


Bëngbe Bëtsa  
Cabëngaftaca  
Entsoyebuambna



New Testament in Camsá

# Bëngbe Bëtsa Cabëngaftaca Entsoyebuambna New Testament in Camsá

copyright © 2009 Wycliffe Bible Translators, Inc.

Language: Camsá

Translation by: Wycliffe Bible Translators, Inc.

## Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### The New Testament

in Camsá

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-05-05

---

PDF generated using Haiola and XeLaTeX on 21 Feb 2024 from source files dated 29 Jan 2022

19104c0e-9046-5ff3-82fb-eb838c88dcf9

## Contents

San Mateo . . . . .	1
San Marcos . . . . .	93
San Lucas . . . . .	149
San Juan . . . . .	242
Hechos . . . . .	312
Romanos . . . . .	401
1 Corintios . . . . .	451
2 Corintios . . . . .	498
Gálatas . . . . .	529
Efesios . . . . .	547
Filipenses . . . . .	564
Colosenses . . . . .	575
1 Tesalonicenses . . . . .	587
2 Tesalonicenses . . . . .	596
1 Timoteo . . . . .	601
2 Timoteo . . . . .	615
Tito . . . . .	624
Filemón . . . . .	630
Hebreos . . . . .	633
Santiago . . . . .	672
1 San Pedro . . . . .	684
2 San Pedro . . . . .	698
1 San Juan . . . . .	706
2 San Juan . . . . .	717
3 San Juan . . . . .	719
San Judas . . . . .	721
Apocalipsis . . . . .	725

## San Mateo

*Jesusbe bēts taitanga*

*(Lc 3.23-38)*

<sup>1</sup> Quemēnga imnamna Jesucristbe bēts taitanga: Jesucristna Rey David y Abrahámbentšana entšá inamna.

<sup>2-6</sup> Abraham yojamna Isaacbe taitá;

Isaacna Jacobēbe taitá

y Jacob, Judá y chabe catsátangbe taitá.

Judá, Fares y Zarabe taitá; y chatbe mamá Tamar yojamna;

Fares Esrombe taitá

y mua Arambe taitá.

Aram Aminadabēbe taitá;

Aminadab Naasonbe taitá

y Naasón Salmonbe taitá.

Salmón Boozbe taitá y muabe mamá Rahab yojamna;

Booz Obedbe taitá y muabe mamá Rut yojamna;

y Obedna Isaíbe taitá.

Isaí Rey Davidbe taitá;

David Salomonbe taitá y muabe mamá yojamna chë Uríasbe shema inamná.

<sup>7-11</sup> Salomón Roboambe taitá;

Roboam Abíasbe taitá

y Abíasna Asabe taitá;

Asa Josafatbe taitá;

Josafat Jorambe taitá

y Joramna Uzíasbe taitá.

Uzías Jotambe taitá,

Jotam Acazbe taitá

y Acazna Ezequíasbe taitá.

Ezequías Manasesbe taitá;

Manasés Amonbe taitá

y Amón Josíasbe taitá.

Josíasna Jeconías y chabe catsátangbe taitá yojamna.

Chë Babilonioca entšanga chë israelitēnga tmojánishēche y choca imojanētámena ora, Josías chë básenga yojánabamna.

<sup>12-16</sup> Ya Babilonioca ndutámenēnga ora;

Jeconías Salatielbe taitá;

Salatiel Zorobabelbe taitá.

Zorobabel Abiudbe taitá;

Abiud Eliaquimbe taitá

y Eliaquimna Azorbe taitá.

Azor Sadocebe taitá;

Sadoc Aquimbe taitá

y Aquimna Eliudbe taitá.

Eliud Eleazarbe taitá;  
 Eleazar Matanbe taitá  
 y Matán Jacobēbe taitá.

Jacob Josebe taitá yojamna y Josena Mariybe boyá.

María Jesusbe mamá, Jesús chë Bëngbe Bëtsabe Uámana  
 Uabuayaná, chë Cristo ca uabainá.

<sup>17</sup> Chcasna, Abrahámbentšana Davidbentscoñe bnëtsana  
 canta bëts pamíllanga imojëftsemna. Davídbentšana y chë is-  
 raelitënga Babilonioca imojanëtamenëntscuana inye bnëtsana  
 canta bëts pamíllanga; y inye bnëtsana canta bëts pamíllanga  
 chë Israeloca entšanga imojanëtamenentšana, chë Cristo to-  
 janonÿnántscöñe.

*Jesucristo tojanonÿná*

*(Lc 2.1-7)*

<sup>18</sup> Jesucristo jónÿnanamna mëntšá tojanopasá: María  
 tbojanšbuachená Joséftaca jobouamayama, pero cabá ndoñe  
 cánÿiñe ibontsiyena ora, tojanopasá Mariyna ngomamaná  
 yojoquéda chë Uámana Espíritbe obenánaca. <sup>19</sup> José, Mariybe  
 boyá, canye nyetsca soyënguiñe tšabá jamama bošá inamna.  
 Cha ndoñe yontseboše entšangbe delante cha mal jaquédana;  
 chíyecna tojanjuabó nye iytëcana Maríybentšana jtsojuánañana.  
<sup>20</sup> Y chca yojtsejuabnantscuana, mo otjenayoquécá canye  
 Bëngbe Bëtsabe ángel tbojáninÿe y chana Josébioye tbojaniyana:  
 “José, Davídbentšana entšá, ndoñe matenócochinÿenana  
 Mariáftaca jobouamayama, er chë bochántsebmna šešona  
 chë Uámana Espíritbe obenánaca cha bochántsebmna. <sup>21</sup> María  
 canye šešona bochántsebmna y cha Jesús ca cochjuabaye.  
 Chca echantsabaina er cha chabe entšanga chëngbe bacna  
 soyënguentšana echanjátsebacaye ca” —chë ángel tbojaniyana.

<sup>22</sup> Lempe chca tojanochnëngo, cachcá chaotsemnama  
 ntšamo Bëngbe Bëtsá chabe juabna oyebuambnayëngbiajana  
 tojanayancá. Chë oyebuambnayá mëntšá tojánayana:

<sup>23</sup> Chë cabá boyabása nduabuatmá ngomamaná echanjo-  
 quéda

y canye šešona boyabásetema bochántsebmna,

y cha mochanjuabaye Emanuel ca.

(Emanuel endayana “Bëngbe Bëtsá bëngaftaca ca”).)

<sup>24</sup> José chë otjénayentšana tojanofšená ora, tojanma ntšamo  
 chë Bëngbe Bëtsabe ángel tbojanmandacá y Mariáftaca to-  
 janobouamá. <sup>25</sup> Pero ndoñe cánÿiñe ibontsaniyena, sinó  
 nye chë šešonatema tojanonÿná orscana. Chë šešonatema  
 tojanonÿná orna, José chábioye Jesús ca tbojanabaye.

## 2

*Reyes Magos Jesúsbioye tmojána*

<sup>1</sup> Herodes judiëngbe rey yojamna ora, canÿe pueblo Judeoca, Belén ca uabáinentše Jesús tojanonÿná. Chentsana, báseftanga, estrellënga uatsjëndayënga, magos ca uabáinënga, canÿe bëts puebloye Jerusalén ca uabáinoe tmojánashjajna. Chënga tmojánabo shinÿe bocanoye luarëngocana. <sup>2</sup> Jerusalenocna chënga, Heródesbioye tmojána y tmojanënoticiá: “¿Ndayentše yojtsemna chë judiëngbe rey jtsemnama tojonÿná cha ca? Bëngbe luarëngoca shinÿe bocanoye chabe onÿnana estrella fsënjinye y as muentše cha jaboadora tífjabo ca.”

<sup>3</sup> Rey Herodes chca tojanuena ora, corente yojtsenócochinÿena, y nÿetsca chë Jerusalenentše oyenëngnaca. <sup>4</sup> Chentsana chë rey tojánachembo nÿetsca chë judiëngbe bachnangbe amëndayënga y chë judiëngbe ley abuátambayënga jenoyeunayëngama. Mëntsá tojanatjá: — ¿Ndayentše chë Bëngbe Bëtsabe Uámana Uabuayaná, chë Cristo ca uabainá, jónÿnama ibomna ca?

<sup>5</sup> Chënga tmojanjuá: —Judeoca, Belén pueblentše ca. Bayté entsemna chë Bëngbe Bëtsabe juabna oyebuambnayá Miqueas mëntsá tojanábema:

<sup>6</sup> Y tsëngaftanga, Judeoca Belenentše oyenënga, canÿe mandayá tsëngaftangbentsana echanjabo. Cha nÿetsca chë Judeoca mándayëngbiana más uamaná echántsemna, y atšbe entšanga Israeloca echántsanÿena. Chíyeca tsëngaftangbe pueblo ndoñe nÿe batšá uámana pueblo quenátsmëna ca.

<sup>7</sup> Chora Herodes iytëcana chë maguënga tojánachembo y cuedádoca tojanatjá ntseco ora chë estrella tmojáninÿama.

<sup>8</sup> Herodes chë soyënga yojtsetátšëmbo ora, Belenoye chë maguënga tojanichamó, y mëntsá tojanëyana: “Choye mot-sajna y tsábá chë šešona šmochjúanguango. Chašmojínÿena ora, šmochjabëuenaye, as átšnaca chayobená jama chë šešona jadórama ca.”

<sup>9</sup> Rey Herodes chë soyënga tojánëyanentšana, chë maguënga tmojtsatanoñe. Chora cachiñe tmojtandinÿe chë chëngbe luarëngoca tmojáninÿe estrella y yojtsanebnatsana chë šešona yojtsemnëntscoñe. Chentsa juatsbuacá chë estrella yojójaiye.

<sup>10</sup> Chë maguënga chë estrella tmojáninÿe orna, corente oyejuayënga imojtsemna. <sup>11</sup> Chë yebnoye tmojánamashjna ora, chë šešona tmojáninÿe chabe mamá Mariáftaca. Chorna, tmojanoshamentšé y chë šešonatema tmojanadorá. Chora chëngbe cajontémënga tmojanëtsécaca y tmojanatštá castellano, inciense y canÿe botamana uanguëtše soye, mirra ca uabáiniye. <sup>12</sup> Chentsana, mo canÿe otjenayoquécá Bëngbe

Bëtsá chë maguënga tojanabuayená rey Herodesbiajana ndoñe chamondesshëcuanama. As chënga chentšana inye benachëjana cachëngbe luarëngoye tmojësanshëcuana.

*Egiptó luaroye tmojtsanachá*

<sup>13</sup> Chë maguënga tmojtsatanoñe ora, otjénayoca José canye Bëngbe Bëtsabe ángelbioye tbojáninye y cha mëntšá tbojaniana: “Motsbaná, chë šešonatema y chabe mamá mesëbiatše y Egiptoye motsachá. Herodes chë šešonatema bochanjánguango jtsóbama, chíyeca choca cochtsoquedañe atše chacbochjábuayenantscuana ca.”

<sup>14</sup> As José tojantsbaná, chë šešonatema y chabe mamá tojesanëbiatše y ibeta Egiptó benache tojëftsanbocna. <sup>15</sup> Y choca imojtsanomñe Herodes tojanóbanëntscuana. Chca tojanopasá, cachcá chaotsemnama ntšamo Bëngbe Bëtsá chabe juabna oyebuambnayabiajana tojanayancá. Chë oyebuambnayá mëntšá tojánayana: “Egiptocana atšbe uaquiñá sënjanchembo ca.”

*Herodes tojanmandá basetémënga jtsëbáyama*

<sup>16</sup> Chë maguënga tmojtsaningñema Herodes tojántatšëmbona ora, puerte tbojánetna, y tojanmandá lempe jtsëbáyama base boyabásetemënga uta uata bomnënga y cabá uta uata ndbomnënga, Belén y chë juachañe pueblënguentsënga. Uta uatama cha tojanjuabó, er uta uata yojtsemna chë maguënga chë estrella tmojáninýama. <sup>17</sup> Ntšamo chë Bëngbe Bëtsabe juabna oyebuambnayá Jeremías tojanoyebuambacá, cachcá tojanochnëngo:

<sup>18</sup> Ramá ca uabaina pueblentše canye oyebuambnayana tmojanuena,

ngmënacá ošachiyana y becá tsetšanánaca oyebuambnayana.

Raquel yojamna chabe básengbiama ošachiyiñe,

pero ndoñe yontseboše chamuatebiajuama,

chabe básenga ya obanënga causa ca —cha tojanábema.

<sup>19</sup> José cabá Egiptoca yojtsoñe ora, Herodes tojanóbana. Chentšana, otjénayoca José canye Bëngbe Bëtsabe ángelbioye tbojáninye y cha mëntšá tbojaniana: <sup>20</sup> “Motsbaná, chë šešonatema y chabe mamá mesëbiatše y Israeloye cochtá. Chë šešonatema jóbama bošënga ya obanënga montsemna ca.”

<sup>21</sup> As José tojantsbaná y chë šešonatema y chabe mamá Israel luaroye tojtésanëbiatše. <sup>22</sup> Arquelao Judeoca yojanmánda chabe taitá Heródesbe cuentiñe, y José chca tojántatšëmbona orna, yojtsauatja choye jama. Pero otjénayoca Bëngbe Bëtsá Josébioye tbojanabuayená; chíyeca Josena Galilea ca uabaina luaroye tojána. <sup>23</sup> Choye tojánashjango ora, José tojána canye pueblo Nazaret ca uabáinoye chentše joyénanama. Chca

tojanochnëngo cachcá chaotsemnana ntšamo chë Bëngbe Bëtsabe juabna oyebuambnayënga tmojanayancá. Chënga tmojánayana: “Nazaretocá ca Jesús mochantsábobaina ca.”

### 3

*Juan chë Ubayaná entsanga yojanabuayiná  
(Mc 1.1-8; Lc 3.1-9, 15-17; Jn 1.19-28)*

<sup>1</sup> Chë tempo, Juan chë Ubayaná, entsanga ndoyena luaroye Judeoca tojánbocna, Bëngbe Bëtsabe soyëngama jábuayenama.

<sup>2</sup> Mëntsá cha yojanëtsësnaye: “Bëngbe Bëtsabe amëndayana ya echanjóshjango. Ngménaca šmochtenójuaboje tšëngaftangbe bacna soyëngama y chca amana šmochtsajbaná y Bëngbe Bëtsabe benache šmochtishache ca.”

<sup>3</sup> Juan yojamna canya ndabiana chë Bëngbe Bëtsabe juabna oyebuambnayá Isaiás mëntsá tojánayana:

Entsanga ndoyena luaroca canya enduáyebuache:

“Bëngbe Utabná echanjabo ca;

mo nda canye benache tojtseprontacá canye uámana entšá jashjanguama,

tšëngaftángnaca cachcá, Bëngbe Utabná jabama ainaniñe tsabe juabnéngaca šmochtseprontana ca” —cha tojánayana.

<sup>4</sup> Juanbe entsayá inauapormana camellbe stjënasheca y bobache yojanasnana. Cha inasaye chapulinatémënga y tjoca tjouangbe méloye. <sup>5</sup> Jerusalenoca entsanga, nyetsca Judea luarentša entsanga y chë Jordán ca uabaina bėjaye béconana oyenënga imojánbocana Juan joyeunayama. <sup>6</sup> Bëngbe Bëtsábioye chëngbe bacna soyëngama jaimpáda chentšana, Juan chë Jordán bėjayiñe chënga yojanëbáyana.

<sup>7</sup> Pero Juan tojáninye ba fariseunga y saduceunga cha chaubáyama tmojánama. Chënga imojamna chë judiëngbeñe uánatsanënga Bëngbe Bëtsá ndoñe corente ntseyeunanama; as chora tojanëyana: “¡Mëtscuaye entsanga! ¿Nda tcmënjáuyana chë echanjóshjango uabouana castigüentšana šmochjotsbocá ca? <sup>8</sup> Bëngbe Bëtsábeñe ndegombre ošbuáchiyënga šmochtsemna, as chca chaotsinyna chë bacna soyënga amana tšëngaftanga ndegombre šmojtšajbanama.

<sup>9</sup> Y ndoñe šmattsejuabnaye cach tšëngaftangbiama jayanama: ‘Abrahábentšana entsanga fsëndmëna ca’. Er atše šcuayana, Bëngbe Bëtsá quem ndëtsbéngacnaca Abrahábentšana entsanga nanjábiana. <sup>10</sup> Chë tatšniá ya entsaprontana chë betiyeshënga tbëtëjëngocana jtseshatëtsetsama. Ndaye betiye ndoñe tontseshajo, jtseshatëtšana y iñoye jtsatmetšana. Tšëngaftangaftácnaca cachcá, tsabe soyënga ndoñe šmontsamëse, Bëngbe Bëtsá cmochanjácastigaye.



11 “Ndegombre, atšna béjayeca cbondubáyana Bëngbe Bëtsabe benache chašmuatishachama. Pero chë atšbe ústonoye echanjabá, atšbiama más obenana bomná comna, y atše merecido taitatobuajoñe ni mo chabe shecochëtjonëshe jtsámbañama. Chë chabe benache aíñe chamojtishachëngbiama Bëngbe Bëtsá echanjama chë echanjabábeyeca, chë Uámana Espíritu chëngbe ainaniñe cháumashënguama. Pero chë benache ndoñe chamontishachëngbiamna, Bëngbe Bëtsá echanjama chë echanjabábeyeca, corente castigánënga chamotsemnama, mo iñeshequécá. 12 Canye entsá chabe mëtštá cucuatšíñe jiyëbana, chabe trigo jtsóbobemana y chë ndoservena shácuanënga jtsejashtsëtsana. Chabe trigo chë grano uaquëcjnaye tsañe jtsabuájua, y chë ndoservena shácuanëngna iñoye jtsatmetšana. Cachcá, chë atšbe ústonoye echanjabana, chë tšabe entsanga echanjúbuaja, y chë bacna entsangna canye iñeshiñe echantsacastígaye, y chë iñe ndocna te queochátsfsana ca” —cha tojanëyana.

*Juan, Jesúsbioye tbojanabaye*

*(Mc 1.9-11; Lc 3.21-22)*

13 As Jesús, Galileocana tojána Jordán béjayoye, Juan yojtsemnoye, cha chabuábayama. 14 Pero Juan ndoñe yontseboše Jesús juabáyama, y mëntšá tbojaniyana: —Atše šontsemna aca chašcuabaye, y ¿más atše aca cbochjuabaye ca?

15 Chora Jesús tbojanjuá: —Morna chca chaotsemna. Entsemna lempe ntšamo Bëngbe Bëtsá tojamandacá jobedésana ca.

As Juan vojouena Jesús juabáyama. 16 Jesús ya uabainá yojtsemna ora, chë buyeshoicana tojtanshëbëbocna. Chorna Jesús tsbanánoye yojontješiye y tojáninýe chë celoca atëfjniñe y chë Uámana Espíritu mo canye palomatemcá chábioye yojtsastjajuana. 17 Chora celocana Bëngbe Bëtsá mëntšá tojánayana: “Mua atšbe bonshana uaquíñá endmëna. Chabiama corente šëntsoyejuá ca.”

## 4

*Jesús tojanobená Satanás jayëñjanama*

*(Mc 1.12-13; Lc 4.1-13)*

1 Chentšana chë Uámana Espíritu entsanga ndoyena luaroye Jesús tbojanánatse, as Satanás chauábama cha jisháchichiyama.

2 Chentše canta bnëtsana te y canta bnëtsana íbeta ntjascá tbojanjëtana; chíyeca chora tbojaneshëntsena. 3 As Satanás tbojanobobeconá y tbojaniyana: —Aca ndegombre Bëngbe Bëtsabe Uaquíñá tcomnëse, momandá quem ndëtšbenga tandëse chaobiama ca.

<sup>4</sup> Pero Jesús tbojanjuá: —Bëngbe Bëtsabe uabemana palabrënguiñe mëntsá endayana: “Entsá nye tandëseca ndoñe vida ntsebomnana, sinó entsá endobena jtsiyenana lempe ntšamo Bëngbe Bëtsá tojayancá tbojtseyeunanëse ca.”

<sup>5</sup> Chentšana Satanás, Jerusalén, chë uámana bëts pueblo ca uabáinoye Jesús tbojanánatse, y chë Bëngbe Bëtsabe bëts yebnentse chë más tsbanánoca tbojanatsá. <sup>6</sup> Chentse Satanás mëntsá tbojaniana: —Aca ndegombre Bëngbe Bëtsabe Uaquiñá tcomnëse, muentšana fshantsoye montsënja, er Bëngbe Bëtsabe uabemana palabrënguiñe endayana: Bëngbe Bëtsá chabe angelënga echanjichamuá, chacmotsinÿenama.

Chënga buacuatsëngaca cmochanjishache, shecuatše ndëtsbeñe ndocá chacondomama ca —cha tbojaniana.

<sup>7</sup> Chora Jesús tbojanjuá: —Cach Bëngbe Bëtsabe uabemana palabrënguiñe mëntsá endayana: “Ndoñe matsbošana acbe Bëtsá chë Utabná bacna soyëngama jacochënguama ca.”

<sup>8</sup> Cabana, Satanás tbojanánatse canÿe bëts tjoye y betscó nÿetsca quem luarentša amëndayëngbenache y chentša nÿetsca uámana soyënga Jesúsbioye tbojaninÿinÿé. <sup>9</sup> As Satanás tbojaniana: —Aca chacojoshëntsamentsé y chašcojadorase, lempe chë soyënga cbochjatštaye ca.

<sup>10</sup> Y Jesús tbojanjuá: —¡Satanás, átsbentšana mojuaná! Bëngbe Bëtsabe uabemana palabrënguiñe mëntsá endayana: “Bëngbe Bëtsá cochtsadorana y nye cha cochtseservena ca.”

<sup>11</sup> As Satanás cachcá tbojanonÿá. Cachora Bëngbe Bëtsábiocana angelotëmënga tmojánabo Jesús jtseservënama.

*Jesús tojanontsé Galileoca chabe trabajo jamana*

*(Mc 1.14-15; Lc 4.14-15)*

<sup>12</sup> Juan chë Ubayaná cárceloye tmojanëtámiamia Jesús tojanuena ora, Galilea luaroye cha tojtaná. <sup>13</sup> Pero ndoñe tonjanoquedá Nazaret pueblentse, sinó Capernaumoca, uafjajónaye tsachañe; choye tojána joyéanama, chë uámana bëts taitata Zabolón y Neftalibe luariñe. <sup>14</sup> Chca tojanochnëngo, cachcá chaotsemnana ntšamo chë Bëngbe Bëtsabe juabna oyebuambnayá Isaías tojanayancá. Isaías tojánayana:

<sup>15</sup> Zabolón y Neftalibe luare, Jordán béjaye chenguánoica, uafjajónaye tsachañe;

Galilea luariñe, ndoñe judío entsanga oyenentše.

<sup>16</sup> Chë mo ibetiñe cuaftsiyencá imojoyena entsanga, Bëngbe Bëtsabe soyënga nduabuatma causa, tmojinÿe canÿa entsangbe juabnënga binÿnayá.

Chë chëngbe juabnënga binÿnayá entsebuashinÿinÿana chë Bëngbe Bëtsábioye nduabuatmëngbiama,

y chë causa chabiamá imomna mo obanëngcá, ndoñe binÿniñe jtsiyenëse ca —cha tojanábema.

<sup>17</sup> Cach orscana Jesús tojanontsé entsanga jábuayenama: “Bëngbe Bëtsabe amëndayana ya echanjóshjango. Ngménaca šmochtenójuaboye tšëngaftangbe bacna soyëngama y chca amana šmochtsajbaná ca.”

*Jesús tojánachembo canta boyabásenga beonga ashebuánayënga cha chamuastama*  
(Mc 1.16-20; Lc 5.1-11)

<sup>18</sup> Canÿe te, Jesús chë Galilea uafjajónaye tsachajana yojtsaye y ndeolpe uta boyabásata tojanÿe: canÿa yojamna Simón, chë Pedro cánaca uabainá, y chabe uabentsá Andrés. Chatna atarraiešhangá ibnetsashbuétsetšañe, er beonga ashebuánayata ibnamna. <sup>19</sup> Jesús tojanëyana: “Atšeftaca mabata; atše cbochanjábiama Bëngbe Bëtsabiamá entsanga anguyata, y morscana nÿe beonga ashebuánayata ya ndoñe quešochátsmëna ca.” <sup>20</sup> Cachora chatbe atarraiešhangá cachcá tbojésanaboshjuana y Jesús tmojanasto.

<sup>21</sup> Y más chcoye, Jesús inÿe uta catšátata tojánanÿe: Santiago y Juan, chë Zebedeobe uaquiñata. Chata ibojtsomñe canÿe barquëshañe, chatbe taitáftaca, chëngbe atarraiešhangá atapórmayinë. Jesús tojánachembo, <sup>22</sup> y cachora chë barquësha tbojésanaboshjona, chë taitá cachentše imojéseboshjona y Jesús tmojanasto.

*Jesús ba entsanga yojanabuatambá y yojánashnaye*  
(Lc 6.17-19)

<sup>23</sup> Jesús nÿets Galilea luarëjana yojánana, chentše judiëngbe enefjuana yebnënguenache abuátambaye. Chë tšabe noticiënga Bëngbe Bëtsabe amëndayama entsanga yojanabuayiná y nÿetsca šocanëngama y tsetšanëngama yojánashnaye. <sup>24</sup> Nÿets Siria luarëjana entsanga cha imojtsebáyana. As entsanga nÿetsca šocana bomnënga Jesúsbiyoye imojtsënachaye: šoquënga y tsetšanana bomnënga, bacna bayëjbe juabna uambayënga, ataque osháchichanënga y jama ndobenënga. Jesús nÿetscanga yojánashnaye.

<sup>25</sup> Mallajta entsanga Galileocana, Decápolis luarocana, Jerusalenocana, Judeocana y chë Jordán béjaye chengvanoicana Jesús imojústona.

## 5

*Ndayá Jesús tjoca tojanabuatambá*

<sup>1</sup> Jesús chë mallajta entsanga tojánanÿe ora, batsjoye tojántsjua y tojanótbema. Chabe ústonënga tmojanobobeconá y <sup>2</sup> Jesús tojanontsé mëntšá jabuátambana:

*Ndëmuanyënga imomna chë ndegombre oyejuayana bomnënga*

*(Lc 6.20-23)*

3 “Puerte oyejuayënga mochántsemna chë Bëngbe Bëtsabe soyënga tša imuajaboto ca juabnayënga. Chca entsänga mochántsemna chë Bëngbe Bëtsabe amëndayoca mochtsiyenënga.

4 “Puerte oyejuayënga mochántsemna chë mondbëtsošachiyënga; chënga Bëngbe Bëtsá entsëjabuáchana ngménaca ndoñe chamondëtsemnama.

5 “Puerte oyejuayënga mochántsemna chë uámanënga ndoñe mondbëtse nobiamnayënga, er chënga mo chëngbe otocana soycá quem luare mochanjójyëngacñe.

6 “Puerte oyejuayënga mochántsemna chë nyetsca soyënguiñe tšabá jamama bošënga. Chëngbe bošana entsemna mo chë oshëntsiyá y uajuendayabe bošancá. Chë nyetsca soyënguiñe tšabá jamama bošënga mochanjobenaye jëftsinÿana lempe ntšamo tmojtsebošcá.

7 “Puerte oyejuayënga mochántsemna chë ínÿengbiamna ongmiayënga, er Bëngbe Bëtsá chëngbiamna bochanjóngmia.

8 “Puerte oyejuayënga mochántsemna chë nÿe tšabe juabnënga ainaniñe bomnënga; chënga Bëngbe Bëtsá mochanjinÿe.

9 “Puerte oyejuayënga mochántsemna chë nyetscanga natjëmbana chamotsiyenama amënga, er chënga Bëngbe Bëtsabe básënga ca mochantsabaina.

10 “Puerte oyejuayënga mochántsemna chë ínÿënga tmojama chamotsesufrínënga, ntšamo Bëngbe Bëtsá yobošcá bétsamama; chca entsänga mochántsemna chë Bëngbe Bëtsabe amëndayoca mochtsiyenënga.

11 “Puerte oyejuayënga tšëngaftanga šmochtsemna, entsänga chacmojoyánguango y chacmojtšëcamena ora y nyetscna soyëngaca chacmojtšëbuayatsenaye ora, atšbe ústonënga bëtsemnama. 12 Móyejuanga, puerte móyejuanga, tšëngaftanga celoca becá šmochanjójyëngacñe. Er ntšamo entsänga tšëngaftanga cmëcamena, cachcá chë Bëngbe Bëtsabe juabna oyebuambnayëngbioye, chë tšëngaftangbe natsana monjanienëngbioye entsänga monjanëcamena ca” —Jesús tojánayana.

*Ošbuáchiyënga jtsemnana mo tamocá y binÿnayënga quem luarentša entsängbiamna*

*(Mc 9.50; Lc 14.34-35)*

13 “Tšëngaftanga, quem luarentša entsänga jtsëjabuáchanëse šmojtšiyena, Bëngbe Bëtsabe soyënga chamotsetatšëmbuama, as chëngbiamna šmochántsemna mo chë mëntšëna ndoñe

chaondóndbemama tcojataboto tamocá. Pero chë tamó fténana tojtsóbemëse, ndoñe ntsopodénana tempcá sanana cachiñe jtëtsmënana. Chca, ya tondayama ntsoservénana; chíyeca chë tamó tsáshenoye jtsëtsenana y entsanga jtsebotájayana.

14 “Tšëngaftanga, ntšamo tšabá yomncá šmojtšiyenëse, as quem luarentša entsangbiana smochántsemna mo chë ibetiñe tojtsebínÿna soycá. Canÿe bëts pueblo batsjo juatsbuañe tomnëse, ndoñe ntsopodénana iytëmencá jtsemnama. 15 Canÿe uajuinÿanësha tcojuajuinÿena ora, ndoñe cajonëshe tajsoye jtsabuájuaama, sinó tsbanánoca juajájuama, chca, nÿetsca entsanga chë yebnentše tmojtsemnëngbiana chaotsebínÿnama. 16 Cachcá tšëngaftanga, entsangbe delante mo binÿnayëngcá šmochtsemna, as chënga tšëngaftanga tšabe soyënga šmuamama chamuinÿama, y chca, chënga chamuinÿanÿé chë Taitá, Bëngbe Bëtsá celoca endmëná, corente uamaná y obená bëtsemnama ca” —Jesús tojánayana.

### *Chë Moisesbe leyama Jesús tojanabuatambá*

17 “Ndoñe šmattsejuabnaye, ntšamo Moisesbe leyíñe iuayancá y chë Bëngbe Bëtsabe juabna oyebuambnayënga tmojanayancá jabëtsepochochocama atše tijabo ca. Atše ndoñe chiyátabo chë soyënga jabëtsepochochocama, sinó jabábuayenama ndayá chë soyënga ndegombre bétsayanama. 18 Ndegombre šcuayana: Celoca y quem luare chaojftsemnëntscuana, ndocná queochatobenaye ni canÿe punto, ni canÿe letra chë leyënguentšana jtsejuánana, lempe ntšamo jochnënguama yomncá chaojtsemnëntscuana. 19 Chíyeca, nda nÿe mo canÿe mando chë leyënguiñe ndoñe tonjoyeuná cha, masque nÿe base soye chë mando tojtsemna, y chë ínÿenga cachcá tojtsabuatambá, cha Bëngbe Bëtsabe amëndayoca chë más nduamaná echántsemna. Pero ndëmuanÿënga tmojtsama ntšamo Bëngbe Bëtsá tojamëndacá y chë ínÿenga cachcá chamotsamama tmojtsabuátambase, chënga Bëngbe Bëtsabe amëndayoca uámanënga mochántsemna. 20 Chë soyëngamna mëntsá šcuayana: Tšëngaftanga chë ley abuátambayënga y fariseúngbioye ndoñe šmontsayëñanase, jtsamama ntšamo Bëngbe Bëtsá tcmojamëndacá, ndocna te Bëngbe Bëtsabe amëndayoye quešmochátamashjna.

### *Ndayá chë ínÿëngaftaca tbojetnama Jesús tojanabuatambá*

21 “Tšëngaftanga šmojouena ntšamo Bëngbe Bëtsá tšëngaftangbe bëts taitanga tojanamëndacá: ‘Ndoñe catjóba ca. Chca ochjajnayá bontsemna jobuambayana chë entsangbiana tšabá o ndoñe tšabá tmonjamama endbayanabe delante, ndáyeca chca ca.’ 22 Pero atše

šcuayana, nda cachabe catšátaftaca tbojetna, chánaca bontsemna jobuambayana chë entšangbiana tšabá o ndoñe tšabá tmonjamama endbayanabe delante, ndáyeca chca ca. Nda cachabe catšátbïoye puerte tbojtsáboyënja, cha bontsemna chë Sanedrín ca uabaina mándayëngbe delante jobuambayana ndáyeca chca ca; y nda cachabe catšatbïama opjema ca tojayana, ntšamo cha bétsamama, cha bontsemna chë infiernoca iñeshoye jama.

23 “Chíyeca, nderado ndayá Bëngbe Bëtsabe bëts yebnoye tcojuamba Bëngbe Bëtsá jëtschuayama y chora tcojenojuabó acbe catšata ácaftaca etonaná yojtsemna ca, 24 as chë tcojiyëbo soye chë altarentša natsanoica cochjéseboshjona, cochtá y acbe catšátaftaca cochtenoyántsia. Chentšana cocayé altaroye cochjá y chë tcojuamba sóyeca Bëngbe Bëtsá cochjëtschuaye.

25 “Nderado nda tcmojademanda y cabildoye jotsánama cmojtsemna, cabá choye ndáshjango ora, betscó cháftaca cochtenoyántsia. Chca ndóñese, chë demandayá mandádbïoye cmochanjúshjango, chë mandado josticiëngbe cucuatšïñe cmochanjáboshjona y chënga cárceloye cmochanjutame. 26 Ndegombre cbëyana: Chentšana ndoñe quecochtëtsbocna lempe candesopagantscuana ca” —Jesús tojánayana.

*Chë boyá o shémbïoye ínÿaftaca íngñayama Jesús tojanabu-atambá*

27 “Tšëngaftanga šmojouena ntšamo Bëngbe Bëtsá tojanmandacá: ‘Acbe boyá o acbe shémbïoye ínÿaftaca ndoñe catjaíngña.’ 28 Pero atše cbëyana: Nderado canÿe boyabása ndëmuanÿe shembásabïoye tbojinÿe y tojajuabó ‘malaye cha ca’, chë boyabása chca tojajuabose, ainanoca ya chë inÿe shembásaftaca cachabe shémbïoye tbojtseingñé.

29 “Chíyeca, nderado acbe catšbïoica bomínÿeca bacna soye tcojinÿe y cachca soye tcojamëse, más tšabá nántsemna chë bominÿe cochtsenobuchjatsëca y cochtsëtšena. Nÿets cuerpo jtsebomnana y lémpca infiernoye jama chacmotsëtšenamna, acbïama más tšabá nántsemna nÿe canÿe soye acbe cuerpentšana chacoperdé. 30 Nderado acbe catšbïoica cucuatšëca bacna soye tcojamëse, más tšabá nántsemna chë cucuatšë cochtsenástjango y cochtsëtšena. Nÿets cuerpo jtsebomnana y lémpca infiernoye chacmotsëtšenamna, acbïama más tšabá nántsemna nÿe canÿe soye acbe cuerpentšana chacoperdé ca” —Jesús tojánayana.

*Chë bouamnata enëtšanama Jesús tojanabuatambá  
(Mt 19.9; Mc 10.11-12; Lc 16.18)*

31 “Mëntsánaca leyïñe enduábemana: ‘Ndëmuanÿe boyá chabe shémaftaca tbojtsenëtšena, chë boyá bontsemna chabe shema

canÿe tsbuanácha juiiyana, ndayéchañe chaotsayana cha ya ndoñe chabe shema yontsemna ca.’<sup>32</sup> Pero atše cbéyana: Nda chabe shémaftaca tbojtsenétšena y chca tojopasá ndoñe chë shema ínÿaftaca tbontseingñé causa, as chë boyá jtsamana cha chabotseingñema, chë shema ínÿaftaca tojtóbouamase. Y nda chë útšena shémaftaca tojtobouamá, chana canÿe uabuatmá jtsebomnana, y chca, chë tsëm boyánaca canÿe bacna soye jamana ca” —Jesús tojánayana.

### *Chë entsanga júrayama Jesús tojanabuatambá*

<sup>33</sup> “Tšëngaftanga šmojouena ntšamo tšëngaftangbe bëtš taitángbioye tmojanëyancá: ‘Nderado tcojayana: De Dios chë soye chanjama ca; ojal chë soye ndoñe catjama ca.’<sup>34</sup> Pero atše cbéyana: Tondayama šmattsejúraye; ni celocama, er choca Bëngbe Bëtšabe tbemaniñe endmëna. <sup>35</sup> Ni quem luarama, er Bëngbe Bëtšabiamama mo tšenëtemcá endmëna, chiñe chabe shecuatšënga jacjayama; ni Jerusalenama, er chë pueblo endmëna Bëngbe Bëtšá chë Bëtš Reybe bëtš pueblo. <sup>36</sup> Ni tšëngaftangbe bestšašama cach ndoñe, er tšëngaftanga ndoñe quešmátobena ni mo canÿe stjénashe ftsenguëshe o fjantsëshe jabemana. <sup>37</sup> Tšëngaftanga aíñe ca jayanama šmojtsebošëse, nÿe aíñe ca šmochjayana, y ndoñe casna nÿe ndoñe. Ndayá chentšana más šmojatichamo soye, Satanásbiocana jtsóbocanana ca” —Jesús tojánayana.

### *Chë entsanga mondbátenachnënguama Jesús tojanabuatambá (Lc 6.29-30)*

<sup>38</sup> “Tšëngaftanga šmojouena ntšamo tšëngaftangbe bëtš taitángbioye tmojanëyancá: ‘Nderado nda tcmojtsebuchjatsëca, ácnaca derecho contsebmna canÿebé cha jëtšbuchjátsëcama ca; y nderado nda canÿe juatsaše tcmojtsásiye, ácnaca derecho contsebmna cánÿëse cha jtašiyama ca.’<sup>39</sup> Pero atše cbéyana: Ndoñe matsbošana chë ndayánaca tcmojaborlábioye jtachnënguama; chamna, ndánaca catšbioica tcmojajuebiantšetase, cochjomiye chë ínÿoica cachcá chacmomama. <sup>40</sup> Nderado nda tcmojademandá y tojtseboše acbe shabuanguañjua jtsabocñama, cha molesenciá acbe quëšsaíyanaca chauetsácñama. <sup>41</sup> Nderado nda tcmojuasmá y tcmojamandá bnëtsana cuadroca juyambama, inÿe bnëtsana cuadroca cochjuyamba. <sup>42</sup> Nda ndaye soye tcmojotjañëse, cochjatštaye; y nda ndaye soye tcmojuatjase, cha ndoñe stëtšoye catjaquëda ca” —Jesús tojánayana.

### *Chë uayayëngbiamama bonshánana jtsebomnana (Lc 6.27-28, 32-36)*

43 “Tšëngaftanga šmojouena ntšamo tšëngaftangbe bëts taitángbioye tmojanëyancá: ‘Acbe amigo cochtsebobonshana y acbe uayayá cochtsaboyënja ca.’ 44 Pero atše cbëyana: Tšëngaftangbe uayayënga šmochtsababuánÿeshana, y chë cmëcamenëngbiama Bëngbe Bëtsá šmochtseimpadana. 45 Chca tšëngaftanga, chë Taitá, Bëngbe Bëtsá, chë celoca endmënabe básenga šmochántsemna; Bëngbe Bëtsá endbëtsama tšabe y bacna entšángbeñe chabe shinÿe chaotsebinÿayama, y endbëtsama chë nÿetsca soyënguiñe tšabá jamama bošënga y ndoñe chca entšángbeñe chauaftema. 46 Tšëngaftanga nÿe chë tšëngaftanga tcmojtsababuánÿeshanënga šmojtsababuánÿeshanëse, ¿Bëngbe Bëtsábiocana ndayá šmochjuacaná? Romocama crocénana entšángbioye atjanayëngnaca chca monduamana. 47 Y nÿe chë amiguëngbioye šmojtsacheuanase, ¿ndaye bëts soye šmojtsama? Chë ndoñe judiëngnaca chca mondbëtsama. 48 Tšëngaftangbe Taitá, Bëngbe Bëtsá celoca endmëná, nÿetsca tšabe soyënga bomná y amá endmëna. Tšëngaftángnaca cachcá šmochtsemna ca” —Jesús tojánayana.

## 6

*Jesús tojanabuatambá ntšamo tšabe soyënga ínÿengbiama jamana*

1 “Cuedado šmochtsebomna ndoñe ntsamama entšángbeñe tšëngaftangbe tšabe soyënga, nÿe chënga chca chamuinÿama. Chca šmojamëse, tšëngaftangbe Taitá, Bëngbe Bëtsá, celoca endmëná ndocna uacanana soye quecmochtétatšataye.

2 “Chcasna, nderado nda caridá tcojábemëse, chca ndoñe šmatjama chë ntšamo šmojtsamama nÿetscanga chamotsetatšëmbuama, mo canÿe trompetéñjua cuaftsajatëtancá, chë caridá šmojábemama chaotsótatšëmbuama; chca monduamana chë bacna entšanga chë ntšamo ndegombre tmojuabnacá ndinÿinÿayënga, chë judiëngbe enefjuana yebnënguenache y tsáshenañe. Ndegombre cbëyana, chë chca amënga ya chëngbe uacanana soye tmojóyëngacñe, ntšamo chënga tmojamama entšanga tšabá chëngbiama tmojtsoyebuambná ora. 3 Chcasna, nda caridá tcojábema ora, ndocná más chaondëtsetatšëmbo, mo chë uañicuayoica cucuatše ndoñe queondbatstatšëmbcá ndayá chë catšbioica cucuatše tojtsamama, 4 chca, acbe caridá iytëcana chaotsemnana. As, tšëngaftangbe Taitá, nda bominÿe endbëtsequëcnaye chë iytëmencá tcojtsama soye, acbe uacanana soye cmochántatštaye ca” —Jesús tojánayana.

*Jesús tojanabuatambá ntšamo Bëngbe Bëtsáftaca jencuéntana (Lc 11.2-4)*



<sup>5</sup> “Bëngbe Bëtsáftaca šmojtsencuénta ora, ndoñe šmattsama chë bacna entsanga ntšamo ndegombre tmojuabnacá ndinÿinÿnayëngcá. Chënga corente jtsogusetánana chë judiëngbe enefjuana yebnënguenache tsanana y tsashená tsëntsaca Bëngbe Bëtsáftaca jtsencuéntayana, chca, nÿe entsanga chë soye chamuinÿama. Ndegombre šcuayana: chënga nÿe morscama ya montsábouacanána, chënga tšabá imojtsama ca entsanga tmojayana ora. <sup>6</sup> Pero aca Bëngbe Bëtsáftaca jencuéntama orna, acbe tsoye cochtamáshëngo, bësása cochtatame y cháftaca cochjencuénta. Chánaca chë iytëmentšë ácaftaca echántsemna. Bëngbe Taitá lempe bominÿe endetsequëcñá, masque cánÿenga šmojtsemna ora šmojtsama soyëngnaca. As Bëngbe Bëtsá, chca cháftaca chacojtsencuénta ora, cachá acbe uacanana soye cmochántatštaye.

<sup>7</sup> “Bëngbe Bëtsáftaca šmojtsencuénta ora, ndoñe nÿe cachcá ndoservena palabrenga ba soye šmattsichamo. Chca mondbétsama chë Bëngbe Bëtsábioye nduabuátmënga. Chënga jtsejuabnayana becá chca tmojtsichámëсна, Bëngbe Bëtsá chënga más yochjóyaunaye ca. <sup>8</sup> Ndoñe chëngcá šmattsemna. Cabá nduyana ora, Bëngbe Bëtsá ya jtsetatšëmbuana ntšamo tšëngaftanga cmojtsëjbotcá. <sup>9</sup> Chamna tšëngaftanga mëntšá cmontsëtocana Bëngbe Bëtsáftaca jencuéntana:

Bëngbe Taitá, celoca icotsomñe.

Acbe uabaina chë más uámana uabainana chauesomñe.

<sup>10</sup> Acbe amëndayana chaóshjango.

Celoca yojtsemna ntšamo icobošcá;

quem luaríñnaca cachcá chaotsemna.

<sup>11</sup> Mënté šmiyatšatá cada te šnetsëjaboto tandëse.

<sup>12</sup> Bacna soyënga bënga fsënjama: šmotsaperdónaye;

cachcá ntšamo chë bëngbiana bacna soyënga amënga fsëndbetsaperdonaycá.

<sup>13</sup> Bacna soyënga jamama šojocochëngo ora, šcochjujabuache chca ndenobuíyama.

Nÿetsca bacna soyënguentsána šmatsebacaye.

<sup>14</sup> “Chë tšëngaftangbiana bacna soyënga amënga šmojtsaperdónasna, Bëngbe Taitá chë celoca endëtsomñá, tšëngaftanga cmochanjáperdonaye. <sup>15</sup> Pero chë tšëngaftangbiana bacna soyënga amënga ndoñe šmontsaperdónasna, Bëngbe Taitá cachcá, tšëngaftanga ndoñe quecmochátaperdonaye ca” —Jesús tojánayana.

*Chë Bëngbe Bëtsáftaca jencuéntama tondaye ntjascá*

<sup>16</sup> “Y nderado tšëngaftanga inÿe ora tondaye ntjascá šmojtsemna Bëngbe Bëtsáftaca jencuéntama, juebëngmënënga ndoñe šmattsemna, ntšamo chë bacna entsanga chë

ndegombre tmojuabnacá ndinÿinÿnayënga mondbetsamcá, as chca, chënga imojtsayúnama entšanga chamuinÿama. Ndegombre šcuayana, chëngbe uacanana soye ya tmojóyëngacñe, chënga tmojayunáyeca entšanga tšabá chëngbiama tmojtsoyebuambná ora. <sup>17</sup> Aca nderado tcojtsayúna ora, cochtsojuebjabebiye y aceitíyeca botamana cochtenochquëca, <sup>18</sup> as chca, entšanga ndoñe chamondëtsetatšëmbo aca tondaye ntjascá cojtsemnana. Nÿe acbe Taitá, lempe chë mo iytëmencá yomna soyëngama tatšëmbuá, chama echántsetatšëmbo. Y cha, chë iytëmencá tcojama soye bominÿe endbetsequëcñayá, acbe uacanana soye cmochántatštaye ca” —Jesús tojánayana.

*Chë celoca bomnana*  
(Lc 12.33-34)

<sup>19</sup> “Bomnana quem luarentše ndoñe šmattsëjuabaye. Muentšna chë mejojón y inÿe pochócaye soyënga lempe jtsendbiamana, chë atbëbanënga jtsamashjnana y chë juabana soyënga jesatbëbana. <sup>20</sup> Más tšabá tšëngaftangbiama entsemna, mora quem luarentše tšabe soyënga šmojtsamamna, uacanana soyënga celoca chaotsójuabaye. Chentše ni chë mejojón, ni chë inÿe pochócaye soyënga acbe soyënga quemochatspochóca, ni atbëbanënga quemochátamashjna jatbëbama. <sup>21</sup> Er chë ndayentše acbe bomnana tojtsemnentša soyëngama acbe ainánaca cochántsejuabnaye ca” —Jesús tojánayana.

*Chë cuerpama uajuinÿanësha*  
(Lc 11.34-36)

<sup>22-23</sup> “Acbe bominÿe tšabá totsomñëse, mo canÿe uajuinÿanëshacá acbe cuerpama jtsemnana, chíyeca aca jtsobenana ntšamo tcojtsamcá chë bominÿyeca jtsonÿayana. Chë bominÿe ndoñe tšabá tontsemnëсна, chë bominÿe tondaye ntsobenana jamana, ntšamo tcojtsamcá chacobená jinÿama. Cachcá, acbe ainaniñe tšabe juabnënga tcojtsebomnëse, lempe ntšamo chacojtsamcá tšabá echántsemna. Y acbe ainaniñe ndocna tšabe juabnënga tcontsebomnëсна, lempe ntšamo chacojtsamcá ndoñe tšabá queochátsmëna. Y chca, aca cochantsiyena soyënga jtsamëse mo puerta ibetiñcá ca” —Jesús tojánayana.

*Chë Bëngbe Bëtsabiama bonshánana o chë nÿe quem luarentša soyënga jtsebošana*  
(Lc 16.13)

<sup>24</sup> “Ndocná ntsobenana uta mandayata jtsaservénana: cánÿabioye bochantsáboyënja y chë ínÿabioyna bochántsebobonshana, o cánÿabiama tšabá echántsetrabajaye y

chë ínÿabiamna ndoñe tšabá. Ndoñe quecátobena Bëngbe Bëtsá jtsebobonshánana, nÿe quem luarentša soyënga jtsebomnama yapa tcojtsebošëse ca” —Jesús tojánayana.

*Bëngbe Bëtsá chabe básenga jtsanÿenana  
(Lc 12.22-31)*

25 “Chcasna atše šcuayana: Ndoñe šmattsenócochinÿena ndayá šmochjase o šmochjofšiye vida jtsebomnama, ni ndaye entšayá šmochjuíchëtjuama cach ndoñe. Ndegombre, vida chë sanama más enduámana y cuerpo chë entšayama más. 26 Smochjanÿe chë shloftšënga jtsongüefjnayana. Chënga tondaye ntjájena, ni jaja saná ntjátbanana, ni chë grano uaquëcjnaye yebnënguiñe quemnatsquëcjná; pero Bëngbe Bëtsá, celoca endmëná, chënga saná jtsatsatnayana. ¡Y tšëngaftanga chë shloftšetëmëngbiama puerte más šmonduámana! 27 Masque chca endmëna, canÿa masque tša tojtsenócochinÿena, ¿ntšamo nanjobenaye jamana chë ntsachetšá vida yochtsebomnentšana, canÿe hora vida más jabotiyana?

28 “Y ndayá šmochjuíchëtjuama, ¿ndáyeca šmojtsenócochinÿena? Smochjinÿe chë jajañe lirio uantšefjushangá jtsajuajnana: ndoñe ntsetrabájayana, ni ntseshabiamnayana. 29 Pero atše cbëyana, ndegombre ni mo Rey Salomón nÿetsca chabe bomnánaca nÿetšá botamana mo chë lirio uantšefjushangacá quenjatspormana. 30 Bëngbe Bëtsá tša botamana shácuana tojuama, y chë shácuana mënté jajoca jtsamnana, yëfsana iñoca. Chca chë shácuana cha tojamëse, ndegombre tšëngaftangbiámna Bëngbe Bëtsá echanjama entšayá chašmotsábomnama, jentsanga nÿe batšá Bëngbe Bëtsábeñe ošbuáchiyënga! 31 Ndoñe šmattsenócochinÿena, mëntšá jtsichámëse: ‘¿Ndayá mochjase?’ o ‘¿Ndayá mochjofšiye?’ o ‘¿Ndayá mochtichëtjo ca?’ 32 Chë soyëngama, chë Bëngbe Bëtsábioye nduabuátmënga mondbétsenocochinÿena, pero tšëngaftanga ndoñe. Tšëngaftangbe Taitá, Bëngbe Bëtsá, ndayá cmojtsëjabortama endëtatšëmbo. 33 Chíyeca, tšëngaftangna natsana šmochjshëtseboše Bëngbe Bëtsá tšëngaftangbe ainaniñe chaotsemándama y lempe ntšamo cha tojamandacá šmochtsama. Chca šmojamëse, Bëngbe Bëtsá lempe ntšamo cmojtsëjabortcá cmochanjátšataye. 34 Ndoñe matenócochinÿenana ndayá yëfse yochjochnënguama. Yëfse luare cochántsebmna chë soyënga jinÿama y jamama. Cada tescama endbëtsemna yapa totcá soyënga jájandmanama ca” —Jesús tojánayana.

## 7

*Ndoñe ntsichámuana chë ínÿenga tšabá o ndoñe tšabá tmonjamama*

*(Lc 6.37-38, 41-42)*

<sup>1</sup> “Ndocá ínÿengbiama šmattsichamo chë ndoñe tšabá tmontsamama. Chca, Bëngbe Bëtsá ndoñe queochátichamo tšëngaftanga ndoñe tšabá šmonjama ca. <sup>2</sup> Chë ntšamo tšëngaftanga ínÿengbiama šmojtsichamcá tšabá o ndoñe tšabá tmontsamama, cachcá Bëngbe Bëtsá tšëngaftangbiama chë ntšamo šmojamama echántsichamo. Y ntšamo ínÿengbioye chašmojábiama, uabouana o ndoñe jabuache soyënga, cachcá Bëngbe Bëtsá tšëngaftangbioye cmochanjábiama.

<sup>3-5</sup> “Nderado canÿa chabe bominyiñe canÿe niñëfja tojtse-bomñese, cha ndoñe ntsoobenana chabe catšata jauyanama: ‘Acbe bominyentsana canÿe polvështema jtsebuchjâtsëcana šmolesenciá ca’. Natsana cha bontsemna cachabe bominyentsana chë niñëfja jtsebuchjâtsëcana tšabá jinÿama jobenayama, chabe catšatbe bominyentsana polvështema jtsebuchjâtsëcana. Cachcá entsemna acbiama, jbacna entšá chë ntšamo ndegombre tcojuabnacá ndinÿinÿayá!, chë tša bacna soye cojtsama ca acbe catšata tcojauyana ora, cachaca tša bëts bacna soyënga cojtsamama ntjenojuaboycá; y chca, aca jamana canÿe bacna soye. Natsana cmontsemna chë cachaca ndoñe tšabe soyënga cojtsamama ngmënaca jshatenójuaboyana y chca amana jtsajbanana, y chentšana cocayé cochantsobena acbe catšata juajabuáchana ntšamo tšabá yomncá chaotsamama.

<sup>6</sup> “Chë Bëngbe Bëtsabe soyëngama josértama ndëboše entšanga ndoñe šmattsabuayiynaye. Aññese nántsemna mo chë Bëngbe Bëtsabe bëts yebnoca uátšëmbona mëntsena quešënga cuaftsëbuajocá; chorna chënga jobuértanana, jobotjajuana y jtsáshantsana. O mo chë uámana ndëtsëtémënga cotšëngbioye cuaftsëtsancá, chënga nÿe jtsebotájayana ca” —Jesús tojánayana.

*Šmochjotjañe, šmochjánguango y šmochjachembo*

*(Lc 11.9-13; 6.31)*

<sup>7</sup> “Šmochjotjañe y Bëngbe Bëtsá cmochanjátsataye; šmochjánguango y šmochanjínÿena; šmochjachembo y bëšáša cmochanjébëtafjo. <sup>8</sup> Er ndánaca tojtsotjanañá, jóyëngacñana; y nda tojtsenguá cha, jónÿenana; y nda tojtsechembuanábioye jebiatëfjuana.

<sup>9</sup> “¿Ndëmuanÿe boyabása tšëngaftanguentsá, canÿe tandëse chabe uaqiñá tbojtsotjanañe ora, canÿe ndëtsbé chábioye buanjatštaye? <sup>10</sup> ¿O canÿe mëtscuaye buanjatštaye, beona tbojtsotjanañe ora? <sup>11</sup> Y chca, tšëngaftanga, bacna soye

amënga, tšëngaftangbe basetëmënga tšabe soyënga jatšatayama šmojtsamanëse, ¡más tšëngaftangbe Taitá, Bëngbe Bëtsá celoca endmëná, chë tmojtsotjanañënga tšabe soyënga echanjátšataye!

12 “Inyëngaftaca šmochtsama ntšamo chë ínÿënga tšëngaftangftaca chamotsamama šmojtsebošcá. Chca endmëna ntšamo Moisesbe leyíñe y chë Bëngbe Bëtsabe juabna oyebuambnayëngbe buatëmbana soyënguiñe endayancá ca” —Jesús tojánayana.

*Chë base utëntšá bësásá*  
(Lc 13.24)

13 “Chë base utëntšá bësásajana šmochjámashjna. Chë utëntšá bësásajana y chë paselo jóyënama benache, infiernoye cmochanjuánatse y banga chëjana mondámashjuana. 14 Chë tšabe vida binÿnoye jamna base utëntšá bësásajana endmëna y ndoñe paselo jóyënama benache, y chiñe báseftanga mondbínÿëna.

*Chë Bëngbe Bëtsabe ndoñe ndegombre juabna oyebuamb-nayënga*  
(Lc 6.43-44)

15 “Cuedado šmochtsebomna chë Bëngbe Bëtsabe ndoñe ndegombre juabna oyebuambnayëngbiama. Chëngna mo oveshëngcá tšëngaftangbioye mochanjabo, pero ndegombre chënga mondmëna mo tšátjaye tjañe quešëngcá. 16 Tšëngaftanga betiyënga jtsabuatmana ntšamo cada ona tojtseshajcá; cachcá tšëngaftanga chcanga šmochantsëbuatma, ndayá chënga mochtsamama. Uchmašëshe betiyentsana ndoñe uvas ntjuátabebiana, ni higuëbé cardo betiyentsana. 17 Chca, nÿetsca tšabe betiyíñe tšabe soye jashájonana; y chë ndoñe tšabeshiñna podësca soye. 18 Canÿe tšabe betiyíñe quenátopodena podësca soyënga jashájonana, ni canÿe ndoñe tšabe betiyíñe tšabe soyënga jashájonana. 19 Ndaye betiye podësca shajuanëshe jtseshatëtšana y iñoye jtsatmetšana. 20 As chca tšëngaftanga chënga šmochantsëbuatma, ndayá chënga mochtsamama ca” —Jesús tojánayana.

*Bëngbe Bëtsabe amëndayoye ndoñe nÿetscanga jamashjnana*  
(Lc 13.25-27)

21 “Ndoñe nÿetscanga chë ‘¡Utabná! ¡Utabná ca!’ atše šmojtsatsëtsnanga, Bëngbe Bëtsabe amëndayoye quemochátamashjna. Nÿe ntšamo atšbe Taitá, celoca endmëná, tojtsebošcá amëngna aíñe. 22 Quem luare jopochócama te banga atše šmochanjauyana: ‘¡Bëngbe Utabná! ¡Bëngbe Utabná! Aca jótšëmbonëse, áceñe betsošbuáchema, bënga fsëndoyebuambná, y ácbeyeca bacna bayëjëngbe juabna

entsángbentsána fsëndëtabocana, y ácbeyeca bëts soyënga fsëndama ca.' <sup>23</sup> Chora atše chanjójuae: 'Ndocna te checbaisëbuátmana. Atšbentsána mojuánanga, bacna soye ama entsanga ca' " —Jesús tojánayana.

*Chë uta ucuatjoniñe*

*(Mc 1.22; Lc 6.47-49)*

<sup>24</sup> "Chcasna, nda atše šojoyeuná y chë ntšamo sentsichamcá tojtsama, endmëna mo canye tšabá juabnaye boyabasacá. Chë boyabásana ndëtšbeñe chabe yebna yojajebo. <sup>25</sup> Uaftena yojuáshjango, chë béjayënga yojóftjajna, chë yebnoye puerte yojtsebinyiaye, pero chë yebna ndoñe ntjuáshajayana, chë yebna ndëtšbeñe inajéboyeca. <sup>26</sup> Pero nda atšbe palabra tojouena y ntšamo sentsichamcá ndoñe tontsama, endmëna mo canye ndëjuabnaye boyabasacá. Chë boyabásana chabe yebna cascajuñe yojajebo. <sup>27</sup> Uaftena yojuáshjango, chë béjayënga yojóftjajna, chë yebnoye puerte yojtsebinyiaye y chë yebna uabouancá yojtsáshajaye ca" —Jesús tojánayana.

<sup>28</sup> Jesús chë soyënga jóyebuambayama tojanpochocá ora, chë entsanga ojanánënga imojtsemna ntšamo cha tojánabuatambama. <sup>29</sup> Jesús tojanabuatambá nyets obenánaca, mo canya mando bomnacá y ndoñe nye mo chë ley abuatambayëngcá.

## 8

*Jesús, canya bacna nguayanánaca šocábioye tbojanshná*

*(Mc 1.40-45; Lc 5.12-16)*

<sup>1</sup> Jesús tjoicana tojtantsmá ora, ba entsanga tmojanasto. <sup>2</sup> Chora canye boyabása bacna nguayanánaca šocá Jesúsbioye tojanobeconá, chabe delante yojoshamentšiye y tbojaniyana: —Utabná, aca tcojtsebošëse, catjobenaye atšbe šocana jtsebojuánana ca.

<sup>3</sup> As Jesús tojanacuenyanëjaná, chë boyabásabioye tbojánbojajo y tbojaniyana: —Aíñe, sëntseboše. Socana cbotsebojuaná ca.

Y cachora chabe šocana tbojtsanóbojuanañe. <sup>4</sup> Jesús chë shnanábioye tbojaniyana: —Mouena, ndocnábeñe cattse-cuëntaye; nye chë Jerusalenoca báchnëbioye motsa, y cha cochjinjinyiye mora aca ya tšabá cojtsatsmënama. Bayá cocht-sambaye, Bëngbe Bëtsá chama jëtschuayama, ntšamo Moisés tojëftsanmandacá, as chca nyetscanga chamotatsšëmbona mora aca y ndoñe šocá contsemnama ca —Jesús tbojaniyana.

*Jesús canye Romano soldadëngbe amëndayabe bochich-nayábioye tbojanshná*

*(Lc 7.1-10)*

<sup>5</sup> Jesús Capernaumoye tojánamashëngo ora, canÿe Romano soldadëngbe amëndayá Jesúsbioye tojanobeconá canÿe pavorama jaimpádama. <sup>6</sup> Jesúsbioye tbojaniyana: —Utabná, atšbe bochichnayá yebnoca šocá entsemna, jama ndoñe quenátobena y jabuache tsetšanánaca entsobësná ca.

<sup>7</sup> Chora Jesús tbojanjuá: —Cha jáshnama chanjá ca.

<sup>8</sup> As chë soldadëngbe amëndayá tbojaniyana: — Señor, atše mercedo taitatobuajoñe atšbe yebnentše chacuamashënguama; nÿe mayana y atšbe bochichnayá tšabá echántsatsmëna. <sup>9</sup> Atšbioye mándayënga atše sëndábamna y átšnaca soldadëngbe amëndayá sëndmëna. Atše canÿe soldado stjauyana “motsa ca”, cha cachora jana; y inÿa stjauyana “mabo ca”, cha cachora jabana; y nderado atšbe bochichnayá ndayánaca chaomama stjamánda, chánaca cachora chë soye jamana ca —cha tojánayana.

<sup>10</sup> Jesús chca tojanuena ora, tojanenjnaná y chë ústonënga tojanëyana: —Ndegombre cbëyana, ni mo nÿets Israe-lentše ni canÿa quem boyabasacá Bëngbe Bëtsábeñe nÿetsá ošbuachiyá chiyátinÿena. <sup>11</sup> Y šcuayana, shinÿe bocanoicana y shinÿe uenatjëmbambanoicana bëtscá entšanga mochanjabo, y Abraham, Isaac y Jacob, chë judiëngbe tempsca uámana bëts taitángaftaca mochanjotbiamá Bëngbe Bëtsabe amëndayoca, cánÿiñe juasama. <sup>12</sup> Ba Israeloca entšanga, chë ndëmuanÿengbiamá Bëngbe Bëtsabe amëndayana natsana yochtsanmëna, chocana mochantëbuacana chë ndëbinÿna lu-aroje, infiernoye. Chentše puerte mochanjenóbošachna y chë tsetšanama juatsašënga mochantsenoftëšjojnaye ca — Jesús tojánayana.

<sup>13</sup> Chora Jesús chë soldadëngbe amëndayábioye tbojaniyana: —Acbe yebnoye motsatá y chë ntšamo cojtsošbuachecá cachcá chaotsemna ca.

Cachora chë bochichnayá tšabá yojtsatsmëna.

*Jesús, Pédrëbe uambén mamábioye tbojanshná*

*(Mc 1.29-31; Lc 4.38-39)*

<sup>14</sup> Chentšana Jesús, Pédrëbe yebnoye tojána. Chentše Pédrëbe uambén mamá šocá calentóracá yojtsejutsnajona.

<sup>15</sup> Chora Jesús chë uambén mamabe cucuatše tojánbojajo y cachora chë calentora tbojtsanóbojuanañe. Chorna chë uambén mamá tojtantsbaná y tojanontšë chënga jobuácuedana.

*Jesús ba šoquënga tojanashná*

*(Mc 1.32-34; Lc 4.40-41)*

<sup>16</sup> Chë te jaibétatama ora, Jesús yojtsemnoye banga bacna bayëjëngbe juabna uambaye entšanga tmojanënatše. Chora, nÿe canÿe Jesús jóyebuambayëse chë bacna bayëjënga imojt-saisebocana y nÿetsca šoquënga tojanashná. <sup>17</sup> Chca Jesús

tojanma, cachcá chaotsemnama ntšamo chë Bëngbe Bëtsabe juabna oyebuambnayá Isaías tojanayancá. Cha mëntšá tojánayana: “Cha bëngbe šocanënga tonjaftsanca y bëngbe nyetsca tsetšanana chábeñe tonjanoquedá ca.”

*Chë Jesús juastama bošënga*

*(Lc 9.57-62)*

<sup>18</sup> Jesús tojánanÿe mallajta entsanga chabe shëconana; as tojanmandá uafjajónaye chenguana jama. <sup>19</sup> Chorna, canÿe ley abuatambayá Jesúsbioye tbojanobobeconá y tbojaniyana: —Buatëmbayá, atše sëntseboše aca juastama, ndëmoye chacojtsá choye ca.

<sup>20</sup> As Jesús tbojaniyana: —Chë zorrënga mondbomna cuevëshënga ndayentše jtsiyenama y chë shloftšëngna uajajonëshangá, pero chë Bëngbe Bëtsá Entšá tbojanbemá ndoñe quenátsbomna ndayentše jóchnama ca.

<sup>21</sup> Chora inÿa, cach uatsjendayënguentsá, Jesúsbioye tbojaniyana: —Bëngbe Utabná, šmolesenciá atšbe taitá chjsh-esabotbontsañe ca.

<sup>22</sup> Chora Jesús tbojanjuá: —Nÿe šmasto. Chë Bëngbe Bëtsabiana mo obanëngcá, ntšamo Bëngbe Bëtsá yomandacá ndoñe tmonsama causa, chënga cachëngbe obanënga chamotsétebuantsañe ca.

*Jesús chë binÿia y chë béjaye bonguana yojëtsbema*

*(Mc 4.35-41; Lc 8.22-25)*

<sup>23</sup> Chentšana Jesús canÿe barquëshoye tojánamashëngo y chabe uatsjëndayënga imojtsetjëmbambnaye. <sup>24</sup> Ndeolpe tša jabuache binÿia chë uafjajónaye béjayiñe yojóshjango; nyetsá jabuachana yojtsemna, chë olëshënga barquëshia imojtsëtsbotsana. Y Jesús chora inétsomañe. <sup>25</sup> As chabe uatsjëndayënga tmojána Jesús jetsefsenama y tmojaniyana: —jBëngbe Utabná, šmatsebacá. Montsenatjëmbambana ca!

<sup>26</sup> Chora Jesús tojanëyana: —¿Ndáyeca tša šmojtsauatja? ¿Tša batšatema šmojtsošbuaché, Bëngbe Bëtsá tšëngaftanga jujuabuáchama yobenama ca?

Chca tojanëyana y tojantsbaná. Chora tojanmandá chë binÿia y chë býyeshe bonguana chaotsatsmënama, y lempe natjëmbana yojtsatsmëna. <sup>27</sup> Chabe uatsjëndayënga ojanánënga imojtsemna y mëntšá imojtsichamo: “¿Nda quem boyabása yomna? Cha tonjayana y chë binÿia y chë býyeshe tmonjoyeuná ca.”

*Chë Gadara luaroca entsata, bacna bayëjbe juabna uambayata*

*(Mc 5.1-20; Lc 8.26-39)*

<sup>28</sup> Jesús uafjajónaye chenguana tojánashjango, canÿe luare Gadara ca uabáinentše. Chorna chë utabuantsánëngbentsana



útata, bayëjbe juabna uambayata, tbojánbocna y Jesúsbioye tbojanobobéconata. Puerte tšatjayata ibnamna, chíyeca entsanga ndoñe ntobenana chëjana jtsachñëjuanana; <sup>29</sup> y chora tbojanontsé chë bacna bayëjngbeyeca mëntšá uayebuáchana: — ¿Ndayá bëngaftaca cojtseboše, Jesús, Bëngbe Bëtsabe Uaquiñá? ¿Moye tcojabo bënga chafsufirma, chama cabá ndoñe chë tempo yontsemna ora ca?

<sup>30</sup> Chentša béconana ba cotšënga imnajena y chënga imnétsosañe. <sup>31</sup> Y chë bayëjënga Jesús tmojanimpadá: — Muentšana jésebocanama aca tcojamëse, cochjama bënga chë cotšëngbeñe fchayamashjnama ca.

<sup>32</sup> Y Jesús tojanëyana: —Motsajna ca.

Chora chë bayëjënga chë boyabásatbentšana tmojésanbocana y chë cotšëngbeñe tmojánamashjna; cachora chë cotšënga batsjocana penëšëjana uafjajónayoye imojtsoshbuetše y yojtsatajo.

<sup>33</sup> Chora chë cotšënga anjënënga tmojtsanacheta, y chë puebloye tmojánashjajna ora, tmojanontsé lempe ntšamo yojchnëngcá jacuéntana y ntšamo chë bayëjbe juabna uambayáftaca tojanopasámnaca. <sup>34</sup> Chora nÿetsca entsanga chë pueblentšana tmojánbocana y Jesús yojtsemnoye tmojána. Chë entsanga Jesús tmojáninÿe ora, tmojanimpadá chë luarentsana chaueseboचना.

## 9

*Jesús, canÿe jama ndobenábioye tbojanshná*  
(Mc 2.1-12; Lc 5.17-26)

<sup>1</sup> Chca tojanopasá chentšana, Jesús canÿe barquëshoye tojánamashëngo, uafjajónaye chenguana tojána y cachabe puebloye Capernaumoye tojtanashjango. <sup>2</sup> Chora, canÿe jama ndobená, tjuashiñe jajoná, Jesús yojtsemnoye básefta boyabásënga tmojanamba. Jesús tojáninÿe chënga tša imojtsosbuáchema chë šocábioye jáshnama cha bétsobenama; as chë šocábioye tbojaniyana: “Sobreno, añemo matsca; acbe bacna soyënga tcbontseboperdoná ca.”

<sup>3</sup> Chca causa, báseftanga ley abuatambayënga chentše imojtsemnënga imojtsejuabnaye: “Chca jayanëse, ndoñe tšabá quenátichamo Bëngbe Bëtsabiamá; mo chábioye cuafjoyenguangcá entsemna ca.” <sup>4</sup> Pero Jesús yojtsetátšëmbo ntšamo chënga imojtsejuabnaycá; chíyeca tojanëyana: “¿Ndayeca nÿetsá bacna juabnënga ainaniñe šmojtsebomna ca? <sup>5</sup> ¿Tšëngaftangbiamá ndayá más paselo nántsemna tšëngaftangbe delante jayanama: ‘Acbe bacna soyënga tcbontseboperdoná’ o ‘Matëtsbaná y motsa ca?’ <sup>6</sup> Atše cbochanjínÿanÿiye ntšamo chë Bëngbe Bëtsá Entšá

tbojanbemá quem luarentše mando yobomnama, entšanga bacna soyëngama jáperdonama ca” —Jesús tojanëyana.

As chë jama ndobenábioye tbojaniana: “Matëtsbaná, acbe tjuashe mesocñe y acbe yebnoye motsatoñe ca.”

<sup>7</sup> Chorna chë jama ndobená tojtantsbaná y cachabe yebnoye yojtsatoñe. <sup>8</sup> Chca tmojáninÿama chë entšanga auatjanánënga imojtsemna y Bëngbe Bëtsá imojtsatschuanaye, cha chca obenana entšanga tojánatšatama.

*Jesús, Matéobioye tbojanchembo chabuastama*  
(Mc 2.13-17; Lc 5.27-32)

<sup>9</sup> Jesús chentšana tojtsanoñe y canÿe entšábioye tbojáninÿe, Mateo ca uabainá, chë Romocama impuesto entšángbioye atjanayentše inétsotbemañe. Chora Jesús tbojaniana: “Smasto ca.” As Mateo chentšana tojëftsantsbaná y tbojanasto.

<sup>10</sup> Jesús cach Mateobe yebnentše yojtsesaye ora, banga Romocama impuesto entšángbioye atjanayënga y ínÿenga bacna soye amënga tmojánashjajna y mesëshentše Jesús y chabe uatsjëndayëngaftaca imojotbiana. <sup>11</sup> Chë fariseunga chca tmojáninÿe ora, Jesusbe uatsjëndayëngbioye tmojanatjá: —¿Ntšamo chca yojtsemna, tšëngaftangbe buatëmbayá chë impuesto atjanayënga y bacna soye amëngaftaca entsesá ca?

<sup>12</sup> Jesús chca tojanuena y chë fariseunga tojanëyana: —Chë salud bomnënga ashnayá ndoñe ntsëjabótana, pero chë šoquënga aíñe. <sup>13</sup> Smochjá y ntšamo ndegombre iuayancá šmochjuatsjinÿe quem Bëngbe Bëtsabe uabemana palabrënguñe:

Atše sëntseboše tšëngaftanga lastemadënga chašmotsemna, y ndoñe nÿe bayënga chašmotsëbánaye Bëngbe Bëtsá jëtschuayama ca.

Atše ndoñe chiyátabo chë Bëngbe Bëtsabe bominÿiñe tšabá amënga jabáchembuama, sinó chë bacna soye amënga imomna ca juabnayënga jabáchembuama ca —Jesús tojánayana.

*Jesús tmojantjá chë Bëngbe Bëtsáftaca jencuéntama tondaye saytescama*  
(Mc 2.18-22; Lc 5.33-39)

<sup>14</sup> Chentšana, Juan chë Ubayanabe ústonënga tmojanobconá y Jesús tmojantjá: —Bënga y chë fariseunga fsënduamana ba soye tondaye ntjascá jtsemnana, Bëngbe Bëtsáftaca jencuéntama. ¿Ndáyeca acbe uatsjëndayënga ndoñe chca ca?

<sup>15</sup> As Jesús tojanëjua: —Chë casamentoye ófjanënga chë boyabása bouamná chëngaftaca tojtsemnëntscuana, chëngbioye saná ndoñe ntsabuáshebenana y ngmënaca ndoñe ntsemnëngana. Pero ora echanjobuache y chë boyabása bouamná chentšana mochantsánatseñe; chora cocayé chë

ófjanënga tondaye más jasama quemochátsbomna. Ntšamo chë tojobouamá cha y chë ofjanëngaftaca endmëncá, cachcá endmëna atše y atšbe uatsjendayëngaftacnaca.

16 “Ndocná canye uatanguá entsáyá base tsëm entsëjuaca jtarmëndana. Er chë tsëm entsëjua jtsabéconana y chë uatanguá entsáyá más jtsatanëcanana, y chca chë uátanëcniñe más bëtsiñe jtsabemana. 17 Y cach ndoñe chë tojtseshayana vínoye tanguá jasabenguiñe ntjataftsuámayana. Tcojuaftsuamasna, chë jasabenga jtseshébëfjuana y chë vínoye jtsabuáshanana, y chë vínoye y chë jasabenga tondayama ntjatoservénana. Chíyeca comna, chë tojtseshayana vínoyna tsëm jasabenguiñe juaftsuámana; y chca, chë jasabenga y chë vínoye jtsoservénana ca” —Jesús tojánayana.

*Jesús canye shembásabioye tbojanshná y tojanma Jairëbe bembetema cháuatayenama*

(Mc 5.21-43; Lc 8.40-56)

18 Jesús entsanga yojtsëtsësnantscuana, chë judiëngbe enefjuana yebnentša canye mandayá tojánashjango y Jesusbe shecuatšentše yojobamentšiyë. Chë mandayá tbojanianyana: “Atšbe bembe tontsóbana. Diosmanda atšbe yebnoye mabo; cochjabojajo y cha echántayena ca.”

19 Chentšana Jesús y chabe uatsjëndayënga chë mandayá tmojanasto. 20-21 Imojtsaye ora, canye shembása stëtšoicana Jesúsbioye yojobeconá. Bnëtsana uta uatama oboftjajuanánaca cha inapadecena. Chë šocá Jesúsbioye yojobeconá ora, yojtsejuabnaye: “Masque nye mo chabe entsáyá sibiájua chaijuábojajo, salud chantinýena ca.” Chentšana chë šocá Jesusbe entsáyá tojanábojajo.

22 Tojanábojajo ora, Jesús tojanobuértana, chë shembásabioye tbojáninýe y tbojanianyana: “Añemo matsca, shembása. Bëngbe Bëtsábeñe icošbuachéyeca, mora tšabá contsatsmëna ca.” Y cach orscana cha tšabá yojsatsmëna.

23 Chënga tmojtëtanontsé ayana y chora chë mandayábioca chënga tmojánashjajna. Chentše Jesús tojánanýe, ínýengna chë veloriamama imojtsanflautaye y ínýengna tša imojtsošachiye. 24 Chora Jesús tojanëyana: “Muentšana mobocnënga. Chë shembásetema cabá ndoñe obaná quenátsmëna; nýe endëtsomañe ca.”

Pero chë entsanga Jesúsbioye nýe imojtsáfchaye. 25 Pero Jesús pronto chënga chë yebnentšana tojanëbuacna. Chora Jesús tojánamashëngo chë shembásetema yojtsemnoye; cucuatšë tbojanábuacueshache y cachora chë shembásetema tojtantsbaná. 26 Y nýets chë luarëjana ndayá Jesús yojamama nýetsca entsanga imojátatšëmbona.

*Jesús uta jtanata tojanashná*

<sup>27</sup> Jesús chentšana tojëftsanbocna ora, uta jtanata tbojanasto y mēntšá ibojtsaiuáye buache: —¡Davídbentšana Entšá, bēndata šmotsalastemá ca!

<sup>28</sup> Jesús chē yebnoye tojánamashēngo ora, chē jtanata tbojanóbobeconata. As Jesús tojanatjá: —¿Tsēndata šojtsošbuaché atše chca jamama chjobenaye ca?

Y tmojanjuá: —Arseñor. Aíñe ca.

<sup>29</sup> Chora Jesús tojánabuchbojajo y tojanēyana: —Ntšamo tsēndatbe ošbuáchiyana yomncá, cachcá chaotsemna ca.

<sup>30</sup> Y cachora jinŷama ibojtsobena. Jesús bēts cá chata mēntšá tojanamēndá: —Ndocná más quem soye chaondētsetatšēmboca.

<sup>31</sup> Pero chata chentšana tbojëftsanbocna y cachora tbojanontsé ndayá Jesús chátaftaca tojanmama nŷets chē luarējana jacúntana.

*Jesús, canŷe ndēbiábioye tbojanashná*

<sup>32</sup> Chē jtanata ibojtsebocanēntscuana, básefta entšanga canŷe ndēbiá, bacna bayējbe juabna uambayá, Jesúsbioye tmojanamba. <sup>33</sup> Jesús chē bacna bayēja chá bentšana tbojtaná bocna y cachora chē ndēbiá tojtanontsé oyebuambnayana. Entšanga ojnánānēnga imojtsichamo: “¡Ndocna te Israelentše chca bēts soye chemuáisinŷe ca!”

<sup>34</sup> Pero chē fariseunga imojtsichamo: “Cach bacna bayējēngbe amēndayá, Satanás, muábioye obenana tbojatštá chē bayējēnga entšāngbentšana jtēbuacanama ca.”

*Jesús entšangbiamá tbojanongmé*

<sup>35</sup> Jesús nŷetsca pueblēnguējana y luarēnguējana yojsachnējuana y chē judiēngbe enefjuana yebnēnguenache entšanga yojsabuátambaye. Yojanabuayiyná chē tšabe noticiēnga Bēngbe Bētsabe amēndayama, y nŷetsca šocanēngama y tsetšanama yojánashnaye. <sup>36</sup> Y chē entšanga tojánānŷe ora, puerte tbojanongmé. Er chēnga imojtsemna mo abuaŷēnŷa ndbomna oveshēngcá, puerte uamēntšnayēnga ba soyēngama padecena causa, y chauŷjabuachama ndocná ntsebomncá. <sup>37</sup> Chora chabe uatsjēndayēnga tojanēyana: “Canŷe bēts jajañe bēts cá játbanama entsemna, pero peonga nŷe báseftanga. Cachcá quem luarentše, bēts cá entšanga Bēngbe Bētsábioye nduabuát mēnga montsemna, y chēngbioye chabiamá abuayiyayēnga nŷe báseftanga. <sup>38</sup> Peonga tmojtsashbenēse chē nduíñbioye jaimpádana ba peonga chauichamoma chē jaja saná játbanama. Cachcá, Bēngbe Bētsábioye moimpadanga ba abuayiyayēnga chauichamoma, quem entšanga chábioye chamúbuajama ca” —Jesús tojanēyana.

## 10

*Jesús chë bnëtsana uta uatsjéndayënga tojanabacacá  
(Mc 3.13-19; Lc 6.12-16)*

<sup>1</sup> Chentšana Jesús tojánachembo chabe bnëtsana uta uatsjéndayënga, y obenana tojanatsatá bacna bayëjëngbe juabna entšángbentšana jtabocnama y nyetsca šocanëngama y tsetšanama jashnayama.

<sup>2</sup> Chë bnëtsana uta uatsjéndayënga mëntšá imojanabaina: chë natsaná Simón, Pedro cánaca uabainá y chabe uabentsá Andrés; Santiago y chabe uabentsá Juan, Zebedeobe uaquiñata; <sup>3</sup> Felipe y Bartolomé; Tomás y Mateo, chë Romocama impuesto entšángbioye atjanayá; Santiago, Alfeobe uaquiñá y Tadeo; <sup>4</sup> Simón, chë celote ca uabobainá y Judas Iscariote, chë uayayëngbe cucuatšiče Jesúsbioye boshjuaná.

*Jesús, chabe bnëtsana uta uatsjéndayënga tojanichamó,  
Bëngbe Bëtsabe amëndayama jábuayenama  
(Mc 6.7-13; Lc 9.1-6)*

<sup>5</sup> Jesús chë bnëtsana uta boyabásenga tojanichamó chë tšabe noticiënga entšanga jabuátambama, y mëntšá tojanabuayená: “Chë ndoñe judiëngbeñe ndoñe šmattsana y ndaye pueblentše Samaria luaroca ndoñe šmatjëftsamashjna. <sup>6</sup> Nye Israeloca pueblëngoye šmochjá. Choca entšanga mo ótsena oveshëngcá montsemna, Bëngbe Bëtsábioye corente nduabuatma causa. <sup>7</sup> Smochjá y entšanga šmochjábuayenaye Bëngbe Bëtsabe amëndayana echanjóshjanguama. <sup>8</sup> Chë šoquënga šmochjášnaye, šmochjama chë obanënga chámuatayenama, bacna nguayanánaca šoquënga šmochjášnaye y bacna bayëjëngbe juabna entšángbentšana šmochtábocna. Chë obenana šmonjójyëngacñe tondaye ntjëtsjajuacá; cachcá, chë soyënga šmojtsamama tondaye entšanga šmattsayëngacaye.

<sup>9</sup> “Ndoñe šmattsambaye crocénana uasnanëchiñe. <sup>10</sup> Ni shecnaja sanaca benachiñama, ni inye entšayá jtsenomódama, ni shecochëtjonëshënga, ni jatjonëfja, er chë tšabe trabajayá jtsomerecénana ntšamo tbojtsajabotcá jójyëngacñama.

<sup>11</sup> “Nderado canye bëts pueblentše o base pueblentše chašmojášhjajna ora, šmochjánguango canye tšabe entšá, ín्यëngbioye ndaingñayá, y chabe yebnentše šmochtsoquedañe, inye puebloye játantscuana. <sup>12</sup> Canye yebnoye chašmojámashjna ora, nyetsca chentša oyenënga mëntšá šmochjácheuaye: ‘Chë bëngbe ainaniñe tšabe ebionana tšëngaftangbe ainaniñe chaotsemna ca.’ <sup>13</sup> Chë yebnentša entšanga ainaniñe tšabe ebionana jtsebomnama

merecido tmojtsebuajonëse, chë tšëngaftangbe ainaniñe tšabe ebionana chëngaftaca chaotsemna. Ndoñesna, nÿe cach tšëngaftangftaca chaotsonñe. <sup>14</sup> Y nderado canÿe pueblentše o bëts pueblentše chë entsanga ndoñe tcmonjúbuaja y ndoñe tcmonjóyaunase, chentšana šmochjésebocana y chë shecuatšentša polvëshe šmochjésenstoto. Chca, chë entsanga mochántsetatšëmbo chënga tšëngaftangftaca ndoñe tšabá tmonjamama. <sup>15</sup> Ndegombre šcuayana, quem luare jopochócama te, chë ndoñe chacmonjúbuaja y ndoñe chacmonjoyauná entsanga Bëngbe Bëtsá puerte jabuache echantsacastígaye, y chë bacna entsanga Sodoma y Gomorra luaroquëngna ndoñe nÿa nÿetsá jabuache queochatacastígaye ca” —Jesús tojánayana.

*Ntšamo chë uatsjédayënga mochjansúfria*

<sup>16</sup> “Smochjouena. Atše cbontsachamná mo oveshënga cuenta tjañe quešëngbeñe. Chíyeca studio bomnënga mo mëtšcuayëngcá šmochtsemna y uamanënga mo palomatemëngcá. <sup>17</sup> Entšangbiamá cuedado smochtsebomna, chëngbe pueblentša amëndayëngbe cucuatšinë tšëngaftanga cmochanjábashejuana y chëngbe enefjuana yebnënguenache cmochanjátsetšenaye. <sup>18</sup> Atšbe ústonënga bëtsemnama, mandadëngbioye y reyëngbioye cmochanjunatse. Y chca, tšëngaftanga smochanjobenaye chëngbeñe y chë ndoñe judiëngbeñe ntšamo atšbiamá smotatšëmbcá jóyebuambayama. <sup>19</sup> Pero chë mandadëngbe cucuatšinë chacmojábashejuana ora, ntšamo o ndayá smochjayanama ndoñe šmattsenócochinÿena. Chca orna, Bëngbe Bëtsá tšëngaftanga cmochanjabuayená ntšamo o ndayá jóyebuambayama. <sup>20</sup> Tšëngaftanga ndoñe chë oyebuambnayënga quešmochátsmëna, sinó chë tšëngaftangbe Taitá, Bëngbe Bëtsabe Espíritu, tšëngaftangbiajana echantsóyebuambnaye.

<sup>21</sup> “Y canÿe entsá cachabe catšátbioye uayayëngbe cucuatšinë bochanjáboshjona chamotsóbama; y canÿe taitá cachabe uaquiñábioynaca. Y chë básenga chëngbe bëtšétsangbe contra mochántsemna y uayayëngbe cucuatšinë mochanjábashhejuana chamotsëbáyama. <sup>22</sup> Tšëngaftanga atšbe ústonënga bëtsemnama, nÿetsca entsanga cmochantsëbuayënja; pero nda nÿets tempo átšbeñe ošbuachiyá chaotsonñá, atsbocaná echántsemna. <sup>23</sup> Canÿe pueblentše chacmojtšécamena ora, inÿe puebloye smochtsacheta. Ndegombre cbëyana, Israelentša nÿetsca pueblëngoye cabá nda ora, chë Bëngbe Bëtsá Entšá tbojanbemá ya quem luaroye echanjabáshjango.

<sup>24</sup> “Ni canÿe uatsjendayá chabe buatëmbayabiamá más uamaná ntsemnana, ni chë oservená chabe nduiñbiamá más

uamaná. <sup>25</sup> Chë uatsjendayá ya cachabe buatëmbayacá jtsemnana tojashjáchëse, ndayá más nanjásboše. Cachcá endmëna chë oservenáftaca, cachabe nduiñcá tojtsemnëse. Atse sëndmëna mo canÿe yebnentša taitacá y tšëngaftangna mo cach yebnentša basengcá. Entšanga jtsichámuana atšna Beelzebú o chë bacna bayëjëngbe amëndayá tsmëna ca. ¿Ntšamo chënga tšëngaftanga cmochtsëbobuatma ca?” —Jesús tojanëyana.

*Nda ndegombre cuantsebiauatja  
(Lc 12.2-7)*

<sup>26</sup> “Chíyeca entšangbiana ndoñe matauatjëngana. Chë yoyitëmena soyentšana tondaye ntjinÿcá queochaisoquéda, y chë ndótatsëmbo soye, ntsotatsëmbcá queochaisoquéda. <sup>27</sup> Chë mora cbontsëtsësná soyënga, chë entšangbiana mo ibetiñe cuaftsemncá soyënga, tšëngaftanga šmochjama entšanga botamana chama chamotsetatšëmbuama. Y chë iytëcana cbontsëtsësná soyënga nÿetsca entšanga šmochtsabuayiynaye, mo nda canÿe yebnentša tsbanánocana noticiënga tojtsayebuachcá. <sup>28</sup> Ndoñe matauatjëngana nÿe chë tšëngaftangbe cuerpo japochócama imobenëngbiana y ainana jtsepochoçama ndoñe ntsobenana. Más šmochtsebiauatja chë nda endobena tšëngaftangbe cuerpo y tšëngaftangbe ainana jtsepochoçama, nÿetsca tescama infernoca.

<sup>29</sup> “Uta jaja shloftšetémata nÿe canÿe denario crocenánama mondbétsena. Masque chca, ni cánÿetema obanatema fshantsoye jotsatsana, tšëngaftangbe Taitá, Bëngbe Bëtsá ndoñe tontsebošëse. <sup>30</sup> Y tšëngaftangbiana, Bëngbe Bëtsá botamana jtsantješnana, y chca, cha lempe tšëngaftangbiana jtsetatšëmbuana, bueta stjënashënga tšëngaftangbe bestšašišne yomnámna. <sup>31</sup> Chíyeca ndoñe matauatjëngana, tšëngaftanga ba jaja shloftšetëmëngbiana corente más šmonduámana ca” —Jesús tojánayana.

*Ndabiana Jesucristo yochjayana chabe entšá yomna ca  
(Lc 12.8-9)*

<sup>32</sup> “Nda atšbe entšá yomna ca entšangbe delante tojyanabiama, átšnaca, atšbe Taitá, chë celoca endmënabe delante chanjayana cha atšbe entšá yomna ca. <sup>33</sup> Pero nda entšangbe delante atšbe entšá ndoñe yondmëna ca tojyanabiama, átšnaca, atšbe Taitá, chë celoca endmënabe delante chanjayana cha atšbe entšá ndoñe yondmëna ca” —Jesús tojanëyana.

*Jesusbe causa, entšángbeñe más jtsentsjanayana  
(Lc 12.51-53; 14.26-27)*

<sup>34</sup> “Ndoñe šmattsejuabnaye atše quem luaroye tijabo nÿetsca entšanga natjěmbana chamotsiyenama. Atše chama ndoñe chiyátabo; atše sěnjabo causa, entšanga más mochántsestsjanaye. <sup>35</sup> Atše sěnjabo chě uaquiñá cachabe taitabe contra chaotsemnana, chě bembe cachabe mamabe contra y chě bebincuá chabe uambén mamabe contra chaotsemnana. <sup>36</sup> Y chca, ba entšangbe uayayěnga cachěngbe pamállanga mochántsemna.

<sup>37</sup> “Nda cachabe taitá o mamábioye atšbiana más tbojtsebobonsháněse, cha ndoñe ntsomerecénana atšbe entšá jtsemnana. Nda cachabe uaquiñá o bémběbioye atšbiana más tbojtsebobonsháněse, cha cach ndoñe. <sup>38</sup> Y nda nÿetsca chabe quem luare soyěnga ndoñe tonjěseboshjona atše juastama, y atšbiana jasúfriama ndoñe tontseprontana y cruciñe jobanámnaca, cha ndoñe ntsomerecénana atšbe entšá jtsemnana. <sup>39</sup> Nda tojtsentšena quem luarentše bětscá soyěnga jtsebonnana y atšbiana jasúfriama ndoñe tontseprontana, chě nÿetsca tescama yomna tšabe vida echanjobuetše. Pero nda quem luarentša soyěnga cachcá tojesonýá atše juastama, masque chaóbana, chě nÿetsca tescama yomna tšabe vida echántsebonna ca” —Jesús tojánayana.

*Chě uacanana soyěnga*

*(Mc 9.41)*

<sup>40</sup> “Nda tšěngaftanga chacmojúbuaja, átšnaca cha šochanjořja; y nda atše chašojofja, chě nda šojichmóbioynaca cha bochanjořja. <sup>41</sup> Nda canýe Běngbe Bětsabe juabna oyeuambnayábioye tbojoyeuná, cha chca bětsemnana, chábioye Běngbe Bětsá canýe uacanana soye bochántatšetaye, mo cach Běngbe Bětsabe juabna oyeuambnayabe uacanana soycá. Y nda canýe nÿetsca soyěnguiñe tšabá amábioye tbojofja, cha chca uamanama, chábioye Běngbe Bětsá canýe uacanana soye bochántatšetaye, mo cach nÿetsca soyěnguiñe tšabá amabe uacanana soycá. <sup>42</sup> Y ndánaca, tšěngaftanguentšá canýe nduamanábioye masque nýe mo base búyeshtema tbojuabatšetá, atšbe ustoná bětsemnayeca, ndegombre Běngbe Bětsá canýe uacanana soye chábioye bochántatšetaye ca” —Jesús tojánayana.

## 11

*Juan chě Ubayanabe ichmóněnga*

*(Lc 7.18-35)*

<sup>1</sup> Jesús tojanpochoćá chabe bnětsana uta uatsjěndayěnga jábuayenama, y chentšana tojtsanoñe chě luariñe pueblěnguenache oyena entšanga Běngbe Bětsabe palabra jabuátambama y jábuayenama.



<sup>2</sup> Chë tempo Juan chë Ubayaná cárceloye tmojanëtame. Choca cha yojouena ndayá Jesús yojtsamama. Y as, Jesús yojtsemnoye, básefta chabe ústonënga tojanichamó, <sup>3</sup> mëntšá jatjayama: —¿Aca ndegombre cojtsemna chë jabama ibojanmëná, chë Uámana Uabuayaná, o šojtsamna ínÿabiama jatobátmama ca?

<sup>4</sup> Chca tmojantjá orna, Jesús tojanëjua: —Smochjá y Juan šmochjauyana ntšamo šmojouena y šmojinÿcá. <sup>5</sup> Cha šmochjacuénta: Chë jtanënga tšabá entsatëbinÿna, chë coshetënga tšabá montsatana, chë bacna nguayanánaca šoquënga shnánënga montsatsmëna y chë tësmënga montsuenana, chë obanënga tmontayena y chë ndbomnjémëngbioye chë tšabe noticiënga montsabuaiyina ca. <sup>6</sup> ¡Puerte oyejuayá chaotsemna chë nda atše bacna soye ndoñe stsama ca jtsejuabnayëse, átšbeñe ošbuáchiyana ndoñe tontsajbaná cha ca! —Jesús tojanëyana.

<sup>7</sup> Chënga tmojtsatanoñe ora, Jesús tojanontšé Juanbiamama chë entšanga jáuyanana, mëntšá: “Juan jinÿama šmojánbocana ora, ¿ndayá jinÿama chë entšanga ndoyena luaroye šmojánbocana? ¿Canÿe entšá ainaniñe tondaye añemo ndbomná, mo canÿe šëše bínÿiaca shatiyeynëscá? <sup>8</sup> Y ndoñese, ¿ndayá jinÿama choye šmojánbocana? ¿Canÿe boyabása uámana entšayaca bopormaná? Ndoñe. Tšëngaftanga šmondëtatšëmbo chë boyabásënga uámana entšayaca bopormánëngna chë mándayëngbe yebnënguiñe mondbétsiyenama. <sup>9</sup> Y asna, ¿ndayama choye šmojánbocana? ¿Canÿe Bëngbe Bëtsabe juabna oyebuambnayá jinÿama? Ndegombre, aíñe; y cbëyana, ndegombre cha canÿe Bëngbe Bëtsabe juabna oyebuambnayabiama más bëtsá endmëna. <sup>10</sup> Cha, Juan, endmëna ndabiama Bëngbe Bëtsá chabe uabemana palabrënguiñe tojánayana mo chabe ichmonacá, mëntšá tojánayana ora:

Cristo, atšbe entšá natsana sënjichmó acbiamama  
chaóyeuambama,

entšanga jábuayenama aca jabama ainaniñe tšabe  
juabnëngaca chamotseprontánama ca.

<sup>11</sup> Ndegombre cbëyana: Nÿets tempo entšángbeñe, ndocná quenátsmëna Juan chë Ubayanabiama más bëtsá; masque chca, Bëngbe Bëtsabe amëndayoca chë más batsá uamaná, más bëtsá echántsemna ntšamo mora Juan yomnama.

<sup>12</sup> “Juan chë Ubayaná tojánabo orscana mëntscoñama, bëtscá entšanga tša mondboše Bëngbe Bëtsabe amëndayoye jamashënguama, y chë Bëngbe Bëtsabe amëndayama contra imomnëngna, chëngbe nÿets añémoca montseboše chë mándayana jtsepochócama. <sup>13</sup> Juan candabëntscuana, nÿetsca

Bëngbe Bëtsabe juabna oyebuambnayënga y Moisesbe Ley nyë Bëngbe Bëtsabe amëndayama tmonjanobuambá. <sup>14</sup> Y tšëngaftanga chë soyënga jýëngaçñama šmojtsebošëse, Juan entsemna chë Bëngbe Bëtsabe juabna oyebuambnayá Eliascá, chë jabama ibojamná. <sup>15</sup> Chë jouenama tmojtsobenënga, chamouena ca” —Jesús tojánayana.

<sup>16</sup> Mëntsánaca Jesús tojánayana: “¿Ndayacá morsca entsänga imomna? Chënga mondmëna mo chë plazëngoca mondbetsetbiámana basetemëngcá; chënga chëngbe enutëngbioye jtsayebuáchana <sup>17</sup> y mëntsá jtsichámuana: ‘Tšëngaftangbiamá fsënjaflautá y ndoñe chešmatslantsá; ngmënaca fsënjaversiá y ndoñe chešmatošachna ca.’ <sup>18</sup> Juan tonjánabo, y bëtscá entsängbeñe ndoñe quenjatamana ni jasana, ni jofšiyana, y entsänga montsanichamo chana bacna bayëbe juabna uambayá yojamna ca. <sup>19</sup> Morna, chë Bëngbe Bëtsá Entsä tbojanbemá tonjabo, y chana aíñe entsamana bëtscá entsängbeñe jtsesayana y jtsosfšëšnayana, y entsänga montsichamo chana yapa uasayá y vínoye tmoyá entsemna ca y Romocama impuesto entsängbioye atjanayënga y bacna soye amëngbe amigo ca. Pero Bëngbe Bëtsá endbétsinýanýnaye cha nyëts osertánana bomná yomnama, chë ndayá cha tojama ora ndayá chentšana tojóbozna soyëngaca ca” —Jesús tojánayana.

### *Chë nduauenana entsänga*

*(Lc 10.13-15)*

<sup>20</sup> Chentšana Jesús tojanontsé jucácanana chë entsänga, ndëmuanýënga imojoyena chë pueblënguiñe ndayenache ba chabe bëts soyënga tojanma, chënga bacna soyënga amana ndoñe tmontsanajbanama y Bëngbe Bëtsabe benache ndoñe tmontanishachama. Mëntsá yojtsichamo: <sup>21</sup> “¡Tša lastema, Corazín puebloca entsängbiamá! ¡Tša lastema, Betsaida puebloca entsängbiámnaca! Chë chentše sënjama bëts soyënga, Tiro y Sidón bëts pueblënguentše matënjochnënguse, chentša bacna entsänga ya tempo ngmënaca matmëntenojuabó chëngbe bacna soyëngama y Bëngbe Bëtsabe benache matmëntishache; y chca tmojamama chaotsótatšëmbuama uajojësha entsayangaca matmëntopormanga y chëngbe bestšašiñe jatinyá matmënjenotbótoto. <sup>22</sup> Pero ndegombre cbëyana, ntšamo entsänga tmojamama, tšabá o ndoñe tšabá bëtsemnama jayanama chaojobuache ora, tšëngaftanga más bëts castigo šmochántsebozna, chë Tiro y Sidonoca bacna entsängbe castiguama. <sup>23</sup> Y tšëngaftanga, Capernaumoca entsänga, ¿šmojtsejuabná celóntscoca atsebánanënga šmochtsemna ca? ¡Chë uabouana infiernoye cmochantsésetjango! Chë muentše sënjama bëts soyënga Sodomoca matënjochnënguse, choca entsänga ya tempo

ngménaca chëngbe bacna soyëngama matmëntenojuabó y Bëngbe Bëtsabe benache matmëntishache, y chë bëts pueblo cabá cachcá mëntscuana mantsonñe. <sup>24</sup> Pero ndegombre cbëyana, quem luare jopochócama te, Bëngbe Bëtsá puerte jabuache cmochantsacastígaye, y chë Sodoma luaroca entšángbioye ndoñe nyëtsá jabuache quemochatacastígaye ca” —Jesús tojánayana.

*“Atšbioye mabënga y šmochjóchna”*

*(Lc 10.21-22)*

<sup>25</sup> Chë tempo, Jesús tojánayana: “Atše cbatschuá, Taita, ce-locu y quem luarentša Utabná. Aca, chë nyë batsá tatsëmbënga tcojanýanyé, chë tša tatsëmbënga y osertánëngbiama tcojaitëme soyënga. <sup>26</sup> Aíñe, chama cbontsadorana, Taita, chca chaotsemnama tcojábošenayeca.

<sup>27</sup> “Atšbe Taitá lempe chca šonjatštá. Chë Uaquiñábioye ndocná corente quebnatábuatma; nyë chë Taitá aíñe. Y chë Taitábioye ndocná corente quebnatábuatma; nyë chë Uaquiñá aíñe, y ndábioye chë Uaquiñá tojtseboše nda chë Taitá yomnama jinýanyiyama, chánaca chë Taitábioye bochantsábuatma.

<sup>28</sup> “Atšbioye mabënga nyëtsca tšëngaftanga uamëntšnayënga y bëtscá trabajo uangménënga, y atše chanjama tšëngaftanga chašmochnama. <sup>29</sup> Ntšamo canye entšá, uacná yuguëšiñe juabatsëcana juanatsama, cachcá, tšëngaftanga atše šmochjaleséncia jobnatsayama y jabuátambama. Atšbentsana šmochjuatsjinýe: atše uantado mëná sëndmëna y ndoñe quetsatamana yapa uamaná jatenobiamnayana. Y chca, tšabá jóchnama šmochantsobena y ainaniñe más añemo šmochántsebmna. <sup>30</sup> Mo canye uacnacá, ndoñe tishuta yuguëšeca o ndoñe uauta uasmanëshaca, paselo jama jobenayana, cachcá tšëngaftanga šmochántsemna atše cbojtsabnatsana y cbojtsabuátambase; y chca, tšëngaftanga más oyejuayënga šmochántsemna y más paselo nyëtsca soyënga jamama echántsemna ca” —Jesús tojánayana.

## 12

*Jesube uatsjëndayënga ochnayté trigo tmojanátabebe*  
*(Mc 2.23-28; Lc 6.1-5)*

<sup>1</sup> Chë tempo, Jesús canye ochnayté canye jajajana yojtsachñëjuana. Chabe uatsjëndayëngna shëntseca imojtsemna, chíyeca tmojanontsé trigo juatabebiana y chë meshënga jasana. <sup>2</sup> Chë fariseunga chca tmojáninýe ora, Jesús tmojanianya: —Minýe, acbe uatsjëndayënga canye soye montsama y chë soye ochnayté jamama ndoñe quenátslesenciana ca.

<sup>3</sup> As Jesús tojanéyana: —¿Ndoñe šmëndualía y šmondětatsšëmbo ndayá David y chabe enutënga tmojanmama, shëntseca imojtsemna ora? <sup>4</sup> Chca orna, David, Bëngbe Bëtsabe bëts yebnoye yojámashëngo y chë Bëngbe Bëtsá chentše yojamnama inÿinÿnaye tandëšënga yojase. Chë tandëše nÿe ndánaca jasama ndoñe yonjalesenciana, ni Davidbiana, ni chabe enutëngbiana. Nÿe bachnangbiana belesenciana chë tandëše jasama. Masque David chca tojanma, Bëngbe Bëtsá chora ndoñe tonjánayana David canÿe bacna soye tojanma ca. <sup>5</sup> ¿O ndoñe šmëndualía y šmondětatsšëmbo, Moisesbe leyinë, chë bachnanga ochnayté Bëngbe Bëtsabe bëts yebnentše jtsetrabájayana, pero ndoñe bacna soye ntsemnana chë bachnanga ochnayté ndoñe mondbóchnama? <sup>6</sup> Y atše šcuayana: Muentše canÿa entsemna, cha chë Bëngbe Bëtsabe bëts yebnentša bachnangbiana más uamaná endmëna y chabe amëndayoca soyënga más entsámama chë bachnangbe mándayentša soyëngama. <sup>7</sup> Bëngbe Bëtsabe uabemana palabrenguiñe mëntšá endayana: Atše sëntseboše tšëngaftanga lastemadënga chašmotsemna, y ndoñe nÿe bayënga chašmotsëbánaye Bëngbe Bëtsá jëtschuayama ca.

Ntšamo chiñe entsayancá ndegombre cmojtsësertánëse, tšëngaftanga ndoñe chëngbe contra šmattsichamo, chë ochnayté chca tmojtsamëngbiana. <sup>8</sup> Chë Bëngbe Bëtsá Entšá tbojanbemá, chë entšá ochnayté tojtsama sóynaca jtsemándayana ca —Jesús tojánayana.

*Chë buashana cucuatše bomna entšá*  
(Mc 3.1-6; Lc 6.6-11)

<sup>9</sup> Chentšana Jesús tojtsanoñe y chentša judiëngbe enefjuana yebnoye tojánamashëngo. <sup>10</sup> Chentše yojtsemna canÿe boyabása buashana buacuatše bomná. Chë fariseunga imojtsenguaye ndayánaca, as chca chënga jtsebomnama ndaye sóyeca Jesús mal jaquédama. Chcasna, chora chënga Jesús tmojantjá: —¿Queojtselesenciana canÿe ochnayté šocá jáshnama ca?

<sup>11</sup> Y Jesús tojanëjua: —¿Nda tšëngaftanguentšá, canÿe oveshá tbojtsebomna y nÿa chë ochnayté canÿe fshantsentše atëfjnoye chë oveshá tojtsótsatše, chora chë boyabása nanjá o ndoñe chë oveshá jatábocnama? <sup>12</sup> ¡Entšá oveshabiana puerta más uamaná endmëna! Chcasna, entselesenciana chë ochnayté tšabe soye jamama ca —Jesús tojanéyana.

<sup>13</sup> Chora Jesús chë buashana buacuatše bomnábioye tbojanianya: “Macuenÿanëjaná ca.” Y chë boyabásana tojanacuenÿanëjaná y chora chëtša tšabá yojtsatamna mo cach inÿetsacá. <sup>14</sup> Pero chë fariseunga tmojésanbocana ora, tmojanontsé juabnayana ntšamo jamëse Jesús jóbama.

*Ndayá chë Bëngbe Bëtsabe juabna oyebuambnayá Jesus-biama tojánayana*

15 Jesús chë soye tojántatsëmbona ora, chentsana tojt-sanoñe y ba entsanga tmojanasto. Nÿetsca šoquënga to-janashná,<sup>16</sup> y tojanamëndá chabiama entsángbeñe ndoñe cha-mondëtsóyebuambnama. 17 Chca tojanamëndá, cachcá chaot-semnama ntšamo chë Bëngbe Bëtsabe juabna oyebuambnayá Isaías tojanayancá. Cha mëntšá tojánayana:

18 Muentše atšbe oservená entsemna. Atše cha sënjabocacá, atšbe bonshaná, y atše corente chabiama sëntsoyejuá.

Atše chanjama atšbe Espíritu chabe ainaniñe chaotsemnama y entsanga echanjabuayená, Bëngbe Bëtsá nÿetsca luarënguentsana entsangbiama yochjayanama chënga tšabá o ndoñe tšabá tmonjamama.

19 Cha ndoñe queochátayajuatsana, ni queochátschembumbuana. Chabe oyebuambnayana tsáshenañe ndocná queochatuena.

20 Mo nda chë atcana šëše ndoñe más jatsndbemana, chë ndobenënga cha ndoñe queochátapochocaye.

Mo nda chë quinÿenëfjua nÿe uabojátšena uajuinÿnëfjua ndoñe ntsafsanana,

chë Bëngbe Bëtsábeñe jtsošbuáchiyama imojtsebojátšangbe obatmanana chábeñe, cha ndoñe queochátabuajuanaye.

Cha nÿets añémoca echanjëftsetrabája, entsanga chëngbe ainaniñe Bëngbe Bëtsabe ndegombre soyënga chamóyëngacñëntscuana.

21 Y nÿetsca luarënguentsana entsanga chábeñe mochantsobátmana ca —cha tojánayana.

*Fariseunga tmojánayana Jesús Satanásbentsana obenana to-janóyëngacñe ca*

(Mc 3.20-30; Lc 11.14-23; 12.10)

22 Chora, Jesús yojtsemnoye canÿe boyabása jtaná y ndëbiá tmojanánatse. Chana bacna bayëjbe juabna uambayá in-amna; y Jesús chábioye tbojanshná, chabuatabínÿnama y chabuatauénanama. 23 Y nÿetsca entsanga ojnánänënga imojt-sichamo: “¿Mua yojtsemna chë Davídbentsana Uámana Entšá, chë Cristo ca?”

24 Pero chë fariseunga chca tmojanuena ora, imojtsichamo: “Beelzebú, cach Satanás, chë bacna bayëjëngbe amëndayá, quem boyabásabioye obenana tbojatštá chë bayëjënga chau-atëbuacnama ca.”

25 Y Jesús yojtsetátšëmbo ntšamo chënga imojtsejuab-nayama; as tojanéyana: “Canÿe amëndayentše entsanga tmojtsenojatá y tmojtšenáyase, cachënga jenpochócana. Cachcá, canÿe bëts pueblentša entsanga o canÿe yebnentša pamállanga tmojtsenojatá y ndoñe tmontsenëyeunanëse,

chënga ndoñe tšabá nyets tempo quemochátsmëna. <sup>26</sup> Cachcá, Satanás cachabe bayëjënga jtëbuacnama tojtsebošëse, chana tojtsenojatá y cachabe contra yojtsemna. Y chca, ¿ntšamo nantsobena chabe mándayana quem luarentše jëftsebmna? <sup>27</sup> Tšëngaftanga šmotsichamo atše Beelzebube obenánaca chë bayëjënga stsatëbuacana ca; pero chca ndegombre tojtsemnëse, ¿ndábeyeca tšëngaftangbe usetonënga obenana imojtsebmna chë bacna bayëjënga jtëbuacnama? Chíyecna, chënga montsinÿinÿná ntšamo ndegombre yomnana y tšëngaftanga ndoñe ndegombre soye šmotsichámuama. <sup>28</sup> Y atšna, chë Bëngbe Bëtsabe Espíritbeyeca chë bayëjënga entsángbentsana sëndëtëbuacana; y chë soye entsinÿinÿná Bëngbe Bëtsabe amëndayana tšëngaftangbioye tojóshjanguama.

<sup>29</sup> “¿Ntšamo nda nanjobenaye canÿe corente añemo bomna entsabe yebnoye jamashënguana y chabe soyënga jtsebo-cana, ndoñe natsana chábioye tconjshétsebatsëquëse? Nÿe tcojshétsebatsëquësna aínë cuanjobenaye cha jefcana. Atše ya chca Satanásoftaca sënjama.

<sup>30</sup> “Nda ndoñe átšëftaca tontsemná, atšbe uayayá jtsemnana. Y nda átšëftaca ndoñe tontsetrabája, chana atšbe contra jtsetrabájayana.

<sup>31</sup> “Chíyecna chëyana, Bëngbe Bëtsá entsanga echanjáperdonaye nyetsca chëngbe bacna soyënga y chë Bëngbe Bëtsabiama puerte bacá oyebuambnayana, mo chábioye cuafjoyenguangcá; pero ndoñe queochátaperdonaye chë Uámana Espíritbiama puerte bacá ichámënga. <sup>32</sup> Bëngbe Bëtsá bochanjaperdóna chë Cha Entšá tbojanbemabiama ndoñe tšabá ichamuábioye; pero chë Uámana Espíritbiama ndoñe tšabá ichamuábioyna, ni quem luarentše, ni ndocna te quebochatsperdóna ca” —Jesús tojánayana.

*Tšabe betiye o ndoñe tšabe betiye tondmënama, jtsotatsëmbuana ntšamo tojashajoncá*

*(Lc 6.43-45)*

<sup>33</sup> “Canÿe betiye tšabá mobocuedanga y botamana echanjashájona; ndoñe tšabá matscuedánana y tšabe shajuana ndoñe queochátsbomna. Chë betiye tšabe betiye o ndoñe tšabe betiye tondmënama, jtsotatsëmbuana ntšamo chëshe tojashajoncá. <sup>34</sup> ¡Mëtscuaye entsanga! ¿Ntšamo šmattsobena tšabe soyëngama jtsóyebuambnayana, cach tšëngaftanga bacna entsanga šmojtsemnëse? Er ndayá ainanoca becá tomnama entšá jtsóyebuambnayana. <sup>35</sup> Chë tšabe entšá, chë ainanoca tšabe juabnënga bomnentsana jtsóyebuambnayana, y chë bacna entsana chë ainanoca bacna juabnënga tobomnentsana jtsóyebuambnayana. <sup>36</sup> Y ndegombre chëyana, chë entsangbiama tšabá o ndoñe

tšabá tmonjamama jayanama tempo chaojobuache ora, ndaye ndoservena palabra šmojóyebuambama, Běngbe Bětsabe delante šmochanjayana ndáyeca chca ca. <sup>37</sup> Er ntšamo tcojtsóyebuambnama Běngbe Bětsá echanjayana tšabá o ndoñe tšabá tconjamama, y cmochanjauyana aíñe o ndoñe cmontsemna castigáná jtsemnama ca” —Jesús tojánayana.

*Chě bacna entsanga Jesús tmojanimpadá canye běts soye chaoma, chabe obenana jinýama*

*(Lc 11.29-32)*

<sup>38</sup> Chentšana, básefta fariseunga y Moisesbe ley abuátambayěnga Jesús tmojantjá: —Buatěmbayá, běnga fsěntseboše aca canye běts soye chacoma, acbe obenana chašcuinýanýema ca.

<sup>39</sup> As Jesús tojanějua: —Quem puerte bacna entsanga y ndošbuáchiyěnga montseboše atše canye běts soye chaima, atšbe obenana jinýanýiyama; pero chca soye ndoñe quemochátinýe, sinó nýe chě ndayá yomna mo chě Běngbe Bětsabe juabna oyebuambnayá Jonásoftaca tojanopasá soyca. <sup>40</sup> Ntšamo Jonás unga te y unga ibeta chě běts beonbe uafsbioye yojěftsemncá, cachcá chě Běngbe Bětsá Entšá tbojanbemá unga te y unga ibeta fshantse jashenoye echanjěftsemna. <sup>41</sup> Morsca entsanga tšabá o ndoñe tšabá tmonjamama Běngbe Bětsá yochjayana te, Nínive běts pueblaca entsanga mochanjotsaye y morsca entsangbiamama mochanjayana ndoñe tšabá tmonjama ca; er chěnga, Jonás yojtsabuayiyayey ora, tmojanoyeuná y chě tšabe benache tmojtanishache, y chě mora muentše entsemnana, Jonasbiamama más uamaná endmēna. <sup>42</sup> Morsca entsanga tšabá o ndoñe tšabá tmonjamama Běngbe Bětsá yochjayana te, chě Sur luaroca reinánaca echanjotsaye y morsca entsangbiamama echanjayana ndoñe tšabá tmonjama ca; er chana chě quem luare iuajbana luarēngocana tojánabo Salomonbe osertanánaca palabrenga jouenama, y chě mora muentše entsemnana, Salomonbiamama más uamaná endmēna ca —Jesús tojánayana.

*Ndayá inopása chě bacna entsángaftaca*

*(Lc 11.24-26)*

<sup>43</sup> Jesús mēntsánaca tojánayana: “Canye bacna bayěja canye entsábentšana tojésebocna ora, chě bayějna bojojo luarēnguenache jtšanana ndayentše jóchnama onguayíñe, y canye luare ndoñe tonjínýena ora cha jenójuaboyana: <sup>44</sup> ‘Atšbe oyenoye, chě ndayentšana sěnjěftsebocnoye chanjesshécona ca’. Y choye tojtashjango orna, jinýenana lempe tšabá cha jtesamashěnguama, mo chentše ndocná tontsiyencá, tsjajniñe

y lempe botamaniñe cuaftsemncá. <sup>45</sup> Chorna chë bayëjna jana y inye canýsëfta bayëjenga chabiama más opëjenga jobiatšana y nyetscanga choye jamashjnana chë boyabásabeñe joyéanama. Y chca, chë boyabása tempscama más bacna entśá jtsemnana, chora chë natsanama más bayëjenga abamna causa. Morsca puerte bacna entśángaftaca cachcá echanjochnëngo ca” —Jesús tojánayana.

*Chë Jesusbe ndegombre pamillanguentsënga*  
(Mc 3.31-35; Lc 8.19-21)

<sup>46</sup> Jesús cabá entśanga yojsëtsëtsnaye ora, chabe mamá y catśátanga tmojánashjajna y imojtseboşe Jesúsëftaca jóyebuambayama. Nye shjoca imojtsemna; <sup>47</sup> asna, canye boyabása Jesúsbioye tbojanbuayená: —Acbe mamá y acbe catśátanga shjoca montsemna y montseboşe ácaftaca jóyebuambayama ca.

<sup>48</sup> Pero Jesús chë jauenayama tojánabioye tbojanianyana: —¿Nda atśbe mamá yomna, y ndëmuanýenga atśbe catśátanga ca?

<sup>49</sup> Y cachora chabe cucuatşe tojanatsbaná, chabe uatsjëndayënga tojanënyanyé y tojánayana: —Quemënga montsemna mo atśbe mamacá y mo atśbe catśatangcá. <sup>50</sup> Er ndánaca, ntśamo atśbe Taitá, celoca endméná yoboścá tojtsama, jtsemnana atśbe catśata, atśbe uabena y atśbe mamá, atśbe ndegombre pamillanguentsá ca —Jesús tojánayana.

## 13

*Chë jenabe cuento*  
(Mc 4.1-9; Lc 8.4-8)

<sup>1</sup> Cach te, Jesús yebnentšana tojëftsanbocna y uafjajónaye tsachoca tojanótbema. <sup>2</sup> Mallajta entśanga choye tmojanobeconá; as Jesús, chë uafjajónayentşe yojanamna canye barquëshoye tojánaşëngo, tojanótbema; y chë entśangna tsachoca imojtsemna. <sup>3</sup> Chorna ba soyëngama cuentëngaca chënga tojanabuatambá.

Mëntśá tojanéyana: “Canye jená chë jénaye jaujquëshama yojëftsebocna. <sup>4</sup> Yojsëjquëshaye orna, básiëfta jénaye benache juachañe yojuatquécjana, pero chë jaja shloftşënga imojástjajna y lempe imojtsósañe. <sup>5</sup> Inye meshëngna ndëtsbenguñe yojuatquécjana, ndoñe yapa fshantse binýnentşe. Chiñna betscó yojuábocna, fshantse ndoñe jashenocana yonjanmëna causa, <sup>6</sup> pero shinye yojábocna ora, puerte yojojënyána y yojsancta; y yojsábojo, bëtscá tbëtëjënga tondaye causa. <sup>7</sup> Inye meshëngna ucmëshangañe yojuatquécjana, y chë ucmëshangá yojuájua orna, lempe yojsatscué. <sup>8</sup> Y inye meshëngna, uanguanëshiñe



yojuatquécjána y puerte botamana chiñe yojuashajo: ínÿenache nÿe canÿe jénayentšána mo patse meshënga yojuashájona, ínÿeñna mo chñënguana bnëtsana meshe y ínÿeñna mo unga bnëtsana meshe.”

<sup>9</sup> Jesús chca jacuéntama tojanpochocá ora, mëntšá tojánayana: “Chë jouenama tmojtsobenënga, šmochjouena ca.”

*Ndáyeca Jesús cuentëngaca yojánabuatambaye  
(Mc 4.10-12; Lc 8.9-10)*

<sup>10</sup> Chora chë uatsjëndayënga tmojanobeconá y Jesús tmojan-tjá: —¿Ndáyeca entšanga cuentëngaca cojtsabuatambá ca?

<sup>11</sup> As Jesús tojanëjua: —Bëngbe Bëtsá tšëngaftanga cmontsinÿanÿná nÿetsca chë mo iytëmencá yomna soyënga chabe amëndayama, pero chë ínÿengbioyna ndoñe. <sup>12</sup> Nda tojtsebomnábioye más jatštayana y chca cha corente bëtscá jtsebomnana; pero chë tondaye tondbomnábioyna, chë batšatema tobomna sóynaca mochántseboca. <sup>13</sup> Chíyeca atše cuentëngaca chënga sëntšëtsëtsná. Chca, masque corente chamotsafšna, ndoñe chamondobená Bëngbe Bëtsabe soyënga jinÿama; y masque becá chë soyënga chamouena, ndoñe tšabá quemochátuenana, ni queochátësertana. <sup>14</sup> Chcáyecna, chëngbeñe entsemna cachcá ntšamo chë Bëngbe Bëtsabe juabna oyebuambnayá Isaías tojanayancá:

Masque becá chamouena, ndoñe queochátësertana.

Masque puerte chamotsantješna, ndoñe quemochátinÿe

<sup>15</sup> Quem entšanga ndoñe quemátsboše botamana jajuaboy-ana;

chënga uamatsáchtönënga montsemna

y chëngbe bomínÿnaca cachcá.

Chca ndóñesna, chënga muantsobena jinÿama, jouenama y ainaniñe josértama;

y chca, chënga bacna soyënga amana muantsajbaná y atšbe benache muantishache,

as atše chënga chayatsebacama ca —cha tojëftsanbema.

<sup>16</sup> “Tšëngaftangna oyejuayënga šmochanjoyena, er šmondobomna bominÿe y matscuašënga Bëngbe Bëtsabe soyënga jinÿama y jouenama. <sup>17</sup> Ndegombre cbëyana, banga Bëngbe Bëtsabe juabna oyebuambnayënga y nÿetsca soyënguiñe tšabá amënga tmonjánbošena chë tšëngaftanga šmontsonÿá soyënga jinÿama, y ndoñe chemátaninÿe; tmonjánbošena chë tšëngaftanga šmontsuenana soyënga jouenama, y ndoñe chemátanuena ca” —Jesús tojanëyana.

*Jesús chë jenabe cuentama tojanabuayená  
(Mc 4.13-20; Lc 8.11-15)*

18 “Chcasna, oído šmochjajajo; chë jenabe cuento mëntšá endayana: 19 Chë Bëngbe Bëtsabe amëndayama tmojouena y ndoñe tontsësertana entšanga mondmëna mo chë benache juachañe yojuatquécjana jenaycá; Satanás jabana Bëngbe Bëtsabe palabra chëngbe ainanentšana jabétsabuajuanama, chënga chiñe ndoñe chamondëtsošbuáchema. 20 Y chë ndëtšbenguiñe yojuatquécjana jénaye entsemna mo chë aiñe Bëngbe Bëtsabe palabra tmojouena y Bëngbe Bëtsábeñe jtsošbuáchiyama oyejuayënga tmojtsemna entšangcá; 21 pero ndoñe nyets tempo chana jocochájuana, y chca, ndoñe bayté Bëngbe Bëtsáftaca ntjëftsemnëngana, ndoñe yapa tmonsasbuaché causa. Inyenga chëngbioye mochantsëbuayënja y Bëngbe Bëtsábeñe betsošbuáchiyama mochanjasúfrianga; chíyeca chënga Bëngbe Bëtsabe palabra cachcá mochanjesonýaye. 22 Chë uchmëshangañe yojuatquécjana jénaye entsemna mo chë Bëngbe Bëtsabe palabra tmojouena entšangcá, pero quem luarentša soyëngaca oyejuayënga jtsemnana yapa mochántsenojuabnaye y mallajta crocénana y ba soyënga jtsebmnama mochántseboše. Chíyeca chënga Bëngbe Bëtsabe palabra jtsebnëtjombana y ntšamo cha tojayancá ndoñe ntsamana. 23 Pero chë uanguanëshiñe yojuatquécjana jénaye entsemna mo chë Bëngbe Bëtsabe palabra tmojouena y botamana jósertana entšangcá. Mo canye betiye puerta tsabá tojtseshajuancá, chënga bëtscá tsabe soyënga Bëngbe Bëtsabiama mochántsama. Inyengna ínÿengbiama más bëtscá soyënga mochántsama, y chca, ínÿenga jtsemnana mo chë patse meshënga tojanshajo jenaycá, ínÿenga mo chë chnënguana bnëtsancá y ínÿengna mo chë unga bnëtsana meshënga tojanshajo jenaycá ca” —Jesús tojanabuayená.

### *Chë tríquañe bacna shacuanama cuento*

24 Jesús mëntšánaca tojanacuntá: “Bëngbe Bëtsabe amëndayana endmëna mo chë tsabe jenaycá, canye boyabása chabe jajañe yojáje. 25 Pero nyetscanga imojtsomañe orna, chabe uayayá yojáshjango y chë trigo jeniñe bacna shácuana yojesejé y yojtsatoñe. 26 Y chë trigo yojuájua y ya yojtseshajuana orna, chë bacna shácuanaënaca yojuábocna. 27 As chë peonga imojá chë nduiño jauyanama: ‘Bacó, chë jajañe tsabe jénaye tconjanjé y as, ¿ndáyeca chë bacna shácuana chiñe tojuábocna ca?’ 28 Y chë nduiño yojáuyana: ‘Atšbe uayayá chca tojama ca.’ Chora chë peonga imojatjaye: ‘¿Quectseboše bënga fchayá chë bacna shácuana jetsejashtsëtsama ca?’ 29 Pero chë nduiño yojáuyana: ‘Ndoñe. Chë bacna shácuana smojtsejashtsëtsana ora, chë trígnaca šmattsejashtse ca. 30 Más

tšabana, cachcá mochjonÿaye cánÿiñe chaójuama, chë jaja saná játbanama tempo chaojobuáchëntscuana. Chora chë trabájayënga chanjichamuá y chanjámëndaye natsana chë bacna shácuana chamotsejashtsëtse y chamotsentsacuacjuá jtsejuinÿiyama, y chentšana chë shajuana chamuatbaná y atšbe grano uaquëcjnaye yebniñe chamotsatsuamá ca' ” — Jesús tojánayana.

*Chë mostaztiye jenayama cuento*

*(Mc 4.30-32; Lc 13.18-19)*

<sup>31</sup> Jesús mēntšánaca tojanacuntá: “Bēngbe Bētsabe amēndayana endmēna mo canÿe mostaza betiye jenaycá, canÿe boyabása chabe jajañe yojáje. <sup>32</sup> Ndegombre, nÿetsca jenayëngama chë mostaza jénaye chë más básetema endmēna, pero tojójua orna, chë jajañentše chë más bēts betiye jóbemana. Tša bēts betiye jtsemnana, chíyeca ba buacuashangá jtsabomnana y chë jaja shloftšënga jana y chiñe uajajonētemēngá jauábopormana ca” — Jesús tojánayana.

*Chë levadurama cuento*

*(Lc 13.20-21)*

<sup>33</sup> Quem inÿe cuétnaca tojanēyana: “Bēngbe Bētsabe amēndayana endmēna mo levadurcá; canÿe shembása chana jenájua bana unga medida arninÿañe, nÿetsana chauabochama ca.”

*Ndayeca Jesús entšanga cuentëngaca yojanabuayiyná*

*(Mc 4.33-34)*

<sup>34</sup> Jesús nÿetsca chë soyëngama lempe cuentëngaca entšanga jtsétsétsnayana, y cuentëngaca ndoñesna ndoñe yonjanoyebuambná. <sup>35</sup> Chca yojamna ndayá cachcá chaochnënguama ntšamo chë Bēngbe Bētsabe juabna oyebuambnayá tojanayancá, mēntšá:

Jabuátambamna cuentëngaca chanjóyebuambaye;  
chanjayana chë iytēmena soyëngama y chë entšanga ndoñe  
mondētatsēmbo soyëngámna;  
Bēngbe Bētsá quem luare tojanma orscana chë soyënga yomna  
ca — cha tojánayana.

*Chë tríguañe bacna shácuana cuentama Jesús tojanabuayená*

<sup>36</sup> Chentšana Jesús chë entšanga tojtanichamó y yebnoye tojtanamáshëngo. Chentšna chabe uatsjéndayënga tmojanimpadá ndayá chë bacna shacuanama cuento betsayancá chauabuayenama. <sup>37</sup> As Jesús tojanēyana: “Chë tšabe jénaye jená endmēna chë Bēngbe Bētsá Entšá tbojanbemá, <sup>38</sup> y chë jajañna, quem luare. Chë tšabe jénaye entsemna chë Bēngbe Bētsabe amēndayoye mochjámashjna entšanga, y chë bacna shácuana entsemna chë bacna

bayëjengbe amëndayabe entšanga, <sup>39</sup> y chë uayayá, chë bacna shácuana yojáje chana, Satanás. Chë jaja saná atbanayana entsemna chë quem luare jopochócama chaojobuache ora, y chë trabájayëngna chë angelotémënga. <sup>40</sup> Ntšamo chë bacna shácuana jtsejashtsëtsana y iñoye jtsatmetšana jtsejuin'yiyama, cachcá echántsemna quem luare jopochócama te. <sup>41</sup> Chorna, chë Bëngbe Bëtsá Entšá tbojanbemá chabe angelotémënga echanjichamuá chë ín'yënga bacna soye chamomama amënga y chë bacna soyënga amënga chabe amëndayentšana chamotsajuanayama. <sup>42</sup> Y chora chëngbioye chë uabouana iñeshoye mochantsésetjango y chentše puerte mochanjenóbošachna y chë tsetšanama juatsašënga mochantsenoftëšjojnaye. <sup>43</sup> Chora, chë ntšamo Bëngbe Bëtsá yomandacá amëngna corente mo shinycá mochantsebuashin'yin'yana chëngbe Taitá, Bëngbe Bëtsabe amëndayoca. Chë jouenama tmojtsobenënga, šmochjouena ca" —chora Jesús tojánayana.

#### *Chë fshantsiñe uaiytëmena bomnanama cuento*

<sup>44</sup> "Bëngbe Bëtsabe amëndayana endmëna mo chë fshantsiñe uaiytëmena bomnancá. Canye boyabása chë bomnana yojuin'yëna y chentšana iytëcana cachentše yojesatbontsá. Corente oyejuayá yojtá, nyetsca chabe bomna soyënga yojetsatobuiye y chentšana chë fshantse yojtobuámiñe ca" —Jesús tojánayana.

#### *Chë corente uámana fjantse ndëtsëtëmama cuento*

<sup>45</sup> "Mo canye entšá uámana fjantse ndëtsëtëmënga obuamnañacánaca endmëna chë Bëngbe Bëtsabe amëndayana. <sup>46</sup> Chana, canye corente uámana ndëtsëtëma yojín'yëna ora, yojtá y lempe chë inabomna soyënga yojetsatobuiye y chë ndëtsëtëma yojtobuámiñe ca" —Jesús tojánayana.

#### *Chë atarraiëshama cuento*

<sup>47</sup> "Bëngbe Bëtsabe amëndayana endmëna mo canye atarraiëshacá, buyeshoye jutšenana y nyetsca beonga jashebuáyana. <sup>48</sup> Chë atarraiëshá jútjena tojtsamna orna, chë beonga ashebuánayënga jtsashëbjátsëcana, tsachoye juyambana y chentše juatbemana chë beonga jabocacayama; chë tšábënga sbarëquënguiñe juatsuámana y chë ndoñe tšábëngna jtsëtšanana. <sup>49</sup> Cachcá echanjochnëngo quem luare jopochócama tempo chaojobuache ora. Chë angelotémënga mochanjábocana chë tšabe entšángbentshana bacna entšanga jaluárama, <sup>50</sup> y chë bacna entšangna chë uabouana iñeshoye mochantsatquëcjaye, y chentše puerte mochanjenóbošachna y chë tsetšanama juatsašënga mochantsenoftëšjojnaye ca" —Jesús tojanacuntá.

*Anteo y tsēm uámana bomnana*

<sup>51</sup> Chora chabe uatsjédayēnga Jesús tojanatjá: —¿Lempe chama quecmojtsésertana ca?

Y chēnga tmojanjuá: —Arseñor, aíñe ca.

<sup>52</sup> As Jesús tojanéyana: —Canýe ley abuatambayá jtsetatšēmbuana ndayá Bēngbe Bētsá tempo Moisesbiajana yojanoyebuambná soyēngama. Ntšamo Bēngbe Bētsabe amēndayana bétsemmama cha tojtsatsjendá orna, mo canýe yebnentša nduiñcá cha jtsemmama. Chē nduiñna chabe grano uaquēcjnaye yebnocana anteo y tsēm uámana bomnana juabocnana. Cachcá chē ley abuatambayá, Bēngbe Bētsabe soyēngama jtsabuátambayana chē tempo Bēngbe Bētsá tojanoyebuambá soyēngama y chē tsēm soyēngnaca Bēngbe Bētsabe amēndayama ca —tojanéyana.

*Jesús Nazaretoca*

(Mc 6.1-6; Lc 4.16-30)

<sup>53</sup> Jesús chē soyēnga jacuéntama tojanpochocá ora, chentšana tojtsanoñe. <sup>54</sup> Y cachabe luaroye tojtashjango y chentša judiēngbe enefjuana yebnentše tojanontšē jabuátambama. Entšanga ojnánēnga imojtsichamo: —¿Chē lempe yojtsetatšēmbcá ndēmoca mua tojuatsjinýe ca? ¿Ntšamo nantsobena chca bēts soyēnga jamama ca? <sup>55</sup> ¿Mua ndoñe yondmēna chē calpinterbe uaquiñá y chabe mamá ndoñe María? ¿Mua ndoñe yondmēna Santiago, José, Simón y Júdasbe catsata, <sup>56</sup> y chabe uabénganga ndoñe muentše bēngaftaca mondoyena? ¿Ndayentšana lempe chca mua yojtsebomna ca? —chēnga imojtsichamo.

<sup>57</sup> Y chē causa chē entšanga tmojanotjayaná y ndoñe imontseboše cha joyeunayana. Pero Jesús tojanéyana: —Nýetsquénache canýe Bēngbe Bētsabe juabna oyebuambnayá bētsá jabemēngana, pero cachabe luarentše, cachabe yebnentše ndoñe ca.

<sup>58</sup> Chíyeca chentše Jesús ndoñe tonjēftsanma ba bēts soyēnga Bēngbe Bētsabe obenánaca, chē entšanga chábeñe ndoñe montsanošbuaché causa.

**14***Ntšamo Juan chē Ubayaná tojanóbana*

(Mc 6.14-29; Lc 9.7-9)

<sup>1</sup> Chē tempo, Rey Herodes, chē Galileoca mandayá tojanuena ntšamo nýetsca entšanga Jesucristbiana imojtsichamcá.

<sup>2</sup> As cha chabe oservénēnga tojanéyana: “Mua Juan chē Ubayaná ctsemna, obanēnguentšana tojtayena, chíyeca chca obenana bēts soyēnga jamama yojtsebomna ca.”

<sup>3</sup> Juan cabá ainá ora, Herodes tojanmandá cha chamishache, cadenějuangaca chamobátsēca y chca cárceloye jutámíama. Herodes chca tojanma Herodíasbe causa, chabe catšata Felipe shema. <sup>4</sup> Juan Heródesbioye mēntšá ibnauácacana: “Ndoñe quenátslesenciana aca acbe catšatbe shémaftaca jobouamayama, acbe catšata cabá ainá yotsomñe ora ca.”

<sup>5</sup> Y chama Herodes yojtseboše Juan jóbana, pero entšangbiana yojtsauatja, er chēnga imnajuabnaye Juan ndegombre Bēngbe Bētsabe obenánaca yojanoyebuambná ca. <sup>6</sup> Pero Heródesbe cumpleaños oboyejuaye ora, Herodíasbe bembe entšangbe delante tojanlantsá y Herodes puerta chama yojtsóyejuaye. <sup>7</sup> Chíyeca Herodes, jajúrase, tbojanšbuachená ndayánaca jatšetayana, ntšamo tbojotjañcá. <sup>8</sup> Y Herodíasna lempe bēmbēbioye ibojabuayená ntšamo Herodes jojuama. As chē bembe tbojaníyana: “Canye šcneniñe Juan chē Ubayanabe bestšaše šmatšetá ca.”

<sup>9</sup> Herodes chē soyama tbojanongmé, pero chē ófjanēngbe delante jajúrase tbojanšbuachená causa, yojamánda chca chaotsemnama. <sup>10</sup> Y as tojanmandá chē Juan yojanētámenoca chabe bestšaše chamuetséstjanguama. <sup>11</sup> Chentšana, canye šcneniñe chē bestšaše tmojanamba y chē tobiáše tmojaněntšabuaché y chana, chabe mamábioye.

<sup>12</sup> Chentšana, Juanbe ústonēnga tmojánashjajna, chabe cuerpo tmojésanocñe y tmojána jauábtontsama. Y chora, Jesús yojtsemnoye chēnga tmojána y chē soyēngama tmojancuentá.

*Jesús shachna uaranga boyabásenga saná tojanacaredadó  
(Mc 6.30-44; Lc 9.10-17; Jn 6.1-14)*

<sup>13</sup> Jesús chca tojanuena ora, canye barquēshañe tojtsanoñe canye bēn luaroye, entšanga ndoyena luaroye. Pero entšanga chama imojátatšēmbona y chē pueblēnguentshana tmojánbocana shecuátšeca cha juastama. <sup>14</sup> Chentšana, chē barquēshoicana tojtanastjango ora, Jesús ba entšanga tojánanye, chē cha tmojánguanguēnga. Chēngbiana tbojanongmé y chē entšanguentshana ba šoquēnga tojanashná. <sup>15</sup> Ya jetiñe yojtsemna, chíyeca chē uatsjéndayēnga Jesúsbioye tmojanobeconá y tmojaníyana: —Ya jetiñe entsemna y quem luariñe ndocná quenatíyena. Entšanga cuantichamuá, pueblotémēngoye chamotsoñama, saná chamobuámiñama ca.

<sup>16</sup> As Jesús tojanējua: —Ndoñe quenátsiyta chēnga chamotsoñama. Tšēngaftanga saná šmochjacaredádaye ca.

<sup>17</sup> Y chēnga tmojanjuá: —Muentše tondaye queftsátsbomna; nye shachna tandēse y uta beónata ca.

<sup>18</sup> As Jesús tojanējyana: —Chē soyēnga moye miyēbo ca.

19 Chentšana Jesús tojanmandá entšanga chamoshěntsjatbiamama. Chorna, chě shachna tanděše y chě uta beónata tojanca, celoye tojanontješé y Běngbe Bětsábioye chama tbojtanchuá. Chora chě saná tojanjatá, chabe uatsjéndayěnga tojanějátaye, y chěngna nýetsca entšanga tmojanacaredadó. <sup>20</sup> Nýetsca entšanga tmojanse jtoshachaye nýetsá y cabá chě ojamnětéměngaca bnětsana uta sbarěcua tmojanajutjé. <sup>21</sup> Chě tmojansěnga imojamna mo shachna uaranga boyabásenga, shembásenga y básenga ntjacuntacá.

*Jesús bėjaye juatsbuacá yojsaye  
(Mc 6.45-52; Jn 6.16-21)*

<sup>22</sup> Chentšana, Jesús chabe uatsjéndayěnga tojanaměndá chě barquěshoye jtamashjna y chě uafjónaye chenguánoica chabe natsana jashjajnana. Chěntscuana Jesús entšanga yojtichamuá. <sup>23</sup> Nýetscanga tojtanichamó orna, Jesús canýe tjoye tojántsjua canýa jtsemnama, Běngbe Bětsáftaca jencuéntama. Yojaibétata ora, cha canýa chentše yojtsemna, <sup>24</sup> y chě barquěshana tsachocana bēnoca yojsamna. Y chě olěshěnga chě barquěsha yojsájantšetaye, chě binýia chěngbe contra yojtsemna causa. <sup>25</sup> Ya bínýanoyna, Jesús chěngbioye yojobconá; bėjaye juatsbuacá yojsaye. <sup>26</sup> Chabe uatsjéndayěnga chca cha tmojáninýe orna, tša imojocochauatjaná y puerte auatjanáněnga tmojanoyó: —¡Canýe añeměse entsemna ca!

<sup>27</sup> Pero chora Jesús tojaněyana: —¡Añemo šmochtsebomna, atše Jesús sěndmēna; ndoñe matauatjěngana ca!

<sup>28</sup> Chora Pedro, Jesúsbioye tbojaniyana: —Běngbe Utabná, ndegombre aca tcojtsemněse, momandá atše bėjaye juatsbuacá ácbioye chayá ca.

<sup>29</sup> Y Jesús tbojaniyana: —Mabo ca.

Chora Pedro chě barquěshoicana tojánastjango y tojanontšé bėjaye juatsbuacá Jesúsbioye jama. <sup>30</sup> Pero chě binýia tša jabuache yojtsemnama tojáninýe ora, Pedro puerte yojtsauatja y tbojanontšé jtsenatjěmbambana. Chíyeca cha jabuache tojanchembo: —¡Běngbe Utabná, šmatsbocá ca!

<sup>31</sup> Y cachora Jesús tbojtano buácuētěntšiye y tbojaniyana: —¡Tša batšatema ošbuachiyá! ¿Ndáyeca ndoñe bětscá átšbeñe contsošbuaché ca?

<sup>32</sup> Chentšana chě barquěshoye chata tbojtanamáshěngo y cachora chě binýia bonguana yojsatsmēna. <sup>33</sup> Y chora, chě barquěshoye imojtsemněnga Jesusbe shecuatšentše tmojanoshamentšé y tmojaniyana: —¡Aca ndegombre Běngbe Bětsabe Uaquíñá comna ca!

*Genesaret ca uabáinoca, Jesús ba šoquěnga tojanashná  
(Mc 6.53-56)*

<sup>34</sup> Chë uafjajónaye tmojánenashbuachengo y canÿe luare Genesaret ca uabáinoÿe tmojánashjajna. <sup>35</sup> Chentša entsanga Jesús tmojantëmbá ora, chë luarentša nÿetsca entsanga chama tmojántatsëmbona. As chë entsanga chëngbe šoquënga Jesúsbioÿe tmojanënatse. <sup>36</sup> Y imojtseimpadana nÿe mo chabe entsayá sibiájuanaca juabojajuama chë šoquënga chaualesenciama. Y nÿetscanga chabe entsayá sibiájua tmojanábojajënga, shnánënga imojtsatoquédaye.

## 15

*Ndáyeca canÿe entsá Bëngbe Bëtsabe delante ndoñe tšabia nántsemna*  
(Mc 7.1-23)

<sup>1</sup> Chora básefta fariseunga y judiëngbe ley abuátambayënga, Jerusalenocana tmojánabënga, Jesúsbioÿe tmojanobeconá y tmojanianyana: <sup>2</sup> —¿Ndáyeca acbe uatsjëndayënga ndoñe montsama chë ntšamo bëngbe bëts taitanga monjanamancá ca? ¿Ndáyeca ndoñe ntsacuentšabiana ndayá jasama ora, ntšamo bënga chë judiënga fsënduamancá, Bëngbe Bëtsabe delante tšábenga jtsatsmënama ca?

<sup>3</sup> As Jesús tojanëjua: —¿Y ndáyeca tšëngaftanga ndoñe šmontsama ntšamo Bëngbe Bëtsá tojanmandacá, nÿe cach tšëngaftangbe bëtsëtsanga imnétsama soyënga jtsamama ca? <sup>4</sup> Bëngbe Bëtsá mëntšá tojanmandá: “Acbe bëtsëtsata stëtšoye ndoñe catjáquedaye”, y “nda cachabe bëtsëtsabiama podesca tojóyebuambase, chana jóbanama jtsemnana ca.” <sup>5</sup> Pero tšëngaftanga šmondbétsichamo canÿe entsá canobena chabe taitá o chabe mamá jauyanana: “Lempe ntšamo sëndbomncá Bëngbe Bëtsá jasérviana entsemna, chíyeca tondaye quetsátsbomna aca juajabuáchama ca”; <sup>6</sup> y šmondbétsichamo nÿe ndánaca chca tojayanëse, ya ndoñe ntsemnana chabe taitá o chabe mamá stëtšoye ndoñe ntjaquédana, ni ntjuajabuáchana ca. Y chca, tšëngaftangbiama tondaye ntsámanana ntšamo Bëngbe Bëtsá tojanmandacá, y aíñe šmontsama ntšamo tšëngaftangbe bëtsëtsanga imojanamancá. <sup>7</sup> ¡Bacna entsanga, ntšamo ndegombre šmojuabnacá ndinÿinÿnayënga! Nÿe tšabá chë Bëngbe Bëtsabe juabna oyebuambnayá Isaías tšëngaftangbiama tojanoyebuambá, mëntšá tojánayana ora:

<sup>8</sup> Bëngbe Bëtsá tonjayana: “Quem entsanga mondbétsichamo Bëngbe Bëtsá tša tšabia yomna ca; chca nÿe uayásaca, pero chëngbe ainanentše atšbiama ndocna tšabe juabnéngaca.

<sup>9</sup> Chënga nÿe bonamente mondbétsichamo: Bëngbe Bëtsá tša tšabia yomna ca;



chënga nÿe entsangbe mandënga jtsabuátambayana y Bëngbe Bëtsabe mandënga ndoñe ca” —cha tojánayana.

<sup>10</sup> Chentsana Jesús entsanga tojánachembo y tojanëyana: —Smochjouena y chacmësertá. <sup>11</sup> Ndayá entsá tojtsesacá, ndoñe quebochátsbema Bëngbe Bëtsabe delante ndoñe tšabia. Inÿetsá comna: ndayá entsá tojtsejuabná y tojtsoyebuambnacá endobena cha jabemana Bëngbe Bëtsabe delante ndoñe tšabia ca.

<sup>12</sup> Chora chë uatsjëndayënga Jesúsbioye tmojanobeconá y tmojanianyana: —¿Quéctsetatšëmbo, ntšamo tconjayanama chë fariseunga ndoñe tšabá chenatëuénana ca?

<sup>13</sup> As Jesús tojanëjua: —Ndaye betiye atšbe Taitá celocá ndoñe tonjájese, tbëtëjocana mochántsejashtse. Cachcá echanjama chë nÿe entsangbe buatëmbana soyëngaca. <sup>14</sup> Cachcá mónÿaye; chënga montsemna mo jtanënga inÿe jtanënga unachayëngcá. Y canÿe jtaná inÿe jtaná tbojtsánachase, nÿets útata canÿe tbuabentše bochanjetsótsatše ca —Jesús tojánayana.

<sup>15</sup> Chora Pedro, Jesúsbioye tbojanianyana: —Ntšamo chë cuento bétsayanama šmabuayená ca.

<sup>16</sup> As Jesús tojanëjua: —¿Tšëngaftángnaca cabá ndoñe cmontsësertana ca? <sup>17</sup> ¿Cabá ndoñe cmontsësertana lempe ntšamo šmojascá uafsbioye jomashënguana y chentsana cuerpentšana jtabocnana? <sup>18</sup> Pero ntšamo šmojtsoyebuambnacana lempe ainanocana jtsóbocanana y chë soye endobena tšëngaftangbioye Bëngbe Bëtsabe delante ndoñe tšábënga jábiamana. <sup>19</sup> Ainanocana jtsóbocanana bacna juabnënga: jenóbama, shema o boyábioye ínÿaftaca jaíngñama, shembása o boyabásaftaca bacna soye jamama, jatbëbama, jobostérama y ínÿabiamama jtsayátsenayama. <sup>20</sup> Chë soyënga cocayé jtsobenana entsábioye Bëngbe Bëtsabe delante ndoñe tšabia jabemama; pero chë ndoñe ntsacuentšabiana ndayá jasama ora, ndoñe ntsobenana Bëngbe Bëtsabe delante ndoñe tšabia jabemama ca —Jesús tojánayana.

*Canÿe shembása inÿe luarocana ashjangoná Jesúsbeñe yojtsošbuaché*

*(Mc 7.24-30)*

<sup>21</sup> Jesús chentsana, Tiro y Sidón luarëngoye tojtsanoñe. <sup>22</sup> Canÿe shembása Caná luarocá chentše inoyena; cha Jesúsbioye yojobeconá y mëntšá yojtsáyebuache: —¡Utabná, Rey Davídbentšana Entšá, šmotselastemá! ¡Atšbe bembe puerta entsesufrina, bacna bayëjbe juabna entsebmna causa ca!

<sup>23</sup> Jesús ndocá tbonjanjuá. As chabe uatsjëndayënga tmojanobeconá y tmojanimpadá: —Chë shembása mëyana chaotsatoñe; bëngbe ústonoye yapa entsáyebuache ca.

24 As Jesús tojánayana: —Bëngbe Bëtsá atše šonjichmó jt-sanÿenama nÿe chë entšanga, chë mo ótsena oveshëngcá imomnënga Israeloquënga, y chë ndoñe judiëngna ndoñe ca.

25 Pero chë shembása tojána, Jesusbe shecuatšentše tojanoshamentšé y tbojaniyana: —¡Utabná! Diosmanda pavor šmotsebema. ¡šmotsajabuache ca!

26 Y Jesús tbojanjuá: —Chë judiënga mondmëna mo Bëngbe Bëtsabe basengcá y atše ácbioye tbojuajabuache y chëngbioye ndóñesna, nántsemna mo chë básengbe saná chënga cuaftsëbaquëcá y quešënga ftsëbuajocá. Chca jamana ndoñe tšabá quenátsmëna ca.

27 As cha tbojanjuá: —Arseñor. Pero chë quešëngnaca chëngbe nduiñëngbe mesëshentšana tmojatquécjanatemënga mondbase, chë nduiñënga tmojtšesá ora. Chcasna, Diosmanda šmotsajabuache ca.

28 Chora Jesús tbojaniyana:

—¡Shembása, Bëngbe Bëtsábeñe tša ošbuachiyá comna! Ntšamo cojtsebošcá chca chaotsemna ca.

Y cach orscana chabe bembe tšabá yojtsatsmëna.

### *Jesús ba šoquënga tojanashná*

29 Jesús chentšana tojëftsanbocna y chë Galilea uafjájónaye tsachoye tojána. Chentšana, canÿe batsjoye tojántsua y choca tojanótbema. 30 Mallajta entšanga Jesús yojtsemnentše tmojánashjajna, y coshetënga, jtanënga, tšabá jobónjuama ndobenënga, ndëbianga y ba šocana bomnënga imojtsënachaye. Jesusbe shecuatšentše tmojanëshejango y cha nÿetscanga tojanashná. 31 Y chca orna, chë entšanga tmojáninÿe: chë ndëbianga imojtsatoyebuambná, chë tšabá jobónjuama ndobenënga tšabá imojtsatsmëna, chë coshetënga tšabá imojtsatana y chë jtanëngna yojtsëbinÿna; y chama chënga corente ojnánánënga imojtsemna. Chora chënga tmojanontšé jëtschuayana chë Israelentša entšanga imojánadorana Bëngbe Bëtsá.

### *Jesús canta uaranga boyabásënga saná tojanacaredadó* (Mc 8.1-10)

32 Chentšana Jesús, chabe uatsjëndayënga tojánachembo y tojanëyana: —Quem entšangbiamá šontsengmena, er ya unga te chënga átšeftaca muentše montsemna y jasama tondaye quemátsbomna. Atše ndoñe quetsátsboše ntjascá cachëngbe yebnoye chënga jtichamuana, er benachiñe shëntsama nantsabuátëcja ca.

33 As chabe uatsjëndayënga tmojantjá: —¿Ntšamo muatjobenaye quem luarentše, ndocna entšá ndoyenentše, chëfta entšangbiamá saná jinÿenama ca?

<sup>34</sup> Y Jesús tojanatjá: —¿Bueta tandëse šmojtsebmoma ca?

Y chënga tmojanjuá: —Canÿsëfta tandëse y básefta beonatémënga ca.

<sup>35</sup> Chora Jesús tojanamëndá nÿetsca entšanga fshantsiñe chamotbiamama. <sup>36</sup> As chë canÿsëfta tandëse y chë

beonatémënga tojanca; Bëngbe Bëtsábioye chama tbojtanchuá, chë saná tojanjatá y chabe uatsjëndayënga tojanëjatá. Chentšana nÿetsca entšángbioye tmojanacaredadó.

<sup>37</sup> Nÿetsca entšanga tmojanse jtoshachaye nÿetsá. Y chentšana cabá canÿsëfta bëts sbarëcua tmojanajutjé chë tojanójamëtemëngaca. <sup>38</sup> Chë tmojansënga imojamna canta

uaranga boyabásenga, shembásenga y básenga ntjacuntacá.

<sup>39</sup> Chentšana Jesús, chë entšanga tojtanichamó, barquëshoye tojanamashëngo y Magadán luaroye tojtsanoñe.

## 16

*Chë fariseunga y saduceunga tmojánbošena Jesús chaoma canÿe bëts soye*

*(Mc 8.11-13; Lc 12.54-56)*

<sup>1</sup> Fariseunga y saduceunga tmojána Jesús jinÿama, y jisháchichiyama imojtseimpadana canÿe bëts soye chaoma, as jtsetatšëmbuama Jesusbe obenana ndegombre Bëngbe Bëtsábiocana tainóbocanama.

<sup>2</sup> Pero Jesús tojanëjua: “Tšëngaftanga jetiñoye šmondbétsichamo: ‘Yëfse tšabe te echántsemna, er celoca buánganiñe entsemna ca.’ <sup>3</sup> Y cachëse šmondbétsichamo:

‘Mënté echanjuafté, er celoca buánganiñe y ibetiñe entsemna ca.’ Tšëngaftanga celoye jontješiyëse, ntšamo chë tempo yochtsemnana tša tšabá jayanama šmojtsobenëse, ¿ndáyeca ndoñe šmontsobena jtsetatšëmbuana ndaye bëts soye Bëngbe Bëtsá quem tempo cmojtsinÿanÿnama? <sup>4</sup> Quem puerte

bacna entšanga y ndošbuáchiyënga montseboše atše canÿe bëts soye chaima, obenana jinÿanÿiyama; pero ndoñe chca quemochátinÿe, sinó nÿe chë ndayá yomna mo chë Bëngbe Bëtsabe juabna oyebuambnayá Jonásoftaca tojanopasá soycá ca” —Jesús tojánayana.

Chora Jesús tojésanabashejuana y chentšana tojtsanoñe.

*Jesús tojanabuayená chë fariseungbe buatëmbana soyëngama*  
*(Mc 8.14-21)*

<sup>5</sup> Chë uafjónaye chenguanocana chënga tmojtanabo ora, chë uatsjëndayënga yojésebnëtjomba tandëse jesocñana.

<sup>6</sup> Chora Jesús tojanëyana: —Šmochtsantješna; cuedado šmochtsebmoma chë fariseunga y saduceungbe levadurama ca.

<sup>7</sup> Pero chë uatsjéndayëngna imojtsenatsëtsnaye: —Chca entsichamo, bënga tandëse ndoñe tmonjesocñama ca.

<sup>8</sup> Jesús chë soye yojtsetátšëmbo; chíyeca mëntšá tojanëyana: —¿Ndáyeca tandëšama šmojtsenatsëtsná ca? ¡Tša batšatema ošbuáchiyana šmobomna! <sup>9</sup> ¿Cabá ndoñe cmontsësertana y ndoñe šmontsabouínÿna chë shachna tandëšentsana shachna uaranga entšanga sënjanëjuatšema y bnëtsana uta sbarëcua šmonjánajutjema? <sup>10</sup> ¿Y ndoñe šmontsabouínÿna chë canÿsëfta tandëšentsana canta uaranga entšanga sënjanëjuatšema y canÿsëfta sbarëcua šmonjánajutjema? <sup>11</sup> ¿Ndáyeca ndoñe cmontsësertana atše tandëšama ndoñe sentsóyebuambnama? Cuedado šmochtsebomna fariseunga y saduceungbe levadurama ca —Jesús tojanëyana.

<sup>12</sup> As chora chë uatsjéndayënga tojanësertá, Jesús ndoñe tonjánayana chë tandëšentša levadurama cuedado jtsebomnana ca, sinó ndayá chë fariseunga y saduceungbe buatëmbana soyëngama.

*Pedro tojánayana, Jesús chë Cristo bétsemnama  
(Mc 8.27-30; Lc 9.18-21)*

<sup>13</sup> Jesús, Cesarea de Filipo luaroye tojánashjango ora, chabe uatsjéndayënga tojanatjá: —¿Nda ca entšanga imojtsichamo chë Bëngbe Bëtsá Entšá tbojanbemá yojtsemna ca?

<sup>14</sup> Chënga tmojanjuá: —Báseftanga montsichamo Juan chë Ubayaná ca, ínÿengna Elías ca, ínÿengna Jeremías y ínÿengna tempsca inÿe Bëngbe Bëtsabe juabna oyebuambnayá ca.

<sup>15</sup> As Jesús tojanatjá: —Y tšëngaftangna, ¿nda atše bétsemnama ntšamo šmochjayana ca?

<sup>16</sup> Chora Simón Pedro tbojanjuá: —Acna chë Bëngbe Bëtsabe Uámana Uabuayaná condmëna, chë Bëngbe Bëtsá Ainabe Uaquiñá ca.

<sup>17</sup> Y Jesús tbojanayana: —Simón, Jonasbe uaquiñá, oyejuayá cochanjoyena. Ndocna quem luarentša entšá chë soye checmatinÿinÿé, sinó atšbe Taitá, celoca endmëná. <sup>18</sup> Y mëntšánaca cbëyana: Mora acna Pedro o chë ndëtsbecá contsemna, y chë ndëtsbeñe atšbe bëts yebna chanjajebo, y ni Satanás, chabe obenánaca entšá jóbanama, queochatobenaye jtsepochoćama. <sup>19</sup> Atše chochanjátšetaye obenana, mo llavëfjá, entšanga Bëngbe Bëtsabe amëndayoye jamashënguama chamobenama. Bëngbe Bëtsáftaca chacojtsencuénta ora, canÿe soye ndoñe chaondëtsemna ca chacojayanëse, Bëngbe Bëtsá cachcá echanjayana. Y cháftaca chacojtsencuénta ora, canÿe soye aíñe chaotsemna ca chacojayanëse, Bëngbe Bëtsá echanjayana aíñe chca chaotsemna ca —Jesús tbojanayana.

20 Chentsana chabe uatsjéndayënga tojanamëndá ndocnábeñe ntsecuéntayana cha, Jesús, chë Bëngbe Bëtsabe Uámana Uabuayaná, chë Cristo bétsemnama.

*Jesús tojánayana cha ibojamna jóbanana y jtayenana ca  
(Mc 8.31-9.1; Lc 9.22-27)*

21 Chorscana Jesús tojanontsé chabe uatsjéndayënga jábuayenana cha ibojtsemna Jerusalenoye jama, y chocna chë bëtsëjemëngcá mándayënga, chë judiëngbe bachnangbe amëndayënga y chë ley abuátambayënga mochjanma cha puerte chaopadecema ca. Tojanëyana cha mochjanóba, pero unga tianoye yochtanayena ca. 22 Chora Pedro, Jesúsftaca tojanoluaré y tojanontsé mëntśá uatsëtsnayana: —¡Atśbe Utabná, Bëngbe Bëtsá ndoñe chaondëlesenciá chca chaopasama! ¡Ndocna te quenausopodena chca ácaftaca jopásana ca!

23 As Jesús tojanobuértana y Pédrëbioye tbojaniyana: — ¡Satanás, átśbentśana mojuaná! ¡Aca contseboşe atşe canye bacna soye chaşócochënguama! Pedro, acbe juabnënga Bëngbe Bëtsábiocana ndoñe quenatóbocana, sinó nye entśángbentśana ca.

24 Chentsana Jesús chabe uatsjéndayënga tojanëyana: — Nda atśbe uatsjendayá jtsemnama tojtseboşe, cháuyana nye Bëngbe Bëtsá yobena sempre chabe vidiñe jtsemándayana ca, chabe quem luarentśa soyënga cachcá chauesonýá atşe juastama, y atśbiamá jasúfriama chaotseprontana y cruciñe jobanámnaca. 25 Nda tojtsama quem luarentśe bëtscá soyënga jtsebomnama y atśbiamá jasúfriama ndoñe tontseprontana, chë nýetsca tescama yomna tśabe vida echanjopérdia. Pero nda quem luarentśa soyënga cachcá tojéftsonýá atşe juastama, masque chaóbana, chë nýetsca tescama yomna tśabe vida echántsebomna. 26 ¿Ndayama entśá buanjosérvia nýetsca quem luarentśa soyënga jtsebomnana, chë nýetsca tescama yomna tśabe vida tojtsoperdese? Ndegombre, canye entśá chë nýetsca tescama yomna tśabe vida tojtsoperdese, ndocna soye quenátsmëna cha chaobená joyiyama, chë nýetsca tescama yomna tśabe vida jtsebomnama. 27 Chë Bëngbe Bëtsá Entśá tbojanbemá, chabe Taitabe obenánaca y puerte buashinýinýaniñe echanjabo chabe angelotémëngaftaca, y chora cada cánýabioye bochántatśetaye cachcá ntśamo cada ona tojéftsemcá. 28 Ndegombre şcuayana: Báseftanga muentşe montsemnënga ndoñe quemochatóbana, Bëngbe Bëtsá Entśá tbojanbemá amëndayacá jabana ntjéftsinýcá ca —Jesús tojánayana.

## 17

*Jesús inyetśá tojanobinýná*  
(Mc 9.2-13; Lc 9.28-36)

<sup>1</sup> Chentšana chněnguana tianoye, Jesús tojéftsanēbiatše Pedro, Santiago y chabe catšata Juan, y inýoye tojanēnatse nýe chēnga, canýe bēts tjoye. <sup>2</sup> Chentše, chēngbe delante inyetśá cha tojanobinýná. Chabe jubiá shinýcá yojtsebuashinýinýana, y chabe uichētjonējuangana mo binýniñcá uafjantsējuangá yojtsamna. <sup>3</sup> Chca orna, chabe uatsjéndayēnga tmojáninýe Moisés y Elías tbojanobinýná, Jesúseftaca encuéntaye.

<sup>4</sup> Chora Pedro, Jesúsbioye tbojanianyana: “Bēngbe Utabná, jtša tšabá bēngbiama cuanmēna muentše jtsemnana ca! Tcojtsebošese, unga tambotémēnga atše chjapórma: cánýetema acbiana, ínýetema Moisesbiana y ínýetemna Elíasbiana ca.”

<sup>5</sup> Pedro chca yojtsóyebuambnantscuana, canýe buashinýinýana jantšetēshe nýetscanga yojáutsbotse. Y chē jantšetēshoicana canýe oyebuambnayana tmojanuena mēntśá: “Mua atšbe bonshana Uaquiñá endmēna, atše chabiana sēntsoyejuá. Cha šmochtseyeunana ca.”

<sup>6</sup> Y chē uatsjéndayēnga chca tmojanuena ora, tmojanoshamentśé y jubiaca fshantsóntscoñe tmojanotsejbéna, puerte auatjanánēnga. <sup>7</sup> Chora Jesús chabe uatsjéndayēngbioye tojanobeconá, tojánabojajo y tojanéyana: “Matētsbananga; ndoñe matauatjēngana ca.”

<sup>8</sup> Y tshanánoye tmojanontjeśé ora, Jesús nýe canýa tmojáninýe, ndocná inýa más.

<sup>9</sup> Chē tjocana imojtsatstsmaye ora, Jesús tojanamēndá: —Bēngbe Bētsá Entśá tbojanbemá obanēnguentsšana candétayenēntscuana, ndocnábeñe chē šmonjinýe soyama šmattsecuéntaye ca.

<sup>10</sup> As chē uatsjéndayēnga Jesús tmojantjá: —¿Ndáyeca chē ley abuátambayēnga mondbétsichamo, canmēna Elías jabana chē Bēngbe Bētsabe Uámama Uabuayanabe natsana ca?

<sup>11</sup> Chora Jesús tojanējua: —Ndegombre canýa Eliascá natsana echanjabo y ntšamo jtsemnana yomncá, lempe echánjabatsma ca. <sup>12</sup> Pero atše cbéyana, canýa mo Eliascá ya tonjabo, entšanga ndoñe chematanotēmbá y cháftaca entšanga tmonjanma lempe ntšamo tmojanbošencá. Y cachcá, chē Bēngbe Bētsá Entśá tbojanbemá entšangbe cucu-atšiñe echanjasúfria ca —Jesús tojánayana.

<sup>13</sup> Chora chē uatsjéndayēnga tojanēsertá, Juan chē Ubayanabiama Jesús chca yojtsētsētsnama.

*Jesús, canýe bacna bayēja tbojanbojuaná*  
(Mc 9.14-29; Lc 9.37-43)

14 Entšanga imojtsemnoye chënga tmojtanashhajna ora, canye boyabása tojanobeconá, Jesusbe natsanoica vojoshamentiſiye y tbojaniyana: <sup>15</sup> —Utabná, atšbe uaquiñá motselastemá. Cha ataque bontsësháchichana y puerte entsesufrina, er cha inye ora inoye jtseshajayana y inye orna, buyeshoye jtsoshbuetšana. <sup>16</sup> Acbe uatsjéndayëngbioye cha sënjuánatse y ndoñe chematobená jtseboshnama ca —cha tbojaniyana.

17 As Jesús tojánayana: —¡Nyetšá ndošbuáchiyënga y bacna entšanga ca! ¿Buetayté šojtsemna tšëngaftangaftaca jëftsemnana? ¿Buetayté uantado tšëngaftangaftaca chjëftsemna? Moye chë básetema mánatse ca.

18 Chora Jesús, chë basetembeñe bacna bayëjbioye tbojanácacana y chábentšana cha tojésanbocna. Cach orscana chë básetema tšabá yojsatsmëna.

19 Chentšana, chë uatsjéndayënga luaroca Jesúseftaca tmojanoyebuambá y tmojaniyana: —¿Ndáyeca bënga ndoñe fsënjobená chë bacna bayëja jtabocnama ca?

20 Y Jesús tojanëyana: —Tšëngaftanga tša batšatema ošbuáchiyana bomna causa. Ndegombre šcuayana: tšëngaftanga batšatema ošbuáchiyana šmojtsebomñese, masque nye mo canye mostaza betiye jenaycá, quem tjoye šmatjayana: “Muentšana mojuaná y choye motsa ca”, quem tjañe chca nanjama, y tšëngaftanga lempe jamama šmattsobena. <sup>21</sup> Pero chca bayëjënga jtëbuacnamna jobenayana nye Bëngbe Bëtsáftaca jencuéntase y chama tondaye ntjascá jtsemñese ca —Jesús tojanëyana.

*Jesús cachiñe tojánayana cha ibojamna jóbanana y jtayenana ca*

*(Mc 9.30-32; Lc 9.43-45)*

22 Jesús y chabe uatsjéndayënga cányiñe Galilea luaroye imojétsaye ora, cha tojanëyana: “Chë Bëngbe Bëtsá Entšá tbojanbemá entšangbe cucuatšine mochanjáboshjona, <sup>23</sup> mochanjóba, pero unga tianoye echántayena ca.” Chë causa chë uatsjéndayënga puerte ngmënaca imojtsemna.

*Chë Bëngbe Bëtsabe bëts yebnama impuesto jtsat-squëcjnyama*

24 Jesús y chabe uatsjéndayënga Capernaumoye tmojánashhajna ora, chë Bëngbe Bëtsabe bëts yebnama entšangbioye impuesto atjanayënga Pédrëbioye tmojána y tmojantjá: —¿Acbe buatëmbayá Bëngbe Bëtsabe bëts yebnama impuesto queonýbetsatsquëcjnyaye ca?

25 Y Pedro tojanëjua: —Aíñe, cha endbetsatsquëcjnyaye ca.

Chentšana, Pedro chë yebnoye tojánamashëngo ora, Jesús natsana mëntšá chábioye tbojaniyana: —Simón, ¿ntšamo

catjájuaboye? ¿Quem luarentša reyënga ndëmuanjengbioye impuesto imnétsayëngacaye y crocénana imnétsatjanaye: cach luarentše oyenëngbioye o chë inye luarocana ashjajnëngbioye ca?

<sup>26</sup> As Pedro tbojanjuá: —Chë inye luarocana ashjajnëngbioye ca.

Y Jesús tbojaniana: —Chcasna, ndoñe quešnátsmëna chë atšbe Taitabe bëts yebnama impuesto jtsatsquëcjnayana ca. <sup>27</sup> Pero ndocná mal chabonduínynanamna uafjajónayoye motsa, anzuelëfjua cochjútšena y chë natsana chaojuásjana beona cochjuábocna. Cochjuayetëfjoná y choye crocénana cochanjínjena y chánaca echanjoshjache atšbiana y acbiana jëtsjájuama. Cochjëftsejatsëca y cochjatsboshjona ca —Jesús tbojaniana.

## 18

*¿Nda chë más uamaná yomna?*

*(Mc 9.33-37; Lc 9.46-48)*

<sup>1</sup> Chentšana chë uatsjëndayënga Jesúsbioye tmojanobeconá y tmojantjá: —¿Chë Bëngbe Bëtsábeyeca mandánëngbeñe nda chë más uamaná yomna ca?

<sup>2</sup> Chora Jesús canye basetëmbioye tbojanchembo y chëngbe tsëntsaca tbojanatsá. <sup>3</sup> Y tojánayana: —Ndegombre cbëyana, nda mo basetemcá ndoñe tontóbema y ndoñe chacá Bëngbe Bëtsabe soyënga tonjójyëngacñe, cha ndocna te queochatobeyenaye Bëngbe Bëtsabe amëndayoye jamashënguama. <sup>4</sup> Chca, nda tojtsejuabná canye nduamaná yomna y quem basetemcá yomna ca, cha chë Bëngbe Bëtsabe amëndayoca chë más uamaná echántsemna. <sup>5</sup> Y nda átšbeñe ošbuachiyá bëtsemnayeca, tbojofja canya mo quem basetëmbioycá, chana atše jofjana ca —Jesús tojánayana.

*Resjo yomna, nderado bacna soyënga cuanjama*

*(Mc 9.42-48; Lc 17.1-2)*

<sup>6</sup> “Nda canye básetema átšbeñe ošbuachiyábioye tbojaingñë bacna soye jamama, chabiana más tšabá nántsemna canye bëts nantsnëbé chamotsetamošëntšbua y chë mar bëjaye shbuatsëntsoye chamotsashbuetše chabotsenatjëmbama. <sup>7</sup> ¡Tša lastema quem luarentša entsangbiana, chë inyënga bacna soye jamama chaócochënguama tmojtsamëngbiana! Njëts tempo chca amënga mochanjëftsemna. Pero, ¡payajema chë inya bacna soye chaomama tojtsamá ca!

<sup>8</sup> “Chíyeca, acbe cucuatšëca o acbe shecuatšëca bacna soye tcojamëse, cochtsenástjango y bënoye cochtsëtšena. Acbiana más tšabá nántsemna celoye jamashënguana chë njëtsca tescama yomna tšabe vida jtsebomnama, cucuatše ndbomná



o cosheto, y ndoñe nyets uta cucuátšeca o shecuátšeca chë nyets tempo echanjesomñe ññeshoye chacmotsëstjango. <sup>9</sup> Nderado acbe bomínýeca bacna soye tcojinýe y cachca soye tcojama, chë bomínýe cochtsenobuchjatsëca y bënoye cochtsëtšena. Acbiama más tšabá nántsemna, celoye jamashënguana nýe canýe bomínýeca, y ndoñe nyets uta bomínýeca infernoye chacmotsëstjango, chë bëts ññeshoye ca” —Jesús tojánayana.

*Chë ótsena oveshabiamana cuento*  
(Lc 15.3-7)

<sup>10</sup> Mëntšánaca Jesús tojánayana: “Ni mo cánýabioye quem tsëm ošbuáchiyënguentsana, chë mo basetemëngcá mondmënënga, mo nduamanacá šmattsonýaye. Ndegombre cbëyana, chëngbe angelotëmënga celoca, sempre atšbe Taitá celocáftaca mondetsemna ca. <sup>11</sup> Er chë Bëngbe Bëtsá Entšá tbojanbemá tonjabo chë pochocánënga jtsemnana imojtsajnënga jabátsebacama.

<sup>12</sup> “¿Ntšamo tšëngaftanga šmatjájuaoye? Canýe boyabása patse oveshënga tojtsabamna y ndeolpe canýe chentša oveshá tojtsotše. ¿Chë boyabása ndoñe chë inýe esconëfta bnëtsana y esconëfta oveshënga tjoca cachcá nanjesënýaye, jama chë ótsena oveshá jetsenguanguama? <sup>13</sup> Y chë oveshá jetsinýenama tojobenase, ndegombre chë boyabása más oyejuayá jtsemnana chë ótsena oveshabiamana, y ndoñe nýa chca chë inýe esconëfta bnëtsana y esconëfta oveshëngbiama chë ndoñe tmonjanotšëngbiama. <sup>14</sup> Cachcá, tšëngaftangbe Taitá, Bëngbe Bëtsá, chë celoca endmëná, ndoñe quenátšboše ni canýa quem basenguentsana mo otšenacá chaotsemna, bacna soyënga jtsamëse oyena causa ca” —Jesús tojánayana.

*Ntšamo cuanjama inýa japerdónama*  
(Lc 17.3)

<sup>15</sup> “Nderado acbe catšata, bacna soye tcmojaborlase, cochjá, cánýata šochjencuënta y cochjama cha chauenójuaboma, ndegombre bacna soye tcmojaborlama. Cha chacmojóyeunasna, acbe catšata cachiñe tšabá ácaftaca echántsatmëna. <sup>16</sup> Pero ndoñe tcmonjóyeunasna, inýe útata cochjáchembo chacmotjëmbambama, chca, chata chabouena ntšamo cochjauyanama y chamuayana ndegombre chca yomnama. <sup>17</sup> Y chata ndoñe tonjóyaunase, chentša Bëngbe Bëtsábeñe ošbuáchiyënga macuntá. Y chënga ndoñe tonjóyaunasna, cochjayana cha yomna mo canýa Bëngbe Bëtsábioye nduabuatmacá, mo canýe ndoñe judiy cá ca o canýe bacna entšá mo canýa Romocama impuesto entšángbioye atjanayacá yomna ca.

18 “Ndegombre cbéyana: Tšëngaftanga Bëngbe Bëtsáftaca chašmojtsencuénta ora, chašmojayana canýe soye ndoñe chaondëtsemna ca, Bëngbe Bëtsá cachcá echanjayana. Y cháftaca chašmojtsencuénta ora, chašmojayana canýe soye aíñe chaotsemna ca, Bëngbe Bëtsá echanjayana aíñe chca chaotsemna ca.

19 “Mëntšánaca cbéyana: Nderado útata tšëngaftanguentšana quem luarentše tbojenoyeuná Bëngbe Bëtsáftaca jencuéntama ndayánaca jótjañama, Bëngbe Bëtsá chë celoca endméná pronto chë soye cmochanjátšataye. 20 Ndayentše útata o únganga tmojénefjna, átšbeñe ošbuáchiyënga bëtsemnama, chentše atše chëngbe tsëntsaca chántsemna ca” —Jesús tojánayana.

21 As Pedro tojána y Jesúsbioye tbojantjá: —Bëngbe Utabná, ¿atšbe catšata bacna soye šojaborlase, bueta soye šojtsemna cha japerdónana? ¿Canýsëfta soye ca?

22 Y Jesús tbojanjuá: —Ndoñe nýe canýsëfta soyama quec-batatsëtsná, sinó canýsëfta bnëtsana soye canýsëfta ca.

*Ndayá inopása chë japerdónama ndëbošëngaftaca*

23 Mëntšánaca Jesús tojanéyana: “Cbochanjáuyana ntšamo Bëngbe Bëtsabe amëndayana yomnana. Endméná ntšamo canýe réyëftaca tojanopasacá. Cha yojábošena chabe oservénënga crocénana jtsëtjañana. 24 Jtsëtjañama yojóntša orna, canýe boyabása imojuánatse, chë réybioye mallajta crocénana ibnandebena. 25 Chë oservená tondaye yonjábomna chë ndebénama jëtsjájuama; asna chë rey yojamánda cha chamotsiye nýets tempo nýe ínýabiamá chaotšoservénama, chabe shema y chabe básengnaca, y lempe ntšamo yojan-bomncánaca, y chca chë ndebénama jtopágama. 26 Chora chë oservená chë reybe shecuatšentše yojoshamentšiye y ibojtseimpáda: ‘Taita, Diosmanda šmotsëuantajema. Atše lempe cbochanjëtsëntšabuachiye ca.’ 27 Chë reyna chë boy-abásabiamá ibojóngmia; as chë ndebénana ibojtseperdóna y ibojëtsboshjona.

28 “Chë oservenana chentšana yojésebocna y benachiñe inýe oservenáftaca ibojenbetše, cach mandadbiama trabajayá. Chë inýe oservenana nýe batšatema crocénana chábioye ibnandebena. Chora chë oservená chë enutábioye tamošajentšana ibojishache y ibojóntša jtsëtajuashbebiana y mëntšá ibojauyana: ‘¡Ndebénana šmatsëntšabuaché ca!’ 29 Chora cha chë oservenabe shecuatšentše yojoshamentšiye y ibojtseimpáda: ‘Diosmanda šmotsëuantajema. Atše lempe cbochanjëtsëntšabuachiye ca.’ 30 Pero chë oservená ndoñe yonjábošena, sinó yojama chë inýe oservenábioye cárceloye chamotsëtámiamá, chë ndebénana candëtsjájëntscuana. 31 Chë inýe oservénënga chca imojinýe ora, puerte yojóngmia y imojá

lempe ntšamo yojopasacá chëngbe rey jacuéntama. <sup>32</sup> As chë rey yojamánda chë boyabása jobetšana, y ibojauyana: ‘¡Puerte bacna oservená! Sconjaimpadáyeca, nÿets ndebénana tcbontseperdoná. <sup>33</sup> Acnaca cachcá cmondmëna chë cach aquëcá muentša trabájayabiama jóngmiana, ntšamo atše acbiama šonjongmecá ca.’ <sup>34</sup> Y tša chë rey ibojtsetna; as yojamánda jabuache chamotsetsetšená nÿets ndebénana candëtsjájuantscuana ca” —Jesús tojanacuntá.

<sup>35</sup> Chora Jesús tojánayana: “Atšbe Taitá, celoca endmëná, cachcá tšëngaftangaftaca echanjama, tšëngaftangbe catšata ndoñe ndegombre nÿets ainánaca šmonjaperdonase ca.”

## 19

*Ndayá Jesús tojanabuatambá chë bouamnënga tmojtsenëtšenama*

*(Mc 10.1-12; Lc 16.18)*

<sup>1</sup> Chë soyënga tojánayanentšana, Jesús Galilea luarentšana tojtsanoñe y Judeoye tojánashjango, Jordán chenguánoica. <sup>2</sup> Ba entšanga tmojanasto y chentše šoquënga tojanashná.

<sup>3</sup> Básefta fariseunga Jesúsbioye tmojanobeconá y jisháchichiyama mëntšá tmojantjá: —¿Queojtselesenciana canÿe boyá nÿe ndayámnaca chabe shémbioye cachcá jesonÿayama ca?

<sup>4</sup> As Jesús tojanëjua: —¿Tšëngaftanga ndoñe chë Bëngbe Bëtsabe uabemana palabrënguiñe šmëndualía, Bëngbe Bëtsá, chë entšanga tojanabiamá, quem luare jobojátšama ora “boyá y shema tojánabiamama”? <sup>5</sup> Y Bëngbe Bëtsá tojánayana: “Chíyeca boyabása chabe taitá y chabe mamá echanjésabashejuana, chabe shémaftaca jenútanama, y chë útata mo canÿacá bochántsemna ca.” <sup>6</sup> Y chca, ya ndoñe útata quebochátsmëna, sinó mo nÿe canÿacá. Chcasna, entšá ndoñe chaondëndbema ndayá Bëngbe Bëtsá mo canÿiñcá tojëftsema soye ca —Jesús tojánayana.

<sup>7</sup> Chora chë fariseunga tmojanianyana: —¿As, ndáyeca Moisés tojanmandá, chë shémbioye canÿe uabemana tsbuanácha juiyiyana jttsenëtšenama y cachcá jesonÿayana ca?

<sup>8</sup> Y Jesús tojanëyana: —Tšëngaftanga Bëngbe Bëtsabe mandënga jóyëngacñama ndoñe quešmátsboše causa, Moisés tmojanalesenciá shémbioye jesëtšenana. Pero quem luare jobojátšama orna, ndoñe chca quenjatsmëna. <sup>9</sup> Atše cbëyana, nda chabe shémaftaca tbojtsenëtšena y chca tojopasá ndoñe chë shema chabe boyábioye ínÿaftaca tbontseingñé causa, y chë boyá ínÿaftaca tojtóbouamasna, cha chë natsana shémbioye ínÿaftaca jtseingñayana ca —Jesús tojánayana.

<sup>10</sup> Chora chabe uatsjéndayënga tmojanianyana: —Chca chë boyá y shémaftaca tojtsemnësna, ndoñe tšabá yontsemna jobouamayana ca.

<sup>11</sup> Y Jesús tojanëyana: —Nÿetscanga ndoñe quemátobena chë palabrenga jóyëngacñana, nÿe chë Bëngbe Bëtsá tojama jóyëngacñama chamobenama, chëngna aíñe.

<sup>12</sup> Ba soyënga comna ndaye causa chë boyabásenga ndoñe ntsobenana jobouamayana. Inÿenga jónÿnana jobouamayama ndobenënga, ínÿengbioye cach entšanga jábiamana jobouamayama ndobenënga y ínÿengna, nÿets tempo nÿe Bëngbe Bëtsabe amëndayama oservena causa ca —tojanëyana.

*Jesús, basetëmëngbiama Bëngbe Bëtsábioye tbojanimpadá*  
(Mc 10.13-16; Lc 18.15-17)

<sup>13</sup> Entšanga basetëmënga Jesúsbioye tmojanënatse, cha chauabojajuama y Bëngbe Bëtsábioye chëngbiama chaboimpadama. Pero chë uatsjéndayëngna tmojanontsé chë basetëmënga unachayënga jtsécácanana.

<sup>14</sup> Chora Jesús tojanëyana: “Cachcá mónÿaye chë basetëmënga átšbioye chamuabo y ndoñe matëuyanana; er Bëngbe Bëtsabe amëndayana endmëna mo quem basetëmëngcá imomnëngbiama ca.” <sup>15</sup> As chë basetëmënga tojánabojajo, Bëngbe Bëtsá jaimpádase; y chentšana cha tojtsanoñe.

*Canÿe bomna bobontse Jesúsbioye tojána*  
(Mc 10.17-31; Lc 18.18-30)

<sup>16</sup> Chentšana, canÿe boyabása tojána Jesús jinÿama y mëntšá tbojantjá: —Buatëmbayá, ¿ndaye tšabe soye chjama chë nÿetsca tescama yomna tšabe vida jtsebomnama ca?

<sup>17</sup> Y Jesús tbojanjuá: —¿Ndáyeca chë tšabe soye ndayá bétsemnama šcojtsetjaná ca? Tšabia nÿe canÿa endmëna: Bëngbe Bëtsá. Aca chë nÿetsca tescama yomna tšabe vida jtsebomnama tcojtsebošëse, mandënga cochtsobedecena ca.

<sup>18</sup> Chora chë bobontse tbojantjá: —¿Ndaye mandënga ca?

Y Jesús tbojanjuá: —“Ndoñe catjóba, acbe shema ínÿaftaca ndoñe cattseíngñaye, ndoñe catjatbëba, ndoñe catjuaboínÿena. <sup>19</sup> Acbe bëtšétsata stëtšoye ndoñe catjáquedaye y ndëmua entšánaca cochtsebobonshana ntšamo cach aca cuenobobonshancá ca” —Jesús tbojanianyana.

<sup>20</sup> Chora chë bobontse tbojanjuá: —Atše lempe chca nÿets tempo sëndocumplina. ¿Ndayá más šojtsebuáshbena ca?

<sup>21</sup> As Jesús tbojanianyana: —Aca lempe tšabá jamama tcojtsebošëse, motsa, acbe bomna soyënga cochjetsatobuiye y chë crocénana, ndbomnëjémënga cochtsatšataye; chca, bëtš uacanana soye celoca cochántsebomna. Chentšana cochjabo y šcochjuasto ca.

22 Chë bobontse chca tojanuena ora, ngménaca yojtsatoñe, cha corente bomná bemna causa.

23 Chora Jesús chabe uatsjédayënga tojanéyana: — Ndegombre cbéyana, puerte totcá entsemna canye bomnabiama Bëngbe Bëtsabe amëndayoye jamashënguama ca. 24 Chë bomnabiama cachiñe šcuatayana: Más paselo entsemna canye camello chë coshufjentša atëfñjèjana chauachnëngo, y ndoñe canye bomná Bëngbe Bëtsabe amëndayoye jamashënguana ca.

25 Chabe uatsjédayënga chca tmojanuena ora, puerte ojnánänënga imojtsemna y imojtsichamo: —As, ¿nda yochjobenaye atsbocaná jtsemnama ca?

26 Jesús chënga tojanënyané y tojanéyana: —Entšanga ndoñe quemátobena jamama canya atsbocaná chaotsemnama, pero Bëngbe Bëtsá aíñe, er cha nyetsca soyënga jamama endobena ca.

27 Chora Pedro tbojanियana: —Aca contsonyá, bënga lempe chë fsëndbomna soyënga fsënjéseboshjona y ácaftaca fsëntsajna. As, ¿ndayá bënga fchjójyëngacñe ca?

28 As Jesús tojanéyana: —Ndegombre cbéyana, nyetsca quem luarentša soyëngama mo tsmécá jtsemnama tempo chaojobuache ora, chë Bëngbe Bëtsá Entšá tbojanbemá chabe buashinýinýana bëts tšenëšiñe reycá echanjót bema jtsemándayama; y tšëngaftanga, chë atše šmëstonëngna, chora bnëtsana uta uámana tbemaniñe šmochanjotbiama mo reyëngcá, chë Israeloca bnëtsana uta bëts pamillentša entšangbiama jayanama tšabá o ndoñe tšabá tmonjamama. 29 Y ndëmuanýënga, atše jaserviama tmojëftseboshjona cachëngbe yebna, catšátanga o uabënanga, befta o bebmá, básënga o fshantsënga, chë soyëngama patse soye más mochanjójyëngacñe y chë nyetsca tescama yomna tšabe vídnaca. 30 Pero banga mora uámanënga imomnënga, nduámanënga mochántsemna; y banga mora nduámanënga imomnëngna, uámanënga mochántsemna ca —Jesús tojánayana.

## 20

### *Chë trabájayëngbiama cuento*

1 Mëntsánaca Jesús tojánayana: “Bëngbe Bëtsabe amëndayana endmëna mo canye bëts jajañe nduiñcá. Chë nduiñna canye te cabá cachëse yojábocna peonga janguanguama, chabe uvas betiyënga jajañe chamotrabajama. 2 Chë nduiño peonga yojánýëna orna, imojenóyeunaye canye tescama canye denario crocénana jtëbuénayama. As chora yojichamuá chë uvas betiyënga jajoye jatrabájama. 3 Mo base mošenana ora, chë nduiño cachiñe yojábocna y plazoca atsanënga ínýënga

yojanÿe, tondaye ntsamcá. <sup>4</sup> As yojáuyana: ‘Tšëngaftángnaca atšbe uvas betiyënga jajoye motsajna jatrabájama y ntšamo chašmojamcá cbochtëbuénaye ca.’ Y chë entsanga imojá. <sup>5</sup> Nÿetsto ora y bëts mošenana ora, chë nduiño cachiñe yojábocna y cachiñe cachcá yojopása. <sup>6</sup> Mo la cinco ora, chë nduiño cachiñe yojábocna y chenache inÿenga yojánÿena, tondaye ntsamcá. As yojátjaye: ‘¿Ndáyeca tšëngaftanga nÿets día ntjatrabajacá muentše šmotsomñe ca?’ <sup>7</sup> Y chënga imojojuá: ‘Ndocná bënga chešnataimpadá causa ca.’ As chë nduiño yojáuyana: ‘Tšëngaftángnaca atšbe uvas betiyënga jajoye motsajna jatrabájama y cbochtëbuénaye ca.’

<sup>8</sup> “Y ya bien jetiñe yojtsemna orna, chë nduiño chabe caporálbioye ibojauyana: ‘Peonga metsachembo y cochtëbuénaye. Chë ústonoye tmojáshjajnënguentsana cochjabojátša y chë natsana tmojáshjajnënga ústonoye ca.’ <sup>9</sup> Y chë mo la cinco ora imojáshjajnënga imojobeconá, y cada ona canÿe denario crocénana yojtáyentšbuachiye. <sup>10</sup> Chentšana, chë natsana jatrabájama imojáshjajnënga yojtsamna jobéconama y chënga imojétsejuabnaye más crocénana mochjanóyëngacñe ca. Pero chëngnaca cach canÿe denario crocénana yojtëbuénaye. <sup>11</sup> Chca imojóyëngacñe orna, chënga imojóntša chë nduiñbiana bacá ichámuana, <sup>12</sup> mëntšá: ‘Quemënga chë ústonoye tmonjáshjajnënga nÿe canÿe horatema tmonjatrabajá; ntšamo bënga šcontëbuenacá, cachcá chënga contëbuená y bëngna nÿets día jabuache fsënjatrabajá y corente jënÿá fsënjauantá ca.’

<sup>13</sup> “Pero chë nduiño canÿa chca yojtsichamuábioye ibojojuá: ‘Sobreno, acbiana ndocna ndoñe tšabe soye chiyatsma. ¿Ndoñe canÿe denario crocénana canÿe tescama tbonjenoye-uná ca? <sup>14</sup> Chcasna, acbe uacanana crocénana mesocñe y motatoñe. Atše sëntseboše chë ústonoye jatrabájama tojashjanguá jtabuénayana, cachcá ntšamo aca tbojtabuenacá. <sup>15</sup> Chca entsemna, er atše sëndobena atšbe crocénánaca nÿe ndayánaca jamana. ¿O aca envidia cojtsebomna, atše tšabia tsmënama ca?’ ” —cha yojayana.

<sup>16</sup> Chora Jesús tojánayana: “Y chca, chë mora nduámanënga imomnënga, uámanënga mochántsemna; y chë mora uámanënga imomnëngna, nduámanënga mochántsemna ca.”

*Jesús cachiñe tojánayana cha jóbanama y jtayenama*

*(Mc 10.32-34; Lc 18.31-34)*

<sup>17</sup> Chënga Jerusalenoye imojtsaye ora, Jesús barie tojánachembo chabe bnëtsana uta uatsjëndayënga y tojanëyana: <sup>18</sup> “Tšëngaftanga šmontsonÿá mora bënga Jerusalenoye montsajnama. Chocna chë Bëngbe Bëtsá Entšá tbojanbemá, chë bachnangbe amëndayënga y ley

abuátambayëngbe cucuatšiñe mochanjáboshjona, y chënga mochanjayana jóbana cha ibojtsemna ca, <sup>19</sup> y chë ndoñe judiëngbe cucuatšiñe mochanjáboshjona chënga chamotsáboyejuanama, chamotjanjama y chamocrucificama. Pero unga tianoye cha echántayena ca” —Jesús tojánayana.

*Chë Santiago y Juanbe mamabe impadana soye*  
(Mc 10.35-45)

<sup>20</sup> Chentšana, Zebedeobe uaquiñatbe mamá chabe uaquiñátaftaca Jesúsbioye tojanobeconá, chabe shecuatšentše vojoshamentsiye canye pavorama jaimpádama. <sup>21</sup> As Jesús tbojantjá: —¿Ndayá cojtseboše ca?

Y chë shembása tbojaniyana: —Aca reycá chacojtsemánda ora, cochjamánda atšbe uaquiñata chabótbema canya acbe catšbioica y chë inya acbe uañicuayoica, ácaftaca chabotsemándama ca.

<sup>22</sup> Y Jesús tojanējua: —Ntšamo šmontsotjanañama, tsëndata ndoñe quešnátstatsëmbo ca. Ntšamo atše chjasufriacá, ¿tsëndátnaca cachcá jasúfriama tašatjobenaye ca?

Y chata tbojanjuá: —Aíñe, fchanjobenaye ca.

<sup>23</sup> Chora Jesús tojanējua: —Ndegombre, tsëndátnaca atšcá šochanjasúfria, pero atše ndoñe quetsátobena jamándana atšbe catšbioica o atšbe uañicuayoica chašótbemama. Chë útentše entsemna ndëmanjëngbiama atšbe Taitá tojaprontacá ca.

<sup>24</sup> Chë inye bnëtsana uatsjëndayënga chca tmojanuena ora, chë uta catšátaftaca tmojanotjayaná. <sup>25</sup> Chora Jesús chë uatsjëndayënga tojánachembo y tojanējyana: —Tšëngaftanga šmondétatsëmbo, chë ndoñe judiëngbeñe chë reyënga lempe jtsemándayana nya mo nduiñënga cuaftsemncá; y chë bëtsëtsa entšangna chëngbe obenánaca jtsemándayana, ndayánaca jt-samëse, chë inye entšanga sempre chamotsayaunanama.

<sup>26</sup> Pero tšëngaftangbeñna ndoñe chca chaondëtsemna. Inyetsá; masna, nda tšëngaftanguentše chë más uamaná jtsemnama tojtsebošá bontsemna chë ínÿenga jtsaservénana. <sup>27</sup> Y ndánaca tšëngaftanguentšá chë más uamaná jtsemnama tojtsebošá bontsemna jtsemnana mo nÿe ínÿabiama nÿets tempo os-ervenacá. <sup>28</sup> Cachcá, chë Bëngbe Bëtsá Entšá tbojanbemá ndoñe chenátabo cha chamotseservénama, ndayá ínÿenga jabáserviama. Y mo nda ínÿenga játsebacama cuafjëtsajocá, cha echanjóbana, ba entšanga atsebácanënga chamotsemnana ca —Jesús tojánayana.

*Jesús uta jtanata tojanashná*  
(Mc 10.46-52; Lc 18.35-43)

<sup>29</sup> Chënga, Jericó bëts pueblentšana tmojánbocana ora, ba entšanga Jesús imojtséstona. <sup>30</sup> Uta jtanata benache

juachañe ibnatbemana. Jesús chëjana yojtsachnëjuanama chata tbojanuena ora, tbojanontsé uayebuáchana: —¡Utabná, Davídbentšana Entśá, šmotsalastemá ca!

<sup>31</sup> Entšanga chë jtanátbïoye tmojtsanëcácana iyteca chabotsemnama, pero chatna más ibojtsáyebuache: —¡Utabná, Davídbentšana Entśá, šmotsalastemá ca!

<sup>32</sup> As Jesús yojotsaye, chë jtanata tojánachembo y tojanatjá: —¿Ndayá šojtseboše atše tsëndatbïama chjamama ca?

<sup>33</sup> Y chata tbojanjúá: —Utabná, bëndata chabuatëbínÿnama ca.

<sup>34</sup> Jesús chatbïama tbojanongmé y tojánabuchbojajo. Ca-chora chë jtanata tšabá yojtëbinÿna y Jesús tmojanasto.

## 21

*Jesús Jerusalenoye tojánashjango*

*(Mc 11.1-11; Lc 19.28-40; Jn 12.12-19)*

<sup>1</sup> Ya Jerusalenoca béconana imojtsemna y canÿe pueblo Betfagé ca uabáinoca tmojánashjango, canÿe tjashe Olivos ca uabáinentše. Chora Jesús uta chabe uatsjédayata tojanichamó, <sup>2</sup> y mëntśá tojanëyana: “Tsëndatbe natsana entsemna base pueblotëmoye motsata. Cachora canÿe burrá utsbuaná šochanjínÿena y cháftaca canÿe burrotema echántsemna. Sochjuajafjoná y šochjuánatse. <sup>3</sup> Nderado nda ndayánaca chacmojáuyanëse, šochjauyana: ‘Bëngbe Utabná bontśájaboto y chentšana camuentše echanjabáisabashejuana ca.’”

<sup>4</sup> Chca tojanopasá, cachcá chaotsemnama ntšamo chë Bëngbe Bëtsabe juabna oyebuambnayá tojanayancá. Cha mëntśá tojanábema:

<sup>5</sup> Jerusalén bëts pueblentše oyenënga mëyana:

“Minÿënga, tšëngaftangbe Rey chentše tšëngaftangbïoye entsabó, ndoñe mo canÿa cachá bëtsá enobiamnayacá; canÿe búrrbeñe enjaquená;

canÿe burrotëmiñe, canÿe uatrabájaye bayabe šešónbeñe ca.”

<sup>6</sup> Chora chë uatsjédayata tbojána y tbojanma ntšamo Jesús tojanamëndacá. <sup>7</sup> Chë uatsjédayatna chë burrá y chë burrotema tmojanënatse, entšayëjuangá chátbeñe tbojanájatse y chora Jesús chábeñe tojanenoyayé. <sup>8</sup> Bëtscá entšanga chëngbe entšayá chë benachëjana imojtsëtëtsatsana, y ínÿengna betiyeshënguiñe buacuafjenga imojtsetcoye y chiñe imojtsequëcñá. <sup>9</sup> Y chë natsana imojtsajnënga y chë ústonoyënga mëntśá imojtsaiuáyebuache: “¡Rey Davídbentšana Entśá matschuanga ca! ¡Corente bendición bomná, chë Bëngbe Utabnabe obenánaca tojabá! ¡Bëngbe Bëtsá celocá matschuanga ca!”



<sup>10</sup> Jesús Jerusalenoye tojánamashëngo ora, nyetsca entsanga imojtsenbouenana y banga imojtsenotíciaye: —¿Nda mua yojtsemna ca?

<sup>11</sup> Y chë entsanga imojtsëjuana: —Chë Bëngbe Bëtsabe juabna oyebuambnayá Jesús, chë Galileoca pueblo Nazaretocá ca.

*Jesús, Bëngbe Bëtsabe bëtsyebnentšana enënga y obuámnayënga tojtanëbuacna*

*(Mc 11.15-19; Lc 19.45-48; Jn 2.13-22)*

<sup>12</sup> Chentšana Jesús, Bëngbe Bëtsabe bëts yebnoye tojánamashëngo y chë entsanga chentşe imojtsena y imojtsobuámnayënga chentšana tojtanëbuacna. Chéntšnaca imojtsemna entsanga canye crocénana enënga, y chë crocénana nye Bëngbe Bëtsabe bëts yebnentšama inoservenana. Chëngbe mesëshangá tojtsanenásatajchquëca y chë palomatema enëngbe tšenëšëgnaca. <sup>13</sup> Y tojanëyana: “Bëngbe Bëtsabe uabemana palabrënguiñe cha mëntšá tojánayana: ‘Atšbe bëts yebna echantsabaina átšeftaca encuéntaye yebna ca’; pero tšëngaftangna, atbëbanëngbe oyeñe chë yebna šmojtsebema ca” —Jesús tojanëyana.

<sup>14</sup> Chentšana, Jesús yojtsemnoye Bëngbe Bëtsabe bëts yebnentše, jtanënga y coshetënga tmojanobeconá, y cha tojanashná. <sup>15</sup> Chë bachnangbe más uámana amëndayënga y ley abuátambayënga, Jesús bëts soyënga yojtsamama tmojáninye ora, y chë basetëmënga Bëngbe Bëtsabe bëts yebnentše imojtsayebuáchama tmojanuena ora, tša tmojanotjáyanga. Chë basetëmënga mëntšá imojtsáyebuache: “¡Chë Rey Davidbentšana Entšá matschuanga ca!” <sup>16</sup> As Jesús tmojaneyana: —¿Ntšamo chë basetëmënga montsichamcá quetsuenana ca?

Y Jesús tojanëjua: —Aíñe, sentsuenana. Pero, ¿tšëngaftanga Bëngbe Bëtsabe uabemana palabrënguiñe chë soyama ndoñe šmëndualía? Chiñe mëntšá endayana:

Chë basetëmënga y ochóchaye šešonatëmëngbe cantëngaca aca tcojama entsanga chacmotsatschuanama ca.

<sup>17</sup> Chora Jesús chënga tojésanabashejuana y Jerusalenentšana Betania puebloye tojtsanoñe; y chentşe chë ibeta tbojánbobinyna.

*Jesús tojánayana canye higo betiye ndoñe más chaondëshájona ca*

*(Mc 11.12-14, 20-26)*

<sup>18</sup> Chë te cachëse, Jesús cach bëts puebloye yojtésa ora, tbojánishëntsena. <sup>19</sup> Chora canye higo betiye benache juachaca yojinye; as choye yojobeconá, pero nye ena tsbuanáchënga chiñe yojinyena. As Jesús chë higo betiyoye tojánayana:

“¡Ndocna te más chacondëshájona ca!” Y betesco chë higo betiye tojtsanbuashá.

<sup>20</sup> Chë uatsjéndayënga chca tmojáninÿe ora, imojenjnaná y Jesús tmojantjá: —¿Ntšamo chca chë higo betiye canÿe ora tojtsebuashá ca?

<sup>21</sup> Y Jesús tojanëjua: —Ndegombre cbëyana, tšëngaftanga Bëngbe Bëtsábeñe ošbuáchiyana šmojtsebmna y chabiamana ainaniñe ndoñe inÿetšá šmonjátsjuabnase, šmochantsobena jamama ndoñe nÿe ntšamo atše quem higo betiyeca sënjamcá, sinó quem tjoye, “muentšana mojuaná y uafjajónayoye moshbuetše ca” šmojayanëse, chca jochnënguana. <sup>22</sup> Y Bëngbe Bëtsáftaca chašmojtsencuénta ora, chábeñe jtsošbuáchiyëse, lempe ntšamo chašmojtjañcá šmochanjóyëngacñe ca —Jesús tojánayana.

### *Jesusbe obenana*

(Mc 11.27-33; Lc 20.1-8)

<sup>23</sup> Chca tojanopasá chentšana, Jesús Bëngbe Bëtsabe bëtse yebnoye tojánamashëngo. Chentše yojtsabuátambantscuana, bachnangbe amëndayënga y judiëngbeñe bëtsejemëngcá amëndayënga tmojanobobconá y tmojantjá: —¿Ndaye deréchoca chë contsama soyënga aca cojtsama ca? ¿Chca jtsamama nda mando tcmënjatštá ca?

<sup>24</sup> As Jesús mëntšá tojanëjua: —Atšnaca canÿe soye sëntsebmna tšëngaftanga jatjayama, y quešmojojuase, átšnaca cbochjáuyana ndaye deréchoca atše chca stsama.

<sup>25</sup> ¿Nda Juan chë Ubayaná tbojanichmó entšanga jubáyama, Bëngbe Bëtsá o entšanga ca? —Jesús tojanëyana.

Chama chënga tmojanontšé mëntšá enatsëtsnayana: “ ‘Bëngbe Bëtsá ca’ chamojojuase, cha šochanjáuyana: ‘As, ¿ndáyeca chë tmojanabuayená soyënguiñe ndoñe šmonjanošbuaché ca?’”

<sup>26</sup> Pero ndoñe quemuátobena jayanana ‘entšanga ca’; muentša entšangbiama bënga montsauatja, er nÿetscanga mondëjuabná Juan ndegombre Bëngbe Bëtsabe juabna oyebuambnayá yomna ca.” <sup>27</sup> Chcasna chënga Jesús tmojanjuá: —Bënga ndoñe queftsátstatšëmbo ca.

Y as Jesús tojanëyana: —Atše cach ndoñe quechochatëyana ndaye deréchoca chca stsama ca.

### *Chë uta uaquiñátbiamana cuento*

<sup>28</sup> Chora Jesús entšanga tojanatjá: —¿Ntšamo tšëngaftanga quem soyama šmatjayana? Canÿe boyabása uta uaquiñata yojánabamna, y cánÿabioye ibojauyana: “Uaquiñá, mënté motsa atšbe uvas betiyënga jajoye jatrabájama ca.” <sup>29</sup> Chë uaquiñá ibojojuá: “¡Jama ndoñe quetsátšboše ca!” Pero botamana yojenójuaboye y pronto choye yojá. <sup>30</sup> Chentšana

chë taitá chë inÿe uaquiñábioye cachcá ibojauyana. As cha ibojuá: “Arseñor, aíñe chanjá ca.” Pero ndoñe yonjá. <sup>31</sup> ¿Chë útatentšana ndëmuanyá tojanma ntšamo chë taitá yojabošcá ca? —Jesús tojanatjá.

Y chënga tmojanjuá: —Chë natsaná ca.

Chora Jesús tojanëyana: —Ndegombre cbëyana, chë Romocama entšángbioye impuesto atjanayënga y chë bacna vida bomna shembásenga, tšëngaftangbiana más montseprontana Bëngbe Bëtsabe amëndayoye jamashënguama. <sup>32</sup> Juan chë Ubayaná tonjánabo tšëngaftanga jábuayenama ntšamo jtsiyenana cmamnana, ntšamo Bëngbe Bëtsá yobošcá, y tšëngaftanga chë tmojanabuayená soyënguiñe ndoñe chešmatanošbuaché; y chë cuenta, chë Romocama entšángbioye impuesto atjanayënga y bacna vida bomna shembásengna aíñe chábeñe montsanošbuaché. Y tšëngaftanga, masque ntšamo chënga Bëngbe Bëtsábeñe imojtsošbuáchema lempe šmojinÿese, chë juabnayana ndoñe šmonjatrocá, chábeñe jtsošbuáchiyama ca —cha tojanëyana.

*Chë puerta bacna trabájayëngbiana cuento*  
(Mc 12.1-12; Lc 20.9-19)

<sup>33</sup> Mëntsánaca Jesús tojánayana: “Inÿe cuento šmochjatuena chašmuatsjínÿama: Canÿe jajañe nduiño uvas betiyënga yojáje y chë shëconana yojajétja. Chë uvasëšangá juantšëtetjamna canÿe base luare yojajutjo y canÿe tsbanana jebna soye yojapórma chentše jtsaishanÿama. Chentšana, inÿe trabájayënga chë jajañe yojárrendaye y chana inÿe luaroye yojtsoñe. <sup>34</sup> Chë uvasëšangá juashacama tempo yojobuache orna, chë jajañe nduiño básefta oservénënga yojichamuá chë arréndayënga jáuyanama ntsachetšá chë nduiño ibojtsotocánama. <sup>35</sup> Pero chë arréndayëngna chë oservénënga imojishëche: ínÿengbioyna imojtsajantšetaye, ínÿengbioye imojtsëbaye y chë ínÿengbioyna ndëtsbéngaca imojtsatëchënganja. <sup>36</sup> As chë jajañe nduiño chë natsanama más ba oservénënga yojichamuá. Pero chë arréndayëngna, ntšamo chë natsanëngaftaca imojamcá, cachcá chora imojama.

<sup>37</sup> “Cabana, chë jajañe nduiño cachabe uaquiñá ibojíchmua; as mëntšá yojtsejuabnaye: ‘Atšbe uaquiñá cocayé mochanjóyeunaye ca.’ <sup>38</sup> Pero chë arréndayënga chë uaquiñá imojinÿe orna, imojeniyana: ‘Mua chë fshantse nduiñbe uaquiñá entsemna. Lempe chabe soyënga mua echanjóyëngacñe. Cuajna, motsóbanga y lempe chabe otocana soyënga bëngbiana echanjoquéda ca.’ <sup>39</sup> As chë uaquiñá imojishache, chë uvas betiyënga jajañentšana imojtsábocna y imojtsóba.”

40 Chca jacuéntama tojanpochocá orna, Jesús tojánayana: —Y morna, chë jajañe nduiño chaojabo ora, ¿ntšamo šmojtsejuabná chë arrendayëngaftaca cha yochjama ca?

41 Y chënga tmojanjuá: —Chë puerte bacna arrëndayënga ni mo batšatema ntjalastemaycá echantsëbaye. Chë jajañe ínÿenga echanjárrendaye y chë uvasësangá juashacama tempo chaojobuache ora, ntšamo chë nduiño chabojsotocancá chënga mochantíyie ca.

42 Chora Jesús tojánayana: —¿Tšëngaftanga ndocna te Bëngbe Bëtsabe uabemana palabra šmëndualía? Chiñe mëntsá endayana:

Chë yebna jebuanënga tmojtsanaboté ndëtsbé, mora chë más bëts uashacuanësentše entsejájona. Chë soye Bëngbe Utabná, Bëngbe Bëtsá chca tojama, y bënga chama ojnánänënga fsëntsemna ca.

43 Ntšamo chë nduiño chë arrëndayënga chë fshantse echántsabaca y ínÿenga echantsatsataye y chënga chabiamá bëtscá shajuana mochanjatbanacá, cachcá, Bëngbe Bëtsabe amëndayana tšëngaftangbentsana mochantsejuána y ínÿengbioye mochantatsataye. Chënga Bëngbe Bëtsabe soyëngama mochanjouena y chë soyëngama ínÿengbioye mochanjabuayená, Bëngbe Bëtsabe amëndayoye jamashënguama. 44 Ndánaca chë ndëtsbeñe chaojotsatsá, chëbé bochantatcacaye; y chë ndëtsbé ndábeñnaca chaojótatsše, polvëshe bochantsebema ca —Jesús tojánayana.

45 Chë bachnangbe amëndayënga y fariseunga, Jesús chë jabuátambama cuentënga yojtsëtsësnama, tmojanenótatsëmbona chëngbiamá chca yojtsóyebuambnama.

46 Chora chënga tmojánbošena Jesús jishachana, pero entšangbiamá imojtsauatja; chënga imojanjuabná Jesús Bëngbe Bëtsabe juabna oyebuambnayá yojamna ca.

## 22

### *Chë casamento fiestama cuento* (Lc 14.15-24)

1 Chentšana Jesús tojanontsé cachiñe cuentëngaca chënga jabuátambana. Mëntsá tojánayana: 2 “Cbochanjáuyana ntšamo Bëngbe Bëtsabe amëndayana yomnana. Endmëna mo ntšamo canÿe réyefraca tojanopasacá. Chë rey yojamánda canÿe bëts fiesta jamama, chabe uaquiñabe casamentama. 3 Chora chë rey chabe oservënënga yojichamuá chë ófjanënga jobiatšama, pero chë ófjanëngna ndoñe imonjouena jama. 4 As chë rey inÿe oservënënga yojichamuá y mëntsá yojámëndaye: ‘Chë ófjanënga šmochjáuyana, ya saná stseboprontana ca. Sënjamandá, atšbe

uacnënga y uamna bayënga minyicánënga jobáyama y lempe entseprontana; y chamuabo chë casamento fiestama ca.’

<sup>5</sup> “Pero chë ófjanënga ndoñe imonjouena. Canyã, cachabe fshantse inabomnoye yojtsoñe; ínÿana chabe obuámnayíñe trabajuama yojtsoñe; <sup>6</sup> y ínÿengna, chë reybe oservénënga imojishëche, jabuache imojtsatsetšenaye y imojtsëbaye. <sup>7</sup> Y chë rey chë soyama yojouena ora, corente ibojtsetna. As chabe soldadënga yojichamuá chë oservénënga obánayënga chamuetsëbáyama y chëngbe bëts pueblo jetsángbotjuama. <sup>8</sup> Chora chabe oservénënga yojáyana: ‘Lempe entseprontana chë casamento fiestama, pero chë ófjanënga ndoñe quenjatëmrecena moye jabama. <sup>9</sup> Motsajna tsashenangoye y ndëmuanÿéngnaca chašmojánÿenënga, chë casamento fiestama šmochjúbuaja ca.’ <sup>10</sup> As chë oservénënga tsashenangoye imojábocana y nÿetscanga imojánÿenënga imojáchembo, cánÿíñe tšabe y bacna entsanga, y chca, chë tsbocnanoica jútjena yojtsemna entsángaca.

<sup>11</sup> “Chë ófjanënga jányama chë rey yojámashëngo ora, chentše cánÿabioye ibojinÿe y chana ndoñe yontsemna ntšamo canÿe casamento fiestama endbetsemncá uichëtjona. <sup>12</sup> As chë rey ibojauyana: ‘Sobreno, ntšamo canÿe casamento fiestama endbetsemncá ndoñe quecatichtëjona. ¿Ntšamo chca moye tcojamáshëngo ca?’ Pero chë boyabásana nÿe iytëca yojtsemna. <sup>13</sup> As chë rey chë fiestentše ujuatšnayënga yojámëndaye: ‘Shecuatše y cucuatše motsebatsëca y chë ndëbinÿna luaroye, infernoye motsábocna. Chentše puerte echanjenóbošachna y chë tsetšanama juatsašënga echantsenoftëšjojnaye ca’ —cha vojayana.”

<sup>14</sup> Jesús chca jacuéntama tojanpochocá ora, mëntšá tojánayana: “Chë fiestama ófjanënga banga montsemna, pero chë bocacánënga choca jtsemnama nÿe báseftanga. Er Bëngbe Bëtsá banga jáchembuana chabe amëndayoye jamashënguama, pero nÿe báseftanga choca mochántsemna ca.”

*Chë Romoca bëts mandadbiama impuesto jtsat-squëcñayama*

*(Mc 12.13-17; Lc 20.20-26)*

<sup>15</sup> Chentšana chë fariseunga tmojtsatanoñe y tmojanenoyeuná ntšamo Jesús tojayaniñe cha jisháchichiyana, as chca, mandadëngbeñe cha mal jaquédama. <sup>16</sup> Chama chënga tmojanichamó básefta cachëngbe usetonënga y ínÿengna Heródesbe ústonënga, Jesús jauyanama: —Buatëmbayá, bënga fsëndëtatšëmbo aca ndegombre soyënga cnetsabuátambama y contsabuatambá ndegombre tšabe vida jtsebomnama, ntšamo Bëngbe Bëtsá yomandacá, y ndoñe jatuenanana nÿe ntšamo entsanga tmojatichamcá,

er acbiamá tondaye quenatámana nda más uamaná o nduamaná tomnana. <sup>17</sup> Chcasna, ¿ntšamo catjájuaboye? ¿Tšabá tayojtsemna, César, chë Romoca bëts mandadbiamá, bënga impuesto jtsatsquëcñayana o ndoñe ca?

<sup>18</sup> Jesús yojtsetátšëmbo chëngbe bacna juabnëngama; chíyeca tojanéyana: —Bacna entšanga, ntšamo ndegombre šmojuabnacá ndinÿinÿnayënga. ¿Ndáyeca tšëngaftanga šmojtseboše chë sóyeca atše jisháchichiyama? <sup>19</sup> Chë šmatsquëcñá crocénana šminÿinÿé ca.

As canÿe crocénana tmojanoyé. <sup>20</sup> Jesús tojanatjá: — ¿Ndabe jubíá quem crocenániñe yojtsemna, y ntšamo muentše entsabemancá nda chca iuabaina ca?

<sup>21</sup> Y chënga tmojanjuá: —Césarbe jubíá; cha chca enduabaina ca.

As Jesús tojanéyana: —Césarbioye šmochtóyie cha ibotocana soye; y Bëngbe Bëtsana cha ibotocana soye ca.

<sup>22</sup> Chënga chca tmojanuena ora, ojnánänënga imojtsemna. As chënga cachcá Jesús tmojanonÿá y tmojtsatanoñe.

*Obanënga jtayenama Jesús tmojantjá*  
(Mc 12.18-27; Lc 20.27-40)

<sup>23</sup> Báseftanga judiëngbe amëndayënga, saduceos ca uabáinënga, imojanjuabná chë obanënga ndocna te ntayenana ca. Cach te, chë impuestama Jesús tojanoyebuambá te, básefta saduceunga tmojána y mëntšá tmojantjá: <sup>24</sup> —Buatëmbayá, Moisés tojánayana nderado canÿe boyá tojóbana básenga ntjëftsabashejuancá, ana chabe uabentsá jtsemnana chë shëmaftaca jtobouamayana, chca, chabe uabochená obanabiamá básenga jtsabamnama ca. <sup>25</sup> Chcase, canÿe bëngbentše canÿsëfta catsátanga monjamna. Chë natsaná tonjanobouamá y tontsanóbana. Básenga ndoñe quenjátabamna, chíyeca chë shemna chë uabentsáftaca tontanobouamá. <sup>26</sup> Y cháftaca cachcá tonjanopasá, chë inÿe uabentsáftaca cachcá, y cachcá chë inÿengaftaca y chë ústonoca uabentsáftacnaca. <sup>27</sup> Y chentšana chë shembásanaca tontsanóbana. <sup>28</sup> Y morna, chë obanënga chamojtayena ora, ¿ndabe chë canÿsëfta catsatanguentšabe shema chë shembása yochtsemna, nÿetscanga cháftaca tmojanobouamase ca? — chënga tmojantjá.

<sup>29</sup> As Jesús tojanéjua: —Ntšamo tšëngaftanga šmonjayancá ndmëncá šmontsoyebuambná, Bëngbe Bëtsabe uabemana palabra, ni chabe obenanama ndoñe quecmátësertana causa. <sup>30</sup> Chë obanënga chamojtayena ora, ni boyabásenga, ni shembásenga quemochatóbouamnaye, y chca, chënga mochántsemna mo celoca angelotemëngcá. <sup>31</sup> Y chë obanënga jtayenamna, ¿ndoñe šmëndualía ntšamo cach Bëngbe

Bëtsá chabe uabemana palabrënguiñe tojánayanama? Cha tonjánayana: <sup>32</sup> “Atše sëndmëna Abraham, Isaac y Jacobëbe Bëtsá ca.” Bëngbe Bëtsá chca jayanëse entsichamo cha ndoñe yondmëna obanëngbe Bëtsá, sinó aina entsangbe Bëtsá ca, er masque chënga tmojanóbana, chënga cabá Bëngbe Bëtsáftaca mondoyena ca —Jesús tojánayana.

<sup>33</sup> Chë entsanga chca tmojanuena ora, ojnánänënga imojtsemna ntšamo Jesús yojtsabuátambama.

*Chë más bëts uámana mando*  
(Mc 12.28-34)

<sup>34</sup> Jesús chë saduceúngbioye iytëca tojánabiamama fariseunga tmojántatšëmbona ora, chënga tmojánenefjna, <sup>35</sup> y canya chënguentšá, ley abuatambayá, Jesúsbioye jisháchichiyama tbojantjá: <sup>36</sup> —Buatëmbayá, ¿Moisesbe leyiñe ndayá chë más bëts uámana mando yomna ca?

<sup>37</sup> As Jesús tbojanjuá: —“Utabná Bëngbe Bëtsá cochtsebobonshana nyets acbe ainánaca, nyets espírituca y nyets juábnaca.” <sup>38</sup> Chë soye endmëna chë más bëts uámana mando y nyetsca mandëngama chë natsanoca entsemna. <sup>39</sup> Y quem inye soye, chë natsana mandcá endenoparecena. Endayana: “Ndëmua entsánaca cochtsebobonshana, ntšamo cach aca cuenobobonshancá ca.” <sup>40</sup> Chë uta mandentšana endóbocana lempe ntšamo Moisesbe leyiñe endayancá y ntšamo chë Bëngbe Bëtsabe juabna oyebuambnayënga mondbetsabuatambacá ca —Jesús tbojaniyana.

*¿Cristo, ndabe entsábentšana yomna?*  
(Mc 12.35-37; Lc 20.41-44)

<sup>41</sup> Chë fariseunga cabá cachentše imojtsemnëntscuana, <sup>42</sup> Jesús tojanatjá: —¿Ntšamo šmojtsejuabná chë Bëngbe Bëtsabe Uámana Uabuayanabiamama, chë Cristo? ¿Ndábentšana cha iuabó ca?

Y chënga tmojanjuá: —Davídbentšana ca.

<sup>43</sup> As Jesús tojanëyana: —¿Ntšamo chca nántsemna, cach David, chë Uámana Espíritbe mándoca, Crístbioye Utabná ca tbojtsabobuátmëse? David mëntšá tojánayana:

<sup>44</sup> Bëngbe Bëtsá, atšbe Utabná Crístbioye tbojaniyana:

atšbe catšbioica mótbema,

atšbe obenánaca acbe uayayënga acbe cucuatšinë chamoquedama chjamëntscuana ca.

<sup>45</sup> ¿Ntšámose Cristo, Davídbentšana Entšá nántsemna, cach David “Utabná ca” chábioye tbojtsabobuátmëse ca? —Jesús tojanatjá.

<sup>46</sup> Chora ndocná tonjanobená ni mo canye palabra jojuana. Y chë tescana ndocná yonjenñëmua Jesús más jatstjanayama.

## 23

*Jesús chë fariseungbiana y ley abuátambayëngbiana tojanayana, chënga ndoñe tšabá montsama ca*  
(Mc 12.38-40; Lc 11.37-54; 20.45-47)

<sup>1</sup> Chora Jesús, entšanga y chabe uatsjëndayënga mëntšá tojanëyana: <sup>2</sup> “Chë fariseunga y chë ley abuátambayënga cmondbétsabuatambaye ntšamo Moisesbe leyënguine iuayancá. <sup>3</sup> Chcasna, tšëngaftanga cmontsamna chënga joyaunayana y ntšamo tcmojauyancá, cachá jtsamana. Pero ndoñe šmattsama ntšamo chënga mondbetsamcá, er chënga ndoñe ntsamana ntšamo mondbetsabuatambacá. <sup>4</sup> Mo canye entšá, couáybioye uauta uasmanësha juasmayana y cachá tondaye tontsasmancá, chënga entšanga jtsamëndayana bëtscá mandënga chamotsocumplínama, pero cachënga ni mo batšatema ntsamana chë mandënga jtsocumplínama. <sup>5</sup> Chënga lempe jtsamana nye entšanga chamotsënyama. Chënga chë ínëngbiana más Bëngbe Bëtsá imobobonshana ca chamotsejuabnama, chënga monduamana tëntša sëndachëjënguine juabemana ntšamo Bëngbe Bëtsabe uabemana palabrenguine endayancá, y juentsaca y buacuatsiñe chëjënga jenábatsëcana y sibiajana nya tëntša uasebtotonanëjuangá jtsichëtjonana. <sup>6</sup> Chënga jtsebošana chë fiestënguine nya quëfseroca jtsetbiámanama, y chë judiëngbe enefjuana yebnënguenache chë más uamana luarënguine. <sup>7</sup> Chënga jtsebošana tsáshenañe entšanga nya respétoca chamotsacheuanama, y ‘abuátambayënga ca’ chamotsachembuanámnaca chënga jtsebošana.

<sup>8</sup> “Pero tšëngaftangna ndoñe šmattseboše entšanga ‘abuátambayënga ca’ chacmotsachembuanama, er nyetsca tšëngaftanga mo catsatangcá šmondmëna, Bëngbe Bëtsábeñe betsošbuachéyeca, y nye canya endmëna tšëngaftangbe Buatëmbayá. <sup>9</sup> Tšëngaftanga ‘taitá ca’ chë ley abuátambayënga šmondbétsachembuana, pero tšëngaftanga ndocna quem luarentšá ‘taitá ca’ šmattsechembuana; tšëngaftanga nye canye Taitá šmondbomna, chë celoca endmëná. <sup>10</sup> Ndoñe šmattseboše entšanga ‘mádayënga ca’ chacmotsachembuanama; er nye canye Mandayá endmëna y cha Cristo endmëna. <sup>11</sup> Nda tšëngaftangbeñe chë más uamaná tojtsemná bontsemna chë ínënga jtsaservénana. <sup>12</sup> Nda cachá bëtsá tojtšenobiamná, nduamaná mochántsebema; y nda cachá nduamaná tojtšenobiamnana, más bëtsá mochanjábema.

<sup>13</sup> “¡Tša lastema tšëngaftangbiana, bacna entšanga ntšamo ndegombre šmojuabnacá ndinÿinÿnayënga fariseunga y ley abuátambayënga! Tšëngaftanga šmontsama



entšangbiamama puerte totcá chaotsemna Běngbe Bětsabe aměndayoye jamashěnguama, mo běšáša cuaftsebiatamiancá. Pero ni cach tšěngaftanga choye quešmátamashjuana, ni ínŷenga choye jamashěnguama bošěngbioye chama quešmátalesenciana. <sup>14</sup> ¡Tša lastema tšěngaftangbiamama, ntšamo ndegombre šmojuabnacá ndinŷinŷnayěnga fariseunga y ley abuátambayěnga! Tšěngaftanga chě viudángbioye chě tmobomna soyěnga jtsabacayana, y entšangbe delante tšabá chacmotsěnyama y chěnga šmojtsaíngñayama ndoñe chamondětsetatsěmbuamna, Běngbe Bětsáftaca tša jtsencuéntayana. Chě causa, Běngbe Bětsá tšěngaftanga más jabuache ínŷengbiamama cmochanjácastigaye.

<sup>15</sup> “¡Tša lastema tšěngaftangbiamama, bacna entšanga ntšamo ndegombre šmojuabnacá ndinŷinŷnayěnga fariseunga y ley abuátambayěnga! Tšěngaftanga ba luarěnguenache jtsajnana canŷa tšěngaftangbe ustoná onguayíne, y šmojínŷena ora, tšěngaftanga jamana cha chaotsemna tšěngaftangbiamama uta soye más merecido buajoná infierno ye chaotsama.

<sup>16</sup> “¡Tša lastema tšěngaftangbiamama; tšěngaftanga šmondměna mo jtaněnga entšanga unachayěngcá! Tšěngaftanga šmondbětsichamo: ‘Nda ínŷabioye tbojašbuachená ndayánaca jamama y tojayana chě Běngbe Bětsabe běts yebnama chca jamama ca, cha ndoñe ntsemnana chě tbojašbuachená soye jamama ca. Pero chě Běngbe Bětsabe běts yebnentša castellanama cha tojajurasna, aíne jtsemnana chě tbojašbuachená soye jamama ca.’ <sup>17</sup> ¡Obějéměnga y nduabínŷněnga! ¿Ndayá más uámana soye yomna, chě castellano o Běngbe Bětsabe běts yebna? Chě castellano Běngbe Bětsabiamama josérviamama jtsemnana, nŷe Běngbe Bětsabe běts yebnoca chě castellano tojtsemnayeca. <sup>18</sup> Tšěngaftanga měntšánaca šmondbětsichamo: ‘Nda ínŷabioye tbojašbuachená ndayánaca jamama y tojayana chě altarama chca jamama ca, cha ndoñe ntsemnana chě tbojašbuachená soye jamama ca. Pero chě Běngbe Bětsabiamama altaroca tojtsejájona soyěngama tojajurasna, aíne jtsemnana chě tbojašbuachená soye jamama ca.’ <sup>19</sup> ¡Nduabínŷněnga! ¿Ndayá más uámana soye yomna, chě Běngbe Bětsabiamama tmojacjá soyěnga o chě altar? Chě tmojacjá soyěnga Běngbe Bětsabiamama josérviamama jtsemnana, nŷe chě altaroca chě soyěnga tmojacjáyeca. <sup>20</sup> Nda chě altarama tojajurá, ndoñe nŷe chě altarama ntsejúrayera. Lempe chě altar juatsboca tojtsemnámna cha jtsejúrayera. <sup>21</sup> Nda Běngbe Bětsabe běts yebnama tojajurá, ndoñe nŷe Běngbe Bětsabe běts yebnama ntsejúrayera. Běngbe Bětsabiamama cha jtsejúrayera, cha chě chentše oyená. <sup>22</sup> Y nda celocama tojajurá, chentše reyca Běngbe Bětsabe tthemaniñama cha

jtsejúrayana y cachora Bëngbe Bëtsabiámnaca, chentše yotbemanabiamana.

23 “¡Tša lastema tšëngaftangbiamana, bacna entsangana ntšamo ndegombre šmojuabnacá ndinÿinÿnayënga fariseunga y ley abuátambayënga! Tšëngaftanga Bëngbe Bëtsabiamana jtsequëcjnayanana chë jajañentša sananga bnëtsanentšana canÿe soye; chë binche matatémënga menta, anis y chë cominentša sanágnaca. Pero tšëngaftanga nÿe batšá jtsamana chë leyentša más uámana soyënga, mo chë nÿetsca entsangana cachca derechënga chamotsebomnana, ínÿënga jtsalastemánana y chë tšabe soyënguiñe jtsiyenana, chca, entsangana tšëngaftangbeñe chamotsošbuáchema. Chë soyënga cocayé cmontsamna jtsamama, chë inÿe tšabe soyënga amana ntjajbanacá. 24 ¡Ttanënga entsangana unachayënga! Tšëngaftanga chë base soyënga jamama puerte jtsenócochinÿenana, pero jtsebnëtjombana uámana soyënga jamama, Bëngbe Bëtsá tojanmandá soyënga. Y chca, tšëngaftanga šmontsemna mo canÿe entsá ndayá tojtsabuchetjca bayëfja jtsejuánana, ndoñe ntjasama, jasama ndoñe yondëlesenciana ca chë leyinÿe iuayana causa. Pero šmondmëna mo entsangcá ndëmuanÿënga camellbe mëntšena jasana, y chë leyinÿe endayana chcana jasama ndoñe yondëlesenciana ca.

25 “¡Tša lastema tšëngaftangbiamana, bacna entsangana ntšamo ndegombre šmojuabnacá ndinÿinÿnayënga fariseunga y ley abuátambayënga! Tšëngaftanga šmondmëna mo entsangcá ndëmuanÿënga platillëjënga y tazëšënga shjoicajana jtsóbojabiana, pero tsoyna nÿe cachcá jonÿayana. Tšëngaftanga tša jtsentšénana entsangbiamana mo tšabengcá jtsinÿnana, pero tšëngaftangbe ainanentše jútjena entsemna nÿe jtsatbëbanama y nÿe bëtscá soyënga jésebomnana juabnëngaca. 26 ¡Nduabinÿna fariseo! Cochjshetsajbaná ainaniñe bacna soyënga bomnana. Chamna nÿe tšabe juabnënga chentše cochtsebomna, y lempe ntšamo chacojtsamcá y entsangana chamojtsonÿacá tšabá echántsemna.

27 “¡Tša lastema tšëngaftangbiamana, bacna entsangana ntšamo ndegombre šmojuabnacá ndinÿinÿnayënga fariseunga y ley abuátambayënga! Tšëngaftanga šmondmëna mo obanëngbe cuevëshënga botamana uafjantsenëshëngcá; shjoicajana puerte botamanëshënga, pero tsoyna jútjena obanëngbe betashëngaca y janjuana soyëngaca. 28 Tšëngaftanga chca šmondmëna: entsangbe delante tšëngaftanga jtsinÿnana mo nÿetsca soyënguiñe tšabá amëngcá, pero ndoñe chca quešmátsmëna. Tšëngaftangbe ainanentšna chë bacna entsangana ntšamo ndegombre tmojuabnacá ndinÿinÿnayëngcá y chë bacna soye amëngcá šmontsejuabná.

29 “¡Tša lastema tšëngaftangbiamá, bacna entšanga ntšamo ndegombre šmojuabnacá ndinÿinÿnayënga fariseunga y ley abuátambayënga! Tšëngaftanga jtsamana chë Bëngbe Bëtsabe juabna oyebuambnayënga tempsquënga bëtsëtsa entšanga chamotsemnama, chëngbe cuevëshënga jtsatspórmayëse. Tšëngaftanga cachcá jtsamana chë nyetsca soyënguiñe tšabá amëngaftaca, chë chëngbiamá jtenójuaboyama pormániñe jtsatsbótamnyëse; 30 y chentšana šmondbétsichamo: ‘Bënga chë bëngbe bëtsëjémëngbe tempo maftsjanienëse, chëngbioye ndoñe matmënjánëjabuache chë Bëngbe Bëtsabe juabna oyebuambnayënga jobáyama ca.’ Pero mo chëngcá canÿe buayenana sóyeca tmojabëngbioyna ndoñe ntsayaunanana. 31 Pero ntšamo šmojtsamcá jtsamëse, tšëngaftanga šmontsinÿanÿná ndegombre chë Bëngbe Bëtsabe juabna oyebuambnayëngbioye tmojanëbayëngbe entšanguentsana šmomnama. Y mora cach tšëngaftangbe bëts taitangcá tšëngaftanga šmontsama. 32 ¡Mopochocanga jamama chë bacna soyënga, chë tšëngaftangbe bëts taitanga tmojanbojatsé jamama soyënga!

33 “¡Mëtšcuayënga, mëtšcuaye entšanga! ¿Ndayá šmochjama chë infiernoca uabouana castigüentsana jótsbocama? 34 Chíyeca atše tšëngaftangbioye chanjichamuá Bëngbe Bëtsabe juabna oyebuambnayënga, tšabe soye tatsëmbënga y abuátambayënga. Pero tšëngaftangna, ínÿengbioye šmochantsëbaye y šmochanjácrucificaye; ínÿengbioyna chë enefjuana yebnënguenache šmochanjátsetsenaye y nyetsca bëts pueblënguenache chënga šmochandúcamedna. 35 Chíyeca, tšëngaftangbiamá nyets castigo echántsemna chë nyetsca soyënguiñe tšabá amënga tmojëftsóbanama; Abel, chë jóbanama chabotsemnama tondaye tonjanmá, tmojanóba orscana y Zacarías tmojanóbantscoñe. Zacarías, Berequíasbe uaquiñana, Bëngbe Bëtsabe bëts yebnentše tmojanóba, altar y chë entšanga Bëngbe Bëtsábioye imojánadorana luariñe. 36 Ndegombre cbëyana, lempe chë soyëngama castigo morsca entšangbiamá echántsemna ca” —Jesús tojánayana.

*Jesús tojanošachna Jerusalemoca entšangbiamá  
(Lc 13.34-35)*

37 Mëntšánaca Jesús tojánayana: “¡Jerusalenentša entšanga, Jerusalementša entšanga! Tšëngaftanga chë Bëngbe Bëtsabe juabna oyebuambnayënga jtsëbáyana y chë Bëngbe Bëtsabe ichmónënga ndëtsbéngaca jtsatëchënganjana jtsëbáyama. Bueta soye atše sënjábošena tšëngaftanga átšbioye júbuajana, mo canÿe tuamba chabe bolletotémënga chabe juatëngmiáša tajsoye cuaftajayecá, pero tšëngaftanga ndoñe chešmátsbošena. 38 Y šmochjinÿe, atše mora

cachcá cbochanjesénjaye, y chca, atšna enánanga cbochanjésabashejuana, mo canye yebna cachcá tcojesonyá y éaña tcojeseboshjoncá. <sup>39</sup> Y atše cbéyana, ndegombre tšëngaftanga morscana atše ndoñe más quešmochátinje; y atše šmochántinje mēntšá chašmojtsichamo ora: ‘¡Corente bendición bomná, Bëngbe Utabnabe obenánaca tojabá ca!’ ”

## 24

*Jesús tojánayana chë Bëngbe Bëtsabe bëts yebna lempe mochjánpochocama*

(Mc 13.1-2; Lc 21.5-6)

<sup>1</sup> Jesús Bëngbe Bëtsabe bëts yebnentšana tojéftsanbocna y ya yojtsaye. Chorna chë uatsjéndayënga chábioye tmojanobeconá y tmojanontšé nýetsca chentša bëts yebnënga cha jinjinyiyana.

<sup>2</sup> Chora Jesús tojanéyana: “Tšëngaftanga lempe šmontsonyá. Ndegombre šcuayana, quem Bëngbe Bëtsabe bëts yebnentše ndoñe queochaisoquéda ni mo canye ndëtsbé inye ndëtsbé juatsboye. Lempe mochantsepochoá ca.”

*Ntsamo yochtsemna quem luare jopochócama tempo chaojt-sobeco ora*

(Mc 13.3-23; Lc 21.7-24; 17.22-24)

<sup>3</sup> Chentšana chënga Olivos tjashoye tmojána. Jesús choca yojtsetbemana; as, chë uatsjéndayënga tmojanobobeconá nýe chëngbiamá jatjayama, mēntšá: —Sméyana. ¿Mocna ora chë soyënga Bëngbe Bëtsabe bëts yebnocá yochjochnëngo ca? ¿Ndayá yochjochnëngo bënga jinjanyiyama aca jésabama ora ya yojtsemnama y quem luare jopochócama tempo yojtsobecuama ca?

<sup>4</sup> As Jesús tojanjuá: —Cuedado šmochtsebomna ndocná chacmondáingñema. <sup>5</sup> Banga mochanjabo y mochantsabíchamo chënga atše imomna ca. Mochánttsichamo: “Atše chë Cristo sēndmēna ca” y chca, ba entšangbioye mochanjáingñaye.

<sup>6</sup> Tšëngaftanga šmochanjouena canye luarentša entšanga inye luaroca entšangaftaca imojtsentsjanama y nderado mochjentsjámna. Ndoñe matauatjëngana, er chca jochnënguama endmēna; pero masque chcase, quem luare jopochócama cabá ndoñe queochátsmēna. <sup>7</sup> Canye luarentša entšanga inye luaroca entšangaftaca mochánttsentsjanaye, y canye amëndayábentša entšanga inye amëndayábioca entšangaftácnaca; y ba luarënguifne shēntsana echanjóshjango y chentša fshantsënga echanjuangmēmama. <sup>8</sup> Masque chca jasúfriase, más chcoye cabá más mochanjatssúfria.

<sup>9</sup> “Chora, entšanga ínýengbe cucuatšifne cmochanjábashejuana chacmatsetšenama y cmochantsëbaye;

y atšbe ústonënga bétsemnayeca nyetsca luarënguentsä entsanga cmochantsëbuayënja. <sup>10</sup> Chë tempo, banga mora átšbeñe ošbuáchiyënga, ošbuáchiyana mochantasjbaná y mochantesenáboyënja y jóbanama ínÿengbe cucuatšifne mochántsenboshjuana. <sup>11</sup> Banga Bëngbe Bëtsabe ndoñe ndegombre juabna oyebuambnayënga mochanjábocana y ba entsanga mochanjáingñaye. <sup>12</sup> Nyetsá bacna juabnënga entsangbe ainaniñe echanjésemna, y chë causa banga ndoñe quemocháatenbobonshana. <sup>13</sup> Pero nda nyets tempo átšbeñe ošbuachiyá totsomñe, atsbocaná echántsemna. <sup>14</sup> Y quem tsabe noticiënga Bëngbe Bëtsabe amëndayama nyets quem luariñe entsángbioye mochántsabuyiynaye, chca, chë ndegombre soyënga Bëngbe Bëtsabiamá chënga chamotsetatsëmbuama. Chentsana cocayé quem luare jopochócama tempo echántsemna.

<sup>15</sup> “Chë Bëngbe Bëtsabe juabna oyebuambnayá Daniel chë puerte uabouana soye tojéftsanabema chë pochócaye soyama. Tsëngaftanga chë puerte uabouana soye chë uámana ca uabaina luarentse chašmojinÿe ora (nda tojtsalía, chabosertá), šmochántsetatsëmbo chë puerte ngménana tempo tojóshjanguama; <sup>16</sup> entsanga Judeoca chamojtsemnënga, batsjabengoye chamotsacheta. <sup>17</sup> Y nda cachabe yebnentša tsbanánoca chaojtsemna, chaotsachá chocana ntjtastjangcá ndayá tsoicana jéftsabocnama. <sup>18</sup> Y nda jajoca chaojtsemna, yebnoye ndoñe chaondëta ni mo chabe quëfsaíya jesácñama. <sup>19</sup> ¡Tša lastema chë tempo ngomámanënga chamojtsemnëngbiama o ochóchaye šešonga chamojtsabamnëngbiama! <sup>20</sup> Bëngbe Bëtsá šmochtseimpadana chë tsëngaftanga jachetama, uaftena tempo ora o canÿe ochnayté ndoñe chaondëtsemnama. <sup>21</sup> Chca, chora puerte ngménana echántsemna. Tša jabuache ngmenancá, quem luare jabojátšama orscana y méntscoñama y más chcoye, cachcá ngménana ndoñe ntjamnana. <sup>22</sup> Chë puerte ngménana tempo yapa bën ndoñe chaondëtsemnama Bëngbe Bëtsá ndoñe tonjalesenciase, ndocná quentatsbocá; pero chabe ubuáyanënga cha corente endábabuanÿeshanayeca, echanjama yapa bën tempo ndoñe chaondëtsemnama.

<sup>23</sup> “Chora nderado nda cmochanjáuyana: ‘Minÿënga, muentse chë Cristo entsemna’, o ‘Choca cha entsemna ca’, chë soyëngama ndoñe šmattsayaunana. <sup>24</sup> Chora mochanjábocana ndoñe ndegombre uámana ubuáyanënga, chënga Cristo imomna ca jtsichámëse, y Bëngbe Bëtsabe ndoñe ndegombre juabna oyebuambnayëngnaca; y chënga mochanjama bëts soyënga chëngbe obenana jinÿanÿiyama, entsanga jáingñama, y tmojobenase, chë Bëngbe Bëtsabe bocacánëngnaca. <sup>25</sup> Atše

ya chama tbonjabuayená chë tempo cabá ndóshjango ora. <sup>26</sup> Chíyeca, nderado chënga chacmojáuyana: ‘Minyënga, chentse chë Cristo entsemna, entsanga ndoyenoca ca’, choye ndoñe šmatjá; o chacmojáuyana: ‘Cha canye tsoca entsemna ca’, chama ndoñe šmattsayaunana. <sup>27</sup> Er ntšamo chë tojatcuinye ora, shinye bocanoicana y shinye uenatjëmbambanëntscoñe jabuashinyinyenancá y ba luarënguenache entsanga jobenayana jinýama, cachcá, Bëngbe Bëtsá Entśá tbojanbemá quem luaroye chaojésabo te, entsanga nyets luarentse mochanjobenaye cha jinýama. <sup>28</sup> Canye obanabe cuerpo tojtsemnama chë gallinacënga tmojátatsëmbona y cachora chë béconana jojotana. Cachcá, chë castigo echántsemna nya chama chë tempo chaojtsemna ora ca” —Jesús tojánayana.

*Bëngbe Bëtsá Entśá tbojanbemá quem luaroye echanjésabo  
(Mc 13.24-37; Lc 21.25-33; 17.26-30, 34-36)*

<sup>29</sup> Mëntśánaca Jesús tojánayana: “Chë puerte ngménana tempo chaojochnëngüentsana, shinye ndoñe queochátsbuashinyinýana, juashcona ndoñe queochátsbinýnaye, celocana estrellënga echanjatquécjana y quem luarentša tsbanánoca espíritënga obenana bomnënga echanjángmëmana. <sup>30</sup> Chora canye soye celoca echanjónýna entsanga jinýanýiyama Bëngbe Bëtsá Entśá tbojanbemá ya iuaisaboma, y nyets luarenache entsanga mochanjenóbošachna, y Bëngbe Bëtsá Entśá tbojanbemábioye mochanjinye celoca jantšetëshiñe echántsaboye, puerte obenánaca y corente buashinyinýaniñe. <sup>31</sup> Y canye trompetëfjua jabuache chaojuénana ora, cha chabe angelotëmënga echanjichamuá Bëngbe Bëtsabe ubuáyanënga júbuajama, nyets luarëngocana, celoca cánýoica juachoicana y chë ínýoica juachóntscoñe.

<sup>32</sup> “Ntšamo higo betíyeca endbëtsopasanama šmochjuatsjinýe: Tojtsaisabuacuana y tojtsaisëjotsana ora, chë tšabe tempo ya tojtsaisobecuama jtsotatsëmbuana. <sup>33</sup> Cachcá, lempe chë ndayama tšëngaftanga tbonjauyancá chašmojinýe ora, šmochántsetatsëmbo Bëngbe Bëtsá Entśá tbojanbemá ya jésabama yojtsemnama. <sup>34</sup> Ndegombre cbëyana, lempe chca echanjochnëngo, morsca entsanga cabá ndóbana ora. <sup>35</sup> Celoca y quem luare echanjopochóca, pero atšbe palabra ndocna te queochaisopochóca.

<sup>36</sup> “Pero ndayté y ntseco ora Bëngbe Bëtsá Entśá tbojanbemá yochjésabama, ndocná quenátstatsëmbo, ni chë celoca angelotëmënga, ni Bëngbe Bëtsabe Uaquiñá. Nye chë Taitá chama yotatsëmbo.

37 “Ntšamo Noé yojěftsiyena ora tojanopasacá, cachcá echanjopása chë Bëngbe Bëtsá Entšá tbojanbemá chaojésabo ora. 38 Noebe tempo, chë uabouana uaftena cabá nduáshjango ora, entšanga imnasaye, imnofšěsnaye y imnóbouamnaye; natjěmbana imojtsiyeñe, y chca imojtsomñe Noé chë barquěshoye tojánamashěnguěntscuana. 39 Chěnga tondaye imonjántatšěmbo, nñe chë uabouana uaftena tojánashjango y nñetscanga tojtsaněyamba ora cocayé. Cachcá echántsemna Bëngbe Bëtsá Entšá tbojanbemá chaojésabo ora; ya chaojochněngo ora, entšanga chama mochanjátatšěmbona. 40 Chora uta boyabásata jajoca bochántsemna; canya mochanjesbetše y chë ínñana ndoñe. 41 Uta shembásata bochántsejanycoye; canya mochanjesbetše y chë ínñana ndoñe.

42 “Chíyeca cuedado šmochtsebomna y yejuana šmochtsantješna, er ndoñe quešmátstatšěmbo ndaytė tšěngaftangbe Utabná yochjésabama. 43 Pero quem soye tšabá chacmėsertá: Chë yebnentša nduiño, ntseco ora ibeta atbėbaná yochjabama tojtsetatšěmběse, cha nantsefšna y ndocnábioye buanjaleséncia jushañe chaotsendbemama tsoye jtsamashěnguama y jtsatbėbama. 44 Chíyeca, tšěngaftángnaca šmochtseprontana, er Bëngbe Bëtsá Entšá tbojanbemá echanjésabo, entšanga chama tondaye chamontsejuabná ora ca” —Jesús tojánayana.

*Chë tšabe oservená y chë ndoñe tšabe oservená  
(Lc 12.41-48)*

45 “¿Nda yomna chë oservená ntšamo chë nduiño tojtsebošcá amá y nñets juábnaca amá? Cha jtsemnana nda chë nduiño bochjěftsebošhona chë yebnentšěnga chaotsanñenama y jasama tojtsemna ora chaújuatšěma. 46 Chë nduiño tojtashjango ora, chë oservenábioye tbojínñena ntšamo ibomncá jtsaměse, chë oservená puerte oyejuayá echántsemna. 47 Ndegombre cbėyana, chë nduiño chábioye bochanjaimpáda lempe chabe soyěnga chabotsinñeñama. 48 Pero chë oservená bacna entšá tomněsna, jajuaboyana chë nduiño ndoñe betSCO yochantabo ca, 49 y as, cha jóntšana chë inñe oservéněnga jtsajantšetayana, becá jtsesana y jtsetmuana inñe tēmiěngaftaca. 50 Y chabe nduiño jtashjanguama ndoñe tontsejuabná te y ndoñe tontsetátšěmbo ora, cha echántashjango. 51 Chora chë nduiño jabuache bochantsecastíga, y ntšamo chë bacna entšanga ndayá ndegombre tmojuabnacá ndinñinñayěnga jasúfriama entsamncá, cha echanjasúfria. Chora cha puerte echanjenóbošachna y chë tsetšanama juatsašěnga echantsenoftěšjojnaye ca” —Jesús tojánayana.

## 25

*Chë bnëtsana tobiasëngbiama cuento*

<sup>1</sup> Mëntsánaca Jesús tojánayana: “Chë te chaojóshjango ora, Bëngbe Bëtsabe amëndayana echántsemna mo ntšamo canÿe casamento fiestentše tojanopasacá. Mëntsá yojopása: Bnëtsana tobiasënga chëngbe querosine uajuinÿanëshangá imojëftsájaca y imojábocana chë casamentero boyabása jajébenguama. <sup>2</sup> Chë bnëtsana tobiasënguentšana, shachnënga sempre enójuabnayënga immamna, y chë inÿe shachnënga, ndenójuabnayënga. <sup>3</sup> Chë ndenójuabnayëngna chëngbe uajuinÿanëshangá imojëftsájaca, pero querosine ndoñe imonjuabuyamba chë uajuinÿanëshangañe cachiñe jtaftsuámama. <sup>4</sup> Pero chë sempre enójuabnayëngna chëngbe uajuinÿanëshangá imojëftsájaca y querosinënaca botellëšënguiñe imojuabuyamba. <sup>5</sup> Chë casamentero boyabásana ndoñe betesco yonjabo, chíyeca nÿetsca tobiasënga ocnayana yojubuache y imojtsomaná. <sup>6</sup> Mo tsëntseto orna, chënga imojouena mëntsá uayebuáchana: ‘¡Chë casamentero boyabása ya endabó! ¡Jajébenguama mobocana ca!’ <sup>7</sup> Asna, nÿetsca tobiasënga imojotsbaná y imojóntša chë uajuinÿanëshangá juabopróntana. <sup>8</sup> Chorna, chë shachna ndenójuabnaye tobiasënga chë inÿe shachnënga siempre enójuabnayëngbioye imojáuyana: ‘Diosmanda tšëngaftangbe querosinentšana baseytema šmëbuatšatá, bëngbe uajuinÿanëshangá tojontsé jtsafsananana ca.’ <sup>9</sup> Pero chë siempre enójuabnayëngna imojayana: ‘Ndoñe. Tcbojubuatšatase, tšëngaftangbiama y bëngbiámnaca querosine echántssashbe. Más tšabá entsemna, chë querosine mondbétsenoye chašma y tšëngaftangbiama chašmauábuamiñe ca.’

<sup>10</sup> “Chorna, chë shachna ndenójuabnaye tobiasënga imojá chë querosine jauabuámiyama; pero chëntsçuana chë casamentero boyabása yojáshjango y chë sempre enójuabnayënga cháftaca chë casamento fiestoye imojámashjna, y chentša bëšáša imojtatame. <sup>11</sup> Chentšana chë inÿe tobiasënga imojáshjajna y mëntsá imojtsichamo: ‘¡Taita, Taita, šmebëtafjo ca!’ <sup>12</sup> Pero chë casamentero boyabása yojójua: ‘Ndegombre cbëyana, tšëngaftanga ndoñe quecbatëbuatma ca.’

<sup>13</sup> “Cachcá echántsemna Bëngbe Bëtsá Entšá tbojanbemá chaojésabo ora; chíyeca šmochtseprontana, tšëngaftanga ndoñe quešmátstatšëmbo ndayté, ni mocna ora chca yochjopásama ca” —Jesús tojánayana.

*Chë crocenánama cuento  
(Lc 19.11-27)*



14 “Bëngbe Bëtsabe amëndayana endmëna mo ntšamo canÿe boyabásaftaca tojanopasacá. Cha ibojtsemna inÿe luaroye jtsoñama; as chabe oservénënga yojáchembo y yojaimpádaye chabe crocénana chamotsinÿenama. 15 Cánÿabioye ibojántšabuachiye shachna uaranga crocénana, ínÿabioyna uta uaranga y ínÿabioyna canÿe uaranga. Chca yojamna ntšamo cada ona ibojobiashjachcá. Y as chë boyabása yojtsoñe. 16 Cachora chë shachna uaranga yojoyëngacñá yojá trato jabemama, y chca, inÿe shachna uaranga crocénana yojábotiye. 17 Chë uta uaranga yojoyëngacñá cachcá yojama y inÿe uta uaranga yojábotiye. 18 Pero chë canÿe uaranga yojoyëngacñana, yojá, fshantsiñe yojajutjo y chabe mandayabe crocénana chentše yojtseitëme.

19 “Chentšana baytese chë oservénëngbe amëndayá yojtashjango y yojóntša chë crocenánama chënga jatjayana. 20 Natsana yojáshjango chë shachna uaranga yojoyëngacñá y chabe mandayábioye inÿe shachna uaranga crocénana ibojántšabuachiye y mëntšá ibojauyana: ‘Taita, aca shachna uaranga šconjanoyé y muentše entsemna inÿe shachna uaranga sënjaboté ca.’ 21 As chë mandayá ibojauyana: ‘Tša tšabá, tšabe oservená y ntšamo tsbošcá amá. Aca quem base soyiñe lempe ntšamo tchojamandacá tcojámayeca, atše cbochanjaimpáda más bëtsacá chašcotsinÿeñama. Mamáshëngo y átšeftaca cochjóyejuaye ca.’ 22 Chentšana chë uta uaranga yojoyëngacñá yojáshjango y chë mandayábioye ibojauyana: ‘Taita, aca uta uaranga šconjanoyé y muentše entsemna inÿe uta uaranga sënjaboté ca.’ 23 As chë mandayá ibojauyana: ‘Tša tšabá, tšabe oservená y ntšamo tsbošcá amá. Aca quem base soyiñe lempe ntšamo tchojamandacá tcojámayeca, atše cbochanjaimpáda más bëtsacá chašcotsinÿeñama. Mamáshëngo y átšeftaca cochjóyejuaye ca.’

24 “Pero chë canÿe uaranga yojoyëngacñe oservená yojáshjango orna, chabe mandayábioye ibojauyana: ‘Taita, atše sëndétatšëmbo aca canÿe tšátjaye entšá comnama; acna chë ndoñe tconjajé chentše saná jocñana y chë ndoñe tconjuquëshe luarentše jobuátbanana. 25 Chama atše uatjana šjuábuache, chíyeca atše sënjá y fshantsiñe chë crocénana sënjetseitëme. Pero muentše acbe crocénana entsatsmëna ca.’ 26 As chë mandayá ibojajuá: ‘¡Bacna oservená y oyënjayá! Chë ndayentše ndoñe tijajé chentše saná jocñana y chë ndoñe tijujquëshe luarentše jobuátbanana atše tsuamanama icojátatšëmbëse, 27 aca cmonjamna atšbe crocénana bancoca jetsobuájuana y atše matijtabo ora, atšbe crocénana matijtóyëngacñe y chë chentšana tojoboté crocénanënaca ca.’ 28 Y as yojamënda: ‘Chë uaranga motseboca y chë bnëtsana

uaranga entsebomnábioye chana motsatšetá ca. <sup>29</sup> Er nda tojtsebomnábioye, más jatšetayana, y chca cha corente bëtscá jtsebomnana; pero tondaye tondbomnábioyna, chë batšatema tobomna sóynaca jtsebocana ca.'

<sup>30</sup> "Y chora cha yojayana: 'Quem ndoservena trabajayá shjoca ibetoye matábocna; choca puerte echanjenóbošachna y chë tsetšanama juatsašënga echantsenoftëšjojnaye ca' " – Jesús tojanëyana.

*Ntsamo chë quem luare jopochócama ora, nyetsca entsangbiama mochjajana*

<sup>31</sup> Mëntšánaca Jesús tojánayana: "Chë Bëngbe Bëtsá Entšá tbojanbemá chabe obenánaca, buashinÿinÿaniñe y nyetsca chabe angelotémëngaftaca chaojésabo ora, chë reybiama puerte buashinÿinÿana tbemaniñe echanjót'bema. <sup>32</sup> Chora nyets luarëngoca entsanga chabe natsanoica mochanjénefjna, y cha, entsanguentsana ínÿenga echanjábacacaye, mo chë oveshënga abuañëñya oveshënga chivëngbentsana endbetsabacacnaycá. <sup>33</sup> Chë abuañëñyana, oveshënga chabe catšbioica echanjáchembo y chivëngna chabe uañicuayoica. Bëngbe Bëtsá Entšá tbojanbemá cachcá echanjama: chë ubuáyanënga chabe catšbioica echanjúbuaja y chë bacna entsangna chabe uañicuayoica echanjátsaye.

<sup>34</sup> "Chorna chë Rey, Bëngbe Utabná, chabe catšbioica chamojtsemna entsanga echanjáuyana: 'Tšëngaftanga, Atšbe Taitá tšábeñe cmëtabna, mabënga ca; atšbe amëndaye luare mo tšëngaftangbiama otocana soycá mosháchiñënga; tšëngaftangbiama endëprontana, Bëngbe Bëtsá quem luare tonjanma orscana. <sup>35</sup> Er atšë šonjanishëntsana y tšëngaftanga saná šmonjancaredadó; šonjanajuendá y tšëngaftanga šmonjanafšé; inÿe luarocana ashjanganocá sënjánana y posada šmonjanántšame. <sup>36</sup> Enašá sënjánana y entsayá šmonjanëtšetá jtichëtjuama; šocá sënjanjájona y šmonjanatsëtsaye; cárceloca sënjanëtámëna y jabëuatsëtsayama šmonjánabo ca.'

<sup>37</sup> "As chë Bëngbe Bëtsá chabe bominÿiñe tšábënga tojábiamënga mochanjatjaye: 'Bëngbe Utabná, ¿ntseco shëntseca tcbënjáninÿe y tcbënjanajuatšé? ¿Ntseco uajuendayá tcbënjáninÿe y tcbënjanaafšé? <sup>38</sup> ¿O ntseco inÿe luarocana ashjanganocá tcbënjáninÿe y posada tcbënjanaántšame, o enašá y entsayá jtichëtjuama tcbënjanaëtšetá? <sup>39</sup> ¿O ntseco šocá o cárceloca utamená tcbënjáninÿe y jauatsëtsayama tifjána ca?'

<sup>40</sup> "As chë Utabná echanjóju: 'Ndegombre cbëyana, lempe ntsamo chë atšbe catšátanguentsana chë más batšá uámanëngaftaca šmojamcá, cach átšëftaca šmonjanma ca.'

41 “Chentšana chë Utabná chabe uañicuayoica chamojtsemna entšanga echanjáuyana: ‘Atsbentšana mojuánanga atšbe Bëtsabe uaboténënga. Infiernoye motsajna, chë ndocna te queochátsfsana íñeshoye; choca endëprontana Satanás y chabe ustonëngbiama. 42 Er atše shëntseca sënjánana y tšëngaftanga saná ndoñe chešmatancaredadó; šonjanajuendá y ndoñe chešmatanafsé; 43 inye luarocana ashjargonacá sënjánana y ndoñe posada chešmatanántšame. Enašá sënjánana y ndoñe entšayá chešmatanëtšetá; šocá sënjanjájona y cárceloca sënjanëtámena y ndoñe chešmatanatsétsá ca.’

44 “As chënga mochanjatjaye: ‘Bëngbe Utabná, ¿ntseco tcbënjáninye shëntseca o uajuendayá, o inye luarocana ashjargonacá, o enašá, o šocá o cárceloca utamená y ndoñe tcbënjanajabuache ca?’

45 “Y chë Utabná echanjójua: ‘Ndegombre cbëyana, tšëngaftanga ntšamo chë atšbe catšátanguentsana chë más batšá uámanëngaftaca, ndoñe šmonjanmcá, átseftaca cach ndoñe chešmánama ca.’

46 “Chëngna infiernoye nyetsca tescama mochantsésetjango, y chë Bëngbe Bëtsá chabe bominyíñe tšábenga tojábiamëngna chë nyetsca tescama yomna tšabe vida mochántsebomna ca” — Jesús tojánayana.

## 26

*Entšanga tmojanjuabó ntšamo jamëse Jesús jishachama*  
(Mc 14.1-2; Lc 22.1-2; Jn 11.45-53)

1 Lempe chca tojánayanentsana, Jesús chabe uatsjédayënga tojanëyana: 2 “Tšëngaftanga šmondëtatšëmbo, uta te y chë Bashco fiesta echántsemna y Bëngbe Bëtsá Entšá tbojanbemá inyëngbe cucuatšíñe mochanjáboshjona chamocrucificama ca.” Chë fiesta inamna jtenójuaboyama Bëngbe Bëtsá chë judiëngbe bëts taitanga Egiptocana tojánatsebacama.

3 Chëntscuana, chë bachnangbe amëndayënga y chë judiëngbeñe bëtsëjemëngcá mándayënga tmojánenefjna, Caifás, chë bachnangbe más uámana amëndayabe bëts yebnentše. 4 Tmojanenujuabó y tmojanenoyeuná jtseíngñase Jesús jishachama, y jtsóbama. 5 Pero imojtsichamo: “Quem fiestëntscuana ndoñe, entšanga yapa muanjónťša enbouenanana ca.”

*Canye shembása botamana uanguëtše béjaye Jesusbe bestšašíñe tbojanbuešcja*  
(Mc 14.3-9; Jn 12.1-8)

6 Jesús Betania pueblentše yojtsemna, Simón chë bacna nguayanánaca šocá ca uabobuatmabe yebnentše.

<sup>7</sup> Chëntsçuana canÿe shembása Jesúsbioye tojanabeconá. Chë shembásana tojanamba canÿe alabastro jarrëtema, jútjena canÿe puerte uámana botamana uanguëtse béjayeca. Jesús mesëshentse yojtsemnëntscuana, chë shembása chabe bestšašiñe chë botamana uanguëtse béjaye tbojanbuešcja.

<sup>8</sup> Chë uatsjédayënga chca tmojáninÿe orna, tmojanotjayaná y tmojanontsé ichámuana: —¿Ndáyeca nÿe bonamente chë soye chca yojtsemna ca? <sup>9</sup> Chamna, matmënjobenanga chë béjaye beca crocenánama juiyana y chánaca ndbomnjémënga matmënjújabuache ca.

<sup>10</sup> Jesús chë soye tojanuena; as tojanëyana: —¿Ndáyeca ndoñe cachcá quem shembása šmochanjonÿaye ca? Ntšamo tonjamcá tšabá entsemna. <sup>11</sup> Er chë ndbomnjémëngna nÿets tempo tšëngaftangbeñe mochanjëftsemna, pero atše tšëngaftangaftaca ndoñe nÿets tempo quicháisemna. <sup>12</sup> Ntšamo chë shembása tojamcá, chë botamana uanguëtse béjaye atšbe cuerpiñe jabuéscjese, cha šontseprónta atše juatbontsa tescama. <sup>13</sup> Ndegombre cbëyana, quem luariñe ndayéntšnaca Bëngbe Bëtsabe soyëngama chamojtsabuayiyná chentse, ntšamo quem shembása tojamámncaca beca mochanjëftsóyebuambaye, chca, entšanga chabiamama chamotsenójuabnama ca —Jesús tojanëyana.

*Judas tojána bachnangbe amëndayëngbioye, Jesús chamuishachama*  
(Mc 14.10-11; Lc 22.3-6)

<sup>14</sup> Canÿa chë bnëtsana uta uatsjendayënguentsá, Judas Iscariote ca uabainá, tojána bachnangbe amëndayëngaftaca jencuéntama. <sup>15</sup> Y tojanatjá: “¿Ntsachetsá šmatjtabuénaye y Jesús tšëngaftangbe cucuatšíñe cbochjayentšbashejuana ca?”

As chëngna, unga bnëtsana ralbenga tmojtanabuená. <sup>16</sup> Y cach orscana Judas yojtsenguaye ntšámose y ntseco ora, Jesús chëngbe cucuatšíñe jayentšbashejuanama.

*Jesús chabe uatsjédayëngaftaca Bashco saná tojanse*  
(Mc 14.12-25; Lc 22.7-23; Jn 13.21-30; 1 Co 11.23-26)

<sup>17</sup> Chë Bashco fiesta bojatšenté, chë levadúraca ndëpormana tandëse jasama fiestëntscuana, chë uatsjédayënga Jesúsbioye tmojanobeconá y tmojantjá: —¿Ndémoca aca cojtseboše bënga fchaiprontama Bashco saná chacosama ca?

<sup>18</sup> Y Jesús tojanëyana: —Chë bëts puebløye motsajna canÿe bacobe yebnoye y cha šmochjauyana: “Buatëmbayá tonjayana: ‘Atšbe ora ya echanjobuache, y atše acbe yebnoye sëntsá, Bashco fiesta jamama atšbe uatsjédayëngaftaca ca.’ ”

<sup>19</sup> As chë uatsjédayënga tmojanma ntšamo Jesús tojanamëndacá y chë Bashco fiesta saná tmojanprontá.

20 Y tojanibétata orna, Jesús chë bnëtsana uta uatsjëndayëngaftaca mesëshentse yojtsemna. 21 Y imojtseantscuana, Jesús tojanëyana: —Ndegombre cbëyana, canya tšëngaftanguentšá uayayëngbe cucuatšinë šochanjáboshjona ca.

22 Chora chë uatsjëndayënga puerte ngménaca imojtsemna y tmojanontšé canyánya Jesús jatjayama: —Bëngbe Utabná, ¿nderado atše cha chtsemna ca?

23 As Jesús tojanëjua: —Canya nda chabe tandëse entsefchecuacná cach atše sëntsefchecuacná šcnenentše, cha uayayëngbe cucuatšinë šochanjáboshjona. 24 Ndegombre, Bëngbe Bëtsá Entšá tbojanbemáftaca echanjopása ntšamo Bëngbe Bëtsabe uabemana palabrenguiñe chabiamana iuayancá; pero, itša lastema chë bochjáboshjonabiamana! Más tšabá chabiamana manjamna ndoñe ntjónynana ca.

25 As Judas, chë boshjuaná, Jesúsbioye tbojantjá: —Buatëmbayá, ¿nderado atše chtsemna ca?

Y Jesús tbojanjuá: —Ndegombre tcjayana ca.

26 Imojtseantscuana, Jesús tandëse tojanca, Bëngbe Bëtsábioye chama tbojtanchuá, tojanjatá y chë uatsjëndayënga tojanatšatá. Y mëntšá tojánayana: “Mocñënga, mosënga. Atšbe cuerpo entsemna ca.”

27 Chentšana, canye coptema vínoyeca tojanaca, Bëngbe Bëtsábioye tbojtanchuá y chë uatsjëndayënga tojanëššašë. Y mëntšá tojánayana: “Nyetscanga quem coptémentšana mofšenga. 28 Quem vínoye atšbe buiñe entsemna. Atšbe buiñe echanjuábuashana entšanga chamotsetatšëmbuama ntšamo Bëngbe Bëtsá entšanga tojanašebuachenacá aiñe yochjochnënguama. Chë buiñe bëtscá entšangbiamana echanjuábuashana, chëngbe bacna soyëngama perdonánënga chamotsemnana. 29 Y ndegombre cbëyana, morscana atše ya ndoñe más chë uvasentšana obocniye quichaisofsiye. Chë tsëm vínoye tšëngaftangaftaca chanjofsiye, atšbe Taitabe amëndayoca chamojtsemna ora ca” —Jesús tojánayana.

*Jesús tojánayana, chábioye ndoñe bonjanabuátma ca Pedro yochjánayanama*

*(Mc 14.26-31; Lc 22.31-34; Jn 13.36-38)*

30 Bëngbe Bëtsá jëtschuayama tmojancantá chentšana, Olivos tjashoye tmojëftsanbocana. 31 Choca Jesús tojanëyana: —Tšëngaftanga nyetscanga quem ibeta átšbeñe ošbuáchiyana šmochantsobuetše y šmochántšacheta, er Bëngbe Bëtsabe uabemana palabrenguiñe, cha mëntšá tojánayana: “Chë oveshëngbe abujënyá chanjóba y chë oveshënga mochantsáshana ca.” Chca tšëngaftangaftaca echanjopása, uayayënga chašmojishache ora. 32 Pero obanënguentsana

chaitayenentšana, tšëngaftangbe natsana Galileoye chanjá ca —cha tojanëyana.

<sup>33</sup> Chora Pedro tbojanjúá: —Masque nÿetscanga ácebeñe ošbuáchiyana chamotsobuetše y chamotsacheta, ntšamo ácaftaca yochjopása causa, atše ndocna te ca.

<sup>34</sup> As Jesús tbojaníyana: —Ndegombre cbëyana, cam ibeta, ngallo cabá ndécánta ora, aca unga soye cochanjayana ndoñe šconduabuatma ca.

<sup>35</sup> Pero Pedro tbojaníyana: —Masque chašotsemna ácaftaca jóbanama, atše ndoñe quichátayana ndoñe cbonduabuatma ca.

Y nÿetsca uatsjéndayëngnaca cachcá imojtsichamo.

*Getsemaní luarentše Jesús Bëngbe Bëtsáftaca tbojanencuentá (Mc 14.32-42; Lc 22.39-46)*

<sup>36</sup> Chentšana, Jesús chabe uatsjéndayëngaftaca canÿe luare Getsemaní ca uabáinoye tojána. Choca tojanëyana: “Muentše motbiamá, chëntscuana atše choye chanjá Bëngbe Bëtsáftaca jencuéntama ca.”

<sup>37</sup> Y Pedro y chë Zebedeobe uta uaquiñata tojëftsanébiatše. Choca yojóntša puerte ngménaca y corente cochtsetšenaná jtsemnama. <sup>38</sup> Jesús tojanëyana: “Atšbe ainana puerte ngménaca entsemna, mo jobanamcá. Muentše moquedanga y átšeftaca šmochtsefšna ca.”

<sup>39</sup> Chora Jesús más natsanoye tojána, tojanoshamentšé y fshantsóntscoca yojotsejbéna, y mëntšá Bëngbe Bëtsáftaca tbojanencuentá: “Atšbe Taitá, jopódianëse moma atše japadésama ndoñe chašondëtsemnama. Pero ntšamo atše štsebošcá ndoñe chaondëtsemna, sinó ntšamo aca cojtsebošcá ca.”

<sup>40</sup> Chentšana, Jesús chabe unga uatsjéndayëngbiyoye tojtanabo y chëngna inmëtsomañe. Chca tojánanÿena ora, Pédrëbiyoye tbojaníyana: “¿Ni mo canÿe horatema tšëngaftanga šmonjobená átšeftaca jtsefšnana ca? <sup>41</sup> Smochtsefšna y Bëngbe Bëtsáftaca šmochtsencuéntaye, chca, bacna soye jamama ndoñe chacmondócochënguama. Tšëngaftanga ndegombre šmontseboše espíritoca Bëngbe Bëtsá joyeunayama, pero cuerpiñe añemo ndoñe quešmátsbomna ca” —Jesús tojanëyana.

<sup>42</sup> Uta soyama tojtesaná y mëntšá Bëngbe Bëtsáftaca tbojanencuentá: “Atšbe Taitá, atše japadésama ndoñe chašondëtsemnama jamama ndoñe jopódianësna, nÿe ntšamo aca cojtsebošcá chaotsemna ca.”

<sup>43</sup> Y tojtanabo ora, chë uatsjéndayënga cachiñe inmëtsomañe; yapa ocnyae causa nÿe imojtsefshétana. <sup>44</sup> As Jesús cachcá yojëftsënÿaye, y ungama cachiñe tojtesaná Bëngbe Bëtsáftaca jencuéntama, y cach palabrenga tojánayana.

<sup>45</sup> Chora chë uatsjéndayëngbiyoye tojtanabo y tojanëyana: “¿Cabá šmotsomañe y šmotsochnañe ca? Ya ora tocjobuache,

Bëngbe Bëtsá Entšá tbojanbemá bacna soye amëngbe cucu-atšiñe mochanjáboshjona. <sup>46</sup> Motsbananga, cuajna. Minyënga, chë boshjuaná ya entsebeconá ca.”

*Uayayënga Jesús tmojánishache*  
(Mc 14.43-50; Lc 22.47-53; Jn 18.2-11)

<sup>47</sup> Jesús cabá yojtsoýebuambnantscuana, Judas, canýe chë bnëtsana uta uatsjendayënguentsá, tojánashjango, y cháftaca imojtsemna ba entsanga espadëjangaca y ngarotbéngaca prontánënga. Chënga imojamna chë bachnangbe amëndayënga y chë judiëngbeñe bëtsëjemëngcá amëndayëngbe ichmónënga. <sup>48</sup> Judas, chë boshjuaná, tojanjuabó ntšamo jamana entsanga jinýanýiyama ndëmua Jesús bëtsemnana. Chíyeca yojáuyana: “Nda chajjauámocho, cha echántsemna. Smochjishache ca.” <sup>49</sup> Cachora Judas Jesúsbioye tojanobeconá y tbojanчуá: —Buajtana, Buatëmbayá ca.

Y tbojtanámocho.

<sup>50</sup> Jesús tbojanianyana: —Enutá, moma chë ndayá jabomama tcojabo ca.

Chorna, chë entsanga tmojanobeconá, Jesús tmojánishache y tmojanánatse.

<sup>51</sup> Chca orna, canýe enutá Jesúsëftaca yojtsemná, chabe espadëja tojanenosëngbotëntsena, y chë bachnangbe más uámana amëndayabe oservenábioye canýe matscuaše tbojt-sanëstjango.

<sup>52</sup> As Jesús tbojanianyana: “Espadëja matosëngbuajonýá. Nda espadëjaca tbojóba chana, cach espadëjaca echanjóbana. <sup>53</sup> ¿Aca ndoñe condëtatšëmbo, atše atšbe Taitábioye stjaimpádase, cha cachora atšbiamana nanjichamuá bnëtsana utama más ejércitënga angelotëmëngaca? <sup>54</sup> Pero chcasna, ¿ndayá Bëngbe Bëtsabe uabemana palabrénguiñe endayancá ntšamo nanjochnëngo? Chiñe endayana ntšamo entsopasancá jochnënguama canmëna ca.”

<sup>55</sup> Cachora Jesús entsanga tojanatjá: “¿Ndáyeca šmojabo espadëjangaca y ngarotbéngaca atše jishachama, mo atše canýe bacá uamana entšá cuaftsemncá ca? Atše cada te Bëngbe Bëtsabe bëts yebnoca tšëngaftangaftaca sënjántbemana abuátambaye, y choca ndoñe chešmánatishache. <sup>56</sup> Pero lempe quem soyënga chca entsopasana, cachcá chaotsemnana ntšamo Bëngbe Bëtsabe uabemana palabrénguiñe chë Bëngbe Bëtsabe juabna oyebuambnayënga tmojanayancá ca” —Jesús tojánayana.

Cachora nýetsca uatsjëndayënga tmojtsanëuatjaná y tmojt-sanacheta, y Jesús chë uayayëngaftaca cachcá tmojesanonýá.

*Jesús tmojanánatse chë judiëngbe más uámana amëndayëngbiöye*

*(Mc 14.53-65; Lc 22.54-55, 63-71; Jn 18.12-14, 19-24)*

57 Chë Jesús tmojánishachënga, tmojanánatse, Caifás chë bachnangbe más uámana amëndayabe yebnoye. Chentše chë ley abuatambayënga y chë judiëngbeñe bëtsëjemëngcá amëndayënga tmojánenefjna. 58 Pedro bënocana Jesús tbojanasto, chë bachnangbe más uámana amëndayabe chashjóntscoñe; choye tojánamashëngo y chë Bëngbe Bëtsabe bëts yebnocá josticiëngaftaca yojótbema, chca, jtsetatšëmbuama ntšamo yochjopásama.

59 Chë bachnangbe amëndayënga, chë bëtsëjemëngcá amëndayënga y ínÿenga judiëngbe amëndayënga imojtsenguaye ndánaca masque uayátsenaye soye Jesusbe contra cháuyanama, as chënga jobenayama cha chaóbana ca jayanama, 60 pero ndoñe tmonjáninÿena, masque banga tmojánashjajna Jesusbe contra uayátsenaye soyënga jayanama. Cabana, útata tbojánashjango, 61 y chata tbojánayana: “Quem boyabása tonjayana canobena Bëngbe Bëtsabe bëts yebna jtšenásatajchcana y nÿe unga tese jtëtsjebuana ca.”

62 As chë bachnangbe más uámana amëndayá tojantsá y Jesúsbiöye tbojantjá: —¿Ndocá cochanjayana? ¿Ndayase yojtsemna chë acbe contra montsichamo soye ca?

63 Pero Jesús nÿe iytëca yojtsemna. Chíyeca chë bachnangbe más uámana amëndayá tbojanayana: —Bëngbe Bëtsá Ainabe mándoca cbomandá chašcuyana aca ndegombre chë Cristo, chë Bëngbe Bëtsabe Uaquiñá comna o ndoñe ca.

64 Chora Jesús tbojanjuá: —Aca ndegombre yomncá tçjayana. Y quem sóynaca cbëyana: Tšëngaftanga šmochanjinÿe, atše, Bëngbe Bëtsá Entšá tbojanbemá, chë nÿets obenana bomnabe catšbioica jtsetbemanana y celoca jantšetëshiñe jtšaboyana ca.

65 Chora chë bachnangbe más uámana amëndayá chabe uichëtjonëjuangá yojtsenántšajatanëca, puerte ibojtsetna causa, y tojánayana: —¡Ntšamo quem boyabása tonjoyebuambacá, Bëngbe Bëtsabiama entsemna mo cha cuafjoyenguangcá, chë chabe Uaquiñá yomna ca cha tonjayana ora! ¿Ndayama más entšanga šochjátëjaboto Jesusbe contra chamuayanama? 66 ¿Ntšamo šmatjayana ca? —cha tojanatjá.

As chë entšanga tmojanjuá: —Ndegombre cha bëts bacna soye entsebomna; jóbanama bontsemna ca.



<sup>67</sup> Chora tmojanontsé Jesús juebëuashëtjnayana, jabuache jantsetayana y ínÿengna imojtsejuébjantsetaye, <sup>68</sup> y imojtsatsëtsnaye: “Cristo, aca ndegombre Bëngbe Bëtsabe juabna oyebuambnayá tcomnëse, ¡momalisiá nda tcmënjajantsetá ca!”

*Pedro tojánayana Jesúsbioye ndoñe bonjanabuátma ca*  
(Mc 14.66-72; Lc 22.55-62; Jn 18.16-18, 25-27)

<sup>69</sup> Chëntscuana Pédrëna shjoca yojtsemna, chashjoca yojtsetbemana. Chora, canÿe shembása chentša oservená tbojanobobeconá y tbojaniyana: —Acnaca, Jesús chë Galileocáftaca conjánana ca.

<sup>70</sup> Pero Pédrëna, nÿetscangbe delante tojánayana chábioye ndoñe bonjanabuátma ca, mëntsá jayanëse: —Ntsamo consichamcá, ndoñe quešnátësertana ca.

<sup>71</sup> Chora Pedro bësoye yojábocna. Chentšna, inÿe shembása oservená chábioye tbojáninÿe y chë inÿe entsanga tojanëyana: —Cha, Jesús chë Nazaretocáftaca enjánana ca.

<sup>72</sup> Pedro cachiñe tojánayana ndoñe bonjanabuátma ca, y mëntsá yojtsejúrayer: —¡Chë boyabása ndoñe quetsatabuatma ca!

<sup>73</sup> Chentšana, chë chentše imojtsemnënga Pédrëbioye tmojanobeconá y tmojaniyana: —Ndegombre, ácnaca chë uat-sjendayënguentsá condmëna. Chë contsoyebuambnacá contsoyátëmbana ca.

<sup>74</sup> Chora Pedro tojanontsé ichámuana, Bëngbe Bëtsá chašotsecastigá ndoñe ndegombre soye stsichámëse ca; yojtsejúrayer y yojtsichamo: —¡Chë boyabása ndoñe quetsatabuatma ca!

Y cachora canÿe ngallo yojacánta. <sup>75</sup> Y Pedro yojenójuaboye ntšamo Jesús tbojanianama. Cha mëntsá tbojanianama: “Cabá ngallo ndëcánta ora, aca unga soye cochanjayana ndoñe šconduabuatma ca.” Y chentšana tojésanbocna y corente ngmënaca yojtsenóbošachna.

## 27

*Jesús, Pilátbioye tmojanánatse*  
(Mc 15.1; Lc 23.1; Jn 18.28-32)

<sup>1</sup> Tojanbinÿna ora, nÿetsca chë bachnangbe amëndayënga y judiëngbeñe bëtsëjemëngcá amëndayënga tmojánenefjna jenóyeunayama ntšamo jamëse Jesús chaóbanama. <sup>2</sup> As, Jesús tmojanëcuébatšëca y tmojanánatse, y chca, Pilato, chë Judeoca Romano mandadbe cucuatšinë tmojánboshjona.

*Ntsamo Judas tojanóbana*

<sup>3</sup> Judas, chë boshjuaná, Jesús jóbanama ibojtsemnama tojanuena ora, puerte yojtsenócochinÿena ntšamo

tojánchjanguama, y chë unga bnëtsana ralbenga chë bachnangbe amëndayënga y bëtsëjemëngbioye tojtanamba, <sup>4</sup>y mëntsá tojanëyana: —Puerte bacna soye tijama. Atše canye bacna soye ndbomná tšëngaftangbe cucuatšifne tijáboshjona chaóbanama ca.

Pero chënga tmojanjuá: —¿Chë soye ndayá bëngbiama? Cachaca cochátotatsëmbñe ca.

<sup>5</sup> As Judas chë ralbenga Bëngbe Bëtsabe bëts yebnentše yojësëtsana, y yojá y yojétsentsešaye.

<sup>6</sup> Chë bachnangbe amëndayëngna chë ralbenga tmojtanatbaná y tmojánayana: —Quem crocenánama buifne echanjuábuashana; ntšamo leyiñe endayancá, bënga ndoñe quemuátobena chë Bëngbe Bëtsabiama soyënga quëcjnyëtémiñe chana jasegórana ca.

<sup>7</sup> Chcasna, chënga tmojanenoyeuná, chë crocenánacna chë Alfarerbe Luare ca uabaina fshantse jabuámiyana, y chca, canye luare jtsebonnama ndayentše chë inye luarëngocana entšanga áshjajnënga jutabuantsama. <sup>8</sup> Chíyeca, chë fshantse mëntscoñama Buiñe Luare ca iuabaina. <sup>9</sup> Chca, tojanochnëngo ntšamo Jeremías, chë Bëngbe Bëtsabe juabna oyebuambnayá, tempscá tojanayancá, ndayá yochjanchnënguama. Chana mëntsá tojánayana: “Y chë unga bnëtsana ralbenga tmonjanca, ntsachetsá chë Israeloca entšanga cha tmojanamananacá, <sup>10</sup> y chánaca chë Alfarerbe Luare tmonjanbuamé, ntšamo Bëngbe Bëtsá šonjanmandacá ca.”

### *Jesús Pilatbe delante*

(Mc 15.2-5; Lc 23.2-5; Jn 18.33-38)

<sup>11</sup> Chentšana Jesús, chë mandado Pilátbioye tmojanánatse y cha mëntsá tbojantjá: —¿Aca chë judiëngbe rey cojtsemna ca?

Y Jesús tbojanjuá: —Aifne, aca ndegombre yomncá tcjayana ca.

<sup>12</sup> Chë bachnangbe amëndayënga y chë bëtsëjemënga Jesús mal imojtsequédantscuana, cha ndocá ntjojuana. <sup>13</sup> Chíyeca Pilato tbojantjá: —¿Ndoñe contsuenana lempe ntšamo acbe contra montsichamcá ca?

<sup>14</sup> Pero Jesús ni canye palabra ndoñe ntjojuana. Chë causa, chë mandado ndoñe yontsetátšëmbo ntšamo jajuaboyana.

### *Jesús chaóbana ca tmojánayana*

(Mc 15.6-20; Lc 23.13-25; Jn 18.38-19.16)

<sup>15</sup> Bashco fiesta ora, chë mandado yojanamana canye utamená jëtsboshjonana, nda entšanga tmojuabuyaná.

<sup>16</sup> Chë tempo canye uachuana utamená inamna, Jesús Barrabás ca uabainá. <sup>17</sup> Njëtsca entšanga chentše imojtsemna ora, Pilato tojanatjá: “¿Tšëngaftanga nda šmojtseboše atše

chjětsboshjonama, Jesús Barrabás o Jesús, chë Cristo ca monduabobuatmá ca?”

<sup>18</sup> Er chë mandado yojtsetátšëmbo, entšangna envidia causa Jesús chabe cucuatšíñe tmojánboshjonama.

<sup>19</sup> Pilato chë tribunal ca uabáinentše yojtsetbemaněntscuana, chabe shema canya tbojanichmó měntšá cha jauyanama: “Chë nýetsca soyěnguiñe tšabá ama entšábioye ndocá matsborlánana; chabe causa ibeta otjénayoca puerta sēnjasufrí ca.”

<sup>20</sup> Pero chë bachnangbe aměndayěnga y chë bětsějéměnga entšanga tmojanayěnaná, Barrabás jětsboshjonama y Jesús chaóbana ca chamuayanama. <sup>21</sup> Chora chë mandado cachiñe tojanatjá: —¿Chë útatentšana nda šmojtseboše atše chjětsboshjonama ca?

Y chěnga tmojánayana: —¡Barrabás ca!

<sup>22</sup> Pilato tojanatjá: —¿As, ndayá Jesús, chë Cristo ca uabobuatmáftaca atše chjama ca?

Y nýetscanga tmojanjuá: —¡Motsecrucificá ca!

<sup>23</sup> Chora Pilato tojtětanatjá: —¿Ndáyeca? ¿Ntšamo cha tojobuachjanguá ca?

Pero chěnga cachiñe tmojanáyebuachena: —¡Motsecrucificá ca!

<sup>24</sup> Ndocá jamama yontsobenama y entšanga más jabuache enbouenanama tmojanontšema Pilato tojáninýe ora, cha tojanmandá búyeshe juabuíyěboñana y nýetscangbe delante yojtsenacuentšabiá. Měntšá tojánayana: —Atše ndocá chiyátayana, ni chiyatsma quem boyabása chaóbanama. Tšěngaftanga lempe šmonjama ca.

<sup>25</sup> Chora nýetsca entšanga tmojanjuá: —¡Quemuá yochjóbanama, běnga y běngbe básengbiama castigo chaotsemna ca!

<sup>26</sup> As Pilato, Barrabás tbojtanboshjona; tojanmandá soldaděnga Jesús jabuache chamotsetsetšenama y chentšana entšangbe cucuatšíñe tbojánboshjona chamocrucificama.

<sup>27</sup> Chentšana, chë mandadbe soldaděnga Jesús tmojanánatse chë mandadbe běts yebnentša chashjoye y choca nýetsca soldaděnga chabe shěconana tmojanójoto. <sup>28</sup> Chorna, entšayá tmojtsanabotsca y shbuenda uafjatsenga entšayá mo reycá tmojanichětjo. <sup>29</sup> Canýe coroněsha tmojanapormá uchmašěfjangaca y tmojanabestšajó, y catšbioica cucuatšíñe canýe niñěfja. Chorna, chabe shecuaťsentše imojtsofshěntsaměntšenaye y imojtsáboyejuana. Měntšá imojtsichamo: “¡Bayté judiěngbe Rey cochtsemna ca!”

<sup>30</sup> Chěngnaca imojtsanbuashětjnaye y cach niñěfjaca bestšaťentše imojtsětsjanjnaye. <sup>31</sup> Y chca imnaťsábóyejuaněntšana, chë shbuenda uafjatsenga entšayá

tmojtsanabotsca y cachabe entšayá tmojtanichëtjo, y chora, jacrucificama tmojanánatse.

*Jesús tmojancrucificá*

(Mc 15.21-32; Lc 23.26-43; Jn 19.17-27)

<sup>32</sup> Chë entšanga chentšana tmojánbocana ora, tmojánenbetše canye bacóftaca, Simón ca uabainá, Cirene pueblócá. As, cha tmojanmandá Jesusbe cruz chauetsocutsama.

<sup>33</sup> Canye luare Gólgota ca uabáinoca tmojánashjajna ora (hebreo biyañe chca endayana “Obanabe Bestšashe Luare ca”), <sup>34</sup> Jesúsbioye vínoye hiéloyeca enájuañbiye tmojanabuiyé chaofšema; pero yojaftántia y ndoñe yonjábosena chiye jofšiyama.

<sup>35</sup> Ya tmojancrucificá orna, chë soldadënga Jesusbe entšayamna, tsbanánoye tmojanëtšena, chca, jtsetatšëmbuama ndabiama yochjanáquedama. <sup>36</sup> Y chora chënga chentše tmojanotbiama Jesús jtsebojanÿama. <sup>37</sup> Y chabe bestšaše juatsboicna canye uabemana soye tmojananjo. Chiñe yojétsayana ndáyeca cha tmojancrucificama, mëntšá: MUA JESÚS ENDMËNA, CHË JUDIËNGBE REY ca.

<sup>38</sup> Utata bacna soye ochjajnayatnaca chënga chentše tmojanacrucificá, canya Jesusbe catšbioica y chë ínÿana chabe uañicuayoica. <sup>39</sup> Y chëjana imojtsachñëjuana entšangna, Jesús imojtsóyenguaye, imojtsobestšfshanenaye <sup>40</sup> y imojtsatsaye: “¡Aca chë icobena Bëngbe Bëtsabe bëts yebna jtsenásatajchcana y nÿe unga tese jëtsjebuana, cach aca mentsbocá! ¡Ndegombre Bëngbe Bëtsabe Uaquiñá tcomñëse, chë cruzocana matastjango ca!”

<sup>41</sup> Chë bachnangbe amëndayënga, ley abuátambayënga y chë judiëngbeñe bëtsëjemëngcá mándayënga cachcá imojtsóyenguaye. Mëntšá imojtsichamo: <sup>42</sup> “Cha ínÿenga tojëftsatsebacá, pero cachá jéntsbecama ndoñe quenátobena. Cha Israeloca entšangbe Rey tojtsemñëse, chë cruzocana chauatastjango, y chca, bënga chábeñe fchtsošbuáchiye. <sup>43</sup> Cha tojayana Bëngbe Bëtsábeñe puerte yojtsošbuaché ca. ¡Mora Bëngbe Bëtsá chabuatsbocá, cha ndegombre muábioye tbobobonshánëse!, er cha tonjánayana Bëngbe Bëtsabe Uaquiñá canmëna ca” —chënga imojtsichamo.

<sup>44</sup> Y chë bacna soye ochjajnayata, Jesúsëftaca ibojtsecrucificanátnaca cachcá ibojtsóyenguaye.

*Jesús tojanóbana*

(Mc 15.33-41; Lc 23.44-49; Jn 19.28-30)

<sup>45</sup> Nÿetsto orscana las tresëntscoñe, nÿets quem luare yojtseibétata. <sup>46</sup> Chca orna, Jesús chabe biyañe tojanáyebuachena:

“Elí, Elí, ¿lema sabactani ca?” (Chca endayana “Atšbe Bětsá, atšbe Bětsá, ¿ndáyeca cachcá šcojonýa ca?”)

47 Chca tmojanuena ora, báseftanga chentše imojtsemna entsanguentsana imojtsichamo: “Cha Elías, chě Běngbe Bětsabe juabna oyebuambnayá, bontsechembuana ca.”

48 As chora, chentša canýa tojěftsanótjajo canýe esponjěshe janguanguama, untja vínoyeca chěshe tojanfchecuacuá, canýe niñěfjiñe tojananguěsětjo y Jesúsbioye tojanbeconá chaofšema. 49 Pero ínýengna tmojánayana: “Cachcá mochjonýaye, er Elías tayochjabo jabátsbocama ca.”

50 Pero Jesús cachiñe jabuache tojanoyó y tojanóbana. 51 Y cachora, Běngbe Běngbe Bětsabe běts yebnocá yojújonýana entsějua tsěntsaca yojtsenájataye, tsbanánocana fshantsoye. Chějua bēñjua inauamna y chě tsatsěntsaca inaújonýana. Fshantse yojuangmēmmana, ndětsbenga yojtsashtětšana, 52 y chě cuevēshěnga obaněngaca yojtsětětjo y banga Běngbe Bětsabe entsānga tmojtānāyena. 53 Y chěnga, Jesús tojtānāyentšana, chě cuevēshěnguentšana tmojánbocana, y Jerusalén, chě uámana běts pueblo ca uabáinoye tmojánamashjna y ba entsāngbioye tmojánēbēbuacana.

54 Chě soldaděngbe aměndayá y chě ínýengna, Jesús jtsebojanýama cháftaca tmojanoquedānga, chě fshantse yojuangmēmmanama tmojáninýe ora, y nýetsca chě yojtsěchnějuana soyěngama, puerte auatjanáněnga imojtsemna y tmojánayana: “¡Ndegombre quem boyabása Běngbe Bětsabe Uaquiñá yomna ca!”

55 Ba shembásengnaca chentše imojtsemna y bēnocana imojtserreparana. Chěngna, Galileocana Jesús tmojanasto y cha imojanájabuachana. 56 Chě shembásengbeñe imojtsemna María Magdalena; María, Santiago y Josebe mamá; y Zebedeobe uaquiñatbe mamá.

### *Jesús tmojanatbontsá*

*(Mc 15.42-47; Lc 23.50-56; Jn 19.38-42)*

57 Ya yojtseibétatana ora, canýe bomna boyabása, José ca uabainá, tojánashjango. Cha inamna Arimatea luarocá y Jesusbe ustoná. 58 José tojána Pilato jinýama, Jesusbe cuerpo jotjañama. As Pilato tojanmandá chě cuerpo chamontšabuáchema. 59 José chě cuerpo tojanca y canýe nduat-sēnga lino entsějuaca tbojanandmaná. 60 Y canýe chabe tsēm cuevēshiñe tbojanajó. Tempo cha inamánda chě cuevēshna ndětsbenguiñe chamopormama. Canýe běts ndětsbé tojansjoná y chě cuevēshoye amashjuanentše tojánachto; y chentšana José yojtsatoñe. 61 Pero María Magdalena y

chë inÿe Mariyna chentše tbojtsanoquedañe y chë cuevëshe ndirichiñe tbojanótbema.

*Soldadënga tmojána Jesús yojtsatbontsánentše jtsebojanÿama*

<sup>62</sup> Yëfsana, chë ochnayté, chë bachnangbe amëndayënga y chë fariseunga cánÿiñe tmojána Pilato jinÿama.

<sup>63</sup> Tmojaniana: —Taita, bënga fsëntsejuabná ntšamo chë bostero cabá ainá ora tonjánayanama, chë unga tianoye cha jtayenama ca. <sup>64</sup> Chíyeca, momandá chë cuevëshe soldadënga chamotsashanÿá unga tentscuana. Chca, chabe uatsjëndayënga ndoñe ibeta chamondabo chabe cuerpo jabétsatbëbama, y chentšana chënga entsanga chamúyana, Jesús tojtayena ca. Y chca, chabiamama quem ústonoye bostero soye, chë cachabiamama tojánayana soyëngama puerte más bacá nántsemna ca —chënga tmojaniana.

<sup>65</sup> As Pilato tojanëyana: —Tšëngaftanga cach tšëngaftangbiamama soldadënga šmondábamna. Motsajna y chë cuevëshe cuedádoca šmochtsashanÿá, ntšamo šmondëtatsëmbcá ca.

<sup>66</sup> Chora chënga tmojána chë cuevëshe jtsashanÿama; chë ndëtšbena, tsengájašeca imojuinÿaná, ntsotatsëmbcá ndocná choye chaondámashënguama, y soldadënga chentše tmojëftsanabashejuana.

## 28

*Jesús tojtayanena*

(Mc 16.1-8; Lc 24.1-12; Jn 20.1-10)

<sup>1</sup> Ochnayté chentšana, chë inÿe semana bojatsšenté yojtsebínÿana ora, María Magdalena y chë inÿe María tbojána cuevëshoye jarrepárama. <sup>2</sup> Ndeolpe fshantse tojanangmëmmana, er Bëngbe Bëtsabe canÿe ángel celocana tojántsmama, chë cuevëshoye tojanobeconá, chë atamiana ndëtšbé tojtsanjuaná y chiñe tojanótbema. <sup>3</sup> Chë ángelna mo canÿe tcuinÿejcá yojtsebuashinÿinÿana, y chabe uichëtjonëjuangá uafjantsëjuangá mo jantšetëshcá yojtsamna. <sup>4</sup> Chë soldadënga chca tmojáninÿe ora, de auatja yojtsangmëmnyaya y mo obanëngcá imojtsemna.

<sup>5</sup> Chora chë ángel chë shembásatbioye tojanëyana: “Ndoñe batauatjana. Atše sëntsetatsëmbo tšëngaftanga Jesús, chë tmonjancrucificá cha šmojtsenguama. <sup>6</sup> Cha muentše ndoñe quenátsmëna; cha tontayena, ntšamo cachá tonjanayanca. Mabata y šochjinÿe cha endëtšesegoranentše. <sup>7</sup> Betsco mot-sata y chë uatsjëndayënga šochjáuyana: ‘Jesús tontayena y tšëngaftangbe natsana Galileoye echanjá; choca šmochanjinÿe ca.’ ” Y chora cha tojánayana: “Chca šondmëna tšëngaftanga jauyanana ca.”

<sup>8</sup> Cachora chë shembásata chë cuevëshentšana tbojésanbocna, auatjanánata pero puerte oyejuayata, y tbojéftsanotjajo chë soye chë uatsjendayëngbeñe jobuambayama. <sup>9</sup> Y ndeolpe Jesús chata tojánebëbuacna y tojanacheuá. Chatna, chábioye tbojanobéconata, tbojtandorata y chabe shecuatše shéconana imojtbojcuá. <sup>10</sup> Y Jesús tojanéyana: “Ndoñe batauatjana. Motsata atšbe uatsjéndayënga, atšbe catšátanga jáuyanama Galileoye chamotsá y chocha atše šmochjinýe ca.”

*Ntšamo chë soldadënga tmojánayana ndayá tojanochñënguama*

<sup>11</sup> Chë shembásata ibojtsayëntscuana, básefta soldadënga chë bëts puebløye tmojána y ntšamo tojanopasacá lempe chë bachnangbe amëndayëngbeñe tmojanobuambá. <sup>12</sup> As chë bachnangbe amëndayënga, chë judiëngbeñe bëtšëjemëngcá mandayëngaftaca tmojánenefjna jenóyeunayama. Chëngna chë soldadëngbioye bëtscá crocénana tmojtandorata, <sup>13</sup> y mëntšá tmojanabuayená: “Tšëngaftanga šmochjayana, ibeta šmotsomáñëntscuana, Jesusbe uatsjéndayënga tmojabo y chabe cuerpo tmojabétsatbëba ca. <sup>14</sup> Y chë mandado chë soyama chaojátatšëmbonëse, bënga lempe cháftaca fchjenóyeunaye, chca, tšëngaftangaftaca ndocá chaondopasama ca” —chënga tmojanéyana.

<sup>15</sup> As chë soldadënga chë crocénana tmojanóyëngacñe y tmojanma ntšamo chë mándayënga tmojanabuayenacá. Ba entšanga chë cuento tmojanuena y mëntscóñama judiënga cachcá mondbétsichamo.

*Jesús chë uatsjéndayënga tojanichamó, Bëngbe Bëtsabe soyëngama nyëtsquénache jábuayenama*

*(Mc 16.14-18; Lc 24.36-49; Jn 20.19-23)*

<sup>16</sup> Chentšana, chë bnëtsana canýe uatsjéndayënga Galileoye tmojána, chë ndëmua tjoye Jesús chënga tojanabuayená choye. <sup>17</sup> Y Jesús tmojáninýe ora, tmojtandorá. Pero báseftangna imojëtsejuabnaye nderado cha ndoñe Jesús yontsemna ca. <sup>18</sup> Jesús chëngbioye tojanobeconá y tojanéyana: “Bëngbe Bëtsá nyëts mando atše šonjatšetá celoca y quem luarentše. <sup>19</sup> Chcasna, motsajna, nyëts luarënguenache oyenënga atšbe uatsjéndayënga šmochjábiana. Entšanga šmochjubaye atšbe Taitá, atše chabe Uaquiñá y chë Uámana Espíritbe uabaina jayanëse, átšbeñe šmošbuachéyeca, <sup>20</sup> y šmochjabatambá lempe ntšamo atše tbojamëndacá chënga chamóyeunama. Y ndegombre atše nyëts tempo tšëngaftangaftaca chanjëftsemna, quem luare jopochócantscuana ca” —Jesús tojanéyana.

## San Marcos

*Juan chë Ubayaná entsanga yojanabuayiná  
(Mt 3.1-12; Lc 3.1-9, 15-17; Jn 1.19-28)*

<sup>1</sup> Měntsá tojanobojatsé chë tšabe noticiēnga Běngbe Bětsabe Uaquiñá Jesucristbiamá.

<sup>2</sup> Ntšamo bayté entsemna, chë Běngbe Bětsabe juabna oyebuambnayá Isaiás chabe librěšañe yojěftsayancá, ntšamo Běngbe Bětsá chabe Uaquiñábioye ibojauyanama cha tojanábema ora:

Minýe, atšbe abuayiyayá acbe natsana sěntsichamná, chë aca jabama lempe echanjaprónta cha.

<sup>3</sup> Entšanga ndoyena luaroca cha enduáyebuache měntsá:

“Běngbe Utabná echanjabo ca;

mo nda canýe benache tojtseprontacá canýe uámana entšá jashjanguama,

cachcá tšěngaftanga, cha jabama ainaniñe tšabe juabněngaca šmochtseprontana ca” —cha tojanábema.

<sup>4</sup> Chcase, Běngbe Bětsá Juan tbojanichmó, y cha tojánbocna entsanga ndoyena luaroca, Běngbe Bětsabe soyēngama abuayiyayē y entsanga ubáyana. Cha entsanga yojanětsětsnaye: “Tšěngaftangbe bacna soyēngama ngmėnaca šmochtenójuaboye, chca amana šochtsajbaná, y Běngbe Bětsabe benache šmochtishache. Chora cbochjúbaye, y Běngbe Bětsá tšěngaftangbe bacna soyēngama cmochanjáperdonaye ca.”

<sup>5</sup> Nýets Judea luarocana chábioye entsanga imojánbocana, y Jerusaleměntšana nýetsca entsāngnaca, y Běngbe Bětsábioye chěngbe bacna soyēngama jaimpáda chentšana, Juan Jordán ca uabaina bėjayiñe chěnga yojaněbáyana.

<sup>6</sup> Juanbe entšayá inaupormana camellbe stjėnasheca y bobache yojanasnana; chapulinatėmėnga y tjañe mėloye inasaye. <sup>7</sup> Y měntsá entsanga yojanětsětsnaye: “Atšbe ústonoye inýa echanjabo, atšbiamá más obenana bomná; chíyeca atše merecido taitsatobuajoñe, ni mo jotsejbiyana chabe she-cochětjoněshentša corriēja jajafjonama. <sup>8</sup> Atšna búyeshēca cbondėubáyana, pero chë echanjabábeyecna, Běngbe Bětsá bochanjíchmuá chë Uámana Espíritu tšěngaftangbe ainaniñe cháuamashėnguama ca.”

*Juan, Jesúsbioye tbojanabaye  
(Mt 3.13-17; Lc 3.21-22)*

<sup>9</sup> Chë tempo, Galilea luarocana Nazaret pueblěntšana Jesús yojěftsebocna, y Juan yojtsemnoye tojána; y Jordán bėjayiñe Jesúsbioye cha tbojanabaye. <sup>10</sup> Bejajoicana yojtashėbėbocna



orna, tojáninÿe celoca atëfjniñe, y chë Uámana Espíritu chábioye mo palomatemcá yojtsastjajuana. <sup>11</sup> Y celocana Bëngbe Bëtsá mëntšá tbojanianyana: “Acna atsbe bonshana Uaquiñá condmëna; acbiama corente sëntsoyejuá ca.”

*Jesús tojanobená Satanás jayënjanama*  
(Mt 4.1-11; Lc 4.1-13)

<sup>12</sup> Chentshana chë Uámana Espíritu Jesúsbioye entsanga ndoyena luaroye tbojanánatse. <sup>13</sup> Canta bnëtsana te chë entsanga ndoyena luaroca tbojanjëtana, y Satanasna yojan-abó jisháchichiyama. Chë luarentše tšátjaye bayënga imnájena; chentsana, Bëngbe Bëtsabe angelënga cha imojtseserverna.

*Jesús tojanontsé Galileoca chabe trabajo jamana*  
(Mt 4.12-17; Lc 4.14-15)

<sup>14</sup> Juan cárceloye tmojanëtámentšana, Jesús Galileoye tojesaná; y chiñe cha yojanabuayiyná chë tšabe noticiënga Bëngbe Bëtsabiana. <sup>15</sup> Jesús entsanga yojanëtsëtsnaye: “Ora tocjobuache, Bëngbe Bëtsabe amëndayana echanjóshjango. Tšëngaftangbe bacna soyëngama ngménaca šmochtenójuaboye, y chca amana šmochtsajbaná y Bëngbe Bëtsabe benache šmochtishache; y ainaniñe chë tšabe noticiënga Bëngbe Bëtsabiana šmochjójyëngacñe ca.”

*Jesús tojánachembo canta boyabásenga beonga ashebuánayënga cha chamuastama*  
(Mt 4.18-22; Lc 5.1-11)

<sup>16</sup> Galilea uafjajónaye tsachajana Jesús yojtsaye ora, cha tojánanÿe Simón y chabe uabentsá Andrés; chatna atarraiëshangá ibnetsashbuétsetsañe, er beonga ashebuánayata chata ibnamna. <sup>17</sup> Chora Jesús tojanëyana: “Atšeftaca mabata. Atše cbochanjábiana Bëngbe Bëtsabiana entsanga anguayata; y morscana, nÿe beonga ashebuánayata ndoñe quešochátsmëna ca.”

<sup>18</sup> Y cachora chatbe atarraiëshangá cachcá tbojésanaboshjuana y Jesús tmojanasto.

<sup>19</sup> Más chcoye yojátaye orna, Jesús tojánanÿe Santiago y chabe uabentsá Juan, Zebedeobe uaquiñata; chatna barquëshañe ibnetsotbemañe, chatbe atarraiëshangá atapórmayñe. <sup>20</sup> Chora Jesús chë útata tojánachembo; as chatna, chatbe taitá Zebedeo chë barquëshañe tmojésanboshjona chabe peóngaftaca y Jesúseftaca tbojtsanoñe.

*Jesús, bacna bayëjbe juabna cánÿabioye tbojanbojuaná*  
(Lc 4.31-37)

<sup>21</sup> Chentshana, Jesús y chabe uatsjëndayënga Capernaum ca uabaina puebloca tmojánashjajna. Chë ochnayté, Jesús chë judiëngbe enefjuana yebnentše tojánamashënga y yojóntša

entšanga jabuátambama. <sup>22</sup> Entšanga imojtsenjanaye ntšamo Jesús yojtsabuatambacá, er chama mo canye mando bomnacá yojtsóyebuambnaye, ndoñe nye ntšamo Moisesbe ley abuátambayënga imojanabuatambacá. <sup>23</sup> Chë pueblentše judiëngbe enefjuana yebnentše yojtsemna canye entšá bacna bayëja uambayá, y chábeyeca chë boyabása yojóntša mëntšá uayebuáchana: <sup>24</sup> —¿Ndayama bëngbioye təcjabo, Jesús Nazaretocá? ¿Tcojabo bënga jabétsapochocama? Atše sëndétatšëmbo nda aca comnama, aca chë Bëngbe Bëtsabe Uamaná ca.

<sup>25</sup> Chora Jesús chë bayëjbioye tbojtsanácacana, y tbojaniyana: —¡Iytëca móbema y chábentšana maisebocna ca!

<sup>26</sup> Chora chë bacna bayëjna tojanma chë boyabása ataque chaboshachama, jabuache tojanoyó y chábentšana tojésanbocna. <sup>27</sup> Chama, nyetsca entšanga ojnánënga imojtsemna, y mëntšá imojtsentjanaye: “¿Ndayá chca yojtsemna? ¿Canye tsëm buatëmbana soye? ¡Quem boyabása mando bomnacá y obenacá entsabuatambá, y chca, chë bayëjënga cha jtsamëndayana y chëngnaca joyeunayana ca!”

<sup>28</sup> Y betscó nyets Galilea luarentša pueblënguenache Jesusbiana yojtsótatšëmbo.

*Jesús, Simón Pédrëbe uambén mamábioye tbojanshná  
(Mt 8.14-15; Lc 4.38-39)*

<sup>29</sup> Chentšana, chë enefjuana yebnentšana tmojánbocana y Santiago y Juánoftaca Jesús tojána, Simón y Andresbe yebnoye. <sup>30</sup> Simonbe uambén mamá šocá inajájona, jabuache calentóraca, y Jesúsbioye chë šocabiana tmojaniyana. <sup>31</sup> As chora, Jesús tojanobeconá, chë šocábioye tbojanábuacushache y tbojanatsbaná. Cachora chë calentora tbojtsanóbojuanañe; y cachora cha tojtantsbaná y tojanontšé chënga jobuácuedana.

*Jesús ba šoquënga tojanashná  
(Mt 8.16-17; Lc 4.40-41)*

<sup>32</sup> Chë te jetiñe, shinye ya yojuenatjëmba ora, chë luarentša nyetsca šoquënga y bacna bayëjënga uambayënga Jesúsbioye tmojanënatse; <sup>33</sup> y nyetsca entšanga bëšoye imojobeconá. <sup>34</sup> Jesús banga tojanashná, nyetsca šocana bomnënga, y ba bacna bayëjënga entšanguentšana tojtanëbuacna; y ndoñe tonjanalesenciá chë bayëjënga chamóyebuambama, er chënga imnatátšëmbo cha chë Cristo bëtsemnama.

*Chë judiëngbe enefjuana yebnënguenache Bëngbe Bëtsabe soyëngama Jesús yojanabuayiyiná  
(Lc 4.42-44)*

<sup>35</sup> Yëfsana cabá cachëse, cabá ibetcá, Jesús tojëftsantsbaná, chë pueblentsana tojëftsanbocna y entsanga ndoyena lu-  
aroye tojtsanoñe, choca Bëngbe Bëtsáftaca jencuéntama. <sup>36</sup> Pero  
Simón y chabe enutëngna tmojána jetsenguanguama; <sup>37</sup> y  
tmojtsaninýena ora tmojanianyana: —Nýetscanga cmontsenguá  
ca.

<sup>38</sup> Y Jesús tojanéyana: —Inýoye cuajna, cam béconana  
pueblëngoye, chíñnaca Bëngbe Bëtsabe soyëngama entsanga  
chayábuayenama; er chama atše sënjabo ca.

<sup>39</sup> Y chentsana, Jesús yojánana Bëngbe Bëtsabiamama entsanga  
abuayiynaye chë judiëngbe enefjuana yebnënguenache, nýets  
Galileiñe, y entsángbentsana bacna bayëjenga yojtëbuacana.

*Jesús, canya bacna nguayanánaca šocábioye tbojanshná*  
(Mt 8.1-4; Lc 5.12-16)

<sup>40</sup> Chentsana, canye boyabása bacna nguayanánaca šocá  
Jesúsbioye tojanobeconá; y joshaméntšase mëntšá tbojanim-  
padá: —Aca tcojtsebošëse, aca catjobenaye atšbe šocana jtse-  
bojuánama ca.

<sup>41</sup> Jesús chabiamama tbojanongmé; cucuátšeca tbojánbojajo y  
tbojanianyana: —Aíñe sëntseboše. ¡šocana cbotsebojuaná ca!

<sup>42</sup> Y cachora chë šocana tbojtsanóbojuanañe y tšabá yojt-  
satsmëna. <sup>43</sup> Chora Jesús chábioye tbojtanichmó, pero puerta  
mëntšá tbojanmandá: <sup>44</sup> —Mouena; ndocnábeñe quem soye  
cattsecuéntaye; nýe Jerusalenoca báchnëbioye motsa y cha  
cochjinýinýiye aca mora ya tšabá cojtsatsmënama. Chora  
cochjuátšëmbona ntšamo Moisés chabe leyiñe tojanmandacá,  
Bëngbe Bëtsábioye chama jëtschuayama, chca, nýetsca entsanga  
chamotatšëmbona mora ya tšabá cojtsatsmënama ca.

<sup>45</sup> Pero chë boyabásana, chentsana tojëftsanbocna y  
cachora yojóntša nýetsquénache entsanga yapa acúntayana  
Jesús tbojanshnama. Chë causa, Jesús ndoñe yontsobena  
entsangbe delante pueblënguenache jtsanana, ndayá nýe  
chë pueblënga béconana y nýetsca chë entsanga ndoyena  
luarënguñe yojánana; pero nýets luarëngocana chábioye  
entsanga imojánashjuana.

## 2

*Jesús, canye jama ndobenábioye tbojanshná*  
(Mt 9.1-8; Lc 5.17-26)

<sup>1</sup> Chentsana, Jesús Capernaumoye tojtanashjango; y  
entsanga imojátatšëmbona, Jesús yebnentše yojtsatsmënama.

<sup>2</sup> Mallajta entsanga chentše tmojanófoto; chë causa  
chë yebnentše ya tondaye más luare entsangbiamama  
yontsemna, ni mo chë amashjuanentše, y Jesús Bëngbe  
Bëtsabe soyëngama yojtsabuayiynaye. <sup>3</sup> Chora tojanopasá,

canta boyabásenga tmojánashjango, canye entšá jama ndobená imojtsaismana. <sup>4</sup> Pero ndoñe tmonjanobená Jesús yojtsemnoye cha juambana, tša entšanga causa. Chcasna, chë canta boyabásenga yebna tsbanánoca, Jesusbe tatsëtsoca batšá tmojánatëfjo y chëjana chë jama ndobená tjuashiñe tmojanëstjango. <sup>5</sup> Jesús tojáninye chënga tša imojtsošbuaché chë šocá jáshnama cha yojanobenama; as chë jama ndobenábioye tbojanianyana: “Sobreno, mouena; acbe bacna soyënga tcbontseboperdoná ca.”

<sup>6</sup> Chentše báseftanga judiëngbe ley abuatambayënga imnatbemanana; chënga chora mëntšá imojtsejuabnaye: <sup>7</sup> “¿Ntšámoyeca quem boyabása chca yojtsichamo? Jesús ndoñe tšabá Bëngbe Bëtsabiamana quenátichamo; mo chábioye cuafjoyenguangcá entsemna. Ndocna entšá quenátobena ínñabioye bacna soyëngama japerdónana; nye Bëngbe Bëtsana aíñe ca.”

<sup>8</sup> Pero Jesús cachora lempe yojtsetátšëmbo ntšamo chënga ainanoca imojtsejuabnacá; as tojanëyana: “¿Ndáyeca chca tšëngaftanga ainaniñe šmojtsejuabná? <sup>9</sup> ¿Tšëngaftangbiamana ndayá más paselo nántsemna tšëngaftangbe delante chë jama ndobenábioye atše jauyanana: ‘Acbe bacna soyënga tcbontseboperdoná’, o ‘Matëtsbaná, acbe tjuashe mesocñe y motsa ca’? <sup>10</sup> Y chca, mora atše cbochanjínñanyïye Bëngbe Bëtsá Entšá tbojanbemá quem luariñe obenana yobomnama, entšanga bacna soyëngama jáperdonama ca” —Jesús tojánayana.

Y chë jama ndobenábioye tbojanianyana: <sup>11</sup> “Atše cbëyana, matëtsbaná, acbe tjuashe mesocñe y acbe yebnoye motsatoñe ca.”

<sup>12</sup> Cachora chë jama ndobená tojtantsbaná, chabe tjuashe yojesocñe, y entšangbiajana chentšana yojésebcna. Chama nñetsca entšanga imojenjnaná y Bëngbe Bëtsábioye imojtsatschuanaye, y mëntšá imojtsichamo: “Nya ndocna te tša bëts soye chemuáisinye ca.”

*Jesús, Levíbioye tbojanchembo chabuastama*  
(Mt 9.9-13; Lc 5.27-32)

<sup>13</sup> Chentšana, Jesús cachiñe chë uafjónayе tsachoyе tojesaná; ba entšanga chábioye imojobeconá, y Jesús yojtsabuátambaye. <sup>14</sup> Chentšana yojtsataye orna, Jesús tbojáninye Levíbioye, Alfeobe uaquiñá, yojtsanotbemañe, entšanga impuesto atjanayacá inëtsotrabaña. Chora Jesús tbojanianyana: “Smasto ca.”

Y Leví tojantsbaná y tbojanasto.

<sup>15</sup> Tojanopasá, Jesús Levíbe yebnentše yojtsesaye, y banga Romocama entšanga impuesto atjanayënga y inye bacna entšanga, mesëshentše cánñiñe imojtsetbiámana, Jesús y chabe uatsjëndayëngaftaca; er ba entšanga cha imojústona.

<sup>16</sup> Chë fariseunga y chë ley abuatambayënga, chë entsãngaftaca Jesús yojtsesama tmojáninÿe ora, chabe uatsjëndayëngbioye tmojanatjá: —¿Ndáyeca tšëngaftangbe buatëmbayá, entsãnga impuesto atjanayëngaftaca y bacna soye amëngaftaca yojtsesá ca?

<sup>17</sup> Jesús chca tojanuena; as mëntsá tojanëjua: —Chë salud tmtsobomñënga, ashnayá ndoñe ntsëjabótana, pero chë šoquëngna aíñe. Y atše ndoñe chiyátabo chë Bëngbe Bëtsabe bominyíñe tšabá amënga jabáchembuama, ndayá chë bacna soye amënga imomna ca juabnayënga átšbioye jabáchembuama ca.

*Jesús tmojantjá chë Bëngbe Bëtsáftaca jencuéntama tondaye saytescama*

*(Mt 9.14-17; Lc 5.33-39)*

<sup>18</sup> Canÿe, Juan chë Ubyanabe ústonënga y chë fariseungbe usetonënga, Bëngbe Bëtsáftaca jencuéntama tondaye ntjascá imojtsemna ora, básefta entsãnga Jesúsbioye tmojanobeconá y mëntsá tmojanianana: —Juanbe ústonënga y chë fariseungbe usetonënga monduamana tondaye ntjascá jtsemnana Bëngbe Bëtsáftaca jencuéntama. ¿Ndáyeca acbe uatsjëndayënga ndoñe chca ca?

<sup>19</sup> As Jesús tojanëjua: —Chë casamento fiestentše, chë ófjanënga saná ndoñe ntsabuáshebenana. ¿Ntsámo chca ndoñe nántsemna? Chë tojobouamá entsá chëngaftaca tojtsemnëntscuana, chë ófjanënga bëtscá jasana y cháftaca oyejuayënga jtsemnana. <sup>20</sup> Pero ora echanjobuache y chë boyabása chëngbentšana mochantsánatseñe; chora cocayé chë ófjanënga echántsamna tondaye ntjascá jtsemnana. Ntsámo chë tojobouamá boyabása y chë ofjanëngaftaca endmëncá, cachcá endmëna atše y atšbe uatsjëndayëngaftacnaca.

<sup>21</sup> “Ndocná, canÿe tanguá entsáyá, base tsëm entsëjuaca jtarmëndana; chca tcojamëse, chë tsëm entsëjua jtsabéconana y chë tanguá entsáyá más jtsatanëcanana, y chca, chë uátanëcniñe más bëtsiñe jtsabemana. <sup>22</sup> Y cach ndoñe, chë tojtseshayana vínoye tanguá jasabenguiñe ntjataftsuámayana; er chë jasabenga jtseshébëfjuana y chë vínoye jtsabuáshanana, y chë vínoye y chë jasabenga tondayama ntjatoservénana. Chíyeca comna, chë tojtseshayana vínoyna tsëm jasabenguiñe juaftsuámana; chca, chë jasabenga y chë vínoye josérviana ca” —Jesús tojánayana.

*Jesusbe uatsjëndayënga canÿe ochnayté trigo tmojanátabebe*  
*(Mt 12.1-8; Lc 6.1-5)*

<sup>23</sup> Canÿe ochnayté, Jesús canÿe jajajana yojtsaye; y chabe uatsjëndayënga chëjana imojtsachñëjuana ora,

tmojanontsé trigo juatabebiana. <sup>24</sup> Chë fariseunga chca imojinye ora, Jesúsbioye tmojanianyana: —Minye. ¿Ntšamo acbe uatsjéndayënga montsamcá, ndoñe quenátslesenciana ochnayté jtsamama ca?

<sup>25</sup> Pero cha tojanējua: —¿Ndoñe šmëndualía y smondëtatšëmbo ntšamo Rey David y chabe enutënga tmojanmama shëntseca imojtsemna ora y jasama yojtsëjaboto ora? <sup>26</sup> Chca ora, Abiatar chë judiëngbe bachnangbe más uámana amëndayá inamna ora, David Bëngbe Bëtsabe yebnoye yojámashëngo, y chë luarentše Bëngbe Bëtsá yojannama inyinyñaye tandëšënga yojase; y chë cháftaca imojánajna entšágnaca yojátšataye. Y chë tandëšna nye bachnangbiana belesenciana jasama. Masque David chca tojanma, Bëngbe Bëtsá ndoñe tonjánayana David canye bacna soye tojanma ca.

<sup>27</sup> Y Jesús más tojánayana: —Bëngbe Bëtsá ochnayté entšabiama tojama y entšá ndoñe tbonjábema nye chë ochnayté ndoñe chaondëtrabajama. <sup>28</sup> Chíyeca, Bëngbe Bëtsá Entšá tbojanbemá, ndayá entšá ochnayté tojtsama sóynaca jtsemándayana ca.

### 3

#### *Chë buashana cucuatše bomna entšá (Mt 12.9-14; Lc 6.6-11)*

<sup>1</sup> Chentšana, Jesús cachiñe chë judiëngbe enefjuana yebnoye tojésanamashëngo; y chentše canye boyabása yojtsemna, buashana cucuatše bomná. <sup>2</sup> Chë fariseunga chiñe imojtserrondana jinýama nderado Jesús chë ochnayté chábiyoe tabuanjashnama, as chca chënga jtsebomnama ndaye sóyeca cha mal jaquédana. <sup>3</sup> Chora Jesús chë buashana cucuatše bomnábiyoe tbojanianyana: —Chentše, entšangbe delante motsa ca.

<sup>4</sup> Y chë fariseunga tojanatjá: —¿Ndayá yojtselesenciana ochnayté jamama, tšabe soye o ndoñe tšabe soye? ¿Jatsbocama o jtsepochócama ca?

Pero chënga ndocá tmonjanjuá, nye iytëca imojobiana. <sup>5</sup> Chora Jesús rábiaca y ngménaca chë fariseunga tojanëñyanýé, chënga ainaniñe josértama ndoñe montseboše causa; y chë buashana cucuatše bomnábiyoe tbojanianyana: —Macuenñanëjaná ca.

As chë boyabása tojanacuenñanëjaná, y chora tšabá chëtša yojtsatamna cach inyetsacá. <sup>6</sup> Pero chë fariseungna, chentšana tmojésanbocana ora, Rey Heródesbe ustonëngaftaca tmojanenoyeuná Jesusbe contra, y tmojanontsé juabnayana ntšamo jamëse Jesús jóbama.

*Mallajta entsanga Jesúsbioye tmojanobeconá*

<sup>7</sup> Chentšana, Jesús chabe uatsjéndayëngaftaca tojanoluare mar béjaye tsachoye, y Galileocana bëtscá entsanga tmojanasto. <sup>8</sup> Inye entságnaca chábioye tmojanobeconá Judeocana, Jerusalenocana, Idumea ca uabaina luarocana, Jordán béjaye chenguanocana, Tiro y Sidón pueblëngocana. Chënga tmojanobeconá, Jesús tša bëtš soyënga yojtsamama tmojanuena ora. <sup>9</sup> Jesús chabe uatsjéndayënga tojanëyana: “Motsajna y canye barquësha atšbiana šmochjuapróna, tša entsanga ndoñe chašmondëtsatsëntšnama ca.” <sup>10</sup> Er cha banga tojanashná, y chë causa, nyetscanga šocana bomnënga chábioye tmojanajuatsëntšená cha jabojuama.

<sup>11</sup> Y chë bacna bayëjënga uambayëngna, Jesús tmojinë ora, betscó chabe shecuatšëntše imojtsofshëntsaméntšenaye, y chë bacna bayëjëngbeyeca mëntšá imojtsáyebuache: “¡Aca Bëngbe Bëtsabe Uaquiñá condmëna ca!”

<sup>12</sup> Pero Jesús puerte tojanamëndá, nda cha bëtsemnama entsangbe delante ndoñe chamondëtsichámuama.

*Jesús chë bnëtsana uta uatsjéndayënga tojanabacacá*  
(Mt 10.1-4; Lc 6.12-16)

<sup>13</sup> Chentšana, Jesús canye batsjoye tojántsjua, y ndëmuanyënga tšabá tbojanínynanënga tojánachembo. Y chëngna chábioye tmojanobeconá. <sup>14</sup> Chora, chënguentsana bnëtsana útata tojanëbuáyana, chamotsetjëmbambnama, y Bëngbe Bëtsabe soyëngama entsanga chámabuayenama; <sup>15</sup> y chënga obenana tojanatšatá entsángbentšana bacna bayëjënga jtëbuacanama. <sup>16</sup> Mënga mondmëna chë bnëtsana uta bocacánënga: Simón, chë ndábioye Pedro ca Jesús tbojanabaye; <sup>17</sup> Santiago y chabe uabentsá Juan, Zebedeobe uaquiñata, chata tojanëbaye “boanerges ca”, y chca endayana “uajuesayabe uaquiñata ca”; <sup>18</sup> Andrés, Felipe, Bartolomé, Mateo, Tomás, Santiago, Alfeobe uaquiñá; Tadeo, Simón chë celote ca uabobainá; <sup>19</sup> y Judas Iscariote, chë chentšana ndoñe baytesna, Jesús uayayëngbe cucuatšinë bochjanboshjoná.

*Ley abuátambayënga tmojánayana, Jesús Satanásbentšana obenana tojanóyëngacñe ca*  
(Mt 12.22-32; Lc 11.14-23; 12.10)

<sup>20</sup> Chentšana, Jesús yebnoye tojtanamáshëngo, y tša entsanga chentše tmojanójoto; chë causa, ni cha ni chabe uatsjéndayënga, ni mo jasama luare ndoñe imontsebonna. <sup>21</sup> Jesusbe pamíllanga ntšamo cha yojtsepásama tmojántatšëmbona ora, tmojána cha jetsbetšama, er entsanga imojtsencuëntaye cha opá tojtsanóbema ca.

22 Y chë ley abuatambayënga Jerusalenocana tmojánashjajnënga Jesusbiamamëntšá imojtsichamo: “Chabedegombre mandayá Beelzebú, cach Satanás yojtsemna. Cha, chë bacna bayëjënga amëndayá, Jesúsbioye obenana tbojatšetá entšángbentšana bacna bayëjënga chauatëbuacnama ca.”

23 Chënga chca imojtsichámuama, Jesús chënga tojánachembo, y cuentëngaca tojanontsé jáuyanana, jinÿanÿiyama chënga canÿe ndoñe ndegombre soyiñe imojtsemnana, mëntšá: “¿Ntšamo Satanás nantsobena cachá jtenábocnama ca?

24 Canÿe amëndayábentše entsanga tmojtsenojatá y tmojtsenáyase, chë amëndayana ndoñe ntjatotonana.

25 Cachcá, canÿe yebnentše pamíllanga tmojtsenojatá y tmojtsenáyase, chë pamíllanga ndoñe tšabá nÿets tempo quemochátmëna. 26 Y cachcá, Satanás y chábënga ndoñe tmontsenëyeunana y cachabe contra tojtsemnëse, chabe amëndayana ndoñe más queochátstotona; y cha ya ndoñe más chëngbe amëndayá queochátmëna.

27 “Ndocná quenátobena canÿe corente añemo bomna entšabe yebnoye jamashënguana y chabe soyënga jtsebocana, ndoñe natsana tconjshétsebatsëquëse. Nÿe tcojshétsebatsëquëse cocayé cuanjobenaye cha jefcana.

28 “Ndegombre cbëyana, Bëngbe Bëtsá entšangbe nÿetsca bacna soyënga echanjáperdonaye, y ntšamo Bëngbe Bëtsabiamay ínÿengbiamandñoñe tšabá tmontsichamo soyëngnaca; 29 pero chë Uámana Espíritbiamandñoñe tšabá ichámëngna ndocna te queochátaperdonaye, er nÿetsca tescama castigánënga jtsemnana chënga jtsamnana ca” —Jesús tojánayana.

30 Jesús chca tojanëyana, er chënga imojtsichamo cha bacna bayëja ibojtsambá ca.

### *Chë Jesusbe ndegombre pamíllanguentsënga*

*(Mt 12.46-50; Lc 8.19-21)*

31 Chëntscuana, Jesusbe mamá y catšátanga choye tmojánashjajna, pero nÿe shjoca imojtsemna; y canÿa tmojanichmó cha jachembuama. 32 Chë ba entsanga chentše chabe shëconana imojtsetbiámanëngna, chora tmojanianyana: —Acbe mamá, acbe catšátanga y uabëంగా shjoca montsemna; aca cmontsenguá ca.

33 Chora cha tojanëjua: —¿Nda atšbe mamá yomna, y ndëmuanÿënga atšbe catšátanga ca?

34 Chentsana, chë chabe shëconanana tbiamanëngbioye jarrepárase, tojánayana: —Quemënga mondmëna atšbe mamá y atšbe catšátanga. 35 Er ndánaca, ntšamo Bëngbe Bëtsá yobošcá tojtsamá, jtsemnana atšbe catšata, atšbe uabëంగా y atšbe mamá, atšbe ndegombre pamíllanguentsá ca.



## 4

*Chë jenabe cuento**(Mt 13.1-9; Lc 8.4-8)*

<sup>1</sup> Chentšana, uafjónayе tsachoca Jesús tojtëtanontsé Bëngbe Bëtsabe soyëngama jabuátambama. Mallajta entšanga tmojanobeconá causa, chë uafjónayentšë yojanamna canÿe barquëshoye Jesús tojánashëngo y tojanótbema; y chë entšanga tsachoca imojtsemna. <sup>2</sup> Chora cuentëngaca ba soyëngama tojanabuatambá.

Mëntšá tojanëyana: <sup>3</sup> “Šmochjouena; canÿe jená chë jënaye jaujquëshama yojëftsebocna. <sup>4</sup> Yojsëjquëshaye orna, básefta jënaye benache juachañe yojuatquëcjana; pero jaja shloftšënga imojástjajna y lempe imojtsósañe. <sup>5</sup> Inÿe meshëngna ndëtšbenguinë yojuatquëcjana, ndoñe yapa fshantse binÿentšë. Chiñna betscó yojuábocna, ndoñe yapa jashenocana fshantse yojanmëna causa; <sup>6</sup> pero yojuábocna orna, puerte yojojënyána y yojsancta; y yojsábojo yapa tbëtëjënga tondaye causa. <sup>7</sup> Inÿe meshëngna uchmëshangañe yojuatquëcjana; chë uchmashá yojuájua ora, lempe yojsatscué, y chca, chë jënayentšana tondaye yonjuashájona. <sup>8</sup> Pero inÿe meshëngna, uanguaniñe yojuatquëcjana, y bëtsá tšabe shajuanënga chiñe yojóbocna: ínÿenache, canÿe meshentšana unga bnëtsana meshënga yojóbocna; ínÿenachna, chnënguana bnëtsana meshënga; y ínÿenachna patse meshënga ca” —cha tojánayana.

<sup>9</sup> Y chentšana, Jesús más tojánayana: “Chë jouenama tmojt-sobenënga, šmochjouena ca.”

*Ndayeca Jesús cuentëngaca yojánabuatambaye**(Mt 13.10-17; Lc 8.9-10)*

<sup>10</sup> Chentšana, Jesús canÿa yojoquéda ora, chë chabe béconana imojtsemnënga chabe bnëtsana uta uatsjëndayëngaftaca, tmojantjá ndayá chë cuento bétsayanama. <sup>11</sup> As Jesús tojanëjua: “Bëngbe Bëtsá tšëngaftanga cmontsinÿanÿná nÿetsca chë mo iytëmencá yomna soyënga chabe amëndayama, pero chë ínÿengbioye ndoñe; chë soyëngama chënga lempe cuentëngaca sëntšëtsëtsná. <sup>12</sup> Chca, masque becá chamotsafšna, ndoñe chamondobená chë Bëngbe Bëtsabe soyënga jinÿama; y masque becá chë soyënga chamouena, ndoñe queochátësertana, chënga Bëngbe Bëtsábioye ndoñe chamondëtobëconama, y cha ndoñe chaondáperdonama ca.”

*Jesús chë jenabe cuentama tojanabuayená**(Mt 13.18-23; Lc 8.11-15)*

13 Chentšana, Jesús tojanéyana: “¿Quem cuentama ndoñe tcmónjósertase, ntšamo chcase nyetsca cuentëngama cmochjóserta ca? 14 Chë jená endmëna chë tšabe noticiëngama abuayiynayá. 15 Básefta entšanga mondmëna mo chë benache juachañe yojuatquécjana jenaycá. Chëngna Bëngbe Bëtsabiamama soyënga jouenana; pero chora Satanás betscó jabana, chëngbe ainaniñe yojtsemna Bëngbe Bëtsabe palabra jabëtsabuajuanama, chënga chiñe ndoñe chamondëtsošbuáchema. 16 Inyë entšanga mondmëna mo chë ndëtšbenguñe yojuatquécjana jenaycá; chëngna Bëngbe Bëtsabe palabra jouenana y oyejuayënga jtsemnana; 17 pero ndoñe nyets tempo chana jochochájuana; y chca, ndoñe bayté Bëngbe Bëtsáftaca ntjëtsemnëngana, ndoñe yapa tmontsašbuaché causa. Inyënga mochantsëbuayëña, y Bëngbe Bëtsábeñe betsošbuáchiyama mochanjasúfrianga; chíyeca chënga Bëngbe Bëtsabe palabra cachcá mochanjesonýaye. 18 Inyënga mondmëna mo chë uchmëshangañe yojuatquécjana jenaycá. Chënga Bëngbe Bëtsabe palabra mochanjouena, 19 pero quem luarentša soyëngaca oyejuayënga jtsemnana yapa mochántseboše, y nyë bomnana jëtsebomnana yapa mochanjésenojuabnaye. Chë soyama y inyë ba soyëngama yapa enócochinýena causa, Bëngbe Bëtsabe soyëngama echantsebnëtjomba, y ndoñe quemochátama ntšamo Bëngbe Bëtsá tojayancá. 20 Pero inyënga mondmëna mo chë uanguaniñe yojuatquécjana jenaycá. Chëngna Bëngbe Bëtsabe palabra botamana mochanjouena; nyets ainánaca mochántseprontana chiñe jtsošbuáchiyama. Mo canyë betiye becá tšabá tojtseshajuancá, chënga bëtscá tšabe soyënga Bëngbe Bëtsabiamama mochántsama. Inyënga ínýengbiamama más bëtscá soyënga mochanjama; y chca, ínýenga mochántsemna mo chë unga bnëtsana meshe tojanshajo jenaycá, ínýenga mo chë chnënguana bnëtsancá, y ínýengna mo chë patse meshënga tojanboté jenaycá ca” —Jesús tojánayana.

### *Chë uajuinýanëshama cuento*

*(Lc 8.16-18)*

21 Mëntšánaca Jesús tojánayana: “Ndocná juiyëbana canyë uajuinýanëshama cajonëshe o jutsnëshama tajsoye juajájuama. Ndoñe; uajuinýanëshama juiyëbana tsbanánoca juajájuama, lempe chaotsebinýnama. 22 Ndocna yoyitëmena soye ntjinýencá queochaisoquéda, y chë ndótatsëmbo soye ntsotatsëmbcá queochaisoquéda. 23 Chë jouenama tmojtsobenënga, šmochjouena ca.”

24 Y mëntšánaca Jesús tojanéyana: “Tšabá šmochjájua boye ntšamo šmojtsuenanama. Nyë batsatema šmojouenëse, nyë

batšatema cmochanjósertaye; pero aínne tšabá šmojouenëse, chama corente cmochanjósertaye; y Bëngbe Bëtsá echanjama tšëngaftanga más soyëngama chacmósertama. <sup>25</sup> Er nda Bëngbe Bëtsabe soyëngama tšabá tbojosertá, Bëngbe Bëtsá echanjama cha más ba soyëngama chabosertama; pero nda chë soyëngama josértama ndoñe tontsebošá, chë nyë batšá ibosertana soyëngama bochántsebnatjëmba ca” —cha tojánayana.

### *Chë ojuajna jenayama cuento*

<sup>26</sup> Jesús mëntšánaca tojanëyana: “Bëngbe Bëtsabe amëndayana endmëna mo ntšamo canye boyabása jénaye tojuatbontsá ora echandbopasacá: <sup>27</sup> masque cha cada ibeta jtsojájua y bnëté jotsbanama, ibeta o bnëté, chë jénayentšana juabocnana y juájua, ntšamo chca yojsájua y chë boyabása ntjatstatšëmbcá. <sup>28</sup> Chë fshantse cachabe ponto jamana ndayánaca chiñe chaójuama; natsana tsbuanachëtema jóbocnana, chentšana chë espiga, y chentšana chë meshënga jashájonana. <sup>29</sup> Y chë meshënga ya tojtsebóchichna orna, játbanama jabocnana, chë saná josháchiñama ora ya tojobuácheyeca ca” —Jesús tojánayana.

### *Chë mostaziye jenayama cuento*

*(Mt 13.31-32; Lc 13.18-19)*

<sup>30</sup> Jesús mëntšánaca tojanëyana: “¿Ndayacá Bëngbe Bëtsabe amëndayana yomna, o ndaye sóyeca nanjopódia chama jábuayenama? <sup>31</sup> Endmëna mo canye mostaza jénaye jajoca tcojajecá. Ndegombre, nyetsca quem luarentša jenayëngama, mostaza jénaye chë más básatema endmëna; <sup>32</sup> pero tcojajé orna, jójuana, y jajañe chë más bëts betiye jóbemana, ba bëts buacuashëngaca; chíyeca chë jaja shloftšënga jana y chiñe uajajonëtemëngá jauábopormana ca.”

### *Ndayeca Jesús cuentëngaca entšanga yojanabuayiyná*

*(Mt 13.34-35)*

<sup>33</sup> Chca Jesús Bëngbe Bëtsabe soyëngama entšanga yojanabuatambá, ba cuentënguentshana, mo chë tmonjouena cuentcá, ntsachetšá chë entšanga josértama tmojobenacá. <sup>34</sup> Tondaye yonjanabuatambá ndoñe cuentëngaca ntsemëncá; pero chabe uatsjëndayëngna lempe yojanabuayiyná, cányënga tmojtsemna ora.

### *Jesús chë binýia y chë béjaye bonguana yojëtsbema*

*(Mt 8.23-27; Lc 8.22-25)*

<sup>35</sup> Cach te, yojtseibétatana ora, Jesús chabe uatsjëndayënga tojanëyana: “Uafjajónaye chenguana cuajna ca.”

<sup>36</sup> Chorna, chë entšanga jesabáshejuanëse, chë uatsjëndayënga Jesús tmojtsanántseñe, cach yojánenjaquena barquëshañe; y inye entšángnaca inye barquëshangañe

tmojanasto. <sup>37</sup> Chentšana, chë uafjajónaye bėjayıñe tša jabuache binýia yojóshjango; olëshenga chë barquësha imojtsétsbotsana, y chë causa chë barquësha yojóntša búyesheca jtsobuajútjiana. <sup>38</sup> Y chëntscuana, barquësha stëtšoica, tsëntšenëshañe Jesús yojtsomañe. Chora chë uatsjéndayënga tmojtsanfšená y tmojanियana: —¡Buatëmbayá! ¿Tondayana cmontsentsamna bënga chašotsënatjëmbama ca?

<sup>39</sup> As Jesús tojantsbaná, chë binýia tbojanácacana, y chë bëts uafjajónayoye tojánayana: —¡Natjëmbana cochtsemna! ¡Bonguana ca!

Y cachora chë binýia yojëtstëcja, y lempe bonguana yojtsatsmëna. <sup>40</sup> Chora chabe uatsjéndayënga tojanëyana: —¿Ndáyeca tša šmojtsauatja? ¿Bëngbe Bëtsá tšëngaftanga jujabuáchama yobenama cabá ndoñe šmontsošbuaché ca?

<sup>41</sup> Chama, chënga puerte auatjanánënga imojtsemna y mëntšá imojtsenatsëtsnaye: “¿Nda quem boyabása yomna? Cha tonjayana y chë binýia y chë bėjaye tmonjoyeuná ca.”

## 5

*Chë Gerasa luaroca bacna bayëja uambayá*  
(Mt 8.28-34; Lc 8.26-39)

<sup>1</sup> Chentšana, uafjajónaye chenguánoica tmojánashjajna, Geraseno ca uabaina entšangbe luaroye. <sup>2</sup> Jesús barquëshoicana tojánastjango, y cachora, chë obanëngbe cuevëshënguentshana canýe entšá, bacna bayëjbe juabna uambayá, tojánbocna y tbojanjébingo. <sup>3</sup> Chë boyabásana, obanëngbe cuevëshënguenache inoyena, y ndocná yonjobena cha jtsebátsëcana, ni mo cadenëjuangaca; <sup>4</sup> er ba soye cadenëjuangaca y inýe soyëngaca cha nyetsá tmojanbatsëca, pero cha nyetsca soye yojtsátabebe y yojtsenájaca, y ndocná yonjobenaye cha bonguana chaotsemnama. <sup>5</sup> Nyets tempo, bnëté y ibeta, obanëngbe cuevëshënguenache y tjañenache yojánana yoye, y ndëtšbéngaca enotsetšenaye. <sup>6</sup> Jesúsbioye bënocana tbojáninýe ora, chábioye tojanótjajo y chabe natsanoica yojoshëntsamentsiye; <sup>7</sup> y mëntšá yojtsáyebuache: —¿Ndáyá átšeftaca cojtseboše, Jesús, celoca Bëngbe Bëtsabe Uaquiñá? ¡Bëngbe Bëtsabe delante cboimpadá, ndoñe šcatjatsetšená ca!

<sup>8</sup> Chca tbojanियana, er Jesús chábioye tbojanियana: —¡Bacna bayëjbe juabna, chábentshana maisebocna ca!

<sup>9</sup> Chentšana Jesús tbojantjá: —¿Ntsamo cabaina ca?

Y chë bacna bayëjëngbe juábnaca cha tbojanjuá: —Atšna Legión ca sënduabaina, bëtscanga fsëndmëna causa ca.

<sup>10</sup> Y tša Jesús ibojtserruana chë luarentšana ndoñe chaondëtëbuacanama. <sup>11</sup> Chentša bëconana ba cotšënga

imnajena, batsjoca imnétsosañe; <sup>12</sup> as chë bacna bayëjenga Jesúsbioye tmojanimpadá: —Chë cotsëngbioye šmichamó, chëngbeñe fchayamashjna ca.

<sup>13</sup> Y Jesús aïñe tojanalesenciá; as chë bacna bayëjenga chë entsábentšana tmojésanbocana y chë cotsëngbeñe tmojánamashjna. Cachora chë mo uta uaranga cotsënga batsjocana peñëšëjana uafjajónayoye imojtsoshbuetše y yojsatajo.

<sup>14</sup> Chora, chë cotsënga anjënënga tmojtsanacheta auatjanánënga, y tmojána chama jacuéntama chë puebloca y chabuenache; y entsanga tmojánabo ntšamo tojanopasacá jinjama. <sup>15</sup> Jesús yojtsemnoye chë entsanga tmojánashjajna ora, tmojáninje chë tempo bacna bayëjenga uambayá, inétsotbemañe, entsayá uichëtjoná y chabe nyets juábnaca. Y chë entsanga chama imojtséuatjaná. <sup>16</sup> Chë tmojáninjënga imojtsecuéntaye, ntšamo chë bayëjbe juabna uambayáftaca tojanopasama, y chë cotsëngaftaca ntšamo tojanopasámnaca. <sup>17</sup> Chora chë entsanga tmojanontsé Jesús impadánana chë luarentšana chaotsatoñama.

<sup>18</sup> Jesús chë barquëshoye tojtanášëngo ora, chë tempo bacna bayëjbe juabna uambayá tbojanimpadá chabolesenciá cháftaca jama ca. <sup>19</sup> Pero ndoñe tbonjanlesenciá, sinó mëntšá tbojanijana: “Acbe yebnoye motsatoñe, acbe pamíllangbioye, y cochjácuntaye ndayá Bëngbe Utabná ácaftaca tojamama, y ntšamo cha ácbioye tcmojalastemama ca.”

<sup>20</sup> Chentšana, chë entsá yojsatoñe y tojanontsé Decápolis uabaina pueblënguenache jacúntana lempe ntšamo Jesús cháftaca tojanmcá; y nyetscanga imojtsenjnanaye.

*Jesús canje shembásabioye tbojanshná y Jairëbe bembetëmbioye tbojtanyená*  
(Mt 9.18-26; Lc 8.40-56)

<sup>21</sup> Chentšana, Jesús cachiñe chë uafjajónaye chenguana tojesaná barquëshañe. Chocna ba entsanga tmojanobuashconá, y Jesús chë uafjajónaye tsachañe yojtsemna. <sup>22</sup> Chorna, tojánashjango chë judiëngbe enefjuana yebnentša canje mandayá, Jairo ca uabainá. Jesúsbioye tbojáninje ora, chábertše tojanoshëntsamentšé, <sup>23</sup> y tša ibojtseimpadana, mëntšá: —Atšbe bembetema ya echantsóbana; Diosmanda mabo, acbe cucuatšënga chábeñe cochjajájua, salud chauatinjenama y cháuatayenama ca.

<sup>24</sup> As Jesús cháftaca tojána; pero bëtská entsanga imojtsëstona, chábioye imojtsenatsëntšenaye. <sup>25</sup> Chë entsanguentše yojsaye canje shembása šocá; cha ya bnëtsana uta uata oboftjajuanánaca inapadecena. <sup>26</sup> Cha puerte tojansufri, ba ashnayëngbe cucuatšëñe, y lempe

ntsachetšá inabomncá tojanpochocá jenóshnama; pero ndoñe ibontsatstécacjana, n̄ye más peor ibojtsobiamnaye. <sup>27</sup> Chë shembása yojouena ntšamo Jesús ba šoquënga tojánashnama, y as stëtšoicana entšangbe tsëntsajana yojobeconá, y Jesusbe entšayá yojauábojajo. <sup>28</sup> Cha chca tojanma, er yojtsejuabnaye: “Masque n̄ye mo chabe entšayá sibiájua chaijuábojajo, y salud chantsatsbomna ca.” <sup>29</sup> Y cachora chë oboftjajuanana ibojtsobojuána; y chabe cuerpiñe ibojebiónana ya tšabá yojtsatsmënama. <sup>30</sup> Chora Jesús yojaséntia chábentšana obenana yojóbocnama, mo ndábioye tbojashná orcá; as cha tojanobuértana entšángbeñe y tojanatjá: —¿Nda atšbe entšayá tojuabojajo ca?

<sup>31</sup> Chabe uatsjéndayënga tmojanjuá: —Aca contsonyá chë entšanga cmontsatsëntšená, y cabá cochjátsnoticiaye nda entšayá tojuabojajo ca.

<sup>32</sup> Pero Jesús cátoye yojtserreparana jinÿama nda tbojánbojajuama. <sup>33</sup> As chë shembása, chë ntšamo cháftaca yojopásama jtsetatsëmbëse, tojanobeconá ngmëmnyá y auatjananá, chabe natsanoica tojanoshëntsamentšé, y lempe ntšamo ndegombre cháftaca tojanopasacá Jesúsbioye tbojaniyana. <sup>34</sup> Chora Jesús tbojaniyana: —Bembe, Bëngbe Bëtsábeñe icošbuachéyeca shnaná contsatsmëna. Natjëmbana motsatoñe; acbe šocana tontsopochocá ca.

<sup>35</sup> Jesús cabá yojtsóyebuambnantscuana, báseftanga tmojánashajna chë judiëngbe enefjuana yebnentša mandayabe yebnocana, y chë shembásetembe taitá tmojaniyana: —Acbe bembe tontsóbana; ¿ndayama más Buatëmbayá chama cochjátebÿaboma ca?

<sup>36</sup> Y Jesús, ntšamo chënga imojtsichamcá ntjatuenancá chë judiëngbe enefjuana yebnentša mandayábioye tbojaniyana: —Ndoñe matauatjana. N̄ye Bëngbe Bëtsábeñe cochtsošbuáchiye cha tšabá chaotsatsmënama ca.

<sup>37</sup> Y Jesús ndoñe tonjanalesenciá Jairëbe yebnoye banga chamuastama; n̄ye Pedro, Santiago y Juan, Santiagbe uabentsana, aíñe. <sup>38</sup> Chentšana, chë mandayabe yebnoye tmojánashajna ora, Jesús tojánanÿe entšanga tša imojtsenbouenana, entšanga imojtsošachiye y puerte ngménaca imojtseyoye. <sup>39</sup> As chë yebnoye tojánamashëngo y chë entšanga tojanëyana: “¿Ndayama tša šmojtsenbouenana y tša šmojtsendëntjana? Chë shembásetema ndoñe chenatóbana, n̄ye endëtsomañe ca.”

<sup>40</sup> Pero entšanga n̄ye imojtsáfchaye. As Jesús nÿetsca entšanga shjoye tojtanëbuacna, y tojëftsanëbiatše chë basetembe bëtsëtsata y chabe enutënga; y chë shembásetema yojtsemnoye tojánamashëngo. <sup>41</sup> Chora Jesús

tbojanábuacueshache y cachëngbe biyañe tbojaniyana: “Talita, cum ca.” (Chca endayana “Shembásetema, matëtsbaná ca”).

<sup>42</sup> Cachora, chë bnëtsana uta uata bomna shembásetema tojtantsbaná y yojtsobena jama. Y chë entsanga chama imojsenjnanaye. <sup>43</sup> Pero Jesús corente tojanamëndá ndocnábeñe chama ntsecuéntayana ca, y tojanamëndá chë básetema saná chamuiyé chaosama.

## 6

### *Jesús Nazaret puebloca* (Mt 13.53-58; Lc 4.16-30)

<sup>1</sup> Chentsana Jesús tojëftsanbocna y cachabe luaroye tojtanashjango, y chabe uatsjëndayënga cháftaca tmojána. <sup>2</sup> Ochnayté tojanobuache ora, Jesús tojanontsé chë judiëngbe enefjuana yebnentse entsanga jabuátambana.

Chë ba entsanga cha jóyebuambayama tmojanuenënga, imojenjananá y tmojánayana: “¿Ndëmoca quem boyabása lempe chca tojuatsjinýe? ¿Ndaye osertánana mua tmojatsetá, y ntšámoyeca cha yojtsobena chca bëts soyënga jtsamana ca? <sup>3</sup> ¿Mua ndoñe chë calpintero yondmëna, Mariybe uaquiñá, y chabe catšátanga ndoñe mondmëna Santiago, José, Judas y Simón; y chabe uabënanagnaca muentse ndoñe bëngaftaca mondoyena ca?” —chënga imojsichamo.

Chë causa chënga tmojanotjayaná, y ndoñe montseboše joyeunayana. <sup>4</sup> As Jesús tojanëyana: “Nýetsca luarënguenache canýe Bëngbe Bëtsabe juabna oyebuambnayábioye bëtsá jabe-mana, pero ndoñe chca cachabe luarentse, ni cachabe pamíllangbenache, ni cachabe yebnentse ca.”

<sup>5</sup> Chë entsanga chentse chábeñe ndoñe montsanošbuaché causa, Jesús ndoñe tonjanobená ni canýe bëts soye Bëngbe Bëtsabe obenánaca chentse jëftsemana; nýe básefta šoquëngbeñe cucuatšënga tojanajó y tojanashná. <sup>6</sup> Jesús ojnananá yojtsemna cachábentša entsanga chábeñe ndoñe montsanošbuaché causa.

### *Jesús, chabe uatsjëndayënga tojanichamó Bëngbe Bëtsabe amëndayama jábuayenama* (Mt 10.5-15; Lc 9.1-6)

Chentsana, chë chaboye base pueblënguenache Jesús yojánana, Bëngbe Bëtsabe soyëngama abuátambaye. <sup>7</sup> Y chë bnëtsana uta uatsjëndayënga Jesús tojánachembo, y utáta ínýoye tojanichamó, entsángbentšana bacna bayëjënga jtëbuacnama obenana jatsatayëse; <sup>8</sup> y mëntšá yojáuyana: “Benachiñama tondaye šmattsambaye, nýe canýe jatjonëfja; ndoñe šmattsambaye saná, ni shecnaja, ni crocénana

uasnanëchiñe. <sup>9</sup> Nduámanëshe šmochjesóshecochëtjo, y nÿe canÿájua šmochjesíchëtjo ca.”

<sup>10</sup> Mëntsánaca tojanëyana: “Posada chacmojúyentšame yebnentše šmochtsoquedañe inÿe puebloye játantscuana.

<sup>11</sup> Canÿe luaroye chašmojáshjajna y ndocná posada chacmonjuyentšame, y joyeunayama ndoñe chamontsebošëse, chentsana šmochjësebocana, y shecuatšentša polvëshe šmochjësenstoto, chca, chëngbioye jinÿanÿiyama chënga ndoñe tšabá tšëngaftangaftaca tmonjamama ca.”

<sup>12</sup> Chentšana, chë uatsjëndayënga tmojëftsanbocana y entšanga imojánabuayiyaye, chë tšabe benache chámuatishachama, bacna soyënga amana jtsajbanase.

<sup>13</sup> Entšángbentšana ba bacna bayëjënga tmojtanëbuacna, y ba šoquënga aceitÿyeca tmojananëttojto y tmojanashná.

*Ntšamo Juan chë Ubayaná tojanóbana  
(Mt 14.1-12; Lc 9.7-9)*

<sup>14</sup> Rey Herodes Jesusbiamá yojátatšëmbona, er nÿetsquénache nÿetsca entšanga chabiamá imojtsóyebuambnaye. Entšanga Jesusbiamá imojtsichamo: “Juan chë Ubayaná obanënguentšana tojtayena, chíyeca cha chca obenana yojtsebomna ca.”

<sup>15</sup> Inÿengna imojtsichamo: “Cha entsemna chë Bëngbe Bëtsabe juabna oyeuambnáyá Elías ca.”

Y inÿengna: “Muana canÿa Bëngbe Bëtsabe juabna oyeuambnáyá, mo chë tempsquëngcá ca.”

<sup>16</sup> Heródesna ntšamo entšanga Jesusbiamá imojtsichamcá tojanuena ora, tojánayana: “Mua Juan entsemna, chë atše sënjanmandá bestšaše chamotsëstjanguamá, mora obanënguentšana tojtayena ca.”

<sup>17</sup> Juan cabá ainá ora, Herodes tojanmandá cha chamishache, cadenëjuangaca chamobátsëca y chca cárceloye jutámiamá. Herodes chca tojanma Herodíasbe causa, chabe uabentsá Felipebe shema. Herodes chë shëmaftaca tojanobouamá, Felipe cabá ainá ora. <sup>18</sup> Y chama, Heródesbioye Juan ibojánabuayiyaye: “Ndoñe quenátslesenciana acbe uabentsabe shema acbe shema chaotsemnama ca.”

<sup>19</sup> Chë causa, Herodías Juánbioye puerte ibojuáya, y yojánbošë jtsóbama; pero ndoñe yontsobena, <sup>20</sup> er Herodes yojántatšëmbo, Juan canÿe nÿetsca soyënguiñe tšabá amá, nÿe Bëngbe Bëtsábioye sempre oservená inamnana. Chama cha yojánauatja y ndoñe yonjanaleséncia cha chamóbama. Y Juan Bëngbe Bëtsabe soyëngama Heródesbioye tbojtsebuayiyáná ora, ntšamo jajuaboyana ndoñe yontsetátšëmbo, pero masque chca, oyejuayá Juánbioye ibnayeunana. <sup>21</sup> Pero Herodías tojáninÿena mocna ora Juan chamóbama. Heródesbe



cumpleaño oboyejuaye ora, bëtscá saná tmojanprontá, y Herodes yojúbuaja chabe amëndayënga, soldadëngbe amëndayënga y Galileoca uámana entšanga. <sup>22</sup> Chora, chë oboyejuaye luaroye Herodíasbe bembe tojánamashëngo, tojanlantsá, y Herodes y nÿetsca ófjanënga chama tša imojtsóyejuaye. As chë rey, chë tobiásbioye tbojaniyana: —Ndayánaca šmotjañe y atše cbochjátsetaye ca.

<sup>23</sup> Y jajúrase, mëntsá tbojansbuachená: —Ntšamo chašcojotjañcá cbochjátsetaye, masque atšbe amëndayentša bomnanentšana tsëntsañnaca ca.

<sup>24</sup> Chentsana, chë tobiáše yojéftsebozna y chabe mamábioye ibojatjaye: —¿Ndayá chjotjañe ca?

Y chabe mamá ibojojuá: —Juan chë Ubayanabe bestšaše ca.

<sup>25</sup> Cachora chë tobiáše betscó chë rey yojtsemnoye tojanamáshëngo, y tbojaniyana: —Atše sëntseboše, cam ora Juan chë Ubayanabe bestšaše canÿe šcnenëšiñe chašcuatšetá ca.

<sup>26</sup> Herodes chama corente tbojanongmé, pero chë entšangbe delante y jajúrase tbojansbuachená causa, ndoñe yonjobenaye ntšamo tbojaniyancá jebëbuetámenana.

<sup>27</sup> Cachora chë rey canÿe soldado ibojíchnua, Juanbe bestšaše chauiyëbama. <sup>28</sup> As chë soldado cárceloye tojána, Juánbioye bestšaše tbojtsanéstjango, y canÿe šcnenëšiñe tojanamba. Chë tobiásbioye tbojanëntšabuaché, y chana, chabe mamábioye.

<sup>29</sup> Juanbe ústonënga chama imojátatšëmbona ora, choye tmojánashjajna, chabe cuerpo tmojésanocñe y jauátbontsama tmojána.

*Jesús shachna uaranga boyabásenga saná tojanacaredadó  
(Mt 14.13-21; Lc 9.10-17; Jn 6.1-14)*

<sup>30</sup> Chë Jesús tojánichamonga chábioye tmojtánashjajna ora, lempe ntšamo tmojanmama y tmojanabuatambama cha tmojancuentá. <sup>31</sup> Chora Jesús tojanéyana: “Cuajna ínÿoye, entšanga ndoyena luaroye, batšatema jóchnama ca.” Cha chca tojánayana, er tša entšanga imojtsaye y imojtsabëbana; ni mo jasama ndoñe luare imontsebonna.

<sup>32</sup> As cánÿenga barquëshañe tmojtsanoñe, entšanga ndëbínÿnoye. <sup>33</sup> Pero chënga imojtsoñama entšanga tmojánanÿe, y ndëmuanÿenga imojamnama imojtsetátšëmbo;

chcasna, chë entšanga shecuátšeca betscó tmojána, nÿetsca pueblënguentsana, y chëngbe natsana choye tmojánashjajna.

<sup>34</sup> Chentsana, chë barquëshoicana tojánastjango ora, Jesús ba entšanga tojánanÿe; chëngbiana tbojanongmé, er imojtsemna mo abuajénÿa ndbomna oveshëngcá; y tojanontsé ba soyëngama jabuátambana.

<sup>35</sup> Ya jetiñe yojtsemna orna, chabe uatsjéndayënga tmojanobobconá y tmojanianyana: —Ya jetiñe entsemna, y quem luariñe ndocná quenatiyena. <sup>36</sup> Entšanga cuantichamuá, pueblotémëngoye y inye luarëngoye chamotsoñama, ndayánaca jasama chamobuámiñama ca.

<sup>37</sup> Y Jesús tojanëyana: —Tšëngaftanga saná chëngbioye smochjacaredádaye ca.

Chora chënga tmojanianyana: —Crocénana queftsátsbomna, uta patse denario nyetšá, chëfta entšangbiama saná jabuámiyama ca.

<sup>38</sup> As Jesús tojanëyana: —¿Bueta tandëse šmojtsebomna? Marrepárange ca.

Ya imojtsetátšëmbo ora, tmojanianyana: —Shachna tandëse y uta beónata fsëntsebomna ca.

<sup>39</sup> Chora Jesús entšanga tojanamëndá ínÿoca ínÿoca chamoshëntsjatbiamama. <sup>40</sup> As chënga tmojanotbiama patse patsënga y shachna bnëtsátsanënga. <sup>41</sup> Chora Jesús chë shachna tandëse y chë uta beónata tojanca, y celoye jontješiyëse, Bëngbe Bëtsábioye chama tbojtanchuá. Chentšana chë tandëšënga tojanjatá y chabe uatsjéndayënga tojanayentšbuaché chë entšanga jatšatayama. Y chë uta beónatnaca nyetscanga tojanëjátaye. <sup>42</sup> Nyetscanga tmojanse jtoshachaye nyetšá. <sup>43</sup> Y chentšana, chë tandëse y chë beonentsana ojamnëtemënga tmojanatbaná, y bnëtsana uta sbarëcua tmojanajutjé. <sup>44</sup> Chë saná tmojansënga imojamna shachna uaranga boyabásenga, shembásenga y básenga ntjacuntacá.

*Jesús béjaye juatsbuacá yojtsaye*  
(Mt 14.22-27; Jn 6.16-21)

<sup>45</sup> Chentšana, Jesús chabe uatsjéndayënga tojanamëndá chë barquëshoye jtašjnama, chë uafjajónaye chenguana jangana y chabe natsana Betsaida ca uabaina puebloca jashjajnana. Chënga imojtsebocanëntscuana, Jesús chë entšanga yojtichamuá. <sup>46</sup> Nyetscanga tojtanadiošoftá ora, tjoye cha tojtsanoñe Bëngbe Bëtsáftaca jencuëntama.

<sup>47</sup> Yojtseibétatana ora, chë barquëshu uafjajónaye tsëntsaca yojtsamna, y Jesús, canÿa fshantsoca. <sup>48</sup> Jesús tojáninÿe chëngbiama totcá yojtsemna, chë barquëshaca natsanoye jtsayana, er binÿia chëngbe contra yojtsemna. Ya binÿana ora, chëngbioye yojobeconá, béjaye juatsbuacá yojtsaye, y ya chëngbiajana nÿe ndericho jachnënguama yojtsemna. <sup>49</sup> Y chënga, chë béjaye juatsbuacá cha yojtsayama tmojáninÿe ora, tmojanjuabó cha canÿe añemëse yojtsemna ca, y tmojanontsé yoyana; <sup>50</sup> er nyetscanga chca tmojáninÿe y cochauatjanánënga imojtsemna. Pero Jesús cachora tojanëyana:

“¡Añemo šmochtsebomna; atše Jesús sëndmëna; ndoñe matau-atjëngana ca!”

<sup>51</sup> Chorna, chënga imojtsemna barquëshoye cha tojánashëngo, y chë jabuache binÿia tojanëjbana, y nÿetscanga puerte auatjanánënga y ojanánënga imojtsemna. <sup>52</sup> Chënga tmojáninÿe chëfta entsanga tandëse jujátayana, pero chëngbe ainanoca cabá ndoñe imontsobena josértana, Jesús lempe jamama obená bëtsemnama.

*Genesaret ca uabáinoca Jesús ba šoquënga tojanashná  
(Mt 14.34-36)*

<sup>53</sup> Chë uafjajónaye tmojánenashbuachengo ora, Genesaret ca uabaina luaroye tmojánashjajna, y chë uafjajónaye tsachoca chë barquëshu tmojanëtsbua. <sup>54</sup> Chë barquëshoicana tmojánastjajna y cachora entsanga Jesús tmojantëmbá. <sup>55</sup> Chíyeca, chë luariñe yebnënguenache betscu chënga tmojána, y tmojanontsé chë šoquënga tjuashënguiñe juyambana, chë ndëmoye tmojanuena Jesús yojtsemna luaroye. <sup>56</sup> Y ndayentse cha tojámashëngüentse, pueblënguiñe, bëtspueblënguiñe y base pueblotëmënguiñnaca, chë šoquënga benachoye imojtsëbuacana, y Jesús corente imojtseimpadana chë šoquënga chaualesenciá, nÿe mo chabe entsáyá sibuájua juabojajuana. Y nÿetscanga tmojuábojajënga tšabá imojtsatsmëna.

## 7

*Ndáyeca canÿe entsá Bëngbe Bëtsabe delante ndoñe tšabia  
nántsemna  
(Mt 15.1-20)*

<sup>1</sup> Chentšana, fariseunga Jesúsbioye tmojanobeconá y báseftanga ley abuátambayëngnaca, Jerusalenocana áshjajnënga. <sup>2</sup> Chënga tmojáninÿe básefta Jesusbe uatsjëndayënga, cabá ndase ora, ndoñe montsacuentšabiá ntšamo chë judiënga imojanamancá. <sup>3</sup> Er chë fariseunga y nÿetsca judiënga imojanamana jtsacuéntšabiana ba soye, ndayá jasama ora, ntšamo chëngbe bëtspueblënguiñe taitanga imojanamancá. Chënga imojanjuabná, chca jtsamëse Bëngbe Bëtsabe delante tšábenga jtsatsmënama ca. <sup>4</sup> Chë sananga enocana tmojtashjango ora, ba soye ndoñe tmontsácuentšabese, tondaye ntjasana; y ba soyëngnaca imojánama, pero nÿe chëngbe bëtspueblënguiñe taitanga chca jamana imojanamánayeca, mo chë bëjayeca juabáyana tazësënga, matbajënga, calderëshënga y jutsnëshangá. <sup>5</sup> Chë causa, chë fariseunga y chë ley abuátambayënga Jesús tmojantjá: —¿Ndáyeca acbe uatsjëndayënga ndoñe montsama ntšamo bëngbe bëtspueblënguiñe taitanga monjanamancá, y

montsesá ntsacuéntšabiase, ndoñe ntšamo bēnga judiēnga fsēnduamancá, Bēngbe Bētsabe delante tšabá jtsatsmēnama ca?

<sup>6</sup> Chora Jesús tojanēyana: —Nye tšabá chē Bēngbe Bētsabe juabna oyebuambnayá Isaías tšēngaftangbiamá tojánayana, bacna entšanga chē ntšamo ndegombre šmojuabnacá nd-inyīnyayēnga ca, mēntšá enduabemanentše:

Quem entšanga mondbétsichamo Bēngbe Bētsá tša tšabia yomna ca; chca nye uayásaca, pero chēngbe ainanentše ndocna tšabe juabnēngaca.

<sup>7</sup> Pero chēnga nye bonamente mondbétsichamo Bēngbe Bētsá tša tšabia yomna ca;

chēnga nye entšangbe mandēnga jtsabuátambayana, y Bēngbe Bētsabe mandēnga ndoñe ca —cha tojánayana.

<sup>8</sup> Chora Jesús tojanēyana: —Ntšamo Bēngbe Bētsá tojan-mandacá stētšoye tšēngaftanga šmojtsequedá, nye ntšamo entšanga monduamancá jtsamama ca.

<sup>9</sup> Y mēntšánaca tojanēyana: “Tšēngaftanga ntšamo Bēngbe Bētsá tojanmandacá stētšoye jtsequedana, nye ntšamo tšēngaftangbe anteunga imojanamancá jtsamama. Tšēngaftanga jtsejuabnayana tšabá šmojtsama ca chca šmojtsama ora. <sup>10</sup> Moisés tonjánayana: ‘Acbe bētsétsata ndoñe stētšoye catjáquedaye’, y ‘nda chabe bētsétsatbiamá ndoñe tšabá tonjoyebuambá chana, jóbanama jtsemnana ca.’ <sup>11</sup> Pero tšēngaftanga šmondbétsichamo, canye entšá yobena chabe taitá o chabe mamá jáuyanana: ‘Lempe sēndbomna soyēnga corbán entsemna, chíyeca ndoñe quetsátobena juajabuáchana ca’ (corbán endayana “Bēngbe Bētsabiamá uátšēmbona soyēnga ca”). <sup>12</sup> Tšēngaftanga šmondbétsichamo, nda chca tojayanēse, ya ndoñe obligaciōnaca ntsemnana chabe taitá o mamabiamá ndayánaca jamama ca. <sup>13</sup> Chca, tšēngaftanga šmontsama entšanga Bēngbe Bētsabe palabra stētšoye chamoquedama, mo tondaye tontsamancá, chē cuenta jtsamama ntšamo anteunga imojanamancá, ntšamo entšángbeñe tempšana y mēntscōñama yochnējuancá. Y ba soyēnga tšēngaftanga cachcá šmontsama ca” —Jesús tojánayana.

<sup>14</sup> Chora Jesús, cachiñe entšanga tojtanachembo y tojanēyana: “Nyetscanga šmochjouena y chacmēsertá. <sup>15</sup> Ndayá entšá tojtsesacá, ndoñe ntjábemana ndoñe tšabia Bēngbe Bētsabe delante. Inyetsá comna: ntšamo entšá tojtsejuabná y tojtsoyebuambnacá endobena jabemana ndoñe tšabia Bēngbe Bētsabe delante. <sup>16</sup> Chē jouenama tmojtsobenēnga, šmochjouena ca” —cha tojánayana.

<sup>17</sup> Jesús entšanga tojēftsanashejuana y yebnoye tojtanamáshēngo ora, chabe uatsjēndayēnga tmojantjá ntšamo cha tojánayanama. <sup>18</sup> As cha tojanēyana:

“¿Tšëngaftángnaca cabá ndoñe cmontsësertana ca? ¿Cabá ndoñe cmontsësertana, lempe ntšamo entšá tojascá ndoñe ntsoebenana chábioye jabemana ndoñe tšabia Bëngbe Bëtsabe delante; <sup>19</sup> er ainanoye ndoñe ntjómashënguana, sinó uafsbioye, y chentšana cuerpentšana jtabocnana ca?”

Y chca, Jesús tojánayana nyetsca sananga tšabá jasama yomna ca y chë saná ndoñe ntjamana canye entšá bacna soye chaotsamama ca. <sup>20</sup> Y mëntšánaca tojánayana: “Ntšamo chë entšá tojtsejuabná y tojtsoyebuambnacá, chë soye cocayé endobena entšá jabemana ndoñe tšabia Bëngbe Bëtsabe delante. <sup>21</sup> Er ainanocana jtsóbocanana bacna juabnënga: shembásaftaca o boyabásaftaca bacna soye jamama, jatbëbama, jóbama, <sup>22</sup> bacna juabnënga boyá o shëmbioye ínÿaftaca jáingñama, jtsatbomnayama, nyetsca bacna soyënga jamama, ínÿenga jáingñama, nÿe cachá jenomándama ntso encá jtsiyenama, ínÿabioye jtsántšabošama, ínÿabiamajtsayátsenayama, jtsenábotamnayama y nÿe opënga jtsobiamnayama. <sup>23</sup> Nyetsca quem bacna soyënga entšabe ainanocana jóbocnana, y cha jabemana ndoñe tšabia Bëngbe Bëtsabe delante ca” —cha tojánayana.

*Canye shembása inÿe luarocana ashjargoná Jesúsbeñe yojtsošbuaché*  
(Mt 15.21-28)

<sup>24</sup> Jesús chentšana, Tiro ca uabaina luaroye tojtsanoñe, y canye yebnentše tojánamashëngo. Cha yojtseboše ndocná chama chaondëtsetatšëmbuama; pero ndoñe yonjobenaye iytëmenana jatsmënana. <sup>25</sup> Y betesco, canye shembása, canye bembe bacna bayëjbe juabna uambayá ibnabomná, Jesusbiamajoyebuambnayana vojouena ora, chábioye tojánabo y chabe shecuatšentše tojanoshëntsamentšë. <sup>26</sup> Chë shembása ndoñe yonjamna judiá, sinó Sirofenicia luarocá. Tojánabo y Jesúsbioye tbojanimpadá chabe bembetëmbentšana bacna bayëja chabuatabocnama. <sup>27</sup> Pero Jesús tbojanianya: —Atše šondmëna natsana judío entšangbiamajchë soyënga jamana; chentšana cocayé chanjobenaye chca inÿe entšangbiamajmana. Atše acbiamaj, canye ndoñe judiá, soyënga stjamese, nántsemna mo chë básengbe saná quešënga cuaftsëbuajocá ca.

<sup>28</sup> Y cha tbojanjuá: —Arseñor, chca jtsemnana. Pero chë quešëgnaca mondbase chë básenga tmojtšesá ora tmojatquëcjanatemënga. Chcasna, Diosmanda átšnaca šmotsajabuache ca.

<sup>29</sup> As Jesús tbojanianya: —Tšabá tcjayana; chcasna, acbe yebnoye motsatoñe. Chë bacna bayëja acbe bembetëmbentšana tonjësebcna ca.

<sup>30</sup> Chentšana, chë shembása chabe yebnoye tojtaná, y tbojáninyena chë bembetema jutsněshentše yojtsojájõe, y chë bacna bayēja ya ndõe chábeñe yontsemna.

*Jesús, canye boyabása těsmá y nděbiábioye tbojanshná*

<sup>31</sup> Tiro pueblentšana Jesús tojěftsanbocna, y Sidón y Decápolis luarentša pueblěnguějana jachněnguse, Galilea uafjájónayoye tojánashjango. <sup>32</sup> Cha chentše yojtsemna ora, chábioye tmojanánatse canye entśá těsmá y nděbiá, y tmojanimpadá chabe cucuatšěnga chë šocábeñe chaojájoma, chaboshnama. <sup>33</sup> Chorna Jesús entśángbentšana luaroye tbojanánatse, cányata. Chora chë šocabe matscuašoye ntšabuafjěnga yojajué, cucuatšiñe yojabuashětjo, y chë šocabe bichtaja yojábojajo. <sup>34</sup> Chentšana, Jesús celoye tojanontješé, jabuache yojáshachna, y hebreo palabriñe tbojaniyana: “¡Efata ca!” (Chca endayana “¡Chacmotsauenana ca!”)

<sup>35</sup> Cachora, chë boyabásabe matscuaše tšabá yojtsatsměna y tšabá yojtsuenana; chë bichtaja tšabá yojtóbema y tšabá yojtsóyebuambnaye. <sup>36</sup> Y Jesús chë entśanga tojanaměndá chama ndocnábeñe ntsecuěntayana. Pero masque tša chama yojtsaměndaye, entśanga más chabiamama imojtsencuěntaye. <sup>37</sup> Chama chë entśanga puerte imojtsenjanaye, y měntśá imojtsichamo: “¡Lempe tšabá entsama! Chë těsměnga chamouenama, y chë nděbianga chamóyebuambama entsama ca.”

## 8

*Jesús canta uaranga entśanga saná tojanacaredadó*  
(Mt 15.32-39)

<sup>1</sup> Chë tempo, ba entśanga Jesúsbioye cachiñe tmojanobeconá, y jasama tondaye imontsebomna. As Jesús chabe uatsjěndayěnga tojánachembo y tojaněyana: <sup>2</sup> —Quem entśangbiamama šontsengmena, er ya unga te átšeftaca montsemna y mora jasama tondaye quemátsbomna. <sup>3</sup> Cachěngbe yebnoye tondaye ntjascá stichamuase, shěntsama benachějana nantsabuátěcja; y báseftanga bën luarocana tmojabo ca.

<sup>4</sup> As chabe uatsjěndayěnga tmojaniyana: —¿Ntšamo nda nanjobenaye quem luarentše, ndocna entśá ndoyenentše, chěfta entśangbiamama saná jiněyename ca?

<sup>5</sup> Chora cha tojanatjá: —¿Bueta tanděše šmojtsebomna ca?  
Y chěnga tmojanjuá: —Canysěftaše ca.

<sup>6</sup> Chentšana, Jesús tojanaměndá entśanga chamoshěntsjatbiamama. Chorna, chë canysěfta tanděše tojanca y Běngbe Bětsábioye chama tbojtanchuá. Chentšana tojanjatá, chabe uatsjěndayěnga tojanějatá, y chěngna chë

entsángbioye. <sup>7</sup> Básefta beonatémēngnaca imnabomna; as Jesús, Bēngbe Bētsábioye chama tbojtanchuá y chabe uatsjéndayēnga tojanamēndá entsānga jujátayama. <sup>8</sup> Nýetscanga tmojanse jtoshachaye nýetsá. Chentšana cabá canýsēfta bēts sbarēcua tmojanajutjé chē ojamnētémēngaca. <sup>9</sup> Chē tmojansēnga imojamna mo canta uaranga nýetsá. Chentšana Jesús chē entsānga tojtanadiošoftá. <sup>10</sup> Chora Jesús barquēshañe tojánenojayiye chabe uatsjéndayēngaftaca, y tmojtsanoñe Dalmanuta ca uabaina luaroye.

*Chē fariseunga tmojánbošena, Jesús chaoma canýe bēts soye, chabe ndegombre obenana jinýama*

*(Mt 16.1-4; Lc 12.54-56)*

<sup>11</sup> Chentšana, fariseunga tmojánabo y tmojanontsé Jesúseftaca enatsētsnayana. Y jisháchichiyama, imojtseim-padana canýe bēts soye chaoma, as jtsetatšēmbuama Jesusbe obenana Bēngbe Bētsábiocana ndegombre tainóbocanama. <sup>12</sup> Y Jesús ngménaca, jabuache yojáshachnēse, mēntšá tojánayana: “¿Ndáyeca tšēngaftanga, chē mora oyenēnga, šmojtseboše canýe bēts soye chaimama tšēngaftanga atšbe obenana jinýanýiyama ca? Ndegombre cbéyana, quem entsānga ndocna chca soye quemochátinýe ca.”

<sup>13</sup> Chorna chē entsānga cachcá tojesanēnyá, chē barquēshoye yojtamáshēngo, y uafjónayē chenguana yojtsoñe.

*Jesús tojanabuayená fariseungbe buatēmbana soyēngama*

*(Mt 16.5-12)*

<sup>14</sup> Chē uatsjéndayēnga yojésebnētjomba ndaye soye jasama jesocñama, y chē barquēshoye nýe canýe tandēse imojtse-bomna. <sup>15</sup> Jesús tojanéyana: —Smochtsantješna; cuedado šmochtsebmoma fariseunga y Heródesbe lewadurama ca.

<sup>16</sup> Chora chē uatsjéndayēnga tmojanontsé enatsētsnayana: — Chca entsichamo, bēnga tandēse ndoñe tmonjesocñama ca.

<sup>17</sup> Jesús yojtsetátšēmbo, chabe uatsjéndayēnga imojtsejuab-naye chana tandēšama yojsētsētsnaye ca; pero ndegombre chana yojsóyebuambnaye ndayá ntšamo fariseunga y Herodes bacna soyēnga jtsamēse imojoyenama. Chcasna, mēntšá tojanéyana: —¿Ndáyeca tandēšama šmojtsoyebuambná? ¿Cabá ndoñe cmontsēsertana, ni šmontsetátšēmbo? ¿Ainanoca ndoñe šmontseboše chacmésertama? <sup>18</sup> Bominye šmondobomna, pero ndoñe quešmátobena jinýana; jouenama šmondobena, y ndoñe quešmátuenana, y ndayá tijamama ndoñe quešmatsjuabná. <sup>19</sup> Chē shachna uaranga entsānga shachna tandēsentšana sēnjanējatá chentšana, ¿bueta sbarēcua chē ojamnētémēngaca šmēnjanajutjé ca? —cha tojanatjá.

Y chënga tmojanjuá: —Bnëtsana utácuca ca.

<sup>20</sup> —Y chë canÿsëfta tandësentšana canta uaranga entšanga sënjanëjatá chentšana, ¿bueta bëts sbarëcuca chë ojamnëtémeŋgaca šmëñjanajutjé ca?

Y chënga tmojanjuá: —Canÿsëftácuca ca.

<sup>21</sup> As Jesús tojanëyana: —¿Y cabá ndoñe cmontsësertana ca?

*Jesús canÿe jtanábioye tbojanshná, Betsaida puebloca*

<sup>22</sup> Chentšana tmojánashajna Betsaida puebloca; y chora, entšanga canÿe boyabása jtaná Jesúsbioye tmojanánatse, y tmojanimpadá cha jabojuana chabotseshnama. <sup>23</sup> As, chë jtanábioye tbojanábuacuashache, y chë pueblo chaboje tbojanánatse. Chorna, yebuáyeca ibojabuchanëtjo, y chábeñe cucuatšënga yojajájua, y tbojantjá nderado ndayá jinÿama tayojtsanobena ca. <sup>24</sup> As chë jtaná yojontješiye y tojánayana: —Boyabásenga sentsënÿa; mo betiyëngcá montsemna, pero montsobonjná ca.

<sup>25</sup> Chora Jesús, chë jtanabe fšnëbeñe cachiñe cucuatšënga yojajájua. Y chë boyabása yojtsobena lempe tšabá jinÿama; ya shnaná yojtoquéda. Y yojtsobena nÿetsca soyënga botamana jinÿana. <sup>26</sup> Chentšana, Jesús cachabe yebnoye tbojtanichmó y mëntsá tbojaniyana: —Chë pübloye ndoñe catjëftsamashëngo ca.

*Pedro tojánayana, Jesús chë Cristo bëtsemnama*

*(Mt 16.13-20; Lc 9.18-21)*

<sup>27</sup> Chentšana, Jesús tojánbocna chabe uatsjëndayëngaftaca Cesarea de Filipo luaroca püblëngoye, y benachiñe chabe uatsjëndayënga tojanatjá: —¿Nda atše bëtsemnama ca entšanga imojtsichamo ca?

<sup>28</sup> Y chënga tmojaniyana: —Inÿenga montsichamo Juan chë Ubayaná ca, ínÿengna Elías ca, y ínÿengna, canÿe Bëngbe Bëtsabe juabna oyebuambnayá ca.

<sup>29</sup> As Jesús tojanatjá: —Y tšëngaftangna, ¿nda atše bëtsemnama ntšamo šmochjayana ca?

Y Pedro tbojanjuá: —Acna chë Cristo condmëna, chë Bëngbe Bëtsabe Uámana Uabuayaná ca.

<sup>30</sup> Chentšana Jesús corente chënga tojanamëndá, chë nda cha yojamnama ndocnábeñe ntsecuëntayana.

*Jesús tojánayana cha ibojamna jóbanana y jtsayenana ca*

*(Mt 16.21-28; Lc 9.22-27)*

<sup>31</sup> Y Jesús tojanontsé chabe uatsjëndayënga jabuátambana, cha, chë Bëngbe Bëtsá Entšá tbojanbemá, ibojamna puerta jasúfriana ca; chë judiëngbeñe bëtsëjemëngcá amëndayëngbiama, chë judiëngbe más uámana bachnangbe amëndayënga y ley abuátambayëngbiama uabotená jtsemnana



ca. Entšanga mochjanóba, pero unga tianoye yochtanayena ca. <sup>32</sup> Njëtscanga catafjosertaycá chama yojtsoyebuambnaye. As Pedro, Jesúsbioye luaroye tbojanánatse, y tojanontsé jtsáuyanana. <sup>33</sup> Pero Jesús yojobuértana, chabe uatsjéndayënga tojanënyänyé, y Pédrëbioye mëntšá tbojtsanbochembo: “¡Satanás, átšbentšana mojuaná! Pedro, acbe juabnënga Bëngbe Bëtsábiocana ndoñe quenatóbocana, sinó nÿe entšángbentšana ca.”

<sup>34</sup> Chentšana, Jesús chabe uatsjéndayënga y chë inÿe entšanga tojánachembo chamouenama, y tojanëyana: “Nda atšbe uatsjendayá jtsemnama tojtseboše, cháuyana nÿe Bëngbe Bëtsá yobena sempre chabe vidiñe jtsemándayana ca, chabe quem luarentša soyënga cachcá chauesonÿá atše juastama, y atšbiamá jasúfriama chaotseprontana y cruciñe jobanámnaca. <sup>35</sup> Nda tojtsama quem luarentše bëtscá soyënga jtsebomnama y atšbiamá jasúfriama ndoñe tontseprontana, chë nÿetsca tescama yomna tšabe vida echanjopërdia. Pero nda quem luarentša soyënga cachcá tojëftsonÿá atše juastama, y chë tšabe noticiënga atšbiamá abuátambaye causa, masque chaóbana, chë nÿetsca tescama yomna tšabe vida echántsebomna. <sup>36</sup> ¿Ndayama entšá buanjósërvia nÿetsca quem luarentša soyënga jtsebomnana, chë nÿetsca tescama yomna tšabe vida tojtsoperdese? <sup>37</sup> Er canÿe entšá chë nÿetsca tescama yomna tšabe vida tojtsoperdese, ndocna soye quenátsmëna cha chaobená joyiyama, chë nÿetsca tescama yomna tšabe vida jtsebomnama. <sup>38</sup> Chcasna, nda mora atšbiamá y atšbe buayenana soyëngama tojtsëuatja entšángbeñe, chënga chë Bëngbe Bëtsábiamá nduauenanënga y bacna soye amënga, chë Bëngbe Bëtsá Entšá tbojanbemánaca chabiamá echantsëuatja, chabe Taitabe bëtš obenánaca y chabe angelëngaftaca chaojésabo ora ca” —cha tojanëyana.

## 9

<sup>1</sup> Mëntšánaca Jesús tojanëyana: “Ndegombre cbëyana, báseftanga muentše montsemnënga ndoñe quemochatóbana, Bëngbe Bëtsá entšángbeñe chabe obenánaca jabomándama jabana ntjëftsinÿcá ca.”

*Jesús inÿetšá tojanobinÿná*  
(Mt 17.1-13; Lc 9.28-36)

<sup>2</sup> Chentšana chnënguana tianoye, Jesús tojëftsanëbiatše Pedro, Santiago y Juan, y inÿoye tojanënatse nÿe chënga, canÿe bëtš tjoye. Y chëngbe delante Jesús inÿetšá tojanobinÿná; <sup>3</sup> chabe uichëtjonëjuangá tša yojtsabuashinÿinÿana; corente uafjantsëjuangá yojtsamna; nÿa chca juafjantsama ndocná quem luarentše quentatobenaye. <sup>4</sup> Chca orna, chë

uatsjéndayënga tmojáninÿe, Moisés y Elías tbojanobinÿná Jesúseftaca encuéntaye.

<sup>5</sup> Chora Pedro, Jesúsbioye tbojanियana: “¡Buatëmbayá, tša tšabá bëngbiamá cuanmëna muentše jtsemnana ca! Mora fchanjapórma unga tambotémënga: cánÿetema acbiamá, ínÿetema Moisesbiamá y ínÿetema Elíasbiamá ca.”

<sup>6</sup> Chca tojánayana, chë uatsjéndayënga yapa auatjanánënga imojtsemna causa, y Pedro ndoñe yontsetátšëmbo ntšamo jayanana. <sup>7</sup> Chora canÿe jantšetëshe yojóbema, y chëngbioye yojáutsbotse; y chë jantšetëshoicana canÿe oyebuambnayana tojanóbcna, mëntšá: “Mua atšbe bonshana Uaquiñá endmëna; cha šmochtseyeunana ca.”

<sup>8</sup> Y ndeolpe, chëngbe shëconana tmojanrrepará ora, ya ndocná más tmonjáninÿe; nÿe Jesús canÿa chëngaftaca yojtsemna.

<sup>9</sup> Chë tjocana imojtsatstsmaye ora, Jesús chë uatsjéndayënga tojanamëndá: —Bëngbe Bëtsá Entšá tbojanbemá obanënguentsana candëtayenëntscuana, chë mënté tjoca šmonjinÿe soyama ndocnábeñe šmattsecuéntaye ca.

<sup>10</sup> Chë uatsjéndayënga aíñe chca tmojanuena; pero chënga imojtsentjanaye ndayá cha yojtsentšáyana, cha yochtanayena ca cha tojánayana ora. <sup>11</sup> Y Jesúsbioye imojtsetjanaye: —¿Ndáyeca chë ley abuátambayënga mondbétsichamo, canmëna Bëngbe Bëtsabe Uámana Uabuayanabe natsana Elías jabana ca?

<sup>12</sup> As cha tojanëjua: —Ndegombre, canÿa Eliascá natsana echanjabo, y ntšamo jtsemnama yomncá lempe echánjabatsma. Pero ntšamo Bëngbe Bëtsabe uabemana palabrenguiñe endayancana, Bëngbe Bëtsá Entšá tbojanbemá puerte caochjasúfria, y ínÿenga puerte camochtsáboyënja ca.

<sup>13</sup> Ndegombre cbëyana, canÿa Eliascá ya tonjabo, y cháftaca entsanga tmonjanma lempe ntšamo tmojabošencá, ntšamo chaochnënguama Bëngbe Bëtsabe uabemana palabrenguiñe endayancá.

*Jesús, canÿe basa bayëjbe juabna uambayábioye tbojanshná (Mt 17.14-21; Lc 9.37-43)*

<sup>14</sup> Chentsana, chënga tmojtaná chë inÿe uatsjéndayëngbioye. Chora, Jesús tojáninÿe ba entsanga chë uatsjéndayëngbe shëconana imojtsemnama, y básefta ley abuátambayëngna chëngaftaca imojtsenatsëtsnaye. <sup>15</sup> Nÿetsca entsanga cha tmojáninÿe ora, imojenjnaná y tmojanótjajo cha jachuayama.

<sup>16</sup> Chora Jesús chënga tojanatjá: —¿Ndayama chëngaftaca šmenatsëtsná ca?

<sup>17</sup> Y canÿa entšanguentsá tbojanjuá: —Buatëmbayá, muentše ácbioye sënjuánatse atšbe uaquiñá; bacna bayëjbe juabna entsambá, y chë causa, jóyebuambayama ndoñe

quenátobena. <sup>18</sup> Nýe ndayéntsñaca cha tojtsemnentše, chë bayëja chábioye jishachana y jtsenajuáchesënjana; chentše uayoicana shashiye jtsabocanana, jtsenofhtëšfjojnayana y obanacá jtsatsjájonana. Acbe uatsjéndayënga sënjaimpadá chë bacna bayëja chamuatábocnama, pero ndoñe chematobená ca —cha tbojaniana.

<sup>19</sup> As Jesús tojánayana: —¡Nýetsá ndošbuáchiyënga ca! ¿Buetayté šojtsemna tšëngaftangaftaca jëftsemnana? ¿Buetayté uantado tšëngaftangaftaca chjëftsemna? ¡Moye chë básetema mánatse ca!

<sup>20</sup> Chora chë básetema chábioye tmojanánatse; y chë bayëja Jesúsbioye tbojáninýe ora, tojanma chë basa ataque chaboshachama, y chë basa fshantsoye yojashajaye, yojtsojan-duounaye y uayoicana shashiye yojtsábocana. <sup>21</sup> As Jesús chë básabe taitábioye tbojantjá: —¿Buetayté chca yojtsepása ca?

Y cha tbojanjuá: —Básetema orscana chca; <sup>22</sup> ba soye, chë bayëja chábioye iñoye jtsatmetšana y buyeshoye jtash-buetšana, jtsóbama. Chíyeca, nderado ndayá chabiamama jamama tcojtsobenëse, bënga šmotsalastemá y šmotsëjabuache ca.

<sup>23</sup> Chora Jesús tbojaniana: —¿Ndáyeca “ndayá jamama tcojtsobenëse ca” šcjauyana? Nda Bëngbe Bëtsábeñe tojtsošbuáchebiamama lempe endopodena ca.

<sup>24</sup> Y cachora chë básabe taitá tojanáyebuachena: —Aíñe, Bëngbe Bëtsábeñe sëntsošbuaché; Diosmanda, ¡más jtošbuáchiyama šmajabuache ca!

<sup>25</sup> Y bëtsá entšanga imojtsótotoma Jesús tojáninýe ora, chë bacna bayëja tbojtsanbochembo mëntsá: —¡Bacna bayëja, chë básetema tësmá y ndëbiá biamnayá; chábentšana maisebocna y ndocna te más chábeñe catjésamashëngo ca!

<sup>26</sup> Y chë bayëja chábentšana yojésebocna, yojtseyoye y chë básabioye jabuache ibojeseshatiyiyé; y chë básana mo obanacá tojanoquedá, y chë causa banga imojtsichamo cha obaná yojtsemna ca. <sup>27</sup> Pero Jesús tbojanábuacueshache y tbojtanatsbaná; y chë básana yojtëtsaye.

<sup>28</sup> Chentšana, Jesús canýe yebnoye tojánamashëngo, y chabe uatsjéndayëngna luaroca cha tmojantjá: —¿Ndáyeca bënga ndoñe fsënjobená chë bayëja jtabocnana ca?

<sup>29</sup> Y Jesús tojanëjua: —Chca bayëjënga jtëbuacanamna jobenayana nýe Bëngbe Bëtsáftaca jencuéntase, chabuájabuachama jaimpádase ca.

*Jesús cachiñe tojánayana cha ibojamna jóbanana y jtayenana ca*

*(Mt 17.22-23; Lc 9.43-45)*

<sup>30</sup> Chentšana tmojëftsanbocna ora, Galilea luarëjana imojtsajna; y Jesús yojtseboše chama ndocná

chaondétsetatsëmbuama, <sup>31</sup> er cha chabe uatsjédayënga yojtsabuátambaye. Mëntsá cachabiana yojanëtsësnaye: “Bëngbe Bëtsá Entsá tbojanbemá entsangbe cucuatšiñe mochanjáboshjona; mochanjóba, pero chentšana unga tianoye echántayena ca.”

<sup>32</sup> Pero chënga ndoñe yontsósertana ntšamo Jesús yojtsanëtsësnacá, y chama jatstjanayamna chënga imojtsauatja.

*¿Nda chë más uamaná yomna?*

*(Mt 18.1-5; Lc 9.46-48)*

<sup>33</sup> Chora Capernaum puebloye chënga tmojánashjajna; y cach yebnentše imojtsemna ora, Jesús chë uatsjédayënga tojanatjá: “¿Ndayama benachiñe šmabáyenatsësnaye ca?”

<sup>34</sup> Chëngna nýe iytëca tmojanobiama, er benachëjana chënga imnayénatsësnaye, chënguentšá nda chë más uamaná bëtsemnama. <sup>35</sup> As Jesús tojanótbema, chabe bnëtsana uta uatsjédayënga tojánachembo y tojanëyana: “Ndánaca nýetscangbiana chë más uamaná jtsemnama tojtsebošëse, cha chë más nduamaná chaóbema y nýetscanga chaotsaserverna ca.”

<sup>36</sup> Chora Jesús canýe básetema tbojánishache, chëngbe tsëntsaca tbojanatsá, tbojantbá y chënga tojanëyana: <sup>37</sup> “Ndánaca, átšbeñe ošbuachiyá bëtsemnayeca, tbojofja canýa mo quem basetemcá, chana atše jofjana; y nda atše šojofja, chora cha nýe atše ndoñe ntjofjana, sinó chë šojichmó chábioynaca jofjana ca.”

*Nda ndoñe bëngbe contra tontsemná, bëngaftaca jtsemnana*

*(Mt 10.42; Lc 9.49-50)*

<sup>38</sup> Juan, Jesúsbiroye tbojaniana: —Buatëmbayá, bënga fsënjinye canýe boyabása, y cha aca jótšëmbonëse, bacna bayëjbe juabna entsángbentšana endëtëbuacana; pero cha bëngaftaca ndoñe quenátsmëna causa, chama fsënjesauyaná ca.

<sup>39</sup> As Jesús tbojanjuá: —Ndoñe šmatjuauyaná; er ndocná quenátobena canýe bëts soye jamana Bëngbe Bëtsabe obenánaca, atše jótšëmbonëse, y chentšana átšbe contra jatóyebuambnayana. <sup>40</sup> Ndegombre, nda ndoñe bëngbe contra tontsemná, bëngaftaca jtsemnana. <sup>41</sup> Y ndánaca, masque nýe býeshtema tšëngaftanga tcmojubuatšatá, tšëngaftanga átšbënga bëtsemnayeca, chábiroye Bëngbe Bëtsá canýe uacanana soye bochántatšetaye, cha chë tšabe soye tojamama ca.

*Resjo yomna, nderado bacna soyënga cuanjama*

*(Mt 18.6-9; Lc 17.1-2)*

<sup>42</sup> Chentšana Jesús tojánayana: “Canýa átšbeñe ošbuachiyábroye mo quem basetemcá, nda tbojaingñe atše ustonama chaotsajbanama, más tšabá chabiana nántsemna

canÿe bĕts nantsnĕbé chamotsetamošĕntšbua y mar bĕjayoye asentoye chamotsashbuetše chabotsenatjĕmbama. <sup>43</sup> Nderado acbe cucuatšeca bacna soye tcojama, más tšabá nántsemna chĕ cucuatše chacotsenacuéstjango. Acbiama más tšabá endmĕna celoye jamashĕnguana nÿetsca tescama vida jtsebomnama, nÿe canÿe cucuatše bomná, y ndoñe nÿets útatšeca infiernoye chacmotocá jama, chĕ ndocna te yochanjáfsana íñeshoye; <sup>44</sup> choca útšenĕnga puerte nÿetsca tescama mochanjasúfria. Chĕngbioye mochtsasaye mamanga ndocna te quemochatóbana, y chĕ íñeshe ndocna te queochátsfsana.

<sup>45</sup> “Nderado acbe shecuátšeca bacna soye tcojama, acbiama más tšabá nántsemna chĕ shecuatše chacotsenashecuástjango. Acbiama más tšabá endmĕna cosheto celoye jamashĕnguana nÿetsca tescama vida jtsebomnama, y ndoñe nÿets útatšeca infiernoye chacmotsĕtsena; <sup>46</sup> choca útšenĕnga puerte nÿetsca tescama mochanjasúfria. Chĕngbioye mochtsasaye mamanga ndocna te quemochatóbana, y chĕ íñeshe ndocna te queochátsfsana.

<sup>47</sup> “Nderado acbe bomínÿeca bacna soye tcojinÿe y cachca soye tcojama, más tšabá nántsemna chĕ bominÿe chacotsenobuchjátsĕca. Acbiama más tšabá endmĕna Bĕngbe Bĕtsabe amĕndayoye jamashĕnguana nÿe canÿe bominÿe bomná, y ndoñe nÿets útabeca infiernoye chacmotsĕtsena; <sup>48</sup> choca útšenĕnga puerte nÿetsca tescama mochanjasúfria. Chĕngbioye mochtsasaye mamanga ndocna te quemochatóbana, y chĕ íñeshe ndocna te queochátsfsana.

<sup>49</sup> “Tamó tšabe soye endmĕna. Ntšamo chĕ tamó canÿe tšabe soye endmĕncá, Bĕngbe Bĕtsá echanjama nÿetsca tšĕngaftangbiana tšábenga chašmotsemnama, chĕ átšbeñe betsošbuáchema šmojtsepadecena ora šmojauantase. <sup>50</sup> Tamó tšabe soye endmĕna. Pero chĕ tamó fténana tojtsóbemĕse, ndoñe quešmátobena jamana cachiñe chabe tempsca sanana chaotsatsbomnama, ni saná jatamuama. Mo tšabe tamocá entšangbiana šmochtsemna, chĕngbeñe jtsiyenĕse ntšamo Bĕngbe Bĕtsá yobošcá, y nÿetscángaftaca natjĕmbana šmochtsiyena ca” —cha tojánayana.

## 10

*Ndayá Jesús tojanabuatambá bouamnĕnga tmojtšenĕtsenama*

(Mt 19.1-12; Lc 16.18)

<sup>1</sup> Chentsana, Jesús chĕ luarentšana tojĕftsanbocna y tojána Judea luaroye y Jordán chenguana. Entšanga cachiñe chábioye tmojánabo, y cha chĕnga yojtsabuátambaye, chĕ

ntšamo jamana yojanamancá. <sup>2</sup> Básefta fariseunga chábioye tmojanobeconá, y jisháchichiyama mēntšá imojtsetjanaye: —¿Queojtselesenciana canye boyá chabe shémbioye cachcá jesonÿayama ca?

<sup>3</sup> Chora cha tojanějua: —¿Ntšamo Moisés chē soyēngama tcmēnjanamēndaye ca?

<sup>4</sup> Y chēnga tmojánayana: —Moisés tojanalesenciá chē boyá chabe shémbioye chabuiyé canye tsbuanácha, ndayéchañe chaotsayana cha ya ndoñe chabe shema yontsemna ca, y chora cachcá chabe shema chabuesonÿá ca.

<sup>5</sup> Chora Jesús tojanějyana: —Tšēngaftanga Bēngbe Bētsabe mandēnga ainaniñe jóyēngacñama ndoñe quešmátsboše causa, Moisés chca tšēngaftanga tcmojēftsanamēndá. <sup>6</sup> Pero quem luare jobojátšama orna, “Bēngbe Bētsá canye boyabása y canye shembása tonjánabiama. <sup>7</sup> Chíyeca, chē boyabása chabe taitá y chabe mamá echanjésabashejuana, chabe shēmaftaca jenútanama, <sup>8</sup> y chē útatna mo canÿacá bochántsemna.” Y chca, ya ndoñe útata quebochátsmēna, sinó nÿe mo canÿacá. <sup>9</sup> Chcasna, entšá ndoñe chaondēndbema ndayá Bēngbe Bētsá mo canÿiñcá tojēftsema soye ca —cha tojánayana.

<sup>10</sup> Ya cach yebnoca imojtsatsmēna ora, chabe uatsjēndayēnga cach soyama imojtētstjaye. <sup>11</sup> Y Jesús tojanějyana: “Nda chabe shémbioye cachcá tbojesonÿá y ínÿaftaca tojtóbouamase, cha chē natsana shémbioye inÿe shembásaftaca jtseíngñayana; chana canye uabuatmá jtsebomnana. <sup>12</sup> Y chē shema chabe boyábioye cachcá tbojesonÿá, y ínÿaftaca tojtóbouamase, chánaca chē natsana boyábioye ínÿaftaca jtseíngñayana; canye uabuatmá jtsebomnana ca” —Jesús tojánayana.

*Jesús, basetémēngbiama Bēngbe Bētsábioye tbojanimpadá  
(Mt 19.13-15; Lc 18.15-17)*

<sup>13</sup> Entšanga, basetémēnga Jesúsbioye tmojanēnatse, chauabájajuama y Bēngbe Bētsábioye chēngbiama chaboimpadama; pero chabe uatsjēndayēngna tmojanontšé chē basetémēnga unachayēnga jtsēcácanana. <sup>14</sup> Jesús chca tojáninÿe ora, tbojánetna y chē uatsjēndayēnga tojanějyana: “Cachcá mónÿaye chē basetémēnga átšbioye chamuabo y ndoñe matēuyanana; er Bēngbe Bētsabe amēndayana endmēna chē mo quem basetemēngcá imomnēngbiama. <sup>15</sup> Ndegombre cbēyana, nda Bēngbe Bētsabe soyēnga ndoñe tonjóyēngacñe mo canye basetemcá jtsošbuáchiyēse, cha ndoñe queochatobenaye Bēngbe Bētsabe amēndayoye jamashēnguama ca.”

16 Y chë basetémënga tojanchebá, y chëngbeñe cucuatšënga jajájuase, Bëngbe Bëtsábioye tbojanimpadá tšabe ben-dicionënga chëngbeñe chaotsemnama.

*Canÿe bomna entsá Jesúsbioye tojána*  
(Mt 19.16-30; Lc 18.18-30)

17 Jesús jama tojtëtanontsé ora, canÿe boyabása chábioye tojanótjajo, chabe shecuatšëntše tojanoshëntsamentšé, y mëntšá tbojantjá: —Tšabe Buatëmbayá, ¿ndayá šojtsemna jamana chë nyetsca tescama yomna tšabe vida jtsebomnama ca?

18 Y Jesús tbojanjuá: —¿Ndáyeca “tšabia ca” šcjauyana? Tšabia nÿe canÿa endmëna: Bëngbe Bëtsá. 19 Aca icotátšëmbo Bëngbe Bëtsá tojanmandacá: “Ndoñe catjóba, acbe shema ínÿaftaca ndoñe cattseíngñaye, ndoñe catjatlëba, ndoñe catjuaboínÿena, ínÿengbioye ndoñe catjáingñaye ndayánaca jabacama, y acbe bëtsëtsata ndoñe stëtšoye catjáquedaye ca.”

20 Chora chë boyabása tbojanjuá: —Buatëmbayá, atše lempe chë mandënga básetema orscana sëndocumplina ca.

21 Jesús bonshanánaca tbojanonÿinÿé y mëntšá tbojaniyana: —Canÿe soye cmontsebuáshbena jamana: Motsa, lempe ntšamo icobomncá cochjetsatobuiye, y chë crocénana, ndbomnjémënga cochtsatšataye; chca, celoca canÿe bëts bomnana cochántsebomna. Chentšana, cochjabo y šcochjuasto ca.

22 Pero chë bobóntsbioye inÿetšá ibojtsínÿnana Jesús chca tbojaniyanama; y puerte ngménaca yojtá, cha puerte bomná inamna causa.

23 Chora Jesús cátoye tojanrrepará y chabe uatsjéndayënga tojanëyana: —¡Puerte totcá entsemna bomnëngbiama Bëngbe Bëtsabe amëndayoye jamashënguama ca!

24 Chca imojouena ora, chë uatsjéndayënga ojnánánënga imojtsemna, pero Jesús cachiñe tojanoyebuambá y mëntšá tojanëyana: —Atšbe básenga; ¡puerte totcá entsemna Bëngbe Bëtsabe amëndayoye jamashënguama! 25 Ndegombre, más paselo endmëna chë coshufjentša atëfjnëjana canÿe camello chauachnëngo, y ndoñe canÿe bomná Bëngbe Bëtsabe amëndayoye jamashënguana ca.

26 Pero chë uatsjéndayënga nÿe más imojtsenjnanaye y imojtsentjanaye: —¿As, nda yochjobenaye atsbocaná jtsemnana ca?

27 Chora Jesús tojanënÿanÿé y tojanëyana: —Entšanga ndoñe quemátobena jamana canÿa atsbocaná chaotsemnama, pero Bëngbe Bëtsá aíñe; er Bëngbe Bëtsá lempe jamama endobena ca.

28 Chora Pedro tbojaniyana: —Aca contsonÿá, bënga lempe chë fsëndbomna soyënga fsënjéshojona y áaftaca fsëntsjana ca.

29 As Jesús tojánayana: —Ndegombre cběyana, ndánaca átšbioye jaserviama y chě tšabe noticiēnga jábuayenama, tojéseboshjona chabe yebna, catšátanga o uabénanga, bebmá o befta, o básenga, o fshantsēnga, <sup>30</sup> cha mora quem luarentše echanjójyēngacñe chama patse soye más yebnēnga, catšátanga, uabénanga, bebmanga, básenga y fshantsēnga, masque puerte chaosufrima ínŷenga mochántsama; y chě inŷe luarocna, chě nŷetsca tescama yomna tšabe vida echanjónŷena. <sup>31</sup> Pero banga, mora uámanēnga imomnēnga, nduámanēnga mochántsemna; y banga, mora nduámanēnga imomnēngna, uámanēnga mochántsemna ca —Jesús tojánayana.

*Jesús cachiñe tojánayana cha jóbana y jtayenama*  
(Mt 20.17-19; Lc 18.31-34)

<sup>32</sup> Chentšana Jerusalenoye imojtsaye, y Jesús yojtsebnatsana. Chě uatsjéndayēnga puerte ojnanánēnga imojtsemna, Jesús ndauatjá choye yojtsayama; y inŷe becá entšanga ústonoye imojtsajnēngna, imojtsayáuatja. Jesús cachiñe chabe bnětsana uta uatsjéndayēnga barie tojánachembo y tojanontšé jáuyanana ntšamo cháftaca jopásama yojtsemnana. <sup>33</sup> Měntšá tojaněyana: “Tšēngaftanga šmontsonŷá, Jerusalenoye bēnga mora montsajnama. Chocna, chě Bēngbe Bětsá Entšá tbojanbemá, chě bachnangbe aměndayēnga y ley abuátambayēngbe cucuatšiče mochanjáboshjona, y chēnga mochanjayana cha chaóbana ca; y ndoñe judiēngbe cucuatšiče mochanjáboshjona. <sup>34</sup> Chēnga mochantsáboyejuana, mochántsebuashětoto, mochántsetjanja y mochanjóba, pero chentšana unga tianoye cha echántayena ca.”

*Santiago y Juan, Jesús tmojanimpadá canŷe pavor cháuabiamama*  
(Mt 20.20-28)

<sup>35</sup> Chora, Santiago y Juan, Zebedeobe uaquiñata, Jesúsbioye tbojanobeconá y tmojaniyana: —Buatēmbayá, bēndata fsěntseboše pavor chašcuabiamama ntšamo chacbojaimpadacá ca.

<sup>36</sup> Y Jesús tojanatjá: —¿Ndayá sojtseboše atše tsěndatbiamama ca?

<sup>37</sup> Y chata tbojaniyana: —Aca reycá chacojtsemánda ora, cochjaleséncia bēndata fchayobená jótbemana, canŷa acbe catšbioica y inŷa acbe uañicuayoica ca.

<sup>38</sup> As Jesús tojanějua: —Ntšamo šmontsotjanañama tsěndata ndoñe quešnátstatšēmba. ¿Ntšamo atše chaitsesufrincá, tsěndátnaca cachcá jasúfriama tašatjobenaye? ¿Y entšanga puerte bacá chacmojtšēbuatsená ora, tašochjauánta, ntšamo atše chjauantacá ca?



39 Y chata tbojanianyana: —Aíñe fchanjobenaye ca.

Y Jesús tojaněyana: —Ndegombre tsëndátnaca atšcá sochanjasúfria, y atšbe causa cmochántsamna bětscá soyěngama jasúfria. <sup>40</sup> Pero atše ndoñe quetsátobena jamándana nda atšbe catšbioica y atšbe uañicuayoica chaótbemama. Chë útentše entsemna ndēmuanjengbiana atšbe Taitá tojaprontacá ca.

<sup>41</sup> Chë inye bnětsana uatsjéndayěnga chca tmojanuena ora, tmojanontšé Santiago y Juánoftaca jotjáyana. <sup>42</sup> Pero Jesús nyetsca uatsjéndayěnga tojánachembo y tojaněyana: “Tšěngaftanga šmondětatsěmbo, quem luarentša aměndayěnga lempe jtsemándayana, nya mo nduiñěnga cuaftsemncá; y chë bětsetša entšanga chěngbe obenánaca jtsemándayana, ntšámnaca jtsaměse, chë inye entšanga sempre chamotsayaunanama. <sup>43</sup> Pero tšěngaftangbeñe ndoñe chca chaondětsemna. Inyetsá; masna, nda tšěngaftangbeñe chë más uamaná jtsemnama tojtseboše, cha bontsemna chë ín्यenga jtsaservénana; <sup>44</sup> y ndánaca tšěngaftanguentsá chë más uamaná jtsemnama tojtsebošá, bontsemna jtsemnana nyetscangbiana, mo nye ín्यabiana nyets tempo oservenacá. <sup>45</sup> Cachcá, Běngbe Bětšá Entšá tbojanbemá ndoñe chenátabo cha chamotseservénama, ndayá ín्यenga jabáserviama. Y mo nda, ín्यenga játsebacama cuafjopagacá, cha echanjóbana ba entšanga atsebácaněnga chamotsemnama ca” —cha tojánayana.

*Jesús canye jtanábioye tbojanshná  
(Mt 20.29-34; Lc 18.35-43)*

<sup>46</sup> Chentšana, Jesús y chabe uatsjéndayěnga Jericó uabaina puebloye tmojánashajna. Y Jesús chabe uatsjéndayěngaftaca y bětscá entšangaftaca Jericó pueblentšana yojtsaisebocana ora, Timeobe uaquiñá, Bartimeo ca uabainá, canye jtaná lemošna otjanañá, benache juachañe yojtsetbemana. <sup>47</sup> Y Jesús Nazaretocá chějana yojtsachnějuanama cha yojátatsěmbona ora, tojanontšé měntšá uayebuáchana: —¡Jesús, Davídbentšana Entšá, šmotselastemá ca!

<sup>48</sup> Chorna, banga chë jtaná imojtsácacana iytěca chaótbemama. Pero cha más yojtsáyebuache: —¡Davídbentšana Entšá, šmotselastemá ca!

<sup>49</sup> Chora Jesús tojantsá y chë ín्यenga tojaněyana: —Chë jtaná mochembo ca.

As chë jtaná tmojanchembo, y měntšá tmojanianyana: — ¡Añemo cochtsebomna; motsbaná! Jesús cmontsechembuana ca.

<sup>50</sup> Y chë jtaná, quefsaíya jtsenátsejquëse, yojontsënja y betscó Jesúsbióye yojobeconá. <sup>51</sup> Chora, Jesús chë jtanábióye tbojan-tjá: —¿Ndayá cojtseboşe atşe acbiama chjamama ca?

Y chë jtaná tbojanjuá: —¡Buatëmbayá, şmoleseñciá atşe chaşuatabínýnama ca!

<sup>52</sup> As Jesús tbojanianyana: —Motsatoñe. Tşabá jtsatsmënema Bëngbe Bëtsábeñe icoşbuachéyeca, tşabá contsatsmëna ca.

Y cachora cha tşabá ibojtabinýna, y Jesúsbióye benachëjana ibojtsëstona.

## 11

*Jesús Jerusalenoye tojánashjango*  
(Mt 21.1-11; Lc 19.28-40; Jn 12.12-19)

<sup>1</sup> Ya Jerusalenoye imojtsebeconá ora, Betfagé y Betania pueblënga béconana, Olivos ca uabaina tjashe juachañe, Jesús uta chabe uatsjëndayata tojanichamó, <sup>2</sup> y mëntsá tojanëyana: “Tsëndatbe natsana entsemna base pueblotémoye motsata. Chaşojáshjango y cachora şochanjínýena canýe burrotema utsbuaná; chábeñe cabá ndocná tonjenoyayé. Sochjuajafjoná y şochjuánatse. <sup>3</sup> Nderado nda, ¿ndáyeca şmojtsanachá ca? chacmojátjase, şochjojuá: ‘Bëngbe Utabná bontsájaboto y chora bochantabáiseboshjona ca.’ ”

<sup>4</sup> As chata tbojána, y tbojáninýena chë burrotema tsáshenañe, canýe bësáşañe utsbuaná, y imojuajafjoná.

<sup>5</sup> Y básefta entşanga chiñe imojtsemnënga, chátbióye tmojanëyana: “¿Ndayá şojtsama? ¿Ndayeca chë burrotema şojtsajafjná ca?”

<sup>6</sup> As chata tbojanjuá ntşamo Jesús tojanëyancá; y chë entşanga tmojanalesenciá chë burrotema chamuánatsama. <sup>7</sup> Chentşana, chë burrotema Jesúsbióye tmojanánatse; chë burrotëmbeñe chatbe entşayá tbojanájatse, y Jesús chábeñe tojanenoyayé. <sup>8</sup> Bëtscá entşanga chëngbe entşayá chë benachëjana imojtsanëtëtsatsana, y ínýengna chë jajoca imojuatëtsetşe buacuashangá chiñe imojuacjaye. <sup>9</sup> Y chë natsana imojtsajnënga y chë ústonoyënga mëntsá imojtsaiuáyebuache: “¡Bëngbe Bëtsá matschuanga! ¡Corente bendición bonná, chë Bëngbe Utabnabe obenánaca tojabá! <sup>10</sup> ¡Tşa tşabá chë echanjóshjango amëndayana, bëngbe bëts taitá David yojëftsemánda orcá! ¡Bëngbe Bëtsá celocá matschuanga ca!”

<sup>11</sup> Jesús Jerusalenoye tojánashjango, y Bëngbe Bëtsabe bëts yebnoye tojánamashëngo. Chabe şhéconana lempe yojëftserrepárase, y ya yojtseibétatana causa, chabe bnëtsana uta uatsjëndayëngaftaca tojëftsanbocna, Betania puebloye.

*Jesús tojánayana canye betiye ndoñe más chaondëshájona ca  
(Mt 21.18-19)*

<sup>12</sup> Yěfsana, Betaniocana Jerusalenoye chënga imojtésajna ora, Jesús tbojánishěntsená. <sup>13</sup> Běnocana canye higo betiye yojinýe; as tojána jontješiyama tainashajo o ndoñe. Pero nýe tsbuanáchënga chiñe yojínýena, chora ndoñe shajo tempo bétsemna causa. <sup>14</sup> As Jesús chë higo betiyoye tojánayana: “¡Ndocna te más chaondëshájona entšanga chamosama ca!”

Y chabe uatsjédayënga imojouena ntšamo cha tojanayancá.

*Jesús, Běngbe Bětsabe běts yebnentšana enënga y obuámnayënga  
tojtaněbuacna  
(Mt 21.12-17; Lc 19.45-48; Jn 2.13-22)*

<sup>15</sup> Jerusalenoye tmojánashjajnentšana, Jesús Běngbe Bětsabe běts yebnoye tojánamashëngo, y tojanontsé chentšana jtěbuacnana chë chentše imojtsena y imojtsobuámnnañënga. Chéntšnaca imojtsemna entšanga canye crocénana enënga, y chë crocénana nýe Běngbe Bětsabe běts yebnentšama inoservena. Chë entšanga crocénana atrocayëngbe mesëshangá tojtsanenásatajchquëca, y chë palomatémënga enëngbe tšeněšëgnaca; <sup>16</sup> y ndoñe tonjanalesenciá ndocná Běngbe Bětsabe běts yebnejana chë soyënga chaotsěchnějuanama. <sup>17</sup> Y tojanontsé entšanga měntšá jabuátambana: “Ndegombre, Běngbe Bětsabe uabemana palabrënguñe cha měntšá tojánayana: ‘Atšbe běts yebna echantsabaina nýetsca luarentša entšangbiana átšeftaca encuéntaye yebna ca’; pero tšëngaftangna atbėbanëngbe oyeñiñe chë yebna šmojtsebema ca” —Jesús tojanéyana.

<sup>18</sup> Chë bachnangbe más uámana aměndayënga y chë ley abuátambayënga tmojántatšěmbona ntšamo yojochněnguama; as tmojanontsé enójuabnayana ntšamo jobenayana cha jóbana, cha imojtsebiauatja causa, er nýetsca entšanga imojtsenjanayeye ntšamo cha yojanabuátambama. <sup>19</sup> Pero yojtseibétatana ora, Jesús chabe uatsjédayëngaftaca chë běts pueblentšana yojesóbocñe.

*Chë higo betiye tojtsanbuashá  
(Mt 21.20-22)*

<sup>20</sup> Yěfsana cachëse, cachějana imojtésachnějuana ora, tmojáninýe chë higo betiye parejo tbětějëngaca yojtsebuashá. <sup>21</sup> Chora Pedro yojenójuaboye ntšamo yojopásama; as Jesúsbioye tbojanianyana: —¡Buatěmbayá, minýe; chë tconjayana ndocna te más tšabe betiye chaotsemnama betiye tojtsebuashá ca!

22 Y Jesús tbojanianya: —Bëngbe Bëtsábeñe šmochtsošbuáchiye. 23 Ndegombre cbëyana, nderado nda quem tjoye tojyana, “¡chentsana mojuaná y bëts uafjajónayoye motsëshbuetše ca!” y chca tojyana ainaniñe inyetsá juabna ntjatsbomncá, y ainaniñe puerte tojtsošbuaché ntšamo tojayancá aíñe yochjochnënguama, ndegombre chca echanjochnëngo. 24 Chiyeca cbochanjáuyana, lempe ntšamo Bëngbe Bëtsáftaca chašmojtsencuénta ora chašmojtsotjanañama, ainaniñe corente šmochtsejuabnaye ya šmojóyëngacñe ca, y ndegombre chca šmochántsebomna. 25 Y Bëngbe Bëtsáftaca chašmojtsencuénta ora, šmochjenójuaboye nderado nda ndaye bacna soye tšëngaftangbiamama tojamama, y cháftaca cabá etonánënga šmojtsemnëse, šmochtseperdóna; chca, Bëngbe Bëtsá, celoca endmëná, tšëngaftangbe bacna soyëngama chacmotsaperdonama. 26 Pero inya ndoñe šmonjaperdonasna, Bëngbe Taitá, celoca endmëná, cach ndoñe tšëngaftanga quecmochátaperdonaye ca —cha tojánayana.

### *Jesusbe obenana*

(Mt 21.23-27; Lc 20.1-8)

27 Chca tojanopasá chentsana, Jerusalenoye chënga tmojesaná. Jesús Bëngbe Bëtsabe bëts yebnëjana yojtsobuertanëntscuana, chábioye tmojanobeconá bachnangbe amëndayënga, ley abuátambayënga y chë judiëngbeñe bëtsëjemëngcá amëndayënga, 28 y mëntšá tmojantjá: —¿Ndaye deréchoca chë contsama soyënga aca cojtsama ca? ¿Chca jtsamama nda obenana tcmënjatšetá ca?

29 As Jesús tojanëyana: —Atšnaca sëntsebomna canye soye tšëngaftanga jatjayama. Chašmojojuase, átšnaca cbochjáuyana ndaye deréchoca atše chca stsama. 30 ¿Nda Juan chë Ubayaná tbojanichmó entsanga jubáyama, Bëngbe Bëtsá o entsanga? Smëyana ca.

31 Chora chënga tmojanontšé mëntšá enatsëtsnayana: “ ‘Bëngbe Bëtsá ca’ chamojojuase, cha šochanjáuyana: ‘As ¿ndáyeca chë cha tmojanabuayená soyënguiñe ndoñe šmonjanošbuaché ca?’ 32 Pero ndoñe quemuátobena jayanana ‘entsanga ca.’” Chca tojánayana, er chënga entsangbiamama imojánauatja, er nyetscanga imojanjuabná, Juan ndegombre Bëngbe Bëtsabe juabna oyebuambnayá yojamnama. 33 Chcasna, chënga tmojanjuá: —Bënga ndoñe queftsátstatšëmbo ca.

Y Jesús tojanëyana: —As atše cach ndoñe quechocatëyana ndaye deréchoca atše chca stsama ca.

## 12

*Chë puerte bacna trabájayëngbiana cuento  
(Mt 21.33-46; Lc 20.9-19)*

<sup>1</sup> Chora Jesús tojanontsé cuentëngaca jabuátambana. Mëntšá tojanëyana: “Canÿe entšá bëtscá uvas betiyënga yojáje, y chë shëconana yojajétja. Chë uvasëšangá juantšëtetjamna canÿe base luare yojajutjo; y canÿe tsbanana jebna soye yojapórma chiñe jtsashanÿama. Chentšana, inÿe trabájayënga chë jajañe yojúyentšame, y chana inÿe luaroye yojtsoñe. <sup>2</sup> Chë uvasëšangá juashacama tempo yojobuache orna, chë jajañe nduiño canÿe oservená ibojíchmuá chë arrëndayënga jáuyanama ntsachetšá chë nduiño ibojtsotocánama. <sup>3</sup> Pero chëngna, cha imojishache, imojtsejantšetaye, y tondaye ntajatacá imojtichmuá. <sup>4</sup> Chentšana, chë nduiño inÿe oservená ibojíchmuá; pero chana, bestšaše imojtselisia y podesca imojtsóyenguango. <sup>5</sup> Chentšana inÿa ibojatichmuá, y chana chë arrëndayënga imojtsóba. Y bángnaca yojichamuá; pero chëngna, ínÿengna imojtsajantšetaye y ínÿengna imojtsëbaye.

<sup>6</sup> “Chë nduiño cabá canÿa ibojtsábojamna jíchmuama: cachabe bonshana uaquiñá. Cabana, cha ibojíchmuá y mëntšá yojtsejuabnaye: ‘Atšbe uaquiñá cocayé mochanjóyeunaye ca.’ <sup>7</sup> Pero chë arrëndayënga cha imojinÿe ora, imojeniñana: ‘Mua chë fshantse nduiñbe uaquiñá entsemna. Lempe chabe soyënga mua echanjóyëngacñe. Cuajna, motsóbanga, y lempe chabe otocana soyënga bëngbiana echanjoquéda ca.’ <sup>8</sup> Chcasna, cha imojishache, imojtsóba y chë uvas betiyënga jajañentšana más chcoye imojetsëtšena ca” —Jesús tojancuentá.

<sup>9</sup> Jesús chca jacuéntama tojanpochocá ora, tojánayana: “Y asna, ¿ndayá chë fshantse nduiño yochjama ca? Cha co echanjá y chë trabájayënga echanjtsëbaye, y inÿe trabájayënga chë uvas betiyënga jajañe echanjárrendaye.

<sup>10</sup> “¿Tšëngaftanga ndocna te Bëngbe Bëtšabe uabemana palabra šmëndualía? Chiñe mëntšá endayana: Chë yebna jebuanënga tmojtsanaboté ndëtšbé, mora chë más bëtš uashacuanëšentše entsejájona.

<sup>11</sup> Chë soye Bëngbe Utabná, Bëngbe Bëtšá chca tojama, y bënga chama ojnánanënga fsëntsemna ca.”

<sup>12</sup> Chora, chë bachnangbe amëndayënga y chë bëtšëjemëngcá mándayënga tmojánbošena Jesús jishachana, er chënga tmojanenótatšëmbona cha chca tojancuentá jinÿanÿiyama chënga mo chë puerte bacna trabájayëngcá imojanmënama. Pero entšangbiana imojtsauatja, chíyeca cachcá tmojanonÿá y chentšana imojtsóñenga.

*Chë Romoca bëts mandadbiama impuesto jtsat-squëcjnayama*

*(Mt 22.15-22; Lc 20.20-26)*

<sup>13</sup> Chentšana chënga, básefta fariseunga y Heródesbe ústonënga Jesúsbiøye tmojanichamó, ndayá cha tojayaniñe jisháchichiyama, as chca jtsebomnama ndaye sóyeca mandadëngbeñe cha mal jaquédana. <sup>14</sup> Chënga tmojána y Jesús tmojaniyana: —Buatëmbayá, bënga fsëndétatšëmbo aca ndegombre soyënga cnetsabuátambama, y ndoñe jatuenanana nÿe ntšamo entšanga tmojatichamcá, er acbiama tondaye quenatámana nda más uamaná o nduamaná tomnana; y contsabuatambá ndegombre tšabe vida jtsebomnama, ntšamo Bëngbe Bëtsá yomandacá. Chcasna, ¿tšabá tanántsemana, César, chë Romoca bëts mandadbiama bënga impuesto jtsatsquëcjnayana? ¿Fchtsatsquëcjnaye o ndoñe ca? —chënga tmojantjá.

<sup>15</sup> Jesús yojtsetátšëmbo, chënga bacna entšanga ntšamo ndegombre tmojuabnacá ndinÿinÿnayënga imojamnama; chíyeca tojanëyana: —¿Ndáyeca tšëngaftanga šmojtseboše chë sóyeca atše jisháchichiyama? Canÿe denario crocénana šmiyëboñe, atše chayobená jinÿyama ca.

<sup>16</sup> As canÿe crocénana tmojanoyé y Jesús tojanëyana: —¿Ndabe jubiá quem crocenániñe yojtsemna, y ntšamo muentše entsabemancá nda chca iuabaina ca?

Y chënga tmojanjuá: —Césarbe jubiá; cha chca enduabaina ca.

<sup>17</sup> Chora Jesús tojanëyana: —Chcasna, César šmochtoyiye cha ibotocana soye; y Bëngbe Bëtsana cha ibotocana soye ca.

Y nÿetscanga chama imojenjaná.

*Obanënga jtayenama Jesús tmojantjá*

*(Mt 22.23-33; Lc 20.27-40)*

<sup>18</sup> Chentšana, báseftanga saduceo ca uabaina entšanga tmojána Jesús jinÿyama. Chënga imojanjuabná obanënga ndocna te ntayenana ca. Chíyeca, Jesús mëntšá tmojaniyana:

<sup>19</sup> —Buatëmbayá, Moisés tojëftsanabema, nderado canÿe boyá tojóbana y básenga ndoñe tonjëftsabáshejuanësna, canmëna chë uabentsá chë shémaftaca jtobouamayana, chca, chabe uabochená obanabiama básenga jtsabamnama ca. <sup>20</sup> Y chcase, canÿe, canÿsëfta catšátanga monjamna. Chë natsaná tonjanobouamá y tontsanóbana básenga ntjëftsabashejuancá.

<sup>21</sup> Chentšana, chë ústona uabentsá chë shémaftaca tonjanobouamá, pero chana tontsanóbana, básenga ntjëftsabashejuancá; chë inÿe uabentsáftaca cachcá tonjanopasá. <sup>22</sup> Chca, nÿetsca canÿsëfta catšátangaftaca cha tonjanobouamá, pero ndocná básenga ntjëftsabáshejuanana.

Y chentšana chë shembásanaca tontsanóbana. <sup>23</sup> Y morna, chë obanënga chamojtayena ora, ¿ndabe chë canÿsëfta catšatanguentšabe shema chë shembása yochtsemna, nÿetscanga cháftaca tmojanobouamase ca? —chënga tmojantjá.

<sup>24</sup> As Jesús tojanéyana: —Ntšamo Bëngbe Bëtsabe uabemana palabrenguine endayancá ndoñe tcmonjosertá, ni Bëngbe Bëtsabe obenanama. Chíyeca ntšamo ndoñe yondmëncá šmontsichamo. <sup>25</sup> Er obanënga chamojtayena ora, ni boyabásenga ni shembásenga quemochatóbouamnaye, y chca, chënga mochántsemna mo celoca angelotemëngcá. <sup>26</sup> Y chë obanënga jtayenama, ¿Moisesbe librëšañe ndoñe šmëndualía ntšamo Bëngbe Bëtsá tbojaniyanama, chë betiyetema yojsángbototjuana ora? Bëngbe Bëtsá mëntšá tbojaniyana: “Atše sëndmëna Abraham, Isaac y Jacobëbe Bëtsá ca.” <sup>27</sup> Bëngbe Bëtsá chca tojánayana ora, entsichamo cha ndoñe yondmëna obanëngbe Bëtsá, sinó aina entsangbe Bëtsá ca, er masque chënga tmojanóbana, chënga cabá Bëngbe Bëtsáftaca mondoyena. Tšëngaftanga canÿe ndoñe ndegombre soyiñe šmontsemna ca —tojanéyana.

*Chë más bëts uámana mando  
(Mt 22.34-40)*

<sup>28</sup> Chentše yojtsemna canÿe ley abuatambayá. Cha yojouena ntšamo Jesús y chënga imojtsenatsëtsnayana, y yojtsetátšëmbo Jesús tšabá tojanëjuama. As, tojanobeconá y Jesúsbioye tbojantjá: —¿Ndayá chë más bëts uámana mando yomna ca?

<sup>29</sup> Y Jesús tbojanjuá: —Chë más uámana mando mëntšá endmëna: “Israeloquënga šmochjouena, Utabná, Bëngbe Bëtsá endmëna, y nÿe canÿe Bëngbe Utabná endmëna, ndocná más. <sup>30</sup> Utabná Bëngbe Bëtsá cochtsebobonshana nÿets acbe ainánaca, nÿets espíritoca, nÿets juábnaca y nÿets añémoca.” <sup>31</sup> Y chentšana quem inÿe mándnaca: “Ndëmua entsánaca cochtsebobonshana, ntšamo cach aca cuenobobonshancá.” Ndocna mando quem uta mandama más quenatámana ca — Jesús tojánayana.

<sup>32</sup> Chora, chë ley abuatambayá Jesúsbioye tbojaniyana: —Buatëmbayá, puerte tšabá tcjayana. Ndegombre yomncá contsichamo, nÿe canÿe Utabná endmëna y ndocná más. <sup>33</sup> Y cha jtsebobonshánana nÿets ainánaca, juábnaca y añémoca, y ndëmua entsánaca jtsebobonshánana cachá cuenobobonshancá, puerte cuámana. Cach nÿetsá ndoñe quenatámana bayënga jtsëbánayana, ni chë uátšëmbona soyënga Bëngbe Bëtsá jëtschuayama ca.

34 Cha n̄yets juábnaca tbojanjuama Jesús tojánin̄ye ora, tbojaniana: –Batšatema cmontsebuáshbena jtseprontánama, Bēngbe Bētsá chacolesenciamana acbe ainanentše jtsemándayama ca.

Y chentsana, ya ndocná yonjen̄ñemua Jesús más jatstjanayama.

*¿Cristo ndabe entšábentšana yomna?*

*(Mt 22.41-46; Lc 20.41-44)*

35 Jesús Bēngbe Bētsabe bēts yebnentše yojsabuátambaye ora, tojánayana: “¿Ndáyeca chē ley abuátambayēnga mondbétsichamo chē Uámana Uabuayaná Davidbentšana iuabó ca? 36 Cach David, chē Uámana Espíritbe mándoca mēntšá tojánayana:

Bēngbe Bētsá, atšbe Uabná Crístbioye tbonjaniana:

atšbe catšbioica mótbema,

atšbe obenánaca, acbe uayayēnga acbe cucuatšine chamo-  
quedama chjamēntscuana ca.

37 ¿Ntšámose Cristo Davidbentšana Entšá nántsemna, cach David ‘Uabná ca’ chábioye tbojtsabobuátmēse ca?” –cha tojanéyana.

Y chē bētsá entšanga, oyejuayēnga imojtsuenana.

*Jesús chē ley abuátambayēngbiama tojánayana, chēnga ndoñe tšabá montsama ca*

*(Mt 23.1-36; Lc 11.37-54; 20.45-47)*

38 Mēntšánaca Jesús chēnga yojsabuátambaye: “Cuedado šmochtsebomna y ndoñe šmattsama chē ley abuatambayēngcá. Chēnga jtsogusetánana bēnēna entšayangaca jtsajnana y jtsebošana tsáshenañe entšanga n̄ya respétoca chamotsacheuanama. 39 Chē judiēngbe enefjuana yebnēnguenache, chē más uámana luarēnguiñe jtsetbiámanana, y chē fiestēnguenache n̄ya quēfseroca. 40 Pero

chēnga, viudángbioye chē tmobomna soyēnga jtsabacayana, y entšangbe delante tšabá chamotsēnyama, y chēngbioye imojtsaíngñama ndoñe chaondētsótatšēmbuamna, Bēngbe Bētsáftaca tša jtsencuéntayana. Chē causa, Bēngbe Bētsá ín̄yēngbiama más chēnga echanjácastigaye ca” –Jesús tojánayana.

*Jesús yojsēnyaye chē crocénana quēcjnayēnga*

*(Lc 21.1-4)*

41 Jesús jabuátambama tojanpochocá ora, tojanótbema Bēngbe Bētsabe bēts yebnentše, chē crocénana quēcjnayētema ndirichiñe; y chē crocénana quēcjnayēnga yojsēnyaye. Bētsá bomnēngna becá crocénana imojtsequēcjnaye. 42 Chora, can̄ye viudá ndbomnējm̄naca yojobeconá y n̄ye uta crocénana



chëtémiñe yojaftseseğóra. <sup>43</sup> Chora Jesús chabe uatsjéndayënga tojánachembo chamobéconama, y mëntsá tojanëyana: “Ndegombre chëyana, quem viudá ndbomñëjema, Bëngbe Bëtsabiama nyetscangbiama más tonjëftseseğorá. <sup>44</sup> Chë bomnëngna chë yojsóyentsjamentšana tmonjëftseseğorá, y cabá bomnana imotsóbomñe; y chë viudana tonjëftseseğorá lempe ntsachetšá yobomncá; masque tša ndbomñëjema, chë vida jtsebomnama lempe ntsachetšá yobomncá tonjëftseseğorá ca.”

## 13

*Jesús tojánayana chë Bëngbe Bëtsabe bëts yebna lempe mochjánpochocama*

*(Mt 24.1-2; Lc 21.5-6)*

<sup>1</sup> Jesús Bëngbe Bëtsabe bëts yebnentsana tojëftsanbocna ora, canye chabe uatsjendayá tbojanayana: —Buatëmbayá, minye, jtša bëts ndëtsbënga, y tša botamana bëts yebnënga ca!

<sup>2</sup> Chora Jesús tbojanayana: —Tšabá cochjinye tša botamana bëts yebnënga. Pero muentše ndoñe queochaisoquéda ni mo canye ndëtsbé inyebé juatsboye. Lempe mochantsepochoá ca.

*Ntšamo yochtsemna quem luare jopochócama te chaojt-sobeco ora*

*(Mt 24.3-28; Lc 21.7-24; 17.22-24)*

<sup>3</sup> Chentsana, Olivos tjahoye chënga tmojána. Bëngbe Bëtsabe bëts yebnentsa ndirichiñe yojamna; y Jesús tojanótbema ora, Pedro, Santiago, Juan y Andrés iytëcana tmojantjá, <sup>4</sup> ntšamo cha tojanayancá ntseco yochjanopásama, y chca jopásama ya tojsobecuama entšanga chamotsetatšëmbuama, ndayá Bëngbe Bëtsá yochjanma ca.

<sup>5</sup> Chora Jesús tojanëjua: “Cuedado šmochtsebomna ndocná chacmondáingñema. <sup>6</sup> Banga mochanjabo y mochantsabíchamo chënga Jesús imomna ca. Mochántsihamo: ‘Atse chë Cristo sëndmëna ca’, y chca, ba entšanga mochanjáingñaye.

<sup>7</sup> “Entšanga tmojtsentsjanama y nderado mochjentsjámnaca tšëngaftanga chašmojouena ora, ndoñe šmattsauatja; er chca chaochnënguama entsemna, pero masque chca, chora chë quem luare jopochócama tempo cabá ndoñe queochátsmëna. <sup>8</sup> Canye luarentša entšanga inye luaroca entšángaftaca mochántsientsjanaye, y canye amëndayábentsa entšanga inye amëndayábioca entšángaftácnaca; ba luarënguénache fshantse echanjuangmëmana y bëts shëntsana echanjóshjango. Masque chca jasúfriase, más chcoye cabá más mochanjatssúfria.

9 “Pero tšëngaftangna cach tšëngaftangbiama šmochtsantješna; entšanga cmochanjíshêche y amëndayëngbe cucuatšiñe cmochanjábashejuana, judiëngbe enefjuana yebnënguenache cmochanjátsetšenaye. Atšbe ústonënga bétsemna causa, mandadëngbioye y reyëngbioye cmochanjunatse, choca, chëngbe delante ntšamo atšbiama šmotatšëmbcá chašmuayanama. 10 Er entseyta, quem luare cabá ndopochóca ora, Bëngbe Bëtsabe tšabe noticiënga nyetsca luarënguentša entšangbioye chaóshjanguama. 11 Y ínÿengbe cucuatšiñe jabáshejuanama chacmojtšënachá ora, ndoñe šmattsenócochinÿena ntšamo chora šmochjayanama. Chora šmochjayana ntšamo Bëngbe Bëtsá yochjamcá tšëngaftanga chašmuayanama, er tšëngaftanga cánÿenga ndoñe chora quešmochátoyebuambnaye, ndayá chë Uámana Espiritu tšëngaftangbiajana echantsóyebuambnaye.

12 “Canÿe catšata cachabe catšata ínÿengbe cucuatšiñe bochanjáboshjona chamotsóbama, y bëtšëtsanga cachëngbe básenga mochanjábashhejuana chamotsëbáyama; y chë básengna chëngbe bëtšëtsangbe contra mochántsemna y chamotsëbáyama mochanjábashhejuana. 13 Atšbe ústonënga bétsemna causa, nyetsca luarënguentša entšanga cmochantsëbuayënja; pero nda nyets tempo átšbeñe ošbuachiyá totsomñe, atsbocaná echántsemna.

14 “Chë Bëngbe Bëtsabe juabna oyebuambnayá Daniel, chë puerte uabouana soye quem luare jopochócama tojéftsanabema. Chë puerte uabouana soye, chca jtsemnama ínÿoca tšëngaftanga chašmojinÿe ora (nda tojtsalía, chabosertá), šmochántsetatšëmbo chë puerte ngménana tempo tojóshjanguama; chorna, chë Judeoca chamojtsemna entšanga, batsjabengoye chamotsacheta; 15 chama, nda cachabe yebnentša tsbanánoca chaojtsemna, chocana ndoñe chaondétastjango, ni chaondétamashëngo tsoicana ndayá jesábocnama; 16 y nda jajoca chaojtsemna, yebnoye ndoñe chaondéta ni mo chabe quëfsaíya jesácñama. 17 ¡Tša lastema chë tempo ngomámanënga o ochóchaye šešonga chamojtsabamna shembásengbiama! 18 Bëngbe Bëtsá šmochtseimpadana chë ngménana tempo ndoñe chaondóshjango uaftena tempo ora, 19 er chora puerte ngmenancá echántsemna. Tša jabuache ngmenancá, quem luare jobojátšama orscana y mëntsoñama y más chcoye, cachcá ngménana ndoñe ntjamnana. 20 Chë puerte ngménana tempo, yapa bën ndoñe chaondétsemnama Bëngbe Bëtsá ndoñe tonjalesenciase, ndocná quentatsbocá; pero cha, chabe ubuáyanënga, chabe bocacánënga corente endábabuanÿeshanayeca, echanjama yapa bën tempo ndoñe

chaondětsemnama.

<sup>21</sup> “Chora nderado nda chacmojáuyana: ‘Minÿe, muentše chë Cristo entsemna’, o ‘Choca cha entsemna ca’, chë soyëngama ndoñe šmattsayaunana. <sup>22</sup> Er mochanjábocana ndoñe ndegombre uámana ubuáyanënga, chënga Cristo imomna ca jtsichámëse, y Bëngbe Bëtsabe ndoñe ndegombre juabna oyebuambnayëngnaca; y chënga mochanjama bëtš soyënga chëngbe obenana jinÿanÿiyama, entšanga jáingñama, y tmojobenase, chë Bëngbe Bëtsabe bocacánëngnaca. <sup>23</sup> ¡Cuedado šmochtsebmna! Cabá chca ndochnëngo ora, lempe tcbonjabuayená ca” —Jesús tojanëyana.

*Bëngbe Bëtsá Entšá tbojanbemá quem luaroye echanjésabo  
(Mt 24.29-44; Lc 21.25-36)*

<sup>24</sup> Mëntsánaca Jesús tojanëyana: “Pero chë tempo, entšanga puerte chamojasufri chentšana, shinÿe ndoñe queochátsbuashinÿinÿana, juashcona ndoñe queochátsbinÿnaye, <sup>25</sup> celocana estrellënga echanjatquécjana, y quem luarentša tsbanánoca espíritënga obenana bomnënga echanjángmëmana. <sup>26</sup> Y chora, entšanga mochanjinÿe, Bëngbe Bëtsá Entšá tbojanbemá jantšetëshiñe echántšaboye, corente obenánaca y corente buashinÿinÿaniñe. <sup>27</sup> Chora cha chabe angelënga echanjámëndaye chë Bëngbe Bëtsabe ubuáyanënga júbuajama, nÿets luarëngocana, quem fshantsoca cánÿoica juachoicana, celoca ínÿoica juachóntscoñe.

<sup>28</sup> “Chë higo betiyama šmochjuatsjinÿe: Tsëm buacuafjënga tojtsebmna ora y tojtsaisëjotsana, jtsotatsëmbuana chë tšabe tempo ya tojtsaisobecuama. <sup>29</sup> Cachcá, chë soyënga ndayama tsëngaftanga tcbonjauyancá chašmojinÿe ora, šmochántsetatsëmbo Bëngbe Bëtsá Entšá tbojanbemá ya jésabama yojtsemnama. <sup>30</sup> Ndegombre cbëyana, lempe chca echanjochnëngo, morsca entšanga cabá ndóbana ora. <sup>31</sup> Celoca y quem luare echanjopochóca, pero atšbe palabra ndocna te queochaisopochóca.

<sup>32</sup> “Pero Bëngbe Bëtsá Entšá tbojanbemá ndayté y ntseco ora yochjésabama, ndocná quenátstatšëmbo, ni chë celoca angelënga, ni Bëngbe Bëtsabe Uaquiñá. Nÿe chë Taitá chama yotátšëmbo.

<sup>33</sup> “Chíyeca, cuedado šmochtsebmna y yejuana šmochtsantješna, er ndoñe quešmátstatšëmbo mocna ora yochtsemna Bëngbe Bëtsá Entšá tbojanbemá jésabama tempo. <sup>34</sup> Echántsemna mo canÿe entšacá; chana inÿe luaroye ya jëftsebmocnama ora, chabe oservénënga jëftsamëndana chabe yebna chamotsinÿenama. Cada ona canÿe trabajo jëftsebmónÿiyana, y chë shanÿá jëftsemándana botamana chaotsantješnama. <sup>35</sup> Chcasna, cuedado šmochtsebmna,

šmochtsantješna, er ntšamo chë trabajayëngcá chë yebna nduiño ntseco jtashjanguama, ndoñe ntsetatšëmbuana, mo nderado jétatana, tsëntseto ora, bínyanoye o cachëse, tsëngaftanga cachcá, Bëngbe Bëtsá Entšá tbojanbemá ntseco jésabama ndoñe quešmátstatšëmbo; <sup>36</sup> ndoñe cuedado šmontsebonnëse, nderado cha nÿe ndeolpe nántashjango, tsëngaftanga ndëprontánënga šmojtsemna ora, mo ftsomañe cuenta. <sup>37</sup> Chíyeca, ntšamo tsëngaftanga cbochanjauyancá, nÿetscanga chanjáuyana: ¡Puerte cuedado šmochtsebonna ca!” —Jesús tojánayana.

## 14

*Entšanga imojtsejuabnaye ntšamo jamëse Jesús jishachama (Mt 26.1-5; Lc 22.1-2; Jn 11.45-53)*

<sup>1</sup> Bashco fiestama uta te yojetsájamna, chë Bëngbe Bëtsá Egiptocana judiëngbe bëts taitanga tojánatsebacama jtenójuaboyama fiesta, chë lewadúraca ndëpormana tandëse sayora. Chë judiëngbe bachnangbe amëndayënga y chë ley abuátambayënga imojtsenguaye ntšamo Jesús jishachana jtseíngñase, y jtsóbama. <sup>2</sup> Báseftanga imojtsichamo: “Quem fiestëntscuana ndoñe, er nderado entšanga yapa muanjótša enbouenanana ca.”

*Canÿe shembása botamana uanguëtse béjaye Jesusbe bestšašinë tbojanbuešcja (Mt 26.6-13; Jn 12.1-8)*

<sup>3</sup> Jesús Betanioca yojtsemna, Simón chë bacna nguayanánaca šocá ca uabobuatmabe yebnentše; mesëshentše Jesús yojtsemna ora, canÿe shembása tojánashjango. Chë shembása yojúshjango canÿe alabastro jarrëtema jútjena canÿe becá uámana y botamana uanguëtse béjayeca, ena nardana uanguëtšiye; chana chë jarrëtema yojátsba y chë béjaye Jesusbe bestšašinë tbojanbuešcja. <sup>4</sup> Chca tmojáninÿe ora, báseftanga chentše imojtsemnënga tmojanotjayaná y mëntšá imojtsenatsëtsnaye: —¿Ndáyeca nÿe bonamente chë soye yojtsemna ca? <sup>5</sup> Chamna, matmënjobenanga chë béjaye unga patse denario crocenánama juiyana, y chánaca ndbomnjémënga matmënjújabuache ca.

Y chë shembásabiama podesca imojtsichamo.

<sup>6</sup> Chora Jesús tojanëyana: —¿Ndáyeca quem shembása ndoñe cachcá šmochanjonÿaye ca? ¡Ndocá matatsana! Atšbiama tšabe soye tonjama. <sup>7</sup> Er ndbomnjémënga nÿets tempo tsëngaftangbeñe mochanjëftsemna, ndayténaca šmojábošena ora, šmatjobenaye tšabe soye chëngbiamana jamana; er atše tsëngaftangafata ndoñe nÿets tempo quichásemna. <sup>8</sup> Quem shembása lempe ntšamo tojobenacá atšbiama tonjama.

Chca tonjama ora, atšbe cuerpo tonjaprontá atše juatbontsa tescama, cabá ndoñe obaná sěntsemna ora. <sup>9</sup> Ndegombre cběyana, quem luaroca ndayéntšnaca Běngbe Bětsabe tšabe noticiěnga chamojtsabuayiyná chentše, ntšamo quem shembása tojamámnaca becá mochanjěftsóyebuambaye, chca, entšanga chabiana chamotsenójuabnama ca —cha tojaněyana.

*Judas tojána bachnangbe aměndayěngbiye, Jesús chamuishachama*  
(Mt 26.14-16; Lc 22.3-6)

<sup>10</sup> Chentšana, Judas Iscariote, canye chě bnětsana uta uatsjendayěnguentšá, tojána chě bachnangbe aměndayěngaftaca jencuéntama, Jesús chěngbe cucuatšiñe jaboshjonama. <sup>11</sup> Chca tmojanuena ora, chěnga imojóyejuaye y tmojanšbuachená crocénana jtabuénayana. Y cach orscana Judas yojtsenguaye ntšamo jamana y nděmua ora, Jesús chěngbe cucuatšiñe jaboshjonana.

*Jesús chabe uatsjéndayěngaftaca Bashco saná tojanse*  
(Mt 26.17-29; Lc 22.7-23; Jn 13.21-30; 1 Co 11.23-26)

<sup>12</sup> Chě Bashco fiesta bojatšenté, chě levadúraca nděpormana tanděse sayté, chě uatsjéndayěnga Jesús tmojantjá: —¿Nděmoca cojtseboše běnga fchajprontama, Bashco saná chacosama ca?

Chca te chě judiěnga imojanamana, Běngbe Bětsá jětschuayamna canye oveshá jóbana chora jasama, chě Egiptocana chěngbe běts taitanga Běngbe Bětsá tojánatsebacama jtenójuaboyama.

<sup>13</sup> As Jesús uta chabe uatsjéndayata tojanichamó y měntšá tojaněyana: —Chě běts puebloye motsata. Chašojáshjango ora, canye bacó cmochanjóbiatše, matbajiñe búyeshe echantsabuyambaye; cha šochjuasto y šochtserreparana nděmuanye yebnentše yochjámashěnguama; <sup>14</sup> y chě yebna nduiño šochjauyana: “Buatěmbayá tonjayana: ¿Ndayentše chě tsañe yojtsemna, Bashco saná atše atšbe uatsjéndayěngaftaca jasama ca?” <sup>15</sup> As cha cmochanjínyanýiye canye běts tsañe, tsbanana pisoca, lempe prontániñe; chentše šochjaprónta běnga mochjasama ca.

<sup>16</sup> As chě uatsjéndayata tbojána y tbojáninýena lempe ntšamo Jesús tojaněyancá; y chentše chě Bashco saná tbojanprontata.

<sup>17</sup> Tojanibétata ora, Jesús chě yebnoca tojánashjango, chabe bnětsana uta uatsjéndayěngaftaca. <sup>18</sup> Y mesěshentše imojtsesaye ora, Jesús tojaněyana: —Ndegombre cběyana, canya tšěngaftanguentšá, átšeftaca entsesá cha, uayayěngbe cucuatšiñe šochanjáboshjona ca.

<sup>19</sup> Chorna chë uatsjédayënga ngménaca imojtsemna, y tmojanontsé canýänýa cha jatjayana: —¿Atse chtsemna ca?

<sup>20</sup> Y Jesús tojanějua: —Canýa chë bnëtsana utatentsá entsemna. Chabe tandëse cach atse sëntsefchecuacná šcnenentše cha entsefchecuacná. <sup>21</sup> Ndegombre, Bëngbe Bëtsá Entsá tbojanbemáftaca echanjopása ntšamo chabiamá Bëngbe Bëtsabe uabemana palabrënguiñe endayancá. Pero, ¡tsá lastema chë bochjáboshjonabiamá! Chabiamá más tsabá manjamna ndoñe ntjónýnana ca —Jesús tojánayana.

<sup>22</sup> Imojtsesantscuana, tandëse tojanca, Bëngbe Bëtsábioye chama tbojtanchuá, tojanjataye y chabe uatsjédayënga tojanëjatá, y mëntsá tojánayana: “Mocñënga, mosënga, atšbe cuerpo entsemna ca.”

<sup>23</sup> Chentšana, canýe coptema vínoyeca tojanaca, Bëngbe Bëtsábioye tbojtanchuá, chabe uatsjédayënga tojanëfsašé, y nyetscanga tmojanofsé. <sup>24</sup> Mëntsá tojánayana: “Quem vínoye atšbe buiñe entsemna. Atšbe buiñe echanjuábuashana entšanga chamotsetatšëmbuama ntšamo Bëngbe Bëtsá entšanga tojašebuachenacá ndegombre yochjochnënguama. Chë buiñe bëtscá entšangbe tsabiamá echanjuábuashana. <sup>25</sup> Y ndegombre cbëyana, morscana ya ndoñe más chë uvasëšentsana obocniye quichaisofsiye. Chë tsëm vínoye tsëngaftangaftaca chanjofsiye, Bëngbe Bëtsabe amëndayoca chamojtsemna ora ca” —tojánayana.

*Jesús tojánayana, chábioye ndoñe bonjanabuátma ca Pedro yochjánayanama*

*(Mt 26.30-35; Lc 22.31-34; Jn 13.36-38)*

<sup>26</sup> Bëngbe Bëtsábioye jëtschuayama tmojancantá chentšana, Olivos tjashoye tmojëftsanbocana. <sup>27</sup> Jesús tojanëyana: —Nyetsca tsëngaftanga quem ibeta átšbeñe ošbuáchiyana šmochantsobuetše y šmochántšacheta, er Bëngbe Bëtsabe uabemana palabrënguiñe, cha mëntsá tojánayana: “Chë oveshënga abuajëñýa chanjóba y chë oveshënga mochantsáshana ca.” Chca tsëngaftangaftaca echanjopása, uayayënga chašmojishache ora. <sup>28</sup> Pero obanënguentšana chaitayenentsana, tsëngaftangbe natsana Galileoye chanjá ca —cha tojanëyana.

<sup>29</sup> Chora Pedro tbojaniyana: —Masque nyetscanga ácheñe ošbuáchiyana chamotsobuetše y chamotsacheta, atše nýa ndocna te ca.

<sup>30</sup> Chora Jesús tbojaniyana: —Ndegombre cbëyana, cam ibeta, ngallo cabá uta soye ndëcánta ora, aca unga soye cochanjayana ndoñe šconduabuatma ca.

<sup>31</sup> Pero Pedro más yojttsichamo: —Masque chašotsemna ácaftaca jóbanama, atše ndoñe quichátayana ndoñe cbonduabu-atma ca.

Y nÿetscanga cachcá imojtsichamo.

*Getsemaní luarentše Jesús, Bëngbe Bëtsáftaca tbojanencuentá (Mt 26.36-46; Lc 22.39-46)*

<sup>32</sup> Chentšana, canÿe luare Getsemaní ca uabáinoye tmojána. Chocna Jesús tojanéyana: “Muentše motbiamá, chëntscuana atše choye chanjá, Bëngbe Bëtsáftaca jencuéntama ca.”

<sup>33</sup> Y tojëftsanébiatše Pedro, Santiago y Juan. Choca cha yojóntša puerte ngménaca jtsemnama y corente cochtsetšenaná. <sup>34</sup> Chëngbioye tojanéyana: “Atšbe ainana puerte ngménaca entsemna, mo jobanamcá. Muentše moquedanga y šmochtsefšna ca.”

<sup>35</sup> Chentšana, Jesús más natsanoye tojána, tojanoshëntsamentšé y fshantsóntscoca tojanotsejbéna y Bëngbe Bëtsábioye tbojanimpadá, jopódianëse, chë tša japadésa ora ndoñe chaondóshjanguama. <sup>36</sup> Mëntšá yojttsichamo: “Atšbe Taitá, aca lempe jamama condobena; tojopodese, cochjama atše japadésama ndoñe chašondëtsemnama. Pero ntšamo atše stsebošcá ndoñe chaondëtsemna, sinó ntšamo aca cojtsebošcá ca.”

<sup>37</sup> Chentšana, chabe unga uatsjëndayëngbioye tojtanabo, y chëngna inmëtsomañe. Chca tojánanyëna ora, Pédrëbioye tbojanianyana: “Simón, ¿cotsomañe? ¿Ni mo nÿe canÿe hora jtsefšnama ndoñe tconjobená? <sup>38</sup> Smochtsefšna y Bëngbe Bëtsáftaca šmochtsencuéntaye, bacna soye jamama ndoñe chacmondócochënguama. Tšëngaftanga ndegombre šmontseboše espíritoca Bëngbe Bëtsá joyeunayana, pero cuerpiñe ndoñe añemo quešmátsbomna ca.”

<sup>39</sup> Jesús cachiñe tojesaná y Bëngbe Bëtsáftaca tbojanencuentá, cach palabrënga jayanëse. <sup>40</sup> Yojttabo orna, chë uatsjëndayënga cachiñe inmëtsomañe; chënga imojtsefshétana ocnaye causa, y ndoñe imontsobena ntšamo jojuana.

<sup>41</sup> Chentšana, tojtesaná y tojtanabo ora tojanéyana: “¿Cabá šmotsomañe y šmotsochnañe? Nÿe nÿetsá; hora tojobuache, Bëngbe Bëtsá Entšá tbojanbemá bacna soye amëngbe cucu-atšñe mochanjábošhona. <sup>42</sup> Motsbananga, cuajna. Minÿënga, atše boshjuaná ya entsebeconá ca.”

*Uayayënga Jesús tmojánishache (Mt 26.47-56; Lc 22.47-53; Jn 18.2-11)*

<sup>43</sup> Jesús cabá yojtsoyébuambnantscuana, Judas, canÿe chë bnëtsana uta uatsjëndayënguentsá, tojánashjango y cháftaca ba entšanga espadëjangaca y ngarotbéngaca prontánënga. Chënga imojamna chë bachnangbe amëndayënga, ley

abuátambayënga y judiëngbeñe bëtsëjemëngcá mándayëngbe ichmónënga. <sup>44</sup> Judas, chë boshjuaná, tojanjuabó ntšamo jamana entsanga jinÿanÿiyama ndëmua Jesús bëtsemnana. Chíyeca, yojáuyana: “Nda chajjauámocho, cha echántsemna; šmochjishache y cuedádoca šmochjuánatse ca.” <sup>45</sup> Chcasna, Judas Jesúsbioye tojanobeconá y tbojaniyana: “¡Buatëmbayá ca!”

Y tbojanámocho. <sup>46</sup> Chora chë entsanga tmojánishache y tmojanánatse.

<sup>47</sup> Pero canÿa chentše Jesúseftaca yojtsemná, chabe espadëja yojenosëngbotëntšena, y chë bachnangbe más uámana amëndayabe oservená canÿe matscuaše tbojtsanëštjango.

<sup>48</sup> Y Jesús chë entsanga tojanatjá: “¿Ndáyeca šmojabo espadëjangaca y ngarotbéngaca atše jishachama, mo atše canÿe bacá uamana entšá cuaftsemncá ca? <sup>49</sup> Atše cada te tšëngaftangbeñe sëndëtsemna Bëngbe Bëtsabe bëts yebnocá abuátambaye, y ndocna te choca chešmátanishache. Pero tšëngaftanga chca átšëftaca šmontsama, cachcá ntšamo Bëngbe Bëtsabe uabemana palabrenguiñe endayancá chaotsemnana ca” —tojánayana.

<sup>50</sup> Chorna, nÿetsca uatsjëndayënga tmojtsanëuatjaná y tmojtsanacheta, y Jesús cachcá chë uayayëngaftaca tmojesanonÿá. <sup>51</sup> Canÿe bobontse Jesúsbioye ibojtsëstona, nÿe canÿe uafjantse entšëjua uichëtjoná. Cha chë entsanga tmojánishache, <sup>52</sup> pero chëngbe cucuatšifne chë entšëjua jesáboshjonëse, chë bobontsna enašá yojtsachá.

*Jesús tmojanánatse chë judiëngbe uámana amëndayëngbioye (Mt 26.57-68; Lc 22.54-55, 63-71; Jn 18.12-14, 19-24)*

<sup>53</sup> Chentšana, Jesús tmojanánatse chë bachnangbe más uámana amëndayábioye; y chocna, nÿetsca chë bachnangbe amëndayënga, bëtsëjemëngcá amëndayënga y ley abuátambayënga tmojánenefjna. <sup>54</sup> Pedro bënocana Jesús tbojanasto, chë bachnangbe más uámana amëndayabe yebnentša chashjónscoñe; y chentše tojanoquedá. Chë Bëngbe Bëtsabe bëts yebnocá josticiëngaftaca yojtsetbemana; iñe juachaca yojtsešbonena.

<sup>55</sup> Chë bachnangbe amëndayënga y chë judiëngbe uámana mándayënga imojtsenguaye canÿa, nda ndayánaca Jesusbe contra cháuyana, as jobenayama cha chaóbana ca jayanama; pero ndoñe montsaninÿana. <sup>56</sup> Er masque banga Jesusbe contra uayátsenaye soyënga imojtsichamo, nÿetscanga ndoñe cachca soye montsanichamo.

<sup>57</sup> Báseftanga imojtsaye y mëntšá Jesusbe contra, ndoñe ndegombre betsemncá tmojánayana: <sup>58</sup> “Bënga cha fsënjoyeuná



mëntšá: ‘Atše quem Bëngbe Bëtsabe bëts yebna, entšangbe pormana yebna, chantsepochóca; y unga tese inye Bëngbe Bëtsabe bëts yebna, entšángbeyeca ndëpormana yebna chanjëtsjebo ca.’”

<sup>59</sup> Pero masque chca imojtsichamo, nyetscanga ndoñe cachca soye montsanichamo.

<sup>60</sup> Chorna, chë bachnangbe más uámana amëndayá yojotsbaná, nyetscangbe tsëntsaca yojotsaye, y Jesúsbioye tbojantjá: —¿Ndocá cochanjayana? ¿Ndayase yojtsemna chë acbe contra montsichamo soye ca?

<sup>61</sup> Pero cha nye iytëca yojtsemna y ndocá ibontsëjuana. Chë bachnangbe más uámana amëndayá cachiñe tbojtëtantjá, mëntšá: —¿Aca chë Cristo icomna, Bëngbe Bëtsá chë nda fsëndadoranabe Uaquiñá ca?

<sup>62</sup> Y Jesús tbojanjuá: —Arseñor, atše cha sëndmëna; y tsëngaftanga šmochanjinye, atše, Bëngbe Bëtsá Entšá tbojanbemá, chë nyets obenana bomnabe catšbioica chantsetbema, y celoca jantšetëshiñe chántsaboye ca.

<sup>63</sup> Chora, chë bachnangbe más uámana amëndayá chabe uichëtjonëjuangá yojtsenántšajatanëca, puerte ibojtsetna causa, y tojánayana: —¿Ndayama más entsanga šochjátëjamoto Jesusbe contra chamuayanama ca? <sup>64</sup> Tsëngaftanga šmonjouena ntšamo chë entsá entsichamcá, y chca Bëngbe Bëtsabiama entsemna mo cha cuafjoyenguangcá, chë chabe Uaquiñá yomna ca cha tonjayana ora. ¿Ntšamo tsëngaftanga šmatjayana ca? —cha tojanëyana.

Y nyetscanga tmojánayana, cha ndegombre bacna soye yojtsebomna y jóbanama ibojtsemna ca.

<sup>65</sup> Chorna báseftanga tmojanontšë Jesús buashëtjnayana; jubíá imojútsbotse, imojtsejantšetaye y imojtsetjanaye: “¡Momalisiá nda tcmënjajantšetá ca!” Y chë Bëngbe Bëtsabe bëts yebnoca josticiëngna imojtsajuebiantšetaye.

*Pedro tojánayana Jesúsbioye ndoñe bonjanabuátma ca*  
(Mt 26.69-75; Lc 22.56-62; Jn 18.15-18, 25-29)

<sup>66</sup> Pédrëna, tsmanoca yojtsemna chashjoca. Chora, canye shembása, chë bachnangbe más uámana amëndayabe oservená yojáshjango; <sup>67</sup> y Pédrëbioye tbojáninye ora, cha iñe juachaca yojtsanšbonena, yejuana ibojonÿinÿiye y tbojanayana: —Acnaca, Jesús Nazaretocáftaca conjánana ca.

<sup>68</sup> Pero Pedro tojánayana chábioye ndoñe bonjanabuátma ca; y mëntšá tojánayana: —Ndayama cojtsichámuama ndoñe quetsátstatšëmbo, ni quešnátësertana ca.

Y shjoye, amashjuanóntscoñe yojábocna; y chora canye gallo yojacánta. <sup>69</sup> Chë oservená cachiñe Pédrëbioye

tbojáninÿe y tojanontsé chë ínÿenga jauyanana: —Muánaca Jesusbe uatsjendayënguentšá entsemna ca.

<sup>70</sup> Pero chana cachiñe tojánayana Jesúsbioye ndoñe bonjanabuátma ca. Chentšana, chë chentše imojtsemnënga Pedro tmojátaniyana: —Ndegombre aca chënguentšá contsemna; ácnaca Galileocá contsemna ca.

<sup>71</sup> Pero Pedro tojanontsé ichámuana: —¡Bëngbe Bëtsá chašotsecastigá ndoñe ndegombre soye stsichámëse ca! — y yojóntša júrayana— ¡Atše chë entšá ndoñe quetsatabuatma, ndabiana tšëngaftanga šmontsatsëtsná ca!

<sup>72</sup> Y cachora chë ngallo uta soyama yojacánta, y Pedro yojenójuaboye ntšamo Jesús tbojaniyanama: “Ngallo cabá uta soye ndëcánta ora, aca unga soye cochanjayana ndoñe šconduabuatma ca.” Y tojanontsé enóbošachiyana.

## 15

*Jesús Pilátbioye tmojanánatse*

(Mt 27.1-2, 11-14; Lc 23.1-5; Jn 18.28-38)

<sup>1</sup> Tojanbinÿna ora, chë bachnangbe amëndayënga, chë judiëngbeñe bëtšëjemëngcá amëndayënga y ley abuátambayënga cánÿentše tmojánenefjna, nÿetsca chë luarentša más uámana mandayëngaftaca, jenóyeunayama ntšamo jamëse Jesús jóbama. Jesús tmojanëcuébatsëca y tmojanánatse, y Pilato, chë Judeoca mandadbe cucuatšinë tmojánboshjona.

<sup>2</sup> Pilato Jesúsbioye tbojantjá: —¿Aca chë judiëngbe rey cojtsemna ca?

Y Jesús tbojanjuá: —Aíñe, aca ndegombre yomncá tcjayana ca.

<sup>3</sup> Chë bachnangbe amëndayënga bëtscá soyënga Jesusbe contra imojtsichamo; <sup>4</sup> chíyeca Pilato cachiñe Jesúsbioye tbojantjá: —¿Ndocá šcochanjojuá ca? Minÿe; bëtscá soyënga acbe contra montsichamo ca.

<sup>5</sup> Pero Jesús ndoñe más tbonjanjuá; chë causa, Pilato ndoñe yontsetátšëmbo ntšamo jajuaboyana.

*Jesús chaóbana ca tmojánayana*

(Mt 27.15-31; Lc 23.13-25; Jn 18.38-19.16)

<sup>6</sup> Cada Bashco fiesta ora, Pilato yojanamana canÿe utamená jëtsboshjonana, ndánaca entšanga tmojuabuayaná. <sup>7</sup> Chë tempo yojamna canÿa Barrabás ca uabainá; cárceloye inautámena chabe enutëngaftaca. Chëngna entšanga tmojtsanëbaye, mandadëngbe entšángaftaca imojentsjaná ora. <sup>8</sup> Chora, entšanga tmojánashjajna y tmojanontsé Pilátbioye jauyanana, ntšamo Bashco fiesta ora jamama yojanamancá

chaomama. <sup>9</sup> Y Pilato tojanějua: —¿Tšëngaftanga šmojtseboše tšëngaftangbe rey atše chjëtsboshjona ca?

<sup>10</sup> Chca tojánayana, er Pilato yojtsetátšëmbo, chë bachnangbe amëndayëngna envidia causa Jesús chabe cucuatšinë tmojánboshjonama. <sup>11</sup> Pero chë bachnangbe amëndayëngna entšanga tmojanañëmó chamuenbouénanama, Pilato jauyanama chëngbiamá Barrabás chabuatsboshjona ca. <sup>12</sup> Y Pilato tojanatjá: —¿Y ntšamo chjama chë “judiëngbe Rey ca” šmonduabobuatmáftaca ca?

<sup>13</sup> Y chënga tmojanáyebuachena: —¡Motsecrucificá ca!

<sup>14</sup> Y Pilato entšanga tojanéyana: —¿Ndáyeca? ¿Ntšamo cha tojobuachjanguá ca?

Pero chëngna más añémoca tmojtétanayebuachena: — ¡Motsecrucificá ca!

<sup>15</sup> As Pilato, entšángaftaca tšabá joquédama yojtsebóšeyecna, Barrabás tbojtanboshjona. Yojámëndaye soldadënga jabuache Jesús chamotsetšenama; y chentšana soldadëngbe cucuatšinë tbojánboshjona, chamocrucificama.

<sup>16</sup> Chentšana, chë soldadënga Jesús tmojanánatse chë mandadbe bëts yebnentša chashjoye, y nyëtsca soldadënga tmojánachembo chamobéconama. <sup>17</sup> Shbuenda uafjatsenga uinýna entšayá mo reycá tmojanichëtjo; canýe coronëshá tmojanapormá uchmašëfjangaca y tmojanabestšajó. <sup>18</sup> Y chentšana tmojanontšé jachuayana: “¡Bayté judiëngbe Rey cochtsemna ca!”

<sup>19</sup> Canýe niñëfjaca Jesús bestšašinë imojtsëtsjanjnaye, imojtsebuashëtjnaye, y chabe delante imojtsofshëntsaméntšenaye. <sup>20</sup> Y chca imnaftásáboyéjuanentšana, chë shbuenda uafjatsenga entšayá tmojtsanabotsca y cachabe entšayá tmojtanichëtjo, y pueblo chaboye tmojanánatse jacrucificama.

### *Jesús tmojanancrucificá*

*(Mt 27.32-44; Lc 23.26-43; Jn 19.17-27)*

<sup>21</sup> Chora, canýe entšá chëjana yojtsatashjauana, Simón ca uabainá, Cirene puebló, Alejandro y Rufbe taitá; jajocana yojtsatachnëjuana; y chë soldadëngna imojuatária Jesusbe cruz jëftsocutsayama.

<sup>22</sup> Jesús tmojanánatse Gólgota ca uabaina luaroye (hebreo biyañe endayana “Obanabe Bestšashe Luare ca”); <sup>23</sup> y tmojanabuiyé vínoye mírraca enájuaabniye, pero Jesús ndoñe yonjuáyëngacñe. <sup>24</sup> Y chentšana tmojanancrucificá; y chabe entšayangamna, tsbanánoye tmojanétšena jinýama ndayá cada ona yochjëtsanácñama.

<sup>25</sup> Cachëse, base mošenana ora Jesús tmojanrucificá. <sup>26</sup> Y chabe bestšaše juatsboicna canýe uabemana soye tmojananjo. Chiñe yojétsayana ndáyeca cha tmojanrucificama, mēntšá: MUA CHĚ JUDIĚNGBE REY ENDMĚNA ca.

<sup>27</sup> Y cháftaca útata bacna soye ochjajnayátnaca tmojanacrucificá, canýa chabe catšbioica, y ínýana chabe uañicuayoica. <sup>28</sup> Chca cháftaca tmojanma, chaochnēnguama ntšamo Bēngbe Bētsabe uabemana palabrenguiñe chabiama iuayancá, mēntšá: “Y chábioye tmonjáninýe mo chē puerte bacna soye amēnguentsá canýa cuaftsemncá ca.”

<sup>29</sup> Y chējana imojtsachnējuana entsanga, Jesús imojtsóyenguaye, imojtsobestšfshanenaye y imojtsatsaye: “¡Aca chē Bēngbe Bētsabe bēts yebna cochtsánenasatajchca y nýe unga tese cochtanjebo, <sup>30</sup> cach aca mentsbocá y cruzocana matastjango ca!”

<sup>31</sup> Cachcá chē bachnangbe amēndayēnga y chē ley abuátambayēnga imojtsáboyejuana, y chēnga imojtsenatsētsnaye: “Cha ínýenga tojēftsatsēbacá, pero cachá jénts bocama ndoñe quenátobena. <sup>32</sup> ¡Chē Cristo, chē Israeloca Rey! ¡Cruzocana chauatastjango, bēnga jinýama y chábeñe chaftsošbuachema ca!”

Y cháftaca ibojtsecrucificanátnaca ibojtsóyenguaye.

### *Jesús tojanóbana*

(Mt 27.45-56; Lc 23.44-49; Jn 19.28-30)

<sup>33</sup> Nýetsto orscana y las tresētscoñe, nýets quem luare yojtseibétata. <sup>34</sup> Chca orna, Jesús chabe biyañe tojanáyebuachena: “Eloi, Eloi, ¿lema sabactani ca?” (Chca endayana “Atšbe Bētsá, atšbe Bētsá, ¿ndáyeca cachcá šcojonýa ca?”)

<sup>35</sup> Chca tmojanuena ora, báseftanga chentše imojtsemnēnga imojtsichamo: “Mouenēnga, chē Bēngbe Bētsabe juabna oye-buambnayá Elías bontsechembuana ca.”

<sup>36</sup> As chora, canýa tojanójtjajo, untja vínoyeca canýe esponjēshe tojanfchecuacuá, canýe niñēfiñe tojananguēsētjo y Jesúsbioye tojanbeconá chaofšema; y tojánayana: “Cachcá mochjonýaye, er Elías tayochjabo jabátēstjanguama ca.”

<sup>37</sup> Pero Jesusna, jabuache tojanoyó y tojanóbana. <sup>38</sup> Y chē Bēngbe Bētsabe bēts yebnoca yojújonýana entsējua tsēntsaca yojtsenájataye, tsbanánocana fshantsoye. Chējua bēnējua in-aumna y chē tsatsēntsaca inaújonýana. <sup>39</sup> Chē romano soldadēngbe amēndayá, Jesusbe ndirichiñe yojtsemna; y ntšamo cha tojanobancá tbojáninýe ora, tojánayana: “¡Ndegombre quem boyabása Bēngbe Bētsabe Uaquiñá yomna ca!”

<sup>40</sup> Básefta shembásengnaca chentše imojtsemna, bēnocana imojtserreparana; chēnguentsē imojtsemna María

Magdalena; María, Santiago chë más basa y Josebe mamá; y Salomé. <sup>41</sup> Chë shembásengna Jesús tmojanasto y tmojanájabuache cha Galileoca yojamna ora; y inÿe ba shembásengnaca chentše imojtsemna, chë cháftaca Jerusalenoye tmojánanga.

### *Jesús tmojanatbontsá*

*(Mt 27.57-61; Lc 23.50-56; Jn 19.38-42)*

<sup>42</sup> Chë yëfsana ochnayté yojtsémnayeca, cach te yojánamna saná japróntana chë yëfsana jasama. Ya yojtseibétatana ora, <sup>43</sup> Pilato yojtsemnoye tojána canÿe boyabása, José ca uabainá, Arimatea pueblócá; cha inamna canÿe chë luarentša uámana mandayënguentsá. Cha Bëngbe Bëtsábeñe yojtsošbuáchiye y yojanobátmana chabe amëndayana chaóshjanguama. Ndauatjácá Pilátbioye Jesusbe cuerpo tbojanotjañe. <sup>44</sup> Pilato yojenjaná Jesús tša betSCO yojóbanama; as tojanmandá chë soldadëngbe amëndayá chamuachembo, jatjayama Jesús ya bën obaná tayojétsemnana. <sup>45</sup> Chë soldadëngbe amëndayana Pilátbioye ibojauyana Jesús ya obaná yojtsemna ca; y as chora, Josébioye tbojanlesenciá Jesusbe cuerpo chabotsámabañama. <sup>46</sup> Chora, José canÿe uafjantse lino entsëjua tojanabuamé, Jesusbe cuerpo cruzocana tbojanëstjango, chë lino entsëjuaca tbojanandmaná, y canÿe cuevëshiñe ndëtšbeñe pormánëshiñe tbojanajó; chentšana canÿe ndëtšbé tojansjoná, y chë cuevëshoye amashjuanentše tojánachto. <sup>47</sup> María Magdalena y María, chë José y Santiagbe mamá, tbojáninÿe ndayentše Jesusbe cuerpo tbojanájoma.

## 16

### *Jesús tojtanayena*

*(Mt 28.1-10; Lc 24.1-12; Jn 20.1-10)*

<sup>1</sup> Ochnayté tojanopasá ora, María Magdalena, María Santiagbe mamá, y Salomé, botamana uanguëtše béjaye tmojanabuamé, chíyeca jama Jesusbe cuerpo janëtjuama; <sup>2</sup> y tmenguse, chë semana bojatséntena, cabá cachëse, shinÿe yojábocna ora, chë cuevëshoye tmojána. <sup>3</sup> Imojtsaye ora imojtsayénatsëtsnaye: “¿Chë cuevëshoye amashjuanentša ndëtšbé nda bochtsabuajuána ca?”

<sup>4</sup> Pero imojontješiyé ora, tmojáninÿe chë cuevëshoye amashjuanentša bëts ndëtšbé, chentšana juanániñe. <sup>5</sup> As chënga choye tmojánamashjna y choye tmojáninÿe canÿe bobontse bën uafjantse entsëjua uichëtjoná, chë cuevëshentša catsbioica inëtsofbemañe; y chë shembásenga imojouatjaná. <sup>6</sup> Pero chë bobontse tojanéyana: “Ndoñe matauatjëngana; tšëngaftanga šmondënguá Jesús Nazaretocá,

chë tmonjancrucificá cha. Cha ya tontayena; muentše ndoñe quenátsmëna. Minyënga cha enjëftsejajonentše. <sup>7</sup> Motsajna, y Pedro y chë inye uatsjédayënga šmochjáuyana: ‘Jesús tšëngaftangbe natsana Galileoye echanjá. Choca cha šmochanjinyë, ntšamo cachá tmojanëyancá ca.’ ”

<sup>8</sup> As chë shembásenga betesco chë cuevëshentšana tmojésanbocana, er puerte auatjanánënga imojtsemna y ngmëmnyënga imojtsemna; y chë causa, chë soyama ndocná tmonjaniyana.

*Jesús, María Magdalénbioye tbojáneböbocna*  
(Jn 20.11-18)

<sup>9</sup> Jesús tojtanayenentšana, chë semana bojatsenté, Jesús natsana María Magdalénbioye tbojáneböbocna. Tempo Jesús chábentšana canýséfta bacna bayëjënga tojtanébuacana. <sup>10</sup> Cha Jesúsbioye ainá tbojáninýentšana, tojána Jesúseftaca imojánajnënga chama jaúnayama; chëngna ngménaca y šachénaca imojtsemna. <sup>11</sup> Pero chënga tmojanjuabó nderado mo ndoñe ndegombre yontsemna ca, chë Jesús ainá yojtsemna ca, y María Magdalena chábioye tbojáninýe ca tmojanuena ora.

*Uta ustonata Jesúsbioye tbojáninýe*  
(Lc 24.13-35)

<sup>12</sup> Chentšana, uta ustonátbioye, básefta yebnënga yojamna luaroye ibojétsaye ora, Jesús tojáneböbuacna, mo inýa cuaftsemncá. <sup>13</sup> Chora chata tbojésanshëcona chë inýënga chama jacúntama; pero chëngna cach ndoñe ndegombre ca tmojanjuabó.

*Jesús chë uatsjédayënga tojanichamó, Bëngbe Bëtsabe soyëngama nyetsquénache jábuayenama*  
(Mt 28.16-20; Lc 24.36-49; Jn 20.19-23)

<sup>14</sup> Cabana, Jesús chë bnëtsana canýe uatsjédayënga tojáneböbuacna, chënga imojtseye ora; y tojanëcácana chë cha ainá yojtsemnama ndoñe ndegombre yontsemna ca tmojánjuaboma y nyets ainánaca chábeñe ndoñe montsanošbuachema, er cha ainá tmojáninýënga chama tmojanacuntá ora, chca ndoñe ndegombre yontsemna ca chë uatsjédayënga tmojánayana.

<sup>15</sup> Chentšana Jesús tojanëyana: “Nyets luarëngoye motsajna, y nyetsca entšanga chë tšabe noticiëngama šmochtsabuayiynaye. <sup>16</sup> Nda chiñe chaojtsošbuaché y tšëngaftanga chašmojuabaye, cha atsbocaná echántsemna; pero nda ndoñe tontsošbuaché, cha nyets tempo castiganá echántsemna. <sup>17</sup> Chë átšbeñe ošbuáchiyënga ndegombre soyënga imojtsabuayiynama, entšanga

mëntšá mochantsetatšëmbo: atše jótšëmbonëse, átšbeñe betsošbuachéyeca, entšángbentšana bacna bayëjëngbe juabna mochantábocna; tempo chënga ndmabiyañe mochantsoyebuambnaye. <sup>18</sup> Masque nderado cucuatšinë mëtšcuayënga tmojishache o veneno tmojofšenga, ndocá quemochatšpása; y šoquëngbeñe cucuatšënga chamojacjá ora, chënga shnánënga mochantšatsmëna ca” —Jesús tojanéyana.

*Jesús Bëngbe Bëtsábioye tojtaná*

*(Lc 24.50-53)*

<sup>19</sup> Bëngbe Utabná Jesús jóyebuambayama tojanpochocá chentšana, celoye cha tmojtanatsbaná, y uámana luarentše, Bëngbe Bëtsabe catšbioica yojtóbema jtsemándayama. <sup>20</sup> Y chë uatsjéndayënga tmojánbocana y Bëngbe Bëtsabe soyëngama nyetsquénache entšanga tmojanabuayená. Cach Bëngbe Utabná chënga yojanëjabuáchana, y yojánama entšanga chamotsetatšëmbuama chë buayenana soye ndegombre Bëngbe Bëtsabe soyënga bëtsemnama, chë uatsjéndayënga bëts soyënga jamama obenana chamotsebomnama cha jtsamëse.

## San Lucas

### *Jabojátšama*

<sup>1</sup> Ba entšanga Jesusbe historia tmojuábema, ntšamo bēngbeñe ndegombre tojopasacá. <sup>2</sup> Chē historia juabemamna, chēnga tmojanuena ntšamo Jesusbe uatsjéndayēnga y inye entšanga chabiama innencuentaycá. Chē entšangna tmojáninye y tmojanuena ndayá Jesús tojanmama y ntšamo tojanayancá, y chentšana chabe tšabe noticiēnga entšángbíoie tmojanabuayená. <sup>3</sup> As, átsnaca sēnjontsé cuedádoca juanotíciana lempe ntšamo Jesusbiamama imojtsichamcá, tojanobojatšentšana mēntscoñe. Mora šontsinýana tšabá yojtsemna acbiamama juabemana ntšamo ndegombre yomncá, uámana taitá Teófilo, chē tjuanoticiá soyēngama, ntšamo ndegombre bēngbeñe tojopasacá. <sup>4</sup> Ba soyēnga Jesusbiamama tmojabuátēmbanga, y atše sēntseboše aca chacotsetátšēmo, ntšamo tcojouencá ndegombre yomnama.

### *Canye ángel tojanabuayená Juan chē Ubayaná jónýnama*

<sup>5</sup> Herodes Judea luaroca rey inamna ora, yojamna canye judiēngbe bachna, Zacarías ca uabainá. Cha yojamna Abíasbe bachnanguentša pamillo. Chabe shemna, Isabel ca yojanabaina, y chana Aarónbentšana entšá inamna (Aarón, chē más uámana bachnangbe natsana amēndayá). <sup>6</sup> Chatna tšabá amata ibnamna Bēngbe Bētsabe bominyiñe, y ntšamo Bēngbe Bētsá yomandacá ibojoyena; y chca, ndocná yonjanobena jayanana chata ndoñe tšabá ibonjánama ca. <sup>7</sup> Básenga tondaye ibonjánabamna, Isabel šešona jtsebomnama ndobena causa, y chatna ya bētsanánata ibojtsemna.

<sup>8-9</sup> Chē bachnanga Bēngbe Bētsabe bēts yebnentše tmojtso servena ora, sempre imojanamana jabocacayana, nda tšabá tbojtsonyēná, Bēngbe Bētsábíoie atschuanaye luaroye cháuama incienso jajuinýiyama. Canye, Zacaríasbe entšanga Bēngbe Bētsabe bēts yebnoca, Bēngbe Bētsábentše imojtso servena orna, Zacaríasbíoie tšabá ibojonýena; y chca, cha ibojotóca jana incienso jajuinýiyana. <sup>10</sup> Zacarías, incienso yojtsejuinýnantscuana, ba entšanga shjoca imojtsemna, Bēngbe Bētsáftaca encuéntaye. <sup>11</sup> Nye ndeolpe, Bēngbe Utabnabe canye ángel tojanonýná chē incienso jajuinýiyama altarentša catšbioica. <sup>12</sup> Zacarías chábíoie tbojáninye ora, tojanenjaná y corente uatjana tbojanábuache.

<sup>13</sup> Chora chē ángel tbojaníyana: —Zacarías, ndoñe matauatjana. Bēngbe Bētsá tonjouena ntšamo tconjaimpadacá. Acbe



shema Isabel canÿe šešona bochántsebmna, boyabásetema, y chana Juan ca cochjuabaye. <sup>14</sup> Chama aca corente oyejuayá cochántsemna, y bĕtsá entšanga mochanjóyejuaye acbe uaquiñá tojonÿnama. <sup>15</sup> Er cha, Bĕngbe Bĕtsabiana canÿe uámana entšá echántsemna. Ndocna te queochaisofsiye vínoye, ni jabuáchiye. Chĕ Uámana Espírítu chabe ainaniñe echantsemádaye, cha cabá ndonÿna orscana. <sup>16</sup> Banga Israeloca entšanga, ntšamo cha chaojayanama mochanjontšé joyeunayana Bĕngbe Bĕtsá, chĕngbe Utabná. <sup>17</sup> Cha echanjáshjango chĕ Bĕngbe Bĕtsabe Uámana Uabuayanabe natsana, y echántsebmna obenana y canÿe espírítu ntšamo chĕ Bĕngbe Bĕtsabe juabna oyebuambnayá Elías inaboncá. Chabe natsana echanjáshjango, bĕtsĕtsanga chĕngbe básengaftaca ndoñe chamondĕtsentsjanama, y chĕ nduaue-nanĕnga cachiñe chamotsatsjuabnama ntšamo chĕ Bĕngbe Bĕtsabe bominiñe tšabá amĕnga mondbetsejuabnacyá. Y chca, entšanga cha echantsapróntaye Bĕngbe Utabná jabama orscama ca —chĕ ángel tbojaniana.

<sup>18</sup> As Zacarías chĕ ángelbioye tbojantjá: —¿Ntšamo atše stjobenaye jtsetatšĕmbuana chĕ šcontsatsá soye ndegombre bĕtsemnama? Er atše ya bĕtsĕjema sĕntsemna y atšbe shémnaca cachcá ca.

<sup>19</sup> Chora chĕ ángel tbojanjúá: —Zacarías, atše ángel Gabriel sĕndmĕna; atše Bĕngbe Bĕtsábioca sĕndoservena. Cha šonjichmó chĕ tšabe noticiĕnga aca jauyanama y juenayama. <sup>20</sup> Morna, chĕ cbontsatsá soyiñe ndoñe quecatošbuaché causa, ndĕbiá cochanjoquéda, y ntšamo cbontsatsacá chaojopasá ora, chama tempo chaojtsemna ora, chora jóyebuambayama cochantobenaye ca.

<sup>21</sup> Chĕ ángel Zacaríaseftaca yojtsoyebuambnantscuana, entšanga shjoca Zacaríasbiana imojtsobátmana, y mĕntšá imojtsejuabnaye: “¿Ndáyeca tša bĕn Bĕngbe Bĕtsabe bĕts yebnentše ibojtsobiamná ca?” <sup>22</sup> Zacarías tojtanbocna ora, ndoñe yontsobena chĕ entšángaftaca jóyebuambayana. Chĕnga tmojántatšĕmbona, chĕ Bĕngbe Bĕtsábioye atschuanayentše Zacarías mo otjenayoquĕcá Bĕngbe Bĕtsábiocana canÿe soye tojáninÿama, er chĕngbioye jatšĕmbombonana yojáuyana, ndĕbiá yojoquĕda causa.

<sup>23</sup> Chabe tempo, chĕ Bĕngbe Bĕtsabe bĕts yebnentše jtsetrabájayama tojanpochocá ora, Zacarías cachabe yebnoye tojtaná. <sup>24</sup> Chentšana baseftaytese, chabe shema Isabel ngomamaná yojoquéda, y chĕ causa, chĕ shema shachna ishinÿe cach tsoca yebnentše totanoquĕdá. <sup>25</sup> Cha mĕntšá yojtšichamo: “Bĕngbe Utabná mora atšbiana tojtenojuabó,

entsángbentše atšbe ngménana jtsebojuánama, básenga ton-daye béntsabamna causa ca.”

*Canye ángel tojanabuayená Jesús jónynama*

<sup>26</sup> Isabel chnēnguana ishinye ngomamaná yojtsemna ora, Bēngbe Bētsá, ángel Gabriel tbojanichmó Galilea luaroye, Nazaret ca uabaina puebloye, <sup>27</sup> canye shembása María ca uabainá jauatsētsayama. Mariyna cabá boyabása nduabuatmá inamna, pero Joséftaca jobouamayama tbojansbuachená. Y Josena, rey Davídbentšana entsá inamna. <sup>28</sup> Chē ángel Maríybioye tojána y mēntšá tbojanчуá: —¡Mouena. Bēngbe Bētsá tšabe bendición acbiama tonjama! ¡Bēngbe Utabná ácaftaca entsemna ca!

<sup>29</sup> Chca tojanuena ora, María yojenjnaná chē soyama, y yojtsejuabnaye ndáyeca chē ángel chca tbojanчуama.

<sup>30</sup> Chora chē ángel tbojaniyana: —María, ndoñe matauatjana, Bēngbe Bētsá entsama tšabe bendicionēnga chacotsebomnama. <sup>31</sup> Aca ngomamaná cochanjoquéda y canye šešona boyabásetema cochántsebomna, y chana Jesús ca cochjuabaye. <sup>32</sup> Cha puerta echantsámana, y entsangna Bēngbe Bētsabe Uaquiñá ca chábioye mochantsábobuatma. Y Bēngbe Bētsá chē Utabná, chábioye canye rey bochanjábema, ntšamo David yojamncá, <sup>33</sup> y Jacóbēbentšana entsanga nyetsca tescama echantsamēndaye, y chabe mándayana ndocna te queochaisopochóca ca —chē ángel tbojaniyana.

<sup>34</sup> Chentšana María chē ángelbioye tbojantjá: —¿Ntšamo chca yochjopása, cabá ndoñe boyá sēntsebomnēse ca?

<sup>35</sup> Y chē ángel tbojanjuá: —Chē Uámana Espiritu echanjabo nyets ábeñe, y Bēngbe Bētsabe obenánaca ngomamaná cochanjoquéda. Chabe obenana mo jantšetēshcá cmochanjabouútsbotse; chíyeca chē echanjónyna šešona Uamaná echántsemna, y chábioye Bēngbe Bētsabe Uaquiñá ca mochantsábobuatma. <sup>36</sup> Mouena, Isabel, acbe primá, canye šešona bochántsebomna, masque ya bētsananá cha entsemna; chē “šešona ndbomná ca” monjanabobuatmá, mora ya chnēnguana ishinye ngomamaná entsemna, <sup>37</sup> er Bēngbe Bētsá lempe jamama endobena ca —cha tojánayana.

<sup>38</sup> Chora María chē ángelbioye tbojaniyana: —Bēngbe Bētsabe oservená atše sēntsemna. Bēngbe Bētsá átšeftaca chaoma ntšamo šcojauyancá ca.

Y chentšana chē ángel tojtsatanoñe.

*María tojána Isabel jabuáchama*

<sup>39</sup> Chentšana, María tojanoprontá y tojanochēmo canye puebloye, Judeoca tjañenache luariñe. <sup>40</sup> Chocna cha, Zacaríasbe yebnentše tojánamashēngo y Isabélbioye

tbojanchuá. <sup>41</sup> Isabel ntšamo María tbojanchuama tojanuena ora, Isabelbe šešona chabe uafsbioye tojanobonjó, y chë Uámana Espiritu Isabélbeñe tojánamashëngo chabe ainaniñe jtsemándayama. <sup>42</sup> Chcasna, Isabel jabuache tojánayana: —¡Bëngbe Bëtsá acbiana más tšabe bendicionënga entsama nyetsca shembásengbiana, y chë cochántsebmna šešonbiámnaca cachcá! <sup>43</sup> Atše mercedo taitatobuajoñe, atšbe Utabnabe mamá chašuabobuáchama; <sup>44</sup> er atše sënjouena ntšamo šconjachuá, y cachora atšbe šešona oyejuayá atšbe uafsbioye tonjobonjó. <sup>45</sup> ¡Aca Bëngbe Bëtsábeñe tcojošbuaché; cojtsetátšëmbo Bëngbe Bëtsá ntšamo tmojašbuachenacá yochjamama; chíyeca puerte oyejuayá cochántsemna ca!

<sup>46</sup> Chora María tojánayana:

“Nyets ainánaca Bëngbe Utabná chantsadorana,

<sup>47</sup> y Bëngbe Bëtsá, atšbe Atsbocayabiana corente chanjóyejuaye.

<sup>48</sup> Bëngbe Bëtsá atšbiana tojtenojuabó, atše chabe oservénëjema.

Er morscana muentša entšanga nyetscanga puerte oyejuayá ca šmochantsábobuatma.

<sup>49</sup> Bëngbe Bëtsá, chë nyets obenana bomná, chabe obenánaca bëts soyënga atšbiana tonjama.

¡Bëngbe Bëtsá puerte Uamaná ca entsabaina!

<sup>50</sup> ¡Morsca entšanga y más chcoyënga, chábioye yeunanëngbiana, cha sempre bochántsengmena!

<sup>51</sup> Cha, chabe obenánaca bëts soyënga tojama, y chë nÿe cachënga bëtsëtsanga enobiamnayëngbe juabna tojtsepochohá;

<sup>52</sup> reyëngbioye chëngbe mándayentšana tojtsatsatše; pero chë nÿe cachënga bëtsëtsanga ndenobiamnayëngbioye, uámanënga tojábiana.

<sup>53</sup> Chë shëntseca imomnëngbioye, chamosama bëtscá cha tojatšatá,

pero chë bomnëngbioyna tondaye tonjatšatá.

<sup>54</sup> Cha tojanéjabuache chabe entšanga Israeloca, chabe oservénënga,

y ndoñe tbonjánebnatjëmbe jtsalastemánana,

<sup>55</sup> nyetsca tescama chë Abraham y chábentšana entšángbioye, ntšamo bëngbe bëts taitanga Bëngbe Bëtsá tojanašebuachenacá ca” —cha tojánayana.

<sup>56</sup> Mariyna unga ishinÿe Isabélaftaca tojanoquedá, y chentšana cachabe yebnoye tojtaná.

*Juan chë Ubayaná tojanonÿná*

<sup>57</sup> Isabel jtsešócanama tojanóntšabuache ora, canye šešona boyabásetema tojanonýná. <sup>58</sup> Isabelbe juachañe oyenënga y chabe pamíllanga tmojánatšëmbona ntšamo Bëngbe Bëtsá chábioye ibojalastemama, y chama corente Isabélaftaca tmojanoyeuanga. <sup>59</sup> Chë šešona posuftayté yojtsebomna ora, tmojánashjango y chëtëmbioye chë más delicadentse base bobachtema tmojantëtse, ntšamo chë judiënga imojanamancá. Chënga imojétseboše chë šešónbioye Zacarías ca juabáyana, cach beftcá; <sup>60</sup> pero chabe mamá tojanëyana: — Ndoñe. Quem šešona echantsabaina Juan ca.

<sup>61</sup> As chënga Isabélbioye tmojanianya: —Acbe pamíllangbeñe ndocná chca quenatabaina ca.

<sup>62</sup> Chora chënga jatšëmbombonana Zacaríasbioye tmojantjá, ntšamo chë šešona chaotsabainama cha yojtseboše ca. <sup>63</sup> Zacaríasna jatšëmbombonana canye tablëbé tojanëyá y chiñe tojanábema: “Cha entsabaina Juan ca”. Y chë causa, nyetscanga ojnánänënga imojtsemna. <sup>64</sup> Y cachora Zacarías jóyebuambayama yojtobenaye, y yojontsé Bëngbe Bëtsábioye jëtschuayana. <sup>65</sup> Chë juachañe oyenënga nyetscanga tmojanëuatjaná, y Judeoca nyetsca chë tjañenache luariñe entšanga chë soyëngama imojtsencuëntaye. <sup>66</sup> Nyetscanga chë soyëngama tmojánatšëmbona ora, chëngnaca corente chama imojtsejuabnaye y mëntšá imojtsichamo: “¿Chë básetema, bëtsá ora nda yochtsemna ca?” Y ndegombre, Bëngbe Bëtsabe obenana cháftaca yojtsemna.

*Zacarías, Bëngbe Bëtsábioye jëtschuayama*

<sup>67</sup> Chë Uámana Espíritu tbojanmandá ora, Zacarías, chë basetembe taitá, Bëngbe Bëtsabe mándoca jtsóyebuambnayëse, mëntšá tojánayana:

<sup>68</sup> “¡Chë Utabná, chë Israeloca entšangbe Bëtsá matschuanga, er cha tonjabo chabe entšanga jabújabuachama y jabátsebacama!

<sup>69</sup> Cha bochanjíchmuá canye atsebacayá puerte obenana bomná,  
y cha echántsemna Bëngbe Bëtsabe oservená Davidbentšana entšá;

<sup>70</sup> ntšamo Bëngbe Bëtsá bayté entsemna, chë chabe juabna oyebuambnayëngbiajana,  
chë chábenga imomnëngbiajana bënga šojanašebuachenacá,  
mëntšá:

<sup>71</sup> Cha canya bochjanichmuá bëngbe uayayënga y nyetsca uaboyënjëngbiamá bënga jabátsebacama;

<sup>72</sup> bëngbe bëtsëtsangbioye jálastemama,  
y jenójuaboyama y jamama chabe uámana trato,

73 ntšamo Bëngbe Bëtsá, bëts taitá Abrahámbyoye  
tbojanšbuachenacá.

74 Cha tbojanšbuachená bëngbe uayayëngbiamá bënga  
jabátsebacama,

chca, bënga ndauatjca Bëngbe Bëtsá jasérviamá,

75 y chabe entšangcá, nÿetsca soyënguiñe tšabá amënga,  
Bëngbe Bëtsabe delante nÿetsca te bëngbe vidënguiñe  
jëftsiyenama.

76-77 Y aca, atšbe básetemna, Bëngbe Bëtsabe juabna oyebuamb-  
naya ca cmochantsábobuatma,

entšangbyoye Bëngbe Bëtsabe soyëngama cochtsabuayiynama,  
Bëngbe Utabná cabá ndáshjango ora, bacna soyënga amana  
chamuajbanama;

as Bëngbe Bëtsá chëngbe bacna soyënga echanjáperdonaye, y  
Bëngbe Utabná jabama mochantsopróntaye.

78-79 Bëngbe Bëtsá bënga puerte šualastemánayeca,  
canÿa bëngbe juabnënga binÿnaya bochanjíchmuá,  
bënga chë bacna soyënga causa mo ibetiñcá y obanëngbe  
luarentšcá vida bomnëngbyoye jabátsebacama,  
y jabuátambama ntšamo natjëmbana jtsiyenana ca” —cha  
tojánayana.

80 Chë básetema yojontsé jobóchana y chabe espíritnaca  
puerte. Bayté, entšanga ndoyena luarënguenache cha  
yojëftsiyena, Bëngbe Bëtsá Israeloca entšangbyoye cha  
tojáninÿanÿentscuana. Chentšana, chamuábuatmanamna  
tojanontsé Israeloca entšangbeñe jóyebuambayana.

## 2

### *Jesucristo tojanonÿná*

*(Mt 1.18-25)*

1 Chë tempo yojamna canÿe Romoca bëts mandado, Au-  
gusto ca uabainá; y cha, chë natsanama tojanmandá nÿetsca  
entšanga chamuenábemama. 2 Chë soye tojanochnëngo Cire-  
nio ca uabainá Siroca mandado yojamna ora. 3 Chamna,  
nÿetscanga tojanotocá jtangana jenábemëngama, cada ona  
ndëmoca chëngbe bëts taitanga imojëftsiyena puebyoye.

4 As, Joséna Galilea luarentšana Nazaretocana  
yojëftsebozna y Judeoye, Belén puebyoye, tojtaná. Tempo,  
Josebe bëts taitá rey David, Belenoca inoyena. Y José,  
Davídbentšana entšá inámnayecna, choye jenábemama tojtaná.

5 Maríaftaca tojána jenábemama, y muana tbojanšbuachená  
Joséftaca jobouamayama. María ngomamaná yojtsemna, 6 y  
Belenoca ibojtsemnëntscuana, chë ora tbojanóntšabuache  
jtsešócanama. 7 Y chentše María ibojtsebozna chabe  
natsana šešona, canÿe boyabásetema. Posadoca tondaye

luare yontsemna causna, chata nÿe uacnëngbe átana tambuentše tbojanoquedá. Y Jesús tojanonÿná orna, María tbojtanëntsacjuá y canÿe bachetémiñe tbojanjajó.

*Chë angelotémënga y chë oveshënga abujänÿyanga*

<sup>8</sup> Belén béconana, chë ibeta, oveshënga abujänÿyanga shëntsjoca cachëngbe oveshëngaftaca imojtsemna. <sup>9</sup> Nÿe ndeolpe, Bëngbe Bëtsábiocana canÿe ángel tojánebëbuacna, y Bëngbe Bëtsábentsana corente yojtsebuashinÿinÿana chëngbe shëconániñe. Chama chënga puerte imojocochauatjaná.

<sup>10</sup> Chora chë ángel tojanëyana: “Ndoñe matauatjëngana. Sënjabo tšabe soyënga tonjopasama jábuayenama, nÿetscanga chamóyejuama. <sup>11</sup> Mora chë David tonjanonÿná pueblentše canÿe šešona tonjonÿná. Cha tšëngaftangbe atsebacayá echántsemna y tšëngaftangbe entšangbiámnaca. Cha endmëna chë Bëngbe Bëtsabe Uámana Uabuayaná, Cristo ca uabainá, y Bëngbe Utabná. <sup>12</sup> Ndegombre chca entsemnana mëntšá šmochanjátatšëmbona: canÿe šešona ntsacjuaná y uacnëngbe bachetémiñe jajoná šmochanjÿnÿena ca” —cha tojanëyana.

<sup>13</sup> Cachora, celocana mallajta angelënga chë natsana ángelbentše tmojánbocana y Bëngbe Bëtsábioye mëntšá imojtsatschuanaye:

<sup>14</sup> “¡Bëngbe Bëtsá, celoca entsemná matschuanga!

Bëngbe Bëtsábioye yeunanëngbiama, Bëngbe Bëtsá corente entsoyejuá; quem luariñe chëngbeñe puerte tšabá chaotsemna ca.”

<sup>15</sup> Chentsana chë angelënga celoye tmojésanshëcuana. Y chora chë oveshënga abujänÿyanga tmojanontšé jeniyanana: “Belenoye cuajna, chë quem tojopasá soye jinÿama. Ndegombre, Bëngbe Bëtsá chë soye šojanÿanÿé ca.”

<sup>16</sup> As betesco tmojána y tmojánanÿena María, José y chë šešonatema bachetémiñe jajoná. <sup>17</sup> Chë šešona tmojáninÿe ora, chënga tmojanacuntá Jesusbe bëtsëtsata y chë inÿengbioye, ntšamo chë šešonbiama chë ángel tojanëyancá. <sup>18</sup> Nÿetscanga chë tmojanuenënga tmojanenjananá ndayá chë oveshënga abujänÿyanga imojtsacúntama. <sup>19</sup> Pero Mariyna nÿe cachabe ainanoca quem soyëngama más bën inétsenujabnañe.

<sup>20</sup> Chentsana, chë oveshënga abujänÿyanga tmojtana Bëngbe Bëtsá atschuanaye, ndayá tmojáninÿama y tmojanuenama. Nÿetšá tojanopasá lempe ntšamo chë ángel tojanëyancá.

*Bëngbe Bëtsabe bëts yebnoye Jesús tmojanamba*

<sup>21</sup> Posufta te tojánashjache ora, chë basetëmbioye chë más delicadentše base bobachtema tmojantëtše, Bëngbe Bëtsabe entšá bëtsemnana chaotsinÿinama, ntšamo judiënga imojanamancá;

y Jesús ca tmojanabaye, ntšamo chë ángel tbojaniyancá, María cabá ndoñe ngomamaná yontsemna ora.

<sup>22</sup> Y chë tempo tojanóshjango, ndaye ora José y María yo-  
jtsamna jamana ntšamo Moisesbe leyiñe iuayancá, ndayá  
jamama yojanmëncá, canye shembása Bëngbe Bëtsabe de-  
lante tšabia jtsatsmënema, canye šešona tbojtsebomnentšana.  
Asna, Jerusalemoye tbojánata y chë bášetema tmojanamba,  
Bëngbe Bëtsabe bëts yebnoca jinjinyiyama, <sup>23</sup> ntšamo chë  
Bëngbe Utabná Moisésbioye tbojaniyé leyënguiñe iuayancá,  
mëntšá: “Canye yebnentše chë natsana šešona boyabása tojt-  
semnësna, Bëngbe Bëtsábioye cha jinjinyiyana chábioye chabot-  
seservénema ca.” Chcasna, chë bášetema Bëngbe Bëtsabe  
bëts yebnoye tmojanamba. <sup>24</sup> Y tmojanamba janshana uta  
shloftše, Bëngbe Bëtsá jëtschuayama, ntšamo Bëngbe Utabnabe  
leyiñe yomandacá. Chiñe mëntšá endayana: “Chë natsana  
šešona chaojonýná ora, boyabášetema tojtsemnëse, janshana  
šmochjuamba uta fchetnatémata o uta šešona palomatémata,  
Bëngbe Bëtsá jëtschuayama ca.”

<sup>25</sup> Jerusalemoca inamna canye bacó, Simeón ca uabainá;  
cha inamna nýetsca soyënguiñe tšabá amá, y yojaniyena  
ntšamo Bëngbe Bëtsá yomandacá. Cha yojanobátmana chë  
tempo ndaye ora, Bëngbe Bëtsá bochjanichmuá canya Israe-  
loca entšanga cháuatsebacama. Y chë Uámana Espíritu chabe  
ainaniñe yojtsemna; <sup>26</sup> chíyeca, cabá lempe chca ndopása ora,  
cha yojtsetátšëmbo cha ndoñe yochjanóbanama, chë Bëngbe  
Bëtsabe Uámana Uabuayaná ntjéftsinyá. <sup>27</sup> Chë Uámana  
Espíritu tbojanmandáyeca, Simeón Bëngbe Bëtsabe bëts yeb-  
noye tojána; y Jesusbe bëtsëtsata chë bášetema tmojanamba  
ora, ntšamo Moisesbe leyiñe iuayancá chabiamá jamama ora,  
<sup>28</sup> Simeón tbojanocutsá y Bëngbe Bëtsábioye tbojtanchuá. Cha  
mëntšá tojánayana:

<sup>29</sup> “Bëngbe Utabná, mora šmolesenciá, atše acbe oservená  
natjëmbana jóbanana,

er ya tconjama ntšamo šconjanšbuachenacá;

<sup>30</sup> atše chë entšangbe Atsebacayá sënjinýe.

<sup>31</sup> Aca cha tcojichmó nýets luarenache entšangbiama.

<sup>32</sup> Cha chë ndoñe judiëngbe juabnënga binýnayá echántsemna;  
y chábeyeca, nýets quem luarentše mochanjátatšëmbona,  
chë acbe entšangbiama, Israeloquëngbiama ca” —cha  
tojánayana.

<sup>33</sup> José y María ibojenjanata ntšamo Simeón Jesusbiamá  
yojtsichámuama. <sup>34-35</sup> Chentšana, Simeón Bëngbe Bëtsábioye  
tbojanimpadá tšabe bendicionënga chata chabotsebomnama  
chaomama; y María, chë Jesusbe mamábioye tbojaniyana:  
“Quem soyënga corente cmochanjacochtsetšenaná, mo

ainana espadějaca cuafjeněchněngcá. Cha Israeloca banga echanjápochocaye y banga echanjátsebacaye; y chca, ntšamo banga ainaniñe imojuabnacá echantsótatšēmo. Israeloca banga quem básetema mochantsábotena y chabe palabrěngnaca ca” —cha tbojaniyana.

<sup>36</sup> Chěntšnaca yojtsemna canye shembása Běngbe Bětsabe juabna oyebuambnayá, Ana ca uabainá; cha yojamna Fanuelbe bembe y Aserbe pamillentšá; ya bětsananá cha inamna. Nye canyěsěfta uata cha yojěftsebouamna; <sup>37</sup> y chabe boyá tojanóbanentšana, cha posufta bnětsana y canta uata viudá inamna. Ndocna te Běngbe Bětsabe běts yebnentšana yonjábocana, y chentše tojanoquedá bněté y ibeta, Běngbe Bětsáftaca encuéntaye y cha atschuanaye; y chama, ba soye yojanamana tondaye ntjascá jtsemnana. <sup>38</sup> Simeón, María y Josébioye yojtsětsětsnaye ora, Ana chěngbioye yojobeconá, y chě Atsebacayá tojanonynama Běngbe Bětsábioye tbojtanchuá chentšana, Jerusalenoca entšangbioye, chě canye atsebacayá Israeloca entšangbiamama imojanobatmaněngbioye tojaněyana, chana Jesús yojětsemna ca.

### *Jesús Nazaret puebloca*

<sup>39</sup> José y María lempe ntšamo chě Utabnabe leyěnguiñe iuayancá tbojanma ora, Galilea luaroye tbojtanata, cachěngbe puebloye, Nazaretoye. <sup>40</sup> Y chě básetema yojtsobóchaye, y más añemo yojtsejacana y más osertánana yojtsebmoma. Y Běngbe Bětsá yojánama cha bětscá tšabe bendicioněnga chaotsebmoma.

### *Jesús Běngbe Bětsabe běts yebnoca*

<sup>41</sup> Chabe bětsětsata ibojanamana cada uata Jerusalenoye jana Bashco fiestama, chě Běngbe Bětsá chě judiěngbe běts taitangbioye Egiptocana tojánatsebacama jtenójuaboyama fiesta. <sup>42</sup> Jesús bnětsana uta uata tojánashjache ora, Jerusalenoye tmojána, ntšamo imojanamancá. <sup>43</sup> Chě fiesta tojanopochocá chentšana, chabe bětsětsata yebnoye ibojtsataye, y chata ntsetatšěmbcá, Jesusna Jerusalenoca yojtsoquedañe. <sup>44</sup> Chata ibojětsejuabnaye Jesús chě inye entšangtaftaca yojtsataboye ca; chcasna, canye te nyetšá benachějana tbojánata ora, tbojanontšé chabe pamíllangbeñe y ubuatměngbeñe jtsenguan-guana, <sup>45</sup> pero ndoñe ibonjobenaye jtsinynana. As, chata chora Jerusalenoye tbojěsanshěcona choca cha jetsenguan-guama.

<sup>46</sup> Unga tianoye chata tbojanobená Běngbe Bětsabe běts yebnentše cha jetsinynana. Chana chě Moisesbe ley abuatambayěngbe tsěntsaca inětsotbemañe, chěngbioye inayaunana, inatjanaye. <sup>47</sup> Nyetsca ouenaněnga



imojtsenjanaye Jesús tša osertaná inamnama, y tša tšabá jojuama cha yojtsobenama. <sup>48</sup> Chabe bētsētsata chca tbojáninye ora, chátnaca ibojenjaná. Chora, chabe mamá tbojaniana: —Uaquiñá, ¿ndáyeca chca bēndátaftaca tcojama? Taitá y atše corente enócochinýenata cbondēguá ca.

<sup>49</sup> As Jesús tojanēyana: —¿Ndáyeca atše šmonguá? ¿Ndoñe sondētatsēmbo atše šomna atšbe Taitabe yebnentše jtsemnana ca?

<sup>50</sup> Pero chē bētsētsata ndoñe tonjanēsertá ntšamo cha tojanēyancá.

<sup>51</sup> Chentsana Jesús chē bētsētsataftaca Nazaretoye tojtaná y chata yojtsayaunana. Y chabe mamana nýe cachabe ainanoca chē soyēngama más bēn inétsenujabnañe. <sup>52</sup> Jesús yojtsobóchaye y más juabna yojtsebomna; y Bēngbe Bētsá y nýetsca entšanga corente oyejuayēnga chabiana imojtsemna.

### 3

#### *Juan chē Ubayaná entšanga yojanabuayiyá (Mt 3.1-12; Mc 1.1-8; Jn 1.19-28)*

<sup>1</sup> Bnētsana shachna uatama Tiberio César Romoca bēts mandado yojamna ora, Poncio Pilato yojamna Judeoca mandado, Heródesna Galileoca rey, chabe catšata Felipe Iturea y Traconitoca rey, y Lisániasna Abilinioca rey. <sup>2</sup> Anás y Caifás chē bachnangbe más uámana amēndayata ibojamna. Cach tempo, canýe luare entšanga ndoyenentše Bēngbe Bētsá tbojanatsētsá Juánbioye; Juan, Zacaríasbe uaquiñá.

<sup>3</sup> As Juan nýetsca luarēnguējana Jordán bėjaye béconana tojánachnēngo, entšanga mēntšá utsētsnaye: “Tšēngaftangbe bacna soyēngama ngmēnaca šmochtenójuaboje, chca amana šmochtsajbaná y Bēngbe Bētsabe benache šmochtishache. Chora cbochjúbaye, y Bēngbe Bētsá tšēngaftangbe bacna soyēngama cmochanjáperdonaye ca.” <sup>4</sup> Chē soye tojanopasá, cachcá ntšamo chē Bēngbe Bētsabe juabna oyebuambnayá Isaías chabe librēšañe yojēftsabemcá. Cha mēntšá tojanábema: Entšanga ndoyena luaroca canýa enduáyebuache:

“Bēngbe Utabná echanjabo ca; mo nda canýe benache tojtseprontacá canýe uámana entšá jashjanguama, cachcá, tšēngaftángnaca, Bēngbe Utabná jabama ainanentše tšabe juabnēngaca šmochtseprontana.

<sup>5</sup> Nýetsca jachañe echantojútjia, y tjañe y batsjabenga mochantenájachibiaye.

Chē scundma benachēnga ndirichējēnga echántatsmēna, y chē bacá mana benachēnga mochantenájachibiaye.

Mo chē chca tmojtsamēngcá, canýe benache japróntana canýe rey cháúashjanguama,

tšëngaftángnaca bëtscá šmochtseprontana tšëngaftangbe ainaniñe, Bëngbe Utabná jabama.

<sup>6</sup> Y nÿetsca entsanga mochanjinÿe chë Atsebacayá Bëngbe Bëtšábentšana jabana ca” —cha tojanábema.

<sup>7</sup> Chë entsanga Juan chaubáyama imojánbocana ora, Juan yojanëtsësnaye: “¡Mëtscuaye entsanga! ¿Nda tcmënjáuyana chë echanjóshjango uabouana castigüentšana šmochjotsbocá ca?

<sup>8</sup> Bëngbe Bëtšábeñe ndegombre ošbuáchiyënga šmochtsemna, as chca chaotsinÿna, tšëngaftanga chë bacna soyënga amana ndegombre šmojtsajbanama. Y ndoñe šmattsejuabnaye cach tšëngaftangbiama jayanama: ‘Bëngna Abrahámbentšana entsanga, Bëngbe Bëtšabe entsanga fsëndmëna ca’. Er atše chanjayana, Bëngbe Bëtšá quem ndëtšbéngacnaca Abrahámbentšana entsanga nanjábiama.

<sup>9</sup> Tatšnía ya entsaprontana chë betiyeshënga tbëtëjengocana jtseshatëtsetšama. Ndaye betiye ndoñe tonjashájona, jtseshatëtšana y iñoye jtsatmetšana; tšëngaftangftácnaca cachcá, tšabe soyënga ndoñe šmontsamëse, Bëngbe Bëtšá cmochanjácastigaye ca” —cha yojanëtsësnaye.

<sup>10</sup> —¿Y as, ndayá jamama šojtsamna ca? —chora chë entsanga tmojantjá.

<sup>11</sup> Y Juan tojanëjua: —Chë uta quëfsáiya uabomná bontsemna canÿiyá jutštayana chë tondaye tonduabomná. Saná bomná bontsemna juajatayana chë tondaye saná tondbomnábioye ca.

<sup>12</sup> Romocama entšángbioye impuesto atjanayëngnaca jenábayama tmojánabo. Chënga Juánbioye tmojantjá: —Buatëmbayá, ¿ndayá jamama šojtsamna ca?

<sup>13</sup> Y Juan tojanëyana: —Nÿe ntšamo chë leyíñe yomandancá entšángbioye crocénana šmochtsayëngacaye ca.

<sup>14</sup> Básefta soldadëngnaca chábioye tmojantjá: —¿Ndayá jamama šojtsamna ca?

Y Juan tojanëyana: —Ndocnábioye tondaye šmatjáboca, ni jauátjanase, ni nÿe ndayámnaca bonamente jobuáchëse; y nÿe ntsachetšá šmacaná crocénanaca oyejuayënga šmochtsomñe ca.

<sup>15</sup> Entšanga chë Bëngbe Bëtšabe Uámana Uabuayanabiama imojtsobátmana, y chëngna Juanbiama imojëtsejuabnaye nderado cha chë Bëngbe Bëtšabe Uámana Uabuayaná nanjamna ca;

<sup>16</sup> pero Juan tojanëyana: “Ndegombre, atše béjayeca cbondubáyana. Pero chë echanjabá atšbiama corente más obenana endbomna, y atše merecido taitatobuajoñe ni mo jotsejbiyana chabe shecochëtjonëshentša corriëja jajafjonama. Chë Bëngbe Bëtšabe benache chamojtishachëngbiama, Bëngbe Bëtšá echanjama chë echanjabábeyeca, chë Uámana Espiritu

chëngbe ainaniñe cháuamashënguama. Pero chë ndoñe chamontishachëngbiamna, Bëngbe Bëtsá echanjama chë echanjabábeyeca, chënga corente castigánënga chamotsemnama, mo ñeshéquécá. <sup>17</sup> Canye entśá chabe mëtštá cucuatsiñe jiyëbana, chabe trigo jtsóbobemama, y chë ndoservena shácuanënga jtsejashtsëtsana. Chabe trigo chë grano uaquëcjnaye tsañe jtsabuájuana, y chë ndoservena shácuanëngna ñeshoye jtsatmetšana. Cachcá, chë átsbentsana echanjabá, chë tsabe entśanga echanjúbuaja, y chë bacna entśangna ñeshiñe echantsacastigaye, y chë ñe ndocna te queochátsfsana ca” — cha tojanëyana.

<sup>18</sup> Chca y inye palabrengaca Juan chë tsabe noticiëngama yojanabuayiyná. <sup>19</sup> Tempo, Juan Heródesbioye tbojanácacana, cha tojanobouamama cachabe catšata Felipbe shëmaftaca, Felipe cabá oyena ora; chana Herodías ca uabainá. Chama Juan tbojanácacana y nyetsca bacna soyënga Herodes tojanmámna. <sup>20</sup> Pero Herodes Juánbioye joyeunaye luariñna, cabá inye más bëts bacna soye tojátanma: Juánbioye cárceloye tbojtsanëtame.

*Juan, Jesúsbioye tbojanabaye*  
(Mt 3.13-17; Mc 1.9-11)

<sup>21</sup> Pero Herodes Juánbioye cabá ndutame ora, Juan ba entśanga tojanëbaye, y Jesúsna tojánabo jenábayama. Ibojtsabayanëntscuana, Jesús Bëngbe Bëtsáftaca ibojtsencuëntaye; y chora celoca yojotëfjo, <sup>22</sup> y chë Uámana Espíritu mo canye palomatemcá Jesúsbioye yojtsastjajuana; y celocana Bëngbe Bëtsá tbojaniyana: “Acna atšbe bonshana Uaquiñá condmëna. Acbiama corente sëntsoyejuá ca.”

*Jesube bëts taitanga*  
(Mt 1.1-17)

<sup>23-38</sup> Jesús unga bnëtsana uata yojtsebomna, entśángbeñe Bëngbe Bëtsabe soyëngama jóyebuambayama yojontsé ora. Entśanga imojanjuabná Jesús Josebe uaquiñá yojamna ca.

José yojamna Elibe uaquiñá.

Elí Matatbe uaquiñá

y Matatna Levibe uaquiñá.

Leví yojamna Melquiibe uaquiñá,

Melqui Janabe uaquiñá

y Jana Josebe uaquiñá.

José yojamna Matatíasbe uaquiñá,

Matatíasna Amosbe uaquiñá.

Amós Nahumbe uaquiñá,

Nahúm Eslibe uaquiñá

y Esli yojamna Nagaiibe uaquiñá.

Nagai yojamna Maatbe uaquiñá,  
Maatna Matatíasbe uaquiñá.  
Matatías Semeibe uaquiñá,  
Semei Josecbe uaquiñá  
y Josec yojamna Judabe uaquiñá.  
Judá yojamna Joananbe uaquiñá  
y Joanán Resabe uaquiñá.  
Resa Zorobabelbe uaquiñá,  
Zorobabel Salatielbe uaquiñá,  
y Salatielna Neribe uaquiñá yojamna.  
Neri yojamna Melquibe uaquiñá,  
Melqui Adibe uaquiñá.  
Adi Cosambe uaquiñá,  
Cosam Elmadambe uaquiñá,  
y Elmadamna yojamna Erbe uaquiñá.  
Er yojamna Jesusbe uaquiñá  
y Jesús Eliezerbe uaquiñá.  
Eliezer Jorimbe uaquiñá  
y Jorimna Matatbe uaquiñá.  
Matat yojamna Levibe uaquiñá,  
Leví Simeonbe uaquiñá  
y Simeón Judabe uaquiñá.  
Judá Josebe uaquiñá,  
José Jonambe uaquiñá,  
y Jonamna yojamna Eliaquimbe uaquiñá.  
Eliaquim yojamna Meleabe uaquiñá,  
Melea Menabe uaquiñá.  
Mena Matatbe uaquiñá,  
y Matata yojamna Natanbe uaquiñá.  
Natán yojamna Davidbe uaquiñá,  
David Isaíbe uaquiñá  
y Isaína Obedbe uaquiñá.  
Obed Boozbe uaquiñá,  
Booz Salabe uaquiñá  
y Sala yojamna Naasonbe uaquiñá.  
Naasón yojamna Aminadabëbe uaquiñá,  
Aminadab Adminbe uaquiñá  
y Admin Arnibe uaquiñá.  
Arni Esrombe uaquiñá,  
Esrom Fáresbe uaquiñá  
y Fáresna yojamna Judabe uaquiñá.  
Judá yojamna Jacobëbe uaquiñá,  
Jacob Isaacbe uaquiñá  
y Isaacna Abrahambe uaquiñá.  
Abraham Tarebe uaquiñá

y Taré yojamna Nacorbe uaquiñá.  
 Nacor yojamna Serugbe uaquiñá,  
 Serug Ragaube uaquiñá  
 y Ragauna Pelegbe uaquiñá.  
 Peleg Heberbe uaquiñá,  
 y Heber yojamna Salabe uaquiñá.  
 Sala yojamna Cainanbe uaquiñá,  
 Cainán Arfaxadbe uaquiñá  
 y Arfaxadna Sembe uaquiñá.  
 Sem Noebe uaquiñá  
 y Noé yojamna Lamecbe uaquiñá.  
 Lamec yojamna Matusalenbe uaquiñá,  
 Matusalén Enoche uaquiñá  
 y Enocna Jaredbe uaquiñá.  
 Jared Mahalaleelbe uaquiñá,  
 y Mahalaleelna yojamna Cainanbe uaquiñá.  
 Cainán yojamna Enosbe uaquiñá,  
 Enós Setbe uaquiñá,  
 Set Adanbe uaquiñá  
 y Adán Bëngbe Bëtsabe uaquiñá.

## 4

*Jesús tojanobená Satanás jayëñjanama*  
*(Mt 4.1-11; Mc 1.12-13)*

<sup>1</sup> Juan, Jesúsbioye tbojanabáyentsana, chë Uámana Espíritu Jesusbe ainaniñe yojtsemándaye. Jesús Jordán bejayoícana tojtaná y chë Uámana Espíritna entsanga ndoyena luaroye tbojanánatse. <sup>2</sup> Chentše canta bnëtsana te tbojanjétana, y Satanasma yojanabó Jesús jisháchichiyama. Chë canta bnëtsana tentscuana Jesús tondaye tonjanse, y cabana ibojeshëntsena.

<sup>3</sup> Chora Satanás tojésanabo y tbojanianyana: —Aca ndegombre Bëngbe Bëtsabe Uaquiñá tcomnëse, momandá quem ndëtšbenga tandëse chaobiama ca.

<sup>4</sup> As Jesús tbojanjuá: —Bëngbe Bëtsabe uabemana palabrënguiñe mëntsá endayana: “Entsá nye tandëšeca ndoñe vida ntsebomnana ca.”

<sup>5</sup> Chentšana, Satanás canye bëts tjoye tbojanánatse y betscó nyetsca quem luarentša amëndayëngbenache tbojaninýinýe.

<sup>6</sup> Chora Satanás tbojanianyana: —Atše nyets obenana cbochjátsetaye y lempe quem amëndayëngbenache yobinýna soyëngnaca. Atše lempe chca sënjóyëngacñe y sëntsobena jatsetayama nda stsebošábioye. <sup>7</sup> Aca chacojoshëntsamentšé y chašcojadorase, lempe nyetšá acbiama echántsemna ca.

8 Chora Jesús tbojanjuá: —Bëngbe Bëtsabe uabemana palabrénguiñe mëntšá endayana: “Acbe Bëtsá, chë Utabná cocht-sadorana y nÿe cha cocht-seservena ca.”

9 Chentšana, Satanás Jerusalemoye tbojanánatse y Bëngbe Bëtsabe bëts yebnentše chë más tsbanánoca tbojanatsá, y tbojaniana: —Aca ndegombre Bëngbe Bëtsabe Uaquiñá tcomnëse, muentšana fshantsoye montsënja, <sup>10</sup> er Bëngbe Bëtsabe uabemana palabrénguiñe endayana: Bëngbe Bëtsá chabe angelënga echanjichamuá, chac-motsinÿenama.

11 Chënga buacuatsëngaca cmochanjishache, shecuatše ndocá ndëtsbeñe chacondomama ca —cha tbojaniana.

12 Chora Jesús tbojanjuá: —Bëngbe Bëtsabe uabemana palabrénguiñe mëntšá endayana: “Ndoñe matsbošana acbe Bëtsá chë Utabná bacna soyëngama jacochënguama ca.”

13 Cabana, Satanás tojanajbaná bošana Jesúsbioye bacna soyëngama jacochënguama, y bënama Jesús bentsšana tojtsano-juánañe.

*Jesús tojanontsé Galileoca chabe trabajo jamana*  
(Mt 4.12-17; Mc 1.14-15)

14 Chentšana, Jesús Galileoye tojesaná chë Uámana Espíritbe obenánaca, y nÿetsca entsanga chë luariñe chabiamama imojtsencuëntaye. <sup>15</sup> Jesús yojtsabuátambaye chë judiëngbe enefjuana yebnënguenache, y nÿetscanga cha imojtsatschuanaye.

*Jesús Nazaret puebloca*  
(Mt 13.53-58; Mc 6.1-6)

16 Chentšana Jesús Nazaretoye tojtanashjango, chë pueblentše cha tojanoboché, y ochnayté, ntšamo cha yojanamancá, chë judiëngbe enefjuana yebnentše tojánamashëngo. Y chocna tojantsbaná Bëngbe Bëtsabe palabra jualiama. <sup>17</sup> Chë Bëngbe Bëtsabe juabna oyebuambnayá Isaíasbe librëša tmojaniyé chaualiama. Chë librëša yojutëfjona orna, tojáninÿena mëntšá uábemanentše:

18 “Chë Utabnabe Espíritu átšeftaca entsemna, er atše uabuayaná stsemna chë Bëngbe Bëtsabe tšabe noticiënga chë ndbomnëngbeñe jóyebuambayama.

Cha šonjichmó jábuayenama, chë utámenënga chentšana ya chamuáisebocanama;

jamama chë jtanënga chamobenama tšabá jubínÿenama;

jamama chë ínÿengbe causa imosufrínënga, tempcá cachcá tšabá chamotsatsmënama;

19 y entsanga jáuyanama ndëmua ora chë Utabná chabe entsanga yochjatsebacaye ca.”

20 Jesús jualiama tojanpochocá y chora chë uajabuachanábioye chëša tbojtaniyé y tojtánótbema. Nÿetsca entsanga chë enefjuana yebnentše imojtsemnënga Jesúsbioye imojtsobuáuatja. 21 Chora Jesús tojanontsé mëntšá jayanana: —Camënté tsëngaftangbeñe tonjopasá ntšamo quem librëšañe iuabemancá ca.

22 Nÿetscanga Jesusbiamá tsabá imojtsencuëntaye y ojanánënga imojtsemna tša botamana cha yojtsoyebuambnama. Y chënga imojtsentjanaye: —¿Quem boyabása ndoñe Josebe uaquiná yondmëna ca?

23 Jesús yojtsetátšëmbo ntšamo cha tojánayaniñe chënga ndoñe tmonjanósbuachema. As tojanëyana: —Ndegombre tsëngaftanga ntšamo entsanga mondëntsayanca atše šmochanjauyana: “Ashnayá, cach aca menoshná ca”. Y tsëngaftanga šmojtsejuabná atše jauyanama: “Bënga fsënjouena chë bëts soyënga Bëngbe Bëtsabe obenánaca Capernaumoca tcojamama. Ntšamo contsichamcá ndegombre tojtsemnëse, cach acbe pueblëntšnaca cachcá moma ca”.

24 Y cachora Jesús más tojanoyebuambá, mëntšá: “Ndegombre cbëyana, ni canÿe Bëngbe Bëtsabe juabna oyebuambnayábioye cachabe pueblentše tsabá quematonýá. 25 Ndegombre cbëyana, Elías, chë Bëngbe Bëtsabe juabna oyebuambnayá, Israeloca inamna ora, ba viudanga chentše imojamna. Chë tempo, unga uata y tsëntsañe nÿetsá ndoñe tonjanafte y bëts shëntsana chë luariñe yojtsebinýna. 26 Pero Bëngbe Bëtsá, Elíasbioye ndoñe tbonjanichmó ni mo canÿe Israelentša viudábioye, y aíñe tbojanichmó ínÿoye, Sarepta ca uabáinoye, Sidón béconana, canÿe chentša viudábioye. 27 Eliseo, chë Bëngbe Bëtsabe juabna oyebuambnayá, Israeloca inamna ora, chentše banga imojamna bacna nguayanánaca šoquënga, y ni mo canÿa chentša šocábioye tbonjanshná, pero aíñe canÿe šocábioye, Naamán ca uabainá, cach bacna nguayanánaca, Siriocá ca” —cha tojánayana.

28 Chë judiëngbe enefjuana yebnentše imojtsemna entsanga chca tmojanuena ora, puerte tojánëtna. 29 As, chora chënga tmojantsbaná, chë pueblentšana Jesús imojtábocna y más tsjuanoye canÿe peñëšëjana imojuánatse. Chënga imojanajebna cach peñëšiñe, y chë entsanga imojtseboše Jesús chocana jtsajuatsëntšana. 30 Pero Jesusna chëngbe tsëntsajana tojánachnënga y ínÿoye tojtsanoñe.

*Jesús, bayëjbe juabna cánÿabioye tbojanbojuaná  
(Mc 1.21-28)*

31 Chentšana, Jesús cach Galileoye tojesaná, Capernaum puebloye, y choca tojanontsé, chë ochnayté, chë judiëngbe

enefjuana yebnentše entsānga jabuátambana. <sup>32</sup> Entšānga imojtsenjnanaye ntšamo Jesús yojtsabuátambama, er chamna mo canýe mando bomnacá yojtsóyebuambnaye.

<sup>33</sup> Chë enefjuana yebnentše, canýe boyabása bacna bayēja uambayá yojtsemna, y chabe causa chë boyabása tojanontšé mēntšá uayebuáchana: <sup>34</sup> —¡Cachcá šmonýá! ¿Ndayama bēngbioye tēcjabo, Jesús Nazaretocá? ¿Tcojabo bēnga jabétsapochocama? Atše sēndétatšēmo nda aca comnama, aca chë Bēngbe Bētsabe Uamaná ca.

<sup>35</sup> Chora Jesús chë bacna bayējbioye tbojtsanácacana y tbojaniyana: —¡lytēca móbema y chábentšana maisebocna ca!

As chora chë bayēja entsanguentše chë boyabásabioye tbojanshajayé, y ndocá ntjēftsemcá chábentšana yojésebocna.

<sup>36</sup> Chë soyama nýetsca entsānga imojénjnanaye y mēntšá imojtsenatsēsnaye: “¡Tša chca palabrenga! ¡Quem entsá mandayacá y obenacá chë bayējēnga entsamēnda, y chēnga montsaisebocana ca!”

<sup>37</sup> Y Galileoca nýetsca pueblēnguiñe Jesusbiamia yojtsótatšēmo.

*Jesús, Simón Pédrēbe uambén mamábioye tbojanshná*  
(Mt 8.14-15; Mc 1.29-31)

<sup>38</sup> Chentšana, Jesús chë judiēngbe enefjuana yebnentšana tojēftsānbocna y Simonbe yebnentše tojánamashēngo. Simonbe uambén mamá šocá inajájona jabuache calentóraca, y chë chentše imojtsemna entsānga chabiamia Jesúsbioye tmojanimpadá. <sup>39</sup> Chora Jesús chë šocábioye yojotsejbéna y tojánayana: “¡Calentora mojuaná ca!” Y chë calentora tbojtsanóbojuanañe. Y cachora, cha tojtantsbaná y tojanontšé chēnga jobuácuedana.

*Jesús ba šoquēnga tojanashná*  
(Mt 8.16-17; Mc 1.32-34)

<sup>40</sup> Shinýe yojuenatjēmba ora, banga inýe y inýe šocana bomnēnga Jesúsbioye tmojanēnatse, y cha nýetsca šoquēngbeñe cucuatšēnga tojanajájó y tojanashná. <sup>41</sup> Chora, ba šoquēngbentšana bacna bayējēnga imojtsaisebocana y mēntšá imojtsanchembumbuana: “¡Aca chë Bēngbe Bētsabe Uaquiñá condmēna ca!” Pero Jesusna yojtsēcácana y ndoñe tonjanalesenciá chamóyebuambama, er chë bayējēnga imnatátšēmo cha chë Cristo bétsemnama.

*Chë judiēngbe enefjuana yebnēnguenache, Bēngbe Bētsabe soyēngama Jesús entsānga yojanabuayiyná*  
(Mc 1.35-39)

<sup>42</sup> Yēfsana tojanbinýna ora, Jesús chë pueblentšana tojēftsānbocna, y canýe luaroye, entsānga ndoyenoye



tojtsanoñe. Pero entšanga tmojána cha jetsenguanguama, y cha yojtsemnoye tmojánashjajna. Chënga imojétseboše Jesús cach pueblentše chaotsoquedáñama, <sup>43</sup> pero Jesús tojanéyana: “Atše šontsemna chë tšabe noticiënga Bëngbe Bëtsabe amëndayama inýe publënguenáchnaca jábuayenana. Chama Bëngbe Bëtsá šonjichmó ca.”

<sup>44</sup> Y chentsana, Jesús yojánana Bëngbe Bëtsabiama entšángbioye abuayiynaye, chë judiëngbe enefjuana yebnënguenache Judeoca.

## 5

*Canýe te mallajta beonga ashebuánaye te*

*(Mt 4.18-22; Mc 1.16-20)*

<sup>1</sup> Canýe te, Jesús, Genesaret ca uabaina uafjajónaye tsachañe yojtsemna ora, ba entšanga tmojánashjajna, y chënga tša imojtsenajuatsëntšnaye Bëngbe Bëtsabe palabra jouenama.

<sup>2</sup> Jesús, chë uafjajónaye tsachañe bécoñe tojáninýe uta ena barquësha; chë beonga ashebuánayëngna barquëshanguentšana tmojëftsanbocna atarraiešhangá jetsáboshabiama. <sup>3</sup> Jesús canýe barquëshañe tojánamashëngo; chësha Simónbesha in-aumna. Chora Simónbioye mëntšá tbojaniyana: “Quem tsachañentšana chcoye mëyamba ca.”

<sup>4</sup> Tojanótbema ora, Jesús chë barquëshoicana tojanontšë entšanga jabuátambama. Jabuátambama tojanpochocá orna, Simónbioye tbojaniyana: —Shbuatsëntsoye barquësha mëyamba y tšëngaftangbe atarraiešhangá šmochjushbuetše, beonga jashebuáyama ca.

<sup>5</sup> Pero Simón tbojanjuá: —Buatëmbayá, nýets ibeta fsëndanguá y tondaye chibiátashebuaye. Pero aca chca tojayánayecna, cachiñe atarraiešha chantëtëshbuetše ca.

<sup>6</sup> Tmojanëshbuetše orna, bëts cá beonga tmojánishëche y chëngbe atarraiešhangá tojanontšë jtsatanëcanana.

<sup>7</sup> As, chë inýe barquëshañe imojtsemna enutëngbioye tmojánëfjatsëmbo, jabújabuachama chamuábama. Chora chënga tmojánabo, y nýets uta barquësha beóngaca tmojanajutjé. Tša chëftanga causa, tojanontšë chë uta barquësha jtsenatjëmbambana. <sup>8</sup> Simón Pedro chca tojáninýe ora, Jesús bentše tojanoshëntsamentšë y tbojaniyana: —¡Bëngbe Utabná, atše bacna soye amá sëndmëna, chíyeca átšbentšana mojuaná ca!

<sup>9</sup> Chë tša beonga jashebuáyama Jesús tojanmama, Simón y chë cháftaca imojtsemnënga imojouatjaná. <sup>10</sup> Santiago y Juan, chë Zebedeobe uaquiñata y Simonbe enutata, chátnaca auatjanánata ibojtsemna. Chora Jesús Simónbioye tbojaniyana: — Ndoñe matauatjana. Morscana, entšanga Bëngbe Bëtsabiama

cochántanguaye, y n̄ye beonga ashebuanayá ndoñe que-cochátsmēna ca.

<sup>11</sup> As chora ch̄e barquëshangá tsachoye tmojtan̄yamba y lempe j̄éseboshjon̄ese, Jesús tmojanasto.

*Jesús, can̄ya bacna nguayanánaca šocábioye tbojanshná*  
(Mt 8.1-4; Mc 1.40-45)

<sup>12</sup> Jesús can̄ye pueblent̄se yojtsemna ora, chent̄se tojánashjango can̄ye ent̄sá bacna nguayanánaca šocá. Ch̄e šocá Jesúsbioye tbojánin̄ye ora, tojanosh̄entsament̄sé y jubiaca fshantsóntscoñe yojotsejb̄ena y tbojanimpadá: —B̄engbe Utabná, aca tcojtseboš̄ese, aca catjobenaye at̄sbe šocana jtsebojuánana ca.

<sup>13</sup> As Jesús cucuat̄seca tbojánbojajo y tbojanianyana: —Aíñe, s̄entseboše. ¡šocana cbotsebojuaná ca!

Y cachora ch̄e šocana tbojtsanóbojuanañe. <sup>14</sup> Chora Jesús tbojanmandá: —Ndocnáb̄eñe ch̄e soye cattsecuéntaye; n̄ye Jerusalenoca báchn̄ebioye motsa, y cha cochjin̄yinyiye aca mora ya t̄sabá cojtsatsm̄enama; y chora cochjuát̄š̄embona nt̄samo Moisés chabe leyiñe tojanmandacá, B̄engbe B̄etsábioye chama j̄etschuayama, chca, n̄yetsca ent̄sanga chamotat̄š̄embona mora ya t̄sabá cojtsatsm̄enama ca.

<sup>15</sup> Pero ndayá Jesús yojtsamama más ent̄sanga imojátat̄š̄embona, y ba ent̄sanga imojtsójotoye chábioye joyeunayama y ch̄engbe šocan̄engama chauashnama. <sup>16</sup> Pero Jesús yojanamana jtsoñana ent̄sanga ndoyena luar̄engoye y choca B̄engbe B̄etsáftaca ibn̄écuentaye.

*Jesús, can̄ye jama ndobenábioye tbojanshná*  
(Mt 9.1-8; Mc 2.1-12)

<sup>17</sup> Can̄ye te, Jesús yojtsabatambá ora, chent̄se básefta fariseunga y ley abuat̄ambaȳenga imojtsetbiám̄ana, Galileoca n̄yetsca puebl̄enguent̄šana áshjajn̄enga, Judeoqūenga y Jerusalenoqūenga. Y chora Jesús šoqūenga yojtsashnaye, B̄engbe B̄etsabe obenánaca. <sup>18</sup> Chora tojanopasá, básefta boyabásenga can̄ye šocá, jama ndobená, tjuashiñe choye imojuamba. Ch̄enga imojétseboše tsoye cha juambana, Jesús yojtsemnoye, <sup>19</sup> pero jamashjnama ndoñe tmonjanobená, t̄ša ent̄sanga causa. Chcasna, gradas̄es̄engūejana ch̄e yebnent̄ša tsbanánoye tmojánas̄engo y bat̄sá tej̄eshe tmojtsanjuaná. Chorna, ch̄e at̄ef̄jn̄ejana ch̄e šocá tjuashiñe tmojan̄estjango, ent̄sangbe ts̄entsaca, Jesusbe natsanoica.

<sup>20</sup> Jesús tojánin̄ye cha ch̄e šocá jáshnama b̄etsobenama ch̄enga puerte imojtsoš̄buáchema. As, ch̄e jama ndobenábioye tbojanianyana: “Bacó, acbe bacna soȳenga tcbontseboyperdoná ca.”

21 Chora chë ley abuátambayënga y chë fariseunga mëntśá tmojanontśé juabnayana: “Quem boyabása ndoñe tśabá Bëngbe Bëtsabiana quenátichamo; mo chábioye cuafjoyenguangcá entsemna. Ndocna entśá quenátobena bacna soyëngama inya japerdonana; nýe Bëngbe Bëtsá aíñe ca.”

22 Pero Jesús yojtsetátśëmbo ntśamo chënga imojtsejuabnayama; as tojanëyana: “¿Ndáyeca tśëngaftangbe ainaniñe chca šmojtsejuabná? 23 ¿Tśëngaftangbiana ndayá más paselo nántsemna tśëngaftangbe delante jayanama: ‘Acbe bacna soyënga tcbontseperdoná’, o jayanana: ‘Matëtsbaná y motsa ca’? 24 Y chca, morna atśe cbochanjínyanýiye, chë Bëngbe Bëtsá Entśá tbojanbemá quem luariñe obenana yobomnama, entśanga bacna soyëngama jáperdonama ca” —Jesús tojánayana.

As Jesús chë jama ndobenábioye tbojanianyana: “Atśe cbëyana, matëtsbaná, tjuashe mesocñe y acbe yebnoye motsatoñe ca.”

25 Cachora chë jama ndobená tojtantsbaná entśangbe delante, chë cha inajájona tjuashe yojesocñe y Bëngbe Bëtsábioye atschuanaye chentśana yojtsatoñe. 26 Chama nýetsca entśanga imojénjnanaye y Bëngbe Bëtsá imojtsatschuanaye. Y corente auatjanánënga imojtsichamo: “Mënté bëts soyënga tmonjinýe ca.”

*Jesús, Levíbioye tbojanchembo chabuastama  
(Mt 9.9-13; Mc 2.13-17)*

27 Chca yojochnëngüentśana, Jesús chentśana tojéftsanbocna y canýe entśábioye tbojáninýe, Leví ca uabainá, chë entśángbioye impuesto Romocama atjanayentśe inétsotbemañe. Chora Jesús tbojanianyana: “Smasto ca.”

28 Y Leví lempe tojésanboshjona, tojantsbaná y Jesús tbojanasto.

29 Chentśana, Levina bëts fiesta chabe yebnentśe Jesusbiana yojama. Y chë fiestentśe imojtsemna banga impuesto atjanayënga; y inýe entśángnaca mesëshentśe imojtsetbíamana. 30 Chora, chë fariseunga y chë ley abuátambayënga tmojanontśé chë Jesusbe uatsjëndayëngbiana podësca oyebuambnayana; y chëngbioye mëntśá tmojanëyana: —¿Ndáyeca tśëngaftanga impuesto atjanayëngaftaca y bacna soye amëngaftaca šmojtśesá y šmojtsofšëśná ca?

31 Y Jesús tojanëjua: —Salud bomnënga ashnyáyá ndoñe ntśejabótana, pero šoquëngna aíñe. 32 Y atśe ndoñe chiyátabo chë Bëngbe Bëtsabe bominýiñe tśabá amënga jabáchembuama, sinó chë bacna soye amënga imomna ca juabnayënga Bëngbe Bëtsábioye jabáchembuama ca.

*Jesús tmojantjá chë Bëngbe Bëtsáftaca jencuéntama tondaye saytescama*

*(Mt 9.14-17; Mc 2.18-22)*

<sup>33</sup> Chora chënga Jesúsbiöye tmojanianyana: —Juan chë Ubayanabe uatsjéndayënga y chë fariseungbe usetonënga monduamana ba soye Bëngbe Bëtsáftaca jtsencuéntayana, y chama ba soye tondaye ntjascá jtsemnana; pero acbe uatsjéndayënga nyë nyëts tempo jesosañana y jesofšëšnañana ca.

<sup>34-35</sup> Chora Jesús tojanëjua: —Chë boyabása bouamná chë ofjanëngaftaca tojtsemnëntscuana, chëngbiöye saná ndoñe ntsabuáshebenana. ¿Ntsamo chca ndoñe nántsemna? Chë tojobouamá cha chëngaftaca tojtsemnëntscuana, chë ófjanënga bëtská jasana y cháftaca oyejuayënga jtsemnana. Pero ora echanjóshjango y chë boyabása chëngbentsana mochantsánatseñe; chora cocayé chë ófjanënga echántsamna tondaye ntjascá jtsemnana. Ntsamo chë tojobouamá cha y chë ofjanëngaftaca endmëncá, cachcá endmëna atše, atšbe uatsjéndayëngaftacnaca ca —cha tojanëjua.

<sup>36</sup> Jesús mëntsánaca tojanacuntá jabuátambama: “Ndocná queonÿbatatëtše basájua tsëm entšayañe, tanguá entšayá jtarmëndama. Chca tcojamëse, chë tsëm entšayá jtsandbemanana, y chë tcojuatëtše entšëjua chë tanguájuañe ndoñe tšabá ntsinÿnana. <sup>37</sup> Y cach ndoñe, chë tojtseshayana vínoye tanguá jasabenguiñe ntjataftsuámayana. Tcojuaftsuamasna, chë jasabenga jtseshëbëfjuana y chë vínoye jtsabuáshanana; y chca, chë vínoye y chë jasabenga tondayama ntjatoservénana. <sup>38</sup> Chíyeca co, chë tojtseshayana vínoyna tsëm jasabenguiñe juaftsuámana. <sup>39</sup> Ndocná, chë bóchena vínoye tojatëmo y chentšana játsbošana chë tojtseshayana vínoye jatofšiyana; cha jayanana: ‘Chë bóchena vínoye tša tšabeye ca.’”

## 6

*Jesusbe uatsjéndayënga ochnayté trigo tmojanátabebe*

*(Mt 12.1-8; Mc 2.23-28)*

<sup>1</sup> Canÿe ochnayté, Jesús canÿe jajajana yojtsaye; chabe uatsjéndayënga trigo imojtsaiuatabnaye, imojtsaiúshenëcaye, y imojtsaiuasaye. <sup>2</sup> Chë causa, básefta fariseunga tmojanatjaye: —¿Ndáyeca šmojtsama chë ochnayté jamama ndoñe quenátslesenciana soye ca?

<sup>3</sup> Y Jesús tojanëjua: —¿Ndoñe šmëndualía y šmondëtatšëmbo, ntsamo rey David y chabe enutënga tmojanmama shëntseca imojtsemna ora y jasama yojtsëjaboto ora? <sup>4</sup> Chca orna, David Bëngbe Bëtsabe bëts yebnentše yojámashëngo y chë Bëngbe Bëtsá chentše yojamnama inÿinÿnaye tandëšënga yojase, y chë cháftaca imojánajna entšángnaca yojátšataye. Y chë tandëšna

nÿe bachnanga belesenciana jasama. Masque David chca vojama, Bëngbe Bëtsá chora ndoñe tonjánayana David canÿe bacna soye tojanma ca — Jesús tojanëjua.

<sup>5</sup> Y Jesús más tojanëyana: “Chë Bëngbe Bëtsá Entšá tbojanbemá, chë entšá ochnayté tojtsama sóynaca jtsemándayana ca.”

*Chë buashana cucuatše bomna entšá*  
(Mt 12.9-14; Mc 3.1-6)

<sup>6</sup> Inÿe ochnayté, chë judiëngbe enefjuana yebnoye Jesús tojánamashëngo y tojanontsé jabuátambana. Y chentše yojtsemna canÿe entšá, catšbioica cucuatše buashanëtše bomná; <sup>7</sup> y chë ley abuátambayënga y fariseunga chiñe imojtserrondana jinÿama nderado Jesús chë ochnayté chábioye tabuanjashna, as chca chënga jtsebomnama ndaye sóyeca Jesús mal jaquédana. <sup>8</sup> Pero Jesús chëngbe juabna yojtsetátšëmbo; asna chë buashana cucuatše bomna boyabásabioye tbojanianyana: “¡Motsbaná y chentše tsëntsaca motsa ca!” Y chë entšá yojtsbaná y entšangbe tsëntsaca yojotsaye. <sup>9</sup> Chora Jesús chë ínÿengbioye tojanëyana: “¿Ndayá yojtselesenciana ochnayté jamana, canÿe tšabe soye o canÿe ndoñe tšabe soye? ¿Jatsbocana o jtseepochócana ca?”

<sup>10</sup> Y nÿetscanga chabe chabuajana imojtsemnënga tojanëñyanÿé, y chë buashana cucuatše bomnábioye tbojanianyana: “Macuenÿanëjaná ca.” Y chë boyabása tojanacuenÿanëjaná, y tšabá chëtša yojtsatamna. <sup>11</sup> Pero chë ínÿengna puerte tmojanotjayaná, y tmojanontsé enatsëtsnayana ndayá muanjobenaye Jesusbe contra jamana ca.

*Jesús chë bnëtsana uta uatsjëndayënga tojanabacacá*  
(Mt 10.1-4; Mc 3.13-19)

<sup>12</sup> Chë tempo, Jesús tjoye tojána Bëngbe Bëtsáftaca jencuéntama; y nÿets ibeta cháftaca tbojanencuentá. <sup>13</sup> Tojanbinÿna ora, chabe ústonënga tojánachembo, y chënguentšana tojanëbuáyana bnëtsana uta uatsjëndayënga, chë ndëmuanÿenga “chabe ichmónënga cánaca” tojanëbobaye. <sup>14</sup> Chënga imojamna: Simón, chë Pedro cánaca Jesús tbojanabobayá; Andrés, Simonbe catšata; Santiago y Juan, Felipe y Bartolomé, <sup>15</sup> Mateo y Tomás, Santiago, Alfeobe uaquiñá; Simón, chë celote ca uabobainá; <sup>16</sup> Judas, Santiagbe uaquiñá; y Judas Iscariote, chë más chcoye, Jesús uayayëngbe cucuatšifne bochjanboshjoná.

*Jesús ba entšanga yojanabuatambá y yojánashnaye*  
(Mt 4.23-25)

<sup>17</sup> Chentšana, Jesús chëngaftaca chë tjocana tojtantsmá y canÿe jachañe tojanoquedá ba chabe ustonëngaftaca

y ba inÿe entšángaftaca. Ba entšanga choye tmojánabo Judeocana, Jerusalenocana y Tiro y Sidón, chë mar béjaye béconana pueblënguentšana, Jesúsbioye oído jabuájuama y chëngbe šocanëngama chauashnama. <sup>18</sup> Y chábeyeca chë bacna bayëjbe juabna uambayënga tšabá imojtsatsmëna. <sup>19</sup> Nÿetsca entšanga tša imojtseboše y ndayánaca imojtsama Jesús jabojuama, er chábentšana bëts obenana yojtsóbocana y nÿetscanga yojtsashnaye.

*Chë ndegombre oyejuayana bomnënga y ndëmuanÿengbiam*  
*tša lastema yochtsemna*

*(Mt 5.1-12)*

<sup>20</sup> Jesús chabe uatsjëndayëngbioye tojanontjësé y tojanëyana: “Puerte oyejuayënga tšëngaftanga, chë quem luarentša soyënga ndbomnënga, er Bëngbe Bëtsabe amëndayentša soyënga tšëngaftangbiam entsemna ca.

<sup>21</sup> “Puerte oyejuayënga tšëngaftanga chë mora oshëntsiyënga, er becá šmochantóshachaye ca.

“Puerte oyejuayënga tšëngaftanga chë mora šmošachenga, er chentšana šmochántsaténbiajuaye ca.

<sup>22</sup> “Puerte oyejuayënga šmochtsemna, entšanga chacmojtšëbuayënja ora, chacmojtsatëbuacana ora, chacmojtšëyanguá ora, y tšëngaftanga ndoñe tšabá šmontsama ca chënga chamojtsichamo ora, tšëngaftanga atšbe ústonënga bëtsemnama. <sup>23</sup> Chë te puerte šmochjóyejuaye, er celoca canÿe bëts uacanánana šmochántsebmna. Chëngbe bëts taitanga, cachcá chë Bëngbe Bëtsabe juabna oyebuambnayëngaftaca tmonjanma ca.

<sup>24</sup> “Pero jtša lastema tšëngaftanga bomnëngbiam, er mora oyejuayënga jtsemnama ya bëtscá šmojóyëngacñe ca!

<sup>25</sup> “¡Tša lastema tšëngaftanga chë mora shachanëngbiam, er shëntsana šmochántsebmna ca!

“¡Tša lastema tšëngaftanga chë mora oyejuayëngbiam, er ngménama šmochanjenóbošachna ca!

<sup>26</sup> “¡Tša lastema tšëngaftangbiam nÿetsca entšanga tšabá chamojtsoyebuambná ora; er cachcá chëngbe bëts taitanga monjánama chë Bëngbe Bëtsabe ndoñe ndegombre juabna oye-buambnayëngaftaca ca!” —Jesús tojanëyana.

*Chë uayayëngbiam bonshánana jtsebmnan*

*(Mt 5.38-48; 7.12)*

<sup>27</sup> “Pero tšëngaftanga, átšbioye ouenanënga cbëyana: Tšëngaftangbe uayayënga šmochtsababuánÿeshana; chë tcmojtsëbuayënjëngbiam tšabe soyënga šmochtsama; <sup>28</sup> chë tšëngaftangbiam bacna soyënga bošëngbiam, Bëngbe Bëtsá šmochtseimpadana tšabe bendicionënga chamóyëngacñama; chë tcmojóyanguanguëngbiam, Bëngbe

Bëtsá šmochtseimpadana. <sup>29</sup> Nderado ndánaca cányoica tcmojajuebjantšetase, cochjomiye chë ínyoica cachcá chacmomama; nderado ndánaca quëfsaíya tcmojuábocana, cachcá cochjonýaye acbe shabuanguanëjuanaca chauetsácñama. <sup>30</sup> Ndánaca chacmojtjañábioyna, jatšetayana; y nda ndayánaca chacmojefcábioyna, ndoñe catjontšínýena chacmatoyema. <sup>31</sup> Inýengaftaca šmochtsama, ntšamo chë ínýenga tšëngaftangaftaca chamotsamama šmojtsebošcá.

<sup>32</sup> “Tšëngaftanga, nýe chë tcmojtsababuánýeshanënga šmojtsababuánýeshanëse, ¿ndaye tšabe soye chca šmattsama?; er chë bacna entšágnaca chca mondbëtsama. <sup>33</sup> O nderado, nýe chë tšëngaftangbiamia tšabe soyënga tmojtsamëngbiamia tšabe soyënga šmojtsamëse, ¿ndaye tšabe soye chca šmattsama?; er bacna entšágnaca chca mondbëtsama. <sup>34</sup> O nýe chë cmochtëchenanguama šmojtsejuabnángbioye šmojúyentsamëse, ¿ndaye tšabe soye chca šmattsama?; er chë bacna entšágnaca mondbetsenántšamiana, chëngbentsana cachcá jtóyëngacñama jtsobátmanëse. <sup>35</sup> Pero tšëngaftangna cmontsamna chë uayayënga jtsababuánýeshanana; y tšabe soyënga chëngbiamia jtsamana y júyentsamiana, chëngbentsana ndayánaca jtóyëngacñama ntjatobatmancá. Chca, tšëngaftanga uacanánana cuenta canýe bëts soye šmochanjóyëngacñe, y celoca endmëna Bëngbe Bëtsabe básenga šmochántsemna; Bëngbe Bëtsá chë ndochuanayëngaftaca y bacna entšangaftácnaca tšabia comna. <sup>36</sup> Inýengbiamia lastemadënga šmochtsemna, ntšamo tšëngaftangbe Taitá yomncá ca” —Jesús tojánayana.

*Ndoñe ntsichámuana chë ínýenga tšabá o ndoñe tšabá tmonjama*

*(Mt 7.1-5)*

<sup>37</sup> “Ndocá ínýengbiamia šmattsichamo chë ndoñe tšabá tmontsamama, y Bëngbe Bëtsá ndoñe queochátichamo tšëngaftanga ndoñe tšabá šmonjama ca. Inýengbiamia ndoñe šmattsichamo ndoñe tšabá tmonjama ca, y Bëngbe Bëtsá ndoñe queochátichamo tšëngaftanga ndoñe tšabá šmonjama ca. Inýenga šmochjáperdonaye y Bëngbe Bëtsá cmochanjáperdonaye. <sup>38</sup> Inýengbioye šmochjatsataye y Bëngbe Bëtsá cmochántatsataye. Mo nda canýe biaco medidiñe bëtscá tojajutjé, uashëshe y cmojtiyecá, Bëngbe Bëtsá cachcá cmochántatsataye. Ntšamo tšëngaftanga ínýengbioye chašmojábiama, uabouana o ndoñe jabuache soyënga, Bëngbe Bëtsá cachcá tšëngaftangbioye cmochanjábiamia ca” —Jesús tojánayana.

<sup>39</sup> Jesús quem cuéntnaca tojánayana jabuátambama: “¿Canýe jtaná nantsobena inýe jtaná jtsanachayama? ¿Chca ndoñe

nÿets útata ndaye tbuabentše buanjótsatše? <sup>40</sup> Chë uatsjendayá ndoñe ntsemnana chë buatëmbayabiama más bëtsá. Pero chabe uatsjéndayana chaojapochocá ora, cach buatëmbayacá jtsemnana.

<sup>41-42</sup> “Canÿa chabe bominiÿiñe canÿe niñëfja tojtsebomnëse, cha ndoñe ntsobenana chabe catsátbioye jauyanana: ‘Acbe bominiÿentšana canÿe polvështema jtsebuchjátsécama šmolesenciá ca’. Natsana cha bontsemna cachabe bominiÿentšana chë niñëfja jtsenobuchjátsécana, tšabá jinÿama jobenayama, chabe catsatbe bominiÿentšana chë polvotema jtsebuchjátsécama. ¡Cachcá entsemna acbiama, bacna entšá chë ntšamo ndegombre tcojuabnacá ndinÿinÿnayá! Chë tša bacna soye cojtsama ca acbe catsátbioye tcojauyana ora, cach aca tša bëts bacna soyënga cojtsamama ntjenojuaboycá; y chca, aca jamana canÿe bacna soye. Natsana cmontsemna chë cach aca ndoñe tšabe soyënga cojtsamama ngménaca jshatenójuaboyana y chca amana jshétsajbanana, y chentšana cocayé cochantsobena acbe catsata juajabuáchana ntšamo tšabá yomncá chaotsamama ca” —Jesús tojánayana.

*Tšabe betiye o ndoñe tšabe betiye tondmënama, jtsotatšëmbuana ntšamo tojashajoncá*

*(Mt 7.17-20; 12.34-35)*

<sup>43</sup> “Ndoñe queonÿbatsmëna, chë canÿe tšabe betiyiñe podesca soye jashájonana; ni canÿe ndoñe tšabe betiyiñe tšabe soye jashájonana. <sup>44</sup> Betiyënga jtsabuatmana ntšamo cada betiye tojtseshajcá. Uchmašëshentšana quenátopodena higuëbé jocñana; ni uvašëša, shëshëntša betiyentšana. <sup>45</sup> Chë tšabe entšana, chabe ainanoca tšabe juabnënga bomnentšana jtsóyebuambnayana; y chë bacna entšana, chabe ainanoca ndoñe tšabe juabnënga bomnentšana jtsóyebuambnayana. Er ndayá becá ainanoca tomnana entšá jtsóyebuambnayana ca” —Jesús tojánayana.

*Chë uta ucuatjoniñe*

*(Mt 7.24-27)*

<sup>46</sup> “¿Ndáyeca tšëngaftanga atše šmnétsatsaye, ‘Utabná, Utabná ca’, y ntšamo atše stsichamcá ndoñe ntsamana? <sup>47</sup> Cbochanjáuyana ndacá yomna nda átšbioye tojabo, atšbe palabra tojouena y ntšamo stsichamcá tojtsama: <sup>48</sup> Cha endmëna mo canÿe entšacá, nda canÿe yebna jajebuamna becá fshantse jashenoye yojajutjo y ndëtsbenguiñe yojúcuatjoye. Béjayënga yojtsóftjajna ora, chë yebnëjana yojobuachnëngo, pero ndoñe yonjobenaye juashajayana, er chë ndëtsbenguiñe jabuache yojáúcuatjona. <sup>49</sup> Pero nda atšbe palabra tojouena y ntšamo stsichamcá ndoñe tontsama, endmëna mo canÿe entšacá, nda canÿe yebna yojajebo nÿe



fshantsiñe, tondayiñe ntjucuatjoycá. Bėjaye yojóftjango y jabuache chë yebnoye yojobuá ora, chë yebna yojtsáshajaye y lempe yojtsopochóca ca” —Jesús tojánayana.

## 7

*Jesús canye Romano soldadengbe amëndayabe bochich-nayábioye tbojanshná*

*(Mt 8.5-13)*

<sup>1</sup> Entšángbioye chca jáuyanana tojanpochocá ora, Jesús Capernaum puebloye tojána. <sup>2</sup> Chentše yojoyena canye romano soldadengbe amëndayá. Cha ibnabomna canye bochichnayá puerte bonshaná, y chora cha šocá yojtsemna, ya jtsóbanama. <sup>3</sup> Jesús ba šoquëngbioye yojáshnama encuéntayana chë amëndayá yojouena ora, báseftanga bëtšëjemëngcá amëndayënga cha tojanichamó, chauábama Jesús jaimpádama y chabe bochichnayábioye chabotseshnáñama. <sup>4</sup> Chënga Jesúsbioye tmojánashjango y tša imojtseimpadana, mëntšá: “Quem soldadengbe amëndayá merecido entsebuájona chacotsájabuachama; <sup>5</sup> er cha bëngbe luarentša entšángbioye corente endábabuanÿeshana, y cachá chë bëngbe enefjuana posada šonjayentšjebo ca.”

<sup>6</sup> Jesús chëngaftaca tojána. Pero chë mandayabe yebnoye imojtsebeconá ora, chë soldadengbe amëndayá básefta amiguënga yojichamuá, Jesúsbioye mëntšá chamuauyanama: “Atšbe Utabná, ndoñe yapa matenócochinÿenana átšbioye jabama. Atše merecido taitsatobuajoñe aca atšbe yebnoye chacuamashënguama; <sup>7</sup> chíyeca ni mo añemo chiyatentšetá jama aca jajébenguama. Morna nÿe cochjayana y atšbe bochichnayá tšabá echántsatsmëna. <sup>8</sup> Er atše sëndábamna átšbioye mándayënga y átšnaca soldadengbe amëndayá sëndmëna. Atše canye soldádbioye stjauyana ‘motsa ca’, cha cachora jana; y ínÿabioye stjauyana ‘mabo ca’, cha cachora jabana; y nderado atšbe bochichnayábioye ndayánaca chaomama stjamánda, chánaca cachora chë soye jamana ca” —cha yojáuyana.

<sup>9</sup> Jesús chca tojanuena ora, chë mándayabiama yojenjnaná, y jobuértanëse chë ba entšanga cha ustonëngbioye tojanëyana: “Ndegombre cbëyana, ni mo nÿets Israelentše, ni canÿa quem boyabasacá tša ošbuachiyá chiyátinÿena ca.”

<sup>10</sup> Y chë ichmónënga yebnoye tmojtaná orna, tmojáninÿena chë bochichnayá y tšabá yojtsatsmëna.

*Jesús tojanma canye viudabe uaquiñá cháuatayenama*

<sup>11</sup> Chca tojanopasá chentšana, Jesús yojétsaye Naín ca uabaina puebloye, y cháftaca chabe uatsjëndayënga y ba

entsanga imojtsaye. <sup>12</sup> Chë pueblo amashjuanoye yojtsebeconá orna, entsanga chë pueblentsana canye obaná imojtsábocana jauátbontsama; chë obaná canye viudabe uaquiñá inamna y nye cha uaquiñá. Bëtská entsanga chë obanabe mamá imojtsetjëmbambnaye. <sup>13</sup> Bëngbe Utabná chë viudábioye tbojáninye ora, chabiamá tbojanongmé y tbojaniyana: “Ndoñe matošachena ca.”

<sup>14</sup> Y jobéconase, chë ataúse tojánbojajo, y chë obaná atambayënga tmojantsá. Y Jesús chë obanábioye tbojaniyana: “Bobontse, atše cbëyana: ¡Matëtsbaná ca!”

<sup>15</sup> Chora chë obaná tojtantsbaná y tojanontsé oyebuambnayana; y chabe mamábioye Jesús chë bobontse tbojtananatse. <sup>16</sup> Nyetsca entsanga tša uatjana vojubuahe chca tmojáninye ora, y Bëngbe Bëtsá imojtsatschuanaye, mëntsá jayanëse: “Bëngbentše canye Bëngbe Bëtsabe juabna oyebuambnayá cuatënjonýná ca.” Y mëntsánaca: “Bëngbe Bëtsá tojabo chabe entsanga jabújabuachama ca.”

<sup>17</sup> Y nyets Judea luarëjana y chë chábuañe luarenache entsanga imojátatšëmbona ndayá Jesús tojanmama.

*Juan chë Ubayanabe ichmónënga*  
(Mt 11.2-19)

<sup>18</sup> Juan, lempe ntšamo Jesús yojsamama yojátatšëmbona; er chabe ústonënga chama tmojancuentá. As Juan, chënguentšana útata tojánachembo, <sup>19</sup> y Jesúsbioye yojichamuá jatjayama cha tajojamna chë Cristo, chë jabama ibojanmëná, chë Uámana Uabuayaná, o ínÿabiama jatobátmama tajojétsamna ca. <sup>20</sup> As chë Juanbe ichmónënga Jesúsbioye tmojanobeconá y tmojaniyana: —Juan chë Ubayaná šonjichamo jatjayama, aca ndegombre cojtsemna chë Cristo, chë jabama ibojanmëná, o šojtsamna ínÿabiama jatobátmama ca.

<sup>21</sup> Chë ichmónata tbojánashjango ora, Jesús banga yojsashnaye, šocanëngama y tsetšanëngama; bacna bayëjbe juabna uambayënga tšabá imojtsatsmëna, y jtanënga tšabá yojsatëbinýna. <sup>22</sup> Chora Jesús mëntsá tojanëjua: —Motsata y Juánbioye šochjauyana ntšamo šojinye y šojouencá: Chë jtanënga tšabá entsatëbinýna, chë coshetënga tšabá montsatana, chë bacna nguayanánaca šoquënga shnánënga montsatsmëna, chë tësmënga montsuenana, chë obanënga tmontayena, y chë ndbomnějëmëngbioye chë tšabe noticiënga montsabuayiyá. <sup>23</sup> ¡Puerte oyejuayá chaotsemna, nda atše ndoñe bacna soye stsama ca jtsejuabnayëse, átšbeñe ošbuáchiyana ndoñe tontsajbaná cha ca! —Jesús tojanëyana.

<sup>24</sup> Chë Juanbe ichmónata chentsana tbojésanbocnentšana, Jesús tojanontsé Juanbiamá entsanga jáuyanana, mëntsá: “Juan jinÿama šmojánbocna ora, žndayá jinÿama šmojánbocana

entšanga ndoyena luaroye? ¿Canÿe entšá ainaniñe tondaye añemo ndbomná, mo canÿe šěše bínÿiaca shatiyeyněscá? <sup>25</sup> Y ndóñese, ¿ndayá jinÿama choye šmojánbocana? ¿Canÿe boyabása uámana entšayaca bopormaná? Ndoñe. Tšəngaftanga šmondétatšəmo chē uámana entšayaca bopormánənga y chē bētscá bomnánaca nÿe tondayama ntsecochinÿencá vida bomnəngna, reyəngbe yebnənguiñe mondbétsiyenama. <sup>26</sup> Asna, ¿ndayá jinÿama choye šmojánbocana? ¿Canÿa Bəngbe Bētsabe juabna oyebuambnayá? Ndegombre; y cbəyana, canÿa Bəngbe Bētsabe juabna oyebuambnayabiama más bētsá. <sup>27</sup> Cha, Juan, endmēna ndabiama Bəngbe Bētsá chabe uabemana palabrenguiñe tojánayana mo chabe ichmonacá, mēntšá tojánayana ora: Cristo, atšbe entšá natsana sənjichmó acbiama chaóyebuambama,

entšanga jábuayenama aca jabama ainaniñe tšabe juabnəngaca chamotseprontánama ca.

<sup>28</sup> Ndegombre cbəyana: Nÿets tempo entšangbeñe, ndocná quenátsmēna Juan chē Ubayanabiama más bētsá; masque chca, Bəngbe Bētsabe aməndayoca chē más batšá uamaná, cha más bētsá echántsemna ntšamo mora Juan yomnama ca” — Jesús tojánayana.

<sup>29</sup> “Nÿetsca entšanga chca Juánbioye tmojanóyeunanga y chē Romocama entšangbioye impuesto atjanayəngnaca, nÿets ainánaca tmojánayana Bəngbe Bētsá nÿetsca soyənguiñe tšabá amá yomna ca; er tmojánenabaye ntšamo jubáyama Juan yojanamancá. <sup>30</sup> Pero chē fariseunga y ley abuátambayənga, ntšamo jubáyama Juan yojanamancá jójəngacñama ndoñe tmonjánbošena ora, tmojtsanaboté ndayá Bəngbe Bētsá chəngbiama jamama yojanjuabnacá.”

<sup>31</sup> Jesús mēntšánaca tojánayana: “Cbochanjáuyana ndayacá morsca entšanga imomna, y ndayəngcá chənga imomna.

<sup>32</sup> Chənga mondmēna mo chē plazəngoca mondbetsetbiámama baseteməngcá; chəngna mēntšá jabuache jtseatsayana: ‘Tšəngaftangbiama fsənjaflautá y ndoñe chešmatslantsá; ngménaca fsənjavarsiá y ndoñe chešmatenóbošachna ca.’

<sup>33</sup> Juan chē Ubayaná tonjánabo y ndoñe quenjatamana bētscá entšangbeñe jtsemnana, ni tanděse jasana, ni vínoye jofšiyana; y tšəngaftanga šmongsichamo chana bacna bayəjbe juabna uambayá inamna ca. <sup>34</sup> Morna, chē Bəngbe Bētsá Entšá tbojanbemá tonjabo y chana aíñe entsamana bētscá entšangbeñe jtseyayana y jtsofšəšnayana, y tšəngaftanga chabiama šmongsichamo: ‘Chana yapa uasayá y vínoye tmoyá entsemna y Romocama entšangbioye impuesto atjanayənga y bacna soyənga aməngbe amigo ca’. <sup>35</sup> Pero Bəngbe Bētsá

endbétsinÿinÿnaye cha nÿets osertánana bomná yomnama, chë ndayá cha tojama ora ndayá chentšana inobocna soyëngaca ca” —cha tojánayana.

*Jesús, chë fariseo Simonbe yebnentše*

<sup>36</sup> Canÿe fariseo Jesúsbioye tbojanofja saná jauasama, y Jesús chabe yebnoye tojána y mesëshentše yojótbema. <sup>37</sup> Chë pueblentše yojamna canÿe shembása, bacna vida bomná. Jesús chë fariseobe yebnentše yojtsesama chë shembása yojátatšëmbona; as cha chë yebnoye tojánashjango y tojanamba canÿe alabastro botellëše, jútjena canÿe botamana uanguëtše bėjayeca. <sup>38</sup> Jesusbe shecuatšentše yojoshëntsamentšiyë, šachénaca; shëchbuíyeca chabe shecuatšënga yojtsefchecuacná y cachabe stjënashaca ibojtsatsshéchojuaye. Chabe shecuatšënga yojtonguëtsëntšiyë y chë botamana uanguëtše bėjaye ibojtashecbuešcacia. <sup>39</sup> Chë fariseo Jesúsbioye ofjaná chca tojáninÿe ora, mëntšá Jesusbiamá yojtsejuabnaye: “Cha ndegombre canÿe Bëngbe Bëtsabe juabna oyebuambnayá tojtsemnëse, nantsetátšëmbo nda y mocna shembása yomna chë bontsebana shembása: canÿe bacna vida bomna shembása ca.” <sup>40</sup> As Jesús chë fariséobioye tbojanianya: —Simón, cuentado palabra šmotsoyeuná ca.

Y chë fariseo tbojanjuá: —Arseñor, Buatëmbayá ca.

<sup>41</sup> Y Jesús tojánayana: —Canÿe entšá crocénana uyentšamianá, uta ndebénata yojánabamna. Canÿa shachna patse denario crocénana ibojandebena, y chë ínÿana, shachna bnëtsana. <sup>42</sup> Pero chë útata tondaye ibontsebomna ndayentšana cha jëtsëntšabuáchiyama; as chë uyentšamianá nÿets útata chë ndebénana yojtsaperdónaye.

Chora chë fariséobioye tbojanianya: —Mora šmëyana, ¿chë útatentšana nda más chë uyentšamianábioye buantsebobonshana ca?

<sup>43</sup> Y Simón tbojanjuá: —Atše šontsinÿana chë más bëtsca ndebená ca.

Y Jesús tbojanianya: —Ndegombre, ntšamo endmëncá tcjayana ca.

<sup>44</sup> Jesús, chë shembásabioye jontješiyëse, Simónbioye tbojanianya: —Minÿe quem shembása. Atše acbe yebnoye sënjámashëngo y aca búyeshe ndoñe chešcatabuatsëtá atšbe shecuatšëngama. Y quem shembásana, cachabe shëchbuíyeca šontseshecjabebé y chabe stjënashaca šontseshecbojó. <sup>45</sup> Ndoñe chešcatámocho, pero cha tonjámashëngo orscana ndoñe ntjájbanana atšbe shecuatšënga onguëtsëntšnaye.

<sup>46</sup> “Aca bestšašiñe aceitiye ndoñe chešcatsbuešcja, y chana aíñe botamana uanguëtše bėjaye šonjashecbuešcja. <sup>47</sup> Chcasna atše cbëyana, cha šonjinÿanÿé atšbiamá corente

bonshánana yojtsebomna, er atše chabe bëtscá bacna soyënga sëntseboperdoná; pero nda nÿe básefta bacna soyëngama stjaperdóna chana, nÿe batšatema bonshánana jtsebomnana ca.”

<sup>48</sup> Y chora Jesús chë shembásabioye tbojaniyana: “Acbe bacna soyëngama perdonaná contsemna ca.”

<sup>49</sup> Chora chë ófjanënga chentše imnatbiámanëngna tmojanontsé enatsëtsnayana: “¿Nda quem entšá yojtsemna, chë bacna soyëngámna entšángbioye jtsaperdónayana ca?”

<sup>50</sup> Y Jesús más chë shembásabioye tbojaniyana: “Aca átšbeñe icošbuachéyeca, atsbočaná cochántsemna; natjëmbana motatoñe ca.”

## 8

### *Chë Jesúsbioye imojanájabuachana shembásenga*

<sup>1</sup> Chca tojanopasá chentšana, Jesús bëtš y base pueblënguëjana yojánana, tšabe noticiënga Bëngbe Bëtšabe amëndayama entšanga abuátambaye y abuayiynaye. Chë bnëtsana uta uatsjëndayëngna cháftaca imojtsajna. <sup>2</sup> Básefta shembásengnaca imojtsetjëmbambnaye; chëngbentšana Jesús bacna bayëjënga tojtanëbuacna y šocanëngama tojanashná. Chënga imojamna, María chë Magdalena ca uabobainá, ndábentšana Jesús canÿsëfta bacna bayëjënga tojtanëbuacna; <sup>3</sup> Juana, Cuzbe shema (Cuza yojamna rey Heródesbe canÿe uajabuachaná); Susana y inÿe shembásenga; chëngna chë imojánbomna soyëngaca chëngbioye imojanéjabuáchana.

### *Chë jenabe cuento*

*(Mt 13.1-9; Mc 4.1-9)*

<sup>4</sup> Ba pueblënguentsana mallajta entšanga tmojánbocana Jesús jinÿama. Ba entšanga jouenama tmojanobeconá ora, Jesús mëntšá tojanacuntá: <sup>5</sup> “Canÿe, canÿe jená jénaye jaujuëshama yojëftsebocna. Yojtsëjquëshaye orna, básefta jénaye benache juachañe yojuatquëcjana; chiñna entšanga imojtsebotájaye, y jaja shloftšënga imojástajna y imojtsósañe. <sup>6</sup> Inÿe meshëngna ndëtšbenguiñe yojuatquëcjana. Yojuábocna orna, betscó yojtsábojo, chë fshantsiñe ndoñe yapa búyeshe yonjamna causa. <sup>7</sup> Inÿe meshëngna uchemëshangañe yojuatquëcjana y chë uchemëshangá lempe yojtsatscué, chë jénayeca cánÿiñe yojuábocna ora. <sup>8</sup> Inÿe meshëngna, uanguaniñe yojuatquëcjana. Yojuájua orna, bëtscá yojuashájona; canÿe jénayentšana nÿa mo patse meshënga yojuashájona.”

Jesús chca jacuéntama tojanpochocá ora, tojanáyebuachena: “Chë jouenama tmojtsobenënga, šmochjouena ca.”

*Ndáyeca Jesús cuentëngaca yojánabuatambaye*

*(Mt 13.10-17; Mc 4.10-12)*

<sup>9</sup> As chora chabe uatsjédayënga tmojantjá: —¿Ntšamo chë cuento yojtsayana ca?

<sup>10</sup> Y Jesús tojanëyana: —Bëngbe Bëtsá tšëngaftanga cmontsinÿanÿná nÿetsca chë mo iytémencá yomna soyënga chabe amëndayama, pero chë ínÿengbioyna ndoñe; chë soyëngama chënga lempe cuentëngaca sentsëtsëtsná. Chca, masque corente chamotsafšna, ndoñe chamondobená Bëngbe Bëtsabe soyënga jinÿama; y masque becá quem soyënga chamouena, ndoñe queochátësertana ca.

*Jesús chë jenabe cuentama tojanabuayená*

*(Mt 13.18-23; Mc 4.13-20)*

<sup>11</sup> “Chë cuento mëntšá endayana: Chë jénaye Bëngbe Bëtsabe palabra entsemna. <sup>12</sup> Chë benache juachañe yojuatquécjana básefta jénaye endayana chë básefta entšanga Bëngbe Bëtsabiama soyënga tmojouenënga; pero chora Satanás betscó jabana chënga Bëngbe Bëtsabe palabra jabétsabuajuanama, chca, chënga ndoñe chamondëtsošbuáchema y bacna soyënguentsána ndatsebácanënga chamotsemnana. <sup>13</sup> Inÿe entšanga mondmëna mo chë ndëtsbenguiñe yojuatquécjana jenaycá. Chë entšangna Bëngbe Bëtsabe palabra jouenana y oyejuayënga jtsemnana. Pero ndoñe nÿets tempo chana jocochájuana; y chca, ndoñe bayté Bëngbe Bëtsáftaca ntjëftsemnëngana, cha ndoñe yapa tmontsašbuaché causa. Inÿenga mochantsëbuayënja y Bëngbe Bëtsábeñe betsošbuáchiyama mochanjasúfrianga; chë causa, Bëngbe Bëtsabe palabra cachcá chënga mochanjesonÿaye. <sup>14</sup> Inÿe entšanga mondmëna mo chë ucmëshangañe yojuatquécjana jenaycá. Chëngna Bëngbe Bëtsabe palabra jouenana, pero quem luarentša soyëngaca oyejuayënga jtsemnana yapa jesenójuabnayana, y mallajta crocénana y ba soyënga jtsebonnana yapa jésebošana; chama y ba soyëngama yapa enócochinÿena causa, Bëngbe Bëtsabe soyëngama echantsebnëtjomba y ndoñe quemochátama ntšamo Bëngbe Bëtsá tojayancá. <sup>15</sup> Inÿe entšangna mondmëna mo chë uanguniñe yojuatquécjana jenaycá. Chëngna Bëngbe Bëtsabe palabra botamana mochanjouena; tšabe ainánaca Bëngbe Bëtsabe palabriñe jtsošbuáchiyama jtseprontánëngana. Mo canÿe betiye puerta tšabá tojtseshajuancá, chënga bëtscá tšabe soyënga Bëngbe Bëtsabiama mochántsama. Chca mochántsama, Bëngbe Bëtsábeñe jtsošbuáchiyëse y nÿetsca soyënguiñe puerta uantadënga jtsemnëse ca” —Jesús tojanabuayená.

*Chë uajuinÿanëshama cuento*

*(Mc 4.21-25)*

16 “Ndocná canÿe uajuinÿanëshsa juajuinÿenana, chentšana ndaye sóyeca chëshsa jtsëstama o jutsnëshsa tajsoye jtsajájuama; juajuinÿenana ndayá tsbanánoca juajájuama, chë luarentše amashjuanëngbiama chaotsebínÿnama. 17 Er ndocna yoiytëmena soye, ntjinÿcá queochaisoquéda, y chë entsangbiama ndótatšëmbo soye, ntsotatšëmbcá queochaisoquéda.

18 “Chcasna, botamana šmochjouena, er nda Bëngbe Bëtsabe soyëngama tšabá tbojosertá, Bëngbe Bëtsá echanjama cha más ba soyëngama chabosertama; pero nda chë soyëngama ndoñe tontsebošá, chë nÿe batšá ibosertana soyëngama bochántsebnatjëmba ca” —Jesús tojánayana.

*Chë Jesusbe ndegombre pamíllanguentsënga*  
(Mt 12.46-50; Mc 3.31-35)

19 Chora, chabe mamá y chabe catsátanga chë Jesús yojtsemnentše tmojánashjajna, pero ndoñe imontsobena chábioye jobéconana, yapa entsanga causa. 20 As canÿa Jesúsbioye mëntšá tbojaniyana: —Ache mamá y ache catsátanga shjoca montsemna y montseboše aca jinÿama ca.

21 As Jesús tojánayana: —Chë Bëngbe Bëtsabe palabra tmojouenënga y ntšamo tmojouencá tmojtsamënga jtsemnana atšbe mamá y atšbe catsátanga, atšbe ndegombre pamíllanguentsënga ca.

*Jesús chë binÿia y chë béjaye bonguana yojëtsbema*  
(Mt 8.23-27; Mc 4.35-41)

22 Canÿe te, Jesús chabe uatsjëndayëngaftaca canÿe barquëshoye tojánamashëngo y chënga tojanëyana: “Uafjónaye chenguana cuajna ca.”

As tmojána; 23 y imojtsenachnëjuanëntscuana Jesús yojtsomaná. Ndeolpe, chë béjayiñe corente jabuache binÿia yojóshjango y yojontsé béjaye chë barquëshoye jtsobuajútjiana. Y chca, chëngbiama puerte resjo yojtsemna. 24 Chora chë uatsjëndayënga tmojána Jesús jetsefšenama y mëntšá tmojaniyana: —¡Buatëmbayá! ¡Buatëmbayá! ¡Montsenatjëmbambana ca!

Chora Jesús tojantsbaná y chë binÿia y chë bëts olëshëngoye tojanmandá: “Bonguana šochtsemna ca.” Y chë binÿiyana tojanëjbana y lempe bonguana yojtsatsmëna.

25 Chentšana Jesús chabe uatsjëndayënga tojanëyana: —¿Bëngbe Bëtsá tšëngaftanga jujabuáchama yobenama, cabá ndoñe šmontsošbuaché ca?

Y chënga auatjanánënga y ojanánënga mëntšá imojtsenatsëtsnaye: —¿Nda quem boyabása yomna? ¡Cha tojamandá ora, masque chë binÿia y chë béjaynaca joyeunayana ca!

*Chë Gerasa luaroca bacna bayëja uambayá*  
(Mc 8.28-34; Mc 5.1-20)

<sup>26</sup> Chentšana Gerasa ca uabaina luaroye tmojánashjajna, Galilea ndirichiñe. <sup>27</sup> Jesús fshantsoye tojánastjango ora, chë pueblocana canye entśá chábioye tojánabo. Cha ya bayté bayëjbe juabna yojtsebomna, ndocna entśayá yonjanichëtjona; y yebniñe ndoñe yonjaniyena, sinó obanëngbe cuevëshënguenache. <sup>28</sup> Chë entśá, Jesúsbioye tbojáninye ora, chabe natsanoica yojoshëntsamentsiye y mëntśá yojtsáyebuache: —¿Ndayá átseftaca cojtseboše, Jesús chë celoca Bëngbe Bëtsabe Uaquiñá? ¡Diosmanda ndoñe šcatjatsëtšená ca!

<sup>29</sup> Chca tbojaniana, er Jesús tojanmandá chë bacna bayëjbe juabna chábentšana chauesebocnama. Ba soye chë bayëja yojánama chë entśá ndoñe tšabá chaotsemnama. Chë entśanga imojuamana cucuatšentšana y shecuatšentšana cha jtsëtsbuayana bonguana chaotsemnama, pero chana jtsatabebiana, y chë bacna bayëjbe mándoca entśanga ndoyena luarëngoye yojánachana. <sup>30</sup> Jesús chë boyabásabioye tbojantjá: —¿Ntšamo cabaina ca?

Y cha tbojanjuá: —Atše sënduabaina Legión ca.

Cha chca tojánayana, er chábeñe ba bacna bayëjenga tmojánamashjna. <sup>31</sup> Y chë bayëjenga Jesús tmojanimpadá, chë corente uabouana tboye ndoñe chaondíchamuama. <sup>32</sup> Chentša béconana ba cotsënga imnajena, tjoca imnétsosañe; as chë bayëjenga Jesús tmojanimpadá chë cotsëngbeñe jamashjna chualesenciama, y Jesús aiñe chca tojanalesenciá. <sup>33</sup> As chë bayëjenga chë entśábentšana tmojésanbocana y chë cotsëngbeñe tmojánamashjna; y chentšana, chë cotsënga batsjocana peñëšëjana uafjónayoye imojtsoshbuetše y yojtsatajo.

<sup>34</sup> Chë cotsënga anyëñenga chca yojopásama tmojáninye ora, chentšana tmojtsanacheta y tmojána chë soye jacuéntama chë puebloca y chiñe luarenache. <sup>35</sup> Entśanga tmojánbocana ndayá tojanopasacá jinýama, y Jesús yojtsemnoye tmojánashjajna ora, tmojáninye chë entśá chë ndábentšana bayëjenga tmojtanbocna, Jesusbe shecuatšentše yojtsótbemañe, entśayá uichëtjoná y chabe nyets juábnaca. Y chë entśanga chama corente imojouatjaná. <sup>36</sup> Ntšamo yojopasacá tmojáninyëngna entśángbioye tmojanacuntá ntšamo chca chë bacna bayëjbe juabna uambayá chora ya tšabá yojtsatsmënana. <sup>37</sup> Chentšana, nyetscanga chë Gerasa luarentše oyenënga Jesúsbioye imojtseimpadana chë luarentšana ínýoye chaotsoñama, er chënga corente imojtsauatja. As Jesús chë barquëshoye tojtanamáshëngo



y chentšana tojtsanoñe. <sup>38</sup> Chë entsá chë ndábentšana bacna bayëjenga tmojtanbocana, Jesúsbioye tbojanimpadá cháftaca jama chabolesenciama; pero cha ndoñe tbonjanlesenciá. Jesús tbojanmandá chauatoquedama y mëntšá tbojaniyana: <sup>39</sup> “Acbe yebnoye motsatoñe y cochjácuntaye lempe ntšamo Bëngbe Bëtsá acbiama tojamcá ca.”

Chentšana chë boyabása yojtsatoñe, y nyëts pueblëjana tojanacuntá ntšamo Jesús chabiama tojanmcá

*Jesús canye shembásabioye tbojanshná y tojanma Jairëbe bembetema cháuatayenama*

*(Mt 9.18-26; Mc 5.21-43)*

<sup>40</sup> Jesús chë uafjájónaye chenguánoica tojtashjango ora, nyëtsca entsanga oyejuayënga tmojtanofja, er nyëtscanga chabiama imojanobátmana. <sup>41</sup> Chora tojánashjango canye entsá, Jairo ca uabainá. Cha inamna chë pueblentse chë judiëngbe enefjuana yebnentša mandayá. Jesusbe shecuatšentše yojoshëntsamentsiye y ibojtseimpadana chabe yebnoye cháuama; <sup>42</sup> er chë nye canye bembe cha ibnabomná, bnëtsana uta uata bomná, chora ya jóbanama yojtsemna.

Y Jesús yojtsayëntscuana, chë entsanga chábioye imojtsojuatsëntšenaye. <sup>43</sup> Chë entsanguentše yojtsaye canye shembása, oboftjajuanánaca šocá; cha ya bnëtsana uta uata chca inapadecena. Lempe ntšamo yojanbomncá ashnayëngbioye atóbocayiñe yojtsepochóca, y ndocná yonjobenaye cha jáshnana. <sup>44</sup> Chë shembásana stëtšoicana Jesúsbioye yojobeconá y chabe entsáyá sibuájua tojanábojajo. Y cachora chë oboftjajuanana ibojtsobojuána. <sup>45</sup> Chora Jesús tojanatjá: —¿Nda šjabojo ca?

Nyëtscanga imojtsichamo ndoñe ca; as Pedro tojánayana: —Buatëmbayá, entsanga cmontsatsëntšená y cmontsayájuatsëntšenaye ca.

<sup>46</sup> Pero Jesús cachiñe tojánayana: —Pronto nda šojábojajo, er atše sënjasenté obenana átšbentšana jóbocnana, mo nda stjashna orcá ca.

<sup>47</sup> Chë shembása tojáninye Jesús yojtsetátšëmbo cha tbojánbojajuama. As chora, ngmëmnayá tojána y Jesusbe shecuatšentše yojoshëntsamentsiye; y nyëtscangbe delante tojanobuambá, ndáyeca tbojánbojajuama, y ntšamo cachora tšabá tojtanoquedama. <sup>48</sup> Chora Jesús tbojaniyana: —Bembe. Bëngbe Bëtsábeñe icošbuachéyeca shnaná contsatsmëna. Natjëmbana motsatoñe ca.

<sup>49</sup> Jesús cabá yojtsóyebuambnantscuana, chë judiëngbe enefjuana yebnentša mandayábocana canya tojánashjango, y chë mandayábioye tbojaniyana: —Acbe bembe ya tontsóbana; ndoñe más chë Buatëmbayábioye matëbëyabomana ca.

<sup>50</sup> Pero Jesús chë soye tojanuena; as chë mandayábioye tbojaniyana: —Ndoñe matauatjana. Nye Bëngbe Bëtsábeñe cochtsošbuáchiye y acbe bembe tšabá echántsatsmäna ca.

<sup>51</sup> Chë yebnoye tmojánashjajna ora, Jesús ndoñe tonjanalesenciá banga choye jamashjna, nye Pedro, Juan y Santiago y chë shembásetembe bëtsétsatna aíñe. <sup>52</sup> Nýetscanga imojtsenóbošachiye y ngménaca imojtsóyebuambnaye, pero Jesús tojanéyana: “Ndoñe matenóbošachengana. Cha ndoñe chenatóbana; cha nye endëtsomañe ca.”

<sup>53</sup> Chë entšanga Jesúsbioye nye imojtsáfchaye, er chënga imojtsetátšëmbo chë shembásetema obaná yojétsemnama. <sup>54</sup> Chora Jesús chábioye tbojanábuacueshache y jabuache tbojaniyana: “¡Shembásetema, matëtsbaná ca!”

<sup>55</sup> Y cha tojtanayena y cachora tojtantsbaná; y Jesús tojanamëndá chë shembásetema saná chamuajuatšé, chaosama. <sup>56</sup> Chë shembásetembe bëtsétsata puerte ojanánata ibojtsemna; y Jesús tojanamëndá, ndayá tojanopasama ndocnábeñe ntsecuéntayana.

## 9

*Jesús, chabe uatsjédayënga tojanichamó, Bëngbe Bëtsabe amëndayama jábuayenama*

(Mt 10.5-15; Mc 6.7-13)

<sup>1</sup> Chentšana, Jesús chabe bnëtsana uta uatsjédayënga tojánachembo, y mando y obenana tojanatšatá bacna bayëjënga entšángbentšana jtëbuacanama y šocanëngama jashnayama. <sup>2</sup> Tojanichamó Bëngbe Bëtsabe amëndayama jábuayenama y entšángbioye jashnayama. <sup>3</sup> Y mëntšá tojanéyana: “Benachiñama tondaye šmattsambaye: ni jatjonëfja, ni shecnaja, ni saná, ni crocénana; ni inye entšëjua jenotrócama cach ndoñe. <sup>4</sup> Canye yebnentše posada chacmojúyentšame ora, chentše šmochjoquéda inye puebloye játantscuana. <sup>5</sup> Nderado ndayentše posada ndoñe chacmonjuyentšame, chentšana šmochjésebocana y shecuatšentša polvëshe šmochjésenstoto, chca, chëngbioye jinñanñiyama chënga ndoñe tšabá tšëngaftangaftaca tmonjamama ca” —Jesús tojanabuayená.

<sup>6</sup> Asna chë uatsjédayënga tmojëftsanbocana y tmojána, nýetsca chë base pueblotémënguenache chë tšabe noticiënga abuayinyaye y entšanga šocanëngama áshnaye.

*Herodes y Jesús*

(Mt 14.1-12; Mc 6.14-29)

<sup>7</sup> Jesusbiana y ntšamo yojtsanopasánama rey Herodes tojántatšëmbona; y ndoñe yontsetátšëmbo ntšamo jtsejuabnayana, er báseftanga imojtsanichamo Juan chë Ubayaná

obanënguentsana tojtanayena ca, <sup>8</sup> ínÿenga imojtsanichamo chë Bëngbe Bëtsabe juabna oyebuambnayá Elías cachiñe tojánbocna ca, y ínÿengna canÿa chë tempo imojanmëna Bëngbe Bëtsabe juabna oyebuambnayënguentsá obanënguentsana tojtanayena ca. <sup>9</sup> Pero Heródesna tojánayana: “Cach atše sënjanmandá Juanbe bestšaše chamotsëstjanguama. ¿As, nda cha nántsemna, chë ndabiama chca soyënga jtsóyebuambnayana sentsuenana ca?”

Chíyeca Herodes yojtsenguaye ntšamo jamëse Jesús jinÿama.

*Jesús shachna uaranga boyabásenga saná tojanacaredadó  
(Mt 14.13-21; Mc 6.30-44; Jn 6.1-14)*

<sup>10</sup> Chë Jesús tojánichamonga chábioye tmojtanashjango ora, lempe ntšamo chënga tmojanmama tmojancuentá. Y Jesús, nÿe chënga jëftsëbiatšese ínÿoye tojtsanoñe, Betsaida ca uabaina puebloye. <sup>11</sup> Pero chë entšanga chë soye tmojántatšëmbona, y as tmojanasto; y Jesusna tšabá chënga tojanëbuaja, y Bëngbe Bëtsabe amëndayama yojtsëtsëtsnaye, y chë šoquënga imojtsemnëngbioye tojanashná.

<sup>12</sup> Ya jetiñe yojtsobiamná orna, chë bnëtsana uta uatsjëndayënga Jesúsbioye tmojanobeconá y mëntsá tmojanianya: —Chë entšanga cuantichamuá, jóchnama y saná jonguan-goñama chamotsama chë béconana pueblotémënguenache y luarënguenache; er quem luariñe ndocná quenatiyena ca.

<sup>13</sup> Jesús chora tojanëyana: —Tšëngaftanga saná chëngbioye šmochjacaredádaye ca.

Pero chënga tmojanjuá: —Nÿe shachna tandëse y uta beónata fsëntsebmna; nÿetscangbiana saná jabuámiyama nderado nda tojasna, aíñe cuanjacaredádaye ca.

<sup>14</sup> Er mo shachna uaranga boyabásenga immamna. Pero Jesusna chabe uatsjëndayënga tojanëyana: —Mamëndá nÿetscanga chamotbiamama shachna bnëtsátsanënga ca.

<sup>15</sup> As chënga chca tmojanma y nÿetsca entšanga tmojanot-biama. <sup>16</sup> Chora, Jesús chë shachna tandëse y chë uta beónata tojanca, y celoye tojanontješé, Bëngbe Bëtsábioye chama tbojtanchuá, tojanjatá y chabe uatsjëndayënga tojanantregá entšangbioye chamuatšatama. <sup>17</sup> Nÿetsca entšanga tmojanse jtoshachaye nÿetsá, y cabá bnëtsana uta sbarëco tmojanajutjé chë ojamnëtémëngaca.

*Pedro tojánayana, Jesús chë Cristo bétsemnama  
(Mt 16.13-19; Mc 8.27-29)*

<sup>18</sup> Canÿe te, Jesús canÿa Bëngbe Bëtsáftaca ibojtsencuëntaye ora, chabe uatsjëndayënga cháftaca imojtsemna. Chora tojanatjá: —¿Nda atše bétsemnama entšanga imojtsichamo ca?

19 Y chënga tmojanjuá: —Báseftanga montsichamo Juan ca, ínÿengna Elías ca, y ínÿengna canÿe Bëngbe Bëtsabe juabna oyebuambnayá tempscá mora tojtayena ca.

20 As Jesús tojanatjá: —Y tšëngaftangna, ¿nda atše bétsemnama ntšamo šmochjayana ca?

Y Pedro tbojanjuá: —Acna chë Cristo condmëna, chë Bëngbe Bëtsabe Uámana Uabuayaná ca.

*Jesús tojánayana cha ibojamna jóbanana y jtayenana*

*(Mt 16.20-28; Mc 8.30-9.1)*

21 Pero Jesús corente chënga tojanamëndá ndocnábeñe chama ntsecuëntayana. 22 Y mëntšá cachabiamna tojánayana: —Chë Bëngbe Bëtsá Entšá tbojanbemá bontsemna puerta jasúfriana, chë judiëngbeñe bëtsëjemëngcá amëndayëngbiama, chë judiëngbe bachnangbe más uámana amëndayëngbiama y ley abuatambayëngbiama uabotená jtsemnana. Entšanga mochanjóba, pero unga tianoye cha echántayena ca.

23 Chentšana nÿetsca entšanga tojanëyana: “Nda atšbe uatsjendayá jtsemnama tojtseboše, cháuyana nÿe Bëngbe Bëtsá yobena sempre chabe vidiñe jtsemándayama, chabe quem luarentša soyënga cachcá chauesonÿá atše juastama, y cada te chaotseprontana átšbeyeca jasúfriama, y cruciñe jobanámnaca. 24 Nda tojtsama quem luarentše bëtscá soyënga jtseboznama y atšbiama jasúfriama ndoñe tontseprontana, chë nÿetsca tescama yomna tšabe vida echanjobuetše. Pero nda quem luarentša soyënga cachcá tojëftsonÿá atše juastama, masque chaóbana, chë nÿetsca tescama yomna tšabe vida echántseboznama. 25 Er ¿ndayama entšá buanjósërvia nÿetsca quem luarentša soyënga jtseboznana, cha pochocaná jtsemnama tojtsá y chë nÿetsca tescama yomna tšabe vida tojtsoperdese? 26 Er ndëmuanÿe entšá, atšbiama o atšbe buayenana soyëngama tojtsëuatja, chë Bëngbe Bëtsá Entšá tbojanbemanáca chabiamna echantsëuatja, cha chabe bëtš buash-inÿinÿaniñe chaojésabo ora, chabe Taitabe bëtš obenánaca y chabe angelotëmëngaftaca adoraná. 27 Ndegombre cbëyana, báseftanga muentše montsemnënga quemochatóbana, Bëngbe Bëtsá chabe obenánaca entšángbeñe jabomándama jabana ntjëftsinÿcá ca” —cha tojánayana.

*Jesús inÿetšá tojanobinÿná*

*(Mt 17.1-8; Mc 9.2-8)*

28 Mëntšá tojanopasá: Chca palabrënga tojanoyebuambá chentšana posuftaytese, Jesús tojëftsanëbiatše Pedro, Santiago y Juan, y canÿe tjoye tojántsua, Bëngbe Bëtsáftaca jencuëntama. 29 Bëngbe Bëtsáftaca ibojtsencuëntantscuana, chabe jubiá inÿetšá yojtsinÿna, y chabe uichëtjonëjuangá

tša uafjantsëjuangá yojtsamna y tša yojtsabuashinÿinÿana.  
<sup>30</sup> Chora uta boyabásata tbojanonÿná, Jesúseftaca ibojtsen-  
 cuéntaye. Chata ibojamna Moisés y Elías; <sup>31</sup> corente buash-  
 inÿinÿaniñe ibojtsemna, y chënga imojtsencuéntaye ntšamo  
 Jesús Jerusalenoca jasúfriana y jóbanana. <sup>32</sup> Masque Pedro y  
 chabe enutata tša ocnayënga imojtsemna, nÿe imojtsefsna y  
 tmojáninÿe Jesusbe juachañe tša yojtsebuashinÿinÿana y chë  
 uta boyabásata cháftaca ibojtsemna. <sup>33</sup> Chë uta boyabásata  
 Jesús bentshana ibojoluára ora, Pedro, Jesús bioye tbojaniyana:  
 “Buatëmbayá, ¡tša tšabá bëngbiana cuanmëna muentše jtsem-  
 nana ca! Mora fchanjapórma unga tambotémënga: cánÿetema  
 acbiana, ínÿetema Moisesbiana y ínÿetemna Elíasbiana ca.”

Pero Pedro ndoñe yontsetátšëmbo ntšamo yojtsichámuama.  
<sup>34</sup> Y chca yojtsóyebuambnantscuana, canÿe jantsetëshe yojóbema,  
 y chëngbioye yojáutsbotse, y chënga chë tsoye imojtsemnama  
 tmojáninÿe ora, chë uatsjéndayënga chama imojtsauatja.  
<sup>35</sup> Chora chë jantsetëshoicana canÿe oyebuambnayana to-  
 janóbocna, mëntšá: “Mua atšbe Uaquiñá endmëna, atšbe  
 uabuayaná; cha šmochtseyeunana ca.”

<sup>36</sup> Chë oyebuambnayana tmojanuenentšana, tmojáninÿe  
 Jesús canÿa yojtsemna. Chë uatsjéndayënga iytëca imojt-  
 semna, y chë tempo ndocnábioye chama imonjueyaye.

*Jesús, canÿe basa bacna bayëjbe juabna uambayábioye tbo-  
 janshná*

*(Mt 17.14-21; Mc 9.14-29)*

<sup>37</sup> Yëfsana, chë tjocana tmojtantsmá ora, ba entšanga  
 tmojánbocana Jesús jajëbenguama. <sup>38</sup> Chora, chë  
 entšanguentšana canÿe boyabása tojanontšé mëntšá  
 uayebuáchana: —Buatëmbayá, Diosmanda atšbe uaquiñá  
 minÿe. Nÿe cha atšbe uaquiñá endmëna; <sup>39</sup> y mora,  
 bayëjbe juabna chábioye bontsësháchichana, y nÿe ndeolpe  
 jóntšana yoyana, ataque joshachana y uayoicana shashiye  
 jtsabocanana. Y chábentšana chë bayëja ndoñe betscó  
 ntjësebocnana, y cuerpiñe corente maltrataná jeseboshjonana.  
<sup>40</sup> Acbe uatsjéndayënga sënjaimpadá chë bayëja chábentšana  
 chamuatábocnama, pero ndoñe chematobená ca.

<sup>41</sup> As Jesús tojánayana: —¡Nÿetšá ndošbuáchiyënga y bacna  
 entšanga! ¿Buetaytë šojtsemna tšëngaftangaftaca jëftsemnana y  
 jtsëuantánana ca?

Chora chë boyabásabioye tbojaniyana: —Moye chë uaquiñá  
 mánatse ca.

<sup>42</sup> Chë basa yojtsebeconá ora, chë bacna bayëja chábioye  
 tbojanshajayé y inÿe ataque tbojanëshache. Pero Jesús chë  
 bayëjbioye tbojanácacana, chë basetëmbioye tbojanshná y

chabe taitábioye tbojtanëntregá. <sup>43</sup> Y nÿetscanga puerte ojnánánënga imojtsemna, Bëngbe Bëtsá tša obenana bomná inamnana.

*Jesús cachiñe tojánayana cha ibojamna jóbanana y jtayenana ca*

(Mt 17.22-23; Mc 9.30-32)

Nÿetsca entšanga, ndayá Jesús yojtšamama ojnánánënga imojtsemnëntscuana, chabe uatsjéndayënga cha tojanëyana: <sup>44</sup> “Quem soye tšabá šmochjouena y ndoñe chacmondébnëtjomba: Chë Bëngbe Bëtsá Entšá tbojanbemá entšangbe cucuatšíñe mochanjáboshjona ca.”

<sup>45</sup> Pero chënga ndoñe yontsósertana ntšamo Jesús yojtšëtsësnacá, er Bëngbe Bëtsá ndoñe tonjanalesenciá chama chaósertama; y imojtsauatja Jesús jaimpádana chama chauabuayenama.

*¿Nda chë más uamaná yomna?*

(Mt 18.1-5; Mc 9.33-37)

<sup>46</sup> Chë tempo, chë uatsjéndayënga tmojanontšë enatsëtsnayana, nda chë más uamaná bëtsemnana. <sup>47</sup> Jesús yojtsetátšëmbo ntšamo chënga imojtsejuabnayama; asna, canÿe básetema tbojánishache, chabe juachaca tbojánbema, <sup>48</sup> y chëngbioye tojanëyana: “Nda átšbeñe ošbuachiyá bëtsemnana, quem basetémbioye tbojofja, chana atše jofjana; y nda atše šojofja, chana chë nda šojichmó chábioynaca jofjana. Chíyeca, tšëngaftanguentše chë más nduamaná, cha chë más uamaná entsemna ca.”

*Nda bëngbe contra ndoñe tontsemná, bëngaftaca jtsemnana (Mc 9.38-40)*

<sup>49</sup> Juan, Jesúsbioye tbojanianana: —Buatëmbayá, bënga fsënjinÿe canÿe boyabása y cha aca jótšëmbonëse, entšángbentšana bacna bayëjbe juabna endëtëbuacana; pero cha bëngaftaca ndoñe quenátsmëna causa, chama fsënjesauyaná ca.

<sup>50</sup> As Jesús tbojanjuá: —Ndoñe šmatjuauyaná; er nda bëngbe contra ndoñe tontsemná, bëngaftaca jtsemnana ca.

*Santiago y Juánbioye Jesús tojanëcácana*

<sup>51</sup> Jesús celoye jtama yojtšobeco ora, nÿets añémoca cha yojtsejuabnaye Jerusalenoye jama. <sup>52</sup> Natsana báseftanga tojanichamó, y chënga tmojána canÿe base pueblotémoye Samaria luaroca, posada chabiana janguangoñama; <sup>53</sup> pero chë luarentša entšanga ndoñe tmonjánbošena posada juantšamiana, er tmojántatšëmbona cha Jerusalenoye yojtšayama, chë chëngbe uayayëngbe uámana puebloye. <sup>54</sup> Chabe uatsjéndayata, Santiago y Juan, chë soye tbojáninÿe

ora, Jesús tmojaniyana: “Bëngbe Utabná, ¿quectseboše bëndata fchaimandá celocana ñeshe chaótsatše y quem entsanga chaotsapochóca?”

<sup>55</sup> Pero Jesús yojobuértana y chátbioye tojtsanécácana, chca juabna bomna causa. <sup>56</sup> Chentšana chënga inye pueblotémoye tmojtsanoñe.

*Chë Jesús juastama bošënga  
(Mt 8.19-22)*

<sup>57</sup> Benachëjana imojtsajna ora, canye boyabása Jesúsbioye tbojaniyana: —Atsbe Utabná, atše séntseboše aca juastana ndémoye chacojtsá choye ca.

<sup>58</sup> Y Jesús tbojanjuá: —Chë zorrënga cuevëshënga mond-bomna ndayentše jtsiyenama y chë shloftsetémëngna uaja-jonëshangá; pero chë Bëngbe Bëtsá Entsó tbojanbemá ndoñe quenátsbomna ndayentše jóchnama ca.

<sup>59</sup> Jesús inye entsábioye tbojaniyana: —Smasto ca.

Pero cha tbojanjuá: —Atsbe Utabná, šmolesenciá atsbe taitá chjshesabotbontsañe ca.

<sup>60</sup> As Jesús tbojaniyana: —Chë Bëngbe Bëtsabiana mo obanëngcá imomnënga, ntšamo Bëngbe Bëtsá yomandacá ndoñe tmontsama causa, chënga cachëngbe obanënga chamotsétebuantsañe. Acna, motsa y Bëngbe Bëtsabe amëndayama entsanga cochjabuayená ca.

<sup>61</sup> Inyana Jesúsbioye tbojaniyana: —Atsbe Utabná, atše séntseboše aca juastama, pero šmolesenciá natsana atsbe pamíllangbiana jaisodiósoftama ca.

<sup>62</sup> As Jesús tbojaniyana: —Nda cachabe soyëngama tbojtsen-gmena, Bëngbe Bëtsabe amëndayocama ndoñe ntsoservénana; er cha jtsemnana mo canye arayacá, chë tojtsetrabája ora, stëtsoye tojtsaisantješncá ca.

## 10

*Jesús canyësëfta bnëtsana y uta entsanga tojanichamó Bëngbe Bëtsabe soyëngama jábuayenama*

<sup>1</sup> Chë soyënga chentšana, Bëngbe Utabná Jesús inye canyësëfta bnëtsana y útatnaca tojanabacacá, y utáta chabe natsana tojanichamó, chë cha ibojtsemna jama pueblëngoye y luarëngoye.

<sup>2</sup> Mëntsó chënga tojanëyana: “Canye bëts jajañe bëtscá játbanama entsemna, pero peonga báseftanga; chíyeca, chentša nduíñbioye jaimpádana ba peonga chauichamó chë jaja saná játbanama. Cachcá, quem luarentše bëtscá entsanga montsemna Bëngbe Bëtsábioye nduabuátmënga, y chëngbioye chabiana abuayinyayënga nye báseftanga. Chíyeca, Bëngbe Bëtsá moimpadanga ba abuayinyayënga

chauichamó quem entšanga chábioye júbuajama. <sup>3</sup> Motsajna; šmochjinÿe, atše tšëngaftanga cbontsichamná mo oveshënga cuenta, tjañe quešëngbeñe. <sup>4</sup> Ndoñe šmattsambaye shecnaja, ni crocénana šmattsaiuábuenana, ni shecochëtjonëshe; y nda chacmojacheuá ora, ndoñe yapa bën chentše šmatjáisenobiamnaye.

<sup>5</sup> “Ndaye yebnentše chašmojáamashjna ora, natsana šmochjayana: ‘Lempe tšabá quem yebnentše chaotsomñe ca’. <sup>6</sup> Y chë yebnentše chca juabna bomna entšanga tmomnësna, chë tšabiana ndegombre chentše echántsemna; pero ndoñese, chca tšabiana chentše ndoñe queochátsmëna. <sup>7</sup> Canÿe yebnentše šmochjoquéda, y šmochjase y šmochjofsiye ntšamo chentše chacmojacaredadaycá; er chë trabajayá merecido jtsebuájonana chca juacánama. Canÿe pueblentše nÿe inÿe y inÿe yebnënguenache ndoñe matajnana.

<sup>8</sup> “Ndaye pueblentše chašmojáamashjna y tšabá chacmojúbuajentše, šmochjase ntšamo chentše chacmojacaredadaycá; <sup>9</sup> chentša šoquënga šmochjáshnaye y šmochjáuyana: ‘Bëngbe Bëtsabe amëndayana tšëngaftangbeñe entsemna ca’. <sup>10</sup> Pero canÿe pueblentše chašmojáshjango y ndoñe chacmonjúbuaja, chentša tsashenangoye šmochjábocana y mëntšá šmochjayana: <sup>11</sup> ‘¡Chë tšëngaftangbe pueblentša polvëshe, chë bëngbe shecuatšënguiñe tojuanjëshe, camuentše fscuesenstëtoná, chca, tšëngaftanga chašmotsetatšëmbuama ndoñe tšabá šmonjamama! Pero masque chca, šmochtsetátšëmbo chë Bëngbe Bëtsabe amëndayana tšëngaftangbeñe entsemnama ca.’ <sup>12</sup> Ndegombre cbëyana, quem luare jopochócama te, chë luarentša entšángbioye Bëngbe Bëtsá puerte jabuache echantsacastígaye, y Sodoma puebloca bacna entšángbioye ndoñe nÿa nÿetšá jabuache ca” —Jesús tojánayana.

### *Chë nduauenana entšanga*

*(Mt 11.20-24)*

<sup>13</sup> “¡Tša lastema Corazín puebloca entšangbiana! ¡Tša lastema Betsaida puebloca entšangbiana! Er chë muentše Bëngbe Bëtsabe obenánaca sënjama soyënga, chë bëts pueblënga Tiro y Sidonoca chca matënjochnënguse, chentša bacna entšanga ya tempo chëngbe bacna soyëngama ngmënacá matmëntenójuabonga y Bëngbe Bëtsabe benache matmëntishache, y chca tmojamama chaotsótatšëmbuama, uajojësha entšayangaca matmëntopormanga y jatinÿashiñe matmënjotbiana. <sup>14</sup> Pero ntšamo entšanga tmojamama, tšabá o ndoñe tšabá bëtsemnama jayanama chaojobuache ora, tšëngaftanga más bëts castigo šmochántsebmna, chë Tiro y Sidonoca bacna entšangbe castiguama. <sup>15</sup> Y tšëngaftanga,



Capernaum pueblentša entšanga, ¿celóntscoca atsebánanënga šmochtsemna ca šmojtsejuabnanga? ¡Chë uabouana infernoye cmochantsësetjango!

16 “Nda tšëngaftanga tcmojoyauná, chana atše joyeunayana; y nda tšëngaftanga tcmojtsëbaté, chana atše jtsabotena; y nda atše šojtsaboté, chana chë nda šojichmó chábioye jtsabotena.”

*Chë canÿsëfta bnëtsana y uta entšanga tmojtanashjajna*

17 Chë canÿsëfta bnëtsana y útatna Jesús yojtsemnoye tmojtanashjajna, puerte oyejuayënga; y chábioye mëntšá tmojaniyana: —¡Bëngbe Utabná, aca jótšëmbonëse, chë bacna bayëjëngnaca šonjoyauná ca!

18 Y Jesús tojanëyana: —Ndegombre. Y tšëngaftanga Satanásbioye chca šmontseyëñjaná ora, entsemna mo Satanás celocana canÿe tcuinÿcá jtsotsatšana stjinÿcá. 19 Atšna obenana tcbonjatsatá mëtscuayënga y alacranëngbeñe chašmotsajnama, y bëngbe uayayá Satanasbe nÿets obenana jáyëñjanama, tšëngaftanga ndocá ntjapasacá. 20 Pero móyejuanga, ndoñe chë bacna bayëjënga chacmóyaunama obenana šmojtsebojnama, sinó tšëngaftangbe uabaina celoca ya yojtsábemanama, er tšëngaftanga chë nÿetsca tescama yomna tšabe vida šmochántsebojna ca —cha tojanëyana.

*Jesús puerte tojanoyejuá*

*(Mt 11.25-27; 13.16-17)*

21 Chora Jesús, chë Uámana Espíritbeyeca, corente oyejuayá tojánayana: “Atše cbatschuá, Taita, celoca y quem luar-entša Utabná. Aca, chë nÿe batsá tatsëmbënga tconjanÿanjë, chë tša tatsëmbënga y osertánëngbiamá tcojaiytëme soyënga. Añe, chama cbontsadorana, Taita, aca chca chaotsemnama tcojábosenayeca.

22 “Atšbe Taitá lempe chca šonjatšetá. Chë Uaquiñábioye ndocná corente quebnatábuatma; nÿe chë Taitá añe. Y chë Taitábioye ndocná corente quebnatábuatma; nÿe chë Uaquiñá añe, y ndëmuanÿengbioye chë Uaquiñá tojtseboše nda chë Taitá yomnama jinÿanjÿiyama, chëngnaca chë Taitábioye mochantsábuatma ca.”

23 Chentšana, Jesús chabe uatsjëndayëngbioye tojanobuértana y nÿe chëngbioye tojanëyana: “¡Puerte oyejuayënga chë ntšamo tšëngaftanga šmontsonÿacá jinÿyama tmojtsobenënga! 24 Er atše cbëyana, banga Bëngbe Bëtsabe juabna oyebuambnayënga y reyënga tmojánbošena chë tšëngaftanga šmontsonÿá soyënga jinÿyana, pero ndoñe tmonjáninÿe; y tmojánbošena chë šmontsuenana soyënga jouenana, pero ndoñe tmonjanuena ca” —cha tojánayana.

*Chë Samarioca tšabe entšabiamá cuento*

<sup>25</sup> Canÿe judiëngbe ley abuatambayá yojontsé Jesúseftaca jóyebuambayama, y jisháchichiyamna mëntśá tbojantjá: —Buatëmbayá, ¿ndayá šojtsemna jamana chë nyetsca tescama yomna tšabe vida jtsebomnama ca?

<sup>26</sup> Y Jesús tbojanjuá: —¿Ntšamo leyiñe iuábemana? ¿Ndayá chiñe condbétsaliaye ca?

<sup>27</sup> Chë ley abuatambayá tbojanjuá: —“Chë Utabná Bëngbe Bëtsá cochtsebobonshana nyets ainánaca, nyets espíritoca, nyets añémoca y nyets juábnaca”; y “ndëmua entśánaca cochtsebobonshana, ntšamo cach aca cuenobobonshancá ca.”

<sup>28</sup> Chora Jesús tbojaniana: —Tšabá šconjojuá. Chca cocht-sama y chë nyetsca tescama yomna tšabe vida cochántsebomna ca.

<sup>29</sup> Pero chë ley abuatambayá tšabá jenoquédamna Jesúsbioye tbojantjá: —Y ¿ndase chë ndëmua entśánaca yomna ca?

<sup>30</sup> As Jesús tbojanjuá: —Canÿe, Jerusalenocana Jericó benache canÿe entśá yojtsetsma, y básefta salteadorënga imojébëbocna. Lempe imojtsefca, chë entśayánaca; imojtsejantšetaye y chentšana imojtsatóñënga, y chë entśá batśá obaná imojéseboshjona. <sup>31</sup> Ndeolpe, chë benachëjana canÿe judiëngbe bachna yojtsachnëjuana. Chë entśábioye ibojinÿe ora, nÿe chabuacá yojtsëchnëguañe. <sup>32</sup> Cachcá, canÿe Levita, chë canÿe Bëngbe Bëtsabe bëts yebnoca trabajayá chëjana yojtsachnëjuana; y chë entśábioye ibojinÿe orna, nÿe chabuacá yojtsëchnëguañe.

<sup>33</sup> “Chorna, cach benachëjana canÿe samaritano ináboye. Chë entśábioye ibojinÿe orna, ibojóngmia. <sup>34</sup> Chábioye yojobeconá, aceitiye y vínoyeca ibojáshna, y lisianënguiñe entśëjuaca ibojuantsacjuá. Chabe couayiñe ibojëftsenjajiye, canÿe yebnoye posada uyentšamianoye ibojuánatse, y chentše chábioye ibojëftsinyena. <sup>35</sup> Yëfsana, chë samaritano uta denario crocénana yojenóbojatsëca, chë mo uta tesca trabajuama crocénana nyetsá, y chë posada nduíñbioye ibojesabuenaye, y mëntśá ibojauyana: ‘Quem boyabása cochtsinyena, y nderado más crocénana muabiana chacojenábojafjonasna, mëjana chaitísachnëjuana ora, cbochjabáisabuenaye ca.’ <sup>36</sup> Y chcasna, ¿chë unganguentšana nda cmojtsinyana chë entśabiana yojtsejuabnaye cha cachacá entśá inamnama ca?”

<sup>37</sup> Y chë ley abuatambayá tbojanjuá: —Chë entśabiana tbojanongmé cha ca.

Y Jesús tbojaniana: —Asna, motsa y cachcá cochjama ca.

### *Jesús, María y Marthe yebnentše*

<sup>38</sup> Chentšana, Jesús benachëjana yojtsaye y canÿe base puebloté moye tojëftsanamashëngo; y canÿe shembása Marta

ca uabainá, chabe yebnentše tbojanofja. <sup>39</sup> Martna canýe quenata ibnabomna, María ca uabainá. Cha Jesusbe shecutšentše yojótbema chabe palabra jouenama; <sup>40</sup> y chěntscuana Marta ba soyěnga vojtsama. Cha Jesúsbioye tojanobeconá y tbojanijana: —Utabná, ¿tondayana cmontsentšamna, atšbe quenata nýe canýa chašonýá lempe jamama ca? Měyana chašuájabuache ca.

<sup>41</sup> Chora Jesús tbojanjuá: —Marta, Marta, bětscá soyěngama contsenócochinýena y contsenomantšná; <sup>42</sup> pero nýe canýe soye endmēna chě yoiyta soye jamama. María chca jamama tojobuáyana, chě más tšabe soye, y ndocná queochatsma cha chaotsajbanama ca.

## 11

*Ntšamo Běngbe Bětsáftaca cuanjencuénta*  
(Mt 6.9-15; 7.7-11)

<sup>1</sup> Canýe, Jesús Běngbe Bětsáftaca ibojtsencuéntaye canýe luar-entše. Tojanpochocá orna, canýa chabe uatsjendayěnguentšá tbojanijana: —Běngbe Utabná, Běngbe Bětsáftaca jencuéntama šmabuatambá, ntšamo Juan chabe uatsjěndayěngaftaca tojan-  
mcá ca.

<sup>2</sup> Y Jesús tojaněyana: —Běngbe Bětsáftaca chašmojtsencuénta ora, šmochjayana:  
Běngbe Taitá, acbe uabaina chě más uámana uabainana chaue-  
somñe.

Acbe aměndayana chaóshjango.

<sup>3</sup> Měnté šmiyatšatá, cada te šnetsějaboto tanděse.

<sup>4</sup> Bacna soyěnga fsěnjama: šmotsaperdónaye;  
er běngnaca nýetscanga chě běngbiana bacna soyěnga  
aměngbioye fsěndbetsaperdónaye.

Bacna soyěnga jamama šojocohěngo ora, šcochjujabuache  
chca ndenobuíyama.

<sup>5</sup> Jesús měntšánaca tojaněyana: “Nderado aca acbe bacóbioye tsěntseto ora tcojá y tcojauyana: ‘Bacó, Diosmanda unga tanděse šmotsemná, <sup>6</sup> er canýe atšbe amigo yebnoca tonjáshjango y tondaye quetsátsbomna cha jonánjama ca.’ <sup>7</sup> Ndegombre, cha tsocana tcmojojuá: ‘Ndoñe šmatébyabomana. Běšáša ya entsatámena y atše y atšbe básenga ya fsěntsocjá; ndoñe quetsátobena mora jotsbanana y chě tanděse jámnana ca.’ <sup>8</sup> Ndegombre, chě bacó ndoñe tonjotsbaná chě tanděse jámnama, cháftaca šuenatsětsnámase, cha pronto jotsbanana chca uéběyabomana ndoñe tconjajbaná causa, y lempe ntšamo cmojtsajabotcá cha cmochanjoyiye. <sup>9</sup> Chcasna, atše cběyana: Šmochjotjañe y Běngbe Bětsá cmochanjátšataye; šmochjánguango y šmochanjínýena;

šmochjachembo y cmochanjébëtafjo. <sup>10</sup> Er ndánaca ndayá tojtsotjanañá, jóyëngacñana; y tojtsenguá cha, jónyënana; y nda tojtsechembuanábioye jebiatëfjuana ca.

<sup>11</sup> “¿Nda tsëngaftanguentsana nantsobena, taitá tojtsemnëse, cachabe uaquiñábioye canyë mëtscuaye jatstayana, beona tbojtsotjanañe ora; <sup>12</sup> o canyë alacránashe joyiyana, shëmnëbé tbojtsotjanañe ora? <sup>13</sup> Y chca, tsëngaftanga, bacna soyënga amënga, tsëngaftangbe basetemëngbioye tsabe soyënga jatstayama šmojtsamanëse, imás chë celoca Taitá, chë Uámana Espiritu echanjátsataye, chca tmojtsotjanañëngbioye ca!” —Jesús tojánayana.

*Fariseunga tmojánayana Jesús Satanásbentsana obenana tojányëngacñe ca*

*(Mt 12.22-30; Mc 3.20-27)*

<sup>14</sup> Jesús canyë entsábentsana canyë bacna bayëja tbojtanábocna. Chë bayëja ndëbiá chë entsábioye tbojánbema, y chábentsana tojésanbocna ora, chë ndëbiá tojtanontsé oyebuambnayana. Y chë entsanga chama imojenjnaná; <sup>15</sup> pero báseftanga imojtsichamo: “Beelzebú, cach Satanás, chë bacna bayëjëngbe amëndayá, quem boyabásabioye obenana tbojatsetá chë bayëjënga chauatëbuacnama ca.”

<sup>16</sup> Y ínÿenga, Jesús jisháchichiyamna tmojanimpadá canyë bëts soye chaoma, jinÿanÿiyama cha celoca obenana inabomna o ndoñe. <sup>17</sup> Pero Jesús yojtsetátšëmbo ntšamo chëngbe juabna bëtsemnana. As tojanëyana: “Canyë amëndayábentše entsanga tmojtsenojatá y tmojtsenáyase, cachënga jtsenpochócana; y canyë yebnentše oyenënga tmojtsenojatá y tmojtsenáyase, chë pamíllanga tsabá nÿets tempo ndoñe quemochátsmëna. <sup>18</sup> Cachcá, Satanás tojtsenojatá y cachabe contra tojtsemnëse, ¿ntšamo nantsobena chabe mándayana quem luarentše jëftsebmomna? Chca sentsichamo, er tsëngaftanga šmontsichamo Beelzebube obenánaca chë bayëjënga stsatëbuacana ca; <sup>19</sup> pero chca ndegombre tojtsemnëse, ¿ndábeyeca tsëngaftangbe usetonënga obenana imojtsebmomna chë bacna bayëjënga jtëbuacnama? Chíyecna, cachënga montsinÿinÿná ntšamo ndegombre yomnana, y tsëngaftanga ndoñe ndegombre soye šmontsichámuama. <sup>20</sup> Y atšna, Bëngbe Bëtsabe obenánaca entsángbentsana chë bayëjënga sëndëtëbuacana; y chë soye entsinÿinÿná, Bëngbe Bëtsabe amëndayana tsëngaftangbioye tojóshjanguama.

<sup>21</sup> “Canyë corente añemo bomna entsá, bëts cá ármangaca chabe yebna tojtsinÿenëse, chë tsoca tomna soyënga ndoñe ntjotsana. <sup>22</sup> Pero inÿa chabiamá más añemo bomná tojabo

y tbojabetseyënjaná, chë cha yojanašbuaché armangá jtsabocana y chë tobomna sóynaca; y ntšamo chë inÿa tojtsebošca chë soyëngaca jamana.

<sup>23</sup> “Nda ndoñe átšeftaca tontsemná, atšbe uayayá jtsemnana. Ynda átšeftaca ndoñe tontsetrabája, chana atšbe contra jtsetrabájayana ca” —Jesús tojánayana.

*Ndayá inopása chë bacna entsángaftaca*  
(Mt 12.43-45)

<sup>24</sup> “Canÿe bacna bayëja canÿe entsábentsana tojësebcna ora, bojojo luarënguenache chë bayëja jtsanana, ndayentše jóchnama onguayíñe. Ndoñe tonjínÿena ora, jenójuaboyana: ‘Atšbe oyenoye, chë ndayentsana sënjëftsebcnoye chanjesshécona ca.’ <sup>25</sup> Y choye tojtashjango ora, jinÿenana lempe tšabá cha jtesamashënguama, mo tsajniñe y prontániñe cuaftsemncá. <sup>26</sup> Chora chë bayëja jana y inÿe canÿsëfta bayëjenga, chabiamá más opëjenga jobiatšana, nÿetscanga choye jamashjnama, chë boyabásabeñe joyéanama. Y chca, chë boyabása tempscama más bacna entsá jtoquédana, chora chë natsanama más bayëjenga abamna causa ca” —Jesús tojánayana.

*Chë ndegombre oyejuayana*

<sup>27</sup> Jesús chë soyënga yojsichamëntscuana, entsanguentše canÿe shembása yojuayebuáchena: —¡Puerte oyejuayá chë quem luaroye tcmojúshjango y tcmojëftseboché shembása ca!

<sup>28</sup> As Jesús tbojanianya: —Más oyejuayana bomnëngna, chë Bëngbe Bëtsabe palabra tmojouena y chca tmojtsamënga ca.

*Chë bacna entsanga Jesús tmojanimpadá canÿe bëts soye chaoma, chabe obenana jinÿama*

(Mt 12.38-42; Mc 8.12)

<sup>29</sup> Entšanga más imojtsójoye Jesús yojtsemnentše, y Jesús tojanontšé jáuyanana: “Morsca entsanga puerte bacna entsanga; chënga montsotjanañe atše canÿe bëts soye chaima atšbe obenana jinÿama, pero ndoñe chca quemochátinÿe, sinó nÿe chë ndayá yomna mo chë Jonásoftaca tojanopasá soycá. <sup>30</sup> Er chca, ntšamo Jonás Nínive puebloca entsanga canÿe bëts soye tojaninÿanyë Bëngbe Bëtsá obená yomnama chamotsetatsëmbuama, chë Bëngbe Bëtsá Entšá tbojanbemánaca entsinÿanÿná morsca entsángbioye, Bëngbe Bëtsabe amëndayana tojóshjanguama. <sup>31</sup> Bëngbe Bëtsá ntšamo morsca entsanga tmojanmama yochjayana te, chë Sur luaroca reiná echanjotsaye y morsca entsangbiamá echanjayana ndoñe tšabá tmonjama ca; er chana chë quem luare iuajbana luarëngocana tojánabo Salomonbe osertanánaca palabrënga jouenama, y chë mora muentše

entsemnana, Salomonbiama más uamaná endmëna. <sup>32</sup> Chë entsanga tšabá o ndoñe tšabá tmonjamama jayanama te, chë Nínive bêts pueblaca entsángnaca mochanjotsaye y mochanjayana morsca entsanga ndoñe tšabá tmonjama ca; er chënga, Jonás yojtsabuayiyayana ora, tmojanoyeuná y chë tšabe benache tmojtanišache, y chë mora muentše entsemnana, Jonasbiama más uamaná endmëna ca” —Jesús tojánayana.

*Chë cuerpama uajuinÿanësha*

*(Mt 5.15; 6.22-23)*

<sup>33</sup> “Ndocná canÿe uajuinÿanësha juajuinÿenana, canÿe iytëmena luaroye juajájuama, ni canÿe cajonëshe tajsoye, sinó canÿe tsbanana luaroca juajájuama, chca, chë luaroye amashjuanëngbiama chaotsebínÿnama. <sup>34</sup> Acbe bominye tšabá totsomñëse, acbe cuerpama mo canÿe uajuinÿanëshacá jtsemnana; chíyeca aca jtsoobenana, ntšamo tcojtsamcá chë bomínÿyeca jtsonÿayana. Chë bominye ndoñe tšabá tontsemnësna, chë bominye tondaye ntsoobenana jamana, ntšamo tcojtsamcá chacobená jinÿama. Cachcá, acbe ainaniñe tšabe juabnënga tcojtsebomnëse, lempe ntšamo chacojtsamcá tšabá echántsemna. Y acbe ainaniñe ndocna tšabe juabnënga tcontsebomnësna, lempe ntšamo chacojtsamcá ndoñe tšabá queochátsmëna. <sup>35</sup> Cuedado šmochtsebomna, tšëngaftangbe ainaniñe nÿe tšabe juabnënga chaotsemnana, chca, lempe ntšamo chašmojtsamcá tšabá chaotsemnana, y bacna juabnënga ndoñe chaondëtsemnana. <sup>36</sup> Chcasna, lempe ntšamo šmojtsamcá tšabá tojtsemnëse y ndocna bacna sóyesna, tšëngaftanga bëtscá tšabe soyënga šmochántsama; y chca, tšëngaftanga šmochántsemna mo canÿe uajuinÿanësha puerte tšabá tojtsebinÿnacá ca” —Jesús tojánayana.

*Jesús chë fariseungbiama y ley abuátambayëngbiama tojánayana, chënga ndoñe tšabá montsama ca*

*(Mt 23.1-36; Mc 12.38-40; Lc 20.45-47)*

<sup>37</sup> Jesús chca jayanama tojanpochocá ora, chábioye canÿe fariseo tbojanofja chabe yebnoye jauasama. As Jesús tojánamashëngo y mesëshentše tojanótbema. <sup>38</sup> Chë fariseo tojanëuatjaná, Jesús ntsacuentšabiacá jasama yojontšé causa, ndoñe ntšamo chë judiënga imojanamancá, Bëngbe Bëtsabe delante tšábenga jtsatsmënama. <sup>39</sup> Pero Bëngbe Utabná tbojaniyana: “Tšëngaftanga fariseunga šmondmëna mo entsangcá ndëmuanÿyënga chë tazësënga y šcnenënga shjoicajana jtsóbojabiana, pero tsoyna nÿe cachcá jonÿayana. Tšëngaftanga beca jtsamana entsangbiama mo tšabengcá

jtsinÿnama; pero tsëngaftangbe ainanentše jútjena entsemna nÿe jtsatbëbanama y bacna soyënga jtsamama juabnëngaca.<sup>40</sup> ¡Juabna ndbomnënga! Tsëngaftanga ndoñe šmondëtatsëmbo, chë tsëngaftangbentsana entsanga ndayá jinÿama imobencá tojamá, chë tsëngaftangbe tsoye yomna soyëngnaca tojamama; y chíyeca, chabíama cachcá enduámana ndayá tsëngaftangbe ainanoye yomna soyënga, y chë entsangbe delante šmojama soyënga.<sup>41</sup> Tsëngaftanga cmontsamna, chë soyënguiñe ndayá ainaniñe yomnentšana ínÿengbioye jatšatayana, y chca, lempe ntšamo chašmojtsamcá Bëngbe Bëtsabe delante tsábá echántsemna ca.

<sup>42</sup> “¡Tša lastema tsëngaftangbiamá fariseunga! Tsëngaftanga Bëngbe Bëtsabíama jtsequëcjnayana chë jajañentša sananga bnëtsanentšana canÿe soye nÿetsá, y chë binche matatémënguentsana menta, ruda y nÿetsca binche matatemënguentsánënaca; pero nÿe batsá jtsamana chë nÿetscanga cachca derechénga chamotsebomnama y cha jtsebobonshánama. Quem soyënga cocayé cmontsamna jtsamana, chë inÿe tsabe soyënga ntjajbanacá ca.

<sup>43</sup> “¡Tša lastema tsëngaftangbiamá fariseunga! Tsëngaftanga tša jtsebošana chë judiëngbe enefjuana yebnënguenache chë más uámana luarënga jtsebomnama, y benachiñe nÿa puerte respétoca entsanga chacmotsacheuanayama ca.

<sup>44</sup> “¡Tša lastema tsëngaftangbiamá! Smondmëna mo obanënga uatbontsaniñcá, ndoñe ntsinÿnana, y entsanga ntsetatšëmbcá chiñe jtsebotájayana. Chca šmondmëna, er tsëngaftangbe ainana entsemna jútjena bacna juabnëngaca, pero entsangbiamá ndoñe chca quešmátinÿna ca.”

<sup>45</sup> Jesús chca tojánayana ora, canÿe ley abuatambayá tbojaniyana: —Buatëmbayá, chca palabrënga contsoyebuambná ora, bëngbiámnaca ndoñe tsábá quecátichamo ca.

<sup>46</sup> Pero Jesús tojánayana: —¡Tša lastema tsëngaftangbiámnaca, chë ley abuátambayënga! Mo canÿe entsá, couáybioye canÿe uauta uasmanësha tbojuasmá, y chësha ndoñe yapa chaondëtsautama tondaye tontsamcá, tsëngaftanga entsángbioye jtsamëndayana bëtscá mandënga chamot-socumplínama, pero cach tsëngaftanga ni mo batšatémnaca jtsamana chë mandënga jtsocumplínama ca.

<sup>47</sup> “¡Tša lastema tsëngaftangbiamá! Tsëngaftanga jtsamana chë Bëngbe Bëtsabe juabna oyebuambnayënga tempsquënga bëtsëtsa entsanga chamotsemnama, chëngbe cuevëshënga jtsatspórmayëse; pero chë mo chëngcá, canÿe buayenana sóyeca tmojabëngbioye ndoñe ntsayaunanana. Y chë tempsquënga chca oyebuambnayëngbioye tsëngaftangbe bëts taitanga tmojtsanëbaye.<sup>48</sup> Chca jtsamëse, tsëngaftanga

šmontsinÿanÿná, ntšamo chë bëts taitanga tmojanmca tšabá yomna ca tšëngaftanga šmojtsejuabnama, er chënga chë oyebuambnayëngbioye tmojtsanëbaye y tšëngaftangna chëngbe cuevëshënga jtsatspórmayana.

<sup>49</sup> “Chíyeca, Bëngbe Bëtsá chabe bëts osertanánaca tojánayana: ‘Atše chëngbioye chanjichamuá atšbe juabna oyebuambnayënga y atšbiana abuayiynayënga, y báseftangbioye mochantsëbaye y ínÿengbioyna mochantsëcamiye ca.’ <sup>50</sup> Y chca, nÿets castigo morsca entšángbeñe echántsemna, nÿetsca Bëngbe Bëtsabe juabna oyebuambnayënga tmojóbanama, Bëngbe Bëtsá quem luare tojanma orscana; <sup>51</sup> Abélbioye tbojanóba orscana, Zacarías tmojanóbantscoñe. Zacaríasna Bëngbe Bëtsabe bëts yebnentše tmojanóba, altar y chë entšanga Bëngbe Bëtsábioye imojánadorana luariñe. Chcasna, Bëngbe Bëtsá echanjama chë oyebuambnayënga tmojanóbanama, morsca entšángbeñe nÿets castigo chaotsemnama ca.

<sup>52</sup> “¡Tša lastema tšëngaftangbiana, chë ley abuátambayënga! Tšëngaftanga jtsamana, Bëngbe Bëtsabe soyëngama jtsetatšëmbuama entšangbiana yapa totcá chaotsemnama. Cach tšëngaftanga ndoñe quešmátobena chë soyëngama tšabá jtsetatšëmbuana, y chama jtsetatšëmbuama tmojtsebošëngbioyna ndoñe quešmatalesénciaye ca” —Jesús tojánayana.

<sup>53</sup> Jesús chë soyënga tojánayanama, chë ley abuátambayënga y fariseunga puerte tojánëtëna, y cha chentšana yojtsaisebocana ora, tmojanontšé chábioye becá tjanayana, y imojtsama ba soyëngama chaóyebuambama, <sup>54</sup> chca, jisháchichiyama jtsebošëse, cachá ntšamo tojayana sóyeca chënga jtsebomnama ndáyeca chábioye mal jaquédana.

## 12

*Jesús, chë bacna entšanga ntšamo ndegombre tmojuabnacá ndinÿinÿnayëngbiana tojanabuatambá*

<sup>1</sup> Chëntscuana, ba uaranga entšanga chentše tmojanójoto; tša entšanga causa, nÿetscanga imojtsenatsëntšenaye. Chora Jesús tojanontšé jóyebuambayama, y natsana chabe uatsjëndayëngbioye tojanëyana: “Chë fariseungbe buatëmbana soyëngama cuedado šmochtsebomna, chënga mondmëna bacna entšanga, ntšamo ndegombre tmojuabnacá ndinÿinÿnayënga. Ntšamo chë levadura jamana nÿetsana chauábochema, cachcá chëngbe buatëmbana soyëngaca, chë fariseunga montsobena jamana bëtscá entšanga ntšamo ndoñe tšabá tontsemncá chamotsamama. <sup>2</sup> Er ndocna yoiytëmena soye, ntjinÿcá queochaisoquéda; y chë ndótatšëmbo soye, ntsotatšëmbcá queochaisoquéda.



<sup>3</sup> Chíyeca, chë mora nýe tšëngaftangbiamá šmojtsichamo soyënga, chë entšangbiamá mo íbetiñcá cuaftsemna soyënga, entšanga chama botamana mochanjátatšëmbona. Y chë iytëcana šmojtsichamo soyënga, nýetsca entšangbioye mochántsabuayiyñaye, mo nda canýe yebnentša tsbanánocana noticiënga tojtsayebuachcá ca” —cha tojanëyana.

*Nda ndegombre cuantsebiauatja*  
(Mt 10.26-31)

<sup>4</sup> “Tšëngaftanga, atšbe amiguënga, cbochjáuyana: Ndoñe matauatjëngana nýe chë tšëngaftangbe cuerpo japochócama imobenëngbiamá, pero chentšana más jamana ndoñe ntsoberana. <sup>5</sup> Cbochanjabuayená ndábioye cmojtsamna jtsebiauatjana: šmochtsebiauatja chë nda vida jtsabuajuánama y chentšana infiernoye jtsichámuama obenana endbomnábioye; chábioye cocayé šmochtsebiauatja ca.

<sup>6</sup> “¿Shachna jaja shloftšetëmënga ndoñe nýe uta denario crocenánama mondbétsena? Pero masque chca, Bëngbe Bëtsá chëngbiamá sempre jesenójuabñayana. <sup>7</sup> Y tšëngaftangbiamá Bëngbe Bëtsá lempe endëtátšëmbo, y bueta stjënëjënga tšëngaftangbe bestšašiñe yomnámñaca. As ndoñe matauatjëngana; tšëngaftanga ba jaja shloftšëngbiamá corente más šmonduámana ca” —Jesús tojánayana.

*Ndabiamá Jesucristo yochjayana chabe entšá yomna ca*  
(Mt 10.32-33; 12.32; 10.19-20)

<sup>8</sup> “Atše cbëyana, nda atšbe entšá yomna ca entšangbe delante tojayanabiamá, chë Bëngbe Bëtsá Entšá tbojanbemánaca, Bëngbe Bëtsabe angelëngbe delante echanjayana chë entšá chabia yomna ca; <sup>9</sup> pero nda entšangbe delante, atšbe entšá ndoñe yondmëna ca tojayanabiamá, chë Bëngbe Bëtsá Entšá tbojanbemá, Bëngbe Bëtsabe angelëngbe delante echanjayana, cha chabe entšá ndoñe yondmëna ca.

<sup>10</sup> “Bëngbe Bëtsá bochanjaperdóna, nda chë Bëngbe Bëtsá Entšá tbojanbemabiamá ndoñe tšabá tontsichamuábioye, pero chë Uámana Espíritbiamá ndoñe tšabá tontsichamuábioyna ndoñe.

<sup>11</sup> “Tšëngaftanga chë judiëngbe enefjuana yebnëngoye, ntšamo entšanga bétsamama ichámëngbioye y mandadëngbioye chacmojunatse ora, ndoñe šmattsenócochinýena ntšamo o ndáyeca šmochjenëuyanama, o ndayá šmochjayanama; <sup>12</sup> er chë Uámana Espiritu cmochanjabuayená ntšamo jayanama tojtsemncá, jóyebuambayama chacmojtsamna ora ca” —Jesús tojánayana.

*Entšabiamá resjo yomna, nýe yapa bomnana jesejuabayana*

13 Chentshana, canya entsanguentsá Jesúsbioye tbojanianana: —Buatëmbayá, atšbe catšata momandá chë átšbioye otocana soyënga chašuatoyé ca.

14 Y Jesús tbojanianana: —Bacó, ¿nda atše šojábema tsëndatbe ujtatanayá ca?

15 Y entsángbioye tojanëyana: —Smochjinÿe y cuedado šmochtsebomna chë nÿe yapa soyënga jtsebomnama bošama; er masque bëtscá soyënga chašmotsóboñe, chca ndoñe quešmochátstatsëmbo aiñe tšabe vida taišmochjónÿenama ca.

16 Y chora mëntšá tojanacuntá: “Inamna canÿe bomna entsá, y chabe fshantsënguiñe tša jaja saná yojtsopodena.

17 Chë bomná chora mëntšá yojtsejuabnaye, ‘¿Y morna, ntšamo chjama? er ndoñe quetsátsbomna ndayentse atšbe jaja saná jtsobocjayama ca.’ 18 Y mëntšá yojenianana: ‘Chë grano uaquëcjnaye yebnënga chantsendbiana, y inÿe más bëtš yebnënga chanjëtšjebo, y chiñe nÿetsca atšbe jaja saná chantsóbojaye y nÿetsca atšbe soyëngnaca.

19 Y chora atše chjenianana: Bacó, bëtscá soyënga contsebocjana, ba uatama cmochanjuáshjache. Morna, cochjóchna, cochjase, cochjatëmo, cochjóboyejuaye ca.’ 20 Pero Bëngbe Bëtšá chábioye ibojauyana: ‘Obëjema, cach quem ibeta cochanjóbona; y asna, chë contsebocjana soye, ¿ndabiana yochtsemna ca?’ ”

21 Y Jesús chora tojánayana: “Chca endbopása chë nÿe chabiama bomnana tojtsejuabá y bëtscá Bëngbe Bëtšabe soyënga ndoñe tonjëftsashjáftaca ca.”

*Bëngbe Bëtšá chabe básenga jtsanÿenana*

*(Mt 6.25-34)*

22 Chentshana, Jesús chabe uatsjëndayënga tojanëyana: “Quem soye cbëyana: Ndoñe šmattsenócochinÿena ndayá šmochjase o šmochjofšiyé vida jtsebomnama, ni ndaye entsáyá šmochjuíchëtjuama cach ndoñe. 23 Ndegombre, vida chë sanama más enduámana y cuerpo chë entsáyama más.

24 Chë ftsenga shloftšënga šmochjanÿe: tondaye ntjájena, ni jaja saná ntjátbanana, ni grano uaquëcjnaye yebnënga ntsebomnana; pero Bëngbe Bëtšá chënga saná jtsatšatnayana. ¡Y tšëngaftanga chë ftsenga shloftšëngbiana puerta más šmonduámana!

25 Masque chca endmëna, masque canya tša tojesenócochinÿena, ¿ntšamo nanjobenaye jamana, chë ntsachetšá vida yochtsebomnentšana canÿe hora vida más jabotiyana? 26 Chcasna, nÿe chë base soye jamama ndoñe šmontsobenëse, ¿ndayama chë inÿe soyëngama šmochjatenócochinÿena?

27 “Smochjuinÿe chë lirio uantšëfjushangá jtsajuajnana: ndoñe ntsetrabájayana, ni ntsehabiamnayana. Pero atše cbëyana, ndegombre ni mo rey Salomón, nÿetsca chabe

bomnánaca, chë lirió uantšefjushangacá njetšá botamana quenjatspormana. <sup>28</sup> Bëngbe Bëtsá tša botamana shácuana tojuama, y chë shácuana mënté jajoca jtsamnana y yëfsana iñoca. Cha chë shácuana chca tojamëse, ndegombre tšëngaftangbiámnaca Bëngbe Bëtsá echanjama entšayá chašmotsábomnama, jentšanga Bëngbe Bëtsábeñe nje batšá ošbuáchiyënga! <sup>29</sup> Chíyeca, ndoñe šmattsenócochinýena ndayá jasama o jofšiyama onguayiñe; <sup>30</sup> er chë soyëngama quem luarentša entšanga mondbétsenocochinýena, pero tšëngaftanga ndoñe. Tšëngaftangna canýe Taitá šmondobomna, y cha endétatšëmbo ndayá cmëjabótama. <sup>31</sup> Más tšabana, tšëngaftanga šmochtseboše Bëngbe Bëtsá tšëngaftangbe ainaniñe chaotsemándama, y chë cmojtsëjaboto soyënga nje šmochanjóyëngacñe ca” —Jesús tojánayana.

*Chë celoca bomnana*  
(Mt 6.19-21)

<sup>32</sup> “Ndoñe matauatjëngana atšbe ústonënga, atšbe básefta oveshënga, er Bëngbe Bëtsá tšabá tbonjuínýnana chabe amëndayana tšëngaftanga jatšatayama. <sup>33</sup> Lempe ntšamo šmobomncá šmochtsatobuiye y chë ujabotëngbioye šmochtsatšataye. Mo ndotanguánaye shecnajiñe crocénana cuafjacjacá, celoca tšabe soyënga šmochjobuajo. Choca ndocna te queochaisopochóca, atbëbanënga choye ndoñe quemochátamashjna jatbëbama, y mejojón ndoñe queochatspochóca; <sup>34</sup> er chë ndayentše tšëngaftangbe bomnana tojtsemnentša soyëngama, ainánaca tšëngaftanga šmochántsejuabnaye ca” —Jesús tojánayana.

*Bëngbe Utabná yochjésabama jtseprontánana*

<sup>35</sup> “Mo chë oservëngë, chë entšayá uichëtjonënga y uajuinýananëshangaca chëngbe nduiño yochtashjanguama cuaftsobatmancá, tšëngaftanga šmochtseprontana Bëngbe Utabná yochjésabama. <sup>36</sup> Chca, tšëngaftanga šmochántsemna mo chë oservëngë, tšabe entšayaca bopormánënga y uajuinýananëshangaca chëngbe amëndayá casamentocana yochtashjanguama cuaftsobatmancá; y chca, chë nduiño tojabochembo ora, cachora chë oservëngë jtebiatëfjuama. <sup>37</sup> Puerte oyejuayënga chë oservëngë, chë nduiño tojtashjango ora tmojtsefšnënga. Ndegombre cbëyana, chora chë mandayá sëndorëche echantásnaye, mesëshentše chë oservëngë echanjátbiamá, y saná echanjuuatšiyë. <sup>38</sup> Puerte oyejuayënga chënga, chë tmojtsefšnënga cha tojtashjango ora, masque tséntseto ora o bínýanoyë. <sup>39</sup> Quem soye tšabá chacmësertá: chë yebnentša nduiño, ntseco ora atbëbaná yochjabama tojtsetatšëmbëse, cha

ndoñe nanjaleséncia ndocná jushañe chaondbemama, chë yebnoye jtsamashënguama y jtsatbëbama. <sup>40</sup> Tsëngaftángnaca šmochtseprontana, er chë Bëngbe Bëtsá Entšá tbojanbemá echanjésabo, entšanga chama tondaye tmontsejuabná ora ca” —Jesús tojánayana.

*Chë tšabe oservená y chë bacna oservená*  
(Mt 24.45-51)

<sup>41</sup> Pedro, Jesúsbioye tbojanियana: —Utabná, ¿chë tconjayana cuento nýe bëngbiana o nýetscangbiana yochtsemna ca?

<sup>42</sup> Y Bëngbe Utabná tbojanjuá: —¿Nda yomna chë oservená, ntšamo chë nduiño tojtsebošcá amá y nýets juábna amá? Cha jtsemnana nda chë nduiño bochjëftsebošhona chë yebnentšënga chaotsanýenama, y jasama tojtsemna ora chaújuatšema. <sup>43</sup> Puerte oyejuayá chë oservená, chë nduiño tojtashjango ora, cha tbojínýena jtsamëse ntšamo tbojtsemncá. <sup>44</sup> Ndegombre cbëyana, chë nduiño chábioye bochanjainpáda nýetsca chabe soyënga chabotsinýeñama. <sup>45</sup> Pero chë oservená, chabe nduiño betscó ndoñe yochantabo ca tojtsejuabná, y tojontsé chë inýe oservénënga, boyabásënga y shembásënga jtsajantšëtayana, becá jtsesana, jofšiyana y jtsótmenana, <sup>46</sup> cha ndoñe tontsejuabná te y tontsetátšëmbo ora, chabe nduiño echántashjango y puerte jabuache bochantsecastíga, y echanjama cha jasúfriama chabotsemnana, mo chë Bëngbe Bëtsábeñe ndošbuáchiyënga mochanjasufriacá.

<sup>47</sup> “Chë oservená, nda tojtsetátšëmbo ndayá chë nduiño tojtsebošama, pero ndoñe tontseprontana y ndoñe tontsobedecena, cha ba soye mochántsetjanja. <sup>48</sup> Y chë oservená, ntsetatšëmbcá ntšámna tojabuachjuanguá, y chë causa chamotsetjanjama tbojtsemnësna, chana más batšá mochántsetjanja. Nda bëtscá soyënga tmojatštábioye jauyanana, bëtscá soyënga chaoma ca; y nda bëtš trabajo tmojabonýébioyna jauyanana, más bëtš trabajo chaoma ca.”

*Jesube causa, entšángbeñe más jtsentsjanayana*  
(Mt 10.34-36)

<sup>49</sup> “Atše sënjabo quem luariñe jabojuinýiyama, y ítša sëntseboše malaye ya ctsangbototjuana! <sup>50</sup> Atše šontsemna puerte jasúfriana, y ¡puerte ngménaca sëntsobátmana chca chaotsemnana! <sup>51</sup> ¿Tsëngaftanga šmojtsejuabná atše tijabo quem luarentše entšanga natjëmbana chamotsiyenama? Ndegombre ndoñe chca queochátsmëna; atše sënjabo causa, entšanga más mochántsetsjanaye. <sup>52</sup> Er mëntescana, canýe yebnentše, shachnënga ndoñe quemochátenëyeunana, únganga útatbe contra y útata úngangbe contra mochántsemna. <sup>53</sup> Taitá

uaquiñabe contra echántsemna, y uaquiñá taitabe contra; bebmá, bembëbe contra, y bembe bebmabe contra; uambén mamá, bebincuabe contra, y bebincuá uambén mamabe contra ca” —cha tojánayana.

*Ndaye tempo yochtsemnama ntšamo inétsotatsëmbo*  
(Mt 16.1-4; Mc 8.11-13)

<sup>54</sup> Mëntšánaca Jesús entšanga tojanëyana: “Tšëngaftanga, chë jantšetëshënga shinÿe uenatjëmbambanoicana tojóboconama šmojinÿe ora šmondbétsichamo ‘echanjuafté ca’, y ndegombre chca jopásana. <sup>55</sup> Y tsmanoicana tojtsebínÿia orna, tšëngaftanga šmondbétsichamo ‘echanjojenÿana ca’, y ndegombre chca jopásana. <sup>56</sup> ¡Bacna entšanga, chë ntšamo ndegombre šmojuabnacá ndinÿinÿnayënga! Ntšamo quem luarentše yochtsemnama, ndayá celoca šmojinÿama tša tšabá šmojtsetatšëmbëse, ¿ndáyeca ndoñe šmontsobena jtsetatšëmbuana ndaye bëts soye quem tempo Bëngbe Bëtsá cmojtsinÿanÿnama ca?” —Jesús tojánayana.

*Chë uayayáftaca natjëmbana jtënbemana*  
(Mt 5.25-26)

<sup>57</sup> “¿Ndayeca cach tšëngaftanga ndoñe šmondbéyana ndayá tšabá bétsemnana? <sup>58</sup> Nderado nda tcmojtsedemandá y cabildoye jotsánama cmojtsemna, cabá choye ndáshjango ora, betesco cháftaca cochtenoyántsia. Chca ndoñese, chë demandayá mandádbioye cmochanjúshjango, chë mandadna josticiëngbe cucuatšinë cmochanjáboshjona, y chënga cárceloye cmochanjutame. <sup>59</sup> Ndegombre cbëyana, chentšana ndoñe quecochtëtsbocna, nyëts ndebénana candesopagantscuana ca” —Jesús tojánayana.

## 13

*Bëngbe Bëtsabe benache jtishachana*

<sup>1</sup> Cach ora, báseftanga tmojána Jesús jinÿama, y tmojan-cuentá ndayá chë mandado Pilato tojanmama; chana básefta Galileoca boyabásenga tojtsanëbaye, y chëngbe buiñe yojenajuabó chë Bëngbe Bëtsábioye jëtschuayama tmojanóba bayëngbe buiñeca.

<sup>2</sup> Y Jesús chënga tojanëyana: “¿Tšëngaftanga šmojtsejuabná, chë Galileoca entšanga chca tmojapasá, chë luarentša inÿe boyabásengbiama chënga más bacna soye amënga imojamna causa ca? <sup>3</sup> Ndegombre cbëyana, ndoñe. Y cach tšëngaftanga, bacna soyënga amama ndoñe šmontsajbaná y Bëngbe Bëtsabe benache ndoñe šmontishachëse, tšëngaftángnaca šmochanjóbana. <sup>4</sup> O, ¿tšëngaftanga šmnétsejuabnaye, chë Jerusalenentša bnëtsana posufta entšanga tmojanóbanënga,

chë Jerusalenoca binche uafjónaye Siloé béconana tsbanana jebna soye tojtsanáshajaye ora, chënga imojamna chë ínÿenga Jerusalenentse oyenëngbiamá más bacna soyënga amënga ca? <sup>5</sup> Ndegombre chëyana, ndoñe. Y cach tsëngaftanga, bacna soyënga amama ndoñe šmontsajbaná y Bëngbe Bëtsabe benache ndoñe šmontishachëse, tsëngaftángnaca šmochanjóbana ca” —Jesús tojanëyana.

### *Chë ndëshajona higo betiyama cuento*

<sup>6</sup> Jesús mëntšá tojanacuntá jabuátambama: “Canÿe entšá jajoca canÿe higo betiye inabomna, y yojá nderado nantse-shájonama, pero tondaye yonjínÿena. <sup>7</sup> Chcasna, chë jajañe bojanÿábioye cha ibojauyana: ‘Mouena, ya unga uata tsabó quem higo betiyoje jaborrepárama, nderado nantse-shájonama, pero ndocna te tondaye chiyátinÿena; chíyeca, motsetëtse. ¿Ndayama quem jajañe yochjátsjena ca?’ <sup>8</sup> Pero chë jajañe inÿená ibojauyana: ‘Bacó, inÿe uata cachcá monÿá, fshantse chanjáboplojua y uanguanëshe chanjabotboto. <sup>9</sup> nderado chca jamëse, nanjashájona; y ndoñesna, chora cocayé cuantsetëtse ca.’ ”

### *Jesús canÿe ochnayté, canÿe tsëstjona shembásabioye tbojan-shná*

<sup>10</sup> Canÿe, canÿe ochnayté Jesús yojontsé entšanga jabuátambana, chë judiëngbe enefjuana yebnentse, <sup>11</sup> y chentse yojtsemna canÿe shembása; cha ya bnëtsana posufta uata yojtsešoca. Canÿe bacna bayëja chábeñe tojánamashëngo y chca tsestjoná tbojtsanbema, y tondayama yontsobena jtondiríchana. <sup>12</sup> Jesús chábioye tbojáninÿe ora, tbojanchembo y mëntšá tbojanianyana: “Batá, mora ya ndoñe šocá quecátsmëna ca.”

<sup>13</sup> Chora Jesús chabe cucuatšënga chábeñe tojanajó, y cachora chë shembása yojtondirícha, y tojanontsé Bëngbe Bëtsábioye jëtschuayama. <sup>14</sup> Pero chë enefjuana yebnentša mándayana tbojánetna, Jesús chë shembása ochnayté tbojan-shnama, y entšanga tojanëyana: —Chnënguana te comna jatrabájama; chora šmochjabo jenóshnama; ochnaytese ndoñe ca.

<sup>15</sup> Y Bëngbe Utabná tbojanjuá: —¡Bacna entšanga, ntšamo ndegombre šmojuabnacá ndinÿinÿenayënga! ¿Tsëngaftanguentšá ndocná chë ochnayté chabe uacná o chabe burrotema buanjuajafjoná, juanatsama béjaye chaofšema? <sup>16</sup> Chcasna, quem shembása, canÿa Abrahábentšana entšá, y Satanasbe causa bnëtsana posufta uata šocá yojtsemna, ¿ndoñe tsabá yondmëna canÿe ochnayté chë bayëja jtsebojuánana ca?

<sup>17</sup> Jesús chca tojánayana ora, chabe uayayënga imojtsëuatja, y nyetsca entsanga imojtsóyejuaye Jesús tša bëts soyënga yojtsamama.

*Chë mostaztiye jenayama cuento*

(Mt 13.31-32; Mc 4.30-32)

<sup>18</sup> Jesús mëntšánaca tojánayana: “¿Ndayacá Bëngbe Bëtsabe amëndayana yomna, o ndaye sóyeca nanjopódia chama jábuayenana ca? <sup>19</sup> Endmëna mo canÿe mostaza jénaye, canÿe entsá jajañe tojajecá; chiyna jójuana y canÿe bëts betiye jóbemana; tša bëtsashe jóbemana, chíyeca chë jaja shloftšënga chë buacuashënguiñe uajajonëtemëngá jauábopormana ca.”

*Chë levadurama cuento*

(Mt 13.33)

<sup>20</sup> Mëntšánaca Jesús tojánayana: “¿Ndaye sóyeca chjobenaye Bëngbe Bëtsabe amëndayama jábuayenama ca? <sup>21</sup> Endmëna mo levadurcá; canÿe shembása chana jenájuabana unga medida arniñyañe, nyetsana chauabochama ca.”

*Chë base utëntsä bësásä*

(Mt 7.13-14, 21-23)

<sup>22</sup> Jerusalenoye benache, Jesús entsanga yojtsabuátambaye bëts pueblënguiñe y base pueblotëmënguiñe. <sup>23</sup> Canÿa chábioye tbojantjá: —Bëngbe Utabná, ¿nyë báseftanga imomna chë atsebácanënga mochtsemnënga ca?

Y Jesús tbojanjuá: <sup>24</sup> —Puerte šmochtsentsëna chë base utëntsä bësásajana jamashjnama; er ndegombre cbëyana, banga mochántseboše chëjana jamashjnama, pero ndoñe quemochatobenaye. <sup>25</sup> Chë yebnentša nduiño chaojotsbaná y chë bësásä chaojtatámentsana, tšëngaftanga chë shjoca chašmojtsemnënga, šmochántsechembuana, mëntšá jtsichámëse: “Utabná, šmebëtafjo ca.” Pero cha cmochanjáuyana, “Atše ndoñe quetsátstatšëmbo ndëmoquënga tšëngaftanga šmomnama ca.” <sup>26</sup> Chora tšëngaftanga šmochanjontsé ichámuana: “Acaftaca cánÿiñe fsënjase y fsënjofsé, y aca bëngbe tsáshenañe tconjabuatambá ca.”

<sup>27</sup> Pero cha cmochanjójuaye: “Ya tcbonjáuyana, ndëmoquënga šmomnama ndoñe tstátšëmbo ca. ¡Atšbentšana mojuánanga, bacna soyënga amënga ca!

<sup>28</sup> “Chora chentše puerte šmochanjenóbošachna y tsetšanama juatsasënga šmochantsenoftšësjonaye, Abraham, Isaac, Jacob y nyetscanga Bëngbe Bëtsabe juabna oye-buambnayënga Bëngbe Bëtsabe amëndayoca imojtsemnama chašmojinÿe ora, y tšëngaftanga chentšana cmochtëbuacanama. <sup>29</sup> Y shinÿe bocanoicana y uenatjëmbambanoicana, tsmanoicana y tsjuanoicana entsanga mochanjabo y juasama mochanjotbiama Bëngbe Bëtsabe amëndayentše.

<sup>30</sup> Y banga mora nduámanënga imomnënga, chora uámanënga mochántsemna; y banga mora uámanënga imomnënga, chora nduámanënga mochántsemna ca” —Jesús tojánayana.

*Jesús tbojanongmé Jerusalenentša entsangbiana*  
(Mt 23.37-39)

<sup>31</sup> Jesús chë soyënga tojanëyana ora, básefta fariseunga tmojánashjajna y tmojanियana: —Muentšana motsatoñe; Herodes entseboše aca jtsóbama ca.

<sup>32</sup> Y Jesús tojanëjua: —Motsajna y šmochjauyana chë corente studio bomná, mo tjañe mesetca: “Minÿe, mënté y yëfse entsángbentšana bacna bayëjënga sëndëtëbuacana y šoquënga sëndáshnaye, y baseftaytesna chanjapochóca ca.”

<sup>33</sup> Pero atše šontsemna mënté y yëfse jtsayana, y baseftaytesna Jerusalenoye jana, er ndoñe tšabá ntsemnana canÿa Bëngbe Bëtsabe juabna oyebuambnayá Jerusalenentša chábuañe chaóbana ca.

<sup>34</sup> “¡Jerusalenentša entsanga, Jerusalenentša entsanga, tšëngaftanga chë Bëngbe Bëtsabe juabna oyebuambnayënga jtsëbáyana, y chë Bëngbe Bëtsabe ichmónëngbiyoye ndëtšbëngaca jtsatëchénganjana jtsëbáyama! ¡Bueta soye atše sënjábošena tšëngaftanga átšbiyoye júbuajama, mo canÿe tuamba chabe bolletotémënga juatëngmiáša tajsoye cuaftajayecá, pero tšëngaftanga ndoñe chešmátsbošena! <sup>35</sup> Y šmochjinÿe, mora atše cachcá cbochanjesënÿaye, y chca, atšna enánanga cbochanjésabashejuana, mo canÿe yebna cachcá tcojesonÿá y éañe tcojeseboshjoncá. Y ndegombre, tšëngaftanga morscana ndoñe más atše quešmochátinÿe; y atše šmochántinÿe, chë: ‘Corente bendición bomná, Bëngbe Utabnabe obenánaca tojabá ca!’ chašmojtsichamo ora ca” —Jesús tojánayana.

## 14

*Jesús, canÿe uafshachanána šocábioye tbojanshná*

<sup>1</sup> Canÿe ochnayté, Jesús tojána jasama fariseungbe canÿe amëndayabe yebnoye; y chë fariseunga yejuana imojtserreparana, er ndayá Jesús nanjama. <sup>2</sup> Chéntšnaca, chabe delante yojtsemna canÿe entsá uafshachanána šocá. <sup>3</sup> As Jesús chë ley abuátambayënga y fariseunga tojanatjá: “¿Quenlesenciana canÿe ochnayté canÿe šocá jáshnama o ndoñe ca?”

<sup>4</sup> Chëngna ndocá tmonjanjuá. As Jesús chë šocábioye tbojánishache, tbojanshná y tbojanियana chaotsatoñe ca. <sup>5</sup> Y chë fariseunga tojanëyana: “¿Nda tšëngaftanguentšá, nderado chabe uaquiñá o uacná canÿe tboye tojtsótsatše, cachora ndoñe nanjá jetsejátsëcama, masque ochnayté totsomñëse ca?”

<sup>6</sup> Y chënga ndocá tmonjanobená cha jojuana.



### *Chë casamentoye ófjanënga*

<sup>7</sup> Jesús tojáninye ntšamo chë ófjanënga quëfseroye imojtsachnëjuana jotbiamama; as mëntšá chënga tojanabuayená: <sup>8</sup>“Canÿe casamentama nda chacmojojfa ora, quëfseroca ndoñe catjót'bema, er nderado inÿe ofjaná acbiamama más uamaná ústonoye nandaboye; <sup>9</sup>y nderado chë tsëndatbe ofjajaná nanjabo y cmatjauyana: ‘Mua chentše chaótbema, maluaré ca’, y chora cmatjotóca ouatjentše chafjoca jana jatótbemana. <sup>10</sup>Chamna, nda chacmojojfa ora, chafjoca cochjót'bema, chca, chë ofjajaná chaojabo ora chacmëyana: ‘Taita, quëfseroye motsëchnëngoñe ca’. Y chca, aca chë chentše tmojtsetbiámanëngbiama uamaná cochántsemna. <sup>11</sup>Er nda cachá bëtsá tojtsenobiamná, nduamaná mochántsebema; y nda cachá nduamaná tojtsenobiamná, aíñe bëtsá mochanjábema ca.”

<sup>12</sup>Y chë tbojanofja entsábioynaca Jesús mëntšá tbojaniyana: “Fiesta chacojama o sananga chacojtsebomna ora, ndoñe cattšëbuájajana acbe amiguënga, catsátanga, ni pamíllanga, ni acbe juachañe oyenënga bomnënga; er chëngnaca, fiesta chamojtsebomna ora, aca cmochantétofja, y chca ya acbe uacanana soye cochántsebomna. <sup>13</sup>Chamna, canÿe fiesta chacojama ora, cochjúbuaja ndbomnjémënga, jama ndobenënga, coshetënga y jtanënga, <sup>14</sup>y aca corente oyejuayá cochántsemna; er chënga ndoñe quemochatobenaye cachcá aca jtëtofjana, pero acna acbe uacanana soye cochántsebomna, chë Bëngbe Bëtsabe bominyiñe tšábenga imomnënga chamojtayena ora ca” —cha tbojaniyana.

### *Chë bëts sanama cuento (Mt 22.1-10)*

<sup>15</sup>Chca tojanuena ora, canÿa chë mesëshentše tbemaná tojánayana: —¡Puerte oyejuayá echántsemna Bëngbe Bëtsabe amëndayoca juasama chaojtsemná ca!

<sup>16</sup>Chora Jesús tbojaniyana: —Canÿe bacó canÿe bëts saná yojapróna y ba entsanga yojúbuaja. <sup>17</sup>Juasama ya yojobuache ora, canÿe oservená ibojíchmua chë ófjanënga jáuyanama chamotsajna, ya lempe yojtseprontana ca. <sup>18</sup>Pero chorna nÿetscanga imojontšé jtsoyátšëmbuana. Canÿa yojayana: “Cabá mora canÿe fshantse sënjobuámiñe, y šontsemna jana jarrepárama. Chcasna, aslëpaye šmotsepacenciá ca.” <sup>19</sup>Inÿa yojayana: “Bnëtsana toronga sënjobuámiñe, y šontsemna jana jányama, jaárama taimochjosérvia. Chcasna, aslëpaye šmotsepacenciá ca.” <sup>20</sup>Y inÿa yojayana: “Cabá mora sëntsobouamá, y chë causa, ndoñe quichatobenaye jama ca.” <sup>21</sup>Chora chë oservená yojesshëcona y lempe chabe nduíñbioye ibojauenaye. Chë nduíño tša ibojtsetna, y

chë oservenábioye ibojauyana: “Cam ora motsa tsashenan-goye y benachëngoye, y moye cochjunatse ndbomnjémënga, jama ndobenënga, jtanënga y coshetënga ca.”<sup>22</sup> Chentša bënëntscoese, chë oservená chë nduñbioye ibojauyana: “Bacó, ya sënjama ntšamo šconjamandacá, y cabá ínÿengbiama lu-are entsemna ca.”<sup>23</sup> As chë nduñio ibojauyana: “Motsa benachëngoye y betiyetemëngaca jetjaniñëngoye, y entšanga cochjautáriaye moye chamuábama, atšbe yebna chaojutjiana;<sup>24</sup> er ndegombre cbëyana, chë natsana sënjobuajënguentsá ndocná atšbe saná queochatsse ca.”

*Ntšamo yomna Cristbe ustoná jtsemnama  
(Mt 10.37-38)*

<sup>25</sup> Mallajta entšanga Jesús imojtsëstona; as cha tojanobuértana y tojanëyana: <sup>26</sup> “Nderado nda átšbioye tojabo, y ntšamo chabe taitá, chabe mamá, chabe shema, chabe básenga, chabe catšátanga y uabénanga tuababuánÿeshanama, y ntšamo cachá tuenobobonshánama, atše ndoñe más corente šontsebobonshánëse, cha ndoñe ntsoebenana atšbe uatsjendayá jtsemnana.<sup>27</sup> Y nda, atšbiama ndoñe tontseprontana jasúfriama y cruciñe jobanámnaca, y nÿetsca chabe quem luare soyënga ndoñe tonjëseboshjona atše juastama, cha ndoñe ntsoebenana atšbe uatsjendayá jtsemnama.

<sup>28</sup> “Nderado nda tšëngaftanguentsá tojtsejuabná canÿe tsbanana jebna soye japórmama, ¿cha natsana ndoñe nanjót'bema jinÿama ntsachetšá crocénana chentše yochjuába, y japochócama nÿetšá crocénana tajojtsebomnama? <sup>29</sup> Chca ndóñese, nderado chë uajatsana ucuatjoniñe tojapormá y lempe jajebuama ndoñe tonjobenase, nÿetscanga chca tmojinÿënga, muantsáfchaye y mëntšá muantsichamo: <sup>30</sup> ‘Quemëjema jajebuama tonjontsé, y japochócama ndoñe chenatobená ca.’

<sup>31</sup> “O ¿ndaye rey inÿe réyefraca jéntsjava tbojotocase, natsana ndoñe nanjót'bema jajuaboyama, nderado nanjobenaye bnëtsana uaranga soldadëngaftaca chë ínÿabioye jayëñjanana, chë inÿa uta bnëtsana uaranga soldadëngaftaca tojtsabose? <sup>32</sup> Y ndóñesna, chë inÿe rey cabá bënoca tojtsemna ora, básefta entšanga echanjichamuá, cha jauyanama más tšabá yomna ndoñe jatentsjanayana ca.

<sup>33</sup> “Chcasna, ndánaca tšëngaftanguentsá, lempe ntšamo to-bomncá ndoñe cachcá tonjesonÿá, cha ndoñe ntsoebenana atšbe uatsjendayá jtsemnama ca” —Jesús tojánayana.

*Chë tamó fténana tojtsebocna ora  
(Mt 5.13; Mc 9.50)*

34 “Tamó tšabe soye endmëna; pero chë tamó fténana tojtsóbemëse, tšëngaftanga ndoñe quešmátobena jamana tempcá sanana cachiñe chaotsatsmënana, ni saná jatamuama. Chë ftena tamó tondayama ntososervénana, cachcá, chë atšbe uatsjéndayënga jtsemnana tmojtsebošënga, pero lempe jéseboshjonama ndoñe tmontseboše, cach ndoñe chama ntososervénana. 35 Chë ftena tamó ndoñe ntososervénana ni fshantsama, ni uanguanëshama. Nye jtsëšenana. Chë jouenama tmojtsobenënga, šmochjouena ca” —Jesús tojánayana.

## 15

### *Chë ótsëna oveshabiamana cuento (Mt 18.10-14)*

1 Njëtscá chë Romocama impuesto entšángbioye atjanayënga y inye bacna soyënga amënga, Jesúsbioye imojánajna chabe palabra jouenama; 2 y chë fariseunga y ley abuátambayënga chama Jesusbiamana podescá imojtsoyebuambná, mëntšá: —Mua bacna soyënga amëngaftaca entsenuta y chëngaftaca entsesá ca.

3 As Jesús mëntšá tojanacuntá, chënga jabuátambama: 4 —¿Nda tšëngaftanguentšá, canye patse oveshënga tojtsabamna, y canya tbojtsobuétšëse, chë inye esconëfta bnëtsana y esconëfta oveshënga shëntsjañe ndoñe cachcá nanjesënyaye, y nanjá chë otšená jetsenguanguama candëtsónyëñëntscuana? 5 Y tbojtsinýena ora, oyejuayá chë oveshá jesotantšájuaana; 6 y yebnoye tojtashjango orna, chabe amiguënga y juachañe oyenënga jáchembuana y mëntšá jáuyanana: “Atšeftaca móyejuanga, er chë sëntsanobuetše oveshá sëntsinýena ca.” 7 Atše cbëyana, cachcá, celócnaca más oyejuayana jtsebínynana, canye bacna soyënga amá tšabe benache tojtishachabiamana, y ndoñe nya yapa, esconëfta bnëtsana y esconëfta tšabe soyënga amëngbiamana, chë ndoñe yondujaboto bacna soyënga amana jtsajbanana ca.

### *Chë crocénana tojtsónýena shembásabiamana cuento*

8 “O mëntšá, ¿ndëmua shembása, bnëtsana uámana crocénana tojtsebmna y cányana tojtsobuétšëse, chora ndoñe canye uajuinýanëshana nanjuajuinýená, y cuedádoca chë yebna nantsetsjajo y botamana chë crocénana nantsenguango candëtsónyëñëntscuana? 9 Y tojtsinýena ora, chabe amiguënga y juachañe oyena shembásënga jáchembuana, y mëntšá jáuyanana: ‘Atšeftaca móyejuanga, er chë sëntsanobuetše crocénana sëntsinýena ca.’ 10 Atše cbëyana, cachcá, chë Bëngbe Bëtsabe angelotëmëngbeñe oyejuayana jtsebínynana, nye canye

bacna soyënga amá chë tšabe benache tojtishachabiana ca”  
—Jesús tojánayana.

*Chë uaquiñá bacna benachiñe ayá*

<sup>11</sup> Jesús mëntsánaca tojanacuntá: “Canÿe entšá uta uaquiñata yojánabamna; <sup>12</sup> y canÿe, chë ngomënche uaquiñá chabe taitábioye ibojauyana: ‘Taita, atšbe otocana soyënga šmatatšetá ca.’ As chë befta lempe chë uta uaquiñata yojtëjátaye.

<sup>13</sup> “Chentšana baseftaytesna, chë más bobontse uaquiñá lempe ntšamo ibojobuachcá yojtsatobuiye y chë crocenánaca bën luaroye yojtsoñe, y choca, cha nÿe ntšamo ibojocochëngcá, mocá yojenobuiye, y chca, lempe yojtsepochóca. <sup>14</sup> Lempe crocénana yojtsoshañe orna, bëts shëntsana chë luarentše yojóshjango, y chë causa cha ibojotóca shëntseca jtsëjétanana. <sup>15</sup> As, cha yojá trabajo jonguangoñama y yojínÿena chë luarentša canÿe entšábentše; chana, chabe jajoye ibojíchmua cotšënga jtsanÿenama. <sup>16</sup> Chë bobontsna yojtseboše chë cotšbe saná jtsesana, pero ndocná tondaye ibonjanájuatšnaye.

<sup>17</sup> “Cabana, botamana yojinÿe ntšamo yojtsepasacá, y mëntšá yojenójuaboye: ‘¡Bueta trabájayënga atšbe taitabe yebnentše bëtscá saná mondëtsóboñe, y atše muentše shëntsama chanjóbana ca! <sup>18</sup> Chantá atšbe taitabe yebnoye y mëntšá cha chanjauyana: Taita, šmotseperdoná. Atše tijama ndayá Bëngbe Bëtsá ndoñe yondbošcá, y ntšamo aca ndoñe condbošcá. <sup>19</sup> Mora ya merecido taitatobuajoñe acbe uaquiñá jtsabáinama; nÿe canÿe acbe trabajayacá Diosmanda šmatofja ca.’ <sup>20</sup> Chca jëftsenójuaboyëse, yojontsé cachabe yebnoye jtana.

“Cabá bënoca yojtsemna ora, chabe taitá chábioye ibojinÿe, y chabe uaquiñabiana ibojóngmia, y jajëbenguama betscó yojá; ibojajebengo, ibojtotsejcuá y tša yojtsóyejuayayama chë uaquiñábioye ibojtámochó. <sup>21</sup> Chora chë uaquiñá ibojauyana: ‘Taita, šmotseperdoná. Atše tijama ndayá Bëngbe Bëtsá ndoñe yondbošcá, y ntšamo aca ndoñe condbošcá; mora ya merecido taitatobuajoñe acbe uaquiñá jtsabáinama ca.’ <sup>22</sup> Pero chë Taitana chabe oservënënga yojámëndaye: ‘Betsco chë más tšabe entšayá mauaca y matspormanga, montšabuechëtjo y matsshëcochëtjo. <sup>23</sup> Mora chë más minÿica uacná šmochjuánatse y šmochjáshbua. ¡Mochjase y mochjóboyejuaye ca! <sup>24</sup> Quem atšbe uaquiñá mo obanacá endánmëna y mora bënga montsetátšëmbo cha ainá yotsomñama. Quem atšbe uaquiñá mo otšenacá endánmëna y mora tmonsínÿena ca.’ Y chentšana imojontsé joboyejuayama.

25 “Chë yebnoca fiesta yojtsemnëntscuana, chë mayor uaquiñana jajoca inétsomñe. Yebnoye yojtsataye y ya béconana yojtsemna orna, cha yojouena imojtsabuastoye y imojtselántsaye. 26 As chora cha canýe oservenábioye ibojachembo y mëntśá ibojatjaye: ‘¿Ndayá bēngbe yebnentše yojtsopasana ca?’

27 “As chë oservená ibojojuá: ‘Acbe uabentsá tontashjango y chama acbe taitá šonjutarié chë más minýica uacná jáshbuama, cha tšabá tojtashjanguama ca.’ 28 Pero chë uabóchena catšatna corente ibojtsetna y ndoñe yontseboše tsoye jtamashēnguana. As cach befta yojábocna chë catšátbioye jaimpádama chauatamashēnguama. 29 Chora cha chë taitábioye ibojauyana: ‘Taita, aca condétatšēmbó bueta uata cbetsajabuáchanama, nýets tempo cbetseyeunanama, pero ndocna te ni mo canýe chivotema chešcaisatštá atšbe amiguēngaftaca joboyeuayama. 30 Y masna, acbe uaquiñá chë bacna vida bomna shembásengaftaca acbe crocénana pochocayá tojtashjango ora, chë más minýica uacná chabiamá tcojášhua ca’ — chë uaquiñá ibojauyana.

31 “Chora chë befta ibojojuá: ‘Atšbe uaquiñá, aca sempre átšeftaca condétsemna y lempe ntšamo atše tsbomncá acbiámncá endmēna. 32 Pero mora tšabá entsemna joboyeuayama y joyeuayēngama; er acbe uabentsá mo obanacá endánmēna, y mora bēnga montsetátšēmbó cha ainá yot-somñama; mo otšenacá endánmēna, y mora tmontsinýena ca.’”

## 16

### *Chë nduiñbe ndoñe tšabe uajabuachanábiama cuento*

1 Jesús mëntśánaca chabe uatsjéndayēnga tojanacuntá: “Inamna canýe bomna entśá, y cha ibnabomna canýe uajabuachaná chabe soyēnga chaotsinýenama; y chë nduiño imojuenaye chë uajabuachaná chabe soyēngaca ndoñe tšabá yontsamama. 2 Asna, chë nduiño ibojachembo y mëntśá ibojauyana: ‘¿Ntšamo acbiama šmontsatsētsnacá ndegombre yojtsemna ca? Mora cuenta šmatatštá ntšamo atšbe soyēngaca tcojamama, er morscana ya ndoñe atšbe soyēnga inýená quecochátsmēna ca.’ 3 Chë uajabuachaná yojontšé jenójuaboyana, y mëntśá yojeniyana: ‘¿Y mora ntšamo chtsemána, chë nduiño atšbe trabajuentšana šojtabocna ora? Ndoñe añemo quetsátsbomna fshantse jatrabájama, y lemošna jótjañamna sēntsēuatja. 4 Ya sēntsetatšēmbó ndayá chjama, chca, atšbe trabajuentšana chašojtábocna ora, atše jtsabamnama ndēmuanýenga chēngbe yebnentše chašmofjama ca.’

<sup>5</sup> “Chentsana, canyánja chë chabe nduiñbioye ndebénënga vojáchembo. Cányabioye ibojatjaye: ‘¿Ntsachetsá atšbe nduiño icondebena ca?’ <sup>6</sup> Y cha ibojuá: ‘Canye patse barrilëshangá aceitiye ca.’ As cha ibojauyana: ‘Muentše acbe recibëcha entsamna; mora mótbema y inyácha nye shachna bnëtsana barrilëshangama matapormá ca.’ <sup>7</sup> Chentsana ínÿabioye ibojatjaye: ‘Y acna, ¿Ntsachetsá icondebena ca?’ Y cha ibojuá: ‘Canye patse medida trigo ca.’ As cha ibojauyana: ‘Muentše acbe recibëcha entsamna; chiñe nye posufta bnëtsanama mábema ca.’ <sup>8</sup> Chentsana, chë nduiño tšabá yojayana chë ndoñe tšabá ama mayordombiama, cha stúdioca yojamama. Chë nye quem luarama enójuabnaye entšanga, cachëngbe soyëngaca puerta studio bomnënga mondmëna; y chë entšangbe juabnënga binÿnayábenga ndoñe nÿa yapa ca.

<sup>9</sup> “Atše cbabuayená, quem luarentše, chë bacna soyënga amëngbe luarentša bomnánaca amiguënga šmochjábiamá, ínÿenga jtsëjabuáchanëse. Chca, chë bomnana tojtsopochocá ora chašmotsabamna ndëmuanÿenga chë nÿetsca tescama oyenoye chacmúbuajama ca.

<sup>10</sup> “Nda básefta soyënguiñe lempe tšabá tojama, bëtscá soyënguiñnaca lempe tšabá echanjama; y nda básefta soyënguiñe ndoñe tšabá tonjama, bëtscá soyënguiñnaca cach ndoñe tšabá queochatsma. <sup>11</sup> Chcasna, quem luarentše, chë bacna soyënga amëngbe luarentša bomnánaca ndoñe tšabá šmonjamëse, ¿nda chë ndegombre bomnana, chë Bëngbe Bëtsabe soyënga cmochjábanÿiye? <sup>12</sup> Y chë ndoñe tšëngaftangbe sóyeca ndoñe tšabá šmonjamëse, ¿nda cmochjantšabuáchiye ndayá tšëngaftangbiama yomncá ca?

<sup>13</sup> “Ndocná ntsobenana uta mandayata jtsaservénana; er cányabioye bochantšáboyënja y chë ínÿabioyna bochantšebobonshana, o cányabiamá tšabá echántsetrabajaye, y chë ínÿabiamna ndoñe tšabá. Ndoñe quecátobena Bëngbe Bëtsá jtsebobonshánana, nÿe quem luarentša soyënga jtsebomnama tcojtsebošëse ca” —Jesús tojánayana.

<sup>14</sup> Chë fariseunga, becá crocénana jtsebomnama bošënga imnamna, lempe chca chënga tmojanuena, y Jesúsbioye imojtsáboyejuana. <sup>15</sup> As Jesús tojanëyana: “Tšëngaftanga entšangbe delante mo tšábenga cuaftsemncá jtsenobiamnayana, pero Bëngbe Bëtsá endétatšëmbo ndayá tšëngaftangbe ainaniñe yomnama; er ndayá entšanga más tojtsebošcá, Bëngbe Bëtsá jtsáboyënjana ca.

### *Moisesbe ley y Bëngbe Bëtsabe amëndayana*

<sup>16</sup> “Moisesbe ley y chë Bëngbe Bëtsabe juabna oyebuambnayënga tšëngaftanga cmonjanabuayiyná, Juan chë Ubayaná quem luaroye tonjánabëntscuana. Cha tonjánabo

orscana montsabuayiyná chë tšabe noticiënga Bëngbe Bëtsabe amëndayocama, y nyëtscanga tša montseboše choye jamashënguama ca.

17 “Más paselo endmëna, celoca y quem luare chaopochocá, y ndoñe chë ntšamo leyiñe iuayancá, chë ndayá jopásama yomnama, ni mo canye punto ndoñe chca chaondëtsemnama ca” —Jesús tojánayana.

*Ndayá Jesús tojanabuatambá chë bouamnënga tmojtsenëtšenama*

*(Mt 19.1-12; Mc 10.1-12)*

18 “Nda chabe shémbioye cachcá tbojesonýa y ínÿaftaca tojtóbouamase, cha chë natsana shémbioye ínÿaftaca jtseíngñayana; y nda chë útšena shembásaftaca tojobouamá chana, canye uabuatmá jtsebomnana, y chca, chana canye bacna soye jtsamana ca” —Jesús tojánayana.

*Chë bomná y chë ndbomnjëma Lázaro*

19 “Canye bomna entsá inamna; cha yojanamana uámana y botamana shbuenda uafjatsenga y lino entsayangá jtichëtjuana, y cada te bëts fiestënga yojánama. 20 Canye ndbomnjëmnaca inamna, Lázaro ca uabainá, bacna nguayanánaca šocá; y cha yojanamana chë bomnabe bësásentše fshantsiñe jótbemana. 21 Quem ndbomnjëma yojtseboše chë bomná yojtsesayentšana yojatquëcjana sanángaca jtoshachayana; y chë quešënga imnaboje chabe nguaye cuerpo jajáfuama. 22 Canye te Lázaro yojtsóbana, y Bëngbe Bëtsabe angelënga Abrahámboje cha imojtamba, chë nyëtscanga oyejuayënga mondmëna luaroye. Chë bomnánaca yojóbana y imojuátbontsa.

23 “Chë bomná infiernoca puerte ngmëniñe yojtsesuf-rina ora, tsbanánoye yojontješiye y bënoca Abraham ibojinÿe, y Lázaro cháftaca yojtsemna. 24 As chë bomná yojuayebuáchena: ‘¡Taita Abraham, šmolastemá! Lázaro michmó chabe ntšabuafja chaofchecuacuá y atšbe bichtaja chauabofchecuacuaye, er quem íñeshoca tša sëntsesufrina ca.’ 25 Pero Abraham ibojauyana: ‘Uaquiñá, menojuabó, aca fshantsoca vida conjánbomna ora, lempe ntšamo icojabošcá tconjanóyëngacñe, y Lázaro chë cuenta tondaye quenjátsbomna; pero morna, cha tšabá y oyejuayá entsemna, y aca jabuache ngmënanana contsebomna. 26 Y inÿe soye, canye bëts tũañe entsemna tšëngaftangbiocana mëntscoñe; chca, chë tšëngaftangbioye muentšana jenachnënguama tmojtsebošënga ndoñe chamondëtsobena, ni chocana bëngbioye cach ndoñe ca.’

27 “Y chë bomná ibojauyana: ‘Masque chca, Taita Abraham, Diosmanda Lázaro michmó atšbe taitabe

yebnoye; <sup>28</sup> choca sëndábamna shachna catšátanga; as chaúyana ntšamo moca atše stsepasana y ntšamo jamëse chënga ndoñe chaondëtsamna quem ngménënga luaroye jabama ca.' <sup>29</sup> Chora Abraham ibojauyana: 'Chënga ya mondbomna ndayá Moisés y chë Bëngbe Bëtsabe juabna oyebuambnayënga tmojëftsaná bema soyënga; ¡chëngbioye chamoyauná ca!' <sup>30</sup> Chë bomná ibojojuá: 'Ndoñe, Taita Abraham; nderado obanënguentšana canya chëngbioye tojase, aïñe chë tšabe benache muantishache ca.' <sup>31</sup> Pero Abraham ibojauyana: 'Chënga ni mo Moisés, ni chë Bëngbe Bëtsabe juabna oyebuambnayëngbioye ndoñe tmonjóyaunase, Bëngbe Bëtsabeñe ndoñe quemochatošbuáchiye, masque canye obaná chauatayenëse, chëngbioye jábuayenama ca' ” —Jesús tojancuentá.

## 17

*Resjo yomna, nderado bacna soyënga cuanjama*  
(Mt 18.6-7, 21-22; Mc 9.42)

<sup>1</sup> Jesús chabe uatsjëndayënga tojanëyana: “Sempre echanjëftsemna juabnënga bacna soyënga jamama; pero, ¡tša lastema chë entšabiamana ndabe causa ínÿënga bacna soyënga tmojama! <sup>2</sup> Más tšabá chabiamana nántsemna canye nantsnëbé chamotsetamošëntšbua y mar béjayoye chamotsashbuetše, y ndoñe chë canya Bëngbe Bëtsabeñe ošbuachiyá bacna soye chaomama juanatsana. <sup>3</sup> Cuedado šmochtse bomna.

“Acbe catšata bacna soye tojamëse, cochjuácacana; y yocht-sajbaná ca cha tojayanëse, cochtseperdóna. <sup>4</sup> Masque nÿe canye te, canysëfta soye ntšámnaca tcmojaborlá, y canysëfta soye ‘chca ndoñe más quebochatsbórla ca’ tcmojauyanëse, aca cmontsemna cha jtseperdónana ca” —Jesús tojánayana.

*Bëngbe Bëtsabeñe jtsošbuáchiyëse, corente obenana jtse bomnana*

<sup>5</sup> Chë uatsjëndayënga Bëngbe Utabnábioye tmojanianyana: — Ošbuáchiyana šmababuaté ca.

<sup>6</sup> Y chë Utabná tojanëjua: —Tšëngaftanga ošbuáchiyana, batšatema masque nÿe mo mostaza jenaycá šmojtse bomnëse, quem sicomoro betiyoye šmatjauyana: “quemuentšana mo-jashtse y mar béjayoca mojé ca”, y quem betiye chca nanjama ca.

*Chë oservená ndayá ibomna jamana*

<sup>7</sup> “Nderado canya tšëngaftanguentšá canye bochichnayá tbojtse bomna, cha jajocana tojtashjango jajañe arayocana o uacnënga anÿenocana, ¿chábioye bochjauyana: ‘Matabo y mabose ca?’ <sup>8</sup> Ndoñe, chamna mëntšá bochanjauyana: ‘Jetiñe juasama cochjuábua, y moprontá atše jaserviama



atše candëse y candofšentscuana; y chentšana aca cochjase y cochjofsiye ca.' <sup>9</sup> Y chë bochichnayábioye ndoñe quebochtëtschuaye ndayá tbojuatarieca cha tojamama. <sup>10</sup> Tšëngaftángnaca cachcá, lempe ntšamo Bëngbe Bëtsá tcmojutarieca chašmojama ora, cmontsamna jayanana: 'Nduámana oservénënga fsëndmëna; er nýe ntšamo jamama suamncá tifjama ca' " —Jesús tojánayana.

*Jesús, bnëtsanënga bacna nguayanánaca šoquënga tojanashná*

<sup>11</sup> Jerusalenoye benache, Jesús tojánachnëngo Samaria y Galilea luarëjana. <sup>12</sup> Y canýe pueblotémoye tojánashjango ora, bnëtsana boyabásenga bacna nguayanánaca šoquënga chábioye tmojána; chá bentšana bënoca chënga tmojanouedá, <sup>13</sup> y mëntšá imojtsáyebuache: —¡Jesús, Buatëmbayá, šmotsalastemá ca!

<sup>14</sup> Jesús chënga tojánanyë ora, tojanëyana: —Jerusalenoca bachnángbioye motsajna, y chënga šmochjínyanýiye tšëngaftanga mora ndëšoquënga šmojtsemnama ca.

Y tojanopasá, chë bnëtsanënga cabá imojétsayëntscuana, ya shnánënga imojtoquedaye. <sup>15</sup> Canýa chënguentsá, shnaná yojtsemnama tojáninyë ora, yojesshëcona Bëngbe Bëtsábioye jabuache atschuanaye; <sup>16</sup> y Jesusbe delante yojoshëntsamentšiyë, jubiaca fshantsóntscoñe yojotsejbéna, y chábioye ibojtsatschuanaye; y chë boyabásana Samarioca entšá inamna.

<sup>17</sup> Chora Jesús tbojaniyana: —Bnëtsanënga mondmëna chë shnánënga tmontoquedanga. ¿Ndayentšë chë inýe esconëftanga imojtsemna? <sup>18</sup> ¿Nýe quem boyabása, inýe luarocana ashjanganá, tojesshëcona Bëngbe Bëtsá jëtschuayama? ¿Ndáyeca chë inýënga ndoñe ca?

<sup>19</sup> Y chë entšábioye tbojaniyana: —Matëtsbaná y motsatoñe; Bëngbe Bëtsábeñe aca icošbuachéyeca shnaná contsatsmëna ca.

*Ntšamo Bëngbe Bëtsabe amëndayana yochjóshjango*  
(Mt 24.23-28, 36-41)

<sup>20</sup> Canýe, chë fariseunga Jesús tmojantjá, mocna ora chë Bëngbe Bëtsabe amëndayana yochjanóshjanguama; y cha tojanëjua: "Bëngbe Bëtsabe amëndayana chaojóshjango ora, tšëngaftanga ndoñe quešmochatobenaye chca jinýana. <sup>21</sup> Chora ndoñe quemochátichamo 'Muentšë entsemna' o 'Choca entsemna ca'; er Bëngbe Bëtsabe amëndayana ya tšëngaftangbeñe entsemna ca" —cha tojánayana.

<sup>22</sup> Jesús chabe uatsjëndayënga tojanëyana: "Canýe tempo echanjóshjango, y chora tšëngaftanga šmochántseboše canýe te jtsebomnana, ntšamo chë Bëngbe Bëtsá Entšá tbojanbemá

tšëngaftangbeñe enjëftsemna orcá; pero chora ndoñe chca queochatóshjango. <sup>23</sup> Chora báseftanga mochántsemna: ‘Muentse entsemna’ o ‘Choca entsemna ca’; pero choye ndoñe šmatjá, ni šmatjúseto. <sup>24</sup> Er chë tojatcuinýe ora, ntšamo celoca catoica juachoica tojabuashinýinýenacá, chca echántsemna chë Bëngbe Bëtsá Entšá tbojanbemá quem luaroye chaojésabo te. <sup>25</sup> Pero natsana cha bontsemna puerte jasúfriana, y morsca entšangbiana uabotená jtsemnana.

<sup>26</sup> “Ntšamo Noé yojaniyena ora tojanopasacá, cachcá echanjopása chë Bëngbe Bëtsá Entšá tbojanbemá quem luaroye chaojésabo ora. <sup>27</sup> Chë tempo, entšanga imnasaye, imnofšëšnaye, imnóbouamnaye; natjëmbana imojtsiyëñe, y chca, natjëmbana imojtsomñe, Noé chë barquëshoye tojánamashënguëntscuana; pero chora uabouana uaftena tojánashjango y chë entšanga tojtsanapochocá. <sup>28</sup> Cachcá ntšamo Lot yojaniyena ora tojanopasacá: entšanga imnasaye, imnofšëšnaye, imnóbouamnaye, imojtsena, sananga imnajena y imnajebuana; <sup>29</sup> pero Lot Sodoma bëts pueblentšana tojëftsanbocna ora, Bëngbe Bëtsá tojanma celocana íñeshe y azufre chauaftema, y chentša entšanga tojtsanapochocá. <sup>30</sup> Cachcá echántsemna chë Bëngbe Bëtsá Entšá tbojanbemá chaojtonýná ora.

<sup>31</sup> “Chë tena, nda cachabe yebnentša tsbanánoca chaojtsemna, y chabe soyënga cach tsoca tojtseboamnëse, chocana ndoñe chaondëstajango chë soyënga jesabobocnama; y nda jajoca chaojtsemna, yebnoye ndoñe chaondëta. <sup>32</sup> Menójuabonga ntšamo Lotbe shémaftaca tojanopasama. <sup>33</sup> Nda tojtsentšena quem luarentše bëtscá jtseboamnana y atšbiana jasúfriana ndoñe tontseprontana, chë nýetsca tescama yomna tšabe vida echanjobuetše. Pero nda quem luarentša soyënga cachcá tojonýá atše juastama, masque chaóbana, chë nýetsca tescama yomna tšabe vida echántseboamna.

<sup>34</sup> “Atše cbëyana, chë ibeta, chë Bëngbe Bëtsá Entšá tbojanbemá chaojtonýná ora, útata canýe jutsněshañe bochántsemna; canýa mochanjesbetše y chë ínýana ndoñe. <sup>35</sup> Uta shembásata cánýiñe bochántsejanýcoye; canýa mochanjesbetše y chë ínýana ndoñe. <sup>36</sup> Uta boyabásata jajoca bochántsetrabajaye; canýa mochanjesbetše y chë ínýana ndoñe ca” —cha tojanéyana.

<sup>37</sup> Chora chë uatsjédayënga Jesús tmojantjá: —Utabná, ¿ndëmoca chca yochjopása ca?

Y cha tojanjú: —Chë obanabe cuerpo tojtsemnentše chë gallinacënga jootana ca.

## 18

### *Chë viudá y chë mandadbiama cuento*

<sup>1</sup> Jesús mēntśá tojanacuntá, entśanga jabuátambama, Bēngbe Bētsáftaca n̄yets tempo jtsencuéntayana yomnama, ainaniñe añemo jtsebomnama ndocna te ntjajbanacá. <sup>2</sup> Mēntśá tojánayana: “Can̄ye pueblentse can̄ye mandado inamna; chana ni Bēngbe Bētsábioye ndoñe bonjánebiauatja, ni entśanga yonjánayaunana. <sup>3</sup> Chë pueblentse can̄ye viudánaca inamna; chana can̄ye demanda yojánbomna. As chë mandádbioye yojobeconá y mēntśá ibojauyana: ‘Diosmanda atśbe uayayá motsecastigá ndayá šojaborlama ca.’ <sup>4</sup> Bayté chë mandado ndoñe yonjábosena chë viudábioye joyeunayama; pero chentśana cha yojenójuaboje: ‘Masque Bēngbe Bētsá ndoñe quetsátebiauatja, ni entśanga ndoñe quetsátayaunana, <sup>5</sup> pero quem viudá cada ora endabó causa, añe chanjóyeunaye, chabe uayayá chanjacastíga; ndoñesna cada te nandaboje y cabana ya šochanjanamēntśa ca.’”

<sup>6</sup> Chentśana Bēngbe Utabná tojánayana: “Smonjouena ntśamo chë ndoñe tśabá ama mandado yojayancá. <sup>7</sup> Y chca, ¿Bēngbe Bētsá chabe bocacánēnga ndoñe yochanjátsebacaye? Chēnga mora ín̄yengbe causa montsesufrina y cada te Bēngbe Bētsá mondbétseimpadana chaújabuachama. ¿Más chamuatobatmá ca yochjáuyana? <sup>8</sup> Atśe cbēyana, Bēngbe Bētsá betscó tśēngaftanga cmochanjátsebacaye, tśēngaftanga chë ín̄yengbe causa mora šmojtseufrínēnga. Pero chë Bēngbe Bētsá Entśá tbojanbemá chaojésabo ora, ¿cabá Bēngbe Bētsábeñe ošbuáchiyēnga quem luarentse entśanga yochján̄yena ca?” —Jesús tojánayana.

### *Chë fariseo y chë Romocama impuesto atjanayabiama cuento*

<sup>9</sup> Báseftanga imojtsanjuabná chēnga tśabe entśanga imnamna ca, pero chë ín̄yengbioye imojtsēbuayēnja; chíyeca Jesús mēntśá tojanacuntá jabuátambama: <sup>10</sup> “Uta boyabásata Bēngbe Bētsabe bēts yebnoye tbojána Bēngbe Bētsáftaca jencuéntama: can̄ya yojamna fariseo, y chë ín̄yana, can̄ye Romocama entśāngbioye impuesto atjanayá. <sup>11</sup> Chocna chë fariseo, tsanana Bēngbe Bētsábioye mēntśá ibojtsecuéntaye: ‘Bēngbe Bētsá, cbontsatschuaná atśe chë ín̄yengcá ndoñe quetsatsmēnama: atbēbanēnga, puerte bacna soye amēnga y shémbioye ín̄yaftaca íngñayēnga; y ni quem Romocama impuesto atjanayacá ndoñe quetsatsmēnama. <sup>12</sup> Atśe sēnduamana, ácaftaca jencuéntamna, can̄ye semaniñe uta soye tondaye ntjascá jtsemnana; y lempe stjon̄yenentśana, bnētsanentśana can̄ye soye acbiama sēndēquēcjná ca.’ <sup>13</sup> Pero chë Romocama impuesto atjanayana, bēnoca yojtsemna,

ni celoye ntjontješiyca, yojtsenócochjantšetaye y mēntšá yojtsichamo: ‘¡Atšbe Bětsá, šmotselastemá, atšajema bacna soye amá tsmēna causa ca!’ ”

<sup>14</sup> Chentšana Jesús tojánayana: “Atše cběyana, quem Romocama impuesto atjanayá chabe yebnoye tojtaná chabe bacna soyēngama perdonaná, pero chē fariseo ndoñe. Er nda cachá bētsá tojtsenobiamná, nduamaná mochántsebema; y nda cachá nduamaná tojtsenobiamná, aífne bētsá mochanjábema.”

*Jesús, basetémēngbiana Bēngbe Bětsábioye tbojanimpadá*  
(Mt 19.13-15; Mc 10.13-16)

<sup>15</sup> Entšanga imojanamana Jesúsbioye basetémēnga junatsana chauabájajuama, y Bēngbe Bětsábioye chēngbiana chaboimpadama; pero chē uatsjēndayēnga chca tmojáninýe ora, tmojanontsé chē basetémēnga unachayēnga jtsēcácanana.

<sup>16</sup> Pero Jesusna chē basetémēnga tojánachembo, y mēntšá tojánayana: “Cachcá mónýaye chē basetémēnga átšbioye chamuabo, y ndoñe matéuyanana; er Bēngbe Bětsabe amēndayana endmēna chē mo quem basetemēngcá imomnēngbiana. <sup>17</sup> Ndegombre cběyana, nda Bēngbe Bětsabe soyēnga ndoñe tonjóyēngacñe mo canýe basetemcá jtsošbuáchiyēse, cha ndoñe queochatobenaye Bēngbe Bětsabe amēndayoye jamashēnguama ca.”

*Canýe bomna entšá Jesúsbioye tojána*  
(Mt 19.16-30; Mc 10.17-31)

<sup>18</sup> Canýe mandayá Jesúsbioye tbojantjá: —Tšabe Buatēmbayá, ¿ndayá šojtsemna jamana chē nýetsca tescama yomna tšabe vida jtsebomnama ca?

<sup>19</sup> Y Jesús tbojanjuá: —¿Ndáyeca šcjauyana “tšabia ca”? Tšabia nýe canýa endmēna: Bēngbe Bětsá. <sup>20</sup> Aca condětatsēmbo ntšamo Bēngbe Bětsá tojanmandacá: “Acbe shema ínýtaca ndoñe cattseíngñaye, inýa ndoñe catjóba, ndoñe catjatbēba, ndoñe catjuaboínýena y acbe bētsétsata ndoñe stētšoye catjáquedaye ca.”

<sup>21</sup> Chora chē boyabása tbojanjuá: —Atše lempe chca básetema orscana sēndocumplina ca.

<sup>22</sup> Jesús chca tojanuena ora, tbojanियana: —Cabá canýe soye cmontsebuáshbena jamana: lempe ntšamo icobomncá cochjetsatobuiye, y chē crocénana, ndbomnējémēnga cocht-satšataye; chca, celoca canýe bēts bomnana cochántsebomna. Chentšana, cochjabo y šcochjuasto ca.

<sup>23</sup> Chē entšá chca tojanuena ora, puerta ngménaca yojtsemna, er cha corente bomná inamna. <sup>24</sup> Chca ngmená tbojáninýe ora, Jesús tojánayana: —¡Yapa totcá bomnēngbiana entsemna Bēngbe Bětsabe amēndayoye jamashēnguama!

25 Ndegombre, más paselo endmëna canÿe camello chë coshufjentša atëfjnëjana chauachnëngo, y ndoñe canÿe bomná Bëngbe Bëtsabe amëndayoye jamashënguana ca.

26 Chora, chë chca imojouenënga tmojánayana: —¿As nda yochjobenaye atsbočaná jtsemnana ca?

27 Y Jesús tojanëjua: —Ndayá entsanga ndoñe mondobena jamana, Bëngbe Bëtsá aíñe endobena jamana ca.

28 Chora Pedro, Jesúsbioye tbojaniyana: —Bëngbe Utabná, aca contsonÿá, bënga lempe chë fsëndbomna soyënga fsënjëseboshjona, y ácaftaca fsëntsajna ca.

29 Jesús chora tojanëyana: —Ndegombre cbëyana, ndánaca Bëngbe Bëtsábioye jaserviama, chabe amëndayama jtsabuayiyayëse, cachcá tojëftseboshjona chabe yebna, shema, catšátanga, bëtsëtsanga o básenga,<sup>30</sup> cha mora quem luarentše chë soyëngama más echanjóyëngacñe, y chë inÿe luarocna, chë nyetsca tescama yomna tšabe vida ca.

*Jesús cachiñe tojánayana cha jóbanama y jtayenama*

*(Mt 20.17-19; Mc 10.32-34)*

31 Jesús chabe bnëtsana uta uatsjëndayënga barie tojánachembo, y mëntsá tojanëyana: “Smontsetátšëmbo mora Jerusalenoye bënga montsajnama, y choca lempe echanjochnëngo ntšamo chë Bëngbe Bëtsabe juabna oye-buambnayënga, chë Bëngbe Bëtsá Entšá tbojanbemabiamama tmojanabemcá; <sup>32</sup> er choca cha chë ndoñe judiëngbe cucuatšiñe mochanjáboshjona, y mochantšáboyejuana, mochanjóyenguango, mochántsebuashëttoj; <sup>33</sup> y chamojátjanjentšana, mochanjóba, pero unga tianoye cha echántayena ca.”

34 Chë uatsjëndayënga tondaye tonjanësertá, ni montsetátšëmbo ndayá bëtsemnana ntšamo Jesús yojtšëtsëtsnacá, er chëngbiamama yojamna josértama ndopodena soyënga.

*Jesús, Jericó pueblaca canÿe jtanábioye tbojanshná*

*(Mt 20.29-34; Mc 10.46-52)*

35 Tojanopasá, Jesús Jericó pueblöye yojtsebëconaye ora, canÿe jtaná benache juachañe inatbemana, lemošna ot-janañe. <sup>36</sup> Entšanga chëjana imojtsachnëjuanama tojanuena ora, yojanotícia ndayá yojtšopasana ca, <sup>37</sup> y chë entsanga tmojaniyana, —Jesús Nazaretocá entsebeconá ca.

38 As cha yojontšë uayebuáchana: —¡Jesús, Davídbentšana Entšá, šmotselastemá ca!

39 Chë natsana imojtsajñënga chë jtaná imojtsácacana, iytëca chaóbemama; pero cha más yojtšáyebuache: —¡Davídbentšana Entšá, šmotselastemá ca!

<sup>40</sup> As Jesús tojantsá y tojanmandá cha chamobetšama. Cha ya bécoñe yojtsemna ora, Jesús tbojantjá: <sup>41</sup> —¿Ndayá cojtseboše atše acbiama chjamama ca?

Y chë jtaná tbojanjúá: —Atšbe Utabná, atše sëntseboše chašuatábínýnama ca.

<sup>42</sup> Chora Jesús tbojaníyana: —Matinýe, Bëngbe Bëtsábeñe betsošbuachéyeca shnaná contsatsmëna ca.

<sup>43</sup> Y cachora cha tšabá ibojtabinýna, y Jesúsbioye ibojtsëstona, Bëngbe Bëtsá atschuanaye. Y nyëtsca entšanga, chca tmojáninýe ora, Bëngbe Bëtsá imojtsatschuanaye.

## 19

### *Jesús y Zaqueo*

<sup>1</sup> Jesús Jericó puebloca tojánashjango ora, chë pueblëjana cha yojtsachnějuana. <sup>2-3</sup> Chora, canýe bomna entšá, chë Romocama entšanga impuesto atjanayëngbe amëndayá, Zaqueo ca uabainá, yojtseboše Jesús jinýama. Pero ndoñe yontsobena jinýama, bëtscá entšanga causa y cha becuá inamna causa. <sup>4</sup> Chcasna, cha betscó natsanoye tojaftsanótjajo y canýe sicomoro betiyeshoye tojánašëngo, chca, Jesús chëjana tojtsachnějuana ora, jinýama jobenayama. <sup>5</sup> Jesús chë betiyeshoye tojánashjango ora, tsbanánoye tojanontješé y Zaquéobioye tbojáninýe. As Jesús tbojaníyana: “Betsco chocana matastjango, Zaqueo, er mënté chanjá acbe yebnoye jatema ca.”

<sup>6</sup> Chora Zaqueo betscó tojtjanastjango y chentšana puerte oyejuayá Jesúsbioye tbojanofja. <sup>7</sup> Entšanga chca tmojáninýe ora, tmojanontšé Jesusbe contra mëntšá ichámuana: “Jesús tonjá canýe bacna soyënga amabe yebnentše jatema ca.”

<sup>8</sup> Chora Zaqueo tojantsá, Bëngbe Utabná Jesús bentše, y mëntšá tbojaníyana: —Mouena, atšbe Utabná, atšbe bomna soyënguentshana tsëntsañe ndbomnějëmënga chanjátšataye y nda más crocénana tijëftseyëngacá, chë ntsachetšá tijëftsefcama canta soye más chantoyiye ca.

<sup>9</sup> As Jesús tbojaníyana: —Mënté, aca acbe bacna soyënguentshana atsbocaná contsemna, er Zaqueo, ácnaca Abrahábentšana entšá condmëna. <sup>10</sup> Er chë Bëngbe Bëtsá Entšá tbojanbemá tojabo chë pochocánënga jtsemnama imojtsajnënga jabëtsanguanguama y jabátsebacama ca.

### *Chë crocénánama cuento* (Mt 25.14-30)

<sup>11</sup> Entšanga chë soyënga imojtsuenana, y Jesús inýe soye tojanacuntá jabuátambama, er cha ya Jerusalén béconana yojtsemna, y entšanga imojtsejuabnaye chë Bëngbe Bëtsabe amëndayana ya yochjanóshjango ca.

<sup>12</sup> Jesús tojanéyana: “Canýe luarentša uámana entšá inýe bën luaroye yojá, cachabe luarentša rey chamobemama y chentšana cachábioye jtama. <sup>13</sup> Cabá nda ora, chabe bnétsana oservénënga yojáchembo y bëtscá crocénana cada cánýabioye yojéftsayentšbuachiye, y mëntšá yojéftséyana: ‘Quem crocenánaca trato šmochjábema atše candëtabëntscuana ca.’ <sup>14</sup> Pero cachabe luarentša entsanga cha imojuáya, as chëngna básefta entsanga imojichamuá chë inýe bën luaroca mëntšá chamuayanama: ‘bënga ndoñe queftsátsoše cha bëngbe rey chaotsemnana ca.’

<sup>15</sup> “Pero pronto chë luarentša rey cha imojábema. Y chë luaroye yojtá orna yojamánda chë crocénana yojéftsayentšbuáchenga chamobéconama, jtsetatšëmbuama ntsachetšá cada ona chë crocenánaca yojongánama. <sup>16</sup> Chë natsaná yojáshjango y yojayana: ‘Taita, acbe crocénana bnétsana soye más tonjoboté ca.’ <sup>17</sup> Y chë rey ibojojuá: ‘Tša tšabá, tšabe oservená. Aca quem base soyiñe ntšamo tbojamandacá tšabá tcojámayeca, bnétsana pueblentša mandado chacotsemnana cbojayé ca.’ <sup>18</sup> Chentšana inýa yojáshjango y yojayana: ‘Taita, acbe crocénana shachna soye más tonjoboté ca.’ <sup>19</sup> Y chë rey ibojauyana: ‘Acnaca shachna pueblentša mandado cochántsemna ca.’

<sup>20</sup> “Chorna inýa yojobeconá y mëntšá yojayana: ‘Taita, muentše acbe crocénana entsatsmëna; canýe pañuelëjuañe bonguana sëntsejajo. <sup>21</sup> Atše acbiama uatjana šonjuábuache, er aca canýe tšátjaye entšá condmëna; aca chë ndoñe condbuajonentšana jocñana y chë ndoñe tconjajé luarentšana jaja saná jobuátbanana ca.’ <sup>22</sup> As chë rey ibojauyana: ‘Bacna oservená, cach acbe palabrëngaca chanjínýanýiye aca ndoñe tšabá tconjamama. Atše chë ndoñe sëndbuajonentšana jocñana y chë ndoñe sënjajé luarentšana jobuátbanana tsuamanama icojátatšëmbëse, <sup>23</sup> ¿ndáyeca ndoñe tconjá chë crocénana bancoca jetsobuájuama, y atše camoye matijtabo ora, mašctoyé chë crocénana y chë chentšana tojoboté crocénanënaca ca?’ <sup>24</sup> Y chë chentše imojtsemna entsanga yojáuyana: ‘Chë crocénana motseboca y chë bnétsana soye más tojabotébioye chana motsatšetá ca.’ <sup>25</sup> As chënga imojojuá: ‘¡Pero cha ya bnétsana soye más entsebmna ca!’ <sup>26</sup> Y chë rey yojójua: ‘Atše cbëyana, nda tojtsebmónábioye, más mochanjátšetaye; pero nda tondaye tondbmónábioye, chë tojtsejuabná batšatema yobomna sóynaca mochántseboca ca. <sup>27</sup> Y chë atše uayayënga, chë chëngbe rey atše chaitsemnana ndoñe monjánbošëngna, moye mënatse y atšbe delante šmochtsëbaye ca’ ” —cha chora yojayana.

*Jesús Jerusalenoye tojánashjango**(Mt 21.1-11; Mc 11.1-11; Jn 12.12-19)*

28-29 Chca tojéftsanayana chentšana, Jerusalenoye yojétsaye ora, Jesús tojánashjango canye tjashoye, Olivos ca uabáiniñe, Betania y Betfagé pueblënga béconana. Chora, uta chabe uatsjéndayata tojanichamó, <sup>30</sup> mëntšá jáuyanëse: “Tsëndatbe natšana entsemna base pueblotémoye motsata. Chašojáshjango ora, canye burrotema utsbuaná šochanjínÿena. Chábeñe cabá ndocná tonjenojayé. Sochjuajafjoná y šochjuánatse. <sup>31</sup> Y nderado nda ndáyeca šojtsajafjná ca chacmojátjasna, šochjauyana: ‘Bëngbe Utabná bontsájaboto ca.’ ”

<sup>32</sup> Chë uatsjéndayata tbojána y lempe ntšamo Jesús tojanëyancá tbojáninÿena. <sup>33</sup> Y chë burrotema imojtsajafjná orna, chë burrotema nduiñënga tmojanëyana: —¿Ndayeca chë burrotema šojtsajafjná ca?

<sup>34</sup> Chora chata tbojánayana: —Bëngbe Utabná bontsajabótoyeca ca.

<sup>35</sup> Chentšana Jesúsbioye chë burrotema tmojanánatse, y chë burrotémbeñe chatbe entšayá tbojanájatse, y chábeñe Jesús tmojanenjayé. <sup>36</sup> Y cha yojtsachñëjuana ora, entšanga chëngbe entšayá benachëjana imojtsëtétsatsana.

<sup>37</sup> Olivos tjashe tsmanoye yojtsebeconá ora, chë bëtscá entšanga, Jesúsbeñe ošbuáchiyënga, tmojanontšë uayebuáchana y Bëngbe Bëtsá oyejuayënga jëtschuayana, Bëngbe Bëtsabe obenánaca bëts soyënga Jesús tojanmama. <sup>38</sup> Chënga mëntšá imojtsichamo: “¡Corente bendición bomná chaotsemna, chë Bëngbe Utabnabe obenánaca tojabo Rey ca! ¡Celoca tšabá entsemna! ¡Bëngbe Bëtsá matschuanga ca!”

<sup>39</sup> Chë entšanguentše básefta fariseunga imojtsemnënga, Jesús tmojanianya: —Buatëmbayá, acbe ústonënga męcácana chca ndoñe chamondëtsáyebuachama ca.

<sup>40</sup> Pero Jesús mëntšá tojanëjua: —Ndegombre cbëyana, mënga iytëca tmojobiamëse, chë ndëtšbenga muanjuayebuáchena ca.

<sup>41</sup> Jesús Jerusalén béconana tojánashjango, y chë bëts pueblo tojáninÿe ora, chentša entšangbiana tojánenobošachna. <sup>42</sup> Y mëntšá tojánayana: “¡Malaye šmëntsetátšëmbo, nÿe mo mënténaca, ndayá yojtseita tšëngaftangbeñe lempe tšabá chaotsomñama! Pero mora chë soye tšëngaftangbe bominÿama entsëtëmëna. <sup>43</sup> Er Jerusalenoca bacna tenga echanjóshjango; chora uayayënga chentša shëconánëjana canye tapiëse mochantsepórma, mochantsejëtja y nÿetsca juachoicana mochanjontšë tšëngaftanga jtsatsejana, <sup>44</sup> y lempe mochantsepochóca. Muentša oyenënga mochantšëbaye, y ni mo canÿe ndëtšbé inÿebé juatsboca quemochaiseboshjona,



chë Bëngbe Bëtsá tšëngaftanga játsebacama tojabo ora, ndoñe chešmatoyeuná causa ca” —Jesús tojánayana.

*Jesús, Bëngbe Bëtsabe bëts yebnentšana enënga y obuámnayënga tojtanëbuacna*

*(Mt 21.12-17; Mc 11.15-19; Jn 2.13-22)*

<sup>45</sup> Chentšana, Bëngbe Bëtsabe bëts yebnoye Jesús tojánamashëngo y tojanontšé chë chentše imojtsenënga chentšana jtëbuacnana, <sup>46</sup> y tojanëyana: “Bëngbe Bëtsá chabe uabemana palabrenguine tojayana: ‘Atšbe bëts yebna echántsemna átšeftaca encuéntaye yebna ca’, pero tšëngaftangna, atbëbanëngbe oyeniñe chë yebna šmojtsebema ca.”

<sup>47</sup> Y cada te, Bëngbe Bëtsabe bëts yebnentše Jesús entšanga vojtsabuátambaye; y bachnangbe amëndayënga, ley abuátambayënga y chë pueblentša mandayëngnaca imojtsenguaye ntšamo jamëse cha jóbana. <sup>48</sup> Pero ndoñe tmonjáninÿena ntšamo, er nÿetsca entšanga corente imojtseyeunana ntšamo cha vojtsoyebuambnacá.

## 20

*Jesusbe obenana*

*(Mt 21.23-27; Mc 11.27-33)*

<sup>1</sup> Canÿe te, Bëngbe Bëtsabe bëts yebnentše Jesús vojtsabuátambaye, y chë tšabe noticiëngama vojtsabuayiyná ora, tmojánashjajna bachnangbe amëndayënga, ley abuátambayënga, judiëngbeñe bëtsëjemëngcá mandayëngaftaca cánÿiñe; <sup>2</sup> y Jesús tmojanianyana: —Smëyana; ¿ndaye deréchoca chë contsama soyënga aca cojtsama ca? o ¿chca jtsamama nda obenana tcmënjatšetá ca?

<sup>3</sup> Chora Jesús tojanëjua: —Atšnaca canÿe soye sëntsebmna tšëngaftanga jatjayama. Smochjojuanga. <sup>4</sup> ¿Nda Juan chë Ubayaná tbojanichmó entšanga jubáyama, Bëngbe Bëtsá o entšanga ca?

<sup>5</sup> Chora chënga tmojanontšé enatsëtsnayana: “ ‘Bëngbe Bëtsá ca’ chamojojuase, cha šochanjáuyana: ‘As ¿ndáyeca chábeñe ndoñe šmonjanošbuaché ca?’ <sup>6</sup> Y ndoñe quemuátobena jayanana ‘entšanga ca’; entšanga ndëtsbéngaca buattsëbaye, er nÿetscanga becá mondëjuabná Juan ndegombre Bëngbe Bëtsabe juabna oyebuambnayá yojamnama.” <sup>7</sup> Chcasna, chënga tmojanjuá ndoñe monjántatšëmbo nda Juan tbojanichmó entšanga jubáyama ca.

<sup>8</sup> Y Jesús tojanëyana: —Asna atše cach ndoñe quebochatëyana ndaye deréchoca chca stsama ca.

*Chë puerte bacna trabájayëngbiana cuento**(Mt 21.33-44; Mc 12.1-11)*

<sup>9</sup> Chentšana Jesús tojanontsé entsanga jáuyanana, y quem cuéntoca tojanabuatambá: “Canýe entsá uvas betiyënga yojáje y chë fshantse inýe trabájayënga yojúyentsame, y baytescama bën luaroye yojtsoñe. <sup>10</sup> Chë uvasësangá juashacama tempo yojobuache orna, chë jajañe nduiño canýe oservená ibojíchmua chë trabájayënga jáuyanama ntsachetsá cha ibojtsotocánama. Pero chëngna cha imojtsejantsetaye, y tondaye ntoyiyá imojtichmuá. <sup>11</sup> Chentšana inýa ibojíchmua; pero chë trabájayënga cha imojtsejantsetaye, imojtsóyenguango, y tondaye ntoyiyá imojtichmuá. <sup>12</sup> Chë nduiño inýa ibojatichmuá; pero chánaca chënga imojtsejantsetaye, imojtselísia, y chentšana imojtábocna.

<sup>13</sup> “Chora chë nduiño yojeniyana: ‘¿Y mora ntšamo chjama ca? Cach atsbe bonshana uaquiñá chanjíchmua; nderádose cha aíñe mochanjóyeunaye ca.’ <sup>14</sup> Pero chë trabájayënga, chë uaquiñá imojinýe orna imojeniyana: ‘Mua chë fshantse nduiñbe uaquiñá entsemna. Lempe chabe soyënga mua echanjóyëngacñe; motsóbanga y nyetsca chabe otocana soyënga bëngbiana echanjoquéda ca.’ <sup>15</sup> Chcasna, chë uvas jajañentsana cha imojtsábocna y imojtsóba.”

Chora Jesús tojanatjá: —Y asna, ¿ntšamo šmojtsejuabná, ndayá chë jajañe nduiño chë trabájayëngaftaca yochjama ca? <sup>16</sup> Cha co echanjá y chë trabájayënga echanjetsëbaye, y chë uvas betiyënga jajañe inýe trabájayënga echanjárrendaye ca.

Chë entsanga chca tmojanuena ora, tmojánayana: — ¡Bëngaftaca ndocna te chca chaondopasá ca!

<sup>17</sup> Pero Jesús tojanënyanyé y tojánayana: —As ¿ndayama Bëngbe Bëtsabe uabemana palabrenguiñe iuayana?: Chë yebna jebuanënga tmojtsanaboté ndëtsbé, mora chë más bëts uashacuanësentse entsejájona ca.

<sup>18</sup> Ndánaca chë ndëtsbeñe chaojotsatsá, chëbé bochántsatcacaye; y chë ndëtsbé ndábeñnaca chaojótatsë, polvëshe bochántsebema ca —Jesús tojánayana.

<sup>19</sup> Chë bachnangbe amëndayënga y ley abuátambayënga tmojanenótatsëmbona Jesús chca tojanacuntá jinýanýiyama, chënga mo chë puerte bacna trabájayëngcá imojamnana; asna tmojánbošena cachora jishachana, pero entsangbiana imojtsauatja.

*Chë Romoca bëts mandadbiana impuesto jtsat-squëcñayama*

*(Mt 22.15-22; Mc 12.13-17)*

<sup>20</sup> Chentšana chënga báseftanga tmojanichamó, mo ndegombre tšabe entsanga cuaftsemncá chamobiamëse, Jesús

jisháchichiyama, nderado ndayá cha tojayaniñe; y chca chënga jobenayama cha jishachana y chëngbe mandádbioye juanatsama. <sup>21</sup> As chënga tmojantjá: —Buatëmbayá, bënga fsëntsetatšëmbo ntšamo aca cojtsoyebuambná y cojtsabuatambacá ndegombre tšabá yomnama, ntšamo ndegombre Bëngbe Bëtsá yobošcá, y acbiama tondaye quenatámana nda más uamaná o nduamaná tomnana. Aca contsabuatambá ndegombre tšabe vida jtsebmnama, ntšamo Bëngbe Bëtsá yomandacá. <sup>22</sup> Chcasna, šmëyana, ¿tšabá tajojtsemna bënga, César, chë Romoca bëts mandadbiama, impuesto jtsatšquëcjnyana o ndoñe ca?

<sup>23</sup> Jesús yojtsetatšëmbo, ntšamo cha tojayaniñe jisháchichiyama chënga imojtsebošama; as tojanëyana: <sup>24</sup> — Chë šmatsquëcjná crocénana šminÿinÿenga ca; ¿ndabe jubiá chë crocénaniñe yojtsemna, y ntšamo muentše entsabemancá nda chca iuabaina ca?

Y chënga tmojanjuá: —Césarbe jubiá; cha chca enduabaina ca.

<sup>25</sup> Y Jesús tojanëyana: —César šmoctoyiye cha ibotocana soye; y Bëngbe Bëtsana cha ibotocana soye ca.

<sup>26</sup> Y chca, chë ichmónënga ndoñe imonjobenaye jisháchichiyana, ndayá cha entsangbe delante tojayaniñe. Masna, ntšamo tojanëjuama, ojnánänënga iytëca imojbiama.

*Obanënga jtayenama Jesús tmojantjá*  
(Mt 22.23-33; Mc 12.18-27)

<sup>27</sup> Chentšana, báseftanga saduceo ca uabaina entsanga tmojána Jesús jinÿama. Chënga imojanjuabná obanënga ndocna te ntayenana ca. Jesús mëntšá tmojantjá: <sup>28</sup> — Buatëmbayá, Moisés bëngbe leyënguñe tojëftsanabema, nderado canÿe boyá tojtsóbana y básenga ndoñe tonjëftsabáshejuanësna, canmëna chë uabentsá chë shémaftaca jtobouamayana, chca, chë chabe uabochená obanabiama básenga jtsabamnama ca. <sup>29</sup> Chcase, canÿe bëngbentše canÿsëfta catšátanga monjamna. Chë natsaná tonjanobouamá y tontsanóbana, básenga ntjëftsabashejuancá; <sup>30</sup> chentšana chë inÿa chë shémaftaca tonjanobouamá, y cachcá tonjanopasá. <sup>31</sup> Chë inÿe uabentsá chora cháftaca tonjanobouamá, pero tontsanóbana básenga ntjëftsabashejuancá; y cachcá, chë inÿe uabentsëgnaca cháftaca tmonjanobouamá, pero nyetscanga tmonjanóbana básenga ntjëftsabashejuancá. <sup>32</sup> Cabana, chë shembásanaca tontsanóbana. <sup>33</sup> Y chcasna, chë obanënga chamojtayena ora, ¿ndabe chë canÿsëfta catšatanguentsabe shema chë shembása yochtsemna, nyetscanga cháftaca tmonjanobouamase ca? —chënga tmojantjá.

34 Chora Jesús tojanējua: —Quem luarentše boyabásenga y shembásenga mondbétsobouamnaye; 35 pero chë echanjóshjango luaroye jama y obanënguentsana jtayenama merecido jtsebuájonama chamojobenangna, masque boyabásenga o shembásenga, ya ndoñe quemochatóbouamnaye, 36 ni queochátopodena chënga chamóbanama, y chca, chënga mochántsemna mo angelëngcá, y Bëngbe Bëtsabe básenga mochántsemna, obanënguentsana mochtayénayeca. 37 Y Moisésnaca, chë yojsángbototjuana betiyetémama tojanábementše, bënga šontsinýanýná chë obanënga imnátayenama; chentše Bëngbe Bëtsá tojánayana cha yomna Abraham, Isaac y Jacobëbe Bëtsá ca. 38 Bëngbe Bëtsá chca tojánayana ora, entsichamo cha ndoñe yondmëna obanëngbe Bëtsá, sinó aina entsangbe Bëtsá ca, er masque chënga tmojanóbana, chënga cabá Bëngbe Bëtsáftaca mondoyena ca —Jesús tojánayana.

39 Chora básefta ley abuátambayënga Jesús tmojanianya: —Buatëmbayá, tšabá tcjayana ca.

40 Y ya ndoñe más montsenñémua inýe soyëngama jatstjanayana.

*¿Cristo ndabe entsábentsana yomna?*

*(Mt 22.41-46; Mc 12.35-37)*

41 Jesús tojanatjá: “¿Ndáyeca tšëngaftanga šmnétsichamo chë Uámana Uabuayaná, chë Cristo, Rey Davidbentsana iuabó ca? 42 Er cach David, chabe librëšañe Salmos ca uabainëšañe, tojánayana:

Bëngbe Bëtsá, atšbe Utabná Crístbioye tbojanianya:

‘Atšbe catšbioica mótbema,

43 atšbe obenánaca, acbe uayayënga acbe cucuatšinë chamoquedama chjamëntscuana ca.’

44 ¿Ntšámose, Cristo, Davídbentsana nántsemna, cach David ‘Utabná ca’ chábioye tbojtsabobuátmëse ca?” —cha tojanatjá.

*Jesús chë ley abuátambayëngbiana tojánayana chënga ndoñe tšabá montsama ca*

*(Mt 23.1-36; Mc 12.38-40; Lc 11.37-54)*

45 Nýetsca entsanga imojtsuenana, y Jesús chabe uatsjëndayënga tojanējyana: 46 “Cuedado šmochtsebomna, y ndoñe šmattsama chë ley abuatambayëngcá; chënga jtsogusetánana bënëna entsayangaca jtsajnana, y jtsebošana tsáshenañe entsanga becá respétoca chamotsacheuanayama. Chënga chë judiëngbe enefjuana yebnënguenache chë más uámana luarënguñe jtsetbiámanana, y fiestënguñe nýa quëfseroca. 47 Pero chë viudángbioye chë tmobomna soyënga jtsabacayana; y entsangbe delante tšabá chacmotsénýama y chënga imojtsaíngñama ndoñe chaondëtsótatsëmbuamna,

Bëngbe Bëtsáftaca tša jtsencuéntayana. Chë causa, Bëngbe Bëtsá ínÿengbiana más chënga echanjácastigaye ca” —Jesús tojánayana.

## 21

*Jesús yojtsënyaye chë crocénana quëcnyâyënga*  
(Mc 12.41-44)

<sup>1</sup> Bëngbe Bëtsabe bëts yebnentse, Jesús yojtsënyaye chë bomnënga crocénana jtsequëcnyayana chë crocénana quëcnyâyëtémiñe; <sup>2</sup> y canÿe viudá ndbomnjéjmnaca tbojáninÿe, uta crocénana chëtémiñe yojaftseseGORá. <sup>3</sup> Chora Jesús tojánayana: “Ndegombre cbëyana, quem viudá ndbomnjëma, Bëngbe Bëtsabiana nÿetscangbiana más becá tonjëftseseGORá; <sup>4</sup> er nÿetscanga tmonjëftseseGORá chë yojtsóyentsjamentsana, pero chana, masque tša ndbomnjëma, cha vida jtsebomnama lempe ntsachetšá yobomncá tonjëftseseGORá ca.”

*Jesús tojánayana Bëngbe Bëtsabe bëts yebna lempe mochjápochocama*  
(Mt 24.1-2; Mc 13.1-2)

<sup>5</sup> Báseftanga imojtsichamo chë Bëngbe Bëtsabe bëts yebnama, tša yojtsebotamanana puerta uámana ndëtsbéngaca y chë entšanga imoJanamana juambana Bëngbe Bëtsábioye uátsëmbona soyëngaca ca. As Jesús tojánayana: <sup>6</sup>—Canÿe tempo echanjóshjango, y lempe ntšamo mora muentše šmontsonÿacá tondaye queochatoquéda, ni mo canÿe ndëtsbé inÿebé juatsboye. Lempe mochantsepochóca ca.

*Ntšamo yochtsemna quem luare jopochócama te chaojt-sobeco ora*  
(Mt 24.3-28; Mc 13.3-23)

<sup>7</sup> Chora chënga tmoJantjá: —Buatëmbayá, ¿ntseco chca yochjopása? ¿Y ndayá Bëngbe Bëtsá yochjama, chca jopásama yoJtsobecuama entšanga chamotsetatšëmbuama ca?

<sup>8</sup> Y Jesús tojánayana: —Cuedado šmochtsebomna ndocná chacmondáingñema. Er banga mochanjabo y mochantšabíchamo chënga atše imomna ca. Mochántšichamo: “Atše chë Cristo sëndmëna”, y “Mora chë tempo entsemna ca”. Pero ndoñe šmatjóyaunaye. <sup>9</sup> Y tsëngaftanga, entšanga imojtsentsjanama y entšanga mandadëngbe contra imojtsemnama chašmoJtsuenana ora, ndoñe šmattsauatja, er entseyta natsana chë soyënga chaohnëngo; pero masque chca, chë quem luare jopochócama tempo cabá ndoñe queochátsmëna ca.

<sup>10</sup> Y mëntšánaca Jesús toJanëyana: “Canÿe luarentša entšanga, inÿe luaroca entšángaftaca mochantšentsjanaye; y canÿe amëndayábentša entšanga, inÿe amëndayábioca

entšangaftácnaca. <sup>11</sup> Ba luarënguïñe jabuache echanjuangmëmana, bëts shëntsana, y entšanga pochócaye šocanënga echanjóshjango; y celoca echántsemna puerte uabouana soyënga y bëts soyënga, entšanga jinÿanÿiyama quem luare ya yochtsopochócama.

<sup>12</sup> “Pero cabá ndoñe chca chaondochnëngo ora, tšëngaftanga cmochanjíshëche y chašmosufrima mochántsama; bënga judiëngbe enefjuana yebnëngoye cmochanjunatse játsetšenama y cárceloynaca cmochanjáutame, y reyënga y mandadëngbióynaca cmochanjunatse, atšbe ústonënga bëtsemna causa. <sup>13</sup> Chca šmochanjapása, ntšamo atšbiamá šmotatšëmbcá chënga chašmëyanama. <sup>14</sup> Natsana ndoñe šmatjátsjuabnaye jenëuyanama ntšamo chora jóyebuambayana, <sup>15</sup> er atše chanjama puerte tšabá y osertanáncaca tšëngaftanga chašmóyebuambama; y chca, tšëngaftangbe uayayënga ndoñe quemochatobenaye jayanana ndoñe tšabá šmontsichamo ca, y ndocá jojuama quemochatobenaye. <sup>16</sup> Pero uayayëngbe cucuatšïñe cmochanjábashejuana cach tšëngaftangbe bëtsëtsanga, catšátanga, pamíllanga y amiguënga; y tšëngaftanguentšana báseftanga cmochantsëbaye. <sup>17</sup> Y nÿetsca entšanga cmochantsëbuayënja, atšbe ústonënga bëtsemna causa. <sup>18</sup> Pero tšëngaftangbe bestšašentsana ni mo canÿe stjënëja quecmochátabajajo. <sup>19</sup> Tšëngaftanga nÿets tempo átšbeñe ošbuáchiyënga chašmojtsemnëse, chë nÿetsca tescama yomna tšabe vida šmochántsebonna ca.

<sup>20</sup> “Jerusalén nÿets shëconana soldadënga chašmojanÿe ora, šmochtsetátšëmbo Jerusalén jopochócama tojobuáchama. <sup>21</sup> Chorna, chë Judeoca oyenënga batsjabengoye chamot-sacheta; Jerusalemntše chamojtsemnënga, chentšana chamuaisebocana; y chë jajenache chamojtsemnëngna, Jerusalemoye ndoñe chamondésamashjna. <sup>22</sup> Er chora echántsemna chë entšangbe jabuache castigo; lempe ntšamo Bëngbe Bëtsabe uabemana palabrenguïñe endayancá chora echanjochnëngo. <sup>23</sup> ¡Tša lastema chë tempo shembásenga ngomámanëngbiamá o ochóchaye básenga chamojtsabamnëngbiamá! Er chora corente ngmënaná quem luarentše echántsemna, y quem luarentša entšangbiamá chë uabouana castigo. <sup>24</sup> Inÿënga espadëjaca mochanjóbana, y ínÿëngbioye nÿetsca luarënguëjana utámenënga mochanjunatse; y chë ndoñe judiëngna, Jerusalemoca entšangbioye mochántsatsejaye y mochantsëbaye, chca chaotsemnana Bëngbe Bëtsá tojalesenciantscuana ca” —Jesús tojánayana.

*Bëngbe Bëtsá Entšá tbojanbemá quem luaroye echanjésabo  
(Mt 24.29-35, 42-44; Mc 13.24-37)*

25 Měntśánaca Jesús tojánayana: “Chora bėts soyėnga echantsinŷna shinŷiņe, juashconiņe y estrellėnguiņe; y quem luarentśa entśanga tśa mochántsausatja, ndayá jamama ntsetatśėmbcá, chė mar bėjaye y olėshėnga corente echantsefshauenana causa. 26 Entśanga echantsabuátėcja tśa auatja causa y ndayá quem luariņe yochjopásama enócochinŷena causa; er chė quem luarentśa tsbanánoca espíritėnga obenana bomnėnga echanjángmėmana. 27 Y chora entśanga mochanjinŷe, chė Bėngbe Bėtsá Entśá tbojanbemá jantśetėshiņe echántsaboye, puerte obenánaca y corente buashinŷinŷaniņe. 28 Chė soyėnga jochnėnguama chaojoboatśé ora, añemo śmochjentśetaye y bestśaše játsbanase śmochjarrepára, er chora echántsemna chė tśėngaftangbe atsebacayana ca” —Jesús tojánayana.

29 Měntśánaca Jesús tojanėyana jabuátambama: “Śmochjinŷe canŷe higo betiye o ndaye inŷe betiynaca. 30 Tojtsaisėjotsanama śmojinŷe ora, jtsetatśėmbuana chė tśabe tempo ya yojtsaisobecuama. 31 Cachcá, chė soyėnga yojtsėchnėjuanama chaśmojinŷe ora, śmochtsetátśėmbo chė Bėngbe Bėtsabe amėndayana ya yojtsobecuama.

32 “Ndegombre cbėyana, lempe chca echanjochnėgo, morsca entśanga cabá ndóbana ora. 33 Celoca y quem luare echanjopochóca, pero atśbe palabra ndocna te queochaisopochóca.

34-35 “Cuedado śmochtsebomna y ndoņe śmatjalesėncia tśėngaftangbe ainana bacna juabnėngaca chaotsemnama, jenomándama ntsobencá mocá enobuena causa, tmoye causa y nŷe quem luarentśa soyėngama enócochinŷena causa; y tśėngaftanga prontánėnga śmochtsemna, nŷe ndeolpe chė te chaojobuache ora; y tśėngaftanga ndėprontánėnga ndoņe chaśmondėtsemna, mo tśėngaftangbiana canŷe uachmaniņe cuaftsemncá. Er nŷetsca quem luarentśa entśangbiana chca echántsemna. 36 Cuedado śmochtsebomna y yejuana śmochtsantjeśna; nŷe ntseco órnaca Bėngbe Bėtsáftaca śmochtsencuėntaye, chca, chė echanjopása soyėngama jótsbocama chaśmobenama, y chė Bėngbe Bėtsá Entśá tbojanbemabe delante jashjanguama ca” —Jesús tojanėyana.

37 Jesús, bnėté Bėngbe Bėtsabe bėts yebnentśe yojánabuatambaye, y ibetna, Olivos uabaina tjashoye yojánaye joquėdama. 38 Y nŷetsca entśanga cabá cachėse Bėngbe Bėtsabe bėts yebnoye imojánajna Jesús joyeunayama.

## 22

*Entśanga tmojanjuabó ntśamo jamėse Jesúsbioye*

*jishachama**(Mt 26.1-5, 14-16; Mc 14.1-2, 10-11; Jn 11.45-53)*

<sup>1</sup> Ya yojétsobeco Bashco fiesta, chë levadúraca ndëpormana tandëse saye fiesta, chë Bëngbe Bëtsá Egiptocana judiëngbe bëts taitanga tojánatsebacama jtenójuaboyama. <sup>2</sup> Chë bachnangbe amëndayënga y ley abuátambayënga imojtsenguaye ntšamo jamëse Jesús jóbana, pero entšangbiama imojtsauatja.

<sup>3</sup> Chora Satanás, Judas chë Iscariote ca uabobuatmabe ainaniñe bacna juabnënga tojanjajó. Chánaca yojamna chë bnëtsana uta uatsjendayënguentsá; <sup>4</sup> y tojána, chë bachnangbe amëndayënga y Bëngbe Bëtsabe bëts yebnoca soldadëngbe amëndayëngaftaca jencuéntama, ntšamo Jesús chëngbe cucuatsiñe jayentšbáshejuanama. <sup>5</sup> As chënga imojóyejuaye, y Judas tmojanšbuachená crocénana chama jtatšetayana. <sup>6</sup> Y Júdasna aíñe ca tojánayana; y cach orscana cha yojtsenguaye ntšamo jamana y ndëmua ora Jesús chëngbioye jayentšbáshejuanama, ndocna entšanga ora.

*Jesús chabe uatsjëndayëngaftaca Bashco saná tojanse**(Mt 26.17-29; Mc 14.12-25; Jn 13.21-30; 1 Co 11.23-26)*

<sup>7</sup> Chë Bashco fiesta ora tojanóshjango, chë levadúraca ndëpormana tandëse sayté; chë te yojamna, Bëngbe Bëtsá jëtschuayamna canye oveshá jóbana chora jasama. <sup>8</sup> As Jesús, Pedro y Juánbioye tojanëyana: —Motsata y saná šochjaprónta Bashco fiestama bënga mochjasama ca.

<sup>9</sup> Chora chata tbojantjá: —¿Ndëmoca cojtseboše chë saná fchjapróntama ca?

<sup>10</sup> Y Jesús tojanëjua: —Jerusalenentše chašojámashëngo ora, canye bacó cmochanjóbiatše, matbajiñe búyeshe echantsabuyambaye. Cha šochjuasto, y šochtsonýaye ndëmuanýe yebnentše cha yochjámashënguama; <sup>11</sup> y chentša nduiño šochjauyana: “Chë Buatëmbayá šonjichamó aca jauyanama: ‘¿Ndayentše chë tsañe yojtsemna, Bashco saná atše atšbe uatsjëndayëngaftaca jasama ca?’ ” <sup>12</sup> As cha cmochanjínýanýiye canye bëts tsañe, tsbanana pisoca; ya lempe echántseprontana, y chentše, Bashco fiestama saná šochjaprónta ca.

<sup>13</sup> As chë útata tbojána, y tbojáninýena lempe ntšamo Jesús tojanëyancá, y chentše chë Bashco saná tbojanprontata.

<sup>14</sup> Jasama tojanobuache ora, Jesús mesëshentše tojanótbema chabe uatsjëndayëngaftaca, chë cachënga más chcoye chabe ichmónënga ca uabáinënga. <sup>15</sup> Chora Jesús tojanëyana: “Tša sëndánboše quem Bashco saná tšëngaftangaftaca jasama, atše cabá ndoñe chandësufri ora. <sup>16</sup> Muentšana ndoñe más quemëntša saná quicháisese,



Bëngbe Bëtsabe amëndayana candóshjanguëntscuana. Chora echantsótatšëmbo ntšamo quem fiesta ndegombre iuayancá ca.”

<sup>17</sup> Chorna canÿe coptema vínoyeca tojanaca, Bëngbe Bëtsábioye tbojtanchuá y mëntsá tojánayana: “Quem coptema vínoye menáfšenga; y cbéyana, <sup>18</sup> chë uvas betiyentša shajuanentšana obocniye ndoñe más quichaisofšiyee, Bëngbe Bëtsabe amëndayana candóshjanguëntscuana ca.”

<sup>19</sup> Chentšana, tandëse tojanca y Bëngbe Bëtsábioye tbojtanchuá; tojanjatá, tojanatšatá y mëntsá tojánayana: “Quem soye, atšbe cuerpo entsemna, y chanjóbana tšëngaftangbe tšabiama. Ntšamo mora bënga montsamcá šmochtsama, atšbiama jtenójuaboyama ca.”

<sup>20</sup> Tmojansentšana, chë coptémaca tojanma cachcá ntšamo chë tandëseca tojanmcá y mëntsá tojánayana: “Quem coptema vínoye entsemna chë Bëngbe Bëtsabe tsëm trato entšangftaca. Atšbe buiñe echanjuábuashana, tšëngaftanga chašmotsetatšëmbuama ntšamo Bëngbe Bëtsá entšanga tojanašebuachenacá ndegombre yochjochnënguama. Chë buiñe tšëngaftangbe tšabiama echanjuábuashana. <sup>21</sup> Pero chë uayayëngbe cucuatšifñe šochjaboshjoná, mesëshentše átšeftaca entsemna. <sup>22</sup> Ndegombre, chë Bëngbe Bëtsá Entša tbojanbemáftaca echanjopása, ntšamo Bëngbe Bëtsá chabiama tojanjuabocá. ¡Pero tša lastema chë bochjáboshjonabiama ca!” —Jesús tojánayana.

<sup>23</sup> Chorna chë uatsjëndayënga tmojanontsé entjanayana, chënguentšá nda chë boshjuaná bétsemnana.

### *Nda chë más uamaná yomna*

<sup>24</sup> Chë uatsjëndayënga imojtsenatsësnaye chënguentšá nda chë más uamaná bétsemnana. <sup>25</sup> As Jesús tojanëyana: “Chë ndoñe judiëngbeñe, chë reyënga chëngbe entšangbioyee nÿe ntšámnaca jtsamëndayana, y chentša amëndayënga jtsamana, entšanga chëngbioyee tšabe soye amënga ca chamotsëbobaútmama. <sup>26</sup> Pero tšëngaftangbeñe ndoñe chca chaondëtsemna; chamna, tšëngaftangbeñe chë más uamaná mo chë más basacá chaóbema, y chë mandayá mo chë oservenacá. <sup>27</sup> Er, ¿ndase chë más uamaná yomna, chë mesëshentše jasama tojotbemá o chë uajuatšnayá? Ndegombre co chë mesëshentše tojotbemá; pero atšna tšëngaftangbeñe sëntsemna mo chë oservenacá.

<sup>28</sup> “Atšbe padecëniñe tšëngaftanga sempre átšeftaca šmondëtsemna. <sup>29</sup> Chiyeca, atšbe bariëna, canÿe amëndayana cbochanjátšataye, ntšamo atšbe taitá canÿe amëndayana šojatštacá; <sup>30</sup> chca, atšbe amëndayoca mesëshentše átšeftaca šmochanjase y šmochanjofšiyee, y uámana tbemaniñe mo

reyëngcá šmochanjotbiama, chë Israeloca bnëtsana uta pamíllanga entšangbiama chašmuayanama tšabá o ndoñe tšabá chënga tmonjamama ca” —Jesús tojánayana.

*Jesús tojánayana, chábioye ndoñe bonjanabuátma ca Pedro yochjánayanama*

(Mt 26.31-35; Mc 14.27-31; Jn 13.36-38)

<sup>31</sup> Jesús mëntšánaca tojánayana: —Simón, Simón; cochtsetátšëmbo, Satanás obenana tonjotjañe tšëngaftangafatacaca nÿe ntšámnaca jamama, mo chë trigo matënga tcojtsashatiyeynacá; <sup>32</sup> pero atšna Bëngbe Bëtsá sënjaimpadá, átšbeñe ošbuáchiyana ndoñe chacmondëtsebuášbenama. Y aca, nÿets ošbuáchiyana átšbeñe chacojtsatsbomna ora, chë inÿe ošbuáchiyënga cochjújabuache átšbeñe sempre chamotsošbuáchema ca.

<sup>33</sup> Chora Simón tbojaniyana: —Bëngbe Utabná, atše sëntseprontana ácaftaca cárceloye jámnaca y jobanámnaca ca.

<sup>34</sup> Y Jesús tbojaniyana: —Pedro, atše cbëyana, cam ibeta bínÿanoye, ngallo cabá ndécánta ora, aca unga soye cochanjayana ndoñe šconduabuatma ca.

*Chë más jabuache ora yojtsobeco*

<sup>35</sup> Chentšana Jesús tojanatjá: —¿Chë ni shecnájaca, ni crocenánaca, ni shecochëtjonësheca tcbonjanichamó ora, nderado ndayá tmojanabuášhebena ca?

Y chënga tmojanjuá: —Tondaye ca.

<sup>36</sup> Chora tojanëyana: —Mora ndoñe chca; shecnaja tobomná, chëja chauesocñe y crocenánama shecnëbénaca; y nda ndoñe espadëja tondbomna, chabe quëfsaiya chaot-satábuiye y canÿe espadëja chauatobuámiñe. <sup>37</sup> Er cbëyana, entseyta átšeftaca chaopasá, ntšamo Bëngbe Bëtsabe uabemana palabrënguiñe atšbiama iuayancá, mëntšá: “Y chábioye tmonjáninÿe mo chë puerte bacna soye amënguentsá canÿa cuaftsemncá ca.” Y lempe ntšamo atšbiama iuabemancá, mora ya echanjochnëngo ca —Jesús tojanëyana.

<sup>38</sup> As chënga tmojaniyana: —Bëngbe Utabná, muentše uta espadëja entsemna ca.

Y japochócamna cha tojánayana: —Nÿe nÿetsá ponto ca.

*Getsemaní luarentše, Jesús Bëngbe Bëtsáftaca tbojanencuentá*  
(Mt 26.36-46; Mc 14.32-42)

<sup>39</sup> Chentšana, Jesús tojánbocna y ntšamo yojanamancá Olivos tjashoye tojána, y chabe uatsjëndayënga tmojanasto.

<sup>40</sup> Choca tmojánashjajna ora, Jesús tojanëyana: “Bëngbe Bëtsá moimpadanga, bacna soye jamama ndoñe chacmondócochënguama ca.”

41 Y chë uatsjéndayëngbentsana yojoluára, mo canÿe ndëtsbé jutšenëntscoca nÿetsá, y yojoshëntsamentsiye Bëngbe Bëtsáftaca jencuéntama. 42 Jesús mëntsá tojánayana: “Taita, aca tojtsesebošese, moma atše ndoñe chašondëtsemna chca jasúfriana. Pero ntšamo atše stsebošcá ndoñe chaondëtsemna, sinó ntšamo aca cojtsebošcá ca.”

43 Chca orna celocana canÿe ángel tbojánebëbocna, añemo chaotsebomnama juajabuáchama. 44 Jesús tša ngméniñe yojtsemna, y Bëngbe Bëtsáftaca más ibojtsencuéntaye. Y chabe bosese yojtsemna mo fshantsiñe buiñe cuaftsebuastëtjuancá.

45 Bëngbe Bëtsáftaca jencuéntama tojanpochocá ora, tojtantsbaná y chabe uatsjéndayënga imojtsemnoye tojána; y chënga imnétsomañe, tša ngménaca imojtsemna causa. 46 Chora tojanéyana: “¿Ndáyeca šmotsomañe? Motsbananga y Bëngbe Bëtsá šmochtseimpadana, bacna soye jamama ndoñe chacmondócochënguama ca.”

*Uayayënga Jesús tmojánishache*

*(Mt 26.47-56; Mc 14.43-50; Jn 18.2-11)*

47 Jesús cabá yojtsóyebuambnantscuana, ba entšanga chentše tmojánashjajna. Chë Judas ca uabainá, canÿa chë bnëtsana uta uatsjendayënguentsá, chë entšangbe natsana yojtsaye. Cha yojobeconá Jesús juamóchama; 48 pero Jesús tbojaniyana: “Judas, ¿canÿe juamochëse chë Bëngbe Bëtsá Entsá tbojanbemá uayayëngbe cucuatšiče cochjaboshjona ca?”

49 Chë Jesúseftaca imojtsemnënga tmojáninÿe ntšamo chora yochjanopásama; as tmojaniyana: —Bëngbe Utabná, ¿espadëjaca fšcotsatsejaye ca?

50 Y canÿa chënguentsá, chë bachnangbe más uámana amëndayabe bochichnayábioye catšbioica matscuaše tbojt-santëtše, y tbojtsanëštjango. 51 Chora Jesús tojanéyana: — Cachcá monÿá; nÿe nÿetsá ponto ca.

Y chë bochichnayábioye chë matscuaše tbojánbojajo y tbojanshná. 52 Chentšana, chë bachnangbe amëndayënga, chë Bëngbe Bëtsabe bëts yebnentša soldadëngbe amëndayënga y chë judiëngbeñe bëtsëjemëngcá amëndayënga, chë cha juanatsama tmojánabënga, Jesús tojanéyana: “¿Ndáyeca espadëjangaca y ngarotbéngaca šmojabo atše jishachama, mo atše canÿe bacá uamana entsá cuaftsemncá ca? 53 Atše cada te tšëngaftangaftaca sënjamna Bëngbe Bëtsabe bëts yebnentše, y ni chešmátanbojajo. Pero ora tojjobuache tšëngaftanga chca chašmomama, y Satanás ntšamo yojtsebošcá tšëngaftangbeñe echantsemándaye ca” —Jesús tojanéyana.

*Pedro tojánayana Jesúsbioye ndoñe bonjanabuátma ca*

*(Mt 26.57-58, 69-75; Mc 14.53-54, 66-72; Jn 18.12-18, 25-27)*

<sup>54</sup> Chentšana Jesús tmojánishache, y chë bachnangbe más uámana amëndayabe yebnoye tmojanánatse. Y Pedro bënocana ibojséstona. <sup>55</sup> Choca, chashja tsëntsaca, canÿe iñeshe tmojanangbotjó y entsanga chë shëconana imojtsetbiámana; y Pédrënaca chentše chëngaftaca yojótbema. <sup>56</sup> Chora, canÿe shembása chentša oservená, Pédrëbioye tbojáninÿe chë iñe juachaca yojtsetbemana; tbojanonÿinÿé y tojánayana: — Muánaca cháftaca endánmëna ca.

<sup>57</sup> Pero Pedro ndoñe ca tojánayana, y chë shembásabioye mëntšá tbojanianana: —Sobrená, atše cha ndoñe quetsatabu-atma ca.

<sup>58</sup> Ndoñe yapa bën y inÿa chábioye tbojátaninÿe y tbojanianana: —Acnaca chë uatsjendayënguentsá condmëna ca.

Pero Pedro tbojanjuá: —Bacó, atše ndoñe quetsátsmëna ca.

<sup>59</sup> Chentša benëntscosna, inÿa más yojátayana: — Ndegombre, muánaca cháftaca enjánana; muánaca Galileocá entsemna ca.

<sup>60</sup> Y Pedro tojánayana: —Bacó, ndayama cojtsichámuama ndoñe quetsátstatšëmbo ca.

Cachora, y Pedro cabá yojtsóyebuambnantscuana, canÿe ngallo yojacánta. <sup>61</sup> Chora Bëngbe Utabná yojobuértana y Pédrëbioye tbojanonÿinÿé; y Pedro chora yojenójuaboye ntšamo Bëngbe Utabná tbojanianama: “Cam ibeta bínÿanoye, ngallo cabá ndécánta ora, aca unga soye cochanjayana ndoñe šconduabuatma ca.” <sup>62</sup> As Pedro shjoye tojánbocna, y corente ngmënaca yojtsenóbošachna.

*Jesús imojtsáboyejuana*  
(Mt 26.67-68; Mc 14.65)

<sup>63</sup> Chë Jesús imojtsebojanÿá entsanga cha imojtsáboyejuana y imojtsejantšetaye; <sup>64</sup> y jtsabuchëntsacjuase, imojtsetjanaye: “¡Momalisiá, nda tcmënjajantšetá ca!” <sup>65</sup> Y imojtsóyenguaye, nÿe mocá soyënga jtsatsëtsnayëse.

*Jesús, chë judiëngbe uámana mándayëngbe delante*  
(Mt 26.59-66; Mc 14.55-64; Jn 18.19-24)

<sup>66</sup> Tojanbinÿna ora, chë bëtsëjemëngcá amëndayënga, bachnangbe amëndayënga y ley abuátambayënga tmojánenefjna, y chëngbioye Jesús tmojanánatse. Choca tmojantjá: <sup>67</sup> — Smëyana, ¿aca Bëngbe Bëtsabe Uámana Uabuayaná, chë Cristo comna ca?

Y Jesús tojanëjua: —Aíñe ca tbojáuyanëse, tšëngaftanga chama átšbeñe ndoñe quešmochatošbuáchiye. <sup>68</sup> Y nderado tbojátjasna, tšëngaftanga ndoñe quešmochatojuá ca. <sup>69</sup> Pero cam orscana, chë Bëngbe Bëtsá Entšá tbojanbemá, chë Bëngbe Bëtsá nÿets obenana bomnabe catšbioica echántsatsbemana ca.

<sup>70</sup> Chora nyetscanga tmojantjá: —¿As, aca chë Bëngbe Bëtsabe Uaquiñá comna ca?

Y Jesús tojanējua: —Cach tsëngaftanga chca šmontsichamo; atše cha sëndmëna ca.

<sup>71</sup> As chora chënga tmojánayana: —¿Ndayama más entsanga sochjátëjamoto Jesusbe contra chamuayanama? Er cach bënga chabe uayásentsana chca tmonjouena ca.

## 23

### *Jesús, Pilatbe delante*

(Mt 27.1-2, 11-14; Mc 15.1-5; Jn 18.28-38)

<sup>1</sup> Nyetsca mándayënga tmojëftsantsbaná, y Pilátbioye, chë Judeoca mandádbioye Jesús tmojanánatse. <sup>2</sup> Y chentše tmojanontsé cha mal jaquédana, mëntsá: —Bënga fsënjínÿena mua entsabuatambá bacna soyënga, quem luarentša entsangbe amëndayëngbioye ndëtsayaunanama. Cha entsichamo bënga ndoñe šontsamna Césarbiama impuesto jtsatsquëcjnyana ca; y entsichamo cha yomna chë Cristo, chë Bëngbe Bëtsabe Uámana Uabuayaná, mo canÿe reycá ca.

<sup>3</sup> Chora Pilato Jesúsbioye mëntsá tbojantjá: —¿Aca chë judiëngbe Rey cojtsemna ca?

Y Jesús tbojanjuá: —Aíñe, aca ndegombre yomncá tcjayana ca.

<sup>4</sup> As Pilato, chë bachnangbe amëndayënga y entsanga tojanëyana: —Atše ni mo canÿe soye chiyátinÿena, quem boyabása castiganá chaotsemnama jayanama ca.

<sup>5</sup> Pero chënga más tmojanáyebuachena: —Nyets Israel luarëjana entsabuatambá, Galilea entsangbe amëndayëngbe contra jtsemnama. Galilea luaroca chca tonjabojatšé y mora moca Judeócnaca cachcá entsama ca.

### *Jesús Rey Heródesbe delante*

<sup>6</sup> As Pilato, Galilea luarama yojouena ora, tojanatjá Jesús Galileocá tayojamnama. <sup>7</sup> Y Jesús aíñe Galileoca yojamnama cha tojántatšëmbona ora, Rey Heródesbioye cha tbojanichmó. Herodes inamna Galileoca mandado y chora Jerusalemntše cha yojtsemna. <sup>8</sup> Herodes Jesúsbioye tbojáninÿe ora, corente tojanoyejua. Chana tempscana inaboše Jesús jinÿama. Cha ba soyënga Jesusbiama tojanuena, y yojtseboše jinÿama Jesús jamana canÿe bëts soye, Bëngbe Bëtsabe obenánaca. <sup>9</sup> Heródesna ba soyënga tbojantjá, pero cha ndocá tbonjanjuá. <sup>10</sup> Y chéntšnaca, chë bachnangbe amëndayënga y judiëngbe ley abuátambayënga imojtsemna, y Jesús corente mal imojtsequédaye.

<sup>11</sup> Chora, Herodes y chabe soldadënga Jesúsbioye corente imojtsáboyënja, y jtsaboyejuanamna, botamana entsayangá

tmojanichëtjo, mo canÿe reycá; chentšana cachiñe Pilátbioye tmojesanichmó. <sup>12</sup> Cach te Herodes y Pilato tbojtane-natsëtsaye; tempna chata ibojenáyata.

*Jesusbama chaóbana ca tmojánayana*  
(Mt 27.15-26; Mc 15.6-15; Jn 18.39-19.16)

<sup>13</sup> Chentšana Pilato, chë bachnangbe amëndayënga, chë pueblentša amëndayënga y nÿetsca entšanga tojánachembo, <sup>14</sup> y mëntšá tojanëyana: —Tšëngaftanga quem entšá átšbioye šmojuánatse, mo bacna soye entšángbeñe abuatambayacá, mandadënga ndëtsayaunanama ca; tšëngaftangbe delante lempe sënjatjá, tšëngaftanga ba soyënga muabiamana šmonjayana, pero atšna ni mo canÿe soye chiyátinÿena, quem boyabása castiganá jtsemnama ibojtsemna ca jayanama. <sup>15</sup> Herodes cach ndoñe, chíyeca cachiñe bëngbioye cha tbojesichmó. Quem boyabása ni mo canÿe ndoñe tonjobuachjanguá jóbanama chabotsemnama. <sup>16</sup> Chcasna, jabuache chamotsecastigá y chentšana chanjëtsboshjona ca —cha tojánayana.

<sup>17</sup> Yojamna canÿe utamená jëtsboshjonana, ntšamo Bashco fiesta ora jamana imojanamancá. <sup>18</sup> Pero chora entšanga cánÿiñe tmojanáyebuachena: —¡Jesús chaóbana! ¡Barrabás matsboshjona ca!

<sup>19</sup> Barrabás inautámëna, mandadëngbioye ndëtsayaunanama chë bëts pueblentše entšanga tojánenautanama y entšá óbanaye causa. <sup>20</sup> Pilato cachiñe tojánayana Jesúsbioye jëtsboshjonama yojtsanboše ca; <sup>21</sup> pero entšangna más tmojtëtanayebuachena: —¡Motsecrucificá! ¡Motsecrucificá ca!

<sup>22</sup> Pilato ya unga soyama tojtëtanayana: —¿Ntšamo bacna soye mua tojobuachjanguá ca? Ni mo canÿe bacna soye chiyátinÿena, mua jóbanama chabotsemnama. Chcasna, chanjacastíga y chora chanjëtsboshjona ca.

<sup>23</sup> Pero chëngna más imojtsechembumbuana Jesús chamotsecrucificama. Cabana, chë bachnangbe amëndayënga y chë entšangbe jabuache chembumbuanánaca, Pilato tmojanëyëñjaná Jesús chamóbama. <sup>24</sup> As Pilato tojanmandá ntšamo chë entšanga imojtsotjanañcá chaotsemnama; <sup>25</sup> as chora Pilato, Barrabásbioye cachcá tbojtanboshjona, chë nda inautámëna mandadëngbioye ndëtsayaunanama entšángbioye tojánenautanama y entšá óbanaye causa. Y Jesusna entšangbe cucuatšíñe tbojánboshjona, ntšamo chënga tmojtsebošcá chamomama.

*Jesús tmojanrucificá*  
(Mt 27.32-44; Mc 15.21-32; Jn 19.17-27)

<sup>26</sup> As jacrucificama Jesús tmojanánatse. Chora jajocana inátaboje canÿe boyabása, Simón ca uabainá, Cirene luarocá;

y cha Jesusbe cruz tmojancutsá, Jesusbe ústonoye chaotsambama.

<sup>27</sup> Y banga chë pueblentša entsanga imojtsëstona; y chë shembásenga imojtsëstonëngna imojtsayošachiye y ngménaca imojtsanioye, Jesús chca yojtsepásama. <sup>28</sup> As Jesús chëngbioye tojanobuértana y tojanëyana: “Jerusalenentša shembásenga, atšbiana ndoñe matošachena; cach tšëngaftangbiana y tšëngaftangbe básengbiana šmochjenóbošachna. <sup>29</sup> Canye te echanjóshjango y chë te šmochántsicamo: ‘Tša tšabá chë shembásenga šešona ndbomnëngbiana, chë quem luaroye šešonga ndoñe tmonjëftsëshejajnëngbiana, y chë šešonga ndoñe tmonjëftsabachengbiana ca.’ <sup>30</sup> Chora entsanga jetsóitanama mochántseboše y mochanjontsé ichámuana: ‘¡Tjashënga šmotsëtebuantsá y batsjabenga šmotsaitame ca!’ <sup>31</sup> Atše, chë ndocna bacna soye amá, chíyeca puerta obená, chca šmojaborlase, ¿ntšamo mochjama chë ndegombre bacna soye amëngaftaca, chíyeca ndobenënga? O mëntšá, ¿chë nguëfshna betíyeca chca tmojtsamëse, ntšamo chë tojtsebuashá betíyeca mochjama ca?” —cha tojanëyana.

<sup>32</sup> Jesúseftaca cruciñe jóbanama, útata bëts bacna soyënga ochjajnayátnaca imojtsënachaye. <sup>33</sup> Chë “Obanabe Bestšashe ca” uabaina luaroye tmojánashjajna ora, Jesús tmojanrucificá y chë bëts bacna soyënga ochjajnayátnaca, canya chabe catšbioica y chë ínÿana chabe uañicuayoica. <sup>34</sup> Chora Jesús mëntšá tojánayana: “Taita, mëngbe bacna soye motsaperdónaye, er ntšamo montsamama chënga ndoñe quemátstatsëmbo ca.”

Chë soldadënga Jesusbe entsayamna, tsbanánoye tmojanëtsena, chënga jtenájatayama. <sup>35</sup> Entsanga chentše imojtsemnënga chca imojtsonÿaye, y chë pueblentša mandayëngnaca Jesús imojtsáboyejuana y mëntšá imojtsenatsëtsnaye: “Inÿengna aíñe tojëftsatsebacá; mora cachá chauentsbocá, cha ndegombre Cristo, chë Bëngbe Bëtsabe Uámana Uabuayaná tomñese ca.”

<sup>36</sup> Soldadëngnaca Jesús imojtsáboyejuana; tmojanobeconá y untja vínoye imojtsefšësnaye, <sup>37</sup> y mëntšá imojtsatsaye: “¡Chë judiëngbe Rey tcomnësna, cach aca mentsbocá ca!”

<sup>38</sup> Jesusbe bestšaše juatsboicna canye uabemana soye tmojananjo; chiñe mëntšá yojtsanábemana: MUA CHË JUDIËNGBE REY ENDMËNA ca.

<sup>39</sup> Canye bëts bacna soyënga ochjajnayá yojtsecrucificaná, Jesúsbioye mëntšá tbojanóyenguango: —Chë Bëngbe Bëtsabe Uámana Uabuayaná tcomnësna, mentsbocá y bëndátnaca šmatsebocá ca.

40 Pero chë inÿe bëts bacna soyënga ochjajnayana mëntšá tbojanácacana: —¿Ni mo Bëngbe Bëtsá ndoñe condërrespectana? Bëndátnaca bontsamna chacá jóbanama. 41 Ndegombre bëndata muentše bontsemna bëts bacna soyënga ochjajnaye causa, y chíyeca chca jasúfriama bontsamna. Pero quem boyabása ni mo canÿe bacna soye ndoñe tonjobuachjanguá ca.

42 Y chorna, quem bëts bacna soyënga ochjajnayá Jesúsbioye tbojaniyana: —Jesús, atšbiamá cochtenójuaboje aca reycá jabomándama chacojtabo ora ca.

43 Y Jesús tbojanjuá: —Ndegombre cbëyana, mënté átšeftaca celoca, chë nÿetscanga oyejuayënga mondbetsemnoca, aca cochantsatsmëna ca.

### *Jesús tojanóbana*

*(Mt 27.45-56; Mc 15.33-41; Jn 19.28-30)*

44 Nÿetsto orscana las tresëntscoñe nÿets quem luare yojt-seibétata. 45 Y shinÿe yojtsajbaná binÿnayana, y Bëngbe Bëtsabe bëts yebnentše yojújonÿana entsšëjua tsëntsaca yojtsenájataye. Chëjua bënëjua inauamna y chë tsatsëntsaca inaújonÿana. 46 As Jesús tojanáyebuachena: “Taita, atšbe espíritu acbe cucuatšifne šcoboshjona ca.”

Y chca jayanama tojanpochocá ora, tojanóbana.

47 Chë romano soldadëngbe amëndayá chca tojáninÿe ora, Bëngbe Bëtsábioye tbojtandorá, mëntšá jayanëse: “Ndegombre, quem boyabása ainaniñe tšabe juabnënga bomná inamna ca.”

48 Nÿetsca entsšanga chë soye jinÿyama tmojánabënga, chca tojanopasama tmojáninÿe ora, tmojanontšé jtangana enocochjantšetaye, ngménama. 49 Pero Jesusbe nÿetsca ubuátmënga y chë shembásenga Galileocana tmojanastëngna, chaboca tmojanoquedá chë soyënga onÿayiñe.

### *Jesús tmojanatbontsá*

*(Mt 27.57-61; Mc 15.42-47; Jn 19.38-42)*

50 Yojanmëna canÿe boyabása, José ca uabainá, canÿe Judeoca pueblócá, Arimatea ca uabaina; cha inamna canÿa chë pueblentša uámana amëndayënguentsá y canÿe tšabe entsá y nÿetsca soyënguifne tšabá amá. 51 Chánaca yojanobátmana chë Bëngbe Bëtsabe amëndayana chaóshjanguama, y tondaye tbonjanogustá ntšamo chë inÿe amëndayënga tmojanjuabó y Jesúseftaca tmojanmcá. 52 Cha Pilátbioye tojána y Jesusbe cuerpo tbojanotjañe. 53 José chë cruzocana Jesusbe cuerpo tbojtandštango, canÿe lino entsšëjuaca tbojanandmaná y canÿe cuevëshiñe, peñëshiñe pormániñe, tbojanjajó. Chentše cabá ndocná mondëjajo. 54 Yëfsana ochnayté bëtsemnayecna, cach te yojanotocana saná japróntana chë yëfsana jasama; y chë ochnayté ya yojtsebínÿana.



<sup>55</sup> Chë shembásenga, Galileocana Jesús tmojantjëmbambanga, tmojána y chë cuevëshe tmojáninÿe, y tmojanrrepará ntšamo Jesusbe cuerpo tmojanajoma. <sup>56</sup> Yebnoye tmojtaná orna, tmojanprontá botamana uanguëtse béjayënga y soyënga chë cuerpiñe janëtjuama.

Chë ochnaytena chënga tmojanochná, ntšamo Moisesbe leyiñe yojanmandancá.

## 24

### *Jesús tojtanayena*

(Mt 28.1-10; Mc 16.1-8; Jn 20.1-10)

<sup>1</sup> Y tmengo, chë inÿe semana bojatséntena, cabá cachëse, Jesús tmojanatbontsá cuevëshoye chë shembásenga tmojána, y tmojanamba chë tmojanprontá botamana uanguëtse soyënga. <sup>2</sup> Pero choye tmojánashjajna orna, tmojáninÿena chë cuevëshoye amashjuanentša ndëtšbé chentšana juanániñe, <sup>3</sup> y choye tmojánamashjna ora, Bëngbe Utabná Jesusbe cuerpo ndoñe tmonjáninÿena. <sup>4</sup> Chë shembásengna ndoñe imontsetátšëmbo ntšamo jajuaboyana chë soyama; chora, uta boyabásata, uabuashinÿinÿana entšayá uichëtjonata chentše tbojabántsaye. <sup>5</sup> Y chë shembásenga tmojanëuatjanama y fshantsoye imojtsatsejbénama, chata tbojanéyana: “¿Ndáyeca obanëngbentše chë vida totsobomñá šmojtsenguá ca? <sup>6</sup> Muentše cha ndocná quenátšmëna, er cha ya tontayena. Menójuabonga ndayá cha tmojanéyanama, cha cabá Galileoca enjamna ora. Cha tonjánayana: <sup>7</sup> ‘Chë Bëngbe Bëtsá Entšá tbojanbemá bontsemna bacna soye amëngbe cucuatšiñe chamoboshjonama, chamocrucificama y unga tianoye cháuatayenama ca’ ” —chata tbojánayana.

<sup>8</sup> Chora chë shembásenga Jesusbe palabrëngama imojtenójuaboje, <sup>9</sup> y chë cuevëshentšana tmojtaná ora, chë tšabe noticiënga chë bnëtsana canÿe uatsjëndayënga y inÿe entšángbioye tmojanacuntá. <sup>10</sup> Chë uatsjëndayëngbioye chca cuentayëngna imojamna María Magdalena, Juana, y María, chë Santiagbe mamá, y chë inÿe shembásenga chëngaftaca imojamnënga. <sup>11</sup> Pero chë uatsjëndayëngna mëntšá chë shembásengbiama imojétsejuabnaye: “Chënga montsoyebuambná mo corente juabna ndbomnëngcá ca.” Y chca, chënga chë soyiñe ndoñe montsanošbuaché.

<sup>12</sup> Pero chentšana, Pedro tojëftsantsbaná y ochamanana chë Jesús tmojanajó cuevëshoye tojána. Y choca yojtsemna ora, yojtsejbéna tsoye jontješiyama, pero nÿe ena entšëjuangá yojuinÿe, chë Jesús tmojanbochmëjuangá. As Pedro ojnananá yebnoye yojtá, chca tojanopasama.

*Chë Emaús puebloye benachiñe*  
(Mc 16.12-13)

<sup>13</sup> Cach te, uta uatsjéndayata Emaús puebloye ibojtsaye. Emaús yojamna Jerusalenocana bnétsana canye kilómetroca. <sup>14</sup> Chata ibojtsayencuéntaye lempe ntšamo tojanopasama. <sup>15</sup> Y tojanopasá, ibojtsencuéntaye y ibojtsenatsëtsnayëntscuana, cach Jesús tojanobeconá y chátaftaca cányiñe yojtsaye; <sup>16</sup> masque imojtsonyaye, ndoñe ibontsobena cha jótëmbana. <sup>17</sup> Jesús tojanëyana: —¿Ndayama benachiñe šuabanencuéntaye ca?

As chata ngménaca ibojotsaye, <sup>18</sup> y canya, Cleofás ca uabainá, tbojaniyana: —¿Nyë aca cojtsemna, inye luarocana ashjanganá Jerusalenentše oyená, ndayá chentše quem diënga yopasánama ndëtatšëmbuá ca?

<sup>19</sup> Chora cha tojanëyana: —¿Ndaye soyënga ca?

Y chata tbojaniyana: —Chë Jesús Nazaretocáftaca tonjopasá soyëngama. Cha enjamna canye Bëngbe Bëtsabe juabna oyebuambnayá, puerte obenana bomná ndayá jamama y jayanama, Bëngbe Bëtsabe delante y nyëtsca entšangbe delante. <sup>20</sup> Y ntšamo, chë bachnangbe amëndayënga y chentša mandadënga ínÿengbe cucuatšinë tmonjáboshjona, jóbanama ibojtsemna ca entšanga chamuayanama y chamocrucificama. <sup>21</sup> Bënga chabiamana fsënjanojátmana, Césarbe cucuatšentšana Israeloca entšangbe atsebacayá chaotsemnana; pero morna ya unga te entsemna chca tonjopasá. <sup>22</sup> Y mora ndayá, básefta shembásenga bëngbe enutënga ójnanana soyënga šonjáuyana. Chënga cabá cachëse chë Jesusbe cuerpo tmonjanjájó cuevēshoye tmonjá, <sup>23</sup> y chabe cuerpo ndoñe tmonjínÿena; as chora chënga bëngbioye tmontabo y montsabíchamo angelënga tmojëftsanyë y chënga catmënjayana cha ainá yojtsatsmëna ca. <sup>24</sup> Bëngbentšana baseftángnaca chentšana chë cuevēshoye tmonjá, y tmojínÿena ntšamo chë shembásenga tmonjayancá, pero Jesús ndoñe tmonjëftsinyë ca —chata ibojtsichamo.

<sup>25</sup> As Jesús chata tojanëyana: —¡Tša juabna ndbomnënga y tša uenana jošbuáchiyama, chë Bëngbe Bëtsabe juabna oyebuambnayënga tmojánayana soyëngama! <sup>26</sup> ¿Mo ndoñe yonjamna chë Uámana Uabuayaná chë soyënga chaosufrima, y chentšana nyëtsca entšanga corente cha chamuatschuama ca?

<sup>27</sup> Chentšana Jesús tojanontšë chata jábuayenana, lempe ntšamo chabiamana yojanoyebuambnacá chë Bëngbe Bëtsabe uabemana palabrënguñe; yojontšë Moisesbe librëšangañe y chë Bëngbe Bëtsabe juabna oyebuambnayëngbe librëšangáñnaca.

28 Chë ibojétsaye puebloye imojtsebeconá ora, Jesús tojanma mo más chcoye cuaftsacá. 29 Pero chatna tmojanatarié chentše chaotsoquedáñama, mēntšá jauyanēse: —Bēndátaftaca motsoquedañe; ya jetiñe entsemna y ya echanjaibétata ca.

As Jesús chátaftaca tojtsanoquedañe. 30 Chentšana tojanopasá, juasama mesēshentše imojtsetbiámana ora, Jesús chë tandēse tojanca, Bēngbe Bētsábioye tbojtanchuá, chë tandēse tojanjatá, y chata tojanatšatá. 31 As, chora chë uatsjéndayata ibojobenaye Jesús jótēmbana; pero chana n̄yē ndeolpe yojuenatjēmba. 32 Chora chata ibojtsenatsēsnaye: “Chë benachiñe Bēngbe Bētsabe uabemana palabrengama šondabuayiñá ora, ndegombre bēngbe ainaniñe más bontseboše cha más chašotsabuayiñama, ¿ndoñe chca ca?”

33 As, cachora tbojēftsantsbanata y Jerusalenoye tbojtanata; choca tmojánin̄yena chë bnētsana can̄yē uatsjéndayēnga cán̄yentše imojtsemna y chēngbe enutēngnaca; 34 y mēntšá imojtsichamo: —¡Ndegombre Bēngbe Útabná tojtayena; Simónbioye tbojébēbocna ca!

35 As chata tbojanontšé jacúntana, ntšamo benachiñe tbojanpasacá, y ntšamo Jesúsbioye imojótēmba, chë tandēse tojanjatá ora.

*Jesús chabe uatsjéndayēnga tojánēbēbuacna  
(Mt 28.16-20; Mc 16.14-18; Jn 20.19-23)*

36 Chë uatsjéndayēnga chë soyēngama cabá imojtsencuéntantscuana, Jesús chēngbe tsēntsaca tojabántsaye y mēntšá tojanēyana: “Chë atšbe ainaniñe tšabe ebionana tšēngaftangaftaca chaotsemna ca.”

37 Pero chēnga tša auatjanánēnga imojtsemna, y can̄yē añemēse imojétson̄yaye ca imojtsejuabnaye. 38 Pero Jesús tojanēyana: “¿Ndáyeca auatjanánēnga šmojtsemna? y ¿ndáyeca tšēngaftangbe ainaniñe chca šmojtsejuabná ca? 39 Atšbe cucuatšēnga y atšbe shecuatšēnga min̄yēnga; šmobjajo y šmochanjinyē. Cach atše sēntsemna. Can̄yē añemēsna, ni mēntšena ni betašēnga ntsebomnana; pero tšēngaftanga šmontson̄yá, atšna aíñe ca” —tojanēyana.

40 Chca yojtsichámēse, chabe cucuatšēnga y chabe shecuatšēnga tojanin̄yan̄yé. 41 Y chēnga cabá ndoñe montsanošbuaché, chca noticiama corente imojtsóyejuama y tša ojanánēnga imojtsemna causa; as Jesús tojanatjá: “¿Muentše ndayá jasama quešmēbomna ca?”

42 As can̄yē tabena buana beonbiana tmojanoyé; 43 Jesús tojanocñe y chēngbentše tojanse. 44 Chentšana Jesús tojanēyana: “Quem palabrenga entsemna ntšamo cabá tšēngaftangaftaca sēnjamna ora tcbonjanēyancá: Entsemna,

lempe chaopasá ntšamo atšbiana iuabemancá, Moisesbe leyënguiñe, chë Bëngbe Bëtsabe juabna oyebuambnayëngbe uabemana librëšangañe y Salmos librëšañnaca ca.”

<sup>45</sup> Y chora chë uatsjëndayënga, Jesús beyeca tmojanobená chë Bëngbe Bëtsabe uabemana palabrëngama josértana. <sup>46</sup> Chentsana Jesús tojanëyana: “Ntšamo atšbiana iuabemancana yomna, chë Bëngbe Bëtsá Entšá tbojanbemá chaosufrí y unga tianoye chauatayena ca. <sup>47</sup> Y morna atšbe uabaina jayanëse, átsbeñe betsošbuáchema, nyets quem luarentše šmochjontša entsanga atšbiana jábuayenama, bacna soyënga amana chamuajbanama, as chca, Bëngbe Bëtsá chëngbe bacna soyëngama cháuaperdonama; chë soyënga Jerusalemntše chaobojatsé. <sup>48</sup> Tšëngaftanga atšbiana soyënga šmonjinýe y šmondétatsëmbo. <sup>49</sup> Atšbe Taitabe šbuachenaná, tšëngaftangbiana chanjíchmu. Pero morna camuentše Jerusalemntše moquedanga, Bëngbe Bëtsabe obenana chašmóyëngacñëntscuana ca” —cha tojanëyana.

*Jesús celoye tojtantsjuá*

*(Mc 16.19-20)*

<sup>50</sup> Chentsana, Jesús chabe uatsjëndayënga ínýoye tojanënatse, Betania pueblo béconana. Y chabe buacuatšënga játsbanase, Bëngbe Bëtsá tbojanimpadá chë uatsjëndayënga tšabe bendicionënga chamóyëngacñama. <sup>51</sup> Chca yojtsamëntscuana, cha chëngbentsana tojanoluaré y tojanontsé celoye játsjuana. <sup>52</sup> Chë uatsjëndayëngna, Jesús tmojtanadorá chentsana, Jerusalemoye oyejuayënga tmojtaná; <sup>53</sup> y cada te, Bëngbe Bëtsabe bëts yebnoye imojánajna, Bëngbe Bëtsá jëtschuayama.

## San Juan

*Cristo, chë Bëngbe Bëtsabe Uámana Oyebuambnayana ca Uabainá*

<sup>1</sup> Quem luare ndobojátša ora, Cristo, chë Bëngbe Bëtsabe Uámana Oyebuambnayana ya yojtsemna; chora cha, chë chca uabainá, Bëngbe Bëtsáftaca yojtsanmëna, y cachá Bëngbe Bëtsá inamna. <sup>2</sup> Ndegombre cha, chë tempscana Bëngbe Bëtsáftaca yojtsanmëna. <sup>3</sup> Cháftaca, Bëngbe Bëtsá lempe tojanma; cháftaca ndóñesna, lempe ntšamo mora yomncá, Bëngbe Bëtsá tondaye matënjanma. <sup>4</sup> Cachábeñe nÿets vida inamna, y quem vídaca tojánabo quem luarentša entsangbe juabnënga jabuábinÿnayama. <sup>5</sup> Cha tonjánabo moye, chë entsangbe juabnënga ndoñe binÿniñe yonjamnoye, chiñe jabobínÿnayama. Cha sempre chca yobínÿna, y Satanás chë entsangbe juabnënga ndoñe binÿniñe chaondëtsemnama amá, ndoñe yondobena chë binÿnayabe obenana jtsejuánana.

<sup>6</sup> Inamna canÿe boyabása, Juan ca uabainá; y Bëngbe Bëtsá tbojanichmó, <sup>7</sup> binÿnayabiamá chaóyebuambama; entsángbeñe binÿnayabiamá cháuyanama, chca, ntšamo Juan chë binÿnayabiamá tojayana soyëngaca, nÿetscanga Jesúsbeñe chamotsošbuáchema. <sup>8</sup> Juan ndoñe yonjamna chë binÿnayá. Cha inamna canÿe ichmoná, chë nda binÿnayá yomnabiamá entsángbeñe chauabáyanama. <sup>9</sup> Chë ndegombrá quem luaroye tonjánabo chë entsangbe juabnënga jabuábinÿnayama.

<sup>10</sup> Chë Bëngbe Bëtsabe Uámana Oyebuambnayana quem luariñe yojtsanmëna; masque cháftaca Bëngbe Bëtsá quem luare tojanma, nda cha yojamnama muentša oyenënga ndoñe monjántatšëmbo. <sup>11</sup> Cachabe luare entsángbioye tonjánabo, y entsanga ndoñe tmonjánbošena cha joffana. <sup>12</sup> Nÿetscanga, ndëmuanÿenga cha tmojanëbuaja y chábeñe tmojtsošbuáchenga, cha derecho tonjanatšatá jtsoobenama Bëngbe Bëtsabe básenga ca jtsabáinama. <sup>13</sup> Quem ošbuáchiyëngna, chca jtsemnama ndoñe tmonjanobená entsangbe buiñentsana tmojanonÿnáyeca, o ndaye entsabe juabnentsana. Nÿe Bëngbe Bëtsábeyeca chca chabe básenga imojtsabaina.

<sup>14</sup> Cha, chë Bëngbe Bëtsabe Uámana Oyebuambnayana, entsá tojanóbema, y quem luare bëngaftaca yojëftsiyena. Cha yomna chë Bëngbe Bëtsabe nÿe canÿe Uaquiñá; chíyeca bënga tifjáninÿe chabe bëts obenana y chabe tsabe juabna, chë Bëngbe Bëtsábentsana tojanóyëngacñana. Cha corente jtsababuánÿeshanëse šojánanÿena y yojëftsiyena

ntšamo ndegombre inamncá. <sup>15</sup> Juan mēntšá chabiamama yojanáyebuache: “Chabiamama sēnjanoyebuambná, chē ndabiamama chora atše sēnjánayana, chē átšbentšana jabamana atšbiamama más uamaná endmēna, er atše cabá ndonŷna orna, cha ya yojtsemna ca.”

<sup>16</sup> Cha tša tšabe ainana bómnayeca, bēnga nŷetscanga malajta tšabe bendicionēnga tmojóyēngacñe. <sup>17</sup> Moisesbiajana tifjanóyēngacñe chē Bēngbe Bētsá tojanmandá soyēnga. Pero Jesucristbeyeca, Bēngbe Bētsá tšabe bendicionēnga bēngbiamama tojama y chē ndegombre soyēnga bēnga tmojēftsashjache. <sup>18</sup> Ndocná, ndocna te Bēngbe Bētsábioye tbonjinŷe. Chē nŷe canŷe Uaquiñá ibobomná, cach Bēngbe Bētsá yomna; y cha, Bēngbe Bētsá chē Taitáftaca cánŷiñe mo canŷacá yomna. Mua, chē Uaquiñá, bēngbiamama tojama, Bēngbe Bētsá juabuátmanama chaotsopodénama.

*Juan chē Ubayaná Jesucristbiamama tojanabuayená  
(Mt 3.11-12; Mc 1.7-8; Lc 3.15-17)*

<sup>19</sup> Canŷe te, Jerusalenoca judiēnga tmojanichamó básefta chēngbe bachnanga y levitēnga, chē Bēngbe Bētsabe bēts yebnoca trabájayēnga, Juan yojtsemnoye, cha nda bétsemnama chamuatjayama. <sup>20</sup> Chocna, Juan chēngbeñe ndegombre tojanobuambá: —Atše, chē Bēngbe Bētsabe Uámana Uabuayaná ndoñe quetsásmēna ca.

<sup>21</sup> As chora, cachiñe tmojantjá: —As, ¿ndase cojtsemna? ¿Chē Bēngbe Bētsabe juabna oyebuambnayá Elías ca?

Y Juan tojanéjua: —Atše cha ndoñe quetsásmēna ca.

Chora chēnga tmojantjá: —As, ¿chē Bēngbe Bētsabe juabna jabóyebuambayama jabamá ca?

Y Juan tojanéjua: —Ndoñe ca.

<sup>22</sup> Chora chēnga tmojanianana: —Asna, ¿aca ndase cojtsemna? Bēnga šontsamna nda aca cojtsemnama jtsetatšēmbuana, as chē šonjadespachenga jacúntama. ¿Ndayá cojtsobena cach acbiamama jayanama ca?

<sup>23</sup> Y Juan mēntšá tojanéjua: —Atše sēntsemna chē ndabiamama Bēngbe Bētsabe juabna oyebuambnayá Isaías mēntšá tojanábema: “Entšanga ndoyenoca canŷe abuayiynayá echántsemna, y entšanga mēntšá echántsbuayiynaye: Bēngbe Utabná echanjabo ca. Mo nda canŷe benache tojtseprontacá, tšēngaftágnaca cachcá, cha jabama tšabe juabnēngaca šmochtseprontana ca.”

<sup>24</sup> Chorna, báseftanga chē fariseungbe ichmónēnguentsana, <sup>25</sup> Juan tmojantjá: —Chē Bēngbe Bētsabe Uámana Uabuayaná, Cristo ca uabainá, ndoñe tcontsemnēsna, ni Elías, ni chē Bēngbe Bētsabe juabna jabóyebuambayama jabamá ndóñesna, ¿ndáyeca entšanga cojtsēbayana ca?

26 Chora Juan tojanějua: —Atšna, béjayeca entšanga sëndëubáyana. Pero tšëngaftangbeñe canya entsemna; cha ndoñe quešmatábuatma; 27 y cha atšbe ústonoye echanjáshjango. Atše merecido taitatobuajoñe, ni mo jotsejbiyama, chabe shecochëtjonëshentša corriëja jajafjonama ca.

28 Chca tojanopasá, canye pueblo Betania ca uabáinentše, Jordán béjaye chenguana. Cach béjayiñe, Juan entšanga yojanëbáyana.

### *Jesús chë Bëngbe Bëtsabe Oveshatema ca uabainá*

29 Yëfsana, Juan yojtsemnoye Jesús yojtsebëconaye, y chë cháftaca imojtsemna entšanga tojanëyana: “Smochjinýe. Chë nda Bëngbe Bëtsá tbojichmó y iytanana Oveshatemcá entsobiamná cha, entsashjajuana ca. Cha jóbanëse, quem luarentša entšanga bacna soyëngama perdonánënga mochántsemna. 30 Atše chabiamna cbonjutsëtsná, mëntsá sënjánayana ora: ‘Atšbe ústonoye canya echanjáshjango. Cha atšbiama más uamaná endmëna, er atše cabá ndonýna ora, cha ya yojtsemna ca.’ 31 Tempna, cach atše ndoñe quetsjátantatšëmbo nda cha bëtsemnana. Pero atšna ínýenga béjayeca ubáyana sëndabó, Israeloca entšanga quem boyabása chamuábuatmanama ca” —Juan tojanëyana.

32 Chentšana Juan mëntsánaca tojanobuambá: “Chabiamna mëntsá bominye sënjanjajó: chë Uámana Espíritu, mo canye palomatemcá, celocana tonjánastjango y quem boyabásabe juatsbuañe tonjanototoná. 33 Atše cabá ndoñe quetsjátantatšëmbo nda cha bëtsemnana, pero chë béjayeca jubáyama šonjanichmó cha, mëntsá šonjaniyana: ‘Nda chacojinýe, chë Uámana Espíritu jastjanguana y chabe juatsbuañe jototonana, chábeyeca atše chanjíchmu chë Uámana Espíritu entšangbe ainaniñe cháuamashënguama ca.’ 34 Y morna, atše aiñe chca tijinýe, y ndegombre tšëngaftanga cbëyana, cha chë Bëngbe Bëtsabe Uaquiñá entsemna ca” —cha tojanëyana.

### *Chë Jesusbe natsana ústonënga*

35 Yëfsana, Juan chabe uatsjëndayënguentsana útataftaca cachoca yojtésemna. 36 Jesús yojtsachnëjuanama, Juan tbojáninýe ora, tojanëyana: “Sochjinýe. Mua entsemna nda Bëngbe Bëtsá tbojichmó y iytanana Oveshatemcá entsobiamná cha ca.”

37 Chora chë Juanbe uta uatsjëndayata, chca tbojanuena ora, Jesús tmojanasto. 38 Jesús tojesanontješë y tojánanýe chata imojétsëstonama. As, tojanatjá: —¿Ndayá šojtsenguá ca?

Y chata tbojaniyana: —¿Rabí, ndayentše icoyena ca? (Rabí endayana “Buatëmbayá ca”.)

39 Chora Jesús tojanějua: —Mabo y sochjinýe ca.

As chata tbojána y tbojáninÿe ndayentše cha yojaniyenana. Y chentše cháftaca tojéftsanajëtana, ya jetiñe mo las cuatro ora yojtsemna causa.

40 Chë Jesusbiamá oyebuambnayana Juánbioye tbojanóyeunata y Jesús tbojanasto útatentšana cánÿana Andrés ca yojanabaina; cha yojamna Simón Pédrëbe catšata.

41 Andrés, cabá ndocna inÿe soye ndëma ora, tojána chabe catšata Simón janguanguama. Y tbojáninÿena ora, Simónbioye tbojaniyana: “Chë Bëngbe Bëtsabe Uámana Uabuayaná, Cristo, fsënjínÿena ca.”

42 Chentšana Andrés, Simónbioye tbojanánatse Jesús yojtsemnoye. Jesús, Simónbioye tbojáninÿe ora, tbojaniyana: “Aca condmëna Simón, Jonasbe uaquiñá, pero Cefas ca cochantsabaina ca.” (Chcana endayana “Pedro o ndëtsbé ca”).

*Jesús, Felipe y Natanael tojánachembo chamuastama*

43 Yëfsana, Jesús tojanjuabó Galilea luaroye jama. Benachiñe Felípbioye tbojáninÿena y tbojaniyana: “Smasto ca.”

44 Chë boyabása Felipe, Betsaida pueblóca inamna. Andrés y Pédrëna cach pueblócata ibnamna. 45 Chentšana Felipe tojána Natanael janguanguama; y tbojaniyana: — Chë ndabiamá leyënga librëšangañe Moisés tojanábema cha fsënjínÿena ca. Cachabiamá, Bëngbe Bëtsabe juabna oyebuambnayëngnaca tmojanábema. Cha Jesús entsemna, Josebe uaquiñá, chë Nazaretocá ca.

46 Chora Natanael tbojaniyana: —¿Ndaye tšabe soye Nazaretocana nanjopódia jóbocnama ca?

Y Felipe tbojanjuá: —Mabo y cochjinÿe ca.

47 Natanael yojtsebëconama, Jesús tbojáninÿe ora tojánayana: —Moye canÿe entšá entsabó; cha ndegombre endomerecena Israelbentšana entšá jtsemnama. Cha tšabe entšá endmëna; ndocnábioye quebnatsíngña ca.

48 Chora Natanael Jesúsbioye tbojantjá: —¿Ntšamo atše šcuabuatma ca?

Y Jesús tbojanjuá: —Felipe cabá aca ndëchembo ora, atše tcbonjinÿe, chë higo betiye tēchetšoye condëtsomñe ora ca.

49 As, Natanael tbojaniyana: —Buatëmbayá, ¡aca chë Bëngbe Bëtsabe Uaquiñá comna! ¡Aca, chë Israeloca entšangbe Rey ca!

50 Chora Jesús tbojanjuá: —¿Aca átšbeñe cojtsošbuaché, nÿe chë higo betiye tēchetšoye tcbójinÿe ca tcbójauyanama? Ndegombre, chë soyama más bëts soyënga cochanjinÿe ca.

51 Chentšana Jesús tojanëyana: —Ndegombre šcuayana: Tšëngaftanga šmochanjinÿe celoca atëfjniñe, y Bëngbe Bëtsabe angelotëmënga jtsetsjuajnana y jtsastjajuanana Bëngbe Bëtsá Entšá tbojanbemabe tatsëtsoca.



## 2

*Canýe casamento Galilea luaroca, Caná pueblentše*

<sup>1</sup> Chentšana unga tianoye, canýe casamento inamna, canýe pueblentše Caná ca uabáinentše, Galileoca. Chë oboyejuayoca Jesusbe mamá yojtsemna. <sup>2</sup> Jesús y chabe uatsjédayëgnaca chë casamentoca ófjanënga imojtsemna. <sup>3</sup> Chë oboyejuayentše, vínoye yojtsopochóca y Jesusbe mamá tbojaniana: —Ya tondaye vínoye quemátsbomna ca.

<sup>4</sup> As, Jesús tbojanjuá: —Mama, ¿ndáyeca chca atše šcojtsatsá? Atšbe ora cabá ndoñe ntjoshjanguana ca.

<sup>5</sup> Chentšana, chabe mamá, chentša oservénënga tojanëyana: —Lempe šmochjama, ntšamo cha chacmojayuancá ca.

<sup>6</sup> Chocna, chnënguana ndëtšbé matbaja inamna. Chca matbajënguentša béjayeca, judiënga imojanamana jtsacuéntšabiana cabá ndëse ora, ntšamo tempo entšanga imojanamancá, Bëngbe Bëtsabe delante tšábënga jtsatsmënama. Cada matbajiñe, mo shachna o canýsëfta bnëtsanáua béjaye yojanába.

<sup>7</sup> Chora Jesús chë oservénënga tojanamëndá: “Quem matbajënga béjayeca mobuajutetjé ca.” Y chënga, chora lempe tmojanbuajutetjé.

<sup>8</sup> Y Jesús tojanëyana: “Morna, báseye mobuatsjo y chë fiesta otocanábioye mabuyamba ca.” Y chënga chca tmojanma.

<sup>9</sup> Chora, chë fiesta otocaná, chë béjaye Jesús vínoye tojanbe miye tojanftantiá, ndëmocana yojóboचना ntsetatšëmbcá. Pero chë oservénëngna aíñe imojtsetátšëmbo ndëmocana, er cachënga chë béjaye tmojanbuatsjo. As, chë fiesta otocanana, chë bobontse bouamnábioye tbojanchembo, <sup>10</sup> y tbojaniana: “Nýetscanga monduamana natsana chë más uámana vínoye jushebëcana, y chë ófjanënga becá tmojatëmo ora, chë más batšá uámaniye. Pero acna, chë más uámana vínoye morscama tcojtsabofjajó ca.”

<sup>11</sup> Ntšamo Jesús tojanmcá Caná pueblentše, Galileoca, yojamna chabe natsana bëts soye Bëngbe Bëtsabe obenánaca. Y chca, chabe bëts obenana y uámanana cha tojaninýanyé; y as, chabe uatsjédayënga chábeñe imojtsošbuaché.

<sup>12</sup> Chca tojanopasá chentšana, Jesús canýe pueblo, Capernaum ca uabáinoye tojtsanoñe. Chorna, chabe mamá, chabe catšátanga y chabe uatsjédayënga cha tmojantjëmbambá, y choca baseftatescama tmojanoquedá.

*Jesús Bëngbe Bëtsabe bëts yebnentšana bacna entšanga tojanëbuacna*

*(Mt 21.12-13; Mc 11.15-18; Lc 19.45-46)*

13 Ya canÿe judiëngbe bëts fiesta, chë Bashco fiesta yojétsobeco, chë ntšamo Bëngbe Bëtsá chëngbe bëts taitanga Egiptocana tojánatsebacama jtenójuaboyama. Chë fiestama Jesús Jerusalenoye tojána. 14 Jerusalenoca, Bëngbe Bëtsabe bëts yebnentše, Jesús tojánanÿena uacnënga, oveshënga y paloma enënga, y entšángbioye crocénana atrócayënga, chëngbe luarënguenache imojtsetbiámana. 15 Jesús chca tojánanÿe ora, biajënga tojanaca, tjanjanëja tojanobopormá, y Bëngbe Bëtsabe bëts yebnentšana nÿetscanga tojtanëbuacna, chëngbe oveshënga y uacnëngaca. Chentšana Jesús, Bëngbe Bëtsabe bëts yebnentšama yojanoserverna crocénana atrocayëngbe crocénana tojtsanëjquësheshe, y chë mesëshangá tojtsanenásatajchquëca. 16 Chë paloma enëngna Jesús tojanëyana: —¡Quem soyënga lempe muentšana matábocana! ¡Ndoñe matsbuamnana ni mátenana atšbe Bëtsabe yebnentše, mo cánÿentše jiyama luarentše cuaftsemncá ca!

17 Y as, chabe uatsjëndayënga tmojanenojuabó ntšamo Bëngbe Bëtsabe uabemana palabrënguiñe iuayanama: “Bëngbe Bëtsabe yebna jtseboguianama juabna, nÿets átšbeñe entsemna ca.”

18 Chora, judiënga Jesús tmojantjá: —¿Ndaye bëts soye cochjama bënga chašcuinÿanÿema, aca ndaye deréchoca bëngaftaca chca cojtsobenama ca?

19 As Jesús tojanëjua: —Quem Bëngbe Bëtsabe yebna menásatajchca, y atše unga tese chtëtsbaná ca.

20 Chora chë judiënga tmojanianyana: —Canta bnëtsana chnënguana uatiñe, quem Bëngbe Bëtsabe yebna tmojanjebo. ¿Y aca, nÿe unga tese lempe cochtëtsjebo ca?

21 Pero Bëngbe Bëtsabe yebna, ndayama chora cha chca tojánayana, cachabe cuerpo yojtsemna, ndoñe chë jebna soye. 22 Chama, Jesús obanënguentšana tojtanayena ora, chabe uatsjëndayënga tmojanenojuabó ntšamo muentše cha tojanëyanama. Chca ora, Bëngbe Bëtsabe uabemana palabrënguiñe y Jesús chora tojánayana palabrënguiñe más chënga imojtsošbuaché.

### *Jesús nÿetsca entšangbe juabna iuábuatma*

23 Jesús Jerusalenoca chë Bashco fiestama yojtsemnëntscuana, entšanga tmojáninÿe Jesús jamana bëts soyënga Bëngbe Bëtsabe obenánaca. Chíyeca, ba entšanga chábeñe imojtsošbuaché. 24 Pero Jesús chëngbeñe ndoñe yontsošbuaché, cha nÿetscanga yojanëbuatma causa. 25 Y Jesús ndoñe bonjanájaboto chë entšangbe soyëngama chabotsebuayiynama, er cachá entšangbe ainaniñe nÿetsca juabnënga yojanábuatma.

## 3

*Jesús y Nicodemo*

<sup>1</sup> Inamna canye boyabása Nicodemo ca uabainá. Cha yojamna fariseunguentśá y judiengbe canye amëndayá. <sup>2</sup> Chana ibeta Jesúsbioye tojána y tbojaniana: —Buatëmbayá, bënga fsëntsetatsëmbo aca canye buatëmbayá comnama, Bëngbe Bëtsabe ichmoná. Ndocná quenátobena jamana quem bëts soyënga, aca contsama soyënga, Bëngbe Bëtsá cháftaca ndoñe tontsemnëse. Chiyeca bënga chca fsëntsetatsëmbo ca —cha tbojaniana.

<sup>3</sup> Chora Jesús tbojanjuá: —Ndegombre cbëyana, nda ndoñe cachiñe tontonyná, cha ndoñe quenátobena Bëngbe Bëtsabe amëndayana jinýama ca.

<sup>4</sup> Y Nicodemo tbojantjá: —¿Ntśamo, canye entśá ya bëtsá tojtsemna ora, nantsobena cachiñe jtónynama ca? Ndegombre, cha ndoñe ntsoyobena cachabe mamabe cuerpiñe jtamashënguana cachiñe jtónynama ca.

<sup>5</sup> Chora Jesús tbojanjuá: —Ndegombre cbëyana, bėjayeca y chë Uámana Espíritbeyeca ntjonynacá, ndocná quenátobena Bëngbe Bëtsabe amëndayoye jamashënguama. <sup>6</sup> Nda bëtsëtsabentsana tojonyná cha, quem luarentśa entśangcá jtsemnana; pero chë Uámana Espíritbeyeca tojonyná chana, jtsemnana canya chë Uámana Espiritu ainaniñe bomná.

<sup>7</sup> Ndoñe matenjnanana ntśamo tcbonjauyanama: “Nýetscanga entsamna cachiñe jtónynama”. <sup>8</sup> Chë binýia ndëmuajana tojtseboşe jtsemnana, chëjana jtsanana. Masque entśanga, chë binýiyama jtsuenanana, ndoñe ntsetatsëmbuana ndëmocana yobama y ndëmoye yojsoma. Cachcá, tšëngaftanga ndoñe queśmátstatsëmbo ntśamo entśanga chë Uámana Espíritbeyeca tmojtsónynama; pero tšëngaftanga śmontsetatsëmbo aiñe chca yomnama ca —Jesús tbojaniana.

<sup>9</sup> Chora Nicodemo tbojantjá: —¿Ntśamo chca nántsemna ca?

<sup>10</sup> Y Jesús tbojanjuá: —Aca, canye Israeloca abuatambayá, ¿chë soyëngama ndoñe condëtatśëmbo ca? <sup>11</sup> Ndegombre cbëyana, bëngna chë fststátsëmbo soyëngama fsëntsoyebuambná, y chë tifjinýe soyëngama ndegombre bëtsemnana fsëntsichamo. Pero tšëngaftangna, chë cbontsëtsëtsná soyënguiñe ndoñe queśmatoşbuaché. <sup>12</sup> Atşe, quem luarentśa soyëngama sënjoyebuambá y tšëngaftanga átşbeñe ndoñe cheśmatoşbuaché. Y as, ¿ntśamo átşbeñe śmochtsoşbuáchiye, celoca soyëngama cbojtsëtsëtsnase?

<sup>13</sup> “Ndocná, nýe cachábeyeca Bëngbe Bëtsábioye tonjátsjua. Nýe chë celocana tojabá aiñe, chë Bëngbe Bëtsá Entśá tbojanbemá. <sup>14</sup> Y chcase, ntśamo Moisés entśanga ndoyenoca bronze mëtşcuaye tsbanánoca tbojananguësëtcjá, şoquënga

tšabá chamotsatsmënama; cachcá entsemna, Bëngbe Bëtsá Entšá tbojanbemá entšanga chamuatsbanama; <sup>15</sup> chca, nÿetscanga chábeñe tmojtsošbuáchenga, chë nÿetsca tescama yomna tšabe vida chamotsebomnana ca” —Jesús Nicodémioye tbojaniana.

*Ntsachetsá Bëngbe Bëtsá entšanga iuababuánÿeshana*

<sup>16</sup> Mëntšánaca Jesús tojánayana: —Bëngbe Bëtsá quem luare entšángbioye tša yojánababuanÿeshanayeca, chë nÿe canÿe Uaquiñá ibobomná, bëngbioye tbojichmó, nÿetsca chábeñe ošbuáchiyënga ndoñe chamondóbanama, y aíñe chë nÿetsca tescama yomna tšabe vida chamotsebomnana. <sup>17</sup> Er Bëngbe Bëtsá chabe Uaquiñá quem luaroye ndoñe tbonjichmó quem luare entšangbiama jabáyanama ntšamo tmojamama castigánënga chaotsamnana ca, sinó, entšanga chábeyeca atsebácanënga chamotsemnana.

<sup>18</sup> “Nda Bëngbe Bëtsabe Uaquiñábeñe tojtsošbuáchebiana, Bëngbe Bëtsá ndoñe queochátayana ntšamo cha tojamama, castiganá chaotsemna ca. Pero chë Uaquiñábeñe ndoñe tontsošbuáchebiana, mora Bëngbe Bëtsá ya tojayana, ntšamo tojamama cha castiganá chaotsemna ca, chë Bëngbe Bëtsá nÿe canÿe Uaquiñá ibobomnábeñe ndoñe yontsošbuaché causa. <sup>19</sup> Chca, chë ndoñe tmontsošbuáchengbiamna cha ya tojayana, ntšamo tmojamama castigánënga chamotsemna ca; er chë entšangbe juabnënga binÿnayá quem luaroye tojabo, pero ba entšanga tmojábošena jtsomñana, chë entšangbiama bacna juabnëngaca chamotsebomnana amáftaca. Chënga sempre bacna soyënga jtsamana; chíyeca chënga jtsebošana cháftaca jtsomñana. <sup>20</sup> Chë bacna soyënga tojtsamá ndoñe ntsebošana, chë binÿnayá chabe bacna soyënga chabuinÿinÿema, ni chabe bacna soyëngama chabuácacanama. Chíyeca, chë bacna soyënga jtsamëse oyená, chë binÿnayábioye jtsáboyënjana, y chë binÿnayábioye ndoñe ntjabana. <sup>21</sup> Pero nda sempre tojtsiyena ntšamo ndegombre yomncá jtsamëse, chana aíñe chë binÿnayábioye jabana, chë binÿnayá chabiana chabuinÿinÿema, chë tojama soyëngna, ntšamo Bëngbe Bëtsá tojtsebošcá tojamama ca” —Jesús tojánayana.

*Juan chë Ubayaná cachiñe Jesucristbiana tojanabuayená*

<sup>22</sup> Chca tojanopasá chentsana, Jesús chabe uatsjéndayëngaftaca básefta Judeoca pueblëngoye tojtsanoñe. Chiñe, baseftatescama chë uatsjéndayëngaftaca tojanoquedá, entšanga ubáyana. <sup>23</sup> Cach tempo, Juanënaca entšanga yojanëbáyana Enonoca, Salim béconana, er chocha bëtscá béjaye inabinÿna. Ba entšanga choye imojtsaye, y Juan chënga

yojanëbáyana. <sup>24</sup> Chca tojanopasá, chë Heródesbe soldadënga Juan cabá ndutame ora.

<sup>25</sup> Chë tempo, básefta Juanbe ústonënga tmojanontsé inye judíoftaca enatsëtsnayana ntšamo tempo judiënga chë jtsacuëntšabiama imojanámanama. <sup>26</sup> Chora, chënga Juánbioye tmojánabo y tmojaniyana: —Buatëmbayá, chë Jordán chenguánoica ácaftaca enjamná, ndabiama tša tšabá conjanoyebuambná, mora entsanga entsëbayana y nyetscanga cha montsëstona ca.

<sup>27</sup> As Juan tojanëyana: —Ndocná quenátobena tondaye ntsebomnana, Bëngbe Bëtsá ndoñe tbonjatsetase. <sup>28</sup> Cach tšëngaftanga tšabá šmonjanuena y šmontsobena ndegombre yomnama jayanana, atše ndoñe chë Bëngbe Bëtsabe Uámana Uabuayaná tsjanmëna ca sënjánayanama; sinó, Bëngbe Bëtsá atše šojanichmó chë Uabuayanabe natsana, chabiama entsanga jabábuayenama. <sup>29</sup> Chë tobiaše tojtsobouamá ora, chë bobontse chábioye jtsebomnana; y chabe amigna, chabiama jtsobátmanana y chë bobontse bouamnabe oyebuambnayana jtsuenanana; y chca tojtsuenana ora, tša oyejuayá cha jtsemnana. Cachcá, ntšamo chë Uabuayaná yojtsamama y yojtsóyebuambnama sëntsuenana ora, átšnaca corente oyejuayá sëntsemna. <sup>30</sup> Cha bontsemna más uamaná jtsemnana, pero atše šontsemna más nduamaná jtsemnana ca —Juan tojanëyana.

### *Ntšamo yomna chë celocana tojabá*

<sup>31</sup> Mëntšánaca Juan tojánayana: “Chë tsbanánocana tojabá, nyetsca entsangbiama más uamaná endmëna. Chë quem luare oyená quem luare entsangcá jtsemnana y quem luarentša soyëngama jtsóyebuambnayana, pero chë celocana tojabana, nyetsca entsangbiama más uamaná endmëna. <sup>32</sup> Cachá ntšamo tojinye y tojouencá entsoyebuambná, pero chë entsichamo soyënguiñe ndocná quenatošbuaché. <sup>33</sup> Nda ntšamo cha tojtsóyebuambnañe tojtsošbuaché y chca tojtsama, jtsinýanýnayana Bëngbe Bëtsá ndegombre soyënga inetsichámuama. <sup>34</sup> Chcasna, Bëngbe Bëtsabe ichmonana, jtsóyebuambnayana ntšamo Bëngbe Bëtsá tojtsichamcá. Bëngbe Bëtsana chë ichmonábioye tbojichmó chë Uámana Espíritu, nyets tempo corente chabotsájabuachanama, ntšamo cach Bëngbe Bëtsá tojtsichamo y cachcá chaotsichámuama. <sup>35</sup> Chë Taitá Uaquiñábioye bondbobonshana, y chë Uaquiñábioye obenana tbojatšetá nyetsca soyënguiñe jtsemándayama. <sup>36</sup> Nda chë Uaquiñábeñe tojtsošbuaché, chë nyetsca tescama yomna tšabe vida echántsebomna; y nda chë Uaquiñábioye ndoñe tbontsašbuaché, chana chë vida ndoñe queochátsbomna, y

chë Bëngbe Bëtsabe uabouana castigo nyetsca tescama chábeñe echántsemna ca” —cha tojánayana.

## 4

### *Jesús y chë Samaria luaroca shembása*

<sup>1</sup> Chë fariseunga tmojanuena Jesús, Juanbiamá más ústonënga yojtsabamná, y más entšanga yojtsëbáyana.

<sup>2</sup> Pero ndegombre, cach Jesús ndocnábioye bonýanábayana, sinó chabe uatsjédayënga. <sup>3</sup> Bëngbe Utabná Jesús, ntšamo chë fariseunga tmojanuena tojántatšëmbona ora, Judea luarocana tojéftsanbocna y Galileoye tojtaná.

<sup>4</sup> Choye jtamna ibojamna Samaria luarëjana jachnënguana.

<sup>5</sup> Samariocna, canýe pueblo Sicar ca uabáinoye Jesús tojánashjango. Chë puebló yojamna, chë Jacob chabe uaquiñá Josëbioye tbojéftsanlargá fshantse béconana. <sup>6</sup> Choca yojamna cánýentšë atëfjóniñe, búyeshe jobuatsjuama, Jacobëbe atëfjóniñe ca uabáiniñe. Mo nyetsto ora, chentšë Jesús yojtsemna, aniñe uamëntšayá, chë atëfjóniñe batsjaca yojótbema. <sup>7-8</sup> Chabe uatsjédayëngna chë pueblöye tmojána saná jobuámiñama. Chora, canýe shembása Samariocá, chë atëfjónoye tojánashjango, búyeshe jauafcama; as Jesús tbojaniana: —Búyeshtema šmabuátšeta ca.

<sup>9</sup> Y chë shembása tbojanjá: —Aca canýe judío condmëna y atšna canýe samaritaná. ¿Ntšamo cojtsobena atšë búyeshe juabuátjañama ca? (Cha chca tojánayana, er canjanopasana, judiëngna samaritanëngaftaca ndoñe monjanenatsëtsná.)

<sup>10</sup> Chora Jesús tbojanjá: —Aca mo cojtsetátšëmbo nýe ntšamo Bëngbe Bëtsá aca jatšetayama yojtsebošcá, y nda chë búyeshe cmojtsábuatjanañama, acna más cha catjuábuatjañe, y chana béjaye vida bomniye cmatjuabuátšetaye ca.

<sup>11</sup> Y chë shembása tbojaniana: —Señor, tondaye quecátsbomna nýe mo ndayecnaca búyeshe jabuatsjuama, y chë atëfjóniñe corente tbocha endmëna; y as, ¿ndayentšana cochjobenaye béjaye vida bomniye atšë juabuátšetayama?

<sup>12</sup> Bëngbe tempsca bëts taitá Jacob, quem atëfjóniñe bëngbiamá tojéftsanboshjona. Cachá, chabe básenga y chabe bayënga muentšana búyeshe tmojéftsanofsé; y ¿aca chabiamá más bëtsá comna ca? —chë shembása yojtsichamo.

<sup>13</sup> As Jesús tbojanjá: —Nyetscanga chë quem búyeshentšana tmojofšenga, chënga cachiñe echantëtëjuendaye. <sup>14</sup> Pero chë chanjuabuátšetaye búyeshentšana tojofšé chana ndocna te cachiñe quebochëtajuendaye. Cha chanjuabuátšetaye búyeshna, chábeñe echántsemna mo cánýentšë béjaytema obocaniñcá, chë nyetsca tescama yomna tšabe vida jtsebomnama ca —cha tbojaniana.

15 Chora chë shembása tbojaniyana: —Señor, chca búyeshe šmabuatsëtá, as atše ndoñe cachiñe chašondetsajuendama, ni búyeshe juafcama moye jtsaboyama ndoñe chašondëtsemnama ca.

16 As Jesús tbojaniyana: —Motsa acbe boyá jachembuama y cochjésabo ca.

17 Chora chë shembása tbojanjuá: —Boyá ndoñe quetsátsbomna ca.

As Jesús tbojaniyana: —Tšabá tcjayana boyá ndoñe cond-bomna ca. 18 Er, aca shachna boyanga conjánabamna, y chë mora contsebomnana, acbe boyá ndoñe quenátsmëna. Ntšamo tconjayancá ndegombre entsemna ca.

19 Chë shembása chca tojanuena ora, Jesúsbioye tbojaniyana: —Señor, mora atše sëntsetatsëmbo, aca canya Bëngbe Bëtsabe juabna oyebuambnayá comnama. 20 Bëngbe tempsca bëts taitanga quem tjoca Bëngbe Bëtsá monjánadorana; pero tšëngaftanga, judiënga šmondbëtsichamo, bënga Bëngbe Bëtsá jadóramna, Jerusalemoca chë luare canmëna ca.

21 Chora Jesús tbojanjuá: —Shembása, šmoyeuná; canye tempo echanjóshjango y chora tšëngaftanga ndoñe quecmochátamna Bëngbe Bëtsá jadóramna, ni quem tjoye jabana, ni Jerusalemoye jana. 22 Tšëngaftanga samaritanënga ndoñe quešmatábuatma nda šmetsadoránama; pero bënga aïñe fsënduábuatma, er chë atsebacayá judiënguentšana endabó. 23 Pero ora entsoshjajuana, ya chë tempo tocjobuache, ndaye ora chë Bëngbe Bëtsá chë Taitá ndegombre atschuanayënga, chë Espíritbeyeca y ndegombre juabnëngaca chábioye mochántsadorana. Er chë Taitá entseboše chë chábioye adórayënga chca chamotsamama. 24 Bëngbe Bëtsá, Espiritu endmëna; y chë chábioye adórayënga entsamna, chë Uámana Espíritbeyeca y ndegombre juabnëngaca cha jtsadoránana ca —Jesús tbojaniyana.

25 Chora chë shembása tbojaniyana: —Atše sëndëtatšëmbo, canmëna chë Bëngbe Bëtsabe Uámana Uabuayaná, chë Cristo jabana ca; y cha chaojášhango orna, cha nyetsca soyëngama cašochjabuayená ca.

26 As Jesús tbojaniyana: —Atše, chë ácaftaca entsoyebuambná cha, cha entsemna ca.

27 Chëntscuana, Jesusbe uatsjëndayënga tmojtanashajna, y tmojtsanëuatjaná, Jesús canye shembásaftaca yojtsoyebuambná causa. Pero ndocná Jesús tbonjantjá: ¿Ndayá cháftaca cojtseboše? o ¿Ndáyeca cháftaca cojtsoyebuambná ca?

<sup>28</sup> Chorna, chë shembása chabe uafcanëja tojésanboshjona, y chë puebloye betesco tojtaná. Chocna, entšanga tojanëyana: <sup>29</sup> “Mabënga canÿe boyabása jinÿama ca. Cha atše šonjauyana lempe ntšamo tijamcă. ¿Chë boyabása, chë Cristo tanántsemna ca?” —cha yojtsichamo.

<sup>30</sup> As chë entšanga chë pueblócana tmojánbocana y Jesús yojtsemnoye tmojánashajna. <sup>31</sup> Chca yojtsopasánentscuana, chë uatsjéndayënga Jesúsbioye imojtseimpadana: —Buatëmbayá, batšatema mose ca.

<sup>32</sup> Pero cha tojanëyana: —Atše canÿe soye jasama šentsebomna. Tšëngaftanga chë soyama ndoñe quešmátstatšëmbo ca.

<sup>33</sup> Chora chë uatsjéndayënga tmojanontšé entjanayana: —¿Nderado nda jasama chabiana tojiÿebo ca?

<sup>34</sup> Y Jesús tojanëyana: —Chë šonjichmó cha ntšamo yojtsebošcă jamana, y chabe trabajo japochócana, chë soyënga mo sanacá atšbiana entsemna. <sup>35</sup> Tšëngaftanga šmondbétsichamo: “Cabá canta ishinye entsashbena jaja saná chaotsebínÿnama ca”; pero atše cbëyana: Minÿënga tša entšanga moye montsabëbana; chënga montsemna mo jajañe saná játbanama tojtseprontancá. <sup>36</sup> Tšëngaftanga šmontsemna mo chë saná atbanayëngcă. Chëngna jajañe jtsetrabájayana, y chëngbe uacanáana jtsësháchiñana. Cachcă, tšëngaftanga cmontsamna atšbiana entšanga júbuajana, chë nÿetsca tescama yomna tšabe vida chamotsebomnama. Chë jaja saná átbanaye ora, jenënga y chë atbanayënga cánÿiñe oyejuayënga jtsemnana. Cachcă, chë entšanga átšbeñe chamojtsošbuaché ora, nÿetscanga, chë atšbiana obuájajanënga y chë atšbiana trabájayëngnaca cánÿiñe oyejuayënga mochántsemna. <sup>37</sup> Quem entšangbe ichámuana, canÿe ndegombre soye endmëna: “Chë jená canÿa jtsemnana, y atbanayana inÿa ca.” <sup>38</sup> Atše tšëngaftanga cbonjichamó canÿe soye játbanama, y tšëngaftanga tondaye chešmatsma chca chaotsebínÿnama. Inÿënga chiñe bëtscá tmonjëftsetrabája, y tšëngaftangna, chëngbe trabajënguentsána šmojologañe ca —Jesús tojánayana.

<sup>39</sup> Bëtscá entšanga, Samarioca pueblentšënga Jesúsbeñe imojtsanošbuaché, ntšamo chë shembása tojanëyanama. Chë shembása tojanëyana: “Lempe ntšamo atše tijamcă cha šonjauyana ca.” <sup>40</sup> As chë samaritanënga, Jesús yojtsemnentše tmojánashajna ora, tmojanimpadá chëngaftaca chaotsoquedáñama. Y as Jesús, uta te chentše tbojëftsanjétana. <sup>41</sup> Y más entšanga, cach ntšamo Jesús yojtsanëtsëtsnacá tmonjanuena ora, chábeñe imojtsanošbuaché.



42 Y chë shembása chë entšanga tmojanijana: “Mora cocayé fsëntsošbuaché, ndoñe nýe ntšamo aca šcojáuyanama, sinó cach bēnga chábioye oído fsēnjabuajóyeca; y mora fsēntsetatšēmo ndegombre cha yojtsemna chë quem luare entšangbiana Atsebacayá ca.”

*Jesús, canýe mandado uajabuachanabe básabioye tbojanshná*

43 Uta te chentšana, Jesús Samariocana tojáisanbocna y Galileoye tojataná. 44 Cach Jesús mēntšá tojánayana: “Canýa Bēngbe Bētsabe juabna oyebuambnayá, cachabe luarentše oyenēnga ndoñe bētsá ntjabemēngana ca.” 45 Galileoca oyenēnga Jerusalemoye tmojána, y tmojáninýe nýetsca bēts soyēnga ntšamo Jesús Bashco fiesta ora choca tojanmcá. Chíyeca, Jesús Galileoye tojtanashjango ora, chēnga tšabá tmojtanojfa.

46 Galileocna, Jesús cachiñe Caná puebloye tojésanashjango, chë béjayeca vínoye cha tojánbementše. Choca yojtsemna canýe mandadbe uajabuachaná, y chabe uaquiñana Capernaum puebloca šocá yojtsejájona. 47 Jesús Judeocana Galileoye tojánashjanguama, chë uajabuachaná tojanuena ora, Jesúsbioye tojána y ibojtseimpadana chabe yebnoye cháuama, chabe uaquiñá chabuetseshnáñama, er ya jtsóbanama yojtsemna ca. 48 As Jesús tbojanijana: —Tšēngaftanga, Bēngbe Bētsabe obenana jinýanýiyama bēts soyēnga atše jamama ndoñe šmonjinýese, átšbeñe ndocna te ntsošbuáchiyana ca.

49 Chora, chë mandadbe uajabuachaná Jesúsbioye tbojanijana: —Taita, betesco mabo, atšbe uaquiñá cabá ndóbana ora ca.

50 As Jesús tbojanijana: —Acbe yebnoye motsatá. Acbe uaquiñá ainá endētsomñe ca.

Chë boyabásana tojanošbuaché ntšamo Jesús tbojanijancá y tojtaná. 51 Cha yojtsataye orna, chabe oservēnēnga tmojánbocana jajēbenguama y tmojanijana: —Acbe uaquiñá tšabá entsatsmēna ca.

52 As cha tojanatjá: —¿Ntseco orscana thēnjatēcja ca?

Y chēnga tmojanjuá: —Tonjopasá yēfse, mošenana orscana chë calentora tbonjábosana ca.

53 Chora chë taitá tojanenojuabó, cachca ora Jesús tbojanijana: “Acbe uaquiñá ainá endētsomñe ca”. Y cha y nýetscanga chabe yebnentše oyenēnga Jesúsbeñe imojtsanošbuaché.

54 Ntšamo Jesús chora, chë uajabuachanabe uaquiñabiana tojanmcá, Judeocana Galileoye yojtsataye orna, yojamna chabe utama chca bēts soye jamama, Bēngbe Bētsabe obenana jinýanýiyama, Galilea luaroca.

## 5

*Jesús canye jama ndobenábioye tbojanshná*

<sup>1</sup> Baseftayté chentsana, chë judiënga canye oboyejuaye te imojtsebomna ora, Jesús Jerusalenoye tojána. <sup>2</sup> Choca, chë Oveshëngbe amashjuana ca uabáinentše yojamna canye binche uafjajónaye, entsangbe pormániñe. Chë béjayna judiëngbe biyañe Betzata ca inauabaina. Chë béjaye juachañe shachna amashjuana otsbojebniñe inamna. <sup>3</sup> Chiñna ba šoquënga jtanënga, coshetënga y jama ndobenënga imojtsecjana; chë béjaye chamobonjoma imojtsobátmana. <sup>4</sup> (Nderado nderado, Bëngbe Bëtsábioca canye ángel yojanamana jastjanguana chë béjaye jabónjuama. Chca ora, chë béjayoye natsana tojamashënguá, chabe šocanama tšabá jtsatsmënana.) <sup>5</sup> Chë šoquënguiñe canye boyabása inamna, unga bnëtsana y posufta uatama jama ndobená. <sup>6</sup> Jesús chë jajonábioye tbojáninye ora y ba uatama chca yojamnana tojántatšëmbona ora, tbojantjá: —¿Quecojtseboše tšabá jtsatsmënana ca?

<sup>7</sup> Y chë šocá tbojanjuá: —Taita, ndocná quetsátsbomna nda chašuájabuache béjayoye jamashënguama, chë béjaye tojtsobonjá ora. Y atše béjayoye jamashënguama stseboše ora, inya atšbe natsana jtsamashënguana ca.

<sup>8</sup> Y Jesús tbojaniyana: —Matëtsbaná, acbe tjuashe mesocñe y matontšé jóyenana ca.

<sup>9</sup> Cach ora chë boyabása tšabá yojtsatsmëna, chabe tjuashe tojésanocñe y tojanontšé jtsanana. Chca tojanopasá ora, chë ochnayté inamna. <sup>10</sup> Chíyeca, chë tbojanshnábioye chë judiënga tmojaniyana: —Mëntena ochnayté. Mënté ndoñe quenátopodena aca tjuashe jtsecutsnana ca.

<sup>11</sup> Y chë boyabása tojanëyana: —Chë šonjashná cha mëntšá šonjauyana: “Acbe tjuashe mesocñe y montšé jóyenana ca”.

<sup>12</sup> As chënga tmojantjá: —¿Nda yojtsemna chë “acbe tjuashe mesocñe y montšé jóyenana ca” tcmojauyaná ca?

<sup>13</sup> Pero chë shnaná ndoñe yontsetátšëmbo nda tbojanshnama. Chocna bëtscá entsanga imojtsemna; chcasna, Jesús chëngbe tsëntsajana tojanenatjëmba.

<sup>14</sup> Chentsana, Jesús Bëngbe Bëtsabe bëts yebnentše chë boyabásabioye tbojáninýena y tbojaniyana: —Mouena; mora aca ya ndoñe šocá quecátsmëna; bacna soyënga ndoñe cachiñe cattsama. Aíñese, acbiama puerta mal echanjopása ca.

<sup>15</sup> Chë boyabása tojtsanoñe y chë judiënga tojanëyana: —Chë šonjashná cha Jesús entsemna ca.

<sup>16</sup> Chë causa, chë judiënga imojtsenguaye ntšamo Jesús ndayánaca jabórlana, cha ochnayté chë soyënga tojanmama. <sup>17</sup> Pero Jesús tojanëyana: “Atšbe Taitá nyets tempo tšabe

soyënga endbétsama; cachcá, átšnaca tšabe soyënga sěntsama ca.”

<sup>18</sup> Jesús tojanma ntšamo ochnayté ndoñe yonjanapodencá, y Bëngbe Bětsabiamma tojánayana “Atšbe Taitá ca”. Měntšá Jesús yojtsanobiamná cach Bëngbe Bětsacá. Chama, chě judiënga más imojtseboše Jesús jóbama.

### *Bëngbe Bětsabe Uaquiñabe obenana*

<sup>19</sup> Chentšana Jesús tojaněyana: “Ndegombre šcuayana: Bëngbe Bětsabe Uaquiñá, nje cachabe cuenta tondaye quenátobena jamana. Cha jtsoněyana ntšamo chabe Taitá tojtsamcá. Ntšamo chě Taitá tojtsamcá, chě Uaquiñánaca jtsamana. <sup>20</sup> Er Bëngbe Taitá chabe Uaquiñábioye bondbobonshana, y lempe ntšamo cha tojtsamcá chábioye bondiněinyná; y más běts soyënga bochanjiněiněiye, chě soyëngama tšëngaftanga chašmenjanama. <sup>21</sup> Chě Taitá endama obanënga chámuatayenama y tšabe vida chamotsebomnama; cachcá, chě Uaquiñá entsama tšabe vida chamotsebomnama, nděmuaněyenga cha tojtsebošcá. <sup>22</sup> Chě Taitá ndocnabiamma jatichámuana tšabá o ndoñe tšabá yontsama ca. Chabe Uaquiñábioye njęts obenana tbonjatšetá njętscangbiamma jayanama tšabá o ndoñe tšabá tmontsamama. <sup>23</sup> Chca, chënga chamuiněiněyě Bëngbe Bětsabe Uaquiñá puerte uamaná yomnama, ntšamo Bëngbe Bětsá puerte uamaná yomnama njętscanga mondbetsiněiněynaycá. Nda chě Uaquiñábioye ndoñe más uamaná tbontsebiamná, cach ndoñe más uamana ntsebiamnayana chě Taitábioye, nda chě Uaquiñá tbojichmóbioye.

<sup>24</sup> “Ndegombre šcuayana: Nda ntšamo atše sěntsichamcá šojoyeuná, y chě muentše šonjichmó chábeñe tojtsošbuaché, chě njętsca tescama yomna tšabe vida jtsebomnana. Chabiamma chě Uaquiñá ndoñe queochátayana castiganá chaotsemna ca. Chca, Bëngbe Bětsabiamma cha ya ndoñe más mo obanacá queochátsmëna, chábeñe ndošbuáchiye causa; y ya ndoñe njętsca tescama castiganá queochátsmëna. Y añe, chě njętsca tescama yomna tšabe vida echántsebomna.

<sup>25</sup> “Ndegombre šcuayana: Chě jobuáchama te ya tojjobuache. Chě te, chě Bëngbe Bětsabiamma mo obanëngcá imomnënga mochanjouena Bëngbe Bětsabe Uaquiñá jtsóyebuambnayana. Nda chca tšabá chašojoyeuná cha, tšabe vida echántsebomna. <sup>26</sup> Er ntšamo Bëngbe Taitá obenana endbomncá, cachá jamama entšanga vida chamotsebomnama, chabe Uaquiñábioynaca obenana tbojatšetá entšanga vida chamotsebomnama jamama. <sup>27</sup> Chě Uaquiñá endmëna nda Bëngbe Bětsá Entšá tbojánbema; chíyeca chě Taitá chábioye obenana tbojatšetá njętscangbiamma

jayanama tšabá o ndoñe tšabá tmontsamama. <sup>28</sup> Chama ndoñe matenjnanana. Er canye tempo echanjobuache, y chora chë Uaquiñá obanënga echántsachembuana; chënga mochanjouena y cach ora, chëngbe oyenocana mochanjësebocana. <sup>29</sup> Tšabe soyënga tmojëftsemënga, obanënguentsana mochántayena, chë nyetsca tescama yomna tšabe vida jtsebomnama. Pero bacna soyënga tmojëftsemëngna obanënguentsana mochántayena nyetsca tescama castigánënga jtsemnama ca” —Jesús tojanëyana.

*Jesús, ndegombre Bëngbe Bëtsabe ichmoná inamna*

<sup>30</sup> Mëntšánaca Jesús cachatbiama tojánayana: “Nye átšbeyeca tondaye quetsátobena jamama. Chë Taitá šontsemánda ntšamo nyetscangbiama jayanama tšabá o ndoñe tšabá tmontsamama. Nye chca atše sentsobena chë soye jamama. Ndoñe quetsátšboše jamana nye ntšamo cach atše stsebošcá; pero sempre sëndbétseboše jamama, ntšamo Taitá, chë šonjichmó cha tojtsebošcá. Chiyeca atše nyetscangbiama sentsichamo tšabá o ndoñe tšabá tmontsamama; y ntšamo nyetscangbiama sentsichamcá, ndegombre endmëna.

<sup>31</sup> “Ntšamo cach atšbiama tijayanama, ndegombre entsemna ca stsichámëse, ntšamo stsichamcá, nyetscangbiama tondaye ntsámanana. <sup>32</sup> Pero inya entsemna. Cha endétatšëmbo y entsichamo ntšamo ndegombre atšbiama yomncá; y sëntsetatšëmbo ntšamo cha atšbiama yojsichamcá, nyetscangbiama aíne yojsámanama.

<sup>33</sup> Tšëngaftanga ínÿenga šmojanichamó atšbiama Juan jatjayama; y ntšamo cha tcmojauyancá ndegombre endmëna. <sup>34</sup> Masque chë soyënga cha tcmojáuyana, ndoñe quešnatájaboto ndocna entšá atšbiama chaotsichamo ‘cha aíne chca endmëna ca’. Atše quem soyënga sentsichamo ndayá nye tšëngaftanga atsebácanënga chašmotsemnama.

<sup>35</sup> Juan enjamna mo canye uajuinÿanësha tojtsajuinÿana y tojtsabuashinÿinÿancá. Tšëngaftanga chabe buashinÿinÿanana šmonjinÿe, y šmonjábošena rato cháftaca oyejuayënga jtsemnama. <sup>36</sup> Pero chë atše sënjama soyëngacna más entsinÿinÿena ntšamo atšbiama ndegombre yomncá, chë ntšamo Juan atšbiama tojánayanama. Ndayá atšbe Taitá šojabonyé jamama, ntšamo atše sentsamcá, entsinÿinÿná ndegombre chë Taitá šojichmoma. <sup>37</sup> Atšbe Taitá, chë šojichmó chánaca entsichamo ntšamo atšbiama ndegombre yomncá, masque ndocna te chabe oyebuambnayana chešmatuena, ni ntšamo cha yomncá chešmátinÿe.

<sup>38</sup> Pero tšëngaftangbe ainanoye chabe palabra ndoñe tonjómarshëngo, cha tbojichmóbeñe tšëngaftanga ndoñe quešmatošbuaché causa. <sup>39</sup> Tšëngaftanga, Bëngbe Bëtsabe

palabra tša jtsatsjédayana, er šmondobátmana, chca jtsamëse chë nyetsca tescama yomna tšabe vida jónyënama. Y Bëngbe Bëtsabe uabemana palabrënguiñe atšbiana endayana ntšamo ndegombre yomncá; <sup>40</sup> pero masque chca, tšëngaftanga ndoñe quešmátsboše atše jtséstonana, y chca, tšabe vida jtseboamna.

<sup>41</sup> “Atše ndoñe quetsátsboše entšanga yapa tšabá atšbiana chamotsichámuama. <sup>42</sup> Y inye soye, atše puerte cbondëbuatma, y sëndétatšëmbo tšëngaftanga Bëngbe Bëtsá ndoñe šmondobonshánama. <sup>43</sup> Atšna atšbe Taitabe cuenta sënjabo, y tšëngaftanga ndoñe quešmátsboše atše jofjana. Pero inya, cachabe cuenta tojabábioye cocayé aiñe šmatjofja. <sup>44</sup> Tšëngaftanga corente jésebošana, ínýenga tšëngaftangbiana tšabá chamotsichámuama, y ínýengbiana tšabá jtsichámuama; pero ndoñe ntsebošana chë nye canye Bëngbe Bëtsá tšëngaftangbiana cachcá chaotsichámuama. Chca šmojtsamëse, ¿ntšamo šmochtobena Bëngbe Bëtsábeñe jtsošbuáchiyana? <sup>45</sup> Ndoñe šmattsejuabnaye, atšbe Taitabe delante tšëngaftangbe contra atše chjayana ca ntšamo tšëngaftanga šmojtsamama. Tšëngaftanga tša jtsobátmanana atsebácanënga jtsemnama, chë ntšamo Moisesbe leyíñe endayancá šmojtsamama; pero ndegombre, ntšamo cha tojayancá, cach tšëngaftangbe contra entsemna. <sup>46</sup> Tšëngaftanga, chë Moisés tojéftsanabema soyiñe šmojtsošbuachese, átšbeñnaca šmattsošbuáchiye, er cha atšbiana tojanábema. <sup>47</sup> Pero chë tojanábema soyiñe tšëngaftanga ndoñe šmontsošbuachesna, ¿ntšamo šmochjobenaye chë atše séntsichamo soyënguiñe jtsošbuáchiyana ca?” —Jesús tojanëyana.

## 6

*Jesús shachna uaranga boyabásenga saná tojanacaredadó (Mt 14.13-21; Mc 6.30-44; Lc 9.10-17)*

<sup>1</sup> Chë soyënga tojanopasá chentšana, Jesús chabe uatsjédayëngaftaca tojana Galilea uafjajónaye chenguana. Chë uafjajónayna Tiberias cánaca inauabaina. <sup>2</sup> Ba entšanga imojtséstonana, er chënga tmojáninýe cha bëts soyënga jtsamana, šoquënga jtsashnayëse. <sup>3</sup> As Jesús tjoye tojántsjua, y choca chabe uatsjédayëngaftaca tojanótbema. <sup>4</sup> Ya judiëngbe canye fiesta, chë Bashco fiesta, yojétsobeco.

<sup>5</sup> Jesús tojanótbema ora, tojanontješé y tojánanýe ba entšanga chábioye imojetsebéconaye. As Felípbioye tbojaniyana: —¿Ndayentše saná cuanjabuámiye nyetsca quem entšanga chamosama ca?

<sup>6</sup> Jesús chca tbojaniyana, ana Felípbioye jinýama ntšamo cha tabuanjojuama; er cach Jesús tšabá inatátšëmbo ndayá

jamama. <sup>7</sup> Y Felipe tbojanjuá: —Ni mo uta patse denario crocenánaca nanjopódia tandëse jabuámiyama, nÿetsca entšanga nÿe mo batšatémnaca chamuétsesama ca.

<sup>8</sup> Chorna, Jesusbe canÿe uatsjendayá, Andrés ca uabainá, Simón Pédrëbe catšata, Jesúsbiöye tbojaniana: <sup>9</sup> —Muentse entsemna canÿe básetema y cha shachna cebada tandëse y uta beónata entsebomna. Pero, ¿ndayase nÿe nÿetsatema chëfta entšangbiama ca?

<sup>10</sup> As Jesús tojánayana: —Entšanga mëyana chamotbiama ca.

Becá shácuana chë luariñe inamna, y nÿetsca entšanga chiñe tmojanoshëntsjatbiama. Chë entšanguentse shachna uaranga boyabásenga imojtsemna. <sup>11</sup> Chora Jesús, chë tandëse chabe cucuatšifne tojanca, y Bëngbe Bëtsáböye chë tandësama tbojtanchuá; y chabe uatsjéndayënga tojanëjatá, y chë uatsjéndayëngna nÿetsca entšanga imojtsetbiámanënga tmojanatsatá. Cachcá Jesús chë beónaca tojanma, y ntšamo entšanga imoijanbošcá tmojanatsatá. <sup>12</sup> Nÿetscanga tmojanse y tmojtanoshachá ora, Jesús chabe uatsjéndayënga tojanëyana: —Chë ojamnëtemënga šmochtsatbananga, tondaye nÿe cachcá ntjëftsonÿayama ca.

<sup>13</sup> As chënga tmojanatbaná, y chë tmojanse shachna cebada tandësentšana tojanójamëtemëngaca, bnëtsana uta sbarëcua tmojanajutjë. <sup>14</sup> Chë entšanga quem bëts soye Jesús jamama tmojáninÿe ora tmojánayana: “Ndegombre quem boyabása, chë quem luaroye jabama Bëngbe Bëtsabe juabna jabóyebuambayama cha entsemna ca.”

<sup>15</sup> Jesús yojtsetátšëmbo entšanga chëngbe rey jabemama imojetsebošama. Chíyeca cach tjoye tojtsaisanoñe canÿa jt-somñama.

*Jesús béjaye juatsbuacá yojtsaye*

*(Mt 14.22-27; Mc 6.45-52)*

<sup>16</sup> Tojanibétata ora, Jesusbe uatsjéndayënga chë uafjónayoye tmojantšamá; <sup>17</sup> barquëshañe tmojtanenojayé, y tmojanontšé jenashbuachënguana, chca, Capernaumoca jembocnama. Ya ibeta yojtsemna, y Jesús cabá ndoñe chëngbiöye ntashjanguana. <sup>18</sup> Chca imojtsenashbuachnëjuana orna, chë béjayeñe jabuache binÿia tojanóshjango y bëts olëshënga chë barquëshoye yojtsóyantšetaye. <sup>19</sup> Shachna o chnënguana kilómetro chënga tmojána ora, tmojáninÿe Jesús chëngbiöye yojtsebëconaye, béjaye juatsbuacá yojtsaye. Chënga chca tmojáninÿe ora tša tmojanocochauatjaná, <sup>20</sup> pero Jesús tojanëyana: “Atse sëndmëna; ndoñe matauatjëngana ca.”

<sup>21</sup> Chora chë uatsjéndayënga oyejuayënga imojtseboše Jesús chë barquëshoye jofjana, y ndoñe bënëntscose ya chë imojtsaye luaroye tmojánashjajna.

### *Entšanga Jesús tmojánanguango*

<sup>22</sup> Yěfsana, nýetsca entšanga, chë uafjajónaye chenguánoica tmojanoquedanga tmojáninýe, chë inýe yěfsana chë nýe canýe barquëshá yojuamněshañe Jesúsbe uatsjédayěnga tmojtsanoñama, y Jesús chěngaftaca ndoñe tonjánama. <sup>23</sup> Pero chěntscuana, Tiberias pueblentšana inýe barquëshangá tojanáshjajna canýe luarentše, chë Běngbe Utabná Jesús chabe Taitábioye tbojtanchuá chentšana, entšanga saná tmojanse luare béconana. <sup>24</sup> Asna, ni Jesús ni chabe uatsjédayěnga chentše ndoñe montsemnama chë entšanga tmojáninýe ora, chë barquëshangañe tmojtanenojayé y Capernaumoye tmojána Jesús jetsenguanguama.

*Jesús, chë nýetsca tescama yomna tšabe vida jtsebomnama tanděse*

<sup>25</sup> Chë uafjajónaye chenguánoye tmojánashjajna ora, Jesús tmojáninýena y měntšá tmojantjá: —¿Buatěmbayá, ntseco ora muentše tcojášhango ca?

<sup>26</sup> Y Jesús tojaněyana: —Ndegombre cběyana, tšěngaftanga ndoñe atše quešmatsnguá, chë běts soyěnga tijamama, sinó nýe chë jtoshachaye nýetšá tanděse šmojasama. <sup>27</sup> Ndoñe matenángmenana chë nýe ndoñe bën y jopochócana sanama; chë ndmopochócaye saná, chë nýetsca tescama yomna tšabe vida jtsebomnama saná šmochjánguango. Chë saná, Běngbe Bětsá Entšá tbojanbemá cmochanjátšataye, er Běngbe Bětsá chë Taitá tonjinýanyé, tšabe soyěngaca, cha chábioye tbojuábuayanama ca —tojánayana.

<sup>28</sup> Chora chë entšanga tmojantjá: —¿Ndayá fchjama ntšamo Běngbe Bětsá yojtseboščá chaotsemnama ca?

<sup>29</sup> Chca tmojantjá ora, Jesús tojaněyana: —Chë Taitá entseboše tšěngaftanga chabe ichmonábeñe chašmotsošbuáchema ca.

<sup>30</sup> Chora chěnga tmojanियana: —¿Ndaye tšabe soye cochjama acbe obenana běnga jinýanýiyama ca? Chë soye chaftsjinýěse, ácbeñe fchantsošbuáchiye. ¿Běngbiana taicochjama ca? <sup>31</sup> Běngbe tempsca běts taitanga entšanga ndoyenoca maná ca uabaina saná tmojanse. Běngbe Bětsabe uabemana palabrěnguiñe měntšá endayana: “Cha celoca tanděse tonjanatšatá chamosama ca” —chěnga tmojánayana.

<sup>32</sup> Chora Jesús tojaněyana: —Ndegombre cběyana, Moisés chěnga ndoñe chë celoca tanděse tonjanatšatá; Běngbe Bětsá Běngbe Taitá chěngbioye tojanatšatá chë maná ca uabaina tanděse; y cha endměna nda celocana chë ndocna te ndmopochócaye tanděse ndegombre cmondatsatná. <sup>33</sup> Er Běngbe Bětsábíocana tanděse entsemna chë celocana tojastjanguá; y

cha quem luare entšangbiamama entsama chë nyetsca tescama yomna tšabe vida chamotsebomnama ca —cha tojanëyana.

<sup>34</sup> Chora chënga tmojanimpadá: —Taita, chë tandëse sempre šcochtsatšatnaye ca.

<sup>35</sup> Y Jesús tojanëjua: —Atše sëndmëna entšanga chë nyetsca tescama yomna tšabe vida jtsebomnama tandëse. Nda atše chašojtsëstona, sempre oyejuayá echanjëftsemna y Bëngbe Bëtsabe soyënga nyets tempo echanjesóbomñe, mo nda nyets tempo saná totsobomñcá, y ndocna te tbontsishëntsancá.

<sup>36</sup> Pero ntšamo ya tcbonjauyancá, tšëngaftanga atše šmonjinÿe y cabá ndoñe átšbeñe quešmatošbuaché. <sup>37</sup> Nda atšbe Taitá atšbiamama tbojabocacá, cha atše šochantsëstona; y nda átšbioye šojtsëstona, átšbentšana quichtëtábocna. <sup>38</sup> Er atšna celocana sënjabo chë šojichmó cha ntšamo yojtsebošcá jamama, y ndoñe nÿe ntšamo atše stsebošcá. <sup>39</sup> Y chë šojichmó cha entseboše, ni mo canÿa chë atšbiamama tojabacacá chentšana, atše chailesenciá pochocaná chaotsemnama; y quem luare jopochócama tena, nyetscanga atšbiamama tojábacacangbiamama chámuatayenama atše chaimama. <sup>40</sup> Er atšbe Taitá entseboše, nda chabe Uaquiñábioye tbojinÿe y chábeñe tojtsošbuaché, chë nyetsca tescama yomna tšabe vida chaotsebomna, y quem luare jopochócama tena, cha cháuatayenama atše chaimama ca —Jesús tojanëyana.

<sup>41</sup> “Atše sëntsemna chë celocana tojóshjango tandëse ca” Jesús tojanëyana causa, chë judiënga tmojanontšé chabiamama podesca ichámuana. <sup>42</sup> Chënga mëntšá imojtsichamo: —¿Mua ndoñe Jesús yondmëna, chë Josebe uaquiñá? Chabe bëtsëtsata bënga tmotsábuatmñe. ¿Ntšamo cha mora yochjátichamo celocana tojástjango ca?

<sup>43</sup> As Jesús tojanëyana: —Atšbiamama ndoñe podesca matichámuana. <sup>44</sup> Ndocná quenátobena atše juastana, chë Taitá, chë šojichmó cha, ainaniñe chca chaotsebošama ndoñe tbonjuajabuáchëse; y atše chanjama cha cháuatayenama quem luare jopochócama te. <sup>45</sup> Chë tempsquënga Bëngbe Bëtsabe juabna oyebuambnayënga mëntšá tmojanábema: “Cach Bëngbe Bëtsá nyetscanga echanjabuatambá ca.” Chcasna, nda atšbe Taitábioye tbojoyeuná, y ntšamo chë Taitá tbojabuatëmbacá tojuatsjinÿe, cha atše šochanjuasto.

<sup>46</sup> “Ndocná atšbe Taitá tbojinÿe. Nÿe chë Bëngbe Bëtsábiocana tojabá aiñe. <sup>47</sup> Ndegombre šcuayana: Nda átšbeñe tojtsošbuaché, chë nyetsca tescama yomna tšabe vida echántsebomna. <sup>48</sup> Atše sëndmëna entšanga chë nyetsca tescama yomna tšabe vida chamotsebomnama tandëse. <sup>49</sup> Masque tšëngaftangbe bëts taitanga, entšanga ndoyenoca chë maná ca uabaina saná tmojanse, pronto tmojanóbana.



<sup>50</sup> Pero atše sëntsoyebuambná ndayá chë celocana tojóshjango tandëšama. Nda chë tandëše tojase, ndoñe queochatóbana.

<sup>51</sup> Atše sëntsemna entsanga chë nyetsca tescama yomna tšabe vida jtsebomnama tandëše, chë celocana tojóshjanguëše. Nda quem tandëše tojase, nyetsca tescama nye ainá echanjesomñe. Chë chanjátšataye tandëšna, cach atšbe cuerpo entsemna. Chca chanjama quem luare entsanga chë nyetsca tescama yomna tšabe vida chamotsebomnama ca” —Jesús tojánayana.

<sup>52</sup> Chora chë judiënga tmojanontšé enatsëtsnayana: — ¿Ntšamo cha yochjobenaye cachabe cuerpo jatšatayana bënga jasama ca?

<sup>53</sup> As Jesús tojanëyana: —Ndegombre šcuayana: Tšëngaftanga Bëngbe Bëtsá Entšá tbojanbemabe cuerpo ndoñe šmonjase y chabe buiñe ndoñe šmonjofšese, ndegombre tšabe vida ndoñe quešmochátsbomna. <sup>54</sup> Nda atšbe cuerpo tojase y atšbe buiñe tojofšé, chë nyetsca tescama yomna tšabe vida echántsebomna, y quem luare jopochócama te atše chanjama cha cháuatayenama. <sup>55</sup> Atšbe cuerpo ndegombre saná endmëna, y atšbe buiñe ndegombre ofšëšnayiye.

<sup>56</sup> Nda atšbe cuerpo tojase y atšbe buiñe tojofšé, átšeftaca cányiñe mo canyáca echántsemna, y átšnaca cháftaca. <sup>57</sup> Atšbe Taitá, chë šojichmó cha, vida endbomna, y atše chábeyeca vida séndbomna; cachcá, nda atšbe cuerpo tojase, chana átšbeyeca vida jtsebomnana. <sup>58</sup> Chë ndaye soyama atše sëntsoyebuambná, atšbe cuerpo y atšbe buiñe, entsemna chë celocana tojóshjango tandëše. Masque tšëngaftangbe bëts taitanga chë maná ca uabaina tandëše tmojanse, pronto tmojanóbana; pero quem tandëše ndoñe cachcá quenátsmëna. Nda quem tandëše tojase, nye nyets tempo vida echanjesóbomñe ca —Jesús tojánayana.

<sup>59</sup> Chë soyëngna Jesús tonjanabuatambá Capernaum pueblentše, chë judiëngbe enefjuana yebnentše.

*Chë nyetsca tescama yomna tšabe vida jtsebomnana pal-abrënga*

<sup>60</sup> Chca tmojanuena ora, banga Jesusbe ústonënga imojtsichamo: —Ntšamo cha entsichamcá yapa totcá entsemna mo ndegombre cuaftsemncá joyeunayama. ¿Nda buanjóyeunaye ca?

<sup>61</sup> Jesús yojtsetátšëmbo chënga ndoñe tšabá imontsichámuama; as, chënga tojanatjá: —¿Ntšamo cbontsëtsëtsnacá ndoñe tšabá cmontsëuenana ca? <sup>62</sup> Y chcasna, Bëngbe Bëtsá Entšá tbojanbemá, chë cha tempo inamna luaroye tojëtstsjuama šmojinjëše, ¿ntšamo šmattsejuabnaye? <sup>63</sup> Bëngbe Bëtsabe Espíritu entsama entsanga chë tšabe vida chamotsebomnama. Chë cuerpo

ndoñe uámana soye quenátsmëna; chë tcbonjáuyana soyënguiñe entsemna chë Uámana Espíritbe uajabuáchenana y chë tšabe vida. <sup>64</sup> Pero masque chca entsemna, tšëngaftangbentsana banga átsbeñe ndoñe quešmatošbuaché ca —Jesús tojánayana.

Er Bëngbe Bëtsabe soyëngama entšanga jábuayenama Jesús tojanbojatsé orscana, cha inatátsëmbo ndëmuanÿenga chábeñe ndoñe mochanjanošbuáchiye, y nda chë uayayëngbe cucuatšiñe yochjëftsayentšbashejuanana. <sup>65</sup> Y Jesús yojtëtóntša oyebuambnayana: —Chíyeca, atše tšëngaftanga tcbonjáuyana: “nda atše juastama ainaniñe chaotsebošama atšbe Taitá ndoñe tbonjuájabuache, cha ndoñe quešochatasto ca”.

<sup>66</sup> Chë causa, chentsana, ba chabe ústonënga cachcá tmoje-sanonÿá, y cháftaca ya ndoñe imontsajna. <sup>67</sup> Chora Jesús, chë bnëtsana uta uatsjëndayënga tojanëyana: —¿Y tšëngaftángnaca, jtsoñama y atše jéseboshjonama šmojtseboše ca?

<sup>68</sup> Chora Simón Pedro tbojanjuá: —Bëngbe Utabná Jesús, ¿chcasna ndábioye fchjanga ca? Nÿe aca šcontsëtsëtsná chë nÿetsca tescama yomna tšabe vida jtsebomnama palabrenga. <sup>69</sup> Acheñe fsëntsošbuaché, y mora fsëntsetatšëmbo aca chë Bëngbe Bëtsabe Uamaná comnama ca.

<sup>70</sup> Chora Jesús tojanëyana: —Atše tcbonjabacacá, chë bnëtsana útata; pero canÿa tšëngaftanguentšana, mo Satanasbe canÿe trabajayacá entsemna ca.

<sup>71</sup> Judas Iscariote, chë Simonbe uaquiñabiama chca Jesús tojánayana. Er chana masque canÿa chabe bnëtsana uta uatsjëndayënguentsá inamna, Jesús uayayëngbe cucuatšiñe yochjáftsayentšbashejuana.

## 7

### *Jesusbe catšátanga chábeñe ndoñe montsanošbuaché*

<sup>1</sup> Chë soyënguentsana, Jesús Galilea luarëjana yojánana. Chë tempo, judiënga imojtsanjuabnaye ntšamo jamëse cha jóbama. Chíyeca, Jesús ndoñe yontseboše Judeoye jama. <sup>2</sup> Chora, judiëngbe canÿe bëts fiesta semana yojtsobeco. Quem fiestënguentscuana, chë judiënga imojanamana tambënguiñe jt-siyenana. <sup>3</sup> As chora Jesusbe catšátanga tmojanianyana: —Muentše ndoñe catjoquéda; Judeoye motsa, choca cond-bomna ústonënga, ntšamo contsamcá chócnaca chaminÿama. <sup>4</sup> Er nda tojtseboše chamotsábuatmama, chabe soyënga ndoñe iytcana ntsamana. Aca bëts soyënga Bëngbe Bëtsabe obenánaca contsamësna, motsa y nÿetscangbe delante chca cochjama ca —chënga tmojanianyana.

<sup>5</sup> Er ni mo cach Jesusbe catšátanga chábeñe ndoñe montsanošbuaché. Chíyeca chënga chca tmojanianyana.

6 Chora Jesús tojanējua: —Atšbe ora cabá ndoñe quentóshjango, pero tšëngaftangbiana mocna órnaca tšabá endëtsomñe. 7 Chë nÿe quem luarama enójuabnaye entšanga ndoñe quemátobena tšëngaftanga jtsëbuayënjana, pero átšbioyna aífne, er atše puerte tšabá sëntsinÿanÿná ntšamo chënga imojtsamcá ndoñe tšabá yontsemnama. 8 Tšëngaftanga chë fiestama šmochjá. Atšbe ora cabá ndoñe quentóshjango. Chíyeca atše choye ndoñe quicháta ca —cha tojánayana.

9 Jesús chë soyënga tojanéyana y cach Galileoca tojt-sanoquedañe.

*Chë tambënguífne jtsiyenama fiesta*

10 Chabe catšátanga chë fiestoye tmojána chentšana, Jesúsna tojána, masque ndoñe entšángbeñe, sinó mo iytëcana cuenta. 11 Chë fiestocna, judiënga Jesús imojtsenguaye y imojtsichamo: —¿Ndayentše chë boyabása yojtsemna ca?

12 Entšángbeñe ba soyënga chabiana iytëcana imojtsichamo. Inÿenga chabiana imojtsichamo: “Cha tšabia endmëna ca”; pero inÿengna: “Cha entšanga entsaíngña ca”.

13 Pero ndocná Jesusbiana becá añémoca yontsoyebuambná, chë judiëngbe amëndayëngbiana imojtsauatja causa.

14 Chë fiesta semana tsëntsañe yojtsó ora, Jesús Bëngbe Bëtsabe bëts yebnentše tojánamashëngo, y tojanontsé jabuátambana. 15 Chentše chë judiënga, ntšamo Jesús tojanabuatambacá tmojanuena ora, ojanánënga imojtsichamo: —Bëtscá ntjuatsjinÿcá, ¿ntšamo nÿetšá nantsetátšëmbo ca?

16 As Jesús tojanējua: —Atšbe buatëmbayana ndoñe nÿe átšbentšana quenatóbocana, ndayá chë šojichmó chábentšana. 17 Nda tojtseboše jamama ntšamo chë šojichmó cha yojtsebošcá, cha echántsetatšëmbo atšbe buatëmbayana Bëngbe Bëtsábocana yóbocanama o nÿe átšbentšana. 18 Nda nÿe cachabe juábnaca tojtsoyebuambná, jtsebošana entšanga más bëtsá chamobemama; pero nda bëtscá tojtsama, chë tbojichmóbioye entšanga más bëtsá chamobemama, cha cocayé ntšamo ndegombre yomncá jtsóyebuambnayana, y ndocnábioye ntseíngñayana.

19 “Ndegombre, Moisés tšëngaftangbiana ley tojëftsanaboshjona. Pero masque chca, tšëngaftanguentšá ndocná quenátama ntšamo cha tojëftsanmandacá. Y ¿ndáyeca šmojtseboše atše jóbama ca?” —Jesús tojanatjá.

20 Chora entšanga tmojanjuá: —¿Ndegombre aca bacna bayëjbe juabna contsambá! ¿Nda yojtseboše aca jóbama ca?

21 Chora Jesús tojanéyana: —Nÿetsca tšëngaftanga ojanánënga atše šmontsonÿá, atše canÿe ochnayté canÿe

entšá tijashnama. <sup>22</sup> Pero, Moisés tcmonjanamëndá básetema base bobachtema chë más delicadentše jatëtšana, chaotsinýnama (ndoñe nýe Moisésbeyeca chca, sinó Moisesbiana más tempsca bëts taitanga chca jamama imojanamánayeca); y tšëngaftanga canýe básetema base bobachtema chë más delicadentše jatëtšana, masque chë te canýe ochnayté totsomñese. <sup>23</sup> Y mora, ntšamo Moisés tcmojëftsanamëndacá ndoñe cachcá ntjonýayama, canýe básetema chca jatëtšana masque ochnayté; as, ¿ndáyeca atše šmojtsayaná, atše ochnayté canýe entšabe nýets cuerpo tijashnama? <sup>24</sup> Nýe batšá jinýese, ínýengbiana ndoñe matichámëngana tšabá o ndoñe tšabá tmonjama ca. Ntšamo chë soyënga ndegombre bétsemnama natsana lempe tšabá jshëtsetatšëmbëse, šmochjayana tšabá o ndoñe tšabá tmonjama ca —Jesús tojánayana.

*Jesús tojánayana ndëmocana cha tojánabama*

<sup>25</sup> Chora báseftanga Jerusalenoca oyenënga tmojanontšë ichámuana: —¿Mua ndoñe yontsemna chë jóbama montsenguá cha ca? <sup>26</sup> Masque ba entšangbe delante entsoyebuambná, ndocná chábioye ndocá ntjauyanana. ¿Nderado mo chë bëngbe amëndayënga imojtsejuabná cha chë Cristo, chë Uámana Uabuayaná yojtsemna ca? <sup>27</sup> Pero bënga mondëtatšëmbo ndëmocá quem boyabása yomnana; y chë cuenta, chë Cristo chaojabo ora, ndocná queochátstatšëmbo ndëmocana cha yochjabama ca —chënga imojtsichamo.

<sup>28</sup> Chca tojanuena ora, Bëngbe Bëtsabe bëts yebnentše Jesús yojtsabuátambayëntscuana, cha jabuache tojánayana: —¡Tšëngaftanga šmojtsejuabná atše ndegombre šmabuatma, y ndëmocana tijabama šmojtsetátšëmbo ca! Pero nýe atšbe cuenta, ndoñe chiyátabo, ndayá canýa šojichmóyeca, nda ntšamo ndegombre yomncá nýetsca soyëngama endbëtsoyebuambnaye; y tšëngaftanga cha ndoñe quešmatábuatma. <sup>29</sup> Atšna aíñe cha sënduábuatma, er atše chábentšana sënjabo y cha quem luaroye šonjichmó ca —Jesús tojánayana.

<sup>30</sup> Jesús chca tojánayana ora, chënga tmojánbošena cha jishachama, pero ndocná tbonjánishache, er cha chca japásama cabá ndoñe ora tonjanóshjango. <sup>31</sup> Banga chentše Jesúsbeñe imojtsanošbuaché y tmojánayana: “Chë Uámana Uabuayaná chaojabo ora, ¿quem boyabásabiama más tšabe soyënga yochjama ca?”

*Chë fariseunga tmojánbošena Jesús jishachama*

<sup>32</sup> Chë fariseunga tmojántatšëmbona ntšamo entšanga Jesusbiana iytëcana imojtsencuëntaye. As, chënga y chë

bachnangbe amëndayënga tmojanichamó báseftanga Bëngbe Bëtsabe bëts yebnoca josticiënga, Jesús chamuishachama. <sup>33</sup> Chora Jesús tojánayana: “Muentšana nÿe baseftayté tšëngaftangaftaca chanjëftsemna; chentšana, chë šojichmó chábioye chanjëtspadésa. <sup>34</sup> Chora tšëngaftanga atše šmochántsenguaye, pero ndoñe quešmochátinÿena; y ndayentše chántsemnoca ndoñe quešmochatobenaye jashjanguama ca.”

<sup>35</sup> Chora chë judiënga tmojanontsé entjanayana: “¿Ndemoye quem boyabása yochjá, y bënga ndoñe mochanjobenaye jinÿenama ca? ¿Inÿe fshantsëngoye, judiënga tmojuashanëngbioye yochjá, y choca chë ndoñe judiënga yochjabuatambá? <sup>36</sup> ¿Ntšamo yojtsentšáyana cha šonjauyancá, chë ‘tšëngaftanga atše šmochántsenguaye, pero ndoñe quešmochátinÿena; y ndayentše chántsemnoca ndoñe quešmochatobenaye jashjanguama ca?’” —chënga imojtsichamo.

### *Béjayënga vida bomniye*

<sup>37</sup> Chë fiesta jopochócama te yojamna chë más uámana te. Chë te, Jesús entšángbentše tojantsá y jabuache tojánayana: “¿Nda tbojtsajuendá, átsbioye chauabo y chaofsé! <sup>38</sup> Ntšamo Bëngbe Bëtsabe uabemana palabrénguiñe endayancá: ‘Nda átsbeñe tojtsošbuaché, cha echántsemna mo ndabe ainanentšana vida bomna béjayënga tojtsobocancá.’ Chca echántsemna átsbeñe ošbuáchiyëngbiamca ca” —cha tojánayana.

<sup>39</sup> Chë sóyeca, Jesús yojtseboše jayanana, chábeñe ošbuáchiyënga chë Uámana Espíritu mochjanóyëngacñe ca; er chë Uámana Espíritu cabá ndoñe tonjánabo, Jesús corente bëtsá yojamnca cabá ndoñe tmonjaninÿinÿé causa.

### *Nÿetsca entšanga ndoñe cachcá Jesusbiamca imontsejubnaye*

<sup>40</sup> Chca tmojanuena ora, ínÿenga imojtsichamo: —Quem boyabása ndegombre chë Bëngbe Bëtsabe juabna oyebuambnaya entsemna, chë Cristbe natsana jabamá ca.

<sup>41</sup> Inÿenga imojtsichamo: —Ndegombre cha chë Cristo, chë Uámana Uabuayaná entsemna ca.

Pero ínÿengna: —Ndoñe, er chë Cristo Galileocana ndoñe queochátabo. <sup>42</sup> Ndegombre, Bëngbe Bëtsabe uabemana palabrénguiñe endayana, chë Cristna rey Davídbentšana entšá canmëna, y Belenocana caochjabo ca, cach pueblcana ndayentšá David inamna ca —chënga imojtsichamo.

<sup>43</sup> Y chca, ínÿengna Jesusbe pavor imojtsemna, y ínÿengna chabe contra. <sup>44</sup> Inÿenga imojtseboše Jesús jishachama, pero ndocná tbonjánishache.

*Chë amëndayënga Jesúsbeñe ndoñe montsanošbuaché*

<sup>45</sup> Chë fariseunga y bachnangbe amëndayënga imojtsemnoye chë Bëngbe Bëtsabe bëts yebnoca josticiënga tmojtanashjajna ora, tmojanatjá: —¿Ndáyeca ndoñe Jesús šmonjuánatse ca?

<sup>46</sup> Chora chë josticiënga tmojanějua: —Ndocná quenatoyebuambná ntšamo chë boyabása tonjoyebuambacá ca.

<sup>47</sup> Chora chë fariseunga tmojaněyana: —¿Tšëngaftágnaca šmojalesenciá cha chacmaingñema ca? <sup>48</sup> ¿Nderado bëngbe amëndayënguentsá o bënga fariseunguentšá nýe mo canýa chábeñe tayojtsošbuaché? <sup>49</sup> Pero quem entsanga, ntšamo leyiñe iuayancá nduabuátmënga, bacna soyëngaca sempre mochanjëftsemna ca —chënga imojtsichamo.

<sup>50</sup> Chora Nicodemo, canýa fariseunguentšá, chë Jesúseftaca jencuéntama íbeta tojána cha, tojánayana: <sup>51</sup> —Ntšamo bëngbe leyiñe endayancá, bënga ndoñe quemuátobena jayanana canýe entsá castiganá jtsemnama íbojtsemna ca, cha cabá ntjoyeunaycá, ndayá cha tojamama jtsetatšëmbuama ca.

<sup>52</sup> Chora chënga Nicodemo tmojanjuá: —¿Acnaca chábeñe cojtsošbuaché y mo canýe Galileoca entsacá cojtsejuabná ca? Bëngbe Bëtsabe uabemana palabrenguiñe cochjuatsjinýe, y cochanjinýe ni canýa Bëngbe Bëtsabe juabna oyebuambnayá Galileocana yochjabo ca.

*Chë shema boyábioye ínÿaftaca ingñayá*

<sup>53</sup> Fariseunga y bachnangbe amëndayënga chë josticiëngbioye tmojanēcácanentsana, cada ona cachabe yebnoye imojtsatóñënga.

**8**

<sup>1</sup> Pero Jesusna canýe tjoye, Olivos ca uabáinoye tojtsanoñe. <sup>2</sup> Y chë yëfsana cachëse, Jesús cachiñe Bëngbe Bëtsabe bëts yebnoye tojesaná. Nýetsca entsanga tmojanobeconá jouenama, y Jesús tojanótbema y tojanontsé jabuátambama.

<sup>3</sup> Chorna, báseftanga ley abuátambayënga y fariseunga tmonjánashjajna, y canýe shembása tmojanëshjango. Chana tmojáninýena chabe boyábioye ínÿaftaca íbnetsoíngñañëntscuana; nýetscangbe tsëntsaca tmojanatsá, <sup>4</sup> y Jesús tmojanianyana: —Buatëmbayá, quemúa fsënjínýena chabe boyábioye ínÿaftaca bondëtsoíngñañëntscuana. <sup>5</sup> Leyiñe Moisés šonjanamëndá mëntšá uamana shembásengna ndëtšbéngaca jtsëbáyama. ¿Aca ntšamo catjayana ca?

<sup>6</sup> Jesús chca tmojanianyana ana jisháchichiyama, chca chënga jtsebomnama ndáyeca chabe contra jayanana. Pero Jesús nýe fshantsoye yojotsejbéna y yojóntša ntšabuáfjaca fshantsiñe

juabemama. <sup>7</sup> Chënga nÿe imojtsetjanaye causa, Jesús tojantsbaná y tojanëyana: —Nda tšëngaftanguentsá tondaye bacna soyënga tondbomná, chaobojatšë ndëtsbeca jatëchënjama ca.

<sup>8</sup> Chentsana Jesús cachiñe fshantsoye yojtotsejbéna, y yojtëtóntša fshantsiñe jtëtabemama. <sup>9</sup> Chca tmojanuena ora, entsanga tmojanontsé canÿánÿa chentsana jésebocanana; natsana chë más bëtsanánënga y chë ínÿengna ústonoye. Canÿa Jesús tonjanoquedá y chë shembásanaca. <sup>10</sup> As, Jesús tojtantsá y tbojantjá: —¿Shembása, ndayentše chë acbe contra ichámënga imojtsemna? ¿Ndocná acbiamá tonjayana castigáná chacotsemna ca?

<sup>11</sup> Ndoñe, Taita, ndocná ca —chë shembása tbojanjuá.

Chora Jesús tbojaniana: —Atše cach ndoñe acbiamá quichátayana castigáná chacotsemna ca. Morna, motsatoñe, pero ndoñe más bacna soyë cattsama ca.

*Jesús yomna quem luarentša entsangbe juabna binÿnayá*

<sup>12</sup> Jesús cachiñe Bëngbe Bëtsabe bëts yebnentše yojtsabuátambaye, y entsanga mëntsá tojanëyana: —Atše sëndbínÿna quem luare entsangbe juabnënga. Nda atše chašojtsëstona, cha echantsiyena atše chë binÿnayáftaca; y ndoñe mo ibetiñcá queochátaye, y chca, tšabe vida echántsebomna ca.

<sup>13</sup> Chora chë fariseunga Jesús tmojaniana: —Aca nÿe cach acbiamá chca contsoyebuambná; chcana, chë ntšamo consichamcá tondaye quenatámana ca.

<sup>14</sup> As chora Jesús tojanëjua: —Ntšamo cach atšbiamá sentsichamcá aiñe entsámána, masque nÿe atše stsichamo ntšamo atšbiamá ndegombre yomncá. Er atše sëndëtatšëmbo ndëmocana tijabo y ndëmoye tstsá. Pero tšëngaftanga ndoñe chca quešmátstatšëmbo. <sup>15</sup> Tšëngaftanga šmondbétsichamo ínÿengbiamá tšabá o ndoñe tšabá tmontsamama, chca, nÿe ntšamo entsanga mondbetsejuabnayscá. Pero atšna ndocnabiamá chca quetsátichamo. <sup>16</sup> Atše ndoñe nÿe canÿa quetsátsmëna ínÿabiamá jayanama tšabá o ndoñe tšabá tontsamama; ndayá atšbe Taitá, chë šonjichmó cha, átšeftaca chca jayanana. Chíyeca, atše ínÿabiamá tšabá o ndoñe tšabá tonjama ca stsichamo ora, ntšamo stsichamcá ndegombre jtsemnana. <sup>17</sup> Tšëngaftangbe leyiñe enduábemana, uta entšata ndayámnaca cachcá tbojayanëse, ntšamo chata tbojayancá puerte jtsámanana ca. <sup>18</sup> Y morna, atše sentsichamo chë ntšamo cach atšbiamá ndegombre yomncá, y atšbe Taitá, chë šonjichmó chánaca entsichamo ntšamo atšbiamá ndegombre yomncá ca —Jesús tojánayana.

<sup>19</sup> Chora chënga tmojantjá: —¿Ndayentše acbe Taitá yojtsemna ca?

Y Jesús tojanějua: —Tšëngaftanga ndoñe quešmatábuatma ni atše ni atšbe Taitá. Atše šmojtsábuatmësna, atšbe Taitánaca šmattsábuatma ca.

<sup>20</sup> Bëngbe Bëtsabe bëts yebnoca, chë crocénana jacjayama luarentše yojtsabuátambaye ora, Jesús chca tojánayana. Pero masque cha chentše yojtsemna, ndocná tbonjánishache, er chca japásama cabá ndoñe ora tonjanóshjango.

*“Chë chanjá luaroye, tšëngaftanga ndoñe quešmátobena jama”*

<sup>21</sup> Chora Jesús yojtétóntša oyebuambnayana: —Atše chantá, y chora tšëngaftanga atše šmochántsetatšëmbo. Masque chca, šmochanjóbana tšëngaftangbe bacna soyëngama ndëperdonánënga. Chë chanjá luaroye, tšëngaftanga ndoñe quešmátobena jama ca —Jesús tojánayana.

<sup>22</sup> Chora chë judiënga tmojanontsé enatsëtsnayana: —¿Mónderado yojtsejuabná jtsenóitanama, y chíyeca yojtsichamo chë cha yochjá luaroye bënga ndoñe montsobena jama ca?

<sup>23</sup> Chora Jesús tojanějyana: —Tšëngaftanga quem luaroquënga šmondmëna; atšna tsbananocá, celocá sëndmëna. Tšëngaftanga nÿe quem luarama enójuabnayënga šmondmëna, pero atše ndoñe. <sup>24</sup> Chíyeca atše chca tcbonjáuyana, chë “tšëngaftangbe bacna soyëngama ndëperdonánënga šmochanjóbana ca”. Er, nda atše ndegombre bétsemnama ndoñe chašmontsošbuachese, tšëngaftangbe bacna soyëngama ndëperdonánënga šmochanjóbana ca.

<sup>25</sup> Chora chënga tmojantjá: —¿As aca ndase cmëna ca?

Y Jesús tojanějyana: —Entšanga jabuátambama sënjanbojatšé orscana chama tcbonjáuyana. <sup>26</sup> Atše ba soyënga sëntsebmoma tšëngaftangbiana jayanama, tšëngaftangbe contra jayanama; pero chë šonjichmó cha nÿetsca soyëngama ndegombre endbétsichamo, y atšna ntšamo chábensana tijouencá, cachcá quem luare oyenënga sentsëtsëtsná ca —cha tojanějyana.

<sup>27</sup> Pero chënga ndoñe tonjanësertá Jesús cachabe Taitabiana chca tojanëyanama. <sup>28</sup> As Jesús tojanějyana: —Bëngbe Bëtsá Entšá tbojanbemá chašmojatsbaná ora, šmochántsetatšëmbo nda sëndmëná atše bétsemnama. Cachcá, tšëngaftanga šmochántsetatšëmbo, nÿe cach atšbe juábna ca atše tondaye jamama sëndobenama. Nÿe ndayá atšbe Taitá šojabuatëmbacá atše sëndoyebuambná. <sup>29</sup> Y chë šonjichmó cha ndoñe nÿe canÿa quešnátsboshjuana. Chca endmëna, er atše sempre sëndbétsama ntšamo cha oyejuayá jabemama tojtsemncá ca —Jesús tojánayana.

<sup>30</sup> Jesús chca tojánayana ora, banga chábeñe imojtsanošbuaché.

*Bëngbe Bëtsabe básenga y chë nÿe bacna soye jtsamama vida bomnënga*



31 Chora Jesús, chë chábeñe imojtsošbuaché judiënga tojanéyana: —Ntšamo cbontsëtsëtsnacá tšëngaftanga sempre šmojtsamëse, ndegombre atšbe uatsjëndayënga šmochántsemna. 32 Ntšamo ndegombre yomncá šmochántsetatšëmbo; y ntšamo ndegombre yomncá jtsetatšëmbëse, atsebácanënga šmochántsemna ca.

33 Chora chënga tmojanjuá: —Bëngna Abrahábentšana entšanga fsëndmëna, y ndocná ndocna te chešnáisishëche nÿe chabiamana nÿets tempo jtsošservénama. As, ¿ndáyeca šcojtsëtsëtsná bënga atsebácanënga fchtsemna ca?

34 Chora Jesús tojanéyana: —Ndegombre šcuayana: Nda bacna soyënga tojtsama, cha nÿe bacna soyënga jamama juabnëngaca mandaná jëftsemnana. 35 Canÿe oservená ndoñe nÿets tempo chë pamillentšá ntjëftsemnana, ntšamo canÿe uaquiñá sempre chë pamillentšá jesomñancá. 36 Y chca, Bëngbe Bëtsabe Uaquiñá chacmojátsebacase, tšëngaftanga ndegombre atsebácanënga šmochántsemna bacna soyënga juabnënguentšana. 37 Atše sëndëtatšëmbo tšëngaftangna Abrahábentšana entšanga šmomnana; pero tšëngaftanga šmontseboše atše jóbama, ntšamo atše cbontsëtsëtsnacá ainaniñe jóyëngacñama ndoñe quešmátsboše causa. 38 Ntšamo atšbe Taitábioca tijinÿcá, cach soyëngama atše sëntsoyebuambná. Tšëngaftangnaca, cachcá ntšamo tšëngaftangbe taitábentšana šmojouencá šmontsama ca — tojanéyana.

39 Chora chënga tmojanjuá: —Bëngbe uámana bëts taitá, Abraham endmëna ca.

As Jesús tojanéyana: —Tšëngaftanga Abrahambe básenga ca jtsabáinama mercedo šmojtsebuajónëse, chë ntšamo Abraham tojëftsema y cachcá tšëngaftanga šmattsama. 40 Atšna ntšamo ndegombre yomncá sëndoyebuambná, ntšamo Bëngbe Bëtsábentšana tsouenancá. Pero mora tšëngaftanga šmontseboše atše jóbama; Abraham ndocna te chca chenaisobuachjanguá. 41 Tšëngaftangna, ntšamo tšëngaftangbe taitá tojëftsemcá y cachcá jtsamana ca —Jesús tojánayana.

Chora chënga tmojaneyana: —Bënga nÿe enaquécana básenga ndoñe queftsátsmëna. Chë nÿe canÿe taitá fsëndbomná, Bëngbe Bëtsá endmëna ca.

42 Chora Jesús tojanéyana: —Bëngbe Bëtsá ndegombre tšëngaftangbe taitá tojtsemnëse, tšëngaftangna atše šmattsebobonshana. Er atšna, Bëngbe Bëtsábiocana sënjabo y muentše sëntsemna. Nÿe atšbe ponto ndoñe chiyátabo; Bëngbe Bëtsá šonjichmó. 43 ¿Ndáyeca tšëngaftanga ndoñe šmontsobena atšbe palabrenga josértana? Co, ntšamo

cbontsëtsëtsnacá joyeunayama ndoñe quešmátsboše causa chca. <sup>44</sup> Tšëngaftangbe taitá Satanás endmëna. Tšëngaftangna chabe entšanga šmondmëna; chíyeca, tšëngaftanga šmontseboše jamama cachcá ntšamo cha tojtsebošcá. Quem luare jobojátsama orscana, Satanás entšá obanayá endmëna. Satanasbe juabnoca, ndocna tšabe soyënga ni ndegombre soyënga ntsebinÿnana. Chíyeca, ndocna te cha ntšamo ndegombre yomncá ntsamana. Cha canÿe bostero endmëna, y chábentsana nÿetsca bostero soyënga jtsóbocanana. Chíyeca, cha tojtsebostero ora, nÿe ntšamo cachá yomnama jtsichámuana. <sup>45</sup> Atšna sempre ntšamo ndegombre yomncá cbondutsëtsná; chíyeca, chë sëntsichamo soyiñe tšëngaftanga ndoñe quešmatošbuaché. <sup>46</sup> ¿Nda tšëngaftanguentsá nanjobenaye jinÿanÿiyana atše ndaye bacna soye tijamama? Y atše, nÿe ntšamo ndegombre yomncá stsichámëse, ¿ndáyeca chë tijayaniñe ndoñe šmontsošbuaché? <sup>47</sup> Nda Bëngbe Bëtsabe entšá tomna, ntšamo Bëngbe Bëtsá tojtsichamcá jtsuenanana. Pero tšëngaftangna ndoñe Bëngbe Bëtsabe entšanga quešmátsmëna. Chíyeca, ntšamo Bëngbe Bëtsá entsichamcá ndoñe quešmátsboše jouenama ca —Jesús tojanéyana.

*Cristo Abrahambiana más natsana ya yojtsemna*

<sup>48</sup> Chora chë judiënga tmojanianyana: —Ajá, bënga co ndegombre fstsichamo, aca nÿe samaritano y bacna bayëjbe juabna uambayá comna ca fstsichamo ora ca.

<sup>49</sup> Y Jesús tojanéjua: —Atše ni mo canÿe bayëjbe juabna quetsatambá. Ntšamo atše sëntsamcá, endmëna jinÿanÿiyama atšbe Taitá Bëngbe Bëtsá uamaná yomnama; pero tšëngaftangna, atše chca tsmënama ndoñe quešmatinÿinÿná. <sup>50</sup> Atše ndoñe quetsátsboše ínÿenga atše más uamaná chašmobemama. Pero inÿa endmëna; cha aíñe endboše atše bëtsá bëtsemnama cham-inÿanÿema. Y chánaca endmëna chë ínÿengbiana tšabá o ndoñe tšabá tmontsamama endbetsichamuá. <sup>51</sup> Ndegombre šcuayana, nda ntšamo atše sëntsichamcá tojouena y chca tojama, ndocna te queochatóbana ca —Jesús tojánayana.

<sup>52</sup> Chora chë judiënga tmojanianyana: —Mora cocayé fsëntsetatšëmbo aca ndegombre bacna bayëjbe juabna uambayá comnama. Abraham tojanóbana, y cachcá, nÿetscanga Bëngbe Bëtsabe juabna oyebuambnayëngnaca. ¿Y mora aca cochjátichamo, “Nda ntšamo atše sëntsichamcá tojouena y chca tojama, cha ndocna te queochatóbana ca”? <sup>53</sup> ¿O aca, bëngbe bëts taitá Abrahambiana más bëtsá comna? Cha tojanóbana, y Bëngbe Bëtsabe juabna oyebuambnayëngnaca. ¿Ndase cojátsmëna ca aca cojatsjuabná ca? —chënga imojtsichamo.

<sup>54</sup> Chora Jesús tojanējua: —Atše nýe cach atše más bētsá stsenobiamnasna, chē soye tondaye nantsámána. Pero chē más bētsá šojtsebiamnă cha, atšbe Taitá endmēna, cach ndabiana tšēngaftanga šmondbétsichamo tšēngaftangbe Bētsá canmēna ca. <sup>55</sup> Pero tšēngaftanga cha ndoñe quešmatábuatma; atše aíñe. Y atše, “cha ndoñe quetsatabuatma ca” stsihámēse, átšnaca cach tšēngaftangcá canýe bostero stsemna. Pero ndegombre atše cha sēnduábuatma, y ntšamo cha tojtsichamcá, atše sēndouenana y cachcá sēndbétsama. <sup>56</sup> Tšēngaftangbe uámána bēts taitá Abraham, chē atše jabama te jinýama yojtsejuabnaye ora, puerte oyejuayá yojtsemna. Y pronto tojēftsaninýe, y puerte tojanoyejuá ca —Jesús tojánayana.

<sup>57</sup> Chora chē judiēnga tmojaniana: —Aca cabá ndoñe shachna bnētsana uata quecátsbomna; y as, ¿ntšamo cochjátichamo, Abraham tcojēftsinye ca?

<sup>58</sup> Chora Jesús tojanējua: —Ndegombre cbēyana, Abraham cabá ndoñe ainá quenjatsmēna ora, atše ya sēnjētsemna ca.

<sup>59</sup> Jesús chca tojanējua ora, chēnga ndētsbenga tmojanájaca cha jtsatēchénganjama. Pero Jesusna oitanánana, Bēngbe Bētsabe bēts yebnentšana tojésanbocna.

## 9

*Jesús tojanma, canýe boyabása jtaná onýnaná chabuabínýnama*

<sup>1</sup> Canýe luarējana yojtsachnějuana ora, Jesús canýe boyabásabioye tbojáninýe. Chē boyabásana jtaná inónýna. <sup>2</sup> Chē uatsjéndayēnga Jesús tmojantjá: —Buatēmbayá, ¿ndáyeca quem boyabása jtaná inónýna? ¿Camuá bacna soyēnga tojamama, o chabe bētsétsangbe bacna soyēnga causa ca?

<sup>3</sup> Chora Jesús tojanējua: —Ni cachabe bacna soyēngama, y ni chabe bētsétsangbe bacna soyēnga causa. Chca endmēna ndayá entšanga jinýanýiyama ntšamo Bēngbe Bētsá yobencá. <sup>4</sup> Cabá yojtsēsháchena ora, šontsamna jamana ntšamo chē šonjichmó cha yojtsebošcá. Ndoñe usháchena tempo echanjóshjango; chora ndocná tondaye jamama quechatobenaye. <sup>5</sup> Quem luariñe chjēftsemnēntscuana, atše quem luare entšangbe juabnēnga binýnayá chanjēftsemna ca —tojanējyana.

<sup>6</sup> Chca tojánayanentšana, Jesús fshantsiñe tojanbuashētjo, y chē yebuáyeca batsá ngüiche tojábema, y chē jtaná chē ngüicheca tbojanbuchanētjo. <sup>7</sup> Chora chē jtaná tbojaniana: —Motsa y metsobúchjabebiye, chē binche uafjónaye entšangbe pormániñe, Siloé ca uabáiniyoca ca. (Siloé, judiēngbe biyañe endayana “Ichmoná ca”).)

Y chë jtaná tojána; choca yojetsobúchjabebiyé, y yebnoye tojtaná ora, ya ibojtsabinýna. <sup>8</sup> Chë juachañe oyenënga y chë jtaná tempo lemošna otjanañana tmojáninýënga, imojtsentjanaye: —¿Mua ndoñe yondmëna chë enjanamana jótbemana lemošna jótjañama ca?

<sup>9</sup> Inýënga imojtsichamo: —Cha entsemna ca.

Y ínýengna: —Cha ndoñe quenátsmëna, pero chacá entsábona ca.

Y cach shnaná yojetsichamo: —Atše cha sëndmëna ca.

<sup>10</sup> As chë entšanga tmojantjá: —¿Ntsamo chca mora cmojtsabinýna ca?

<sup>11</sup> Y cha tojanējua: —Chë boyabása, Jesús ca uabainá, ngüiche yebuáyeca tonjábema, šonjabuchanětjo y šonjauyana: “Motsa y Siloé uafjajónayiñe metsobúchjabebiyé ca”. Chcasna, atše sënjá, sënjetsobúchjabebiyé y cachora šontsabinýna ca.

<sup>12</sup> Chora chënga tmojantjá: —¿Ndayentše cha yojtsemna ca?

Y chana: —Atše ndoñe quetsátstatsëmbo ca —tojanējua.

### *Chë jtana shnanábioye fariseunga imojtsetjanaye*

<sup>13</sup> Chora chë entšanga, chë jtaná inamná fariseúngbioye tmojanánatse. <sup>14</sup> Chë Jesús batšá yebuáyeca ngüiche tojábema, y chë jtaná tojanma te, canýe ochnayté inamna. <sup>15</sup> As chë fariseunga chë boyabása tmojantjá: —¿Ntsámoyeca mora cmojtsabinýna ca?

Chora cha tojanējua: —Cha ngüiche yebuáyeca tonjábema y šonjabuchanětjo. Sënjetsobúchjabebiyé, y cachora šonjuabinýna ca.

<sup>16</sup> As chora básefta fariseunga imojtsichamo: —Chë jtaná chabotsabinýnama tojamá ndoñe tonjochná, y ochnayté tojatrabajá. Chíyeca cha Bëngbe Bëtsabe entšá ndoñe quenátsmëna ca.

Inýënga imojtsichamo: —Cha canýe bacna soyënga amá tojtsemnëse, ¿ntšamo nantsobena canýe bëts soye Bëngbe Bëtsabe obenánaca jamama ca?

Y chca, ínýënga Jesusbe pavor imojtsemna, y ínýengna chabe contra. <sup>17</sup> Chama chënga cachiñe chë jtaná inamná tmojtětantjá: —Er aca mora chacmotsabinýnama cha tojamëse, ¿chabiamana ntsamo catjayana ca?

Chora cha tojanējua: —Chana canýa Bëngbe Bëtsabe juabna oyebuambnayá entsemna ca.

<sup>18</sup> Pero chë judiënga ndoñe montsanošbuaché, cha chë jtaná inamna y chora ibojtsabinýnama. As chënga, ínýënga tmojanichamó chë boyabásabe bëtsétsata jobiatsama. <sup>19</sup> Chë bëtsétsata tbojánashjango ora, chë judiënga tmojanatjá: —¿Quem boyabása tsëndatbe uaquiñá yomna ca? ¿Ndegombre

tašojtsichamo cha jtaná inonýnama? Chcase, ¿ntšamo mora cha ibojtsabinýna ca?

<sup>20</sup> Chora chë bëtšetsata tmojanějua: —Aíñe fsëndétatsëmbo cha bëndatbe uaquiñá endmënana y jtaná tonjanonýnama. <sup>21</sup> Pero ndoñe queftsátstatsëmbo ntšámoyeca mora chca ibojtsabinýnama, ni bëndatbe uaquiñá chabotsabinýnama nda tojamama cach ndoñe. Cachá motjanga. Ya bëtšá entsemna, y cachá entsobena tšëngaftanga razón jatsatayama ca —chata tbojánayana.

<sup>22</sup> Tempo, chë judiënga imojenóyeunaye, chëngbe enefjuana yebnënguentšana jtëbuacanana chë Jesús ndegombre chë Uámana Uabuayaná, chë Cristo yojamna ca tmojayanënga. Chë bëtšetsatna chama ibojtsauatja; <sup>23</sup> chíyeca tmojanějyana: “Cha ya bëtšá entsemna. Cachá motjanga ca”.

<sup>24</sup> As cachiñe chë judiënga chë jtaná inamná tmojanchembo y tmojaniyana: —Bëngbe Bëtšabe delante cach acbiama ndegombre mobuambá. Bënga fsëndétatsëmbo chë boyabása canýe bacna soyënga amá yomnama ca.

<sup>25</sup> Chora cha tojanějua: —Cha canýe bacna soyënga amá o ndoñe tondmënana, atše ndoñe quetsátstatsëmbo. Atše nýe mëntšá sëntsetatsëmbo: Atše jtaná sënjanmëna, pero mora sontsabinýna ca.

<sup>26</sup> Chora chënga cachiñe tmojatantjá: —¿Ntšamo tcmënjama? ¿Ntšamo cha tënjama chacmotsabinýnama ca?

<sup>27</sup> Y cha tojanějua: —Ya tcbonjáuyana y ndoñe chešmatoyeuná. ¿Ndáyeca cachiñe šmojtseboše jatuenama? ¿Tšëngaftángnaca šmojtseboše chabe ústonënga jtsemnama ca?

<sup>28</sup> Chora chënga cha tmojtsanóyenguango y tmojaniyana: —Acna canýe chabe ustoná cojtsemna, pero bënga ndoñe; bëngna Moisesbe ústonënga fsëndmëna. <sup>29</sup> Bënga fsëndétatsëmbo, Bëngbe Bëtšá Moisésbioye tbojanatsëtsama, pero chë boyabásabiama ndoñe queftsátstatsëmbo ni mo ndëmocana cha tojabama ca —chënga imojtsichamo.

<sup>30</sup> Chora chë boyabása tojanějua: —¡Ntšamo chca nántsemnal Tšëngaftanga ndoñe šmontsetátšëmbo ndëmocana cha tojabama; pero chašubabinýnama cha tonjama. <sup>31</sup> Bënga tšabá mondétatsëmbo, bacna soyënga amënga Bëngbe Bëtšá ndoñe queondbátayaunanama. Chana, nýe chábioye adorayá y ntšamo cha tojtsebošcá amábioye joyeunayana. <sup>32</sup> Quem luare jobojátsama orscana ndocna te quenaisótatsëmbo canýe jtaná onýnanabiama ndánaca cha chabotsabinýnama tojéftsemama. <sup>33</sup> Quem boyabása, Bëngbe Bëtšabe ichmoná chabe soyënga jamama ndoñe tontsemnëse, tondaye nantsobena jamama ca —chë entšá tojánayana.

34 As chë fariseunga tmojanियana: —¡Ndayá! Aca tcojanonýná orscana, corente bacna soyënga amá tcomnëse, ¿ntšamo mora bënga šcochjatabuatambaye ca?

Y chora chë judiëngbe enefjuana yebnentsana cha tmojtanábcna.

*Chë Bëngbe Bëtsabe soyëngama mo jtanëngcá imomnënga*

35 Chë jtaná tmojtanábcnama Jesús tojanuena ora, tojána cha janguanguama. Tbojáninýena ora tbojanियana: —¿Aca Bëngbe Bëtsá Entsá tbojanbemábeñe quecojtsošbuaché ca?

36 Y cha tbojanjuá: —¿Taita, nda cha yojtsemna, as atše chábeñe jtsošbuáchiyama ca?

37 As Jesús tbojanियana: —Aca ya tconjinýe; chë ácaftaca entsoyebuambná cha entsemna ca.

38 Chora, chë boyabása Jesús bentše tojanoshamentsé jëtschuayama y tbojanियana: —Atšbe Utabná, aíñe sëntsošbuaché ca.

39 Chora Jesús chë entšanga tojanëyana: —Atše quem luaroye tijabo ndayá entšanga jinýanýiyama ntšamo cachënga Bëngbe Bëtsabe soyëngama imojuabnama. Chë Bëngbe Bëtsabe soyëngama ndosertánënga, chë soyënga atše chanjínýanýiye ora, mo jtanëna shnanëngcá mochántsemna; y chë Bëngbe Bëtsabe soyëngama corente imotátšëmbo ca juabnayëngna chanjínýanýiye, nýe batšá Bëngbe Bëtsabe soyëngama imotatšëmbuama. Y chca, chënga, masna mo jtanëngcá mochántsemna y ndoñe mo chë jinýama obenëngcá.

40 Básefta fariseunga Jesús eftaca imojtsemnënga chca tmojanuena ora, cha tmojanियana: —Ndegombre bënga ndoñe mo jtanëngcá queftsátsmëna ca.

41 Chora Jesús tojanëjua: —Tšëngaftanga Bëngbe Bëtsabe soyëngama ndëtatšëmbënga šmojtsemna ca, y ndegombre chë soyëngama ndoñe cmontsësertana ca šmojobuambase, ndayá šmojtsamcá Bëngbe Bëtsá mo bacna soyënga cuenta ndoñe queochátönyaye. Pero tšëngaftanga corente Bëngbe Bëtsabe soyëngama cmojtsësertana ca šmojtsichámësna, Bëngbe Bëtsá ndoñe queochatobenaye tšëngaftangbe bacna soyëngama jáperdonana ca —Jesús tojanëyana.

## 10

*Chë oveshënga abujjënýa y chabe oveshënga*

1 As Jesús tojanëyana: “Ndegombre šcuayana: Nda chë oveshëngbe luaroye bësáshajana ndoñe tonjámashëngo, pero aíñe inýajana tojtsamáshëngo, chana canýe atbëbaná y abacayá jtsemnana. 2 Pero chë bësáshajana tojamashënguana, chë oveshënga anýená jtsemnana. 3 Chë bësásha ebtafjuaná, chë bësásha jebëtafjuana, y chë oveshënga abujjënýa ntšamo cada

ona tmabaincá chë oveshënga jáchembuana. Y chë oveshënga jtsetatsëmbuana chëngbe abujajënya yojsachembuanama; y chë luarentšana cha jubuacnana. <sup>4</sup> Njetsca oveshënga tmojábocana ora, chë abujajënya chënga jtsebënatsanana, y chë oveshënga jtsëstonana, er chabe oyebuambnayana chënga joyátëmbana. <sup>5</sup> Pero chë tmonduabuatmábioyna chë oveshënga ndoñe ntjuastana; nje chábentšana jtsachetëngana, chë oveshënga chabe oyebuambnayana ndoñe ntjoyátëmbana causa ca” —Jesús tojánayana.

<sup>6</sup> Jesús entšanga chca tonjanacuntá, pero chënga ndoñe ntjosértana ntšamo yojsentšayancá.

### *Jesús, chë oveshënga tšabe abujajënya*

<sup>7</sup> As Jesús cachiñe tojanëyana: “Ndegombre cbëyana: Atše sëndmëna chë bëshasha oveshënga mondbëtsamashjuanëjana. <sup>8</sup> Njetscanga chë atšbe natsana tmojánabënga, atbëbanënga y abacayënga imnamna, pero chë oveshënga ndoñe chëngbioye ntjóyaunayana. <sup>9</sup> Atše chë bëshasha sëndmëna. Nda quem bëshashajana tojamashënguá, atsbocaná echántsemna. Canye oveshá jamashënguana y jabocnana, y shácuana jónyenana. Cachcá, chë quemëjana tojamashënguá, lempe echanjónyena.

<sup>10</sup> “Chë atbëbaná jabana nje jatbëbama, jóbama y lempe jtsepochócama; pero atšna, entšanga vida chamotsebomnama y átšeftaca bëtscá tšabe vida chamotsebomnama tijabo.

<sup>11</sup> “Atše sëndmëna chë oveshënga tšabe abujajënya. Chë oveshënga tšabe abujajënya sempre jtseprontánana chëngbiana jóbanama, chabe oveshënga ababuányëshanayeca. <sup>12</sup> Pero nda nje crocenánama totrabája y chë oveshënga ndoñe chábënga tmontsemna, cha nderado tojinye canye tjañe queše chë oveshëngbioye tojtsobécocnama, cachora nje cachcá jesënyayana y jtsachana. Chë tjañe queše oveshënga jtsacamiyana, y chë oveshëngna nje cátoye jtsachetana. <sup>13</sup> Cha jtsemnana nje crocenánama trabajayá; chabiana nje chë uacanánana más uámana soye jtsemnana, y chë oveshëngbiana tondayana ntsentšamnana; chíyeca cha jtsachana.

<sup>14</sup> “Atše sëndmëna chë oveshënga tšabe abujajënya. Atše chënga sëndëubuatma, y chëngnaca atše šmonduábuatma. <sup>15</sup> Cachcá, chë Taitá Bëngbe Bëtsá atše šonduábuatma y atše chábioye. Atše sempre sëndétseprontana jóbanama, atšbe oveshënga sëndababuanyëshánayeca. <sup>16</sup> Atše inye oveshënga sëndábamna, pero chënga ndoñe quem luariñe oveshënga quemátsmëna. Atše šontsemna chëngnaca moye junatsana. Chëngnaca atšbe oyebuambnayana mochanjouena, y muentša oveshëngaftaca cányiñe mochántsemna, y atšna njetsca chë oveshëngbiana chë abujajënya chántsemna.

17 “Atše sempre sëndétseprontana jóbanama, chora jtayenama. Chíyeca chë Taitá šondbobonshana.

18 Ndocná atšbe vida quešochatsbojuána, pero chënga sëndababuanÿeshánayeca sempre sëndétseprontana jóbanama, cach atše chca sëndbošeyeca. Derecho sëndétsóbomñe chëngbiana jóbanama, y chora jtayenama. Chca endmëna ntšamo atšbe Taitá šonjamandacá ca” —Jesús tojánayana.

19 Chë soyënga chë judiënga tmojanuena ora, cachiñe banga Jesusbe contra y ínÿengna Jesusbe pavor imojtsemna.

20 Banga imojtsichamo: —Chana bacna bayëjbe juabna uambayá y corente juicio ndbomná entsemna. Ý as ¿ndáyeca cha mochjátsyeunana ca?

21 Pero ínÿengna imojtsanichamo: —Ndocna bacna bayëjbe juabna uambayá ntsoebenana chca jóyebuambayama. ¿Canÿe bayëja nantsobena jamama canÿe jtaná chabotsabinÿnama ca?

*Chë judiënga ndoñe imontsošbuáchiye Jesús Bëngbe Bëtsabe Uaquiñá bëtsemnama*

22 Canÿe uaftena tempo inamna, y Jerusalenentše canÿe fiesta imojtsebomna. Chë fiesta inamna cada uata, Bëngbe Bëtsabe bëts yebna tempo cachiñe tmojtanjebuama entšanga jtenójuaboyama. 23 Jesús Bëngbe Bëtsabe bëts yebnoca yojétsana, canÿe amashjuana otsbojebniñe, Salomonbe Amashjuana ca uabáinentše. 24 Chora, chë judiënga tmojanóbobuashcona, y tmojantjá: —¿Buetaytentscuana bënga fchjëftsemna achiana ndegombre soye ntsetatšëmbcá? Aca chë Cristo cojtsemnëse, chama lempe tšabá šmanÿanÿé ca.

25 As Jesús tojanëjua: —Ya tcbonjáuyana y tšëngaftanga átšbeñe ndoñe ntsošbuáchiyana. Chë atše sëndama soyënga, atšbe Taitá Bëngbe Bëtsabe obenánaca, cmontsinÿanÿná nda atše bëtsemnana. 26 Pero tšëngaftanga átšbeñe ndoñe quešmatošbuaché, er tšëngaftanga atše ndoñe quešmatëstona, ntšamo chë oveshënga chë tšabe abuajënÿa mondbetsëstoncá.

27 Chë atše šmondústonënga, atše šmondbóyeunaye y šmondbëuasto. Atše chënga sëndëubuatma. 28 Atše chanjama, quem entšanga chë nÿetsca tescama yomna tšabe vida chamotsebomnama; chënga ndocna te pochocánënga quemochátsmëna, y ndocná quenátobena átšbentsana chënga jefcana. 29 Atšbe Taitá Bëngbe Bëtsá, chë entšanga atše chašmuastama tojamá, nÿetscangbiana más bëtsá endmëna, chíyeca ndocná quenátobena chábentsana chënga jefcana.

30 Chë Taitá y atše canÿa fsëndmëna ca —Jesús tojánayana.

31 Chora, chë judiënga cachiñe ndétsbenga tmojanájaca Jesús jtsatëchënganjama. 32 Pero Jesús tojanëyana: — Atše tšëngaftangbeñe, ba bëts soyënga sënjama atšbe Taitá



Bëngbe Bëtsabe obenánaca. ¿Ndëmua chentša soyama atše šmochtsatëchënganja ca?

<sup>33</sup> Chora chë judiënga tmojanjuá: —Ni canye quem bëts soyëngama bënga queftsátsboše aca jtsatëchënganjama. Aca Bëngbe Bëtsabiana ndoñe tšabá quecátichamo; mo chábioye cuafjoyenguangcá entsemna. Aca nye canye entšá condmëna, pero acna contsichamo cach aca Bëngbe Bëtsá comna ca; chíyeca bënga fsëntseboše ndëtsbéngaca aca jtsatëchënganjama ca —chënga tmojaniana.

<sup>34</sup> Chora Jesús tojanëyana: —Bëngbe Bëtsabe uabemana palabrenguiñe mëntšá endayana: “Atše sënjayana tšëngaftanga diosënga šmomna ca.” <sup>35</sup> Bëngbe Bëtsá chca tojánayana chë chabe palábraca y cha chamotseservënana tojánamandangiama; ndocná quenátobena jinyanÿyana ni mo canye soye Bëngbe Bëtsabe uabemana palabrenguiñe, ndoñe ndegombre soye yomnama. <sup>36</sup> Y atšbiana, Bëngbe Bëtsabiacá uabuayaná y quem luare ichmoná, ¿ntšamo tšëngaftanga šmojtsobena jayanama, “aca Bëngbe Bëtsabiana ndoñe tšabá quecátichamo ca”, chë Bëngbe Bëtsabe Uaquiñá sëndmëna ca atše tijayanama? <sup>37</sup> Ntšamo atšbe Taitá endamcá atše ndoñe sëntsamëse, tšëngaftanga átšbeñe ndoñe šmattsošbuáchiye. <sup>38</sup> Pero, ntšamo atšbe Taitá endamcá atše aíñe stsamëse, masque ndoñe átšbeñe šmontsošbuaché, nye chë Taitabe obenánaca soyënga tijamama šmochtsošbuáchiye. As, canye ora chašmotsetátšëmbo y chacmësertá, chë Taitá átšbeñe yomnama y atše chábeñe tsmënana ca —Jesús tojanëyana.

<sup>39</sup> Chora chënga cachiñe tmojánbošena Jesús jishachama, pero cha chëngbentšana tojanotsbocá.

<sup>40</sup> Chentšana, Jesús Jordán béjaye chenguana tojesaná y choca tojtsanoquedañe. Chentše Juan tempo entšanga yojanëbáyana. <sup>41</sup> Ba entšanga tmojána Jesús jinÿyama, y mëntšá imojtsichamo: “Ndegombre, masque Juan ni mo canye bëts soye Bëngbe Bëtsabe obenánaca tonjëftsema, lempe ntšamo quem boyabásabiana tonjanoyebuambacá, ndegombre yojamna ca.” <sup>42</sup> Y chentše, ba entšanga Jesúsbeñe imojtsanošbuaché.

## 11

### *Lázaro tojanóbana*

<sup>1</sup> Inamna canye boyabása šocá, Lázaro ca uabainá. Cha inoyena canye pueblo Betania ca uabáinentše, Marta y Maríaftaca, chabe uabénata. <sup>2</sup> Quem María inamna nda Bëngbe Utabná Jesusbe shecuatšifñe botamana uanguëtsiye tbojanáshecbuešcja, y chabe stjënashaca tbojtanshecbojó cha.

<sup>3</sup> Chë uta uabénatna ínÿenga tmojanichamó Jesús jauenayama: —Bëngbe Utabná, chë aca condbobonshaná šocá entsemna ca.

<sup>4</sup> Jesús chca tojanuena ora, tojánayana: —Quem šocana ndoñe quenátsmëna Lázaro chaóbanama. Pero aiñe entsemna Bëngbe Bëtsabe obenana entšanga jinÿanÿiyama, y Bëngbe Bëtsabe Uaquiñá chamuatschuama ca.

<sup>5</sup> Jesús corente yojánababuanÿeshana Marta, María y chatbe uaftše Lázaro. <sup>6</sup> Masque chcasna, Lázaro šocá yojtsemna ca Jesús tmojanियana ora, cabá uta te más cha yojétsemna luar-entše tojtsanoquedañe. <sup>7</sup> Chentšana, chabe uatsjéndayënga tojanëyana: —Judeoye cachiñe cuajna ca.

<sup>8</sup> As chë uatsjéndayënga tmojanियana: —Buatëmbayá, baseftayté entsemna chë luaroca judiënga cmonjanbuachetá ndëtšbëngaca jtsóbama; y mora, ¿cabá choye jtésama cojtseboše ca?

<sup>9-10</sup> Chora Jesús tojanëyana: —Bnëtsana uta hora bnëté endmëna. Nda bnëté tojtsana, ndoñe ntjojéstjiana, binÿiniñe bëtsemnayeca. Cachcá átšeftaca endmëna, tondaye quenátópodena átšeftaca jopásana, atše jóbanama cabá ndoñe tonjobuache ora. Pero ibeta tojtsanëse, cha jtsojéstjiana, ndoñe binÿiniñe causa. Cachcá, bënga šontsamna yojtsësháchenëntscuana jatrabájana. Atšbe jóbanama tempo chaojóshjango ora, ya ndoñe queochátëshachena jatrabájama ca —tojánayana.

<sup>11</sup> Chentšana tojanëyana: —Bëngbe amigo Lázaro tojtso-maná, pero atše choye chanjá jetsefšenama ca.

<sup>12</sup> Chora chë uatsjéndayënga tmojanjuá: —Bëngbe Utabná, tojtsomanase yojtsayana chana tšabá yochtsatsmëna ca.

<sup>13</sup> Pero Jesús yojtsanëtsëtsná ndayá Lázaro tojtsanóbana ca, y chabe uatsjéndayëngna imojtsejuabnaye Lázaro ndegombre yojtsomáñama. <sup>14</sup> As Jesús tšabá tojanëyana: —Lázaro tontsóbana. <sup>15</sup> Atše sëntsoyejuá choca atše ndoñe tsmënama, tšëngaftangbe tšabiama chaotsemnama; chca, tšëngaftanga más átšbeñe chašmotsošbuáchema. Pero cuajna cha jinÿama ca.

<sup>16</sup> Chora Tomás, chë Gemelo ca uabobainá, chë inÿe uatsjéndayënga tojanëyana: “Bëngnaca cuajna, cháftaca mochjóbana ca.”

*Jesús iuama entšanga chámuatayenama y chë nÿetsca tescama yomna tšabe vida chamotsebomnama*

<sup>17</sup> Jesús chë béconana tojánashjango ora, tojántatšëmbona Lázaro ya canta te uatbontsána yojtsemnama. <sup>18</sup> Betania pueblo yojamna Jerusalén béconana, mo unga kilómetroca. <sup>19</sup> Ba judiënga tmojána Marta y María jautsëtsayama y jatjëmbabayama ndoñe tša ngménaca chabondëtsemnama, chatbe uaftše tojanóbana causa. <sup>20</sup> Jesús yojtsashjajuanama

Marta tojántatsëmbona ora, tojánbocna cha jajébuguama, pero María cach yebnentše tojanoquedá.

<sup>21</sup> Chora Marta Jesúsbioye tbojaniana: —Bëngbe Utabná, aca muentše macmënëse, atšbe uaftše ndoñe matënjóbana. <sup>22</sup> Pero atše sëntsetatsëmbo, masque ndayánaca mora Bëngbe Bëtsá chacojotjañe, y cha lempe chca cmochjátšetaye ca.

<sup>23</sup> Y Jesús tbojanjuá: —Acbe uaftše echántayena ca.

<sup>24</sup> Chora Marta tbojaniana: —Aíñe, atše sëndëtatšëmbo cha yochtayenama, pero quem luare jopochócama te, nÿetsca obanënga mochtayena ora ca.

<sup>25</sup> As Jesús tbojaniana: —Atše sëndmëna chë entsanga chámuatayenama y chë nÿetsca tescama yomna tšabe vida chamotsebomnama endamá. Nda átšbeñe tojtsošbuaché, masque chaóbana, echántayena. <sup>26</sup> Y nda cabá ainá totsomñe y átšbeñe tojtsošbuaché, ndocna te queochatóbana. ¿Chë cbontsatsá soyiñe quecojtsošbuaché ca? —Jesús tbojantjá.

<sup>27</sup> Chora Marta tbojaniana: —Aíñe, Bëngbe Utabná, atše ácbeñe sëntsošbuaché, aca chë Cristo, chë Bëngbe Bëtsabe Uaquiñá y chë quem luaroye jabamá comnama ca.

*Jesús, Lázaro yojtsátbontsana cuevēshentše yojenóbošachna*

<sup>28</sup> Chca tojánayanentšana, Marta tojtaná chabe quenata María jachembuama, y iytëcana tbojaniana: “Buatëmbayá tonjášhango y entseboše aca jinÿama ca.”

<sup>29</sup> María chca tojanuena y cachora tojëftsánbocna y tojána Jesús jinÿama. <sup>30</sup> Jesús cabá ndoñe chë puebloye tonjánamashëngo; yojëtsemna Marta tbojanjébugo luarentše. <sup>31</sup> Chë yebnentše imojtsemna judiënga, María tša ngmënaca ndoñe chaondëtsemnama tjëmbambayënga, tmojánbocana María juastama; er chë tojëftsantsbaná y tojëftsánbocna ora, chë judiënga imojtsejuabnaye, Lázaro yojtsátbontsana luaroye María yojtsaye, choca jošachnama ca.

<sup>32</sup> Jesús yojtsemnentše María tojánashjango ora, chábentše tojanoshamentšé y tbojaniana: —Bëngbe Utabná, aca muentše macmënëse, atšbe uaftše ndoñe matënjóbana ca.

<sup>33</sup> María y cháftaca tmojánashajna judiënga, nÿetscanga imojtsetšena y puerta ngmënaca yojtsemna. <sup>34</sup> Chora Jesús tojanatjá: —¿Ndayentše cha šmojuatbontsá ca?

Y chënga tmojanjuá: —Bëngbe Utabná, mabo y cochjinÿe ca.

<sup>35</sup> Chora Jesús tojánenobošachna. <sup>36</sup> As chë judiënga tmojánayana: —¡Minÿënga, tša ibnabobonshana ca!

<sup>37</sup> Pero inÿe judiënga imojtsichamo: —Chë jtaná chabuabínÿnama tojamá, ¿tondaye tonjobená jamama, Lázaro ndoñe chaondóbanama ca?

*Lázaro tojtanayena*

<sup>38</sup> Jesús, cachiñe puerte cochtsetšenaná, chë uatbontsánoye tojanobeconá. Chë luarna cuevëshe inamna, y amashjuanentse canye bëts ndëtsbeca yojtsatámena. <sup>39</sup> Chora Jesús tojanëyana: —Chë ndëtsbé mojuánanga ca.

Chora Marta, chë obanabe uabena tbojaniyana: —Bëngbe Utabná, mora ya bacá yojtsonguëtsé, er ya canta te entsemna cha tontsóbana ca.

<sup>40</sup> Y Jesús tbojanjuá: —Ndegombre, ya tchonjauyana, aíñe átsbeñe tcojtsošbuáchese, cochjinye Bëngbe Bëtsá puerte obená y bëtsá bëtsemnama ca.

<sup>41</sup> Chora chë ndëtsbé tmojanjuaná; Jesús celoye yojontješiyey Bëngbe Bëtsábioyey tbojaniyana: “Taita, cbatschuá atšbe opresido tcojouenama. <sup>42</sup> Atše sëndëtatšëmbo aca sempre šcondbëtseyeunanama; atše chca tchonjauyana, muentše montsemna entšangbe tšabíama, chca, aca atše šcojichmoma, chënga chamotsošbuáchema ca.”

<sup>43</sup> Chca tojánayanentšana, jabuache tojánayana: “¡Lázaro, chentšana matsbocna ca!”

<sup>44</sup> Y cachora chë obaná tojtanbocna, cucuatšënga y shecuatšënga entšëjuaca batsëcná, y chabe jubiá base entšëjuaca uamochëcjuaná. As Jesús tojanëyana: “Motsejafjoná y jama chaotsobena ca.”

*Chë judiëngbe amëndayënga tmojanenoyeuná Jesúsbioyey jóbama*

(Mt 26.1-5; Mc 14.1-2; Lc 22.1-2)

<sup>45</sup> Chë soyëngama, banga chë judiënguentšana, María jatjëmbabayama tmojánanga, y ntšamo Jesús tojanmcá tmojáninÿënga, Jesúsbeñe imojtsošbuaché. <sup>46</sup> Pero inye judiënga fariseúngbioyey tmojána, ntšamo Jesús tojanmama chënga jacúntama. <sup>47</sup> As, chë fariseunga y chë bachnangbe amëndayënga tmojánenefna inye judiëngbe amëndayëngaftaca, y tmojánayana: —¿Ndayá mochjobenaye cháftaca jamama? Quem boyabása bëts soyënga entsama. <sup>48</sup> Nye cachcá chamojonÿase, nÿetsca entšanga chábeñe mochantsošbuáchiye; chë romanëngbe amëndayënga mochanjabo y lempe mochantsepochóca, Bëngbe Bëtsabe bëts yebna y bëngbe luare Israel ca —chënga imojtsichamo.

<sup>49</sup> Pero canya chënguentšá, Caifás ca uabainá, chë uata chë bachnangbe más uámana amëndayá inamná, tojanëyana: —Tšëngaftanga tondaye quešmátstatšëmbo. <sup>50</sup> Y ndoñe quešmatsjuabná, tšëngaftangbiana más tšabá yojtsemna nÿe canye boyabása Israeloca entšangbiana chaóbana, y ndoñe nÿets bëngbe luare chamotsepochocá ca —cha tojanëyana.

<sup>51</sup> Pero Caifás chë soye nÿe cachabe juábnaca ndoñe chca tonjánayana. Cha, chë uata chë bachnangbe más uámana amëndayá inámnayeca, Bëngbe Bëtsabe Espíritbe obenánaca tojánayana Jesús ibojamna Israeloca entsangbiana jóbanama ca. <sup>52</sup> Y ndoñe nÿe Israeloca entsangbiana, sinó chë inÿe luarënguifne Bëngbe Bëtsabe básenga tmojanáshanënga chamuatábama, as chca, nÿetscanga nÿe canÿe luarentša entsanga chamotsemnama. <sup>53</sup> Chcasna, cach tescana judiëngbe amëndayënga tmojanenoyeuná Jesús jóbama.

<sup>54</sup> Chíyeca Jesús entsángbeñe, Judea luariñe ya ndoñe yontsana. Chë luarentšana tojëftsanbocna y canÿe luaroje tojtsanoñe, entsanga ndoyeniñe béconana, canÿe pueblo Efraín ca uabáinoje. Y chentše chabe uatsjëndayëngaftaca tojtsanoquedañe.

<sup>55</sup> Judiëngbe Bashco fiestama batšá yojtsájamna, y ba entsanga pueblënguentsana Jerusalenoye imojtsajna, soyënga choca jamama ntšamo tempo inamncá, chca, Bëngbe Bëtsabe bominyama tsábenga jtsemnama, chë Bashco fiesta cabá ndobuache ora. <sup>56</sup> Chocna, judiënga Jesús imojtsenguaye, y Bëngbe Bëtsabe bëts yebnentše imojtsentjanaye: “¿Ntšamo šmojtsejuabná, cha tayochjabo o ndoñe quem fiestama ca?”

<sup>57</sup> Chë fariseunga y chë bachnangbe amëndayënga tmojanmandá, nderado nda Jesús ndayentše tojtsemnama tojtsetatšëmbësna, chaobuambá ca, as Jesús jishachama.

## 12

*María, botamana uanguëtsiye Jesúsbeñe tbojanáshecbuešcja (Mt 26.6-13; Mc 14.3-9)*

<sup>1</sup> Chnënguana te chë Bashco fiestama yojtsájamna ora, Jesús Betania puebloje tojtaná. Lázaro, chë Jesús tbojtanyená cha, choca inoyena. <sup>2</sup> Chentšna bëts saná Jesusbiana tmojanábua. Marta tojanëjuatšé, y Lázaro yojtsemna chë Jesúseftaca juasama mesëshañe imojtsetbiámanënguentshe. <sup>3</sup> As María canÿe jarrëtema tojanaca; chiñe yojanaftsuamna canÿe botamana uanguëtsiye, bëtscá uámaniye, ena nárdoca pormániye. Chë uanguëtsiye, María, Jesusbe shecuatšënguifne tbojanáshecbuešcja, y cachabe stjënashaca tbojtanshecbójó. Chora, chë yebnentše ena nardiyana yojtsonguëtsiye.

<sup>4</sup> Chora, canÿa Jesusbe uatsjëndayënguentsá, Judas Iscariote, chë Jesús uayayëngbe cucuatšifne yochjanayentšbashejuaná, tojánayana: <sup>5</sup> —Quem botamana uanguëtsiye unga patse denario crocénana enduámana. ¿Ndáyeca ndoñe šmonjuie y ndbomnjëmënga chë crocénana mašmëntsatsatá ca?

<sup>6</sup> Pero Judas chca tojánayana, chë ndbomnjémëngbeñe ntse-juabnaycá, sinó cha atbëbaná inamna causa. Judas chëngbe crocénana shecnëšiñe yojánatbëna, y ba soye, chë shecnësoye imojanatsuáma crocenánentsana cha yojánatbëbana.

<sup>7</sup> As Jesús tbojanjuá: —Cachcá monyá. María mëntscoñe chë botamana uanguëtsiye iuabofjájona, cha jobenayama átšbeñe jabuéscjama, er ndoñe bën y atše šmochanjaitëme. <sup>8</sup> Chë ndbomnjémëngna tšëngaftangbeñe sempre mochanjesomñe, pero atše ndoñe ca —tojánayana.

### *Judiënga tmojanenoyeuná Lázaro jóbama*

<sup>9</sup> Ba judiënga tmojántatšëmbona Jesús Betanioca yojtsemnama, y choye tmojána, ndoñe nýe Jesús jinýama, sinó Lázarnaca, chë Jesús tbojtanayená cha. <sup>10</sup> As chë bachnangbe amëndayënga tmojanenoyeuná Lázarnaca jóbama. <sup>11</sup> Chabe causa, ba judiënga chëngbioye cachcá tmojesanënyá y Jesúsbeñe imojtsošbuaché.

### *Jesús Jerusalenoye tojánashjango*

*(Mt 21.1-11; Mc 11.1-11; Lc 19.28-40)*

<sup>12</sup> Chë yëfsana, mallajta entšanga, Jerusalenoca fiestama tmojánashjajnënga, tmojántatšëmbona Jesús choye yochjánashjanguama. <sup>13</sup> As chëngna palma betiye buacuafjënga tmojanatëtsetše, y Jesús jajëbenguama tmojánbocana, y mëntšá imojtsáyebuache: “¡Bëngbe Bëtsá matschuanga! ¡Corente bendición bomná chë Bëngbe Utabnabe obenánaca tojabá! ¡Corente bendición bomná chë Israeloquëngbe Rey ca!”

<sup>14</sup> Jesús canýe burrotema tbojáninýena y chábeñe tojanenoyayé. Ntšamo Bëngbe Bëtsabe uabemana palabrenguiñe iuayancá, cachcá tojanopasá. Chiñe mëntšá endayana Jerusalenoca entsangbiama:

<sup>15</sup> Sión bëts puebloca oyenënga, ndoñe matauatjëngana. Minýënga, tšëngaftangbe Rey burrotëmiñe enjaquená entsabó ca.

<sup>16</sup> Chca orna, Jesusbe uatsjëndayënga chë soyëngama ndoñe tonjanësertá; pero chentšana, Jesús corente bëtsá yomnama Bëngbe Bëtsá tojaninýanýé ora, chë uatsjëndayënga chama tmojanenoyuabó, lempe ntšamo Bëngbe Bëtsabe uabemana palabrenguiñe iuayancá y cachcá Jesúseftaca tojanopasama.

<sup>17</sup> Chë Jesúseftaca imojtsemna entšanga, Lázarbioye uatbontsánoye tbojanchembo ora y chentšana tbojtanayená ora, ntšamo tmojáninýama chora imojtsecuëntaye. <sup>18</sup> Chíyeca, ba entšanga tmojánbocana Jesús jajëbenguama, chë bëts soye Bëngbe Bëtsabe obenánaca cha tojanmama tmojanuénayeca. <sup>19</sup> Pero chë fariseunga imojtsenatsëtsnaye: “Tšëngaftanga šmontsonyá bënga tondaye jamama quemuátobenama y más, inýetscanga cha montsëstona ca!”

*Básefta Grecia luaroca entsanga Jesús tmojánanguango*

<sup>20</sup> Bashco fiestama, chë Bëngbe Bëtsá jadórana Jerusalenoye tmojánangbeñe, básefta griego entsángnaca imojtsemna. <sup>21</sup> Chëngna, Felipe chë Galilea luarocá, chë Betsaida pueblócábioye, tmojanobeconá y tmojanimpadá: “Señor, bënga fsëntseboše Jesús jinýama ca.”

<sup>22</sup> Chora Felipe tojána Andrés jauyanama, y chë útatna Jesúsbioye tbojána, chë grieguëngbiama jauenayama. <sup>23</sup> Jesús chata tojanéyana: “Chë Bëngbe Bëtsá Entśá tbojanbemá corente bëtsá yomnama jinýanýiyama te ya tojobuache. <sup>24</sup> Ndegombre šcuayana: Canýe trigo jénaye ndoñe fshantsiñe tmonjuatbontśá y ndoñe tonjóbanëse, nýe cach canýe trigo jénaye jesomñana. Pero tmojuatbontśá y tojóbanase, bëtsá jashájonana. <sup>25</sup> Cachcá, nda nýe cachá tojtsenóbobonshana, cha chabe vida echanjëftsobuetše. Pero nda nýe cachá ndoñe tontsenóbobonshana y ntšamo atše stsemandacá, quem luariñe vida tojtsebomnëntscuana cha tojtsamëse, chë nýetsca tescama yomna tšabe vida echántsebomna. <sup>26</sup> Nda ntšamo stsemandacá jamama tojtseboše, atše chašotsëstona. Chca, ndayentše atše chaitsemna, chánaca, chë atše oservená, chentše chaotsemna. Atše šojtseservénabiama, atšbe Taitá Bëngbe Bëtsá echanjínýanýiye bëtsá yomnama ca” —Jesús tojánayana.

*Jesús tojánayana cha yochjanóbanama*

<sup>27</sup> Y más Jesús tojánayana: “¡Mora tša cochtsetšenaná sëntsemna! ¿Atše chjayana: ‘Taita, chë átšeftaca echanjopása soyënga šmotsebojuaná ca?’ Ndoñe; er más chama atše quem luaroye tijabo. <sup>28</sup> Taita, šminýanýé aca puerte bëtsá y obená connama ca.”

Y cachora, celocana canýe oyebuambnayana tojanóbozna mëntśá: “Ya tchbonjinýanýé atše puerte bëtsá y obená tsmënama, y mora cachiñe cachcá chanjama ca.”

<sup>29</sup> Entśanga chca tmojanuena ora, ínýenga imojtsichamo nýe tojanjuésase ca; pero ínýengna imojtsichamo: —Canýe ángel chábioye tbonjuatsëtsá ca.

<sup>30</sup> Chora Jesús tojanéyana: —Ntšamo šmonjouencá, atšbiama ndoñe quenátsmëna, sinó tšëngaftangbiama. <sup>31</sup> Mora chë tempo entsemna, chë quem luare entsanga tmojëftsema bacna soyënga jinýanýiyama y chëngbe castiguama jayanama. Y mora, chë nýetsca bacna soyënga mandayá, quem luarentšana mochantábocna. <sup>32</sup> Pero atše fshantsocana atšbananá chaitsemna ora, nýetsca entsanga átšbioye chanjúbuaja ca —Jesús tojánayana.

<sup>33</sup> Chca cha yojtsichamo, ana jinýanýiyama ntšamo jóbanama ibojamnama. <sup>34</sup> Chora chë entsanga tmojanjuá: —Bëngbe

Bëtsabe uabemana palabrënguiñe endayana, y chíyeca bënga fsëndétatšëmbo chë Cristo nÿetsca tescama vida yochtse-bomna ca. As, ¿ndáyeca cojtsichamo, Bëngbe Bëtsá Entšá tbojanbemá chamuatsbanama yojtsemna cá? ¿Nda yojtsemna Bëngbe Bëtsá Entšá tbojanbemá ca? —chënga imojtsichamo.

<sup>35</sup> Y Jesús tojanéyana: —Nÿe baseftatescama chë entsangbe juabnënga binÿnayá tšëngaftangbeñe entsemna. Chë binÿnayá cabá tšëngaftangbeñe yojtsemnëntscuana, cháftaca šmochtsajna. Chca, mo ibetiñcá ndoñe quešmochátajna. Nda ndoñe binÿniñe tojtsana, cha ndoñe ntsetatšëmbuana ndëmuajana yojtsana. <sup>36</sup> Chë binÿnayá cabá tšëngaftangbeñe endëtsemnëntscuana, chábeñe šmochtsošbuáchiye; as, tšëngaftangbe juabnënga binÿniñe echántsemna ca —Jesús tojánayana.

Chë soyënga tojánayanentšana, Jesús tojtsanoñe y entsangbiana yojtsóitana.

*Ndáyeca chë judiënga Jesúsbeñe ndoñe montsanošbuaché*

<sup>37</sup> Masque Jesús, judiëngbe delante ba bëts soyënga Bëngbe Bëtsabe obenánaca tojëftsema, chënga ndoñe chábeñe ntsošbuáchiyana, <sup>38</sup> ntšamo Bëngbe Bëtsabe juabna oyebuambnayá Isaías tojanabemcá, cachcá chaotsemnama. Isaías mëntsá tojánayana:

Bëngbe Utabná, ¿nda bëngbe buayenana soyiñe yojtsošbuaché? Y ¿nda tbojosertá, acbe obenana tcojinÿinÿé ora ca?

<sup>39</sup> Chíyeca chënga ndoñe montsobena Jesúsbeñe jtsošbuáchiyama, er Isaías mëntsánaca tojëftsanabema:

<sup>40</sup> Bëngbe Bëtsá tojama chënga chabe soyëngama ndoñe botamana chamondëtsejuabnama

y chabe soyënga ainaniñe ndoñe chamondóyëngacñama, as ndoñe chaondëtšësertánama ca.

Y Bëngbe Bëtsá entsichamo: “Chca entsemna, chënga atšbe benache ndoñe chamondishachama,

y atše ndoñe ntjátsebacama;

y chca, chënga mochántsemna mo ndëshnana entsangcá ca.”

<sup>41</sup> Isaías chca tojánayana, er tojáninÿe Jesús puerte bëtsá y obená yojamnama, y chca chë uabemaniñe Jesusbiana yojanoyebuambná.

<sup>42</sup> Pero masque chca iuábemanëse, ba judiënga imojtsanošbuaché, y banga judiëngbe amëndayëgnaca Jesúsbeñe imojtsanošbuaché. Pero chëngna, Jesúsbeñe imojtsošbuáchema entsángbeñe ndoñe montsichamo. Chca imojánama chë fariseungbiana auatja causa, chë judiëngbe enefjuana yebnënguentsana ndoñe chamondëtëbuacnama.

<sup>43</sup> Chëngbiana más yojanámana, entsanga chëngbiana



chamotsichamo tša uámanënga imojamna ca, y ndoñe, Bëngbe Bëtsá chca chaotsamama.

*Jesusbe palabrëngaca yochtsótatsëmbo entsanga tšabá o ndoñe tšabá tmonjamama*

<sup>44</sup> Chora Jesús mëntšá jabuache tojánayana: “Nda átšbeñe tojtsošbuaché, ndoñe nÿe átšbeñe ntsošbuáchiyana; chë nda šojichmó chábeñnaca cha jtsošbuáchiyana. <sup>45</sup> Cachca, nda atše šojtsonÿá, chë šojichmó chábioynaca cha jtsonÿayana. <sup>46</sup> Atše quem luaroye tijabo entsangbe juabnënga jabobínÿnama, chca, nda átšbeñe tojtsošbuaché, mo ibetiñcá ndoñe chaondëtsemnama. <sup>47</sup> Pero nda atšbe soyëngama tojouena, pero ntšamo sëntsichamcá ndoñe tontsama, atše chabiamana ndocá quichátayana tšabá o ndoñe tšabá tonjama ca. Atše ndoñe chiyátabo, ntšamo quem luarentša entsanga tmojamama tšabá o ndoñe tšabá yontsemna ca jatichámuama; quem luaroye sënjabo ndayá chënga jabátsebacama. <sup>48</sup> Nda atše šojtsaboté y atšbe palabrëngama ndoñe šonjoyeuná, ya entsebomna nda chabiamana yochjayana bëts castigo jtsebomnama ibojtsemna ca. Atše tijanoyebuambá palabrëngaca, quem luare jopochócama te chabiamana chca echántsayana. <sup>49</sup> Er atše ndoñe nÿe atšbe juábna quetsatoyebuambná. Chë Taitá, chë šonjichmó cha, šonjamandá ntšamo jayanana y ndayá jabuátambana. <sup>50</sup> Atše sëndëtatsëmbo, atšbe Taitá tojamandá orna, cha jamándana entsanga chë nÿetsca tescama yomna tšabe vida chamotsebomnama. Chíyeca, ndayá sëntsichamcá, endmëna ntšamo atšbe Taitá Bëngbe Bëtsá šojamandacá ca” —Jesús tojánayana.

## 13

*Jesús chabe uatsjëndayënga tojanashecjabebé*

<sup>1</sup> Bashco fiesta cabá ndobuache ora, Jesús yojtsetátšëmbo chabe tempo tojanóshjanguama, quem luarentšana jëftsebocnama y chabe Taitábioye jtama. Ntšamo Jesús chábenga yojanababuanÿeshancá, chë quem luare imojamnënga, chórna yojtseboše chë bëts bonshánana puerte más jinÿanÿiyana.

<sup>2</sup> Pero Satanás, Júdasbe ainaniñe bacna juabnënga tojanajajó, uayayëngbe cucuatšifne Jesús jayentšbáshejuanama. Judas Iscariote, Simonbe uaquiñá. <sup>3</sup> Jesús yojtsetátšëmbo chabe Taitá Bëngbe Bëtsá nÿets obenana tbojánatšetama. Cachcá, Jesús yojtsetátšëmbo, Bëngbe Bëtsábicana cha tojánabama y cachábioye jtama ibojtsemnama. <sup>4</sup> Chcasna, chë ibeta jasama

tmojanpochocá ora, mesëshentšana tojantsbaná, chabe juatsboye uichëtjoníya tojanenátsejca y canýe tualléjua tojanenasná. <sup>5</sup> Chentšana, canýe bachešiñe búyeshe tojanbuešcja y tojanontsé chabe uatsjéndayënga jushecjabebiyana y jtšhecbojuana cha yojtsasnana tualléjuaca.

<sup>6</sup> Pero, Simón Pedro tbojanobuache ora, Jesúsbioye tbojaniana: —Atšbe Utabná, ¿aca šcochjuashecjabiá ca?

<sup>7</sup> Chora Jesús tbojanjuá: —Atše sěntsama soye mora ndoñe quecmátěsertana; pero más chcoye aíñe cmochanjosérta ca.

<sup>8</sup> As Pedro tbojaniana: —¡Ndocna te šcatjuashecjabiá ca!

Pero Jesús tbojaniana: —Ndoñe chacbonjuáshecjabese, atšbia ndoñe quecochátsměna ca.

<sup>9</sup> Y Simón Pedro tbojaniana: —¡Atšbe Utabná, as nýe atšbe shecuatšënga ndoñe, ndayá atšbe cucuatšënga y bestšášnaca ca!

<sup>10</sup> Pero Jesús tbojanjuá: —Nda bebená tojtsemna, nýe shecuatše jtsashecjabiamá jtsajabótana, ndoñe nýetšá cachiñe. Nda tojtsobebé, ndoñe tsengá ntsemnana. Cachcá, mo bebénënga cuenta tšëngaftanga šmontsemna; pero canýa muentše entsemna, y cha mo bebenacá ndoñe quenátsměna.

<sup>11</sup> Jesús yojtsetátšëmbo nda chë uayayëngbe cucuatšiñe boshjuaná yochtsanmënama, chíyeca tojánayana: “Tšëngaftanguentšá canýa entsemna, cha mo bebenacá ndoñe quenátsměna ca”.

<sup>12</sup> Jushecjabebiyama tojanpochocá ora, chabe juatsboye uichëtjoníya tojtaníchëtjo, y mesëshentše tojtanótbema. Chora tojanéyana: —¿Chë tcbonjábiamá soyama quecmojsěsertana ca? <sup>13</sup> Tšëngaftanga atše šmondbauyana Buatëmbayá y Bëngbe Utabná ca; tšabá chca šmontsichamo, er atše ndegombre chca sëndměna. <sup>14</sup> Atše, tšëngaftangbe Buatëmbayá y Utabná, tcbonjushecjabebé; chcasna, tšëngaftángnaca cmontsamna jenáshecjabebiyana. <sup>15</sup> Ntšamo quem sóyeca tcbonjanýanýecá, tšëngaftanga cachcá šmochtsama. <sup>16</sup> Ndegombre šcuayana, chë oservená chabe nduiñbiamá ndoñe más uamaná ntsemnana. Cachcá, chë ichmoná chë tbojichmobiamá ndoñe más uamaná quenátsměna. <sup>17</sup> Quem soyënga chašmojuatsjinýe y chca chašmojaměse, tšëngaftanga puerte oyejuayënga vida šmochanjěftsebonna.

<sup>18</sup> “Atše sëndétatšëmbo chë tijábacacangbiamá, chíyeca atše nýetscangbiamá ndoñe chca quetsatoyebuambná. Y ntšamo Bëngbe Bětsabe uabemana palabreñguiñe endayancá cachcá chaotsemnama, chë ‘canýa átšeftaca tanděse tonjasá, atšbe contra echántsemna ca’, cachcá echanjopása. <sup>19</sup> Mora, cabá ndoñe chca tonjopasá ora, lempe chë soyënga sěntsichamo. As, chca chaojopasá ora, átšbeñe šmochantsošbuáchiye,

y as šmochántsetatsšëmbo atše tsmëna chë nda sëndmëná.  
<sup>20</sup> Ndegombre šcuayana: Nda atše tijichmóbioye tbojofja, cha atše šochanjofja; y nda atše šojofja, cha chë nda šojichmóbioye bochanjofja ca” —Jesús tojánayana.

*Jesús tojánayana uayayëngbe cucuatšiñe Judas bochjáboshjonama*

*(Mt 26.20-25; Mc 14.17-21; Lc 22.21-23)*

<sup>21</sup> Chë soyënga tojánayanentsana, Jesús corente cochtsetšenaná yojtsemna, y tojánayana: —Ndegombre šcuayana, canya tšëngaftanguentsá uayayëngbe cucuatšiñe šochanjáboshjona ca.

<sup>22</sup> Chora, chabe uatsjëndayënga tmojanontsé enonjinyayana, y ndoñe montsetátšëmbo ndabiama Jesús chca tojánayanama. <sup>23</sup> Canye uatsjendayá, chë Jesús puerte ibnabobonshaná, Jesusbe juachaca inatbemana. <sup>24</sup> As, Simón Pedro chábioye tbojánefjatsšëmbo, ndabiama Jesús chca tojánayanama Jesúsbioye chabotjama. <sup>25</sup> Chë puerte bonshana uatsjendayá, Jesúsbioye batšatema más tojanosjoná y tbojantjá: —Bëngbe Utabná, ¿nda cha yojtsemna ca?

<sup>26</sup> Chora Jesús tbojanjuá: —Atše canye base tandëtema chanjafchécuacuaye y ndábioye chajoyé, cha entsemna ca.

As Jesús canye base tandëtema tojanfcheacuacúá, y Judas, Simón Iscariote uaquiñábioye, tbojanoyé. <sup>27</sup> Tandëse tojanóyëngacñe y cach ora, Satanás Júdasbe ainaniñe bacna juabnënga tbojáncochëngo. As Jesús tbojanianana: “Chë cochanjama soye, cam ora moma ca.”

<sup>28</sup> Pero ni canya chë jasama imojtsetbiamanënguentsá tbojanësertá, ndayama Júdasbioye chca tbojanianana. <sup>29</sup> Judas inamna chëngbe crocénana shecnësiñe uambayá; chíyeca ínÿenga tmojanjuabó Jesús chca ibojtsatsaye, ana ndayá yojtseita soye chë fiestama chauabuámiyama, o ndbomnjémënga ndayánaca chauatšatama ca.

<sup>30</sup> Júdasna chë base tandëtema tojanóyëngacñe, y cachora chentsana tojéftsanbocna. Chora ya ibeta yojtsemna.

### *Chë tsëm mando*

<sup>31</sup> Judas tojéftsanbocnentsana, Jesús tojánayana: —Ora tojobuache, Bëngbe Bëtsá Entšá tbojanbemá corente bëtsá y obená yomnama jinÿanÿiyama; y mua echanjínÿanÿiye Bëngbe Bëtsá corente bëtsá y obená yomnama. <sup>32</sup> Cha echanjínÿanÿiye Bëngbe Bëtsá chca yomnama, chíyeca Bëngbe Bëtsánaca echanjínÿanÿiye corente bëtsá y obená yomnama, y mora entsemna chë ndaye ora Bëngbe Bëtsá chca chabiama yochjínÿanÿiye. <sup>33</sup> Atšbe básënga, baseftatescama tšëngaftangafata sëntsemna. Chora

šmochántsenguaye, pero ntšamo judiënga sënjauyancá, mora cachcá tšëngaftanga cbëyana: Chë chanjá luaroye, tšëngaftanga ndoñe quešmátobena jama ca. <sup>34</sup> Canye tsëm soye cbetsamëndá: Nyetscanga šmochtsenbobonshana. Ntšamo atše tšëngaftanga cbondábabuanyëshana, cachcá tšëngaftanga šmochtsenbobonshana. <sup>35</sup> Tšëngaftanga šmojtsenbobonshánëse, nyetsca entsanga mochántsetatšëmbo, tšëngaftanga atšbe uatsjëndayënga šmomnana ca —Jesús tojanéyana.

*Jesús tojánayana, chábioye ndoñe bonjanabuátma ca Pedro yochjánayanama*

*(Mt 26.31-35; Mc 14.27-31; Lc 22.31-34)*

<sup>36</sup> Chora Simón Pedro tbonjantjá: —Bëngbe Utabná, ¿ndëmoye cochjá ca?

As Jesús tbojanjúá: —Atše sentsá luaroye, mora aca ndoñe quecátobena atše juastana, pero más chcoye aïne šcochanjuasto ca.

<sup>37</sup> As Pedro tbojanianyana: —Atšbe Utabná, ¿ndáyeca ndoñe sentsobena mora aca juastama? ¡Atše sëntseprontana acbiana jóbanama ca!

<sup>38</sup> Chora Jesús tbojanianyana: —¿Ndegombre cojtseprontana atšbiana jóbanama? Ndegombre cbëyana, cabá ngallo ndëcánta ora, aca unga soye atšbiana cochanjayana: “Cha ndoñe quetsatabuatma ca”.

## 14

*Jesúsbeýeca entsanga jobenayana Bëngbe Bëtsábioye jama*

<sup>1</sup> Mëntšánaca Jesús tojánayana: —Ndoñe ainana tsetšanënga matsmënanana. Tšëngaftanga Bëngbe Bëtsábeñe šmondošbuaché; átšbeñnaca šmochtsošbuáchiye. <sup>2</sup> Atšbe Taitá Bëngbe Bëtsá endmënoca, ba luarënga joyénanama endmëna. Ndoñe chca tontsemnëse, atše chca matchbënjáuyana. Morna, cha endmënoye atše chanjá tšëngaftangbiana canye luare joyénanama jabuáprontama. <sup>3</sup> Atše chajá y chë luare chacbojabuaprontá ora, cachiñe moye chanjésabo, tšëngaftanga átšeftaca junatsama. As, atše chaitsemnoye, tšëngaftángnaca chašmotsá joyénanama. <sup>4</sup> Atše chanjá choye ntšamo jama y jashjanguama ya šmontsetátšëmbo ca —Jesús tojánayana.

<sup>5</sup> Chora Tomás Jesúsbioye tbojanianyana: —Bëngbe Utabná, ndëmoye cochjama ndoñe queftsátstatšëmbo. As, ¿ntšamo bënga fchtsetátšëmbo ntšamo choye jama ca?

<sup>6</sup> Chca tbojanianyana ora, Jesús tbojanjúá: —Atše sëndmëna benachcá; chëjana tcojtsase, pronto jashjanguana. Atše

sëndmëna ntšamo ndegombre yomncá sempre oyebuamb-nayá, y entsanga chë nyetsca tescama yomna tšabe vida chamotsebomnama endamá. Nye átsbeyeca endopodena ndayëjana jama, y atšbe Taitá Bëngbe Bëtsábioca jashjan-guama. <sup>7</sup> Tšëngaftanga atše šmojtšábuatmëse, atšbe Taitánaca šmattsábuatma. Morscana ya cha šmontsábuatma y cha šmontsonyá ca –tbojaniana.

<sup>8</sup> Pero Felipe tbojaniana: –Atšbe Utabná, nye chë Taitá šmanyanyé, ndayama más ca.

<sup>9</sup> Chora Jesús tbojaniana: –Chëfta te tšëngaftangaftaca sëntsemna, y ¿cabá ndoñe atše šcontsábuatma, Felipe? Nda atše šojinye, chë Taitá Bëngbe Bëtsábioynaca jinýana. As, ¿ntšamo atše šcojtsatsá, chë Taitá šmanyanyé ca? <sup>10</sup> ¿Ndoñe condošbuaché, atšbe Taitá átsbeñe y átsnaca chábeñe nye canýacá ftsmënama? Chë cbontsëtsësná soyënga, ndoñe nye atšbe juábnaca chca quetsatoyebuambná. Atšbe Taitá, chë átsbeñe vida endbomná jtsamana lempe ntšamo stsamcá. <sup>11</sup> Muiñe šmochtsošbuáchiye: Atšbe Taitá átsbeñe endmëna, y átsnaca chábeñe mo nye canýacá sëndmëna. Chama ndoñe šmontsošbuachese, as nye chë tijama soyëngámna átsbeñe šmochtsošbuáchiye. <sup>12</sup> Ndegombre šcuayana, nda átsbeñe tojtsošbuaché, ntšamo atše tijamcá y cachcá cha echántsama. Atšbe Taitá entsemnoye atše chanjá, chíyeca, chë átsbeñe ošbuachiyá, chama más bëts soyënga echanjama. <sup>13</sup> Tšëngaftanga ndaye sóynaca Bëngbe Bëtsábiocye šmojtjañe, y chca šmojama atše jótšëmbonëse, átsbeñe šmošbuachéyeca, lempe šmochanjóyëngacñe; chca, chë Uaquiñá echanjinyanýiye chë Taitá corente bëtsá y obená yomnama. <sup>14</sup> Tšëngaftanga ndaye sóynaca atše šmojtjañe, y chca šmojama atše jótšëmbonëse, átsbeñe šmošbuachéyeca, atše chë soye chanjama ca –Jesús tojánayana.

### *Jesús tojanašebuachená chë Uámana Espíritu jíchmuama*

<sup>15</sup> Mëntšánaca Jesús tojánayana: “Tšëngaftanga atše smojtsebobonshánëse, ntšamo cbontsamëndacá cachcá šmochanjama. <sup>16</sup> Chca chašmojamëse, atšbe Taitá Bëngbe Bëtsá tšëngaftangbiama chanjaimpáda, tšëngaftanga jabújabuachama y jabáñemuayama inyá cha chabuichmoma, chë Uajabuachaná nyetsca tescama tšëngaftangaftaca chauétsemnama. <sup>17</sup> Cha, chë Uámana Espíritu endmëna chë nyetsca soyënguiñe ntšamo ndegombre yomncá oyebuambnáyá. Chë nye quem luarama enójuabnaye entsanga, chë átsbeñe ndošbuáchiyënga ndoñe quematonýá, ni quematábuatma. Chíyeca chënga ndoñe quemátobena cha jóyëngacñana. Pero tšëngaftanga aiñe cha šmontsábuatma. Cha

tšëngaftangaftaca entsemna, y tšëngaftangbe ainaniñe sempre echanjëftsiyena.

18 “Atše ndoñe quebocháisabashejuana, mo uajchonga cuenta chašmotsemnama. Tšëngaftangbioye chanjésabo. 19 Muentšana baseftaytese, chë nýe quem luarama enójuabnaye entšanga ndoñe más quešmochátonýaye; pero tšëngaftangna aiñe, atše cachiñe šmochántinýe. Atše ainá chántsemna, chíyeca tšëngaftanga átšeftaca tšabe vida šmochántsebmna. 20 Chë Uámana Espíritu tšëngaftangbe ainaniñe chašmojóyëngacñe ora, tšëngaftanga šmochántsetatšëmbo, atše atšbe Taitábeñe nýe canýacá tsmënama; cachcá, tšëngaftanga šmochántsetatšëmbo, tšëngaftanga átšeftaca cachcá nýe canýacá šmomnama y átšnaca tšëngaftangaftaca. 21 Nda totátšëmbo ntšamo atše tijamandacá y sempre chca tojtsama, cha ndegombre šojtsebobonshana. Nda átšbioye šojtsebobonshana, chábioye atšbe Taitánaca bochántsebobonshana. Atšnaca cha chántsebobonshana, y nda atše tsmënama cha chanjinýinýiye ca” —Jesús tojánayana.

22 Chora, inýe Judas, ndoñe Judas chë Iscariote, Jesúsbioye tbojanianyana: —Bëngbe Utabná, ¿ntšamo chca yojtsemna, nýe bënga šcochjínýanýiye ntšamo cach aca comnama, y nýetsca quem luarentšëngbioye ndoñe ca?

23 Chora Jesús tbojanjuá: —Nda atše šojtsebobonshana, ntšamo atše sëntsoyebuambnacá echanjama. Atšbe Taitánaca chábioye bochántsebobonshana, y bëndata chábioye fchanjabo y chábeñe vida fchantsebmna. 24 Nda ndoñe šontsebobonshana, ndoñe queochátama ntšamo sëntsoyebuambnacá. Ntšamo sëntsoyebuambnacá ndoñe nýe atšbe juábnaca quenátsmëna, sinó chë Taitá, chë sonjichmó chabe juábnaca.

25 “Atše cabá tšëngaftangaftaca sëntsemnëntscuana, lempe quem soyëngama sëntsoyebuambná. 26 Chë Uajabuachaná, chë Uámana Espíritu, atšbe impadanánaca atšbe Taitá bochanjíchmua. Cha lempe cmochántsabuatambaye, y echanjama nýetsca chë tcbonjáuyana soyëngama chašmuatenójuaboma.

27 “Chë atšbe ainaniñe puerte tšabe ebionana tšëngaftangbiana šcuétseboshjona, cbetsatšatá. Chë nýe quem luarama enójuabnaye entšanga cmondbétsatšatnaye soyëngcá ndoñe quenátsmëna, chë atše cbontsatšatná ainaniñe puerte tšabe ebionana. Ainana tsetšanënga ndoñe matsmënana, ni matauatjëngana. 28 Ya šmonjouena ntšamo tcbonjauyancá: ‘chanjá y tšëngaftangbioye chanjésabo’. Tšëngaftanga atše smojtsebobonshánëse, šmattsóyejuaye atše chë Taitábioye

jama šojtsemnana, er chë Taitá atšbiama más bëtšá endmëna. <sup>29</sup> Quem soyënga tcbonjáuyana, cabá ndoñe chca tonjopasá ora; as, chca chaojopasá ora, chiñe jenójuaboyëse átšbeñe chašmotsošbuáchema.

<sup>30</sup> “Chë quem luarentša bacna soyënga mandayá endabó; chíyeca atše ya ndoñe bëtšcá tšëngaftangaftaca quichaisóyebuambaye. Pero cha tondaye quenátobena atše jabórlana. <sup>31</sup> Masque cha chca endmëna, chca entsemna, atše chë Taitábioye tšbobonshánama quem luarentša entšanga chamotsetatšëmbuama. Ntšamo atšbe Taitá šojamandacá, atše cachcá tsámama chamotsetatšëmbuama.

“Motsbananga. Muentšana cuajna ca” —Jesús tojanëyana.

## 15

### *Jesús yomna mo chë tšabe uvas betiyá*

<sup>1</sup> Mëntšánaca Jesús tojánayana: “Atše sëndmëna mo chë tšabe uvas betiyá, y atšbe Taitá Bëngbe Bëtšá chë tšabe uvas betiye inyënacá. <sup>2</sup> Chë inyëná, chë uvas betiyentša buacuafjënga ndëshajuanëfjënga jtsebuácuëtëtsetšana; pero chë uvas betiyentša buacuafjënga shajuanëfjënga jtsobolímpiana, bëtšcá chaotseshájuanama. Nda ndoñe tontsama ntšamo Bëngbe Bëtšá tojtsebošcá, jtsemnana mo chë ndëshajuana buacuafjëngcá; y chë causa, chë Taitá chábioye corente bochantsecastíga. <sup>3</sup> Tšëngaftanga šmonjouena ntšamo tijayancá; bëtšcá chca šmontsama. Chíyeca mora tšëngaftanga šmontsemna mo chë limpiana y shajuana buacuafjëngcá. <sup>4</sup> Atšeftaca cányiñe mo canyáca šmochtsemna y atše tšëngaftangaftácnaca. Chë buacuafja uvas betiyentšana juanánëfja ndoñe ntšobenana nye cachabe ponto jashájonana. Cachcá, tšëngaftanga átšeftaca ndoñe cányiñe mo canyáca šmontsemnëse, ndoñe šmattsobena Bëngbe Bëtšabiama bëtšcá soyënga jamama.

<sup>5</sup> “Atše chë tšabe uvas betiyá sëndmëna y tšëngaftanga chë buacuafjëngcá. Nda átšeftaca cányiñe mo canyáca tojtsemna y atše cháftacnaca, cha Bëngbe Bëtšabiama bëtšcá soyënga echanjama, mo canye buacuafja becá tojtseshajuancá. Er, tšëngaftanga atšbe uajabuáchenana ndoñe šmontsebomnëse, átšeftaca cányiñe mo canyáca ndoñe šmontsemna causa, tondaye šmattsobena jamama. <sup>6</sup> Canya átšeftaca cányiñe mo canyáca ndoñe tontsemnëse, cha jtsemnana mo canye buacuafjënga, entšanga jtsatbanana, íñeshoye jtsëtšenana y chentše jtsejuinëyana. Cachcá, nda ndoñe átšeftaca cányiñe mo canyáca tontsemna, ndoservená jtsemnana y luaroca cha mochantsesegóra.

<sup>7</sup> “Tšëngaftanga átšeftaca cányiñe mo canýacá šmojtsemna y ntšamo atše tijayancá šmojtsamëse, lempe ntšamo šmojtsebošcá šmochjotjañe, y lempe šmochanjóyëngacñe. <sup>8</sup> Chë shajuana buacuafjëngcá tšëngaftanga chašmojtsemna ora, šmochanjínýanýiye atšbe Taitá corente bëtsá y obená yomnama. Y chca, tšëngaftanga atšbe ndegombre uatsjëndayënga šmochántsemna. <sup>9</sup> Ntšamo chë Taitá šondbobonshancá, átšnaca cachcá tšëngaftanga cbondábabuanýeshana. Chíyeca, šmochtsiyena atšbe bonshánama jtsejuabnayëse. <sup>10</sup> Atše sëndama ntšamo atšbe Taitá šondëmandacá. Chíyeca atše sëndoyena chabe bonshánama jtsejuabnayëse. Cachcá tšëngaftángnaca, ntšamo atše cbontsamëndacá šmojtsamëse, atšbe bonshánama jtsejuabnayëse šmochantsiyena.

<sup>11</sup> “Atše chca cbontsëtsëtsná, chë atše sëntsebmoma oyejuayana tšëngaftángnaca chašmotsebmomnama, y tšëngaftanga puerte chašmotsóyejuama. <sup>12</sup> Mëntšá cbetsamëndá: Ntšamo atše cbondababuanýeshancá, cachcá šmochtsenbobonshana. <sup>13</sup> Chë chabe amiguëngbiama tojóbanabiama, ndocna quenátobena chabiama más bonshánana jtsebmomnama. <sup>14</sup> Ntšamo atše tijamandacá tšëngaftanga šmojtsamëse, atšbe amiguënga šmochántsemna. <sup>15</sup> Chë oservená ndoñe ntsetatšëmbuana ndayá chabe nduiño tojtsamama. Chíyeca atše tšëngaftanga oservëngca ca ndoñe quecbatëtsëtsná. Morscana mëntšá cbontsëtsëtsná: ‘Tšëngaftangna atšbe amiguënga šmontsemna ca’, er lempe ntšamo atšbe Taitábentšana tijuatsjinýcá, tšëngaftanga tcbonjinýanjé. <sup>16</sup> Tšëngaftanga ndoñe atše chešmatábuayana, pero atše aiñe tšëngaftanga tcbonjabacacá y tcbonjubuáyana, Bëngbe Bëtsabe trabajo jamama; y chca, mo canýe betiye sempre tojtseshajuana y chë shajuana ndocna te tontsopochocacá, tšëngaftanga chašmotsemnama. Chca, lempe ntšamo atšbe Taitá šmojtotañcá, y chca šmojama atše jótšëmbonëse, átšbeñe šmošbuachéyeca, cha lempe cmochanjátšataye. <sup>17</sup> Mëntšá atše cbetsamëndá: Smochtsenbobonshana ca” —Jesús tojanéyana.

*Jesús y chabe entsanga, chë nýe quem luarama enójuabnayëngbiama uaboyëñjanënga*

<sup>18</sup> Mëntšánaca Jesús tojánayana: “Pero chë nýe quem luarama enójuabnaye entsanga tcmojtsëbuayënjëse, šmochjenójuaboye, natsana chënga atše šmonjanáboyëñjama. <sup>19</sup> Tšëngaftanga, chë nýe quem luarama enójuabnaye entsanguentsšana šmojtsemnëse, chënga cmattsababuánýeshana cachëngbengbioycá. Pero tšëngaftanga ndoñe chë nýe quem luarama enójuabnaye entsanguentsšana quešmátsmëna,



y atšna, chë quem luare oyenënguentsana tšëngaftanga tcbonjabacacá. Chíyeca chë nýe quem luarama enójuabnaye entsanga tšëngaftanga cmontsëbuayënja. <sup>20</sup> Smochjenójuaboye ntšamo tcbonjáuyanama: ‘Chë oserverná chabe nduiñbiama ndoñe más uamaná quenátsmëna ca’. Chënga monjánama atše chaisufrima; tšëngaftángnaca chašmotsesufrínama mochántsama. Entšanga ntšamo atše tijayanentsana ntsachetsá tmojtsamcá, cachcá chënga mochántsama ntšamo tšëngaftanga chašmojtsëtsësná chentsana. <sup>21</sup> Chë chacmojtsëbuayënjënga, chë šojichmó cha ndoñe quematábuatma. Chíyeca chënga lempe chca cmochanjáborlaye, atšbe causa.

<sup>22</sup> “Atše ndoñe matijabo y chënga ndoñe matijáuyanëse, ndegombre ndoñe bacna soye mattsebmoma. Pero mora, chëngbe bacna soyëngama chënga ndoñe quemátobena jayanana, ‘¡Chca fsënjama ntsetatšëmbcá ca!’ <sup>23</sup> Nda atše šojtsáboyënja, atšbe Taitábioynaca jtsáboyënjana. <sup>24</sup> Atše chë bëts soyënga Bëngbe Bëtsabe obenánaca chëngbeñe ndoñe matijamëse, ndegombre chënga ndoñe bacna soyënga mattsebmoma. Pero mora, masque ntšamo sënjamcá tmonjinýëse, chënga atše šmontsáboyënja y atšbe Taitábioynaca. <sup>25</sup> Chca chënga montsama, ntšamo chëngbe leyënguiñe enduabemancá cachcá chaopasama. Chiñe mëntsá endayana: ‘Nýe tondayama chënga šmonjanáboyënja ca.’

<sup>26</sup> “Atše, atšbe Taitábentsana chë Uajabuachaná y añemuayá tšëngaftangbioye chanjíchmuá. Cha chë Uámana Espíritu endmëna, chë nýetsca soyënguiñe ntšamo ndegombre yomncá oyebuambnayá. Cha endmëna chë Taitábentsana ichmoná; y cha lempe atšbe tšabe soyënga cmochantsëtsësnaye. <sup>27</sup> Chorscana, tšëngaftángnaca atšbiama entsanga smochantsëtsësnaye, er tšëngaftanga átšeftaca šmondétsemna, entsanga jábuayenama atše sënjanbojatšë orscana ca” —Jesús tojánayana.

## 16

<sup>1</sup> Mëntsánaca Jesús tojánayana: “Atše quem soyënga cbontsëtsësná, tšëngaftanga átšbeñe ošbuáchiyana ndoñe chašmondájbanama, atšbe causa chašmojtsesufrina ora. <sup>2</sup> Chëngna, chë judiëngbe enefjuana yebnënguentsana cmochantëbuacana. Chca tempo chaojobuache ora, chë tšëngaftanga chacmojtsëbáyënga mëntsá mochántsejuabnaye: ‘Bënga tšabá tmonjama ca. Ntšamo Bëngbe Bëtsá yojtsebošcá, cachcá bënga tmonjama ca.’ <sup>3</sup> Chënga, chë Taitá Bëngbe Bëtsá ndoñe quematábuatma, y átšbioye cach ndoñe. Chíyeca, chca

cmochanjáborlaye. <sup>4</sup> Atše chca tšëngaftanga cbontsëtsëtsná, ntšamo tcbonjáuyanama chašmuenójuaboma, chca tempo chaojobuache ora ca” —Jesús tojánayana.

*Ndayá chë Uámana Espíritu inétsama*

Mëntsánaca tojánayana: “Entšanga jábuayenama sënjanbojatsé orscana, chë echanjopása soyëngama ndoñe quecbënjatanëtsëtsná, er atše tšëngaftangaftaca sënjëtsemna. <sup>5</sup> Pero morna, chë šojichmó cha yomnoye chantá; y tšëngaftanguentsá ndocná šochanjatjaye, ‘¿ndëmoye cojtsá ca?’ <sup>6</sup> Mora, tšëngaftangbe ainana ngménaca entsemna, atše chca tcbonjáuyana causa. <sup>7</sup> Pero ndegombre šcuayana: Atše chanjá y chca tšëngaftangbe tšabiamá echántsemna. Atše ndoñe quetsjase, chë Uajabuachaná y añemuayá ndoñe tšëngaftangbioye queochátabo. Pero aïne chanjá, y chora cha tšëngaftangbioye chanjíchmuá. <sup>8</sup> Cha chaojášhango ora, echanjama quem luarentša entšanga corente chamotsetátšëmbo ndayá ndegombre yomna bacna soyënga jtsamana, ndayá ndegombre yomna chë Bëngbe Bëtsabe bominjíiñe tšabia jtsemnana, y ndayá yomna chë Bëngbe Bëtsá entšangbiama jayanana tšabá o ndoñe tšabá tmonjamama. <sup>9</sup> Entšanga átšbeñe ndoñe quematošbuaché. Chíyeca chë Uajabuachaná echanjama chënga corente chamotsetátšëmbo ndayá ndegombre yomna chë bacna soyënga jtsamana. <sup>10</sup> Chë Taitábioye chanjá y atše ndoñe más quešmochátinýe. Chíyeca chë Uajabuachaná echanjama chënga corente chamotsetátšëmbo ndayá ndegombre yomna Bëngbe Bëtsabe bominjíiñe tšabia jtsemnana. <sup>11</sup> Quem luarentša bacna soyënga mándayabiama Bëngbe Bëtsá ya tonjayana, ntšamo cha tojamama ndoñe tšabá yontsemna ca y nyetsca tescama castiganá chaotsemna ca. Chíyeca chë Uajabuachaná echanjama entšanga corente chamotsetátšëmbo, ndayá ndegombre yomna chë Bëngbe Bëtsá entšangbiama jayanana tšabá o ndoñe tšabá tmonjamama.

<sup>12</sup> “Atše cabá ba soyënga séntsebomna tšëngaftanga jáuyanama. Masque chcasna, mora tšëngaftanga ndoñe quešmátobena chë soyëngama josértana. <sup>13</sup> Pero chë Uámana Espíritu, chë nyetsca soyënguiñe ntšamo ndegombre yomncá oyebuambnayá, chaojášhango ora, lempe ntšamo ndegombre yomncá cmochanjabuatambá. Cha ndoñe nýe cachabe juábnaca queochátoyebuambnaye. Ntšamo chë Taitá chábioye tbojauyancá, tšëngaftanga cachcá cmochanjáuyana, y cha cmochanjábuayenaye ntšamo yochjopásama. <sup>14</sup> Atšbe soyënguentsána cha echanjóyëngacñe, y cach soyëngama cmochanjabuatambá. Chcase cha cmochanjínýanýiye atše

bëtsá y obená bétsemnama. <sup>15</sup> Lempe ntšamo chë Taitá endbomncá, atšbe soyëngnaca endmëna. Chíyeca atše tcbonjáuyana, chë Uámana Espíritu atšbe soyënguentšana yochjóyëngacñe y cach soyëngama cmochjabuatambá ca.”

<sup>16</sup> “Baseftayté y atše ndoñe más quešmochátinÿe. Inÿe baseftayté y cachiñe šmochantëtínÿe ca” —Jesús tojanéyana.

*“Tšëngaftangbe ngmënana, oyejuayana echanjóbema”*

<sup>17</sup> Chora Jesusbe básefta uatsjédayënga imojtsentjanaye: —¿Ntšamo yojtsentšáyana, chë “baseftayté y atše ndoñe más quešmochátinÿe, y inÿe baseftayté y cachiñe atše šmochantëtínÿe, er atše chë Taitábíoye chanjá ca”? <sup>18</sup> ¿Ntšamo yojtsentšáyana, chë “baseftayté ca”? Ndoñe quemuátstatsëmbo ntšamo yojtsentšáyanama ca —chënga imojtsichamo.

<sup>19</sup> Jesús yojtsetátšëmbo chënga chca jatjayama imojtsebošama, y tojanéyana: —Atše tcbonjáuyana: “Baseftayté y atše ya ndoñe más quešmochátinÿe, y inÿe baseftayté y cachiñe atše šmochantëtínÿe ca.” ¿Chë soyëngama šmojsentjaná ntšamo stsentšáyanama? <sup>20</sup> Ndegombre šcuayana: Tšëngaftanga šmochanjenóbošachna y puerte ngmënënga šmochántsemna, pero chë nÿe quem luarama enójuabnaye entšanga corente oyejuayënga mochántsemna. Masque tša ngmënënga šmochántsemna, chentšana tšëngaftangbe ngmënana, oyejuayana echanjóbema. <sup>21</sup> Canÿe shembása tbojontšabuache šešona jónÿnama ora, tša ngmënaca cha jésemnana, puerte tbojtsetsetše causa. Chë šešona ya tojonÿná ora, cha ndoñe ntsenójuabnayana chë tša ibuántsetšama. Canÿe šešona quem luaroye cháúashjanguama chë shembása tojámayeca, chora cha tšabá y oyejuayá jtsemnana. <sup>22</sup> Ndegombre, tšëngaftángnaca cachcá, chora tša ngmënaca šmochántsemna. Pero atše tšëngaftangbíoye chajjésabo ora, atše šmochantëtínÿe y corente oyejuayënga šmochántsmëna. Y ndocná queochatobenaye chë oyejuayana jabuajuánana.

<sup>23</sup> “Chë te chaojóshjango ora, tšëngaftanga ndocá atše quešmochatstjaye. Ndegombre šcuayana, lempe ntšamo atšbe Taitá smojotjañcá, y chca smojama atše jótšëmbonëse, átšbeñe šmošbuachéyeca, cha lempe cmochanjátšataye. <sup>24</sup> Mëntscoñama, atšbe Taitá tondaye chešmatotjañe atše jótšëmbonëse. Cha motjañënga y šmochanjóyëngacñe, y chca, bëtsá oyejuayana šmochántsebomna ca” —Jesús tojanéyana.

*Jesucristo, quem luarentše mandayábíoye yëñjanayá*

<sup>25</sup> Mëntsánaca Jesús tojánayana: “Chë soyëngama lempe cuentëngaca tšëngaftanga tcbonjáuyana; pero tempo echanjobuache, chora atše ya ndoñe más cuentëngaca

quebochátêtsétsnaye; chë cuentna, puerta botamana lempe atšbe Taitabiana cbochanjáuyana. <sup>26</sup> Chë tena, atšbe jótšëmbonëse, átšbeñe šmošbuachéyeca, atšbe Taitábioye šmochanjotjañe. Y atšbe cbëyana; chca, chë te ndoñe quešochatájaboto tšëngaftangbiana atšbe Taitá jatsimpadánana. <sup>27</sup> Atšbe ndoñe quichatsimpadana, er cach Taitá tšëngaftanga cmondábabuanÿeshana. Tšëngaftanga atšbe šmondobonshánama, y Bëngbe Bëtsábíocana atšbe tijabama šmojtsošbuáchema, chë Taitá cmondábabuanÿeshana. <sup>28</sup> Atšbe chë Taitábíocana sënjábocna y quem luaroye sënjabo. Pero mora quem luare chanjëftsebošhona atšbe Taitábioye jtama ca” —Jesús tojánayana.

<sup>29</sup> Chora chabe uatsjëndayënga tmojaniana: —Mora ya ndoñe cuentëngaca quecatoyebuambná, chíyeca lempe paselo josértama bëngbiana entsemna. <sup>30</sup> Mora fsëntsetatšëmbo aca nÿetsca soyëngama cotatšëmbuama, y ndoñe quenátsiyta ndocná aca chacmátstjanama, er aca chëngbe juabnënga jtsabuatmana, chënga cabá aca ndëtjaye ora. Chíyeca bënga fsëntsošbuaché aca Bëngbe Bëtsábíocana tojabama ca —chënga tmojaniana.

<sup>31</sup> As Jesús tojanéyana: —¿Mora chiñe šmojtsošbuaché ca? <sup>32</sup> Ya tempo tojobuache y cam ora entsemna, tšëngaftanga nÿetsquénache šmochanjuáshana y atšbe nÿe canÿa šmochanjésebošhona. Pero atšbe ndoñe nÿe canÿa quichátsmëna, chë Taitá átšeftaca entsémnayeca. <sup>33</sup> Atšbe lempe quem soyënga cbontsëtsësná, tšëngaftangbe ainaniñe tšabe ebionana chašmotsebošhona, átšeftaca cánÿiñe mo canÿacá jtsemnëse. Quem luarentše šmochanasufrina; pero añemo šmochtsebošhona, atšbe ya chë quem luarentša mandayá sënjayëñaná ca —Jesús tojánayana.

## 17

*Jesús chabe uatsjëndayëngbiana Bëngbe Bëtsábíoye tbojanimpadá*

<sup>1</sup> Jesús chë soyënga tojánayanentsana, cloye tojanontješé y Bëngbe Bëtsábíoye tbojaniana: “Taita, atšbe te ya tojobuache. Minÿanyë, atšbe acbe Uaquiñá, corente bëtsá y obená bëtsemnama. As, atšbe acbe Uaquiñá, aca corente bëtsá y obená comnama chainÿanyëma. <sup>2</sup> Mora aca nÿets obenana šconjatšetá nÿetsca entšangbeñe, nÿetscanga chë atšbiana tojábacacanga chë nÿetsca tescama yomna tšabe vida chamotsebošhona atšbe chaimama. <sup>3</sup> Chë nÿetsca tescama yomna tšabe vida jtsebošhona endmëna aca, chë nÿe canÿe y ndegombre Bëngbe Bëtsá jtsabuatmana, y atšbe Jesucristo, acbe ichmoná.

4 “Lempe ntšamo šconjamandacá atše sënjapochocá, y chca quem luariñe sënjama aca corente bëtšá y obená comnama jinÿanÿiyama. 5 Taita, quem luare cabá ndoñe quenjatsmëna ora, aca tconjaninÿanÿé atše corente bëtšá y obená ácaftaca bétsemnama. Mora moma atše cachcá ácaftaca chaitsemnama.

6 “Aca quem luarentša entšanguentšana quem boyabásenga tconjabacacá y atšbiamá šconjinÿinÿé. Atše chënga sënjanÿanÿé ntšamo ndegombre aca comnama. Chënga acbe entšanga mondmëna; y acna, chë atšbiamá chënga šconjinÿinÿiyá. Chënga acbe palabra tmonjouena y tšabá tmonjoyeuná. 7 Chíyeca chënga mondëtatšëmbo, lempe ntšamo atše tsbomncá ácbentšana tijóyëngañama. 8 Atše chënga sënjáuyana ntšamo aca šcojauyancá, y chënga montsošbuaché chë atše sënjauyaniñe. Chíyeca, chënga ndegombre mondëtatšëmbo atše acbiocana tijabama, y montsošbuaché aca chë atše šcojichmó cha comnama.

9 “Atše chëngbiamá cbontseimpadana. Chë nÿe quem luarama enójuabnaye entšangbiamá ndoñe quecbátsimpadana, pero aíñe chë atšbiamá šcojinÿinÿiyëngbiamá, er chënga acbe entšanga mondmëna. 10 Lempe ntšamo atše tsbomncá, acbiámncá endmëna; y cachcá, lempe ntšamo cobomncá, atšbiámncá endmëna. Acbengbe vidëngaca aca tcojinÿanÿé atše corente bëtšá y obená bétsemnama.

11 “Atše ndoñe quem luarentše quešocháisetotona, pero chënga aíñe cabá camuentše mochanjëftsemna. Atše chantá ácaftaca jtsatsmënama. Uámana Taitá, chë atšbiamá šconjinÿinÿiyënga acbe obenánaca cochtsanÿena. Chca ntšamo bëndata mo canÿacá bondmëna, chëngnaca cachcá chamotsemnama. 12 Atše chëngaftaca sëntsemnëntscuana, chënga sëntsanÿena, aca šconjatšetá obenánaca. Atše chënga sëndanÿena, y ni canÿa queochátsmëna infernoca pochocaná, nÿe chë infernoca pochocaná jtsemnama ibomná chana aíñe, ntšamo acbe uabemana palabrënguiñe endayancá, cachcá chaotsemnama.

13 “Morna chë aca condmënoye chantá; pero atše cabá quem luariñe sëntsemnëntscuana chca chënga sëntsëtsëtsná, chca, chë atše sëntsebomna puerte bëtscá oyejuayana chëngnaca chamotsebomnama. 14 Atše chënga sënjáuyana ntšamo aca šcojauyancá. Ntšamo atše ndoñe quetsátsmëna chë nÿe quem luarama enójuabnaye entšanguentšá, cachcá, chënga cach ndoñe quemátsmëna. Chíyeca, chë nÿe quem luarama enójuabnaye entšanga chënga montsëbuayënja. 15 Atše ndoñe quecbátsimpadana, chënga quem luarentšana chacúbuacanama; pero aíñe, nÿetsca bacna soyënguentsšana chacuatsebacama. 16 Ntšamo atše ndoñe quetsátsmëna chë

n̄ye quem luarama enójuabnaye entšanguentšá, cachcá, chēnga cach ndoñe quemátsmēna. <sup>17</sup> Cochjama chēnga acbe entšanga chamuétsemnana, y chca, n̄ye acbiama vida chamotsebmna. Chca cochjama, ntšamo ndegombre yomncá chēnga imoyenama. Ntšamo aca condbetsichamcá, ndegombre endmēna. <sup>18</sup> Ntšamo aca quem luaroye šconjanichmocá, cachcá átšnaca chēnga sēntsachamná, quem luare entšanga jábuayenama. <sup>19</sup> Chēngbiama atše cachiñe mēntšá cbēyana: Atše n̄ye acbiama sēndmēna. Y chca, chēngnaca, ntšamo acbiama ndegombre yomncá jtsóyebuambnayēse acbe entšanga chamotsemna, y chca, n̄ye acbiama vida chamuétsebmna, ntšamo ndegombre yomncá chēnga imoyenama.

<sup>20</sup> “Pero n̄ye chēngbiama ndoñe quecbátsimpadana, sinó chē átšbeñe mochtsošbuáchiyēngbiamnaca, chē atšbiama šconjín̄in̄iyēnga, chēngbioye atšbiama ín̄yēnga chamojtsabuayiyná ora; <sup>21</sup> as chēnga n̄yetscanga cán̄yiñe mo can̄yácá chamotsemnana. Ntšamo aca, Taita, átšeftaca cán̄yiñe mo can̄yácá bondmēna y átšnaca ácaftaca, cachcá chēngnaca cán̄yiñe mo can̄yácá bēndátaftaca chamotsemnana cbontseimpadana. Y chca, quem luarentša n̄yetsca entšanga, atše šcojichmoma chamotsošbuáchema. <sup>22</sup> Ntšamo chē obenana y uámanana šconjatšetacá, cachcá átšnaca chēnga sēnjatšatá. As, ntšamo bēndata cán̄yiñe mo can̄yácá bondmēna, chēngnaca cachcá cán̄yiñe mo can̄yácá chamotsemnana. <sup>23</sup> Atše chēngbe ainaniñe sēntsemna, y aca átšeftaca cán̄yiñe mo can̄yácá bondmēna; as, chēngnaca n̄yetsca soyēnguiñe cán̄yiñe mo can̄yácá chamotsemnana. Y chca, quem luarentša entšanga chamotsetátšēmo aca šcojichmoma, y chamotsetátšēmo ntšamo atše šcondbobonshancá, chēngnaca cachcá condábabuan̄yeshanama.

<sup>24</sup> “Taita, atšbiama chēnga šconjín̄in̄iyē. Atše mēntšá sēntseboše: chē atše chántsemnoca, chēngnaca chamotsemna, y chentše, chē šconjatšetá obenana y uámanana chēnga chámuin̄yē. Quem luare cabá ndoñe quenjatsmēna orscana, šconjánbobonshana; chíyeca, cachora tconjanin̄yan̄yé atše corente bētsá y obená bētsemnana. <sup>25</sup> Taita, n̄yetsca soyēnguiñe tšabá amá, masque chē n̄ye quem luarama enójuabnaye entšanga ndoñe quecmatábuatma, atše aíñe cbonduábuatma, y quem boyabásenga montsetátšēmo, aca comna chē šcojichmó cha. <sup>26</sup> Atše chēnga sēnjin̄yan̄yé ntšamo ndegombre aca comnana, y más chanjín̄yan̄yē; chca, ntšamo šcondbobonshancá, chēngnaca cachcá chamotsenbobonshánama y atše chēngbe ainaniñe chaitsemnana ca” —Jesús tojánayana.

## 18

*Uayayënga Jesús tmojánishache*  
(Mt 26.47-56; Mc 14.43-50; Lc 22.47-53)

<sup>1</sup> Chë soyënga Jesús tojëftsanayanentsana, chabe uatsjëndayëngaftaca tojëftsanbocna, chë binche béjaye Cedrón ca uabáiniye chenguana jama. Chentše inamna canye tjashetema; y Jesús chabe uatsjëndayëngaftaca choye tojánamengo. <sup>2</sup> Y Judas, chë Jesús uayayëngbe cucuatšinë boshjuaná, tšabá chë luare yojanábuatma, er Jesús y chabe uatsjëndayënga ba soye chentše imojánenefjuana. <sup>3</sup> Chora Judas tojánashjango, y cháftaca ba soldadënga y básefta Bëngbe Bëtsabe bëts yebnoca josticiënga; chënga imojamna chë bachnangbe amëndayënga y fariseungbe ichmónënga; nÿetscanga uajuinÿanëshangaca, lamparëshangaca y espadëjangaca uajátënga.

<sup>4</sup> Jesusna yojtsetátšëmbo lempe ntšamo cha yochjanpásama; chíyeca, natsanoye tojánbocna y chë entsanga tojanëyana: —¿Nda šmojtsenguá ca?

<sup>5</sup> Y chënga tmojanjuá: —Jesús, chë Nazaretocá fsëntsenguá ca.

As Jesús tojanëjua: —Atše cha sëndmëna ca.

Y Judas, chë boshjuaná, chánaca chë entšángaftaca yojtsemna. <sup>6</sup> Jesús tojanëyana: “Atše cha sëndmëna ca”, y cachora chë entsanga tmojtantostëtsánanga y fshantsoye tmojánshajaye.

<sup>7</sup> Chora Jesús cachiñe tojanatjá: —¿Nda šmojtsenguá ca?

Y chënga tmojanjuá: —Jesús, chë Nazaretocá ca.

<sup>8</sup> As Jesús tojanëyana: —Ya tcbonjáuyana: “Atše cha sëndmëna ca.” Atše šmojtsenguasna, mënga cachcá šmochjónÿaye chamotsóñengama ca.

<sup>9</sup> Chca tojanopasá, ana ntšamo Jesús tojanayancá cachcá chaotsemnama, chë “Atšbe Taitá Bëngbe Bëtsá, chë šconjínÿinÿiye entsanguentsana ni canÿa pochocaná queochátsmëna ca”.

<sup>10</sup> Simón Pedro canye espadëja inasëngbuájonÿana; asna, tojanenosëngbotëntšëna y chë bachnangbe más uámana amëndayabe canye oservenábioye catšbioica matscuaše tbojtsanëštjango. Chë oservená Malco ca inauabaina.

<sup>11</sup> As Jesús, Pédrëbioye tbojanianya: “Acbe espadëja matosëngbuajonÿá. Ntšamo atšbe Taitá Bëngbe Bëtsá tojanmandacá, chë atše puerte ngmënana jtsebomnama, ¿ndoñe chca chaondëtsemna ca?”

*Jesús, Anasbe yebnoca*  
(Mt 26.57-58; Mc 14.53-54; Lc 22.54)

<sup>12</sup> Chentsana chë soldadënga, chëngbe amëndayá y Bëngbe Bëtsabe bëts yebnoca josticiënga Jesús tmojánishache y

tmojanëcuébatsëca. <sup>13</sup> Natsanëna, Anás, Caifasbe uambén taitábioye Jesús tmojanánatse. Caifás chë uata inamna chë bachnangbe más uámana amëndayá. <sup>14</sup> Caifás yojamna nda judiënga tojanëyana: “Tšëngaftangbiana más tšabá entsemna canye boyabása Israeloca entšangbiana chaóbana ca.”

*Pedro tojánayana Jesúsbioye ndoñe bonjanabuátma ca*  
(Mt 26.69-70; Mc 14.66-68; Lc 22.55-57)

<sup>15</sup> Simón Pedro y inye uatsjendayá Anasbe yebnoye Jesús imojtsëstona. Chë inye uatsjendayábioyna, chë bachnangbe más uámana amëndayá ibnauábuatma; chíyeca, cha tojanobená Jesúsfeftaca chabe chashjónscoñe jashjanguana. <sup>16</sup> Pero Pédrëna nje shjoca, amashjuanentše tojanoquedá. Chcasna, chë inye uatsjendayá tojánbocna y chë bëshása ebtajfjuana shembásaftaca tojanoyebuambá. Chora Pedro tbojanëmashëngo. <sup>17</sup> As chë shembása Pédrëbioye tbojanianyana: —¿Acnaca ndoñe chë boyabásabe uatsjendayá condmëna ca?

Y Pedro tbojanjuá: —Ndoñe; atše cha ndoñe quetsatabu-atma ca.

<sup>18</sup> Tša yojtsesësna causna, chë oservénënga y chë josticiënga shjoca tmojanniñe y chentše imojtšboniye. Y Pédrënaca chëngaftaca yojtšëbonena.

*Ntšamo chë bachnangbe más uámana pasado amëndayá, Jesúsbioye tbojantjá*

(Mt 26.59-66; Mc 14.55-64; Lc 22.66-71)

<sup>19</sup> Chora, chë bachnangbe más uámana pasado amëndayá tojanontšë Jesús jatjayama chabe uatsjëndayëngbiana y ndayá cha entšanga yojánabuatambamnaca. <sup>20</sup> Y Jesús tbojanjuá: —Atše nyetsca entšangbe delante sënjoyebuambá. Sempre chë entšangbe enefjuana yebnënguenache sëndabuatambá, y Bëngbe Bëtsabe bëts yebnócnaca, nyetsca judiënga mondbëtsenefjuanentše; y chca, iytëmencá tondaye chiyatoyebuambá. <sup>21</sup> ¿Ndáyeca chca šcojtsetjaná? Atšbe palabra tmojouenënga mátjaye, as chënga chacmëyana ntšamo atše tijáuyanama. Chënga mondëtatšëmbo ntšamo atše tijayancá ca —Jesús tbojanjuá.

<sup>22</sup> Jesús chë soyënga tojánayana ora, canye josticio chentše yojtsemná, Jesúsbioye tbojanjuebjantšetá y tbojanianyana: —¿Chca chë bachnangbe más uámana amëndayá cuanjojuá ca?

<sup>23</sup> Y Jesús tbojanjuá: —Ndoñe tšabá tijayanësna, šmëyana ndayentše chë podesca palabra yojtsemna; y tšabá tijóyebuambasna, ¿ndáyeca šcojajuebjantšetá ca?

<sup>24</sup> Chentšana, Anás tojanmandá, chë bachnangbe más uámana amëndayá Caifasbe yebnoye, Jesús batsëcná chamuánatsama.



*Pedro cachiñe tojánayana Jesúsbioye ndoñe bonjanabuátma ca (Mt 26.71-75; Mc 14.69-72; Lc 22.58-62)*

<sup>25</sup> Chëntscuana, Pedro yojtsešbonena, tsanana chë iñe juachaca. Chora chë entšanga tmojantjá: —¿Aca ndoñe chabe uatsjendayënguentsá condmëna ca?

Y Pedro ndoñe ca tojánayana: —Atše ndoñe quetsátsmëna ca —cha tojánayana.

<sup>26</sup> Chora, chë bachnangbe más uámana amëndayabe canye oservená Pédrëbioye tbojaniyana: —¿Atše ndoñe cháftaca chë tjashetémoca tcbonjinye ca?

Chë oservená inamna chë Pedro tbojtsanmatstëtšabe pamillo.

<sup>27</sup> Y Pédrëna cachiñe ndoñe ca tojánayana, y cachora canye ngallo yojacánta.

*Jesús Pilatbe delante*

*(Mt 27.1-2, 11-14; Mc 15.1-5; Lc 23.1-5)*

<sup>28</sup> Chentšana, Caifasbe yebnentšana Jesús tmojanánatse chë romano mandadbe yebnoye. Ya yojtsebínÿana, y chë bëts yebnoye chë judiënga ndoñe tmonjánamashjna, er chënga imojtseboše chë Bashco saná jasama. Judiënga ndoñe imonjobena Bashco saná jasana, chca tempo canye ndoñe judiëbe yebnoye nda tojámashënguse. <sup>29</sup> Chíyeca Pilato tojánbocna y chënga tojanëyana: —¿Ndayá quem boyabásabe contra šmochjayana ca?

<sup>30</sup> Chora chë entšanga tmojanjuá: —Bacá uamaná ndoñe tontsemnëse, ndoñe matifuánatse ca.

<sup>31</sup> As Pilato tojanëyana: —Tšëngaftanga matánatse, y ntšamo cach tšëngaftangbe leyíñe iuayancá muabiamama šmochjayana tšabá o ndoñe tšabá tonjamama ca.

Y chë judiënga tmojanjuá: —Bënga derecho queftsátsbomna ndocná jóbama ca.

<sup>32</sup> Chca tojanopasá, ana ntšamo Jesús cachá jóbanama tojanayancá cachcá chaotsemnama. <sup>33</sup> As Pilato cach yebnoye tojtanamáshëngo, Jesús tbojanchembo y tbojantjá: —¿Aca chë judiëngbe Rey cojtsemna ca?

<sup>34</sup> Y Jesús tbojanjuá: —¿Ntšamo šconjatjacá, cach aca chca cojtsejuabnáyeca chca yojtsemna o ínÿenga atšbiama tmojacuentáyeca ca?

<sup>35</sup> Chora Pilato tbojaniyana: —¿Mo atše judío quetsmëna? Cach ábioca entšanga y chë bachnangbe amëndayënga muentše tmonjúshjango. ¿Ndayá tcojama ca?

<sup>36</sup> Chora Jesús tbojanjuá: —Atšbe jamándama luare ndoñe quem luarentše quenátsmëna. Aíñe tojtsemnësna, atšbe ústonënga muantsatsejaye atše chë judiëngbe cucuatšíñe

ndoñe chašmondoboshjonama. Pero atšbe jamándama luare ndoñe quem luarentše quenátsmëna ca —Jesús tbojanjuá.

<sup>37</sup> As Pilato tbojaniana: —¿As aca rey cojtsemna ca?

Y Jesús tbojanjuá: —Tšabá tcjayana; atše rey sëndmëna. Chama atše tijonýná y quem luaroye tijabo; y atše sënjabo ndegombre soyëngama jabóyebuambayama. Y chca soyënga jtsamëse tmoyenënga, atše jtseyeunanana ca.

<sup>38</sup> Chora Pilato tbojaniana: —¿Y ndayase chë ndegombre soye yomna ca?

*Jesusbama tmojánayana chaóbana ca*  
(Mt 27.15-31; Mc 15.6-20; Lc 23.13-25)

Chca tbojantjá chentšana, Pilato cachiñe tojánbocna judiëngaftaca jóyebuambayama, y tojanëyana: —Atše ni mo canýe soye chiyátinýena, quem boyabása castiganá chaotsemna ca jayanama. <sup>39</sup> Pero tšëngaftanga šmondëtatšëmbo, Bashco fiestama atše canýe utamená cachcá jëtsboshjonama. ¿Šmojtseboše chë judiëngbe Rey chjëtsboshjona ca?

<sup>40</sup> Chorna nýetsca entšanga cachiñe tmojanáyebuachena: —¡Ndoñe, cha ndoñe! ¡Barrabás matsboshjona ca!

Barrabasna canýe bacá uamana entšá inamna.

## 19

<sup>1</sup> Chora Pilato, Jesús tbojanánatse y tojanmandá chamotsetjanjama. <sup>2</sup> Y canýe coronësha uchmašëfjangaca chë soldadënga tmojanapormá y Jesús tmojanabestšajó; y canýe shbuenda uafjatsenga entšayá mo reycá tmojanichëtjo. <sup>3</sup> Chorna chënga imojtsóbobecocnaye y jtsafchayama imojtsatsëtsnaye: “¡Bayté judiëngbe Rey cochtsemna ca!” Y imojtsejuebantšetaye.

<sup>4</sup> Pilato cachiñe tojánbocna y entšanga tojanëyana: —Smochjouena; cha chanjuábocna, chë boyabása castiganá chaotsemna ca jayanama atše ni mo canýe soye ndoñe sënjinýenama chašmotsetatšëmbuama ca.

<sup>5</sup> As Jesús tojánbocna chë uchmašëfjangaca coronësha uabestšajoná y chë shbuenda uafjatsenga entšayá mo reycá uichëtjoná. Y Pilato tojanëyana: —¡Muentše chë boyabása entsemna ca!

<sup>6</sup> Chë bachnangbe amëndayënga y chëngbe josticiënga cha tmojáninýe ora, tmojanontšë uayebuáchana: —¡Motsecrucificá! ¡Motsecrucificá ca!

Chora Pilato tojanëyana: —Cach tšëngaftanga mánatse y smochjacrucificá; atše ni mo canýe soye chiyátinýena quem boyabása castiganá chaotsemna ca jayanama ca.

<sup>7</sup> Chora chë judiënga tmojanjuá: —Bëngna canye ley fsëndbomna, ntšamo chiñe endayancana, quem boyabása jóbanama bontsemna, Bëngbe Bëtsabe Uaquiñá entsenobiamná causa ca.

<sup>8</sup> Pilato chca tojanuena ora, más yojtsauatja. <sup>9</sup> Cachiñe chabe yebnoye tojtanamáshëngo y Jesús tbojantjá: —¿Ndëmocá aca cmëna ca?

Pero Jesús ndocá tbonjanjuá. <sup>10</sup> Chora Pilato tbojaniyana: —¿Ndoñe šcochanjojuá ca? ¿Ndoñe condëtatšëmbo, aca jacrucificama o jëtsboshjonama atše tsobenama ca?

<sup>11</sup> As Jesús tbojanjuá: —Acbe obenana Bëngbe Bëtsá ndoñe macmënjánatšëtase, tondaye cattsobena átšëftaca jamama; chíyeca, acbe cucuatšíñe šonjaboshjoná, acbiama más bëts bacna soye tonjama ca.

<sup>12</sup> Cach orscana Pilato yojtsenguaye ntšamo jamana, jobenayama Jesús jëtsboshjonama; pero chë judiënga imotsáyebuache: —¡Chacojëtsboshjonësna, Césarbe amigo ndoñe condmëna! ¡Nda rey tojtsenobiamná chana, Césarbe uayayá jtsemnana ca!

<sup>13</sup> Pilato chë soyënga tojanuena ora, chashjoye Jesús tbojanábocna. Pilato tojanótbema chabe puestentše tribunaloca. Chë tribunaloca chashjañna hebreo biyañe Gabata ca inauabaina, y endayana “ndëtsbéngaca pormániñe ca”. <sup>14</sup> Bashco fiestama canye te yojtsájamna, y mo nyetsto ora yojtsemna. Chora Pilato chë judiënga tojanëyana: —¡Muentše tšëngaftangbe rey entsemna ca!

<sup>15</sup> Pero chënga tmojanáyebuachena: —¡Chaóbaná! ¡Chaóbaná! ¡Motsecrucificá ca!

As Pilato tojanatjá: —¿Tšëngaftangbe rey atše chjacrucificá ca?

Y chë bachnangbe amëndayënga tmojanjuá: —Bëngbe rey nye César endmëna, ndocná más ca.

<sup>16</sup> Chentšana Pilato, chëngbe cucuatšíñe Jesús tbojánboshjona chamocrucificama y chë judiënga cha tmojanánatse.

### *Jesús tmojanrucificá*

*(Mt 27.32-44; Mc 15.21-32; Lc 23.26-43)*

<sup>17</sup> Jesús tojánbocna chabe cruz tantšajónana y tmojanánatse canye luaroye, “Obanabe Bestšashe ca” uabáinoye (hebreo biyañe Gólgota ca inauabaina). <sup>18</sup> Chentše cha tmojanrucificá y inye útatnaca cátatoica tmojanrucificá; Jesusna tsëntsaca. <sup>19</sup> Pilato tojanmandá canye uabemana soye chë cruciñe chamuanjuama. Chiñe yojetsábemana: JESÚS NAZARETOCÁ, JUDIËNGBE REY ca. <sup>20</sup> Y ba judiënga chë uabemana soye tmojanalía, er chë Jesús tmojanrucificá luare Jerusalenó béconana inamna, hebreo, latín y griego

biyañe yojetsábemana. <sup>21</sup> Chca juabemama tojanmandáyeca, chë bachnangbe amëndayënga Pilato tmojanianyana: —Ndoñe matabiamnana “Judiëngbe Rey” sinó ntšamo cachá tojayancá, “Judiëngbe Rey atše sëndmëna ca”.

<sup>22</sup> Pero Pilato tojanëjua: —Ntšamo tijuábema cachcá chaotsábemana ca.

<sup>23</sup> Chë soldadënga Jesús tmojanrucificá chentšana, chabe entšayangá tmojanájaca y cántañe tmojanajatá, nÿetsca canta soldadëngbiama. Chabe cmešëjua tmojanaca; chëjuana yojanamna nduajonanëjua, nÿetsëjua uabianánëjua. <sup>24</sup> As chë soldadënga tmojáneniyana: “Ndoñe matjuátanëca; más tšabana tsbanánoye mochjútšëna, ndabiama yochjuáquedama chaotso-tatšëmbuama ca.”

Chca tojanopasá ana ntšamo Bëngbe Bëtsabe uabemana palabrenguiñe endayancá cachcá chaotsemnama, chë “Atšbe entšayangá tmojatenájataye; atšbe cmešëjuamna tsbanánoye tmonjanëtšëna, ndabiama jauquédama jtsotatšëmbuama ca.” Y lempe chca chë soldadënga tmojanma.

<sup>25</sup> Jesusbe cruz juachaca imojtsemna chabe mamá; chë mamabe quenata María, Cleofasbe shema; y María Magdalena. <sup>26</sup> Jesús chabe mamábioye tbojáninÿe, y chabe juachacna chë Jesusbe bonshana uatsjendayá yojtsemna. Chora chabe mamá tbojanianyana: “Mama, chentše acbe uaquiñá entsemna ca.”

<sup>27</sup> Y chë bonshana uatsjendayá tbojanianyana: “Chentše acbe mamá entsemna ca.”

Cach orscana, chë uatsjendayá chabe yebnentše Jesusbe mamábioye tbojanofja.

### *Jesús tojanóbana*

*(Mt 27.45-56; Mc 15.33-41; Lc 23.44-49)*

<sup>28</sup> Jesús yojtsetátšëmbo ya lempe tojanchnënguama, chíyeca chentšana y ntšamo Bëngbe Bëtsabe uabemana palabrenguiñe endayancá cachcá chaotsemnama, tojánayana: “Sontsajuendá ca.”

<sup>29</sup> Chentše inamna canÿe matbaja buajútjena untja vínoyeca. As, chë soldadënga canÿe esponjëshe chë vínoyeca tmojanfchecuacuá, canÿe hisopo niñëfjiñe tmojananguësëtjo y játsbanase, Jesusbe uayásoye tmojanbeconá. <sup>30</sup> Chë untja vínoye Jesús tojanofsé ora, tojánayana: “Ya lempe tocjochnëngo ca.”

Tojanotsejbé y tojanóbana.

*Canÿe soldado chabe lanzëšaca costillaca Jesúsbioye tbojanashacuá*

<sup>31</sup> Bashco fiestama canÿe te yojtsájamna, y chë judiënga ndoñe imontseboše chë crucificánënga cachentše chë

ochnayté chamotsemnana, chë te puerta uámana te bétsemnayeca. As Pilato tmojanimpadá chë crucificánënga shecuatsënga jetsatcacayama y chë cuerpënga chentšana jtsejuánama chaomandama. <sup>32</sup> As chë soldadënga tmojána y shecuatsënga imojtsatcacaye, natsana canya y chentšana chë inya, Jesúsftaca yojtsecrucificaná. <sup>33</sup> Pero Jesúsbioye tmojanobeconá ora, ya obaná tmojáninye; chíyeca chabe shecuatsënga ndoñe tmonjanatcacá. <sup>34</sup> Masque chca, canye soldado Jesúsbioye costillaca canye lanzësaca tbojanashacúa. Y cachora buiñe y búyeshe chentšana tonjanóbocna. <sup>35</sup> Chë mëntsá cuentayá chentše enjamna y tonjáninye, y ndegombre entsichamo; cha endëtatsëmbo ndegombre yojtsichámuama, chca, tsëngaftángnaca chiñe chašmotsošbuáchema. <sup>36</sup> Chë soyënga chca tojanopasá, ntšamo Bëngbe Bëtsabe uabemana palabrenguiñe endayancá cachcá chaotsemnana. Chiñe endayana: “Ni mo canye betaše cha quemochatsëntsátca.” <sup>37</sup> Y inyoca, Bëngbe Bëtsabe uabemana palabrenguiñe endayana: “Chë tmojenachentsá bominye mochanjabuájua ca.”

### *Jesús tmojanatbontsá*

*(Mt 27.57-61; Mc 15.42-47; Lc 23.50-56)*

<sup>38</sup> Chë soyënga tojanopasá chentšana, José Arimateocá, Pilátbioye tbojanimpadá Jesusbe cuerpo jesocñama chabolesenciama. José inamna Jesusbe canye ustoná, masque nye iytëcana, chë judiëngbiama auatja causa. Pilato aiñe tbojanlesenciá; as José tojána y Jesusbe cuerpo yojtsámabañe. <sup>39</sup> Nicodemo, chë ibeta Jesúsbioye tbojanbuachá, chánaca tojánashjango y tojanëyamba unga bnëtsana kilo mirra y áloe enájua bnana. <sup>40</sup> As José y Nicodemo Jesusbe cuerpo tbojanca y tmojanandmaná chë botamana uanguëtse soyëngaca unëtjona entšëjuangaca. Judiënga chca imnauamana, obaná juatbontsama ora. <sup>41</sup> Jesús tmojan crucificá luarentše canye base jajañe inamna, y chiñe canye tsëm cuevëshe, entšangbe pormánëshe, obanëngbiama; chëshiñe cabá ndocna obaná mondëjajo. <sup>42</sup> Asna, nye chentše Jesusbe cuerpo tmojansegorá, chë Bashco fiestama canye te yojtsájamna causa, y chë cuevëshe chë béconana inámnyeca.

## 20

### *Jesús tojtana yena*

*(Mt 28.1-10; Mc 16.1-8; Lc 24.1-12)*

<sup>1</sup> Chë inye semana bojatšenté, cabá cachëse, cabá ndëbinyna ora, María Magdalena chë cuevëshoye tojána y tojáninye inyoca yojtsemna chë cuevëshoye amashjuanentsa ndëtsbé. <sup>2</sup> Asna, tojëtsanótjajo y tojána chë Simón Pedro y chë

inÿe uatsjendayá, ndábioye Jesús tša ibnabobonshana ibojtsemnoye. Chora tojanëyana: “Bëngbe Utabnabe cuerpo chë cuevëshentšana tmojtsámbañe y ndayentše tmojtsejájoma ndoñe queftsátstatšëmbo ca.”

<sup>3</sup> Chora Pedro y chë inÿe uatsjendayá chentšana tbojëftsanbocna y chë cuevëshoye tbojánata. <sup>4</sup> Nÿets útata ibojtsëchamana, pero chë inÿe uatsjendayá Pédrëbiamá más betscó tojanótjajo y natsana chë cuevëshoye tojánashjango. <sup>5</sup> Tojanotsejbé y chë chentše tmojanacjá entšëjuangá tojáninÿe, pero choye ndoñe tonjánamashëngo. <sup>6</sup> Chentšana, Simón Pedro chabe ústonoye tojánashjango y chë cuevëshoye tojánamashëngo, y tojáninÿe chë chentše tmojanacjá entšëjuangá. <sup>7</sup> Y chë Jesús juabestšëntsacjuama tojanaservé entšëjuana ndoñe chë inÿájuangaca yontsamna, sínó inÿoca botamana uandmanánëjua. <sup>8</sup> Chora chë inÿe uatsjendayá, chë cuevëshoye natsana tojanashjanguá, choye tojánamashëngo. Tojáninÿe y Jesús tojtanayenama yojtsanošbuaché. <sup>9</sup> Chëntscoñe chë útata cabá ndoñe yontsósertana ntšamo Bëngbe Bëtsabe uabemana palabrënguiñe endayancá, chë Jesús obanënguentšana jtayenama ibojamnama. <sup>10</sup> Chentšana chë uatsjendayata chatbe oyenoye tbojtaná.

*Jesús, María Magdalénbioye tbojánëbëbocna  
(Mc 16.9-11)*

<sup>11</sup> Pero María chentše tojanoquedá, chë cuevëshoye juachaca šachénaca; yojtsošachentscuana tojanotsejbé cuevëshoye jarrepárama. <sup>12</sup> Y tojáninÿe uta angelotémata uafjantsëjua uichëtjonata, Jesusbe cuerpo yojëftsejajóntše ibojtsetbemana. Canÿa tsëntsënëshoica y chë inÿana matsëskoica. <sup>13</sup> Chora chata tmojanianya: —Shembása, ¿ndayama cošaché ca?

As cha tojanjuá: —Atšbe Utabná tmojtsámbañe, y ndayentše tmojtsejájoma ndoñe queftsátstatšëmbo ca.

<sup>14</sup> Chca tojánayana ora, tojanostëtšantješé y tojáninÿe chentše Jesús yojtsemna, pero María ndoñe yontsetátšëmbo cha Jesús bétsemnama. <sup>15</sup> Chora Jesús tbojanianya: —Shembása ¿ndayama cošaché? ¿Nda conguá ca?

María yojtsejuabnaye chë boyabásana yojtsemna chentša base jajañe uaishanÿá ca; chíyeca tbojantjá: —Bacó, aca tcojuambësna, šmëyana ndayentše cojtsejajó, as atše cha jesocñama ca.

<sup>16</sup> As Jesús tbojanianya: —¡María ca!

Chora María chábioye tojanontješé y tbojanianya: —¡Rabuni ca! (hebreo biyañe chca endayana “Buatëmbayá ca”).

<sup>17</sup> Chora Jesús tbojanianya: —Ndoñe šcatábojajo, er atše cabá ndoñe atšbe Taitábioye quetstëtstjua. Pero motsa atšbe

catšátangbioye y cochjáuyana, atše stsetsjuá atše y tšëngaftangbe Bëtsábioye, atše y tšëngaftangbe Taitábioye ca.

<sup>18</sup> As María Magdalena tojána y Jesusbe uatsjéndayënga tojanëyana cha chë Utabnábioye tbojáninÿe ca y cha chë palabrënga tojánayana ca.

*Jesús chabe uatsjéndayënga tojánebëbuacna*  
(Mt 28.16-20; Mc 16.14-18; Lc 24.36-49)

<sup>19</sup> Tojanibétata ora, cach semana bojatsenté, chë uatsjéndayënga tmojánenefjna canÿe luarentše, pero lempe tmojtanatame, chë judiëngbiamama auatja causa. Chora Jesús tojánamashëngo, chëngbe tsëntsaca tojantsá y mëntsá tojanacheuá: “Chë atšbe ainaniñe tšabe ebionana tšëngaftangaftaca chaotsema ca.”

<sup>20</sup> Y chca tojanëyana ora, chabe cucuatšënga y costillaca tojaninÿanyé. Chora chë uatsjéndayënga oyejuayënga imojtsemna, chëngbe Utabná tmojáninÿama. <sup>21</sup> As Jesús cachiñe tojanëyana: “Chë atšbe ainaniñe tšabe ebionana tšëngaftangaftaca chaotsemna. Ntšamo atšbe Taitá Bëngbe Bëtsá šojichmocá, átsnaca cachcá tšëngaftanga cbontšachamná ca.”

<sup>22</sup> Chca tojánayana ora, chëngbioye tojangouo y tojanëyana: “Chë Uámana Espíritu šmochjóyëngacñe. <sup>23</sup> Ndëmuanÿënga chëngbe bacna soyëngama chašmojáperdonanga, perdonánënga mochántatsmëna; y ndoñe chašmonjáperdonasna, ndëperdonánënga mochántsemna ca.”

*Tomás, Bëngbe Utabnábioye ainá tbojáninÿe*

<sup>24</sup> Pero Tomás, chë Gemelo ca uabobainá, canÿa chë bnëtsana uta uatsjéndayënguentsá, chë uatsjéndayëngaftaca ndoñe yontsemna, Jesús tojánashjango ora.

<sup>25</sup> Chíyeca, “bënga chë Utabná fsënjinÿe ca”, chë inÿe uatsjéndayënga tmojanियana ora, Tomás tojanëjua: “Atše chabe cucuatšinë chë uajabonjana uinÿniñe ndoñe sënjinÿe, y chiñe atšbe ntšabuafja ndoñe sënjajué y atšbe cucuatše chabe costillaca ndoñe, ndoñe quichátošbuachiye ca.”

<sup>26</sup> Canÿe semana tojanochnëngo ora, chë uatsjéndayënga cachiñe canÿe luarentše tmojánenefjna. Y Tomásnaca chëngaftaca yojtsemna. Masque chentše atámeniñe yojtsemna, Jesús tojánamashëngo, chëngbe tsëntsaca tojantsá y tojanëyana: —Atšbe ainaniñe tšabe ebionana tšëngaftangaftaca chaotsemna ca.

<sup>27</sup> Chora Tomásbioye tbojanियana: —Acbe ntšabuafja muentše mojué y atšbe cucuatše minÿe; acbe cucuatše miyëbo y atšbe costillaca mojué. Y ndošbuachiyá ndoñe matsmënana, sinó atše tijtayanama cochtsošbuáchiye ca.

<sup>28</sup> As Tomás tbojaniyana: —¡Atšbe Utabná y atšbe Bëtsá ca!

<sup>29</sup> Chora Jesús tbojaniyana: —Tomás, nÿe šconjínÿeyeca cojtsošbuaché. ¡Bëngbe Bëtsá chaoma puerte oyejuayënga chamotsemna chë nÿe ntjinÿcá tmojošbuachenga ca!

*Ndayama quem librëša tmojanábema*

<sup>30</sup> Jesús, chabe uatsjédayëngbe delante inÿe bëts soyënga Bëngbe Bëtsabe obenánaca tonjëftsema, pero quem librëšañe ndoñe quenatábemana. <sup>31</sup> Y quem librëšañe soyëngna, entsábemana tšëngaftanga chašmotsošbuáchema, Jesús, chë Cristo y Bëngbe Bëtsabe Uaquiñá bétsemnama; y chcase, chábeyca chë nÿetsca tescama yomna tšabe vida chašmotsebomnama.

## 21

*Jesús, canÿsëfta chabe uatsjédayënga tojánëbëbuacna*

<sup>1</sup> Chca tojanopasá chentšana, Jesús inÿe soye chabe uatsjédayënga tojánëbëbuacna, Tiberias mar béjaye tsachañe. Chora mëntsá tojanopasá: <sup>2</sup> Cánÿentšë imojétsemna Simón Pedro; Tomás, chë Gemelo ca uabobainá; Natanael, chë Galilea luarocá, Caná pueblócá; Zebedeobe uaquiñata y Jesusbe inÿe uta uatsjédayata. <sup>3</sup> Simón Pedro chënga tojanëyana: —Sëntsá beonga jashebuáyama ca.

As chënga tmojanjuá: —Bëngnaca ácaftaca fchanjá ca.

As tmojána y canÿe barquëshoye tmojánamashjna; pero chë ibeta tondaye tmonjáninÿena. <sup>4</sup> Ya yojtsebínÿana orna, Jesús chë tsachoca yojtsemna, pero chë uatsjédayënga ndoñe imontsetátšëmbo cha Jesús yojamnama. <sup>5</sup> Chora Jesús tojanatjá: —Básenga, ¿tondaye šmonjashbuá ca?

Y chënga tmojanjuá: —Tondaye ca.

<sup>6</sup> As Jesús tojanëyana: —Barquësha catšbioica chë atarraiësha mëtsena y beonga šmochanjáshebuaye ca.

As chënga chca tmojanma, y chora chësha jtabocnama ndoñe imontsobena, nÿetsá beonga tmojánishëche causa. <sup>7</sup> As chë Jesusbe bonshana uatsjendayá, Pédrëbioye tbojaniyana: “¡Bëngbe Utabná entsemna ca!”

Simón Pedro chca soye tojanuena y cachora entsáyá tojtánichëtjo, er nduichëtjoná yojtsemna, y chë béjayoye tojanoshbuëtše. <sup>8</sup> Chë inÿe uatsjédayëngna chë barquëshañe tmojána, y chë atarraiësha jútjena beóngaca imojtsásjaye, er chë tsachocama bécoñe imojtsemna, nÿe canÿe patse metroca. <sup>9</sup> Fshantsoye tmojánastjajna ora, chënga tmojáninÿena canÿe chebániñe pormániñe, y chentšna canÿe beona y tandëšnaca yojtsesegorana. <sup>10</sup> Chora Jesús tojanëyana: “Chë šmonjáshebuaye beonguentšana báseftanga miyëbo ca.”



11 Simón Pedro chë barquëshoye tojánamashëngo, y chë atarraïëshä jútjena bëts beóngaca, uasjojónana tsachóntscoñe tojanëyamba. Mo canye patse y shachna bnëtsana y unga beóngaca; pero masque nyetśá beonga, chë atarraïëshä ndoñe ntjuatanécana. 12 Chora Jesús tojanëyana: “Mabënga, śmochjase ca.”

Chë uatsjëndayënguentsana ni canya yontsenñëmua cha jat-jayama nda cha yojamnama, er nyetscanga imojtsetátśëmbo cha chë Utabná bëtsemnama. 13 Chora Jesús tojanobeconá, chë tandëse tojanca y chënga tojanatśatá, y chë beónacnaca cachá tojanma.

14 Chóracna, Jesús ya unga soyama chabe uatsjëndayënga vojtsanebëbuacana, obanënguentsana tojtanayenentsana.

*Jesús, Simón Pédroftaca tojanoyebuambá*

15 Jasama tmojanpochocá ora, Jesús, Simón Pédrëbioye tbojantjá: —Simón, Juanbe uaquiñá, ¿quemëngbiama más queścbobonshana ca?

Y Pedro tbojanjuá: —Atśbe Utabná, aíñe. Aca condëtatśëmbo atśe aíñe cbondbobonshánama ca.

As Jesús tbojaniyana: —Atśbe entśanga, mo oveshatemëngcá imomnënga, cochtsanÿena ca.

16 Chora cachiñe tbojantjá: —Simón, Juanbe uaquiñá, ¿queścbobonshana ca?

Y Pedro tbojanjuá: —Atśbe Utabná, aíñe. Aca condëtatśëmbo atśe aíñe cbondbobonshánama ca.

As Jesús tbojaniyana: —Atśbe entśanga, mo oveshëngcá imomnënga, cochtsanÿena ca.

17 Y unga soyama tbojtëtantjá: —Simón, Juanbe uaquiñá, ¿queścbobonshana ca?

Pedro puerte tbojanongmé, ya unga soyama “queścbobonshana ca” tbojantjá causa; y tbojanjuá: —Atśbe Utabná, aca lempe condëtatśëmbo. Aca condëtatśëmbo atśe aíñe cbondbobonshánama ca.

As Jesús tbojaniyana: —Atśbe entśanga, mo oveshëngcá imomnënga, cochtsanÿena. 18 Ndegombre cbëyana: Más bobontse conjamna ora, conjanamana cach aca jtichëtjuana

y ndëmoye jama cojtseboşe choye jtsoñana; pero tanguá chacojtsemna orna, buacuatśënga cochanjatsbaná, y inÿa cmochantichëtjo y ndëmoye jama ndoñe chacontseboşe choye cmochanjuánatse ca —Jesús tbojaniyana.

19 Chca tojánayana, ana jtsotatśëmbuama ntśamo Pedro jóbanama ibojamnama, y chë chca jóbanëse, Bëngbe Bëtsá corente bëtsá y obená bëtsemnama Pedro yochjáninÿanÿiyama. Y chca tojánayanentsana, Pédrëbioye tbojaniyana: —Smasto ca.

*Jesusbe bonshana uatsjëndayá*

<sup>20</sup> Pedro tojesanenostëtšantješé y tojáninýe, Jesusbe bonshana uatsjendayá ústonoye yojtsaye. Cha enjamna chë monjansá ora, Jesús cabá ndóbana ora, chë Jesúsbioye más tonjanosjoná y tbonjantjá: “Bëngbe Utabná, ¿nda chë boshjuaná yochtsemna ca?” <sup>21</sup> Pedro chábioye tbojáninýe ora, Jesúsbioye tbojantjá: —Atšbe Utabná, y cháftaca, ¿ntšamo yochjopása ca?

<sup>22</sup> Chora Jesús tbojanjuá: —Atše quem luaroye jesabáměntscuana cha ainá chauesomñama atše stsebošése, ¿aca ndayá chama cmatjátsěntšamna? Acna nýe šmasto ca.

<sup>23</sup> Chíyeca, chentšana, Jesucristbeñe ošbuáchiyěngbenache nýetscanga imojánichamo, chë uatsjendayá ndoñe yochanjanóbana ca. Pero Jesusna ndoñe chca tonjánayana, sinó “atše quem luaroye jesabáměntscuana cha ainá chauesomñama atše stsebošése, ¿aca ndayá chama cmatjátsěntšamna? ca”.

<sup>24</sup> Mua endmēna chë uatsjendayá; cha entsichamo quem soyěnga ndegombre yojamnama, y camuá quem librěšañe lempe tonjuábema. Y bēnga mondětatsēmbo cha ndegombre soye endóyebuambnama.

<sup>25</sup> Jesús inýe ba soyěnga tonjěftsema; tša bětscá soyěnga endmēna, nderado lempe cada canýe soye tcojuábema y librěšangá tcojuapormá, atše sěntsejuabná, nýetsca chěšangá quem luarentše ndoñe nanjuába.

## Hechos

### *Jesús tojanašebuachená chë Uámana Espíritu jíchmuama*

<sup>1</sup> Teófilo, atšbe natsana librěšaňe tcbonjuábobema lempe ntšamo Jesús tojanmama y tojánabuatambama, chca tojanbojatsě orscana, <sup>2</sup> y Běngbe Bětsá celoye tbojtanatsbanantscuana. Cabá celoye nděta orna, chë chabe ichmoněngcá tojanabacacá boyabásengna Jesús tojěftsanaměndá, chë Uámana Espíritbiajana, ndayá jamama yojánamnama. <sup>3</sup> Jesús cruciňe tojanóbana y tojtanayenentšana, ba soye chë ichmóněnga yojáneběbuacana, chca, chěnga jinŷanŷiyama cha ndegombre tojtanayenama. Canta bnětsana tentscuana cha yojáneběbuacana y Běngbe Bětsabe aměndayama chěnga yojanabuatambá.

<sup>4</sup> Canŷe, Jesús chabe ichmóněngaftaca yojětsemna ora, měntšá tojanaměndá: —Jerusalenentšana ndoňe šmatjábocana. Camuentše šmochjobátma, ntšamo atšbe Taitá tcmonjanašebuachenacá chaóshjanguěntscuana, ndayama atše tcbonjúyana. <sup>5</sup> Ndegombre, Juan entšanga bėjayeca tonjaněbaye; pero ndoňe baytesna, Běngbe Bětsá chë Uámana Espíritu bochanjíchmua, tšěngaftangbe ainaniňe jtsemándayama cháuamashěnguama ca.

### *Jesús celoye tojtantsjuá*

<sup>6</sup> Canŷe, chë ichmóněnga Jesúseftaca cánŷiňe imojtsemna ora, chěnga tmojantjá: —¿César y chë Romoquěngbe aměndayentšana tašcochjatsebacá, y mora běnga, Israeloca entšanga, canŷe Rey quemochtsatsbomna ca?

<sup>7</sup> As Jesús tojaněyana: —Tšěngaftanga ndoňe quecmátamna chë soyěngama jtsetatšěmbuana. Nŷe atšbe Taitá aíňe; y cha, chabe obenánaca echanjamánda mocna ora y ndayté chca chaopasama. <sup>8</sup> Chë Uámana Espíritu tšěngaftangbe ainaniňe jtsemándayama chaojabo ora, tšěngaftanga obenana šmochanjóyěngacňe. Chentšana, ntšamo atšbiama šmotatšěmbcá, chë tcbonjabuatambá soyěnga, entšanga šmochjúyana Jerusalenentše, nŷets Judea luariňe, Samarioca y quem luarentša nŷets luarěnguenáchnaca ca.

<sup>9</sup> Chë soyěnga tojánayanentšana y chabe uatsjěndayěnga imojtsonŷaye ora, Běngbe Bětsá, Jesúsbioye tbojtanatsbaná y canŷe jantšetěshe chábioye ibojútsbotse y ndoňe más tmonjanobená cha jinŷama. <sup>10</sup> Jesús celoye yojtsetsjuama chěnga bën imojtserreparáněntscuana, nŷe ndeolpe, uta boyabásata uafjantse entšayaca bopormánata chěngbe juachaca tbojabántsaye, <sup>11</sup> y chěngbioye tmojaněyana: “Galileoca entšanga, ¿ndáyeca

celoye šmojtsantješana? Jesús, chë tšëngaftangaftaca enjamná celoye tontá y ntšamo mora šmonjinýcá cha celoye jtama, cachcá quem luaroye cha echanjésabo ca.”

*Júdasbe cuenta Matías tmojanábuayana*

<sup>12</sup> Jesusbe ichmónënga chë Olivos tjashocana Jerusalenoye tmojtaná. Chë tjocana Jerusalenóntscoñna bécoñe inamna, ndayëntscoca canýe ochnayté jama yojanlesenciana nýetšá. <sup>13</sup> Jerusalenoye tmojtanashajna orna, chë yebnentša tsbanánoca tsoye tmojtanášëngo. Chentše yojánatana Pedro, Juan, Santiago, Andrés, Felipe, Tomás, Bartolomé, Mateo, Santiago chë Alfeobe uaquiñá, Simón chë Celote ca uabobainá, y Judas, chë Santiagbe uaquiñá. <sup>14</sup> Chënga sempre imojanamana jtenefjnana Bëngbe Bëtsáftaca jencuéntama básefta shembásengaftaca, María Jesusbe mamá y Jesusbe catšátangaftaca.

<sup>15</sup> Chë tempo tmojánenefjna canýe patse y uta bnëtsana Jesucristbeñe ošbuáchiyënga, y canýe, Pedro tojantsá y tojanëyana: <sup>16</sup> “Jesucristbeyeca atšbe catšátanga, endánëyta ntšamo Bëngbe Bëtsabe uabemana palabrenguiñe iuabemancá chaochnënguama, y tempo, David chë Uámana Espíritbeyeca chiñe tojanábema ntšamo Júdasefraca yochjanopásama; chcasna, Judas uayayënga tojanënatse Jesús chamuishachama. <sup>17</sup> Júdasnaca bëngbe enutá enamna y Jesús chábioynaca tbonjanábuayana bëngcá chabe trabajuiñe jtsoservénama. <sup>18</sup> Tšëngaftanga šmondétatšëmbo, chë Judas bacna soye tojanmama tmojtanabuená crocenánacna fshantse tmojánbuamema. Chentšana cha tojtsanótsatše y chabe bestšaše tsëntsaca tbojtsanashtëtšena y chabe uafsbentšana nýetsca chabe chunchullëjuangá tojtsanáshana. <sup>19</sup> Jerusalenentše oyenënga chë soyama tmojántatšëmbona ora, chë fshantse chëngbe biyañe Acéldama ca tmojanabaye. Acéldama endayana ‘Buiñe Luare ca’. <sup>20</sup> Salmos librëšañe, Jesucristo uayayëngbe cucuatšinë boshjuanabiamama mëntšá enduábemana:

Chabe yebna éañañe chaotsemna

y ndocná chentše chaondëtsiyena ca.

Y mëntšánaca endayana:

Chabe cuenta inýa chabe trabajo chaoma ca.

<sup>21</sup> “Chcasna, mora muentše montsemna taitanga bëngaftaca mondenutënga, Bëngbe Utabná Jesús bëngaftaca enjamnëntscuana, <sup>22</sup> Juan Jesúsbioye tbonjanabaye orscana y Bëngbe Bëtsá Jesúsbioye bëngbentšana celoye tbontanatsbanantscuana. Y mora šontsamna canýa mënguëntšá juabuáyanama, Jesús tojtanayenama entšángbioye bëngaftaca jábuayenama ca.”

<sup>23</sup> As chora útata tmojanabocacá: José, nda Barsabás ca imojanábobuatma y ínÿengna Justo ca; y chentšana Matías. <sup>24</sup> Chora Bëngbe Bëtsáftaca mëntšá tmojanencuentá: “Bëngbe Utabná, aca nÿetscangbe ainana icuabuatma; chcasna, šminÿanÿé nda quem útatentšana cochjuábuayanana, <sup>25</sup> canÿe ichmonacá Júdasbe cuenta chaotrabajama. Judas ya ndoñe canÿe ichmoná quenátsmëna, bacna soye tojama causa, y cha mora yojtsemna chë ndayentše jtsemnama ibomna luaroca ca” – chënga tmojánayana.

<sup>26</sup> Y nda chë ichmoná yochtsemnama jtsotatsëmbuamna tshanánye tmojanëtšena y Matías tbojanobuache; as cach orscana, Jesucristbeñe ošbuáchiyënga chabiamia imojanjuabná mo canÿe Jesusbe ustonacá, cachcá ntšamo chë bnëtsana canÿe uatsjëndayëngbiamia chënga imojanjuabnacá.

## 2

### *Chë Uámana Espíritu ošbuachiyëngbeñe tojánamashëngo*

<sup>1</sup> Pentecostés ca uabaina fiesta tojanobuache ora, chë jaja sananga tmojanobuátbanama fiesta te, Jesucristbeñe ošbuáchiyënga nÿetscanga cánÿiñe canÿe luarentše imojtsemna. <sup>2</sup> Ndeolpe, celocana mo canÿe jabuache binÿiécá yojtsaishauenana y chca, tša jabuache shauenanana tojanóshjango nÿets yebnentše, chënga imojtsetbiámanentše. <sup>3</sup> Y chora bichtajënga mo iñeshcá yojónÿna y canÿánÿabeñe yojojátaye. <sup>4</sup> Chca chë Uámana Espíritu tojánamashëngo chëngbe ainaniñe jtsemándayama; chora nÿetscanga tmojanontsé inÿetšá biyangana, chënga tempo ndmabiyañe, ntšamo chë Uámana Espíritu yojtsamcá chënga inÿetšá chamotsebiyama.

<sup>5</sup> Chë tempo Jerusalenentše imojtsemna ba judiënga, Bëngbe Bëtsá puerte adórayënga, nÿets luarëngocana áshjajnënga; chënga tmojánabo Bëngbe Bëtsá jëtschuayama. <sup>6</sup> Entšanga chë shauenanana tmojanuena ora, tmojanójoto y ndoñe imontsetátšëmbo ntšamo jtsejuabnayana ndayá yojtsopasánama, er chë inÿe luarocana áshjajnënga imojtsuenana chë Jesucristbeñe ošbuáchiyënga inÿetšá biyangana jtsóyebuambnayana, ntšamo cada ona chënga imojanbiyacá. <sup>7</sup> Chë soyëngama entšanga puerte imojenjaná y mëntšá imojtsenatsëtsnaye: “Chë chca montsóyebuambnanga Galileoquënga mondmëna. <sup>8</sup> Chcase, ¿ntšámoyeca bënga imojtsobena chënga joyaunayana cach bënga mondëbiyacá ca? <sup>9</sup> Muentše montsemna Partioquënga, Medioquënga, Elam, Mesopotamia y Judeoquënga, Capadocia, Ponto y Asia luaroquëgnaca, <sup>10</sup> Frigioquënga, Panfilia, Egipto y Libia, chë Cirene béconana luaroquënga. Báseftangna

Romoquënga montsemna; <sup>11</sup> chëngbeñe nderado judiënga camuentše onÿnánënga, pero ínÿengna ndoñe, y chënga Bëngbe Bëtsá mondbëtsatschuanaye cach ntšamo chë judiënga monduamancá. Inÿengna Cretocana y Arabiocánënaca tmojabo. ¡Y bënga montsobena chë Galileoca judiënga joyaunayana Bëngbe Bëtsá bëts soyënga tojamama cach bënga mondëbiyacá ca!” —chë entsanga imojtsichamo.

<sup>12</sup> Chë causa nÿetscanga imojtsenjnanaye y ntšamo jtse-juabnayama ntsetatšëmbcá imojtsemna y imojtsentjanaye: “¿Ndayá chë soye yojtsayana ca?”

<sup>13</sup> Pero ínÿengna, chë soyëngama chëngbioye imojtsëbayajuana y imojtsichamo: “Chënga tëmiënga montsemna ca.”

*Ntšamo Pedro chora tojanoyebuambá*

<sup>14</sup> Chentšana, Pedro tojantsá chë inÿe bnëtsana canÿe ichmónëngaftaca y jabuache tojanontsé chë entsanga jáuyanana, mëntšá: “Atšbe entsanga judiënga y nÿetscanga Jerusalemntše oÿenënga, tšabá šmochjouena. Ntšamo tojopasama cbochanjábuayenaye, as chacmësertama. <sup>15</sup> Tšëngaftanga šmontsejuabná atše y atšbe enutënga tëmiënga fstsemna ca, pero ndegombre, tëmiënga ndoñe queftsátsmëna; cabá cachëse, base mošenana ora ctsomñe. <sup>16</sup> Pero ntšamo entsopasánamna, Bëngbe Bëtsabe juabna oyebuambnayá Joel mëntšá tojanábema:

<sup>17</sup> Bëngbe Bëtsá mëntšá tojánayana: ‘Quem luare jopochócama te chaojtsobeco ora, chë soyënga echanjochnëgo.

Atše chanjama, atšbe Espíritu nÿetscangbe ainaniñe cháumashënguama.

Chentšana, tšëngaftangbe uaquiñënga y bemianga atšbe soyëngama entsanga mochantsëtsësnaye;

tšëngaftangbe bobontsëngna, atše chanjama soyënga mochantsonÿaye mo otjenayoquëcá;

y tšëngaftangbe bëtsëjëmëngna atšbe soyënga mochantsotjénaye.

<sup>18</sup> Chca ora, atše chanjama nÿetsca atšbe oservénëngbiana, boyabásenga y shembásenga,

chëngbe ainaniñe atšbe Espíritu cháumashënguama, as chënga atšbe soyëngama entsanga mochantsëtsësnaye.

<sup>19</sup> Atše chanjama bëts soyënga celoca;

y quem luariñe echántsemna buiñe, íñeshe y ngona mo jantšetëshcá, atšbe obenana jinÿanÿiyama.

<sup>20</sup> Cabá chë puerte uámana te, chë Bëngbe Utabná bëts soyënga jamama ndobuache ora,

shinÿe ndoñe queochátsbuashinÿinÿana

y juashcona buánganëtema mo buiñcá echántsemna.

21 Y as, ndánaca Bëngbe Utabná tbojtsotsëmbuaná, cha bochanjatsbocá’

Chca Joel tempo tojanábema ca” —Pedro tojánayana.

22 Chora Pedro tojatanëyana: “Israeloquënga, šmochjouena ntšamo cbochanjauyancá: Bëngbe Bëtsá ndegombre tcmónjaninÿanÿé, Jesúsbioye chabe trabajo biannayá cha tbojánbemama. Chë soye Bëngbe Bëtsá tcmónjaninÿanÿé, Jesús chë Nazaretocáftaca cha tojanma bëts soyëngaca y ójnanana soyëngaca, Bëngbe Bëtsabe obenana jinÿanÿiyama. Cach tšëngaftanga chë soyëngama šmondëtatšëmbo, Bëngbe Bëtsabe obenánaca chë soyënga tšëngaftangbeñe Jesús tonjánmayeca.

23 Ndegombre tšëngaftangbe cucuatšinë Jesús tmonjánboshjona, pero cabá ndëboshjona ora, Bëngbe Bëtsá tojanjuabó ntšamo jopásana yojamnama; y ntšamo tšëngaftanga cháftaca šmochjanmámnnaca cha inatátšëmbo. Tšëngaftangna Jesús šmonjanishache y šmonjanma cha chamóbama y chamocrucificama, bacna entšangbe cucuatšinë. 24 Pero Bëngbe Bëtsá tojama cha cháuatayenama; y chë obanëngbe luarentšana tbojatsbocá, er ndoñe yonjopodena cha obaná chaoquedama ca” —cha tojánayana.

25 Chora Pedro tojatanëyana: “Rey David tempo Jesusbiana mëntšá tojëftsanabema, ntšamo cha Bëngbe Bëtsábioye tbojanianama:

Atšbe Utabná, aca sempre átšeftaca condbétsemna, y sempre átšeftaca condboquedá atše juajabuáchama, chíyeca ndocná queochatobenaye atše jauátjanama.

26 Chíyeca atše corente oyejuayá sëntsemna, y atšbe uayášaca cbontsatschuaná.

Atše masque chanjóbana, tšabá sëndëtatšëmbo aca atšbe Bëtsá, atše chaitayenama cochjamama.

27 Aca, Bëngbe Bëtsá, obanëngbe luarentše ndoñe quešcochátšboshjona, y ndoñe queochatsleséncia acbe uámama oservenabe cuerpo chaotsopochocama.

28 Aca chë tšabe benache šconjaninÿinÿé, ntšamo tšabe vida jtsebomnama.

Aca átšeftaca condbétsemnama, atše puerta oyejuayá sëntsemna ca —David tojëftsanabema ca.”

29 Chentšana Pedro tojatanëyana: “Baconga y batanga, šontsemna ndegombre tšëngaftanga jábuayenana tšabá chacmësertama. Bëngbe tempsca bëts taitá David tojanóbana y tmojanatbontsá, y bënga montsemna cha tmojanatbontsá luare béconana. 30 Cach David canÿe Bëngbe Bëtsabe juabna oyebuambnayá inamna. Cha tšabá inatátšëmbo Bëngbe Bëtsá bëtscá tbojanšbuáchenama, Davidbe entšanguentsana canÿa,

Cristo, cach Davidcá rey jabemama. <sup>31</sup> David inatátšëmbo chë Uámana Uabuayaná, chë Cristo, cháuatayenama Bëngbe Bëtsá yochjanmama. Chama cha tojánayana y tojëftsanabema, obanëngbe luarentše Cristo ndoñe ntjëftseboshjonana y Bëngbe Bëtsá ndoñe ntjalesénciana chabe cuerpo chaotsopochocama ca. <sup>32</sup> Bëngbe Bëtsá tojama Jesús cháuatayenama y bënga cha fsënjinÿe. Chíyeca bënga fsëntsetatšëmbo chca ndegombre bëtsemnama. <sup>33</sup> Bëngbe Bëtsá, Jesús celoye tbontanatsbaná chabe catšbioica jtsatsmënama jtsemándayama, y Bëngbe Bëtsá chë Uámana Espíritu Jesúsbioye tbojanëntšabuaché ntšamo chë Taitá tbojanšbuachenacá. Ntšamo tšëngaftanga šmontsonÿá y šmontsuenancá entsemna, Jesucrístoftaca chë Uámana Espíritu bëngbe ainaniñe cháumashënguama Bëngbe Bëtsá tojámayeca. <sup>34</sup> David ndoñe Jesuscá celoye tonjána, pero mëntšá tojëftsanábema:

Bëngbe Bëtsá atšbe Utabná Crístbioye tbonjanianyana:

‘Atšbe catšbioica cochtsetbemana,

<sup>35</sup> acbe uayayënga acbe cucuatšinë chamoquedama atšbe obenánaca chjamëntscuana ca.’ ”

<sup>36</sup> Chora Pedro tojatanëyana: “Tšëngaftanga nÿets Israeloquënga šmochtsetátšëmbo, atše ndegombre cach Jesusbiamasëntsóyebuambnama. Cha tšëngaftanga šmonjancrucificá, pero Bëngbe Bëtsá chábioye tbonjábema Bëngbe Utabná y chabe Uámana Uabuayaná, chë Cristo ca.”

<sup>37</sup> Chë soyënga tmojanuena ora, entšanga cochtsetšenanënga imojtsemna, y Pedro y chë inÿe ichmónëngbioye tmojanëyana: —Baconga, ¿ndayá mora jamama šojtsamna ca?

<sup>38</sup> As Pedro tojanëjua: —Ngménaca šmochtenójuaboye bacna soyënga šmojtsamama, chca amana šmochtsajbaná y Bëngbe Bëtsabe benache šmochtishache. Chca chašmojama ora, cbochanjubaye mo chábeñe ošbuachiyëngcá, Jesucristo atše jótšëmbonëse. Chcase, Bëngbe Bëtsá tšëngaftangbe bacna soyëngama cmochanjáperdonaye y echanjama chë Uámana Espíritu tšëngaftangbe ainaniñe jtsemándayama cháumashënguama. <sup>39</sup> Bëngbe Bëtsá chë soyënga tcmonjanašebuachená tšëngaftangbiamá, tšëngaftangbe básëngbiamá y nÿets chë bën luarënguenache imomna entšangbiamá, nÿetscanga chë Bëngbe Utabná Bëngbe Bëtsá chábioye jabama chaojubuáyanënga ca.

<sup>40</sup> Inÿe palabrëngnaca Pedro tojatanëyana y bëtscá tojanabuayená mëntšá: “¡Bëngbe Bëtsá chë Israeloca bacna entšanga echanjácastigaye. Chašmótsbocamna, chëngbentšana smochtsojuánañe ca!”



41 Ba entšanga imojtsanošbuaché ntšamo Pedro tojanéyanama y tmojánenabaye. Cach te mo unga uaranga entšanga nýetsá tmojanoboté, Jesucristbeñe ošbuáchiyënga jtsemnama. 42 Chënga corente imojtseboše jtsamama chë Jesusbe ichmónënga imojtsabuatambá soyënga. Tšabá yojsacochebiona nýetscanga cánýiñe jtsemnama y imojanamana mo chë Jesucristbeñe ošbuachiyëngcá cánýiñe jtseyayana y cánýiñe Bëngbe Bëtsáftaca jtsencuéntayana.

*Ntsamo chë natsana Crístbeñe ošbuáchiyënga vida imnabomna*

43 Nýetscanga imojtsenjanaye, chë ichmónënga bëts soyënga y inýe soyënga chabe obenana jinýanýiyama chamomama Bëngbe Bëtsá tojánmayeca. 44 Nýetsca chë Jesucristbeñe ošbuáchiyënga sempre cánýiñe mo canýacá imojtsemna y nýetsca chëngbe bomna soyënga nýetscangbiama yojtsemna. 45 Chënga imojanamana fshantsënga jtsatobuíyana y chë imojánbomna soyëngnaca, y chë crocénana jujátayana ntšamo chë ínýenga tojtsëjabotcá. 46 Cada te imojanamana Bëngbe Bëtsabe bëts yebnentše jénefnana cha jëtschuayama, y yebnënguenache cánýiñe imojtsesaye oyejuayënga y ndoñe ojëndayënga. 47 Chënga imojanamana Bëngbe Bëtsá jtsatschuanayana, y nýetsca entšanga imojtsejuabnaye chë Jesucristbeñe ošbuáchiyëngbiama tšabe entšanga imojamna ca. Y cada te Bëngbe Bëtsá yojsama más ošbuáchiyënga chamóbotema, chë ndëmuanýënga cha yojtsatsebacayënga.

### 3

*Pedro canýe coshétbioye tbojanshná*

1 Canýe te, Pedro y Juan Bëngbe Bëtsabe bëts yebnoye tbojánata bëts mošenana ora. Chca ora entšanga imojanamana Bëngbe Bëtsáftaca jtsencuéntayana. 2 Bëngbe Bëtsabe bëts yebnentše canýe cosheto yojtsemna; tojanonýná orscana chca šocá inamna. Entšanga imojanamana cada te cha juanatsana canýe luaroye, Bëngbe Bëtsabe bëts yebnoca, Botamana Amashjuana ca uabáinoye, chë tmojtsachnëjuanënga lemošna chaótejañama. 3 Pedro y Juan Bëngbe Bëtsabe bëts yebnoye jamashënguama chë cosheto tojánanyë ora, canýe lemošna chátbioye yojótejañe. 4 Chatna chë šocá imojtsonýaye, y Pedro tbojaniyana: “Scochtsënyäye ca.”

5 As cha yojtsënyäye y yojtsejuabnaye ndayá chjójyëngacñe ca. 6 Chora Pedro tbojaniyana: “Quetsátsbomna ni crocénana, ni castellano aca jatšetayama, pero atše chanjama Jesucristbe obenánaca ndayá acbiamama jamama atše stsobencá: Jesús chë Nazaretocá obenana endbomna; chíyeca atše cbëyana chabe mándoca, matëtsbaná y cochtsana ca.”

<sup>7</sup> Pedro chca tbojaninyana ora, tbojanábuacueshache catšbióicatše y tbojtanatsbaná, y cachora chë cosheto shecuatsiñe y shëmiabeñe añemo yojsatsbomna. <sup>8</sup> As chë cosheto, canye jontsënjëse tšabá tojtantsá y tojanontšë tšabá jtsanana, y Bëngbe Bëtsabe bëts yebnoye Juan y Pédroftaca tojánamashëngo; yojsayontsënjnaye y Bëngbe Bëtsá ibojsatschuanaye, tbojanshnama. <sup>9</sup> Chë Bëngbe Bëtsabe bëts yebnentše imojëtsemnënga nÿetscanga cha tmojáninÿe tšabá jtsanana y Bëngbe Bëtsá jtsatschuanayana. <sup>10</sup> Chënga imnatátšëmbo cha chë cosheto yojamnana, chë nda yojanamana Bëngbe Bëtsabe bëts yebnoca, chë Botamana Amashjuantšë jótbemana, entšanga lemošna jotejañama. Cha tšabá yojsatsmënamna entšanga ojanánënga imojtsemna.

*Ntšamo Pedro tojanoyebuambá Salomonbe Amashjuana ca uabáinentše*

<sup>11</sup> Chë cosheto ya shnaná ora, ndoñe yontseboše Juan y Pédrëbentšana joluárana. As, nÿetsca entšanga ojanánënga tmojanótjajo chë amashjuana otsbojebniñe, Salomonbe Amashjuana ca uabáinoye, chë Juan, Pedro y chë cosheto shnaná imojëtsemnoye. <sup>12</sup> Pedro chë entšanga tojánanÿe ora, tojanëyana: “Taitanga y mamanga, Israeloquënga, ¿ndáyeca chë soyëngama ojanánënga šmojtsemna? ¿Ndáyeca nÿe šcojtsëbuáutja? ¿Šmojtsejuabná nÿe bëndatbe obenánaca quem boyabása tifjashná ca? ¿O šmojtsejuabná quem boyabása tifjashná bëndata Bëngbe Bëtsá puerte tšabá ftsadoránayeca? <sup>13</sup> Bëngbe Bëtsá, ndábeñe Abraham, Isaac y Jacob imojanošbuaché y ndábeñe bëngbe bëts taitanga imojanošbuaché, cha tonjinÿanÿé chabe oservená Jesús chë más uamaná yomnama. Cha tšëngaftanga chë mándayëngbe cucuatšíñe šmonjánboshjona chamóbama. Pilato enjëtseboše Jesús jëtšboshjonama, pero tšëngaftanga Pilatbe delante šmonjánayana chca ndoñe šmontsanboše ca, y chíyeca Pilato ndoñe tbontanboshjona. <sup>14</sup> Jesús uamaná y nÿetsca soyënguiñe tšabá amá enjamna, pero tšëngaftangna cha šmontsanaboté y Pilato šmonjanimpadá chabe cuenta canye boyabása, entšá obanayá, chabuatsboshjonama. <sup>15</sup> Y chca, chë ndegombre tšabe vida chašmotsebomnama amábioye tšëngaftanga šmonjanóba. Pero Bëngbe Bëtsá tojanma cha cháuatayenama y bënga chë soye fsënjáninÿe y chama fsëndëtatšëmbo. <sup>16</sup> Jesús puerte obená endmënayeca, quem cosheto añémoca entsatsmëna. Ntšamo šmonjinÿe y šmonjatatšëmboncá ndegombre tonjopasá Jesúsbeñe betsošbuáchema. Chë Jesúsbeñe jtsošbuáchiyana tonjama cha tšabá tšëngaftangbeñe chaotsatsmënama.

17 “Taitanga y mamanga, atše sëndētatsēmbo tšëngaftangbe causa y tšëngaftangbe amëndayëngbe causa Jesús tojanóbanama. Pero tšëngaftanga chca šmojanma, ndayá šmojétsamama ntsetatsëmbcá. 18 Tempo, Bëngbe Bëtsá chë chabe juabna oyebuambnayënga tojanamëndá entsanga jábuayenama, chë Bëngbe Bëtsabe Uámana Uabuayaná puertengménana yochtsanbomnana. Morna, ntšamo Bëngbe Bëtsá tojanayancá ya tonjochnëngo. 19 Chcasna, ngménaca menójuabonga bacna soyënga šmojtsamama, chca amana šmochtsajbaná y Bëngbe Bëtsabe benache šmochtishache, chca, tšëngaftangbe bacna soyënga cha chacmabuajuánama. Chca chašmojamëse, Bëngbe Bëtsá echanjama tšëngaftangbe ainaniñe oyejuayana chašmotsóbonñama,<sup>20</sup> y tšëngaftangbiroye bochanjíchmuá Jesús, chë tempo chabe Uámana Uabuayaná Bëngbe Bëtsá tbojanbemá. 21 Canye te echanjóshjango, Bëngbe Bëtsá lempe tsmëmacá jëtsbemama. Chë tentscuana Jesús bontsemna celoca joquédana. Chca echanjochnëngo ntšamo Bëngbe Bëtsá chabe juabna oyebuambnayëngbiajana entsanga tojanabuayenacá. 22 Moisés bëngbe bëts taitanga tojanabuayená: ‘Chë Utabná Bëngbe Bëtsá canye chabe juabna oyebuambnayá ntšamo atše sëndmëncá, cmochanjayentsíchmuá. Cha tšëngaftangbentsana echanjábocna y tšëngaftanga cmontsamna ntšamo chacmojtsëtsëtsnacá cha jtseyeunanana. 23 Ndánaca chábiroye ndoñe chabonjoyeuná, cha bontsemna chë Bëngbe Bëtsabe entsángbentsana luaroca jtsemnana y chamotsepochochocama ca’ —cha tojánayana.

24 “Y nyetsca chë Bëngbe Bëtsabe juabna oyebuambnayëngnaca Samuel orscana, entsanga tmojanabuayená ndayá quem tempo yochjanchnënguama, ntšamo mora montsonyáca. 25 Chabe juabna oyebuambnayëngaftaca Bëngbe Bëtsá tojanašebuachená bëts soyënga tšëngaftangbiama, y tšëngaftangbe bëts taitángaftaca canye trato tojábema; chë soyënga cabá tšëngaftangbiama entsemna. Bëngbe Bëtsá Abrahámbiroye mëntsá tbojaniyana: ‘Chë ácbentsana entsángbeyeca tšabe bendicionënga chanjama nyetsca quem luarentša entsangbiama ca.’ 26 Bëngbe Bëtsá tojama chabe oservená cháuatayenama y natsana tšëngaftangbiroye tbojanichmó, bacna soyënga amana chašmotsajbanama. Y chca, Bëngbe Bëtsá jamama tšëngaftangbeñe tšabe bendicionënga chaotsemnana ca” —Pedro tojánayana.

## 4

*Pedro y Juan Jerusalenentša mandadëngbe delante*

<sup>1</sup> Pedro y Juan cabá entsānga imojtsētsētsnaye; chorna chē chata ibojtsemnoye tmojánashjajna judiēngbe bachnanga, Bēngbe Bētsabe bēts yebnentša soldadēngbe amēndayá y saduceo ca uabaina judiēngbe amēndayēnga. <sup>2</sup> Chatna entsāngbioye imojtsabuátambaye Jesús tojtanayenama y chē soye yojánayana obanēnga ndegombre mochtayena ca. Chē causa, chē tmojánashjajna amēndayēnga tojánētēna. <sup>3</sup> As, Pedro y Juan tmojánishēche y ya jetiñe yojtsemna causa, cárceloye tojanētame yēfsanēntscuana. <sup>4</sup> Masque chca, banga entsānguentšana, ntšamo Pedro y Juan tbojanayancá tmojanuenēnga, aīñe Jesucristbeñe imojtsošbuáchiye. Chē tentscuana shachna uaranga Jesucristbeñe ošbuáchiyēnga imojtsemna, n̄ye boyabásenga jacuéntase.

<sup>5</sup> Yēfsana, chē judiēngbe amēndayēnga, judiēngbeñe bētsējemēngcá amēndayēnga y ley abuátambayēnga Jerusalenentše tmojánenefjna. <sup>6</sup> Chéntšnaca imojtsemna, chē bachnangbe más uámana amēndayá Anás ca uabainá, Caifás, Juan, Alejandro y chē bachnangbe más uámana amēndayēngbe n̄yetsca pamíllangnaca. <sup>7</sup> Chora chēnga tmojanmandá Pedro y Juan junatsama, y chēngbe tsēntsaca tojanatsá y mēntšá tmojanatjá: —¿Ndabe obenánaca chē soyēnga šojtsama, o, nda derecho tcmēnjatsatá chē soyēnga chašotsamama ca?

<sup>8</sup> As Pedro, chē Uámana Espiritu chabe ainaniñe corente jtsemándayēse, mēntšá tojanējua: —Israeloca mándayēnga y bētsējemēnga, <sup>9</sup> mēnté šconjatjá chē jama ndobenáftaca tšabe soye tifjamama y ntšamo cha mora jama yojtsatobenama. <sup>10</sup> Chcasna, ntšamo tojopasama cbochanjabuayená, chca, tšēngaftanga y n̄yetsca Israeloca entsānga chē soyēnga chašmotsetatšēmbuama. Quem boyabása, chē tšēngaftangbe tsēntsaca entsemná, Jesucristo chē Nazaretocabe bēts obenánaca chca tšabá entsatsmēna. Y Jesús endmēna nda tšēngaftanga šmonjancrucificá y ndabiama Bēngbe Bētsá tojanma cháuatayenama. <sup>11</sup> Jesusbiamá Bēngbe Bētsabe uabemana palabrenguiñe mēntšá endayana: “Chē yebna jebuanēnga tmontsanaboté ndētšbé, mora chē más bēts uashacuanēsentše entsejájona ca”. Tšēngaftanga šmondmēna mo chē yebna jebuanēngcá, er Jesúsbioye šmontsanaboté y mora cha chē más uamaná entsemna. <sup>12</sup> N̄ye cha yobena tšēngaftanga játsebacama. Bēngbe Bētsá ndocna in̄ye entsábioye tbonjatšetá chabe obenana chca jamama; chíyeca quem luarentše ndocná más quenátobena bēnga játsebacama. N̄ye Jesucristbe obenánaca aīñe ca —Pedro tojánayana.

<sup>13</sup> Chēnga imojenjnaná Pedro y Juan tša añémoca ibojtsóyebuambnama tmojánin̄ye ora, y chata tempo

nduatsjínjenata y librëša nduabuatmata bétsemnama tmojántatsëmbona ora. Chca chë mándayënga tmojántatsëmbona chata Jesúseftaca bayté ibojamnana. <sup>14</sup> Y entsanga imojtsonyaye chë tmojanshná cha chentše chátaftaca yojtsemnama; chë causa, chënga ndocá más tmonjanobená chatbe contra jatichámuana. <sup>15</sup> As chora tmojanamëndá chentšana chábuaisebocnama y chentše tmojanoquedangna chë soyama imojtsenatsëtsnaye. <sup>16</sup> Chënga imojtsentjanaye: “¿Ndayá chátaftaca mochjama ca? Jerusalemntše oyenënga montsetáttsëmbo chata chë bëts soye Bëngbe Bëtsabe obenánaca tbojamama; chë causa, bënga ndoñe quemuátobena jayanana chata chca ndoñe tbonjama ca. <sup>17</sup> Pero entsanga chama ndoñe más chamondëtsencuéntamna, chata mochjáuyana: ‘Ndoñe más entsángbeñe Jesús šmattsebáyana; y ndoñe chašmonjouenëse, jabuache castigo šochántsebomna ca.’ ”

<sup>18</sup> As chë mándayënga cachiñe chata tmojánachembo y tmojanamëndá ndoñe más Jesús jtsebáyana, ni chabiamana entsángbeñe jtsabuátambayana. <sup>19</sup> Pero Pedro y Juan tbojánayana: “¿Ntsamo tsëngaftanga šmatjayana ntsamo fchanjayanama ca? Ndegombre, Bëngbe Bëtsabe bominyiñe ndoñe tsabá quenátsmëna tsëngaftangbioye aïñe joyaunayana y chábiyoye ndoñe. <sup>20</sup> Er bënga queftsátobena jtsajbanana oyebuambnayana chë tifjinye y tifjouena soyëngama ca.”

<sup>21</sup> Chë mandayëngna chátbiyoye tojtsanautatjá, pero chentšana tmojtanabáshejuana. Nyetsca entsanga Bëngbe Bëtsá imojtsatschuanaye ntsamo tojanopasama; chíyeca, chë mándayënga ndoñe tmonjanobená tondaye ntjinyenana ntsamo chata jácastigama. <sup>22</sup> Chë boyabása, ndáftaca chata chë bëts soye Bëngbe Bëtsabe obenánaca tbojanma, inabomna canta bnëtsana uatama más.

*Jesucristbeñe ošbuáchiyënga Bëngbe Bëtsá tmojanimpadá más añemo chauatšatama*

<sup>23</sup> Pedro y Juan ya tmojtanabáshejuana ora, tbojánata chë inyë ošbuáchiyëngaftaca jateninyenama y lempe ntsamo chë bachnangbe amëndayënga y bëtsëjemëngcá mándayënga chátbiyoye tmojanëyancá, chëngbiyoye tmojanacuntá. <sup>24</sup> Chënga chca tmojanuenentsana, nyetscanga cányiñe tmojanontsé Bëngbe Bëtsáftaca mëntsá jencuéntama: “Bëngbe Utabná, aca chë nda tojama celoca, fshantse, nyetsca béjayënga y lempe ntsamo chenache yomncá, <sup>25</sup> chë Uámana Espíritbiajana tcojánayana y acbe oservená David, ntsamo tcojanayancá tojanábema, mëntsá:

¿Ndayeca entsanga yapa imojtsetsátjaye ca?

¿Ndayeca imojtsejuabná nye bonamentiamana soyënga jamana?

<sup>26</sup> Quem luarentša reyënga y amëndayënga imoprontánënga, nyëtscanga tmojenoyeuná Bëngbe Bëtsá y chabe Uámana Uabuayaná chë Cristbe contra jtsemnama ca —cha tojanábema.

<sup>27</sup> “Ndegombre chca tonjopasá. Rey Herodes y Poncio Pilato, quem bëts pueblentše, ndoñe judiëngaftaca y israelitëngaftaca tmonjánenefjna, jenóyeunayama ntšamo jamana, Jesús chë acbe uámana oservená y chë Uámana Uabuayaná tcojabemábioye jóbama. <sup>28</sup> Tempo, Bëngbe Bëtsá, acbe obenánaca y ntšamo icnabošcá tcojanmandá ntšamo mora chaotsemnama, y chënga chca Jesúseftaca tmonjama. <sup>29</sup> Morna Bëngbe Bëtsá, mouena ntšamo chënga montsichamo, bënga jasúfriama cašojsamna ca; chcasna, cochjama bënga fchayobená Jesusbe tšabe noticiënga bëts añémoca entsángbeñe jtsóyeuambnayama, <sup>30</sup> y cochjama acbe obenánaca šoquënga tšabá chamotsatsmënema y cochjama bënga fchayobená bëts soyënga jamama, Jesús chë uámana oservenabe obenánaca y cha jótšëmbonëse ca” —chënga tmojánayana.

<sup>31</sup> Bëngbe Bëtsáftaca jencuéntama tmojanpochocá orna, chë tmojánenefjnentše tojanangmëmema; y nyëtscangbe ainaniñe chë Uámana Espíritu tojanontsé más jtsemándayana, y chënga tmojanontsé más añémoca Bëngbe Bëtsabe soyëngama entsanga jábuayenama.

### *Nyetsca bomna soyënga nyëtscangbiamayojtsemna*

<sup>32</sup> Jesucristbeñe ošbuáchiyënga, nyëtscanga canye juabna imojtsebomna y ainaniñe cach canye ebionana. Ndocná ntjatichamuana chabe soyënga nye chabiamayojtsemna ca, pero aine imojtsichamo, “atše sëndbomna soyënga nyëtscangbiamayentsemna ca”. <sup>33</sup> Chë Jesusbe ichmónëngna puerte obenánaca mëntšá imojtsichamo: “Fsëjinnye y fsëntsetatšëmbo Bëngbe Utabná Jesús obanënguentsana tojtayenama ca.” Y Bëngbe Bëtsá yojtsama chë ichmónënga bëts cá tšabe bendicionënga chamotsebomnama. <sup>34</sup> Jesucristbeñe ošbuachiyëngbeñe ndocná yonjamna ndayánaca uajabotá, er nyëtscanga fshantse o yebna bomnënga imojanamana jtsatobuíyana, y chë crocénana <sup>35</sup> chë ichmónëngbioye jayentšbuáchiyana, ntšamo tojtsëjabotcá nyëtscanga jujátayama. <sup>36</sup> Chca tojanma canya Bëngbe Bëtsabe bëts yebnoca trabajayá, José ca uabainá; cha chë ichmónënga imojanábobuatma Bernabé ca (y chca iuayana “Añemuayá ca”). Bernabé yojamna Chipre luarocá. <sup>37</sup> Chana, fshantse yojtsatobuiye, y chë crocénana Jesusbe ichmónëngbioye yojáyentšbuachiye, chë uajabótëngbiamaychaoservema.

## 5

*Ntšamo Ananías y Safíraftaca tojanopasá*

<sup>1</sup> Inamna canye bacó, Ananías ca uabainá, y chabe shemna, Safira ca. Chatna canye fshantse tbojániye. <sup>2</sup> Ananías y Safirna tbojanenóyeunata; chcasna, batšá crocénana cachatbiama tbojanobuajó y chë tojanójama crocénana ichmónëngbioye Ananías tojanamba, pero tojanéyana chana canjamna nyets crocénana ntsachetšá chë fshantsama tbojanosháchiñe ca. <sup>3</sup> As Pedro tbojaniyana: “Ananías, ¿ndáyeca tcojalesenciá Satanás acbe ainaniñe bacna juabnënga chacmócochënguama, Uámana Espíritu chë crocenánama jabuambayama ca? Acna chë fshantsama tcmojtabuená crocenánentšana cach achiamna batšá tcontábojama. <sup>4</sup> Cabá ntsatobuiye ora, chë fshantse ácbeshe endánmëna y tcojtsatobuíyentšana chë crocénana acbiana y chánaca condánobena ntšamo tcojtsebošcá jamama. ¿Ndáyeca acbe ainaniñe tcojajuabó chë crocenánama chca jobostérama? Chca jamëse, ndoñe nye entšángbioye quecatabuambná, sinó Bëngbe Bëtsánaca ca” —Pedro tbojaniyana.

<sup>5</sup> Ananías chë palabrenga tojanuena ora, obaná tojánshajaye. Y nyetscanga chama tmojántatšëmbonënga corente imojtsauatja. <sup>6</sup> Chentšana, básefta bobontsënga tmojánashjajna y Ananíasbe cuerpo entšëjuaca tmojanandmaná y jauátbontsama tmojanamba.

<sup>7</sup> Mo unga horëntscose, Ananíasbe shema Safira tojánashjango, pero ndoñe yontsetátšëmbo ntšamo chabe boyáftaca tojanopasama. <sup>8</sup> Chora Pedro tbojantja: —Ndegombre šmëyana, ¿chë šmonjayana nyetšnama chë fshantse šmojiye ca?

As chë shema tbojanjuá: —Aíñe, nyetšnama fsënjiye ca.

<sup>9</sup> Pedro tbojaniyana: —¿Ndáyeca tsëndata šojenoyeuná Bëngbe Utabnabe Espíritu jabuambayama, y cabá castigo jtsebomnama ndoñe šontsobatmana ca? Acbe boyá jauátbontsama tmonjuambënga muentše bësoca montsemna y mora ácnaca cmochanjuamba ca.

<sup>10</sup> Cachora Safira Pédrëbe shecuatšentše obaná tojánshajaye. Chë bobontsënga tmojtanamáshjna ora, obaná Safira tmojáninýena; asna, chentšana tmojanamba y cachabe boyabe juachaca tmojanatbontsá. <sup>11</sup> Y nyetsca Jesucristbeñe ošbuáchiyënga chentše imojtsemnënga y nyetscanga chë soye tmojántatšëmbonënga, corente imojtsauatja.

*Ba bëts soyënga chë ichmónënga tmojanma, Bëngbe Bëtsabe obenana jinýanýiyama*

<sup>12</sup> Chë Jesucristbe ichmónëngaftaca ba bëts soyënga entšángbeñe yojtsebinýna Bëngbe Bëtsabe obenana

jin̄yan̄iyama; y nyetsca Jesucristbeñe ošbuáchiyënga imojanamana Bëngbe Bëtsabe bëts yebnoca jénefnana, Salomonbe Amashjuana otsbojebnentše. <sup>13</sup> Chë ín̄yënga, chë Jesucristbeñe ndošbuáchiyëngna, imojtsauatja Jesucristbeñe ošbuáchiyëngaftaca jtsenutana; pero entšangna chë ošbuáchiyëngbiana tšabá imojtsencuëntaye. <sup>14</sup> Bëngbe Utabnábeñe ošbuáchiyënga más imojtsóbotena, bëtsca boyabásenga y shembásengnaca. <sup>15</sup> Tša bëts soyënga chë ichmónëngaftaca yojtsebin̄ȳna; chíyeca entšanga imojanamana jutsnëshangañe y tjuashënguiñe tsáshenoye šoquënga jubuacnana, chca, Pedro chëjana tojtsachñëjuana ora, n̄ye mo chabe sómbrenaca chëngbe cuerpëjana chaochnënguama, shnánënga jtsatsmënama. <sup>16</sup> Jerusalén chábuañe pueblënguentsana ba entšanga imojanamana jabana, y šoquënga y bacna bayëjbe juabna uambayënga imojtsëyabó; y nyetscanga shnánënga imojtsatsmëna.

*Bëngbe Bëtsá tojanma Pedro y chë in̄ye ichmónënga cárcelocana natjëmbana chámuaisebocnama*

<sup>17</sup> Chë ichmónënga tša tšabá imojtsamama, chë judío bachnangbe más uámana amëndayá y chabe ústonënga, chë saduceunga, puerte envidia imojtsebomna. <sup>18</sup> As chë ichmónëngbioye tmojánishëche y chë bëts pueblentša cárceloye tojtsanëtame. <sup>19</sup> Pero ibetna, Bëngbe Utabná can̄ye ángel tbojanichmó y chë utámenentša bëšašangá cha tojánatëfjo, chënga tojtanëbuacna y mëntšá tojanëyana: <sup>20</sup> “Motsajna, Bëngbe Bëtsabe bëts yebnentše šmochjámashjna, y entšanga šmochjabuayená ntšamo cuanjama chë nyetsca tescama yomna tšabe vida jtsebomnama, Jesucristoftaca cán̄yiñe mo can̄yacá jtsemnëse ca.” <sup>21</sup> Ntšamo tmojanuencá, yëfsana cabá cachëse Bëngbe Bëtsabe bëts yebnoye tmojána y tmojanontšë entšanga jabuátambana.

Chëntscuana, chë bachnangbe más uámana amëndayá y chabe ústonënga, chë Israeloca bëtsëjemëngcá mándayënga y in̄ye chentša amëndayënga tmojánachembo jénefnama y jenóyeunayama; as chora chënga tmojanmandá chë utámenocana chë ichmónënga jobiatšama. <sup>22</sup> Pero chë soldadënga chë utámenoye tmojánashjajna ora, chënga chentše ndoñe tmonjánan̄yena. Chcasna, chënga tmojtaná chë mándayënga chca jaúnayama. <sup>23</sup> Y tmojánayana: “Chë utámenoca fsenjín̄yena lempe tšabá endëtsëtámeñe y soldadëngna nyetsca bëšašangá monduabojan̄yanga; pero fsenjätëfjo y tsoye fsenjámashjna orna ndocná chibiátin̄yena ca.”

<sup>24</sup> Chë bachnangbe amëndayënga y chë Bëngbe Bëtsabe bëts yebnentša soldadëngbe amëndayá chca tmojanuena ora,



yojtsëtēmna y imojtsentjanaye ndayá chentšana yochjanopásama. <sup>25</sup> Chorna, chënga imojtsemnentše canýe boyabása tojánashjango y mēntšá tojanéyana: “Chë šmojutámiēnga mora Bēngbe Bētsabe bēts yebnocá montsemna, entšanga montsabatambá ca.”

<sup>26</sup> Chë soldadēngbe amēndayá tojána soldadēngaca, chë Jesusbe ichmónēnga junatsama; pero nýe tšabá tmojanēnatse, er chënga entšangbiama imojtsauatja, nderado cachēngbioye ndētšbēngaca muantsēbaye. <sup>27</sup> Chēngbioca tmojanēshejajna ora, mandayēngbioye tmojanēnatse; chora chë bachnangbe más uámana amēndayá mēntšá tojanéyana: <sup>28</sup> —Bēnga jabuachana tcbontsēuyaná y tcbonjáuyana ndoñe šmontselesenciana jtsóyebuambnayama chë boyabása Jesús tojánayana yojtsemna jabuátambama soyēngama ca. Masque chcasna, mora tšēngaftanga nýetsca chë Jerusalenentša oyenēnga chabe soyēngama šmojtsabatambá y šmojtseboše, cha tojanóbanama castigo bēngbeñe chaotsemnama ca.

<sup>29</sup> Chorna, Pedro y chë inýe ichmónēnga tmojánayana: —Bēnga šontsamna natsana Bēngbe Bētsá joyeunayana y chentšana entšangbioye. <sup>30</sup> Chë Taitá, nda bēngbe bēts taitanga monjánadorana, cha tojama Jesús cháuatayenama, chë nda tšēngaftanga šmonjanóba canýe cruciñe juajabonjēse. <sup>31</sup> Bēngbe Bētsá tbontatsbaná y chabe catšbioica tbojētstbema, jtsamēndayama, y tbojábema entšangbe Unachayá y Atsebacayá, chca, Israeloca entšanga ngménaca chamuenójuaboma bacna soyēnga imojtsamama y chca amana chamotsajbanama, y chēngbe bacna soyēngama perdonánēnga chamotsemnama. <sup>32</sup> Bēnga fsēntsichamo ndayá bēnga ndegombre tifjinýe Bēngbe Bētsá chca jtsamana ca; chë Uámana Espíritnaca chë soyēngama endbētsoyebuambnaye. Bēngbe Bētsá endbētsama chë Uámana Espíritu cháumashēngo chë tmojtseyeunanēngbe ainaniñe jtsemándayama ca —chēnga tmojánayana.

<sup>33</sup> Chë mándayēnga chca tmojanuena ora, puerta tmojanotjayaná y tmojánbošena chë ichmónēnga jtsēbáyama. <sup>34</sup> Pero chë mándayēnguentše yojtsemna canýe fariseo, Gamaliel ca uabainá. Chana canýe ley abuatambayá inamna y entšanga puerta imnarrespetana. As cha tojantsá y tojanmandá chë ichmónēnga ratotema chentšana jubuacnama. <sup>35</sup> Chentšana chë inýe mándayēnga tojanéyana: “Israeloca taitanga, puerta cuedado šmochtsebmna ntšamo quem boyabásengaftaca šmochjamama. <sup>36</sup> Quem soyama šmochjenójuaboye: Ndoñe bayté quenátsmēna, Teudas tonjánbocna y cha enjánichamo canýe uámana entšá canjamna ca, y mo canta patse entšanga cha tmojanasto. Pero chora ínýenga cha tmontsanóba y chabe

ústonënga tmonsanáshana, y chca lempe tontsanopochocá.  
<sup>37</sup> Chentšana, chë entsanga jenábemama enjamna ora, Judas chë Galileocá tonjánbocna y tonjanma báseftanga cha chamuastama; pero chánaca ínÿenga tmonsanába y nÿetsca chabe ústonënga tmonsanáshana. <sup>38</sup> Chíyeca atše cbëyana, quem boyabásenga matabáshejuana y ndocá mataborlánana. Ntsamo chënga montsamancá, nÿe entsangbe juabna y nÿe chëngbe trabajo tojtsemnëse, betscó echanjopochóca.  
<sup>39</sup> Pero chca Bëngbe Bëtsabe soye tomnëse, tšëngaftanga ndoñe quešmochatobenaye jáyënjanama. Cuedado šmochtsebomna, nderado mo Bëngbe Bëtsabe uayayënga šmuatjanenobiamaca” —cha tojanëyana.

Y as chënga Gamaliel tmojanoyeuná. <sup>40</sup> Chcasna, chë ichmónëngbiyoye tmojánachembo, tmojtsanachebuánganja y tmojanëyana Jesusbe uabáinaca entsángbeñe ndoñe chamondëtsoyebuambná ca; y chentšana tmojtanabáshejuana.  
<sup>41</sup> Chora chë ichmónënga chë amëndayëngbentsana puerte oyejuayënga tmojésanbocna, er Bëngbe Bëtsá tojanalesenciá jasúfriama, chënga Jesusbiamá oservënga bëtsemnayeca.  
<sup>42</sup> Chentšana, chënga cada te imojanabuatambá y Jesús, chë Uámana Uabuayaná, chë Cristo bëtsemnama entsángbiyoye imojanabuayiyiná, Bëngbe Bëtsabe bëtš yebnentše y yebnënguenáchnaca.

## 6

### *Chë ichmónëngbiamá ujabuáchanënga tmojanëbuáyana*

<sup>1</sup> Chë tempo, Jesucristbeñe ošbuáchiyënga betscó imojtsóbotena. Chora chë Jesucristbeñe ošbuachiyëngbentše, chë judiënga griego biyanga batšá imojtsetsátjaye y chë judiënga hebreo biyangbiamá mëntšá tmojánayana: “Chë griego biyangbe viudángbiyoye ndoñe cachcá quemnatëjabuáchna ntsamo chë hebreo biyangbe viudángbiyoye cada te montsëjabuachancá ca.”

<sup>2</sup> Asna, chë bnëtsana uta ichmónënga nÿetsca chë Jesucristbeñe ošbuáchiyënga tmojanëbuaja y tmojanëyana: “Ndoñe tšabá quenátsmëna, bënga jtsajbanana Bëngbe Bëtsabe palabra oyebuambnayana nÿe chë viudanga jtsanÿenama chë tojtsëjaboto soyënguiñe. <sup>3</sup> Chcasna, baconga y batanga, tšëngaftanguentsana canÿsëftanga mëbuáyana, tšabá mandbomnëngcá šmëbuátmënga, chamotsemna osertánënga y chë Uámana Espíritu chëngbe ainaniñe chaotsemánda, as chënga chë ujabótënga jtsëjabuáchanama trabajo fchanjábanÿiye. <sup>4</sup> Y bëngna šontsamna nÿets tempo Bëngbe Bëtsáftaca jtsencuëntayana y Bëngbe Bëtsabe palabra entsanga jtsabuayiyinayana ca” —chënga tmojánayana.

<sup>5</sup> Nyetscanga tojanogusetá ntšamo chë ichmónënga tmojanayancá; as, Esteban tmojanábuayana; canye boyabása puerte ošbuachiyá cha inamna y chë Uámana Espíritu chabe ainaniñe yojanmánda. Chentšana tmojanëbuáyana Felipe, Prócoro, Nicanor, Timón, Parmenas y Nicolás (cha inamna ndoñe judío entšá, Antioquía bëts pueblóca, y cha yojanamana Bëngbe Bëtsá jtsadoránana mo cach judiëngcá).  
<sup>6</sup> Chentšana chënga tmojanënatse Jesucristbe ichmónënga imojtsemnoye; chocna, chë Jesusbe ichmónënga Bëngbe Bëtsá tmojanimpadá chë ichmónëngbe trabajënguiñe chë ubuáyanënga chaújabuachama, chëngbe cucuatšënga chëngbe bestšašentše jajájuase.

<sup>7</sup> Más banga Bëngbe Bëtsabe palabra imojtsuenana, y chca, Jesucristbeñe ošbuáchiyënga más imojtsóbotena, y Jerusalenentše más ošbuáchiyënga betscó imojtsóbotena. Y ba judiëngbe bachnángnaca tmojanontsé Jesucristbeñe jtsošbuáchiyana, ntšamo chë ínÿenga imojtsanošbuachecá.

### *Esteban tmojánishache*

<sup>8</sup> Esteban, Bëngbe Bëtsabe obenana y chábentšana tšabe bendicionënga yojtsebomnëse, entšángbeñe bëts soyënga yojtsama. <sup>9</sup> Báseftanga “Ya Cachcá Atabashejuana Oservénënga ca” uabainëngna tmojanontsé Estébanoftaca enatsëtsnayana. Chënga imojamna judiënga Cirenoquënga, Alejandrioquënga, Cilicia y Asioquëgnaca, y chëngbe enefjuana luare yojanabaina “Ya Cachcá Atabashejuana Oservénëngbe Yebna ca”.  
<sup>10</sup> Pero chë Uámana Espíritu tojanma Esteban chaóyebuambama bëtscá osertanacá, y chíyeca chënga ndoñe imontsobena ntšamo cha jojuana. <sup>11</sup> As chënga báseftanga tmojanëbuénaye Estébanbe contra podesca soye chamuayanama, mëntsá: “Cha fsënjoyeuná Moisesbiamá y Bëngbe Bëtsabiamá ndoñe tšabá jtsóyebuambnayana, mo cuafjoyanguangcá ca.” <sup>12</sup> Chcase chënga tmojanma entšanga, bëtsëjemëngcá mándayënga y ley abuátambayënga Estébanbe contra chamóntša enbouenanana; y as, Esteban tmojanotbá y chë mándayënga imojtsemnoye imojuíchëmo. <sup>13</sup> Y tmojanënatse básefta entšanga, uayátsenaye soyënga y podesca soyënga Estébanbe contra chamuayanama; as chënga mëntsá tmojánayana: “Mua bacna soyënga entsichamo chë Bëngbe Bëtsá jtsadoránama bëts yebnama y Moisesbe leyëngama. <sup>14</sup> Y fsënjoyeuná cha jayanana, Jesús Nazaretocá Bëngbe Bëtsabe bëts yebna caochtsepochoáca y caochjama bënga nÿe chabe mandëngaca mandánënga chamotsiyenama y ndoñe ntšamo Moisés bëngbe bëts taitanga tojëftsanabuatambacá ca.”

<sup>15</sup> Chë mándayënga y nyetscanga chentše imojétsetbiamanënga Esteban tmojanonjinyé ora, tmojáninýe chabe jubíá yojtse-buashinýinýana mo canýe ángelbe jubiacá.

## 7

### *Ntšamo Esteban tojanenëuyaná*

<sup>1</sup> Chora chë bachnangbe más uámana amëndayá, Estébanbioye tbojantjá: —¿Ntšamo acbiamá montsichamcá ndegombre yojtsemna ca?

<sup>2</sup> As Esteban tojanëjua: —Taitanga y baconga, mouenënga. Bëngbe Bëtsá, chë corente uamaná endmëná, Abrahámioye tbojánëbëbocna, cha Mesopotamioca yojaniyena ora; tbojánëbëbocna, Harán bëts pueblocá joyéanama cabá nda ora, <sup>3</sup> y Bëngbe Bëtsá tbojaniyana: “Metseboshjona acbe fshantse y acbe pamíllanga y cbochanjinýinýiye luaroye cochjá ca.” <sup>4</sup> As Abraham chabe luare Caldea tojéftsanboshjona y tojána Haránoca joyéanama. Chabe taitá tojanóbanentšana, Bëngbe Bëtsá Abrahámioye chë luaroye tbojanánatse, chë mora tšëngaftanga šmontsiyenentše. <sup>5</sup> Pero quem luariñe ni mo base fshantse ndoñe tbonjëftsanatšetá, ni mo ndayentše jtsiyenama. Pero aíñe Abrahámioye tbojanšbuachená chë fshantse jatšetayama, chabiamá y chabe básengbiamá, Abraham tojóbanentšana. Chca tbojanšbuachená ora, Abraham ni canýe šešona bonjánbomna. <sup>6</sup> Y Bëngbe Bëtsá mëntsá tbojaniyana: “Chë ácbentšana entšanga, ínýengbe luaroca áshjajnënga mochántsemna, y choca oyenënga chëngbe oservénënga chëngbioye mochanjábiamá y canta patse uatëntscuana jabuache mochanjasufrina ca.” <sup>7</sup> Y mëntsánaca tbojaniyana: “Pero atše chanjácastigaye chca oservénënga chacmojábiamá luarentša entšanga; y as, chentšana chë ácbentšana entšanga mochanjésebocana y mora bontsemna luaroye mochanjésabo y muentše atše šmochántadorana ca.” <sup>8</sup> Bëngbe Bëtsá Abrahámioye tbojanšbuachená nýe cha y chabe básengbe Taitá cha jtsemnama y jamama tšabe bendicionënga chëngbeñe chaotsemnama, y chama, chaotsinýnamna tbojanmandá chabe šešona, boyabásetema tojonýná ora, base bobachtema chë más delicadentše jatëtšana. Chíyeca, chabe uaquiñá Isaac tojanonýná ora, posufta tianoye Abraham base bobachtema chë más delicadentše tbojantëtše. Isaac cachcá tojanma chabe uaquiñá Jacóboftaca y Jacob cachcá tojanma chë chabe bnëtsana uta uaquiñëngaftaca. Chënga monjamna chë Israeloca bnëtsana uta bëts pamíllangbe taitanga.

<sup>9</sup> “Quem uaquiñënga bëngbe bëts taitanga monjamna. Chëngna, chëngbe uabentsá Josébioye envidia innabomna

y tmojtsatanobuiye, Egiptoeye canýe oservenacá chamotsánatseñama. Pero Bëngbe Bëtsá Josébioye nyets tempo ibnauájabuachana, <sup>10</sup> chíyeca nyetsca chabe ngmenënguentšana tbojanatsbocá y Bëngbe Bëtsá tojanma cha chaotsetatšëmbuama tšabá jóyebuambayama chë Egiptoca réybentše, Faraón ca uabainá. Bëngbe Bëtsá tojanma chë Faraón chaoyeuá ntšamo José yojamnama; chíyeca Faraón Josébioye tbojánbema Egiptoca mandado y chabe yebnënguentše oyenëngbiámnaca.

<sup>11</sup> “Chë tempo, Egiptó y Canaán luariñe bëts shëntsana tojanóshjango y puerte ngménana yojtsemna y bëngbe bëts taitanga ndoñe imontsobena saná jónýenama. <sup>12</sup> Pero Jacob tojántatšëmbona Egiptoca saná yojtsemnama; asna, chabe uaquiñënga, chë bëngbe bëts taitanga choye tojanichamó. Chora yojamna chë natsanama chënga Egiptoeye jama. <sup>13</sup> Uta soyama chënga tmojtesaná ora, José chabe catšátanga tojanéyana: ‘Atše José sëndmëna, tšëngaftangbe uabentsá ca.’ Chca chë Faraón Josebe pamíllangbiana tojántatšëmbona. <sup>14</sup> Chentšana, José tojanmandá chabe taitá Jacob y nyetsca pamíllanga Egiptoeye chamotsama. Canýsëfta bnëtsana shachnënga imojamna chë Egiptoeye tmojánanga. <sup>15</sup> Chcasna, Jacob Egiptoeye tojána choca joyénanama. Choca cha tojanóbana y chë inýe bëngbe bëts taitángnaca. <sup>16</sup> Jacob y chabe básënga, ntšamo imojtsobancá, chëngbe cuerpo Siquem bëts puebloeye imojtsatambaye y tmojanëtebuantsá, Abraham tojëftsanbuamé cuevëshënguiñe. Abraham canýe crocenánama Hamorbe uaquiñëngbioye, chëshënga yojtëyentšbuamiñe Siquem puebloca.

<sup>17</sup> “Ntšamo Bëngbe Bëtsá Abrahámioye tbojanšbuachenacá jamama yojtsobeco ora, Egiptoca corente tmojanoboté Israeloca entšanga y banga chënga imojtsemna. <sup>18</sup> Cabana, Egiptoca inýe rey tojanoyayé y cha Josébioye ndoñe tbonjanabuátmana. <sup>19</sup> Chë reyna, bëngbe entšanga, chë bëngbe bëts taitángbioye tojanaingñé y tojanma chënga puerte chamosufrima; tojanamëndá, chë tmojtsónýna šešonatémënga cachcá jtsënyayana chamotsóbanama. <sup>20</sup> Chë tempo canýe básëtema tojanonýná y cha Moisés ca tmojanabaye. Bëngbe Bëtsá Moisesbiana oyejuayá yojtsemna y chabe bëtsëtsata cach yebnentše tmojanboché unga ishinýëntscuana. <sup>21</sup> Cachcá jonýayama yojtsamna orna, Faraonbe bembe tbojanocñe y mo cachabe uaquiñá cuenta tbojanboché. <sup>22</sup> Chca, chë Egiptoquënga imnatátšëmbo soyënga Moisés tmojanbuatëmbá y canýe uámana entšá tojánbocna jóyebuambayama y ndayánaca jamama.

<sup>23</sup> “Canta bnëtsana uata tojánashjache ora, tojanenojuabó

jama jtsetatšëmbuama ntšamo chë Israeloquënga, chabe entšanga imojtsemnama. <sup>24</sup> Canÿe, Moisés tojáninÿe canÿe Egiptocá canÿe Israelocábioye ibojtsejantšetaye ora; as Moisés tbojanoboguiyaná y chë Egiptocábioye tbojtsanóba. <sup>25</sup> Moisés yojtsanjuabnaye chë Israeloquënga yojtsósertana, Bëngbe Bëtsá yochjanma cach Moisesbe obenánaca chë Egiptoca mandentšana chëngbioye játsebacama ca. Pero chë Israeloquënga ndoñe yontšesertana. <sup>26</sup> Yëfsana, Moisés tojánanÿena útata, cach Israelocata, ibojtsentsjanaye; chora cha betesco tojána jetsëuyanama y tojanëyana: ‘Tsëndata catšata šondmëna, ¿ndáyeca šojtsentsjanata ca?’ <sup>27</sup> As, chë inÿabioye ibojtsetsjanayá Moisésbioye tbojtsanajuatsëntse y tbojaniyana: ‘¿Nda bëngbeñe tcmënjajayé mandado y chë tšabá o ndoñe tšabá ftsamama chacuayanama ca?’ <sup>28</sup> ¿Cojtseboše átšnaca jóbama, ntšamo tonjopasá yëfse chë Egiptocábioye tconjobacá ca?’ <sup>29</sup> Moisés chca tojanuena ora, Madián luaroye tojtsanachá y choca yojoyena inÿe luarocana ashjanganocá. Chentše uta uaquiñata yojéftsabamna.

<sup>30</sup> “Chentšana canta bnëtsana uatëse, entšanga ndoyena luariñe, Sinaí tjañe béconana, canÿe ángel tbojánëbëbocna zarzësha yojtsángbototjuanentše. <sup>31</sup> Moisés yojenjnaná ndayá yojtsonÿama y tšabá jinÿama tojanobeconá ora, tojanuena Bëngbe Bëtsá mëntšá ibojtsatsëtsnaye: <sup>32</sup> ‘Atše acbe bëts tai-tangbe Bëtsá sëndmëna, Abraham, Isaac y Jacobëbe Bëtsá ca.’ Moisés chama tojanëuatjaná, ibojtsengmëmñnaye y añemo ndoñe yontsebmna choye jontješiyama. <sup>33</sup> As Bëngbe Utabná tbojaniyana: ‘Motsenóshecbotsca, er aca contsemnentše nÿe atšbiamu luare endmëna, er átšnaca chentše sëntsemna. <sup>34</sup> Ndegombre sënjinÿe ntšamo atšbe entšanga Egiptoca montsesufrina y sënjouena chëngbe oyabojuyana, y atše sënjabo chënga jabátsebacama. Chcasna, mabouena, Egiptoeye cbochanjíchmuca ca’ –Bëngbe Bëtsá tbojaniyana.”

<sup>35</sup> Chentšana Esteban tojanëyana: “Quem Moisés entšanga tmojtsanaboté y tmojaniyana: ‘¿Nda bëngbeñe tcmënjajayé mandado y chë tšabá o ndoñe tšabá ftsamama chacuayanama ca?’ Masque chca, Bëngbe Bëtsá mo mandayacá y atsebacayacá tbojesanichmó, chë zarzëshentše tojanobinÿná ángeloftaca. <sup>36</sup> As Moisés, bëngbe bëts taitanga Egiptocana tojésanëbuacna y bëts soyënga tojanma, y inÿe soyënga Bëngbe Bëtsabe obenana jinÿanÿiyama Egiptentše, chë Buángana ca uabaina mar béjayentše y entšanga ndoyena luarentše, canta bnëtsana uatëntscuana. <sup>37</sup> Cach Moisés Israeloca entšanga mëntšá tojanëyana: ‘Bëngbe Bëtsá tšëngaftanguentšana canÿa bochanjábema atšcá Bëngbe Bëtsabe juabna oyebuambnyá ca.’ <sup>38</sup> Moisés Israeloca entšangaftaca

yojéftsemna chë entsanga ndoyena luaroca. Choca chë entsanga tmojánenefjna Sinaí tjañe béconana. Chentšna canýe ángel Moisésoftaca tojanoyebuambá, bēngbe bēts taitángbioye chë buayenana soye Moisés chaóyebuambama, chë entsanga tšabe vida jónýenama palabrénga; y Moisés chca tojanma, bēngnaca chë palabrénga jouenama jobenayama.

<sup>39</sup> “Pero bēngbe bēts taitanga ndoñe tmonjánbošena joyeunayama, masna nýe tmojtsanaboté y Egiptoye jeshšéconama imojtsaiseboše. <sup>40</sup> Moisés cabá chë

tja tsjuanoca chë ángeloftaca yojtsemna ora, chēngbe bachnangbe más uámana amēndayá Aarónbioye mēntšá tmojaniyana: ‘Bēngbe Bētsabe cuenta šmayentšpormá canýe buashinýinýana soye jadórama, bēnga chašúnatsama. Er bēnga quemátstatšēmbu ndayá yojtsopasana Moisés, chë Egiptocana šonjéftsēbuacnáftaca ca.’ <sup>41</sup> As tmojanma canýe buashinýinýana soye mo canýe uacnabecá y cha jadórama ba bayēnga tmojanēbaye, y tmojanóboyejuanga cachēnga chë soye tmojanpormáyeca. <sup>42</sup> Chë causa,

Bēngbe Bētsá chēngbentšana tojtsanojuánañe y cachcá tojesanēnyāye chēngbe bacna soyēnga causa, estrellatēmēnga chamotsadoránama. Chca jochnēnguama, Bēngbe Bētsabe juabna oyebuambayēngbe librēšañe mēntšá endayana, ntšamo Bēngbe Bētsá tojanayancá:

Israeloca entsanga,

¿Atše jētschuayama bayēnga chešmēnjanēbaye y chë soyēnga chešmēnjanátšēmbona,

chë canta bnétsana uata entsanga ndoyena luarentše tšēngaftanga šmonjéftsemna ora?

<sup>43</sup> Atše jadóra cuentna, chë Molocbiana jebna soye šmonjanacutsá y cha šmonjánadorana,

y chë Refánbe estréllacnaca cachcá šmonjánama.

Chë soyēnga mo Bēngbe Bētsá cuenta šmonjánbomna y cach tšēngaftanga šmonjanobopormá jadórama.

Mora chë causa atše chanjama, Babilonientšana más chcoye tšēngaftanga chacmotsēnatsama ca” —chiñe endayana.

<sup>44</sup> “Bēngbe tempsca bēts taitanga entsanga ndoyena luaroca, chë jatsjacama opodena yebna innabomna; chë yebnentše Bēngbe Bētsá chēngaftaca tojanoyebuambá. Inajebna ntšamo Bēngbe Bētsá Moisésbioye tbojanmandacá, y cha tojanma ntšamo chaojebuama Bēngbe Bētsá tbojaninýinýecá. <sup>45</sup> Bēngbe bēts taitangna chēngbe taitángbentšana chë jatsjacama opodena yebna chēngbiana tmojanóyēngacñe, y chēnga chë Canaán luaroye Josuéftaca, chë inýe luaroquēngaftaca jéntsjava tmojána ora, chë jebna soye tmojanamba y chocna, Bēngbe Bētsábeyeca chentša

entsángbioye Israeloquéngbentsána tmojtanébuacna; y chë jebna soyna chë tmojanayëñaná luarentše tojanoquedá, rey David yojëftsiyenëntscuana. <sup>46</sup> David tšabá mandbomná inamna, chíyeca Bëngbe Bëtsá cháftaca puerte yotsóyejuaye. David chábioye lesencia tbojanotjañe jajebuama, Bëngbe Bëtsá chë Jacob tbojanadorá cha, chentše chaotsiyenama. <sup>47</sup> Pero Salomón inamna nda chë Bëngbe Bëtsabe bëts yebna tojanjebuá. <sup>48</sup> Masque chë celoca Bëngbe Bëtsá, entsangbe jebna yebniñe ndoñe quenatiyena. Ntšamo Bëngbe Bëtsabe juabna oyebuambnayá tojanabemcá, ndayá Bëngbe Bëtsá tojanayancá:

<sup>49</sup> ‘Celoca endmëna chë luare ndayentsána atše tsmánda, y quem luare endmëna nÿe mo canÿe tšenëtemcá ndayentše atšbe shecuatšënga chjacjaye.

As, ¿ntšamo atšbiana jebna yebna šmochjajebo ca?’ —chë Utabná jayanana—;

‘o ¿ndaye yebnentše atše jóchnama chjobenaye,

<sup>50</sup> ndegombre cach atše nÿetsca chë soyënga tijamëse ca?’ ”

<sup>51</sup> Esteban mëntsánaca tojanéyana: “Tšëngaftanga nÿets tempo josértama ndëbošënga šmondmëna; šmondbomna ainana mo chë Bëngbe Bëtsabeñe ndošbuáchiyëngbe ainancá, y Bëngbe Bëtsabe soyëngama nduauenanënga šmondmëna. Tšëngaftanga ndocna te quešmátsboše chë Uámana Espíritu joyeunayana. Ntšamo tšëngaftangbe bëts taitanga monjanियencá, tšëngaftágnaca cachcá. <sup>52</sup> ¿Bëngbe Bëtsabe juabna oyebuambnayënguentsána, ndábioye tšëngaftangbe bëts taitanga ndoñe monjanacmena? Chë Bëngbe Bëtsá tojanichamó entsanga chënga tmojtšanëbaye, y mëngna entsángbioye imojanabuayiyná Cristo, chë ntšamo Bëngbe Bëtsá yobošcá amá yochjánabama. Pero morna, uayayëngbe cucuatšiñe cha šmojáboshjona y šmojóba. <sup>53</sup> Bëngbe Bëtsabe mandënga angelëngaftaca tšëngaftanga šmonjanóyëngacñe, pero chë soyënga ndoñe quešmátsyeunana ca” —cha tojanéyana.

### *Esteban ndëtsbéngaca tmojanóba*

<sup>54</sup> Chentša mándayënga chca tmojanuena ora, Estébanoftaca tmojanotjayaná y tmojanenaftëšbonzentsé, rábiaca imojtsemnama. <sup>55</sup> Pero chë Uámana Espíritu Estébanbe ainaniñe corente yojtsemándaye. Celoye yojontješiye y Bëngbe Bëtsabe buash-inÿinÿanana yojinÿe, y Jesús, Bëngbe Bëtsabe catšbioica yojtsatsana. <sup>56</sup> As, Esteban tojánayana: “¡Mouenënga, sëntsonÿá celoca entsatëfjna y Bëngbe Bëtsá Entšá tbojanbemá Bëngbe Bëtsabe catšbioica entsemna jtsamëndayama ca!”

<sup>57</sup> Chora chënga jabuache imojtseyoye, imojtsenamatsachto ndoñe más ntsuenanama y Estébanbioye



tmojanontsënja. <sup>58</sup> Chentšana, chënga chë pueblentshana tmojtsanábocna y ndëtsbéngaca tmojtsanatëchënganja. Chë Estébanbioye mal tmojanquedangna entsayangá tmojtsanenátsejca y canye bobontse, Saulo ca uabainá, tmojesanábonyiñe chaotsinýenama.

<sup>59</sup> Ndëtsbéngaca imojtsénanantscuana, Esteban Bëngbe Bëtsáftaca ibojtsencuéntaye y mëntsá tojánayana: “Bëngbe Utabná Jesús, atšbe espíritu šmóyëngaca ca.”

<sup>60</sup> Chentšana Esteban tojanoshamentšé y jabuache tojánayana: “¡Bëngbe Utabná, chëngbe bacna soye motsaperdoná ca!” Y chca tojánayana ora, tojanóbana.

## 8

<sup>1</sup> Saulo chentše yojtsemna y tšabá imojtsama ca yojtsejuabnaye, Esteban tmojanóbama.

*Saulo yojánama chë Crístbeñe ošbuáchiyënga chamot-sesufrínama*

Cach te, ínýenga tmojanontšé Jesucristbeñe ošbuáchiyënga Jerusalemntše ucamenana y jtsamana puerte chamot-sesufrínama; chcasna, chënga tmojtsanacheta y Samarioye y Judeoye tmojanáshana. Nýe chë Jesucristbe ichmónënga ndócnoye tmonjánacheta. <sup>2</sup> Básefta boyabásenga, Bëngbe Bëtsá adórayëngna, Esteban tmojanamba jauátbontsama y chabiamana puerte tmojánenobošachna. <sup>3</sup> Chëntscuana, Saulo yojtsentšena Jesucristbeñe ošbuáchiyënga jtsapochócama y yebnënguenache yojánamashjuana boyabásenga y shembásenga sjojónana ubuacana jutámiamana.

*Felipe Samaria luaroca tšabe noticiëngama yojanabuayiyná*

<sup>4</sup> Y Jesucristbeñe ošbuáchiyënga tmojanáshanëngna nýetsquénache imojánabuayiynaye Jesusbe tšabe noticiënga. <sup>5</sup> Chca, Felipe Samarioye tojána y tojanontšé chë Bëngbe Bëtsabe Uámana Uabuayaná, Cristbiamana, chentša entsangana jábuayenama. <sup>6</sup> Entšangana imojánenefjuana Felipe joyeunayama y tmojáninýe bëts soyënga cha jtsamana, Bëngbe Bëtsabe obenana jinýanýiyama. Chënga nýetscangana ntšamo Felipe yojtsichamcá tšabá imojtseyeunana. <sup>7</sup> Banga bayëjbe juabna uambayënga tšabá imojtsatsmëna y chë bacna bayëjënga jabuache jtsaiyoyëse chëngbentshana imojtsaisebocana; y banga jama ndobenënga y coshetënga tšabá imojtsatsmëna. <sup>8</sup> Chë soyama chë pueblentsha oyenënga corente imojtsóyejuaye.

<sup>9</sup> Pero canye pueblentše Samarioca inamna canye boyabása, Simón ca uabainá; cha tempo inamna canye bocjuaná y chë Samarioca entsangana chabe soyëngama imojánenjanayana.

Cha yojánichamo cha canye uámana entśá canjamna ca.<sup>10</sup> Y chábioye corente inmayerunana nyetscanga, uámanënga y nduámanëngnaca. Entśanga imojánichamo: “Mua entsemna chë Bëngbe Bëtsabe bëts obenana inyanynayá ca.”

<sup>11</sup> Y ndegombre chënga corente inmayerunana, er cha chë bocjuanana soyëngaca bayté chë entśanga ingñénënga y ojnánánënga yojsabamna. <sup>12</sup> Pero chë luarentśa entśangna, Felipe tmojanoyeuná chë cha yojsëtsëtsná tśabe noticiënga Bëngbe Bëtsabe amëndayama y chë Jesucristbiana tśabe soyënga. Chorna chënga Jesucristbeñe imojtsoşbuáchiye, y boyabásenga y shembásenga tmojánenabaye. <sup>13</sup> Y cach Simónënaca Jesucristbeñe yojtsoşbuáchiye y tojanenábaye, y chentśana cada te Felípeftaca cha yojsanmëna. Cha tojáninye Felipe chë bëts soyënga Bëngbe Bëtsabe obenánaca jamana, y chama ojnananá yojtsemna.

<sup>14</sup> Chë Jerusalemoca imojtsemna ichmónënga tmojántatşëmbona Samarioca entśanga Bëngbe Bëtsabe palabra tmojanóyeunama; as, chora Pedro y Juan choye tmojanichamó. <sup>15</sup> Pedro y Juan Samarioye tbojánashjango ora, chentşe Jesucristbeñe oşbuáchiyëngbiana Bëngbe Bëtsá tmojanimpadá, as chë Uámana Espiritu chëngbeñe cháumashënguama jtsemándayama. <sup>16</sup> Er cabá ni mo cányabeñe chë Uámana Espiritu tonjánamashëngo; chënga tmojánenabaye Bëngbe Utabná Jesús jótşëmbonëse, chábeñe oşbuáchiyënga jtsemnama imojtsebóşeyeca. <sup>17</sup> As Pedro y Juan chëngbe bestşaşiñe cucuatşënga tbojancjá, y chca, chë Uámana Espiritu tojánamashëngo chëngbe ainaniñe jtsemándayama.

<sup>18</sup> Simón tojáninye, chë ichmónënga entśángbeñe cucuatşënga tmojancjá ora, chë Uámana Espiritu chëngbeñe jamashënguana. As chora Simón chë ichmónënga tojanëyana: —Quem crocénana mosháchiñe, <sup>19</sup> y átşnaca chë obenana şmatşetá, y ndábeñnaca cucuatşënga chaijajajó ora, chábeñnaca chë Uámana Espiritu cháumashëngo ca.

<sup>20</sup> As Pedro tbojanianya: —¡Acbe crocénana infiernoye chaotsá y ácnaca, chë Bëngbe Bëtsabe tşetana soye crocénánaca jobuámiñama yopodena ca tcojajuabó causa! <sup>21</sup> Ndegombre, aca bëngaftaca ndoñe quecátsmëna, ni bëngbe trabajo acbiana quenátsmëna, Bëngbe Bëtsabe delante acbe ainaniñe tśabe juabnënga ndoñe quecátşbomna causa. <sup>22</sup> Ngmënac cochjenójuaboye quem bacna soye tcojamama y chca amana cochtsajbaná y Bëngbe Bëtsá cochjaimpáda, aca chca tcojajuaboma nderádose cmatjaperdóna. <sup>23</sup> Atşe sëntsetatşëmbo, acbe ainaniñe tśa bacna juabnënga inyëngbiana yojtsemnama; y bacna soyënga amana

jtsajbanama ndoñe quecátobena causa, aca mo canye ntsacjuanacá contsemna ca —Pedro tbojaniana.

<sup>24</sup> As chora Simón tojanëyana: —Bëngbe Utabná atšbiamasochjaimpáda, ntšamo šmonjauyancá ndoñe chandëpasama ca.

<sup>25</sup> Pedro y Juan, ntšamo Bëngbe Utabná Jesucristbiamatbojaninýcá y ibnatatšëmbcá entšanga imojsëtsësnaye. Chentsana, Jerusalemoye tbojésanata y tbojánachnëngo ba Samarioca pueblënguëjana, tšabe noticiënga entšanga abuaiynaye.

*Felipe y chë Etiopía luaroca reinabe uajabuachaná*

<sup>26</sup> Chentsana, Bëngbe Utabnabe canye ángel Felípbioyebtojaniana: “Moprontá y tsmana luarëngoye motsa, Jerusalementsana Gaza ca uabaina bëts puebloyebenachëjana ca.” Chë benachna entšanga ndoyena luarëjana yojanachnëngona. <sup>27</sup> As Felipe yojëftsëtsbaná y tojána. Benachiñe tbojáneninýena canya Etiopía luarocáftaca. Etiopía luaroca canye reiná inamna y chë boyabásana chabe uajabuachaná y chabe crocénana bojanýá inamna. Chana Jerusalemoye tojánabo Bëngbe Bëtsá jadórama. <sup>28</sup> Chora Etiopía luaroye yojtsataye, chabe cochëshañe inayésenotbemañe, y chë Bëngbe Bëtsabe juabna oyebuambnayá Isaíasbe uabemana librëša yojtsaiualíaye.

<sup>29</sup> Chora chë Uámana Espíritu Felípbioyebtojaniana: “Mobeconá y chë cochësha juachaca cochtsaye ca.” <sup>30</sup> As Felipe betscó yojobeconá. Chora yojouena chë Etiopía luarocá, Isaíasbe uabemana librëša yojtsaiualíaye; as tbojantjá: —¿Chë contsalía soye quecmojtsosertana ca?

<sup>31</sup> Y chë Etiopía luarocá tbojanjuá: —¿Ntšamo šochjosërta, ndocná šonjabuayenase ca?

Y Felípbioyebtojaniana: —Diosmanda, atšbe cochëshoye másëngo y atšbe juachaca mabótbema ca.

<sup>32</sup> Isaíasbe uabemana librëshañe mëntšá yojtsalíaye: Cha tmojanánatse mo canye oveshá jóbama cuafjuanatscá; y chë mo canye oveshá tmojsëtsbotjná ora, cha iyëca jtsemnana, chánaca cachcá, chacá tondaye chenátanayana.

<sup>33</sup> Entšanga tmonjanma cha puerte chaosufrima, mo cha canye nduamaná cuaftsemncá y ntšamo ndoñe betsomerecencá cháftaca tmonjanma.

Ndocná nanjobenaye chabe básengbiamajacuéntana, quem luarentša chabe vida tmontsanbojuaná causa ca.

<sup>34</sup> Chora chë Etiopía luaroca uajabuachaná Felípbioyebtojaniana: —Diosmanda, šmobuayená, ¿ndabiamas Bëngbe

Bëtsabe juabna oyebuambnayá chca yojtsichamo, cachabiama o ínÿabiama ca?

<sup>35</sup> As Felipe tojanontsé, chë Isaíasbe librëshañe yojtsayana sóyeca, Jesusbe tšabe noticiënga jábuayenama.

<sup>36</sup> Chentša bënëse, canÿe béjaye obëjniñe juachañe ibojtsachnëjuana. Chora chë uajabuachaná tojánayana: —Muentše béjaye entsemna. ¿Ndáyeca ndoñe nanjopódia atše muentše uabainá jtsemnama ca? Diosmanda, šmabaye ca.

<sup>37</sup> As Felipe tbojanियana: —Jesucristbeñe nÿets acbe ainánaca tcojtsošbuáchese, aíñe echanjopódia juabáyama ca.

Y chë boyabása tbojanjuá: —Aíñe, sëntsošbuaché Jesucristo Bëngbe Bëtsabe Uaquiñá yomnama ca.

<sup>38</sup> As chë Etiopiocá tojanmandá chë cochësha chauátotonama. Chentšana, nÿets útata chë béjayoye tbojanashëbëbuástjango y Felipe, chë Etiopioca uajabuachanábioye tbojanabaye.

<sup>39</sup> Chë béjayentšana tbojtanbocna ora, chë Uámana Espiritu Felipe ibojtsánatseñe y chë uajabuachaná ya ndoñe más Felípbioye ibontsonÿaye, pero corente oyejuayá yojtsatoñe.

<sup>40</sup> Felipe tojántatšëmbona Azoto bëts puebloca yojtsemnama, y chentšana tojána nÿetsca publënguenache chë tšabe noticiënga abuayiynaye, Cesarea puebloye jashjanguëntscuana.

## 9

*Ntšamo Saulo Crístbeñe ošbuachiyá tojanóbema  
(Hch 22.6-16; 26.12-18)*

<sup>1</sup> Saulo chëntscuana cabá Bëngbe Utabnábeñe ošbuachiyënga yojanautatjñá jtsëbáyama. Chama cha tojána chë bachnangbe más uámana amëndayábioye, <sup>2</sup> uabemana tsbuanachangá jauátjañama, as chëchangaca jobenayama chë Damascoca judiëngbe enefjuana yebnëngoye jama, y chocna, chë Jesucristo tojaninÿanÿé Benache ustoniñe, boyabásenga o shembásenga tojánÿenëse, jótabayama y Jerusalenoye júnatsama. Y chca jamama tojánbocna. <sup>3</sup> Pero ya Damasco béconana yojtsaye orna, nÿe ndeolpe chabe juachañe celocana canÿe bëts tcuinÿe tojanbuashinÿinÿena. <sup>4</sup> Chora Saulo fshantsoye tojánshajaye y canÿe oyebuambnayana tojanuena, mëntšá: —Saulo, Saulo, ¿ndáyeca chca šcojtsacmena ca?

<sup>5</sup> As Saulo tbojantjá: —¿Nda comna, Bëngbe Utabná ca?

Y chë oyebuambnayana tbojanjuá: —Atše sëndmëna Jesús y aca condama atšbe entšanga chamotsesufrínama.

<sup>6</sup> Pero matëtsbaná y Damascoye mamáshëngo; chentše canÿa cmochanjabuayená ndayá jamama cmojtsemnama ca.

<sup>7</sup> Chë Sáuloftaca imojánajna boyabásenga tša auatjanánënga imojtsemna y chíyeca ndoñe imontsobena jóyebuambayana;

er nÿe chë oyebuambnayana tmojanuena, pero ndocná tmonjáninÿe. <sup>8</sup> As Saulo fshantsentsana tojtantsbaná y tojtanobuchatefjona ora, tondaye yontsobena jinÿana. Chcasna, chë ínÿenga tmojëftsanobuacuetëntsé y chca, Damascoye tmojanánatse. <sup>9</sup> Chentse yojëftsemna unga te, jinÿama ntsobencá, ni ntjascá y tondaye ntjofšiyá.

<sup>10</sup> Damascoca Jesucristbeñe canÿe ošbuachiyá inoyena, Ananías ca uabainá. Cha Bëngbe Utabnábioye mo otjenayoquécá tbojáninÿe y Bëngbe Bëtsá tbojanियana: —Ananías ca.

As cha tbojanjuá: —Bëngbe Utabná, ¿ndayá chjama ca?

<sup>11</sup> Y Bëngbe Utabná tbojanियana: —Moprontá y motsa chë “Ndericho tsáshenañe ca” uabáinoye, y Júdasbe yebnentse cochjanotícia canÿe boyabásabiama, Saulo ca uabainábiamá, Tarso pueblócá; cha mora Bëngbe Bëtsáftaca bentsencuénta.

<sup>12</sup> Saulo ya tonjinÿe mo otjenayoquécá, canÿe entšá Ananías ca uabainá entsamashjuana y chabe cucuatšënga chabe bestšašínë entsejájuá, chca, cha chabuatabínÿnama ca.

<sup>13</sup> Ananías chca tojanuena ora, tojánayana: —Bëngbe Utabná, banga ba soyënga chabiamá šmonjacuentá; Jerusalenoca tša bacá acbe entšanga imomnënga tojáborye. <sup>14</sup> Y mora entsebomna mando chë bachnangbe amëndayëngbentsana, muentse aca otšëmbuanënga jótabayama ca.

<sup>15</sup> As Bëngbe Utabná tbojanियana: —Motsa, er atše cha sënjuábuayana atšbiama chaotrabajama; chaóyebuambama ndoñe judiëngbeñe, reyëngbeñe y Israeloca entšángbeñnaca, y chca, chënga atšbiama chamotatšëmbonama. <sup>16</sup> Atše cha chanjinÿinÿiye ntsachetšá ibojtsemna átšbeyeca jasúfriama ca.

<sup>17</sup> As Ananías tojána Saulo yojtsanmëna yebnoye. Tojánamashëngo ora, Saulëbe bestšašínë chabe cucuatšënga tojanjajó y tbojanियana: “Jesucristbeyeca atšbe catšata, Saulo, Bëngbe Utabná Jesús, chë benachëjana conjanabó ora cmonjanebëbocná, šonjichmó aca chacmatabínÿnama y chë Uámana Espiritu acbe ainaniñe jtsemándayama cháumashënguama ca.”

<sup>18</sup> Cachora, Sálulëbe bominÿentsana mo beonbe bobachëshëngcá tojantquëcjana, y chca, ibojtsatabinÿna; chora tojantsbaná y tojanenábaye. <sup>19</sup> Chentsana, Saulo tojanse y añemo yojtsatsbomna y baseftayté chë Jesucristbeñe ošbuáchiyëngaftaca tbojántotona, Damascoca.

### *Damasco puebloca Saulo entšanga yojanabuayiná*

<sup>20</sup> Saulo cachorscana tojanontsé jábuayenama judiëngbe enefjuana yebnënguenache, Jesús Bëngbe Bëtsabe Uaquiñá bëtsemnama. <sup>21</sup> Chë imojtsuenanënga nÿetscanga imojtsenjanayé y mëntšá imojtsichamo: “Mua entsemna

chë Jerusalenoca Jesúsbioye otšëmbuanënga endanëbanayá, y mora camuá Damascoye tojabo, Jesucristbeñe ošbuáchiyënga jabótabayama y chë bachnangbe amëndayëngbe cucuatšíñe jabáshejuanama.”

<sup>22</sup> Pero Saulo cada ora más añémoca yojtsóyebuambnaye y puerte tšabá yojaninÿanÿná Jesús Bëngbe Bëtsabe Uámana Uabuayaná bëtsemnama. Chíyeca chë Damascoca judiënga ndoñe imontsobena ntšamo cha jojuana.

### *Ntšamo Saulo judiëngbentsana tojtsanachá*

<sup>23</sup> Bayté tojanochnëngo ora, judiënga tmojanenoyeuná ntšamo jamëse Saulo jóbama, <sup>24</sup> pero Saulo chë soye tojántatšëmbona. Bnëté y ibeta, chë bëts pueblentša bëšašanguenache chënga chabiana imojananÿá, jtsóbama; <sup>25</sup> pero chë Jesucristbeñe ošbuáchiyënga, ibeta, cha canÿe bëts sbarëcuiñe tmojtsanatsuamá, y chë pueblentša shëconana tapišëšjana tmojtsanëštjango. Chca cha tojanotsbocá.

### *Saulo Jerusalenoca*

<sup>26</sup> Saulo Jerusalenoye tojánashjango ora, yojtseboše chë Jesucristbe ichmónëngaftaca jenútanama, pero nÿetscanga imojtsebiauatja y ndoñe imontsošbuaché Saulo Jesucristbe ustoná yojtsemnama. <sup>27</sup> Chcasna, Bernabé Sálëbioye tbojëftsanbetše y chë Jesucristbe ichmónëngbioye tbojanánatse, y tojanacuntá Saulo benachiñe Bëngbe Utabnábioye tbojáninÿama, ntšamo Bëngbe Utabná tbojaniyanama y ntšamo cha Damascoca tša añémoca Jesusbiana entšanga tojánabuayenama. <sup>28</sup> As Saulo Jerusalenentše tojanototoná y chë Jesucristbe ichmónëngaftaca yojánana. Bëngbe Utabnabiana bëts añémoca entšanga yojanabuayiyná y <sup>29</sup> yojanoyebuambná y imojanenatsëtsná chë griego biyá judiëngaftaca; pero chëngna imojtsenëyeunana Saulo jtsóbama. <sup>30</sup> Jesucristbeñe ošbuáchiyënga chca tmojántatšëmbona ora, Saulo Cesarea luaroye tmojanánatse, y chentšana Tarso puebloye tmojanichmó.

<sup>31</sup> Y chca, Jesucristbeñe ošbuáchiyënga Judeoca, Galilea y Samaria luarentše chora ya ndoñe más montsansufrina y natjëmbana imojtsemna, y nÿetscanga más ošbuáchiyana imojtsebmna. Ntšamo Bëngbe Bëtsá yojanbošcá, imojtsaniyena cha jtsatschuanayëse; y chë Uámana Espíritbe uajabuáchenanaca, Jesucristbeñe ošbuáchiyënga más tmojanoboté.

### *Pedro Enéasbioye tbojanshná*

<sup>32</sup> Pedro yojánabuache nÿetsca chë Jesucristbeñe ošbuáchiyëngbenache. Y chca, Lida puebloca Bëngbe Bëtsabe

entšanga jabuachámnaca tojána. <sup>33</sup> Lida pueblentše canya tbojáninýena, Eneas ca uabainá. Cha jama ndobená inamna y posufta uata jutsněshañe chca inajájona. <sup>34</sup> Pedro tbojaniana: “Eneas, Jesucristo tcmonejashná. Matětsbaná y acbe tjuashe motsejacadá ca.” Y cachora chě jama ndobená tojtantsbaná.

<sup>35</sup> Nýetscanga chě Lida pueblentše y Saronoca oyeněnga chě entšá shnaná tmojáninýe. Y as, chěnga bacna soyěnga amana tmojtsanajbaná y cach orscana tmojanontšě Běngbe Utabnábeñe ošbuáchiyana.

*Pedro tojanma Dorcas cháuatayenama*

<sup>36</sup> Chě tempo, Jope pueblaca yojaniyena canye shembása Jesucristbeñe ošbuachiyá, Tabita ca uabainá, o griego biyañna Dorcas ca. Cha nýets tempo tšabe soyěnga yojánama y yojanama chě tojtsėjabotěnga jujabuáchana. <sup>37</sup> Pero chora, šocana tbojanshache y tojtsanóbana. Tmojtsanbebé chentšana, canye tsoye tsbanana tsañoca chabe cuerpo tmojtanaajajó. <sup>38</sup> Jope inamna Lida béconana, y Lidentše Pedro yojtsemna; y chě Jope pueblentše Jesucristbeñe ošbuáchiyěnga tmojántatsěmbona Pedro choca yojtsemnama. Asna, uta boyabásata tmojanichamó Pedro jauyanama: “Diosmanda, betscó Jope pueblóye mabo ca.”

<sup>39</sup> As Pedro tojěftsantsbaná y chě uta boyabásaftaca tojána. Choye tmojánashajna ora, tmojanánatse chě Dórcasbe cuerpo yojtsemnoye, tsbanánoca; chorna, nýetsca viudanga šachénaca Pédrěbioye tmojanóbobuashcona y imojtsinýinýnaye chě Dorcas yojuajonaná entšayangá y cmešějuangá, cabá chěngaftaca yojěftsemna ora. <sup>40</sup> Pedro tojanmandá nýetscanga chentšana chamotsebocanama; chora Pedro yojoshěntsamentšiye y Běngbe Bětsáftaca ibojencuentá. Chentšana, Pedro chě obanábioye tbojanonýinýe y tbojaniana: “Tabita, matětsbaná ca.”

As Dorcas tojtanobuchatefjona y Pédrěbioye tbojáninýe ora, tojanótbema. <sup>41</sup> Chora Pedro tbojanábuacueshache y tojtanatsbaná. As Pedro tojánachembo nýetsca chě Jesucristbeñe ošbuáchiyěnga, chě viudanga y chě ínýenga, y Dorcas ainá tojtaninýanyé. <sup>42</sup> Chě soye nýets Jope pueblentše tojanótatsěmbona y banga Běngbe Utabnábeñe imojtsošbuáchiye. <sup>43</sup> Y Pedro bayté Jope pueblentše tojanoquedá, Simón chě bobáchěshiñe trabajayabe yebnentše.

## 10

*Pedro y Cornelio*

<sup>1</sup> Cesarea pueblentše inamna canye boyabása Cornelio ca uabainá; cha inamna chě Italiano ca uabaina soldaděngbe

amëndayá. <sup>2</sup> Cornelio Bëngbe Bëtsábioye ibnarrespectana y nyetsca chabe yebnentša oyenëngaftaca Bëngbe Bëtsá puerte imojánadorana. Becá crocénana inaquëcjnaye chë judiënga ndbomnjëmënga jujabuáchama y sempre Bëngbe Bëtsáftaca ibnécuentaye.

<sup>3</sup> Canye te, mo bëts mošenana ora, cha botamana tojáninÿe mo otjenayoquëcá, mëntšá: Bëngbe Bëtsabe canye ángel Cornelio yojtsemnoye yojtsamashjuana y tbojanियana: —¡Cornelio ca!

<sup>4</sup> Cornelio chë ángelbioye ibojtsonÿaye y auatjananá tbojanियana: —Taita, ¿ndayá yojtsemna ca?

Y chë ángel tbojanियana: —Bëngbe Bëtsá condbëtseimpadanama y chë ujabótënga condbëtsëjabuachanama, Bëngbe Bëtsá ácaftaca entsoyejuá y lempe cmochanjóyeunaye.

<sup>5</sup> Chcasna, mora básefta boyabásenga Jope bëts puebloye michamó y Simón, chë Pedro ca monduabobuatmá, moye chamuánatse. <sup>6</sup> Cha posada entsebomna inÿe Simónbentše, chë bobáchëshiñe trabajayabe yebnentše. Chabe yebna mar béjaye tsachañe endmëna. Cha cmochanjauyana ndayá jamama cmojtsemna ca.

<sup>7</sup> Chë Cornéliëbioye ibojuatsëtsaye ángel tojtsatanoñe ora, Cornelio chabe oservenënguentsána útata tojánachembo y canye soldádnaca, chabe uajabuachaná, Bëngbe Bëtsá adorayá; <sup>8</sup> lempe ntšamo yojopasacá chënga tojanacuntá y chentšana Jope puebloye tojanichamó.

<sup>9</sup> Yëfsana mo nyetsto ora, chënga benachiñe Jope béconana imojtsajnëntscuana, Pedro yebnentša tsbanánoye tojánašëngo, Bëngbe Bëtsáftaca jencuëntama. <sup>10</sup> Becá tojánishëntsena y jasama yojtseboše; pero imojtsebopróntantscuana, Pedro mo otjenayoquëcá mëntšá tojáninÿe: <sup>11</sup> Celoca yojtsatëfjna y mo canye bëts entsayëjuacá yojtsabá y nyets canta sibientšana yojtsëjonÿana. <sup>12</sup> Chë entsayëjuañe imojtsemna nyetscna bayënga, ósjojnaye bayënga y nyetscna shloftšëgnaca. <sup>13</sup> Y tojanuena canye oyebuambnayana mëntšá: —Motsbaná, Pedro; mobaye y quem bayënga mose ca.

<sup>14</sup> Chora Pedro tojánayana: —Ndoñe, atšbe Utabná. Atše ndocna te chiyáise Moisesbe leyíñe ndoñe yondëlesenciana jasama bayënga y chë jasama ndoñe tšabá imomna bayënga ca.

<sup>15</sup> Y cachiñe tojtëtanuena chë oyebuambnayana mëntšá: —Bëngbe Bëtsá tojalesenciá y canye bayá tšabá jasama yomna ca tojayanëse, aca ndoñe matsjuabnana chë bayá jasama ndoñe tšabá yontsemna ca.

<sup>16</sup> Chë soye unga soyama chca tojanopasá chentšana, chë entsayëjua celoye tojtanátsjua. <sup>17</sup> Pero Pedro ndoñe



yontsetátšëmbo ntšamo tojaninýcá ndayá chabiama yojt-sayanama. Chëntscuana, chë Cornéliëbe ichmónënga noti-ciánana Simónbe yebnoca tmojánashjajna y shjoca bësoca imo-  
jtsobátmana. <sup>18</sup> Tmojanchembo ora, tmojanënoticiá Simón, chë Pedro ca uabobainá, chentše taibojatanama.

<sup>19</sup> Pedro, ndayá tojáninýyama chabosertama yojt-senójuabnantscuana, chë Uámana Espíritu tbojaniyana: “Mouena, muentše mora unga boyabásenga cmontsenguá. <sup>20</sup> Motsbaná, mocana matastjango y yapa ntjatenojubnaycá chëngaftaca cochjá, er atše chënga sënjichamó ca”.

<sup>21</sup> As Pedro tojtanastjango y chë tmojánashjajnënga tojanëyana: —Atše sëndmëna chë šmontsenguá cha. ¿Ndáyeca moye šmojabo ca?

<sup>22</sup> Chora chënga tmojanjúá: —Cornelio šonjichamó. Cha endmëna chë soldadëngbe amëndayá, canýe tšabá mándbomna entšá y Bëngbe Bëtsábioye adorayá, y nyetsca judiënga chabiama tšabá mondbétsoyebuambnaye. Bëngbe Bëtsabe canýe ángel chábioye tbojabuayená ntšamo jamana aca chábioye chacot-sama, as chë ndayá cha jauyanama cojtsebomncá cha jouenama ca.

<sup>23</sup> As chënga tojanëmashengo y posada tojanëyentsame. Yëfsana Pedro chë unga boyabásengaftaca tojána. Básefta Jesucristbeñe ošbuáchiyënga Jope pueblentsënga Pedro tmojan-tjëmbambá.

<sup>24</sup> Chë inýe yëfsana Cesarea puebloye tmojánashjajna. Chentše Cornelio Pédrëbiamá yojtsobatmana, y Cornelio tojanëbuaja pamíllanga y tšabe amiguëngnaca chentše imojtsemna. <sup>25</sup> Pedro tojánashjango ora, Cornelio tojánbocna jajëbenguama y chabe shecuatšentše yojoshëntsamentšiye cha jadórama. <sup>26</sup> Pero Pédrëna tbojtanatsbaná y mëntšá tbojaniyana: —Matëtsbaná, atše cach aquécá nýe canýe entšá sëndmëna ca.

<sup>27</sup> Pedro Cornélioftaca encuéntaye chë yebnentše tojánamashëngo y ba entšanga tojánanýena, chentše tmojanójtënga. <sup>28</sup> Chora Pedro tojanëyana: —Cach tšëngaftanga šmondëtatšëmbo chë judiëngbe leyënguïñe endayana ndoñe yondopodena canýe judío ndoñe judío entšàngaftaca jenútanama y ni mo chëngbe yebnënguenache jábuachama ca. Pero Bëngbe Bëtsá šonjinýinýé atše ndocna te šondmëna ínýabiamá jatsjuabnayana cháftaca jenútanama ndoñe tšabá yondmëna ca. <sup>29</sup> Chíyeca, šmonjobetše ora, ndocá ntjatichamcá nýe sënjabo ca.

Chora tojanatjá: —¿Ndáyeca šmojobetše ca?

<sup>30</sup> As Cornelio tojánayana: —Canta te entsemna, camëntša ora, muentše sëndánmëna Bëngbe Bëtsáftaca

encuéntaye y ndeolpe sënjinÿe atšbe delante canÿe boyabása uabuashinÿinÿana entšayaca bopormaná. <sup>31</sup> Cha šonjauyana: “Cornelio, Bëngbe Bëtsá condbétseimpadanama y chë ujabótënga condbëtsëjabuachanama, Bëngbe Bëtsá ácaftaca entsoyejuá y lempe cmochanjóyeunaye ca. <sup>32</sup> Básefta boyabásenga Jope bëts puebloye michamó y Simón chë Pedro ca monduabobuatmá moye chamuánatse ca. Cha posada entsebomna inÿe Simónbentše, chë bobáchëshiñe trabajayabe yebnentše, y chabe yebna mar bėjaye tsachañe endmëna. Cha cmochanjauyana ndayá jamama cmojtsemna ca.” <sup>33</sup> Chcasna, cachora sënjichamó aca jobetšama, y aslëpaye jabama tcojóyaunama. Y as morna, nÿetscanga Bëngbe Utabnabe delante fsëntseprontana jouenama lempe ntšamo Bëngbe Bëtsá tcmojamandacá ca —cha tojánayana.

### *Ntšamo Pedro tojanoyebuambá Cornéliëbe yebnentše*

<sup>34</sup> Pedro chora tojanontšé mëntšá jóyebuambayama: —Mora atše šontsosertana, ndegombre Bëngbe Bëtsabiana nÿetscanga cachcá uámanënga imomnama. <sup>35</sup> Nÿets luarënguenache Bëngbe Bëtsá júbuajana cha tmojtsatschuaná y tšabe soyënga tmojtsamënga. <sup>36</sup> Tšëngaftanga šmondëtatšëmbo, Bëngbe Bëtsá Israeloca entšanga tojánabuayenama, tšabe noticiënga jtsóyebuambnayëse, chënga nÿetscanga ainaniñe tšabe ebionana chamotsebomnama, Jesucristbeyeca; y cha endmëna nÿetsca entšangbe Utabná. <sup>37</sup> Tšëngaftanga šmondëtatšëmbo ntšamo nÿets Judeoca tonjanopasama. Chë soye Galilea luaroca tojanobojatšé, Juan entšanga yojanabuayiyná orscana, chënga bacna soyënga amana chamotsajbanama y chamuenábayama. <sup>38</sup> Smondëtatšëmbo ntšamo Bëngbe Bëtsá, Jesús Nazaretocábioye tbojanábuayanama y tojanma chë Uámana Espíritu chabe ainaniñe cháumashënguama, y tojanma Jesús corente obená chaotsemnama; y šmondëtatšëmbo ntšamo Jesús enjánana entšangbiama tšabe soyënga amiñe y nÿetscanga chë Satanás yojánama chamosufrimënga áshnaye, er Bëngbe Bëtsá cháftaca yojtsemna.

<sup>39</sup> “Bënga fsënjáninÿe y fsëndëtatšëmbo lempe ntšamo Jesús tojanmcá Jerusalenoca y nÿets Judea luariñe; y cha tmonjanóba, canÿe cruciñe jacrucificase. <sup>40</sup> Pero Bëngbe Bëtsá tonjanma unga tianoye cha cháuatayenama y bëngbeñe chaonÿnama. <sup>41</sup> Cha nÿetsca entšangbe delante ndoñe chenátanbocna, pero aiñe bëngbeñe, chë tempo Bëngbe Bëtsá šojanëbuáyanënga, Jesús tojtanayenama chamuinÿama. Y tojtanayenentšana bënga cháftaca fsënjanse y fsënjanofsé. <sup>42</sup> Cha šonjichamó entšanga jábuayenama y jayanama ndegombre cha yomna chë Bëngbe Bëtsabe uabuayaná,

chë nda obanëngbiama y ainëngbiama yochjayana tšabá o ndoñe tšabá tmonjamama. <sup>43</sup> Bëngbe Bëtsabe juabna oyebuambnayënga nyëtscanga cach Jesusbiamama tmojánayana, nda Jesúsbeñe tojtsošbuaché, chábioye Bëngbe Bëtsá chabe bacna soyëngama bochanjaperdóna, Jesusbe obenánaca ca.”

*Ndoñe judiënga chë Uámana Espíritu tmojanóyëngacñe*

<sup>44</sup> Pedro chë palabrënga cabá yojtsoyebuambnantscuana, chë Uámana Espíritu tojánamashëngo nyëtsca chë imojtsuenanëngbe ainaniñe jtsemándayama. <sup>45</sup> Chë judiënga Jesucristbeñe ošbuáchiyënga Pédroftaca tmojánabënga imojenjnaná, chë Uámana Espíritu ndoñe judiëngbeñnaca cháumashënguama Bëngbe Bëtsá tojanmama. <sup>46</sup> Chënga imojtsuenana chënga inyëtsá jtsebiayangana, chënga tempo ndmabiyañe y jt-sichámuana Bëngbe Bëtsá bëts soyënga tojanmama.

<sup>47</sup> Chora Pedro tojánayana: “Pero mëngna chë Uámana Espíritu tmonjóyëngacñe ntšamo bënga tmonjoyëngacñecá. Chcasna, ndocná queochatobenaye jamana chënga uabáinënga ndoñe chamondëtsemnama ca.” <sup>48</sup> As Pedro tojanamëndá chënga jubáyama, Jesucristo jótšëmbonëse. Chentšana chënga tmojanimpadá baseftayté chëngaftaca chaoquedama.

## 11

*Ntšamo Pedro chë Jerusalenoca imojánenefjuana ošbuachiyëngbioye tojanëyana*

<sup>1</sup> Jesucristbe ichmónënga y chë Judeoca Jesucristbeñe ošbuáchiyënga tmojántatšëmbona, chë ndoñe judiëngnaca Bëngbe Bëtsabe palabriñe imojtsošbuáchema. <sup>2</sup> Pero Pedro Jerusalenoye tojesaná ora, báseftanga chabiamama ndoñe tšabá tmonjánayana. Chënga imojamna chë juabnayënga, chë ndoñe judiënga ošbuáchiyënga boyabásenga canjánamna chë más delicadentše base bobachtema tëtšenënga jtsemnama ca, ntšamo chë judiënga imojanamancá, as chënga jobenayama chë judiënga ošbuáchiyëngaftaca jenútanama ca. <sup>3</sup> As Pedro tmojantjá: —¿Ndáyeca tcojá chë ndoñe judiënga jábuachama y chëngaftaca tcojase ca?

<sup>4</sup> Chora Pedro lempe chënga tojanacuntá ntšamo chë ndoñe judiëngbioye cha tojána orscana tojanopasama. Cha tojanëyana: <sup>5</sup> —Atše Jope puebloca sënjamna y Bëngbe Bëtsáftaca sënjencuénta ora, mo otjenayoquécá sënjáninýe celocana mo canýe bëts entšëjuacá átšbioye enjétsabeconaye y nyëts canta sibiocana enjétsëjonýana. <sup>6</sup> Y botamana sënjanrrepará ndayá chë tsoye bëtsemnama y sënjáninýe choye monjëtsemna uamna y tjoca bayënga, ósjojnaye

bayënga y nyetscna shloftšëngnaca. <sup>7</sup> Y sënjanuena canyë oyebuambnayana mëntšá: “Motsbaná, Pedro; mobaye y quem bayënga mose ca.” <sup>8</sup> Chora atše sënjánayana: “Bëngbe Utabná, ndoñe; atše ndocna te chiyáisese chë Moisesbe leyinë ndoñe yondëlesenciana jasama bayënga y jasama ndoñe tšabá imomnënga ca.” <sup>9</sup> Chentšana cachiñe sëntëtanuena chë celocana oyebuambnayana mëntšá: “Bëngbe Bëtsá tojalesenciá y canyë bayá tšabá jasama yomna ca tojayanëse, ndoñe matsjuabnana chë bayá jasama ndoñe tšabá yontsemna ca.” <sup>10</sup> Chë soye unga soyama chca tonjanopasá y chentšana chë entšëjua celoye tontanátsjua. <sup>11</sup> Y cachora unga boyabásenga Cesarea pueblcana ichmónënga, chë posada sëndbomnentše tmonjánashjajna, atše janguanguama. <sup>12</sup> Y chë Uámana Espíritu šonjanmandá atše yapa ntjatenojwabnaysá chëngaftaca jama; y quem chñënguana Jesucristbeñe ošbuachiyëngnaca átšeftaca tmonjána. Nyetscanga canyë entšá Cornelio ca uabainabe yebnoye fsënjánamashjna; <sup>13</sup> y chana bënga šonjanacuntá ntšamo tojáninyë, cachabe yebnentše canyë ángel ibojtsebiatsana y mëntšá tbojaniyana: “Básefta boyabásenga Jope bëts pueblloye michamó y moye chamuánatse Simón, chë Pedro ca monduabobuatmá, <sup>14</sup> y cha cmochanjabuayená ntšamo aca y acbe yebnentša oyenënga šmochjotsbocá ca.” <sup>15</sup> As, atše jóyebuambayama sënjanbojatsé orna, chë Uámana Espíritu tonjánamashëngo chëngbe ainaniñe jtsemándayama, ntšamo bëngbeñe natsana tonjanamashëngcá.

<sup>16</sup> “Chora sënjanenoiwabó ntšamo Bëngbe Utabná tonjánayanama: ‘Ndegombre, Juan entšanga béjayeca tonjanëbaye; pero Bëngbe Bëtsá chë Uámana Espíritu bochanjíchmuá, tšëngaftangbe ainaniñe jtsemándayama cháuamashënguama ca.’ <sup>17</sup> Chcasna, chëngnaca Bëngbe Bëtsá chë Uámana Espíritu tonjatsatá, ntšamo bënga, chë Utabná Jesucristbeñe ošbuáchiyënga, šonjanatšatacá. Y chca, atše ndoñe quetsásmëna canyë tša uamaná, Bëngbe Bëtsá jauyanama ntšamo cha yobošcá ndoñe chaondëtsemna ca.”

<sup>18</sup> Jerusalemoca Jesucristbeñe ošbuáchiyënga chë soyënga tmojanuena ora, ndocá más tmonjantjá y Bëngbe Bëtsá tmojtanchuá, mëntšá: —¡Asna, Bëngbe Bëtsá chë ndoñe judiëngnaca tojalesenciá chëngbe bacna soyëngama ngmënaca chamuatenójuaboma y chca amana chamotsajbanama, chë nyetsca tescama yomna tšabe vida chamotsebomnama ca!

*Ntšamo Antioquía pueblca tojanobojatsé, entšanga Jesucristbeñe ošbuáchiyana*

19 Esteban tmojanóba chentšana, tmojanontsé chë Jesucristbeñe inye ošbuachiyëngnaca jatëcamiyama. As chentšana báseftanga yojtsamna bën luarëngoye jtsachetëngana Fenicioye, Chipre y Antioquía luarëngoye, y chenache chënga Jesucristbe soyëngama imojanoyebuambná, pero nýe judiëngbiama. 20 Pero báseftanga imojamna Chipre y Cirene luaroquënga, y chënga Antioquía bëts puebløye tmojánashjajna orna, chë ndoñe judiëngbeñnaca tmojanoyebuambá, Jesús, chë Utabnabe soyëngama jabuayenase. 21 Bëngbe Utabnabe obenana chëngaftaca yojtsemna, y chca, ba entšanga tmojanajbaná bacna soyënga amana y tmojanontsé Bëngbe Utabnábeñe jtsošbuáchiyana.

22 Jerusalemoca Jesucristbeñe ošbuáchiyënga chë soye tmojántatšëmbona ora, Antioquía luaroye Bernabé tmojanichmó. 23 Bernabé choye tojánashjango orna, tojáninýe ntšamo Bëngbe Bëtsá tšabe bendicionënga chëngbeñe tojanmama y chama corente tojanoyejuá. Nýetscanga tojanabuayená chamotsiyena nýets ainánaca Bëngbe Utabnábeñe jtsošbuáchiyëse. 24 Bernabé inamna canýe entšá tšabe soyënga amá, chë Uámana Espíritu chabe ainaniñe yojtsemándaye y bëts cá ošbuachiyá inamna. Y banga tmojanontsé Bëngbe Utabnábeñe jtsošbuáchiyana.

25 Chentšana, Bernabé Tarso puebløye tojána Saulo janguanguama, 26 y tbojáninýena ora, Antioquía luaroye tbojëftsanbetše. Antioquía luarentšna canýe uata nýetsá Jesucristbeñe ošbuáchiyëngaftaca cánýiñe ibojëftsemna y ba entšanga tmojanabuatambá. Antioquioca inamna chë ndayentše natsanama Jesucristbeñe ošbuáchiyënga Cristbe ústonënga ca imojtsëbuatma.

27 Chë tempo, básefta Bëngbe Bëtsabe juabna oyebuambnayënga Jerusalemocana Antioquía luaroye tmojána. 28 Chënguentšana canýa Agabo ca uabainá tojantsá y chë Uámana Espíritbeyeca tojánayana, mëntšá: “Nýets luariñe entšanga oyeniñe bëts shëntsana echanjóshjango ca.” Y ndegombre chca tojanopasá, Claudio Romoca bëts mandado inamna ora. 29 Chcasna, chë Antioquía bëts pueblentša Jesucristbeñe ošbuáchiyënga imojenóyeunaye ntsachetšá crocënanënaca juíchmuana, ntšamo cada ona tojobenacá, Judeoca Jesucristbeñe ošbuáchiyënga jujabuáchama. 30 Chca tmojanma, y Bernabé y Sáuloftaca chë crocënanana tmojanichmó chë Judeoca Jesucristbeñe ošbuáchiyënguentše bëtsëjemëngcá amëndayëngbiøye.

## 12

*Santiago tmojanóba; Pedro tmojanëtame*

1 Chë tempo, rey Herodes básefta Jesucristbeñe ošbuáchiyënga tojánishëche jutámíama y jätsetšenama. 2 Tojanmandá espadējaca chamóbama Santiago, Juanbe catšata; 3 y Herodes tojántatsëmbona judiënga chë soye tojanogúsetama; as, cha tojanmandá Pédrënaca chamutámíama. Chca tojanopasá chë levadúraca ndëpormana tandëše sayté, Bashco fiesta ora. 4 Pedro tmojánishache orna, Herodes tojanmandá chamutámíama, y chë cárceloca soldadënga cantátanga tmojanenajatá cántentše cha chamotsebojanýama. Herodes yojétsejuabnaye, Bashco fiesta tojochnëngo ora Pedro juabocnama, entšangbe delante jayanama cha chaóbanama. 5 Chcasna, Pedro yojtsétámëna y chë soldadëngna corente imojtsebojanýá. Pero Jesucristbeñe ošbuáchiyëngna bëtscá Bëngbe Bëtsá imojtseimpadana Pédrëbiamá.

*Bëngbe Bëtsá tojanma Pedro natjëmbana cárcelocana cháuaisebocnama*

6 Canýe te yojtsájamna Herodes entšangbe delante Pedro juabocnama. Chë te ibetna, Pedro yojtsomañe y cátaoica canýe soldado yojtsemna; uta cadenëjuaca yojtsabatsëcna y inýe soldadëngna bëšócana chë utámëniñe imojtsebojanýá. 7 Ndeolpe, Bëngbe Utabnabe canýe ángel tojánbocna, y lempe chë utámëniñe yojtsebuashinýinýana. Chora chë ángel tëchañe Pédrëbioye tbojánbojajo, tbojanfšená y tbojaníana: “Betsco motsbaná ca.” Y cachora chë cadenëjuangá Pédrëbe buacu-atšënguentshana tojanatquécjana, 8 y chë ángel tbojaníana: “Matichëtjo y matóshecochëtjo ca.” Pedro tojanma ntšamo chë ángel tbojaníancá, y chora chë ángel tbojátaníana: “Mataquëfsayé y šmasto ca.”

9 Pedro utámënocana chë ángel ibojtsëstona, pero ndoñe yontsetátšëmbo aiñe ndegombre o ndoñe bentsemna chë ángel yojtsama cha chocana cháuaisebocnama; masna, ibojtsinýana mo canýe otjénayoca cuaftsemncá ca. 10 Y útentše chë soldadënga imojtsebojanýajana chata tbojánachnëngo y yerëša bëšásoye tbojánashjango, chë ndayëša yojanamna tsáshenoye jabocnama; y chë bëšásana nýe cachabe ponto yojotëfjo. Chentshana tbojëftsanbocna ora, canýe tsáshenëjana ibojtsaye, y nýe ndeolpe chë ángel Pédrëbentshana yojtsojuánañe.

11 Nýa chora Pedro tbojanosertá y tojánayana: “Mora tšabá šjosertá, ndegombre Bëngbe Utabná chabe ángel tbojichmó atše jatsbocama Heródesbe cucuatšentshana y lempe ntšamo judiënga átšëftaca jamama imojuabnámnaca ca.”

12 Pedro chë soyama juicio tojanca ora, tojána María, Juanbe mamabe yebnoye; Juan, Marcos ca imojanábobaina. Y chë

yebnentše banga cányiñe imojtsemna, Bëngbe Bëtsáftaca encuéntaye. <sup>13</sup> Pedro chë tsashenoica bësásoca tojanchembo ora, canye oservená, Rode ca uabainá, tojánbocna jarrepárama. <sup>14</sup> Chë oservená Pédrëbioye tbojanoyatëmbá ora, corente oyejuayá yojtsemna y cha, jebiatëfjo cuentna, cach tsoye tojesaná chë tsabe noticia jaúnayama, Pedro bësoca yojtsemna ca. <sup>15</sup> Chë tsoca imojtsemnëngna chora tmojanianyana: “¿Opá chectsebocna ca?”

Pero chë oservená yojtsichamo ndegombre ca. Y chënga tmojanianyana: “¡Chabe ángel ctsemna ca!”

<sup>16</sup> Chëntscuana Pedro cabá yojtsechembuana; tmojánebiatëfjo y tmojáninye ora, chënga puerta imojenjnaná. <sup>17</sup> Pero Pedro tojánefjatsëmbo iyteca chamobiamama y tojanacuntá ntšamo Bëngbe Utabná utámenocana tbojánatsbocama. Chentšana tojanëyana: “Ntšamo tonjopasama Santiago y chë Jesucristbeñe inye ošbuáchiyënga šmochjaúnaye ca.”

Chora Pedro chë yebnentšana tojtáisebocna y ínÿoye yojáta.

<sup>18</sup> Tojanbinÿna ora, chë soldadënga puerta imojóntša enbouenanana, ntšamo Pédroftaca tojanopasama ndoñe imontsetátšëmbo causa. <sup>19</sup> As Herodes tojanmandá Pedro chamotsenguanguama; pero jtsinÿenama ndoñe imonjobenaye orna, Herodes chë soldadënga tojanatjá ndayá Pédroftaca tojanopasana y chentšana tojanmandá chë cha imojanbojanýa soldadënga jtsëbáyama. Chë soyënga tojanochnëngo chentšana, Herodes Judea luarentšana tojëftsanbocna y Cesarea luaroye tojtsanoñe, y choca tojtsanoquedañe.

### *Herodes tojanóbana*

<sup>20</sup> Herodes corente yojtsetšátjaye Tiro y Sidonoquëngaftaca; as chënga tmojanenoyeuná Heródesbioye jama. Canye uámana uajabuachaná, Blasto ca uabainábioye tmojanayeuamaná, y chana tojanašebuachená Herodes jauyanama ndoñe más entjayánanënga chamondëtsemnama, er Tiro y Sidonoca entšanga vida innabomna Heródesbe luaroca sanángaca. <sup>21</sup> Chcasna, rey Herodes inye tescama tojánachembo. Chë tena, jóyebuambayama Herodes uámana entšayaca yojtopórma y yojótbema chabe mándaye tbemanentše; chentšana tojanonguamé. <sup>22</sup> Chora entšanga tmojanontšë mëntšá uayebuáchana: “¡Chë entsoyebuambná cha entšá ndoñe quenátsmëna! ¡Chana canye dios entsemna ca!” <sup>23</sup> Cachora, Bëngbe Bëtsabe canye ángel tojanma Herodes šocana chaboshachama, chabe cuenta Bëngbe Bëtsá chamuatschuama entšanga ndoñe yonjáuyana causa. Herodes tojanóbana mamángaca sasná.

<sup>24</sup> Pero chë tempo más bëtscá entšanga Bëngbe Bëtsabe palabra imojtsuenana y Jesucristbeñe imojtsošbuáchiye.

<sup>25</sup> Bernabé y Saulo chatbe trabajo tbojéftsanna ora, Jerusalenocana Antioquía luaroye tbojésanata y Juan, chë Marcos ca uabobuatmá, chátaftaca tmojéftsanbetše.

## 13

*Bernabé y Saulo tbojanbojatsé Bëngbe Bëtsabe trabajo jamama*

<sup>1</sup> Antioquía luaroca Jesucristbeñe ošbuáchiyënguentše imojtsemna Bëngbe Bëtsabe juabna oyebuambnayënga y ošbuachiyëngbioye abuatambayënga. Chënga imojanabaina Bernabé, Simón (chë Sibetá ca uabobuatmá), Lucio Cirenocá, Manaén (nda tojanoboché cánjiñe Herodes, chë Galileoca réyefaca) y Saulo. <sup>2</sup> Canye te, Bëngbe Utabná imojtsatschuanaye y chama tondaye ntjascá imojtsemna ora, chë Uámana Espiritu tojánayana: “Mora šmochjaleséncia Bernabé y Saulo tšëngaftangbentšana chabuétsebocnama; chatna canye trabajuama sënjabacacá ca.”

<sup>3</sup> Bëngbe Bëtsá jëtschuayama tondaye ntjascá imojtsemnëntscuana y cháftaca imojtsencuéntantscuana, chëngbe cucuatšënga chatbe bestšaše juatsboica tmojancjá, chatbe trabajuiñe chaújabuachama Bëngbe Bëtsá jtseimpadánëse. Y chentšana chátbioye tmojtanadiošoftá.

*Bernabé y Saulo Chipre luaroca*

<sup>4</sup> As Bernabé y Saulo, chë Uámana Espiritbeyeca ichmónata, Seleucia ca uabáinoye tbojánata y chentšana bejaycá, Chipre luaroye. <sup>5</sup> Salamina bëtš puebloye tbojánashjango ora, tbojanontsé Bëngbe Bëtsabe palabrama entšanga jábuayenama, chentša judiëngbe enefjuana yebnënguenache. Juan Marcos mo chatbe uajabuachanacá ibojtsebomna.

<sup>6</sup> Njets chë luarëjana tmojánachnëngo orna, Pafos puebloye tmojánashjajna; y chentše tmojáninýena canye judío tatsëmbuá, Barjesús ca uabainá. Cha yojánichamo cha canjamna canye Bëngbe Bëtsabe juabna oyebuambnayá ca, pero ndoñe chca yonjamna. <sup>7</sup> Chë tatsëmbuá inatrabájaye chë Chipre luaroca mandadbiama, Sergio Paulo ca uabainá; y chë mandadna corente osertaná inamna. Cha yojtseboše Bëngbe Bëtsabe palabra jouenama; as tojanmandá Bernabé y Saulo jobiatšana. <sup>8</sup> Pero chë tatsëmbuá, grieguiñe Elimas ca uabainá, Saulo y Bernabebe contra yojtsemna y yojtsama chë mandado ndoñe chaondëtsošbuáchema, ntšamo chë Jesucristbeñe ošbuáchiyënga imojanošbuachecá. <sup>9</sup> Chora, Saulo chë Pablo ca imojanábobuatmabe ainaniñe chë Uámana Espiritu corente yojtsemándaye; as chë tatsëmbuábioye yejuana ibojonýinýiye, <sup>10</sup> y



tbojaniyana: “¡Abuambnayá, puerte bacna entśá, Satanasbe uaquiñá y tšabe soyënga ndoñe chaondětsebínýnama trabajayá! Bëngbe Utabnabe nýetsca ndegombre soyëngama aca contsichamo uayátsenaye soyënga yojtsemna ca. <sup>11</sup> Mora, Bëngbe Bëtsá cmochanjacastíga, jtaná cochanjoquéda y baseftayté jinýama quecochatobenaye ca.”

Cachora Elimas mo ibetiñcá yojoquéda y ibojtsonguaye canýa buacuetëntšnana chabuánatsama, jtaná yojtsemna causa. <sup>12</sup> Chë mandado chca tojáninýe ora, Jesucristbeñe yojtsošbuaché y yojenjnaná Bëngbe Utabnabe soyënga tojanatsjínýama.

*Pablo y Bernabé Antioquía pueblentše, Pisidia luaroca*

<sup>13</sup> Pablo y chabe enutënga, Páfosocana, bejaycá Perge puebloye tmojátananga, Panfilia luaroca. Pero Juan tojésanabashejuana y Jerusalenoye tojésanshëcona. <sup>14</sup> Pergentsana Antioquía puebloye tbojátanata; chë pueblo inamna Pisidia luare béconana. Chentšna, ochnayté, chë judiëngbe enefjuana yebnoye tbojánamashëngo y tbojanótbema. <sup>15</sup> Moisesbe leyiñe y Bëngbe Bëtsabe juabna oyebuambnayëngbe uabemana librëšangañe tmojanalía orna, chë enefjuana yebnentša mándayënga canýa tmojanichmó chënga jáuyanama: —Israeloquënga, bënga fséntseboše entšanga chašmabuayená, nderado ndayá jayanama šmojtsebmñese, muentša entšanga añemo chamotsebmñama ca.

<sup>16</sup> As Pablo tojantsá y entšángbiroye cucuátšeca tojánefjatsëmbo iytëca chamobiamama, y tojánayana: —Smochjouena Israeloquënga y ndoñe judiënga Bëngbe Bëtsá adórayënga. <sup>17</sup> Israeloca entšanga mondadorana Bëtsá, Bëngbe Bëtsá, bëngbe bëtš taitanga tojanëbuáyana, y tojanma chënga corente bëtšcanga chamotsemnana, chënga Egiptoca inýe luarocana ashjajnëngcá imojoyena ora. Y chentšana, cachabe obenánaca chë luarocana chënga tojésanëbuacana. <sup>18</sup> Canta bnëtsana uata nýetśá, Bëngbe Bëtsá entšanga ndoyena luaroca chënga yojanëuantana, <sup>19</sup> y cha tojanma chë Canaán luaroca canýsëftentša entšanga chamopochocama y bëngbe bëtš taitanga chëngbe fshantsënga nduiñënga tojánabiama. <sup>20</sup> Chë tempo, chë Bëngbe Bëtsá Abrahámbioye quem fshantse jatšetayama tbojanšbuachená orscana, y chë tempo, chë bëngbe bëtš taitanga chë fshantse tmojanóyëngačñëntscuana, canta patse y shachna bnëtsana uata tojanochnëngo.

“Chentšana, Bëngbe Bëtsá chëngbiamama mandadënga tojánabiama, Bëngbe Bëtsabe juabna oyebuambnayá Samuel chëngbe mandayá yojëftsemna tempëntscuana. <sup>21</sup> Chentšana, Israeloquënga Samuel tmojanimpadá canýe rey chabojayé

chaotsamëndama; as Bëngbe Bëtsá Saúlbioye chëngbe rey tbojánbema, canta bnëtsana uatëscama. Saúl inamna Cisbe uaquiñá y Benjaminbe bëts pamillanguentšá. <sup>22</sup> Más chcoyna, Bëngbe Bëtsá Saúlbioye chë mándayentšana tbojtsanjuaná, y chentšana Davidbioye mo chëngbe reycá tbojánbema. Chabiamá Bëngbe Bëtsá tojánayana: ‘Atše sëndétatšëmbo, David, Isaíbe uaquiñá, canye tšabe entšá yomnama y chama atše sëndoyejuá, y cha sempre endëprontana ntšamo atše stsebošcá jtsamama ca.’ <sup>23</sup> Davídbentšana canye entšá Jesús enjamna, nda Bëngbe Bëtsá tbojanichmó Israeloca entšanga jabátsebacama, ntšamo cach Bëngbe Bëtsá chëngbe bëts taitanga tojanašebuachenacá. <sup>24</sup> Cabá Jesús ndëbocna ora, Juan nyëtsca Israeloquënga tojanabuayená bacna soyënga amana chamotsajbanama y chamuenábayama. <sup>25</sup> Juanbe trabajo jopochócama yojtsobeco ora, cha tojánayana: ‘¿Nda atše tsmënama tšëngaftanga šmojuabná ca? Chë tšëngaftanga šmontsejuabná atše tsmëna ca cha, atše ndoñe quetsátsmëna. Pero átšbentšana echanjabo canya, y atše merecido taitatobuajoñe ni mo jotsejbiyama chabe shecochëtjonëshentša corriëja jajafjonama ca.’

<sup>26</sup> “Chcase morna, Abrahábentšana entšanga y ndoñe judiënga Bëngbe Bëtsá adórayënga; bëngbiamá entsemna quem buayenana soye, chë Bëngbe Bëtsá entšanga játsebacana. <sup>27</sup> Masque cada ochnayté, Bëngbe Bëtsabe juabna oyebuambnayëngbe uabemana palabra monjanalía chëngbe enefjuana yebnentše, Jerusalemëntša oyenënga y chentša mándayënga ndoñe quenjátanësertana nda Jesús bëtsemnama, y chë tmojtsalía soyëngama cach ndoñe. Y chca, chënga Jesús chamóbama tmojánboshjona ora, chë chca amënga tmojanma ntšamo Bëngbe Bëtsabe juabna oyebuambnayëngbe librëšangañe iuabemancá. <sup>28</sup> Y masque ndocna bacna soye tmonjáninÿena Jesús jóbanama chabotsemnama, Pilato tmojanimpadá chaomandá chábioye jóbama. <sup>29</sup> Chentšana, lempe ntšamo Bëngbe Bëtsabe uabemana palabrënguiñe iuayancá Jesúseftaca tojanochnëngo ora, chabe ústonënga chë cruzocana tmojtanëštjango y tmojanatbontšá. <sup>30</sup> Pero Bëngbe Bëtsá tojanma Jesús cháuatayenama. <sup>31</sup> Chë Galileocana Jerusalemoye cháftaca tmojánanga, baytentscuana Jesús yojánebëbuacana; y morna, lempe ntšamo Jesusbiamá tmojaninÿcá, chënga entšangbeñe montsoyebuambná.

<sup>32</sup> “Y chca, mora bënga chë tšabe noticiënga cbontsëtsëtsná. Ntšamo Bëngbe Bëtsá bëngbe bëts taitanga tojanašebuachenacá, <sup>33</sup> cha tonjama, bënga chë chëngbe entšanguentšëngbiamá, chca chaotsemnama. Y Bëngbe Bëtsá chca tojama, Jesús cháuatayenama cha jamëse. Rey

David, Běngbe Bětsabe uabemana palabrěnguiñe, segundo salmentše mēntšá tojanábema, ntšamo Běngbe Bětsá Jesúsbioye tbojaniyanama:

Aca atšbe uaquiñá condmēna.

Mēnté entsanga sēnjinŷanŷé aca atšbe Uaquiñá comnama ca.

<sup>34</sup> Y tempo Běngbe Bětsá chabe uabemana palabrěnguiñe tojaninŷanŷé cachá jamama Jesús cháuatayenama y ndoñe cachiñe chaondóbanama, mēntšá tojánayana ora:

Chē ndegombre soyēnga y chē tšabe bendicionēnga ntšamo

David sēnjanšbuachenacá,

tšēngaftanga cbochanjátšataye ca.

<sup>35</sup> Inŷoca Běngbe Bětsabe uabemana palabrěnguiñe, Salmos librěša uabiamnayá, mēntšá tojanábema ntšamo Jesús Běngbe Bětsábioye tbojaniyanama:

Aca ndoñe quecochatslesēncia atšbe cuerpo,

chē acbe Uámana oservenabe cuerpo chaotsopochocama ca.

<sup>36</sup> David, chabe tempo imojoyenēngbiamama tojanma, ndayá cha chaomama Běngbe Bětsá tojanjuabocá. Cha tojanóbana y tmojanatbontsá chē chabe bēts taitángbioye tmojanētabuantsá luarentše, y chabe cuerpo tojanopochocá. <sup>37</sup> Pero chē Běngbe Bětsá tojanma chauatayenamabe cuerpo, ndoñe tonjanopochocá.

<sup>38-39</sup> “Asna, baconga y batanga, atše sēntseboše tšēngaftanga quem soye chašmotsetátšēmo: Ndayá Jesús tojanmama, entsanga chēngbe bacna soyēngama perdonánēnga montsemna. Jesúsbe yeca, nŷetsca chábeñe tmojtsošbuáchenga, bacna soyēngama perdonánēnga mochántsemna. Ntšamo Moisesbe leyiñe iuayancá tmojanmama, chēnga ndoñe tmonjanobená chca perdonánēnga jtsemnama; nŷe Jesúsbeñe jtsošbuáchiyēse chēnga perdonánēnga jtsemnana.

<sup>40</sup> Cuedado šmochtse bomna, ntšamo Běngbe Bětsabe juabna oyebuambnayēnga tmojanayancá, tšēngaftangaftaca ndoñe chaondochnēnguama. <sup>41</sup> Běngbe Bětsá mēntšá tojánayana:

Smochjouena. Tšēngaftanga chē ntšamo atše tijayancá šmojtsábotenga,

ojnanánēnga šmochántsemna y šmochanjóbana.

Tšēngaftanga cabá vida šmobomnēntscuana, atše bēts soyēnga chanjéftsema,

y masque ndánaca chē soyēngama chacmojtsacúnta,

tšēngaftanga chiñe ndoñe quešmochatošbuáchiye ca” —Pablo tojanoyebuambá.

<sup>42</sup> Pablo y chabe enutēnga chē judiēngbe enefjuana yebnentsana tmojéftsanbocna ora, chē ndoñe judiēnga chēngbioye tmojanaimpadá, chē inŷe ochnaytescama chē soyēngama más jábuayenama. <sup>43</sup> Chentše chē te jénefnama

tempo tojanopochocá ora, ba judiënga y ndoñe judiënga, chë Bëngbe Bëtsábioye imojánadorana mo chë judiëngcá, Pablo y Bernabé tmojanëseto. Y chatna chënga tmojanabuayená nÿets tempo chamotsejuabnama, Bëngbe Bëtsá chëngbiana tšabe soyënga yojtsamama.

<sup>44</sup> Chë inÿe semana, chë ochnaytena, nÿa mo nÿetsca chë pueblentše oyenënga tmojanobeconá Bëngbe Bëtsabe palabra jouenama. <sup>45</sup> Pero ba entšanga choye jouenama tmojánama chë judiënga tmojáninÿe ora, tmojanotjayaná, ba entšanga Pablo imojtseyeunanama; as chënga tmojanontšé mocá ichámuana ndayá cha yojtsóyebuambnama, y chábioye oyenguayana. <sup>46</sup> As Pablo y Bernabé más añémoca mëntšá tbojánayana: “Endánëyta, natsana tšëngaftanga, chë judiënga šmognënga, Bëngbe Bëtsabe palabra jshabuayenana. Pero tšëngaftangna chë palabra šmontsaboté, y šmontsejuabná tšëngaftangbiana ndoñe tšabá yontsemna chë nÿetsca tescama yomna tšabe vida jtsebomnana ca; chë causa, bënga fchantsoñe chë ndoñe judiëngbeñe Bëngbe Bëtsabe palabra jóyebuambayama. <sup>47</sup> Er Bëngbe Bëtsá chama šjanichamó, mëntšá jauyanëse:

Aca tcbonjuábuayana chë ndoñe judiëngbioye tšabe noticiënga jábuayenama, chaósertama.

Y chca, aca chëngbiana cochántsemna mo canÿe binÿnayacá.

Chca, ácbeyeca nÿets luarënguenache entšanga atše chanjatsebacá ca.”

<sup>48</sup> Chë ndoñe judiënga chca tmojanuena ora, puerta imojtsóyejuaye y tmojanontšé mëntšá ichámuana: “Bëngbe Utabnabe palabra tšabá bëngbiana entsemna ca.” Y chora, chë nÿetsca tescama yomna tšabe vida jtsebomnana Bëngbe Bëtsá tempo tojánabacacanga, tmojanontšé Jesúsbeñe jtsošbuáchiyana. <sup>49</sup> Y chca, nÿets chë luariñe más entšanga Bëngbe Bëtsabe palabra imojtsuenana. <sup>50</sup> Pero chë judiënga tmojanoyebuambá, shembásengaftaca Bëngbe Bëtsá adórayënga y uámanënga, y chë pueblentša uámana taitángaftaca, jamama Pablo y Bernabé chabosufrima y chë luarentšana jtëbuacnama. <sup>51</sup> As, Pablo y Bernabé tbojésanshecstëtonata, judiënga jinÿanÿiyama chënga ndoñe tšabá tmojanmama; y chentšana, Iconio puebloye tbojtsanoñe. <sup>52</sup> Pero Jesucristbeñe ošbuáchiyënga corente oyejuayënga imojtsemna, y chë Uámana Espíritu chëngbe ainaniñe corente yojtsemádaye.

## 14

*Pablo y Bernabé Iconio puebloca*

1 Iconioca, Pablo y Bernabé cánjiñe tbojánamashëngo chë judiëngbe enefjuana yebnentše y corente obenánaca Bëngbe Bëtsabe palabra tbojanoyebuambá. Chíyeca, ba judiënga y ndoñe judiënga Jesucristbeñe imojtsošbuaché. 2 Pero chë judiënga Jesucristbeñe ndošbuáchiyënga, chë ndoñe judiëngbioye tmojanayënjaná, Pablo y Bernabebiama podesca chamotsejuabnama. 3 Chíyeca, Pablo y Bernabé bayté chentše tbojanototoná y ndauatjácá Bëngbe Utabná Jesucristbiama tbojanoyebuambá. Bëngbe Utabná obenana chata tojanatšatá bëts soyënga jtsamama, y chë soyëngaca Bëngbe Utabná entšanga tojaninñanyé, ndayá chë ichmónata ibojtsoyebuambnacá ndegombre bëtsemnama, chë Bëngbe Bëtsá nyetscanga iuababuánñeshanana. 4 Pero nyetsca chë pueblentša entšanga ndoñe cachcá imontsejuabnaye; ínñyënga chë judiëngaftaca imojtsemna, y ínñyënga chë Jesucristbe ichmonátaftaca. 5 As, chë judiënga y ndoñe judiënga chentša mandayëngaftaca tmojanenoyeuná chata jtsatsetšenama y ndëtšbéngaca jtsébáyama. 6 Pero Pablo y Bernabé chama tbojántatšëmbona orna, tbojtsanëchañe Listra y Derbe puebloye, Licaonia luaroca, y choca chábuañe luarëngoye; 7 y chë luarënguenáchnaca, chata Jesucristbe tšabe noticiënga entšanga tmojanabuayená.

*Listra puebloca, ndëtšbéngaca Pablo tmojtsanatëchënganja jtsóbama*

8 Listra puebloca inamna canñe boyabása jama ndobená. Ndocna te yondobena jana, chca cosheto inónñna causa. Chë boyabásana yojtsetbemana 9 ouenana ntšamo Pablo yojtsichamcá. Y Pablo chábioye tbojanonñinýe ora, tojántatšëmbona chë šocá tša yojtsošbuáchemá, shnaná jtsatsemñenama; 10 as Pablo, juayebuáchenëse tbojaniyana: “¡Motsbaná y acbe shecuatšëngaca tšabá motsa ca!”

Chora chë boyabása, canñe jontsëñjese tojantsá y yojóntša anana. 11 As chë entšanga, ndayá Pablo tojanmccá tmojáninñyë ora, tmojanontšé uayebuáchana chë Licaonia luarentša biyañe, mëntšá: “¡Bëngbe diosënga bëngbioye tbojátšma mo entšatcá ca!”

12 Bernabé imojtsábobuatma Zeus ca, mo chë chëngbe diosënga amëndayacá; y Páblëna Hermes ca, mo chë inñyë diosëngbiama oyebuambnayacá. Páblëbioye chca imojtsábobuatma, er cha más yotsoyebuambná. 13 Zeusbiama chentša bachna inabomna canñe yebna chë pueblo chaboca, chábioye jadórama. Chë bachna, uacnënga tojanënatse y uantšëfjushangá tojanëyamba chë Zeus jadórama yebnentša amashjuanoye; y cha y chë entšanga

imojtseboše chë uacnënga jashebuáyana y jajuinÿiyana, chca, chë ichmonátbioye jadórama.

14 Bernabé y Pablo chama tbojántatsëmbona ora, entsáyá tbojtsanenántšajatanëca, entsanga jinÿanÿiyama, ntšamo chënga imojtsamcá chata tondaye yonjógusetama, y tbojëftsanotjajo entsangbe tsëntsajana y mëntšá ibojtsaychembumbuana: 15 “Baconga y batanga, ¿ndáyeca chca šmojtsama ca? Bëndata cach tsëngaftangcá entsata fsëndmëna. Muentše bëndata fsëntsemna nÿe jábuayenama Bëngbe Utabná Jesucristbe tsabe noticiënga, tsëngaftanga chë quem ndoservená soyënga, vida ndbomna soyënga adórayana chašmotsajbanama, y Bëngbe Bëtsá Ainabe benache chašmatishachama. Ndegombre, cha tojanma celoca, fshantse, nÿetsca béjayënga y lempe ntšamo chenache yobinÿncá. 16 Masque tempo, Bëngbe Bëtsá entsanga tojanalesenciá cada ona chaoma ntšamo tojtsejuabnacá, tsabá cachëngbiamá yojtsemnayeca, 17 Bëngbe Bëtsá ndocna te ntjájbanana tsëngaftanga jtsinÿanÿayana, cachá tojama tsabe soyëngaca, mocna Bëtsá cha yomnana. Cha endama tsëngaftangbiamá chauaftema y chë matënga botamana chaoshájonama, y beca saná cmondatsatná; y cha endama tsëngaftangbe ainaniñe corente oyejuayana chašmotsebomnama ca” —chata tbojánayana.

18 Masque chë soyënga tbojánayana, nÿe batšatema más bën y ya ndoñe matbënjanobenata chë entsanga jtsëuyanana uacnënga jashebuáyama, chca, chátbioye jadórama.

19 Chca ora, básefta judiënga tmojánashjajna Pisidioca, Antioquíocana y Iconiocana, y chentša entsángbioye tmojanayënjaná, Jesucristbe ichmonatbe contra chamotsemnama. Chcasna, Pablo ndëtsbéngaca imojtséanaye y chabe cuerpo chë pueblo chaboye tmojtsansjojó, er chënga imojtsejuabnaye Pablo ya obaná yojtsemna ca. 20 Pero Jesucristbeñe ošbuáchiyënga Pablo tmojanóbobuashcona orna, cha tojtantsbaná y cachiñe chë pueblöye tojtésaná; y chë yëfsana, Bernabéftaca Derbe pueblöye tojana.

21 Derbe pueblöca Jesucristbe tsabe noticiënga entsanga tmojanabuayená, y chca, entsanga Jesucristbeñe imojtsošbuáchiye. Chentšana chata tbojésanshëcona Listra, Iconio y Pisidioca Antioquiöye. 22 Chë luarënguenache chata ibojánana chë Jesucristbe ustonëngbioye atañémuaye, cada te chábeñe más chamotsošbuáchema. Y entsángbioye tmojanéyana: “Bëngbe Bëtsabe amëndayoye jamashënguamna, bënga šontsamna quem luarentše bëtscá jëftsepadecénana ca.” 23 Nÿetsca ošbuachiyëngcá enefjuanenache, bëtsëjemëngcá mándayënga tmojanabacacá, chentša

Jesucristbeñe ošbuáchiyënguentšana, cachënga chentša ošbuachiyëngbioye jtsamëndayama. Bëngbe Bëtsá jëtschuayama tondaye ntjascá imojtsemna y cháftaca imojtsencuénta ora, cha tmojanimpadá, chë ošbuáchiyënga Bëngbe Utabnabe cucuatšinë chamotsemnama, ndábeñe chënga imojtsošbuaché.

*Pablo y Bernabé, Siroca Antioquía puebloye tbojtanata*

<sup>24</sup> Pisidia luarëjana tbojánachnëngo ora, Panfilia luaroye tbojánashjango. <sup>25</sup> Perge pueblentše Jesucristbe tšabe noti-ciënga entšángbioye tmojanabuayená, y chentšana Atalia puebloye tbojánata. <sup>26</sup> Chentšana, Bernabé y Pablo, bejaycá tbojtanata Siroca Antioquía puebloye. Chentša entšanga Bëngbe Bëtsá tmojanimpadá chata chabe cucuatšinë chabotsemnama, chë trabajuiñe chaotsanÿenama; y chorna, chë trabajo ya tbojanpochocá. <sup>27</sup> Choye tbojtanashjango ora, nÿetsca Jesucristbeñe ošbuachiyëngbioye tmojánachembo, y tmojanacuntá ntšamo Bëngbe Bëtsá tšabe soyënga chátaftaca tojanmama, y ntšamo Bëngbe Bëtsá tojaninÿanÿé, chë ndoñe judiëngnaca chamotsobenama Jesucristbeñe jtssošbuáchiyama. <sup>28</sup> Y Pablo y Bernabé bayté chentše tbojanototoná Jesucristbeñe ošbuáchiyëngaftaca.

## 15

*Ichmónënga y bëtsëjemëngcá mándayënga Jerusalenoca tmojánenefna jencuéntama*

<sup>1</sup> Chë tempo, báseftanga Judeocana áshjajnënga tmojanontsé, Antioquía pueblentše, chentša Jesucristbeñe ošbuáchiyënga mëntšá jabuátambana: “Base bobachtema chë más delicadentše ndoñe šmonjenotëtšëse, ntšamo Moisesbe leyinë endayancá, ndoñe quenátopodena tšëngaftanga atsebácanënga jtsemnama ca.” <sup>2</sup> Chíyeca, Pablo y Bernabé jabuachana chca buatëmbayëngaftaca imojánenatsëtsnaye. Cabana, tmojanëbuáyana Pablo, Bernabé y inÿënga Jerusalenoye chamotsama, choca chë Jesucristbe ichmónëngaftaca y chë chentše Jesucristbeñe ošbuachiyëngbeñe bëtsëjemëngcá mandayëngaftaca chama chamencuentama.

<sup>3</sup> Chcasna, chë Antioquioca imojánenefjuana Jesucristbeñe ošbuáchiyënga Jerusalenoye chënga tmojanichamó. Fenicia y Samaria luarëjana imojtsachnëjuana ora, chënga tmojanacuntá ntšamo chë ndoñe judiënga chëngbe tempsca soyënguifne ošbuáchiyana tmojtsanajbanama y chora Bëngbe Bëtsábeñe imojtsošbuáchema. Jesucristbeñe chentša ošbuáchiyënga chca tmojanuena ora, puerte oyejuayënga imojtsemna.

4 Pablo y chë ínÿenga Jerusalenoye tmojánashhajna ora, chentša Jesucristbeñe ošbuáchiyënga, Jesucristbe ichmónënga y bëtsëjemëngcá mándayënga chëngbioye tmojanëbuaja. Chentšana, Pablo y Bernabé tbojanacuntá lempe ntšamo Bëngbe Bëtsá chátaftaca yojamcá. 5 Pero básefta fariseunga, chora ya Jesucristbeñe ošbuáchiyënga, tmojantsá y mëntšá tmojánayana: “Chë ndoñe judiënga entsamna chë más delicadentše base bobachtema tëtšenënga jtsemnana, bënga judiëngcá; y tšëngaftanga cmontsamna chënga jáuyanana, ntšamo Moisesbe leyënguiñe iuayancá chamotsamama ca.”

6 As, chë Jesucristbe ichmónënga y bëtsëjemëngcá mándayënga tmojánenefjna jencuéntama, chë ndoñe judiënga aiñe o ndoñe yonjánamnama chë más delicadentše base bobachtema tëtšenënga jtsemnana, ntšamo chë judiënga imojanamancá. 7 Bën y bëtscá chënga tmojanencuentá chentšana, Pedro tojantsbaná y mëntšá tojanëyana: “Jesucristbeyeca catsátanga, tšëngaftanga šmondétatšëmbo, ya bayté entsemna Bëngbe Bëtsá tšëngaftangbentšana atše šonjanábuayana, Jesucristbe tšabe noticiënga chë ndoñe judiënga jábuayenama, chca, chënga Bëngbe Utabnábeñe chamotsošbuáchema. 8 Bëngbe Bëtsá jtsetatšëmbuana lempe ntšamo entšanga tmojtsejuabnacá. Y cha šonjaninÿanjé, chë ndoñe judiëngnaca innobena chabe entšanga jtsemnana, chábeñe tmojtsošbuáchese, chë Uámana Espiritu chëngbe ainaniñe cháuamashënguama cha tojanma ora, ntšamo cha bëngbe ainaniñe tojanmcá. 9 Y chca, Bëngbe Bëtsabiama nÿetscanga cachcá monduámana, judiënga y ndoñe judiëngnaca; y cha tojama chë ndoñe judiëngnaca chëngbe bacna soyëngama perdonánënga chamotsemnana y ainaniñe tšabe juabna chamotsebomnana, Bëngbe Bëtsabe palabriñe jtsošbuáchiyëse. 10 Y mora, ¿ndáyeca tšëngaftanga ndoñe šmontseboše ntšamo Bëngbe Bëtsá tojamcá? Pero tšëngaftanga šmontseboše, chë ndoñe judiënga Jesucristbeñe ošbuáchiyënga lempe chë leyentša mandënga chamotsocumplínama, mo nda ínÿabioye uauta uasmanësha cuaftsasmëmnacá; pero lempe chë mandënga, ni bëngbe bëts taitanga ni bënga ntsobenana jocúmpliana. 11 Y chca ndoñe chaondëtsemna. Bënga mondošbuaché bënga atsebácanënga imomnana Bëngbe Utabná Jesús chabe tšabe juabna šojaninÿanjéyeca, y Bëngbe Bëtsá cachcá chë ndoñe judiëngnaca tojatsebacá ca” —cha tojanëyana.

12 Chorna, chentše imojtsemna entšanga nÿetscanga iytéca tmojanobiama, y tmojanuena Bernabé y Pablo jtsóyebuambnayana, chë bëts soyëngama, Bëngbe Bëtsabe obenana entšanga jinÿanjiyama, y inÿe soyëngama chabe



obenánaca, ntšamo chë ndoñe judiëngbeñe Bëngbe Bëtsá chátaftaca tojanmcá.

<sup>13</sup> Chë útata jóyebuambayama tbojanpochocá ora, Santiago mëntšá tojánayana: “Jesucristbeyeca catšátanga, šmochjouena: <sup>14</sup> Simón šonjabuayená ntšamo Bëngbe Bëtsá natsana tojaninÿanÿé, chë ndoñe judiëngnaca cha iuanÿenama, y chíyeca cha chënguentšana banga tojubuáyana chabe entšanga chamotsemnama. <sup>15</sup> Ntšamo Simón šonjabuayenacá entsemna cachcá ntšamo chë Bëngbe Bëtsabe juabna oyebuambnayënga tmojanayancá, ntšamo yochjanopásama y ntšamo Bëngbe Bëtsabe uabemana palabrenguiñe endayancá, mëntšá:

<sup>16</sup> Chentšana atše chanjésabo

y chë Rey Davidbe pamíllanga cachiñe uámanënga chantabiama;

mo nda canÿe uáshajayena yebna tojëtsjebcá, atše, Davidbe pamíllanga cachiñe uámanënga chantabiama;

<sup>17</sup> chca, chë inÿe entšanga chamonguango ndayá jamana atše, tšëngaftangbe Utabná, más chašmotsábuatmama, nÿetsca ndoñe judiënga, chë atšbe entšanga chamotsemnama atše tijábacacanga.

<sup>18</sup> Chca atše, tšëngaftangbe Utabná séntsihamo,

nda ya bayté entsemna tonjanma entšanga chë soyënga chamotsetatšëmbuama ca —chiñe endayana.”

<sup>19</sup> Chentšana Santiago mëntšá tojanëyana: “Chíyeca atše sëntsejuabná, bënga ndoñe šontsamna chë ndoñe judiëngbiama jamana más totcá chaotsemnama Jesucristo jtsëstonama.

<sup>20</sup> Chamna, šontsamna chënga juabuábiamana y jáuyanana ndoñe chamondëtsesá, sananga chë ndaye soyënga entšanga tmojuabná diosënga yomna ca jadórana tmojuiyëbana; bacna soyënga shembásenga o boyabásengaftaca ndoñe chamondëtsama y ndoñe chamondëtsesá tsešana bayëngbe mëntšëna, y buiñe cach ndoñe ca. <sup>21</sup> Er chë natsana tempënga orscana, nÿetsca pueblënguenache mondmëna chë Moisés tojëftsanayana soyënga entšángbioye abuayiyayënga; y chabe leyënga, nÿetsca ochnayté mondbetsalíaye chë bënga judiëngbe enefjuana yebnënguenache ca” —cha tojanëyana

*Chë Jerusalenoca ichmónënga y bëtsëjemëngcá mándayënga canÿe tsbuanácha tmojanichmó chë ndoñe judiëngbiama*

<sup>22</sup> Chentšana, chë Jesucristbe ichmónënga y bëtsëjemëngcá mándayënga, nÿetsca chë Jesucristbeñe ošbuáchiyëngaftaca tmojanenoyeuná chënguentšana báseftanga jabacacayama, Pablo y Bernabéftaca Antioquía puebloye jíchamuama. Chcasna, tmojanëbuáyana Judas, chë Barsabás ca uabobuatmá, y Silas; chata ibnamna uámanata chë

Jesucristbeñe ošbuáchiyënguentše. <sup>23</sup> Y chëngaftaca canyë tsbuanácha tmojanichmó, y chiñe mëntšá yojétsayana:

Bënga chë Jesucristbe ichmónënga y chë bëtsëjemëngcá mándayënga, cach tšëngaftangcá Jesucristbeñe ošbuáchiyënga, fsëntseboše Bëngbe Bëtsá salúdoca chacmotsábouamna, tšëngaftanga chë ndoñe judiënga, Jesucristbeñe ošbuáchiyënga, Antioquía puebloca y Siria y Cilicia luarëngoca oyenënga.

<sup>24</sup> Bënga fsëntsetatšëmbo bëngbentšana báseftanga choye tmojángama, bënga ntjamëndacá, y fsëntsetatšëmbo mocna soyënga cmojtsabuátambama y chë causa, tšëngaftanga ndoñe šmontsetátšëmbo ntšamo jtsejuabnayana ndayá jamama yomnana, Jesucristbe canyë ndegombre ustoná jtsemnama. <sup>25</sup> Chcasna, bënga fsënjenoyeuná y šonjúnynana tšabá yojtsemna báseftanga bënguentšana jabacacayana tšëngaftangbioye jontješiyama chamotsama, y Pablo y Bernabé, chë Jesucristbeyeca bëngbe bonshana catšátataftaca, choye chamotsama. <sup>26</sup> Chë úatna ba soye tbojotsbocá vida jáshbiana, Bëngbe Utabná Jesucristbiana oservéniñe. <sup>27</sup> Chátaftaca Judas y Silas fsënjichamó; y chatna cach tšëngaftangaftaca bochanjóyebuambaye ntšamo quem tsbuanáchañe yojtsábemana. <sup>28</sup> Chë Uámána Espíritu y bënga cachcá fsëntsejuabná, bënga ndoñe šontsamna tšëngaftanga jamëndana bëtscá jabuache mandënga Moisesbe leyënguiñe chašmotsocumplínama. Nye quem uámána soyënga chiñe aíñe cmontsamna jtsobedecénana: <sup>29</sup> Ndoñe šmattsesaye mëntšena, chë ndaye soyënga entšanga tmojuabná diosënga yomna ca jadórama tmojóba bayëngbiana; ndoñe šmatjofsiye buiñe, ni šmatjase tsešana bayëngbe mëntšena; y shembásenga y boyabásengaftaca bacna soyënga ndoñe šmattsama. Chë soyënga ntšamcá, tšabá šmochanjama.

Bëngbe Bëtsá salúdoca chacmotsábouamna ca —chiñe yojétsayana.

<sup>30</sup> Chcasna, chë quem Jerusalenocana ichmónënga tmojésanodiošoftanentšana, Antioquía puebloye tmojána; y chocna, nyetsca chë Jesucristbeñe ošbuachiyëngbioye tmojanëbuaja y chë tsbuanácha tmojanayentšbuaché <sup>31</sup> Chë Antioquía pueblentša Jesucristbeñe ošbuáchiyënga ntšamo chë tsbuanáchañe yojtsabemancá tmojanalía ora, bëts añemo tmojtanca y corente imojtsóyejuaye. <sup>32</sup> Judas y Silas Bëngbe Bëtsabe juabna oyebuambnayata ibnamna; as, chátnaca chë chentša Jesucristbeñe ošbuachiyëngbioye ba soyënga tmojanéyana, chënga añemo chamotsatsbomnama y Jesucristbeñe corente

chamotsošbuáchema. <sup>33</sup> Chentšana baseftaytese, chentša Jesucristbeñe ošbuáchiyënga chëngbioye tmojtanadiošoftá, chë ndëmanýënga tmojanichamóngbioye jtama. <sup>34</sup> Pero Silasna tšabá ibojtsinýana cachentše más jëftsajétanama. <sup>35</sup> Pablo y Bernabé baseftayshinýe Antioquia pueblentše tbojanototoná y ba ínýengaftaca Bëngbe Utabná Jesucristbe tšabe noticiënga entšanga tmojanabuatambá y tmojanabuayená.

*Pablo cachiñe inýe luarëngoye tojána, Bëngbe Bëtsabe trabajo jamama*

<sup>36</sup> Chentšana baseftaytese, Pablo Bernabébioye tbojaniyana: “Bëngbe Utabnabe palabra tbonjanabuayená luarëngoye bochjésa, choca Jesucristbeñe ošbuáchiyënga jábuachama y jányama ntšamo imojtsemnana ca.”

<sup>37</sup> Bernabé yojtseboše, Juan chë Marcos ca uabobuatmábioye chátaftaca jëftsbetšama. <sup>38</sup> Pero Páblëna ndoñe tšabá ibontsinýana cha jëftsbetšana, er Juan chátbentšana tojtsanojuánañe Panfilia luarocana, y ndoñe tonjanatjëmbambá, Bëngbe Bëtsabe trabajo japochócantscuana. <sup>39</sup> Y chë palabrama tondaye tbonjanenóyeunata causna, Pablo y Bernabé cachcá tbojesanenonýaye. Y chca, Bernabé, Marcos tbojëftsanbetše, y bejaycá Chipre luaroye tbojánata; <sup>40</sup> y Páblëna, Silas tbojanábuayana jëftsbetšama. Chë Antioquia pueblentša Jesucristbeñe ošbuáchiyënga Bëngbe Bëtsá tmojanimpadá Pablo y Silas Bëngbe Utabnabe cucuatšifne chabotsemnana, chatbe trabajuiñe chaotsanýenama. Chentšana, Pablo Sílasftaca tbojánbocna y <sup>41</sup> Siria, Cilicia luarënguëjana tojánachnëngo entšanga añemo atšatnaye, chë luarenache enefjuana ošbuáchiyënga Jesucristbeñe más chamotsošbuáchema.

## 16

*Pablo Timotéobioye tbojáninýena*

<sup>1</sup> Chentšana Pablo tojánashjango Derbe y Listra luaroye, y chentše tbojáninýena canýe Jesucristbeñe ošbuachiyá, Timoteo ca uabainá; cha inamna canýe judiá Jesucristbeñe ošbuachiyabe uaquiñá y chabe taitana griego entšá inamna. <sup>2</sup> Chë Listra y Iconioca Jesucristbeñe ošbuáchiyënga Timoteobiana tšabá imojanoyebuambná. <sup>3</sup> Pablo tojánbošena Timoteo jëftsbetšama; pero cabá ndetsbetše orna, Pablo base bobachtema chë más delicadentše tbojantëtše, ntšamo judiënga imojanamancá. Cha chca tojanma, jobenayama chë judiënga imojoyena luarëngoye cháftaca jama, er nýetsca judiënga imnatátšëmbo Timoteobe taitá griego inamnana. <sup>4</sup> Chë ibojtsachnëjuana pueblënguenache chata ibojtsana Jesucristbeñe ošbuachiyëngbioye

abuayiynaye, ntšamo Jerusalenoca Jesusbe ichmónënga y bëtšëjemëngcá mándayënga tmojanamëndacá, ndayá chë Jesucristbeñe ošbuáchiyënga ndoñe judiënga jamama yojtsamncá. <sup>5</sup> Nyets luarenache enefjuana ošbuáchiyënga, Jesucristbeñe más imojtsošbuáchiye, y cada te Jesucristbeñe ošbuáchiyënga más imojtsóbotena.

*Pablo mo otjenayoquëcá canyë Macedonioca entšábioye tbojáninÿe*

<sup>6</sup> Chë Uámana Espíritu, Pablo y Silasbioye tojaninÿanÿé, chata ndoñe yontsanamna Asia luaroca Bëngbe Bëtsabe palabra entšanga jábuayenana; asna, tbojánachnëngo Frigia y Galacia luarëjana. <sup>7</sup> Y Misia luaroca enajébanoye tbojánashjango ora, tmojanjuabó tsjuana jana, Bitinia luaroye; pero chë Uámana Espíritu tojanabuayená choye ndoñe chabondëtsama. <sup>8</sup> Misia luarëjana tmojánachnëngo ora, Troas luaroye chënga tmojána. <sup>9</sup> Chë te ibeta, Pablo mo otjenayoquëcá tojáninÿe canyë Macedonioca boyabása ibojtsebiatsana y mëntšá ibojtseimpadana: “Diosmanda Macedoniocyte mabo y šmabëjabuache ca.” <sup>10</sup> Pablo chca tojáninÿe y cachora lempe tmonjanprontá Macedoniocyte jama. Atšnaca, chë quem soyënga uabiamnayá, chënga sënjétsatjëmbambnaye. Bënga fsënjëtsejuabnaye ndegombre Bëngbe Bëtsá šojtsanachembuana choye jama ca, Jesucristbe tšabe noticiënga chocha entšanga jábuayenama.

*Pablo y Silas Filipos puebloca*

<sup>11</sup> As, Troasentšana bejaycá fsënjána Samotracia luaroye, y yëfsana Neápolis puebloye, <sup>12</sup> y chentšana Filíposoye. Filipos enjamna canyë uámana bëtš pueblo Macedonioca y bëtscá romanënga oyeniñe. Chë luarentše baseftayté fsënjanuquedanga. <sup>13</sup> Canyë ochnaytena, chë pueblentšana fsënjëftsanbocna y chë fshájaye tsachoye fsënjána. Fsënjanuena chentše canjamna canyë luare Bëngbe Bëtsáftaca jencuëntama ca, y fsënjána janguanguama. Fsënjáninÿena ora, chentše fsënjanotbiamna y Bëngbe Bëtsabe palabra fsënjanoyebuambá chentše tmojanójoto shembásengbiamna. <sup>14</sup> Enjamna canyë shembása, Lidia ca uabainá, Tiatira pueblócá, y cha enjamna uámana uabuángana uafjatsenga entšayá uená. Cha inamna Bëngbe Bëtsábioye adorayá y chentše Páblëbioye ibotseyeunana. Bëngbe Bëtsá tojanma cha chabosertá lempe ntšamo Pablo yojtsoyebuambnacá, Jesucristbeñe chaotsošbuáchemna. <sup>15</sup> Cha y chabe yebnentše oyenënga tmonjánenabayora, Lidia mëntšá šonjanaimpadá: “Tšëngaftanga šmonjayana atše Jesucristbeñe ndegombre tsošbuaché ca; chcasna, mabënga yebnoye, átšbentše chašmoquedama ca.”

Y šonjanětarié bēnga chentše joquédama.

16 Canye te, chē Bēngbe Bētsáftaca encuéntaye luaroye fsēnjétsajna orna, šonjanēbiatše canye tobiaše, oservená, bacna bayějbe juabna uambayá; chē causa cha malisiayá inamna. Chabe nduiñēnga becá crocénana imojanójacañe, chē tobiaše yojanmalísiaye soyēngama. 17 Chē tobiaše tonjanontsé Pablo y bēnga usetonana y mēntšá enjétsaychembumbuana: “¡Quem boyabásenga montsemna chē celoca Bēngbe Bētsabe oservénēnga y tšēngaftanga cmontsabuaiyina ntšamo Bēngbe Bētsá yobena tšēngaftanga játsebacama ca!”

18 Y bayté chca enjanchembumbuana; chē causa, Pablo bonjétssetana y cabana, tonjanobuértana y chē bacna bayějbioye mēntšá tbonjaniyana: “¡Jesucristbe obenánaca y cha jótšēmbonēse, cbontsemánda chē tobiásbentšana chacuaisebocnama ca!”

Y cachora chē bacna bayēja chē tobiásbentšana tojésanbocna.

19 Pero, chē bayějbe juabna chábentšana tojésanbocnama y chēngbiama más crocénana jabemama chora chē tobiaše ndoñe yontsobenama, chē tobiaše nduiñēnga tmojáninýe ora, Pablo y Sílasbioye tmojánishēche y tmojtsanasjojoye plazoye, mandayēngbioye.

20 Chē mandayēngbioye tmojanēnatse ora, chēnga mēntšá imojtsichamo: “Quem boyabásata judío entšata bondmēna, y muatbe causa bēngbe pueblentša entšanga montsenbouenana, 21 y bontsabuatambá soyēnga jamama ntšamo chē judiēnga imuamancá y bēngbe leyēnguiñe chē soyēnga jamama ndoñe quenátslesenciana. Bēnga ndoñe quešnátamna ni jouenana, ni jamana chē soyēnga, romanēnga bétsemnayeca ca” — chēnga imojtsichamo.

22 Chora chē entšanga tmojanontsé uayebuáchana; as, chē mándayēnga tmojanamēndá chata entšayá jtsētsejquécana y niñēfjēngaca jtsachebuánganjana. 23 Jabuache tmojanachebuánganjentšana, cárceloye tmojanautame y chē utámenēnga shanyá tmojanmandá yejuana chaotsabuajēnyama. 24 Chca tmojanmandá ora, chē utamianá chata tojanēnatse chē más tsoye utámenoye y shecuatšentšana tsbuanēšiñe tojanatsebuá.

25 Pero tsēntseto orna, Pablo y Silas ibnétsocantañe Bēngbe Bētsá jétschuayama, y cháftaca ibnécuentaye; y chē inýe utámenēnga chca imojtsuenana. 26 Ndeolpe, corente jabuache yojsébánjua y chē utámena yebna fshantsocana yojsábonjnaye. Cachora, nyetsca chē utámenentša bēšašangá tojantēfjo y nyetsca utámenēnga chē cadenējuangá yojsayentšajfjona. 27 Pero chē

utámenënga shanyá tojanofšená y chë utámenentša bëšašangá yojsatëfjnama tojáninýe ora, cha tojanjuabó nyetsca utámenënga tmojtsanacheta ca; chë causa, chabe espadëja yojenosëngbotëntšena jtsenóitanama. <sup>28</sup> Pero Pablo tbojánbochembo: —¡Acbe cuerpo ndocá matenábomana; nyetscanga camuentše fsëndëtsomñe ca!

<sup>29</sup> Asna, chë utámenentša shanyá canýe uajuinýanësha tojanëyá y chë utámenoye ochamanana tojánamashëngo y auatja causa ngmëmnyáy Pablo y Sílasbe shecuatšentše yojoshëntsamentšiyë. <sup>30</sup> Chentšana tojtanëbuacna y tojanëyana: —Señórata, ¿ndayá šojtsemna jamama atše atsbočaná jtsemnama ca?

<sup>31</sup> Y chata tbojanjuá: —Bëngbe Utabná Jesúsbeñe cochtsošbuáchiye, y chca, Bëngbe Bëtsá aca cmochanjatsbocá y acbe yebnentše oyenëngnaca ca.

<sup>32</sup> Y cha y nyetscanga chë yebnentše imojtsemnënga, Bëngbe Utabnabe palabra tmojanabuayená. <sup>33</sup> Cach ora chë ibeta, chë utamianá chata tojanënatse chë lisianënguiñe jetsajabiamama. Chentšana, cha y chabe pamíllanga tmojánenabaye. <sup>34</sup> Chentšana, chë utamianá chata tojanënatse chabe yebnoye y saná tojanacaredadó. Cha y nyetscanga chë yebnentše oyenënga oyejuayënga imojtsemna, Bëngbe Bëtsábeñe imojtsošbuáchemama.

<sup>35</sup> Yëfsana cachëse, chë mandayëngna soldadënga tmojanichamó, chë utamianá jamándama Pablo y Silas chauatabáshejuanama. <sup>36</sup> Chë utamianá Páblëbioye tbojaniyana: —Chë mándayënga šmonjamandá tsëndata jtabáshejuanama. Chcasna, šontsobena natjëmbana jtsatoñana ca.

<sup>37</sup> Pero Pablo chë soldadënga tojanëyana: —Bëndátnaca fsëndmëna mo Romoca onýnanatcá derecho bomnata y šonjáchebuanganja entšangbe delante, bacna soyënga aiñe o ndoñe tatifjamama cabá ndinýanýiyë ora, y cárceloye šmonjautame. ¿Y mora imojtseboše iytëcana jtabáshejuanama? Chca ndocna te chaondëtsemna; cach mándayënga chamuabo jabátëbuacnama ca —cha tojánayana.

<sup>38</sup> Chentšana, chë soldadëngna chë mandayëngbeñe tmojanobuambá ntšamo Pablo y Silas tbojanayancá; chca chënga tmojántatšëmbona chatna mo Romoca onýnanatcá derecho bomnata ibnamnama; chë causa, chë mándayënga puerte imojtsauatja. <sup>39</sup> Chcasna, cach mándayënga tmojána chata perdón jatëtejañama; chentšana tmojtanëbuacna y tmojanëyana: “Diosmanda, muentšana inýe luaroye motsoñata ca.” <sup>40</sup> As chata chë utámenentšana tbojëftsanbocna y Lídiëbe yebnoye tbojëftsanata. Chentšna, Jesucristbeñe ošbuáchiyëngaftaca tmojánenefjna y chata

tbojánayana soyëngaca chëngbioye tmojanañemó. Y chentšana, chata ínÿoye tbojtsanoñe.

## 17

*Tesalónica puebloca, Pablo y Sílasbioye ndoñe tšabá tmonjanëbuaja*

<sup>1</sup> Pablo y Silas inÿe luaroye ibojtsaye ora, Anfípolis y Apolonia bëts pueblënguëjana tbojánachnëngo y canÿe bëts pueblo, Tesalónica ca uabáinoye tbojánashjango. Chentše, chë judiënga canÿe yebna imnabomna chënga jénefnama. <sup>2</sup>Páblëna, ntšamo enjanamancá, cada ochnayté chë jénefnama yebnoye yojánaye, unga semanëntscuana, y chentše chë judiëngaftaca yojanoyebuambná y imojánëtsëtsnaye. Bëngbe Bëtsabe uabemana palabrënguïñe iuayana soyëngaca, <sup>3</sup>chënga yojanabuayiyá y ndegombre yojaninÿanÿná, Bëngbe Bëtsabe Uámana Uabuayaná jóbanama y chentšana jtayenama ibojamnama. Y mëntsá yojanëtsëtsná: “Chë Cristo, Jesús endmëna, ndabiama atše cbontsabuyiyá ca.”

<sup>4</sup> Judiënguentsana báseftanga chiñe imojtsošbuáchiye y Pablo y Silas tmojanëseto más jouenama. Ba grieguënga, Bëngbe Bëtsá adórayënga, Jesucristbeñe imojtsošbuáchiye y ba uámana shembásengnaca. <sup>5</sup>Pero chë judiënga ndošbuáchiyënga chca tmojáninÿe ora, puerta envidia imojtsebmna. Asna, chënga tmojánachembo banga, tondaye amënga y bacna entšanga, y chënga tmojanenutaná jamama nÿetsca chë pueblentsa entšanga chamotsenbouénanama; y canÿe entšá, Jasón ca uabainabe yebna chënga tmojtsanabuache, Pablo y Silas jtsanguanguama, chentšana jesëbuacnama y entšangbe cucuatšihñe jabáshejuanama. <sup>6</sup>Pero chentše ndocná tmonjáninÿena; as chë entšanga Jasón imojtsejjoye y chentša mándayënga imojëtsemnoye tmojanánatse y Jesucristbeñe inÿe ošbuachiyëngnaca choye tmojanënatse, y mëntsá imojtsáyebuache: “¡Chë boyabásata, chë ndëmuanÿata ibojtsama nÿetsca luarentša entšanga chamuenbouénanama, quem luaróynaca tbojabo, <sup>7</sup>y Jasón chabe yebnentše chata tojúbuaja ca! ¡Chënga montsama ntšamo chë Romoca bëts mandadbe mandënguïñe ndoñe quenatslesenciancá, er chënga montsichamo inÿe rey canmëna, Jesús ca, y cha, César chë Romoca mandadbe cuenta nÿetscángbeñe yojtsemánda ca!” —chënga imojtsáyebuache.

<sup>8</sup> Chë entšanga y chë pueblentsa mándayënga chca tmojanuena ora, corente imojenbouénana. <sup>9</sup>Pero Jasón y chë inÿënga, cháftaca imojtsemnënga, crocénana tmojtanjajó, y as tmojtanabáshejuana.

### *Pablo y Silas Berea Puebloa*

<sup>10</sup> Ya ibeta yojtsemna orna, chë Jesucristbeñe ošbuáchiyënga tmojanma cachora Pablo y Silas Berea bëts puebloye chabuétsebocnama. Y chata choye tbojánashjango ora, chë judiëngbe enefjuana luaroye tbojánata. <sup>11</sup> Chentša judiënga imojamna más tšabe ainana bomnënga chë Tesalonicoca judiëngbiamá; chcasna, oyejuayënga chë buayenana soye Jesucristbiamá tmojanóyëngacñe, y cada te Bëngbe Bëtsabe uabemana palabra imojanalía, jtsetatšëmbuama, ntšamo Pablo y Silas ibojtsëtsëtnacá aínë o ndoñe ndegombre yojtsemnama. <sup>12</sup> Y chca, ba chentša judiënga chatbe palábraca Jesucristbeñe imojtsošbuáchiye, y Grecia luaroca ba uámana shembásenga y boyabásengnaca. <sup>13</sup> Pero, Pablo Bereoca chë Bëngbe Bëtsabe buayenana soyama entšanga yojsabuayiyname chë Tesalonicoca judiënga tmojántatšëmbona ora, chënga choye tmojána y tmojanma chentša entšanga chamuenbouéñanama. <sup>14</sup> Chcasna, banga Jesucristbeñe ošbuáchiyënga tmojanma cachora Pablo chentšana chauétsebocnama y bėjaye tsachoye chaotsoñama; chëntscuana, Silas y Timoteo Bereoca tbojanoqueda. <sup>15</sup> Pablo tmojantjëmbambá entšangna, Atenas ca uabaina bëts pueblóntsoñe cháftaca tmojána. Chentšana, Pablo chënga tojanabuayená chamuaišshëconama Silas y Timoteo jaúnayama betesco jtsayana, Pábloftaca jateninýenama.

### *Pablo Atenas puebloa*

<sup>16</sup> Pablo Atenas bëts puebloa Silas y Timoteo yojsëbatmanëntscuana, puerte tbojanongmé, er cha tojáninýe chentša entšanga imojtsadorana bëtscá cachëngbe pormana soyënga, ndayama chënga imojanjuabná diosënga yojamna ca. <sup>17</sup> Chíyeca, chë judiëngbe enefjuana yebnentše, judiënga y ndoñe judiënga Bëngbe Bëtsá adorayëngaftaca imojánenatsëtsnaye, y cada te chentša plazoca chë ndëmuanýënga chentše imojanashjauanëngaftácnaca. <sup>18</sup> Y báseftanga, ntšamo jtsejuabnayama entšanga abuátambayënga, epicureunga y estoiquënga ca uabainëngnaca Pábloftaca imojánenatsëtsnaye. Inýënga imojtsichamo: “¿Ndayama quem bostero yojtsoyebuambná ca?” Y ínýënga: “Chana inýe luarëngoca entšangbe diosëngbiamá muentše entsabóyebuambnaye ca.”

Chënga chca imojtsichamo, er Páblëna Jesusbiamá y chë obanënga jtayenama yojanoyebuambná. <sup>19</sup> Asna, chentša entšanga cha tmojanánatse canýe luaroye, entšanga jénefnama y oyebuambnayënga joyaunayama luare, Areópago ca uabáinoye. Chentše imojanamana uámanënga jénefnana, nderado ndabiamá jayanama tšabá



o ndoñe tšabá tonjamama. Chora Pablo tmojantjá: —¿Chë aca contsabuatambá soyënga ndayá bétsayanana bënga quefstsobena jtsetatsëmbuama ca? <sup>20</sup> Aca tsëm soyënga šcontsëtsësná y bënga fsëntseboše jtsetatsëmbuana ndayá chë soyënga bétsayanana.

<sup>21</sup> Er nÿetscanga Atenasentša oyenënga y inÿe luarëngocana áshjajnëngna, corente yojanogúsetana chë tojtsopasana tsëm soyëngama jtsuenanana y jtsencuéntayana.

<sup>22</sup> As Pablo tojantsá chëngbe tsëntsaca chë Areópago ca uabáinentše y tojánayana: —Atenasentša entšanga: ntšamo bominÿe sënjajajcá, atše sëntsetatsëmbo tšëngaftanga ba diosënga puerte šmayaunana y šmadoránama. <sup>23</sup> Atše sëndánrreparana tšëngaftangbe diosënga šmétsadorana luarënguenache y sënjínÿena canÿe altar y chentše mëntšá iuábemana: “Chë Bëtsá nduabuatmabiana ca”. Y morna, chë Bëtsá chë nda ntsabuatmcá šmadoránabiana, atše cbontsabuaiyná.

<sup>24</sup> “Chë Bëtsá quem luare y lempe ntšamo chentše yomncá tojanma; cha endmëna quem luarentše y celoca Utabná, y cha ndoñe quenatiyena cha jadórama entšangbe jebna yebnënguiñe, <sup>25</sup> ni quebnatájaboto ndocná chabiana tondaye chaondëtsama, er cha endmëna nda inétsama bënga vida chamotsebomnama y jtseshachnayama chamotsobenama, y cha nÿetsca soyënga šnetsatšatnaye.

<sup>26</sup> “Cha nÿe canÿe boyabásabentšana nÿets luarënguentša entšanga tojánabiana, nÿets quem luarentše chamotsiyenama; y cha quem soyënga cabá ndëma ora, tojanjuabó mocna ora y ndayentše entšanga chamuetsiyenama; <sup>27</sup> chca, Bëngbe Bëtsá chamonguanguama, masque chabiana ndoñe corente tmontsetátšëmbo, y chamuinÿena y chábeñe chamotsošbuáchema; pero ndegombre, Bëngbe Bëtsá bëngbentše cada cánÿabentšana ndoñe bënoca quenátsmëna. <sup>28</sup> Ntšamo canÿa tojanayancá: ‘Bënga Bëngbe Bëtsáftaca cánÿiñe mo canÿacá mondmëna; chábeyeca bënga vida mondbomna, jobónjuama mondbena y ainënga mondmëna ca’. Ntšamo tšëngaftanguentša báseftanga bëts soyëngama uabiamnayëngnaca tmojanayancá: ‘Bënga nÿetscanga Bëngbe Bëtsabe básenga mondmëna ca’. <sup>29</sup> Y chcasna, Bëngbe Bëtsabe pamíllanga bënga tmomnëse, ndoñe quešnátamna jtsejuabnayana Bëngbe Bëtsá yomna mo cach entšangbe castellano, midio o chë ndëtsbeca pormana soyëngcá ca, er chë soyëngna nÿe ntšamo entšanga tmojajuabocá y tmojtsobencá japórmana. <sup>30</sup> Pero Bëngbe Bëtsá tojanjuabó ndoñe ntjatónÿayana chë entšangbe tempsca ndosertánana, y morna, nÿetsca luarënguentša entšanga entsamënda, ndaye

bacna soyënga tmojtsamama ngménaca chamuenojuabó, chca amama chamotsajbaná y Bëngbe Bëtsabe benache chamuatishache ca. <sup>31</sup> Bëngbe Bëtsá canÿe te tojuinÿaná, y chë tena, ndocnábioye ínÿabiamá más tšabá ntjatonÿaycá, cha echanjayana entšanga tšabá o ndoñe tšabá tmonjamama; lempe chca cha echanjama canÿa cachá tbojabocacá entšáftaca, Jesús; y chca yochtsemnamna, Bëngbe Bëtsá entšanga tojinÿanÿé, chë bocacaná Jesús cháuatayenama cachá tojánmayeca ca” —Pablo tojánayana.

<sup>32</sup> Chë obanënga mochtayenama ichámuana chë entšanga tmojanuena ora, báseftanga Pablo imojtsáboyejuana, y ínÿengna mëntšá imojtsichamo: —Bënga fsëntseboše chë contsichamo soyënga más chcoye cachiñe jatuenama ca.

<sup>33</sup> As Pablo chëngbentsana tojésanbocna. <sup>34</sup> Pero báseftanga aíñe Jesucrístbeñe imojtsošbuáchiye y Pablo tmojanasto más jatuenama; chënguentše imojamna Dionisio, canÿa chë Areopagoca tbiamanënguentšá; canÿe shembásanaca, Dámaris ca uabaina, y ínÿenga.

## 18

### *Pablo Corinto puebloca*

<sup>1</sup> Chë soyënga tojanochnëngüentsana, Pablo Aténasentsana Corinto bëts puebloye tojána. <sup>2</sup> Chocna, canÿe judío Ponto luaroca onÿnanáftaca tbojáneninÿena, Aquila ca uabainá. Cha y chabe shema Priscila, cabá chora cuenta Italia luarocana tbojánabo, nÿetsca judiënga Romocana chamuáisebocanama choca bëts mandado Claudio tojanmandá causa. Pablo tojána chata jautsëtsayama, <sup>3</sup> y ntšamo chata jamama Páblënaca jamama inatátšëmboyecna, chátaftaca yojtsoquedañe y cánÿiñe chënga imnatrabájaye; chënga imnatátšëmbo mo tambotemëngcá entšëjuaca japórmana. <sup>4</sup> Y nÿetsca ochnayté, Pablo yojanamana chentša judío entšangbe enefjuana yebnoye jana, Bëngbe Bëtsabe soyëngama jóyebuambayama, y puerte yojtsentsena judiënga y ndoñe judiënga chamotsošbuáchema, ntšamo cha yojtsanëtsëtsnacá ndegombre bëtsemnama.

<sup>5</sup> Silas y Timoteo Macedoniocana choye tbojánashjango ora, Pablo nÿets tempo Bëngbe Bëtsabe soyëngama entšanga yojtsabuayiyayey y puerte tšabá chë judiënga yojaninÿanÿná, Jesús ndegombre Bëngbe Bëtsabe Uámana Uabuayaná bëtsemnama. <sup>6</sup> Pero chë judiënga Páblëbe contra imojtsemna y tmojanontsé podesca chabiamá ichámuana. Asna, Pablo chabe uichëtjoniyangá yojtsenántšasajajaye, chënga jinÿanÿiyama chënga ndoñe tšabá tmonjánchjanguama, y tojanëyana: “Tšëngaftanga ndatsebácanënga chašmojóbanëse,

cach tšëngaftanga šmochtsótatsëmbñe; atšna ndoñe. Mëntescana chë ndoñe judiënga jábuayenama chantsoñe ca.”

<sup>7</sup> Chorna, chë judiëngbe enefjuana yebnentšana tojftsanbocna y canye boyabása, Ticio Justo ca uabainábioye tojtsanoñe. Cha Bëngbe Bëtsábioye ibojánadorana y chë enefjuana yebnentša juachaca inoyena. <sup>8</sup> Y Crispo, canye chë enefjuana yebnentša mandayá, Bëngbe Utabná Jesucristbeñe yojtsošbuáchiye y nyetsca chabe pamíllangnaca; y banga chë Corintentsëgnaca Jesucristbeñe imojtsošbuáchiye, Pablo yojtsoyebuambná ora; y chënga tmojánenabaye. <sup>9</sup> Canye ibeta, Bëngbe Bëtsá Páblëbioye mo canye otjenayoquécá tbojaniyana: “Ndoñe matauatjana; nye cochtsana atšbe soyëngama oyebuambnaye y ndoñe iytëca cattsemana. <sup>10</sup> Er atše ácaftaca sëntsemna y ndocná quemochátsbojajo ntšámnaca jáborlama; atše bëtscá entsanga quem pueblentše sëndábamna ca.” <sup>11</sup> Chcasna, Pablo Corintentsë canye uata y chnënguana shinye tojanototóná, Bëngbe Bëtsabe palabra entsanga abuátambaye.

<sup>12</sup> Pero, Galión chë Acaya luarentša mandado inamna orna, chë judiënga imojenóyeunaye Páblëbe contra; cha tmojánishache y chë tribunaloye tmojánanatse. <sup>13</sup> Chocna, chë mandado tmojaniyana: —Mua entsanga entsëtsëtsná y entsama chënga Bëngbe Bëtsá chamotsadorana, pero ndoñe ntšamo bëngbe leyënguiñe endayancá ca.

<sup>14</sup> Pablo jóyebuambayama uatajanóntša orna, Galión chë judiënga tojanéyana: —Quem entsá nderado ínÿabioye matbënjóba o ndayánaca chca matënjobuachjanguá, as cocayé atše matijótbema tšëngaftanga judiënga yejuana joyaunayama; <sup>15</sup> pero ntšamo šmotsichamcá entsemna nye buatëmbana soyëngama, nye tšëngaftanga šmëbuatma entsangbiana y cach tšëngaftangbe leyëngama; chcasna, cach tšëngaftanga cmontsamna jenóyeunayana y jamana ntšamo chašmojenoyeunacá. Atše quem base soyëngama ndoñe quetsátsboše ngoberna jtsemnana ca.

<sup>16</sup> As Galión tojanamëndá chë tribunal luarentšana chë judiënga jtëbuacnama. <sup>17</sup> Chorna, chë entsanga tmojánishache chë judiëngbe enefjuana yebnentša mandayá, Sóstenes ca uabainá, y Galionbe delante imojtsejantšetaye. Pero Galión chë soye tondayana ibontsentšamna.

*Pablo Antioquiye tojtaná y chentsana cachiñe inye lu-  
arëngoye tojána, Bëngbe Bëtsabe trabajo jamama*

<sup>18</sup> Pablo cabá bayté Corintentsë tbojántotona. Chentsana, Jesucristbeñe ošbuachiyëngbentsana tojesanodiošoftá y bejaycá Siria luaroye tojána, Priscila y Aquílaftaca. Cabá Sirioye nda ora, Cencrea puebloca nyets stjénashe

yojtsenátsbotje, Bëngbe Bëtsábioye jinÿinÿiyama canÿe soye tbojansbuáchenama. <sup>19</sup> Efeso puebloye tmojánashjajna ora, Páblëna Priscila y Aquila tojésanabashejuana. Chentšana, cha tojána chë chentša judiëngbe enefjuana yebnoye y chentše chë judiëngaftaca yojanoyebuambná y imojánenatsëtsnaye. <sup>20</sup> Báseftanga Pablo tmojanimpadá inÿe baseftayté chentše chauesomñama, pero chana ndoñe tonjanoyauná; <sup>21</sup> chentšana, chëngbentšana tojesanodiošoftá, mëntšá jëftsëyanëse: “Nderádose cachiñe chantésabo tšëngaftanga jabábuachama, Bëngbe Bëtsá šojalesenciase ca.”

Chora, Pablo bejaycá Efesocana tojëftsanbocna. <sup>22</sup> Cesarea puebloye tojánashjango ora, tojána jacheuayama Jesucristbeñe ošbuáchiyënga Jerusalenoca; y chentšana Antioquiye tojána. <sup>23</sup> Chentše baseftayté yojëftsemna; y chentšana, Pablo tojesaná Galacia y Frigia luarënguenache, Jesucristbeñe ošbuáchiyënga añemo atšatnaye.

*Apolos, Efeso puebloca Bëngbe Bëtsabe soyëngama yojanabuayiná*

<sup>24</sup> Cach tempo, Efesoye tojánashjango canÿe judío, Apolos ca uabainá, Alejandría bëts pueblocá; cha puerta obená inamna jonguamiyama y corente inatátšëmbo Bëngbe Bëtsabe uabemana palabrëngama. <sup>25</sup> Bëtscá tojánatsjinÿe chë Bëngbe Utabná tojaninÿanÿé benachama; añémoca yojanoyebuambná y Jesusbe soyëngama botamana yojanabuatambá, masque cha nÿe ntšamo Juan entšanga tojánabuatambama y tojanëbáyama inatátšëmbo. <sup>26</sup> Ndauatjca Apolos tojanontsé jóyebuambayama chë judiëngbe enefjuana yebnentše. Pero Priscila y Aquila cha imojóyeunaye ora, barie tmojanchembo y más botamana tmojanbuayená, ntšamo Bëngbe Bëtsabe inÿinÿena benache bëtsemnama. <sup>27</sup> Apolos Acaya luaroye jama yojtseboše orna, Jesucristbeñe ošbuáchiyënga bëtscá tmojanañemó y choca Jesucristbeñe ošbuáchiyëngbiamama canÿe tsbuanácha tmojanichmó, chca, Apolos choca tšabá chamofjama. Acaya luaroye tojánashjango ora, Jesucristbeñe ošbuáchiyënga bëtscá tojanëjabuache. Bëngbe Bëtsá chëngbe tšabiamama yojanjuabnáyeca, chënga Jesucristbeñe corente imojtsošbuáchiye. <sup>28</sup> Entšangbe delante chë judiëngaftaca jabuachana imojánenatsëtsnaye y nÿetscanga tojaninÿanÿé, ntšamo ndoñe tšabá inamncá chë judiënga imnatatšëmbuama; y Bëngbe Bëtsabe uabemana palabrëngaca chënga tojaninÿanÿé, Jesús Bëngbe Bëtsabe Uámana Uabuayaná bëtsemnama.

## 19

*Pablo Efeso puebloca*

<sup>1</sup> Apolos Corintoca yojtsemnëntscuana, Páblëna chë tjañe luarënguëjana tojánachnëngo y Efesoye tojánashjango; chentşe básefta oşbuáchiyënga tojánanyëna, pero chëngna nÿe ntşamo Juan chë Ubayaná tojanabuatambacá imnatátşëmbo. <sup>2</sup> Pablo chënga tojanatjá: —¿Uámana Espíritu chenjánabo tşëngaftangbe ainaniñe jtsemándayama, Jesucristbeñe oşbuáchiyënga şmojanóbiama ora ca?

Chora chënga tmojanjuá: —Ni mo queftsátstatsëmbo chë Uámana Espíritu yomnama ca.

<sup>3</sup> Y Pablo tojanëyana: —As, ¿ntşamo şmojánenabaye ca?

Y chënga tmojanjuá: —Fsënjánenabaye ntşamo Juan entşanga yojanëbayancá ca.

<sup>4</sup> As Pablo tojanëyana: —Juan tojanëbaye chë bacna soyënga amama ngménaca tmojanenojuabó, chca amana tmojanajbaná y chë Bëngbe Bëtsabe benache tmojánishachënga, y entşanga yojanëtsëtsná chë chábensana yochjanashjanguábeñe chamotsoşbuaché ca; y cha Jesús endmëna ca —Pablo tojánayana.

<sup>5</sup> Chca tmojanuena ora, chënga tmojánenabaye Bëngbe Utabná Jesús jótşëmbonëse, chábeñe imojtsoşbuáchema.

<sup>6</sup> Pablo chëngbe bestşasiñe chabe cucuatşënga tojanajó ora, Uámana Espíritu chëngbe ainaniñe tojánamashëngo jtsemándayama; tmojanontsé inÿetşá biyangana, chënga tempo ndmabiyañe, y Bëngbe Bëtsabe juabna imojtsoyebuambná. <sup>7</sup> Chentşe imojtsemna bnëtsana uta entşanga.

<sup>8</sup> Unga shinÿëntscuana Pablo yojánaye chë judiëngbe enefjuana yebnoye y ndauatjá Jesucristbe soyëngama yojanoyebuambná; entşángaftaca imojánenatsëtsnaye y entşanga yojanëtsëtsná Bëngbe Bëtsabe amëndayama, chënga chábeñe chamotsoşbuáchema. <sup>9</sup> Pero ba nduauenanënga ndoñe imontsoşbuaché y Bëngbe Utabná tojaninÿanyé Benachama entşángbeñe bacna soyënga imojtsichamo. Chcasna, Pablo chëngbentsana tojtsanojuánañe y nÿe chë Jesucristbeñe oşbuáchiyënga tojanëbuaja canÿe scueloye, canÿe entşá Tirano ca uabainabe yebnoye. Chentşe cada te chë ouenanëngaftaca yojanoyebuambná, <sup>10</sup> y chca yojánama uta uatëntscuana; y chca, nÿetscanga Asia luaroca oyenënga Bëngbe Utabnabe palabra tmojanuena, judiënga y ndoñe judiëngnaca. <sup>11</sup> Y Bëngbe Bëtsá puerte bëts soyënga Pábloftaca yojtsama. <sup>12</sup> Tşa bëts soyënga tojanma; chíyeca, nÿetsca chë Pablo tojuabojajo entşayá y pañuelëjuangá, entşanga imojanamana şoquëngbioye juyambana, y chca tmojama

orna, chë šocanënga juenatjëmbana y chë bacna bayëjënga entšangbentšana jésebocanana.

<sup>13</sup> Pero básefta judiënga tsáshenañe bacna bayëjënga entšangbentšana imojtanëbuacana. Chë judiënga imojtseboše chë bayëjënga jtëbuacnana, Bëngbe Utabná Jesús jótšëmbonëse. As, chë bacna bayëjëngbioye mëntšá imojtsëtsësnaye: “Bëngbe Utabná Jesús, Pablo bondbetsebayaná jótšëmbonëse y chabe obenánaca cbontsamënda muabentšana chašmuaisebocnama ca.”

<sup>14</sup> Chca imojánama chë judío Esceva ca uabainabe canÿsëfta uaquiñënga. Esceva inamna bachnangbe amëndayá. <sup>15</sup> Pero canÿe, Escévëbe uaquiñënga chca tmojánayana orna, chë bacna bayëja mëntšá tojanëjua: “Atše Jesús sënduábuatma y sëndëtatšëmbo nda Pablo yomnana; pero tšëngaftanga, ¿ndëmuanÿënga šmomna ca?”

<sup>16</sup> As, cachora chë bacna bayëjbe juabna uambayá chëngbioye tojanontsënja y tša añemo bomná bëtsemnayeca chënga tojtsanayëñjaná, jabuache jtsajantšëtaÿëse; chë causa, chënga chë yebnentšana tmojtsanacheta enašënga y lisiánënga. <sup>17</sup> Nÿetscanga Efesoca oÿenënga, judiënga y ndoñe judiënga, chca tmojántatšëmbona y corente imojtsanauatja. Y chca, Bëngbe Utabná Jesús entšanga más imojtsatschuanaye.

<sup>18</sup> Jesucristbeñe imojtsošbuachiyënguentšana, banga imojánashjajuana y entšangbe delante imojtsecompšaye, tempo bacna soyënga tmojanmama; <sup>19</sup> banga, chë bocjuanana soyënga jamama imojanëntšénënga, chëngbe bocjuanana librëšangá tmojaniyëbo y entšanga imojtsantješna ora, chëšangá imojtsajuinÿiye. Tmojanjuabó ntsachetšá chë librëšangá betšámanama y tojanóbocna shachna bnëtsana uaranga crocénana nÿetšá. <sup>20</sup> Y chca, Bëngbe Utabnabe palabra más ba entšanga imojtsuenana y chiñe imojtsošbuáchiye y Bëngbe Bëtsá chabe obenana entšangbeñe yojtsinÿinÿnaye.

<sup>21</sup> Chca tojanochnëngüentšana, Pablo tojanjuabó Macedonia y Acaya luarënguëjana jachnënguse, Jerusalenoye jésama. Y yojtsejuabnaye cha ibojtsemna Jerusalenentšana Romoye jama ca. <sup>22</sup> Asna, chabe uajabuachanënguentšana útata, Timoteo y Erasto, Macedonioye cha tojanichamó. Chëntscuana Pablo baseftayté más Asia luarentše tbojanjëtana.

### *Efesoca entšanga tmojánënbouenana*

<sup>23</sup> Chë tempo, Efesoca entšanga corente tmojánënbouenana, chë Bëngbe Utabná yojtsinÿanÿná Benache imojtsisháchichanëngbe causa. <sup>24</sup> Chë entšanga chca tmojanma, er canÿe entšá mídioca soyënga pormayá, Demetrio ca uabainá, chënga tojanayëñjaná chca jamama. Cha yojanamana

binche soyetémenga japórmana y chëtémenga yojáninÿna mo chë Efeso puebloquëngbe diosá Artemisa jadórama bëts yebncá. Demétrioftaca imojantrabájangna bëtscá crocénana imojanójacañe chë soyetémenga eniñe. <sup>25</sup> Demetrio tojanëbuaja cháftaca imojantrabájanga y ínÿenga cach mídioca soyënga pórmayënga, y mëntšá tojanëyana: “Baconga, tšëngaftanga šmondétatsëmbo, bënga bëtscá crocénana jtsebomnamna quem trabajuentsana chca jopódiana. <sup>26</sup> Pero tšëngaftanga šmontsonÿá y šmontsuenana ntšamo chë Pablo ca uabainá yojtsichamcá. Cha entsichamo, chë entsangbe pormana soyënga ndoñe yontsemna jtsadoránana ca; y chca ba entsanga tojabuayená y chënga aíñe montseyeunana. Chë soyna ndoñe nÿe muentše Efesentše chca quenátopasana; nÿets Asia luaríñnaca chca entsopasana. <sup>27</sup> Resjo entsemna; chca causa, entsanga bëngbe trabajuama ndoñe tšabá quemochátichamo y chë uámana Artemisa jadórama bët yebnama mochántichamo uámana yebna ndoñe yondmëna ca. Y chca, Artemisbe obenana entsanga mochantsábotena y Artemisa ndoñe bañe quemochátuabatma, nda Asientše y nÿets luaríñnaca mondadorana ca.”

<sup>28</sup> Chca tmojanuena ora, chca pórmayënga puerte tojánetëna y tmojanáyebuachena: “¡Efesoquëngbe Artemisa corente bëtšá endmëna ca!”

<sup>29</sup> Y chca, nÿetsca chë pueblentša entsanga tmojánenbouenana. Tmojanotabá Gayo y Aristarquëbioye, Macedonioca boyabásata, Páblëbe tjëmbambnayata; y sjojónana tmojanënatse chëngbe enefjuana yebnóntscoñe. <sup>30</sup> Pablo tojánbošena choye jamashënguama chë entsángaftaca jóyebuambayama, pero Jesucristbeñe ošbuáchiyënga ndoñe tmonjanlesenciá. <sup>31</sup> Chë Asioca mándayëngbentše báseftanga imnamna Páblëbe amiguënga, y chënga Páblëbioye palabra tmojanafja chë jénefnama yebnoye ndoñe chaondámashënguama.

<sup>32</sup> Chëntscuana, entsanga imojtsejotonocna, ínÿenga imojtsechembumbuana canÿe soye y ínÿengna inÿe soye, chënga corente imojtsenbouenana causa, y banga chentše imojtsemnënga ndoñe imontsetátšëmbo ndayama choye tmojanobéconama. <sup>33</sup> Pero básefta judiënga, canÿe entšá, Alejandro ca uabainá, chë entsangbe natsanoye tmojanajuatsëntše, y báseftanga cha tmojanbuayená ntšamo yojtsopasánama. Asna, Alejandro tojánefjatšëmbo cucuátseca iytëca chamobiamama, er cha yojtseboše entsangbe delante chë judiënga jobuauyanama. <sup>34</sup> Pero, Alejandro judío bemnama chë entsanga tmojántatsëmbona ora, nÿetscanga

tmojanáye buachena uta horëntsçuana, mëntšá: “¡Efesoquëngbe Artemisa corente bëtsá endmëna ca!”

<sup>35</sup> Chë pueblentša mándayëngbe uajabuachaná, entsanga iytëca jábiamama tojanobená ora, tojanëyana: “Efesoquënga, nyëts luariñe endótatsëmbo, quem pueblentše oyenënga iuamna jtsinÿenana chë Artemisa jadórama bëts yebna y chë cha jadórama celocana otsatsëna ndëtšbé. <sup>36</sup> Ndocná quenátobena chama jayanama ndoñe ndegombre yondmëna ca. Chcasna, natjëmbana motsomñënga y tondaye matamëngana corente tsabá ntjshajuaboycá. <sup>37</sup> Tšëngaftanga quem boyabásenga moye šmojunatse, masque Artemisbe yebnentše tondaye tmonjatlëba y bëngbe Artemisbiana ndoñe podesca tmonjoyebuambá. <sup>38</sup> Demetrio y cháftaca šmotrabájanga, nderado ndabiama ndaye demanda šmojtse bomnëсна, cabildoca endatëfjna y chentše mándayënga montsemna chë demandënga jouenama, y chëngbentše cada ona šmochjëftsendemánda. <sup>39</sup> Y tšëngaftanga inÿe soye šmojtsenguasna, cmontsamna ntšamo bëngbe leyënguiñe yomandancá, nyëtsca quem pueblentše oyenëngaftaca jenóyeunayana. <sup>40</sup> Ndayá mënté tojopasá causa, resjo entsemna bëngbiana chamuayana, ntšamo leyënguiñe yomncá bënga ndoñe montsama ca; y bënga ndoñe quemuátobena ndayá jojuana, ndáyeca quem enbouenanana tojopasá ca šojátjayëse ca” —cha tojanëyana. <sup>41</sup> Y chca jayanëse, chë entsanga tojtanichamó.

## 20

### *Pablo, Macedonia y Grecia luaroye tojána*

<sup>1</sup> Chë enbouenanana tojanochnëngo ora, Pablo chë Jesucristbeñe ošbuachiyëngbioye tojanëbuaja jábuayenama, añemo chamotsatsbomnama; tojesanodiošoftá y Macedonioye tojëftsanbocna. <sup>2</sup> Chë luarënguëjana cha tojánachnëngo Jesucristbeñe ošbuáchiyënga becá añemo atatšatnaye, ba chabe palabréngaca; chentšana, Grecia luaroye tojánashjango, <sup>3</sup> y chentše unga ishinÿe tojanoquedá. Barquëshañe Sirioye játama Pablo yojtseprontana orna, tojántatsëmbona chë judiënga cha jtsóbama tmojanenóyeunama. Asna, tojanenojuabó jesshéconama, cach Macedonia luarëjana jésachnënguse. <sup>4</sup> Pablo quem boyabásenga tmojantjëmbambá: Sópater, chë Bereocá, Pirrbe uaquiñá; Aristarco y Segundo, Tesalónicocata; Gayo, Derbe pueblócá; Timoteo; y Tíquico y Trófinnaca, Asia luarocata. <sup>5</sup> Chënga tmonjanonatsé y šonjanëbatma Troasoca. <sup>6</sup> Chë levadúraca ndëpormana tandëse saye fiestentšana, Filíposentšana barquëshañe fsënjëftsanbocna y shachna tianoje, Troasoca



chë tmonjanonatsenga fsëntanishëche, y chentše canýe semana fsënjanoquedanga.

*Ntšamo tojanopasá Troas puebloca*

<sup>7</sup> Chë inýe semana jobojátsama te, fsënjánenefjna Jesucristbeñe ošbuachiyëngcá tandëse jajátayama, cánýiñe jasama; y Pablo entšanga enjétsëtsësnaye. Cha bonjamna yëfsana chentšana jëftsebochnana; chë causa, más bën chëngaftaca tonjanoyebuambá, tsëntsetëntscuana. <sup>8</sup> Fsënjamna canýe tsoye tsbanana tsañoca y chentše ba uajuinýanëshangá enjanamna; <sup>9</sup> y canýe bobontse, Eutico ca uabainá, ventanentše enjántbemana. Pablo bën enjanoyebuambná causa, chë bobontse ocnayana tbojanábuache. Cabana, corente tojtsanomaná ora, chë unga tsañocana tontsanótsatše y obaná chora tmontanatsbaná. <sup>10</sup> As, Pablo tonjánastjango, chë bobóntsbioye tbonjanotsbuajó y tbonjanotsejcuá. Y chë entšanga tonjanéyana: “Ndoñe nýetšá matauatjëngana; ainá cha entsatsmëna ca.”

<sup>11</sup> Chentšana Pablo cach tsbanánoye tonjesaná y tandëse tonjanjatá, jtenójuaboyama ndayá Jesús jóbanëse tojanmama. Chora Pablo chë entšángaftaca tonjanse y tontëtanontšë oye-buambnayana, jabinýnëntscuana. Chora Pablo chentšana tontsanoñe. <sup>12</sup> Y chë otsatšena bobontsna ainá imojtsatánatseñe, y chama chë entšanga corente oyejuayënga imojtsemna.

*Pablo Troasentsana Mileto puebloye tojána*

<sup>13</sup> Bëngna fsënjanonatsé y barquëshañe fsënjána Aso pueblóntsoñe, chentšana Pablo jtesbetšama, ntšamo fsënjanenoyeunacá, er Pablo tonjánbošena fshantscá choye jana. <sup>14</sup> Asoca Pábloftaca fsëntaneninýena ora, bëngaftaca barquëshañe cha tonjána Mitilene puebloye. <sup>15</sup> Chentšana fsënjëftsanbocna y yëfsana Quío luarëjana fsënjánachnëngo, y chë inýe yëfsana Samos luaroye fsënjánashjajna. Chentšana fsënjána y yëfsana Mileto puebloye fsënjánashjajna. <sup>16</sup> Chca tonjanochnëngo er Pablo ndoñe chenátanbošena Efesoye jama, Asia luariñe ndoñe yapa ndétsemnama. Chca tojánbošena er cha enjëtseboše betsco Jerusalemoca jtsatsmënana, tojopodesna chë judiëngbe fiesta, Pentecostés ca uabaina fiestama.

*Ntšamo Pablo chë Efesoca ošbuachiyëngbeñe bëtsëjemëngcá mándayënga tojanéyana*

<sup>17</sup> Miletocana Pablo tonjanmandá chë Efesoca ošbuachiyëngbeñe bëtsëjemëngcá mándayënga jobiatšana. <sup>18</sup> Chënga tmonjánashjajna ora, Pablo tonjanéyana: “Tšëngaftanga šmondétatšëmbo ntšamo atše quem

Asia luaroye sēnjabánashjango orscana tšēngaftangbeñe snetsamana. <sup>19</sup> Njēts tempo Bēngbe Utabná sēndēserveda y cach atše uamaná ndoñe quetsatenobiamná. Corente shēchbuiye tijētsoperdé y ba soyēnguiñe tijasufri, chē judiēnga atše jóbama mondboše causa. <sup>20</sup> Y lempe ntšamo tšēngaftangbe tšabiamá yomncá tčbonjabuayená; tondaye ntjatsbuetamencá. Njētschangbe delante sēnjabuatambá y tšēngaftangbe yebnēnguenáchnaca. <sup>21</sup> Judiēnga y ndoñe judiēnga Bēngbe Bētsabe soyēngama sēnjabuayená, bacna soyēnga amama ngmēnaca chamuenójuaboma y chca amana chamotsajbanama, Bēngbe Bētsabe benache chamuishachama y Bēngbe Utabná Jesúsbeñe chamotsošbuáchema. <sup>22</sup> Y mora Jerusalenoye chanjá; Uámama Espiritu chca šontsemánda y ndayá choca chjapásamna ndoñe quetsátstatšēmo. <sup>23</sup> Njē mēntšá aíñe sēndētátšēmo: Njētsca bēts pueblēnguenache ndayējana atše chandbētsana, Uámama Espiritu šondbētsebuaiynaye entšanga cašmochjutame y puerte chaisufrima camochjama ca. <sup>24</sup> Atšbe vida cach atšbiamá ndoñe yapa quenatámama, chaitsaina o chayóbana. Pero atšbiamá iuámanana endmēna ndayá atše jobenayana atšbe trabajo jēftsepochócana, ndayá Bēngbe Utabná Jesús šojanmandá jamama, chē tšabe noticiēnga Bēngbe Bētsá entšángaftaca tšabia yomnama jábuayenama.

<sup>25</sup> “Y mora atše ndegombre sēntsetátšēmo, tšēngaftangbentšana, chē ndēmuanjēngbentše Bēngbe Bētsabe amēndayama sēnjabuayená, ndocná atše más quešmochátinje. <sup>26</sup> Chiyeca, atše ndegombre mēnté cbetséyana: Atše tondaye quetsátstatšēmo nderado nda ndatsbocaná chaojóbanabiamá, <sup>27</sup> er atše ntšamo Bēngbe Bētsá jamama yojuabnacá lempe tčbonjabuayená, tondaye ntsebuetamencá. <sup>28</sup> Chcasna, cach tšēngaftangbiamá šmochtsantješna y njētscanga muentše Jesucristbeñe ošbuachiyēngbiámna. Chēngbeñe mo chēngbe abujēnyāngcá Uámama Espiritu tčmonjajayé, Bēngbe Bētsabe entšanga chašmotsanjenama, chēnga Bēngbe Bētsá chábenga tojábiamá, chabe Uaquiñabe buiñe juabuáshanēse y jóbānēse, mo bētská cuafjopagacá. <sup>29</sup> Atše sēntsetátšēmo, atše chaitsoñe orna, banga mochanjabo y chēnga mochántsemna mo corente tšátjaye tjañe quešēngcá, Jesucristbeñe ošbuáchiyēnga chábeñe ošbuáchiyana chamotsajbanama chēnga jamama. <sup>30</sup> Y tšēngaftangbentšánēnaca báseftanga mochanjábocana y entšángbioye uayátsenaye soyēnga mochanjabuatambá, chca, báseftanga Jesucristbeñe ošbuáchiyēnga chē injēngbentšana chamotsoluarema y njē chē abuatambayēngbioye chamotsésetonama. <sup>31</sup> Chcasna,

sempre šmochtsantješna; ndoñe chacmondébnětjomba, atše unga uatěntscuana, bněté y ibeta, tšěngaftanga cada ona cbondétsabuayiyname y chama atše puerte tijasufrí.

<sup>32</sup> “Y morna, Jesucristbeyeca catšátanga, Běngbe Bětsabe cucuatšíně cbétsabashejuana y ntšamo tšěngaftangbiama chabe tšabe juabna yomname palabrěngaca, tšabá chašmuesomñe. Cha endobena jamama tšěngaftangbe ainaniñe más chašmotsošbuáchema, y endobena tšabe soyěnga tšěngaftanga jatšatayama, ndayá jatšatayama tojanašebuachenacá mo tšěngaftangcá entšángbioye, nděmuanjěnga cha tojáchembo chabe entšanga chamotsemnana. <sup>33</sup> Atše ndocnabe crocénana, o castellano o entšayá atšbiama quetsatántšaboše; <sup>34</sup> más injětšá, y tšěngaftanga lempe šmondětatsěmbo, atše cach atše cucuatšeca tijěftsetrabajama, atšbiama y átšeftaca imojamněngbiama opresido enjamna soyěnga janguanguama. <sup>35</sup> Atše njěts tempo sěndinjanjěná entšá chca ibomname, chě jabuache jatrabájana y chě ujabótěnga jujabuáchana, quem Běngbe Utabná Jesusbe palabrěngama sempre jtsejuabnayěse: ‘Canjě entšá más oyejuayá jtsemnana ndayánaca injábioye tbojtsatšetná ora, y injábioye tbojtseyěngacá ora ndoñe njá njětšá ca’ ” —Pablo tonjanoyebuambá.

<sup>36</sup> Pablo chě soyěnga tonjánayanentšana, tonjanoshamentšé y njětscanga chentše monjětsemněngaftaca Běngbe Bětsá tmonjanótšěmbona. <sup>37</sup> Njětscanga tmonjánenobošachna y Pablo tmontanotsejcuá y tmontanámochó. <sup>38</sup> Y entšanga corente ngménaca monjětsemna, chěnga ndocna te más cha mochántinjě ca Pablo tojaněyana causa. Chentšana, chěnga chě barquěsha enjetsamněntscoñe cha tmonjantjěmbambá.

## 21

### *Pablo Jerusalenoye tojana*

<sup>1</sup> Chě Jesucristbeñe ošbuáchiyěnga fsěnjěftsanabashejuana ora, barquěshañe fsěnjanojayé y ndericho Cos luaroye fsěnjána; chě yěfsana Rodasoye y chentšana Pátara puebloye. <sup>2</sup> Pátara pueblentše canjě barquěsha fsěnjáninjěna, Fenicioye enjětsaye; asna, chěshañe fsěnjanojayé y chentšana fsěnjěftsanbocna. <sup>3</sup> Fsěntsanachnějuana ora, fsěnjáninjě Chipre luare; Chipre běngbe uañicuayoica tonjanoquedá y běngna Sirioye fsěnjětsaye. Tiro pueblentše chě barquěshentša uasmaněshangá jěftšáboshjonama yojámnyeca, chě puebloye běnga fsěnjěftsanamashjna. <sup>4</sup> Chentšna, Jesucristbeñe ošbuáchiyěnga fsěnjánanjěna y canjěsěfta te chěngaftaca fsěnjanoquedá. Chěnga Pablo tmonjanijana cha ndoñe ibonjamna Jerusalenoye jtsayana ca, er chě Uámana Espiritu tojanabuayená ndayá choca cháftaca jopásama. <sup>5</sup> Chě

canýsëfta te tonjanochnëngo ora, chentšana fsënjëftsanbocna y nýetscanga parejo chëngbe shémangaftaca y básengaftaca šonjanatjëmbambá chë pueblo chabóntscoñe; y chentše, chë chënýañe fsënjanoshamentsé y Bëngbe Bëtsá fsënjanimpadá. <sup>6</sup> Chentšana, fsënjesanodiošoftá y chë barquëshoye fsëntanášëngo; chentšana chë ošbuáchiyënga cachëngbe yebnëngoye tmontaná.

<sup>7</sup> Tirentšana fsënjëftsanbocna y Tolemaida puebloye fsënjánashajna; y chentše tonjanopochocá bëngbiana bejaycá chë te ayana. Tolemaidentše Jesucristbeñe ošbuáchiyënga fsënjanacheuá y chëngaftaca canýe te fsënjanoqueđanga. <sup>8</sup> Yëfsana, bënga chentšana fsënjëftsanbocna y Cesarea luaroye fsënjánashajna. Chocna, bënga fsënjáana Felipe chë Jesucristbiana tšabe noticiënga abuayiyayabe yebnoye y cháftaca fsënjanoqueđanga. Felipe enjamna canýa chë Jesucristbe ichmónëngbioye ujabuachanënguentšá, Jerusalemoca ubuáyanënga. <sup>9</sup> Felipe enjánabamna canta ndëbouamna bemianga y chënga monjamna Bëngbe Bëtsabe juabna oyebuambnayënga. <sup>10</sup> Ya bayté chentše fsënjëtsemna orna, Judeocana tonjánashjango canýa Bëngbe Bëtsabe juabna oyebuambnayá, Agabo ca uabainá. <sup>11</sup> Agabo bëngbioye tonjánashjango ora, Páblëbe uasnanëja tonjanca y cucuatšënga y shecuatšënga cachá tonjanenabatsëca y mëntšá tonjánayana: “Uámana Espiritu entsichamo, Jerusalemoca quem uasnanëja nduíñbioye chë judiënga mëntšá camochjama y ndoñe judiëngbe cucuatšíñe camochjáboshjona ca.”

<sup>12</sup> Chca fsënjanuena ora, bënga y chentša entšanga Pablo fsënjanimpadá Jerusalemoye ndoñe chaondëtsama. <sup>13</sup> Chora Pablo tonjánayana: —¿Ndáyeca šmojtsošaché y šmojtsama atšbe ainaniñe puerte ngmënana chaotsemnama ca? Atše sëntseprontana y ndoñe nýe chašmobatsëcama; Jerusalemoca jobanámnaca sëntseprontana, Bëngbe Utabná Jesusbiana ca — cha tonjánayana.

<sup>14</sup> Jáyëñjanama ndoñe chibiatanobená ora, ndoñe más chibiatanimpadá; nýe mëntšá fsënjanianayana: —Ntšamo Bëngbe Utabná yojtsebošcá chaotsemna ca.

<sup>15</sup> Chë soyënga tonjanochnëngüentšana, fsënjanoprontá y Jerusalemoye fsënjáana. <sup>16</sup> Cesareoca, básefta Jesucristbeñe ošbuáchiyënga choye šonjanatjëmbambá y chocna, chënga šonjanënatse canýe Chipre luaroca entšabe yebnoye, Mnasón ca uabainá, ndábentše bënga joquédama. Mnasón tempscana inamna Jesucristbeñe ošbuachiyá.

<sup>17</sup> Jerusalenoye fsenjánashjajna orna, chentša Jesucristbeñe ošbuáchiyënga oyejuayënga šonjanëbuaja. <sup>18</sup> Yëfsana, Pablo bëngaftaca tonjána Santiago jábuachama, y chentše, nyetsca chë ošbuachiyëngbeñe bëtsëjemëngcá mandayëngnaca monjëtsemna. <sup>19</sup> Pablo tonjanacheuá y chentšana tonjanacuntá lempe ntšamo Bëngbe Bëtsá Páblëbe trabájoca chë ndoñe judiëngbeñe tojanmama.

<sup>20</sup> Chca tmonjanuena ora, Bëngbe Bëtsá tmontanchuá y Pablo mëntšá tmonjaniyana: “Morna, Jesucristbeyeca bëngbe catšata, contsonyá ntšamo ba uaranga judiënga Jesucristbeñe imojtsošbuáchema, y chënga nyetscanga montsantješna nyetsca Jesucristbeñe ošbuáchiyënga chë Moisesbe leyentša nyetsca mandënga chamotsocumplínama. <sup>21</sup> Y entsanga chëngbioye noticia tmojatšatá, aca chë inye luarënguenache imoyena judiënga cojtsabuatambá, Moisés tojanmandá soyënga ndoñe ntseyeunanama y basetëmënga base bobachtema chë más delicadentše ndoñe ntjatëtšama, ntšamo bënga judiënga fsënduamancá, y ntšamo bënga fsëndëtatšëmbcá ndoñe chamondëtsamana ca. <sup>22</sup> Y morna, ¿ntšamo chë soyëngama cochtsemana? Ndegombre, chënga mochanjátatšëmbona aca moye tcojabama. <sup>23</sup> Chcasna, ntšamo cbochanjabuayenacá cochjama: Bëngbentše canta boyabásënga montsemna y chënga entsamna Bëngbe Bëtsabiamana canye šbuachenana soye jamama. <sup>24</sup> Acaftaca cochjunatse, chëngaftaca cochtsemna y chëngcá cochtsama Bëngbe Bëtsabe delante tšábënga jtsatsmënama ntšamo chamojtsama ora, y ntsachetšá jëtsjájua chaojtsamncá, aca cochjëtsjájua, as chënga chamobená nyets stjënashë jtsenátšotjiamana, jinyanïyama, ntšamo Bëngbe Bëtsábioye tmojašbuachenacá ya tmojamama. Y chca, nyetsca judiënga mochanjinye ndoñe ndegombre yontsemna chë ntšamo chëngbioye acbiamana tmojacuntacá; masna, chënga mochanjátatšëmbona aca ndegombre ntšamo Moisesbe leyinë yomandancá icuamama. <sup>25</sup> Y chë ndoñe judiënga Jesucristbeñe imojtsošbuachengbiamna, bënga ya fsënjubúabiamana y fsënjáuyana ndayá jtsocumplínama chënga yojtsamnama, mëntšá: ‘Ndoñe chamondëtšesá mëntšëna, chë entsanga tmojtsejuabná diosënga imomna soyënga jadórama tmojiyëbana; ni buiñe, ni tšëšana bayëngbe mëntšëna; y ndoñe chamondëtšama bacna soyënga shembásënga y boyabásëngaftaca ca’ ” —chënga tmojánayana.

*Bëngbe Bëtsabe bëts yebnentše judiënga Pablo tmojánishache*

<sup>26</sup> As Pablo, yëfsana chë cántanga tonjanënatse y chëngaftaca tonjanma soyënga Bëngbe Bëtsabe delante tšábënga jtsatsmënama. Chentšana, Pablo Bëngbe Bëtsabe bëts yebnoye tonjánamashëngo chë bachnanga júnayama, ndaytëntšcoñe

yojamna chë cantangbiamama soyënga jtsamama, Bëngbe Bëtsabe delante tšábënga jtsatsmënama, y jayanama ndaytë chëngbiamama yojtsemna ndaye ora cada ona ibojtsemna ndayánaca Bëngbe Bëtsabe bëts yebnoye juambana, Bëngbe Bëtsabiamama juatšëmbonama.

27 Chënga tmojanenoyeuná y tmojánayana canÿsëfta tentscuana chca jamana ca. Chë canÿsëfta te ya jochnënguama yojtsemna orna, básefta judiënga Asioquënga Pablo tmojáninÿe Bëngbe Bëtsabe bëts yebnoca y tmojanma entšanga chamuenbouénanama. Y cha tmojánishache, <sup>28</sup> mëntšá jtsayebuáchëse: “¡Israeloca entšanga, šmabétsëjabuache ca! Quem boyabása entsemna chë nÿets luarënguenache iuana abuátambaye soyënga bëngbe entšangbe contra, y ntšamo bëngbe leyënguiñe endayanama contra, y quem Bëngbe Bëtsabe bëts yebnama ndoñe tšabá yontsoyebuambná. Y cabana quem Bëngbe Bëtsabe bëts yebnoye grieguënga tojúmashengo, y chca cha tonjama chë Bëngbe Bëtsabe bëts yebna Bëngbe Bëtsabe bominÿiñe ndoñe tšabá chaondëtsemnama ca” — chënga imojtsichamo.

29 Chca imojtsichamo, er entšanga Pablo tmojáninÿe chë bëts pueblentše Trófimo Efesocáftaca; y imojétsejuabnaye chábioye Bëngbe Bëtsabe bëts yebnoye Pablo tbojanánatse ca.

30 Nÿetsca chë pueblentša entšanga tmojánenbouenana, y ochamanana chë Pablo yojtsemnoye tmojánashajna. Pablo tmojánishache y Bëngbe Bëtsabe bëts yebnentšana shjoye tmojtsansjojó, y cachora chentša bëšašangá tmojtanatame. <sup>31</sup> Jtsóbama ya imojtsebuachéta ora, chë Romoca soldadëngbe mandayá tojántatšëmbona nÿetsca chë bëts pueblentša entšanga imojtsenbouenana. <sup>32</sup> Asna, chë mandayá chabe soldadënga y inÿe chentša amëndayënga tojánachembo y cánÿiñe chë entšanga imojtsemnoye tmojëftsanójtajo. Entšanga, chë mandayá y chë soldadëngbioye tmojánanÿe ora, tmojtsanajbaná Pablo jantšetayana.

33 Chorna, chë soldadëngbe amëndayá tojanobeconá, Páblëbioye tbojánishache y tojanmandá uta cadenëjuaca cha chamotsebátsëcama y tojanatjá: “¿Nda mua yomna y ndayá tojama ca?” <sup>34</sup> Pero chë entšángbeñe, ínÿënga canÿe soye imojtsáyebuache y ínÿëngna inÿe soye; y chca, ntšamo ndegombre tojanopasama jtsetatšëmbuama chë mandayá ndoñe tonjanobená; chcasna, cha tojanmandá Pablo chë soldadëngbe oyenoye chamuánatsama. <sup>35</sup> Chë soldadëngbe oyenoca grádasbengoye tmojánashajna ora, chë soldadënga tojanotocá Pablo cutsnana juambama, chë entšanga tša

rábiaca imojtsemna causa, <sup>36</sup> er chënga ústonoye imojétsaye y “¡Chaóbana ca!” imojtsaiuáye buache.

*Ntšamo Pablo entsangbe delante tojanenëuyaná*

<sup>37</sup> Chë soldadëngbe oyenoye ya jamashënguama imojtsemna orna, Pablo chë soldadëngbe amëndayábioye tbojantjá: — ¿Tašcatjaleséncia ratotema ácaftaca jóyebuambayama ca?

Y chë mandayá tbojanjuá: — ¡Aca icobena griego biyañe jóyebuambayama! <sup>38</sup> As, ¿aca ndoñe condmëna chë Egiptocá, chë ndoñe bayté quenátsmëna entsanga yojanëtsëtsná chë mándayëngbe contra chamotsemnana y chë canta uaranga podesca uamana entsanga puñálaca uajatëngaftaca, entsanga ndoyena luaroye tojanbochná ca?

<sup>39</sup> Chora Pablo tbojanjuá: — Atše judío sëndmëna, Tarso puebloca onýnaná, canýe uámana pueblentše Cilicia luaroca; Diosmanda šmolesenciá entsanga jáuyanama ca.

<sup>40</sup> As, chë soldadëngbe amëndayá chca tbojanlesenciá. Páblëna chë gradasbenguíne tojantsá y cucuatše tojanatsbaná entsanga iytëca chamobiamama. Nýetscanga iytëca imojtsemna orna, Pablo hebreo biyañe mëntsá entsanga tojanëyana:

## 22

<sup>1</sup> “Baconga y taitanga, mora šmochjouena atše jenëuyanama ntšamo chjayancá ca.”

<sup>2</sup> Pablo cachëngbe biyañe, hebreo biyañe yojtsóyebuambnama entsanga tmojanuena ora, más iytëca tmojanobiamama. As Pablo tojanëyana: <sup>3</sup> “Atše judío sëndmëna. Tarso pueblentše, Cilicia luaroca sënjanonýná, pero muentše Jerusalenentše sënjanoboché y sëndétatšëmbo soyëngna Gamaliélbeyeca chca botamana sënjanatsjinýe. Cha corente tšabá šonjanbuatëmbá bëngbe bëts taitangbe leyënga; nýets atšbe ainánaca Bëngbe Bëtsá sëndëserveda, ntšamo nýetsca tšëngaftanga mora šmontsamancá. <sup>4</sup> Atše sënjánama chë Jesucristo tojaninýanýé Benache ústonënga chamosufrima y chamóbanama; boyabásenga y shembásenga sënjanëtabaye y cárceloye sënjanautame. <sup>5</sup> Chë judío bachnangbe más uámana amëndayá, nýetsca chë judiëngbeñe bëtsëjemëngcá mándayënga y inýe muentša mándayënga mondobena jayanana ntšamo sëntsichamcá ndegombre yomnama. Chënga uabemana tsbuanachangá šmonjaniyé, bëngbe catsátanga judiënga chamotsetatšëmbuama atše mando stsanbomnama, Jesucristbeñe ošbuáchiyënga jótabayama; y Damascoye sënjána choca Jesucristbeñe ošbuáchiyënga jótabayama, moye Jerusalenoye junatsama jacastígayama.”

*Pablo tojanacuntá ntšamo Jesucristbeñe ošbuachiyá tojanóbema*

*(Hch 9.1-19; 26.12-18)*

<sup>6</sup> “Pero canye te benachiñe Damasco béconana sēnjétsaye orna, mo nyetsto ora, nye ndeolpe atšbe juachañe canye bēts tcuinye celocana tonjanbuashinýinýena. <sup>7</sup> Y fshantsoye sēnjétseshajaye y canye oyebuambnayana sēnjanuena mēntšá: ‘Saulo, Saulo, ¿ndáyeca šcojtsacmena ca?’ <sup>8</sup> Atše sēnjantjá: ‘¿Nda comna, Bēngbe Utabná ca?’ Y chē oyebuambnayana šonjanjuá: ‘Atše sēndmēna Jesús Nazaretocá, y aca condama atšbe entšanga chamotsesufrínama ca.’ <sup>9</sup> Chē átšeftaca monjánajnēnga chē bēts tcuinye tmojáninýe y tmojanouatjananga, pero chē oyebuambnayana ndoñe tmonjanuena. <sup>10</sup> Chora atše sēnjantjá: ‘¿Bēngbe Utabná, ndayá jamama šojtsemna ca?’ Y cha šonjaniyana: ‘Matētsbaná y mētētontsé Damascoye jama. Chentše canya cmochanjabuayená ndayá jamama cmojtsemnana ca.’ <sup>11</sup> Chē tcuinye yapa tonjanbuashinýinýena causa, atše jtaná sēnjanoquedá. Chcasna, chē inýenga šmontanobuacuetēntsé y chca, Damascoye sēnjánashjango.

<sup>12</sup> “Chentše enjamna canye bacó Ananías ca uabainá; cha inoyena ntšamo Bēngbe Bētsá yobošcá y yojánama ntšamo bēngbe leyēnguiñe iuayancá, y nyetsca chentša judiēnga monjanamana chabiamna tšabá jtsóyebuambnayana. <sup>13</sup> Cha tonjánabo atše jinýama y tonjánashjango ora, šonjaniyana: ‘Jesucristbeyeca atšbe catšata, Saulo, chacmotsatabinýna ca.’ Cachora y cha sēnjáninýe.

<sup>14</sup> “Chentšana cha tonjánayana: ‘Bēngbe bēts taitangbe Bētsá aca tcmojuábuayana, ntšamo cha acbiamna yobošcá chacotsetatšēmbuama, chē nyetsca soyēnguiñe Tšabá Amá chacuinýama y cachabe uayášentšana chacóyeunama. <sup>15</sup> Bēngbe Bētsá chca tojama, aca chē chabe buayenana soyēngama entšángbeñe chacóyebuambama, y chamna nyets luarentša entšángbeñe cochjacuénta, ntšamo tcojinýe y tcojouencá. <sup>16</sup> Y mora, ¿ndoñe más matobátmanana! Motsbaná y cochjenábaye Jesucristo jótšēmbonēse, chca, acbe bacna soyēngama perdonaná chacotsemnana ca’ ” —cha šonjaniyana.

*Pablo tojanacuntá ntšamo chē ndoñe judiēngbioye tmojánichmoma*

<sup>17</sup> “Jerusalenoye sēntaná ora, Bēngbe Bētsabe bēts yebnoye sēnjána cháftaca jencuéntama, y ndeolpe atše mo otjenayoquēcá sēnjanoquedá. <sup>18</sup> Chca orna, Bēngbe Utabná sēnjáninýe y cha mēntšá šonjaniyana: ‘Betsco motsa y cam ora Jerusalenentšana métsebozna; quemuentša entšanga ndoñe



quecmochatoyeunaye ntšamo atšbiamá condétatšëmbo y contšetsnacá ca.’<sup>19</sup> Atše sënjanjuá: ‘Bëngbe Utabná, chënga mondétatšëmbo atše sënjánana nyetsca chëngbe enefjuana yebnënguenache y chë ácebeñe ošbuáchiyënga sënjanëtámiana y sënjánatsetšenaye;’<sup>20</sup> y acbiamá ndegombre oyebuambnáyá Esteban tmonjanóba ora, átšnaca chentše sënjamna y tšabá imojtsama ca chama sënjëtsejuabnaye, y cabá chë monjanóbanangbe entšayëjuangá atše chora sënjanabojanjá ca’ —atše sënjanjuá.<sup>21</sup> Pero chca sënjánayana ora, Bëngbe Utabná šonjaniyana: ‘Motsa; atše bën luarëngoye, ndoñe judiëngbioye cbochanjíchmuá ca.’ ”

*Pablo y chë soldadëngbe amëndayá*

<sup>22</sup> Chë entšanga chëntscoñe tmojanuena; pero chë ndoñe judiëngbiamá tojanoyebuambá orna, chënga tmojanontšé uayebuáchana: “¡Ndoñe tšabá quenátsmëna cha vídaca chaotsemnama! ¡Motsóba ca!”<sup>23</sup> Y chënga más imojtsáyebuache; puerte rábiaca chëngbe uichëtjonëjuangá tsbanánoye imojtsëbëntaye y tsbanánoye polvëshe imojtsëtšana;<sup>24</sup> chë causa, chë mandayá tojánayana chë soldadëngbe oyenoye Pablo chamotsëmashëngo ca, y tojanmandá chamotsetjanja chaobuambama ndáyeca entšanga chca chabe contra imojtsáyebuache.<sup>25</sup> Pero jtsetjanjama ya tmojanbatsëca orna, chentše imojtsemna soldadëngbe amëndayábioye Pablo tbojantjá: —¿Tšëngaftanga šmobena canyë entšá derecho bomná mo canyá Romoca onyñanacá jatjanjana, ndegombre tšabá o ndoñe tšabá tonjamama cabá ndayana ora ca?

<sup>26</sup> Chë básefta soldadëngbe mandayá chë soye tojanuena ora, tojána y nyetsca soldadëngbe amëndayábioye chama ibojue-naye, mëntšá: —¿Ndayá cochjama? Chë entšá derecho bomna mo canyá Romoca onyñanacá canmëna ca.

<sup>27</sup> As chë amëndayá tojána Pablo yojtsemnoye y tbojaniyana: —Smëyana, ¿aca derecho bomná mo canyá Romoca onyñanacá comna ca?

Y cha tbojanjuá: —Arseñor ca.

<sup>28</sup> Chora chë amëndayá tojánayana: —Atše becá crocénana sënjëtšajó mo canyá Romoca onyñanacá derecho jtsebomnama ca.

As Pablo tbojanjuá: —Y atšna derecho bomná mo canyá Romoca onyñanacá sëndmëna atše tijanonyná orscana, er atšbe taitá chca derecho bomná inamna ca.

<sup>29</sup> Chcasna, chë jatjanjama imojtseprontanënga, Páblëbentšana tmojanojuaná; y chë mandayánaca tojanojuaná y yojtsauatja, Pablo derecho bomná mo canyá Romoca

onÿnanacá yojamnama tojántatsëmbona ora, er cha tojanmandá Pablo chamotsebátsëcama.

*Pablo, Jerusalenentsa uámana mándayëngbe delante*

<sup>30</sup> Chë soldadëngbe amëndayá yojtseboşe ndegombre jtsetatsëmbuama ndaye soyama judiënga Páblëbe contra imojtsichámuama; asna, yëfsana tojanmandá cadenëjuangá jtsajafjonana y chë bachnangbe amëndayënga y nÿetsca chë judiëngbe amëndayënga chamobéconama. Chentšana, Pablo tbojanábocna y chëngbe delante tbojanatsá.

## 23

<sup>1</sup> Chora Pablo, nÿetsca chë mandayëngbioye tojanënÿanÿë y tojanëyana: —Taitanga, atşe mëntétscoñe tsiyena jtsamëse ntšamo Bëngbe Bëtsá yobošcá y chabe delante atšbe ainana natjëmbana endëtsomñe ca.

<sup>2</sup> As, Ananías, chë bachnangbe más uámana amëndayá, tojanmandá Páblëbe béconana imojtsemnënga cha chamotsáyejantšetama. <sup>3</sup> Pero chora Pablo Ananíasbioye tbojanjuá: —¡Bëngbe Bëtsá ácnaca cmochanjëtsjantšetá, bacna entšá, ntšamo ndegombre tcojuabnacá ndinÿinÿnayá! Aca chentşe contsetbemana tšabá o ndoñe tšabá tïjamama jayanama, ntšamo Moisesbe leyiñe yomandancá; as, ¿ndáyeca cojtsemánda chašmojantšetama? Chca chë leyiñe ndoñe quenátslesenciana ca.

<sup>4</sup> As, chabe béconana imojtsemna entšanga tmojánayana: —¿Chca chë Bëngbe Bëtsabe bachnangbe más uámana amëndayábioye cochjójyenguango ca?

<sup>5</sup> Chora Pablo tojánayana: —Taitanga, atşe ndoñe quetsátstatšëmbo cha chë bachnangbe más uámana amëndayá yomnama. Er Bëngbe Bëtsabe uabemana palabrënguiñe mëntšá endayana: “Entšangbe mandayabe contra ndoñe catjayana ca.”

<sup>6</sup> Pablo tojáninÿe chë mándayënguentşe báseftanga saduceunga y ínÿengna fariseunga imojtsemnama; as, mëntšá tojanáyebuachena: —Taitanga, atşe fariseo sëndmëna; atšbe bëtsëtsanga fariseunga mondmëna. Atşe, jtsošbuáchiyëse chë obanënga mochtayenama tsobátmana causa, atşe ndoñe tšabá sentsama ca tšëngaftanga šmochjayana ca.

<sup>7</sup> Pablo chca tojánayana ora, chë fariseunga y saduceunga tmojanontšë enatsëtsnayana, y chë causa nÿetsca entšanga ndoñe cachcá imontsejuabnaye. <sup>8</sup> Er chë saduceunga jt-sichámuana chë obanënga ndoñe ntayenana ca, y ni angelënga, ni espíritënga ndoñe mondmëna ca; pero chë fariseunga aíñe chë soyënguiñe jtsošbuáchiyana. <sup>9</sup> Y nÿetscanga tša imojtsáyebuache; asna, básefta fariseunga ley abuátambayënga

tmojantsbaná y jabuachana mēntšá imojtsáyebuache: “Quem boyabása ndocna bacna soye tonjama. Nderado mo Bēngbe Bētsabe canye ángel o espíritu muábioye ndegombre tbojauyana ca.”

<sup>10</sup> Entšanga más imojtsáyebuache y chē soldadēngbe amēndayá yojtsauatja nderado entšanga Pablo muantsatcacaye; as, cha tojanmandá soldadēnga chamua Pablo chē entšāngbentšana jaisábocnama y chē soldadēngbe oyenoye cachiñe jesánatsama.

<sup>11</sup> Yēfsana ibeta, Bēngbe Utabná Páblēbioye tbojánēbēbocna y tbojanियana: “Pablo, ainaniñe añemo cochtsebomna. Ntšamo aca atšbiana condētatsēmo y muentše Jerusalemēntše condoyebuambnacá, cachcá cmontsemna Romoca jamama ca.”

*Judiēnga tmojanenoyeuná Pablo jtsóbama*

<sup>12</sup> Chē inye yēfsana, judiēnguentšana báseftanga tmojanenoyeuná Pablo jtsóbama, y tmojanjurá tondaye ntjasana, ni ntjofšiyana, cha jóbantscuana. <sup>13</sup> Chca jamama tmojanjuabó entšanga imojamna canta bnētsanēngama más. <sup>14</sup> Chēnga tmojána chē bachnangbe amēndayēnga y judiēngbeñe bētsējemēngcá mandayēngbioye y mēntšá tmojánayana: “Bēnga Bēngbe Bētsá mēntšá fsēnjašbuachená y bacna soyēnga bēngbeñe chaotsemna chca ndoñe fsēnjocumplise: Tondaye ntjasana, ni ntjofšiyana, Pablo jóbantscuana. <sup>15</sup> Morna, tšēngaftanga y chē inye muentša mandayēngaftaca chē soldadēngbe amēndayá šmochjaimpáda Pablo moye chabuánatsama; y šmochjauyana chca yojtsemna ana chē ndayá yojtsopasánama más botamana cha jatjayama ca; y bēngna fchtseprontana cha jtsóbama, cabá moye ndáshjango ora ca.”

<sup>16</sup> Pero, Páblēbe uabenbe uaquiñá chē soye tojántatsēmbona; asna, tojána chē soldadēngbe oyenoye, chama Pablo jaueyayama. <sup>17</sup> Chorna, Pablo canye básefta soldadēngbe mandayábioye tbojanchembo y tbojanियana: “Diosmanda quem basa mánatse chē nyetsca soldadēngbe amēndayábioye; canye soye entsebomna chábioye juenayama ca.”

<sup>18</sup> As, cha chē bobontse tbojēftsānbetše, chē nyetsca soldadēngbe amēndayábioye tbojanánatse y tbojanियana: “Chē utamená Pablo šonjachembo y šonjaimpadá quem bobontse ábioye juanatsana; mua caojtsebomna canye soye aca jauyanama ca.”

<sup>19</sup> Chē soldadēngbe amēndayá chē bobóntsbioye tbojēftsānabuácuētēntšiyē, luaroye tbojanánatse y tbojantjá: —¿Ndayá cojtsebomna atše jauyanama ca?

<sup>20</sup> As chē bobontse tbojanियana: —Judiēnga tmojenoyeuná taitá jaimpádama, yēfse chēngbe amēndayēngbioye Pablo

chacuánatsama, y chënga cmochanjauyana chca yojtsemna ana chë ndayá yojtsopasánama más botamana cha jatjayama ca. <sup>21</sup> Pero ndoñe catjóyaunaye; chënguentšana canta bnëtsanëngama más entsanga iytëmenënga Pablëbiana montsanýá. Chënga tmojajurá, bacna soye chëngbeñe chaotsemna ndoñe tmonjocumplise, tondaye ntjasana, ni ntjofsiyana, Pablo jóbantscuana. Mora chënga montseprontana y montsobátmana ntšamo aca chë soyama cochjáuyanama ca —chë bobontse tbojaniana.

<sup>22</sup> Chentšana, chë soldadëngbe amëndayá chë bobóntsbioye tbojanmandá, ndayá ibojuenayama ndocnábeñe ntsecuéntayana, y chentšana tbojtanichmó.

*Pablo tmojanánatse Félix, chë Cesareoca mandádbioye*

<sup>23</sup> Chentšana, chë soldadëngbe amëndayá tojánachembo útata chë inýe soldadëngbioye mándayënguentšana, y tojanamëndá chamoprontama uta patse soldadënga, inýe canýsëfta bnëtsanënga couayënguiñe y inýe uta patse lanzëšangaca, Cesarea puebloye ibeta, las nueve ora jabocanama; <sup>24</sup> y tojanamëndá couayënga chamoprontá Pablo chauenójayema. Y tojanmandá tšabá y ndocá ntjapasacá Pablo chamuánatsama, Félix chë Cesareoca mandádbioye. <sup>25</sup> Y canýe tsbuanácha chëngaftaca tojanichmó y chëchañe mëntšá yojtsábemana:

<sup>26</sup> Claudio Lisias, chë bëts uámana mandado Felixbiana: Salud bomná chacotsomñe.

<sup>27</sup> Judiënga quem boyabása tmojishache y montseboše jtsóbama; pero cha mo canýa Romoca onýnanacá derecho bomná yomnama sënjátatšëmbona ora, atšbe soldadëngaftaca sënjá y chëngbe cucuatšentsšana cha sënjatsbocá. <sup>28</sup> Atše sëntseboše jtsetatšëmbuana ndaye soyama chënga chabe contra imojtsichámuama; as,

cha sënjuánatse nýetsca chë judiëngbe amëndayënga montsemnoye; <sup>29</sup> y chentšana, atše sënjátatšëmbona chënga chabe contra imojtsichamo ana cachëngbe leyentša soyëngama, pero cha tondaye tonjobuachjanguá, cha jóbama bënga chašotsamnama, ni mo cárceloye jutámia.

<sup>30</sup> Pero atše sënjátatšëmbona chë judiënga tmojenoyeuná cha jtsóbama; chíyeca, cam ora cha ácbioye sëntsichamná, y chabe contra ichámëngna sënjáuyana, ndayá muabe contra jayanama imojtsebomncá acbe delante chamuayana ca.

<sup>31</sup> Chentšana, chë soldadënga tmojanma ntšamo tmojanamëndacá, ibeta Pablo tmojëftsanbetše y Antípatris puebloye tmojanánatse. <sup>32</sup> Yëfsana, chë shecuátšeca tmojána soldadëngna cach soldadëngbe oyenoye tmojésanshëcuana, y chë couayiñe enjaquenënga Pábloftaca tmojána. <sup>33</sup> Cesareoye

chënga tmojánashjajna ora, chë tsbuanácha chë mandádbioye tmojanantšabuaché, y Páblënaca chabe cucuatšišne tmojánboshjona. <sup>34</sup> As chë mandado chë tsbuanácha tojanalía; chentšana, cha tojanënoticiá ndaye luarocá Pablo inamnama, y Cilicia luarocá cha inamnama cha tojántatšëmbona ora, <sup>35</sup> tbojaniyana: “Acbe contra ichámënga chamobeconá ora, ácbioye oído cbochjabuájua ca.”

Chentšana, cha tojanmandá Rey Heródesbe bëts yebnoca Pablo chamotsebojanýama.

## 24

### *Ntsamo Pablo chë mandado Félixbe delante tojanenëuyaná*

<sup>1</sup> Shachna tianoye, Ananías, chë bachnangbe más uámana amëndayá, Cesareoye tojána báseftangaftaca chë judiëngbeñe bëtsëjemëngcá mándayënguentsana y canýa entsanga obuauyayáftaca, Tértulo ca uabainá; y chë mandádbioye chënga tmojána Páblëbe contra jayanama.

<sup>2</sup> Pablo tmojanábocna ora, Tértulo tojanontsé chabe contra jayanama y Félixbioye tbojaniyana: “Aslëpaye, taita mandado, ácbeyeca bënga natjëmbana fsëndoyena y aca puerta obiashjachá cómnayeca ba tšabe soyënga quem luarentša entsangbiamma yojtsebinýna. <sup>3</sup> Nýets tempo y nýetsquénache chë soyënga fsëndóyëngacañe, bëts uámana mandado, y bënga chama corente chondetsechuaná. <sup>4</sup> Pero ndoñe yapa bën jatenbiamnayamna, Diosmanda ratotema šmotsoyauná. <sup>5</sup> Bënga fsëntsetatšëmbo quem boyabása entsanguentše entsemna mo bacna shacuancá, nýets luarënguenache yojtsana y yojtsama chë judiënga nýetscanga cachca soye ndoñe chamondëtsejuabnama, y cha yojtsemna chë Nazaretocabe ustonëngbe uanatsaná. <sup>6</sup> Y tonjábosena jamama Bëngbe Bëtsabe bëts yebna, Bëngbe Bëtsabe bominjíñe ndoñe tšabá chaondëtsemnama; chíyeca bënga cha fsënjotbá. Bënga fsënjábosena chabiamma jayanana tšabá o ndoñe tšabá tonjamama, ntsamo bëngbe leyënguiñe endayancá; <sup>7</sup> pero chë soldadëngbe amëndayá Lisias tonjontremeté y jabuachana bëngbe cucuatšentsana tbojtsánatseñe, <sup>8</sup> y tonjayana chë chabe contra ichámëngna caojtsamna ácbioye chama jabana ca. Cach taitá chacojatjá ora, ndegombre soyënga cochántsetatšëmbo ndáyeca bënga muabe contra fstsichámuama ca” —cha tojánayana.

<sup>9</sup> Y chë judiënga chentše imojëtsemnëngna imojtsanichamo aíñe chca tojanopasá y lempe ndegombre yojtsemna ca.

<sup>10</sup> Chentšana, chë mandado Páblëbioye tbojánëfjatsëmbo chaóyebuambama; as Pablo tojánayana: “Atše sëndëtatšëmbo aca ba uatama comna muentša entsangbiamma tšabá o

ndoñe tšabá tmonjamama ichamuá; chcasna, tondayama ntsauatjá y puerte oyejuayá acbe delante šcuenëuyaná. <sup>11</sup> Ntšamo cach aca jtsetatšëmbuama contsobencá, cabá bnëtsana uta te entsemna atše Jerusalenoye sënjá, Bëngbe Bëtsá jadórama. <sup>12</sup> Y quemënga ndoñe chešmátinýena nderado ndáftaca jabuachana enatsëtsnayañe, ni entšanga chamuembouénanama amiñe, Bëngbe Bëtsabe bëts yebnoca, ni chëngbe enefjuana yebnënguenache, ni inýe luarënguenache chë bëts pueblentše. <sup>13</sup> Quem entšanga tondaye quemátsbomna ntšamo jayanama, atšbe contra montsichamo soyënga ndegombre yojtsemna ca. <sup>14</sup> Pero ndegombre endmëna y chanjayana, atše bëngbe taitangbe Bëtsá sëndëserveda, jtšiyenëse ntšamo Bëngbe Bëtsá šonjaninýanýé benache yomncá; y quem entšanga montsichamo, básefta soyënga ntšamo bënga quem Tsëm Benache ústonënga fstsošbuachecá, ndoñe ndegombre yondmëna ca. Pero atšna nýetsca chë Moisesbe leyiñe y Bëngbe Bëtsabe juabna oyebuambnayëngbe uabemana librëšanguentša soyënguiñe sëndošbuaché; <sup>15</sup> y atše cach chëngcá, puerte jtsošbuáchiyëse Bëngbe Bëtsábeñe sëndobátmana cha yochjama chë mochjóbanënga chámuatayenama, nýetsca entšanga, lempe tšabá amënga y chë ndoñe tšabá amëngnaca. <sup>16</sup> Chíyeca, atše nýets tempo puerte tšabá sëndama, tondayama ntjatenócochinýenama y atšbe ainana natjëmbana chaotsomñama, Bëngbe Bëtsabe delante y entšangbe delántnaca.

<sup>17</sup> “Básefta uatama inýe luarënguenache atše sëndánana; ndoñe bayté quenátsmëna cach atšbe luaroye sëntashjango, chentša ndbomnjëjmënga jujabuáchama ndayánaca jatšatayama y bayënga jobáyama, Bëngbe Bëtsá jëtschuayama. <sup>18</sup> Atše sënjama soyënga Bëngbe Bëtsabe delante tšabá jtsatšmënama; chentšana, básefta Asioca judiënga Bëngbe Bëtsabe bëts yebnentše šmonjinýena, pero ndoñe chešmátinýena ni ba entšángaftaca, ni enbouenaniñe. <sup>19</sup> Chë šmonjinýenënga entsamna ácbioye jabana y acbe delante atšbe contra chamuayana, nderado ndayá tmojtsebomnëse. <sup>20</sup> O ndóñesna, cach quemënga, muentše montsemnënga chamuayana, chë judiëngbe amëndayëngbiyoe atše šmonjuánatse ora, atše ndayá tijobuáchjanguama chešmënjínýena, atše castiganá jtsemnama šojtsemna ca chënga chamuayanama; <sup>21</sup> o nderado nántsemna chë atše chëngbentše sëntsemna ora, mëntšá tijuáyebuachenama: ‘Atše chë obanënga mochtayenama puerte jtsošbuáchiyëse sëndobátmana causa, tšëngaftanga atšbe contra šmochjayana ca.’ ”

<sup>22</sup> Félix bëtscă inatátšëmbo Bëngbe Utabná tojaninÿinÿé Benache ústonënga imojanošbuaché soyëngama; as, Pablo chca yojtsoyebuambná ora, cha tojanmandá ndoñe más chë soyama chë te jatóyebuambnayana, y chë entsanga tojanëyana: “Chë soldadëngbe amëndayá Lisias chaojášhjangora, chanjajana ntšamo quem tšëngaftangbe sóyeca jamama ca.”

<sup>23</sup> Y chentša soldadëngbe amëndayábioye tbojanmandá Pablo jtsebojanÿama, pero nÿe utamená ndoñe chaondëtsemna ca; y tojanmandá, Páblëbe amiguënga jalesénciyana ntšamo tmojtsebošcă cha chamuauájabuachama.

<sup>24</sup> Chentšana baseftaytese, chë mandado Félix Cesareoye tojtashjango, chabe shema Drusíaftaca, canÿe judiá. Chorna, cha tojanmandá Pablo jachembuana y tojanuena ntšamo Pablo yojtsichamo, ntšamo canÿa nanjobenaye Jesucrístbeñe ošbuachiyá jtsemnama. <sup>25</sup> Pero, nÿetsca soyënguñe tšabá jtsamama, cachá jenomándama jtsobenama y ntšamo tmojamama nÿetsca entsangbiamama Bëngbe Bëtsá yochjayanama Pablo tojanoyebuambá ora, Félix tojanëuatjaná y Páblëbioye tbojanianama: “Mora, mata; luare quétstsebmoma ora, cbochjachembo ca.”

<sup>26</sup> Jëtsboshjonama Pablo crocénana chabuatabuenámna Félix inobátmana; y chca, ba soye ibojanófajana cháftaca jencuëntama. <sup>27</sup> Y chca uta uata tojanochnëngo; chentšana, Félix ya ndoñe más chë mandado yontsemna y chabe cuentna Porcio Festo mandadcă tmojántbema. Félix yojtseboše chë judiëngbe delante tšabá joquédama, chíyeca utamená Pablo tbojëftsanboshjona.

## 25

### *Pablo Festbe delante*

<sup>1</sup> Festo chë luaroye tojánashjango y unga tianoye, Cesarea pueblentšana Jerusalenoye cha tojána. <sup>2</sup> Chocna, chë bachnangbe amëndayënga y chë más uámana judiënga Fëstbioye tmojána Páblëbe contra jayanama. <sup>3</sup> Y tmojanimpadá, mo chëngbiamama canÿe bëts pavor cuenta, cha chaomandá Pablo Jerusalenoye chamuánatsama. Chëngna imojëtsejuabnaye Pablo benachiñe chamotsóbama. <sup>4</sup> Pero Festo tojanëyana, Páblëna Cesareoca utamená yojtsemna y baseftaytese cha choye jtama ca. <sup>5</sup> Y tojanëyana: “Chamna, tšëngaftangbe amëndayënga átšeftaca Cesareoye chamua y chë boyabása ndaye bëts soye tojobuáchjanguase, choca chabe contra šmochjayana ca.”

<sup>6</sup> Festo Jerusalenentše posufta o bnëtsana te más chëngaftaca tbojëftsanjëtana y chentšana Cesareoye tojaná.

Yëfsana, cha tojanótbema chabe puestentše tribunaloca y tojanmandá Pablo choye chamuánatsama. <sup>7</sup> Pablo choye tojánashjango ora, Jerusalenocana tmojánashjajna judiënga tmojanobobeconá y ba uabouana soyënga chabe contra imojtsichamo, pero ni canye chë soyëngama tmonjanobená jinÿanÿiyana chca ndegombre bëtsemnama.

<sup>8</sup> Y Pablo, cachá jenëuyanama mëntšá yojtsichamo: — Atše tondaye chiyatobuachjanguá, ni judiëngbe leyëngama, ni Bëngbe Bëtsabe bëts yebnama, ni Romoca bëts mandadbe contra ca.

<sup>9</sup> Festo yojtseboše chë judiëngaftaca tšabá joquédama; as Páblëbioye tbojantjá: —¿Tacatjábošena Jerusalenoye jama, choca atše quem acbe soyama jayanama ca?

<sup>10</sup> As Pablo tojánayana: —Atše sëntsemna chë Romoca bëts mandado tojichamó amëndayëngbe delante y chënga entsamna jayanama atše tšabá o ndoñe tšabá sënjamama. Ntšamo ndegombre contsetatsëmbcá, judiëngbe contra atše ndocna bacna soye chiyatsma. <sup>11</sup> Nderado atše ndaye bëts soye tijobuachjanguá y chama atše jóbanama šojtsemnëse, atše tondaye quichátayana atše ndoñe chayóbanama; pero atšbe contra montsichamo soyëngama tondaye ndegombre tontsemnëse, ndocná queochatobenaye chëngbe cucuatšišne atše jaboshjonana. Chíyeca, Diosmanda chë Romoca bëts mandado cháuyana tšabá o ndoñe tšabá sënjama ca —Pablo tojánayana.

<sup>12</sup> As Festo, chë soyama chabe buayiynayënga tojanatjá y chentšana tojánayana: —Chë Romoca bëts mandado quem soyama cháuyanama tcojábošënësna, chábioye cochjá ca.

*Festo, Rey Agrípaftaca tbojanencuentá ntšamo Pábloftaca jamama*

<sup>13</sup> Chentšana baseftayté tojanochnëngo ora, Rey Agripa y Berenice Cesareoye tbojána, Festo jauatsëtsayama. <sup>14</sup> Bayté chata chentše tojanajétana; y chca, Festo chë réybioye tbojancuentá Páblëbe soyama. Cha mëntšá tbojaniyana: —Muentše endmëna canye entšá, Pablo ca uabainá; Félix utamená tbonjëftsebošhona, atše mandadca sënjontšé ora. <sup>15</sup> Jerusalenoca sëndánmëna ora, chë bachnangbe amëndayënga y chë judiëngbeñe bëtsëjemëngcá mándayënga Páblëbe contra demanda tmonjajajó y šmonjaimpadá cha jóbanama ibojtsemna ca atše jayanama. <sup>16</sup> Y atše sënjáuyana: “Chë romanënga ndoñe quematamana ndocnabiamama jayanana cha jóbanama ibojtsemna ca, chabe contra ichámënga chabe delante ndoñe tmontsemnëse, chca, chama jenëuyanama cha chaobenama ca.” <sup>17</sup> Chíyeca, chënga moye tmonjabo ora, ndoñe yapa bën ntjatenobiamnycá cach



yěfsana atšbe puestentše tribunaloca sěntótbema y sěnjamandá chě boyabása jobetšana. <sup>18</sup> Pero chabe contra icháměnga, ntšamo atše sěndanjuabnacá chěnga mochjayanamna ni mo canye běts soye chabe contra chemátayana, chěnga jóyebuambayama tonjóyentsbuache ora. <sup>19</sup> Chěnga chabe contra montsichamo, nye cachěngbe Dios ntšamo jadórama yomnana y canya Jesús ca uabainábiana; cha tojanóbana, pero Pablo entsichamo cha ainá yotsomñe ca.

<sup>20</sup> “Chora atše ndoñe quetstětsetatsēmbo ntšamo chě soyiñe jamana; asna, Pablo sěnjantjá Jerusalenoye jama tayojétseboše ca, choca atše jayanama tšabá o ndoñe tšabá cha tonjanmama. <sup>21</sup> Pero cha šonjaimpadá camuentše jaboshjonana, cach Romoca běts uámana mandado chě soyama tojayaněntscuana ca. Chcasna, atše sěnjamandá cha chamotsebojanýama, chě mandádbioye jíchmuama atše jobenayěntscuana ca” —Festo tbojan cuentá.

<sup>22</sup> Chca tbojanencuentá ora, Agripa Féstbioye tbojaniana: —Atšnaca sěntseboše chě boyabása joyeunayama ca.

Y Festo tbojanjúá: —Cach yěfse oído chábioye cochanjabuájua ca.

<sup>23</sup> Chě yěfsana, Agripa y Berenice corente uachuanentše chě tribunaloye tbojanamashjna y chátaftaca tmojanamashjna chě soldaděngbe aměndayěnga y chě pueblentša uámana taitanga. Chentšana Festo tojanmandá Pablo jobetšana; <sup>24</sup> y chora cha tojánayana: “Rey Agripa y nyetsca taitanga běngaftaca šmojtsemněnga: Chentše entsemna chě boyabása. Nyetsca judiěnga chabe contra átšbentše montsabíchamo, Jerusalenoca y quem Cesarea pueblěntšnaca, y nya jtsayebuáchěse tša šmontseimpadana cha chaóbanama; <sup>25</sup> pero atše sěntsejuabná quem boyabása tondaye tonjama, jóbanama chabotsemnama ca. Y más, cachá šonjaimpadá chě Romoca běts uámana mandado César chabe soyama cháuyanama; chcasna, chca chanjama, chábioye cha chanjíchmu. <sup>26</sup> Pero atše, atšbe běts uámana mandádbioye quem boyabásabiama juábobemama ndocna serto soye quetsátsbomna causa, tšěngaftangbe delante cha tijatsá, y masna, acbe delante, běts rey Agripa; chca, lempe chacojatjá chentšana, ndayá juabemama atše chaitsebonnama. <sup>27</sup> Er atše sěntsejuabná ndoñe corente juabnayabe soye yomna, canye utamená jíchmuana y ndayama chabe contra tmojtsichámuama ndoñe lempe ntjuabemana ca” —cha tojánayana.

## 26

*Pablo tojanontsé rey Agripbe delante jóyebuambayama*

1 Chentšana, Agripa Páblëbioye tbojaniyana: —Jóyebuambayama contselesenciana, cach aca chacuenëuyanama ca.

As Pablo, chë réybioye jachuyama cucuatše tojanatsbaná y jenëuyanama tojanontsé mëntšá jayanama: 2 —Atše ndegombre sëntsoyejuá mora chjobenaye acbe delante jóyebuambayama, uámana rey Agripa, chca, atše jenëuyanama nÿetsca soyëngama ntšamo judiënga atšbe contra montsichámuama; 3 y más sëntsoyejuá, taitá conduábuatmama lempe ntšamo judiënga monduamancá y condétatsëmbo chë judiënga ndayama imuenoboyebuambnana. Chcasna, Diosmanda uantádoca šmotsoyeuná.

### *Pablo tojanacuntá ntšamo cha tempo inamnana*

4 “Nÿetsca judiënga mondétatsëmbo ntšamo atše tempscana chëngbeñe tsiyenama, bobontse sënjamna orscana, atše sënjanonÿná luarentše y Jerusalenentše. 5 Chëngnaca mondétatsëmbo y montsobena jayanana, chënga tmojtsebošëse, chca ndegombre yomnana; atše nÿets tempo fariseucá vida sëndbomna, y chë fariseunga mondoyena más soyënga jtsamëse chë judiëngbe leyëngaca chë inÿe judiëngbiana. 6 Y mora, ntšamo Bëngbe Bëtsá bëngbe bëts taitanga tojanašebuachenacá, chë obanënga jtayenama cha yochjamama puerta jtsošbuáchiyëse atše obatmana causa, šmojuánatse atšbe contra jayanama. 7 Bëngbe bnëtsana uta Israeloca bëts pamíllanga mondobátmana chë šbuachenana soye chëngbiana chaóshjanguama y chíyeca, cada te bnëtë y ibeta chënga Bëngbe Bëtsá mondadorana y mondëserveda. Y atše cach soyama obatmana causa, bëts rey Agripa, judiënga mora atšbe contra montsabíchamo. 8 ¿Ndáyeca tšëngaftanga judiënga šmojtsichamo, chë obanënga chámuatayenama Bëngbe Bëtsá yochjamama jtsošbuáchiyama ndoñe šmontsobena ca?

### *Pablo tojanacuntá, ntšamo tempo cha Jesucristbeñe ošbuáchiyënga yojanaborlánama*

9 “Y cach átšnaca sënjanjuabná atše šojamna lempe ntšamo stjobenacá jamana, Jesús chë Nazaretocábeñe ošbuáchiyënga corente chamosufrima, 10 y chca Jerusalenentše atše sënjamna. Chë bachnangbe amëndayënga mando šmonjanatšetá, y chca, banga Jesucristbeñe ošbuáchiyënga cárceloye sënjanëtame; y jtsëbáyama ca chëngbiana montsanichamo ora, átšnaca aíñe chca chamoma ca sënjánichamo. 11 Y ba soye, chë judiëngbe enefjuana yebnënguenache jabuache chënga sënjanatsetšená, chënga Jesucristo ústonana chamotsajbanama, y chëngaftaca

tša etonaná sënjëtsemna causa, chë inÿe luarëngoca bëtš pueblënguenáchnaca chënga sënjanëcamena.”

*Pablo tojanacuntá ntšamo cha Jesucristbeñe ošbuachiyá tojanóbema*

(Hch 9.1-19; 22.6-16)

<sup>12</sup> “Y cachcá jamama canÿe te Damascoye sënjëtšaye; chë bachnangbe amëndayënga uabemanëchangá šmonjanëntšabuaché chca jamama y, cachënga choye šmonjanichmó. <sup>13</sup> Pero, uámana rey, chë benachëjana mo nÿetsto ora, sënjáninÿe canÿe bëtš tcuinÿe celocana, šhinÿama corente más enjëtsebinÿnaye, y atše y chë átšeftaca ajnëngbe shëconana corente enjëtsebuashinÿinÿana. <sup>14</sup> Nÿetscanga fsënjánshajaye y atše sënjanuena canÿe oyebuambnayana, hebreo biyañe, mëntšá šonjëtšatsaye: ‘Saulo, Saulo, ¿ndáyeca chca šcojtsacmena ca? Cach aca bacá contsenabomá, atšbe entšanga chamosufrima tcojtsama ora, mo uacná ngmëche niñëfjiñe cha tojtsoscunjná orcá, cachá jenótsetšenana ca.’ <sup>15</sup> As atše sënjánayana: ‘¿Nda comna, Bëngbe Utabná ca?’ Y chë Utabná šonjanjuá: ‘Atše sëndmëna Jesús, y aca condama atšbe entšanga chamosufrima ca. <sup>16</sup> Pero matëtšbaná y matëtšá. Atše cbonjébëocna jinÿinÿiyama aca tcojuábuayanama atše šcochjaserviama, y chacotsetatšëmbuama y entšanga chacuacuntama, mora tconjinÿe soyama y más chcoye atšbiama cbochanjinÿinÿiye soyëngámnaca. <sup>17</sup> Atše chanjama judiënga y ndoñe judiënga tondaye chacmondëborlama; y morna, ndoñe judiëngbioye cbontsichamná, <sup>18</sup> chënga atšbe soyëngama josértama aca chacomama. Chca, chënga bacna juabnënga ndoñe chamondëtsebomna, mo ibetiñe cuaftsemnëngcá, sinó mo binÿniñcá chamotsemna átšeftaca, atše chë entšangbe juabnënga binÿnayá. Satanasbe cucuatšiče ndoñe chamondëtsemnama, sinó Bëngbe Bëtšabe obenánaca chamotsiyenama; chënga átšbeñe chamotsošbuáchema, y chca, chëngbe bacna soyëngama perdonánënga chamotsemnama y chënga chamotsebomnama canÿe luare entšángaftaca, chë ndëmuanÿëngbioye Bëngbe Bëtšá tšabe entšanga y chabe entšanga tojábiama, chënga átšbeñe betsošbuáchiyama ca’ ” —cha šonjanियana.

*Pablo tojanma ntšamo chë mo otjenayoquëcá tojaninÿcá*

<sup>19</sup> “Chcasna, bëtš rey Agripa, atše sënjanma chë mo otjenayoquëcá sënjáninÿe ora ntšamo Cristo šonjaniancá; <sup>20</sup> y natsana, Damascoca entšanga chë tšabe noticiëngama sënjanabuayená; chentšana, Jerusalemnoquënga y nÿetsca chë Judea luaroquënga y ndoñe judiëngnaca; chënga

sēnjánaimpadana bacna soyēnga amama ngménaca chamuatenójuaboma, chca amana chamuajbaná y Bēngbe Bētsabe benache chámuatishachama, y soyēnga chamotsama jin̄yinyiyama chca ndegombre tmojanmama. <sup>21</sup> Chca sēnjánama causa, judiēnga Bēngbe Bētsabe bēts yebnoca šmonjanishache y tmonjánbošena atše jtsóbana. <sup>22</sup> Pero Bēngbe Bētsá sempre šonduájabuachana, y chca, cada te mēntscoñama, n̄yetscanga Bēngbe Bētsabiamama sēndabuayiyá, uámanēngbioye y nduámanēngbioynaca; n̄ye ntšamo Moisés y Bēngbe Bētsabe juabna oyebuambnayēnga tmojanayancá, ntšamo yochjopásama atše sēndoyebuambná; in̄yetsá ndoñe. <sup>23</sup> Chēnga tmonjánayana: ‘Bēngbe Bētsabe Uámana Uabuayaná, Cristo jóbanama bontsemna; pero chaojóbanentšana, cha chē natsaná echántsemna obanēnguentshana jtayenama, y cha judiēngbioye y ndoñe judiēngbioye echanjabuayená, y chca, chēnga mochántsetatsēmbo n̄yetscanga chábeñe tmojtšošbuáchenga atsebácanēnga mochtsemnama ca.’ ”

*Pablo tojanma rey Agrípbioye jáyēnjanama, Jesucristbeñe ošbuachiyá chaóbemama*

<sup>24</sup> Pablo, cachá jenēuyanama chē soyēnga tojánayana ora, Festo mēntšá tojanáyebuachena: —¡Pablo, opá cojtsóbema! Yapa ualíaye causa, opá tcojtsóbema ca.

<sup>25</sup> Pero Pablo tbojanjuá: —Opá ndoñe quetsátsmēna, bēts uámana Festo; in̄yetsá entsemna; atše sēntsoyebuambná n̄yets juábnaca, y ndegombre soyēnga. <sup>26</sup> Chentše rey Agripa entsuenana, y cha puerte tšabá chē soyēngama endētatsēmbo, chíyeca, tondayama ntjatauatjca, atše chabe delante sēntsoyebuambná; atše corente sēndētatsēmbo chánaca chē soyēngama yotatsēmbuama, er ndayá Jesús tojanmcá, ndoñe tonjopasá ndaye iytēmena chaboye. <sup>27</sup> Bēts rey Agripa, ¿Bēngbe Bētsabe juabna oyebuambnayēnga tmojánayana soyēnguiñe aca quecošbuaché? Atše sēntsetatsēmbo aiñe chiñe cošbuáchema ca —Pablo tbojaniana.

<sup>28</sup> Chora Agripa tbojanjuá: —Batšatema más y mašcjayēnjaná Jesucristbe ustoná atše jóbemama ca.

<sup>29</sup> As Pablo tojánayana: —N̄ye batšatema más o bētsicama más, atše Bēngbe Bētsá sēntseimpadana, ndoñe n̄ye bēndatbe barie, sinó n̄yetscanga chē mora šmojtsuenanēnga, atšcá Cristbe ústonēnga chašmobiamama, pero utámenēnga ndoñe chamondētsemna, ntšamo mora atše sēntsemncá ca.

<sup>30</sup> Chorna, chē rey, chē mandado, Berenice y chē chēngaftaca imojantbiámanēnga tmojantsbaná, <sup>31</sup> y luaroye tmojána chē soyama jencuéntama. Mēntšá imojtsichamo: —Quem boyabása ndocna bacna soye tonjama jóbanama

chabotsemnama, ni mo utamená jtsemnama ndoñe quebnátsmëna ca.

<sup>32</sup> Y Agripa Féstbioye tbojaniana: —Chë Romoca bëts mandado, quem chabe soyama cháuyanama cachá ndoñe matênjábošenëse, bënga matmênjobená quem boyabása jëtsboshjonama ca.

## 27

### *Roma bëts puebloye Pablo tmojanichmó*

<sup>1</sup> Italia ca uabaina luaroye Pablo jíchmuama tmojanenoye-uná ora, atše, quem librëša uabiamnayá, cháftaca sënjána. Chora Pablo y chë inye utámenënga Julio ca uabainabe cucuatšiñe tmonjánabashejuana. Julio enjamna canya chë Romoca bëts mandadbe soldadënguentša mandayá. <sup>2</sup> Asna, fsënjánašëngo canye Adramitio puebloca barcuñe; ya chë Asioca bëts pueblëngoye juama enjétsamna. Cesarea pueblentsana fsënjánbocna y Aristárncaca bëngaftaca enjëtsemna; cha enjamna Tesalónica bëts pueblócá, Macedonia luaroca.

<sup>3</sup> Chë inye yëfsana, Sidón puebloye fsënjánashjajna. Chentše Julio, tsabá mandbomná Pábloftaca enjëtsemna; tbonjanlesenciá chabe amiguëngbioye chauabuáchama, chënga chamofjama y chamóbocuedama. <sup>4</sup> Sidonocana fsënjëftsanbocnentsana, bëngbe contra corente enjëtsebinÿiaye. Chíyeca, Chipre fshantsënga catšbioicajana, ndoñe yapa quentëtsebinÿiayëjana bënga fsënjána. <sup>5</sup> Cilicia y Panfilia luarënga béconana mar bejaycá fsënjánachnëngo, y Mira bëts puebloye fsënjánashjajna, Licia luaroca.

<sup>6</sup> Chë soldadëngbe amëndayá, canye Alejandría puebloca barco chentše tonjáninÿena, Italia luaroye yojétsaye; asna, šonjanamëndá chë barcuñe jenójajiyana.

<sup>7</sup> Baseftaytentscuana uenana fsënjánana y pordonto fsënjanobená Gnido pueblentsa ndirichiñe jashjanguana. Cabá bëngbe contra enjëtsebinÿiaye causa, Salmón luarëjana fsënjánachnëjna, Creta fshantsënga béconana, ndoñe yapa quentëtsebinÿiayëjana. <sup>8</sup> Y chca, pordonto bejaycá fsënjánana, fshantsënga béconana; chentsana, canye pueblo, Tsabe Puertënga ca uabáinentše fsënjánashjajna, Lasea ca uabaina pueblo béconana.

<sup>9</sup> Chca, bayté tonjanochnëngo y chora chë bejaycá jama puerta resjo enjëtsemna, er ya chë judiënga bayënga jobáyama te tonjanochnëngo, Bëngbe Bëtsá chëngbe bacna soyëngama cháuperdonama, y chora chë uaftena tempo joshjanguama ya enjëtsobeco.

<sup>10</sup> Chíyeca Pablo chë entsanga mëntšá tonjanabuayená: “Baconga, atše šontsinýana mora puerte resjo entsemna bejaycá játama, y ndoñe tšabá queochátsmëna, ni chë uasmanëshangama, ni chë barcuama y bëngbiama cach ndoñe, mo nderado muanjanóbana ca.”

<sup>11</sup> Pero chë soldadëngbe amëndayá Páblëbioye ndoñe ntjoyeunayana; más, chë barcuentsa mandayá y chë barco nduíñbioye aíñe. <sup>12</sup> Ndoñe tšabá yonjamna, chë barco chora enjëtsemnentše chë uaftena tempëntscuana jëftsemnana; chë causa, nýa mo nýetscanga tmonjanenoyeuná cachiñe bejaycá chentšana játama, nderado cuanjobenaye Fenice puebloye jashjanguama y chentše jëftsemnana chë uaftena tempo tojopochocantscuana. Chë pueblo Creta luaroca enjamna; y choye jamashënguamna enjamna shinýe endbetsenatjëmbambana juachoica tsjuanoicajana y tsmanoicajana.

*Mar béjayiñe puerte uaftena y binýia tojanóshjango*

<sup>13</sup> Chentšana tonjanontsé tsmanoicana batšá binýiayana, chíyeca chë entsanga tmonjanjuabó ya yojsanopodena jtëtóntšana jama ca. As, chentšana fsënjëftsanbocna y bejaycá fsënjána, Creta fshantsënga beconanëjana. <sup>14</sup> Pero baseftayté chentšana, chë fshantsëngocana tonjanontsé corente jabuache binýiayana y chë barquëshoye enjétsoshjajuana. Chë binýia yojanabaina Nordeste binýia ca. <sup>15</sup> Chë barcna nýe chë bínýiëbe ponto tonjanontsé uayana; chë binýia enjétsobayëjana jama ndoñe quentétsopodena causa, šonjanotocá nýe ntšamo tojtsebinýiacá chašúyambama. <sup>16</sup> Chentšana fsënjánachnëjna Cauda ca uabaina stëtšoicajana, base fshantsënga mar béjayoca; chiñe ya ndoñe tša jabuache quentétsëbinýiaye y pordonto fsëñjanobená buyeshoicana jtabocnana chë barco enjanasjá canouše, ndoñe chaondëtsóndbemama. <sup>17</sup> Ya chë barquëshoye fsëntanëshëngo orna, chë entsanga lazëjangaca chë barquëshasha tmontsanabatsécaca, más uamorochëshasha chaotsamnana. Pero chënga monjétsauatja nderado chë barco chë Sirte ca uabaina cascajuentše nanjetsánjua; asna, chë barcuentsa ancla tmonjanashëbëútsëna, chë barco ndoñe betsco chaondëtsábonjnana, y ntšamo enjetsanbinýiaycá fsënjána. <sup>18</sup> Chë inýe yëfsana y chë binýiayana cabá jabuache enjëtsemna causa, chënga tmonjanontsé chë barcuentsa uasmanëshangá jtsëshbuëtsetsana; <sup>19</sup> y unga tianoye bëngnaca šonjanotocá, cach bëngbe cucuátšëca, chë barcuentsa soyënga buyeshoye jtsëtšanana. <sup>20</sup> Baytentscuana bënga ndoñe chibiatanobená jinýana ni shinýe, ni estrellatëmënga, tša tonjëtseibetata causa; y tša jabuache enjëtsebinýiaye causa, bënga ya ndoñe quefstëtsanobatmana chentšana jótsbocana.

21 Ya bayté enjésemna y chëntscuana tondaye saná ntjascá fsenjésemna. Chentsana, Pablo bēngbe tsēntsaca tonjantsá y tonjánayana: “Baconga, tšabá manjamna atše mašmējanoyeuná y Creta luarocana ndoñe matmējēftsanbocna; chca mora ndoñe mal mamojtsepasá y ndoñe n̄ya n̄yetsá matmējjobuetše. 22 Pero mora ngmēnaca ndoñe matsmēnēngana; masque chē barco echantsenatjēmba, tšēngaftanguentsá ndocná queochatóbana. 23 Ibeta can̄ye ángel šonjébēbocna; Bēngbe Bētsá, ndabia atše sēndmēna y nda sēndēserveda, cha tbojichmó; 24 y chē ángel mēntšá šonjauyana: ‘Pablo, ndoñe matauatjana; entseyta aca chē Romoca bēts mandádbioye chacotsama, y aca Bēngbe Bētsábia cómnayeca, n̄yetsca quem barcuine ajnēnga jobanámentšana cha echanjatsebacá ca.’ 25 Chcasna, baconga, ndoñe matauatjēngana, er atše Bēngbe Bētsábeñe corente sēntsošbuaché y lempe ntšamo chē ángel šonjauyancá echanjóbocna. 26 Pero mora entseyta can̄ye fshantse mar bėjaiñe chašúshejanguama ca” —cha tonjanēyana.

27 Can̄ye ibeta, uta semana fsenjánana chentsana chē Adriático ca uabaina mar bėjaiñe fsenjésemna, y n̄ye ín̄oye y ín̄oye chē bin̄ya šonjétsēyambaye. Y mo tsēntseto yojésemna orna, chē barcuentsa trabájayēnga tmojanjuabó ya fshantse béconana imojésemna ca. 28 As chēnga tmonjanmedidá ntsachetšá chē búyeshe buatjoye inamnana y tonjanóbocna unga bnētsana y chnēnguana metro; más chcoye cachiñe tmonjanmedidá y uta bnētsana can̄ysēfta metro tonjanóbocna. 29 Chēnga monjétsauatja nderado bēts ndētsbēngaca nanjētsántšētjiama; asna, chē barco stētsoicajana canta ancla buyeshoye tmonjanashēbēútsena, chē barco ndoñe más chaondētsábonjnana, y tša monjéteseboše betscó chaobín̄yana. 30 Chēntscuana, chē barcuentsa trabájayēnga tmojánbošena chentsana jtsachetana; chamna, chēnga tmojanontsé chē canouše buyeshoye justjanguana, pero chca imojétsama, mo chē anlēnga chē barco natsanoica cuaftsēstjajuancá. 31 Pero Pablo chē soye tojánin̄ye, y chē soldadēngbe amēndayábioye y chē soldadēngbioye tonjanēná y mēntšá tonjanēyana: “Chē barcuentsa trabájayēnga cach quem barcuentsē ndoñe chamonjoquedase, tšēngaftanga ndoñe quešmochatobenaye muentšana jótsbocama ca.”

32 As, chē soldadēnga tmonjána y chē canoušentsa lazējēnga tmontsantētsetše y buyeshoye chēse tmontsantsatše.

33 Enjésebin̄yana ora, Pablo n̄yetscanga tonjanaimpadá ndayánaca chamosēngama, mēntšá jáuyanēse: “Ya uta semana entsemna y tšēngaftanga ni mo batsatema chešmatamaná, y tondaye chešmatsbmuananga. 34 Diosmanda, masque n̄ye

mo batšatémnaca šmochjase. Chca cmontsamna jamana ndoñe chašmondóbanama, er ndocná ndocá queochatspása ca.”

<sup>35</sup> Pablo, chca tonjánayanentšana, canye tandëse tonjanca y nyetscangbe delante Bëngbe Bëtsábioye tbontanchuá. Chorna, tonjanjatá y tonjanontsé jasama. <sup>36</sup> Chentšana nyetscanga tmonjanenñemó y chëngnaca tmonjanse. <sup>37</sup> (Chë barcuentše nyetscanga fsënjamna uta patse y canyësëfta bnëtsana y chnënguanënga.) <sup>38</sup> Ntsamo inmabošcá tmonjansentšana, buyeshoye trigo tmontsanashaná, chca, chë barco ndoñe yapa chaondëtsautama.

### *Chë barco tojtsanenatjëmba*

<sup>39</sup> Ya tonjanbinÿna ora, chë barcuentša trabájayënga ndoñe quemëntétsetatšëmbo ndaye fshantse chentše bëtsemnama, pero tmonjáninÿe chë fshantsentše canye luare jachañe, chë béjaye chë luaroye omashjuanentše, y chiñe canye chënyañe enjamna; as chënga tmonjanjuabó jarrepárana nderado cuanjobenaye chëjana chë barco chë fshantsoye juyambana. <sup>40</sup> Asna, chë anclentša lazëjënga tmontsantétsetse y chë anclënga buyeshoye tmontsanboshjuana, y chë timón, chë barco juyambama oservena soyentša uabatsëcnëjëngnaca tmontsanjafjoná. Chorna, chë barcuentša natsanoica niñësiñe entšëjua tsbanánoye tmontanëšëngo, y chë binÿia tonjanma chë barco chaontsé chë chënyoye juabëconama. <sup>41</sup> Pero chë barco canye luaroye tonjánashjango, y chentše chë béjaye catatoicajana enjetsobuá y chë barco cánÿentše, bëtscá cascajo buyeshiñe binÿnentše tontsanajo. Chë barcuentša natsanoica lado chë cascajuiñe entsanajuena, ndócnoye juabónjuama ntšopodencá, y chë stëtsoica lado puerta entsanashatiyiyná y lempe entsanandbiamná, yapa binÿia causa y búyeshe chentše enjëtsojantšetaye causa.

<sup>42</sup> Chora, chë soldadënga tmonjanjuabó chë utámenënga jtsëbáyana, jachbabëse chënga ndoñe chamondëtsachetama. <sup>43</sup> Pero chë soldadëngbe amëndayá inaboše Pablo jatsbocama, y chíyeca chë soldadëngbioye ndoñe chenatanalesenciá chca jamana; y tojanmandá nyetscanga chë jachbabama obenëngna natsana chë buyeshoye joshbuetšana tsachoye chamuashjanguama, <sup>44</sup> y chë ínÿengna tablëshënguiñe o chë barcuentša pedazënguiñe chamoshbuetšama. Y chca, nyetscanga fsënjanošená tšabá y ndocá ntjapasacá fshantsoye jashjanguama.



1 Ya n̄yetscanga fshantsoca t̄sabá fs̄enj̄tsemna ora; fs̄enj̄ántats̄ẽmbona ch̄ẽ luare Malta ca yojanabaina. 2 Ch̄ẽ luarent̄sa ents̄anga b̄ẽngaftaca corente t̄sabá mándbomn̄ẽnga monj̄tsemna; can̄yẽ íñeshe tmonjanangbotj̄o y šonjan̄ẽbuaja choca b̄ẽnga jat̄ošboniyama, er t̄sa enj̄etsaftena y yapa enj̄etses̄esna. 3 Pablo tojanatbaná básefta buashana chames̄ẽfj̄ẽnga y ch̄ẽ íñeshoye enj̄etseshacjnaye ora, can̄yẽ m̄ets̄cuaye tojánbocna y enj̄etsachaye, chent̄se yapa obon̄yaye causa, y Pábl̄ẽbe cucuat̄siñe tontsanonj̄yá. 4 Ch̄ẽ luarent̄sa ents̄anga, ch̄ẽ m̄ets̄cuaye Pábl̄ẽbe cucuat̄siñe yojtsajon̄yanama tmonj̄ánin̄yẽ ora, monj̄etsenats̄ẽsnaye: “Quem boyabása ndegombre in̄ya obanayá cuanm̄ẽna; mar b̄ejayoca jobanáment̄šana tojotsbocá, pero chca uamana causa, diosá Justicia ndoñe quebnatsles̄encia cha vida chaotsebomn̄ama ca.”

5 Pero Pablo tontsanenacuest̄etoná y íñeshoye ch̄ẽ m̄ets̄cuaye tbontsantsat̄se y Pablo ndocá chenatanpasá. 6 Ch̄ẽ ents̄anga imoj̄tsejuabnaye ch̄ábioye bochtsacuefshachá y n̄yẽ ndeolpe obaná yochjashajaye ca. Pero b̄ẽn tonjanochn̄ẽngo y ndocá chenátanopasama ch̄ẽnga tmonj̄ánin̄yẽ ora, ya ndoñe cachcá quem̄ent̄sanjuabnaye y tmonjanont̄sé ichámuana Pablo can̄yẽ dios inamna ca.

7 Chent̄sa b̄econana inamna ch̄ẽ luarent̄sa mandayabe fshants̄ẽnga. Cha šonjan̄ẽbuaja y corente t̄sabá šonjanacuedá, unga tentscuana. Ch̄ẽ taitana Publio ca inauabaina. 8 Ch̄ẽ tempo, Públ̄ẽbe taitá šocá jutsn̄ẽshañe inajájona, calentóraca y buíñeca buamachn̄ẽjuánaca. Pablo tonj̄ána cha jin̄yama y tonj̄ánamash̄ẽngo; B̄ẽngbe B̄ets̄ábioye tbonjanimpadá y ch̄ẽ šocábeñe chabe cucuat̄s̄ẽnga tonjanjajó, y chca, cha shnaná enj̄etsatsm̄ẽna. 9 Chca tonjanopasá chent̄šana, ch̄ẽ luarent̄sa in̄yẽ šoqūẽnga Pábl̄ẽbioye monj̄ánajna y cha enj̄ánashnaye. 10 B̄ets̄cá t̄sabe soȳẽnga chent̄se b̄ẽngbiama tmonjanma, y cachiñe játama ya ch̄ẽ barcuíñe fs̄entanenojayenga orna, lempe nt̄samo bejaycá jama šonjan̄ẽjabotcá ch̄ẽnga šonjanat̄satá.

### *Pablo Romoye tojánashjango*

11 Ch̄ẽ fshantsent̄se mar b̄ejayoca unga ishin̄yẽ fs̄enj̄tsemna, y chent̄šana can̄yẽ Alejandriocana yojanabá barcuíñe fs̄enj̄anenoyayé; ch̄ẽ barco n̄yets uaftena tempo ch̄ẽ luarent̄se yoj̄t̄samna y enjanabaina Cástor y Pólux ca, mo ch̄ẽ roman̄ẽngbe uta diosata cat̄satcá. 12 Chent̄šana, Siracusa b̄ets̄ puebloye fs̄enj̄ánashjajna y chent̄se unga te fs̄enj̄tsemna; 13 y chent̄šana fshantse b̄econana bejaycá fs̄enj̄ána, Regio puebloye jashjangūentscuana. Ȳẽfsana, tsmanoicana tsjuanoye enj̄tsebin̄ȳiaye, y chca, ch̄ẽ in̄yẽ ȳẽfsana Puteoli

puebloye fsenjánashjajna. <sup>14</sup> Chentše básefta Jesucristbeñe ošbuáchiyënga fsenjánanýena, y šonjanëbuaja chëngaftaca canýe semana chentše jëftsajëtanama; y chentšana Romoye fsenjëftsanbocna. <sup>15</sup> Romoca Jesucristbeñe ošbuáchiyënga ya imojëtsetatšëmbo bënga choye fchjanashjajnama; chcasna, chënga tmonjánbocna bënga jajëbenguama canýe luare Foro del Apio y Unga Tabernënga ca uabainóntscoñe. Pablo chënga tonjánanýe ora, Bëngbe Bëtsá tbontanchuá y puerta añémoca enjëtsemna. <sup>16</sup> Romoye fsenjánashjajna ora, soldadëngbe amëndayá Páblëbioye tbonjalesenciá cánýabe yebnentše chaotsiyenama, y tonjanmandá canýe soldado chabotsebojanýama.

### *Ndayá Pablo Romoca tojanma*

<sup>17</sup> Choye fsenjánashjajnentšana unga tianoye, Pablo tonjanmandá chentše imnoyena judiënga más uámanënga chamobéconama; y nyetscanga ya tmojánenefjna ora, cha tojanéyana: —Catsátanga judiënga, masque atše tondaye chiyatsma bënga judiënga mondbétsama soyëngama contra, ni bëngbe bëts taitanga imojanamana soyëngama contra, judiënga Jerusalemoca šmonjanishache y romanëngbe cucuatšinë šmonjáboshjona. <sup>18</sup> Chë romanënga lempe šmonjantjá chentšana, monjëtseboše atše jëtsboshjonana, er ndocna bacna soye chemátaninýena atše jóbanama chašotsemnama. <sup>19</sup> Pero chë judiënga ndoñe quemtëtseboše atše chašmuatsboshjonama; chíyeca, šonjanotocá jáimpadana cach Romoca bëts uámana mandado cháuyana atše tšabá o ndoñe tijanmama, masque atše tondaye quetsátsbomna, cach atšbe luarentša entšanga, judiëngbe contra jayanama. <sup>20</sup> Chíyeca, atše tbonjúbuaja jányama y jáuyanama, er ndayama chë Israeloca entšanga puerta jtsošbuáchiyëse mondobátmanama, chë obanënga mochtayenama, atše mora utamená sëntsemna ca —tojanéyana.

<sup>21</sup> Chora chënga tmojanianyana: —Bënga ni mo canýe tsbuanácha Judeocana fchiyatáyëngaca acbiama noticiëngaca, y ni canýe catšata judío, chocana moye ashjajnënguentšá, ndocna bacna soye acbiama chešnatacuntá. <sup>22</sup> Bënga fsëntseboše jouenana ntšamo aca cojuabnama, er ntšamo Jesucristbe ustonëngbiamana fstsëtatsëmbcá, entsemna ana nyets luarenache chëngbe contra entšanga imojtsichamo ca.

<sup>23</sup> Asna, canýe tescama Pablo tmojanianyana chca chaotsemnama; y chë tena, ba entšanga chë Pablo posada inabomnoye tmojanobeconá. Y cachëscana tojanjëtanëntscuana, Pablo entšanga yojanëtsëtsná Bëngbe Bëtsabe amëndayama, ndayama cha ininýe y inatátšëmbo; y yojtsentšena chënga jáyënjana

Jesúsbeñe chamotsošbuáchema, Moisesbe leyënguentsä soyëngaca y Bëngbe Bëtsabe juabna oyebuambnayëngbe uabemana librëšangañe soyëngaca. <sup>24</sup> Báseftanga aiñe imojtsošbuáchiye ntšamo Pablo yojtsanëtsëtsnacá ndegombre bëtsemnama, pero ínÿengna ndoñe. <sup>25</sup> Nÿetscanga ndoñe cachcá montsanjuabnaye causa, tmojanontsé chentšana jésebocanana. As Pablo tojanéyana: “Nÿets razónaca chë Uámana Espíritu tšëngaftangbe taitanga tojanéyana, Bëngbe Bëtsabe juabna oyebuambnayá Isaíasbiajana, mëntsá:

<sup>26</sup> Motsa chë entšanga jauyanama:

‘Bëtscá šmochantsuenana, pero tondaye quecmochátësertana; tša šmochantsafšna, pero tondaye quešmochátinÿe.

<sup>27</sup> Muentša entšanga ainánaca josértama ndoñe quemátsboše causa,

chënga nduauenanënga montsemna y nduabinÿnëngnaca;

chënga bomínÿeca ndoñe chamondobená jinÿama,

ni chëngbe matscuašeca jouenama,

ni chëngbe ainánaca josértama ndoñe chamondobená,

chca, atšbe benache ndoñe chamondishachama,

atše ndoñe ntjátsebacama ca.’ ”

<sup>28</sup> Pablo chora mëntsá tojanéyana: “Ndegombre šmochtsetátšëmbo, cach quem Bëngbe Bëtsabe buayenana soyënga entšanga bacna soyënguentsána játsebacama, chë ndoñe judiëngbioye mochanjábuayenaye, y ndegombre chënga cocayé aiñe mochanjóyeunaye ca.” <sup>29</sup> (Pablo chca tojánayana ora, chë judiënga chentšana imojésebocana y tša imojtsenatsëtsnaye.)

<sup>30</sup> Pablo uta uata chentše tonjanoquedá canÿe uántšamena yebnentse; y nÿetscanga cha jauatsëtsayama monjánajnënga cha enjanëbuájajana. <sup>31</sup> Nÿetscangbe delante puerte añémoca entšanga enjanabuayiyiná Bëngbe Bëtsabe amëndayama, y enjanabuatambá soyënga Bëngbe Utabná Jesucristbiama, y ndocna Romoca mandayá quebënjatanauyá chca jtsamama.

## Romanos

### *Pablo Romoca ošbuáchiyënga jacheuayama*

<sup>1</sup> Atše Pablo, Jesucristbe oservená, quem tsbuanácha sentsabiamná. Bëngbe Bëtsá šonjanchembo Jesucristbe ichmoná jtsemnama, y šonjanbocacá chabe tšabe noticiëngama entšanga chayábuayenama.

<sup>2</sup> Ya bayté entsemna, Bëngbe Bëtsá chabe juabna oyebuambnayëngaftaca chë tšabe noticiënga entšanga tojanašebuachená, y chënga chca tmojëftsaná bema Bëngbe Bëtsabe uabemana palabrënguïñe. <sup>3-4</sup> Chë tšabe noticiëngna, chabe Uaquiñá Bëngbe Utabná Jesucristbiamá jtsóyebuambnayana. Entšá quetsomñecana, tojanonýná canýe rey Davídbentša entšábentšana; pero chabe espíritu sempre uamanáyecna, Bëngbe Bëtsá chabe obenánaca entšanga tojaninýanýé Jesucristo chabe Uaquiñá bétsemnama. Cha chca tojaninýanýé chë Uaquiñá cháuatayenama cha tojanma ora.

<sup>5</sup> Chábeyeca, Bëngbe Bëtsá atše canýe bëts soyama šojanábuayana, Jesucristbe ichmoná jtsemnama, chabe soyëngama entšanga jábuayenama, y nýets luarënguenache Jesucristbeñe ošbuáchiyënga chamotsemnama, y chca, ntšamo cha yomandacá chënga chamotseyeunanama. <sup>6-7</sup> Tšëngaftángnaca chëngbeñe šmontsemna, tšëngaftanga chë Romoca šmoyenënga, ndëmuanýënga Bëngbe Bëtsá tcmojáchembo Jesucristbenga chašmotsemnama. Atše tšëngaftangbiamá sentsabiamná, tšëngaftanga Bëngbe Bëtsabe bonshánënga y chabe entšanga chašmotsemnama chémbonënga. Atše sentsaimpadana Bëngbe Bëtsá Bëngbe Taitá y Bëngbe Utabná Jesucristo, chaboma tšëngaftangbeñe tšabe bendicionënga chaotsemnama, y chaboma tšëngaftanga ainaniñe tšabe ebionana chašmotsebomnama.

### *Pablo tša inaboše Roma bëts puebloye jama*

<sup>8</sup> Jabojátšamna, Bëngbe Bëtsá, Jesucristbiajana šcuatschuá, cada ona tšëngaftanguentsabiama, er nýets quem luariñe entšanga tša monjesoyebuambná tšëngaftanga Jesucristbeñe bëtscá šmojtsošbuáchema. <sup>9</sup> Bëngbe Bëtsá, nda nýets ainánaca sëndëserveda, tšabe noticiënga chabe Uaquiñabiamá abuayinyañe, endétatšëmbo atše nýets tempo Bëngbe Bëtsáftaca stsencuénta ora, tšëngaftangbiamá sëndétseimpadanama; <sup>10</sup> y mora Bëngbe Bëtsá sëntseimpadana, nýa mora y cha tojtsebošëse, chašolesenciá jama tšëngaftanga jautsëtsayama. <sup>11</sup> Er atše tša sënjëseboše tšëngaftanga jányama,

chca, atše chayobená jamama chë Uámana Espíritbentšana yóbocana tšabe soyënga tšëngaftanga chašmotsebomnama; y chca, tšëngaftanga ainaniñe bëts añemo chašmotsebomnama, y Jesucristbeñe corente chašmotsošbuáchema; <sup>12</sup> o más tšabá jayanamna, tšëngaftanga y átseftaca mochjenájabuache ainaniñe bëts añemo jtsebomnama, tšëngaftanga y átšnaca Jesucristbeñe tša imošbuachéyeca.

<sup>13</sup> Y morna, Jesucristbeyeca catšátanga, sëntseboše tšëngaftanga chašmotsetátšëmbo atše ba soye jama tijájuaboma, tšëngaftanga jautsëtsayama, pero mëntscoñama ndoñe tsjobenaye. Atše sëntseboše ndayá chayobená jamana ínÿenga tšëngaftangbioca Jesucristbeñe chamotsošbuáchema, ntšamo ínÿengbeñe ndoñe judiëngbeñe tonjopasacá. <sup>14</sup> Atše Jesucristbiana canÿe oservená sëndmëna, y chíyeca nÿetscángaftaca obligaciönaca sëntsemna, chë pueblënguiñe oyenëngaftaca y bën tjoye oyenëngaftaca, chë uatsjinÿenëngaftaca y ndoñe chcangaftácnaca. <sup>15</sup> Chíyeca atše tša sëntseboše tšëngaftanga chë Romoca šmoyenëngnaca chë tšabe noticiënga jábuayenama.

*Chë tšabe noticiënga Bëngbe Bëtsabe obenana jtsinÿanÿnayana*

<sup>16</sup> Atše ndoñe quetsátëuatja chë tšabe noticiënga jtsabuayiyayama, er chë noticiënga jtsinÿanÿnayana Bëngbe Bëtsabe obenana; y chë obenánaca, nÿetscanga Jesucristbeñe ošbuáchiyënga jtsoobenana atsebácanënga jtsemnama, natsana chë judiënga chca ošbuáchiyënga, pero chë ndoñe judiëngnaca. <sup>17</sup> Er chë tšabe noticiënga jtsinÿanÿnayana ntšamo Bëngbe Bëtsá inétsama entšanga chabe bominiñe tšábënga chamotsemnama. Y entšanga chabe bominiñe tšábënga jábiamana, chënga Jesucristbeñe tmojtsošbuáchema. Ntšamo Bëngbe Bëtsabe uabemana palabrënguiñe endayancá: “Nÿe ndabiana Bëngbe Bëtsá tojama chabe bominiñe tšabia chaotsemnama, cha Bëngbe Bëtsábeñe betsošbuáchema, cha ndegombre chë nÿetsca tescama yomna tšabe vida echántsebomna ca.”

*Bëngbe Bëtsabe delante nÿetscanga culpa bomnënga mondmëna*

<sup>18</sup> Bëngbe Bëtsá celocana tojinÿanÿé, chë uabouana castigo, tša tbojetnama entšangbiana chaotsemnama, ainaniñe bacna juabnënga bomnëngbiana y chë bacna soyënga amëngbiana y ndëmuanyëngbiana, masque Bëngbe Bëtsabe ndegombre soyënga jtsotatšëmbñana, tša bacna soyënga tmojtsama causa, ndoñe ntjalesénciana cachënga jtsiyenama ntšamo ndegombre yomncá. <sup>19</sup> Bëngbe Bëtsá echanjácastigaye, er ntšamo entšanga imobencá Bëngbe Bëtsabiana jtsetatšëmbuama soye, chëngaftaca sempre endëtsemna. Y chca endmëna, Bëngbe Bëtsá chë soye

tojinÿanÿeyeca. <sup>20</sup> Bëngbe Bëtsá quem luare tojanma orscana, entšanga mondetsobena botamana josértana, Bëngbe Bëtsabe obenana ndocna te yochjëftsopochócama y cha ndegombre Bëngbe Bëtsá yomnama. Chë soyënga Bëngbe Bëtsabiama entšanga quemuátobena jinÿana; nÿe jtsetatšëmbuamna aíñe. Entšanga mondobena chë soyënga Bëngbe Bëtsabiama jtsetatšëmbuana, cachá tojanma soyëngaca. Chcasna, chënga ndoñe quemátobena jayanana bacna soye tmojama, cha nduabuatma causa ca. <sup>21</sup> Chënga Bëngbe Bëtsabiama mondëtatšëmbo, pero ndoñe ntsebošana chábioye jadórana, “aca ndegombre Bëngbe Bëtsá condmëna ca” jtsichámëse, ni cha ntsatschuanayana. Pero, ntšamo chënga tmojtsejuabnacá tondaye ntsámanana; ndoservena juabnëngaca y bacna juabnëngaca montsiyena, y chca, chënga montsiyena, jtsamëse ntšamo cachëngbe juabnënga yomncá, mo ibetiñe cuaftsajncá. <sup>22</sup> Chënga jtsichámuana corente osertánënga imomna ca, pero ndegombrna juabna ndbomnënga mondmëna. <sup>23</sup> Chënga ndoñe ntsadoránana Bëngbe Bëtsá, chë ndocna te yochjëftsobaná; chë cuenta, soyënga tmojobopormá mo entšangcá, y chëngna aíñe jóbana; o soyënga shloftšëngcá o bayëngcá, o osjojnayëngcá, y chënga diosënga imomna ca jtsejuabnayëse jtsadoránana.

<sup>24</sup> Chíyeca, Bëngbe Bëtsá cachcá tojónÿa, cachëngbe ainaniñe puerte bacna juabnëngaca mandánënga chamotsiyenama, y chca, bacna soyëngnaca ínÿengaftaca imojtsama; chë soyëngamna jtsëuatjana chënga entsamna. <sup>25</sup> Chënga chca jtsemnana, er ndoñe tmonjábošena Bëngbe Bëtsabe ndegombre soyënguiñe jtsošbuáchiyana, pero chë ndoñe ndegombre soyënguiñe cocayé jtsošbuáchiyana; chënga jtsadoránana y jtseservénana, Bëngbe Bëtsá quem luarentše tojama soyënga; pero ndoñe ntsadoránana, ni ntseservénana cach Bëngbe Bëtsá, chë nÿetsca chë soyënga tojanmá. Entšanga nÿets tempo cha chamotsatschuaná. Chca chaotsemna.

<sup>26</sup> Entšanga chca ndoñe tšabá tmonjámayeca, Bëngbe Bëtsá cachcá tojónÿa, chënga ínÿengaftaca bacna soyënga jtsamama chamotsebošama; chë soyëngamna jtsëuatjana chënga entsamna. Y chca, chë shembásengnaca tmojtsajbaná boyabásengaftaca jtsamana ntšamo tšabá yomncá, inÿe shembásengaftaca bacna soyënga jtsamama. <sup>27</sup> Cachcá, boyabásenga tmojtsajbaná shembásengaftaca jtsamana ntšamo tšabá yomncá; y tša imojtseboše inÿe boyabásengaftaca bacna soyënga jtsamama. Chënga chë inÿe boyabásengaftaca bacna soyënga imojtsama causa, entsamna jtsëuatjana, y chë soyëngama castigánënga mochántsemna, cachëngbe cuerpënguiñe jasúfriase, ntšamo chëngbe bacna

soyëngama yojsëmerecencá.

<sup>28</sup> Chënga ndoñe tmonjábošena jtsiyenana jtsejuabnayëse, ntšamo entšanga Bëngbe Bëtsabiana imotatsëmbcá ndegombre bëtsemnama. Chíyeca Bëngbe Bëtsá cachcá tojónya, cachëngbe ndbémana juábnaca chamotsiyenama; y chca, chënga ba soyënga jtsamana, jamama ndoñe yontsamncá. <sup>29</sup> Chënga nÿetscna bacna soye jtsamana: ainaniñe nÿetscna bacna juabna jtsebmomnana, nÿe cachëngbiana bëtscá soyënga jtsebmomnana tša jésebošana, y ínÿengbioye ntšámnaca jáborlama jtsebošana; chënga nÿe játsbošana ínÿa tojtsebmomna soyënga jtsebmomnana, ínÿenga jtsébánayana. Mondmëna penzentserënga, ínÿenga áingñayënga, puerte bacna soyënga ínÿengbiana bošënga, y uayátsenayënga. <sup>30</sup> Chënga ínÿengbiana podasca jtsóyebuambnayana, Bëngbe Bëtsá jtsáyayana, ínÿenga jtsóyanguayana, nÿe cachëngbe soyënga más iuámana ca jésejuabnayana, tša jtsenábotamnayana, jésejuabnayana ntšamo muanjobenaye más bacna soyënga jamana; chëngbe bëtsetsangbioye ndoñe ntsayaunanana. <sup>31</sup> Chënga ndoñe ntsebošana chë tšabe soyëngama chaósertama, tondayama palabra ndbomnënga, ndocnábioye ntsebobonshánana y ndocnabiana ntjóngmiana. <sup>32</sup> Y chënga corente mondëtatšëmbo chca soyënga amëngbiana, Bëngbe Bëtsá chabe leyíñe tojayana jóbanama yojsëmerecena ca; pero masque chca, chënga nÿets tempo chca jtsamana, y oyejuayënga jtsënÿayana ínÿenga cachcá tmojtsama ora.

## 2

*Bëngbe Bëtsá echanjama chë ndoñe tšabe soye amënga bëtscá castigo chamotsebmomnana*

<sup>1</sup> Chcasna tšëngaftanga, chë ínÿenga ndoñe tšabá montsama ca šmojtsichámënga, ndoñe quešmátobena jayanana ndáyeca chca cach tšëngaftanga šmojama soyëngama. Tšëngaftanga chca ínÿengbiana šmojtsichamo ora, jtsinÿanÿnayana cach tšëngaftángnaca ndoñe tšabá šmonjamama, y castigánënga jtsemnama cmontsamna, er tšëngaftanga cachëngcá šmojtsiyena. <sup>2</sup> Bënga mondëtatšëmbo, Bëngbe Bëtsá ntšamo ndegombre yomncá inétsamama, chë chca amëngbiana ndoñe tšabá tmonjama ca y castigánënga jtsemnama yojsamna ca cha tojayana ora. <sup>3</sup> Y tšëngaftanga, chë ínÿenga ndoñe tšabá montsama ca šmojtsichámënga, y cachca soyënga šmojtsama, ¿šmojatsjuabná Bëngbe Bëtsabe castigüentsana šmochjotsbocá ca? <sup>4</sup> Bëngbe Bëtsá tšëngaftangbiana corente tšabe juabna endbomna; mora ndoñe quecmátacastigaye, y tšëngaftangacna puerte uantado nÿe chca endëtsemna. ¿Chama tšëngaftanga cha

šmojtsábotena? ¿Ndoñe šmondétatšëmbo Bëngbe Bëtsá chca corente jtsababuányeshanëse cmojtsënÿa, tšëngaftanga juabna chašmotrocama y chabe benache chašmuishachama cha yobóseyeca? <sup>5</sup> Er tšëngaftanga ndoñe quešmátsboše chacmotsësertánama, y bacna soyënga amama jtsajbanama ndoñe quešmátsboše causa, šmontsama más bëts castigo chašmotsebomnama, chë ndayté Bëngbe Bëtsá ntšamo entšanga tmojamcá tšabá o ndoñe tšabá bëtsemnama yochjayana ora; chë te, Bëngbe Bëtsá echanjamánda chë ndoñe tšabe soye amënga bëts castigo chamotsebomnama, y chë tšabe soye amëngna, uacanana soye; y chca echanjama ntšamo ndegombre yomncá, y echanjínÿanÿiye cha tša tbojetna, entšanga ndoñe tšabá tmonjamama. <sup>6</sup> Chca, chë te, ntšamo cada ona tojëftsemama, Bëngbe Bëtsábentsana echanjóyëngacñe. <sup>7</sup> Ndëmuanÿenga nÿets tempo tšabá jtsamëse imoyena, y chca imonguá Bëngbe Bëtsá más uámanënga chauabiama, cha chëngbiama tšabá chaotsoyebuambná y tšabe vida jtsebomnama chaoma; chë te chëngbiama Bëngbe Bëtsá echanjama, chë nÿetsca tescama yomna tšabe vida chamotsebomnama. <sup>8</sup> Inÿenga imoyena, nÿe cachëngbe juabnëngaca cachënga tšabá jtsomñama; y ntšamo ndegombre tšabá yomncá tmojtsaboté, ntšamo ndoñe tšabá yomncá jtsamama. Y Bëngbe Bëtsá chë te, ndoñe tšabá tmonjëftsobuachjanguamna puerte etonaná echanjayana nÿetsca tescama castigánënga jtsemnana chënga yojsamna ca. <sup>9</sup> Bëngbe Bëtsá echanjama, chca amëngna puerte chamosufrima y lastemcá chëngbiama chaotsemnana, er yapa tsetšénana chëngbiama echanjëftsemna; chca echántsemna chë chcángbeñe judiënga imomnëngbiama natsana, y ndoñe judiëngbiámnaca. <sup>10</sup> Pero chë te, Bëngbe Bëtsá echanjama, ntšamo tšabá yomncá amëngna puerte uámanënga chamotsemnana, chëngbiama corente tšabá echanjóyebuambaye, y echanjama chënga cháftaca tšabá tempcá chamotsatsmënama; y chca echántsemna chë chcángbeñe judiënga imomnëngbiama natsana, pero ndoñe judiëngbiámnaca.

<sup>11</sup> Er Bëngbe Bëtsabiama nÿetscanga cachcá monduámana. <sup>12</sup> Chë Moisesbe ley ndoñe monduábomnënga, bacna soye tmojamamna castigo mochántsebomna, masque leyënga ndoñe tmonduábomnëse, ndayá yojsamna jamama chaúyanama; y chë Moisesbe leyënga imuabomnëngbiamna, bacna soye tmojamama, Bëngbe Bëtsá echanjayana chënga ndoñe tšabá tmonjama ca y castigo chamotsebomna ca, chë leyënguiñe iuayana soyëngaca. <sup>13</sup> Chca endmëna, er Bëngbe Bëtsá ndoñe queonÿbatsma entšanga chabe



bominjĩne tšábenga chamotsemnana, nje ntšamo chẽ leyĩne iuayancá tmojtsuenanama, sinó ntšamo leyẽnguiĩne iuayancá, ndayá jamama yojtsamncá tmojtsamẽse. <sup>14</sup> Chẽ ndoĩne judiẽnga chca leyẽnga ndoĩne quematábomna, pero chẽngbe ainanentša juabnẽnga tojtsẽtsẽtsná ndayánaca jamana, y ndayá chamotsamama ntšamo chẽ leyẽnguiĩne tomandancá chẽnga tmojamẽse, chẽnga jtsinỹanỹayana tšabá imotátšẽmbo ndayá aĩne o ndoĩne inétsamna jamama, masque leyẽnga ndoĩne tmonduábomnẽse, ndayá yojtsamna jamama chaúyanama. <sup>15</sup> Ntšamo tmojtsiyencá chẽnga jtsinỹanỹayana, ndayá leyĩne yomandánama chẽnga ainaniĩne cachcá imojuabnana. Ntšamo chẽnga ainaniĩne imotátšẽmbo y imojuabnacá ndayá cachẽnga tmojamama, jtsinỹanỹayana chẽnga ntšamo chẽ leyĩne yomandánama cachcá imojuabnana. Inye ora, chẽngbe juabnẽnga echantsẽtsẽtsnaye aĩne o ndoĩne tšabá tmonjama ca; y ndayté, Bẽngbe Bẽtsá nyetscangbiama ntšamo tmojamama yochjayana ora, cachẽngbe ainaniĩne tmojajuabó soyẽngaca, cha echanjĩnỹanỹiye ndayá tšabá o ndoĩne tšabá tmonjamama. <sup>16</sup> Chẽ te, Bẽngbe Bẽtsá nyetscangbiama echanjayana chẽngbe juabnẽngama y ntšamo tmojamama, ndayá entšanga tempo ndoĩne tmonjánínỹama; cha chca echanjama Jesucrísoftaca; y chẽ atše sẽndabuayiyná tšabe noticiẽnga entsichamo ndegombre chca yochtsemnana.

### *Judiẽnga y Moisesbe ley*

<sup>17</sup> Y mora tšẽngaftangbiama, chẽ judiẽnga šmomna ca ichámẽnga, y tša šmojtsejuabná Moisesbe léyeca tšẽngaftanga tšabe vida jtsebomnana, y jtsenábotamnayana Bẽngbe Bẽtsabe ubuáyana entšanga šmomna ca; <sup>18</sup> tšẽngaftanga chẽ ntšamo Bẽngbe Bẽtsá yobošcá tšẽngaftanga chašmotsamama tatšẽmbẽnga, y chẽ leyentšana šmojuatsjinỹe jobocacayana ndayá más tšabá jamama tojtsemncá. <sup>19</sup> Tšẽngaftanga tša jẽsejuabnayana, šmobena ínỹenga chẽ ntšamo tšẽngaftanga cmẽsertancá ndosertánẽnga jujabuáchama ca, mo jtanẽnga unachayẽnga cuaftsemnẽngcá, o mo chẽ ndoĩne binỹniĩncá oyenẽngbe juabnẽnga binỹnayẽngcá; <sup>20</sup> tšẽngaftanga jtsejuabnayana chẽ ntšamo tšabá yomncá ndosertánẽngbiama abuayiynayẽnga šmomna ca, y mo chẽ basengcá tondaye nduatsjínỹenẽngbiama abuátambayẽnga ca. Tšẽngaftanga tša jẽsejuabnayana chẽ ley šmobomnana, lempe šmotátšẽmbo ca y ntšamo šmojtsichamcá ndegombre yojtsemna ca. <sup>21</sup> Y chcasna, tšẽngaftanga chẽ ínỹenga abuátambayẽnga, ¿ndáyeca ndoĩne cach tšẽngaftanga šmondẽtsánatsana? Tšẽngaftanga ínỹengbioye jtsabuayiynayana ndoĩne chamondẽtsatbẽbanama; as, ¿ndáyeca cach tšẽngaftanga šmnẽtsatbẽbana? <sup>22</sup> Tšẽngaftanga jtsichámuana, acbe shema o boyábioye ndoĩne ínỹaftaca

cattseíngñaye ca; as, ¿ndáyeca tšëngaftanga cachcá šmnétsama? Tšëngaftanga jtsábøyenjana soyënga chë ndayama ínÿenga tmojtsichamo diosënga yomna ca y jtsadórayana; as, ¿ndáyeca chë soyënga chënga jadórama yebnënguentsána uámana soyënga šmnétsatbëbana? <sup>23</sup> Tšëngaftanga tša jtsenábotamnayana chë ley šmobomnama; as, ¿ndáyeca šmonÿbétsama ínÿenga Bëngbe Bëtsabiana podesca chamotsóyebuambnama, tšëngaftanga chë leyentša mandënga jobedésama ndocna te ntsebošana causa? <sup>24</sup> Chama, Bëngbe Bëtsabe uabemana palabrenguine mëntšá endayana: “Tšëngaftanga judiëngbe causa, ndoñe judiëngbeñe Bëngbe Bëtsabiana ndoñe tšabá quematoyebuambná ca.”

<sup>25</sup> Tšëngaftanga ntšamo leyiñe yomandancá šmojtsamëse, Bëngbe Bëtsábenga šmomnana jinÿanÿiyama, chë más delicadentše base bobachtema tëtšenënga jtsemnana tšabá nántsemna; pero ntšamo chiñe tomandancá ndoñe šmontsamëse, chca tëtšenënga jtsemnana, tondayama ntsošervénana, y chca, tšëngaftanga jtsemnana mo chë más delicadentše base bobachtema ndëtëtšenëngcá. <sup>26</sup> Y chë ndoñe judiënga chë más delicadentše base bobachtema tëtšenënga, judiëngcá ndoñe quemátsmëna; pero chënga ntšamo leyiñe yomandancá tmojtsamëse, ndegombre Bëngbe Bëtsá chënga echanjúbuaja mo cachabe entšangcá. <sup>27</sup> Y chca, tšëngaftanga judiëngbiana Bëngbe Bëtsá echanjayana ndoñe tšabá šmonjama ca, ntšamo leyiñe yomandancá ndoñe šmontsama causa. Cha chca echanjama, er bëtscá ndoñe judiënga mondmëna y chënga ntšamo leyiñe yomandancá mondocumplina, pero chënga ndoñe quemátsmëna tšëngaftangcá tëtšenënga, jtsinÿnama Bëngbe Bëtsábenga šmomnana. Tšëngaftanga, masque Bëngbe Bëtsabe uabemana ley šmonduábomna y chë más delicadentše base bobachtema tëtšenënga šmondmëna, cabá ndoñe šmontsama ntšamo leyiñe iuayancá, ndayá jamama cmojtsamnana.

<sup>28</sup> Chcasna, nda chë más delicadentše base bobachtema tmojatëtše ora, chábioye chë soye ndoñe ntjábemana canÿe ndegombre judío. Y canÿe entšá ndoñe Bëngbe Bëtsábiana ntsemnana nÿe ínÿenga chë más delicadentše base bobachtema tmojatëtšama. <sup>29</sup> Y canÿe entšá ndegombre judío jtsemnana, ntšamo chabe ainaniñe tomncá, cha Bëngbe Bëtsabe entšá yomnama tojtsinÿanÿnase. Y chca, canÿe ndegombre judío, Bëngbe Bëtsabe entšá yomnama chaotsinÿnamna ndoñe quenátsmëna chë más delicadentše base bobachtema jtsetëtšenana, sinó ntšamo Bëngbe Bëtsá tojamcá chabe ainaniñe chaotsebínÿnama. Bëngbe Bëtsabe Espíritu jamana entšá chca ainana chaotsebomnana, ndayá inétsinÿanÿnaye

cha canye ndegombre judío yomnama; y chë uabemana ley ndoñe quenátobena chca jamana. Bëngbe Bëtsá endmëna chë tšabe soye entšabiamana ichamuá; entšanga ndoñe.

### 3

<sup>1</sup> Chcase, ndánaca šuatjatjaye, as ¿Bëngbe Bëtsabe entšá jtsemnama jëftsashjáchama, más tšabá yojtsemna canye judío jtsemnana cá? ¿Base bobachtema chë más delicadentše tëtšená jtsemnana becá yojtsámama cá?

<sup>2</sup> Aíñe, chca jtsemnana corente enduámama y nýetsca soyënguiñe; natsana chjayana, Bëngbe Bëtsá, judiënga chabe palabra tojanabanýe, nýetscangbiama chamotsinýenama.

<sup>3</sup> Y morna, ¿ndayá yochjopása nderado judiënguentše báseftanga ya ndoñe chca tmontsentšénese? Y chë causa, ¿Bëngbe Bëtsánaca yochtsajbaná ntšamo tojašebuachenacá amana?

<sup>4</sup> ¡Ndoñe, ndegombre ndoñe! Chca ndoñe cha queochatsma; tšëngaftanga šmondëtatšëmbo Bëngbe Bëtsá sempre endbétsama ndayá jamama tojašebuachenacá, masque nýetsca entšanga bosterënga chamotsomñe. Er Bëngbe Bëtsabe uabemana palabrënguiñe Bëngbe Bëtsabiamana mëntšá endayana:

Aca ntšamo chacojayana ora, nýetscanga mochanjinýe aca ntšamo ndegombre yomncá cnétsamama; y chacojtsenëuyaná ora, sempre cochanjínýanýiye acbe contra tmojtsoyebuambnángbioye, chënga ndoñe tšabá montsamama ca.

<sup>5</sup> Pero bënga ndoñe tšabe soye montsama ca báseftanga tmojayana ora, Bëngbe Bëtsá siempre tšabá inétsamama entšanga más tšabá jinýama tmojtsobenëse, ¿ntšamo bënga mochjayana? ¿Bënga imojtsobena jayanana Bëngbe Bëtsá ndoñe tšabá tonjama ca, bëngbiama castigo chaotsemna ca cha tojayana ora? (Morna atše sëntsoyebuambná ntšamo entšanga jóyebuambayama monduamancá.) <sup>6</sup> ¡Ndoñe, ndegombre ndoñe! Ndoñe quemuátobena chca jayanama. Bëngbe Bëtsá nýets tempo ntšamo ndegombre yomncá ndoñe tontsamëse, ndegombre cha ndoñe nanjobenaye jayanama nýetsca quem luarentša entšangbiama, ntšamo tmojamcá tšabá o ndoñe tšabá bëtsemnama.

<sup>7</sup> Nderado nda tojayana: “Atše ndaye bacna soye stjama y ndoñe ntšamo ndegombre yomncá tojtsemna, y chë soye tojoservé Bëngbe Bëtsá puerte uamaná y bëtsá yomnama jinýanýiyama, y Bëngbe Bëtsá siempre ntšamo ndegombre yomncá tojtsamama jinýama entšanga tmojtsobenëse, ¿ndáyeca Bëngbe Bëtsá cabá iuichamo ntšamo atše tijamcá ndoñe tšabá yontsemna ca y atše canye bacna soye amá stsemna ca?” <sup>8</sup> Y chcase, ndánaca mëntšá

nanjátayana: “Ntšamo ndoñe tšabá yondmëncá mochjama, chca, entsanga chámuinye Bëngbe Bëtsá puerte tšabia yomnama ca.” Ndegombre, atše mal jaquédama báseftanga tmojayana atše chca stsabuatambá ca; Bëngbe Bëtsá chca abuátambayënga echanjácastigaye, ntšamo castigánënga jtsemnama imomerecencá.

*Ntšamo entsá tojtsamama, Bëngbe Bëtsabe bominyiñe ndocná tšabia ntsemnana*

<sup>9</sup> Y asna, ¿Bëngbe Bëtsá bënga judiënga ínÿengbiana más tšabá šonýa? ¡Ndoñe, ndegombre ndoñe! Atše ya sënjinÿinyé judiënga y ndoñe judiëngnaca, chë bacna soyënga jamama juabnëngaca mandánënga imomnama. <sup>10</sup> Er Bëngbe Bëtsabe uabemana palabrenguiñe mëntšá endayana:

Ntšamo entsá tojtsamama, ndocná Bëngbe Bëtsabe bominyiñe tšabia quenátsmëna.

¡Ndoñe, ndegombre ndoñe, ni mo canýa chca quenátsmëna!

<sup>11</sup> Ndocná quenátsmëna ntšamo ndegombre yomncá chabot-sosertánama;

¡Ndocná quenátsmëna nda chaotseboše Bëngbe Bëtsáftaca jtsemnama!

<sup>12</sup> Nÿetscanga ndoñe tšabe benache tmojishache y chiñe montsajna.

Chënga nÿetscanga Bëngbe Bëtsabe bominyiñe tondayama quemátoservena.

Ndocná quenátsmëna ntšamo tšabá yomncá chaotsamama, ¡ni canýa ndoñe!

<sup>13</sup> Ntšamo tmojtsichamcá puerte bëts bacna soye jtsemnana, mo canýe obanabe cuevëshe atëfjnëshe puerte bacá tojtsongüetšecá.

Chënga tmojtsoyebuambná soyëngaca ínÿengbioye jtsaíngñayana.

Chë tmojtsichamo soyëngaca puerte bacna soye ínÿengbiana jtsamana, mo canýe mëtscuaye tbojtseftëtše orcá, chë veneno canýe entsábioye jóbana.

<sup>14</sup> Chënga, nÿets tempo ínÿengbiana podesca jtsichámuana, y sempre jtsóyebuambnayana chë ínÿenga ntšámnaca jáborlama.

<sup>15</sup> Sempre jtseprontánana ínÿengbioye ntšámnaca jáborlama y jobáyama.

<sup>16</sup> Chënga siempre jtsiyenana ínÿenga chamotsesufrínama jtsamëse, y nÿe ntšámnaca jtsaborlánana.

<sup>17</sup> Chënga ndocna te tondaye ntjamana nÿetscanga natjëmbana chamotsiyenama;

<sup>18</sup> Chënga ndoñe ntsiyenana Bëngbe Bëtsabiamá jtsejuabnayëse, cha chë más bëtsá nyetscangbiamá yomnama ca –chiñe endayana.

<sup>19</sup> Er bënga mondëtatšëmbo, lempe ntšamo leyinë iuabemancá, chë leyëngaca mandánënga imoyenëngbiamá yomnama. Chcasna, chë ley endmëna, Bëngbe Bëtsabe delante ndocná chaondobená jayanama, cha ndoñe tsabá tonjama, chama ndoñe yonjátatšëmbo causa ca; y endmëna jinÿanÿiyama, ntšamo tmojamcá tsabá o ndoñe tsabá bëtsemnama Bëngbe Bëtsá nyetscangbiamá yochjayana ora, nyetscanga yojtsamna chabe delante jayanama, ndáyeca ntšamo tsabá yomncá ndoñe tmonjama ca. <sup>20</sup> Er, Bëngbe Bëtsá ndoñe queochatsma ndocná chabe bominyiñe tsabia chaotsemna, ntšamo leyinë yomandancá cha tojamama; chë ley bëngbiamá jamana, nye bënga bacna soye tmojamama chamotsetatšëmbuama.

*Ntšamo Bëngbe Bëtsá inama entsanga chabe bominyiñe tsábënga chamotsemnama*

<sup>21</sup> Pero mora, Bëngbe Bëtsá tonjinÿanÿé ntšamo cha inama entsanga tsábënga chabe bominyiñe chamotsemnama; y Bëngbe Bëtsá ndoñe ntjamana canÿa chabe bominyiñe tsabia chaotsemnama, ntšamo ibomncá cha tojtsamama, ntšamo chë leyënguiñe y mandënguiñe yomncá. Pero masque mora chca, Bëngbe Bëtsá tonjinÿanÿé, Moisesbe leyinë y Bëngbe Bëtsabe juabna oyebuambnayëngbe librëšangañe yopodena jinÿenana chca yochtsemnama. <sup>22</sup> Bëngbe Bëtsá jamana entsanga chabe bominyiñe tsábënga chamotsemnama, chënga Jesucristbeñe tmojtsošbuáchema. Bëngbe Bëtsá nyetscanga Crístbeñe ošbuáchiyëngbiamá chca jamana, y chabiamá nyetscanga cachcá monduámama; <sup>23</sup> er nyetscanga bacna soye tmojama, y chë causa, ndocna entsá tonjobená jashjáchana ndocna bacna soye ndbomná jtsemnama y puerte bëtsá jtsemnama, ntšamo Bëngbe Bëtsá tojanjuabocá entsanga chamotsemnama. <sup>24</sup> Pero Bëngbe Bëtsá chëngbiamá corente tsabe juabna bómnyayeca, mo ndayá cuafjatšatacá, cha jamana chënga chabe bominyiñe tsábënga chamotsemnama. Bëngbe Bëtsá chca tojanma, Cristo Jesúsbeyeca, entsanga atsebácanënga chamotsemnama y ya ndoñe más bacna soyënga jamama juabnëngaca mandánënga chamondëtsemnama cha tojanma ora. <sup>25</sup> Bëngbe Bëtsá cha tbojanábuayana, chabe buiñe juabuáshanëse y jóbanëse, cha chaotsemna ndábeyeca Bëngbe Bëtsá entsanga bacna soyëngama jáperdonama; Jesucristbeñe jtsošbuáchiyëse entsanga jobenayana perdonánënga jtsemnama. Bëngbe Bëtsá chca tojanma, jinÿanÿiyama cha inétsama entsanga

tšábenga chabe bominiñiñe chamotsemnana, chë entsanga bacna soyënga tmojanmama chë tempo ntjatonjáyca, er cha chë tempo corente uantado chëngaftaca yojtsemna y chëngbe bacna soyëngama ndoñe yonjánacastigaye. <sup>26</sup> Cha lempe chca tojanma, jinjanyiyama cha sempre ntšamo ndegombre yomncá inétsamama, y nyëtsanga Jesucristbeñe ošbuáchiyënga chabe bominiñiñe tšábenga chamotsemnana inétsamama.

<sup>27</sup> Chcáyeca, entsá ndoñe ntsobenana tondayama ntsenábotamnayana. Chca endmëna, er Bëngbe Bëtsá tšabia chabe bominiñiñe jabemana, ndoñe ntšamo leyiñe tomandancá cha tojtsamama, sinó nyë Jesucristbeñe tojtsošbuáchema. <sup>28</sup> Y chca jayanëse, mora bënga tšabá montsetátšëmbo, Bëngbe Bëtsá inétsama canye entsá tšabia chabe bominiñiñe chaotsemnana, nyë Jesucristbeñe tojtsošbuáchema, y ndoñe ntšamo leyiñe yomandancá cha tojtsamama.

<sup>29</sup> ¿O Bëngbe Bëtsá nyë judiëngbe Bëtsá yomna? ¿Ndoñe judiëngbe Bëtsánaca cha ndoñe yondmëna? Aíñe, chëngbe Bëtsánaca cha endmëna; <sup>30</sup> er nyë canye Bëtsá nyëtscangbiama endmëna, y cha echanjama chë más delicadentse base bobachtema tëtšenënga imomnëngbiama y ndoñe chchangbiámna, chabe bominiñiñe tšábenga chamotsemnana, Jesucristbeñe tmojtsošbuáchema. <sup>31</sup> Chcasna, Bëngbe Bëtsá jamana entsanga chabe bominiñiñe tšábenga chamotsemnana, Jesucristbeñe tmojtsošbuáchema; ¿chca yojtsayana chë ley nyë tondayama yondoservena ca? ¡Ndoñe, ndegombre ndoñe! Inyëtsá, chca jamana chë ley más chaotsámanama.

## 4

### *Ntšamo Abrahánoftaca tojanopasá*

<sup>1</sup> Morna Abrahambiana mochjóyebuambaye, bëngbe tempsca bëts taitá, y mochjinjyë ndayá tojánatsjinjyë Bëngbe Bëtsábeñe ošbuáchiyana bomnentsana. <sup>2</sup> Abraham chabe bominiñiñe tšabia chaotsemnana, ndayá cha tojanmama Bëngbe Bëtsá matëñjanmëse, cha matëñjanobená entsángbeñe ndayama jtsenábotamnayana, pero Bëngbe Bëtsabe delante ndoñe; <sup>3</sup> er Bëngbe Bëtsabe uabemana palabrënguiñe mëntšá endayana: “Abraham, Bëngbe Bëtsábeñe yojtsošbuáchiye, y chíyeca Bëngbe Bëtsá tonjánayana cha chabe bominiñiñe tšabia yojamna ca.”

<sup>4</sup> Canye entsá trabajayá, crocénana josháchiñana ndayá tojamama, pero chë crocénana ndoñe nyë tšetanana ntsemnana, sinó chana jtsemnana ntšamo cha tojtsomerecencá. <sup>5</sup> Er menójuabonga, nda tondaye tontsama Bëngbe Bëtsá cháuyanama cha chabe bominiñiñe tšabia yomna ca, pero aíñe

tojtsošbuaché Běngbe Bětsábeñe, nda endbáyana chě bacna soye tmojaměnga mora mo ndoñe chca cuafjamcá chamotsemna ca, chabiamá Běngbe Bětsá echanjama chabe bominyiñe tšabia chaotsemnama, chabe ošbuáchiyama. <sup>6</sup> Rey David cachcá chabe librěšañe tojánayana, chě ndabiamá Běngbe Bětsá jayanana chabe bominyiñe tšabia chaotsemna ca, masque chabiamá chca cháuyanama tondaye tonjaměse. David chca entšabiamá tojánayana, cha puerte echantsoyejuaye ca. <sup>7</sup> Chabe librěšañe měntšá tojanábema:

¡Tša oyejuayěnga jtsemnana chě Běngbe Bětsá chěngbe bacna soyěnga tojáperdonanga,

chě Běngbe Bětsá chěngbe bacna soyěnga tojabuajuánanga!

<sup>8</sup> ¡Puerte oyejuayá jtsemnana chě Běngbe Bětsá mo ndoñe bacna soye cuafjama cuenta tbojtsonyá cha ca!

<sup>9</sup> ¿David tojánayana nye chě más delicadentše base bobachtema tětšeněnga imomněngbiama oyejuayana yomna ca? Ndoñe; ndoñe chca mondměněngbiámna. Y muentše tmonjayana, Abraham Běngbe Bětsábeñe yojtsošbuachéyeca, Běngbe Bětsá tojánayana cha chabe bominyiñe tšabia yojamna ca. <sup>10</sup> Y ¿ntseco chca tojanopasá? ¿Abraham ya chě más delicadentše base bobachtema tětšená yojtsemna ora, o cabá ndoñe chca yontsemna ora? Ndegombre, Abraham cabá ndoñe chca tětšená yontsemna ora. <sup>11</sup> Y cabá chentšana, Abraham base bobachtema chě más delicadentše tětšená yojtsemna; y chca yojamna jinýanýiyama, Běngbe Bětsá tempo ya chabiamá tojánayana cha chabe bominyiñe tšabia yojamna ca, cha Běngbe Bětsábeñe yojtsošbuáchema. Lempe chca tojanopasá, jinýanýiyama Abraham mo taitacá yomnama Běngbe Bětsábeñe imošbuachéngbiama, masque ndoñe base bobachtema chě más delicadentše tětšeněnga mondměna. Y cachcá Běngbe Bětsá chě ošbuáchiyěngbiama tojánayana, chěnga chabe bominyiñe tšábenga imomna ca. <sup>12</sup> Y Abrahámna endměna mo chě taitacá, chě más delicadentše base bobachtema tětšeněnga imomněngbiama, pero aĩñe Běngbe Bětsábeñe corente jtsošbuáchiyěse imoyěngbiama, cachcá ntšamo běngbe bětš taitá Abraham Běngbe Bětsábeñe yojtsošbuachecá. Y cha cabá chě más delicadentše base bobachtema ntsetětšena ora, ya chca yojtsošbuáchiye.

*Jtsošbuáchiyěse, ntšamo Běngbe Bětsá tojašebuachenacá jóshjanguana*

<sup>13</sup> Běngbe Bětsá tojanašebuachená Abrahambiamá y chábentšana entšangbiama, quem luare chěngbiama yochjěftsemna ca. Y chca tojanašebuachená, ndoñe Abraham ntšamo leyiñe yomandancá betsobedecénama, sinó cha Běngbe Bětsábeñe yojtsanošbuáchema, y chíyeca Běngbe Bětsá

tojánayana cha chabe bominyiñe tšabia yojamna ca. <sup>14</sup> Pero, ntšamo Bëngbe Bëtsá tojanašebuachenacá, bënga ntšamo chë leyiñe yomandancá tmojtsamëngbiana yojtsemna ca tmojayanëse, Bëngbe Bëtsábeñe jtsošbuáchiyana tondayama nantsoserverna, y ntšamo Bëngbe Bëtsá tojanašebuachenacá tondaye ntsámanana. <sup>15</sup> Chë ley juabocnana, Bëngbe Bëtsá puerte etonaná entšanga cháuacastigama, chënga ntšamo chiñe iuayancá ndoñe tmontsamama; pero ndocna mandënga tontsemnëse, ndocná ntsobenana chë ndoñe tontsayancá ndoñe ntjamana.

<sup>16</sup> Y chca, Bëngbe Bëtsá Abrahámbyoye tbojanšbuachená, cha yojtsanošbuachéyeca, ntšamo Bëngbe Bëtsá tojanašebuachenacá, ndegombre chaotsemnana chë Bëngbe Bëtsábeñe imošbuáchema mo Abrahámbytšana entšangcá imomnëngbiana; y Bëngbe Bëtsá chca tojanašebuachená, cha chëngbe tšabiana iuantjésnayeca. Chë mo Abrahámbytšana entšangcá imomnëngbeñe, ndoñe quemnatmëna nÿe chë ntšamo ley yomandacá imnétsamënga, sinó nÿetscanga chë ntšamo Abraham tojanošbuachecá Bëngbe Bëtsábeñe imošbuachëngnaca. Y Abraham nÿetscanga bëngbiana, Bëngbe Bëtsábeñe ošbuáchiyënga, mo taitacá endmëna. <sup>17</sup> Ntšamo Bëngbe Bëtsábe uabemana palabrënguiñe endayancá, Bëngbe Bëtsá Abrahámbyoye ibojtsatsëtsnaye ora: “Atše sënjama aca ba luariñe entšangbiana atšbe bominyiñe taitá chacotsemnana ca.” Chë ntšamo tojanašebuachenacá ndegombre tšabe soye endmëna, er Bëngbe Bëtsá chca Abrahambiana yojanjuabná; y Bëngbe Bëtsá endmëna ndábeñe Abraham yojtsanošbuaché, y nda inétsama entšanga chámuatayenama, y nda inamánda y entšanga jobenayana jinÿama ndayá ndocna te tmonjaninÿcá.

<sup>18</sup> Abraham Bëngbe Bëtsábeñe yojtsošbuáchiye y yojtsobatmana ntšamo tbojanšbuachenacá chaotsemnana, masque entšabe juabniñe ndoñe chca ntjátsjuabnayana; y chca, cabana cha tojánashjache jtsemnana “ba luariñe entšangbe taitá”, ntšamo Bëngbe Bëtsá tbojaniancá: “Acbytšana entšanga tša mallajta mochántsemna, ndocná queochatobenaye jacúntana ca”. <sup>19</sup> Abraham yojanobatmanëntscuana, cha puerte chábeñe yojtsanošbuaché, ntšamo tbojanšbuachenacá jóyëngacñama, masque Abraham yojtsonÿaye ya bëtsanánëjema yojtsemnana, er ya mo patse uata yojtsebomna, y chabe shema, Sara, ndoñe yonjobena šešonga jtsabamnana. <sup>20</sup> Abraham ndocna te tonjanajbaná Bëngbe Bëtsábeñe ošbuáchiyana, y ni mo canÿe ndoñe yonjanjuaboye chë ntšamo Bëngbe Bëtsá tbojanšbuachenacá ndoñe joparéjana ca; sinó más corente chábeñe yojtsanošbuaché, y chca Bëngbe Bëtsábyoye ibojtsatschuanaye, <sup>21</sup> er cha tšabá inatátšëmbo, ntšamo tbo-



janšbuachenacá jamama, ndegombre Bëngbe Bëtsá obená inamnana. <sup>22</sup> Chíyeca, Bëngbe Bëtsá tojánayana cha chabe bominiñe tšabia yojamna ca.

<sup>23</sup> Pero, chabe bominiñe tšabia yojamna ca Bëngbe Bëtsá tojánayana ora, ndoñe nñe Abrahambiana chca ntsóyebuambnayana; <sup>24</sup> ndayá bëngbiámnaca, ndëmuanñengbiana Bëngbe Bëtsá yochjayana chabe bominiñe tšábenga imomna ca, bënga Bëngbe Bëtsábeñe imošbuachéyeca; Bëngbe Bëtsá, nda tojanma Bëngbe Utabná Jesús cháuatayenama. <sup>25</sup> Bëngbe Bëtsá tojanalesenciá entsanga Jesús chamóbama, bënga bacna soyënga tmojanma causa, y Bëngbe Bëtsá tojanma cha cháuatayenama. Bëngbe Bëtsá chca tojanma jobenayama, bënga chabe bominiñe tšábenga jábiamama.

## 5

### *Mora bënga Bëngbe Bëtsabe bominiñe tšábenga montsemna*

<sup>1</sup> Er Bëngbe Bëtsá tojama bënga chabe bominiñe tšábenga chamotsemnana, bënga chábeñe imošbuachéyeca; mora tempcá tšabá Bëngbe Bëtsáftaca bënga montsatsmëna, Bëngbe Utabná Jesucristbeyeca. <sup>2</sup> Bënga Crístbeñe mondošbuáchema, cha tojama bënga chamotsetatšëmbuama Bëngbe Bëtsá tša tšabia yomnana, y Bëngbe Bëtsábiocana tšabe soyënga jtsebomnëse mora chamotsiyenama. Bënga tša oyejuayënga jësemnana, er Bëngbe Bëtsábeñe jtsošbuáchiyëse mondobátmana cha puerta uámanënga y bëtsëtsanga šochjábiamama, batšá ntšamo cachá yomncá. <sup>3</sup> Y ndoñe nñe chama bënga oyejuayënga jësemnana, ndayá bënga tmojtseufrina y padecena soyënguiñe tmojtsajna órnaca. Chca mondbama, er bënga mondëtatšëmbo bënga tmojtseufrina orna, bënga juatsjínñana ntšamo uantadënga jtsemnana padecena soyënguiñe tmojtsemna ora, Bëngbe Bëtsábeñe jtsošbuáchiyëse. <sup>4</sup> Bënga padecena soyënguiñe tmojtsemna ora, más tšabá uantadënga jtsemnana mondobénayeca, Bëngbe Bëtsá oyejuayá bëngaftaca jtsemnana, padecena soyënguentšana ndegombre tšabá tmojachnëngo ora. Bëngbe Bëtsá oyejuayá bëngaftaca chaotsemnana bënga tmojama ora, bënga jtsobenana más jtsobátmanana, ntšamo šojašebuachenacá cha yochjamama. <sup>5</sup> Bënga chca tmojtsobátmanëse, ndocna te nñe bonamente quemochatobátmana, er Bëngbe Bëtsá šojinñanyé tša bëtscá cha šuababuánñeshanama. Bëngbe Bëtsá chca tojama chë Uámana Espíritbeyeca, y cha endmëna nda Bëngbe Bëtsá tbojanichmó bëngbe ainaniñe chaotsemnana jtsemándayama.

<sup>6</sup> Tempo bēnga tondaye chemuatanobená jamana Bēngbe Bētsabe bominyiñe tšábenga jtsemnama, y chora Cristo tojanóbana bēnga chē bacna soyēnga tmojamēngbe tšabiamá, nŷa chama tempo yojamna ora. <sup>7</sup> Ndoñe paselo quenátsmēna jajuaboyana, ndáyeca canŷa nantseprontana jóbanama canŷa ntšamo chē leyiñe yomandancá jamama tojtsamanabiamá; pero, canŷa bētsá jtsababuánŷeshanēse tšabe soyēnga ínŷengbiamá tojtsamabiamá, nderádose chabiamá jóbanama cuantseprontana. <sup>8</sup> Pero Bēngbe Bētsá bēnga sojanŷanyé tša ŷuababuánŷeshanama, er bēnga cabá bacna soyēnga ntsamcá imojoyena ora, Cristo bēngbiamá tojanóbana.

<sup>9</sup> Cristo, chabe buiñe juabuáshanēse bēngbiamá tojanóbanaŷeca, Bēngbe Bētsá tojanma bēnga chabe bominyiñe tšábenga jtsemnama. Y chca endmēnayeca, ndegombre Cristo ŷochanjátsebacye, entšanga ndoñe tšabá tmonjama ca y castigo chēngbiamá chaotsemna ca Bēngbe Bētsá chaojayana ora. <sup>10</sup> Bēnga tempo Bēngbe Bētsá imojanáya; pero cha tojanma bēnga cháftaca tempcá tšabá chamotsatsmēnama, chabe Uaquiñá tojanóbanaŷeca. Y mora, bēnga natjēmbana cháftaca chamotsemnama ya tojama ora, ndegombre atsebácanēnga mochántsemna, chabe Uaquiñá ainá yómnayeca. <sup>11</sup> Y ndoñe nŷe chca, ndayá bēnga cháftaca puerte oyejuayēnga chamotsemnámna Bēngbe Bētsá jamana, ndayá Bēngbe Utabná Jesucristo bēngbiamá tojánmayeca. Y mora, chábeyeca Bēngbe Bētsá tojama bēnga cháftaca tempcá tšabá chamotsatsmēnama.

### *Adán y Cristo*

<sup>12</sup> Canŷe entšá bacna soye tojanma causa, nŷetsca entšanga bacna soyēnga amēnga tmojábocana; y cha tojanóbana, bacna soyēnga tojanma causa. Y chca, nŷetsca entšanga entsamna jóbanama, er nŷetscanga bacna soyēnga tmojama. <sup>13</sup> Bēngbe Bētsá Moisésbioye chē leyēnga cabá nduántšaboshjona ora, entšanga quem luarentše bacna soyēnga tmojanma. Pero ndocna ley tontsemna ora, Bēngbe Bētsá ndoñe ntjatonŷayana entšanga bacna soyēnga tmojamama. <sup>14</sup> Nŷetsca entšanga, Adánbentsana Moisésbentscoñe, nŷetscanga yojánamna jóbanama, ntšamo cach Adán tojanmcá ndoñe tmonjanmēgnaca, ntšamo cha ndoñe chaondēmama Bēngbe Bētsá tbojanmandacá cha tojanma ora. Y Adánbeñe entšanga mondobena jinŷama, ntšamo chē jabama ibojamná canŷe soyēnguiñe yochtsanmēna.

<sup>15</sup> Pero ntšamo chē útata tbojanmcá ndoñe cachca soye quenátsmēna; er Bēngbe Bētsá entšangbe tšabiamá jtsejuabnayēse tšabe soyēnga chēngbiamá tojanma ora, ndoñe yonjamna mo ntšamo Bēngbe Bētsá tbojanmandacá

ndoñe chaondēmama Adán tojanma orcá. Tšëngaftanga šmondětatsšëmbo, nýe canýe entšá canýe bacna soye tojanma causa, cha tojanma nýetsca entšanga jóbanama chaotsamnana, pero Bëngbe Bëtsá entšangbe tšabiamana yojuabnáyeca, más bëts soyënga jamana, chë Adanbe bacna soye entšangbiamana bacna soyënga tojanmama. Chca, Bëngbe Bëtsá tojanma ba entšanga bëtscá tšabe soyënga chamotsebomnana; y chca tojama, nýe canýe entšá, Jesucristo, tšabe soyënga tojánmayeca. <sup>16</sup> Chë ba entšanga bëtscá tšabe soyënga chamotsebomnana Bëngbe Bëtsá tojamentšana endóbocana soye, puerte inýetsá comna, chë entšá Adán, canýe bacna soye tojanmentšana tojanóbocna soyama. Adán bacna soye tojanmentšana, Bëngbe Bëtsá tojánayana chana bacna soye tojanma y castigo jtsebomnana ibojtsemna ca, y nýetsca entšágnaca chë causa; pero masque nýetscanga bacna soyënga tmojama, Bëngbe Bëtsá entšangbe tšabiamana ndoñe bëndětsebnatjëmbayeyeca, tojanma entšanga chabe bominyiñe tšábenga chamotsemnana y chë bacna soyëngama castigánënga ndoñe chamondětsemnana. <sup>17</sup> Ndegombre endmëna, canýe entšá bacna soye tojanma causa, nýetsca entšanga jóbanama yojtsamna. Pero puerte más, canýe entšá Jesucristo tojanma. Ndëmuanýengbiamana Bëngbe Bëtsá tojama bëtscá tšabe soyënga chamotsebomnana, ndëmuanýengbiamana Bëngbe Bëtsá tojama chabe bominyiñe tšábenga chamotsemnana, y Bëngbe Bëtsábiocana chca tmojójyëngacñënga, chënga nýetscanga mochantsiyena bacna soyënga jtseyëñjanayëse y nýetsca tescama mo bëtsetsangcá; y chca echántsemna ndayá Cristo tojánmayeca.

<sup>18</sup> Y chca, ntšamo canýe entšá, Adán, canýe bacna soye tojanmama, Bëngbe Bëtsá tojánayana nýetscanga bacna soye tmojanma y castigánënga chamotsemna ca; cachcá ntšamo canýe entšá, Cristo, puerte tšabe soye tojánmayeca, Bëngbe Bëtsá jayanana nýetscanga imojtsobena chabe bominyiñe tšábenga jtsemnana y chë nýetsca tescama yomna tšabe vida jtsebomnana ca. <sup>19</sup> Y ntšamo Bëngbe Bëtsá tbojanmandacá ndoñe chaondēmama canýe entšá tojanma causa, nýetsca entšanga bacna soye amënga tmojanobiamana; cachcá, ntšamo Bëngbe Bëtsá tbojanmandacá canýe entšá, Jesucristo, tojánmayeca, Bëngbe Bëtsá tojanma bëtscá entšanga chabe bominyiñe tšábenga chamotsemnana.

<sup>20</sup> Chë ley entšangbe cucuatšiñe tmojanáboshjona, jinýanýiyama ntšamo ndegombre yomna bacna soyënga jtsamana; pero entšanga más bacna soyënga imojtsama ora, Bëngbe Bëtsá cabá más chëngbe tšabiamana yojtsanjuabnaye y

más tšabe soyënga chëngbiana yojtsama. <sup>21</sup> Chcasna, mora mochjayana, entšanga bacna soyëngaca puerte mandánënga imojamna, y chca, nÿetscanga jóbanama yojamna ca. Pero mora, ya ndoñe chca quenátsmëna, er Bëngbe Bëtsá tojama entšanga chabe bominiñe tšábenga chamotsemnana, Bëngbe Utabná Jesucristbeyeca chë nÿetsca tescama yomna tšabe vida chamotsebomnana; chíyeca mora bënga montsobena jtsiyenana, Bëngbe Bëtsá šojatšatá tšabe soyënga lempe bëngaftaca jtsemnëse.

## 6

### *Crístbeyeca bënga tšabe vida jtsebomnana*

<sup>1</sup> Y asna, ¿ntšamo mochjayana? ¿šojtsamna jtsiyenana sempre bacna soyënga jtsamëse, chca, Bëngbe Bëtsá šuababuánÿeshanama más chašotsinÿanÿnama, cha más bacna soyënga bënga jtsaperdónayëse? <sup>2</sup> ¡Ndoñe, ndegombre ndoñe! Tempo bënga monjanienana bacna soyënga jamama juabnëngaca mandánënga, pero mora bënga montsobena jtsiyenana chë juabnënga tondaye bëngbioye ntsamcá, y chca, bënga montsobena mo obanëngcá chë soyëngama jtsemnana; y as, ¿ndáyeca bënga muatjátsjuabnaye ntšamo ndoñe tšabá tontsemncá jatiyenana? <sup>3</sup> Er ndegombre tšëngaftanga šmondëtatšëmbo, bënga uabáinënga tmojananoquedá ora, tmonjaninÿanÿé bënga Cristo Jesúseftaca cánÿiñe mo canÿacá bëtsemnana; y bënga uabáinënga tmonjananoquedá ora, enjamna mo bënga cuafjobancá, ntšamo Cristo tojanobancá. <sup>4</sup> Bënga uabáinënga tmonjananoquedá ora, enjamna mo bëngnaca cháftaca cuafjobancá, y cháftaca uatabuantsanëngcá. Chca yojamna, bënga chamotsobenana mo tsëm entšangcá jtsiyenana, ntšamo Crístoftaca tojanopasacá, cha cháuatayenama Bëngbe Bëtsá tojanma ora, chabe puerte bëts obenánaca.

<sup>5</sup> Bënga Crístoftaca cánÿiñe mo canÿacá jtsemnëse, cha tojanóbana ora mo bëngnaca cháftaca cuafjobancá enjámnayeca, ndegombre bënga cánÿiñe mo canÿacá cháftaca mochántsemna, bënga cachiñe vida nÿetsca tescama chamotsatsbomnana Bëngbe Bëtsá jtsamëse, ntšamo Cristo cháuatayenama cha tojanmcá. <sup>6</sup> Y bënga mondëtatšëmbo, chë ntšamo bëngbe vida enjamncá, bacna juabnëngaca mandánënga, Jesucristbeñe cabá ntsošbuáchiye ora, mora ya ndoñe chca yontsemnana; y chca entsemna mo chë tempsca vida chaóbanama cuafjamcá, Cristo tmojanancrucificá ora. Chca yojamna, Bëngbe Bëtsá jobenayama chë bacna soyënga jamama bëngbe juabnënga jtsepochócama; y chca, ya ndoñe más chë bacna soyëngaca mandánënga

chamondětsemnana, mo nÿets tempo nÿe ínÿabiama oservenëngcá. <sup>7</sup> Er canÿe entšá tojóbana ora, chë bacna soyënga chábioye ya ndoñe más ntsemándayana. <sup>8</sup> Er Cristo tojanóbana ora, mo bëngnaca cháftaca cuafjobancá endmënayeca, cháftaca jtsiyenámñaca bënga montsošbuaché. <sup>9</sup> Bënga mondětatsëmbo Cristo cháuatayenama y ndocna te cha cachiñe jatóbanama Bëngbe Bëtsá tojanmama; y ndocna obenana queochatsma cha cachiñe chauatóbanama. <sup>10</sup> Cha tojanóbana, y chë bacna soye jamama juabnënga ndocna te ntjobenayana chábioye jamándana, y ínÿenga ndoñe imontsobena ntšamo cha jabórlana; y ntšamo mora cha yoyencá, Bëngbe Bëtsá jtseservénama yomna. <sup>11</sup> Cachcá, tšëngaftanga cmontsamna jtsejuabnayana, chë ya ndoñe más bacna soyëngaca mandánënga šmojtsemnana, pero vida šmobomna lempe jtsamëse Bëngbe Bëtsá tšëngaftangaftaca oyejuayá chaotsemnana, Cristo Jesúseftaca cánÿiñe mo canÿacá jtsemnëse.

<sup>12</sup> Tšëngaftanga cmontsamna, chë bacna soyënga jamama ainanentše šmobomna juabnëngaca ndoñe más mandánënga ntsemnana, chca, tšëngaftanga ndoñe chašmondëtsamama juabnëngaca nÿe cach tšëngaftanga, tšëngaftangbe cuerpiñe tšabá jtsomñama. <sup>13</sup> Tšëngaftanga ndoñe quecmátamna jalesénciana ndaye tšëngaftangbe cuerpentša soye, bacna soyënga jamama chaoservema. Chamna, tšëngaftanga cmontsamna Bëngbe Bëtsá jauyanana, lempe ntšamo tšëngaftanga šmomncá, cha jaserviama chaotsemna ca, tšëngaftanga chë šmomna mo ya ndoñe más obanëngcá Bëngbe Bëtsabiama, y tojanma tšabe vida chašmotsebomnana; y jauyanana nÿetsca tšëngaftangbe cuerpentša soyëngna Bëngbe Bëtsá jaserviama yojtsemna ca. <sup>14</sup> Ndoñe quecmátamna bacna soyëngaca mandánënga jtsemnana, er tšëngaftanga ndoñe quešmátiyena leyiñe iuayana soyëngaca mandánënga, y šmondoyena Bëngbe Bëtsá tšëngaftangbiama tšabá jtsejuabnayëse.

*Ošbuachiyá obligaciónaca jtsemnana ntšamo tšabá yomncá jamama*

<sup>15</sup> Y asna, ¿bënga imojtsobena bacna soyënga jamana, chë leyiñe iuayana soyëngaca ndëmandánënga imomnana, y Bëngbe Bëtsá bëngbiama tšabá jtsejuabnayëse bënga imoyenama? ¡Ndoñe, ndegombre ndoñe! <sup>16</sup> Tšëngaftanga tšabá šmondětatsëmbo, ínÿabe cucuatšíñe mo nÿets tempo nÿe ínÿabiama oservenëngcá šmojoquedá ora, cha jtsobedecénama, ndegombre tšëngaftanga chë nduiñbiama nÿets tempo oservénënga jtsemnana. Chcasna, cachcá jtsemnana, chë tšëngaftanga šmojabocacá bacna soyëngaca

mandánënga jtsemnama, y chca jtsemnana mo Bëngbe Bëtsabe bominyiñe tšëngaftanga nyetsca tescama obanënga cuaftsemncá, o Bëngbe Bëtsá jtsobedecénama, y chca, chabe bominyiñe tšábënga jabocanana. <sup>17</sup> Pero šontsamna Bëngbe Bëtsá jtsatschuanayana, er tempo tšëngaftanga mo nye ínÿabiama oservenëngcá šmojamna, bacna soyënga jamama juabnëngaca mandánënga; pero mora nyets ainánaca šmojoyeuná, ntšamo chë tcmojanabuatambá soyënguiñe šmojoyëngacñëcá. <sup>18</sup> Bëngbe Bëtsá tšëngaftanga cmojatsebacá, bacna soyëngaca ndëmandánënga chašmotsemnama, y morna mo Bëngbe Bëtsabiama oservenëngcá šmojábozna, ntšamo tšabá yomncá jtsamama. <sup>19</sup> Muentše sënjoyebuambá ntšamo entšanga mondbetsichamcá, er tšëngaftanga ndoñe corente juabna quešmátsbomna toto palabrenga chacmósertama. Tempo, tšëngaftanga šmonjanamana jaleséciana, lempe ntšamo šmojamncá mandánënga jtsemnama, bacna soyënga shembásaftaca o boyabásaftaca jamama juabnëngaca, y nye ndaye bacna soyënga jamama juabnëngaca. Cachcá, mora tšëngaftanga cmontsamna jaleséciana tšëngaftanga chašmotsemnama juabnëngaca mandánënga tšabe soyënga jtsamama, chca, ndegombre Bëngbe Bëtsabe entšanga chašmotsemnama.

<sup>20</sup> Tšëngaftanga, cabá bacna soyënga jamama juabnëngaca mandánënga šmonjamna ora, tšëngaftanga ndoñe obligaciúnaca quešmënjatsmëna ntšamo Bëngbe Bëtsabiama tšabá yomncá játamama. <sup>21</sup> ¿Ndaye tšabe soye tšëngaftanga šmojosháchiñe chë tempo šmojánama soyënga amiñe? Tondaye; y mora chë soyëngama šmojtsëuatja. Chca soyënga tcojamentšana jóboznana, entšá nyetsca tescama castiganá chaotsemnama, mo Bëngbe Bëtsabe bominyiñe nyetsca tescama obaná cuaftsemncá. <sup>22</sup> Pero mora, ndoñe quešmátsmëna bacna soyënga jamama juabnëngaca mandánënga, y mora bëtscá šmojtsentšëna Bëngbe Bëtsá jtseyeunanana y jtseservénana. Chca jtsamana, tšëngaftangbiama puerte tšabá entsemna, er chca, Bëngbe Bëtsabe entšanga šmochántsemna, y cabana, chë nyetsca tescama yomna tšabe vida šmochántsebozna. <sup>23</sup> Bacna soyënga tcojtsamentšana jóboznana entšá nyetsca tescama castiganá chaotsemnama, mo Bëngbe Bëtsabe bominyiñe nyetsca tescama obanënga cuaftsemncá; pero, Bëngbe Bëtsá šojtsatšatná soyënguentshana, jóboznana chë nyetsca tescama yomna tšabe vida jtsebomnana, Cristo Jesús Bëngbe Utabnáftaca cánÿiñe mo canÿacá jtsemnëse.

*Chë bouamnátbentšana ndayá bēngbiama mochjuatsjinjē*

<sup>1</sup> Jesucristbeyeca catšátanga, tšēngaftanga šmotátšēmo ntšamo chë leyēnga entšangbiama inētsemnama; tšēngaftanga šmotátšēmo, ntšamo chë leyīñe tojtsayancá canjē entšá chaotsamamna, nje chë entšá tojtsainēntscuana chábioye jtsemándayana. <sup>2</sup> Chcasna, canjē bouamna shembása, ntšamo chë leyīñe endayancá bontsemna chabe boyáftaca jēftsemnana, chë boyá tuainēntscuana; pero chë boyá tojtsóbanēsna, chë leyīñe endayana, chë shemna canjā jtoquédana, chë boyabiama ndēmandaná ca. <sup>3</sup> Y chca, chë shema injē boyabásaftaca chabe boyábioye tbojaingñé, chë boyá cabá vida totsóbomñe ora, chë shemna jtsabáinana chabe boyábioye ínŷaftaca ingñayá ca. Pero chabe boyá tojtsóbanēse, chë leyīñe endayana chë shemna canjā jtoquédana, chë boyabiama ndēmandaná ca, y cha jtsobenana ínŷaftaca jtobouamayana; y chca tojama ora, boyábioye ínŷaftaca ingñayana ndoñe ntsemnana.

<sup>4</sup> Tšēngaftanga chë ošbuachiyēngaftácnaca cachcá endmēna; ya ndoñe más chë léyeca mandánēnga quešmátsmēna, er Cristo tojanóbana ora šmojánbocna, mo chë soyēngama obanēnga cuaftjoquedangcá, ínŷabe entšanga jtsemnana, Crístbēnga, ndabiama Bēngbe Bētsá tojanma cháuatayenama; y chca jtsemnēse, bēnga bētscá soyēnga ntšamo tšabá yomncá chamot-samama, Bēngbe Bētsá jaserviama. <sup>5</sup> Bēnga chë nje ntšamo cabēnga imnabošcá monjaniyena ora, chë ley enjanoservena bēngbe ainaniñe chamotsebomnana bacna soyēnga jamama puerte bēts juabnēnga, nje bēnga tšabá jtsomñama. Ba bacna soyēnga tmonjanma, y chë causa bēnga šonjánamna nŷetsca tescama castigánēnga jtsemnana, mo Bēngbe Bētsabe bom-injīñe nŷetsca tescama obanēnga cuaftsemncá. <sup>6</sup> Pero mora Bēngbe Bētsá šojatsebacá chë léyeca ndēmandánēnga chamotsemnana; chë ley tempo enjamna bēngbiama mo canjē amēndayacá. Pero mora bēnga chë leyama mo obanēngcá montsemna; chca, bēnga ndoñe chamondētsiyenama ntšamo tempo enjamncá, chë uabemana leyēngaca mandánēnga, y aiñe tsmēcá chamotsiyenama, ntšamo chë Uámana Espiritu iuamcá bēnga vida chamotsebomnana.

*Bacna soye jamama juabna tcojtsebomnēse, chë ley jamana entšá bacna soye chaomama*

<sup>7</sup> Báseftanga muanjayana cach ley bacna soye yomna ca; ndegombre, chë ley ndoñe chca quenátsmēna. Chë léyeca atše tšabá sēndētátšēmo ndayá yomna bacna soye jamana. Atše ndocna te matijántátšēmbona ndayá yomna chë “ínŷabioye jtsántšabošana”, “ínŷabioye ndoñe cattsantšaboše ca” chë leyīñe ndoñe matmēnjanábemēse. <sup>8</sup> Pero bacna

soyënga jamama juabnënga atše bomna causa tonjanma, atše puerte chaitsebošama chë ndoñe šonjamna jtsebošana soyënga; y chca chë juabnëngaca tonjanopasá, atše chë leyënguiñe ndayá iuayanama jtsejuabnayëse. Er ndocna ley tondmëna ora, entšá ndoñe ntsetatšëmbuana ndayá yomna bacna soye jtsamana. <sup>9</sup> Canye tempo enjamna, chora atše sënjaniyena leyëngama ntsetatšëmbcá, pero ntšamo leyiñe iuayancá sënjanabuátmana ora, ndayá jamama ndoñe yonjamnama, atše sënjanontšé chë bacna soyënga jamama juabnëngaca mandaná jtsemnama; <sup>10</sup> y chora atše sënjántatšëmbona, chë causa šojtsanmëna nyetsca tescama castiganá jtsemnama, mo Bëngbe Bëtsabe bominyiñe nyetsca tescama obaná cuaftsemncá. Bëngbe Bëtsá chë mando tojanma, atše chë nyetsca tescama yomna tšabe vida jtsebomnama chayobenama, chë ley jtseyeunanëse; pero ndoñe chiyatanobedecé causa, chë mando tonjanma atše chašotsemna nyetsca tescama castiganá jtsemnama. <sup>11</sup> Chë leyentša mandiñe inye soyënga ndoñe šonjëtsemna jamama ca yojtsayánayeca, chë bacna soyënga jamama juabnënga átšbeñe, šmonjaningñé bacna soyënga jamama; y chë mando bëtsemnama, chë bacna soyënga jamama juabnënga tmonjanma atše chašotsemna nyetsca tescama castiganá jtsemnama, mo Bëngbe Bëtsabe bominyiñe nyetsca tescama obaná cuaftsemncá.

<sup>12</sup> Pero bënga mëntšá mochjayana: chë ley na tšabe soye endmëna, er Bëngbe Bëtsábiocana tojanóbocna, y chë mandëngnaca Bëngbe Bëtsábiocana tojanóbocna ca; chiñe endayana ndayá tšabá yomna jamana y chca tšabá jtsemnana. <sup>13</sup> Y asna, ¿quem tšabe soye tojanma atše chašotsemna nyetsca tescama castiganá jtsemnama, mo Bëngbe Bëtsabe bominyiñe nyetsca tescama obaná cuaftsemncá? ¡Ndoñe, ndegombre ndoñe! Chë bacna soyënga jamama juabnënga atše bomna causa, chca átšeftaca tonjanopasá. Chë tšabá yomna sóyeca, chë bacna soyënga jamama juabnënga tmonjanma atše chašotsemna nyetsca tescama castiganá jtsemnama. Chca chë juabnëngaca tonjanopasá, entšanga jobenayama jtsetatšëmbuama ndayá yomna bacna soye jamana; y chë mando, bacna soye jamama ndoñe yondmëna ca jtsichámuana causa, nyetsca entšanga mondobena jinýana canye bacna soye, mo canye puerte bëtš bacna soycá.

<sup>14</sup> Bënga mondëtatšëmbo chë ley Bëngbe Bëtsabe ley yomnama, pero atšna nye canye entšá sëndmëna, canya nyets tempo nye bacna soyënga jamama juabnëngaca mandaná. <sup>15</sup> Ndegombre ndoñe quešnátësertana ntšamo sëntsamcá,



er ndoñe ntsamana ndayá jamama stsebošcá, pero aínne jtsamana ndayá jamama ndoñe šontsogustancá. <sup>16</sup> Pero chë atšbe ainaniñe stsejuabná ndoñe tšabá tontsemna soye stsamëse, ndayama leyíñe iuayana ndoñe candmëna ntsamana ca, chca atšbe jtsinñanñayana chë ley ndegombre tšabe soye yomnama. <sup>17</sup> Chcasna, atšbe ya ndoñe ntsemnana chë chca tojtsamá, ndayá chë bacna soye jamama atšbe ainaniñe yomna juabnënga jtsamana atšbe chca jamama. <sup>18</sup> Atšbe sëndëtatšëmbo, atšbe ainaniñe tondaye yontsemna ntšamo tšabá yomncá atšbe jamama. Masque sëntseboše ntšamo tšabá yomncá jamama, ndoñe quetsátobena chca jamama. <sup>19</sup> Atšbe ndoñe quetsátama chë tšabe soye ndayá jamama sëndbošcá, pero aínne sëntsama chë bacna soye ndayá jamama ndoñe sëndbošcá. <sup>20</sup> Chë ndayá ndoñe jamama sëntsebošcá stsamëse, chca jtsayanana, atšbe ya ndoñe stsemna chë chca yojtsamá, sinó chë bacna soye jamama atšbe ainaniñe yomna juabnënga chca yojtsama.

<sup>21</sup> Chca, atšbe tijátatšëmbona ndayá átšeftaca yojtsopasánana; masque, ntšamo tšabá yomncá jamama stseboše, bacna juabnënga sempre jtsemándayana atšbe bacna soye chaimama. <sup>22</sup> Atšbe ainanoca puerte sëntsoyejuá, Bëngbe Bëtsábicana yóbocana mandëngama. <sup>23</sup> Pero atšbe sënjinñena inñe soye átšeftaca yojtsopasánama; chë bacna soye jamama atšbe ainaniñe yomna juabnënga yojtsama atšbe ndoñe ntjamama ntšamo atšbe juabnoca yomna mo ndegombre soy cá, mo chë bacna soyëngaca mandaná cuaftsemncá.

<sup>24</sup> ¡Tša lastema atšbiama! Chë bacna soye jamama juabnënga átšbeñe entsemánda, y entsama atšbe chašotsemna nñetsca tescama castiganá jtsemnana, mo Bëngbe Bëtsabe bominñiñe nñetsca tescama obaná cuaftsemncá. ¿Nda nanjobenaye chentšana atšbe jatsbocama? <sup>25</sup> Nñe Bëngbe Bëtsá endmëna nda yobena atšbe jatsbocama, Bëngbe Utabná Jesucristbeyeca. Chábioye chama mochtsatschuanaye. Atšbe ainanoca atšbe aínne sëntsejuabná chë ley puerte tšabe soye yomna ca, y jobedésama sëntseboše; pero chë bacna soye jamama átšbeñe yomna juabnëngaca, atšbe bacna soyënga sëntsama, ntšamo chë juabnënga šontsemandacá.

## 8

### *Ntšamo Bëngbe Bëtsabe Espiritu yomandacá jtsiyenana*

<sup>1</sup> Y chca, Bëngbe Bëtsá ndoñe ntjayanana, Cristo Jesúsëftaca cánñiñe mo canñacá imomnënga, chëngbe bacna soyëngama nñetsca tescama castigánënga jtsemnana yojtsamna ca. <sup>2</sup> Er, chë Uámana Espiritoftaca mandánënga mondmënayeca, Bëngbe Bëtsá šojatsebacá, bënga chë bacna soye jamama

juabnëngaca mandánënga ndëtsemnana, y nÿetsca tescama castigánënga ndëtsemnana, mo Bëngbe Bëtsabe bominiÿiÿe nÿetsca tescama obanënga cuaftsemncá. Chë Uámana Espíritu jamana bënga ndegombre tšabe vida chamotsebomnana, cánÿiÿe mo canÿacá Cristo Jesúseftaca jtsemnëse. <sup>3</sup> Bëngbe Bëtsá tojanma ndayá Moisesbe ley ndoÿe tonjanobenacá, er entšanga mondoyena nÿe ntšamo cachënga imobošcá, y nÿe cánÿenga ndoÿe ntšobenana jamana ntšamo tojtsamncá. Bëngbe Bëtsá tojánayana entšangbeÿe bacna juabnëngbe mando jtsepochočama ca, y chama chabe Uaquiñá tbojanichmó. Cha quem luaroye mo canÿe entšacá tojánabo, canÿe ainánaca, mo chë entšanga bacna soye amëngbe ainancá, pero ndocna te ni mo canÿe bacna soye ndoÿe tonjëftsema; y tojánabo, chábeyeca entšanga bacna soyëngama perdonánënga chamotsemnana. <sup>4</sup> Bëngbe Bëtsá chca tojanma, bënga chë mora oyenënga jtsamëse ntšamo chë Uámana Espíritu ainaniÿe yomandacá y ndoÿe nÿe ntšamo bënga entšanga tmojtsebošcá, chamobenama tšabá jamana ntšamo chë leyiÿe yomandancá, ntšamo šojtsamncá.

<sup>5</sup> Chë nÿe cachënga tšabá jtsomñama cachëngbe juabnëngaca imoyenënga, nÿe sempre jësejuabnayana bacna soyënga jtsamama, chca bacna juabnëngaca mandánënga; pero ntšamo chë Uámana Espíritu ainaniÿe iuamëndacá oyenëngna, sempre jësejuabnayana tšabe soyënga jamama, ntšamo chë Uámana Espíritu yobošcá. <sup>6</sup> Ntšamo chë nÿe cachá tšabá jtsomñama juabnëngaca mandaná oyenentsana jóbocnana entšá nÿetsca tescama castiganá chaotsemnana, mo Bëngbe Bëtsabe bominiÿiÿe nÿetsca tescama obaná cuaftsemncá; y ntšamo chë Uámana Espíritu tojtsemandacá oyenentsana jóbocnana chë nÿetsca tescama yomna tšabe vida jtsebomnana y ainaniÿe tšabe ebionana. <sup>7</sup> Chë nÿets tempo oyenënga nÿe ntšamo tmojtsebošcá nÿe cachënga tšabá jtsomñama jtsejuabnayëse, Bëngbe Bëtsabe uayayënga jtsemnana, er chënga ndoÿe ntšamana ntšamo cha tojtsamëndacá, y chca jamama ndoÿe ntšobenana; <sup>8</sup> y chca, chë nÿe chca bacna juabnëngaca oyenënga, ndoÿe ntšobenana jamana ntšamo Bëngbe Bëtsá tšabá tbojtsinÿancá.

<sup>9</sup> Pero tšëngaftanga ndoÿe quešmátiyena nÿe cach tšëngaftanga tšabá jtsomñama cach tšëngaftangbe juabnëngaca, sinó šmojtsiyena ntšamo chë Uámana Espíritu tšëngaftangbe ainaniÿe cmamëndacá, er chë Uámana Espíritu sempre tšëngaftangbe ainaniÿe iuëtsemna. Nda ndoÿe quem Cristbe Espíritu tondbomná, ndoÿe Cristbia ntsemnana. <sup>10</sup> Pero Cristo sempre tšëngaftangbe ainanentše vida totsóbomñëse, masque tšëngaftangbe cuerpënga yochjopochóca, quem

luarentše entšanga bacna soyënga jtsamana causa, tšëngaftangbe espíritu nyets tempo vida echanjesóbomñe, er Bëngbe Bëtsá tojama tšëngaftanga chabe bominyiñe tšábenga chašmotsemnana. <sup>11</sup> Y Bëngbe Bëtsabe Espíritu, Jesús cháuatayenama tojamabe Espíritu, sempre tšëngaftangbe ainaniñe tojtsemnëse, Bëngbe Bëtsá, chë Cristo cháuatayenama tojamá, echanjama chë tšëngaftangbe yochjóbana cuerpo, cachiñe vida chaotsatsbomnana. Cha chca echanjama chabe Espíritoftaca, y mua sempre tšëngaftangbe ainaniñe iuétsemna.

<sup>12</sup> Chcasna, Jesucristbeyeca catšátanga, šontsamna jtsiyenana ntšamo chë Uámana Espíritu ainaniñe šuamëndacá; ndoñe quešnátamna jtsiyenana nýe bënga tšabá jtsomñama cabëngbe bacna juabnëngaca; <sup>13</sup> er nýe bënga tšabá jtsomñama cabëngbe bacna juabnëngaca šmojtsiyenëse, castigánënga šmochántsemna, mo Bëngbe Bëtsabe bominyiñe obanënga cuaftsemncá; pero Uámana Espíritbeyeca, chca juabnëngaca nýetsca bacna soyënga jtsamana jtsajbanama šmojobenase, chë nýetsca tescama yomna tšabe vida šmochántsebomna.

<sup>14</sup> Ntšamo chë Uámana Espíritu yomandacá tmojtsamëngna, Bëngbe Bëtsabe básenga jtsemnana. <sup>15</sup> Er Bëngbe Bëtsá ndoñe tonjama bënga ainaniñe canýe espíritu chamotsebomnana, mo nýe ínýabiamana nýets tempo oservenëngcá chašotsamëndama, y chca cha chaoma bënga cachiñe chamotsëuatjama; sinó chë Bëngbe Bëtsá tojama bënga chamotsebomnana Espíritu jamana bënga Bëngbe Bëtsabe básenga chamotsemnana, y chë Espíritu endama “Atšbe Taitá ca” bënga Bëngbe Bëtsá chamotsechembuanama. <sup>16</sup> Y chë Uámana Espíritu y bëngbe espíritu canýe ora jayanana bënga Bëngbe Bëtsabe básenga imomna ca. <sup>17</sup> Y Bëngbe Bëtsabe básenga mondmënayeca, bëngnaca mochanjójyëngacñe ndayá cha chabe básenga jatšatayama tojašebuachenacá; bënga y Cristo cánýiñe chë soyënga mochanjójyëngacñe, er bënga inýe soyënguiñe tmojasufrí cachcá ntšamo Cristo tojansufricá, Bëngbe Bëtsá uámanënga y bëtsëtsanga chásuabiamama, ntšamo cach Cristo yomncá.

*Bëngbe Bëtsá bëtsëtsanga y uámanënga šochjábiama*

<sup>18</sup> Atše ndegombre sëndëtatšëmbo, ntšamo quem tempo bënga imosufrincá, puerte batšatema yomna chë bëngbe tšabiamana uámanana y buashinýinýanana Bëngbe Bëtsá šochjínýanýiyama. <sup>19</sup> Lempe ntšamo Bëngbe Bëtsá tojamcá endmëna mo tša cuaftsobatmancá, chaobuache chë Bëngbe Bëtsá ntšamo chabe básenga imomnana jinýanýiyama ora. <sup>20</sup> Er lempe ntšamo Bëngbe Bëtsá tojamcá, mora ndoñe yontsoservena ntšamo chaotsemnana cha tojanjuabocá. Chca tojanopasá, ndoñe chë lempe ntšamo cha tojanmcá

chca chaotsemnama tojánbošenayeca, ndayá cabá chë soyënga tojanmentšana, Adán bacna soye tojanmentšana, Bëngbe Bëtsá tojanjuabó ntšamo cha tojanmcá josérviana ndoñe ndayama ntšamo cha tempo tojanjuabocá. Pero lempe ntšamo Bëngbe Bëtsá tojanmcá entsemna mo cuaftsobatmancá canye te, ndëmua ora chë soyënga chaoservema cha yochjamama jtsetatšëmbëse, ntšamo quem luare jobojátšama ora chama cha yojanjuabnacá; <sup>21</sup> Bëngbe Bëtsá canye te yochjama lempe ya ndoñe más chaondetsopochocama. Y chora, ntšamo Bëngbe Bëtsá yochjamcá chabe básenga chamotsemnama, lempe ntšamo cha yojanjuabnacá, chabe uámanana y buashinjinyanana jtsebomnana, cachcá yochjama lempe chë cha tojanma soyëngaca.

<sup>22</sup> Er bënga mondëtatšëmbo lempe ntšamo Bëngbe Bëtsá tojanmcá mëntscoñama yomna mo canye shembása šešona jtsebomnana ora tbojtsetsetšama tojtsobësnacá; er lempe ntšamo cha tojanmcá entsemna mo tša cuaftsebošcá Bëngbe Bëtsá chaomama, chë soyënga chaoservema ndayama cha tempo tojanjuabocá. <sup>23</sup> Pero ndoñe nye chë lempe ntšamo Bëngbe Bëtsá tojanmcá yojtsemna mo chë shembasacá, sinó bëngnaca; y bënga ainaniñe mondbomna chë Uámana Espíritu, y chë soye endmëna ndayá natsana bënga tmojanóyëngacñe, chë Bëngbe Bëtsá bëtscá soyënga šochjátšatayentšana; bënga bëngbe ainanoca tša jesobësnayana, bënga chabe básenga chamotsemnama Bëngbe Bëtsá chaomama mondobátmanëntscuana, y chca, Bëngbe Bëtsá chaoma bënga ndocna te ndopochócama cuerpënga chamotsebomnana. <sup>24</sup> Bënga, Bëngbe Bëtsábeñe jtsošbuáchiyëse monjobátmana ntšamo cha tojanayancá chaomama, y chíyeca cha bënga šojatsebacá; pero ndayama tmobatmancá, ya tojtsëchnëjuanama bënga tmojtsonyase, chora chama ya ndoñe ntjátobatmanëngana. Er ndocná jatobátmanana chë ndayá jinýama ya tojobenacá. <sup>25</sup> Pero ndayama bënga tmobatmancá, cabá ndoñe jinýama tmontsobena soye tojtsemnëse, bënga jtsamnana Bëngbe Bëtsábeñe jtsobátmanana, uantadënga jtsemnëse, ntšamo tojayancá Bëngbe Bëtsá chaomëntscuana.

<sup>26</sup> Uámana Espíritnaca bënga šochandbëtsëjabuachana, er bënga ainaniñe ndoñe corente ntsošbuáchiyana. Bënga ndoñe quemuátstatšëmbo Bëngbe Bëtsáftaca jencuëntana ntšamo ndegombre tšabá yomncá; pero cach Espíritu Bëngbe Bëtsábioye bëngbiana jtsotjanañana, mo chca ora chabe ainanoca tša cuaftsobësnacá; y ndayá chca ora tbojtsotjanañamna, bënga ndoñe ntjobenayana bëngbe palábraca chama jóyebuambayama.

27 Y Bëngbe Bëtsana, ntšamo entšanga ainanoca tmojtsebošcá yonjá, y ntšamo chë Espíritu jayanama tojtsebošcá yotátšëmbo, er chë Espíritu chabe entšangbiana ibotjanañe, ntšamo Bëngbe Bëtsá yobošcá.

*Bënga ayëñjanayëngama más tmojábocana*

28 Y bënga mondétatšëmbo, Bëngbe Bëtsá nyetsca soyënguiñe inétsama cha imobobonshánëngbe tšabiana, ndëmuanýenga cha tojáchembo chabe entšanga chamotsemnana, ntšamo cha jamama yojanjuabnacá. <sup>29</sup> Jesucrístbeñe imošbuachéngbiamna, Bëngbe Bëtsá quem luare tojanma orscana yojanjuabná y chënga tojanabacacá chca chamotsemnana, y chë tempšana tojaninýnaná chënga chabe Uaquiñacá chamotsemnana; chca, chabe Uaquiñá chë bëtscá catšátangeñe chë natsaná chaotsemnana. <sup>30</sup> Y chë Bëngbe Bëtsá chca tojánabacacangnaca, tojánachembo chabe entšanga chamotsemnana; chëngbiana tojanma chabe bominiñe tšábenga chamotsemnana, y chëngbiámnaca yochjama chabe uámanana y obenanentšana chamotsebmna.

<sup>31</sup> Y asna, ¿chë soyëngama ntšamo mochjayana? Co Bëngbe Bëtsá bëngaftaca tojtsemnëse, bënga jáyëñjanama ndocná queochatobenaye ca. <sup>32</sup> Cha tondaye tonjanma chabe Uaquiñá jasúfriama ndoñe chabondëtsemnana, sinó tojanalesenciá entšanga chamóba, nyetsca bëngbe tšabiana. Bëngbe Bëtsá chabe Uaquiñáftaca chca tojanmëse, ndegombre Bëngbe Bëtsá lempe šochanjátšataye. <sup>33</sup> ¿Nda nanjobenaye jayanama chë Bëngbe Bëtsá tojábacacanga bacna soyënga tmojama y castigánënga chamotsemna ca? Ndocná; er cach Bëngbe Bëtsá endmëna nda tojayana bënga chabe bominiñe tšábenga imomna ca. <sup>34</sup> Y asna, ¿nda nanjobenaye jayanama bënga castigánënga jtsemnana šojtsamna ca? ¿Cristo Jesús cha yojtsemna? Ndoñe. Cristo, nda bëngbiana tojanóbana, pero cabá más, ndabiana Bëngbe Bëtsá tojanma cháuatayenama, y mora Bëngbe Bëtsabe catšbioica yojtsetbemana, jamándama y puerte bëtscá chentše jtsemnana; y choca, chánaca bëngbiana Bëngbe Bëtsábioye ibotjanañe. <sup>35</sup> ¿Ndayá nanjobenaye Crístbentšana, chë tša šondababuanýeshanábentšana bënga jtsajuánayana? ¿Padecena soyënguiñe jtsemnana, tša jtsetsetšana, bënga chamosufrima ínýenga tmojtsama ora, tondaye saná shëntsana ora, tondaye entšayá tmontsábomna ora, o resjo bëngbiana tojtsemna ora, o bënga jtsëbáyama ínýenga tmojtseboše ora? <sup>36</sup> Ntšamo Bëngbe Bëtsabe uabemana palabrënguiñe endayancá, canýe entšá Bëngbe Bëtsábioye ibojauyana ora:

Acbe causa entšanga cada te šontsëtsëtsná bënga jtsëbáyama ca;

entšanga bëngbioye nýe ntšámnaca jtsaborlánana;

bëngaftaca jamana mo chë jobáyama oveshëngaftaca mond-betsamcá ca.

<sup>37</sup> Pero ndoñe; nýetsca chë soyënguentsana bëngna ayëjanayëngama más tmonjábocana, cha bënga šuababuánýeshanayeca. <sup>38</sup> Er atše tšabá sëndëtatsëmbo tondaye yondobena, bënga Bëngbe Bëtsábentšana, chë tša šondababuanýeshanáentšana jtsajuánayana: masque ainënga o obanënga tmojtsemna; ni angelënga, ni amëndayënga chca jamama quemátobena; ni chë mora yojtsëchnëjuana soyënga, ni chë más chcoye yochjopása soyënga; ni ndocna obenana cach ndoñe; <sup>39</sup> ndocna quem luarentša tsbanánoca soye, ni quem luarentša tajsoica soye; ni ndocna inýe soye ntšamo Bëngbe Bëtsá tojamcá, quenátobena chca bënga jtsajuánayama. ¡Ndocna soye quenátobena bënga Bëngbe Bëtsábentšana, chë bënga šondababuanýeshanáentšana jtsajuánayana, chë Cristo Jesús Bëngbe Utabnáftaca Bëngbe Bëtsá šojanýanyé bonshánentšana!

## 9

*Bëngbe Bëtsá Israeloca entšanga tojabacacá, uámanënga chamotsemnana*

<sup>1</sup> Atše, Crístoftaca cánýiñe mo canýacá quetsomñecana, ntšamo sentsichamcá ndegombre endmëna; atše ndoñe quetsátsbostero. Atšbe ainanoca juabnënga, Uámana Espíritbeyeca jtsemandánëse, chë šmonybëuyana tšabá o ndoñe tšabá tijamama, šmontsatsëtsná atše ndoñe stsebosterama. <sup>2</sup> Ndegombre, atše puerte ngménaca atšbe entšangbiana, chë Israeloquëngbiana sëntsemna y atšbe ainana tša šontsetsetše, chënga Jesucrístbeñe jtsošbuáchiyama ndoñe quemátsboše causa. <sup>3</sup> Tšabá tojtsemnëse, atše stjobenaye jtsebošana cach atše Bëngbe Bëtsábeyeca nýetsca tescama castiganá y Crístbentšana luaroca jtsemnana, atšbe entšanga, chë cach atšcá buiñe bomna entšanga jujabuáchama. <sup>4</sup> Chënga mondmëna chë Israeloca entšanga, chë Bëngbe Bëtsabe bocacana entšanga. Bëngbe Bëtsá chënga chabe basengcá tojánabiana y chë tša bëtsá y uamaná cha yomnana chënga tojaninýanyé. Bëngbe Bëtsá ba soye chënga tojanabuayená ndayá cha chëngbiana yojánboše y ndayá chëngbiana jamama, y chë ley chëngbe cucuatšíñe tojanáboshjona. Chënga monjántatsëmbo ntšamo Bëngbe Bëtsábioye ndegombre jadórana, y chënga mondbomna chë Bëngbe Bëtsabe šbuachenánana: chënga cha játsebacana. <sup>5</sup> Chënga mondmëna chë bëngbe tempsca uámana bëts taitangbentšánënga, y Crístnaca mo canýe entšacá, mo canýe

Israeloca entsangbentsacá tojánabo; y cha endmëna Bëngbe Bëtsá, nyetsca soyënguifne mandayá. Nyetsca entsanga nyets tempo cha chamotsatschuaná. Chca chaotsemna.

<sup>6</sup> Atse ndoñe quetsátichamo, ndayá jamama tojanašebuachenacá ndoñe Bëngbe Bëtsá tonjama ca; er, nyetsca Israeloca entsangbentsënga ndoñe Bëngbe Bëtsabe ndegombre entsanga quemátsmëna. <sup>7</sup> Ni nyetsca Abrahámbentsana entsanga, ndoñe chabe ndegombre básenga quemátsmëna; er Bëngbe Bëtsá Abrahámbioye tbojaniyana: “Chë ácbentsana entsanga nye Isaácbentsana mochanjabo ca.” <sup>8</sup> Chca entsayana, bëngna ndoñe šontsamna jtsejuabnayana Abrahámbentsana nyetsca entsangbiamama mo Bëngbe Bëtsabe basengcá; inyetsá, nye chë Bëngbe Bëtsá tbojanšbuachenáyeca Abraham yojánabamna básengbiamama cocayé entsemna jtsejuabnayana, Abrahámbentsana ndegombre entsanga bétsemnama. <sup>9</sup> Er mëntšá endmëna ntšamo Bëngbe Bëtsá tojánayana, Abrahámbioye tbojanšbuachená ora: “Camëntša tempo entsba uata chanjésabo, y Sara canye šešona bochántsebomna ca.”

<sup>10</sup> Pero nye nyetsá ndoñe quenátsmëna. Chë Rebecbe uta básatna canye taitá ibnabomna, bëngbe tempsca bëts taitá Isaac. <sup>11-12</sup> Bëngbe Bëtsá, Rebécbioye tbojaniyana: “Acbe mayor uaquiñá, acbe ngomënche uaquiñábioye bochanjasérvia ca.” Cha chca tojánayana jinjinñiyama chë básatbentsana canya cha tbojánbocacama, Jacob, y ndoñe chë inye basa, Esaú, chca jamama tempo cha tojanjuabóyeca. Rebécbioye chca tbojaniyana chë básata cabá ndonyna ora, y ni canye basa cabá ndocna soye ndama ora. Y chca, ntšamo tojanopasacana, tojanopasá chë básatbentsana canya y ndoñe chë inya chca chaotsemnama Bëngbe Bëtsá tbojanábuayanayeca, y ndoñe ndayá chata tbojanmama. <sup>13</sup> Ntšamo Bëngbe Bëtsá chabe uabemana palabrënguifne tojanayancá: “Jacob sënjanábobonshana, y Esaú sënjanáboyënja ca.”

<sup>14</sup> Y asna, ¿ntšamo mochjayana? ¿Bëngbe Bëtsá ndoñe cachcá nyetscángaftaca endëtsemna ca? ¡Ndoñe, ndegombre ndoñe! <sup>15</sup> Er Bëngbe Bëtsá Moisésbioye tbojaniyana:

Atse šochanjóngmia nda chaitsebošabiamama,

y nda chaitsebošá chanjalastéma ca.

<sup>16</sup> Y chca, Bëngbe Bëtsá canye entsá jabocacayana, ndoñe ndayá chë entsá tojtsebošama o tojamama, ndayá Bëngbe Bëtsá tbojalastemama. <sup>17</sup> Er Bëngbe Bëtsabe uabemana palabrënguifne, Faraón chë Egiptoča réybioye cha tbojaniyana: “Atse rey tbonjábema, tša bëtscá atšbe obenana yomnama nyetscanga ábeñe chayinñanyema, y nyets luarentša entsanga

atšbiamā chamotatšēmbonama ca.”<sup>18</sup> Y chca, Bēngbe Bētsá jalastémāna nda tojtsebošábioye, y nda tojtsebošábioye jalesénciana chabiamā nduauenaná chaotsomñāma.

<sup>19</sup> Pero ndánaca tšēngaftanguentšá šuatjatjaye: “Bēngbe Bētsá chca tojtsamēse, ¿ntšāmo cha nantsobena jayanana canye entšá bacna soye tojama ca? ¿Nda nanjobenaye chē ndayá Bēngbe Bētsá tojtsebošāma corente contra jtsemnana?”<sup>20</sup> Pero, nye entšá quecotsemñecá, ¿ntšāmo catjobenaye tša uamaná comna ca jtsejuabnayana, Bēngbe Bētsá jatstjanayama ndáyeca canye soye chca yojtsama ca? ¿Chē pormāna soye chē chca tojamábioye buanjauyana: “¿ndáyeca chca šcojama ca?””<sup>21</sup> Chē fshantse soyēnga pormayá jtsoberenana canye fshantsentšāna jamāna, canye matbaja uámana tescama, y inyájna cada te chaotsoservénama. Cachcá, Bēngbe Bētsá jtsobenana jamāna ntšāmo cha tojtsebošcá, ndayá cha tojama sóyeca.

<sup>22</sup> Bēngbe Bētsá yojáboše jinñanñiyama entšāngaftaca tbojánetnama, chēngbe bacna soyēngama; y yojáboše cha puerte obená yomnama jinñanñiyama. Chíyeca, chēnga tša yojanēuantana, chēnga chē ndēmuanñengbiamā Bēngbe Bētsá yochjánayana chēngbe bacna soyēngama castigánēnga jtsemnāma yojánamna ca, chē ndēmuanñēnga jtsapochócama Bēngbe Bētsá yojtsanprontana.<sup>23</sup> Y chánaca yojáboše jinñanñiyama cha puerte uamaná y bētsá yomnama. Cha tojama, bēnga chē ndēmuanñēnga cha šojanalastemá, chabe obenanentšāna y uámananentšāna chamotsebomnama; y cha tempo chca tojanjuabó bēnga uámanēnga y bētsētsānga jábiamama.<sup>24</sup> Bēnga mondmēna chē ndēmuanñēnga Bēngbe Bētsá chama šojánachembo, ínñēngna judío entšanguentšāna, y ínñēngna ndoñe judiēngbentšāna.<sup>25</sup> Ntšāmo chabe uabemana palabreñguñe, Oséasbe librēšañe Bēngbe Bētsá tojanayancá:

Entšānga ndoñe átšbēnga mondmēnēnga, chēnga “atšbe entšānga ca” chantsēbobuatma;

y canye luarentša entšānga ndoñe sēnjánababuanñeshanēnga, chēngna “atšbe bonshánēnga ca” chantsēbobuatma.

<sup>26</sup> Y cach luare ndayentše Bēngbe Bētsá tojánayana: “Tšēngaftānga atšbe entšānga ndoñe quešmátsmēna ca”,

cachentše Bēngbe Bētsá ainá chēnga echanjáuyana “atšbe básēnga ca”.

<sup>27</sup> Israeloca entšāngbiamā, Isaías jabuachana tojánayana: Masque Israeloca entšānga puerte bānga chamotsemna, nya mo chē mar bėjayoca chēñyañe cascajca, Bēngbe Bētsá nye báseftānga chentšāna echanjātsebacaye;



28 er, ndoñe bën y Bëngbe Utabná canye y nyetsca tescama echanjayana,  
nyets quem luarentša entsangbiana ndayá chënga tmoja-  
mama tšabá o ndoñe tšabá bétsemnama,  
y chëngaftaca echanjama ntšamo chaojayancá ca —cha tojánayana.

29 Ntšamo Isaiás tojanayancá, Bëngbe Bëtsá Israeloca entsángaftaca ntšamo jamama tojanoyebuambá ora:  
Bëngbe Utabná, nyets obenana bomná,  
ínjenga bënga jtsapochócama cha tojanalesenciá ora,  
báseftanga bëngbe entsanguentsënga ainënga chamotsomñama  
ndoñe matënjanmëse,  
bënga mora pochocánënga mamojtsemna, mo chë Sodoma y  
Gomorra pueblëngoca entsangcá ca,  
cha nyetscanga y nyetsca tescama tojtsanapochócaye ca.

*Israeloca entsanga y chë tšabe noticiënga*

30 Chcasna, mora mëntšá mochjayana: ndoñe judiënga tondaye monjánama Bëngbe Bëtsabe bominyiñe tšábenga jtsemnama, pero cha tojanma chënga chabe bominyiñe tšábenga chamotsemnama, chënga chábeñe imojtsošbuáchiyama. 31 Pero, Israeloca entsanga imojánboše Bëngbe Bëtsabe bominyiñe tšábenga jtsemnama, ntšamo chë leyiñe iuayancá jtsamëse; pero ndoñe chca tmonjanobená. 32 ¿Y ndáyeca chca? Co chë Bëngbe Bëtsabe bominyiñe tšábenga jtsemnama, chábeñe jtsošbuáchiyëse, chënga tondaye monjánama causa chca, sinó chca jtsemnama imojánboše nye ntšamo leyiñe iuayancá jtsamëse. Y chca, chëngna Jesús tmojtsanaboté, ntšamo chë Bëngbe Bëtsabe uabemana palabrenguiñe chë tmojtsanábotengbiana endayancá, chëngbiana cha yomna mo chë ndëtsbé ndayiñe chënga jtsojestjiamcá ca. 33 Bëngbe Bëtsabe uabemana palabrenguiñe cha chca tojánayana:

Smochjinýe, atše sënjama Jerusalenentše canya chaotsemna, y  
cha endmëna mo ndëtsbecá ndayentše chënga mochjo-  
jestje,  
y canye peñëscá ndayëse yochjama chënga chamotsótsatsama;  
pero nda chábeñe tojtsošbuaché, ndocna te nye bonamente  
queochátobatmana ca.

## 10

1 Jesucristbeyeca catšátanga, atše nyets ainánaca sëntseboše y Bëngbe Bëtsá sëntseimpadana, cha Israeloca entsanga cháuatsebacama. 2 Atše sëndëtatšëmbo y sëntsobena chëngbiana jayanama, chënga puerta mondboše Bëngbe Bëtsá jaserviama, pero ntšamo chënga yojtsësertancá, ntšamo Bëngbe Bëtsá

jasérviamá yojtsamnamna, ndoñe quenátsmëna ntšamo ndegombre yomncá. <sup>3</sup> Chënga ndoñe tonjanësertá ntšamo Bëngbe Bëtsá inétsama entsanga chabe bominyiñe tsábenga chamotsemnana, y cachënga tmojánguango ntšamo jamëse jobenayama Bëngbe Bëtsabe bominyiñe tsábenga jtsemnana; pero ndoñe chca tmonjanobená, chë entsanga chabe bominyiñe tsábenga chamotsemnana ntšamo Bëngbe Bëtsá inetsamcá ainánaca ntjoyëngacñëcá. <sup>4</sup> Er Cristo tojama entsanga ndoñe chamondëtsama ntšamo leyiñe iuayancá, Bëngbe Bëtsabe bominyiñe tsábenga jtsemnana, chca, chënga chamobenama chabe bominyiñe tsábenga jtsemnana, Crístbeñe jtsošbuáchiyëse.

<sup>5</sup> Chë Bëngbe Bëtsabe bominyiñe tsábenga jtsemnana bošëngbiamá, ntšamo leyiñe iuayancá jtsamëse, Moisés mëntšá tojánayana, chëngbiamá tojanábema ora: “Nda tojtsama nyetsca mandënga ntšamo leyënguiñe endayancá, tsabe vida echántsebomna, nyets tempo chë leyëngaca mandaná ca.” <sup>6</sup> Mëntšá endmëna ntšamo Bëngbe Bëtsabe uabemana palabrenguiñe iuayana, entsanga chabe bominyiñe tsábenga chamotsemnana ntšamo cha inétsamama, Jesucristbeñe jtsošbuáchiyëse: “Ndoñe cattsetjanaye: ‘¿Nda celoye yochjátsjua ca?’ (chca endmëna ndayá Cristo quem luaroye chaotsmama); <sup>7</sup> o, ‘¿Chë obanënga imomna luaroye yochjátsma ca?’ (chca endmëna ndayá Cristo chë obanënga imomna luarentšana chaotsjuama).” <sup>8</sup> Ntšamo Bëngbe Bëtsabe uabemana palabrenguiñe iuayancá mëntšá endmëna: “Tsëngaftanga paselo šmontsobena ntšamo Bëngbe Bëtsá tojabuayenacá jouenama, tsëngaftanga ya chama palabrengaca šmojoyebuambá y tsëngaftangbe ainaniñe chama šmojtsejuabná.” Chë buayenánana endmëna ndayá bënga ftsabuayiynacá, y chiñe endayana Jesucristbeñe jtsošbuáchiyama šojtsamna ca. <sup>9</sup> Chë buayenana soyënguiñe endayana, Jesús ndegombre Bëngbe Utabná yomna ca aca tcojayanëse, y Jesucristo cháuatayenama Bëngbe Bëtsá tojanmama, nyets ainánaca tcojtsošbuáchese, Bëngbe Bëtsá cmochjatsbocá ca. <sup>10</sup> Er ainanoca bënga Jesucristbeñe jtsošbuáchiyana y Bëngbe Bëtsá jamana cachabe bominyiñe tsábenga chamotsemnana; palabrengaca bënga jinyaníyiyana ndegombre Jesucristbeñe imojtsošbuáchema, y Bëngbe Bëtsá bënga játsebacana.

<sup>11</sup> Er Bëngbe Bëtsabe uabemana palabrenguiñe mëntšá endayana: “Nda Bëngbe Bëtsábeñe tojtsošbuaché, ndocna te nye bonamente queochátobatmana ca.” <sup>12</sup> Judiënga y ndoñe judiënga atsebácanënga mondmëna cach sóyeca, er canýe Utabná nyetscangbe Utabná endmëna, y cha

tmojtsotsšëmbuanëngbiana, cha bëtsá jtsamana. <sup>13</sup> Er Bëngbe Bëtsabe uabemana palabrënguiñe mëntsá endayana: “Ndánaca Bëngbe Utabná thojtsotsšëmbuanábioye, cha bochanjatsbocá ca.” <sup>14</sup> Pero, ¿ntšamo cha mochjótšëmbona, chábeñe ndoñe tmontsošbuáchese? ¿Y ntšamo chábeñe mochtsošbuáchiye, chabiana jóyebuambayama ndoñe tmonjouenëse? ¿Y ntšamo chabiana mochjouena, chabe buayenana soyënga chënga jáuyanama ndocná tontsemnëse? <sup>15</sup> ¿Y ntšamo chabe buayenánana mochtsabuátambaye, chëngbioye jíchamuama ndocná tontsemnëse? Ntšamo Bëngbe Bëtsabe uabemana palabrënguiñe endayancá: “¡Tša tšabá chë buayenánana abuátambayënga tmojáshjajna ora ca!”

<sup>16</sup> Pero nyëtscanga chë tšabe noticiënga ndoñe ntjoyeyunayana. Cach Isaías mëntsá tojánayana: “Utabná, ¿nda chë mondabuayiyná soyënguiñe yojtsošbuaché ca?” <sup>17</sup> Chcasna, chë tšabe noticiënga jouenëse, entšanga jobenayana Jesucristbeñe jtsošbuáchiyana; y nda Cristbiana tojtsabuayiynase, entšanga chabe buayenánana jouenana.

<sup>18</sup> Pero atše šcotjá: ¿ndegombre nandmëna judiënga chë buayenánana ndoñe tmonjanuena ca? ¡Aíñe, chënga aíñe tmonjanuena! Ntšamo Bëngbe Bëtsabe uabemana palabrënguiñe endayancá, chë Bëngbe Bëtsabe buayenana soyëngama oyebuambnayëngbiana:

Chëngbe oyebuambnayana nyëts quem luariñe tojóshjango, y chëngbe palabrënga nyëts luarënguentša entšangbenache tojuáshana ca.

<sup>19</sup> Pero cachiñe šcotjá: ¿Israeloca entšanga chë buayenánana ndoñe tonjanësertá ca? Natsana, Moisés mëntsá tojánayana, chë ndoñe judiënga Jesucristbeñe tmojtsošbuaché ora, ntšamo chë judiënga mochtsanjuabnayama tojanoyebuambá ora:

Atše, Bëngbe Bëtsá, chanjama, ndayá chë ndoñe judiënga chamojashjache soyëngama tšëngaftanga chašmotsíyentšbuašama, chënga chë ndoñe monjamna mo tšëngaftangcá atšbe entšanga.

Atše chca chanjama chëngaftaca, chënga chë tempo Bëngbe Bëtsabe soyëngama ndoñe tonjanësertá ca.

<sup>20</sup> Isaíasnaca, Bëngbe Bëtsabiana tojanoyebuambá ora, puerte añémoca tojánayana:

Chë atše ndoñe šmondënguanga, šmonjínÿena; y chë atšbiana ndoñe mondënotíciangbioye sënjenonÿinÿé ca.

<sup>21</sup> Pero Israeloca entšangbiana mëntsá tojánayana:

Nyëts tempo atše tša sënjánama, chënga átšeftaca tšabá tempcá chamotsatsmënema, pero chënga ndoñe chemátanbošena jouenama, y atšbe contra monjëtsemna ca.

## 11

*Bëngbe Bëtsá, Israeloca entsangbiana tšabe juabna yobomana tojinÿanyë*

<sup>1</sup> Y as mora šcotjá: ¿Bëngbe Bëtsá chabe entsanga tojtsanëbaté? ¡Ndoñe, ndegombre ndoñe! Cach atše canÿe Israelocá sëndmëna, Abrahám bentšana entsá y Benjaminbe bëts pamillentšana entsá. <sup>2</sup> Bëngbe Bëtsá chabe entsanga ndoñe tonjubaté, chë tempšana tojánabacanga. Tšëngaftanga šmondëtatšëmbo ntšamo Bëngbe Bëtsabe uabemana palabrënguiñe endayancá, Bëngbe Bëtsabe juabna oyebuambnayá Elías, Israeloca entsangbe contra Bëngbe Bëtsábioye cha ibojanatsëtsná ora: <sup>3</sup> “Bëngbe Utabná, acbe juabna oyebuambnayënga tmojtšëbaye y achiana pormana altarënga tmojtšepochocá; nÿe atše vídaca tijoquedá, y chënga montseboše átsnaca jóbama ca.” <sup>4</sup> Y mëntsá Bëngbe Bëtsá tbojanjuá: “Atše canÿsëfta uaranga boyabásenga atšbiana sënjacuedá, Baal ndoñe tmonjadoranga, ndayá entsanga tmojobopormá y imojtsejuabná canÿe dios yomna ca.” <sup>5</sup> Mórñaca cachcá entsemna, judiënguëntšë báseftanga monduájamna Jesucristbeñe ošbuáchiyënga, ndëmuanÿenga Bëngbe Bëtsá tojabacacá, cha chëngbiana tšabe juabna bómñayeca. <sup>6</sup> Bëngbe Bëtsá entsanga jabacacayana chëngbiana tšabe juabna bómñayeca; y ndoñe chca ntjamana ndayá entsanga tmojamama. Er ndayá tmojamama Bëngbe Bëtsá entsanga tojabacacase, cha nanjínÿanyïye cha chca inétsama, ndoñe nÿe chëngbiana tšabe juabna bómñayeca.

<sup>7</sup> ¿Y asna? Israeloca entsanga ndoñe chemátaninÿena ntšamo Bëngbe Bëtsabe bominÿiñe tšábenga jtsemnana, pero chënguëntšënga básefta bocacánëngna aíñe tmojanobená. Bëngbe Bëtsá tojanalesenciá chë ínÿenga Israeloquënguëntšana chabe buayenana soyënga ainaniñe ndoñe chamondóyëngacñama; <sup>8</sup> ntšamo Bëngbe Bëtsabe uabemana palabrënguiñe endayancá: “Bëngbe Bëtsá tojama chënga chabe soyëngama jósertama ndoñe chamondëtsobenama, y mëntscoñama chënga ndoñe quemátobena chabe soyëngama ni jinÿana ni josértana, mo nduabínÿnënga o nduauenanënga cuaftsemnëngcá ca.” <sup>9</sup> Davídnaca chëngbiana mëntsá tojánayana:

Mo chë entsanga canÿe fiestentšë oboyejuayënga, chëngbe uayayëngbeyeca nÿe ndeolpe ishëchenëngcá, y mo chë bayëngbiana uachmaniñe ishëchenëngcá, chënga mal chamopasama chaomama Bëngbe Bëtsá sëntseimpadana, mo nda ndëtsbeñe cuaftsojestjá.

Chca Bëngbe Bëtsá chaoma, chëngbe bacna soyëngama;

y cha cháuyana chënga puerte castigánënga jtsemnana yojt-samna ca, bacna soyënga tmojama causa;  
 10 Bëngbe Bëtsá chaoma ntšamo mochjapásama chënga ndoñe chamondobená jtsetatšëmbuana,  
 y chaoma puerte chamosufrima, nyets tempo padecena soyënguifne jtsiyenëse ca —cha tojánayana.

*Bëngbe Bëtsá ndoñe judiënga tojatsebacá*

11 As mora šcotjá: ¿Israeloca entšanga Bëngbe Bëtsá ndoñe tmonjanoyeuná ora, cha tojánayana chënga nyetsca tescama castigánënga jtsemnana yojtsamna ca, ndocna inye soye chëngbiana ntsemncá? ¿Chëngbiana yojamna mo chë ndëtsbeñe jojéstjiana y jtëtsbanama ndoñe más ntjobenayancá? ¡Ndoñe, ndegombre ndoñe! Chca ndoñe quenátsmëna. Chënga Bëngbe Bëtsá ndoñe chematanoyeuná causa, ndoñe judiënga tmonjántatšëmbona ndayá bëtsemnana Bëngbe Bëtsábeyeca atsocaná jtsemnana; y chë causa, mora, judiënga, ndayá chë ndoñe judiënga Bëngbe Bëtsábentšana tmojoshachiñcá montsiyentšbuaše. 12 Judiënga bacna soyënga tmojanma causa, inye entšanga quem luarentše tmojobená ba tšabe soyënga jtsebomnama. Chë judiënga tmonjanorrebajá causa, chë ndoñe judiënga ba tšabe bendicionënga Bëngbe Bëtsábentšana tmojosháchiñe. Y chca, chë bëtscá judiënga Bëngbe Bëtsá játsebacama, chënga atsebácánënga chamojtsemna ora, más bëtscá tšabe bendicionënga Bëngbe Bëtsábentšana nyetsca entšangbiana echántsemna.

13 Ntšamo mora chanjayancá, tšëngaftanga ndoñe judiëngbiana entsemna. Bëngbe Bëtsá šojichmó chabe soyëngama chë ndoñe judiënga jábuayenama; atše sëntsejuabná puerte uámana trabajo stsebomna ca. 14 Atše sëntsobátmana, quem trabájoca atše jobenayana jamama chë cach atšcá buifne bomna entšanguentšënga, ndayá chë ndoñe judiënga Bëngbe Bëtsábentšana tmojoshachiñcá chamotsiyentšbuaše, y chca, ndayá tijamama, Bëngbe Bëtsá chënguentsana báseftanga cháuatsebacama. 15 Er chë judiënga Bëngbe Bëtsá tojtsanëbaté ora, cha tojanma inye entšanga quem luarentše cháftaca tempcá tšabá chamotsatšmënama; y chënga cha chamojoyeuná ora, corente tšabá echántsemna, nya chënga mo obanënga cuabmëncá y cuaftsatayanëngcá. 16 Nda canye arninýentšana chë natsana tandëse Bëngbe Bëtsabiama josérviana yojtsemna ca tojayanëse, jtsemnana mo nyetsana chabiama cuaftsemncá. Canye betiyentša tbëtëjënga Bëngbe Bëtsabiama yojtsemna ca canya tojayanëse, nyetsca chë betiyentša buacuafjëgnaca Bëngbe Bëtsabiama jtsemnana.

17 Chë judiënguentsë báseftanga Jesucristbeñe ndoñe montsanošbuaché ora, tšëngaftanga chë ndoñe judiënga

šmonjanobená chábeñe jtsošbuáchiyana. Y chca, judiënga monjamna mo canye jena olivo betiyentšana entsanga tmojatëtse buacuafjëngcá, y tšëngaftangna mo tjoca olivo betiyentša buacuafjënga, chë jena olivo betiyeshiñe jenëfjëngcá. Mora tšëngaftanga Bëngbe Bëtsábentšana cachca tšabe soyënga chë judiëngaftaca šmontsebmna, mo chë jena buacuafjënga y cachentša buacuafjënga cach tbëtëjentšana lempe cuaftsoyëngacañcá. <sup>18</sup> Ndoñe šmattsenábotamnaye, tšëngaftanga Bëngbe Bëtsabe tšabe soyënga šmojtsebmnama, chë Jesucristbeñe ndoñe montsanošbuaché judiëngbiama yojamna soyënga. Smochtsejuabnaye, buacuafjëngna chë tbëtëjëngayeca vida jtsebmna, y ndoñe tbëtëjënga chë buacuafjëngayeca; cachcá, tšëngaftanga nye Bëngbe Bëtsábeyeca chë tšabe soyënga šmojtsebmna.

<sup>19</sup> Pero tšëngaftanga šmuatjayana: “Aíñe, pero Bëngbe Bëtsá básefta judiënga tojanëbaté, Jesucristbeñe ndoñe montsanošbuaché causa; chíyeca bënga fsëñjanobená mo buacuafjënga betiyiñe jenëfjëngcá chca tšabe bendicionënga Bëngbe Bëtsábentšana jóyëngacñana ca.” <sup>20</sup> Ndegombre, chënga Jesucristbeñe ndoñe montsanošbuaché causa, mo buacuetëtšëñëfjëngcá tmonjanoquedá, pero Jesucristbeñe šmojtsošbuáchema, tšëngaftanga šmojoquedá Bëngbe Bëtsábentšana tšabe bendicionënga jtsoyëngacañcá. Chcasna, chama ndoñe šmattsenábotamnaye; más tšabana cuedado jtsebmna. <sup>21</sup> Er Bëngbe Bëtsá, chë Jesucristbeñe ndoñe montsanošbuaché judiënga, ndoñe tonjanaperdoná, y chënga chabe entsanga bëtsemnamna, monjamna mo cach betiyentša buacuafjëngcá; tšëngaftanga, chë mo betiyiñe jena buacuafjëngcá šmomnënga, cha cach ndoñe quecmochátaperdonaye, chábeñe ošbuáchiyana šmojtsajbanase.

<sup>22</sup> Bëtscá šmochtsejuabnaye Bëngbe Bëtsá puerte tšabia yomnama, pero cha tšatjayá yomnámna šmochtsejuabnaye; tšatjayá endmëna chë bacna soyënga tmojtsamëngaftaca, pero tšëngaftangaftacna puerte tšabia. Cha tšëngaftangaftaca chca echántsemna, tšëngaftanga chca chašmojtsomerecëñentscuana; pero ndoñesna, Bëngbe Bëtsá echanjama tšëngaftángnaca mo buacuetëtšëñëfjëngcá chašmoquedama, chë tšabe bendicionënga Bëngbe Bëtsábentšana ntsoyëngacañcá. <sup>23</sup> Y ntšamo mora imojtsejuabnacá chë judiënga tmojatrocá y tmojontsé Jesucristbeñe jtsošbuáchiyana, chëngnaca cachiñe chë tšabe bendicionënga Bëngbe Bëtsábentšana mochanjóyëngacñe, y mochantsemna mo betiyiñe jena buacuafjëngcá, er Bëngbe Bëtsá becá obenana endbmna jamama ntšamo chë judiënga

tempo imojobomncá cachiñe chamotsatsbomnama.  
<sup>24</sup> Chcasna, más paselo jtsemnana canye jena olivo betiyentša buacuatětšeněfja cach betiyiñe jětsjena, y ndoñe, chě tjoca olivos betiyentša buacuafja canye jena olivos betiyiñe chaójuama jájena. Cachcá, más paselo jtsemnana chě Jesucristbeñe ndoñe montsošbuaché judiěngbiana, jóntšana jtošbuáchiyana y tsabe bendicioněnga Běngbe Bětsábentšana jýěngacñana, tsěngaftanga ndoñe judiěnga chě tempo Běngbe Bětsá ndoñe šmonjanábuatměngbiana.

*Běngbe Bětsá nyetscángaftaca puerte tsabia endměna*

<sup>25</sup> Jesucristbeyeca catšátanga, atše sěntseboše tsěngaftanga chašmotsetátšěmbo chě tempo Běngbe Bětsá entšanga ndoñe tonjaninýanýe soyěngama. Atše sěntseboše tsěngaftanga quem soyěngama chašmotsetátšěmbo, chca, tsěngaftanga ndoñe judiěnga chě judiěngbiana más uámaněnga šmomna ca ndoñe chašmondětsejuabnama. Ndayá Běngbe Bětsá tempo entšanga ndoñe tonjaninýanýecá, quem soye endměna: Běngbe Bětsá tojalesenciá, nye baseftatescama banga Israeloquěnga Běngbe Bětsabe soyěnga ainaniñe ndoñe chamondóyěngacñama; pero chca echántsemna, chě ndoñe judiěnguěntše atsebácaněnga jtsamnama imomněnga, atsebácaněnga chamojtsemněntscuana. <sup>26</sup> Chca chaojopasá ora, nyetsca Israelentša entšanga atsebácaněnga mochántsemna; ntšamo Běngbe Bětsabe uabemana palabrenguñe endayaná:

Entšangbe atsebacayá Israelocana echanjabo,  
 y echanjama nyetsca Jacóběbentšana entšanga ndoñe más vida chamondětsebomna, bacna soyěnga jtsaměse ca.

<sup>27</sup> Y měntšá endměna ntšamo chěngbiana chjašebuachená:  
 chěnga játsebacana, chěngbe bacna soyěngama chajaperdónaye ora ca —chiñe endayana.

<sup>28</sup> Chě tsabe noticiěnga tmojtsanaboté causa, judiěnga Běngbe Bětsabe uayayěnga mondměna, chca, tsěngaftangbe tsabiama chaotsemnama. Pero Běngbe Bětsá tojánabacacayeca, chěngnaca Běngbe Bětsabe bonsháněnga mondměna, er Běngbe Bětsá chěngbe tempsca uámana běts taitanga chca tojanašebuachená. <sup>29</sup> Chca endměna, er Běngbe Bětsá ndocna te juabna ntjatrócana; nyetscanga chabe entšanga chamotsemnama tojáchemběnga, nyets tempo cha echántsababuanýeshana, y echanjama chěngbeñe tsabe bendicioněnga chaotsemnama. <sup>30</sup> Tsěngaftanga ndoñe judiěnga tempo ndoñe šmonjánama ntšamo Běngbe Bětsá inabošcá; y mora, Běngbe Bětsá tcmojalastemá, judiěnga Běngbe Bětsá ndoñe tmonjoyeuná causa. <sup>31</sup> Cachcá, Běngbe Bětsá tsěngaftanga tcmojalastemama, judiěnga montsemna chě

Bëngbe Bëtsá ndoñe montsobedecénënga, chca, Bëngbe Bëtsá chëngnaca cháualastemama. <sup>32</sup> Er Bëngbe Bëtsá tojinÿanyé, cha ndoñe ntjoyeunayama juabnëngaca nyetscanga mandánënga imomnama, chca, nyetscanga jálastemama cha jobenayama.

<sup>33</sup> ¡Ndegombre, Bëngbe Bëtsá nyetscangbiamu puerte tšabia endmëna, puerte osertaná y puerte obiashjachá! Ndocná quenátobena ínÿenga jábuayenama ndayá Bëngbe Bëtsá jamama inetsejuabnycá, y ndocná quenátobena corente josértana ntšamo cha inetsamcá. <sup>34</sup> Ntšamo Bëngbe Bëtsabe uabemana palabrenguiñe endayanca:

Ndocná quenátstatšëmbo ntšamo Bëngbe Bëtsá inetsejuabnycá;

ndocná quenátobena cha jábuayenama ndayá jamana ibomnama.

<sup>35</sup> Ndocná quenátobena ndayánaca cha natsana jshatšetayana, chë tbojatšetabiamu ndebená cha jatsmënama, y chë ndebënama ndayánaca jtoyiyama chabotsemnama ca.

<sup>36</sup> Er lempe cha tojama, lempe cha iútabna, y lempe chabiamu yomna. ¡Nyetscanga nyetsca tescamu cha chamotsatschuaná! Chca chaotsemna.

## 12

### *Ntšamo jtsiyenëse Bëngbe Bëtsá jtseservénamu*

<sup>1</sup> Chcasna, Jesucristbeyeca catšátanga, Bëngbe Bëtsá bënga ba soye šojalastemáyeca, puerte cbontsaimpadana, tšëngaftanga Bëngbe Bëtsá chašmëyana tša šmojtseboše lempe jamana chábioye jadórama ca, Bëngbe Bëtsá jadórama mo ndayá cuafjobacá y cuafjuatšëmboncá, mo cabá ainá cuaftsomñcá. Smochjauyana tšëngaftanga sempre šmochtsentšena cha servénana y jtsamëse cha tšabá bëngaftaca chaotsemnama. As, chca chašmojtsama ora, ndegombre oyejuayá Bëngbe Bëtsá šmochántsebiamnaye. <sup>2</sup> Ndoñe šmattsiyena jtsamëse ntšamo chë nÿe quem luarama enójuabnaye entšanga monduamancá, y šmochjaleséncia Bëngbe Bëtsá mo tsëm entšangcá chácmabiamama, tšëngaftangbe ainana y juabna mo tsëmca chaomëse. Chca, tšëngaftanga šmochanjobenaye jtsejuabnayana y šmochántsetatšëmbo ntšamo Bëngbe Bëtsá yobošcá: ndayá tšabá yomna, chë ndayá cha oyejuayá ibnabema, y ndayá ya ndoñe yondopodena más tšabá jtsemnama.

<sup>3</sup> Ndayá Bëngbe Bëtsá atšbiamu tšabá jtsejuabnayëse šojatšetama, nyetsca tšëngaftanga cbochjáuyana, ndocná cachabiamu chaondëtsejuabná más uamaná yomna ca, nÿe ntsachetšá jtsenójuabnayana ibomna nyetšá. Más tšabá, cada ona cachabiamu tšabá chaotsenójuabná, y chca



chaotsenojuabná ntšamo chabe ošbuáchiyana yomncá, chca, chë Bëngbe Bëtsá tbojatšetá ošbuáchiyana chabiamana chaotsetrabájama. <sup>4</sup> Er, ntšamo bënga cada ona mondbomna canye cuerpo y chë cuerpiñe ba soyënga jtsebmomnana, y nyetsca soyënga ndoñe cach soyama cuerpiñe ntsoservénana, <sup>5</sup> cachcá bënga ošbuáchiyënga, masque bëtscanga imomna, Crísoftaca cányiñe mo canyácá mondmënayeca, bënga mondmëna mo chabe cuerpo cuaftsemncá, y cada ona cányiñe mo canyácá nyetscángaftaca.

<sup>6</sup> Bëngbe Bëtsá tojama bënga cada ona chamotsebmomnana ndoñe cachca chabe tšetana obenana, ntšamo Bëngbe Bëtsá cada ona bëngbe tšabiamana inajuabnaycá. Y chabe juábna bënga jtsóyebuambnayama jtsobenama Bëngbe Bëtsá tojamëse, chca mochtsama ntsachetšá chábeñe bëngbe ošbuáchiyana yomncá. <sup>7</sup> Ošbuáchiyënga bëtscá jaserviama bënga chamotsobenama Bëngbe Bëtsá tojamëse, chca mochtsama. Tšabá jtsabuátambayama bënga chamotsobenama Bëngbe Bëtsá tojamëse, chca mochtsama. <sup>8</sup> Inyënga jañëmuama bënga chamotsobenama Bëngbe Bëtsá tojamëse, chca šontsamna. Lempe ntšamo bënga tmobomncá inyëngbiámnaca chaotsemnana bënga jamana chamotsobenama Bëngbe Bëtsá tojamëse, nyets ainánaca chca šontsamna. Amëndayënga jtsemnana bënga chamotsobenama Bëngbe Bëtsá tojamëse, šontsamna bëtscá jamana tšabá jtsamëndayama. Inyënga jálastemama bënga chamotsobenama Bëngbe Bëtsá tojamëse, šontsamna oyejuayënga chca jamana.

*Ntšamo bënga Jesucristbeñe ošbuáchiyënga jtsamana šojtsamna*

<sup>9</sup> Inya chašmojtsebomnana ora, nyets ainánaca chca šmochtsama. Ndayá yomna ndoñe tšabe soye šmochtsaboté y chentšana šmochtsojuánañe; šmochtsentšena ntšamo tšabá yomncá jtsamama. <sup>10</sup> Cmontsamna nyetscanga puerte jtsenbomnánana, Jesucristbeyeca catšátanga quetsomñecá, chë inyënga bëngbiama más uámanënga imomna ca jtsejuabnayëse.

<sup>11</sup> Ndoñe oyënjayënga šmattsemna, ndayá bëtscá Bëngbe Utanabiamana šmochtsetrabájaye; ainaniñe corente añemo jtsebmomnëse, Bëngbe Utanabná sempre šmochtseservena.

<sup>12</sup> Tšëngaftanga Bëngbe Bëtsábeñe jtsošbuáchiyëse, chábeñe šmobatmánayeca, puerte oyejuayënga šmochtsemna; padecena soyënguiñe chašmojtsachnëjuana ora, puerte uantadënga šmochtsemna, y sempre Bëngbe Bëtsáftaca šmochtsencuëntaye.

<sup>13</sup> Bëngbe Bëtsabe entšanga opresido bomnënga šmochtjújabuache, y šmochtseprontana tšëngaftangbe yebnentše posada inyënga júyentšamiamana.

14 Bëngbe Bëtsá šmochtseimpadana, chë tšëngaftanga chašmosufrima amëngbiana tšabe bendicionënga cha chaotsamama; aíñe, cha šmochjaimpáda tšabe bendicionënga chëngbiana chaotsamama, bacna soyënga ndoñe.

15 Oyejuayënga ínÿengaftaca šmochtsemna, chënga oyejuayënga chamojtsemna ora; ngménaca šmochtsemna, ínÿenga ngméniñe chamojtsemna ora.

16 Smochtsiyena nÿetscanga jtsenëyeunanëse. Nÿe cach tšëngaftanga uámanënga ndoñe šmattsenobiamnaye, sinó chë nduámanënga imomnëngaftaca tšabá mándbomnënga šmochtsemna. Ndoñe šmattsejuabnaye yapa osertánënga šmomna ca.

17 Inÿenga bacá chacmojtsaborlana ora, ndoñe šmattsatëchénguaye; corente šmochtsentsëna ntšamo nÿetsca entšangbiana tšabá yomncá jtsamama. 18 Ntsachetšá šmojobenacá, lempe šmochtsama natjëmbana nÿetsca entšangftaca jtsiyenama. 19 Atšbe bonshánënga, ínÿenga bacá chacmojtsaborlana ora, ndoñe šmatjama chënga chë causa chamotsesufrínama, ndayá Bëngbe Bëtsá šmochjaleséncia chënga cháuacastigama; er Bëngbe Bëtsabe uabemana palabrenguiñe cha tojánayana: “Atše chanjama chënga chamosufrima, ínÿenga chamosufrima tmojama causa; y chënga chanjácastigaye, ínÿengbioye bacá tmojaborlá causa ca.” 20 Chca játamamna, mëntšá šmochjama, ntšamo cachánaca tojanayancá:

Acbe uayayá tbojtseshëntsanëse, saná cochjacaredáda, y tbojtsajuendase, cochjuáfsiye.

Chca chacojamëse, cochanjama cha puerta chaotsëuatja ntšamo tmojaborlama, y ainana corente chabotsetšëna, mo chebana iñbenga chabe bestšašiñe cuafjacacá ca.

21 Ndoñe šmatjaleséncia, ntšamo ndoñe tšabá tontsemncá tšëngaftanga chacmayëñjanama. Chamna, ntšamo tšabá yomncá jtsamëse, chë ndoñe tšabe soye šmochjayëñjaná.

## 13

1 Nÿetsca entsanga entsamna jtsamana ntšamo chë amëndayënga tmojtsamëndacá, er ndocná obenana ntsebomnana, Bëngbe Bëtsá ndoñe chca tbonjalesenciase, y nÿe Bëngbe Bëtsá tojama amëndayënga obenana chamotsebomnana. 2 Chca, chë amëndayëngbe contra tmojtsemnëngna, ntšamo chaotsemnana Bëngbe Bëtsá tojayancá contra chënga jtsemnana; y chca contra tmojtsemnëngna, castigánënga mochántsemna; 3 er ntšamo tšabá yomncá amënga, ndoñe quenátamna ndayama chë amëndayënga jatebëuatjana, nÿe chë bacna soye

amëngna aíñe. Tšëngaftanga šmojtseboše jtsiyenama chë amëndayëngbioye ntjatebëuatjca; chcasna, ntšamo tšabá yomncá šmochtsama, y chë amëndayëngna tšabe bomínýeca mochantsonýaye ntšamo chašmojtsamcá; <sup>4</sup> er chë amëndayëngna Bëngbe Bëtsabe trabajo amënga mondmëna, tšëngaftangbe tšabiama. Pero bacna soyënga šmojtsamësna, cmontsamna jtsiyenana chë amëndayënga jtsebëuatjese, er chënga jacastígama obenana mondbomna, y chca mondbétsama. Chënga, Bëngbe Bëtsabe mándoca jayanana chë bacna soye amënga ndoñe tšabá tmonjama ca, y jamana chënga chamosufrima. <sup>5</sup> Chíyeca, jtseytana ntšamo chë amëndayënga tmojtsichamcá jtsamana, pero ndoñe nýe chë castigo ndoñe chašmondëtsebonnama, ndoñe chca šmontsama causa, sinó chë ainanentša tšabe juabnënga ntšamo tbojtsëtsëtsnacá joyeunayama yómnayeca. <sup>6</sup> Cachca soyëngama, amëndayëngbiana impuesto tšëngaftanga jtsatsquécjnayana; er chë amëndayënga Bëngbe Bëtsabe oservëngna mondmëna, ntšamo chiñe jtsamama tojtsamncá corente tmojtsentšena ora.

<sup>7</sup> Chcasna, tšëngaftanga šmochjáyentšbuachiye ntšamo chënga jtsebomnama tojtsamncá. Chë crocénana entšanga ayëngacayëngbioye, ndaye impuéstnaca šmochtëbuénaye; chëngna šmochtsarrespetana ntšamo yomncá, y chënga uámanënga chamotsemnana šmochtsejuabnaye.

<sup>8</sup> Crocénana inýa jëtsëntšabuáchiyama chacmojtsamnëse, nýe ntoyicá ndoñe šmatjoquéda, nýets tempo ndebénënga; nýe quem soye sempre šmochtsama: nýetscanga šmochtsenbobonshana; er nda ndëmua entšábioye tbojtsebobonshana, ya tojama ntšamo leyíñe yomandancá. <sup>9</sup> Quem mandënga, “acbe shema ínýaftaca ndoñe cattseíngñaye, inýa ndoñe catjóba, ndoñe catjatbëba, inýa tojtsebomna soye ndoñe nýe acbiana cattseboše”, y chë inýe mandënga leyíñe lempe quem mandiñe entsemna: “Ndëmua entšánaca cochtsebobonshana ntšamo cach aca cuenobobonshancá”. <sup>10</sup> Nda ndëmua entšábioye tbojtsebobonshana, chábioye ndoñe bacá ntjabórlana; chca, ndánaca jtsebobonshánëse, entšá jamana lempe ntšamo leyíñe yomandancá.

<sup>11</sup> Chë soyënga cmontsamna jtsamana, er bënga mondëtatšëmbo ya chë uámana tempiñe imojtsiyenama, chë mocna ora šojtsamna prontánënga jtsemnana, mo ocnayentšana cuafjofšenangcá, Jesucristo jasérviana jtsentšënëse. Chca cmontsamna jamana, er chë Bëngbe Bëtsá bënga játsebacama te, mora ya más bécoñe entsemna, ntšamo chë Jesucristbeñe jtsošbuáchiyama tmonjanontsé ora enjamnama. <sup>12</sup> Mora bënga mondoyena canýe luarentše

bëtská bacna soyëngaca y ngmenánaca, y chca jtsemnana mo bënga nyëts tempo ibetiñe cuafitsajncá. Pero ya entsobeco chë Bëngbe Bëtsá bënga játsebacama te, mo chë ibetiñe ya jtsopochócama y binÿniñe ya jontšamcá. Chíyeca mochtsajbaná bacna soyënga amana, y mochtsiyena tšabe soyënga jtsamëse, Satanás játsjama y jáyënjanama bënga jtseprontánëse, mo canÿe soldado jenëuyanama y inÿa jáyënjanama ba soyënga tojenocjacá. <sup>13</sup> Ntšamo šojtsamncá mochtsiyena, ntšamo entsanga ndaye tšabe sóynaca jamama monduamancá, ínÿengbiama lempe chaotsinÿnëse. Chcasna, ndoñe quešnátamna yapa tmoyënga ntsemnana, ndoñe fiestënguenache ndoñe tšabe soyënga ntsamana, ndoñe bacna soye boyabása o shembásaftaca ntsamana y jenomándama ntsobercá chca soyënga ndoñe ntsamana, nyëtsanga ndoñe cachcá ntsejuabnayama ndoñe ntsamana y ndoñe ínÿenga yapa ntsíyentsbuašana. <sup>14</sup> Chca játamamna, šmochtsiyena jtsamëse ntšamo Bëngbe Utabná Jesucristo endbetsamcá, y ndoñe nÿe šmatjésejuabnaye jtsamana nÿe cach tšëngaftanga tšabá jtsomñama juabnëngaca, ndayá tšëngaftanga chašmotsamama chë juabnëngiñe tojtsemncá.

## 14

### *Ndoñe šmattsóyebuambnaye inÿe ošbuáchiyëngbe contra*

<sup>1</sup> Chë Jesucristbeñe nÿe batšatema ošbuáchiyënga tšabá šmochjúbuaja, y chëngaftaca ndoñe šmattsenatsësnaye ndayá aiñe o ndoñe jamana yontsamnama. <sup>2</sup> Er básiesta ošbuáchiyënga corente imotátšëmbo chënga nÿe ndayánaca jasama imobenama, pero chë Jesucristbeñe nÿe batšatema ošbuáchiyëngna, ndocna mëntšena ntsesayana, er chënga jtsejuabnayana aiñe jasana canÿe bacna soye nántsemna ca. <sup>3</sup> Chë nyëtsca saná sayënga ndoñe chamondëtsejuabná chë inÿe soyënga ndoñe mondëtseyëngbiama, chë causa chënga más batšá uámanënga imomna ca; y chë ndaye soyënga ndoñe mondëtseyëngna, chë nyëtsca saná sayëngbe contra ndoñe chamondëtsoyebuambná, er Bëngbe Bëtsá chënga tojúbuaja mo chabe entsangcá. <sup>4</sup> Tšëngaftanga ndoñe quecmátamna chë ínÿabe oservená ndoñe tšabá tonjama ca jatichámuana. Cachabe nduiño jtsemnana nda yochjayana cha tšabá o ndoñe tšabá tonjamama. Y chë oservená jamana ntšamo tbojtsemncá, er Bëngbe Utabná obenana endbomna cha chca chaotsamama.

<sup>5</sup> Básiestanga mondmëna, chënga jtsejuabnayana canÿe te inÿe tescama más uámana te yomna ca; pero ínÿengna jtsejuabnayana cada te cachcá iuámana ca. Y entsemna ndayá cada ona corente tšabá chaotsetátšëmbo, ntšamo yojuabnacá

ndáyeca chca ca. <sup>6</sup> Nda tojtsejuabná canye te inye tescama más uámana te yomna ca, chca jamana Bëngbe Utabnábiama jtenójuaboyama. Y nda nyetsca saná tojttesá, chca jamana Bëngbe Utabnábiama jtenójuaboyama, er cha Bëngbe Bëtsábioye chë sanama jëtschuayana; y nda tojtsejuabná sananga yomna y ošbuáchiyënga chcana chamotsesama Bëngbe Bëtsá ndoñe yondboše ca, cha chë soyënga ndoñe ntjasana, Bëngbe Utabnabiama jtenójuaboyama, y chánaca Bëngbe Bëtsábioye chë sanama jëtschuayana.

<sup>7</sup> Bënga ošbuáchiyënguentsana ndocná ainá ntsemnana nye cachabiama, ni jóbanana nye cachabiama. <sup>8</sup> Bënga tmojt-siyenëse, Bëngbe Utabnabiama jtsiyenana; y tmojóbanësna, Bëngbe Utabnabiama jóbanana. Chca, masque ainënga o obanënga, bënga Bëngbe Utabná bënga jtsemnana. <sup>9</sup> Chama Cristo tojanóbana y Bëngbe Bëtsá tojanma cha cháuatayenama, cha Bëngbe Utabná chaotsemnana, ainëngbeñe y chë ya tmojóbanëngbeñe chaotsemándama.

<sup>10</sup> As, ¿ndáyeca tšëngaftanguentšë báseftanga, catšátangbe contra jtsóyebuambnayana, ndayá chënga tmojtsamama? ¿Y ndáyeca ínÿënga tšëngaftanguentšë jtsichámuana, catšátanga ndoñe uámanënga montsemna ca, ndayá chënga tmojtsamama? Er nyetscanga šontsamna Bëngbe Bëtsabe delante jashjanguana, ntšamo cada ona tojëftsemcá tšabá o ndoñe tšabá bëtsemnana cha cháuyanama. <sup>11</sup> Er Bëngbe Bëtsabe uabemana palabrënguiñe Bëngbe Utabná mëntšá tojánayana:

Ndegombre atše ainá sëndëtsomñe, y chíyeca atše šcojurá, nyetscanga atšbe delante mochanjoshëntsaméntša atše jadórama, y nyetscanga šmochanjauyana, “ndegombre aca Bëngbe Bëtsá condmëna ca”.

<sup>12</sup> Chcasna, cada ona bënga šontsamna Bëngbe Bëtsá jauyanana ntšamo tmojamama ndáyeca chca ca.

*Ndoñe šmatjama inye ošbuáchiyënga bacna benachiñe chamótsatšama*

<sup>13</sup> Chíyeca, ya ndoñe quešnátamna ínÿëngbe contra jtsóyebuambnayana. Chca játamamna, šmochtsejuabnaye y yejuana šmochtsantješna ndocna te tondaye ntjamana, ndayá chaoma Jesucristbeyeca acbe catšata, chaojuabó y bacna soyënga chaoma. <sup>14</sup> Atše sëndëtatšëmbo, mo canya Bëngbe Utabnáftaca cánÿiñe mo canyacá quetsomñecá, ndocna soye yondmëna, nye cachabe ponto chaotsemna ndoñe tšabe soye. Pero canye entšá tojtsejuabná ndayánaca ndoñe tšabe soye yondmëna ca, ni jasama, ni jabojuama, chabiama cocayé chë soye nyets tempo jëftsemnana ndoñe

tšabe soye. <sup>15</sup> Tšëngaftanga inÿa becá šmojtsatsëtsná, inÿe soyënga tšabá endmëna jasama ca, y cha tojtsejuabná, chca soyënga jasama ndoñe tšabá yondmëna ca, pero tšëngaftanga tša šmojtsatsá causa, cha chca soyënga tojase, y chentšana tbojtsebiona puerte bacna soye tojamama, chca, tšëngaftanga jtsinÿanÿnayana ndoñe šmondoyena jtsamëse chë ínÿenga jtsababuánÿeshanëse. Nÿe tšëngaftanga inÿe soyënga šmétsesayama ndoñe šmatjaleséncia chë soye chaoma inÿa, ndabiama Cristo tojanóbana, chë ndoñe ndegombre benachiñe chaoquedama. <sup>16</sup> Ndoñe šmatjaleséncia ndayá tšëngaftanga tšabá šmétsamama, ínÿenga ndoñe tšabá tšëngaftangbiamama chamotsóyebuambnama. Chca šmochanjobenaye, ntšamo šmojtsamcá jtsajbanase, ínÿenga ndoñe tšabá tmontsoyebuambná ora. <sup>17</sup> Bëngbe Bëtsabe amëndayana bëngbeñe ndoñe quenátsmëna inÿe soyënga aiñe jasana o inÿe soyënga ndoñe, canÿe soye aiñe jofšiyana o inÿe soye ndoñe. Pero chabe amëndayana bëngbeñe aiñe endmëna jtsamana soyënga ndayama Bëngbe Bëtsá tojayana aiñe tšabá jamama yomna ca, cháftaca tempcá tšabá jtsatsmënana y ainaniñe oyejuayana jtsebomnana; y Uámana Espíritbeyeca bënga jobenayana chca jamana. <sup>18</sup> Y nda Crístbioye chca tbojtseserverna, jamana Bëngbe Bëtsá cháftaca oyejuayá chaotsemnama, y entšangbe bominiñe tšabia jtsemnama.

<sup>19</sup> Sempre šontsamna tšabe soyënga jtsamana y chë soyëngaca chaopodé jamana nÿetscanga natjëmbana chamotsiyenama, y ndaye sóynaca šmochtsama, ndayá ínÿenga chaújabuache Jesucrístbeñe corente jtsošbuáchiyama y ainaniñe bëtscá añemo jtsebomnama. <sup>20</sup> Tšëngaftanga ndaye sanánaca jasama šmobénayeca, ndoñe šmatjama chaotsopochocama ndayá Bëngbe Bëtsá ainaniñe tojamcá. Ndegombre, nÿetsca sananga tšabá jasama endmëna; pero ndayá tšëngaftanga šmojasama, inÿa bacna benachiñe chaótsatsáma šmojamëse, chë soye cocayé ndoñe tšabá ntsemnana. <sup>21</sup> Tšabá endmëna mëntšëna ndoñe ntjasana, vínoye ndoñe ntjofšiyana o ndayánaca ndoñe ntjamana, pero chë soye aiñe tcojama ora, Jesucrístbeyeca canÿe catšata chaojuaboma y bacna soye chaomama tojoservese.

<sup>22</sup> Asna, ntšamo tšëngaftanga chë soyëngama ndegombre šmošbuachecá, nÿe Bëngbe Bëtsá y tšëngaftangaftaca chaotsemna. Canÿe entšá ndegombre oyejuayá jtsemnana, canÿe soye jamama tšabá yomna ca tojtsejuabnase, y chë soye tojamentšana, ndoñe tšabá chca yonjamna ca juabnënga ainaniñe ndoñe tontsebomnëse. <sup>23</sup> Pero canÿe entšá ndayá tojamentšana tojayana, bacna soye tojama ca chë ndayá

tojasama o tojamama, as Bëngbe Bëtsánaca echanjayana cha ndoñe tšabá tonjama ca, er ntšamo tojamcá ndoñe tonjama chë soye aíñe tšabá yomnama jtsošbuáchiyëse; y ndayánaca chca ora tojtsamëse, chca jamana bacna soye jtsemnana.

## 15

*Ntšamo ínÿengbiama tšabá tojtsemncá mochtsama, ndoñe nÿe bëngbiama*

<sup>1</sup> Bënga, chë Jesucristbeñe corente ošbuáchiyënga, šontsamna chë nÿe batšatema ošbuáchiyënga jujabuáchana, chënga bacna soyënga tmojtsama ora, nÿe batšá ošbuáchiyana bomna causa; y ndoñe nÿe jatsënguayana nÿe ndaye soyëngaca yopodena bënga tšabá jtsemnana. <sup>2</sup> Cada ona bënga šontsamna jamana ntšamo cach bëngcá Jesucristbeñe ošbuachiyabiama tšabá tojtsemncá, y ndayá cha oyejuayá chaotsemnana tojama soye. Chca šontsamna, cha más bëtscá Jesucristbeñe chaotsošbuáchema, y ainaniñe más añemo chaotsebomnama. <sup>3</sup> Er Cristo, ntšamo tojanmcá cach ndoñe tonjanma nÿe cha oyejuayá jtsemnana. Inÿetšá, cháftaca tojanopasá ntšamo Bëngbe Bëtsabe uabemana palabrenguiñe endayancá, mo Cristo Bëngbe Bëtsáftaca cuaftsoyebuambnacá: “Ntšamo entšanga montsichamcá aca joyenguanguama, atše šmontsatsëtsná ca.” <sup>4</sup> Er lempe ntšamo tempo Bëngbe Bëtsabe uabemana palabrenguiñe tmojanabemcá, bënga jabuátambama endmëna. Ndayá bënga chiñe tmojuatsjínÿama, bënga jtsoobenana padecena soyënguiñe tmojtsachnëjuana ora uantadënga jtsemnana, y ainaniñe más añemo jtsebomnama; y chíyeca bënga montsobena, chábeñe jtsošbuáchiyëse, chábeñe jobátmana, ntšamo tojanayancá chaomama. <sup>5</sup> Atše, Bëngbe Bëtsá sëntseimpadana, nda inétsama bënga padecena soyënguiñe uantadënga chamotsemnana, y nda inétsama bënga ainaniñe más añemo chamotsebomnama, cha chaoma nÿetscanga canÿe juabna chašmotsebomnama, ntšamo Cristo Jesús yojanjuabnacá tšëngaftanga jtsejuabnayëse; <sup>6</sup> cha chca chaoma, nÿetsca tšëngaftanga mo cánÿiñe cuaftsemncá, y mo nÿetscanga canÿe ora cuafjayancá, Bëngbe Bëtsá, Bëngbe Utabná Jesucristbe Taitá, puerte bëtsá y uamaná yomnama chašmuinÿanÿema.

*Chë ndoñe judiëngbiámncá chë tšabe noticiënga jtsemnana*

<sup>7</sup> Nÿetscanga oyejuayënga šmochjenofja, ntšamo Crístnaca tšëngaftanga tmojanëbuajcá, chca, entšanga chamuinÿanÿé Bëngbe Bëtsá puerte bëtsá y obená yomnama. <sup>8</sup> Atše sëntseboše ndayá jayanana, Cristo tojánabo judiënga jabáserviama ca, chca, jinÿanÿiyama Bëngbe Bëtsá sempre

inétsamama ntšamo tojašebuachenacá; tojánabo ntšamo Běngbe Bětsá běngbe tempsca uámana běts taitanga tojanašebuachenacá chaocumplima; <sup>9</sup> y Běngbe Bětsá puerte bětsá yomna ca chě ndoñe judiěngnaca chamuayanámna, cha chěnga inétsalastemanama, ntšamo Běngbe Bětsabe uabemana palabrenguife endayancá, y chca tojanocumplí: Chíyeca, atše chě ndoñe judiěngbeñe chaitsemna ora, aca cbochantsatschuanaye, Běngbe Bětsá;

y jacántase chanjayana aca puerte bětsá y uamaná comna ca. <sup>10</sup> Inyoca měntšá endayana:

Puerte oyejuayěnga chě ndoñe judiěnga šmochtsemna, Běngbe Bětsabe bocacana entšangaftaca cánjiñe ca.

<sup>11</sup> Y ínycoca měntšá endayana:

Běngbe Utabná šmochtsatschuanaye tšěngaftanga ndoñe judiěnga,

y cha šmochtsatschuanaye nyetsca tšěngaftanga nyets luarěnguenache entšanga ca.

<sup>12</sup> Y Isaíasnaca Běngbe Bětsabe uabemana palabrenguife měntšá tojanábema:

Canya Isaíbe entšanguentšana echanjabo,

y Běngbe Bětsá chábioye uamaná bochanjábema, nyets luarěnguenache entšanga chaotsaměndama,

y chěnga chábeñe jtsošbuáchiyěse, chábeñe mochantsobátmana tšabe soyěnga chěngbiama chaotsamama ca.

<sup>13</sup> Atše, Běngbe Bětsá sěntseimpadana, nda inétsama běnga chábeñe chamotsobátmanama tšabe soyěnga běngbiama chaomama, cha chaoma tšěngaftanga ainaniñe puerte oyejuayěnga chašmotsemnama y ainaniñe tšabe ebionana chašmotsebomnama, chábeñe jtsošbuáchiyěse; y Běngbe Bětsá chca tšěngaftangbiama chaoma, tšěngaftanga cada te más chábeñe chašmotsobátmanama, chě Uámana Espíritbe obenánaca.

<sup>14</sup> Jesucristbeyeca atšbe catšátanga, atše corente sěndětatsěmbo tšěngaftanga puerte tšábenga šmomnama, ndayá cmamnama corente šmotatšěmbuama, y jtsenbuayiynayama šmobenámna. <sup>15-16</sup> Quem tsbuanáchañe básefta soyěngama sěnjuábema, ntšamo šmatjátsjuabnayama atše ntjatauatjca; chca sěnjama, básefta soyěngama chašmuatenójuaboma; y chca sěntsobena juabemana, er Běngbe Bětsá tojama atše chaitsebomna chě uámana trabajo, Cristo jtseservénana, chě ndoñe judiěnga jtsějabuáchaněse. Atše bachnēcá sěntsoservena, Cristo stseservena ora, entšanga tšabe noticiěngama jtsabuayiynayěse; atše chca sěndama chě ndoñe judiěnga Jesucristbeñe chamotsošbuáchema, y ndayánaca chamotsamama Běngbe Bětsá oyejuayá



chëngaftaca chaotsemnana, mo chabiama canye uatšëmbonancá. Chcanaca atše sëndama, ndoñe judiënga ndegombre Bëngbe Bëtsábenga chamotsemnana, chë Uámana Espíritbeyeca.

17 Chca, atše Cristo Jesúseftaca cányiñe mo canyáca quetsomñecá, ndegombre sentsobena jtsejuabnayana ntšamo Cristo jaserviama atše sëndamcá, puerte uámana soye yomnana. 18 Atše añemo sëntsebmna nye chë ndayá Cristo átseftaca tojamama jóyebuambayama, ndoñe judiënga Bëngbe Bëtsá chamóyeunama. Chca tonjopasá, ndayá tijayanama y tijamama, 19 chë Bëngbe Bëtsabe obenana jinñanñiyama bëts soyëngama, chë chabe obenánaca tojopasá tšabe soyëngama, y chë Uámana Espíritu bëts obenánaca tojama soyëngama. Y chca, Jerusalenocana jabojátšase, nyetsca luarënguëjana Iliria luaróntscoñe, Cristbe tšabe noticiëngama nyets luarënguenache entšanga tijabuayená. 20 Atše sempre canye soye inye soyëngama más sënjánboše, y enjamna chë tšabe noticiëngama jábuayenana, entšanga ndocna te Cristbiamana oyebuambnayana tmonjanuena luarënguenache; y chca sënjanma, atše ndoñe játamama inya tojanbojátšé trabajo, mo inñabe bojátšena yebnentše jajebuama cuafjatontšecá. 21 Ntšamo Bëngbe Bëtsabe uabemana palabrënguñe endayancá, chë tempo Cristbiamana ndoñe tmonjanuenëngbiamana:

Chë ndëmuanñyënga tempo ndocná chabiama tonjanabuayená,  
 chënga tšabá mochanjinñe ntšamo cha yomnana;  
 y chë ndocna te chabiama tmonjouenënga, chabe soyëngama echanjósertaye ca.

*Pablo yojanjuabná Roma bëts pueblöyë jama*

22 Y nya chë causa, atše ndoñe chiyjobená tšëngaftangbiöyë jana tšëngaftanga jányama, masque ba soye tsjenojuabná choyë jama. 23 Pero mora atšbe trabajo quem luarënguñe sënjapochocá y tempšana tšëngaftanga jányama tša sëndánbošeyeca, 24 sëntsejuabná mora añe chjobenaye choyë jama, tšëngaftanga jautsëtsayama, chëjana chaijachnëngo ora, España luaroyë chaitsá ora. Y baseftayté tšëngaftangaftaca chjëftsemna, cbochjányama tšëngaftangaftaca oyejuayá; chentšana Diosmanda šmochjuájabuache, y lempe ntšamo chašojtsajabotcá šmochjätšetaye jobenayama Españoyë ayana jtëtóntsama. 25 Morna Jerusalenoyë chanjá, choca entšanga Bëngbe Bëtsábenga imomnënga jaujabuáchama; 26 er Jesucristbeñe ošbuáchiyënga Macedonia y Acaya luarentšënga, tmonjajuabó tšabá yojtsemna crocénana jájuabana chë Jerusalenoca entšanga, Bëngbe Bëtsábenga imomnënga y ndbomnëjëmënga imomnënga jujabuáchama; y

oyejuayënga chca tmonjama. <sup>27</sup> Cachënga chca tmonjauabó, y chca jamana tšabá endmëna, er judiënga tmonjanma, chë Bëngbe Bëtsábiocana tmojanóyëngacñe soyënga ndoñe judiëngnaca chamotsebomnama; chíyeca ndoñe judiënga entsamna chë Jerusalenoca judiënga ošbuáchiyënga jujabuáchana, ndaye soyënga jatšatayëse, chënga vida jtsebomnama chamotsobenama. <sup>28</sup> Y chca, quem trabajo chaijapochocá ora, y chë ndoñe judiënga ošbuáchiyënga lempe tmojátbanana chaijáftsayentšbuachiye ora, chanjontšé Españaoye jama, y tšëngaftangbiajana chanjachnëngo tšëngaftanga jáftsanyama, tšëngaftangaftaca baseftayté jëftsemnama. <sup>29</sup> Atše corente sëntsetatšëmbo tšëngaftangbioye chaijá ora, chjášhango y chjama tšëngaftanga bëtscá tšabe bendicionënga Crístbentšana chašmotsebomnama, tondaye chacmondëtsabuáshebenëntscuana.

<sup>30</sup> Jesucrístbeyeca catšátanga, Bëngbe Utabná Jesucrístbeñe ošbuáchiyënga quetsomñecá, y bënga bonshánana chamotsebomnama chë Uámana Espíritu inétsamayeca, tšëngaftanga cbontsaimpadana, bëtscá chašmotsentšena Bëngbe Bëtsá nyets ainánaca jtseimpadánama, ntšamo atše sëndbetseimpadancá, cha atše chašotsinjenama. <sup>31</sup> Cha šmochtseimpadana chë Judea luaroca ndošbuáchiyënga ndocá chašmondëborlama, y chë Jerusalenoquënga Bëngbe Bëtsábenga, tšabá chamóyëngacñama ndayá chënga jujabuáchama chaijáftsayentšbuachiye ora. <sup>32</sup> Y chentšana, y Bëngbe Bëtsá chca chaojábošenëse, atše chayobená bëtscá oyejuayá tšëngaftangbioca jashjanguana tšëngaftanga jányama, y tšëngaftangaftaca chaitsemna ora, batšá jóchnama chayobená. <sup>33</sup> Atše, Bëngbe Bëtsá sëntseimpadana, nda inétsama bënga ainaniñe tšabe ebionana chamotsebomnama, nyetsca tšëngaftangaftaca chaotsemnama. Chca chaotsemna.

## 16

### *Ubuátmënga jacheuayama*

<sup>1</sup> Atše sëntseboše tšëngaftanga jáuyanana Febe, Jesucrístbeyeca bëngbe uabena, canye tšabe entšá endmënama; cha chë Cencrea puebloca enefjuana ošbuáchiyënga endújabuachana. <sup>2</sup> Tšabá cha šmochjofja, mo canya Bëngbe Utabnábia quetsomñecá, ntšamo Bëngbe Bëtsabe entšanga entsamncá ín'yëngaftaca jenofjana. Šmochjuájabuache ntšamo tbojtsajabotcá, er cha banga tonjújabuache; átšbioynaca.

<sup>3</sup> Atšbe cuenta Prisca y Aquila šmochjácheuaye, chë átšeftaca tbonjatrabajata, Cristo Jesusbiana oservéniñe. <sup>4</sup> Jobanámnaca bonjanprontana, atše jatsbocama, ndoñe chašmondóbama. Atše chama chata sëntsatacheuaná; y

ndoñe nÿe atše, sinó nÿets luarenache enefjuana ndoñe judiënga ošbuachiyëgnaca chca. <sup>5</sup> Chë ošbuáchiyënga, chë Bëngbe Bëtsá jëtschuayama chatbe yebnentše jénefnama imuamanëgnaca, šmochjácheuaye. Atšbe bonshana Epeneto šmochjachuaye; cha endmëna chë natsaná Asia luaroca Jesucristbeñe jtsošbuáchiyama. <sup>6</sup> María šmochjachuaye; cha tšëngaftangbeñe bëtsá tojatrabájá. <sup>7</sup> Chë cach atšcá judeocata Andrónico y Junias šmochjácheuaye. Chata canÿe ora átšeftaca cárceloje bonjanëtámëna, y Jesucristbe ichmónëngbiama chata puerta uámanata bonjamna, y atšbiama más natsana tbojanontšé Jesucristbeñe jtsošbuáchiyama.

<sup>8</sup> Ampliato šmochjachuaye, atšbe bonshaná, er atšcá cha Bëngbe Utabnáftaca cánÿiñe mo canÿacá bondmëna. <sup>9</sup> Urbano šmochjachuaye, chë bëngaftaca Cristbiama oservëniñe trabajayá; y atšbe bonshana Estáquisnaca šmochjachuaye. <sup>10</sup> Apeles šmochjachuaye; cha ba soye tonjinÿanÿé Jesucristbeñe puerta yošbuáchema; y Aristóbulbe yebnentsšëgnaca šmochjácheuaye. <sup>11</sup> Chë cach atšcá judeocá Herodión šmochjachuaye, y chë Narcisbe pamillentšana Bëngbe Utabnábeñe ošbuachiyëgnaca. <sup>12</sup> Trifena y Trifosa šmochjácheuaye; chata Bëngbe Utabnabiama puerta bondëtrabájá; y bëngbe bonshaná Pérsidnaca šmochjachuaye; cha bëtsá endëtrabájá, Bëngbe Utabnabiama oservëniñe. <sup>13</sup> Rufo, chë Bëngbe Utabnabiama uámana trabajayá, šmochjachuaye, y chabe mamánaca; cha mo atšbe mamacá endmëna. <sup>14</sup> Asíncrito, Flegonte, Hermes, Patrobas y Hermas šmochjácheuaye, y chë ínÿenga Jesucristbeñe ošbuáchiyënga chëngaftaca inmënutanangnaca. <sup>15</sup> Filólogo y Julia, Nereo y chabe uabena, Olimpas y nÿetsca Bëngbe Bëtsabe entšanga chëngaftaca inmënutanangnaca šmochjácheuaye.

<sup>16</sup> Nÿetscanga mo Jesucristbeyeca catšatangcá šmochjenuaye, jtenámochëse, ntšamo cach tšëngaftangbe pamíllanga puerta bonshanánaca šmondetsacheuanaycá. Nÿets luarenache enefjuana Crístbeñe ošbuáchiyënga cmontsacheuaná.

<sup>17</sup> Jesucristbeyeca catšátanga, atše cbontsaïmpadana tšabá šmochjuáfšna y cuedado šmochtsebomna chë cánÿenga ínÿengaftaca contra chamotsemnana y ínÿenga Jesucristbeñe ošbuáchiyana chamotsajbanama inmëtsamëngbiama; chëngna, chë tšëngaftanga ndaye šmojóyëngañe buatëmbana soyëngama contra jtsóyebuambnayana. <sup>18</sup> Er chca amënga, ndoñe ntsentšënana Cristo Bëngbe Utabná jtsešervënana, sinó jtsamana ndayá cachënga tmojtsebošcá, nÿe cachëngbe cuerpama tšabá tojtsemncá; y tšabe y botamana palabrëngaca chë paselo jáingñama yomna entšanga

jáingñana, chëngbe ainaniñe chëngcá chamotsejuabnama. <sup>19</sup> Njetsca entsanga tmojouena, chë Bëngbe Bëtsabe soyëngama ntšamo inyënga tmojabuatambacá, tšëngaftanga corente šmnétsayaunanama, y chíyeca atse puerte oyejuayá tšëngaftangaftaca sëntsemna. Atse sëntseboše, tšëngaftanga tšabá chašmotsetátšëmbo jtsamana ntšamo tšabá yomncá, y ntšamo bacna soyënga jamamna chašmotsemna mo ndoñe cuaftsetatšëmbcá. <sup>20</sup> Y Bëngbe Bëtsá, nda inétsama bënga ainaniñe tšabe ebionana chamotsebomnama, ndoñe bën y echanjama tšëngaftanga Satanás chašmoyëñjanama, mo cha tšëngaftangbe cucuatšíñe cuafjaboshjoncá. Atse sëntseimpadana Bëngbe Utabná Jesús, chaoma tšabe bendicionënga tšëngaftangbeñe chaotsemnama.

<sup>21</sup> Timoteo, chë átšeftaca trabajayá, tšëngaftanga cmontsacheuaná; y Lucio, Jasón y Sosípater, cach atšcá Judeoquënga, chëngnaca tšëngaftanga cmontsacheuaná.

<sup>22</sup> Atšnaca Tercio, chë Páblëbe cuenta quem tsbuanácha uabiamnayá, tšëngaftanga cbontsacheuaná, tšëngaftanga y átšnaca Bëngbe Utabnáftaca cányiñe mo canyáca quetsomñecá.

<sup>23</sup> Gayo cmontsacheuaná; atse Pablo chabe yebnentše posada sëntsebomna, y cha enduamana njetsca chë muentša ošbuáchiyënga tšabá júbuajana. Erasto, chë quem pueblentša crocénana bojanýá, tšëngaftanga cmontsacheuaná, y Jesucristbeyeca bëngbe catšata Cuártënaca.

<sup>24</sup> Atse, Bëngbe Utabná Jesucristo sëntseimpadana, cha chaoma tšëngaftangbeñe tšabe bendicionënga chaotsemnama. Chca chaotsemna.

*Quem tsbuanácha juapochócoma, Pablo Bëngbe Bëtsábioye tbojtanchuá*

<sup>25</sup> Bënga sempre mochtsinýanýnaye Bëngbe Bëtsá puerte uamaná yomnama. Cha endobena jamama tšëngaftanga puerte chašmotsošbuáchema; y chca, cha echanjama ntšamo chë bënga fsëndabuayiyná tšabe noticiënguiñe yomncá, ntšamo chë Jesucristbe buayenana soyënga yomncá, y ntšamo chë Bëngbe Bëtsá šojinýanýe ndegombre soyënga yomncá. Njets tempo mëntscoñama, Bëngbe Bëtsá chë soyënga entsanga ndoñe tonjinýanýe, y chë causa chënga chë soye ndoñe ntsetatšëmbuana. <sup>26</sup> Pero morna, ntšamo Bëngbe Bëtsabe juabna oyebuambnayënga tmojanabemcá, tojama bëtscá entsanga chë ndegombre soyëngama chamotsetatšëmbuama; Bëngbe Bëtsá, chë njets tempo vida bomná, tojanmandá entsanga njets luarënguenache chë ndegombre soyëngama chamotsetatšëmbuama, chënga chábeñe chamotsošbuáchema y ntšamo cha yobošcá chamotsamama.

<sup>27</sup> Nÿe canÿe Bëngbe Bëtsá endmëna, y cha nÿets osertánana endbomna. ¡Nÿetscanga chamotsinÿanÿná cha puerte bëtsá y uamaná yomnama, ndayá Jesucristo tojanmama! Chca chaotsemna.

# 1 Corintios

*Pablo chënga jacheuayama*

<sup>1</sup> Atše Pablo, ndábioye Bëngbe Bëtsá tbojanchembo Jesucristbe ichmoná jtsemnama, Bëngbe Bëtsá chca yojánbošeyeca, cánýiñe chë Jesucristbeyeca catšata Sósteneseftaca, <sup>2</sup> quem tsbuanácha sèntsabiamná tšëngaftanga chë Corinto bëts pueblocá Jesucristbeñe ošbuáchiyëngbiamá; ndëmuanýenga Cristo Jesúseftaca Bëngbe Bëtsá tojábiamá chabe entšanga nýe chábioye oservénënga, ndëmuanýenga Bëngbe Bëtsá tojáchembo chabe entšanga chašmotsemnama, chë nýe quem luarama enójuabnaye entšanguentšana luarénënga, Bëngbe Utabná Jesucristbioye tmojotšëmbonëngaftaca, Jesucristo nda yomna Bëngbe Utabná y chëngbe Utabná. <sup>3</sup> Atše sèntsaimpadana Bëngbe Bëtsá Bëngbe Taitá y Bëngbe Utabná Jesucristo, chaboma tšëngaftangbeñe tšabe bendicionënga chaotsemnama, y tšëngaftangbe ainaniñe tšabe ebionana chašmotsebomnama.

*Bëngbe Bëtsá Jesucristbeyeca tojama tšëngaftanga ba tšabe bendicionënga chašmotsebomnama*

<sup>4</sup> Bëngbe Bëtsá tšëngaftangbiamá sempre sëndbëtsatschuanaye, er tšëngaftanga cánýiñe mo canýacá Cristo Jesúseftaca šmómnayeca, Bëngbe Bëtsá tšëngaftangbeñe tojajuabó, tšëngaftangbe tšabiamá. <sup>5</sup> Chca Crísoftaca šmómnayeca, Bëngbe Bëtsá tojama tšëngaftanga chašmotsebomnama chábertšana nýetsca tšabe soyënga, tšëngaftanga obenana chašmotsebomnama cha jamëse, Bëngbe Bëtsabe soyëngama jóyebuambayama y chë soyëngama chacmësertama. <sup>6</sup> Chca, ntšamo chonjanabuayiynacá mo Jesucristbe ndegombre soyëngcá, tšëngaftángnaca ínýëngbioye tšabá šmojinýanyé ndegombre soyënga bëtsemnama, chë ntšamo jtšiyenama. <sup>7</sup> Y chca, Bëngbe Bëtsá chabe entšanga inétsatsatnaye tšabe soyënguentsana tondaye quecmochatabuáshebena, Bëngbe Utabná Jesucristo quem luarentše yochtonýna tescama Bëngbe Bëtsábeñe jtsošbuáchiyëse chašmojtšobátmanëntscuana. <sup>8</sup> Cha echanjama tšëngaftanga chábeñe corente chašmotsošbuáchemá y ainaniñe bëts añemo chašmotsebomnama, ndayá tšëngaftangaftaca jamama cha yojuabnacá chaojapochocantscuana; chca, chë Bëngbe Utabná Jesucristo nýetsca entšangbiamá tšabá o ndoñe tšabá tmonjamama yochjayana te, ndocná chaondobená jayanana tšëngaftanga ndoñe tšabá šmonjama ca. <sup>9</sup> Bëngbe Bëtsá nýets tempo jtšamana ntšamo tojašebuachenacá,

y cha endmëna nda tcmojánachembo cánjiñe mo canyáca chašmotsemnama chabe Uaquiñá Jesucristoftaca, Bëngbe Utabná.

*Choca ošbuachiyëngbeñe nyetscanga ndoñe cachcá montsanjuabná*

10 Jesucristbeyeca atšbe catšátanga, tša cbontsaimpadana, chë ndayá Bëngbe Utabná Jesucristo nyetsca bëngbiana yomnama, tšëngaftanga nyetscanga cachcá chašmotsejuabnama, y tšëngaftangbeñe ndoñe más báseftanga canye soye y ínÿenga inye soye chamuatsjuabná. Y aíñe šmochtsiyena mo canyáca, nyetscanga cachcá jtsejuabnayëse y cachcá jamama jtsebošëse. 11 Jesucristbeyeca atšbe catšátanga, atše chca sënjayana, er Cloebe yebnentšënga šmonjabëuenaye, tšëngaftangbeñe šmojtsepenzentserama. 12 Ntšamo sentsichamcá entsemna ndayá tšëngaftangbentšë báseftanga šmojtsechamo: “Atšë Páblëbe ustoná sëndmëna ca”; ínÿengna imojtsichamo: “Atšna Apólosbe ustoná sëndmëna ca”; ínÿenga: “Atšna Pédrëbe ustoná sëndmëna ca”, y ínÿengna: “Atšna Cristbe ustoná sëndmëna ca” imojtsichamo. 13 Chca šmojtseamama, jtsóbocanana mo cada básefta ošbuáchiyënga canye Cristo tmojtsebonmcá. ¿Pablo yojamna nda tmojancrucificá tšëngaftangbe tšabiana? ¿O tšëngaftanga uabáinënga šmomna, atšë jótšëmbonëse, tšëngaftanga atšbe ústonënga bétsemnama? 14 ¡Bëngbe Bëtsá sëndbëtsatschuanaye atšë ndocná tšëngaftanguentšá tijanábayama; nye Crispo y Gáybioye aíñe! 15 Chca, ndocná quenátobena jayanana, atšë jótšëmbonëse uabainá cha tojanoquedá ca, mo átšbeñe ošbuáchiyënga cuaftsemncá. 16 Estéfanasbe pamillentšëngnaca sënjanëbaye, pero ndoñe quetsatabouínÿna inya tijanábayama. 17 Er Cristo ndoñe chešnatanichmó ínÿenga jubáyama, ndayá chë chabe tšabe noticiëngama entšanga jábuayenama. Ndoñe chešnatanichmó chë soyënga jayanama, corente osertana entšangbe soyënga jtsichámëse; chca, entšanga Cristbeñe chamotsošbuáchema, ndoñe chë atšbe osertánanentšana palabrëngama, sinó nye chë buayenánama, Cristo cruzoca bëngbiana tojanóbanama.

*Cristbeñe yomna Bëngbe Bëtsabe obenana y osertánana*

18 Quem buayenánana, Cristo entšangbiana cruzoca tojanóbanama, chë pochocánënga jtsemnama tmojtsejnëngbiyoe jtsinÿanana mo ndoñe corente juabna bonnëngbe soyca; pero bëngbiana, chë Bëngbe Bëtsá nyetsca tescama šochjátsebacangbiamna, quem buayenánana jtsinÿanÿnayana Bëngbe Bëtsabe obenana. 19 Ntšamo Bëngbe Bëtsá chabe uabemana palabrënguiñe tojanayancá:

Atše chanjama chë tša osertánëngbe osertánana tondayama chaondëtsoservénama;

y chanjama chë ba soyëngama osertánëngbe osertánana tondayama chaondëtsámanama.

<sup>20</sup> ¿Ntsachetsá vojtsámama chë tša osertaná y chë puerte uatsjinýená tbojayana soyënga? ¿Ntsachetsá vojtsámama chë tša tšabá chë soyëngama juabnayá, morscá, y ínýengaftaca enatsëtsnaye ora chëngbe ayëñanayá tojayana soyënga? Ndegombre Bëngbe Bëtsá tojinýanýé, chë quem luarentša bëts osertánanaca tmojayana soyënga tondaye yonduámanama.

<sup>21</sup> Bëngbe Bëtsá, nýets osertánana bomná quetsomñecá y puerte tšabá jtsejuabnayëse, ndoñe tonjanalesenciá quem luarentša entsanga cha chamotsábuatmama, chë quem luar-entsënga tša osertánënga tmojánayana soyëngama. Chamna, cha tšabá tbojanínýnana chábeñe ošbuáchiyënga játsebacana chë bënga fsëndabuayiyná soyëngama, masque ínýengbioyna mo ndoñe corente juabna bomnabe soycá jtsinýanana.

<sup>22</sup> Judiënga tša jtsebošana y Bëngbe Bëtsábioye jtsotjanañana bëts soyënga chaomama, chabe obenana jinýanýiyama; y ndoñe judiëngna tša jtsenguayana chë puerte osertánëngbe soyënga jtsetatsëmbuama. <sup>23</sup> Pero bëngna Cristbiamna entsanga fsëndabuayiyná, chë ínýenga tmojancrucificabiamna. Quem buayenánana chë judiënga ndoñe tšabá ntjëuénanana. Y ndoñe judiënga mondbëtsejuabnaye chca yomna mo canýe ndoñe corente juabna bomnabe soycá ca; <sup>24</sup> pero bëngbiamna, nýetscanga Bëngbe Bëtsá chabe entsanga chamotsemnana šojáchembëngbiamna, masque judiënga o ndoñe judiënga, Crístbeñe endmëna nýets Bëngbe Bëtsabe obenana y osertánana; <sup>25</sup> er ndayá Bëngbe Bëtsá tojanmcá, Cristo cruzoca chaóbanama jalesénciase, banga jtsinýanana mo canýe ndoñe corente juabna bomnabe soycá, pero ndegombre endmëna canýe puerte más osertaná tojama soye, lempe ntšamo entsanga imotatsëmbuama. Y ndayá cha tojamcá masque bángbioye jtsinýanana mo canýe tondaye obenabe soycá, ndegombre chë soye jtsinýanýnayana Bëngbe Bëtsá puerte más obenana yobomnana, nýets obenana ntšamo entsanga imobomnana.

<sup>26</sup> Jesucrístbeyeca atšbe catšátanga, šmochtsejuabnaye ntšamo yojamnama, Bëngbe Bëtsá chabe entsanga chašmotsemnana tmojánachembo ora. Tšëngaftangbentše nýe báseftanga tša osertánënga šmojamna, ntšamo chë osertánana bomnënga imomnana entsanga mondbetsejuabnaycá; y báseftanga šmojamna becá mando atšetanënga o uámama pamillentsënga. <sup>27</sup> Pero Bëngbe Bëtsá, quem luarentše ndoñe tša osertánënga tojanabacacá, chca, cha jamama chë quem luarentša soyëngama tša osertánënga chamotsëuatjama;



y cha, quem luarentše ndobenënga tojanabacacá, chca, chë obenana bomnënga chamotsëuatjama. <sup>28</sup> Bëngbe Bëtsá quem luarentšana tojanbocacá ndayá tondaye yonduamancá y ndayá ínÿenga imuabotencá; tojanbocacá ndayá tondaye yonduamancá, chca, ndayá quem luarentše tša iuamancá tondaye chaondëtsámanama. <sup>29</sup> Y chca, Bëngbe Bëtsabe delante ndocná quenátobena jayanana tša bëtsá cha yomna ca. <sup>30</sup> Bëngbe Bëtsá tojama bënga Crístoftaca cánÿiñe mo canÿacá jtsemnëse chamotsiyenama, y chábeyeca tojama bënga chamóyëngacñama chabe osertánana bomna soyënga; chábeyeca tojama bënga tšábenga chabe bominiñe chamotsemnana, chabe entšanga jtsemnana chamobenama, puerte tšábenga cach Bëngbe Bëtsacá, y atsebácanënga chamotsemnana. <sup>31</sup> Y chca, ntšamo Bëngbe Bëtsabe uabemana palabrénguiñe endayancá: “Nda tojtseboše jayanama cha canÿe uamaná yomna ca, chamna más tšabá cha bontsemna jayanama Bëngbe Utabná puerte uamaná yomna ca.”

## 2

*Ntšamo Pablo Cristo crucificanábiana chënga tojanabuayená*

<sup>1</sup> Pero, Jesucristbeyeca atšbe catsátanga, Bëngbe Bëtsabe ndegombre soyëngama tšëngaftanga jábuayenama sënjána ora, chca sënjanma ndoñe chë uámanëngbe palabréngaca, ni chë tša osertánëngbe palabréngaca. <sup>2</sup> Y tšëngaftangaftaca sënjamna ora, ndoñe quetstétseboše nÿe ndayíñnaca jatsjuabnayana, ndayá nÿe Jesucristbeñe, nda bëngbe tšabiana tmojanrucificá. <sup>3</sup> Atše tšëngaftangbeñe sënjamna, mo canÿa ba soyënga jamama ndobenacá, y mo canÿa puerte auatjacá y tbojtsengmëmncá, chabe trabajo jamama ndoñe jobenayama juabnaye causa. <sup>4</sup> Ntšamo cbonjanëtsësná y cbonjanabuayiynacá atše sënjanoyebuambá ndoñe chë tša osertánëngbe palabréngaca, tšëngaftanga jáyënjanama chiñe chašmotsošbuáchema; pero aiñe tcbonjanayëñaná, Bëngbe Bëtsabe Espíritu y chabe obenana tšëngaftanga jinÿanÿiyëse, <sup>5</sup> chca, tšëngaftanga Bëngbe Bëtsábeñe chašmotsošbuáchema, ndoñe nÿe entšangbe osertánanaca, sinó Bëngbe Bëtsabe obenanama.

*Uámana Espíritbeyeca, Bëngbe Bëtsá jamana entšanga cha chamotsábuatmama*

<sup>6</sup> Pero, chë ya tmojashjáchënga Bëngbe Bëtsábeñe puerte jtsošbuáchiyama y chabe soyëngama corente jtsosertánama, chëngbeñe bënga fchandóyebuambaye becá osertánana bomna soyënga. Pero ndoñe quenátsmëna quem luarentša entšanga quem tempo mondbëtsichamo soyënga, ni mora quem

luarentše amëndayëngbe soyënga, ndëmuanÿenga ndoñe bën y ndocna obenana bomnënga mochanjëftsoquëda. <sup>7</sup> Y aïñe, chë bënga fsëndoyebuambná osertánana bomna soyënga endmëna chë Bëngbe Bëtsá quem luarentša entsángbioye baytentscuana ndoñe tonjaninÿanyé soyënga, y chca, entsanga baytentscuana chë soyënga ndoñe tmonjanábuatmana. Cha yojanjuabná chë soyënga chca yochtsanmënana, quem luare cabá cha ndëma ora, y yojanjuabná, chë soyëngaca bënga mochtsanobena puerte bëtsësanga y uámanënga jtsemnana, cháftaca chë nÿetsca tescama yomna tsabe vida jtsebomnana. <sup>8</sup> Quem Bëngbe Bëtsabe puerte osertánana bomna soyënga endmëna canÿe soye ndayá quem luarentša amëndayënga ndoñe ntsësertánana, er chënga aïñe matënjanësértase, Bëngbe Utabnábioye chënga ndoñe matmënjancrucificá, Bëngbe Utabnánda puerte bëtsá y uamaná yomna. <sup>9</sup> Bëngbe Bëtsabe uabemana palabrënguiñe quem Bëngbe Bëtsabe puerte osertánana bomna soyëngama mëntsá endayana:

Cha imobobonshánëngbiana Bëngbe Bëtsá tojaprontá soyënga, ndocná tonjinÿe, ni tonjouena y ni mo tonjajuabó ca.

<sup>10</sup> Pero Bëngbe Bëtsá quem soyënga chabe Espíritoftaca bënga šojanÿanyé, er chë Espíritu lempe jtsetatsëmbuana, chë Bëngbe Bëtsabe soyëngama puerte totcá josértama yomna soyëngámna.

<sup>11</sup> Entsángbeñe ndocná quenátobena jtsetatsëmbuana ndayá entsabe ainaniñe tomnana, sinó nÿe chë entsabe espíritu, chë chábeñe yomná. Cachcá, nÿe Bëngbe Bëtsabe Espíritu jtsetatsëmbuana ndayá Bëngbe Bëtsá tojuabnacá. <sup>12</sup> Y bëngna, Bëngbe Bëtsábiocana Espíritu tmojóyëngacñe, ndoñe canÿe quem luarentša espíritu, chca, bënga chašosertama chë Bëngbe Bëtsá tojama bënga chamotsebomna soyëngama, bëngbe tsabiama cha jtsejuabnayëse. <sup>13</sup> Bënga chë soyëngama fsëndoyebuambná, ndoñe chë quem luarentša entsángbentsana tifjuatsjinÿe osertánana bomna palabrëngaca, sinó chë Bëngbe Bëtsabe Espíritu šojabuatambá palabrëngaca. Chca, Bëngbe Bëtsábiocana soyëngama bënga fsëndabuayiná, Bëngbe Bëtsabe Espíritbentsana yóbocana palabrëngaca, chë Uámana Espíritu ainaniñe imobomnëngbioye.

<sup>14</sup> Bëngbe Bëtsabe Espíritu ndoñe tondbomná, chabe ainaniñe ndoñe ntjóyëngacñana chë Bëngbe Bëtsabe Espíritbiocana yóbocana soyënga, er chë entsabiama chë soyënga jtsemnana mo canÿe ndoñe corente juabna bomnabe soyëngcá, y chabosertama cach ndoñe ntsobenana. Chca endmëna, er entsá jobenayana quem soyëngama jtsetatsëmbuama y josértama, nÿe chabe ainaniñe chë Uámana

Espíritu tbojtsájabuachanëse. <sup>15</sup> Pero nda aïñe chë Espiritu tbojtsebomna jtsobenana nyetsca soyënga tšabá jinÿama chabosertama, y ndocná chë Espiritu ndoñe tbondbomná ntsoebenana josértana ntšamo chë Espiritu bomná yomnama. <sup>16</sup> Er Bëngbe Bëtsabe uabemana palabrenguiñe mëntšá endayana: “Ndocná quenátabuatma Bëngbe Utabnabe juabna, chábioye jabaútëmbama chaotsobenama ca.” Pero bënga, chë ošbuáchiyënga, mondobena jajuaboyana ntšamo Cristo jojuabnacá.

### 3

#### *Jatrabájama enutanánënga Bëngbe Bëtsá jasérviamá*

<sup>1</sup> Pero, Jesucristbeyeca atšbe catšátanga, atše ndoñe chiyatanobená jóyebuambayama, mo tšëngaftanga chë Uámana Espíritoftaca mandánënga šmojatsmëncá, sinó nye cachënga tšabá jtsomñama juabnënga bomna entšangbioycá, mo basetemëngbioycá, Cristbe soyëngama josértama ndobenënga. <sup>2</sup> Mo canÿe bebmacá, chabe basetémbioye nye létsiye jafšiyana y paselo jabmuánama sananga, chë básetema chcana jasama cabá ndoñe ntsoebenana causa, cachcá, atše cbonjanabuatambá Bëngbe Bëtsabiamá nye chë más paselo josértama soyëngama, y ndoñe inÿe soyënga más totcá josértama soyënga, er tšëngaftanga ndoñe quešmënjatobena chca soyëngama josértana. Y ni mora, tšëngaftanga quešmátobena Bëngbe Bëtsabe soyëngama josértana, chë josértama más totcá yomna soyëngama; <sup>3</sup> er tšëngaftanga cabá šmojtsama, nye ntšamo cach tšëngaftanga tšabá jtsomñama tšëngaftangbe juabnënga yomncá. Y tšëngaftanga inÿengaftaca cabá yapa šmojtsenántšaboše y nye inÿengbioye jayënjanama soyënga šmojtsamëntscuana, tšëngaftanga šmojtsama nye ntšamo cach tšëngaftanga tšabá jtsomñama tšëngaftangbe juabnënga yomncá, y chca, tšëngaftanga šmojtsiyena mo chë nye quem luarama enójuabnaye entšangcá. <sup>4</sup> Er canÿa: “Atše Páblëbe ustoná sëndmëna ca”, y inÿana: “Atše Apólosbe ustoná sëndmëna ca” tojayana ora, chca jtsamana mo chë nye quem luarama enójuabnaye entšangcá.

<sup>5</sup> Tšëngaftanga chca šmojamama, atše šontsemna tšëngaftanga játjayana: ¿Ndayá Apolos yomna? ¿Ndayá Pablo? Chatna co nye Bëngbe Bëtsábioye oservénata bondmëna, ndátbeyeca tšëngaftanga Jesucristbeñe šmojtsošbuaché, y bëndata cada ona fsënjama chë Bëngbe Bëtsá šojanÿanyé trabajo. <sup>6</sup> Atšna, mo nda jajañe jénaye cuafjuatbontsacá, tšëngaftangbeñe sënjanbojatsé chë trabajo, Bëngbe Bëtsabe soyëngama jábuayenama; y Apolos, mo nda chë jajañe matënguiñe bëjaye cuaftsebuešcñacá, enjantrabája cach atše

sënjanbojatsé chiñe; pero Bëngbe Bëtsá, ntšamo matatémënga chauájuama endbetsamcá, tojama banga tsëngaftanguentšë Jesucristbeñe chamotsošbuáchema. <sup>7</sup> Ntšamo, chë jená y chë matënguñe bėjaye buešcñayá ndoñe yapa ntsámanana chiñe shajuanënga chaóboचना, nýe Bëngbe Bëtsá aíñe, cachcá, nda Bëngbe Bëtsabiama entšanga jábuayenama trabajo tojabojatsé y nda chentšana tojášhango cach trabajuiñe jóntšama, ndoñe ntjamana entšanga Jesucristbeñe chamotsošbuáchema; nýe Bëngbe Bëtsá chca jamana. <sup>8</sup> Chë jená y chë matiñe bėjaye buešcñayá cach trabajuiñe jtsentšënana, y chatna mo trabajayatcá jtsámanana; y cada ona juácanana ntšamo chabe trabajo tomncá.

<sup>9</sup> Bëndata fsëndmëna trabájayata Bëngbe Bëtsabiama oservéniñe, y tsëngaftanga šmondmëna mo Bëngbe Bëtsabe jajañcá, ndayentšë cha yojtseboše tsabe jaja saná chaóboचना, y šmondmëna mo chë cha yojtsejebuana bëtš yebncá. <sup>10</sup> Er Bëngbe Bëtsá atšbe tsabiama jtsejuabñayëse, chë trabajo šojabonýé, y atšë mo canýe puerte tsabe jebuanacá, canýe yebna ndayiñe chaotsëcuatjonama tojapormacá, sënjanbojatsé chë trabajo, Bëngbe Bëtsabe soyëngama tsëngaftangbeñe jábuayenama. Chentšana inýa, mo chë inýe yebna jebuaná tojabojatsé jajebuama chiñe más jatsjebuama nda tojatontšecá, cach atšë sënjanbojatsé trabajuiñe tojanontšé. Pero cada ona botamana chaotsantješna ntšamo chë trabajo yojtsamama. <sup>11</sup> Mo chë cánýabentšana inýe trabajayacá, ndoñe ntsobenana chë yebna jajebuama tojanbojatsé cha chë yebna chaotsëcuatjonama tojanpormañe inýe soye cachcá chaoservema jatspórmana, cachcá, ndocná chaondëtsabatambá inýe soyënga, nýe ntšamo Jesucristbe soyënga yomncá aíñe, chë ntšamo atšë natsana sënjanabatambacá. <sup>12</sup> Chë Jesucristbiama más uámana soyënga buatëmbayá jtsemnana mo chë castellano, midio y inýe uámana soyëngaca yebna jebuanacá; y chë Jesucristbiama nýe nduámana soyënga buatëmbayana mo chë niñëbenga, butšajëshä y tëshenjñësheca yebna jebuanacá. <sup>13</sup> Y Cristo chaojésabo te, Bëngbe Bëtsá echanjññanýiye ntšamo cada cánýabe trabajo yomnana. Cha chë te iñësheca chca echanjññanýiye, y chë iñësheca, Bëngbe Bëtsá echanjinýe y echanjññanýiye ndaye trabajo cada ona tojamama. <sup>14</sup> Ntšamo cada cánýabe trabajo yojtsámanama jtsetatšëmbuama Bëngbe Bëtsá chaojinýe ora, cha chabe trabajo aíñe yojtsámana ca queojayanëse, chë tsabe trabajayá Bëngbe Bëtsábiocana canýe uacanana soye echanjóyëngacñe, er cha jtsemnana mo canýe entšacá, nda canýe yebna tojtsejebuana jtsejuinýama ndoñe paselo tondmëna soyëngaca. <sup>15</sup> Pero chë te cánýabe trabajo

nÿe batšá yoÿtsámanama Bëngbe Bëtsá ññesheca chaojinÿanyese, chora chabe trabajo echántsemna mo chë jtsejuinÿama paselo tomna soyëngaca jebuanabe soyëngcá, chentšana nÿets yebna jtsejuinÿana. Chë jebuaná jtsachana, pero chabe trabajo lempe jobuétsana. Cachcá, chë Bëngbe Bëtsabiamama trabajo toÿtsamá, nÿe batšá oservena trabajo, cha echanjobenaye atsboaná jtsemnama, masque lempe ntšamo tojamcá tondaye queochaisoquéda.

<sup>16</sup> ¿O tšëngaftanga ndoñe šmondétatsëmbo nÿetscanga cánÿiñe Jesucristbeñe ošbuachiyëngcá, mo chë Bëngbe Bëtsabe bëts yebncá šmomnana, y tšëngaftanguentše Bëngbe Bëtsabe Espíritu yomnana? <sup>17</sup> Nderado nda tojama, tšëngaftanga nÿetscanga cánÿiñe Jesucristbeñe ošbuachiyëngcá jtsemnana chaotsopochocama, Bëngbe Bëtsá chábioye bochantsepochoáca, er chë Jesucristbeñe ošbuachiyëngcá cánÿiñe imomnënga, jtsemnana mo chë Bëngbe Bëtsabe bëts yebncá, chabe entšanga nÿe chábioye jaserviama; y tšëngaftanga chca šmondmëna.

<sup>18</sup> Ndocná cachá chaondëtsenoíngña. Nderado nda tšëngaftanguentšá toÿtsejuabná cha tša osertaná yomna ca, ntšamo quem luarentša entšanga mondbétsejuabnaye ntšamo canÿe puerte osertaná inétsemnana, cha bontsemna jóbemama mo canÿa ndabiamama quem luarentša entšanga chamuayana cha corente juabna ndbomná yomna ca, chca, ndegombre corente osertaná jtsemnama chaobenama. <sup>19</sup> Er chë quem luarentša entšanga tša osertánënga imotátšëmbo soyënga, Bëngbe Bëtsabe bominÿiñe yomna mo chë corente juabna ndbomnabe soycá. Bëngbe Bëtsabe uabemana palabrenguiñe mëntsá endayana: “Bëngbe Bëtsá chë tša osertánënga jáyënjanana, ndayá cachënga ínÿenga jáingñama tša osertánánaca tmoÿtsama soyëngaca ca.” <sup>20</sup> Y mëntsánaca endayana: “Bëngbe Utabná endétatsëmbo chë tša osertánëngbe juabnënga tondayama yondoservénama ca.” <sup>21</sup> Chíyeca, ndocná chaondëtsichamo corente uamaná yomna ca, ndaye entšabe ustoná tomnana, er lempe ntšamo šmobomncá, Crístbeñe ošbuachiyënga bétsemnana, tšëngaftangbe tšabiamama endmëna, y nÿetscanga chë tcojujubuachëngnaca cachcá. <sup>22</sup> Lempe tšëngaftangbe soye endëtsomñe: ndayá Páblëbeyeca yomncá, Apólosbeyeca, Pédrëbeyeca, ndayá quem luarentše yomncá, ndayá yomncá ainá tcoÿtsemna ora, tcojóbana ora, ndayá mora yomncá y chë más chcoye yochtsemncánaca. <sup>23</sup> Y tšëngaftanga Crístbënga šmondmëna, y Cristna Bëngbe Bëtsábia.

### *Jesucristbe ichmónëngbe trabajo*

<sup>1</sup> Entšanga entsamna bëngbiana jtsejuabnayana bënga fstsemna Cristbe uajabuáchanënga y Bëngbe Bëtsabe soyëngama jtsabuátambayama trabajo bomnënga, chë Bëngbe Bëtsá baytentscuana entšángbioye ndoñe tonjaninÿanÿé, pero mora aíñe tojinÿanÿé soyënga jtsabuátambayama trabajo bomnënga.

<sup>2</sup> Chca, nda canÿe trabajo tojtsebojanÿabiamna, chabe mandayá jtsobátmanana cha aíñe tšabe palabra bomná chaotsemnama. <sup>3</sup> Atšbe bariëna, tondaye quenatámana, ntšamo tijamcá šmojinÿe y ndoñe tšabá tijama ca šmojayanëse, o inÿe entšanga cachcá tmojayanëse mo canÿe tribunaliñcá. Ni cach atše ndoñe chca quetsátama, jtsetatšëmbuana ntšamo atšbe trabajuama tijayancá ndegombre tajojtsemnama. <sup>4</sup> Atšbe ainaniñe ndocna juabna quetsátsbomna atše chašuyanama bacna soye tijama ca, pero chca ndoñe quenátayana, ndegombre Bëngbe Bëtsabe delante ndocna bacna soye ndbomná atše stsemna ca. Er Bëngbe Utabná endmëna nda atšbe trabajo yonÿá y nda ndegombre yobena jayanama atše tšabá o ndoñe tšabá tijamama. <sup>5</sup> Chíyeca, tšëngaftanga ndoñe quecmátamna jinÿana y jayanana ínÿenga ndoñe tšabá tmonjama ca, chë nÿa chama tempo cabá ndóshjanguëntscuana, Bëngbe Utabná chama chaojésabo ora. Cha chaojésabo ora, puerte tšabá echanjínÿanÿiye chë iytëmencá yomna soyëngama, mo ibetiñe cuaftsemncá, y botamana echanjínÿanÿiye, mo binÿniñcá, ndayá jamama nÿe chëngbe ainanoca entšanga tmojajuabocá. Y chora Bëngbe Bëtsá cada entšabiana echanjayana tšabe soyënga, ntšamo tbojtsomerecencá.

<sup>6</sup> Jesucristbeyeca atšbe catšátanga, chë soyëngama tšabá jábuayenamna, atše sënjama ntšamo Apolos y atše tifjatrabájama botamana chašminÿama, y chca sënjama tšëngaftangbe tšabiana, ntšamo bëndata tifjamentšana chašmuatsjínÿama jtsiyenana nÿe ntšamo Bëngbe Bëtsabe uabemana palabrënguiñe iuayancá, y ndocná tšëngaftanguentsá canÿe entšabiana chaotsenábotamnaye, y ínÿabiana ndoñe tšabá chauátoyebuambnama. <sup>7</sup> Er, ¿nda chë ínÿengbiana más uámanënga tšëngaftanga cmojtsabiamná? ¿Y ndayá šmobomna, Bëngbe Bëtsá ndoñe tmonjatsatá soye? Y tšëngaftanga chca chašmotsebomnama cha tojanmëse, ¿ndáyeca šmojtsenabotamná mo Bëngbe Bëtsabe tšetana soyënga ndoñe tontsemncá, y nÿe cach tšëngaftangbeyeca šmojonÿencá?

<sup>8</sup> Tšëngaftanga šmojtsejuabná ya lempe ntšamo cmëjabotcá Bëngbe Bëtsábiocana šmojtsebomna ca, y lempe ntšamo jtsebošama šmojtsobencánaca ca. Mo reyënga cuaftsemnëngcá cmojtsabiona, bëngbentsana tondaye

ntsëjabotcá. Malaye tšëngaftanga mo reyëngcá šmojtsemna, Crístoffaca cánÿiñe jtsemándayëse; chca, bëngnaca tšëngaftangaftaca jtsemnama, cánÿiñe jtsemándayëse. <sup>9</sup> Atše šontsinÿana, bënga chë Cristbe ichmónënga Bëngbe Bëtsá šojábiana mo chë nÿetscangbiana más nduamanëngcá, mo chë jóbanama yojtšamna entšangcá. Nÿetscanga chë Bëngbe Bëtsá tojábiamënga bëngbioye jtsëñÿayana mo ndoñe cachca entšanga fstsemncá; angelënga y entšágnaca cachca bëngaftaca montsama. <sup>10</sup> Bënga, Cristbiana oservena causa, quem luarentša entšangbiana fsëntsinÿna mo corente juabna ndbomnëngcá; chë cuenta, tšëngaftanga šmojtsejuabná Cristbe soyëngama corente osertánënga šmomna ca. Bënga fsëndmëna chë entšangbe bominiñe ndocna obenana ndbomnënga; y tšëngaftangna šmojtsejuabná puerte obenana bomnënga šmomna ca. Tšëngaftangbioye inÿenga puerte uámanënga y bëtsëtsanga jtsabiamnayana, pero chënga bëngbioye jtsëbuayënjana. <sup>11</sup> Y mëntscoñama, bënga šontsabuashebebiana saná, ndayá jofsiyama y entšayá. Entšanga bëngbioye bacá jtsaborlánana, y tondaye yebna queftsátsbomna. <sup>12</sup> Y bënga puerte jabuache fsëndëtrabája cach bëngbe cucuatšëngaca. Entšanga šojóyanguango ora, Bëngbe Bëtsá fchandbëtseimpadana cha chaoma chënga tšabe bendicionënga chamotsebomnama. Bënga chamosufrima inÿenga tmojtsama ora, bënga chë soye fchandbëtsoboyaye. <sup>13</sup> Inÿenga bëngbiana bacá tmojtsoyebuambná ora, jtsababuánÿeshanëse fsënduamana jtëjuana. Quem luarentša entšangbe bominiñe bënga jtsemnana chë puerte nduámanënga, mo chë quem luarentša basurëshëngcá, chë quem luarentša entšanga tondayama ndoservënënga, mo chë quem luarentša tsengacá; y chca endmëna mëntscoñama.

<sup>14</sup> Quem soyënga ndoñe quecbatëbuabiamná tšëngaftanga chašmotsëuatjama, sinó ndayá jábuayenama mo cach atšbe basëngbioycá, atšbe bonshánënga. <sup>15</sup> Er masque tšëngaftanga mallajta abuátambayënga chašmotsóbomñe, jacúntama ntjobenaycá, Cristbiana chacmotsabuátambama, ndoñe banga quešmátabamna tšëngaftangbiana mo taitangcá, Cristo Jesúsbeñe jtšošbuáchiyama tcmojanëjabuachama. Nÿe atše sëndmëna mo taitacá tšëngaftangbiana, mo ošbuachiyëngcá, er atše natsana tcbonjanabuayená chë tšabe noticiënga Jesucristbiana, y tšëngaftanga chiñe šmontsanošbuaché. <sup>16</sup> Chíyecna, cbontsaimpadana ntšamo atše tijamcá chašmotsamama.

<sup>17</sup> Chama Timoteo tšëngaftangbioye sëntsichamná, atšbe bonshaná, canÿe aiñe tšabe palabra bomná;

Bëngbe Utabnábeñe tojanošbuachéyeca, atše Cristbiamá sënjanbuayiyiná ora, mo atšbe uaquiñacánaca cha endmëna, ntšamo chabe ošbuáchiyana yomnama. Cha echanjama tšëngaftanga chašmuatenójuaboma ntšamo atše tšëngaftangbeñe tsjoyenama, Crístbeñe ošbuachiyacá, ndayama atše nyets tempo ošbuáchiyënga sëndbetsabatambaycá nyets luare ošbuáchiyënga enefjuanenache. <sup>18</sup> Tšëngaftanguentše báseftanga ya šmojatsjuabná puerte uámanënga šmojtsemna ca, er šmojtsejuabná atše stsauatja tšëngaftangbioye jama jányama ca. <sup>19</sup> Pero Bëngbe Bëtsá chašojalesenciase, sentsobátmana betscó tšëngaftangbioye jama jányama. As chjinýe ntsache obenana imobomna chë Bëngbe Bëtsabe entsangcá jtsiyenama tša uámanënga imomna ca juabnayënga, y ndoñe nye ntšamo jayanama imobencá. <sup>20</sup> Er Bëngbe Bëtsá canýe ošbuachiyabe ainaniñe tojtsemánda ora, chca jtsinýnana ndoñe nye ntšamo tojtsichámuama, ndayá Bëngbe Bëtsabe obenana chábeñe tojtsemnama. <sup>21</sup> ¿Tšëngaftanga ndayá más šmattseboše: atše chayá tšëngaftangbioye jaucácanama, o chayá tšëngaftangbioye jányama puerte bonshanánaca y ntsetšatjaycá tšëngaftanga jauyanama?

## 5

*Ndayá cuanjama canýe boyabása shembásaftaca bacna soye amáftaca*

<sup>1</sup> Ndegombre nyets luariñe entsótatšëmbo tšëngaftanguentše yojtsemna canýa, shembásaftaca bacna soye amá, y ntšamo cha yojtsamcá puerte bacna soye yojtsemna; ni chë Bëngbe Bëtsábioye nduabuátmënga chca ntsamana: canýe entsá cachabe mamamnáftaca bacna soye yojtsama. <sup>2</sup> Y tšëngaftanga cabá šmojatsjuabná corente tšábënga šmomna ca, masque chca tšëngaftangbeñe yojtsopasánëse. Tšëngaftanga cmontsamna puerte ngménaca jtsemnana, tša uabouana soye cha yojtsama causa. Canýe entsá chca tojamáftacna, tšëngaftanga cmontsamna jamana cha ndoñe más tšëngaftangaftaca chaondenútanama mo ošbuachiyacá. <sup>3</sup> Y atšna, masque tšëngaftangaftaca choca ndoñe quetsásmëna, atšbe juabna choca tšëngaftangaftaca entsemna; y chca atšbe espíritoca sëntsemnayeca, Bëngbe Utabná šojëftsanatšetá mándoca, sënjajuabó y sëntsetatšëmbo ntšamo tšëngaftanga cmojtsamnana, chë entsá chca tojamáftaca. <sup>4</sup> Tšëngaftanga chašmojénefná ora, chentše atšbe espíritoca tšëngaftangaftaca atše chántsemna, y atšbe espíritu chentše echántsemna Bëngbe Utabná Jesusbe obenánaca. <sup>5</sup> Y chora tšëngaftanga cmontsamna



jamándana chë entsá ya ndoñe más tšëngaftangaftaca mo ošbuachiyacá chaondenútanama, mo Satanasbe cucuatšíñe cha cuafjaboshjónca, chca, chë quem entsá nýe cachá tšabá jtsomñama juabnënga chaotsopochocama, y chca, Bëngbe Utabná cachiñe chaojésabo ora, chabe espíritu atsbočaná chaotsemnana.

<sup>6</sup> Tšëngaftanga šmojtsejuabná puerte tšábenga y uámanënga šmomna ca, pero šmojtseleséncia canýa tšëngaftanguentše chca chaotsamama. Chca ndoñe tšabá quenátsmëna. Tšëngaftanga ya šmondétatšëmbo, ntšamo chë nýe batšá levadura endbama, nýets arninýá chauábochema; cachcá, tšëngaftanguentše canýa tša bacna soye chca tojama ora, nýetscangbiana ndoñe tšabe soyënga jóbocnana. <sup>7</sup> Chýeca, tšëngaftanga cmontsamna, chca uabouana bacna soye tojamá jtabocnana, cha ya ndoñe más tšëngaftangaftaca mo ošbuachiyacá chaondenútanama; y chora tšëngaftanga šmochántsemna mo tsëm arninýacá, ndocna levadúraca, chë bacna juabnëngaca ya ndëmandánënga šmojtsémnayeca. Ndegombre tšëngaftanga chca šmondmëna, er Bëngbe Bëtsá tojama tšëngaftanga tsëm vida chašmotsebomnana. Bashco fiesta ora, oveshá tmojanóba, Israeloca entsanga perdonánënga chamotsemnana. Cachcá Cristo, mo chë oveshacá, tojanóbana bacna soyënguentshana bënga játsebacama. <sup>8</sup> Ntšamo chë judiënga chë fiesta ora mondbamcá, nýets levadura ojamnana cachcá jonýayana, cachcá, bënga šontsamna jtsajbanana oyenana bacna soyënga ínýengbiana jamama jtsebošëse, y ndaye bacna soye jtsamëse, ntšamo tempo imojanamcá. Ntšamo chë judiënga chë fiestiñe nýe levadúraca ndëpormana tandëse mondbetsesaycá, cachcá, bënga šontsamna jtsiyenana nýetsca soyënga ainaniñe ndocna bacna juábnaca jtsamëse, y ndegombre yomncá jtsóyebuambnayëse y jtsamëse.

<sup>9</sup> Chë inýe atšbe tsbuanáchañe tcbonjáuyana, chë boyabása o shembásaftaca bacna soye amëngaftaca tondayama chašmondëtsencuénta ca. <sup>10</sup> Y chca ndoñe quetstétseboše jáuyanana nýa tondayama chašmondëtsoyebuambná nýetsca chë quem luarentšënga boyabása o shembásaftaca bacna soye amëngaftaca, chë nýe cachëngbiana bëtscá soyënga jtsebomnana tša bošëngaftaca y atbëbanëngaftaca, y chë cachëngbe pormana soyënga diosënga yomnama jtsejuabnayëse adorayëngaftaca ca; er nýa chca jamamna, tšëngaftanga cmattsamna quem luarentšana jëftsebocanana. <sup>11</sup> Ntšamo chora sënjanayancá endmëna ndayá tondayama ntsencuéntayana, chë Crístbeñe ošbuachiyá yomna ca tojayanáftaca, y boyabása o shembásaftaca bacna soye

tojtsama, o nda nÿe cachabiama bÿetscá soyÿenga jtsebomnama tša tojtseboše, o chÿe cachabe pormana soyÿenga diosÿenga yomnama jtsejuabnayÿese tojtsadorana, o yapa tojtsayatsená, o yapa tojtsetmó, o tojtsatbÿebana. Chca entsángaftacna, ni mo šmuatjót bema chÿengaftaca cánÿiñe jasama. <sup>12-13</sup> Atše ndoñe quešnát smÿena jayanana chÿe ndošbuáchiyÿenga, chÿe bÿengaftaca ndoñe mondbÿenutananga, aíñe o ndoñe tšabá tmonjamama. Bÿengbe Bÿetsá echántsemna nda chÿengbiama yochjayana ntšamo tmojamcá tšabá o ndoñe tšabá bÿetsemnama, tšÿengaftanga ndoñe. Ndegombre nÿe chÿe ošbuáchiyÿenga tšÿengaftangaftaca imnÿenutanangbiama cmontsamna chca jayanana. Chcasna, šmochjama ntšamo Bÿengbe Bÿetsabe uabemana palabrenguiñe endayancá: “Tšÿengaftanga cmontsamna, chca bacna soye amá tšÿengaftangbentsana jtabocnana ca.”

## 6

### *Ošbuáchiyÿenga jendemánda tojtsemna ora*

<sup>1</sup> Canÿe tšÿengaftanguentša ošbuachiyá inÿe ošbuachiyabiama canÿe demanda tojtsebomna ora, ¿cha nanjá chÿe ndošbuáchiyÿenga mandadÿengbioye chÿe soye chamojandmanama? ¿Ndáyeca chca nanjama, y ndoñe chÿe Bÿengbe Bÿetsabe entsángbioye nanjá chabe demanda chamouenama? <sup>2</sup> Tšÿengaftanga ndegombre šmondétatšÿembo, Bÿengbe Bÿetsabe entsanga mochjayanama quem luarentša entsangbiama tšabá o ndoñe tšabá tmonjamama. Y chÿenga quem luarentša entsangbiama chca jayanama tmojtsobenÿe, ¿ndoñe montsobena más base soyÿengama chca jayanama? <sup>3</sup> Tšÿengaftanga ndegombre šmondétatšÿembo chÿe angelÿengbiámnaca tšabá o ndoñe tšabá tmonjamama bÿenga mochjayanama. Chcasna, bÿenga más jtso benana chÿe quem luarentše jÿÿtsiyenama soyÿengama chca játayanana. <sup>4</sup> Y chcase, tšÿengaftangbeñe chca demandÿenga chÿe quem luarentše jÿÿtsiyenama soyÿengama tojtsemna ora, ¿ndáyeca šmatjátÿebuayana chÿe ošbuáchiyÿengbiama tondaye tmontsámama entsanga, chÿe soyÿenga chamojandmanama? <sup>5</sup> Chca sÿenjayana tšÿengaftanga chašmotsÿuatjama: ¿O tšÿengaftanguentše ni mo canÿa yondmÿena corente osertaná, ošbuachiyÿengbeñe demandÿenga chaojandmanama? <sup>6</sup> Pero ndoñe chca: ošbuachiyÿengbeñe demandÿenga tojtsemna ora, mandadÿengbioye jana chÿe soyÿenga chamojandmanama. Y chca jamana ndošbuáchiyÿenga mandadÿengaftaca.

<sup>7</sup> Y tšÿengaftangbeñe nÿe demandÿenga jájandmanama tojtsemna ora, tšÿengaftangbiama ya canÿe puerte bacna soye jtsemnana. ¿Ndáyeca ndoñe šmattsóboyaye inÿyenga bacá cmotjsaborlana ora? ¿Ndáyeca ndoñe cachcá šmatjonÿyaye inÿyenga

cmojtsabiatbëbana ora? <sup>8</sup> Pero cach tšëngaftangaftacna inÿetšá copasana, ínÿengbioye bacá jtsaborlánana y jtsabiatbëbanana, y tšëngaftangcá Cristbeñe ošbuachiyëngbioynaca.

<sup>9</sup> ¿Tšëngaftanga ndoñe šmondétatšëmbo, chë bacna soye amënga Bëngbe Bëtsabe amëndayoye ndoñe mochanjámashënguama? Ndoñe matenoíngñana. Ni chë boyabása o shembásaftaca bacna soye amënga, ni chë cachëngbe pormana soyënga diosënga yomna ca jtsejuabnayëse adórayënga, ni cachëngbe boyá o shema ínÿaftaca íngñayënga, ni chë boyabásenga mo shembasengcá jtsinÿnama bošënga, ni chë boyabásenga inÿe boyabásengaftaca bacna soye amënga, <sup>10</sup> ni chë atbëbanënga, ni chë nÿe cachëngbiama bëtscá soyënga jtsebomnama tša bošënga, ni chë tša tmoyënga, ni chë uayátšenayënga, ni chë ínÿengbiama bacna soye jtsamëse innétsatbëbanënga, chënga nÿetscanga ndoñe quemochatobenaye Bëngbe Bëtsabe amëndayoye jamashjnama. <sup>11</sup> Y tempo báseftanga tšëngaftanguentšënga chca šmojamna, pero Bëngbe Bëtsá tšëngaftangbe bacna soyëngama tcmojaperdoná, y chca entsemna mo bebënënga cuaftsemncá; cha tojama tšëngaftanga chabe entšanga chašmotsemnama, nÿe cha chašmotseservénama, y tojama tšëngaftanga mo tšabengcá chabe bominjÿiñe chašmotsemnama. Lempe chca Bëngbe Bëtsá, tojama ndayá Bëngbe Utabná Jesucristo tojanmama y ndayá Bëngbe Bëtsabe Espíritu tojamama.

*Bëngbe cuerpo chaotsemna Bëngbe Utabná jtseservénama*

<sup>12</sup> Mondbétsichamo: “Atšbiama entselesenciana ndayánaca jamama, ndayama Bëngbe Bëtsá ndocá tonjayana ca.” Pero básefta soyënga jtsamana ndoñe atšbe tšabiama ntsemnana. “Atšbiama entselesenciana ndayánaca jamama ca”, pero ndoñe quichatsleséncia ndaye sóyecnaca nÿets tempo mandaná jatsmënana. <sup>13</sup> Mëntšánaca mondbétsichamo: “Saná uafsbiana y uafsbíá saná chaóyëngacñama ca.” Pero Bëngbe Bëtsá canÿe te echanjama chë uta soye chaotsopochocama. Bëngbe Bëtsá entšabiama cuerpo ndoñe tonjanma, boyabása o shembásaftaca bacna soye cha chaotsamama, sinó chë cuérpoca Bëngbe Utabná bënga chamoservema, y Bëngbe Utabná bëngbiama tšabe bendicionënga chaotsamama. <sup>14</sup> Y Bëngbe Bëtsá, nda tojama Bëngbe Utabná cháuatayenama, bëngbiámñaca chabe obenánaca echanjama chámuatayenama.

<sup>15</sup> ¿Tšëngaftanga ndoñe šmondétatšëmbo, Crístoftaca cánÿiñe mo canÿacá šmomnama yomna mo tšëngaftangbe cuerpo chabe cuerpentša soye cuaftsemncá? Tšëngaftangbe cuerpo Crístbioye jaserviama endmënayeca, tšëngaftangbe cuerpo jtsemnana mo Cristbe cuerpentša soycá. ¿Ntšamo atše

chjátobena atšbe cuérpoca, chë ndayá yomna mo Cristbe cuerpentša soyca, canye bacna vida bomna shembásaftaca bacna soye jamana, y chca atšbe cuerpo jabemana mo chë shembásabe cuerpentša soye cuaftsemncá? ¡Ndoñe, ndegombre ndoñe! <sup>16</sup> ¿O tšëngaftanga ndoñe šmondétatšëmbo, canye entšá canye bacna vida bomna shembásaftaca tbojéninýena ora, chë útata jóbemana mo canýacá? Er Bëngbe Bëtsabe uabemana palabrenguiñe boyabása y shembása tbojéninýenama mëntšá endayana: “Chë útata mo canýacá bochántsema ca.” <sup>17</sup> Pero canye entšá Bëngbe Utabnáftaca cánýiñe mo canýacá tojtsemna ora, jtsemnana mo chë útata cach canye espíritu tbojtsebomncá.

<sup>18</sup> Nya ndocna te canye boyabása o shembásaftaca bacna soyënga šmattsama. Nderado ndaye inye bacna sóynaca nda tojama ora, sempre jamana ndayánaca chabe cuerpentšana shjoye; pero boyabása o shembásaftaca bacna soye jamamna, lempe jamana nye cachabe cuérpoca, y chë causa, chca jamëse, cachabe cuerpama más bacna soyënga jtsamana. <sup>19</sup> ¿Tšëngaftanga ndoñe šmondétatšëmbo tšëngaftangbe cuerpo yomna mo canye yebncá Uámana Espiritbiana, cha tšëngaftangbe ainaniñe chaotsiyenama Bëngbe Bëtsá tojánmayeca? Ndegombre tšëngaftangbe cuerpo ndoñe tšëngaftangbe soye quenátsmëna, sinó Bëngbe Bëtsabe soye. <sup>20</sup> Chca endmëna, er Cristo bënga játsebacama tojanóbana ora, yojamna mo cha bëtscá cuafjopagacá tšëngaftanga Bëngbe Bëtsábenga chašmotsemnama. Chíyeca, chë tšëngaftangbe cuerpëngaca chašmojtsama soyëngaca šmochtsinýanýnaye Bëngbe Bëtsá puerte uamaná y bëtscá bëtsemnama.

## 7

### *Jobouamayama jábuayenama*

<sup>1</sup> Mora chanjóyebuambaye ndayá tšëngaftanga átšbioye šmojuábobemama. Ndegombre, canye boyabásabiama más tšabá endmëna ndoñe chaondobouamá. <sup>2</sup> Pero choca banga boyabása o shembásaftaca bacna soye amënga imojtsemna causa, tšabá entsemna cada boyabása chabe shema chabotsóbomñe, y cada shembása chabe boyá. <sup>3</sup> Boyábioye bontsemna jamana chabe shembiana lempe ntšamo jamama ibomncá, boyá bëtsemnama; y chabe shémnaca cachcá chabe boyabiana chaoma. <sup>4</sup> Chë shembe cuerpo ndoñe nye cha cánýabiama ntsemnana, sinó chabe boyabiámnaca. Cachcá, chë boyabe cuerpo ndoñe nye cha cánýabiama ntsemnana, sinó chabe shembíámnaca. <sup>5</sup> Ni boyá, ni shema ndoñe chabondëtsejuabná jtsenbiátšbuana. Aíñe chca copodena, pero nye chë útata chca básefta tescama

tbojenóyeunase, Bëngbe Bëtsáftaca jencuéntama jtsentšénama. Pero chentšana chë útata entsamna cachiñe cánÿiñe jtëtsmënana, chca, Satanás ndoñe chaondobená jamama bacna soye chaócochënguama, cachënga jenomándama ndoñe tmontsobena causa.

<sup>6</sup> Atše chca sëntsicamo, tsëngaftanga jábuayenama, ndayá jamama šmojtselesenciana, y chca ndoñe chašmondëtsamama jamëndama. <sup>7</sup> Y atšbe bariëna, atšbe juabna entsemna malaye nÿetscanga chë soyënguñe mo atšcá šmattsemna. Pero Bëngbe Bëtsá cada ona obenana tbojatšetá tsabe soyënga jamama, Crístbeñe ošbuáchiyënga jujabuáchama, ínÿënga canÿe soyama, ínÿengna inÿe soyama.

<sup>8</sup> Chë cabá ndbouamnënga y viudanga sëntsëtsëtsná, chëngbiana tsabá yojtsemna ntjobouamaycá joquédana, atšcá. <sup>9</sup> Pero chca jtsemnama cachënga jenomándama ndoñe tmontsobenëse, chënga entsamna jtsóbouamayana, er más tsabá endmëna jtsóbouamayana, y ndoñe nÿe boyabásabiana o shembásabiana tša nÿets tempo jësejuabnayana.

<sup>10</sup> Pero chë bouamnënga sëntsamënda shema chabe boyábioye ndoñe cachcá chabondetsonÿá. Chca ndoñe nÿe atše quetsatamënda, ndayá cach Bëngbe Utabná. <sup>11</sup> Pero, shema cachcá chabe boyábioye tbojesonÿase, cha bontsemna ntjobouamaycá jtsomñana o chabe boyáftaca cachiñe jtenútanana. Y cachcá, chë boyá ndoñe quebnátsmëna chabe shema cachcá jesonÿayana.

<sup>12</sup> Chë ínÿënga chjáuyana, atšbe juabncá y ndoñe Bëngbe Utabnabe soycá, nderado canÿe ošbuachiyá tbojtsebomna canÿe shema Crístbeñe ndošbuachiyá, pero chë shema tojtseboše cháftaca joquédana jtsiyenama, cha chë shémbioye ndoñe cachcá chabondetsonÿá. <sup>13</sup> Nderado canÿe ošbuachiyá tbojtsebomna canÿe boyá Crístbeñe ndošbuachiyá, pero chë boyá tojtseboše cháftaca joquédana jtsiyenama, chë shema ndoñe chaondëtsejuabná cha cachcá jesonÿayana. <sup>14</sup> Er Bëngbe Bëtsá tojama, canÿe shembása ošbuachiyá chabe entšá chaotsemnama, nÿe chábioye chabotseservénama, y chca, chánaca jtsejuabnayana chë shembásabe boyá Crístbeñe ndošbuáchiyabiana mo chabiana oservena entšacá, cha chëngbeñe mo canÿe pamillëcá jatrabájama tojtseboše ora; y cachcá, chë boyá ošbuachiyábeyeca Bëngbe Bëtsá jtsejuabnayana chabe shema Crístbeñe ndošbuáchiyabiana mo chabiana oservena entšacá, cha chëngbeñe mo canÿe pamillëcá jatrabájama tojtseboše ora. Er chca ndoñe tontsemnëse, chë básënga muántsemna ndošbuachiyatbe básënga, Bëngbe Bëtsáftaca tondaye ndbomnënga. Ndoñe chca yondmënayeca, canÿa o nÿets uta bëtsëtsatbe ošbuáchiyama,

Bëngbe Bëtsá jtsejuabnayana chë básengbiamana mo chabe entsangcá. <sup>15</sup> Pero chë boyá o shema Crístbeñe ndošbuachiyá cachcá jtšenónyayama tša tojtsebošese, chca chaboma. Chora, chë ošbuachiyá ndoñe ntsotocánana chë ín्याftaca cachiñe jtëtenútanama, er Bëngbe Bëtsá tcmojáchembo natjëmbana chašmotsiyenama. <sup>16</sup> Chca šmochjama, er aca shema ħntšamo cattsetátšëmbo, tacuatjobenaye acbe boyá jayëñjanana Crístbeñe chaotsošbuáchema, y chca, atsbocaná chaotsemnana? o aca boyá ħntšamo cattsetátšëmbo, tacuatjobenaye acbe shema jayëñjanana Crístbeñe chaotsošbuáchema, y chca, atsbocaná chaotsemnana?

<sup>17</sup> Masque ntšámna, cada ona chaotsiyena jtsamëse ntšamo chë Bëngbe Utabná tbojatšetá obenana yomncá, cada ona ndayá jamama Bëngbe Bëtsá tbojachembcá. Chca atše nyets luare ošbuáchiyënga enefjuanenache sëndbëtsamëndaye. <sup>18</sup> Nderado Bëngbe Bëtsá cányabioye tbojachembo, y cha ín्यengbeyeca chë más delicadentse base bobachtema tëtšená tojtsemna, ntšamo chë judiënga monduamancá, cha ndoñe chaondëtšenobiamná mo ndoñe judío cuafjatsmëncá; y nderado Bëngbe Bëtsá cányabioye tbojachembo, y cha ndoñe chca tëtšená tontsemnëse, cha ndoñe chaondëtsejuabná tëtšená jatsmëñana, ntšamo chë judiënga monduamancá. <sup>19</sup> Er ndayá iuámana, ndoñe quenátsmëna chca tëtšená jtsemnana o ndoñe, ndayá ntšamo Bëngbe Bëtsá yomandacá jtsamana. <sup>20</sup> Cada ona bontsemna jtsiyëñana, ntšamo yojoyencá, chabe entšá chaotsemnana Bëngbe Bëtsá tbojanchembo ora. <sup>21</sup> Bëngbe Bëtsá tcmojanchembo ora, nyets tempo ín्यabiamana oservená cojamnëse, chama ndoñe cattsenócochinýena. Pero nderado tojtsemna ntšámose jashjáchama ndoñe más chca ntsemnana, cach achiamana jatrabájama, as chca cochjama. <sup>22</sup> Er chë nýe ín्यabiamana nyets tempo oservená yojamná, Bëngbe Bëtsá chabe entšá chaotsemnana tbojanchembo ora, cha mora ošbuachiyacá, jtsemnana canya ya ndoñe más bacna soyënga jamama juabnëngaca mandaná, sinó Bëngbe Utabnabiamana oservená. Cachcá, chë nýe cachabiamana trabajayá yojamná, Bëngbe Bëtsá tbojanchembo ora, mora cha nyets tempo Crístbe oservená jtsemnana. <sup>23</sup> Cristo bëngbiamana tojanóbana ora, yojamna mo cha bëtscá cuafjopagacá, bënga Bëngbe Bëtsabe entsanga chamotsemnana. Ndoñe šmatjaleséncia nýe entsangbe juabnëngaca nyets tempo mandánënga chašmotsemnana, y Bëngbe Bëtsabiamana chacmotsebnëtjomba. <sup>24</sup> Chcasna, Jesucrístbeyeca atšbe catšátanga, cada ona bontsemna Bëngbe Bëtsáftaca jtsiyëñana, ntšamo yojoyencá Bëngbe Bëtsá tbojanchembo ora.

25 Y chë ndëbouamna shembásengbiamna, chënga aínë o ndoñe yontsamna jobouamayamna, atše chama ndoñe Bëngbe Utabnabe canye mando quetsátsbomna, pero chanjayana ntšamo atše tsjuabnacá. Bëngbe Bëtsá atšbe tšabiamna tojanjuabóyeca, entšanga montsobena jtsejuabnayana aínë tšabe palabra bomná chiñe atše tsmënama. 26 Atše šontsinýana, entšá ibojtsemna jtsomñana nýe ntšamo mora yotsomñcá, er bënga mora montsiyena puerte padecena soyënguiñe. 27 Shema tcobomñese, ndoñe cachcá catjëftsonýaye; y ndoñe tcondbomñesna, ndoñe catjátsënguaye. 28 Tcojobouamase, bacna soye ndoñe quecátama; y nderado canye tobiashe tojobouamase, cach bacna soye ndoñe quenátama. Pero chë tmojtsobouamangna padecena soyënguiñe mochanjoyena quem luarentše chamojëftsemnëntscuana, y atše sëntseboše chënga jujabuáchama chca jatiyenama ndoñe chaondëtsamnama.

29 Jesucrístbeyeca atšbe catsátanga, ntšamo sëntseboše jayanamna mëntšá entsemna: Cristo quem luaroye yochjésabo orscama ya nýe batšá entsájamna. Chiyeca, morscana y nýets tempo más chcoye, chë bouamnënga entsamna jtsiyenana mo ndoñe bouamnënga tmontsemncá, o mëntšá, entsamna jtsentsénana Bëngbe Bëtsabe soyënguiñe, y ndoñe nýe chë bouamná bëtsemnama tbojtsemna soyënguiñe. 30 Cachcá, chë puerte ngménaca tša ošachiyiñe imomnënga, entsamna jtsiyenana mo ndoñe chca tmontsemncá; y chë puerte oyejuayënga, chamotsiyena mo ndoñe chca tmontsemncá; chë soyënga buamnayënga chamotsiyena mo tondaye chëngbe soye tontsemncá. 31 Chë quem luarentša soyëngaca jtsiyenama imojtsentsénënga entsamna jtsiyenana mo ndoñe chca tmontsamcá, er quem luare ntšamo bënga mora monduabuatmcá, pronto echanjochnëngo.

32 Atše sëntseboše tšëngaftanga ndoñe chašmondëtsenocochinýenama. Canye entšá ndoñe bouamná tontsemna ora, jtsobenana jtsentsénana Bëngbe Utabnabe soyëngama jtsejuabnayama, y ntšamo oyejuayá cha jabemama; 33 pero chë bouamná nýets tempo jtsenócochinýenana quem luarentša soyëngama, jtsiyenama, y ntšamo chabe shema oyejuayá jtsebomnama; 34 y chca, cha uta soyiñe canye ora jtsentsénana. Chë ndëbouamna shembása y chë tobiashe bontsobena jtsentsénana Bëngbe Utabnabe soyënguiñe sempre jtsejuabnayama. Chënga mondobena jtsentsénana Bëngbe Bëtsá jaserviama, ndayá chëngbe cuérpoca y chëngbe espíritoca tmojamama. Pero inýetsá, chë bouamna shembásana, nýets tempo jesenócochinýenana quem luarentše vida jtsebomnama

soyëngama, y ntšamo chabe boyá oyejuayá jtsebomnama.

<sup>35</sup> Atše chca cbontsëtsësná tšëngaftangbe tšabiamana, y ndoñe jamëndama ba soyënga jamama ndoñe chašmondëtsobenama, ndayá ntšamo tšabá yomncá chašmotsiyenama, y nÿe Bëngbe Utabná jtse servénama chašmotsentšénama.

<sup>36</sup> Nderado nda tojtsejuabná chabe uatsëtsnaye tobiášeftaca jt sobouamayama ibojtsemna ca, chca jamama chë tobiáše ya bëtsá tojtsemnayeca, y chca jamama tša tšabá yojtsemna ca tojtsejuabnase, cha bontsemna jamana ntšamo tojtsebošcá. Chaotsobouamá. Chca tojama ora bacna soye ndoñe ntsamana.

<sup>37</sup> Pero nderado inÿa, tondaye obligaciönaca tontsemna y lempe ntšamo tojtsebošcá cha tojtsobena jamama, cha tšabá tojajuabó y chabe ainaniñe corente tojtsetátšëmbo, ndoñe nt sobouamayana tšabá yomna ca, cha tšabá chca jtsamana.

<sup>38</sup> Chcasna, chë tobiášeftaca tojt sobouamá chana, canÿe tšabe soye jamana; pero chë ndoñe cháftaca tonjobouamá chana, canÿe más tšabe soye jamana.

<sup>39</sup> Chë shembása bouamná jtsotocánana chabe boyáftaca sempre jëtsiyenana, chë boyá vida tojtsebomnëntscuana; pero chë boyá tojóbanëse, cha jtsobenana cachiñe jtobouamayana, nda cha tojtsebošáftaca, pero chca chaoma mo canÿa Bëngbe Utabnáftaca cánÿiñe mo canÿacá quetsomñecá.

<sup>40</sup> Pero atše jayanamna, cha más oyejuayá nántsemna ndoñe tontóbouamase; y sëntsejuabná, átšnaca tsbomna chë Bëngbe Bëtsabe Espíritu chašotsebuaiynama.

## 8

### *Uátšëmbona saná entsangbe pormana soyëngama*

<sup>1</sup> Mora chanjóyebuambaye ndayá tšëngaftanga atše šmojatjama, ndayá jtse sayama, chë tempo ínÿenga cachëngbe pormana soyënga, diosënga yomna ca jtsejuabnayëse jadórama tmojanátšëmbona soyëngama. Bënga mondëtatšëmbo bënga nÿetscanga osertánënga imomnama.

Canÿa tbojtsosertana ora, cha nderado nanjájuaboye, chca bëtsemnama puerta uamaná cha yojtsemna ca, pero canÿa, ínÿenga tojtsababuánÿeshana ora, cha jtsobenana chënga becá jujabuáchana.

<sup>2</sup> Nderado nda tojtsejuabná ndegombre canÿe soye yotátšëmbo ca, cabá ndoñe yontsetátšëmbo ndayá jtsetatšëmbuama ibojtsemncá.

<sup>3</sup> Pero nderado nda Bëngbe Bëtsábioye tbojtsebobonshana, Bëngbe Bëtsá chábioye jtsabuatmana mo chabe entsacá.

<sup>4</sup> Y chë tempo ínÿenga cachëngbe pormana soyënga, diosënga yomna ca jtsejuabnayëse jadórama uátšëmbona soyëngamna, atše scuayana: bënga corente mondëtatšëmbo chë chënga innëtsadorana soyënga, diosënga yomna ca



jtsejuabnayëse, ndegombre ndoñe dios quemátsmëna y nÿe canÿa Bëngbe Bëtsá endmëna. <sup>5</sup> Pero masque celoca y quem luarentşe chamomna entşangbiama “diosënga ca” uabáinënga (ntşamo ndegombre endmëncá, banga quem luarentşa tsbanánoca obenánaca mondmëna, entşangbiama diosënga ca ubuátmënga, y banga bëts mándoca entşangbiama “utabnënga ca” uabáinënga), <sup>6</sup> bënga chë oşbuáchiyëngbiamna nÿe canÿa Bëngbe Bëtsá endmëna, Bëngbe Taitá, ndábentsana nÿetsca soyënga yóbocana, y nÿe nda jtse servénama bënga imoyena. Y nÿe canÿe Utabnánaca endmëna, Jesucristo, ndábeyeca nÿetsca soyënga yomna, y cach bëngnaca imomna.

<sup>7</sup> Pero nÿetsca oşbuáchiyënga ndoñe chca quemátstatşëmbo. Básefta entşanga, Crístbeñe cabá ntsoşbuáchiye ora, imojanamana ndaye sanánaca juatşëmbonana, chë chënga imojanjuabná diosënga yojamna ca soyënga jadórama; chënga, chca uatşëmbonana tmojttesá ora, jtsejuabnayana chca uatşëmbonana bétsemnama, y ainaniñe juabnënga jtse bomnana ndoñe tşabá tmonjamama, chana tmojase causa. Chënga, ndayá tempo imojánamama, ndoñe quemátobena tşëngaftangcá jtsejuabnayana, chcana jasana bacna soye ndoñe yondmëna ca. <sup>8</sup> Ndegombre, ndayá bënga tmojttesacá ndoñe ntjamana bënga Bëngbe Bëtsábioye más chamuatobéconama. Bënga Bëngbe Bëtsabe bominiñe ndoñe quemochátsmëna más tşábenga aiñe tmojttesama; ni ndoñe chcanga, ndoñe tmontsesá causa.

<sup>9</sup> Pero cuedado şmochtse bomna, ndayá jamana yolesenciánama tşëngaftanga corente tşabá şmotatşëmbuama, ndayánaca jatsmana, y chca causa ínÿenga, chë soyënguiñe más batşá oşbuáchiyënga y osertánënga, ntşamo tşëngaftanga şmojt samcá chamuat smama, y chentşana, chëngbe ainaniñe juabnënga chamotse bomna y chëngbiye chaotsëtsësná ndoñe tşabá tmonjama ca. <sup>10</sup> Er, aca chë soyëngama tatşëmbuá, nderado tcojót bema jasama canÿe luarentşe, canÿe soye ndayama entşanga dios yomna ca jtsejuabnayëse adórayentşe, y canÿe Crístbeñe oşbuachiyá tojtse bomna ainaniñe juabnënga ndoñe tşabá tonjamama, chca tojáyeyeca, aquëcá chë soyëngama ndoñe yondëtatşëmbo causa, y cha nderado chentşe cojttesama tcojinÿëse, chë soye nanjobenaye chábioynaca jañémuana chë saná jasana, chë tempo chë soyëngama tmojanátşëmbona saná. <sup>11</sup> Y chca aca, chë soyëngama ntşamo betatşëmbuama tcojamama, catjama chë Jesucristbeyeca acbe catşata, chë ndoñe corente oşbuachiyá, y ndoñe aquëcá chë soyëngama corente tatşëmbuá, cha pochocaná chaotsemnama, er chabe ainantşe echántsemna juabnënga canÿe bacna soye tojamama, chë saná tojasama.

Chca nderado cánÿabioye catjama, ndabiama Cristo tojanóbana, cha jatsbocama. <sup>12</sup> Jesucristbeyeca acbe catšatbiama chca bacna soye tcojama ora, chca causa cha canÿe soye tojama, ndayama chabe juabnënga ainaniñe chabotsatsësná ndoñe chca chaondëtsama ca; y chca, chentšana tša tojesejuabná cha canÿe bacna soye tojamama, acna canÿe bacna soye jamana, ndoñe nÿe chë catšatbiama, ndayá cach Cristbiámna. <sup>13</sup> Chíyeca, nderado ndayá atše stesama, atše tsjama Jesucristbeyeca atšbe catšata chaoma canÿe soye y chca jamama chabiama canÿe bacna soye tojtsemnëse, más tšabá nántsemna ndocna te chë soye atše ntjasana, chca, atše ndoñe jatsmama cha canÿe bacna soyiñe chaótsatšama.

## 9

### *Jesucristbe ichmónëngbe derecho*

<sup>1</sup> Ndegombre endmëna, atše ndayánaca jamana stselesenciánama y Moisesbe leyëngaca ndoñe más mandaná sëntsemnama. Cach ndegombre endmëna, atše canÿe Jesucristbe ichmoná tsmënama y Jesús Bëngbe Utabná tijinÿama; y cach tšëngaftanga mora ošbuáchiyënga jtsemnëse, šmondmëna ndayá tojóbocna Bëngbe Utabnabiama atšbe trabajuentšana. <sup>2</sup> Masque ínÿenga atšbiama ndoñe quematsjuabná atše canÿe Jesucristbe ichmoná tsmëna ca, tšëngaftangbiamna aiñe chca endmëna; er tšëngaftanga Crístbeñe ošbuáchiyënga šmondmënama y Bëngbe Utabnáftaca cánÿiñe mo canÿacá šmondmënama, puerte tšabá šmontsinÿanÿná atše Jesucristbe canÿe ichmoná tsmënama.

<sup>3</sup> Mëntšá chanjayana chë atše ndoñe tšabá tijama ca imojtsichámëngbiamna: <sup>4</sup> Ndegombre bënga nÿets derecho fsëndëtsóbomñe jtsobátmanama tšëngaftangbentšana, chë tbojujabuáchëngbentšana, bëngbe trabajuama saná o ndayá jofšiyama chašcuacaredadama. <sup>5</sup> Y bëngnaca derecho fsëndëtsóbomñe canÿe shema ošbuachiyá jtsebomnama y bëngaftaca cha jëftsbetšama inÿe luaroye fstsajna ora, ntšamo chë Jesucristbe inÿe ichmónënga, Bëngbe Utabnabe catšátanga y Pédrënaca mondbetsamcá. <sup>6</sup> ¿O nÿe Bernabé y atše šojtsëtocana cabëndatbe cucuátšeca jatrabájana vida jtsebomnama, y ndoñe derecho fsëntsebomna ošbuáchiyënga chašotsacuédanama, Bëngbe Bëtsabiama trabájayama? <sup>7</sup> ¿Ndëmua mo canÿe soldadcá tojtososervená, ndayá tbojtsájabotama cachá nantsatopagana, vida jtsebomnama? Ndocná canÿe jajañe uvas betiyënga ntjájena, chentša uvasëšangá ndoñe ntjuasama. Ndocná oveshënga ntsanÿenana, chë tojabuatëba létšiyentšana ndoñe ntjofšiyama. <sup>8</sup> Ntšamo

atše muentše sentsichamcá ndoñe nye entsangbe juabna quenátsmëna; y Moisesbe leyíñnaca cachcá endayana, <sup>9</sup> er chabe leyíñe mentsá endayana: “Aca canye toróftaca shajuana tmojtsatbaná luariñe chacojtsetrabája ora, ndoñe catjuanguetsenaye ca.” Y chca ndoñe quenátayana Bëngbe Bëtsá nye toronga inétsanyëna ca, <sup>10</sup> sinó inye más bëts soye; chca endayana ndayá ndegombre bënga, chë Bëngbe Bëtsabiama soyëngama abuayiyayíñe trabájayënga cha šnetsanyëna ca. Chca tmojanábema bëngbiama, er chë fshantse arayá y chë meshënga atbanayá, entsamna chca jamana jtsobátmanëse, chë tmojátabe shajuanentsana batsá jóyëngacñama. <sup>11</sup> Y chca, bënga chë tsabe noticiëngama tbojábuaenase, y chca, Bëngbe Bëtsábiocana tsabe bendicionënga chašmotsebomnama bënga tifjama, ndoñe yapa tanandátsmëna tsëngaftanga jótjañana, chë šmobomna soyënguentsana bënga jëftsiyenama chašcuatšatama. <sup>12</sup> Inyënga derecho tmojtsebomna tsëngaftanga jótjañana chë šmobomnentsana chašmuacaredadama, tsëngaftangbeñe chëngbe trabajuama, as bënga más derecho fstsebomna chca jamama.

Pero bënga tondaye checbatamëndá, bënga chë derecho bëtsebomnayeca. Chca játamamna, bënga lempe fsentsoboyá, chca, bënga tondaye ntjätamama, y chë causa entsanga ndoñe chašondëtsayaunana, bënga chë tsabe noticiënga fstsabuayiyá ora. <sup>13</sup> Tsëngaftanga šmondëtatšëmbo, Bëngbe Bëtsabe bëts yebnoca trabájayënga Bëngbe Bëtsabiama oservéniñe, mondbóyëngacñe chënga jasama, ndayá entsanga Bëngbe Bëtsá jadórama chabe bëts yebnoye tmojiyëbo sananguentsana. Y chë Bëngbe Bëtsá jadórama soyënga amënga, altaroca, chë juatšëmbonama luarentše, chënga jasana ndayá chentše tmojuátšëmbona soyënguentsana. <sup>14</sup> Cachcá, Bëngbe Bëtsá tojamandá, chë tsabe noticiënga abuayiyayëngna, vida jtsebomnamna lempe ntšamo tojtsëjabotcá chamóyëngacñe ca, chë tsabe noticiënga abuayiyayama. <sup>15</sup> Pero atše ndocna te chiyaisemandá inyënga chca chašmotsecuedánama, atše chë tsabe noticiënga abuayiyayá bëtsemnama chca derecho tsbómnyeca, y cach ndoñe mora quem soye quecbatëbuabiamná, tsëngaftanga ndayánaca atše chašmuatšetama. Atšbiama más tsabá nántsemna jóbanana, y ndoñe ntjalesénciana inya chaoma atše cach atšbiama oyejuayá ndoñe ntjätsmënama, inyëngbentsana soyënga stjóyëngacñe causa.

<sup>16</sup> Atše ndoñe quetsatsjuabná atše canye bëts soye stsama ca, chë tsabe noticiënga stsabuayiyama, er atše obligaciónaca sëntsemna chca jtsamama, Bëngbe Bëtsá

chama šojanché moyeca. ¡Tša lastemcá atšbiamá nántsemna, chë tšabe noticiënga ndoñe sëntsabuyaynase! <sup>17</sup> Chíyeca, atše chë tšabe noticiënga stsabuyayná nýe atše chca jamama stsebóšeyeca, atšbe uacanana soye ya stsebmna; pero atše chca stjama, y ndoñe tontsemna nýe atše chca jamama stsebóšeyeca, masque chca, atše stsama, ndayá jtsamama Bëngbe Bëtsá šojanbonýecá. <sup>18</sup> Y chca, atšbe uacanana soye endmëna atše oyejuayá jtsemnana chë tšabe noticiënga abuyaynayama, ošbuachiyëngbentšana atše vida jtsebmnama tondaye ntjatoyëngacñécá; chca, atše tondaye quetsátama chë tšabe noticiënga abuyaynayama tsbmna deréchoca, chë atšbe trabajuentšana vida jtsebmnama.

<sup>19</sup> Atše, masque ndocna entšábeyeca nýets tempo mandaná quetsátmëna, puerta nduamaná sënjobema, mo canya nýets tempo ínábeyeca mandanacá, nýetscanga jaserviama, chca, atše chca jtsamëse, jobenayama becá entsanga, ntšamo tojopodecá, jáyëñjanama Crístbeñe chamotsošbuáchema. <sup>20</sup> Chë judiëngbiamna atše sënjama chaitsiyena mo chëngcá jtsamëse y jtsejuabnayëse, chca, atše jobenayama chënga jáyëñjanama Crístbeñe chamotsošbuáchema. Y chë Moisesbe léyeca mandánënga imoyenëngbiamna, atše chëngcá sënjobema, masque ndegombre chë Moisesbe léyeca mandaná ndoñe quetsátiyena; chca sëndbama chënga jáyëñjanama Crístbeñe chamotsošbuáchema. <sup>21</sup> Pero chë Moisesbe léyeca ndëmandánënga oyenëngbiamna, atše chëngcá sënjobema, chënga jáyëñjanama Crístbeñe chamotsošbuáchema, masque ndegombre endmëna, atše šontsemna jamana ntšamo Bëngbe Bëtsá šomandacá y ntšamo Cristo šomandacá. <sup>22</sup> Chë nýe batšatema ošbuachiyëngbiamna y Bëngbe Bëtsabe soyëngama nýe batšatema osertánëngbiamna, atše sënjama chaitsiyena mo chëngcá jtsamëse y jtsejuabnayëse, chca, atše jobenayama jamama chënga sempre Crístbeñe chamotsošbuáchema. Y lempe chca, chë atše jamana ntšamo nýetscanga imomncá atše chaitsemnana, endmëna atše jobenayama báseftanga jáyëñjanama Crístbeñe chamotsošbuáchema.

<sup>23</sup> Atše lempe chca sëndama, bëtscá entsanga chë tšabe noticiënguiñe chamotsošbuáchema, y chca, atše atsbocaná chaitsemnana y chëngcá atše chayóyëngacñama, chë atsebácanënga Bëngbe Bëtsá yochjatsataye tšabe soyënga.

<sup>24</sup> Tšëngaftanga šmondëtatšëmbo, canye luaroye jashjanguama entsanga tmojótjajo orna, banga jotjajuana, pero nýe canya chë uacanana soye jóyëngacñana. Chcasna, mo chë uacanana soye jóyëngacñama tmojotjajëngcá, tšëngaftanga cmontsamna jtsiyenana, chë Bëngbe Bëtsábocana uacanana soye josháchiñama. <sup>25</sup> Nýetscanga chë

tmojótjajënga ínÿenga jáyënjanama, chënga jopróntana nÿetsca soyënguiñe jtsenomándayëse, chca, canÿe uacanana soye, tsbuanachëngaca uapormana coronësha juayëngacñama; y chësha betesco jtsanctana. Pero bënga ndoñe; bënga mondoyena Cristbïama soyënga jtsamëse, Bëngbe Bëtsábïocana ba tsabe soyënga mo uacanancá jóyëngacñama, y chë soyënga nÿetsca tescama bënga mochanjëftsebmna. <sup>26</sup> Y atšna, atšbe bariëna sëndëntšena Bëngbe Bëtsá jtseservénama, ndoñe mo canÿa ínÿengbïoye jáyënjanama tojotjajuacá, chë ndëmoye jashjanguama yomnama ntsetatšëmbcá; y cach ndoñe mo nda tojtsepeliá orcá, chora, cha nÿe ínÿoye chabe buacuatsënga tojtsëtsana y chë ínÿabe cuerpoye ndoñe. <sup>27</sup> Mo canÿe tsabe peliayacá, chabe cuerpo játsesënana y chca chë cuerpo corente jtsemándayana, atše ndoñe quetsatsleséncia chë atše tsabá jtsomñama atšbe ainanentša juabnënga chašotsemándama; y chca, Cristbïoye jtseservénëse chamotsiyenama ínÿengbïoye stjabuayená chentšana, Bëngbe Bëtsá chašotsaboté chabe uacanana soye josháchiñama, cha ndoñe tsabá tijaservé causa.

## 10

*Cach entsangbe pormana soyënga ndoñe chamondëtsadoránama jábuayenama*

<sup>1</sup> Jesucrístbeyeca atšbe catšátanga, atše sëntseboše tsëngaftanga chašmotsetátšëmbo bëngbe tempsca bëtš taitanga judiënga, chënga nÿetscanga Bëngbe Bëtsá canÿe jantšetësheca benache yojaninÿanÿná, y chënga nÿetscanga, chë Buángana ca uabaina mar bejayëjana tmojánachnëjna, chiñe mo bojojuiñe cuaftsomñcá. <sup>2</sup> Chë jantšetësheca Moisés imojanëstonama, y chë mar bejayëjana tmojánama, chënga tmojanóbema Moisesbe ústonënga. <sup>3</sup> Chënga nÿetscanga tmojanse cachca saná, chë Bëngbe Bëtsá celocana tojanichmó saná; <sup>4</sup> y nÿetscanga tmojanofšé chë Bëngbe Bëtsá tojanma chë peñësentšana chaóbcna béjaye. Cristo chëngaftaca yojtsemna jtsanÿenama chënga imojtsajnëntscuana, y ntšamo chë peñësentše chëngaftaca tojanopasacá, yojaninÿanÿná Cristo chënga yojtsanÿenama. <sup>5</sup> Masque chca, banga chënguentsënga ntšamo tmojanmama Bëngbe Bëtsá ndoñe yontsóyejuaye; y chë causa, Bëngbe Bëtsá tojanma chënga chamóbanama chë entsanga ndoyenentše.

<sup>6</sup> Lempe chca tojanopasá bënga jinÿanÿiyama y jábuayenama ntšamo inopása entsanga bacna soyënga jamama tmojtseboše ora, bënga chca jamama ndoñe chamondëtsebošama. <sup>7</sup> Chíyeca, tsëngaftanga ndoñe smattsadorana entsangbe pormana soyënga, ndayama

ínÿenga jtsejuabnayana diosënga yomna ca, ntšamo báseftanga israeloquënga tmojanmca. Ntšamo Bëngbe Bëtsabe uabemana palabrenguiñe chëngbiana endayancá, chënga canÿe ternerá castellánoca tmojanpormá ora, mo dios cuaftsemncá jadórama: “Entšanga tmojanotbiana jasama y jatmuama, y chentšana tmojantsbaná joboyeuama ca”.<sup>8</sup> Boyabása o shembásaftaca bacna soyënga ndoñe šmattsama, ntšamo báseftanga chënguentsënga tmojanmca, y chë causa, nÿe canÿe te, uta bnëtsana y unga uaranga entšanga tmojanóbana<sup>9</sup> Bacna soyënga ndoñe šmattsama, jinÿama buetatescama Bëngbe Utabná uantado yochjëftsemnama y ndoñe šochanjacastígayama. Báseftanga chënguentsënga chca tmojanma, y chë causa tmojanóbana mëtscuayëngaca ftëtšenënga.<sup>10</sup> Bëngbe Bëtsabe contra ndoñe šmattsóyebuambnaye, ntšamo báseftanga chënguentsënga tmojanmca, y chë causa, chë ángel obanayá tojanma chënga chamóbanama.

<sup>11</sup> Lempe chca bëngbe tempsca bëtš taitángaftaca tojanopasá, bënga jinÿanÿiyama ntšamo jtsiyenana šojtsamnama, y Moisés, Bëngbe Bëtsabe uabemana palabrenguiñe chca tojëftsanboshjona bënga jabuátambama, bënga, chë Jesucristo yochjésabo orscama ya batšatema yojtsájamna ora oyenëngbiana.<sup>12</sup> Chcasna, nda tojtsejuabná Bëngbe Utabnabiana tšabá yojtsama ca y bacna soyënga ndocna te yochanjama ca, cuedado chaotsebomna, bacna soyënga amiñe ndoñe chaondótsatšama.<sup>13</sup> Ndocna entšá jatócochënguana bacna soyënga jamama, ntšamo tempo ínÿenga ndoñe tonjanocochëngcá cachca bacna soyëngama, pero tšëngaftanga corente šmondétatšëmbo Bëngbe Bëtsá sempre cmochtsëjabuachanama chë padecena soyënguiñe, y cha ndoñe yochanjalesénciama bacna soyënga jamama chacmócochënguama, tšëngaftanga chca soyënga jamama jtsóboyayama obenana ntsebomncá; pero chë padecena soyënguiñe chašmojtsemna ora, cha cmochanjínÿanÿiye ntšamo chë bacna soyënga ora tšabá jabocanama, y chca, jtsóboyayama chašmotsobenama.

<sup>14</sup> Chíyeca, atšbe bonshánënga, ndocna te šmattsadorana cach entšangbe pormana soyënga, ndayama ínÿenga jtsejuabnayana diosënga yomna ca.<sup>15</sup> Atše sëntsoyebuambná mo tšëngaftanga corente osertánënga cuaftsemncá. Cach tšëngaftanga šmochjenójuaboye y šmochjayana, ntšamo cbojtsëtsëtnacá aíñe o ndoñe tšabá bëtsemnana.<sup>16</sup> Ntšamo Jesús chë coptema vinoyama Bëngbe Bëtsábioye tbojtanchuacá, bëngnaca cachcá Bëngbe Bëtsá chama fsëndbëtsatschuanaye. Bënga chca tmojama ora, ndegombre,

jtsinÿanÿnayana bēnga Crísoftaca cánÿiñe mo canÿacá imomnama, chabe buiñe juabuáshanēse bēngbiama tojanóbanayeca. Y chē mondbajataye tandēse tmojase ora, jtsinÿanÿnayana bēnga Crísoftaca cánÿiñe mo canÿacá imomnama, cha bēngbiama tojanóbanayeca. <sup>17</sup> Bēnga ošbuáchiyēnga masque banga mondmēna, chca orna nÿetscanga cach tandēsentšana bēnga jasana, y chíyeca bēnga jtsemnana mo canÿacá, mo Cristbe cuerpcá.

<sup>18</sup> Tšēngaftanga šmochtsejuabnaye ndayá chē Israeloca bachnanga monduamanama: chēnga chē altaroca tmojóba y tmojuátšēmbona bayēnguentšana jasana, y chca chēnga chora jtsinÿanÿnayana chēnga cánÿiñe mo canÿacá imojtsemnana Bēngbe Bētsáftaca, chē chca tmojtsadoranáftaca. <sup>19</sup> Y chca, atše ndoñe quetsátsboše jayanama chē entšangbe pormana soyēnga mo diosēnga cuaftsemncá, uámana soyēnga yomna ca. Ni chē cach entšangbe pormana soyēnga diosēnga yomna ca jtsejuabnayēse jadórama uátšēmbona saná inÿe sanama más iuámana ca. <sup>20</sup> Pero aiñe, entšanga cach entšangbe pormana soyēngama mo diosēnga cuaftsemncá, chca tmojuátšēmbona ora, ndegombre chēnga Satanás y chabe uajabuachanēngbioye jtsadoránana, y ndoñe Bēngbe Bētsábioye. Y atše ndoñe quetsátsboše, tšēngaftanga chca uatšēmbonana šmojasama, cánÿiñe mo canÿacá chē bayējēngaftaca chašmotsemnana. <sup>21</sup> Tšēngaftanga ndoñe quešmátobena chē vínoye coptémentšana jofšiyana, ntšamo chē ošbuáchiyēnga bétsemnana mondbetsamcá, y chentšana chē cach entšangbe pormana soyēnga, mo diosēnga cuaftsemncá jadórama vínoye coptementšánēnaca. Chca šmojama ora jtsemnana mo chē diablēngaftaca cuaftsesangcá. Y cach ndoñe quešmátobena vínoye jofšiyana y tandēse jasana, ntšamo ošbuáchiyēnga bétsemnana mondbetsamcá, y chentšana cach entšangbe pormana soyēnga mo diosēnga cuaftsemncá jadórama fiestentša sanánaca jasana, y chca chē bayējēngbioye jtsadoránana.

<sup>22</sup> Bēnga chca tmojtsamama, bēnga mochanjama Bēngbe Utabná puerta etonaná bēngaftaca chaotsemnana, er chē bayējēngaftaca bēnga chca jtsamana. ¿O imojtsejuabná bēnga chabiana más obenana bomnēnga imomna ca?

*Lempe šmochjama Bēngbe Bētsá puerta bētsá y uamaná yomnama jinÿanÿiyama*

<sup>23</sup> Mondbétlichamo: “Entselesenciana ndayánaca jamana, ndayama Bēngbe Bētsá ndocá tonjayana ca”, pero básefta soyēnga atše stjama ora ndoñe nÿetscangbe tšabiana ntsemnana. “Entselesenciana ndayánaca jamama ca”, pero nÿetsca soyēnga ntšamo bēnga tmojamcá, ošbuachiyēngbioye

ndoñe ntjajabuáchana Jesucristbeñe más chamotsošbuáchema, y ainaniñe más añemo chamotsebomnama. <sup>24</sup> Ndocná chaondétsama lempe ntšamo tojobenacá nñe cachabe tšabiama, ndayá más chaotsama chë ínñengbe tšabiama.

<sup>25</sup> Lempe mercadoca tmojtseña soyënguentsana šmochjase, ntjatstjanaycá chë mëntšena aiñe o ndoñe tmonjuátšëmbona chë cach entsangbe pormana soyënga, mo diosënga cuaftsemncá jadórama ca. Ndoñe chca šmattsetjanaye, ntšamo tšëngaftangbe ainaniñe juabnënga šmojtsebomnama; <sup>26</sup> er ntšamo Bëngbe Bëtsabe uabemana palabrenguiñe endayancá: “Quem luare Bëngbe Utabnabe soye endmëna, y lempe ntšamo chiñe yomncánaca ca.”

<sup>27</sup> Nderado canñe ndošbuachiyá tmojúbuaja chábioca jasama, y tšëngaftanga choye jama tša šmojtsebošëse, lempe ntšamo cha chacmojonanjacá šmochjase, ndayentsana chë saná tojóbcnoma ndocá ntjatstjanaycá, ntšamo tšëngaftangbe ainaniñe juabnënga šmojtsebomnama. <sup>28</sup> Pero nderado nda tmojáuyana: “Quem mëntšena cach entsangbe pormana soyënga mo diosëngcá jadórama tmonjanátšëmbona ca”, as ndoñe chana šmatjase, er canña chca tmojáuyana, y ainanentše šmojtsebomna juabnënga, chë chca jamama ndoñe tšabá bëtsemnama. <sup>29</sup> Atše sëntsoyebuambná ndayá chë chca tmojayuanabe ainaniñe juabnëngama, chë soye jasana ndoñe tšabá yondmënama, ndoñe chë tšëngaftangbe ainanentša juabnëngama.

Pero tšëngaftanga šmatjatjaye: “¿Ndáyeca atše šojtsemna jayanana ndayá atše stsobena jamama, ošbuachiyá bëtsemnama, ntšamo chë ínñabe ainaniñe juabna yobomnama ca? <sup>30</sup> Y atše chë ndayá stesama Bëngbe Bëtsá tijëtschuase, ¿ndáyeca inña šochjayuana atše ndoñe tšabá tijama ca, chë soye tijasama, chë ndayama Bëngbe Bëtsá tijëtschuá ca?” <sup>31</sup> Masque ntšámnaca, cachcá, chašmojtsešá, o chašmojtsofšëšná, o ndaye inñe soye chašmojtsama, ndayama Bëngbe Bëtsá ndocá tonjayana, lempe šmochtsama Bëngbe Bëtsá puerte bëtšá y uamaná yomnama jtsinñanñayama. <sup>32</sup> Tondaye šmatjama ndayá chaobená jamana, ínñenga Cristo chamotsábotema. Ndoñe chca šmatjama, ni judiëngbiama, ni ndoñe judiëngbiama, ni chë Bëngbe Bëtsábeñe ošbuachiyëngcá enefjuanëngbiama. <sup>33</sup> Smochtsama ntšamo atše sëndëntšencá, nñetscanga nñetsca soyënguiñe oyejuayënga jtsabamnama, lempe ntšamo stjobenacá jtsamëse, ndoñe nñe atšbe tšabiama, ndayá masna chë ínñengbe tšabiama, chënga chamotsobenama chëngbe bacna soyënguentsana atsebácanënga jtsemnama.



# 11

1 Tšëngaftanga šmochtsiyena ntšamo atše sëndamcá jtsamëse, cach ntšamo atše sëndoyencá, ntšamo Cristo inetsamcá jtsamëse.

*Ntšamo yomna shembásenga tšabá jtsemnana, ošbuachiyëngcá tmojénefna ora*

2 Atše sëntseboše tšëngaftanga jáuyanana tšabá šmojama ca, tšëngaftanga nyetsca soyënguiñe atšbiamá šmnétsenojuabnama, y tšëngaftanga šmojtsabuátambama y šmojtsamama ntšamo tčbonjanabuatambacá, cachcá ntšamo atše sënjëfťsanboshjoncá. 3 Pero atše sëntseboše tšëngaftanga chacmësertá: nda nyetsca entsanga iuamënda cha, Cristo endmëna; y nda shémbioye ibománda cha, boyá endmëna; y nda Crístbioye ibománda chana, Bëngbe Bëtsá endmëna. 4 Nderado canye boyabása chabe bestšaše tojtsenátšbotse, inye ošbuáchiyëngaftaca cánýiñe Bëngbe Bëtsáftaca tbojtsencuénta ora o Bëngbe Bëtsabe juabna tojtsoyebuambná ora, cha jamana cachá chaotsëuatjama, chabe bestšásëca chca tojama causa. 5 Pero nderado canye shembása chabe bestšaše ndoñe tontsenátšbotse, inye ošbuáchiyëngaftaca cánýiñe Bëngbe Bëtsáftaca tbojtsencuénta ora o Bëngbe Bëtsabe juabna tojtsoyebuambná ora, cha jamana chama cachá chaotsëuatjama; jtsëuatjana mo cha lempe jshetëtšená cuaftsemncá. 6 Er, nderado canye shembása ndocna te tontseboše chabe bestšaše jtsenátšbotsana, chabiamá más tšabá nántsemna lempe chaotsenójshetëtše. Pero tojtsejuabná utsbotjená o chca lempe jshetëtšená jtsemnana cha yochtsëuatja ca, as chabe bestšaše chaotsenátšbotse. 7 Boyabása ndoñe quebnátšmëna chabe bestšaše jtsenátšbotsana, er Bëngbe Bëtsá tojanma ntšamo cachá yomncá cha chaotsemnana, y chë boyabása chca jtsemnëse, jtsinýanýnaya Bëngbe Bëtsá chabe mandayá yomnana. Pero ntšamo chë shembása yomncá, jtsinýanýnaya chë boyabása chabe mandayá yomnana; 8 er Bëngbe Bëtsá, boyabása ndoñe tbonjanma shembásabentšana, ndayá shembása boyabásabentšana. 9 Y Bëngbe Bëtsá, boyabása ndoñe tbonjanma shembásabeyeca, ndayá shembása boyabásabeyeca. 10 Chýyeca, y chca jamama angelënga tšabá jtsinýanáneyeca, shembása jtsemnana chabe bestšaše chaotsenátšbotsama, chca, chaotsinýnana inya chábeñe yomándama. 11 Pero, Bëngbe Utabnábeñe ošbuachiyëngcá jtsiyenamna, boyabásenga y shembásenga cachcá jtseyitëtanana. 12 Er masque Bëngbe Bëtsá, shembása boyabásabentšana tbojanma, mora, shembásabentšana boyabása jóbocnana; y lempe Bëngbe Bëtsábíocana endóbocana.

13 Cach tšëngaftanga, yejuana chama šmochtsejuabnaye y šmochjayana tšabá o ndoñe tšabá yontsemna, canye shembásabiamna Bëngbe Bëtsáftaca jencuéntana, bestšaše ntse-natsbotscá. 14 Ntšamo entšanga sempre mondbetsejuab-naycá, ndayá tšabá bétsemnama, bëngbioye jtsabuátambayana, boyabása bën stjëněsha chabuájuama tojalesenciase, cha ja-mana cachá chama chaotsëuatjama. 15 Pero shembásabiamna, chë bën stjëněsha jtsinýanýnaya chabe botamanana y uámanana, er Bëngbe Bëtsá tojanma shembása bën stjëněsha chaotsábomnama, chca, cha chaotsebomna ndáyeca chabe bestšaše jtsenátbotsama. 16 Masque ntšámncá, ndánaca tojt-seboše quem soyama más jatóyebuambayama, cha bontsemna jtsetatšëmbuana, ni bënga, ni Bëngbe Bëtsábeñe ošbuachiyëngcá enefjuanënga queftsatsleséncia chca ndoñe chaondétsemnama.

*Bëngbe Utabnabiamna jtenójuaboyama jasama ora, chënga ndoñe tšabá imonjánama*

17 Mora cbochanjaménda soyënguiñe atše ndoñe quetsátobena tšëngaftanga jáuyanana tšabá šmojama ca, er tšëngaftanga Crístbeñe ošbuachiyëngcá šmojénefjna ora, Bëngbe Bëtsá jadórama, atše šontsinýana chë soye yojtsoservena tšëngaftanga más bacá chašmotsemnama, y ndoñe tšëngaftangbe tšabiamna. 18 Natsana cbochjáuyana, atše sënjouena tšëngaftanga ošbuachiyëngcá šmojénefjna ora, báseftanga canye soye imnétsejuabnaye y ínýengna inýetšá ca, y atše sëntsejuabná batšana ndegombre chca yojtsemna ca. 19 Ndegombre jtseytana tšëngaftangbeñe chamotsemna báseftanga canye soye juabnayënga y ínýengna inýetšá, chca, nýetscanga chamotsetatšëmbuama ndëmuanyënga imojtsemna chë Bëngbe Bëtsá tojayana chënga tšabá tmojama ca. 20 Tšëngaftanga tandëse jasama y vínoye jofšiyama šmojénefjna ora, ntšamo bënga fsënduamancá, Bëngbe Utabná bëngbiamna tojanóbanama jtenójuaboyama, ndayá chora tšëngaftanga šmnetsamcá, ndoñe quenátsmëna ntšamo ndegombre cmojtsamncá, chë Bëngbe Utabnabiamna jtenójuaboyama jasama ora; 21 er chë jasama tojobuache ora, cada ona inóntša jasama ndayá tojiyëbcá, y ndoñe ntjatobátmanana nýetscanga ndayánaca jasama chamotsebomnëntscuana; báseftanga shëntseca joquédana, y ínýengna tša jëftsesana y jofšiyana jëftsótmenantscuana. 22 ¿Tšëngaftanga ndoñe yebna šmond bomna ndayentše jasama y jofšiyama? ¿Ndáyeca tšëngaftanga šmojtsejuabná chë imnénefjna ošbuachiyënga nduámanënga imomna ca, y šmojama chë chentše tmojtsemnënga, tondaye ndbomnënga, chamotsëuatjama? ¿Tšëngaftanga šmojtsejuabná atše cbochjáuyana tšabá

šmojama ca, chë Bëngbe Utabnabiamama jasama ora chca šmojamama? ¡Ndegombre ndoñe!

*Bëngbe Utabnabiamama jtenójuaboyama saná*

(Mt 26.26-29; Mc 14.22-25; Lc 22.14-20)

<sup>23</sup> Er atše cach Bëngbe Utabná bentšana ntšamo cbontsabuatëmbacá sënjanóyëngacñe: Bëngbe Utabná cach uayayëngbe cucuatšiñe tmojánboshjona íbeta, tandëse tojanca, <sup>24</sup> Bëngbe Bëtsábioye tbojtanchuá chentšana, tojanjatá y tojánayana: “Quem tandëse atšbe cuerpo entsemna; tšëngaftangbe tšabiamama chanjóbana. Ntšamo mora montsamcá šmochtsama, atšbiamama jtenójuaboyama ca.” <sup>25</sup> Cachcá, chë saná tmojansentšana, coptema tojanaca y tojánayana: “Quem coptema vínoye atšbe buiñe entsemna. Atšbe buiñe echanjuábuashana tšëngaftanga chašmotsetatšëmbuama, ntšamo Bëngbe Bëtsá entšanga tojanašebuachenacá pronto yochtsemnama. Cada vínoye chašmojtsofšëšná ora, chca šmochjama atšbiamama jtenójuaboyama ca.” <sup>26</sup> Er tšëngaftanga cada quemëntša tandëse chašmojtšesá ora y quem coptementšaycá chašmojtsofšëšná ora, Bëngbe Utabná chaojésabëntscuana tšëngaftanga šmochántsinÿanÿnaye cha entšangbiamama tojanóbanama.

*Ntšamo yomna jamana, Bëngbe Utabnabiamama jtenójuaboyama jasama ora*

<sup>27</sup> Chcasna, Bëngbe Utabnabiamama jtenójuaboyama jasama ora, ndánaca tandësentšana tojase y coptémentšana tojofšé, ndoñe chë ntšamo chaotsemnama Bëngbe Utabná yojanjuabnacá, chabiamama Bëngbe Bëtsá jayanana cha puerta bacna soye tojama ca. Chë entšá chca tojama ora, cha jtsinÿanÿnayana, Bëngbe Utabnabe cuerpo y buiñe chabiamama tondaye yonduámanama. <sup>28</sup> Chíyeca, entsemna cada ona corente chauenuabó jtsetatšëmbuama aíñe o ndoñe yontseprontana chca jasama y jofšiyama, cabá ndëse y ndofšé ora. <sup>29</sup> Er nderado nda tojase y tojofšé, chë Bëngbe Utabnabiamama jtenójuaboyama jasama ora, cach Bëngbe Utabnabe cuerpo yomnama ntjajuaboycá, cha chë sóyeca jamana Bëngbe Bëtsá chabotsecastigama. <sup>30</sup> Chíyeca, banga tšëngaftanguentšënga šoquënga šmojtsemna, ínÿenga añemo ndbomnënga, y ínÿengna ndoñe nÿe báseftanga tmojóbana. <sup>31</sup> Pero bënga corente tmojajuabó jtsetatšëmbuama aíñe o ndoñe montseprontana ntšamo šuamncá jasama y jofšiyama, cabá ndëse y ndofšé ora; chca, Bëngbe Bëtsá ndoñe buántsemna bënga játa castigana, ntšamo tšabá yomncá ndoñe tmonjase causa. <sup>32</sup> Pero, Bëngbe Utabná castígoca chca šojabuayená ora, jtsemnana bënga más tšabá jtsamama chamuatsjínÿama, y chca, bayté chentšana, Bëngbe

Bëtsá ndoñe chabondëtsemna játayanana bënga šojtsamna nÿetsca tescama castigánënga jtsemnama ca, cánÿiñe chë nÿe quem luarama enójuabnaye entšangaftaca.

<sup>33</sup> Chca, Jesucrístbeyeca atšbe catšátanga, tšëngaftanga chë Bëngbe Utabnábama saná jasama chašmojënefjna ora, cánÿiñe nÿetscanga šmochjabojátša. <sup>34</sup> Y nderado nda tbojtseshëntsana, cachabe yebnoca chauétsese, chca, Bëngbe Bëtsá ndoñe chabondëtsemna tšëngaftanga jácastigana chora ndoñe tšabá šmonjama causa. Chë inÿe soyëngama ndayama tšëngaftanga šmonjatjá, chamna chanjamánda tšëngaftanga jányama chajjá ora.

## 12

### *Bëngbe Bëtsabe tšetana obenana, tšabe soyënga jamama*

<sup>1</sup> Jesucrístbeyeca atšbe catšátanga, atše sëntseboše tšëngaftanga chašmotsetátšëmbo Bëngbe Bëtsabe tšetana obenanama tšabe soyënga jamama, Crístbeñe ošbuáchiyënga jujabuáchama.

<sup>2</sup> Tšëngaftanga šmondétatšëmbo, tšëngaftanga Crístbeñe ndošbuáchiyënga šmonjamna ora, ínÿenga cmonjanabu-atambá soyënga, y chora tšëngaftanga šmonjamna ínÿabeyeca uasjanëngcá, cach entšangbe pormana soyënga mo diosënga cuaftsemncá jadórana; y chë soyëngna ni mo jóyebuambayama ntobenana. <sup>3</sup> Chíyeca, atše mora sëntseboše tšëngaftanga chašmotsetátšëmbo, ndocná ntobenana jayanana: “Jesús ndoñe chë Cristo quenátsmëna, ni Bëngbe Utabná ca”, chë Bëngbe Bëtsabe Espíritbe obenánaca cha tojtsóyebuambnase. Y cach ndocná ntobenana jayanana: “Jesús Bëngbe Utabná endmëna ca”, chë Bëngbe Bëtsabe Espíritbe obenánaca cha ndoñe tontsóyebuambnase.

<sup>4</sup> Espíritu jamana bënga ndoñe chamondëtsebomnama cachca tšetana obenana tšabe soyënga jamama, pero lempe jobayana cach canÿe Espíritbeyeca. <sup>5</sup> Bënga, Bëngbe Bëtsá mondëserveda, nÿetsca soyënguiñe jtsetrabájayëse, pero cach Utabná nÿets chë trabajënga šojabanÿé. <sup>6</sup> Nÿetsca soyënga Bëngbe Bëtsabe obenánaca fsëndbëtsama, pero cach Bëngbe Bëtsá endmëna nda inétsama bënga chë soyënga jamama obenana chamotsebomnama. <sup>7</sup> Bëngbe Bëtsá inétsama cada ošbuachiyá chaotsebomnama canÿe tšetana obenana tšabe soyënga jamama, y chë soye jtsinÿanÿnayana Bëngbe Bëtsabe Espíritu chabe ainaniñe yomnama; y chë tšetana obenana jtsemnana nÿetscangbe tšabiamá. <sup>8</sup> Bëngbe Bëtsá, Espíritbeyeca, canÿa obenana jatštayana puerte osertanánaca chaóyebuambama, y ínÿana obenana cach Espíritbeyeca ndayámnaca corente jtsetatšëmbëse

chaóyebuambama; <sup>9</sup> ínÿana cach Espíritbeyeca, obenana Crístbeñe puerte chaotsošbuáchema, y ínÿabiamna, cach nÿe canÿe Espíritbeyeca, obenana jatštayana šoquënga jáshnama; <sup>10</sup> ínÿana, obenana tšabe soyënga Bëngbe Bëtsabe obenánaca jamama, y ínÿana, obenana Bëngbe Bëtsabe juabna jóyebuambayama. Inÿana, obenana corente jajuaboyama y jtsetatšëmbuama ntšamo tmojayancá Bëngbe Bëtsabe Espíritbeyeca o bacna espiriténgbeyeca tojtsemnama, y ínÿana, obenana chë tempo ndmabiyáñnaca chaóyebuambama, y ínÿana, obenana josértama ntšamo chë ndaye biyáñnaca jóyebuambayama obenana bomná tojtsichamcá, y ínÿengna chama jábuayenama. <sup>11</sup> Pero cach Espiritu, chë nÿe canÿe Espiritu lempe chca jamana, ntšamo tšabá bétsemnama cha tojtsejuabnacá cada entšábioye jatštayëse.

*Nÿetsca ošbuáchiyënga cánÿiñe, mo Crístbe cuerpcá jtsemnana*

<sup>12</sup> Cuerdo nÿe canÿe soye endmëna y chë cuerpná ba soyënga jtsebomnana; masque chë cuerpo ba soyënga jtsebomnana, nÿe canÿe cuerpo jtsemnana. Bëngaftácnaca cachcá. Bënga banga mondmëna nÿetscanga Crístbeñe ošbuáchiyënga, pero Crístbeyeca, bënga cánÿiñe mo canÿacá jtsemnana. <sup>13</sup> Er bënga nÿetscanga, judiënga o ndoñe judiënga, nÿe ínÿabiamna nÿets tempo oservénënga o cachëngbiama trabájayënga šojanëbaye, Crísoftaca cánÿiñe mo canÿacá, jtsemnama mo chabe cuerpcá, y chca yomna cach Espíritbeyeca; y Bëngbe Bëtsá tojama cach Espiritu nÿetscangbe ainanoye cháumashënguama, bënga jtsamëndayama.

<sup>14</sup> Cachcá, canÿe cuerpo ndoñe nÿe canÿe soye ntsebomnana, ndayá ba soyënga. <sup>15</sup> Nderado shecuatše tojayana: “Cucuatše ndoñe quetsátsmëna causa, atše cuerpentša soye ndoñe quetsátsmëna ca”. Chca tojayanamna, shecuatše mo chë cuerpentša soye ndoñe cuaftsemncá ndoñe ntjátsmënana. <sup>16</sup> Nderado matscuaše tojayana: “Bominÿe ndoñe quetsátsmëna causa, atše cuerpentša soye ndoñe quetsátsmëna ca”. Chca tojayanamna, matscuaše chë cuerpentša soye ndoñe cuaftsemncá ndoñe ntjátsmënana. <sup>17</sup> Nÿets cuerpo bominÿe tojtsemnëse, bënga ndoñe muantsobena jouenama. Y nÿets cuerpo matscuaše tojtsemnëse, bënga ndoñe muanjobenaye jonguëtsetšiyana. <sup>18</sup> Pero ndegombre endmëna, Bëngbe Bëtsá nÿetsca soye cuerpentše tojancjá ndayentše cha tojánbošenentše. <sup>19</sup> Nÿetsca cuerpentša soyënga nÿe canÿe soye tojtsemnëse, ndoñe canÿe cuerpo nántsemna. <sup>20</sup> Pero ndegombre endmëna, masque ba soyënga cuerpentše yomna, nÿe canÿe cuerpo jtsemnana.

21 Bominÿe quenátobena cucuatše jauyanana: “Ndoñe quecátsiyta ca”; y cachcá, bestšaše quenátobena shecuatše jáuyanana: “Ndoñe quecátsiyta ca”. 22 Inÿetšá, chë cuerpentša soyënga, chë tojtsinÿana mo obenana ndbomna y nduámana soyëngcá, jtsemnana chë cuerpama más iyta soyënga. 23 Chë cuerpentša soyëngama, ndayama bënga tmojtsejuabná más nduámana soyënga yomna ca, bënga jamana más chaotsámanama, chiñe entšayaca jtichëtjese. Y chë cuerpentša soyënga, ndayama bënga jtsëuatjana ínÿenga chamotsonÿama, bënga jamana ínÿenga ndoñe chamondëtsonÿama, chiñe entšayaca jtichëtjese. 24 Pero chë cuerpentša soyëngaca, chë nÿetscanga jtsonÿayana y botamana jinÿama jtsemnana soyëngacna, ndoñe ntseytana chca játamana. Bëngbe Bëtsá cuerpo tojama, ntšamo bënga chamotsamama chentša más nduámana soyënga, más chaotsámanama, ntšamo chë soyënga bënga tmojtsinÿenama. 25 Cha chca tojanma, cuerpentša nÿetsca soyënga chë cuerpama trabajo cánÿiñe chamotsamama, y chca, cada soye chaotsama trabajo chë cuerpentša nÿetsca soyëngbe tšabiama. 26 Nderado canÿe cuerpentša soyama bacna soye tojopasá, chora nÿetsca chë cuerpentša soyëngámnaca chca ndoñe tšabe soye jtsebínÿnana; pero canÿe cuerpentša soyama tcojama más uámana soye chaotsemnana o ndaye tšabe soye tojopasase, chora nÿetsca chë cuerpentša soyëngámnaca chca tšabe soye jtsebínÿnana.

27 Cachcá, tšëngaftanga Crístbeñe ošbuáchiyënga, cháftaca cánÿiñe mo canÿacá jtsemnëse, mo chabe cuerpcá jtsemnana, y cada ona tšëngaftanguentšá mo chë cuerpentša soyëngcá, jtsemnana mo chabe cuerpentša soyëngcá. 28 Ntšamo Bëngbe Bëtsá cuerpentše soyënga tojancjá ndayentše inabošcá, cachcá, ošbuachiyëngcá enefjuanëngbeñe Bëngbe Bëtsá tojubuáyana, natsana báseftanga mo Jesucristbe ichmonëngcá, chorna Bëngbe Bëtsabe juabna oyebuambnayënga, chorna Bëngbe Bëtsabiama abuátambayënga, chorna chë bëts soyënga Bëngbe Bëtsabe obenánaca jamama obenana bomnënga, chë šoquënga jáshnama obenana bomnënga, chë ínÿengbioye puerte ujabuáchanënga, chë inÿe ošbuachiyëngbioye amëndayënga, y chë nÿetsca biyañe jtsóyebuambnayama obenana bomnënga, tempo ndmabiyañe. 29 Ndegombre, ošbuachiyëngcá enefjuanëngbeñe nÿetscanga ndoñe Jesucristbe ichmónënga ntsemnana, nÿetscanga ndoñe Bëngbe Bëtsabe juabna oyebuambnayënga, nÿetscanga ndoñe abuátambayënga, nÿetscanga ndoñe Bëngbe Bëtsabe obenana bomnënga, bëts soyënga jamama. 30 Nÿetscanga ndoñe šoquënga jáshnama obenana bomnënga; nÿetscanga ndoñe nÿetsca biyañe jtsóyebuambnayama obenana bomnënga, tempo ndmabiyañe;

ni n̄yetscanga ndoñe obenana bomnēnga quemátsmēna, chē tempo ndmabiyañe n̄yetsca biyañe jtsóyebuambnayama obenana bomnēnga ntšamo tmojtsichamcá josértama y ín̄yengbioye chama jtsabuayiynayama. <sup>31</sup> Pero tsēngaftangna puerte šmochtseboše, lempe ntšamo chašmojobenacá šmochjama, chē Bēngbe Bētsabe más uámana tšetana obenana jēftsashjáchama.

### *Bonshánana jtsebomnana*

Y in̄ye soye más, atše cbochanjín̄yan̄yiye ntšamo šmojtsobena cabá más tšabá jtsiyenana, Bēngbe Bētsá jtseeservénese.

## 13

<sup>1</sup> Nderado atše stjóyebuambaye entsangbe biyañe y angelēngbe biyañe, pero ín̄yengbioye ndoñe sēntsababuán̄yeshanēse, atše stsemna can̄ya tondayama uamaná, mo n̄ye can̄ye metalēshe tojtsenancá, o mo n̄ye can̄ye platillēshcá ndoñe tšabá tontsenanēshe. <sup>2</sup> Y atše obenana stsebomna Bēngbe Bētsabe juabna jóyebuambayama y n̄yetsca soyēngama, y chē Bēngbe Bētsá tempo entsanga ndoñe tonjanin̄yan̄yé soyēnga šojtsēsertana, y Bēngbe Bētsabe n̄yetsca soyēngama stsetátšēmo, y Crístbeñe puerte stjesošbuáchiye, chca betsošbuáchema n̄ya mo chē tjashēnga chamobonjoma jamama, pero ín̄yenga ndoñe sēntsababuán̄yeshanēsna, atše tondaye sēntsemna. <sup>3</sup> Y atše lempe ntšamo stsebomncá ndbomnējēmēnga stšējátaye, y ín̄yengbioye stjenontréga atšbe cuerpo chamojuin̄yema, pero ín̄yengbioye ndoñe sēntsababuán̄yeshanēse, atše ndocna uámana soye ntjashjáchana.

<sup>4</sup> Can̄ye entšá ín̄yenga ababuan̄yeshaná, uantado jtsemnana masque padecena soyēnguiñe tmojtsemna órnaca, y ín̄yengaftaca tšabe ainánaca mando jtsebomnana. In̄yenga ababuan̄yeshaná ndoñe ntsántšabošana ntšamo in̄ya tojatsbomncá, ni ntsenábotamnayana, ni cachá chē ín̄yengbiama más uamaná ntjatenobiamnayana; <sup>5</sup> ndoñe bacá mandbomná ín̄yengaftaca ntsemnana, ni n̄yets tempo ntsebošana y lempe jtsamana n̄ye chabiana tšabe soye jón̄yenama; cha n̄ye ndayám̄naca ndoñe ntjetnana, ntšamo ín̄yenga tmojaborlá ora jtsaperdónayana. <sup>6</sup> In̄yenga ababuan̄yeshaná ndoñe ntjóyejuayana chē ndoñe tšabá yondmēna soyēngama; chē ndegombre yomna soyēngamna aíñe. <sup>7</sup> In̄yenga ababuan̄yeshaná, ainaniñe añemo jtsebomnana n̄yetsca padecena soyēnguiñe, lempe ntšamo más tšabá yomna soyēnguiñe jtsošbuáchiyana, n̄yetsca más tšabá yomna soyēngama jtsobátmanana, y jtsóboyayana n̄yetsca toto soyēnga.

<sup>8</sup> Bonshánana nýetsca tescama jéftsemnana. Canýe te echántsemna, chora chë Uámana Espíritu ndoñe más queochátama entsanga Bëngbe Bëtsabe juabna chamotsóyeuambnama, ni chë ndocna te ndmabiyañe chamotsóyeuambnama, ni chë puerte jtsetatsëmbëse jóyeuambayama obenama chamotsebomnama; <sup>9</sup> er ntšamo mora bënga imotatsëmbcá y Bëngbe Bëtsabe juábnaca jóyeuambayëse tmojayana soyënga, nýe batsatema bëngbioye jtsinýanýayana Bëngbe Bëtsabe soyëngama, ndoñe lempe; <sup>10</sup> pero Jesucristo chaojésabo ora, y chaojama bënga chamotsemna lempe ntšamo Bëngbe Bëtsá bëngbiama yojanjuabnacá, quem soyënga, chë nýe batsatema bëngbioye jtsinýanýayana Bëngbe Bëtsabe soyëngama, ya ndoñe más queochátsbinýa.

<sup>11</sup> Atše básatema ora, sënjanoyebuambná, sënjanjuabná, y soyëngama tšabá jtsetatsëmbuamna sënjanjuabná mo canýe basetemcá; pero bëtsá sënjanóbema orna, sëntsanajbaná lempe amana mo canýe basetemcá. <sup>12</sup> Cachcá, mora bënga quem luarentše nýe batsatema Bëngbe Bëtsabe soyëngama jtsetatsëmbuana, mo canýe espejuiñe tmojtsonýacá, pero ndoñe nýa corente tšabá. Pero canýe te bënga mochántsetatsëmbo lempe nýetsca soyëngama, bënga Bëngbe Bëtsabe delante chamojtsemna ora. Mora atše séntsetatsëmbo nýe batsatema Bëngbe Bëtsabe soyëngama, pero chora lempe chanjuábuatmana, ntšamo Bëngbe Bëtsá corente suabuatmcá.

<sup>13</sup> Pero morna, Bëngbe Bëtsábeñe jtsošbuáchiyana, chábeñe jtsobátmanana, y chábioye y ínýengbioye jtsababuánýeshanana, chë soyëngna nýetsca tescama jéftsemnana; pero chentšana chë más uámana soye endmëna ínýenga jtsababuánýeshanana.

## 14

### *Ndmabiyañe obenana Bëngbe Bëtsabe tšetánana*

<sup>1</sup> Bëtscá šmochtsama nýetscanga jtsababuánýeshanëse chašmotsiyenama, y puerte šmochtseboše jtsebomnama chë Bëngbe Bëtsabe tšetana obenana tšabe soyënga jamama; pero chentšana masna, chë Bëngbe Bëtsabe juabna jóyeuambayama obenana. <sup>2</sup> Er chë tempo ndmabiyañe mora jóyeuambayama obenana bomná, Bëngbe Bëtsábioye jtsatsëtsnayana y ndoñe entsángbioye, er ndegombre entsanguentše ntšamo cha tojtsoyeuambnacá ndocná ntjosértana; chana chabe espíritoftaca jtsóyeuambnayana y ndoñe nýe chabe juábnaca, chë tempo Bëngbe Bëtsá ndocna entsábioye tbonjaninýinýe soyëngama. <sup>3</sup> Pero chë Bëngbe Bëtsabe juabna oyebuambnayana entsanga jtsëtsëtsnayana, chënga más chamotsošbuáchema y ainaniñe



añemo chamotsebomnama, Bëngbe Bëtsabe soyëngama jábuayenama, y jamama padecena soyënguifne tmojtsemna órnaca añemo chamotsebomnama. <sup>4</sup> Chë tempo ndmabiyañe mora jóyebuambayama obenana bomná, jtsamana nýe cha más jtsošbuáchiyama y ainaniñe añemo jtsebomnama; pero chë Bëngbe Bëtsabe juabna oyebuambnayana jtsamana chë ošbuachiyëngcá enefjuanënga chca soyënga chamotsebomnama.

<sup>5</sup> Atše sëntseboše nyetsca tšëngaftanga chë tempo ndoñe šmonjanbiyañe mora jóyebuambayama obenana chašmotsebomnama, pero chama atše más sëntseboše tšëngaftanga chë Bëngbe Bëtsabe juábnaca soyënga chašmotsóyebuambnama. Chë Bëngbe Bëtsabe juábnaca soyënga oyebuambnayá más uamaná jtsemnana chë inýe biyañe oyebuambnayabiama; chca ndoñe nántsemna, ntšamo canýe biyañe tojayancá chë biyañe oyebuambnayá tbojtsësertánëse y chë ošbuachiyëngcá enefjuanënga tojábuayenase, y chca, chë soyënga tmojouenama, chënga chamotsobena más jtsošbuáchiyama y añemo jtsebomnama.

<sup>6</sup> Y mora, Jesucristbeyeca atšbe catšátanga, atše nderado tchojábuache y nýe inýe biyañe tchojáuyanëse, ¿chca ntšamo cbatjújabuache? Atše jtsoobenana jujabuáchana, nýe ntšamo chë biyañe tijayancá átšnaca šojtsësertánëse, y ndayá Bëngbe Bëtsá šojinýinýecá entšanga jábuayenama stjobenase, chë Bëngbe Bëtsá tojama atše jtsetatšëmbuama soye, chë Bëngbe Bëtsabe juábnaca stsoyebuambná soye o chë tšëngaftanga jabuátambama cha yoboše soye.

<sup>7</sup> Entšanga monduamana ndayánaca juénanana, mo flautëfja o arpa, vida ndbomna soyënga; cada sóyeca inýetsá juénanama ndoñe tontsopodénëse, ndocná nantsobena jtsetatšëmbuama ndayá canýa chë soyëngaca yojtsénanama. <sup>8</sup> Y nderado nda trompetëfjua tojuájatëta ora, soldadënga japéliama chamoprontama, chë uajatëtaná inýetsá, nýa chama ndoñe tonjuájatëtëse, ndocná buanjoserá y jenpéliama ndoñe nanjoprónta. <sup>9</sup> Tšëngaftangaftácnaca cachcá jtsoapasánana. Inýenga paselo josértama jobenaycnana tšëngaftanga ndoñe šmonjóyebuambase, ndocná queochátstatšëmbo ntšamo šmojtsichamcá. Nántsemna mo nýe cánýenga cuaftsoyebuambnacá. <sup>10</sup> Atše sëntsejuabná, ndegombre quem luarentše ba inýe biyañe entšanga innétsoyebuambnayana, y ndaye biyáñnaca tmojoyebuambá ora, sempre jtsemnana inýenga ntšamo chënga tmojtsichamcá osertánënga. <sup>11</sup> Pero ntšamo inýa chabe biyañe šojauyancá atše ndoñe šontsësertánëse, atše stsemna canýe chabiama ndosertana biyañe oyebuambnayá, y chánaca cachcá atšbiama.

12 Chcasna, chë Uámana Espíritu šondinÿanÿná obenana jtsebomnama tšëngaftanga puerte šmobóseyeca, lempe ntšamo šmojobenacá šmochtsama chca tšetana obenana jóyëngacñama, chë ošbuáchiyënga más jtsošbuáchiyama y añemo jtsebomnama inétsama obenana.

13 Chíyeca, chë tempo ndmabiyañe mora jóyebuambayama obenana tojtsebomná, Bëngbe Bëtsá chabotseimpadana, cha chaoma ntšamo chë inÿe biyañe tojayancá chabosertama y ošbuáchiyënga jábuayenama obenana chaotsebomnama. 14 Pero atše Bëngbe Bëtsáftaca stjencuénta, chë ndmabiyañe jóyebuambayama cha obenana šojanatšetacá jtsóyebuambnayëse, atšbe espíritu cháftaca nantsóyebuambnaye, pero atšbe juabna ndoñe ntsetatšëmbuana ntšamo chë espíritu tojtsoyebuambnacá. 15 Y asna, ¿ntšamo atše chtsemana? Bëngbe Bëtsáftaca chanjencuénta atšbe espíritoca, pero ntšamo stsichámuama jtsejuabnayësnaca. Bëngbe Bëtsá jëtschuayama chanjavérsia atšbe espíritoca, pero chca chanjama chíñnaca jtsejuabnayëse. 16 Nderado aca Bëngbe Bëtsá cojtsatschuaná nÿe espíritoca, y canÿa quem Bëngbe Bëtsabe tšetana obenanama ndosertaná tcmojóyeunase, cha ndoñe ntsoobenana jayanana “chca chaotsemnaca”, cach aquécá cha yojtsejuabnama jinÿinÿiyama, er ntšamo cojtsichamcá cha ndoñe ntsësertánana. 17 Aca jtsoobenana chca puerte tšabá Bëngbe Bëtsá jëtschuayana, pero ntšamo tcojtsamcá ndoñe ntjamana inÿa ndaye tšabe soye chaotsebomnama. 18 Atše, Bëngbe Bëtsá sentsatschuaná inÿe biyañe jóyebuambayama tšëngaftangbiana más tsobenama; 19 pero Crístbeñe ošbuachiyëngcá tmojénefnja ora, atše más sëndbétseboše nÿe mo shachna palabratémnaca jóyebuambayana, chënga aíñe catafjosertacá, chca, ínÿenga jabuátambama, y ndoñe bnëtsana uaranga palabrënga jatóyebuambnayana inÿe biyañe, chënga chaósertama ndoñe tontsopodénëse.

20 Jesucrístbeyeca atšbe catsátanga, šmochtsajbaná basetemëngcá juabnayana. Mo šešonatemëngcá šmochtsemna, bacna soyënga jamama ntsetatšëmbcá; pero mo bëtsëtsangcá tšabá šmochtsejuabnaye. 21 Bëngbe Bëtsabe uabemana palabrënguiñe, Bëngbe Utabná mëntšá tojánayana: Atše quem entšángbioye chanjáuyana, ínÿenga inÿe luarëngocana ashjajnëngaftaca, chëngbiana canÿe ndosertana biyañe oyebuambnayënga; y chanjáuyana ndayá chëngbe biyañe chamojtsichamo soyëngaca; pero ni chca, chënga ndoñe quešmochatóyeunaye ca.

22 Chcasna, inye biyañe jóyebuambayama obenana jtsebomnana endmëna, Bëngbe Bëtsá ndayánaca chë chábeñe ndošbuachiyëngbioye jinñanñiyama, y chábeñe ošbuachiyëngbioyna ndoñe. Pero, Bëngbe Bëtsabe juabna jóyebuambayama obenana jtsebomnana endmëna, Bëngbe Bëtsá ndayánaca chábeñe ošbuachiyëngbioye jinñanñiyama, y chábeñe ndošbuachiyëngbioyna ndoñe. 23 Er tšëngaftanga nñetscanga ošbuachiyëngcá šmojënefjna ora, nñetscanga ba biyañe šmojtsoyebuambná, y choye tojámashëngo canya chca Bëngbe Bëtsabe tšetana obenanama ndosertaná o chábeñe ndošbuachiyá, cha nanjajuaboye tšëngaftanga opënga šmojtsóbema ca. 24 Pero nñetscanga tmojtsichamo, Bëngbe Bëtsabe juábnaca jtsóyebuambnayëse, y choye tojámashëngo canya Bëngbe Bëtsábeñe ndošbuachiyá o canya chca Bëngbe Bëtsabe tšetana obenanama ndosertaná, ntšamo chašmojtsichamcá cha bochanjosërta; y chë soye cha bochanjayëñjaná cha bacna soyënga tojamama, y ndayá cha tojamiñe corente echántsejuabnaye, ntšamo nñetscanga tmojtsichámuama. 25 Y Bëngbe Bëtsá chábioye bochanjinñinñiyie ntšamo cha ainaniñe tojajuabó y tojabošencá, ndayá ndocnábioye tbonjinñinñyecá, y cha echanjoshëntsamentšiyie Bëngbe Bëtsá jadórama, y tšëngaftangbe delante echanjayana Bëngbe Bëtsá ndegombre tšëngaftangbeñe yojtsemna ca.

*Ošbuachiyëngcá šmojënefjna ora, ntšamo tšabá yomncá lempe šmochtsama*

26 Chcasna, Jesucristbeyeca atšbe catšátanga, šmojënefjna ora, cada ona ndayánaca jtsebomnana nñetscangbiamá: inñengna jtsoobenana javërsiama, Bëngbe Bëtsá jëtschuayama, inñengna jtsoobenana jabuátambana o jábuayenama ndayá Bëngbe Bëtsá tojinñanñyecá, o tempo ndmabiyañe chora jtsóyebuambnayana, o entsanga jábuayenana ntšamo inya inye biyañe tojayancá. Pero lempe šmochjama, ošbuáchiyënga más chamotsošbuáchema y más añemo chamotsebomnana Cristo jasérviamá. 27 Nderado inye biyañe jóyebuambayama tojtsemnëse, útata o nya másese únganga chca chamoyebuambá, y canyánya; y jtseytana ndánaca ntšamo tmojtsichamcá chabosertá y nñetscanga chama chauabuayená. 28 Y chca chabosertama y nñetscanga jábuayenama ošbuachiyëngbeñe ndocná tontsemnëse, as ošbuachiyëngcá chamojënefjna ora chë chca oyebuambnayá bontsemna ndoñe chca biyañe ntsóyebuambnayana, sinó nye canya tojtsemna ora cha jtsoobenana chca Bëngbe Bëtsáftaca jencuëntana. 29 Utata o únganga entsamna jayanana soyënga, Bëngbe Bëtsabe juábnaca jtsóyebuambnayëse; y chë inñenga jtšamnana botamana jajuaboyana y jayanana ntšamo chënga tmojayancá aiñe o ndoñe Bëngbe Bëtsábiocana

tayojsóbocanama. <sup>30</sup> Pero canya Bëngbe Bëtsabe juabna tojtsóyebuambnantscuana, inya chentše ouenana tbemanábioye Bëngbe Bëtsá tbojinýinyé ndayánaca yojtsebomna jayanama, as chë natsana oyebuambnayá iytëca chaóbema, y chabolesenciá chë inya chaóyebuambama. <sup>31</sup> Chca, nyetscanga, canýanýa jtsobenana jayanana soyënga, Bëngbe Bëtsabe juábnaca jtsóyebuambnayëse, nyetscanga chamuatsjínýama y nyetscanga añemo jatšatayama. <sup>32</sup> Chë Bëngbe Bëtsabe juabna oyebuambnayá endobena jtsemándayana ntšamo tojtsichamcá, cha cachabe espíritoca tojtsoyebuambná ora; <sup>33</sup> er Bëngbe Bëtsá endmëna nda inétsama bënga natjëmbana chamotsiyenama, y ndoñe chë bënga nyetscanga cachcá ndoñe chamondëtsejuabnama, y nýe ntšamo cada ona tojtsebošcá chaotsamama.

Ntšamo nyets luarënguenache, chë ošbuáchiyënga, chë Bëngbe Bëtsabe entsanga mondbénefjna luarënguenache endbetsemncá, <sup>34</sup> tšëngaftangbéntšnaca, shembásenga entsamna iytëca jobiamëngana, ošbuachiyëngcá šmojénefjna ora, er ndoñe quenátslesenciana chënga chora chamuátoyebuambnama, y añe chënga entsamna chëngbe boyanga jtsayaunanana, ntšamo Moisesbe leyiñe endayancá. <sup>35</sup> Chënga ndayánaca jtsetatšëmbuama tmojtsebošëse, cachëngbe boyángbioye yebnoca chamotjanga; er ndoñe corente tšabá ntsemnana canýe shembása jtsóyebuambnayana tšëngaftanga ošbuachiyëngcá šmojénefjna ora.

<sup>36</sup> ¿Tšëngaftanga šmojatsjuabná, Bëngbe Bëtsabe tšabe noticiënga tšëngaftangbeñe tojanobojatšé ca, o nýe tšëngaftanga chë soyënga šmojanóyëngacñe ca? Ndegombre ndoñe chca; chíyeca tšëngaftanga nýe cánýenga ndoñe ntsoobenana jayanama ndayá jamama cmojtsamnama. <sup>37</sup> Nda tojtsejuabná cha Bëngbe Bëtsabe juabna oyebuambnayá yomna ca, o chabe ainaniñe chë Espíritu jtsemándayama yojtsebomna ca, cha bontsemna tšabá jtsetatšëmbuana, ntšamo Bëngbe Utabná šojamandacá atše stsabiamnama. <sup>38</sup> Pero cha ndoñe chca tontsetátšëmbo y chca ndoñe yondmëna ca tojayanëse, ndayá cha tojayanacá ndoñe šmatjójyëngacñe.

<sup>39</sup> Chcasna, Jesucrístbeyeca atšbe catšátanga, puerte šmochtseboše Bëngbe Bëtsabe juábnaca soyënga jtsóyebuambnayama obenana jtsebomnama, y ndoñe šmattsama chë tempo ndmabiyañe ínýenga ndoñe chamondëtsóyebuambnama; <sup>40</sup> pero lempe šmochjama ntšamo jamama yomncá, y ndoñe nýe ntšamo cada ona tojatsjuabnacá.

## 15

*Cristo tojtanayenama*

<sup>1</sup> Morna, Jesucristbeyeca atšbe catšátanga, atše sěntseboše tšěngaftanga chašmuatenójuaboma atše tčbonjanabuayená tšabe noticiěnguiñe, ndayá tšěngaftanga šmonjanóyěngacñe, chě ndáyeca tšěngaftanga Jesucristbeñe šmojtsošbuaché y cha jtseservéněse šmojtсийena. <sup>2</sup> Chca šmobómnyeca, tšěngaftanga atsebácaněnga šmojtsemna, pero tšěngaftanga sempre chiñe šmojtsošbuachese, ntšamo cbonjanabuayiynacá; chca ndóñesna, nje ndoñe corente tšabá ntjajuaboycá chě buayenana soyěnguiñe šmojtsanošbuaché.

<sup>3</sup> Er atše tšěngaftangbeñe sěnjěftsanboshjona, Běngbe Bětsábocana atše tijanóyěngacñe más uámama buatěmbana soyěnga. Atše tčbonjabuatambá: Cristo tojanóbana běnga bacna soyěnga tmojamama, ntšamo Běngbe Bětsabe uabemana palabrěnguiñe chabe juabna oyebuambnayěnga chama tmojanayancá; <sup>4</sup> chě Cristo tmojanatbontsá y unga tianoye cha cháuatayenama Běngbe Bětsá tojanmama, ntšamo Běngbe Bětsabe uabemana palabrěnguiñe chabe juabna oyebuambnayěnga chama tmojanayancá; <sup>5</sup> chě Pédrěbioye tbojáněbēbocnama, y chentšana chě bnětsana útata ca uabobáiněngbioynaca. <sup>6</sup> Chentšana mo shachna patsama más chábeñe ošbuáchiyěnga tojáněbēbuacna, chěnga cányentše imojtsemna ora; chěnguentšanga banga cabá vida imotsóbomñe, masque báseftanga ya tmojóbana. <sup>7</sup> Chentšana Santiágbioye tbojáněbēbocna, y chentšana nýetsca chabe ichmóněngbioye.

<sup>8</sup> Y chentšana átšnaca šonjáněbēbocna. Mo canye šešona cabá shbená tojonýnacá, Cristo chabe ichmoná šonjánbema, chě tempo chama jopróntama ntsebomncá, ndayěntscuana ín्यenga cha tojanabuatambá. <sup>9</sup> Er atše sěndmēna chě más batšá uamaná Jesucristbe ichmóněngbeñe; y ni merecido taitsatobuajoñe “chabe ichmoná ca” chašmotsábobuatmama, er atše tša sěnjánama Jesucristbeñe ošbuáchiyěnga chamot-sesufrínama. <sup>10</sup> Pero Běngbe Bětsá atšbe tšabiama yojan-juabná, y chíyeca atše mora tsmēna ntšamo sěndmēncá, y chabe tšabe juábnaca atšbiama jtsamana, ndoñe nje bonamente quenátsmēna. Er atše más sěnjatrabajá, chě inye Jesucristbe ichmóněngbiama; pero ndegombre atše ndoñe nje canya chca chiyatsma, sinó masna Běngbe Bětsá chě trabajo tojama, tšabe juabna atšbiama jtsebomněse. <sup>11</sup> Ndayá más yojtsámama ndoñe quenátsmēna, atše o chěnga, Jesucristbe soyěngama abuayiynayiñe más tojatrabajá, sinó ndayá chě soyěnga běngbe buayenana soye yojtsemna, y tšěngaftanga chiñe šmojtsošbuaché.

*Chë obanënga cachiñe vida mochtsatsbomnama*

12 Pero bëngbe buayenana soye endmëna, Bëngbe Bëtsá tojanma Cristo cháuatayenama; as ¿ndáyeca básefta tšëngaftanga šmnétsichamo Bëngbe Bëtsá ndoñe yochanjama chë mora obanënga chámuatayenama ca? 13 Pero chca tojtsemna, chë obanënga ndoñe mochántayenasna, Cristo cach ndoñe tontanayena; 14 y Cristo ndoñe matenjésayenëse, bënga nÿe bonamente chabiana fstsabuayiyná, y tšëngaftanga nÿe bonamente chábeñe šmojtsošbuaché. 15 Y canÿe más bëts soye: chca tojtsemnësna, bënga muanjábozna mo chë Bëngbe Bëtsabiana soyënga tmojinÿe ca ichamëngcá, pero ndoñe ndegombre chca tontsemna; er bënga fsëndbëtsichamo, Cristo cháuatayenama Bëngbe Bëtsá tojanma ca. Pero chë obanënga ndoñe mochántayenasna, Bëngbe Bëtsá ndoñe tonjanma Cristo cháuatayenama. 16 Pero chë obanënga ndoñe mochántayenasna, Cristo cach ndoñe tontanayena. 17 Y Cristo cháuatayenama Bëngbe Bëtsá ndoñe matënjänmëse, tšëngaftanga nÿe tondayama chábeñe šmojtsošbuaché; tšëngaftanga chë bacna soyëngama cabá ndoñe perdonánënga šmontsemna. 18 Y chca, chë tmojanóbanënga, Crístbeñe ošbuáchiyënga, chënga cach ndoñe chëngbe bacna soyënguentsana atsebácanënga quemochátsmëna, sinó nÿetsca tescama castigánënga. 19 Bënga tmojtsobátmana Cristo bëngbiana tšabe soyënga chaotsamama, pero chca nÿe quem luarentše bënga vida tmojtsebomnëntscuana, as bënga nÿetscangbiana más muantsomerecena, nÿetscanga bëngbiana chaotsangménama.

20 Pero chca ndoñe ndegombre quenátsmëna, er ndegombre Bëngbe Bëtsá tojanma Cristo cháuatayenama. Mo chë uanatsena shajuancá, jtsinÿanÿayana más shajuanënga chentšana yochjóbozna, cachcá, Cristo tojtjanayena ora, cha tojaninÿanÿé Bëngbe Bëtsá yochjanma ínÿenga chábeñe ošbuáchiyënga chámuatayenama vida chamotsatsbomnama. 21 Chca, ndayá canÿe entšá, Adán, tojanmama, nÿetscanga jóbanama yojtsamna, cachcá, ntšamo inÿe entšá, Cristo, tojanmama, Bëngbe Bëtsá yochjama entšanga chámuatayenama. 22 Er ntšamo, Adánbentšana entšanga bëtsemnayeca jóbanama jtsamnana, cachcá, Crístbeñe ošbuáchiyënga bëtsemnayeca, Bëngbe Bëtsá jamana chë nÿetsca tescama yomna tšabe vida chënga chamotsebomnama. 23 Pero Bëngbe Bëtsá jamana cada ona cháuatayenama nÿa chama tempo tojtsemna ora. Natsana Cristo, y chentšana, Cristo cachiñe quem luaroye chaojésabo ora, nÿetscanga chë Crístbe entšanga imomnënga. 24 Y chentšana, Bëngbe Bëtsá chë Taitábioye, Cristo chabe amëndayana chabojantšabuaché ora, nÿetsca mandadënga, mando y obenana bomnënga corente jtsayënjanayëse. 25 Er

Cristo bontsemna ínÿenga mo reycá jtsaméndayana, chabe uayayenga chabe cucuatšiñe chamoquedama Bëngbe Bëtsá tojamëntscuana. <sup>26</sup> Canÿe uayayá inétsama entšanga jóbanama; pero Cristo último echanjama chabe obenana pronto chaot-sopochocama. <sup>27</sup> Er ntšamo Bëngbe Bëtsabe uabemana palabrénguiñe endayancá: “Bëngbe Bëtsá tojama Cristo nÿetsca soyënguiñe chaotsemándama ca.” Pero “tojama Cristo nÿetsca soyënguiñe chaotsemándama ca” tojayana ora, jtsopodénana puerte tšabá jinÿama, chca ndoñe yontsayana, Bëngbe Bëtsá Crístbeyeca mandaná yojtsemna ca; Bëngbe Bëtsá nda tojanma Cristo nÿetsca soyënguiñe chaotsemándama. <sup>28</sup> Y Cristo nÿetsca soyënguiñe chaotsemándama ora, cach Cristo, chë Uaquiñá, echántsemna Bëngbe Bëtsábeyeca mandaná, Bëngbe Bëtsá chë Cristo nÿetsca soyënguiñe chaotsemándama tojanmá. Y chca, Bëngbe Bëtsá lempe echántsemna, lempe ntšamo quem luar-entše yobínÿniñe.

<sup>29</sup> Inÿetšánaca, báseftanga cachiñe uabáinenga imojtsemna, chë ošbuáchiyenga nduabáinenga obanëngbe cuenta. Chca chënga jamana mo chë obanënga uabáinenga chamotsemnana cuafjamcá. Chë obanënga chámuatayenama ndoñe tontsemnëse, ¿ndáyeca entšanga chëngbe cuenta muantenábaye? <sup>30</sup> Obanënga chámuatayenama Bëngbe Bëtsá ndoñe tonjamëse, ¿ndáyeca bënga muántseprontana nÿets tempo resjuiñe jtsajnama, Crístbiana oservena causa? <sup>31</sup> Atšbiana cada te resjo endmëna jóbanama. Jesucrístbeyeca atšbe catšátanga, atše séntsichamo, chca ndegombre yómnayeca, atše oyejuayá stsemna ca, mo Cristo Jesús Bëngbe Utabnabe canÿe oservenacá, tšëngaftanga chábeñe šmojtsošbuáchema. <sup>32</sup> Mo canÿa tšátjaye bayëngaca tojtsentsjaná orcá, atšbiana puerte resjo enjamna jóbanama, Efeso puebloca; pero nÿe chë entšanga mondbétsejuabnaye jëftsashjáchama soyënga jtsebošëse chca matsjamnëse, ¿ndaye tšabe soye matënjanóbocna, chca atšbiana resjo jóbanama enjamna ora? Obanënga ndoñe mochántayenësna, mochtsama ntšamo entšanga jayanana monduamancá: “¡Mochjase y mochjofsiye, nderado yëfse muatjóbana ca!”

<sup>33</sup> Ndoñe matenoíngñana. Ntšamo canÿa tojanayancá: “Nderado nda bacna amiguëngaftaca tojtsenutaná, cha jtsajbanana chë tšabe soyënga, ntšamo jtsamëse vojyena.” <sup>34</sup> Tšabá šmochtenójuaboye, y juabna ndbomnacá ndoñe; y šmochtsajbaná bacna soyënga amana, chë obanënga ndoñe mochántayena ca juabnaye causa, er báseftanga tšëngaftanguentše Bëngbe Bëtsabe soyënga ndoñe quešmatábuatma. Atše chca séntsichamo tšëngaftanga chašmotsëuatjama.

### *Ntšamo chë obanënga mochtayena*

35 Pero nderado nda nanjatjaye: “¿Ntšamo chë obanënga mochtayena ca? ¿Mocna cuerpo mochtsebomna ca?” 36 ¡Juabna ndbomna entšá! Ndayá tcojajé orna, jtseytana chë jénaye chaóbanama, chë matatema vida chaotsebomnama. 37 Ndayá tcojajecá ndoñe ntsemnana chë juábocnama matatema, ndayá nýe chë meshe, trigo meshe o ndaye mata méshnaca jtsemnana. 38 Pero Bëngbe Bëtsá jamana chë jénayentšana mata chauábocnama, ntšamo jamama cha tojajuabocá; y cha jamana cada jénayentšana canýe mata chauábocnama, ntšamo chë jénayentšana chauábocnama tojtsemncá. 39 Nýetsca cuerpënga ndoñe cachcá ntsemnana. Entšanga canýe cuerpo mondbomna, bayënga inýe cuerpo, shloftšënga inýe cuerpo, y beongna inýe cuerpo. 40 Chë celoca vida bomnënga inýetšá jtsinýnana, y chë quem luarentše vida bomnënga inýetšá. Pero chë buashinýinýanana y botamanana ntšamo celoca vida bomnënga jtsinýnancá, ndoñe cachcá ntsemnana chë quem luarentše vida bomnëngbe botamanancá. 41 Cachcá, shinýe ndoñe quenátsbomna cachca buashinýinýana juashconcá, ni estrellëngcá; y estrellënguentše cach ndoñe cachcá ntsebuashinýinýanana.

42 Cachcá, chë obanënga chámuatayenama Bëngbe Bëtsá chaojama ora chamojtsebomna cuerpo, ndoñe queochátsmëna cachcá ntšamo quem luarentše imojaniyena ora imojéftsebomna cuerpcá. Ntšamo chë jénaye tcojuatbontsá ora chiye jóbanana, cachcá, quem luarentše bënga mondbomna cuerpo jóbanana, inýenga juatbontsana y jtsopochócana; pero bënga chámuatayenama Bëngbe Bëtsá chaojama ora, bënga tsëm cuerpo mochántsbomna y ndocna te queochatopochóca. 43 Chë óbana cuerpo tmojuatbontsá ora, chë cuerpo tondaye ntsámanana; pero chë obanënga chámuatayenama Bëngbe Bëtsá chaojama ora, chë tsëm cuerpo puerte echántsebuashinýinýana y echantsámana. Bënga quem luarentše imoyenëntscuana imobomna cuerpo, nýe batšá obenana jtsebomnana; pero chë Bëngbe Bëtsá šochjatsataye tsëm cuerpo, puerte obenana bomna cuerpo echántsemna. 44 Quem luarentše imobomna cuerpo endmëna cam luarentše vida chaotsebomnama; pero bënga chámuatayenama chaojama ora, chë bënga mochtsebomna tsëm cuerpo, puerte chë Espíritbeyeca echántsemandana. Canýe cuerpo quem luarentše vida chaotsebomnama yómnyeyeca, canýe cuerpënaca, jtsemnana celoca vida chaotsebomnama.

45 Chca Bëngbe Bëtsabe uabemana palabrenguñe endayana: “Bëngbe Bëtsá, chë natsana entšá tbojanma chaotsainama ca.” Adánbentšana nýetsca entšanga jabocanana, pero



Crístbeyeca, Bëngbe Bëtsá tojama banga mo tsmëma entšangcá chamotsemnana; chca, Cristo jtsemnana mo chë ústonoye Adancá; pero Cristna canye espíritu endmëna, y chë espíritu jamana entšanga chë nyetsca tescama yomna tšabe vida chamotsebomnana. <sup>46</sup> Pero chë celoca nyetsca tescama vida jtsebomnana cuerpna ndoñe natsana ntjóboconana, ndayá chë quem luarentse vida jtsebomnana cuerpo; chentsana chë celoca vida jtsebomnana cuerpo. <sup>47</sup> Bëngbe Bëtsá, chë natsana entšá tbojanma fshántseca, y chca, cha fshantsentšana tojánboconá; Cristna, mo entšángbentšana chë natsaná tsmacá bemanacá, celocana tojánboconá. <sup>48</sup> Adánbentšana, chë natsana entšá, chë fshántseca tmojanmábentšana tmojábocanënga, ntšamo cha yojamncá jtsemnana. Cachcá, chë mo tsmëmangcá tojábiamëngna, Cristcá jtsemnana; Cristo nda celocana tojánabo.

<sup>49</sup> Ntšamo bënga jtsinynana chë Bëngbe Bëtsá fshántseca tbojábema entšacá, cachcá bëngnaca mochtsinyná ntšamo chë celocá yomnacá.

<sup>50</sup> Jesucrístbeyeca atšbe catšátanga, atše cbochjáuyana, nye quem luarentse vida jtsebomnana cuerpëngaca, bënga ndoñe ntsoybenana Bëngbe Bëtsabe amëndayoye jamashënguana; ni ndayá yochjopochóca soye, ntsoybenana ndayá ndoñe yochanjopochóca soye jtsebomnana. <sup>51</sup> Smochjouena, atše canye soye cbochanjáuyana, y chë soye Bëngbe Bëtsá entšanga tempo ndoñe tonjaninýanýe: Bënga ošbuáchiyënga nyetscanga ndoñe quemochatóbana, pero Bëngbe Bëtsá šochanjátrocaye mo tsmëmangcá. <sup>52</sup> Nye betscó, mo tcojofshetá y cachora tcojtafšnacá, quem luare ya jopochócama ora, canye ángel trompetéřjua chaojuájatëta ora, er chora trompetéřjua echanjuénana, Bëngbe Bëtsá echanjama obanënga chámuatayenama, nyetsca tescama vida jtsebomnana; y bënga, chë ainënga mochtsemnëngna, cha šochanjátrocaye mo tsmëmangcá jtsemnana; <sup>53</sup> er jtseytana Bëngbe Bëtsá chaotrocá chë bëngbeñe jopochócama yomna soye, ndocna te yochanjopochóca soyiñe; y ndayá bëngbeñe yochjóbana soye, ndocna te yochanjóbana soyiñe. <sup>54</sup> Bëngbe Bëtsá chca bëngaftaca chaojama ora, chë cha jatrócana ndayá bëngbeñe yochjopochocacá, ndocna te yochanjopochóca soyiñe, y ndayá bëngbeñe yochjobancá, ndocna te yochanjóbana soyiñe, chora echanjochnëngo ntšamo Bëngbe Bëtsabe uabemana palabrënguiñe chama endayancá:

Bëngbe Bëtsá tojayëñaná chë entšanga chamóbanama endbétsama obyenana;  
entšanga ndoñe más quemochatóbana cá.

<sup>55</sup> ¡Mora entšanga chamuatóbanama chaotsama obenana ya ndoñe quenátsmëna;

Bëngbe Bëtsá chë obenana nyetsca tescama tojayëñjaná ca!

<sup>56</sup> Entšanga bacna soyënga tmojama causa, obenana endmëna entšanga jóbanama chaotsamnana. Ndayá leyiñe iuayanama, entšá jtsetatšëmbuana ndayá yomna bacna soyënga jamana, y chca tátšëmbo causa, chca bacna soyënga jamama juabnëngaca mandaná jtsemnana, y cabana, jóbanama jtsemnana. <sup>57</sup> ¡Pero Bëngbe Bëtsá mochtsatschuanaye, bënga mo ayëñjanayëngcá cha šojábiamama, er ya ndoñe šontsamna chca jtsemnana, chë Bëngbe Utabná Jesucristo bëngbiana tojanma sóyeca!

<sup>58</sup> Chíyeca, Jesucristbeyeca atšbe catsátanga, atšbe bonshánënga, Jesucristbeñe sempre puerte šmochtsošbuáchiye y ndocna te šmatjaleséncia ndocná ni tondaye chaotsama chábeñe ošbuáchiyana chašmotsajbanama. Sempre šmochtsentšena bëtscá jtsamana Bëngbe Utabnabiana trabájayiñe, er tšëngaftanga šmondëtatšëmbo, Bëngbe Utabnabiana trabájayiñe ndayá šmojamcá, ndocna te nyë bonamente ntsemnana.

## 16

### *Jerusalenoca ošbuáchiyëngbiana crocenánama*

<sup>1</sup> Mora chanjóyebuambaye chë Jerusalenoca Bëngbe Bëtsabe entšanga ndbomnjëmëngbiana tšëngaftanga šmochjuíchmua crocenánama. Atše sëntseboše tšëngaftanga chca chašmoma ntšamo chë Galacia luaroca ošbuachiyëngcá enefjuanenache chama atše sënjanabuayenacá. <sup>2</sup> Cada tmengo, cmontsamna batšá crocénana jaluárana ntšamo chë semaniñe šmojonýencá, y šmochtsejuabaye; chca atše choye chajjá ora, ndoñe chacmondëtsamna quem uajabótama chora crocénana játatbanayana. <sup>3</sup> Y atše choye chajjáshjango ora, Jerusalenoye chjichamuá chë tšëngaftanga mo tšabengcá šmojubuáyana entšanga, chë Jerusalenoca ošbuachiyëngbioye tšëngaftangbe crocénana chámuayentšbuachema, y tsbuanachangá chanjúyentšbuachiye ndayá imojtsamama chënga jábuayenama. <sup>4</sup> Y nderado, átšnaca chëngaftaca jama tšabá tojtsemnëse, chënga átšëftaca chamua.

### *Ntšamo Pablo yojanjuabná chë luarëngoye jama*

<sup>5</sup> Atše sëntsejuabná tšëngaftangbioye jama jautsëtsayama, Macedonia luarëjana chajjachnëngüentšana, chentša ošbuáchiyënga jaftsanyëse, er atše sëntsejuabná natsana Macedonia luaroye jëftsana. <sup>6</sup> Nderado baseftayté tšëngaftangbeñe chašuetsetetana, o nderádose nyets uaftena tempo; as tšëngaftanga inye luaroye játama

chašmuájabuachama, ndēmoye jama chašojtsemnoye. <sup>7</sup> Atše ndoñe quetsátsboše nýe betesco tšëngaftanga jáftsanýana, er atše sentsobátmana más bayté tšëngaftangbeñe jajtsemnana, Bëngbe Utabná chca šojalesenciase. <sup>8</sup> Pero Efesoca šochanjajétana Pentecostés fiesta chaojobuáchëntscuana. <sup>9</sup> Er Bëngbe Bëtsá tojama atše jobenayama muentše chë tsabe noticiëngama banga jábuayenama, y chíyeca banga Crístbeñe montsošbuaché; pero bángnaca atšbe contra montsemna.

<sup>10</sup> Timoteo tšëngaftangbioye chaojase, yejuana šmochtsantješna cha tondayama chaondëtsauatjama, tšëngaftangbeñe tojtsemnëntscuana, er cha Bëngbe Utabnabiana endëtrabája, ntšamo atše sëndamcá. <sup>11</sup> Chcasna, ndocná chábioye chabondëtsáboyënja. Bëtscá šmochjama cha natjëmbana átšbioye chauatábama, er atše cha sentsobátmana, chë ínýenga muentše Crístbeñe ošbuáchiyëngaftaca.

<sup>12</sup> Y Jesucrístbeyeca bëngbe catšata Apólosna, atše bëtscá cha sënjaimpadá, chë Jesucrístbeyeca catšátanga tšëngaftanga jányama mochjángaftaca chaotsama, pero cha ndoñe chenátsbošena choye mora jama. Cha choye caochjá, chaojobená ora ca.

### *Pablo chënga jtadióšoftanama*

<sup>13</sup> Sempre šmochtsenocuedana chë Bëngbe Utabná ndoñe chašmondëtseservenama tojtsama soyëngama. Nýets tempo, Crístbeñe y chabe soyënguíñnaca šmochtsošbuáchiye. Ainaniñe puerte añemo šmochtsebomna, y bëtscá šmochtsama Bëngbe Bëtsabe obenánaca. <sup>14</sup> Y nýetsca soyënga ntšamo chašmojtsamcá, bonshanánaca šmochtsama.

<sup>15</sup> Jesucrístbeyeca atšbe catšátanga, tšëngaftanga šmondëtatšëmbo, Estéfnas y chabe pamíllanga chë natsanënga monjamnama Jesucrístbeñe jtsošbuáchiyama, Acaya luaroca, y bëtscá imojtsentšena Bëngbe Utabnabiana jtsetrabájayana, chabe entsanga jtšëjabuáchanëse. <sup>16</sup> Atše cbaimpadá, tšëngaftanga lempe šmochtsama ntšamo cmojtsamëndacá, chca entsanga mo tšëngaftangbe uanatsanëngcá, y ntšamo nýetsca chë ínýenga mo bëngcá quemuiñe uajabuáchanëse trabájayënga cmojtsamëndacá.

<sup>17</sup> Atše tša oyejuayá sëntsemna tšëngaftangbe pueblentšana Estéfnas, Fortunato y Acaico moye tmojáshjajnama, er atše sentsobena oyejuayá chëngaftaca jtsemnana, tšëngaftangaftaca choca jtsemnana cabá ndoñe sentsobenëntscuana. <sup>18</sup> Er chënga átšbioye tmonjabo y tšëngaftangbiana šmonjauyana, y chca chënga tmonjama, atše y tšëngaftanga natjëmbana ainánaca chamotsomñama. Chënga šmochtsétabna mo puerte uámana entsangcá.

19 Asia luaroca ošbuachiyëngcá enefjuanënga cmontsacheuaná. Aquila y Prisca y chatbe yebnentše mondbétsenefjuana ošbuáchiyënga cmontsacheuaná, Bëngbe Utabnábeñe ošbuachiyëngcá, tšëngaftangcá bétsemnayeca. 20 Muentša ošbuáchiyënga nyetscanga cmontsacheuaná. Nyetscanga šmochjenchuaye mo Jesucristbeyeca catšatangcá, jtenámochëse, ntšamo cach tšëngaftangbe pamíllanga puerte bonshanánaca šmondbetsacheuanaycá.

21 Quem palabrënga tšëngaftanga jacheuayama cach atšbe cucuátšeca sentsabiamná.

22 Nderado nda Bëngbe Utabnábioye ndoñe tbontsebobonshana, Bëngbe Bëtsá nyetsca tescama chabocastigá. ¡Bëngbe Utabná cachiñe cochjésabo!

23 Atše, Bëngbe Bëtsá sëntseimpadana, Bëngbe Utabná Jesús chaoma tšëngaftangbeñe tšabe bendicionënga chaotsemnama.

24 Atše, nyetsca tšëngaftanga cbondábabuanyëshana, canya mo tšëngaftangcá, Cristo Jesúseftaca cányiñe mo canyácá jtsemnëse.

## 2 Corintios

### *Jacheuayama*

<sup>1</sup> Atše Pablo, Jesucristbe canye ichmoná, Bëngbe Bëtsá atše chca jtsemnama yojánbošeyeca, Jesucristbeyeca bëngbe catšata Timotéoftaca quem tsbuanácha sentsabiamná, Corinto pueblaca Bëngbe Bëtsábeñe ošbuachiyëngcá enefjuanëngbiama, y nyets Acaya luarentše Bëngbe Bëtsabe nyetsca entšangbiámnaca. <sup>2</sup> Atše sëntseimpadana Bëngbe Bëtsá Bëngbe Taitá y Bëngbe Utabná Jesucristo, chaboma tšëngaftangbeñe tšabe bendicionënga chaotsemnama y ainaniñe tšabe ebionana chašmotsebomnama.

### *Ntšamo Pablo tojansufrí*

<sup>3</sup> Bënga mochtsatschuanaye Bëngbe Bëtsá, chë Bëngbe Utabná Jesucristbe Taitá, bëngbe Taitá, chë bëngbiama lastemado yomná, y ndaye padecena soyënguiñe tmojtsemna ora, bënga šondbetsañemuayá. <sup>4</sup> Cha bënga jtsañémuayana padecena soyënguiñe tmojtsemna ora, chca, bënga chamotsobenama chë tmojtšesufrinënga jañémuayama, ntšamo Bëngbe Bëtsá šojujabuachcá chënga jujabuáchëse. <sup>5</sup> Er ntšamo Cristo tojansufricá, bënga tša fsëndësufrina chabiamna oservéniñe; cachcá, Cristbeyécnaca Bëngbe Bëtsá jamana bënga puerte añemo ainaniñe fchaitsebomnama. <sup>6</sup> Er bënga tmojtšesufrinëse, jtsemnana bënga jobenayama tšëngaftanga jañémuayama chë šmojtšesufrina ora, y atsebácanënga chašmotsemnama, Bëngbe Bëtsabe soyëngama joudenëse. Chë padecena soyënguiñe tmojtsemna ora Bëngbe Bëtsá šojañemose, jtsemnana bënga fchayobenama tšëngaftanga jañémuayama, padecena soyënguiñe šmojtsemna ora. Chca, bënga jobenayana tšëngaftanga jujabuáchana, Bëngbe Bëtsábeñe chašmotsobátmanama, chábeñe jtsošbuachiyëse, y lempe jtsóboyayama, ntšamo bënga fsënjasufricá šmojtšesufrina ora. <sup>7</sup> Bënga sempre fsëndobátmana y tšabá fsëndëtatsëmbo chë padecena soyënguentšana tšabá šmochjábocanama, er bënga fsëndëtatsëmbo, chë ntšamo bënga fsënjasufricá tšëngaftanga šmojasufrima; y cachcá, Bëngbe Bëtsá yochjama tšëngaftanga ainaniñe puerte añemo chašmotsebomnama, ntšamo bënga fchaitsebomnama cha tojamcá.

<sup>8</sup> Jesucristbeyeca atšbe catšátanga, bënga fsëntseboše tšëngaftanga chašmotsetátšëmbo ntšamo bënga Asia luaroca tša fsënjasufrinama. Bënga puerte padecena soyënguiñe fsënjaninyena, nya ndoñe más jauantacá, chentšana vídaca jabocanama ntjatobatmancá. <sup>9</sup> Bënga šontsanëñana mo

jóbanama cuaftsamncá. Pero chë soye tonjanoservé, bënga jtsošbuáchiyama Bëngbe Bëtsábeñe, nda inétsama obanënga chámuatayenama, y ndoñe cabëngbeñe ntsošbuáchiyana. <sup>10</sup> Cha šojatsebacá bënga jóbanama puerte resjo enjamnentšana, y cachcá šochjátsebacaye bëngbiama cachiñe cachcá tša resjuiñe chamojtsemna ora. Bënga puerte chábeñe fsëndobátmana, puerte padecena soyënguiñe bënga chamojtsemna ora, cha cachiñe šochjátsebacama. <sup>11</sup> Tšëngaftángnaca cmontsamna bënga jujabuáchana, bëngbiama Bëngbe Bëtsá jaimpádase; chca, ba entšanga Bëngbe Bëtsá mochanjëtschuaye, er cha tojama bënga chábentšana tšabe bendicionënga fchayóyëngacñama, cha jamëse ntšamo chënga bëngbiama tmojanimpadacá.

*Ndáyeca Pablo Corinto puebloye ndoñe tonjána*

<sup>12</sup> Canye soye endmëna ndayá oyejuayënga šojtsabiamná: bënga bëngbe ainantša juabnëngaca jtsetatšëmbuana puerte tšabá jtsamëse ftsiyena ca, ntšamo chë Bëngbe Bëtsabe entšanga endbetsamncá, nyetsca quem luarentša entšángbeñe, y más tšëngaftangbeñe, y bënga jtsetatšëmbuana ntšamo tšabá tifjamcá nyets ainánaca tifjamama. Bënga tondaye chibiatsma quem luarentša entšangbe osertanánaca, ndayá Bëngbe Bëtsá tša tšabia bëngaftaca bëtsemnayeca, šojjúabuache chca chamotsiyenama. <sup>13</sup> Er ntšamo fsëntsabiamnamna ndoñe queftsátsoše, ntšamo tšëngaftanga šmojtsalía y cmojtsësertánentšana inyetsá játayanana, y sentsobátmana puerte tšabá lempe chacmósertama. <sup>14</sup> Mora ndayá atše stsamama ndoñe lempe quecmátësertana. Pero atše sëntseboše tšëngaftanga chama corente chacmósertama; chca, Bëngbe Utabná quem luaroye chaojésabo ora, tšëngaftanga bëngbiama oyejuayënga chašmotsemnama, ntšamo bëngnaca tšëngaftangbiama oyejuayënga fchantsemncá.

<sup>15</sup> Chca ndegombre yomnama atše sëndëtatšëmboyeca, atše sënjanjuabná tšëngaftangbioye jshétsana jányama, y chca, chë tšabe soye tšëngaftangbiama uta soye jamana, tšëngaftangbioye uta soye jányëse. <sup>16</sup> Atše sënjanjuabná tšëngaftanga jshaftsanýana, Macedonioye ayiñe chëjana matijánachnëngo ora; y chentšana, ya camoye ataboye ora, tšëngaftanga cachiñe jáftsanýana. Chca, tšëngaftanga mašmëñjanobená atše juajabuáchana Judea luaroye játama. <sup>17</sup> Atše chca jamama tsjanjuabná ora, ¿chca tijanma ndoñe corente tšabá ntjenjuaboycá? ¿Tšëngaftanga šmatjájuaboye, ntšamo nyë quem luarama enójuabnaye entšanga monduamancá, cachora canye soyama “áiñe” y “ndoñe ca” jayanëse, atše ndayánaca jamama snëtsejuabnaye ca?

18 Canÿe soye ndegombre endmëna: Bëngbe Bëtsá sempre endbama ntšamo tojayancá, y chca puerte ndegombre endmënayeca, atše ndayánaca chjama ca stjayana ora, chca ndoñe questsbatayana chentšana atšbe juabna jatstrócama, mo canÿa cachora canÿe soyama “aíñe” y “ndoñe ca” cuafjatichamcá. 19 Er Cristo Jesús, Bëngbe Bëtsabe Uaquiñá, ndabiama Silvano, Timoteo y atše tšëngaftangbeñe fsënjanabuayiná, ndoñe ntsejuabnayana canÿe soye jamama y chentšana jatsjuabnayana inÿetsá jatsmama, mo canÿe entšá cachora canÿe soyama “aíñe” y “ndoñe ca” cuafjatichamcá, ndayá chana nÿets tempo ntšamo tojtsejuabnacá jayanana y jamana ntšamo ndegombre yomncá, chentšana ntjatstrocyacá. 20 Er ndayá cha tojamiñe, lempe ntšamo Bëngbe Bëtsá tojašebuachenacá jocúmpliana, mo chë lempe ntšamo Bëngbe Bëtsá tojášebuachenama cha “aíñe ca” cuaftsichamcá. Chíyeca, Bëngbe Bëtsá bënga tmojtsatschuaná ora, Cristo Jesúsbeyeca bënga jayanana “chca chaotsemna ca”. 21 Pero Bëngbe Bëtsá endmëna nda inétsama bënga y tšëngaftanga puerte Crístbeñe chamotsošbuáchema, cháftaca cánÿiñe mo canÿacá jtsemnëse; y Bëngbe Bëtsánaca endmëna nda bënga šojabacacá chabe entšanga chamotsemnana. 22 Cha tojama chë Uámana Espíritu bëngbe ainaniñe cháumashënguama jtsemándayama, y chë soye jtsinÿanÿnayana bënga Bëngbe Bëtsabe entšanga imomnana. Y bëngbe ainaniñe chë Espíritu imobómnyeca, bënga corente jtsetatšëmbuana bënga mochjóyëngacñama lempe ntšamo Bëngbe Bëtsá bënga jatšatayama šojašebuachenacá.

23 Bëngbe Bëtsá entsonÿá atše ndegombre stsichámuama. Atše Corinto puebloye cabá ndoñe chiyjá, er atše ndoñe quetsátsboše tšëngaftanga jašëchnana, chë bacna soyënga šmojamama, tchojaucácanëse. 24 Bënga ndoñe queftsátsboše tšëngaftanga jamëndana ndayiñe cmojtsamna jtsošbuáchiyana; er tša šmojtsošbuachéyeca, ndoñe quešmochatajbaná Crístbeñe jtsošbuáchiyana. Bëngbe fsëntseboše ndayá tšëngaftanga jujabuáchana, corente oyejuayënga chašmotsemnana.

## 2

1 Chíyeca atše ndoñe chiyjá jautsëtsayama, er atše sënjanjuabó y sënjanéniyana choye ndoñe jama ca, bacna soyënga šmojtsanmama jábuayenama, y chca, ngménënga játabiamana, ntšamo chanÿe sënjamcá. 2 Tšëngaftanga ngménaca chašmotsemnana atše stjämëse, ¿nda yochjama atše oyejuayá chaitsemnana, sinó nÿe tšëngaftanga, chë atše ngménënga tijábiamënga? 3 Chíyeca tcbonjanëbuábiamana

chë ntšamo šmojualiaca, chca, atše choye stjášhango ora, tšëngaftanga átšbioye ndoñe ngmená chašmondëbemama. Chca játamamna, tšëngaftangbiana más tšabá endmëna oyejuayá atše chašmobema. Atše tšabá sënjántatšëmbo ndayá átšbioye oyejuayá šojabemcá, tšëngaftángnaca chca mašmënjánbošena y oyejuayënga chë soye matcmënjánabiama. Chíyeca atše ndoñe chiyataná, nyetscanga oyejuayënga jtsemnama ndoñe quenjatopodena ora. <sup>4</sup> Pero chë tsbuanácha tcbonjanëbuábiana ora, atše corente šonjanongmé y ainana šonjántsetšena chca jabuache soyënga tšëngaftanga jubuábiamama, y chca jamama shëchbuýnaca sënjanoperdé. Pero atše ndoñe checbátanëbuabiama atše jatsmama tšëngaftanga puerte ngmënaca chašmotsemnama, ndayá chašmotsetatšëmbuama atše tša cbababuánýeshanama.

*Perdón chë bacna soye amabiama*

<sup>5</sup> Y mora, chë tšëngaftangbeñe puerte ngmënana chaotsemnama tojama boyabásabiamna, cha átšbioye ndoñe ngmená chešnátšbema, ntsachetšá tšëngaftanga tcmojabiamcá, ínýengbioye ínýengbiana más. Chca séntsichamo, er atše ndoñe quetsátšboše jayanama ntsachetšá tojamama cha más bacna soye tojama ca. <sup>6</sup> Banga tšëngaftanguentšënga ntšamo šmojamcá, chë entšabiama ya bëtš castigo entsemna. Nye nyetšá ponto. <sup>7</sup> Chamna, ndayá mora cmojtsamna jamamna entsemna, cha jtseperdónana y jañémuana, chca, ndocna tšabe soye jamama ndobená ndoñe chaondëtsemnama, chë castiguama puerte ngmënaca bëtsemna causa. <sup>8</sup> Chíyeca, tšëngaftanga cbaimpadá cachiñe tšabá chašminýinyé chábioye corente šmobobonshánama. <sup>9</sup> Tempo ya chama tcbonjanëbuábiana, atše jinýama tšëngaftanga aíñe o ndoñe šmotsanprontánama, lempe ntšamo tcbonjanamëndacá jamama. <sup>10</sup> Chcasna, ndánaca ndayánaca tšëngaftanga chašmojaperdoná ora, átšnaca cha chantseperdóna. Y atše cha chantseperdóna, ndayá japerdónama ndegombre tojtsemnëse. Y chca chanjama tšëngaftangbe tšabiama y Cristbe delante. <sup>11</sup> Atše tšëngaftangcá, quem entšábioye šcoperdoná chë bëngbiana tojama bacna soye; chca, Satanás ndoñe chaondobenama bënga jáingñama, er bënga mondëtatšëmbo cha inëtseboše ndaye bacna soye entšá chaotsamama.

*Ndáyeca Pablo ndoñe natjëmbana Troas puebloca tontsanoquedañe*

<sup>12</sup> Atše Troas puebloca sënjánashjango ora, Cristbe tšabe noticiënga jábuayenama, atše sënjáninýe Bëngbe Utabná tojanma chentše banga chë buayenana soye chamouenama y



chëngbe ainaniñe chana chamóyëngacñama. <sup>13</sup> Masque chca enjamna, atše ndoñe quetstétsobena natjëmbana ainana jtse-bomnana, er atše sënjanjuabná Jesucristbeyeca bëngbe catšata Tito chentše jinyenana, pero ndoñe chca. Chíyeca, Troas pueblentša entsanga sëntanadiošoftaná, y Macedonia luaroye sënjána.

*Crísoftaca cánýiñe mo canýacá jtseemnëse, bënga mo ayëñjanayëngcá jtseemnana*

<sup>14</sup> Atše Bëngbe Bëtsábioye sëndbëtsatschuanaye, bënga bacna soyënga jamama juabnënga cha tojanëyëñjanama, tempo šojanamënda juabnënga; y chë mora bënga Crísoftaca cánýiñe mo canýacá jtseemnëse, nýets tempo cha šnetsënachayama, mo canýe ayëñjanayacá, y chë nýets luarenache entsanga Cristbiamama soyënga chamotsábuatmama bëngaftaca cha yojtsamama, mo nda canýe botamana uanguëtše soye nýets luarënguenache chauáshanama cuaftsamcá. <sup>15</sup> Er chë incienso tojtsejuinýinýana ora, entsábioye tšabá juanguëtšenana; cachcá Cristbe tšabe noticiënga fstsabuayiná ora, Bëngbe Bëtsabiamama bënga jtseemnana chë ndëmuanýënga tmojtsamama cha oyejuayá chaotseemnana. Incienso tcojtsejuinýná ora, nýetscángbioye juanguëtšenana. Cachcá, Bëngbe Bëtsabe palabra fstsoyebuambná ora nýetscanga jouenana, Cristo yojtsatsebacanga y chë pochocánënga jtseemnana imojtsajnëngnaca. <sup>16</sup> Chë pochocánënga jtseemnana imojtsajnëngna, pochocánënga mochanjábocana, er ntšamo bënga fsëndabuayinacá y tmojouencá chënga tmojtsaboté; y chca, chëngbiamama chë tšabe noticiënga jtseemnana mo canýe obanabe uanguëtšancá. Pero chë Cristo yochjátsebacangna, tšabe noticiënga tmojóyëngacñeyeca, mochanjobenaye tšabe vida nýets tempo jtsebomnana; y chca, chëngbiamama chë tšabe noticiënga jtseemnana mo canýe puerte botamana uanguëtšancá. Y asna, ¿nda obenana yojtsebomna chë tšabe noticiënga jábuayenama trabajo jtsamama? <sup>17</sup> Bënga chë tšabe noticiënga ndoñe queftsatabuayiná, ntšamo ba entsanga imojtsamcá, mo nýe batšá uámana soyënga cuaftsemncá, y ndayánaca juácánama, mo nda ndaye nduámana soyënga cuaftsencá. Banga chca mondama; bënga ndoñe. Bënga, Crísoftaca cánýiñe mo canýacá jtseemnëse, fsëndabuayiná mo Bëngbe Bëtsabe delante cuaftseemnëngcá, ndegombre nýe ntšamo tšabá yomncá nýets ainánaca jtsebošëse, y mo Bëngbe Bëtsabe ichmonëngcá.

### 3

*Chë Bëngbe Bëtsabe tsëm tratama buayenana soye*

1 Chca bēngbiama fstsjayana ora, tšēngaftanga cmojtsinŷana ¿bēnga cachiñe tiftētontsé cabēnga bētsētsanga enobiamnayana? ¿O bēnga šojtsamna, mo inŷengcá, tšēngaftanga juyentšbuáchiyana o juátjañana tsbuanachangá, bēnga tšabá ftsamama chēchangaca jinŷanŷiyama? 2 Bēnga bēngbe ainaniñe puerte tšabá fsēndētatsēmo, nŷetsca entšanga, ntšamo tšēngaftanga jtsamēse šmoyencá tmojinŷe ora, tšēngaftanga jtsinŷanŷnayana bēnga ndegombre ntšamo tšabá yomncá ftsamama. Chca, tšēngaftanga jtsemnana mo canŷe tsbuanachacá, nŷetscanga jtsabuatmana y jtsoberenana jualána, bēnga tšabá ftsamama. 3 Nŷetscanga tšabá mondētatsēmo Cristo tojanma tšēngaftanga chábeñe chašmotsošbuáchema, y bēngaftaca cha chca tojanmámna. Chca, tšēngaftanga šmondmēna mo Cristbe canŷe tsbuanachacá, ndayēcha quem luarentša entšángbioye tojuyentšbuaché bēngaftaca. Tšēngaftanga ndoñe chešmatanobená Crístbeñe ošbuáchiyēnga jtsemnana entšangbe trabájoca, er Crístbeñe šmonjanošbuaché chē Bēngbe Bētsá Ainabe Espíritbeyeca; y chca, tšēngaftanga šmondmēna mo canŷe tsbuanácha cháftaca uabemanēchacá, y ndoñe mo entšángbeyeca uabemana tsbuanachacá. Bēngbe Bētsá chē mandēnga ndētšbé tablēbenguiñe tojanábema, entšanga chamotsobedecénama, pero tšēngaftangna Cristbe buayenana soye tšēngaftangbe ainaniñe šmojóyēngacñe.

4 Crístbeyeca Bēngbe Bētsábeñe jtsošbuáchiyēse, bēnga corente fsēndētatsēmo chca ndegombre bētsemnana. 5 Ndoñe quenátsmēna, nŷe bēnga cánŷenga quem trabajo jamama ftsobena y játayanana bēngbe soye chē trabajo yojtsemnana, er bēnga jtsoberenana chca jamama, nŷe Bēngbe Bētsabe ujabuáchenanaca; 6 er cha tojama bēnga fchayobenama quem trabajo jamama, chē entšanga jábuayenana Bēngbe Bētsá chabe entšángbioye tojanašebuachená soyēngama, ndayá Cristo tojanma sóyeca, mo canŷe tsēm tratcá, Bēngbe Bētsá y chabe entšángaftaca. Quem soye ndoñe quenátsmēna mo chē Bēngbe Bētsá tempo Israeloca entšángbioye léyeca tojanašebuachená soyēngcá. Inŷetšá; entšanga mondama Bēngbe Bētsabe tsēm trato, Uámama Espíritbeyeca. Chē natsana trato, chē uabemana ley, ntšamo chiñe iuabemancá ndoñe tconjama causa, entšá jóbanama jtsemnana; pero Cristbe tšabe noticiēnga, chē tsēm trato, entšanga ainaniñe tmojóyēngacñe ora, chē Uámama Espírítu jamana, chē nŷetsca tescama yomna tšabe vida chēnga chamotsebojnana.

7 Quem Moisesbe ley, chē ndoñe tmonjobedecema entšanga jóbanama jtsamnana, ndētšbé tablēbenguiñe letrēngaca tmojanábema, y Bēngbe Bētsá Moisésbioye

tbojanantšabuaché ora, cha tša buashinÿinÿaniñe tojánabo. Chë causa entšanga ndoñe imontsobena ni mo jinÿana Moisesbe jubiá, er tša ibojtsanjuebëbuashinÿinÿana, Bëngbe Bëtsáftaca tbojánencuententšana tojtanabo ora. Pero betscó tojanéjbana chë jubiá chca buashinÿinÿanana. Chë ley, chë natsana trato, Bëngbe Bëtsá tojanayentšbuaché ora, tša buashinÿinÿaná naca cha tojanmëse; <sup>8</sup> ndegombre, más bën y uámana tempo entsemna chë Bëngbe Bëtsá bënga šojanašebuachená tsëm soyënga yojtsama ora, chë Uámana Espíritu bëngbe ainaniñe cháuamashënguama Bëngbe Bëtsá tojama ora. <sup>9</sup> Bëngbe Bëtsá chë ley tojanayentšbuaché ora, chë ndáyeca entšanga jóbanama yojánamna, ntšamo chiñe betsayancá ndoñe tmonjama causa, chora cha chca tojanma puerte chabe buashinÿinÿanana jinÿanÿiyëse; ndegombre más bën y uámana tempo entsemna chë mocna ora Bëngbe Bëtsá yojtsama entšanga chabe bominÿiñe tšábenga chamotsemnana. <sup>10</sup> Er chë Bëngbe Bëtsá ley tojanayentšbuaché ora tojaninÿanÿé buashinÿinÿanana, mora jtsinÿnana mo ya tondaye cuabndëtsemncá, chë Bëngbe Bëtsá entšangbiamá tsëm soyënga tojtsamama tcojtsonÿá ora, chë tša buashinÿinÿanana yojtsemna ora. <sup>11</sup> Er chë leyama tempo, chë ya jochnënguama tempo entsemna ora, Bëngbe Bëtsá chabe buashinÿinÿanana y uámanana tojinÿanÿese; ndegombre chë Bëngbe Bëtsá tsëm soyënga entšangbiamá jamama ora, chë ndocna te yochanjochnëngo tempo ora, Bëngbe Bëtsá más chabe buashinÿinÿanana y uámanana echántsinÿanÿnaye.

<sup>12</sup> Y chca, Bëngbe Bëtsá chca bëts soyënga yochjamama fsëndobatmánayeca, bënga fsëntsobena jóyebuambayama, nÿetsca soyëngama jayanëse, tondayama ntjatauatjácá. <sup>13</sup> Y chca, bënga ndoñe Moisescá queftsátama, chë chabe jubiá chaobuashinÿinÿenama Bëngbe Bëtsá tojanma ora, canÿe entšëjuaca yojtsenamochëcjua; cha chca tojanma, chë Israeloca entšanga ndoñe chamondobená jinÿama chë jubiá buashinÿinÿanana ya yojtsëchnëjuana ora. <sup>14</sup> Pero Bëngbe Bëtsá tojanma chënga ndoñe chaondósertama ntšamo Moisesbiajana cha tojanayancá. Y cabá quem tempo, ntšamo Bëngbe Bëtsá Moisésbioye tbojanšbuachenacá chëngbiamá jamama, Israeloca entšanga tmojtsalía ora, ndoñe ntsësertánana Bëngbe Bëtsabe ndegombre soyënga, mo chëngbiamá iytëmena soyënga cuaftsemncá, mo chë Moisés yojtsenamochëcjua entšëjuacá. Y chca endmëna, er nÿe Crístoftaca cánÿiñe mo canÿacá jtsemnëse, chënga jtsobenana chë soyëngama jósertana, y iytëmencá ya ndoñe ntsemnana. <sup>15</sup> Y mëntscoñama, Moisesbe librëšangá chënga tmojtsalía ora, ndoñe ntsësertánana Bëngbe Bëtsabe ndegombre soyëngama, ntšamo chiñe tojtsayancá ja-

mama ndoñe montseboše causa. <sup>16</sup> Pero canye entśá chë Bëngbe Utabnabe benache tojishache ora, cha jtsobenana chë soyëngama josértana. <sup>17</sup> Y Bëngbe Utabná y Espíritu canya bondmëna, y Bëngbe Bëtsabe Espíritu tojtsemnentše, chë bacna soyënga jamama juabnënga, ni chë ley ndoñe ntsemándayana. <sup>18</sup> Moisés chabe jubiañe Bëngbe Bëtsabe buashinÿinÿanana y uámanana tojaninÿanÿé, y chíyeca, canye entśéjuaca yojtse-namochécjua, chca, chënga ndoñe chamondinÿama. Pero bënga ošbuáchiyënga nyetscanga jtsinÿanÿnayana Bëngbe Utabnabe buashinÿinÿanana y uámanana, mo canye espejo canye soye tojtsinÿanÿnacá, y ndoñe queftsátsoše ntśámnaca jamëse chë soye jatsëytamianana. Cha bëngaftaca yojtsama cada te más chë ntšamo cha yomncá bënga chamotsemnana, cada te más bëtsëtsanga chë ntšamo cha yomncá jtsemnëse. Chca endmëna ntšamo Bëngbe Utabná yojtsama; y Bëngbe Utabná y Espíritu canya bondmëna.

#### 4

<sup>1</sup> Y chca, Bëngbe Bëtsá bëngbiana lastemado yómnyeca, quem trabajo šojabanÿé, jtsabuayiynayama chë Crístoftaca tojašebuachená soyënga; y chíyeca bënga ndocna te ntjájbanana ainaniñe añemo bomnana. <sup>2</sup> Bënga fsëntsaboté chë ínÿenga iytëmencá innétsama soyënga, chë ínÿenga tmojinÿe ora chama jtsëuatjana, y chë ínÿenga entśanga jáingñama innétsama soyëngnaca, y Bëngbe Bëtsabe buayenana soye ndoñe queftsatstróca ndoñe ndegombre soyëngaca. Chamna, bënga sempre nÿe chë ntšamo ndegombre yomncá fsëndbëtsoyebuambnaye, mo Bëngbe Bëtsabe delante cuaftsemnëngcá jtsamëse; y chca, bënga fsëndbëtsama cada entśabe ainantśa juabnënga chamuayanama, bënga ndegombre soyënga fstsoyebuambná ca. <sup>3</sup> Y nderado bënga chë tšabe noticiënga fstsabuayiyná ora, báseftanga chë soyënga chaósertama ndoñe tontsopodénëse, nÿe chë pochocánënga jtsemnana tmojtsajnëngbiana chca jtsemnana. <sup>4</sup> Chëngbiana, chë Crístbeñe ndošbuáchiyëngbiamna, chë quem luarentše mora mandayá, Satanás, tojama chë buayenana soye ndoñe chaondëtsësertánama; chca, chënga ndoñe chamondinÿama chë tšabe noticiënguentśana puerta bëts y tšabe soyënga, chë Cristo puerta bëtsá y obená yomnana ínÿanÿnaye soyënga, nda nyetsca soyënguiñe Bëngbe Bëtsacá yomna. <sup>5</sup> Bënga ndoñe nÿe cabëngbe soyama queftsatabuayiyná, ndayá Jesucristbiana mo Bëngbe Utabnacá. Bënga bëngbiana fsëndbáyana mo oservenëngcá fstsmëna ca, tšëngaftanga jujabuáchama; y chca fsëndbëtsama Jesús jaserviama. <sup>6</sup> Er Bëngbe Bëtsá, nda quem luare jobojátśama ora tojanmandá

binÿniñe ibetentšana chaóboconama, chánaca tojama bēnga ainaniñe tšabá chabe soyēngama chašotsēsertánama, chca bēnga fchayobená juabuátmanana chē Bēngbe Bētsabe uámanana y obenanentšana inétsobocana osertánana, ndayá Crístbeñe bēnga mondonjá.

*Bēnga fsēndoyena Crístbeñe jtsošbuáchiyēse*

<sup>7</sup> Pero chē puerte tšabe y bēts soye, chē Crístbe buayenana soye, bēnga mondbomna cuerpiñe, bēngbe ainaniñe; y chē cuerpēnga jtsemnana nÿe mo matbajēngcá, ndoñe yapa obenana ntsebomnana, chca, jinÿanÿiyama tša bēts obenana Bēngbe Bētsábiocana yóbocanama, y ndoñe bēngbentšana. <sup>8</sup> Y chca, bēnga nÿetsca padecena soyēnguiñe vida fsēndbomna, pero ndoñe queftsátsmēna ndobenēnga chē padecena soyēnguentšana tšabá jabocanama; ndoñe queftsátstatšēmo ndayá jamama šojtsamna, pero ndoñe queftsátsmēna ntsoencá jtsobátmanama quem padecena soyēnguentšana tšabá jabocnama. <sup>9</sup> Inÿenga montsama bēnga puerte fchaisufrima, pero Bēngbe Bētsá ndoñe nÿe cachcá šontsabashejuana; mo nda inÿabiye cuafjutsencá tmojtsentsjaná ora, ya jóbama jtseprontánana, uayayēnga bēnga jtsēbáyama imojtsejuabnangbe cucuatšīñe fsēntsemna, pero cabá ndoñe ntjobáyana. <sup>10</sup> Inÿenga sempre jtamana bēnga bēngbe cuerpiñe puerte fchaisufrima, y jobanámna resjo jtsemnana, ntšamo Jesúseftaca tmojanmcá, cha chaosufrima y chaóbanama. Chca bēngaftaca endopasana, chca, inÿenga chamobená jinÿama Jesús bēngbeñe vida yobomnama. <sup>11</sup> Er bēnga vida fchabomnēntscuana, sempre puerte resjo bēngbīama jēftsemnana jóbana, Jesúsbiye servena causa; y chca endmēna, inÿenga chamobená jinÿama Jesús vida yobomnama bēngbe cuerpiñe, chē canÿe te yochjopochóca cuerpo. <sup>12</sup> Y chca, bēnga tša fsēndēsufriña y jobanámna resjo endmēna; y tšēngaftanga tšabe noticiēnga šmojóyēngacñayeca, Bēngbe Bētsá tojama chē nÿetsca tescama yomna tšabe vida chašmotsebomnama.

<sup>13</sup> Bēngbe Bētsabe uabemana palabrēnguiñe endayana: “Atše sēntsanošbuaché y chíyeca sēnjanoyebuambá ca.” Bēnga cachca ošbuáchiyana fsēndbomna chē chca tojanayanacá, y chíyeca bēngnaca Bēngbe Bētsábeñe fsēntsošbuaché y chabīama fsēntsoyebuambná. <sup>14</sup> Er bēnga fsēndētātšēmo, Bēngbe Bētsá, nda tojanma Bēngbe Utabná Jesús cháuatayenama, chánaca yochjama bēnga Crístoftaca cánÿiñe mo canÿacá jtsemnēse, bēnga chámuatayenama, y tšēngaftangaftaca cánÿiñe cha yochtsemnoye šochjúshejango. <sup>15</sup> Lempe ntšamo bēnga fstsama y fstsēsufriñcá tšēngaftangbe tšabīama endmēna; chca, más becá entšanga chábeñe

chamojtsošbuaché ora, ba tšabe bendicionënga Bëngbe Bëtsá entsangbiana jtsamëse, más becá entsángnaca chábioye chamotsatschuaná, ndayá chëngbiana cha yochjamama; y lempe chca, Bëngbe Bëtsá puerte uamaná y obená yomnama nyetsca entsanga chamotsichámuama.

<sup>16</sup> Chíyeca bënga ndoñe ntjájbanana ainaniñe añemo bomnana. Masque quem luarentša bëngbe cuerpo cada te jt-sopochócyana, Bëngbe Bëtsá jamana chë bëngbentsana nyets tempo vida yochtsebomna soye, cada te más obenana chaotsebomnama; y chca, bënga jtsemnana mo tsmëma entsangcá. <sup>17</sup> Ntšamo bënga mora fsëndësufrincá endmëna nÿe quem luarentše vida tmojtsebomnëntscuana, y chca, chë soye jtsemnana mo canÿe nduámana soycá; pero ntšamo bënga fsëndësufrincá josérviana bënga jtsebomnama chë Bëngbe Bëtsá sochjatsataye puerte bëts uámanana y obenana, cháftaca nyets tempo vida jtsebomnama, chë ndayá yomna nyetsca soyëngama más bëts y uámana soye. <sup>18</sup> Er bënga nÿe chë tojtso podena jinÿama soyënguiñe ndoñe nyets tempo queftsatsjuabná, ndayá chë ndoñe yondopodena jinÿama soyënguiñe; er chë bënga imobena jinÿama soyënga ndoñe nyetsca tescama ntsemnana; pero chë bënga ndoñe mondobena jinÿama soyënga cocayé nyetsca tescama jtsemnana.

## 5

<sup>1</sup> Bënga mora mondbomna canÿe cuerpo quem luarentše vida jtsebomnama. Quem cuerpo yomna mo chë jtsatsjacama yopodena yebncá, cánÿentše ndoñe nyets tempo ntjéftsemnana. Bënga mondëtatšëmbo, quem cuerpo canÿe te tojtso pochocase, Bëngbe Bëtsá yochjama bënga tsmëma cuerpënga chamotsatsbomnama, celoca nyetsca tescama vida jtsebomnama, Bëngbe Bëtsabe pormana cuerpënga y ndoñe entsangbe pormana cuerpënga. <sup>2</sup> Chíyeca, bënga quem luarentše chca vida tmojtsebomnëntscuana, yapa tmojtseufrina causa, bënga tša jtsebošana betscó Bëngbe Bëtsá celoye chašúyambama, y bënga nyets tempo celoca jtsiyenama tsëm cuerpo jtsebomnama cha chaomama; <sup>3</sup> chca, Cristo yochjésabo ora, bënga chë tsëm cuérpoca chamotsemnana, y ndoñe nÿe espíritu ndocna cuérpoca. <sup>4</sup> Bënga quem cuerpiñe, chë quem luarentše vida jtsebomnama cuerpiñe chamojtsiyenëntscuana, yapa padecena soyënguiñe sufrina causa, bënga jabuache mochanjáshachna; chca echántsemna ndoñe nÿe chë espíritu ndocna cuérpoca jtsemnana bënga imojtsebóseyeca, ndayá masna, bënga chë tsëm cuerpo chamotsebomnama Bëngbe Bëtsá chaomama imojtsebóseyeca. Bënga fsëntseboše

chë bēngbeñe jopochócama yomna soye Bēngbe Bētsá lempe chaotrocama, chca, bēnga chamotsobenama celoca n̄yetsca tescama vida jtsebomnama. <sup>5</sup> Y Bēngbe Bētsá endmēna nda tojama bēnga chamotseprontánama chë tsēm cuerpo jtsebomnama, y nda tojama Espiritu bēngbe ainaniñe cháuamashēnguama, chca bēngbioye jin̄yan̄iyama, bēnga ndegombre mochjójyēngacñe ndayá Bēngbe Bētsá tojašebuachenacá.

<sup>6</sup> Y chca, bēnga sempre ainaniñe bēts añemo fchandbétsebomna. Bēnga fsēndētatsēmbo, quem cuerpiñe cabá vida bēnga mochjēftsebomnēntscuana, bēnga ndoñe mochántsemna Bēngbe Utabná yojtsemnentse. <sup>7</sup> Er mora bēnga fsēndoyena jtsamēse, ntšamo Cristbeñe bēnga imošbuachecá, y ndoñe n̄ye ndayá jin̄yama tmojtsobenama. <sup>8</sup> Bēngbe fsēntsemna ainaniñe bēts añémoca, y más fsēntseboše jájbanana quem cuerpiñe vida jtsebomnana, jama Bēngbe Utabnáftaca n̄yetsca tescama vida jtsebomnama. <sup>9</sup> Chíyeca bēnga bētscá fsēndētšena Bēngbe Utabná sempre oyejuayá jabemama, masque bēnga quem luarentse quem cuérpoca tmojtsiyena, o ya ndoñe. <sup>10</sup> Er n̄yetscanga šontsamna jashjanguana Cristbe puestoca tribunalentse, cada ona ntšamo yomerecencá chaóyēngacñama, ntšamo tšabá o ndoñe tšabá quem luarentse chabe cuerpiñe vida yojēftsebomnēntscuana tojēftsemcá.

*Jábuayenama ntšamo Bēngbe Bētsá inama entšanga tempcá tšabá cháftaca chamotsatsmēnana*

<sup>11</sup> Chcasna, Bēngbe Utabná n̄yetscangbiana chë más bētsá yomnama jtsejuabnayēse, bēnga bētscá fsēndama entšanga jáyēnjanama, bēnga tšabá ftsamama chamotsejuabnama. Pero Bēngbe Bētsá ya endētatsēmbo ntšamo bēnga ftsmēnana, y atše sēntsobátmana tšēngaftángnaca chca tšabá chašmotsetátšēmbo, tšēngaftangbe ainanentša juabnēngaca, chë bēngbiana aíñe ca cmojtsētsētsná juabnēnga. <sup>12</sup> Bēnga ndoñe cachiñe cabēngbiana queftsatoyebuambná; chca fsēntschamo ndayá tšēngaftanga oyejuayēnga bēngbiana chašmotsemnama, chca, tšēngaftanga jojuama chašmobenama, chë uámana soyēnga tmojtsebiamnángbioye ndayá entšanga can̄ye entšabeñe tmojtson̄yacá y ndoñe chca chë entšabe ainaniñe tomna soyēngaca. <sup>13</sup> Er bēnga mo chë ndoñe corente juabna ndbomnēngcá ftsamēse, ntšamo báseftanga mondbetsichamcá, jtsemnana Bēngbe Bētsá jaserviama; y bēnga corente juabna bomnēngcá ftsamēse, jtsemnana tšēngaftangbe tšabiama. <sup>14</sup> Bēnga chca fsēndmēna, Cristo šondábabuan̄yeshanayeca, y chë soye endama bēnga n̄ye cha fchaitseservénama, er bēnga

fsëndenojuabná y puerte tšabá fsëndétatšëmbo, canÿa, Cristo, nyetscangbiama tojanóbanama; y cha nyetscangbiama tojanóbanayeca, endmëna mo cha tojanóbana ora, nyetscanga cháftaca cuafjobaná. <sup>15</sup> Y Cristo nyetscangbiama tojanóbana, chë quem luarentse vida bomnënga ndoñe más nye cachëngbiama chamondëtsiyenama, sinó chabiama, nda chëngbiama tojanóbana y tojtanayena. <sup>16</sup> Chiyeca, bënga ya ndoñe ndocnabiama queftsatsjuabná ntšamo entšanga quem luarentse jtsejuabnayama monduamancá; masque ndegombre bënga chca Cristbiama fsënjanjuabná, mora ya ndoñe chca chabiama queftsatsjuabná. <sup>17</sup> Chcasna, nderado nda Crísoftaca cánÿiñe mo canÿacá tojtsemna, Bëngbe Bëtsá tojama cha mo canÿe tsëm entšacá chaotsemnana. Ntšamo chë Crístbioye cabá nduabuátmana ora cha yojamncá, mora ya ndoñe quenátsmëna. Morna cha jtsejuabnayana y jtsamana inÿe soyënga y tsëm soyënga.

<sup>18</sup> Bëngbe Bëtsá endmëna nda chca inétsama, entšanga mo tsëm entšangcá jábiamama; y cha Crísoftaca tojama bënga tempcá tšabá cháftaca chamotsatsmënama. Y cha bënga canÿe trabajo šonjanabanÿé, bënga entšanga jábuayenama, Bëngbe Bëtsá inétsama entšanga tempcá tšabá cháftaca chamotsatsmënama, y entšanga jujabuáchama chca chamotsemnana. <sup>19</sup> O mëntšá, Cristo tojanma sóyeca Bëngbe Bëtsá yojtsama entšanga chamotsobenama tempcá tšabá cháftaca jtsatsmënama, y chca, chënga chamotsobena chëngbe bacna soyëngama perdonánënga jtsemnana, y chë soyëngama nyetsca tescama castigánënga jtsemnana ndoñe chaondëtsamnana. Y bënga šonjanabanÿé chë trabajo, entšanga jtsabuayiyayama ntšamo Bëngbe Bëtsá inama entšanga tempcá tšabá cháftaca chamotsatsmënama. <sup>20</sup> Y chca, bënga jtsemnana Cristbe cuenta oyebuambnayënga y amënga, mo cach Bëngbe Bëtsá bëngaftaca cmojtsaimpadaná. Cristbe cuenta cbaimpadá, bëtscá šmochtsentšena Bëngbe Bëtsáftaca tempcá tšabá jtsatsmënama. <sup>21</sup> Cristo ndocna bacna soye tonjanma, pero bëngbe bacna soyënga jabuajuánamna, Bëngbe Bëtsá cháftaca tojanma mo cha canÿe bacna soyënga amá cuaftsemncá, chca, bënga Crísoftaca cánÿiñe mo canÿacá jtsemnëse, Bëngbe Bëtsabe bominiñe tšábënga jtsemnana chamotsobenama.

## 6

<sup>1</sup> Chcáyeca, bënga Bëngbe Bëtsáftaca cánÿiñe trabájayënga quetsomñecana, chontsaimpadana ndoñe nye bonamente chašmondóyëngacñe chë Bëngbe Bëtsá yojtsama soyënga, tšëngaftangbiama tšabe juabna jtsebomnëse. <sup>2</sup> Er Bëngbe Bëtsá chabe uabemana palabrenguiñe mëntšá tojánayana:



Chë tšabe soye jamama tšabá šonjaninýana ora, atše tcbonjanoyeuná;

chë ácbioye jatsbocama te, tcbonjanájabuache ca.

Smochjinýe. Mora entsemna chë mocna ora Bëngbe Bëtsá tšabá ibojtsinýana tšabe soye jamama; mora entsemna chë mocna ora Bëngbe Bëtsá yojtseboše aca jatsbocama.

<sup>3</sup> Bënga ndocna bacna soye queftsátama, ndayá chaoma entšanga chë tšabe noticiënga chamotsábotema, chca, ndocná podesca chaondëtsóyebuambnama bëngbe trabajuama, Cristbiamá. <sup>4</sup> Inýetsá, bëngna nyetsca soyënguiñe fsënjanियena mo Bëngbe Bëtsabe oservenëngcá; Bëngbe Bëtsábeñe obatmancá puerte uantadënga jtsemnëse, fstsésufrina ora; puerte padecena soyënguiñe bëtsemna causa, ndayá jamama ndoñe fsëntsetatšëmbo ora; y ainaniñe puerte ngménaca fstsemna ora; <sup>5</sup> inýenga šojtsatsetšená ora; cárceloye šojautame ora; entšanga bëngbe contra tmojtsebouénana ora; jabuache trabájayiñe puerte uamëntšnayënga fstsemna ora; bayté ntsamanacá fstsemna ora; y jasama tondaye fsëntsebomna ora.

<sup>6</sup> Bëngnaca fsëntsinýanýná Bëngbe Bëtsabe oservénënga fstmënama, puerte tšabe vídaca, ndocna bacna soye ntjamcá jtsiyenëse; Bëngbe Bëtsabe soyëngama corente jtsetatšëmbëse; inýenga ntšamo šojáborlaye ora puerte uantadënga jtsemnëse; inýengbioye puerte bonshanánaca jtsënýayëse; Uámana Espiritu bëngbe ainaniñe jtsebomnëse; y ndegombre nyets ainánaca nyetscanga jtsababuánýeshanëse; <sup>7</sup> ntšamo Bëngbe Bëtsabiamá ndegombre yomncá jtsabuayiynayëse; Bëngbe Bëtsabe obenánaca ba soyënga jtsamëse; y mo chë soldadëngcá, uayayënga jáyënjanama y chëngbiamá jenëuyanama soyënga jtsebomnana, chë Satanásbioye jayënjanama y chabiamá jenëuyanama ndayá Bëngbe Bëtsá šojatšatacá jtsebomnëse; y Bëngbe Bëtsá chca tojama, er cha tojama bënga chabe bominýiñe tšábënga chamotsemnama. <sup>8</sup> Bënga fsëntsinýanýná Bëngbe Bëtsabe oservénënga fstmënama, inýenga bëngbiamá tšabe soyënga tmojtsejuabná ora y bënga nduámanënga jtsemnama chënga tmojtsama ora; inýenga tšabe soyënga bëngbiamá tmojtsoyebuambná ora y chënga bëngbiamá podesca tmojtsichamo ora; bënga áingñayënga fstmëna ca báseftanga tmojtsejuabná ora, pero bënga ntšamo ndegombre yomncá jtsóyebuambnayëse. <sup>9</sup> Mo nduamanëngcá bënga entšángbeñe jtsënýayana, pero banga corente tšabá bënga šondëubuatma; bëngbiamá sempre resjo endmëna jóbanama, pero smochjinýe, bënga sempre vídaca chentšana jatóbocañana; bënga juatsjínýama jobenayama, Bëngbe Bëtsábeyeca castigánënga fchandbëtsemna, pero nýa jóbanana

ndoñe. <sup>10</sup> Masque ngménënga fstsemna, ainaniñe sempre oyejuayënga fchandbëtsomñe; masque ndbomnjëmëngcá, pero fchandbëtsama banga Bëngbe Bëtsábiocana bëtscá chamotsebomnama; quem luarentša soyënga tondaye queftsátsbomna, pero Bëngbe Bëtsabe entšanga quetsomñecana, ndegombre lempe fsëndëtsóbomñe.

<sup>11</sup> Tšëngaftangbiana, Corintoca entšanga, lempe fsënjayana, tondaye ntjaitëmcá; nyëts ainánaca, corente cbondábabuanjëshana. <sup>12</sup> Bënga puerte cbondábabuanjëshana, pero tšëngaftangna ndoñe yapa quešcátababuanjëshana. <sup>13</sup> Atše cbontsaimpadana, mo canye taitá chabe básenga cuaftsaimpadancá, atše puerte chašmotsebobonshánama, er atše corente cbondábabuanjëshana.

*Bënga mondmëna mo Bëngbe Bëtsabe bëts yebncá*

<sup>14</sup> Crístbeñe ndošbuáchiyëngaftaca ndoñe šmatjenutaná ndayánaca jamama, er chca, chëngaftaca šmatjábocana mo chë jaárama uacnata ndoñe cachënchechata tbontsemncá. Ndegombre, chë tšabe soyënga amá y Bëngbe Bëtsabe bominjïñe tšabia mëná, nya tondayama cachcá ntsejuabnayana, chë Bëngbe Bëtsá tojamandacá ndoñe tontsamacá y bacna soyënga amacá. Ndegombre, chë entšangbe juabna binynayáftaca vida bomná, nya tondaye ntsebomnana chë nye mo ibetiñcá juabnayáftaca. <sup>15</sup> Cristo y Satanás, Belial cánaca uabainá, ndocna te tondayama cachcá ntsejuabnayana; y cachcá copasana, Crístbeñe ošbuachiyá y chábeñe ndošbuachiyáftaca. <sup>16</sup> Ndocna soyiñe cachcá ntsemnana, Bëngbe Bëtsabe bëts yebna, chë nye canye Bëngbe Bëtsábioye jadórama yebna, y chë entšangbe pormana soyënga, mo diosënga cuaftsemncá jtsadoránana soyënga; chca endmëna, er bënga, nyëtscanga cánjïñe Jesucrístbeñe ošbuachiyëngcá, mondmëna mo Bëngbe Bëtsá Ainabe bëts yebncá, ntšamo Bëngbe Bëtsá chabe uabemana palabrenguiñe chabe entšangbiana tojanayancá:

Chëngbeñe vida chántsebomna y chëngbenache chántšana; atše chëngbe Bëtsá chántsemna y chëngna atšbe entšanga ca.

<sup>17</sup> Chíyeca mëntšánaca Bëngbe Utabná chabe entšanga tojanéyana:

“Chë bacna soye amëngbentšana šmochjésebocana, y chëngbentšana šmochtsojuánañe; tondaye šmattsebana, ni šmattsama ndayá Bëngbe Bëtsabe entšangbiana ndoñe tšabá tontsemncá.

As cbochanjúbuaja,

<sup>18</sup> y chántsemna mo canye taitacá tšëngaftangbiana, y tšëngaftangna mo atšbe uaquiñënga y bemiangcá.

Chca sěntsichamo atše, tšěngaftangbe Utabná, n̄yets obenana bomná ca” –chiñe enduábemana.

## 7

<sup>1</sup> Chcasna, atšbe bonshánēnga, chca endmēna ntšamo Bēngbe Bětsá šojašebuachenacá. Chíyeca šontsamna, Bēngbe Bětsabe delante n̄yetsca soyēnguiñe tšábēnga jtsemnana, bēngbe cuerpama o espíritbiana bacna soye ndoñe más ntsamcá; y Bēngbe Bětsá n̄yetscangbiana más uamaná yomna ca mondějuabnáyeca, lempe ntšamo tmojobenacá mochtsiyena mo chabe entšangcá, n̄yetsca soyēnguiñe puerte tšábēnga jtsemnēse.

### *Ntšamo chē Corintoca entšanga juabna tmojantrocá*

<sup>2</sup> Bēngbiana šmochtsenójuabnaye tšěngaftangbe ainaniñe puerte bonshanánaca. Bēnga ndocnabiana bacna soye chibiatsma, ndocnabiana chibiatsma más bacna entšá chaotsemnana, y ndocnábioye chibiatsingñé. <sup>3</sup> Atše chca ndoñe quetsátichamo, ndoñe tšabá šmonjama ca tšěngaftangbiana jayanama, er ntšamo ya tcbonjauyancá, atše tšěngaftangbiana sempre ainaniñe puerte bonshanánaca sēndbėtsenójuabnaye; y chca, mo átšeftaca can̄jiñcá šmochántsemna, masque chayóbana o cabá vida chaitsóbomñese. <sup>4</sup> Atše puerte tšabá sēndětatsēmo, ntšamo tšabá yomncá šmochtsamama; y tšěngaftangbiana puerte oyejuayá sēntsemna. Lempe ntšamo tsēsufřincá tsiyenama, atšbe ainaniñe bėts añemo sēndėtsóbomñe y corente sēntsoyejuá.

<sup>5</sup> Macedonia luaroye fsēnjánashjaina orscana, ndoñe luare queftsátsbomna jóchnama, sinó n̄yetsca soyēnguiñe fsēndėpadecena: chē bēngbe buayenana soyama contra tmojtsemnēngaftaca jabuachana enatsėtsnayese, y bēngbe ainaniñe jtsauatjese. <sup>6</sup> Pero Bēngbe Bětsá, chē yapa añemo ndbomnēngbioye endbetsañemuayá, tojanma bēnga ainaniñe más añemo fchaitsebomnama, Tito moye tonjánashjango ora. <sup>7</sup> Y cha tonjábabo ora, bēnga ndoñe más añemo quefstėtsebomna n̄ye cha tojánashjanguama, sinó tšěngaftanga šmojanájabuachama y ainaniñe añemo chaotsebomnama šmojanmama. Cha šonjanėyana tšěngaftanga tša šmojánboše bēnga ján̄yama ca, y šonjanacuntá ntšamo tšěngaftanga ngmėnaca šmojamna, atšbiana ndoñe tšabá šmonjanma causa, y ntšamo tšěngaftangbiana atšbe tšabiana puerte iuámanana; y quem chabe noticiēngaca, cabá más sēntsoyejuá.

<sup>8</sup> Er masque tšěngaftanga tša ngmėnaca šmojamna chē tcbonjanėbuábiana tsbuanáchama, mora ndoñe quetsatsjuabná más tšabá yojamna chca ndoñe

jatëbuabiamana ca; masque tempo atše chca sënjanjuabná, er atše sëntsetatšëmbo chë tsbuanácha básefta tescama ngménënga tcmojánabiamana, <sup>9</sup> mora atše puerte oyejuayá sëntsemna, ndoñe tšëngaftanga ngménënga šmojamnama, ndayá chë šmojánbomna ngménana tojanmama tšëngaftanga chašmuenójuaboma ndoñe tšabá šmontsamama, y chca amana chašmotsajbanama, tšëngaftangbe juabnënga jatrócase. Chca enjamna, er tšëngaftanga ngménana šmojánbomna ntšamo Bëngbe Bëtsá inabošcá; chíyeca, bënga ndocna bacna soye tšëngaftangbiamana chibiatsma. <sup>10</sup> Ntšamo Bëngbe Bëtsá tojtsebošcá ngménana bomnentsana, jóbocnana chë bacna soyënga tcojamama jenójuaboyana y juabnënga jatrócana; y juabna jatrócana entsábioye juanatsana atsbočaná chaotsemnama, y cha ndocna te ntjátsjuabnayana más tšabá yojamna ndoñe chca ntjatstrócana ca. Pero ntšamo chë nÿe quem luarama enójuabnaye entsanga mondbetsebmncá ngménana bomnentsana, ndoñe ntjóbocnana juabna jatrócana; chentsana jóbocnana nÿe nÿetsca tescama castiganá jtsemnana, mo nÿetsca tescama cuafjobancá. <sup>11</sup> Smochjinÿe ndayá tojóbocna, ntšamo Bëngbe Bëtsá inabošcá ngménana bomnentsana: tojanma chë šmojanma soyiñe puerte chašmuenójuaboma; y ntšamo jájandmanana bëtscá chašmonguanguama; tojanma tšëngaftanga chacmetonama chë bacna soye tojanmáftaca; y castigánënga jtsemnama jtsauatjámna. Chentsana, tšëngaftanga tša šmojtsanboše atše jinÿama; y šmojtsanprontana lempe jamama chca bacna soye ndoñe más chaondëtsemnama y chca tojanmábioye jacastígama. Nÿetsca chë soyënguiñe tšëngaftanga šmonjinÿanyé chca bacna soye ndoñe šmonjanmama; y chca, mora tondaye quenátsmëna tšëngaftanga castigo jtsebmnama chacmotsamnama. <sup>12</sup> Y chca, atše chë tsbuanácha tcbonjanëbuábiamana ora, ndoñe checbátanëbuabiamana chë puerte bacna soye tojanmábeyeca, ni chë bacna soye tojanoyëngacñábeyeca; ndayá tšëngaftanga, mo Bëngbe Bëtsabe delante cuaftsemnëngcá, chë šmojanma soyiñe bëtscá chašmuenójuaboma, y chca, cha chašminÿanyé tšëngaftanga bëngbe tšabiamana puerte šmenójuabnama. <sup>13</sup> Chíyeca bënga más añemo ainaniñe fsëntsebmna.

Pero ntsachetšá añemo fstsbmnama, masna puerte oyejuayënga fsëntsemna, er bënga fsënjinÿe Tito tša oyejuayá, er chabe ainaniñe lempe natjëmbana yojtsemna nÿetsca tšëngaftangbiamana. <sup>14</sup> Tito tšëngaftanga jáñÿama cabá nda ora, atše cha sënjanianana tšëngaftanga šmochjanóyeunaye chë atše tcbonjanëbuaja palabra ca; y tšëngaftanga ndoñe chešmatsma atše chaitséuatjama chca tijánayanama. Inÿetšá, lempe ntšamo tchojauyancá ndegombre endmëna; cachcá,

ntšamo bēnga Títbïoye fsēnjaniyancá ndegombre entsemna, chē tšēngaftangbïama fstsóyejuama. <sup>15</sup> Y mora Tito más cmontsababuánÿeshana, ntšamo cha tcmojanamēndacá ndayá tšēngaftanga šmojanmama, y ntšamo puerte respétoca y mo uamaná cuaftsemncá chabïama jtsejuabnayēse šmojanofjama tojtenojuabó ora. <sup>16</sup> Atse puerte oyejuayá sēntsemna, er atse sēndētatsēmo tšēngaftanga ntšamo tšabá yomncá nÿetsca soyēnguiñe šmochtsamama.

## 8

*Chēnga jañémuayama, inÿe ošbuachiyēngbïoye nÿets ainánaca jujabuáchama*

<sup>1</sup> Y mora, Jesucrístbeyeca catsátanga, bēnga fsēntseboše tšēngaftanga chašmotsetátšēmo ntšamo Bēngbe Bētsá bētscá tšabe bendicionēnga tojama Macedonia luarentše ošbuachiyēngcá enefjuanēngbïama. <sup>2</sup> Chēnga puerte tmoja-sufrí, y chora chca, chēnga tmojinÿanÿé becá imošbuáchema y tša imoyejuama; y masque puerte ndbomnjémēnga, chēnga nÿets ainánaca bētscá tmojanacaredadó Jerusalenentša ošbuáchiyēnga ndbomnjémēngbïama. <sup>3</sup> Atse sēndētatsēmo y sēntsobena jayanama chēnga ndegombre tmojatšatá ntšamo tmojobenacá, y ntsachetšá imobenentšana cabá más, chēnga chca imobóseyeca. <sup>4</sup> Tša šonjánaimpadana chēngbïoye jálesenciama ndayánaca jamama, Jerusalenoca ošbuachiyēngbïoye jujabuáchama. <sup>5</sup> Bēnga ftsjanobatmanama cabá más chēnga tmonjanma; natsana, chēnga Bēngbe Utabná tmojanïyana lempe ntšamo cha tojtsebošcá chēnga jamama imojtseboše ca, y chentšana bēngaftácnaca cachcá tmonjanma; y lempe enjamna ntšamo Bēngbe Bētsá inabošcá. <sup>6</sup> Ndayá Macedonioca ošbuáchiyēnga tmojanmama bēnga añemo fsēnjanóyēngacñeyeca, bēnga Tito fsēnjaimpadá chē tšabe trabajo chaopochocama, chē tšēngaftangbeñe crocénana játbanana, Jerusalenoca ošbuáchiyēnga jujabuáchama, ndayá cha jamama tojanbojatšecá. <sup>7</sup> Y morna, ntšamo tšēngaftanga nÿetsca soyēnguiñe tša šmomncá —puerte ošbuáchiyēnga, becá obenēnga Bēngbe Bētsabe soyēngama jóyebuambayama, puerte osertánēnga Bēngbe Bētsabe soyēngama, corente juabnayēnga bētscá jamama Cristo jasérvïama y bēngbïoye corente ababuánÿeshanēnga —cachcá, mórnaca bētscá šmochjama quem trabajuiñe chē ošbuáchiyēnga ndbomnjémēngbïama, tšēngaftangbe bonshánana jtsinÿanÿnayēse.

<sup>8</sup> Chca ndoñe quechatētsētsná mo canÿe mandcá; atse sēntseboše ndayá nÿe tšēngaftanga jáuyanana ntšamo inÿenga bētscá tmojatrabajá chē ndbomnjémēngbïama, tšēngaftángnaca cachcá chašmotsamama; y chca,

chašminjanyëma chë tšëngaftanga šmobomna bonshánana ndegombre bétsemnama. <sup>9</sup> Er tšëngaftanga šmondétatsëmbo ntšamo Bëngbe Utabná Jesucristo puerte tšabe soyënga bëngbiamama, bëngbioye puerte jtsababuánjeshanëse. Celoca, cha cabá quem luaroye ndabo ora, cha bëtská inabomna; pero tšëngaftanga ababuánjeshanayeca, mo canyë puerte nduamanacá tojanóbema. Y mora, Cristo mo canyë nduamanacá tojóbemayeca, Bëngbe Bëtsá puerte tšabe soyënga sojatšatá.

<sup>10</sup> Tšëngaftangbe tšabiamama mëntšá cbaruayená, ntšamo quem soyiñe šmochjamama. Chë inyë uata tšëngaftanga šmonjanbojatsé, ndoñe nyë chë ndbomnjémëngbiamama jacjayama, ndayá chca jamama jtsebošámnaca. <sup>11</sup> Morna, chë ndbomnjémëngbiamama trabajo šmochjapochóca; chca, ntšamo tšëngaftanga becá šmonjanprontana y jujabuáchama tša šmonjanbošcá, mórna cachcá chašmomama chë trabajo japochócama, ntšamo šmojobenacá jacjayëse. <sup>12</sup> Er canyë entšá, jatštayama ndegombre tojtsebošëse, ndayá cha tojatštacá Bëngbe Bëtsábioye oyejuayá jabemana, ntšamo cha tojtsobencá, y ndoñe ntšamo cha ndoñe tontsobencá.

<sup>13</sup> Ndoñe quenátšmëna, tšëngaftanga puerte ujabótënga chašmoquedá, ínÿengbioye atšatnaye causa, chënga ndoñe yapa ujabótënga chamondétsemnama. <sup>14</sup> Atše sentsichamo ndayá nyëtscanga chamotsenajabuachana, chca tojtséjaboto ora ca. Mora, chë bëtská šmobomnentšana šmontsobena chënga jujabuáchana, ndayá tojtsabuáshebencá jatšatayëse; y inyë orna, chënga entsamna tšëngaftanga jujabuáchana chë cmojtsabuáshebena soyëngaca. Chca, nyëtscanga jóyëngacñana ndayá tojtséjaboto ora. <sup>15</sup> Ntšamo Bëngbe Bëtsabe uabemana palabrënguñe endayancá:

Chë tša bomnábioye ndoñe chebatanójama;

y chë nyë batšá bomnábioye, ndoñe quebënjatanbuáshbena ca.

### *Tito y chabe enutënga*

<sup>16</sup> Bëngbe Bëtsá šcuatschuá, tšëngaftanga jtsanÿenama Tito ainaniñe juabnënga chaotsebomnama cha tojanmama, cachcá ntšamo bënga fsëndbomncá. <sup>17</sup> Er tšëngaftangbioye chaotsama bënga fsënjanimpadá ora, cha oyejuayá aiñe ca tonjánayana choye jama; y chabiamama puerte enduámana tšëngaftangbe tšabiana; chíyeca mora echanjá tšëngaftanga jányama, chca jamama cachá yobóseyeca.

<sup>18</sup> Títoftaca, canya Jesucristbeyeca bëngbe catšata fsëntsichamná; chabiamama puerte tšabá ošbuachiyëngcá enefjuanëngbenache mondoyebuambná, chabe trabajuama chë tšabe noticiënga abuayinayama. <sup>19</sup> Y ndoñe nyë chë soye, sinó quem luarentše ošbuachiyëngcá enefjuanënga

cha tmonjuábuayana bēngaftaca Jerusalenoye jama, y jujabuáchama chē ndbomnējémēngbiama trabajuiñe; chē trabajo endmēna bonshánana jinñanñiyama; chca fsēntsama, Bēngbe Utabná jtsatschuanayama y jinñanñiyama bēnga chca jujabuáchama tša fstsbošama. <sup>20</sup> Títoftaca cha fsēntsichamná, chca, ndocná chaondétsichamo bēnga ndoñe tšabá tifjama ca, ntšamo játbanama cmojtsumniñe, chē beca juabónana játbanama, ndbomnējémēnga jujabuáchama; <sup>21</sup> er bēnga fsēndama lempe ntšamo fstsobencá, ndoñe nñe ntšamo Bēngbe Bētsabe bominiñe tšabá yomncá jamama, ndayá ntšamo entšangbe bominiñe tšabá yomncánaca.

<sup>22</sup> Chátaftaca inña Jesucristbeyeca bēngbe catsátnaca fsēntsichamná; cha bēnga ba soyiñe šonjinñanyē cha yojtseboše bētsca jamama, Cristo jaserviama, y mora más, er cha puerta bētsca entsejuabná tšēngaftanga puerta tšabá šmochjamama. <sup>23</sup> Y Titbiamna, cha quem trabajuiñe atšbe enutá endmēna, y atšca tšēngaftangbiama endētrabája; y chē inñata Jesucristbeyeca bēngbe catsatatbiamna, chata bontsemna quemuentša ošbuachiyēngcá enefjuanēngbe ichmónata, chēngbiama chabóyebuambama; y chē bontsama sóyecna, chata Crístbioye corente jtsatschuanayana. <sup>24</sup> Chíyeca, chēngbioca ošbuachiyēngcá enefjuanēnga chca chamotsetatšēmbuama, chē ichmona boyabásengbioye šmochjinñanñiye tšēngaftanga ndegombre chēnga šmojtšababuánñeshanama, y bēnga razón fstsebomnama tšēngaftangbiama oyejuayēnga jtsemnama.

## 9

### *Chē inñe ošbuachiyēngbiama crocénana játbanama*

<sup>1</sup> Chē Jerusalenoca Bēngbe Bētsabe entšangbiama crocénana játbanamna ndoñe quenátsiyta tšēngaftangbioye jatēbuabiamnayama, <sup>2</sup> er atše ndegombre sēntsetatšēmbo tšēngaftanga tša šmojtseboše chca jujabuáchama. Macedonioca entšanga puerta oyejuayá sempre sēndbētsētsēsnaye, Acaya luaroquēnga chē inñe uatscana quem trabajuiñe jujabuáchama šmoprontánama; y chē jujabuáchama tšēngaftangbe bētsca juabnēnga tmojama banga quem luarentšēnga bētsca añemo chamotsebomnama, chēngnaca chē trabajo jamama. <sup>3</sup> Pero Jesucristbeyeca quem catsátanga sēntsichamná, ntšamo bēnga oyejuayēnga tifjayancá tšēngaftanga chašmotsamama, chē tšēngaftanga quem trabajuiñe bētsca šmochjama ca; chca, ntšamo tijanayancá ndoñe nñe bonamente chaondētsemnama, y ntšamo sēnjanayancá tšēngaftanga chašmotseprontánama; <sup>4</sup> er nderado báseftanga Macedonioquēnga átseftaca tmojá y choca ndēprontánēnga tcmojánñena chē ndbomnējémēngbiama

ujabuáchenanaca, chë soye nanjama bënga fchaitseuatjama, er ba soye fsënjayana bënga ndegombre fstsëtátšëmbo tšëngaftanga prontánënga šmochtsemna ca; y ndegombre, tšëngaftangbiamá cabá más ouatjca nántsemna. <sup>5</sup> Chíyeca, tšabá šonjuínÿnana Jesucristbeyeca quem catšátanga jáimpadana chënga atšbe natsana chamotsama tšëngaftanga jányama, y chacmëjabuachama chë juabónana játbanama, ndayá tšëngaftanga tempo šmonjanašebuachenacá. Chca, atše choca chajáshjango ora, tšëngaftangbe juabónana chaotseprontana. Chca, tšëngaftanga šmochanjínÿanÿiye ndbomnjémëngbiamá šmojacjá, chca jamama tša šmobóšeyeca, y ndoñe nÿe batšatema jatšatayama y tšëngaftangbiamá bëtscá jobuájuaama šmojtseboše.

<sup>6</sup> Quemuiñe šmochtsenójuabnaye: Nda nÿe batšá tojajé, cach batšá chentšana josháchiñana; y nda bëtscá tojajé, cach bëtscá chentšana josháchiñana. <sup>7</sup> Cada ona bontsemna jajájuana ntšamo chabe ainaniñe tojajuabocá; ndoñe ngménaca o nÿe ínÿenga chca jamama tmojtsemándayeca. Chca chaotsemna, er nda oyejuayá tojajajóbioye, Bëngbe Bëtšá jtsebobonshánana. <sup>8</sup> Bëngbe Bëtšá endobena jamana chábentšana nÿetsca tšabe bendicionënga y bëtscá soyënga tšëngaftanga chašmotsebonnama; chca, ntšamo nÿetsca soyënguiñe cmojtsëjabotcá sempre chašmotsóbomñama, y cabá más bëtscá chašmotsebonnama, nÿetsca tšabe obrënguiñe ínÿenga chašmëjabuachama. <sup>9</sup> Bëngbe Bëtšabe uabemana palabrënguiñe, mëntšá endayana chë bëtscá tojacjabiamá: Cha nÿets ainánaca ndbomnjémënga bëtscá jatšatayana; y chë tšabe soyënga ntšamo cha tojtsamcá nÿets tempo jëftsemnana.

<sup>10</sup> Bëngbe Bëtšá, nda endbama chaotsemna jénaye jájema y sananga jasama, cmochanjátšataye lempe ntšamo cmojtsëjabotcá, y echanjama, tšëngaftanga cabá más tšabe soyënga chašmotsamama. <sup>11</sup> Bëngbe Bëtšá echanjama tšëngaftanga nÿetsca tšabe soyënga chašmotsebonnama, chca, tšëngaftanga nÿets ainánaca puerte ínÿengbioye chašmatšatama, y bëngbeyeca, chë mochjóyëngacñënga Bëngbe Bëtšá chamotsatschuanama; <sup>12</sup> er chë ujabuáchenana Bëngbe Bëtšabe entšanga tcojatšatá ora, ndoñe nÿe ndayá tojtsëjabotcá jatšatayana, ndayá chënga Bëngbe Bëtšá chamotsatschuanámnaca jamana. <sup>13</sup> Chënga Bëngbe Bëtšá mochántatschuanaye, er chë ujabuáchenanaca chëngbioye jinÿanÿiyana, ntšamo Cristbe tšabe noticiënguiñe iuayancá tšëngaftanga šmobedecénama, y ntšamo tšëngaftanga tšabá jamëse, nÿets ainánaca bëtscá soyënga chënga y nÿetscanga šmojátšatama. <sup>14</sup> Y chënga tša mochántseboše tšëngaftanga



jányama y tšëngaftangbiamá Bëngbe Bëtsá mochántseimpadana, er cha bëtsá tšabe soyënga tšëngaftangbiamá tojama. <sup>15</sup> ¡Bëngbe Bëtsá šcuatschuá ndayá cha šojátšatama, canye puerte uámana soye, ndocná jobenayana tšabá jayanama ntšamo chë soye bëtsemnana!

## 10

*Ntšamo Pablo tojánayana ínÿenga chabe contra imojtsichamo ora*

<sup>1</sup> Y mora, atše Pablo, cbochanjáimpada, tšëngaftangbioye puerte bonshanánaca jtsënyáyëse, y tšëngaftangbiamá tšabá jamama jtseprontánëse, ntšamo cach Cristo endbetsamcá. Báseftanga tšëngaftangbioquënga imojtsichamo atše puerte nduamaná tsnenóbema atše tšëngaftangtaftaca stsemna ora, pero corente añemo bomná tsnenóbema jabuache soyënga jayanama tšëngaftangbentsána bënoca stsemna ora ca. <sup>2</sup> Tšëngaftanga cbontsaimpadana, tšëngaftanga jányama chajjá ora, atše ndoñe chašondëtsemna puerte añemo bomná jtsemnana, jabuache soyënga tšëngaftanga jáuyanama, ndoñe ntšamo atše puerte tšabá sëntsetatsëmbcá ndayá báseftangtaftaca jamama šojtsotocana, chë ndëmuanyënga imojtsejuabná, nÿe bënga tšabá jtsomñama juabnëngaca bënga fstsiyena ca. <sup>3</sup> Ndegombre bënga quem luarentše fsëndoyena, pero ndoñe queftsátspelia Cristbiamá, ntšamo quem luarentša entsanga monduamancá; <sup>4</sup> er chë ndaye sóyeca bënga Cristbe soyëngama fsëndépéla, ndoñe quenátsmëna mo chë ndaye sóyeca chë nÿe quem luarama enójuabnaye entsanga japéliama monduamancá, ntšamo nÿe chënga tšabá jtsomñama juabnënga yomncá. Inÿetšá, chë ndaye soyëngaca bënga fsëndépéla, Bëngbe Bëtsá jtsinÿanana puerte obenana bomna soyënga yomna ca; y endmëna chë Satanás tojtsemánda soyënga jayënjanama, puerte jabuache soyënga jayënjanama. Mo nda canye uayayábioye jtseepochocancá, chë Bëngbe Bëtsabe osertánana ndoñe yonduámana ca jinÿanÿiyama soyënga ichámëngbiamá, <sup>5</sup> y Bëngbe Bëtsabe osertánana jtsabotema juabnënga bomnëngbiamá, bënga fsëndama ntšamo chënga tmojtsichamcá tondaye chaondëtsámanama. Y chë japéliama fsëndbomna soyëngaca, bënga fsëndbétsama chca juabnayana chamotsajbanama, y chamotsobena ntšamo Cristo yomandacá jtsamana. <sup>6</sup> Bënga fsëntseprontana chë Cristbiamá nduauenanënga jácastigama, lempe ntšamo Cristo cmojtsamëndacá tšëngaftanga chašmojtsama ora.

<sup>7</sup> Tšëngaftanga ndayánaca jtsonÿayana nÿe ntšamo tbojtsabinÿnëcá. Nderado nda becá tojtsejuabná Cristbia

yomna ca, cha bontsemna jtsejuabnayana bēngnaca Crístbenga fstsmēnama, ntšamo cha yomncá. <sup>8</sup> Er atše masque tša sēndbétsoyebuambnaye chē Bēngbe Utabná šojatšatá mandama, chē ndáyeca bēnga jamama tšēngaftanga puerte chašmotsošbuáchema y ainaniñe bēts añemo chašmotsebomnama, y ndoñe tšēngaftanga ntjapochócama, chama atše ndoñe quetsátēuatja. <sup>9</sup> Atše ndoñe quetsátsoše tšēngaftanga chacmotsinýana, tšēngaftanga jaútatjayama atše stseboše ca, ndayá atšbe tsbuanáchangañe tijuábemama. <sup>10</sup> Er báseftanga mēntšá atšbiamama imojtsichamo: “Chabe tsbuanáchangañe cha šontsamēnda bētská soyēnga jamama, y tša obenacá cha jtsóyebuambnayana; pero cha bēngaftaca tojtsemna ora, cha jtsóyebuambnayana mo canye ndocna obenana ndbomnacá, y ntšamo tojtsichamcá tondaye ntsámanana ca.” <sup>11</sup> Chca entšanga entsamna jtsetatšēmbuana, ntšamo bēnga fstsichamcá, tsbuanachangá juíchmuase, tšēngaftangaftaca cabá ndoñe fsēntsemna ora, tšēngaftangaftaca fchaitsemna órnama, bēnga chca fchjamama.

<sup>12</sup> Ndegombre bēnga ndoñe tša añemo queftsátbomna jayanama nyetšá uámanēnga fstsmēna ca, mo chē cachēnga jtsenábotamnayana uamanēngcá. Chēnga jtsejuabnayana y jtsichámuana tšábenga imomna ca, nye ntšamo cachēngbeñe ínýenga imomnama jtsonýayēse; y chca tmojtsama ora, chēnga juabna ndbomnēnga jtsemnana. <sup>13</sup> Bēnga ndoñe yapa quifchatóyebuambaye cabēngbiamama, chca, tša tšábenga bēnga imomna ca jtsenábotamnayama; fchanjóyebuambaye ndayá chē bēnga tifjama tšabe trabajuama, ndayá Bēngbe Bētsá šojabanýecá, y chíñnaca entsemna ntšamo tšēngaftangbeñe Corintoca tifjamcá. <sup>14</sup> Chíyeca, bēnga ndoñe queftsatóyebuambná chē bēnga ndoñe derecho fsēntsebomnama, ntšamo ndegombre nántsemna bēnga tempo tšēngaftangaftaca ndoñe mafsēnjamnēse; er bēnga chē natsanēnga fsēnjamna tšēngaftangbioye jama, Crístbiamama tšabe noticiēnga jábuayenama. <sup>15</sup> Y ndoñe quifchatóyebuambaye tša tšabá bēngbe trabajo yomna ca, chē ndayama ndoñe šontsamna chca jatichámuana, chē trabajo ndoñe bēngbe soye, sinó ínýengbe soye yómnyeca. Chamna, bēnga fsēntsobátmana tšēngaftanga Crístbeñe más chašmotsošbuáchema, y chca chaojtsemna ora, bēnga fchayobená ba luariñe entšanga jábuayenana, ntšamo tšēngaftangbeñe fsēntsamcá. <sup>16</sup> Chca, fsēntsobátmana bēnga jobenayama tšabe noticiēngama jábuayenama, chē tšēngaftangbentšana más chcoye imoyena entšángbioye; chca, bēnga ndoñe yapa quifchatóyebuambaye ínýengbe trabajuama, Crístbe soyēnga jábuayenama, mo chē soye bēngbe trabajo cuafjatsmēncá.

17 Ntšamo Běngbe Bětsabe uabemana palabrěnguiñe en-dayancá: “Nda tojtseboše jayanama cha canye uámana entšá yomna ca, más tšabá cha cháuyana Běngbe Utabná puerte uamaná endmēna ca.” 18 Er Běngbe Bětsá jayanana canye entšá ndegombre tšabá tojama ca, ndoñe nye cachá tojt-senábotamnabiama, ndayá Běngbe Bětsá chca ndegombre tojama ca Běngbe Bětsá tojtsejuabnabiama.

## 11

### *Pablo y chě ndoñe ndegombre ichmóněnga*

1 Malaye atše šměntjěuánta, atše básefta soyěnga mo canye opá tojtsoyebuambnacá stsicháměntscuana, cach atše stsenabotamná ora. Masque ntšámnaca šmochtsěuánta. 2 Běngbe Bětsábeyeca atše tša cbondábabuanyěshana y cbondányena, tšěngaftanga nye cha chašmotsěstonama y ndoñe inyěngbioye. Er atše Cristo sěnjašbuachená tšěngaftanga sempre cha šmochtsěstonama, y sěntseboše, cha quem luaroye yochjésabo ora, chábioye tšěngaftanga júshejanguana, mo nye chábioye sempre ustoněngcá, ntšamo canye taitá chabe bembe ndocna boyabása nduabuatmá nye canye boyabásaftaca chaóbuamama jushjanguancá. 3 Mětscuaye Evábioye tbojaningñé, y cha tbojaninyana puerte osertanabe soyěnga cuaftsatsětsnacá, pero ndegombre ndoñe chca yonjamna. Atše sěntsauatja nderado cachcá inyěnga tšěngaftangaftaca muanjama y tšěngaftangbe juabna chašmotrocá, y chca, tšěngaftanga chašmotsajbaná sempre jtsejuabnayana nye Cristo nyetsca soyěnguiñe jtseservénama. 4 Atše chama sěntsauatja, er ndánaca jashjanguana y Jesusbiama tojtsabuayiyná, mo cha inye entšá cuaftsemncá, ndoñe ntšamo běnga Jesusbiama fsěndabuayiynacá, y tojtsama tšěngaftanga chašmobená canye espíritu jtsebomnana, pero ndoñe ntšamo chě Běngbe Bětsá tojama tšěngaftangbe ainaniñe cháumashěnguama espíritcá, chě Uámana Espíritu, tšěngaftanga tšabá cha jtsěuántana. Y atše sěntsauatja, tšěngaftangbe ainaniñe inye buayenana chašmóyěngacñama ndánaca tojtsamama, ndoñe cachcá chě tšabe noticiěnga ntšamo ya běngbentsana šmonjouencá, y chora tšěngaftanga chábioye becá tšabá jtsěuántana. 5 Pero atše sěntsejuabná tondayiñe más batšá uamaná tsměna ca, chě Jesucristbe puerte uámana ichmóněnga imomna ca juabnayěngbiama. 6 Atše ndoñe sěnjuatsjinye ntšamo corente tšabá entšángaftaca jóyebuambayama; pero atše puerte tšabá sěndětatsěmbo ntšamo stsichámuama. Běnga puerte tšabá nyetsca soyěnguiñe tšěngaftanga tcbonjanyanýé, ndegombre chca osertánana ftsbomnana.

<sup>7</sup> ¿O atše ndoñe tšabá sënjama, tšabe noticiënga cbonjanabuayiyná ora, tšëngaftangbentsana atšbiamatodaye ntjotjañcá, nduamanacá jenóbemëse; chca, tšëngaftanga puerte uámanënga chašmotsemnama Bëngbe Bëtsá chaomama? <sup>8</sup> Mo ínÿenache ošbuachiyëngcá enefjuanënga crocénana cuafjabaquëcá, crocénana sënjanóyëngacñe chë ošbuachiyëngbentsana, tšëngaftanga jujabuáchama jobenayama. <sup>9</sup> Y tšëngaftangaftaca sënjamna ora y ndayánaca šojanájaboto ora, atše ndoñe checbátantjañe atšbe opresidama, chca, tšëngaftangbiamatotá ndoñe chaondëtsemnama; er chë Jesucristbeyeca catšátanga Macedoniocana tmonjánashajnënga, šmonjanatšetá ntšamo šojanbuashbencá. Chca, atše sënjanma, atšbe causa tšëngaftangbiamatotá ndoñe chaondëtsemnama; y sempre chca chántsama. <sup>10</sup> Serto, Cristbe ndegombre soyënga atšbe ainaniñe sëntsebmna; chíyeca, atše corente sëntsetatšëmbo ndocná Acaya luarentše yochjama atše chayajbaná puerte oyejuayá jtsóyebuambnayama, chë tšabe noticiënga stsabuayiyná ora; y chca chanjama atšbe opresidama chašmoyema ínÿenga ntsamncá. <sup>11</sup> ¿Y ndáyeca chca stsama? ¿Yojtsemna ndoñe cbondábabuanÿeshana causa? Ndoñe. Bëngbe Bëtsá endëtatsëmbo tša cbondábabuanÿeshanama.

<sup>12</sup> Pero atše sempre chántsama ntšamo sëndamcá, chca, chë ínÿenga, chë Jesucristbe puerte uámana ichmónënga imomna ca juabnayënga ndoñe chamondëtsebmna ndáyeca jatenábotamnayama, ntšamo bënga fstsamcá chënga imojtsetrabája ca. <sup>13</sup> Er chënga ndoñe quemátsmëna Jesucristbe ndegombre ichmónënga, mondmëna chë ínÿenga jáingñama imotrabájanga, y mondama entšanga chaotsinÿanama chënga mo Jesucristbe ndegombre ichmónënga cuaftsemncá. <sup>14</sup> Y chama ndoñe šmatjenjaná, er cach Satanásnaca endbëtsama mo canÿe buashinÿinÿana angelcá jtsinÿinama; <sup>15</sup> chíyeca, ndoñe muatjenjaná, chabe oservenëngnaca tmojtsamama mo tšabe entšangcá jtsinÿinama. Pero chënga mochanjopochóca, ntšamo tmojtsomerecencá, ndayá tmojamama.

*Ntšamo Pablo tojansufri, Cristbe ichmoná bëtsemna causa*

<sup>16</sup> Cachiñe cbochtëtéyana: ndocná chaondëtsejuabná atše opá stsemna ca, cach atše stsenabotamná ora; pero chca šmojtsejuabnase, mo canÿe opabioycá šmochtsëuánta, chca, átsnaca jtsenábotamnayama jobenayama. <sup>17</sup> Chca jayanëse, ndoñe quenátsmëna ntšamo Bëngbe Utabná endbetsamcá, ndayá canÿe opá inetsamcá; atše tšabá jtsetatšëmbëse ndegombre stsebmna ndáyeca jobenayama jtsenábotamnayana. <sup>18</sup> Banga mondmëna, cachënga jtsenábotamnayana ndayá quem luarentše

chënga tmojamama, as átšnaca chantsenábotamnaye.  
 19 Tšëngaftanga chë tša osertánënga, oyejuayënga opëngbioye  
 jtsëuantánana. 20 Atše sëndétatšëmbo tšëngaftanga  
 chë opëngbioye šmnetšëuantánama, er tšëngaftanga  
 šmondbétsëuantana chë nyets tempo tšëngaftanga mo chëngbe  
 oservenëngcá tcmojtsamëndayënga, o chë tšëngaftanga bëtscá  
 tcmojtsabacanga, o tcmojtsaíngñanga, o chë uámanënga  
 tmojtšenobiamnanga tšëngaftanga mo nduamanëngcá  
 jtsamëndayama, o chë tcmojtsajuebjantšetayënga.

21 Atše chca sentsichamo masque sentsëuatja chca  
 jayanama. Bënga fsënjamna corente obenana ndbomnënga,  
 ntšamo tšëngaftanga bëngbiana šmojayancá, tšëngaftangaftaca  
 chca jamama.

Inyënga, chë tšëngaftangbeñe imotrabájanga, ndayama  
 jtsenábotamnayama tmojtsebomnëse, puerte uámana  
 ichmónënga imomna ca jtsichámëse, átšnaca añemo  
 sëntsebomna chama jtsenábotamnayama; chca stjayana  
 ora, mo canye opá tojtsoyebuambnacá sëntsoyebuambná.  
 22 Chënga jtsenábotamnayana hebreunga imomnama. Atšnaca  
 hebreo sëndmëna. Chënga jtsenábotamnayana Israeloquënga  
 imomnama. Atšnaca Israelocá sëndmëna. Chënga  
 jtsenábotamnayana Abrahábentšana entšanga imomnama.  
 Atšnaca Abrahábentšana entšá sëndmëna. 23 Chënga  
 jtsichámuana Cristo imoservenca. Atše chëngbiana cabá  
 más tšabe oservená sëndmëna. Chca stjayana ora, mo canye  
 opá tojtsoyebuambnacá sëntsoyebuambná. Atše chëngbiana  
 más tijatrabájá, más šmojutame, más šmojatsetšená y ba  
 soye atšbiana resjo endmëna jóbanama. 24 Shachna soye  
 judiënga šmonjantsetšená chë unga bnëtsana y esconëfta  
 soye jasachënjëse, ntšamo chënga jacastígana monduamancá.  
 25 Unga soye niñbéngaca šmonjanétsjanganja, y ndëtsbéngaca  
 canye šmonjanatëchënganja. Unga soye chë atše  
 sënjánenjaquena barco tontsanenatjëmbe, y chca ora, canye  
 šonjanotocá, chë mar béjayoca tsachocana bënoca canye  
 ibeta jëftsebobínynana y canye te jëftsejétanana. 26 Atše becá  
 sënjánana, y chca atšbiana resjo enjamna bëtš fshajayënguiñe  
 y uacucuatšënga chašmuebiatbëbama; resjo cach atšbe  
 entšángbentše, judiënga y ndoñe judiëngbentše; resjo bëtš  
 pueblënguentše, entšanga ndoyenentše y mar béjayoca.  
 Atšbiámna resjo enjamna chë Jesucrístbeyeca atšbiana  
 catšátanga imomna ca jtsichámuana, pero ndegombre chca  
 ndoñe mondmënéngbeñe. 27 Atše bëtscá tijatrabájá empás  
 uamëntšnáyá joquédantscuana; ba soye tijachnëngo ibeta  
 ntsamanacá y ba soye tijachnëngo shëntseca y uajuendayá; ba  
 soye ndayá jasama ntsebomncá; tijasufrí sësnama y tondaye

entšayama.

<sup>28</sup> Quem soyëngama y inye ndoñe chiyátayana soyëngama más, atše cada te natjëmbana ainánaca ndoñe queschtatsmëna, er ndoñe quetsátstatsëmbo ntšamo nyetsca ošbuachiyëngcá enefjuanënga imojtsiyenana. <sup>29</sup> Ndánaca tšabe soye jamama tondaye añemo tontsebmna ora, atše chabiamá šochandbóngmia, mo átšnacá cach tondaye añémoca cuabndëtsemncá. Nderado ínÿenga tmojama ndánaca bacna soyiñe chaótsatsáma, atše ndegombre puerte ngménaca chandbëtseufrina. <sup>30</sup> Nderado nÿa tojásiyta atše ndayama jatenábotamnyama, as chë atše tondaye obenana ndbomná tsmënama ínÿanÿnaye soyëngama chtsenábotamnaye. <sup>31</sup> Bëngbe Bëtsá y Bëngbe Utabná Jesucristbe Taitá, ndábioye nyetscanga nyetsca tescama jtsatschuanayama entsamna, cha endëtatsëmbo atše ndegombre stsihámuama chë sëntsoyebuambná soyënguiñe. <sup>32</sup> Atše Damasco bëts pueblaca sënjamna ora, chë rey Aretasbe uabuáyana mandado tojanmandá chë pueblöye amashjuaniñe soldadënga chamotsebojanÿama, atše chašmishachama chëjana stsebocana ora; <sup>33</sup> pero básefta enutënga, canÿe sbarëcuiñe šmóntsánëštjango chë pueblentša šhëconana tapiëšiñe canÿe atëfñëjana, y chca atše sënjanobená chëngbe cucuatšentšana jótsbocana.

## 12

*Ndayá Pablo mo otjenayoquëcá tojáninÿe y ndayá Satanás tojanma, Pablo chaosufrima*

<sup>1</sup> Atše šontsemna más jtsenábotamnyana, masque chca tcojamentšana ndocna tšabe soye ntjóbcnana. Mora chanjóyebuambaye, chë mo otjenayoquëcá sënjinÿe Bëngbe Bëtsabe soyëngama y Bëngbe Utabná šojinÿinÿé soyëngama. <sup>2</sup> Atše canÿe entšá sënduábuatma, cha Crísoftaca cánÿiñe mo canÿacá endmëna y nda bnëtsana canta uata entsemna, Bëngbe Bëtsá tbojanánatse, chë celoca más tsbanánöye, Bëngbe Bëtsá yomnöye. Atše ndoñe quetsátstatsëmbo Bëngbe Bëtsá cha tbojanánatse chabe cuérpoca o nÿe chabe espiritiñe. ¡Nÿe Bëngbe Bëtsá chama yotátšëmbo! <sup>3-4</sup> Atše sëndëtatsëmbo Bëngbe Bëtsá chë entšábioye celöye tbojanánatsama, nyetscanga oyejuayënga imomnöye (atše ndoñe quetsátstatsëmbo Bëngbe Bëtsá tbojanánatse chabe cuérpoca o nÿe chabe espiritiñe; nÿe Bëngbe Bëtsá chama yotátšëmbo), y chentše cha tojanuena palabrenga, ndocná bontsemna jayanama palabrenga, chë ndayama entšangbiamá ndoñe yontselesenciana jatichámuana. <sup>5</sup> Atše chë entšá sëndmëna. Canÿe entšá ndáftaca chca tojopasabiamá,

tšabá nántsemna chama jtsenábotamnayana; pero cach atšbiana jtsenábotamnayana ndoñe tšabá ntsemnana, ndayá n̄ye chē atše mo obenana ndbomnacá tsmēnama in̄yin̄ynaye soyēngama chantsenábotamnaye. <sup>6</sup> Y nderado jtsenábotamnayama atše stseboše, chca ora atše ndoñe stsama mo can̄ye opá tojtsoyebuambnacá, er ntšamo ndegombre yomncá atše stsichamo. Pero chca ndoñe quetsátama, chca, ndocná chaondētsejuabná ntšamo atšbiana tbojtsin̄yanama o ntšamo atšbiana cha tojouenama atše más tsmēna ca. <sup>7</sup> Chíyeca, tša uamaná tsjamna ca atše ntjásjuabnayama, atše chē Bēngbe Bētsá tša bēts soyēnga tbojanin̄in̄yé entšá bētsemnayeca, Bēngbe Bētsá tojanma atše chaitsebomna ndáyeca puerte chaisufrima, mo can̄ye bēts uchmašēfja atšbe cuerpiñe tojtsashacuancá, mo Satanasbe ichmona soycá, atše chaisufrima chaomama. <sup>8</sup> Unga soye Bēngbe Utabná sēnjaimpadá chca sufrínana chašotsebojuánama; <sup>9</sup> pero Bēngbe Utabná šonjauyana: “N̄ye atšbe bonshánana endmēna lempe ntšamo cmojtsajabotcá; n̄yetscanga atšbe obenana más tšabá jin̄yana, chē obenana ndbomna entšángbeñe atšbe obenana stj̄in̄yan̄iye ora ca.” Chcasna, atše puerte oyejuayá chan̄jóyebuambaye chē atše mo obenana ndbomnacá tsmēnama in̄yin̄ynaye soyēngama, Cristbe obenana átšbeñe sempre chaotsomñama. <sup>10</sup> Chíyeca, Cristo jasérviana, oyejuayá chandbētsemna atše mo obenana ndbomnacá stsemna ora, in̄yenga šmojtsoyenguá ora, puerte padecena soyēnga causa ndayá jamama ndoñe sēntsetatšēmbo ora, atše puerte chaisufrima in̄yenga tmojtsama ora y puerte tšetsena ainánaca stsemna ora; er chca soyēnguiñe stsemna ora, mo can̄ya obenana ndbomnacá, chora Bēngbe Bētsá jamana atše ainaniñe bēts añemo chaitsebomnama.

*Nderado ndayá Corintoca ošbuáchiyēnga muanjamama Pablo yojánauatja*

<sup>11</sup> Atše chca chē soyēngama sēntsenabotamná ora sēnjoyebuambá mo can̄ye opá tojtsoyebuambnacá, pero ndegombre tšēngaftanga šmonjama atše chca chaimama. Er tšēngaftanga šmondmēna ndēmuan̄yenga yojtsamna atšbiana puerte tšabá jtsichámuana, atše chca jtsenábotamnayama ndoñe chašondētsemnama. Ndegombre, atše tondayiñe más batšá uamaná quetsátsmēna, chē Jesucristbe puerte uámana ichmónēnga imomna ca juabnayēngbiana, masque atše šontsebiona mo atše tondaye cuaftsamancá. <sup>12</sup> Can̄ya Jesucristbe ndegombre ichmoná bētsemnama in̄yin̄ynaye soyēnga, tšēngaftangbeñe tonjanopasá atše choca sēnjamna ora. Chca, chē Bēngbe Bētsabe obenana in̄yin̄ynaye soyēnga y chē tšabe soyēnga ntšamo chora tonjanopasacá, puerte

tšabá jtsinÿanÿnayana atše canÿe ndegombre ichmoná tsmënama; y atše chca sënjanma, padecena soyënguiñe puerte uantado jtsemnëse. <sup>13</sup> ¿Ndayá tšëngaftanga ndoñe cachcá šmonjanóyëngacñe chë inÿe luarenache ošbuachiyëngcá enefjuanëngbiama? Canÿe soye aiñe, er tšëngaftangbioye tondaye ntjotjañcá, atše ndoñe chiyatslesenciá tšëngaftanga atšbe opresidama chašmuájabuachama, ntšamo inÿe ošbuáchiyënga aiñe sënjalesenciácá. Smochtseperdóna chca bacna soye tšëngaftangbiama tijamama.

<sup>14</sup> Atše ya sëntseprontana, móracna unga soyama jama tšëngaftanga jányama, y mora atše cach ndoñe quebochataimpáda atšbe opresidama chašmuatájabuachama. Atše ndoñe quetsátsboše chë tšëngaftanga šmobomna soye jatsbomnana, ndayá puerte sëntseboše tšëngaftanga Cristo sempre chašmotseservénama. Atše chca jamama sëntseboše, er atše tšëngaftangbiama mo canÿe taitacá, Crístbeñe šmotsanošbuachéyeca, atše chabiamama tcbonjanabuayená ora; sëntsejuabná chë taitanga inétsamna crocénana jájuabana básenga jtsanÿenama, y ndoñe básenga chë taitangbiama. <sup>15</sup> Y atše corente oyejuayá lempe ntšamo tsbomncá chanjátsataye, y atše jopochócantscuanënaca, tšëngaftangbe tšabiamama. Atše cada te más cbojtsababuánÿeshanëse, ¿tšëngaftanga más batšá atše smochtsebobonshana?

<sup>16</sup> Ndoñe; tšëngaftanga tšabá šmondétatšëmbo, atše uajabotá sënjamna ora, atše tondaye tcbonjanótjañama. Masque chca, báseftanga imojtsichamo ntšamo inÿenga ndayíñnaca jáingñama atše tsátšëmbo ca, chëngbentšana crocénana josháchiñama; y atše catijama, inÿenga jáingñase, nÿe ntšamo atše tsbošcá chamotsamama ca. <sup>17</sup> ¿O nderado atše tchojaingñé, canÿa chë tšëngaftangbioye sënjichamó chentsáftaca? <sup>18</sup> Tito sënjanimpadá tšëngaftanga jányama chaotsama, y cháftaca sënjanichmó chë inÿa bëngcá Crístbeyeca bëngbe catšata. ¿Nderado Tito tcmojaingñé? ¿Ndoñe ndegombre yondmëna, Tito y atše cachcá fstsjuabná y fstsboše y cachca soyënga jtsamëse fstsiyena? Ndegombre chca endmëna.

<sup>19</sup> Nderado tšëngaftanga šmojatsjuabná bënga jenëuyanama chca cbojtsëtsësná ca; pero ndoñe chca quenátsmëna. Inÿetšá, bënga Crísoftaca cánÿiñe mo canÿacá entšangcá, Bëngbe Bëtsabe delante fsëntsoyebuabná, y lempe ntšamo tijayancá, Jesucrístbeyeca atšbe bonshana catšátanga, tšëngaftangbe tšabiamama tijayana, Crístbeñe corente chašmotsošbuáchemama y ainaniñe bëts añemo chašmotsebomnana. <sup>20</sup> Er atše sëntsauatja, atše jányama chajá ora, ndoñe chachbondánÿena ntšamo tsbošcá,



y tšëngaftanga atše ndoñe chašmondínjena ntšamo šmojtsebošcá. Sëntsauatja nderado bacna soyënga šmattsama: jtšenpenzentserana, ínÿengaftaca yapa jtšenántšabošana, ndayánaca rábiaca jtsamana, nÿe tšëngaftangbiama tšabe soyënga jtsebomnama jtsebošana, ínÿengbiama podesca ichámuana, uayátsenayënga jtsemnana, ínÿengbiama cachënga más uámanënga jtšenobiamnayana, y nÿetscanga ndoñe cachcá ntsejuabnayana. Chca chacbojánÿenëse, tšëngaftanga ndoñe quešmochátsbošena jóyëngacñana ntšamo tšëngaftanga jucácanama atše šochtsemncá. <sup>21</sup> Atše sëntsauatja, cachiñe jányama chajá ora, atšbe Bëtsá chaoma atše chaitsëuatja chca šmojtsamama, y chašotsemna puerta ngménaca jošachnama ba tšëngaftangbiama, ndëmuanÿënga ya bayté bacna soyënga imojtsama y chca juabnayana ndoñe tmonjatrocá, y ndoñe tmonjajbaná chë bacna soyënga boyabása o shembásaftaca jtsamama juabnayana, y chca soyënga jtsamana y nÿetsca bacna soyënga jtsamana, jenomándama ntsobencá.

## 13

### *Inÿe soyëngama jábuayenama y jádiošoftama*

<sup>1</sup> Móraca ya unga soyama tšëngaftanga jányama chanjá. Atše chajáshjango ora, tojtseytëse chanjayana ntšamo báseftanga tmojamcá tšabá o ndoñe tšabá bëtsemnana. Nda bacna soye ntšamo Moisesbe leyíñe endëmandancá tojama ora, atše chanjayana cha ndoñe tšabá tonjama ca; pero útata o únganga tmojtsemnëse, chënga chamuayanama cha ndegombre chca tojamama. <sup>2</sup> Atše tempo sënjanabuayená, chë tšëngaftanguentsënga bacna soye tmojánamënga y chë ínÿënga, atše šojtsanmëna jácastigana, chca soyënga amana ndoñe tmonjájbananga. Mora, tšëngaftangbentshana bënoca sëntsemna ora, cachiñe cachcá cbëtëtabuayená, ntšamo sënjanamcá chë tšëngaftangaftaca uta soyama sënjamna ora: atše cachiñe jányama chajase, ndoñe quichatsleséncia bacna soyënga chašmotsamama y chama ntjacastigacá jatabáshejuanana. <sup>3</sup> Atše chca chanjama, er tšëngaftanga šmontsenguá ndayánaca tšabá chacminÿanÿëma Cristo atšbiajana yoyebuambnama. Cristo ndoñe quenátsmëna mo canÿa obenana ndbomnacá, ntšamo tšëngaftangaftaca cha tojamama; ndayá chabe bëtš obenana tšëngaftangbeñe bëtscá jtsinÿanÿnayana. <sup>4</sup> Er cha tmojancrucificá mo canÿa obenana ndbomnacá; pero mora, Bëngbe Bëtsá puerta obená betšómñeyeca, cha tojtayena. Cachcá bëngnaca, cháftaca cánÿiñe mo canÿacá jtsemnëse, mo obenana ndbomnëngcá jtsemnana; pero cháftaca mochantsiyena, Bëngbe Bëtsá puerta obená betšómñeyeca, tšëngaftanga jtsaservënama.

5 Tšëngaftanga cada ona šmochjshénojuaboye, tšabá jtsetatšëmbuama mocna entsanga bétsemnana, jtsetatšëmbuama aíñe o ndoñe sempre Crístbeñe puerte tašmuetsošbuáchema. Smochjshénojuaboye chca šmošbuáchema ntšamo šmojtsemnana y tšabá ínÿenga šmochjínÿanÿiye. ¿Ndoñe šmondétatšëmbo Jesucristo tšëngaftangbe ainaniñe yoyenama? Ndoñesna, tšëngaftanga ndegombre ndoñe Crístbeñe ošbuáchiyënga šmontsemna. 6 Pero atše sentsobátmana tšëngaftanga ndegombre chašmotsejuabnama bënga Jesucristbe ndegombre ichmónënga ftsmënana. 7 Y Bëngbe Bëtsá fsëntseimpadana bacna soye ndoñe chašmondétsamama, ndoñe chë Jesucristbe ndegombre ichmónënga ftsmënana tšëngaftanga jinÿanÿiyama, ndayá ntšamo tšabá yomncá chašmotsamama. Nÿetscanga chca tmojtsamëse, nántsinÿna mo Crístbe ndegombre ichmónënga bënga ndoñe cuabndmëncá, er chca ndoñe tašuatátëjamoto jinÿanÿiyana ntšamo bënga bëngbe mándoca ftsmënana mo ichmonëngcá, tšëngaftanga jábuayenama. Pero chë soye tondayana šattsentsamna, 8 er bënga queftsátobena tondaye jamana Bëngbe Bëtsabe ndegombre soyëngama contra; nÿe ntšamo chabe ndegombre soyënga yomncá aíñe. 9 Bënga fsëntseboše ntšamo tšabá yomncá tšëngaftanga chašmotsamama, er bënga oyejuayënga fchandbétsemna, bënga mo chë obenana ndbomnëngcá ftssemna ora, bëngbe mando jácastigama ntjatinÿanÿnaycá, y tšëngaftanga ainaniñe bëts añémoca šmojtsemna ora y puerte tšabá šmojtsemnanda ora. Bënga Bëngbe Bëtsá fchandbétseimpadana, chca bacna soyënga amana jtsajbanase, chašmobená jtsemnana nÿetsca soyënguiñe tšábënga, y lempe ntšamo tšëngaftanga chašmotsemnana Bëngbe Bëtsá yobošcá. 10 Quem tsbuanácha cbontsëbuabiamná tšëngaftangaftaca cabá ndoñe sëntsemna ora; chca, atše choye chajjá ora ndoñe chašondétsemna jabuache jucácanana, mo canÿa puerte mandayacá, ntšamo Bëngbe Utabná šojanbemcá, tšëngaftanga jujabuáchama chábeñe corente chašmotsošbuáchema y ainaniñe bëts añemo chašmotsebonnama, y ndoñe tšëngaftanga jatapochócama.

11 Morna, Jesucristbeyeca atšbe catsátanga, tšabá chašmotsomñe, šmochtsajbaná chca bacna soyënga amana y šmochtsemna lempe ntšamo Bëngbe Bëtsá yobošcá. Smochjouena ntšamo tcbonjabuayenacá, nÿetscanga cachcá šmochtsejuabnaye, nÿetscángaftaca natjëmbana šmochtsiyena, y Bëngbe Bëtsá, chë cmondababuanÿeshaná y tšëngaftangbe ainaniñe tšabe ebionana chašmotsebonnama endamá, tšëngaftangaftaca echántsemna. 12 Nÿetscanga smochjenchuaye mo Jesucristbeyeca catsatangcá,

jtenámochëse, ntšamo cach tšëngaftangbe pamíllanga puerte bonshanánaca šmondetsacheuanaycá. <sup>13</sup> Nýetsca quem luaroca ošbuáchiyënga cmontsacheuaná.

<sup>14</sup> Atše, Bëngbe Bëtsá sëntseimpadana, Bëngbe Utabná Jesucristo chaoma, nýetsca tšëngaftangbeñe tšabe bendicionënga chaotsemnana. Bëngbe Bëtsabe bonshánana sempre chašmotsóbomñe, y Uámana Espíritu sempre chašmotsóbomñe, y chë Uámana Espíritoftaca cánÿiñe mo canÿacá chašmotsomñe.

## Gálatas

### *Pablo Galacia luaroca ošbuáchiyënga jacheuayama*

1-2 Atše Pablo, quem tsbuanácha sentsabiamná Jesucristbeñe ošbuáchiyëngbiama, chë Galacia luaroca ošbuachiyëngcá enefjuanëngbiama. Jesucristo y Bëngbe Bëtsá, chë Taitá, nda tojanma Jesucristo cháuatayenama, chata šmonjanchembo chatbe ichmoná jtsemnama. Ndocna entšá chešnátanabuayana atše Cristbe ichmoná jtsemnama; ni Jesucristo, ni Bëngbe Bëtsá ndocna entšá tbonjanichmó atše chatbe ichmonacá jabuábuayanama. Atše y chë inyënga Jesucristbeñe ošbuáchiyënga átšeftaca montsemnënga, tšëngaftanga cbontsacheuaná. <sup>3</sup> Atše sëntseimpadana Bëngbe Bëtsá Bëngbe Taitá y Bëngbe Utabná Jesucristo, chaboma tšabe bendicionënga tšëngaftangbeñe chaotsemnama, y chaboma tšëngaftangbe ainaniñe tšabe ebionana chašmotsebonnama. <sup>4</sup> Cristo chabe derecho vida jtsobomñama cachcá tojanonyá y tojanóbana, bëngbe bacna soyënguentsana játsebacama, y bënga chamotsobena jtsiyenama ndoñe ntšamo quem tempo entšanga imoyencá, puerta bacna soyënga imojtsama ora. Cristo tojanóbana ora, tojanma ntšamo Bëngbe Bëtsá, Bëngbe Taitá endmëná yojanbošcá. <sup>5</sup> Nyetscanga nyetsca tescama Bëngbe Bëtsá chamotsatschuaná. Chca chaotsemna.

*Nyë canyë ndegombre buayenana soyënga Cristbiamna endmëna*

<sup>6</sup> Atšbe ainanoca inyetsá šontsebiona, er nda nanjouena, tšëngaftanga nyë baseftayshinye y ya juabna šmojatstrocá y Bëngbe Bëtsá stëtsoye šmojtsequedá, nda tšëngaftanga tcmojáchembo chabe entšanga chašmotsemnama. Cha chca tojanma Crísbeyeca, er mua puerta tšabia tšëngaftangaftaca enjamna. Tšëngaftanga Bëngbe Bëtsá stëtsoye šmojtsequedá, inyëngbe buayenana soye jouenama, y chë inyënga jtsichámuana chë buayenana soyënga chë tšabe noticiënga canmëna ca. <sup>7</sup> Ndegombre, ndoñe quenátsmëna inyë ndegombre buayenánana. Ntšamo entsopasancá mëntšá entsemna: báseftanga montsama tšëngaftanga ndoñe natjëmbana ainánaca chašmotsiyenama, y becá montsama chë Cristbiamna tšabe noticiënguentsë, ba ndegombre soyënga jtsejuánama, inyë soyënga jacjayama. <sup>8</sup> Nderado bënga o canyë celoca ángel soyënga cmojtsabuayiyná, y ndoñe tontsemna mo chë tšabe noticiënga bënga tempo tcbonjanabuayenacá, as chë chca tojtsamabiama ¡Bëngbe Bëtsá chaoma infernoca becá chaosufrima! <sup>9</sup> Tempo ya chca sënjánayana; mora cachiñe

šcutétayana: Nderado nda soyënga cmojtsabuayiyná, y ndoñe tontsemna mo chë tšabe noticiënga, ntšamo tempo šmonjanoyëngacñěcá, ¡Bëngbe Bětsá chabiamama chaoma infernoca puerte chaosufrima!

<sup>10</sup> Atše chca stjajana ora, ětšëngaftanga cmojtsinÿana atše soyënga stsama entšanga oyejuayënga átšeftaca chamotsemnama? Ndoñe chca quenátsmëna. Atše sëndboše ndayá Bëngbe Bětsá átšeftaca oyejuayá chaotsemnama. Entšanga oyejuayënga chamotsemnama, atše cabá soyënga stsamëse, atše ya ndoñe Cristbe canÿe oservená stsemna.

*Ntšamo Bëngbe Bětsá Páblëbioye tbojanchembo, Jesucristbe ichmoná jtsemnama*

<sup>11</sup> Atše sëntseboše tšëngaftanga, Jesucristbeyeca atšbe catšátanga, chašmotsetátšëmbo chë tšabe noticiënga ntšamo sëndabuayiynacá quem luarentša entšangbe juabnentšana ndoñe yondóbocanama. <sup>12</sup> Ndocna entšá chë tšabe noticiënga chešnatanbuayená, ni chešnatanbuatëmbá, ndayá cach Jesucristo šonjaninÿinÿé.

<sup>13</sup> Tšëngaftanga šmojátatšëmbona ntšamo atše tempo tsjanamana jtsiyenana, ntšamo judiënga Bëngbe Bětsá mondadorancá atše cha sënjanadorana ora, ntšamo atše becá tsjánamama chë ošbuachiyëngcá enefjuanënga puerte chamosufrima, y ntšamo atše becá tsjánamama ndocná Jesucristbeñe chaondëtsošbuáchema. <sup>14</sup> Atše inÿe judiënga cach atšcá uata bomnëngbiama más sënjánama Bëngbe Bětsá adórayiñe, ntšamo judiënga cha jadórama monduamancá, y atše nÿets añémoca tša sënjantšena jtsamama ntšamo bëngbe běts taitanga básenga jabuátambama monjanamancá. <sup>15</sup> Pero Bëngbe Bětsá atšbe tšabiamama yojanjuabná, y chíyeca, atše cabá ndonÿna ora, canÿe běts soyama cha šojanbocacá. <sup>16</sup> Y cha tojánbošena ora, šonjaninÿinÿé ntšamo ndegombre chabe Uaquiñá yomnana, y šonjanchembo. Cha chca tojanma, atše chë tšabe noticiënga ndoñe judiëngbeñe chayábuayenama. Y atše ndocnábioye chiyataná ndayá jamama šojtsanmënama chašobuayenama; <sup>17</sup> y Jerusalenoye cach ndoñe chiyataná chë atšbiama más natsana Jesucristbe ichmónënga imojamnëngaftaca jencuéntama. Chamna, cachora Arabia uabaina luaroye sëntsanoye, y chentšana Damasco běts pueblöye sëntaná.

<sup>18</sup> Jesucristbeñe jtsošbuáchiyama sënjanóntša orscana, unga uatëse Jerusalenoye sënjánama Pédroftaca jencuéntama, y cháftaca nÿe uta semana sënjëftsemna. <sup>19</sup> Y ndocna chë Jesucristbe inÿe ichmónënga chiyáisananÿe; nÿe Santiago añe, Bëngbe Utabnabe catšata. <sup>20</sup> Bëngbe Bětsá šontsonÿá, ntšamo tšëngaftanga cbontsëtsëtsnacá ndegombre bétsemnama.

21 Jerusalenocana sēnjēftsanbocnentsana, Siria y Cilicia luarēngoye sēnjána. 22 Pero chē tempo, chē Jesucristbeñe ošbuáchiyēnga Judea luariñe bomínýeca ndoñe quešmēnjatanábuatma. 23 Nýe ínýengbioye imojtsayaunana: “Nda tempo bēnga puerte chamotsesufrínama enjanamá, mora entsānga entsabuayiyná, Jesucristbeñe jtsošbuáchiyama caojtsamna ca. Y tempo cha tša enjánboše jamama entsānga Jesucristbeñe ndoñe chamondētsošbuáchema ca” —chēnga imojtsichamo. 24 Y entsānga Bēngbe Bētsá imojtsatschuanaye, ndayá cha atšbiajana tojanmama.

## 2

*Chē inýe ichmónēnga tmojánayana Pablo aínē tšabá yojtsama ca*

1 Jerusalenoye sēnjána orscana bnētsana canta uatēse, cachiñe choye sēnjesaná. Bernabé šonjantjēmbambá, y Tito bēndátaftaca fsēnjēftsanbetše. 2 Choye sēnjána, choye jama šojamnama Bēngbe Bētsá šonjaninýanyéyeca. Atše nýe chē Jesucristbeñe ošbuáchiyēngbiama uámanēnga imojamnēngaftaca sēnjanencuentá, ínýengaftaca ndoñe; y chē tšabe noticiēngama chē ndoñe judiēngbeñe sēndabuayiynama chēnga sēnjanacuntá. Chca sēnjanma atše jtsetatšēmbuama, ntšamo tijanma y sēnjēftsamcá ndoñe nýe bonamente yonjamnama. 3 Pero chēnga tmonjánayana atše aínē tšabá tijanma ca, y Tito, chē átšeftaca enjamná, masque Grecia luarocá enjamna, chēnga ndoñe chematanmandá base bobachtema chē más delicadentše tētšená chaotsemnama, ntšamo judiēnga monduamancá, Bēngbe Bētsábēnga imomnama chaotsinýnama. 4 Chca tonjanopasá, masque ínýēnga monjánboše Tito base bobachtema chē más delicadentše tētšená chaotsemnama. Chēnga tmonjánayana bēngcá Jesucristbeñe ošbuáchiyēnga imojamna ca, pero ndoñe chca quemēnjatsmēna. Chēnga chē Jesucristbeñe ošbuáchiyēngaftaca tmojanenutaná, ndayá yojtsanopasánama chē ošbuáchiyēnga ntsetatšēmbcá, mo chē ošbuáchiyēngbiama bacna soyēnga jamama cuafseitēmena cuenta. Chēnga tmojánabo jtsetatšēmbuama ntšamo Jesucristo bēnga atsebácanēnga šojánabiamama, chē judiēngbe leyēngaca ndēmandánēnga, cháftaca cánýiñe mo canýacá jtsemnēse. Chēnga chca tmojanma, er chēnga imojtsanboše jamana, bēnga chē judiēngbe leyēngaca nýets tempo mandánēnga chamotsiyenama. 5 Pero bēnga ndocna ora fchiyátanayana aínē ca chē ntšamo chēnga monjánichamo bēnga šojánamna jamama soyēngama, er bēnga becá fsēnjánboše tšēngaftanga

nÿets tempo Jesucristbe ndegombre tšabe noticiënga chašmotsóbonñama.

<sup>6</sup> Pero chë ndëmuanyëngbiana entšanga monjánichamo chë uánatsanënga imojamna ca (ndayá chënga tempo imojamna atšbiana ndoñe quenatámana; Bëngbe Bëtsabiana nÿetscanga cachcá monduámana), chëngna tondaye chešmatanbuayená, ntšamo tempo tijanmama inÿetsá chaimama. <sup>7</sup> Masna, chënga tmonjántatšëmbona, Bëngbe Bëtsá chë tšabe noticiënga ndoñe judiënga jábuayenama trabajo atše jamama šojanëntšabuáchema, ntšamo judiënga jábuayenama cachcá Pédrëbioye tbojanëntšabuachecá. <sup>8</sup> Er Bëngbe Bëtsá atše chabe ichmoná šonjánbema, ndoñe judiënga chabiana jábuayenama, ntšamo cachá Pédrëbioye chabe ichmoná tbojanbemcá, judiënga chabiana jábuayenama.

<sup>9</sup> Santiago, Pedro y Juan, chë ošbuachiyënguentša uánatsanënga, atše canÿe bëts trabajo chaitsebomnana Bëngbe Bëtsá tojanmama tmonjántatšëmbona ora, cucuatše šontanatšataye atše y Bernabébioye, jinÿinÿiyama chënga šojanëbuajama mo cachëngbe trabajo amatcá. Y fsënjanenoyeuná bëndata jama, masna ndoñe judiënga jtsabuayinyayama trabajo jamama, y chëngna judiëngbeñe. <sup>10</sup> Chënga nÿe šonjanaimpádaye chë ošbuáchiyënga ndbomñëjmënga Jerusaleñoquëngbiana jtsenójuabnayama; y atše bëtscá sëntsama chënga jujabuáchama.

*Pablo Antioquioca Pédrëbiana tojánayana cha ndoñe tšabá tojanma ca*

<sup>11</sup> Pero Pedro Antioquía bëts puebloye tonjánabo ora, chabe delante sënjánayana cha ndoñe tšabá tonjanma ca, er ntšamo enjanamcá ndoñe tšabá quenjatsmëna. <sup>12</sup> Mëntšá tonjanopasá: Santiago básefta entšanga Antioquiye tojanichmó, pero chënga cabá choca ndáshjajna ora, Pedro yojanamana chë ndoñe judiënga ošbuáchiyëngaftaca jtsesayana. Pero chë entšanga tmojánashjajnentšana, Pedro tojtsanajbaná chëngaftaca sayana y encuéntayana. Cha chca tojanma, ntšamo chë ndoñe judiënga ošbuáchiyënga, chë base bobachtema chë más delicadentše tëtšenënga jtsemnana yojánamna ca tmojánayanënga, chabiana muanjájuaboyama yojtsauatja causa. <sup>13</sup> Chë inÿe judiënga ošbuachiyëngnaca tmojanontsé amana cachcá ntšamo Pedro yojtsamcá, jtsamëse ntšamo chënga imojántatšëmbo chca jamama ndoñe yonjanamncá. Y Bernabënaca, ntšamo chënga imojtsamcá jtsonÿayëse, chëngcá yojtsama, jtsamëse ntšamo cha yojántatšëmbo chca jamama ndoñe ibonjamncá. <sup>14</sup> Chënga ndoñe quemënjátaniyena jtsamëse ntšamo yojanamncá, ntšamo chë Jesucristbe tšabe noticiënguentša ndegombre

soyënga endmëncá. Chca sënjaninÿe ora, Pédrëbioye nÿetsca ošbuáchiyëngbe delante sënjanianya: “Aca canÿe judío, mo ndoñe judío bendmëncá cojtsiyena, y ndoñe ntšamo chë judiënga jamama monduamancá; chcasna, ¿ntšamo catjobenaye jamana chë ndoñe judiënga ošbuáchiyënga mo chë judiëngcá chamotsiyenama ca?”

*Bëngbe Bëtsá judiënga y ndoñe judiënga játsebacana, Jesucristbeñe tmojtsošbuáchema*

15 Bënga judiënga fsëndmëna, bëngbe bëtsëtsanga judiënga monjámnayeca, y ntšamo judiënga chë ndoñe judiëngbioye mondubobuatmcá, chë “bacna soye amënga ca”, ndoñe queftsátsmëna. 16 Y bënga mondëtatšëmbo, canÿe entšá Jesucristbeñe tojtsošbuáchema, Bëngbe Bëtsá jamana cha chabe bominiÿiñe tšabia chaotsemnana, y Bëngbe Bëtsá ndoñe chca ntjamana, ntšamo chë judiëngbe leyënguiñe jamama yomna ca iuayancá chë entšá tojamama. Y bëngnaca Jesucristbeñe imojtsošbuaché, Bëngbe Bëtsá chaomama bënga chabe bominiÿiñe tšábenga chamotsemnana, pero ndoñe ntšamo chë judiëngbe leyënguiñe jamama yomna ca iuayancá bënga tmojamama. Er Bëngbe Bëtsá ndocna ora ntjamana canÿe entšá chabe bominiÿiñe tšabia chaotsemnana, ntšamo chë judiëngbe leyënguiñe iuayancá jamama ibomna ca cha tojamama.

17 Pero, bënga bëtscá mondënguá, Bëngbe Bëtsá chaomama bënga chabe bominiÿiñe tšábenga chamotsemnana, bënga Crísoftaca cánÿiñe mo canÿacá jtsemnëse, chábeñe imošbuáchema. Chca mondošbuaché, bënga chë bacna soyëngama perdonánënga chamotsemnana. Pero inÿe entšanga jtsichámuana bënga bacna soyënga amënga imomna ca, ntšamo chë Moisesbe leyinÿe iuayancá ndoñe montsama causa. ¿Y chca, Cristo bacna soye amënga šuabiamná ca nántsayana? ¡Ndoñe, ndegombre ndoñe! 18 Atše, ntšamo Bëngbe Bëtsá šojaniniÿinÿecá, chë šojtsemna jájbanama soyënga, cachiñe jajuaboyama y jamama stëtontšese, mo chë Moisesbe ley jtsocumplínana perdonánënga jtsemnana, atše stsemna mo nda ndayá cachá tojtsembema y cachiñe tojtëtsjebuanacá; y ndegombre, atše stsemna canÿa ntšamo ndoñe tšabá yondmëncá amá. 19 Chë judiëngbe leyëngaca atše sëndëtatšëmbo, ntšamo chë leyënguiñe iuayancá stsamëse, Bëngbe Bëtsá ndoñe yochanjama atše chabe bominiÿiñe tšabia chaitsemnana; y chca, atše jtsemnana mo obanacá chë castígoca, er chë leyentša mandënga stsamëse, ndoñe quetsátobena atsbocaná jtsemnana. Chë léyeca ndoñe más mandaná ntsemnana jtsebošëse, atše cachcá chë ley sënjanonÿá, Jesucristbeñe jtsošbuáchiyama; y chca, atše



chaitsobena jtsiyenana Bëngbe Bëtsá jtseservénëse. Atše Crístofaca cánÿiñe mo canÿacá sëndmënayeca, Cristo cruciñe tojanóbana ora enjamna mo átšnaca cuañjobancá; <sup>20</sup> y mora entsemna mo nÿe atše ya ndoñe cuaftsiyencá, Cristo beca vida atšbe ainaniñe entsebómnyayeca. Y ntšamo mora atše vida sëntsebomncá, entsemna atše chë Bëngbe Bëtsabe Uaquiñábeñe betsošbuáchiyama, nda šojánbobonshana, y chabe derecho vida jtsobomñama cachcá tojanonÿá y atšbe tšabiamama tojanóbana. <sup>21</sup> Atše ndoñe quetsatábotena ntšamo Bëngbe Bëtsá entšangbe tšabiamama juabna yobomncá. Nderado Bëngbe Bëtsá tojama canÿe entšá chabe bominÿiñe tšabia chaotsemnana, ntšamo chë leyiñe jamama yomna ca iuayancá cha tojtsamama, as Cristo nÿe tondayama matënjanóbana.

### 3

#### *Ley jtsobedecénëse o Jesucristbeñe jtsošbuáchiyëse*

<sup>1</sup> ¡Tšëngaftanga Galacientša entšanga, yapa ndenójuabnayënga! Entsemna mo nda tcmojtsabocjuanacá, tšëngaftangbe juabna tojtsetrocá. Ndoñe quešnátësertana ntšamo chca nanjopása, er cach atše botamana cbonjanabuayiyiná, Jesucristo cruciñe tojanóbanama. <sup>2</sup> Atše sëntseboše nÿe canÿe soye atše chašmëyana: ¿Uámana Espíritu tšëngaftangbe ainaniñe tojánamashëngo jtsemándayama, tšëngaftanga ntšamo chë leyiñe jamama yomna ca iuayancá šmojamama, o tšëngaftanga chë tšabe noticiënga šmojanuena y chiñe šmojtsošbuáchema? <sup>3</sup> ¿Ndáyeca tša ndenójuabnayënga šmomna? Bëngbe Bëtsabe Espíritbeyeca tšëngaftanga šmonjanontsé mo tsmëma entšangcá jtsemnana. ¿Y mora šmojtseboše tšëngaftangbe vidënga jachnënguama nÿe entšangbe juabnëngaca jtsiyenëse? <sup>4</sup> ¿Nÿetsca soyënga ndayëjana tšëngaftanga šmojachnëjna, tondayama tonjoservé? Ndegombre chca ndoñe taiuatsmëna. <sup>5</sup> Bëngbe Bëtsá, chë Uámana Espíritu tšëngaftangbe ainaniñe cháumashënguama tojanma ora, y tšëngaftangbeñe bëts soyënga chaopasama tojama ora, ¿ndáyeca chca nanjama? ¿Tšëngaftanga ntšamo chë leyiñe jamama yomna ca iuayancá šmojtsamama, o tšëngaftanga Jesucristbe tšabe noticiënga šmojanuena y chiñe šmojtsošbuáchema?

<sup>6</sup> Menójuabonga ntšamo Abraham tojanpasama. Bëngbe Bëtsabe uabemana palabreñguiñe mëntšá endayana: “Cha Bëngbe Bëtsábeñe yojtsošbuáchiye, y chíyeca Bëngbe Bëtsá tonjánayana cha chabe bominÿiñe tšabia yojamna ca.”

<sup>7</sup> Chíyeca tšëngaftanga cmontsamna jtsetatšëmbuana, Bëngbe Bëtsábeñe ošbuáchiyënga mondmëna mo Abrahábentšana entšangcá, cachcá ošbuáchiyana bëtsebomnana, chë

chábertšana ndegombre entsangbiana más. <sup>8</sup> Bëngbe Bëtsabe uabemana palabrënguiñe endopodena jualíama, Bëngbe Bëtsá yochjanma chë ndoñe judiënga chabe bominyiñe tšábenga chamotsemnama, chábeñe tmojtsošbuáchema ca. Y Bëngbe Bëtsabe uabemana palabrënguiñe, cabá chca ndëma ora, Bëngbe Bëtsá Abrahámbyoye quem tšabe noticiënga tbojanbuayená: “Acbeyeca, atše chanjama nyetsca quem luarentša entsanga tšabe bendicionënga chamotsebomnama ca.” <sup>9</sup> Bëngbe Bëtsá tojanma Abraham ba tšabe bendicionënga chaotsebomnama, cha chábeñe yojtsošbuáchema. Chca, Bëngbe Bëtsá, chábeñe ošbuachiyëngbiámnaca ba tšabe soyënga jamana, cachcá ntšamo Abrahambiana tšabe soyënga tojanmcá.

<sup>10</sup> Chë Bëngbe Bëtsá chabe bominyiñe tšábenga yochjábiana ca juabnayënga, ntšamo leyiñe jamama yomna ca iuayancá lempe tmojtsobedecënema, chënga nyets tempo jtsiyenana jtsetatšëmbëse Bëngbe Bëtsá nyetsca tescama chënga yochjácastigayama. Er Bëngbe Bëtsabe uabemana palabrënguiñe mëntšá endayana: “Bëngbe Bëtsá jayanana nyetsca tescama castigo chaotsebomna ca, nda nyets tempo ndoñe tontsama nyetsca mandënga ntšamo chë leyënguiñe iuabemancá ca.” <sup>11</sup> Ndegombre, puerte tšabá entsinyinyëna, Bëngbe Bëtsá ndoñe yochanjama ndocná chabe bominyiñe tšabia chaotsemnama, ntšamo chë leyiñe jamama ibomna ca iuayancá tojtsobedecënëse. Chca ndegombre endmëna, er Bëngbe Bëtsabe uabemana palabrënguiñe mëntšá endayana: “Nyë ndabiana Bëngbe Bëtsá tojama chabe bominyiñe tšabia chaotsemnama, cha Bëngbe Bëtsábeñe betsošbuáchema, cha ndegombre chë nyetsca tescama yomna tšabe vida echántsebomna ca.” <sup>12</sup> Jtsamana ntšamo chë leyënguiñe jamama yomna ca iuayancá, ndoñe quenátsmëna mo Bëngbe Bëtsábeñe cuaftsošbuachecá. Ntšamo Bëngbe Bëtsabe uabemana palabrënguiñe endayancá: “Nda tojtsama nyetsca mandënga ntšamo chë leyënguiñe endayancá, tšabe vida echántsebomna, nyets tempo chë leyëngaca mandaná ca.”

<sup>13</sup> Pero, Cristo jóbanama ibojamna ca tmojánayanama, y cha bëngbe causa chca chamomama chënga tojanalesénciayeyeca, Cristo tojama bënga nyetsca tescama castigánënga ndoñe chamondëtsemnama, ntšamo chë leyiñe iuayancá ndoñe tmontsama causa. Ntšamo Bëngbe Bëtsabe uabemana palabrënguiñe endayancá: “Nyetsca tescama castigo chaotsebomna, nda canye niñësiñe tmojajonyá chaóbanama cha ca.” <sup>14</sup> Chca tojopasá, Bëngbe Bëtsá chaomama, chë tšabe bendicionënga ntšamo cha Abrahámbyoye tbojanšbuachenacá, ndoñe judiëngnaca chamotsebomnama,

Cristo Jesús beyeca; y Jesucrist beñe ošbuachiyánaca, Bëngbe Bëtsá chaomama chë Uámana Espiritu bëngbe ainaniñe cháumashëngo jtsemándayama, ntšamo Bëngbe Bëtsá tojanašebuachenacá.

*Ndocna ley quenátobena Bëngbe Bëtsabe šbuachenana soye jatrócama*

<sup>15</sup> Jesucrist beyeca catšátanga, chë ndayá sentsichamcá endmëna ntšamo nyets tempo entšangbeñe endbetsopasancá. Uta entšata tbojenoyeuná canye trato jénbemama, y ntšamo tbojenšbuachenacá chaotsinýnama chatbe uabaina tsbuanáchañe tbojuábemëse, ndocná inya más ntso benana jayanana ntšamo tbojentratacá ndoñe yontsoservena ca; y inye soyënga chiñe jacjayama cach ndoñe. <sup>16</sup> Chcasna, Bëngbe Bëtsá ba soye Abrahám bioye tbojanšbuachená puerte tsabe bendicionënga chabiamama, y chabe entšanguentšana canyabiámnaca. Y Bëngbe Bëtsabe uabemana palabrenguiñe ndoñe quenátayana: “chabe entšanguentšengbiámnaca ca”, mo Bëngbe Bëtsá ba entšangbiama cuaftsichamcá; sinó mëntšá endayana: “acbe entšanguentšana cányabiama ca”. Y chca entsayana, nye canye entšá ca; y cha endmëna Cristo. <sup>17</sup> Atše ndayá mëntšá cbontsëtsëtná: Natsana, Bëngbe Bëtsá Abrahánoftaca canye trato tojánbema, y tbojaniyana “aiñe ca”, ntšamo tbojanšbuachenacá jamama. Chentšana canta patse y unga bnëtsana uatëse, Bëngbe Bëtsá Moisesbe cucuatšine chë leyënga tbojanántšaboshjona; chíyeca, chë leyënga ndoñe ntso benana jamana chë Bëngbe Bëtsá Abrahánoftaca tojánbema trato ndoñe chaondëtsoservénama, ni jamana ndayá Bëngbe Bëtsá tojanšbuachenacá ndoñe chaondëtsoservénama. <sup>18</sup> Er ndayá Bëngbe Bëtsá chabe entšanga tojatsatacá, tojtsemna chënga ntšamo chë leyine jamama yomna ca iuayancá tmojtsamama, chca, chë tsetana soyënga ya ndoñe nantsóbocana ndayá Bëngbe Bëtsá jamama tojanašebuáchenantšana. Pero ba tsabe bendicionënga Abrahambiamama jamama, Bëngbe Bëtsá tbojanšbuachenáyeca, Bëngbe Bëtsá chë soyënga Abrahambiamama tojanma.

<sup>19</sup> Asna, ¿ndayama chë Moisesbe ley nantsoservena? Bëngbe Bëtsá chë leyënga tojanáboshjona, ba tsabe soyënga jamama Abrahám bioye tbojanšbuáchenantšana baytese. Bëngbe Bëtsá yojanjuabná chë ley chaoservé entšanga jinyanýiyama ndayá tsabá o ndoñe tsabá jamama bëtsemnama, chë Abrahám bentšana Uámana Entšá jashjanguentscuana, ndabiamama Bëngbe Bëtsá Abrahám bioye tbojanšbuachená ba tsabe bendicionënga jamama. Bëngbe Bëtsá angelëngaftaca chë ley Moisesbe cucuatšine tbojanántšaboshjona, y chë entšá Moisés enjamna chë oyebuambnayá Bëngbe Bëtsáftaca

y entšángaftaca. <sup>20</sup> Uta entšata canje trato jénbemamna, jtseytana inje entšá chë uta entšátaftaca chaóyebuambama; pero Bëngbe Bëtsá Abrahámboye ba tšabe soyënga jamama tbojanšbuachená ora, nje canya chca tojanma, y ndoñe bonjanájaboto inya chabiamana Abrahánoftaca chaóyebuambama.

### *Ndayama chë ley yomna*

<sup>21</sup> ¿Chca nántsayana, ntšamo Moisesbe leyiñe iuayancá, chë Bëngbe Bëtsá tojanšbuachená soyëngama contra yomna ca? ¡Ndoñe, ndegombre ndoñe! Bëngbe Bëtsá entšangbe cucuatšíñe canje ley tojanáboshjona, y chë ley tojtsovena jamana entšanga ndegombre tšabe vida chamotsebomnana, as Bëngbe Bëtsá nanjama entšanga chabe bominiñe tšábenga chamotsemnana, ntšamo chë leyiñe jamama yomna ca iuayancá tmojtsamama. <sup>22</sup> Pero Bëngbe Bëtsabe uabemana palabrënguiñe endayana, nyetsca quem luarentša entšanga cachëngbe bacna soyënga jamama juabnëngaca mandánënga imomna ca, chca, Jesucristbeñe ošbuáchiyënga chamobenama ndayá Bëngbe Bëtsá tojašbuachenacá jójyëngacñama. Y chënga, Jesucristbeñe imojtsošbuáchema imojtsebomna ndayá Bëngbe Bëtsá tojanašebuachenacá.

<sup>23</sup> Jesucristbeñe jtsošbuáchiyama entšanga chamobenama tempo joshjanguëntscuana, bënga monjamna corente mandánënga chë léyeca, y chca enjamna mo presënga cuaftsemncá, cárceloca utámenënga. Chë ley chca enjamna, ntšamo entšanga Jesucristbeñe muanjobenaye jtsošbuáchiyama Bëngbe Bëtsá jinñanyiyama tempo joshjanguëntscuana. <sup>24</sup> Cristo jabama tempo tonjanoshjanguëntscuana, chë ley bëngbiamana enjamna mo canje pamillentša oservenacá, cha jtsamana chentša básenga chamotsamama ntšamo tšabá tojtsemncá. Chë ley chca yojamna, bënga Crístbeñe jtsošbuáchiyama chamobenama, y chca, Bëngbe Bëtsá chaoma bënga chabe bominiñe tšábenga chamotsemnana. <sup>25</sup> Pero Jesucristbeñe jtsošbuáchiyama bënga chamotsobenama mora ya tonjóshjangoyeca, chë ley ya ndoñe más quenátsmëna mo canje entšacá, ndayá tšabá yomncá bënga chamotsamama cuaftsamcá. <sup>26</sup> Cristo Jesúsbeñe šmojtsošbuáchema, nyetsca tšëngaftanga šmojobená Bëngbe Bëtsabe básenga jtsemnana, Cristo Jesúseftaca cánjiñe mo canyacá jtsemnëse. <sup>27</sup> Tšëngaftanga tcmonjanëbaye, y chca, Crístoftaca cánjiñe mo canyacá šmontsemna. Y mora šmojobená mo cach Crístcá jtsemnana. <sup>28</sup> Chíyeca, ndayá Bëngbe Bëtsá tojamama, judiënga y ndoñe judiënga cachcanga mondmëna; nyets tempo nje inñabiamana oservénënga y chë nje cachëngbiamana trabájayënga cachcanga, y boyabásenga y shembásengnaca. Nyetsca tšëngaftanga mo canyacá šmondmëna, Cristo

Jesúseftaca cányiñe mo canyáca jtseññese. <sup>29</sup> Tšëngaftanga Cristbe entšanga šmondmëñayeca, šmontsemna mo Abrahámbeñšana entšanga cuaftsemncá; y chca, ntšamo Bëngbe Bëtsá Abrahámbye tbojašbuachenacá, tšëngaftanga šmochanjóyëngacñe.

#### 4

<sup>1</sup> Atšnaca séntseboše jayanama, chë uaquiñá nda yochjóyëngacñe ntšamo tbojtsotocancá, ntšamo chabe taitá jatšetayama tbojašbuachenacá, cha cabá mo canyë basacá tojtseññentscuana, ndocna derecho chë soyënguiñe ntsebomnana; y chca, cha jtseññana mo canya nyets tempo nye ínñabiama oservenacá, masque lempe ntšamo chabe taitá tbojašbuachenacá chë uaquiñabiama tojtseñña. <sup>2</sup> Chë uaquiñá tojtsobóchantscuana, entšanga jtseññana ndëmuanyënga ntšamo cha tbojtsajabotcá jtsoinayana, y ínñyënga jtsejuabñayana ndayá chë taitabe soyëngaca jamama, chë uaquiñá otocana soyëngaca. Y chca jtseññana, chë taitá tojayana tempëntscuana. <sup>3</sup> Mo cachcá cuaftsemncá, bënga chë ndegombre soyëngama cabá ndosértaye ora, bëññaca mandánënga monjamna mo nyets tempo nye ínñabiama oservenëngcá, quem luarentše imománda espiritëngaca. <sup>4</sup> Pero Bëngbe Bëtsá chabe Uaquiñá quem luaroye tbojanichmó, nya chama tempo tojanóshjango ora; cha mo nyetsca entšangcá, canyë shembásabentšana tojanonyná, y yojoyena jtsamëse ntšamo judiëngbe leyiñe jamama ibojamna ca yojanayancá jtsamëse. <sup>5</sup> Quem luaroye chca tojánabo bënga jabátsebacama, y chamotsobenama Bëngbe Bëtsabe basengcá jtseññama, bënga chë tempo šonjánamna chë ley jtsobedecénana. <sup>6</sup> Y chca, tšëngaftanga ya chabe básënga šmojtseññama jinñanyiyama, Bëngbe Bëtsá chabe Uaquiñabe Espíritu tbojanichmó, nyetscangbe ainaniñe cháumashënguama, y chë Espíritu endama bënga Bëngbe Bëtsá chamochembo, “Atšbe Taita ca”. <sup>7</sup> Mëñtsá, cada ona tšëngaftanguentšá ya ndoñe quenátsmëna mo chë nyets tempo nye ínñabiama oservenëngcá, quem luarentše imománda espiritëngaca mandánënga, y aíñe Bëngbe Bëtsabe basa tojoquedá. Y chabe basa tojoquedáyeca, lempe ntšamo Bëngbe Bëtsá chabe básënga jatšatayama tojašbuachenacá cha echanjóyëngacñe.

*Pablo, Galacia luaroquëñgbiama ngmëñaca yojtsanjuabñaye*

<sup>8</sup> Tempo, Bëngbe Bëtsá ndoñe šmonjanábuatma ora, tšëngaftanga šmojamna mo nyets tempo nye ínñabiama oservenëngcá, ndoñe ndegombre diosënga mondmëna espiritëngaca mandánënga. <sup>9</sup> Pero mora, Bëngbe Bëtsábye

šmónsábuaatma ora, o tšabá jayanama, Běngbe Bětsá cmojtsěbuaatma ora, ¿ntšámoyeca tšěngaftanga cachiñe chě quem luarentše imománda espíritěnga šmojtsayaunana? Chěnga ndocna obenana quemátsbomna, y nduámaněnga mondměna. ¿Ndáyeca tšěngaftanga šmojtseboše cachiñe jtsemnana mo chě nyěts tempo nyě ínŷabiama oserveněngcá, chě espíritěngaca mandáněnga? <sup>10</sup> Tšěngaftanga tša jtsejuabnayana diěnguiñe, shinŷěnguiñe, canŷe uatentša tempěnguiñe y uatěnguiñe, mo uámana tempěngcá Běngbe Bětsá tšabá jadórama, y chama běts fiestěnga jtsebomnana. <sup>11</sup> Atše corente šontsengmena, nderado atšbe trabajo tšěngaftangbeñe tondayama tonjoservé.

<sup>12</sup> Jesucrístbeyeca atšbe catšátanga, bětscá cbontsaimpadana, šmochtsiyena jtsaměse ntšamo atše sěndamcá, er átšnaca sěnjóbema ntšamo tšěngaftanga ndoñe judiěnga šmondměncá. Tšěngaftanga ndocna bacna soye atše chešatsborlá.

<sup>13</sup> Tšěngaftanga šmondětatsěmbo, atše sěnjanobená chě natsana soyama tšěngaftanga chě tšabe noticiěnga jábuayenama, canŷe šocana šonjanontšáshjango causa.

<sup>14</sup> Atše canŷe šocana sěnjánbomna causa, tšěngaftangbiama ndoñe paselo quenjatsměna tšěngaftangbeñe atše jofjana; pero masque chca, tšěngaftanga ndoñe chešmatanaboté, ni quešmatanáboyěnja; masna, tšěngaftangbeñe tšabá šmonjanofja; šmonjanofja mo canŷe ángel Běngbe Bětsabe ichmoná šmojofjá, o cach Jesucristbioycá. <sup>15</sup> Ndayá chora tšěngaftangaftaca enjanopasancá, puerte oyejuayěnga tcmónjánabiama. ¿Y mora ndayá tojopasá? Ndegombre,

atše sěndětatsěmbo y sěntsobena jayanama, tšěngaftanga ndaye sóynaca atšbiama mašměnjannama. Chě más uámana šmojánbomna soyěnga atšbe cucuatšifne mašměnjánboshjona, y nŷa mo chě bominyěngnaca masměnjánenobuchjatsěca atše jatšetayama. <sup>16</sup> Y morna, ¿ntšamo ndegombre yomncá cbojtsětsěsnama, atšbiama šmojtsejuabná mo tšěngaftangbe uayayá cuaftsemncá ca?

<sup>17</sup> Chě ndoñe ndegombre soyěnga buátěmbayěnga montsinŷinŷná mo tšěngaftangbiama ndegombre tšabá chašmotsiyenama cuaftsebošcá, pero chca ndoñe quenátsměna; ndayá jamama imojtsebošcá, tšěngaftangbiama ndoñe tšabá quenátsměna. Chěnga montseboše atšbe contra y atšbe buátěmbana soyěngama contra chašmotsemnana, chentšana tšěngaftanga chěngaftaca jtsemnana chašmotsebošama y chěnga chašmotsababuánŷeshanama.

<sup>18</sup> Puerte tšabá endměna atše y ínŷěnga chafstseboše tšěngaftangaftaca amiguěnga jtsemnana, canŷe tšabe soye jamama tojtsemněse; y sempre chca chauětsemna, tšabiama tojtsemněse, y ndoñe nyě atše chentše

tšëngaftangaftaca stsemna ora. <sup>19</sup> Tšëngaftanga, chë atšbiamá mo atšbe basengcá šmondmënënga, Jesucristbeñe chašmošbuáchema tcbonjanëjabuácheyeca; atše cachiñe sëntsesufrina tšëngaftangbe causa, ntšamo canye šešona jtsebomnama ora canye shembása jtsesufrinancá; y atše chca chanjëftsesentina, ntšamo Cristo endmëncá tšëngaftangbe vidiñe ndegombre chaojtsebínÿnëntscuana. <sup>20</sup> Malaye atše, mora tšëngaftangaftaca stsemna, atše jobenayama jinÿanÿiyama, cach tšëngaftanga jáuyanëse, ntšamo ndegombre atše tšëngaftangbiamá tsësëntínana. Atše tša šontsecochëngmena tšëngaftangbiamá.

### *Ntšamo Agar y Sáraftaca tojanopasá*

<sup>21</sup> Canye soye šmochjauyana, tšëngaftanga chë Moisesbe léyeca mandánënga jtsemnama šmojtsebošënga. ¿Ntšamo chë leyíñe endayancá tacmojtšësertana? <sup>22</sup> Chiñe endayana, Abraham uta uaquiñata yojánabamna ca; cánÿana Agárbeñe, canÿa chabe shembiamá nÿets tempo oservená; y chë ínÿana, cachabe shémbëñe, Sara, y mua ndocnabiamá nÿets tempo oservená yonjamna. <sup>23</sup> Chë chabe shembiamá nÿets tempo oservenabe šešona, tojanonÿná nÿe Abraham y Agar chca chaotsemnama tbojánbošenayeca; y cachabe shembe šešona tojanonÿná, Bëngbe Bëtsá chë soye jamama Abrahámbioye tbojanšbuachenáyeca.

<sup>24</sup> Ntšamo Agar y Sara, y chatbe šešónataftaca tojanopasacá, bënga canye uámana soye šontsabuatambá. Ndayá chë uta shembásataftaca tojanopasacá, uta trato entsinÿinÿná: chë shembása Agar, chë nÿets tempo nÿe ínÿabiamá oservená yojamná, entsinÿinÿná chë trato Bëngbe Bëtsá y Israeloca entsángaftaca, chë Moisésoftaca Bëngbe Bëtsá leyënga entsangbe cucuatšíñe tojanáboshjona ora. Agar básenga yojtsabamna ora, chëngnaca tmojanonÿná nÿe ínÿabiamá nÿets tempo oservënënga jtsemnama, y chë tratentša leyíñe soyëngaca mandánënga jtsemnama tmojtsebošëngnaca jtsemnana mo nÿe ínÿabiamá nÿets tempo oservenëngcá. <sup>25</sup> Ndayá Agáraftaca tojanopasacá entsinÿinÿná chë Sináí batsjoca tmojánbema trato, Arabia luaroca; y chë morsca bëts pueblo Jerusalénënaca entsinÿinÿná, er chentša entsanga montsemna chë leyëngaca mandánënga. Ntšamo Agar y chabe básenga nÿe ínÿabiamá nÿets tempo oservënënga monjamncá, Jerusalenentša entsángnaca cachcá chëngcá mondmëna, chë leyëngaca nÿets tempo mandánënga bëtsemnayeca. <sup>26</sup> Ndayá Sáraftaca tojanopasacá, chë nÿe cachabiamá trabájaye shembása, entsinÿinÿná chë trato, chë tšabe bendicionënga Abrahambiamá jamama chábioye tbojanšbuachená ora. Chánaca entsinÿinÿná chë Bëngbe

Bětsabe bēts pueblo celoca, Jerusalén ca uabaina pueblo, er chē chentše mochjoyénananga, mora ndoñe quemuátiyena chē leyēngaca mandánēnga. Chē Crístbeñe ošbuáchiyēnga mondmēna chē celoca bēts pueblo Jerusalenentše joyénanama, y chca, ndegombre chēnga mondmēna celocama entšanga. <sup>27</sup> Chē celoca Jerusalén endmēna chē ndegombre bēts pueblo chē Jesucristbeñe ošbuáchiyēngbiana, y chca endmēna mo canye shembása šešonga ndabamná y aíñe chaotsabamnama Bēngbe Bětsá cuafjamcá. Quem luarentša Jerusalén endmēna chē uámana luare chē léyeca mandánēnga imomnēngbiana, y chca endmēna mo canye shembása aíñe boyaftaquécá, er Bēngbe Bětsabe uabemana palabrēnguiñe chē shembásatbiana mēntšá endayana:

Shembása šešonga ndabamná, y ndocna te tsetšanēnga ndobomná šešona jtsebomnama,  
moyejuá y moyó oyejuayá cojtsemnama.

Chca moma, er aca, chē shembása chabe boyabiana utšená, chē shembása boyá bomnabiana más básenga cochántsabamna ca.

<sup>28</sup> Chcasna, Jesucristbeyeca atšbe catšátanga, ntšamo Isaac Abrahambe uaquiñá tojanobemcá, Bēngbe Bětsá chca Abrahámbyoye tbojanšbuachenáyeca; cachcá, tšēngaftángnaca šmojobená Bēngbe Bětsabe básenga jtsemnama, Bēngbe Bětsá chca tojanšbuachenáyeca. <sup>29</sup> Ntšamo chē tempo tojanopasacá, chē Isaac chaosufrima Ismael tojanmá (Ismael, Abrahambe uaquiñá Agárbeñe, chē nye chata chca tbojánbošenayeca onýnaná; Isaac, chē Bēngbe Bětsabe Espíritbeyeca onýnaná), mórnaca cachcá entsopasana: chē ndoñe ndegombre soyēnga buátēmbayēnga judiēnga montsama bēnga chamosufrima, ntšamo Isaac chaosufrima Ismael yojanamcá. <sup>30</sup> Pero, ¿ndayá Bēngbe Bětsabe uabemana palabrēnguiñe Abrahambe básatbiana iuayana? Mēntšá endayana: “Moma, chē nyets tempo nye ínñabiana oservená y chabe basa acbe yebnentsana chábuaisebocnama, er chē nyets tempo nye ínñabiana oservenabe šešona ndoñe quenátobena chabe taitabe soyēnga jtsebomnama. Nye chē propio shembe šešona aíñe, er chē shemna ndoñe nye ínñabiana nyets tempo oservená quenátsmēna.” <sup>31</sup> Chcasna, Jesucristbeyeca atšbe catšátanga, bēnga ndoñe quemuátsmēna mo canya nye ínñabiana nyets tempo oservenabe básenga cuaftsemncá, er mora ya ndoñe más quemuátsmēna chē léyeca nyets tempo mandánēnga. Y aíñe montsemna mo canye shema ndoñe nye ínñabiana nyets tempo oservenabe básenga cuaftsemncá, er Bēngbe Bětsabe básenga bēnga mondmēna.



## 5

*Cristo bēnga šojatsebacá*

<sup>1</sup> Cristo bēnga šojatsebacá, ndoñe más mo chē nyets tempo nye ínŷabíama oservenēngcá chamondētsiyenama, chē léyeca mandánēnga. Nŷa šmochtsentsēna nyets tempo chca atsebácanēnga chašmoquedama, y ndoñe šmatjaleséncia tšēngaftanga cachiñe chē léyeca mandánēnga ínŷenga chácmabíamama.

<sup>2</sup> Tšabá šmochjouena. Atše Pablo cbēyana: Nderado tšēngaftanga ndoñe judiēnga, šmojalesenciá ínŷenga chē tšēngaftangbe más delicadentše base bobachtema chamotētšama, ntšamo judiēnga monduamancá, asna, ndayá Cristo tšēngaftangbíama tojanmcá tondayama nantsoservena. <sup>3</sup> Ndēmuanŷe entšánaca, nda tojalesenciá ínŷenga chabe más delicadentše base bobachtema chamotētšama, cachiñe cha šcobuayená: Mora aca cmontsemna nyetsca chē judiēngbe leyentša mandēnga jtsobedecénana.

<sup>4</sup> Ndēmuanŷenga tšēngaftangbentšana šmojtsenguá, Bēngbe Bētsabe bomínŷiñe tšábenga jtsemnana, ntšamo leyíñe jamama yomna ca iuayancá jtsamēse, tšēngaftanga chca šmojtsamama, šmojama Crísoftaca cánŷiñe mo canŷacá ndoñe chašmondētsemnana; Bēngbe Bētsábentšanēnaca šmojtsoluaré, y chca, šmontsinŷanŷná tšēngaftanga ndoñe šmontseboše, Bēngbe Bētsá tšēngaftangbe tšabíama jtsejuabnaye, chácmatsebacana. <sup>5</sup> Pero bēnga, Bēngbe Bētsábeñe jtsošbuáchiyēse, mondobátmana cha yochjama bēnga chabe bomínŷiñe tšábenga nyets tempo chamotsemnana. Y bēnga chca mondobátmana, Jesucrístbeñe ošbuáchiyana bómnyeca, y chē ošbuáchiyana chē Uámana Espíritbiajana bēngbioye endobá. <sup>6</sup> Er Crísoftaca cánŷiñe mo canŷacá tmojtsemna ora, aíñe base bobachtema tētšenēnga tmojtsemna o ndoñe, tondaye ntsámanana; ndayá puerte enduámana endmēna chē Jesucrístbeñe bēnga mondbomna ošbuáchiyana, y chca bētsebomnamna bēnga montsinŷanŷná ínŷenga jtsababuánŷeshanēse.

<sup>7</sup> Tšēngaftanga tšabá šmonjánama, chē jtsiyenana ntšamo Bēngbe Bētsabe ndegombre soyēnga yomncá jtsamēse. Y mora, ¿nda tojama tšēngaftanga chašmotsajbanama chē Bēngbe Bētsabe ndegombre soyēnga jtsuenanama? <sup>8</sup> Ndegombre, Bēngbe Bētsá ndoñe quenátsmēna, er cha tšēngaftanga tcmojáchembo chabe entšanga chašmotsemnana. <sup>9</sup> Ntšamo entšanga mondētšayancá: “Nŷe base levadura jamana nyetsana chauabochama ca”; cachcá, tšēngaftanga chē judiēngbe básefta leyēngaca mandánēnga jtsemnana šmojabojátšese, šmuatjábocna nyetsca leyēngaca mandánēnga.

<sup>10</sup> Bënga Bëngbe Utabnáftaca cánjñe mo canyáca bétsemnayeca, atše corente sëntsetatsëmbo, ntšamo atšbe juabna yomncá tšëngaftángnaca cachcá šmochtsejuabnayama; y átšnaca corente sëntsetatsëmbo Bëngbe Bëtsá puerte bochjacastíga, nda tšëngaftanga natjëmbana ainánaca ndoñe chašmondëtsiyenama tojtsamábioye, masque ndánaca cha chaotsomñe.

<sup>11</sup> Y atšbiama chanjayana, Jesucrístbeyeca atšbe catšátanga, Jesucrístbeñe ošbuáchiyënga base bobachtema chëngbe más delicadentše tëtšenënga chamotsemnama entšanga cabá stsbuayiynase, entšanga ya ndoñe muantsama atše chaitsesufrínama. Atše chca stsamëse, Cristo cruciñe tojanóbanama ntšamo iuayancá entšanga stsbuayiyná ora, chënga ya ndoñe átšeftaca nanjósentiaye. <sup>12</sup> Pero chë natjëmbana ainánaca ndoñe chašmondëtsiyenama imojtsamëngna, jmalaye cachënga muanjenocbóna!

<sup>13</sup> Pero tšëngaftanga, Jesucrístbeyeca atšbe catšátanga, Bëngbe Bëtsá tcmojáchembo chë judiëngbe léyeca ndëmandánënga chašmotsemnama. Pero chca bétsemnama, mora ndoñe šmatjátsjuabnaye šmojtsobena jalesénciana, nýe tšëngaftangbe cuerpënga tšabá chamotsemnama juabnëngaca mandánënga jatiyenama. Chamna, tšëngaftanga šmuenbobonshánayeca, nýetscanga šmochtsenájabuachana. <sup>14</sup> Er ntšamo Moisesbe leyentša nýetsca mandënguiñe endayancá, nýe canýe mandiñe lempe chca entsayana. Y chë mando endmëna: “Ndëmua entšánaca cochtsebobonshana ntšamo cach aca cuenobobonshancá.” <sup>15</sup> Pero ínýenga chamotsesufrínama jtsamëse tšëngaftanga šmojtsiyenëse, mo tšátjaye bayënga tmojtsenashantsná y tmojtsenobanacá, cuedado šmochtsebonna. Ndóñese, nýetscanga šmatjánenpochocaye.

*Ntšamo chë Bëngbe Bëtsabe Espíritbeyeca vida jtsebomnama*

<sup>16</sup> Chíyeca cbochjáuyana: Nýets tempo šmochtsiyena ntšamo chë Uámana Espíritu cmojtsamëndacá, y chca, tšëngaftanga ndoñe quešmochátama soyënga, nýe cach tšëngaftanga tšabá jtsomñama juabnëngaca. <sup>17</sup> Er ndayá bënga, nýe entšangbe juábnaca jamama mondbošcá, jtsemnana ndayá chë Uámana Espíritu bënga chamomama yobošcá contra; y ndayá chë Uámana Espíritu bënga chamomama yobošcá, jtsemnana ndayá bënga, nýe entšangbe juábnaca jamama imobošcá contra. Chca endmënayeca, ntšamo chë Uámana Espíritu chašmomama yobošcá šmojtsamëse, ndoñe quešmátobena jamana, ndayá cach tšëngaftanga, nýe entšangbe juábnaca jamama šmojatsbošcá. <sup>18</sup> Tšëngaftanga, ntšamo chë Uámana Espíritu cmojtsamëndacá šmojtsamëse, ndoñe quecmátamna ntšamo chë leyñe iuayancá játamama.

19 Ntšamo entšanga, n̄ye entšangbe juábnaca tmojtsamcá, n̄yetscanga paselo jtsonȳayana: chēnga bacna soye boyabása o shembásaftaca jtsamana, n̄ye chca soyēngama jésejuabnayana, y ndoñe ntso benana cachēnga jenomándama, chca soyēnga jtsamēse. 20 Ba uabouana soyēnga jtsamana, diosēnga yomna ca tmojtsejuabná soyēnga jadórama, jtsencjuanayana, ín̄yengaftaca jtsenáyayana, n̄yetscanga ndoñe cachcá chamondētsejuabnama jtsamana, ín̄yengaftaca yapa jtsenántšabošana, soyēnga n̄ye rábiaca jtsamana, ín̄yengaftaca tša jesenaleganana, y cán̄yenga ín̄yengaftaca contra chamotsemnama jtsamana. 21 N̄ye jtsebošana ntšamo in̄ya tojatashjachcá jtse bomnama, yapa tmoyēnga jtsemnana, fiestēnguiñe ndoñe tšabe soyēnga jtsamana, y in̄ye soyēngnaca mo chē soyēngcá jtsamana. Y mora atše cbabuayená, cach ntšamo tempo sēnjanmcá: chca soyēnga jtsamēse oyenēnga, Bēngbe Bētsabe amēndayoca ndoñe luare quemochátsbomna.

22 Pero, Uámana Espíritu ainaniñe tojtsemánda ora, quem soyēnga chentšana jóbocnana: n̄yetscanga jtsababuán̄yeshanana, jtsóyejuayana, natjēmbana ín̄yengaftaca jtsiyenana, puerte uantado n̄yetsca padecēniñe jtsemnana, n̄yetscanga corente bonshanánaca jtsēnȳayana, tšabe ainana jtse bomnana, y n̄yetscañe tšabe palabra bomnēnga jtsemnana, 23 jtsejuabnayana chē ín̄yenga mo chabiamama más uámanēnga cuaftsemncá, y cachá n̄yetsca soyēnguiñe jenomándama jtsobenana. Y ndocna ley quenátsmēna, chca soyēnga tmojtsama entšangbiama contra cháuyanama. 24 Jesucristbenga imomnēnga tmojama, chēnga chē n̄ye entšangbe juabnēngaca mandánēnga ndoñe ntsemnana; ya ndoñe más, chē n̄ye cachēnga tšabá jtsomñama bacna juabnēngaca mandánēnga quemátsmēna, y chē n̄ye cachēngbiama soyēnga jamama bētscá juabnēngaca cach ndoñe. 25 Bēnga ndegombre tšabe vida chamotse bomnama Uámana Espíritu yojtsámayeca, bēnga mochsiyena jtsamēse lempe ntšamo Uámana Espíritu šojtsamēndacá. 26 Ndoñe šmattsenábotamnaye, uámanēnga jatenobiamnayēse, ndoñe soyēnga mattsama ín̄yenga bēngaftaca chaoséntiyama, y ndoñe n̄ye mochjátsboše ntšamo in̄ya tojatashjachcá jatsbomnama.

## 6

### *N̄yetscanga šmochtsenájabuachana*

1 Jesucristbeyeca atšbe catšátanga, nderado ndánaca bacna soye tojamama šmojin̄ye, tšēngaftangbentše ntšamo chē Bēngbe Bētsabe Espíritu tojtse mandacá tmojtsamēnga cmontsamna cha juajabuáchana, chē ndoñe tšabe soye amana

chaotsajbanama; pero chca šmochjama becá bonshanánaca jtsónyayëse. Cuedado šmochtsebomna, er ndoñese, tšëngaftángnaca cmatjócochëngo cachcá soye jamama. <sup>2</sup> Chë soyënguiñe chašmojtsepadecena ora, šmochtsenájabuachana, mo chë uauta uasmanëshangá šmojtsëyambá ora, juyambama šmojtsenajabuachancá. Y chca chašmojtsama ora, ntšamo Cristo tojanmandacá šmochantsocumplina.

<sup>3</sup> Nderado nda tojtsejuabná, cha canyë uámana entšá yomna ca, pero ndoñe chca cha tondmënëse, cachá jtsenoíngñayana.

<sup>4</sup> Cada ona chauenojuabó, ntšamo tojamcá tšabá o ndoñe tšabá bëtsemnama. Ntšamo tojamcá tšabá tojtsemnëse, chca tojamama oyejuayá chaotsemna; pero cha ndoñe quebnátsmëna jayanana ntšamo tojamcá tšabá yojtsemna ca, chë ndayá ínÿenga tmojamama más tšabá yojtsemna ca jatichámëse. <sup>5</sup> Er cada ona bontsemna jtsenójuabnayana, jtsetatšëmbuama ntšamo tojamcá tšabá o ndoñe tšabá bëtsemnama.

<sup>6</sup> Nda Bëngbe Bëtsabe soyëngama tojtsatsjendá, cha bontsemna chabe buatëmbayáftaca nyetsca tšabe soyënga jenájatayana.

<sup>7</sup> Ndoñe matenoíngñana; ndoñe šmattsejuabnaye tšëngaftanga šmojtsobena ntšamo Bëngbe Bëtsá tojamandacá ndoñe ntjamana, castigo ntjoyëngacñëcá, er ndocná quenátobena Bëngbe Bëtsá jaíngñana. Ntšamo entšanga mondëntšayancá: “Ndayá tcojajé y cachcá josháchiñana ca.”

<sup>8</sup> Mo nda ndoñe tšabe fshantsiñe tojajecá, tšabe shajuana ndoñe ntjoshachiñana, cachcá, nda tojtsiyena nÿe cachá tšabá jtsomñama bacna juabnëngaca, cha echanjábocna jabuache castiganá nyetsca tescama. Pero mo nda uaba fshantsiñe tojajecá, tšabe shajuana josháchiñana, cachcá nda tojtsiyena ntšamo chë Uámana Espiritu tojtsemandacá jtsamëse, chë nyetsca tescama yomna tšabe vida echántsebomna. <sup>9</sup> Chcasna, ndoñe chašondëmantsé tšabe soye jtsamama; er masque šojtsëmantsnasna, pero chë tšabe soyënga jtsamama ndoñe tmonjajbanase, canyë bëts te echanjóshjango, bënga bëtsca tšabe soyënga josháchiñama, mo tša tšabe shajuanënga tmojashaquëcá. <sup>10</sup> Chíyeca, tmojtsobena ora, nyetscangbiama tšabe soyënga mochjama, pero masna chë Jesucristbeñe ošbuáchiyana bómnyeca, bëngcá Bëngbe Bëtsabe básenga imomnëngbiama.

*Quem tsbuanácha juapochócama cach Pablo tojanábema*

<sup>11</sup> ¡šmochjinÿe, tša bëts letrëngaca cach atšbe cucuátšeca mora cbontsëbuabiamná!

<sup>12</sup> Ndëmuanÿenga imojtseboše, tšëngaftanga chë ndoñe judiënga jamëndama tšëngaftangbe más delicadentse base bobachtema tëtšenënga chašmotsemnama, ntšamo

judiënga monduamancá, chënga chca jtsamana nÿe chë judiëngaftaca tšabá joquédama. Y chca jtsamëndayana, chënga chamosufrima ínÿenga chamotsamama ndoñe mondbóseyeca; er judiënga muanjama chënga chamosufrima, Cristo cruzoca jóbanana entšangbiana puerte iuámana ca chënga tmojtsabuayiynase. <sup>13</sup> Pero ni mo chë más delicadentše base bobachtema tëtšenënga imomnënga, ndoñe quemátama lempe ntšamo chë leyiñe iuayancá. Pero chënga jtsebošana tšëngaftanga chca tëtšenënga chašmotsemna, chënga jtsenábotamnayama jobenayama, ínÿenga base bobachtema chacmatëtšama tšëngaftanga šmojalesenciama. <sup>14</sup> Atšeftacna ndocna te chca chaondopasá. Atše nÿets tempo y becá chanjëftsóyebuambnaye ndayá atšbiana Bëngbe Utabná Jesucristo tojanmama, cha cruzoca tojanóbana ora; er ndayá choca tojanma sóyeca, atšbiana tondaye quenatámana ntšamo entšanga quem luarentše imojuabnacá y chëngbiana puerte iuámana; y ndayá atšbiana puerte iuámana, entšangbiana tondaye quenatámana; y chë causa, atše chëngbiana mo obanacá sëndmëna. <sup>15</sup> Chë más delicadentše base bobachtema aiñe tëtšená o ndoñe, tondaye quenatámana. Ndayá puerte iuámana endmëna, Bëngbe Bëtsá mo tsmëma entšangcá bënga šojábiana, Uámana Espíritu bëngbe ainaniñe jtsemándayëse. <sup>16</sup> Chë quem buatëmbana sóyeca jtsamëse šmoyenëngbiana, atše, Bëngbe Bëtsá sëntseimpadana, cha chaoma tšëngaftangbe ainana natjëmbana chašmotsebomnana y becá chacmotsalastemánama; y ndoñe nÿe chëngbiana chca quetsatsimpadana, ndayá nÿetscanga Bëngbe Bëtsabe entšanga imomnëngbiámnaca.

<sup>17</sup> Y mora, nÿe canÿe soye cbochjáuyana: morscana ndocná chaondétsama atše jasúfriama chašotsemnana; er atšbe cuerpiñe endëtinÿna ntšamo atše tijasufri, Jesusbe oservená bëtsemnana.

<sup>18</sup> Jesucristbeyeca atšbe catsátanga, atše sëntseimpadana Bëngbe Utabná Jesucristo chaoma tšabe bendicionënga tšëngaftangbeñe chaotsemnana. Chca chaotsemna.

## Efesios

### *Jacheuayama*

<sup>1</sup> Atše Pablo, Jesucristbe ichmoná Bëngbe Bëtsá chca yobóseyeca, quem tsbuanácha sentsabiamná Efeso puebloca Bëngbe Bëtsabe entšanga y Cristo Jesúsbeñe ošbuáchiyënga imomnëngbiamna. <sup>2</sup> Atše sëntseimpadana Bëngbe Bëtsá Bëngbe Taitá y Bëngbe Utabná Jesucristo, chaboma tšëngaftangbeñe tšabe bendicionënga chaotsemnana, y chata chaboma tšëngaftangbe ainaniñe tšabe ebionana chašmotsebomnana.

*Crísoftaca cányiñe mo canyáca jtsemnëse, bënga mochántsebomna nyetsca tšabe soyënga, ntšamo celoca yobinýncá*

<sup>3</sup> Bëngbe Bëtsá y Bëngbe Utabná Jesucristbe Taitábioye mochjëtschuaye, er bënga Crísoftaca cányiñe mo canyáca mondmënayeca, Bëngbe Bëtsá tojama bënga nyetsca tšabe soyënga chamotsebomnana, ntšamo celoca yobinýncá.

<sup>4</sup> Bëngbe Bëtsá bënga šojanabacacá Crísoftaca cányiñe mo canyáca chamotsemnana, cabá quem luare cha ndama orscana, bënga chabe delante chamotsemnana chabe entšanga, bacna soyëngama perdonánënga y chabe oservénënga, y bënga ainaniñe bacna soye ndbomnënga imomna ca cha cháuyanama.

<sup>5</sup> Bëngbe Bëtsá šuababuánýeshanayeca, tempo cha tojanjuabó y tojánbošena bënga mo cachabe basengcá jábiamama, chë Jesucristo yochjanma sóyeca. <sup>6</sup> Chíyeca bënga Bëngbe Bëtsábioye sempre jtsatschuanayana, cha bëngbe tšabiamna juabna yobómnayeca, ndayá chabe Bonshana Uaquiñáftaca bëngbe tšabiamna cha tojamama.

<sup>7</sup> Bëngbe Bëtsá puerte bonshanánaca bëngbe tšabiamna bëtscá yojuabnáyeca, cha bëngbe bacna soyëngama šojtsaperdoná y šojatsebacá, er Jesús bëngbiamna tojanóbana, chabe buiñe juabuáshanëse.

<sup>8</sup> Bëngbe Bëtsá tojama bënga nyets osertánana y becá juabna chamotsebomnana, cha becá bonshanánaca bëngbe tšabiamna juabna yobómnayeca,

<sup>9</sup> y tojama bënga chamotsetatšëmbuama ndayá jamama cha yobošcá, ndayá cachá tempscana yojanjuabná jamama, pero entšanga chca ndoñe tonjaninýanyé. Ndayá jamama Bëngbe Bëtsá tempo yojanjuabnacá, ndayá cha tojama bënga chamotsetatšëmbuama, cachá yojanjuabná chca jamama.

<sup>10</sup> Ndayá jamama Bëngbe Bëtsá yojuabnacá, lempe echanjochnëngo nya chama tempo chaojóshjango ora, y quem Bëngbe Bëtsabe juabna endmëna jamana, lempe ntšamo cha tojamcá celoca y quem luarentše, Cristo chamotsebomna nyetsca chë soyënguiñe mo chë mandayacá.

11 Bëngbe Bëtsá sempre jamana nyetsca soyënga ntšamo tojtsejuabnacá y tojtsebošcá. Y Bëngbe Bëtsá bënga šojabacacá, ntšamo cabá chca ndama ora yojanjuabnacá; chca, bënga Crísoftaca cányiñe mo canyácá jtsemnëse, bënga chamóyëngacñama ndayá Bëngbe Bëtsá chabe entšanga jatšatayama tojašebuachená, mo chëngbe otocana soycá. 12 Y Bëngbe Bëtsá chca tojama, bënga chë Crístbeñe natsana imojtsanošbuachenga, cha bënga šochjánatsebacama, tšabe soyënga jtsamëse chamotsiyenama, chca, chë inye entšanga Bëngbe Bëtsabe obenanama cha chamotsatschuanama. 13 Y tšëngaftángnaca, chë ndegombre buayenánana šmojanuena ora, chë Bëngbe Bëtsá bënga játsebacama buayenánana, y Crístbeñe šmojtsanošbuaché ora, Bëngbe Bëtsá tojanma tšëngaftanga Crísoftaca cányiñe mo canyácá chašmotsemnana y tcmojanainynaná tšëngaftanga chabe entšanga bétsemnana. Bëngbe Bëtsá chca tojanma, Uámana Espíritu tšëngaftangbe ainaniñe cháumashënguama tojanma ora, ntšamo tempo cha tojanašebuachenacá. 14 Bënga chë Uámana Espíritu bëngbe ainaniñe mondbómnayeca, corente mondétatšëmbo ndayá Bëngbe Bëtsá chabe entšanga tojašebuachenacá bënga mochjójyëngacñama. Uámana Espíritbeyeca bënga montsobena chca puerte tšabá jtsetatšëmbuama, chë Bëngbe Bëtsá chabe entšanga nyetsca tescama játsebacama y ntšamo tojašebuachenacá jatšatayama tempo chaóshjanguëntscuana; y lempe ntšamo cha bëngbiana inétsamama, nyetscanga cha mochántatschuanaye, cha bëtsá y obená bétsemnana.

*Pablo Bëngbe Bëtsábioye tbojanimpadá, ošbuáchiyënga osertánana chamotsebomnana.*

15-16 Chcáyeca, atšna, Bëngbe Bëtsá tšëngaftangbiana stseimpadana ora, sempre cha sëndbëtsatschuanaye, er atše sënjátatšëmbona ntšamo tšëngaftanga Bëngbe Utabná Jesúsbeñe tša šmojtsošbuáchema, y ntšamo tšëngaftanga nyetsca chë Bëngbe Bëtsábënga imomnënga šmababuánjeshanama. 17 Bëngbe Bëtsá, Bëngbe Utabná Jesucristbe Taitá, nda corente iuámana, sëntseimpadana cha chaoma Uámana Espíritu chacmëjabuachama, corente osertánënga chašmotsemnana, y chacminyanjé nda Bëngbe Bëtsá yomnana, chca, más tšabá cha chašmotsábuatmama. 18 Atše, Bëngbe Bëtsá sëntseimpadana, cha chaoma tšëngaftanga Bëngbe Bëtsabe soyënguiñe corente osertánana chašmotsebomnana, tšëngaftanga chašmotsetatšëmbuama, ndayá Bëngbe Bëtsábeñe jtsošbuáchiyëse tšëngaftanga šmojtsobatmancá cha cmochjátšatayama. Bëngbe Bëtsá tcmojáchembo chábeñe chca chašmotsobátmanama. Atše cha sëntseimpadana, chaoma tšëngaftángnaca chašmotsetatšëmbo

tša bĕtscá y bĕts soyĕnga yomna ndayá chabe entšanga cha tojašebuachenacá; <sup>19</sup> y chašmotsetátšĕmbo tša bĕts soye y ndocna te ntjĕftsopochócama chabe obenana yomnama, chĕ ndayá bĕngbe ainaniĕne tšabe soyĕnga yojtsama, bĕnga chĕ Crístbeĕne ošbuachiyĕngbeĕne. Cach quem puerte bĕts obenana endmĕna, <sup>20</sup> ndáyeca Bĕngbe Bĕtsá tojanma Cristo cháuatayenama, y chabe catšbioica celoca tbojtantbema chaotsemándama. <sup>21</sup> Choca Cristo nĕjetsca soyĕnguiĕne yojtsemánda, y más bĕtscá obenana y mando yojtsebomna nĕjetsca mándayĕngbiama, chĕ mando y obenana bomnĕngbiama, y cha yomna más uamaná y bĕtsá nĕjetsca chĕ entšangbiama mo bĕtsĕtsangcá utabnĕngbiama, chĕngbe uabaina respétoca jtsichámĕse. Cristo puerte bĕtsá endmĕna lempe ntšamo quem luarentše yobínĕnama y Cristo yochjĕsabentšana yochtsebinĕnámna. <sup>22</sup> Bĕngbe Bĕtsá tojama Cristo nĕjetsca soyĕnguiĕne chaotsemándama, y tbojanábuayana nĕjetsca soyĕnguiĕne chaotsemándama, chábeĕne ošbuáchiyĕngbe tšabiama. <sup>23</sup> Cha endmĕna nĕjetsca chábeĕne ošbuáchiyĕngbe mandayá, y chĕnga mondmĕna mo cachabe cuerpo cuaftsemncá. Chĕngbe ainaniĕne cha endoyena y nĕjetsca luarĕnguífina, y lempe cha endĕmánda.

## 2

*Atsebácanĕnga                      mondmĕna,                      Bĕngbe                      Bĕtsá*  
*šwababuánĕyeshanayeca*

<sup>1</sup> Tempo tšĕngaftanga Bĕngbe Bĕtsabiama mo obanĕngcá šmonjamna, er tšĕngaftanga šmonjaniyena, ntšamo Bĕngbe Bĕtsá yomandacá ntsamcá, y bĕtscá bacna soyĕnga šmojánama. <sup>2</sup> Chca, tšĕngaftanga šmonjánama mo chĕ nĕ quem luarama enójuabnayĕnga monduamancá, y šmonjanĕyeunana Satanás, chĕ bacna espíritĕnga obenana bomnĕnga y quem luarentša tsbanánoca imomnĕngbe amĕndayá, chĕ Bĕngbe Bĕtsábioye ndĕyeunanĕngbe ainaniĕne yománda espírítu. <sup>3</sup> Tempo bĕnga nĕjetscanga fsĕnjaniyena ntšamo tšĕngaftanga šmonjaniyencá. Bĕnga soyĕnga fsĕnjánama, nĕ ntšamo ftsjanbošcá nĕ bĕngbe cuerpĕngbe tšabiama, y nĕ ntšamo bĕngbe juabna enjamncá bacna soyĕnga jamama. Bĕnga fsĕnjaniyena soyĕnga jtsamĕse mo chĕ Bĕngbe Bĕtsábioye nduabuatma entšanga mondbetsamcá; chĕ causa bĕnga fsĕnjanomerecena jtsebomnana chĕ Bĕngbe Bĕtsabe uabouana castigo, cachcá chĕ Bĕngbe Bĕtsábioye nduabuatmĕngcá. <sup>4</sup> Pero Bĕngbe Bĕtsá sempre tša lastemado entšangbiama endmĕna y sempre corente bĕnga šondábabuanĕyeshana; <sup>5</sup> y chíyeca, bĕnga cabá mo obanĕngcá chabiama fsĕnjamna ora, bacna soyĕnga fsĕnjánama causa, chora cha tojanma bĕnga tšabe



vida chamotsebomnama y Crístoftaca cánÿiñe mo canÿacá chamotsemnama. Bëngbe Bëtsá tšëngaftangbe tšabiamna juabna bómnayeca, bacna soyënguentsana tcmojatsebacá. <sup>6</sup> Bënga Jesucrístoftaca cánÿiñe mo canÿacá bétsemnayeca, Cristo Jesús cháuatayenama Bëngbe Bëtsá tojanma ora y celoca tbojtantbema ora, enjamna mo bëngnaca chámuatayenama Bëngbe Bëtsá cuafjamcá y Cristo Jesúseftaca celoca cuafatbiamcá. <sup>7</sup> Chca enjamna, Bëngbe Bëtsá entsanga cháuinÿanÿema nÿetsca joshjanguama tempënguiñe, ntšamo cha bëngbe tšabiamna bëtscá juabna bétsebomnama, cha Cristo Jesúseftaca bëngbioye tšabe juábnaca šojánanÿe ora. <sup>8</sup> Er Bëngbe Bëtsá tšëngaftangbiamna tšabe juabna yojánbomnayeca, tcmojatsebacá, Jesucristbeñe šmojtsanošbuáchema; pero atsebácanënga šmondmëna, ndoñe cach tšëngaftanga ndayá šmojánmayeca, ndayá atsbocaná jtsemnana endmëna Bëngbe Bëtsabe canÿe tšetana soye. <sup>9</sup> Atsebácanënga šmondmëna, ndoñe cach tšëngaftanga ndayá šmojánmayeca; chíyeca ndocná quenátobena jtšenábotamnayana atsbocaná yojtsemnama. <sup>10</sup> Bëngbe Bëtsá šojtabiamna ntšamo bënga mondmëncá, y Cristo Jesúseftaca cánÿiñe mo canÿacá bétsemnayeca, Bëngbe Bëtsá mo tsmëma entsangcá cuafatsmëncá šojtabiamna, tšabe soyënga jtsemnana. Y ndayá bënga tšabá mondamcá, Bëngbe Bëtsá tempo tojanprontá bënga chamotsamama.

*Crístbeyeca tempcá tšabá Bëngbe Bëtsáftaca jtsatsmënana*

<sup>11</sup> Tšëngaftanga ndoñe judiënga, ndëmuanÿenga judiënga cmondubuatma “chë más delicadentše base bobachtema ndëtëtšenënga ca”, chëngcá uinÿnanánënga ndoñe šmondmënama; chënga cachënga jtšenábobuatmana “chë más delicadentše base bobachtema tëtšenënga ca”, y cachëngbe cuerpënguiñe chca jtsemnana. Mëntsá, tšëngaftanga chë ndoñe judiënga, <sup>12</sup> šmochjenójuaboje ntšamo tempo šmojamnama, Crístbeñe cabá ndošbuáchiye ora. Chora, tšëngaftanga Cristo ndoñe šmonjánbomna, Israeloca entsangbiamna stëtšoye šmonjanquedana, y ndoñe šmonjantátšëmbo lempe ntšamo Bëngbe Bëtsá chabe entsanga tojanašebuachenacá. Tšëngaftanga quem luarentše šmonjaniyena ndocnábeñe ntsobatmancá y Bëngbe Bëtsá ntsabuatmcá. <sup>13</sup> Pero mora tšëngaftanga Cristo Jesúseftaca cánÿiñe mo canÿacá šmontsemna, chë tempo Bëngbe Bëtsá ndoñe šmonjanábuatmënga, y cha tojama chábioye chašmotsábuatmama; y chca yomna, er Jesús, chabe buiñe juabuáshanëse, tšëngaftangbiamna tojanóbana. <sup>14</sup> Cach Cristo yojtsama bënga tempcá tšabá Bëngbe Bëtsáftaca chamotsemnama. Cha tojama judiënga y ndoñe judiënga

nÿetscanga mo cachca entšangcá chamotsemnana, mo nda canÿe tapiëse tojtsendbemcá, chë ndayëseca canÿe luarentša entšanga tmojtsenjáta, chënga enáyaye causa. <sup>15</sup> Cristo chënga mo cachca entšangcá tojábiama, judiëngbe leyënga y mandënga ndocna obenana chamondëtsebojnana jamëse. Chca tojama, cha jóbanëse, chë útoica entšanga mo nÿe canÿe tsmëma entšangcá jábiamama, cháftaca cánÿiñe mo canÿacá jtsemnëse. Cha chca tojanma chënga nÿetscanga tšabá chamotsiyenama; <sup>16</sup> y Cristo cruciñe tojanóbanayeca, cha tojanma chë útoica entšanga enáyayana chamotsajbanama, y tojanma chë útoica entšanga mo canÿe entšangcá chamotsemnana, chënga tempcá tšabá Bëngbe Bëtsáftaca chamotsatsmënama.

<sup>17</sup> Cristo quem luaroye tojánabo tšabe noticiënga jabábuayenama, tempcá tšabá Bëngbe Bëtsáftaca jtsatsmënama. Cha quem tšabe noticiënga tojanabuayená tšëngaftanga chë ndoñe judiëngbioye, chë Bëngbe Bëtsá ndoñe šmonjanábuatmënga, y chë judiëngbioynaca, chë Bëngbe Bëtsá imojanábuatmënga. <sup>18</sup> Er chábeyeca, canÿánÿenga y ínÿenga montsobena chë Taitábioye jobéconana, er bënga nÿetscanga cachca espíritu bëngbe ainaniñe mondbomna, chë Uámana Espiritu. <sup>19</sup> Chíyeca tšëngaftanga, Bëngbe Bëtsabe entšanguentše ndoñe quešmátsmëna mo inÿe luarocana ashajñëngcá, y ni mo cachëngbe yebnentše ndoyenëngcá, tondayama derecho ndbomnënga. Inÿetšá endmëna; tšëngaftanga derecho šmondbomna cachcá ntšamo Bëngbe Bëtsabe entšanga mondbomncá, y Bëngbe Bëtsabe básenga šmondmëna. <sup>20</sup> Jesucristo y chabe entšanga mondmëna mo canÿe jebna yebncá. Jesucristbe ichmónënga y chë Bëngbe Bëtsabe juabna oyebuambnayënga mondmëna mo chë ndëtšbënga ndayíñe chë yebna tojtsëcuatjoncá; tšëngaftanga ošbuáchiyënga šmondmëna chë jebna yebnentša soyëngcá, y cach Jesucristo mo chë más uámana luarentše uashacuana ndëtšbecá. <sup>21</sup> Quem más uámana luarentše uashacuana ndëtšbeñe, nÿetsca chë bëtš yebnentša soyënga jtsëcuatjonana, y tsbanánoye más tmojatsjebëse, chë bëtš yebnentše tsëm jebna sóynaca chiñe jtsëcuatjonana. Cachcá Cristo, mo chë más uámana luarentše uashacuana ndëtšbecá, jtsamana nÿetsca chábeñe ošbuáchiyënga cháftaca cánÿiñe mo canÿacá chamotsemnana, y ínÿëngnaca cachcá chamotsemnana. Y nÿetsca ošbuáchiyënga Crísoftaca cánÿiñe mo canÿacá tmojtsemna ora, chënga jtsemnana mo Bëngbe Utabnabiama canÿe bëtš yebna jebncá, chábioye jtsatschuanayama. <sup>22</sup> Y tšëngaftanga Efesoca ošbuachiyëngbiámnaca Cristo entsama, chë inÿe chábeñe ošbuáchiyëngaftaca mo canÿe entšangcá

chašmotsemnama. Y chë Uámana Espíritu bēngbe ainaniñe yojtsiyénayeca, bēnga n̄yetscanga cányiñe mondmēna, mo can̄ye bēts yebncá ndayentse Bēngbe Bētsá yoyena.

### 3

*Pablo Jesucristbe trabajo yojanbon̄yena, chë ndoñe judiēngbeñe jamama*

<sup>1</sup> Chca, atse Pablo utamená sēntsemna, Cristo Jesusbiana soyēnga entšanga abuayiynaye causa, tšēngaftanga chë ndoñe judiēngbe tšabiama. <sup>2</sup> Er tšēngaftanga ya cmontsamna jtsetatšēmbuama, Bēngbe Bētsá tšēngaftangbe tšabiama juabna yobomnama; y chca, chë trabajo atse šojabon̄yé, tšēngaftangbe tšabiama jamama. <sup>3</sup> Tšēngaftángnaca cmontsamna jtsetatšēmbuama ndayá Bēngbe Bētsá šojin̄yin̄yé, ntšamo cha jamama tempo tojanjuabocá, pero entšanga chca ndoñe tonjanin̄yan̄yé, y chë soyama ya batsatema tcbonjubuábiana. <sup>4</sup> Chašmojualiá ora, šmochanjátatšēmbona Cristbe soyēnga šosertánama, chë tempo ndocná yonjanábuatma soyēnga, <sup>5</sup> chë tempo Bēngbe Bētsá ndocnábioye tbonjanin̄yin̄yé soyēnga; pero mora cha tojin̄yan̄yé, Jesucristbe ichmónēnga n̄ye Bēngbe Bētsabiama oservénēngbioye y Bēngbe Bētsabe juabna oyebuambnayēngbioye; y cha chca tojama chabe Uámana Espíritoftaca. <sup>6</sup> Ndayá tempo Bēngbe Bētsá ndoñe tonjanin̄yan̄yecá mēntšá endmēna: chë ndoñe judiēnga Jesucristbe tšabe noticiēnguiñe chamojtsošbuaché ora, cachcá ntšamo chë judiēnga ošbuáchiyēnga Bēngbe Bētsábiocana mochjoshachiñcá, chēngnaca chábiocana mo otocancá chë soye mochanjóyēngacñe. Chēnga mo cach judiēnga ošbuachiyēngcá, Cristo mondbomna mo chēngbe mandayacá. Y chca Cristo endmēna mo bestšašcá y chēnga n̄yetscanga mondmēna mo cachabe cuerpentša soyēngcá. Chë ndoñe judiēnga ošbuáchiyēnga mochanjóyēngacñe lempe ntšamo Bēngbe Bētsá chë judiēnga ošbuáchiyēnga tojašebuachenacá. Chca echántsemna chë ndoñe judiēngaftaca, chēnga Cristo Jesúsēftaca cányiñe mo can̄yacá bētsemnayeca.

<sup>7</sup> Masque ndoñe šonjanomerecena, mo ndayá cuafjatšetacá, Bēngbe Bētsá šonjanábuayana cha jtseservénama, tšabe noticiēnga entšanga jtsabuayiynayēse; y cha átšēftaca chca tojanma chabe obenánaca. <sup>8</sup> Atse n̄yetsca chë Bēngbe Bētsabe entšanguentse sēndmēna chë más nduamana; pero Bēngbe Bētsá bēts pavor šontsebema, šonjalesenciá chë Cristbe bētscá tšabe soyēnga chë ndoñe judiēnga jábuayenama. Chë Cristbe soyēnga tša bētscá endmēna, y chca, quenátopodena chë soyēnguentšana lempe jtsabuatomana.

<sup>9</sup> Y chë trabajo šonjabonyé jamama, nyetscanga botamana jinýama chamotsobenama ndayá Bëngbe Bëtsá yochjama, ndayá cachá, chë nyetsca soyënga tojamá, tempscana yojanjuabnacá. Méntscañama Bëngbe Bëtsá chë soye ndocnábioye tbonjinýinýé, pero mora aiñe. <sup>10</sup> Chca, Crístbeñe ošbuachiyëngbeyeca, mora chë celoca mándayënga y obenana bomnënga, chamobená juabuátmanana nyets osertánana ntšamo Bëngbe Bëtsá yobomncá. <sup>11</sup> Bëngbe Bëtsá chca tojama, ntšamo cachá yojanjuabnacá nyetsca tescama jamama, y chca cha tojama Jesucrísoftaca, Bëngbe Utabná. <sup>12</sup> Bënga Crístoftaca cánýiñe mo canýacá mondmëna, y chábeñe mondošbuachéyeca, bënga montsobena Bëngbe Bëtsábioye jobéconama tondayama ntjatauatjácá, y corente jtsetatšëmbëse cha ndoñe chašondubatema. <sup>13</sup> Chýeca atše cbontsaïmpadana ndoñe chašmondëtsajbaná ainaniñe añemo bomnana, atše sëntsesufrina causa, er chë tšëngaftangbe tšabïama tsësufrentšana, tšëngaftangbïama tšabe soyënga endóbocana.

### *Cristbe bonshánana*

<sup>14-15</sup> Y chca, Bëngbe Bëtsá, chë Taitá, ndábentšana nyetsca pamállanga celoca y quem luarentše uabaina imóyëngacañe, chabe delante joshaméntšase, <sup>16</sup> sëntseïmpadana, chabe bëtscá uámana bomnánaca chaoma, tšëngaftanga ainaniñe obenana y bëts añemo chašmotsebonnama, chabe Espíritbeyeca, <sup>17</sup> y tšëngaftanga Crístbeñe jtsošbuáchiyëse, mua tšëngaftangbe ainaniñe chaotsiyenama. Bëngbe Bëtsánaca sëntseïmpadana, cha y ínýenga nyets ainánaca jtsababuánýeshanëse, <sup>18</sup> tšëngaftanga y nyetsca Bëngbe Bëtsabe entšángnaca tšëngaftangaftaca, chašmotsobena josértama Crístbe bonshánana bëngbïama tša bëtscá yomnama. Nderado nda tojontsé chabe bonshánana jatšëmbonana mo canýe soye cuaftsemncá, cha ndocna te nanjobenaye jtsetatšëmbuana tëntsoye ndayëntscoca yomna y nýañëjoye ndayëntscoca, jashenoye ndayëntscõe y tsbanánoye ndayëntscõe yomna. <sup>19</sup> Atše sëntseïmpadana tšëngaftanga chašmobená chë bonshánana juabuátmanana (chë bonshánana puerta bëtscá endmëna causa, bënga ndocna te quemochatobenaye josértama ntšamo chë soye lempe yomnana). Pero sëntseboše, tšëngaftangbe ainaniñe nýe Bëngbe Bëtsabe soyënga chaotsemna y tšëngaftanga chašmotsiyena jtsamëse, ntšamo tšëngaftanga chašmotsamama Bëngbe Bëtsá yojuabnacá.

<sup>20</sup> Y mora, nyetscanga Bëngbe Bëtsá chamotsatschuaná. Cha obenana yobomna ntšamo bënga tmojtsotjanañe o tmojtsejuabnama más soyënga jamama, chabe puerta bëts obenánaca; y chë obenana bëngbe ainaniñe yojtsemánda y yojtsama

bënga ainaniñe sempre ošbuáchiyana chamotsebomnama.  
<sup>21</sup> ¡Entšanga Bëngbe Bëtsá chamotsatschuaná nyets tempo y nyetsca tescama, ndayá Crístbeñe ošbuáchiyënga tmojt-samama y cach Cristo tojamámnaca! Chca chaotsemna.

## 4

### *Uámana Espíritbeyeca bënga cányiñe mo canyáca jtsemnana*

<sup>1</sup> As, atše chë cárceloye utamená, Bëngbe Utabnabiamama trabájaye causa, tšëngaftanga cbontsaïmpadana, ndëmuanyënga Bëngbe Bëtsá tcmojáchembo chabe entšanga chašmotsemnana, sempre chašmotsiyena mo chë entšangcá ndëmuanyënga Bëngbe Bëtsá cach soyama tojánachembo y chca imomerecena. <sup>2</sup> Cada ona chamotsenuabná mo chë ínÿenga chabiamama más uámanënga tmojtsemncá, y nyetscángbioye puerte bonshanánaca šmochtsobátmana, y bëtscá bonshánana jtsebomnëse šmochtsenëuantana; <sup>3</sup> sempre šmochtsejuabnaye y šmochtsentšena tšëngaftanga nyets tempo cányiñe mo canyáca chašmotsemnana, nyetsca tšëngaftanga natjëmbana jtsemnëse. Y tšëngaftanga šmontsobena cányiñe mo canyáca jtsemnana chë Uámana Espíritbeyeca. <sup>4</sup> Bënga Jesucristbeñe ošbuáchiyënga bëtsemnayeca mondmëna mo cach cuerpentšëngcá, chë Crístbe cuerpo, y cachca Espiritu bënga nyetscanga ainaniñe mondbomna. Bëngbe Bëtsá šojáchembo, bënga chábeñe jtsošbuáchiyëse, nyetscanga cachcá šochjátšatayama chamotsobátmanama. <sup>5</sup> Bënga nyetscanga cach Utabná mondbomna, cachca ošbuáchiyana Jesucristbeñe mondbomna, y bënga nyetscanga uabáinënga mondmëna chca betsošbuáchiyama. <sup>6</sup> Bënga ošbuáchiyënga nyetscangbiama cach Bëngbe Bëtsá y Taitá endmëna. Cha bëngbe amëndayá endmëna, chabe obenana nyetscángbeñe jtsinÿnana, y nyetsca bëngbe ainaniñe chabe Espiritu endmëna.

<sup>7</sup> Pero bënga, cada ona tšetana obenana tojóyëngacñe, tšabe soyënga jamama, ntšamo Cristo jatšatayama tojanbošencá, chábeñe ošbuáchiyënga jujabuáchama. <sup>8</sup> Chíyeca, Bëngbe Bëtsabe uabemana palabrenguiñe Jesucristbiamama mëntšá endayana:

Cha celoye tontantsjuá, y cháftaca tonjanéyamba nyetsca  
 chabe uayayënga, chë tojánayënjananga,  
 y chabe entšángbioye obenana tonjanatšatá, tšabe soyënga  
 jamama ca.

<sup>9</sup> ¿Y ndayá yojtsayana chë “cha tontantsjuá ca”? Chca entsayana co Cristo natsana, quem luaroye tojánastjango ca. <sup>10</sup> Y Cristo, chë tojanastjanguá, cachá endmëna nda celoca chë más tsbanánoye tojtantsjuá; chca, canye ora nyetscañe cha chaotsemnana. <sup>11</sup> Y cachá, chë tšabe

soyënga jamama obenana tojanatšatá ora, tojanma chábeñe ošbuáchiyënguentše chamotsemna ínÿengna chabe ichmónënga, ínÿengna Bëngbe Bëtsabe juabna oyebuambnayënga, ínÿengna tšabe noticiënga Cristbiana abuayiynayënga, y ínÿengna ošbuáchiyënga anÿenënga y Bëngbe Bëtsabe soyëngama abuátambayënga. <sup>12</sup> Cristo tojanabacacangna chabe entšángbioye mochjanëjabuache, cha tojanabanÿé trabajo chënga chamotsamama, y nÿetsca ošbuáchiyënga, chë nÿetscanga cánÿiñe mondmëna mo Cristbe cuerpcá, cada te más ošbuáchiyana y bonshánana chamotsebomnama, <sup>13</sup>bënga nÿetscanga chamobenantscuana cachca ošbuáchiyana Jesucristbeñe jtsebomnama, y Bëngbe Bëtsabe Uaquiñabiana nÿetscanga lempe cachcá jtsetatšëmbuama. Chca, bënga mochanjashjache jtsemnama lempe ntšamo Cristo yomncá, mo bëtsétsanga bëtscá juabna bomnëngcá, <sup>14</sup> y ndoñe nÿe mo basengcá, Bëngbe Bëtsabe soyëngama jtsetatšëmbuama. Chë soyënguiñe ya ndoñe más nÿe mo basengcá quemochátsmëna, ndëmuanÿenga paselo jáingñama yomna. Mo canÿe barquësha nÿe ndaye bínÿiacnaca tojtsëyambancá, básefta entšanga nÿe ndaye buatëmbana soye tmojatucá jatsyeunanana; bënga ndoñe chca quemochátsmëna, ya ndoñe más bëngbe juabna quemochatstróca, nÿe ndaye tmojatucana tsëm sóyeca, ínÿengbioye áingñayënga. Chënga becá montsetátšëmbo ntšamo entšanga jáingñana, y montseboše chë montsabuatambá bostero soyënga bënga jtseyeunanama. <sup>15</sup> Chamna, chë Bëngbe Bëtsabe ndegombre soyëngama bonshanánaca jtsóyebuambnayëse, šontsamna jashjáchana jtsemnama lempe ntšamo Cristo yomncá. Cha bëngbe amëndayá endmëna, cachcá ntšamo bestšaše chë cuerpentša soyënga jtsemandayancá. <sup>16</sup> Mo canÿe bestšašcá, chëse jamana nÿetsca chë cuerpentša soyënga ndayentše chamuenefjnama y chiñe jobónjuama chamotsobenama, chë cuerpo saná chaotsebomnama jtsamëse, chca, nÿets cuerpo tšabá chaóbochema, cachcá Cristo, chë nÿetsca ošbuáchiyëngbe amëndayá, chabe obenánaca jamana chënga cada te más ošbuáchiyana y bonshánana chamotsebomnama. Cada cuerpentša soye tojtsama ntšamo chë soye chaotsamama tomncá, as nÿets cuerpo tšabá jobóchana; cachcá, ošbuáchiyënguentše cada ona tojtsama ntšamo jamama tbojtsemncá, as nÿetsca ošbuáchiyënga cada te más ošbuáchiyana mochántsebomna, puerte jtsebobonshánëse.

*Cristoftaca cánÿiñe mo canÿacá jtsemnëse tsëm vida smochtsebomna*

17 Měntšá entsemna ntšamo cbontsětsětsnacá, y Běngbe Utabná endmēna nda tojama atše mando chaitsebomnama tšěngaftanga chca jáuyanama: Ndoñe más šmattsiyena bacna soyēnga jtsamēse, mo chē Běngbe Bětsábioye nduabuátmēnga mondbetsamcá; chēnga jtsiyenana jtsamēse ntšamo cachēngbe ndoservena juabnēnga tojtsamēndacá. 18 Chēngbe juabnoca obenana mondbomna nje ndoñe ndegombre soyēngama josértama. Chēnga ndoñe quemátsbomna chē Běngbe Bětsábioyana yóbocana tšabe vida, er chēnga ndoñe quematsleséncia chē Běngbe Bětsabe soyēnga chēngbe ainaniñe chaómashēnguama; y chca endmēna, er chēnga tmojajuabó y tmojama chē Běngbe Bětsabe buayenana soye chēngbe ainaniñe tondaye chaondómashēnguama. 19 Chēnga bacna soyēnga tmojtsama ora, tondayama ntsenócochinjenana; chēnga nyets tempo jesentšénana nyetsca bacna soyēnga amana, y chca jtsamana tondayama ntjatenujuabnacyá.

20 Pero chca ndoñe quenjatsmēna ntšamo tšěngaftanga Cristbe soyēngama šmojanatsjinje y ntšamo chábioye šmojanabuatmancá. 21 Ndegombre tšěngaftanga chabiamá šmojanuena y ínjenaga tmojanabuatambá mo chábeñe ošbuachiyēngcá y ntšamo chē ndegombre soyēnga Jesucristbeñe endbinjncá. 22 Chcasna, ntšamo tšěngaftanga šmojanjuabná, šmojansentina y šmojanamcá Jesucristbeñe cabá ndošbuachená ora, mora lempe stětsoye šmochjaquéda; ntšamo tempo tšěngaftanga šmojanjuabná, šmojansentina y šmojanamcá, canje ondbiamnaye juabnentšana yojóbocana, tšěngaftanga bacna soyēngama juabnēngaca mandánēnga jtsemnēse, y chē juabnēnga tšěngaftangbioye cmojánaingnaye. 23 Tšěngaftanga cmontsamna tšěngaftangbe juabniñe tsēm y tšabe juabnēnga jtsebomnana. 24 Tšěngaftanga cmontsamna jashjáchana mo tsmēma entšangcá jtsemnama, y chē ntšamo tempo šmojanamcá mora ndoñe cachcá chašmondětsamama. Chca, tšěngaftanga šmochanjashjache jtsemnama ntšamo Běngbe Bětsá yomncá. Běngbe Bětsá chca tsmēma entšangcá tcmojábiamá, tšěngaftanga chašmotsiyenama jtsamēse Běngbe Bětsabe bominiñe tšabá yomna soyēnga y chábioye jadórana soyēnga, chē ndegombre soyēnguentšana óbocana soyēnga.

25 Chcasna, ya ndoñe más šmattsebostero, ndayá cada ona cháuyana ndegombre soyēnga cachacá Jesucristbeñe ošbuachiyáftaca, er nyetscanga cánjiñe mondmēna mo nje canje entšangcá. 26 Nderado chacmojetēna, tcmojetēna causa ndaye bacna soye ndoñe šmatjama. Pero ndoñe šmatjaleséncia bēnama chacmetēna y ndoñe nyets te chacmondetēna. 27 Ndoñe šmatjaleséncia Satanás ndayánaca

tšëngaftangaftaca chaomama.

<sup>28</sup> Chë yojanatbëbaná chauajbaná atbëbanama y jatrabájama chaontšë; cachabe cucuátšeca tšabe trabajo chaotsóboma, chca, ndayánaca cha chaotsebomnama chë ujabótënga jatšatayama.

<sup>29</sup> Bacna palabrënga ndoñe šmattsichamo, pero aiñe tšabe palabrënga y nja chorsca ujabótama palabrënga, chë inje entšángbioye jujabuáchama más Cristcá chamotsemnana, chënga Bëngbe Bëtsábíocana tšabe bendicionënga chamóyëngacñana, chë ndayá chašmojtsëtsëtsná sóyeca.

<sup>30</sup> Ndoñe šmattsama soyënga, Bëngbe Bëtsabe Uámána Espíritu chabongmema. Bëngbe Bëtsá tojama Uámána Espíritu tšëngaftangbe ainaniñe cháumashënguama, y chca, tcmojanainñaná chabe entšanga bëtsemnayeca, chë yochjóshjango tescama, Bëngbe Bëtsá chabe entšanga nýetsca tescama yochjatsebacaye orscama.

<sup>31</sup> Inyëngbiama bacna juabnënga ainaniñe ndoñe chašmondëtsebonna, etonánënga ndoñe chašmondëtsemna, ni inyëngaftaca ndoñe chacmondetëna. Inyëngbioye ndoñe chašmondëtsabuachembuana, inyëngbioye ndoñe šmatjoyánguango y ndaye bacna sóynaca ndoñe šmattsama.

<sup>32</sup> Nýetscángaftaca tšábënga šmochtsemna, nýetscanga šmochtsenlastemana y šmochjenperdóna, ntšamo Bëngbe Bëtsá, Crístbeyeca tcmojaperdonacá.

## 5

*Ntšamo yomna Bëngbe Bëtsabe básënga chamotsiyenama*

<sup>1</sup> Tšëngaftanga, Bëngbe Bëtsabe bonshana básënga quetsomñecá, nja šmochtsentšëna cachacá jtsemnana.

<sup>2</sup> Smochtsiyena nýetsca soyënga bonshanánaca jtsamëse, ntšamo Cristo šojanababuanýeshancá; chca, cha chabe derecho vida jtsobomñana cachcá tojanonýá y bëngbiama tojanóbana. Y ntšamo Cristo tojanmcá, yojamna Bëngbe Bëtsábíoye jëtschuayama, y chabe bominýiñe tša tšabá yojtsemna, mo ndaye ora Bëngbe Bëtsá oyejuayá jóyëngacñana ndayá tcojóna y altaroca tcojajuinýese, y chë soye botamana jtsonguëtsiyana.

<sup>3</sup> Tšëngaftanga, Bëngbe Bëtsábënga šmomnënga, ndoñe quecmátamna shembása o boyabásaftaca bacna soyënga jtsamana, ni chca játamama jtsejuabnayana y jtsebošana, y chë nje yapa jésebošana más soyënga inyëngbiama jtsebonnama cach ndoñe. Ni chë soyëngama ndoñe šmattsóyëbuambnaye. <sup>4</sup> Bacna soye ndoñe šmattsóyëbuambnaye, ni corente ntjenojuaboycá, ni nje ntšámnaca bacna soye jenbotatšëmbonana cach ndoñe, er chë soyënga



tšëngaftangbiana ndoñe tšabá ntsemnana. Chca játamamna, más tšabá, Bëngbe Bëtsá šmochtsatschuanaye. <sup>5</sup> Er tšëngaftanga ya šmondétatšëmbo, ndocna chë shembása o boyabásaftaca bacna soye amá, ndocna chë nýe chabe bacna juabnëngaca soyënga jtsamama oyená, o chë nýe más soyënga ínýengbiana jtsebmomna bošá y amá (chca jtsayanana chabiana más iuámana soyënga jtsebmomna, Bëngbe Bëtsábioye jatsbobonshánama), chca amënguentsana ndocná tondaye queochatóyëngacñe ndayá Bëngbe Bëtsá chabe entšangbioye jatšatayama tojašebuachenantsana, Cristo y Bëngbe Bëtsabe amëndayoca. <sup>6</sup> Ndocná chacmondaingñé ndoñe ndegombre tondmëna palabréngaca, bacna soyënga chašmotsamama, er chë causa chë uabouana castigo echanjobaye, ndáyeca Bëngbe Bëtsá chábioye ndëyeunanënga yochjácastigaye. <sup>7</sup> Chíyeca, chca amëngbe soyënga tondaye šmattsama.

<sup>8</sup> Tempo tšëngaftanga šmojanienya bacna juabnënga jtsebmomñe y bacna soyënga jtsamëse, mo ibetiñe cuaftsiyencá, pero mora Bëngbe Utabnáftaca cánýiñe mo canýacá bëtsemnayeca, chabe soyënga šmontsetátšëmbo y sempre šmondétsemna cháftaca, chë entšangbe juabnënga binýnayáftaca. Smochtsiyena jtsamëse mo chë binýnayabe entšangcá. <sup>9</sup> Chë binýnayábeyeca entšanga tšabe soyënga jtsamana, chë Bëngbe Bëtsabe bominiñe tšabá yomna soyënga, y ndegombre soyëngnaca. <sup>10</sup> Nýa šmochtsentšena soyënga jamama, Bëngbe Bëtsá oyejuayá chaotsemnana. <sup>11</sup> Chë mo ibetiñe cuaftsiyencá oyenëngbe bacna soyënga tondayama ntsošervénana, y tšëngaftanga chca ndoñe šmattsama. Chamna, chëngbioye šmochjínýanýiye chënga ndoñe tšabá tmonjamama. <sup>12</sup> Ndegombre, nýe chë ndayá chënga mo iytemencá tmojamama jóyebuambayama ya cuantsëuatja; <sup>13</sup> pero nýetsca soyënga binýniñe tmojacá ora jtsopodénana tšabá jinýama ntšamo ndegombre tomncá. Cachcá, ntšamo entšanga tmojamcá chë binýnayá chaojinýanýé ora, echantsopodena jtsotatšëmbuama ntšamo chë soyënga yomnana; <sup>14</sup> er ndayánaca binýniñe tojtsinýinýena, jtsopodénana jinýama ntšamo ndegombre chë soye tomncá. Cachcá, ntšamo entšanga iytemencá tmojtsamcá chë binýnayá chaojinýanýé ora, chënga mochántsetatšëmbo bacna soyënga imojtsamama. Chíyeca mëntšá jtsichámuana:

Botamana cochjájuaboje, aca ndoñe quecátobena  
jenomándana, mo canýa cuaftsomañcá;  
chë bacna soyënga ama causa, Bëngbe Bëtsabe bominiñe mo  
obanëngcá imomnënguentsana šmochtsojuánañe,  
y Cristo acbe juabnënga echantsebínýnaye ca.

15 Chcasna, šmochtsantješna ntšamo tšabá yomncá jtsamëse chašmotsiyenama. Ndoñe šmattsiyena jtsamëse, mo chë Bëngbe Bëtsabe soyëngama ndosertanëngcá, pero aíñe chë chca soyëngama osertanëngcá. 16 Lempe ntšamo chašmojobenacá nÿets tempo tšabe soyënga šmochtsama, er quem tempo entšanga yapa bacna soyënga montsama. 17 Ntjenojuaboycá ndoñe šmattsama, mo chë ndosertanëngcá. Pero aíñe bëtscá šmochtsentšena ndayá Bëngbe Utabná jamama yobošcá chacmósertama. 18 Ndoñe šmattsótmenaye, er chë soye entšábioye juanatsana jenomándama ndoñe chaondëtsobenama; chamna, šmochjama Uámana Espiritu sempre y bëtscá tšëngaftangbe ainaniñe chaotsemándama. 19 Smochjenatsëtsaye Salmos librëšañe enduábemana cantënga jacántase, Jesucristbe soyëngama cantëngaca y chë Bëngbe Bëtsabe Espiritu inétsama tšëngaftanga chašmotsobena jacántama soyëngaca; chca, nÿets ainánaca Bëngbe Utabnabiamama šmochjacántaye y cha šmochtsatschuanaye. 20 Nÿets tempo y lempe ntšamo cha tojamama Bëngbe Bëtsá chë Taitá šmochtsatschuanaye, Bëngbe Utabná Jesucristbiajana.

*Ntšamo yomna canÿe yebnentšënga chamotsemnana*

21 Nÿetscanga šmochtsenëyeunana, tšëngaftanga Crístbioye puerte šmorrespetánayeca.

22 Shémanga, šmochtsetátšëmbo tšëngaftangbe boyanga chë yebnentša mándayënga imomnana; y nÿets tempo chca šmochtsama, Bëngbe Utabná chašmotsobedecénama.

23 Er boyá endmëna shembe mandayá y inÿená, ntšamo Cristo chë ošbuáchiyëngbe mandayá y inÿená endmëncá. Cha chënga tojatsebacá y mora cha chënga entsamënda, mo chë bestšaše nÿets cuerpo jtsemmandayancá; 24 y chca, ntšamo chë ošbuáchiyënga, Cristo chëngbe amëndayá yomnama imotatsëmbcá y chca jtsamana, cachcá, chë shemángnaca entsamna jtsemnana nÿetsca soyënguifne chëngbe boyángaftaca.

25 Boyanga, tšëngaftangbe shémanga šmochtsababuánÿeshana, ntšamo Cristo chábeñe ošbuáchiyënga yojanababuanÿeshancá, y chca, chabe derecho vida jtsobomñama cachcá tojanonÿá y chëngbiamama tojanóbana. 26 Chca tojanma, chënga chabe entšanga y puerte tšábenga jábiamama; y chënga tmojánenabayey ora, tmojaninÿanyé Bëngbe Bëtsá chëngbe bacna soyënga tojánabuajuanama, y chabe delante tšábenga chamotsemnana cha tojanmama. Cha chca tojanma, er chënga chábeñe imojtsanošbuaché, chabiamama buayenana soyënga tmojanuena ora. 27 Cha chca lempe tojanma, chë ošbuáchiyënga japróntayama corente tšábenga y uámanënga

cachabiama chamotsemnana, ndocna bacna soye ndbomnënga, ni ndocna entśá chaondobená jayanama chënga imomna chë ndoñe tśabá tmonjamënga ca, ni ndocna inye cachca sóyeca. <sup>28</sup> Ntśamo canye boyá cachabe cuerpo endbetsebobonshancá, cachcá cha bontsemna chabe shémbioye jtsebobonshánana. Nda chabe shémbioye tbojtsebobonshana, cachábioye jtzenobobonshánana, er chata cányiñe jtsemnana mo nye canye entśá cuenta. <sup>29</sup> Er ndocná cachabe cuerpo jtsáboyënjana, ndayá saná janguangoñana y jtsinyenana, ntśamo Cristo bënga chë ośbuáchiyëngaftaca endbetsamcá; <sup>30</sup> er bënga nyetscanga cányiñe mondmëna mo chabe cuerpo cuaftsemncá, y bënga mo chabe cuerpentśa soyënga cuaftsemncá. <sup>31</sup> Ntśamo Bëngbe Bëtsabe uabemana palabrenguiñe endayancá: “Chíyeca, boyabása chabe taitá y chabe mamá echanjésabashejuana chabe shémaftaca jenútanama, y chë útata mo canyacá bochántsemna ca.” <sup>32</sup> Chë soyënga josértama puerta totcá comna, pero atśe ŝcuayana, chë soye entsoyebuambná ntśamo Cristo chábeñe ośbuáchiyëngaftaca yomnama. <sup>33</sup> Pero morna, tśëngaftanga cada ona cachabe shémbioye chabotsebobonshana, ntśamo cachá iuenobobonshancá, y shema boyábioye ndoñe stëtsoye chabondëquedá.

## 6

<sup>1</sup> Básenga, Bëngbe Utabnáftaca cányiñe mo canyacá bëtsemnayeca, tśëngaftangbe bëtśétsangbioye ŝmochtsayaunana, er chca jamana tśabá endmëna. <sup>2</sup> Moisesbe leyíñe canye mando endmëna, y chentśe endmëna chë Bëngbe Bëtsabe natsana mando, ndayentśe cha tojaśbuachená tśabe bendicionënga jamama: “Acbe taitá y acbe mamá ndoñe stëtsoye catjëftsaquédaye, <sup>3</sup> tśabe vida chacuetsobomñama y quem luarentśe baytë chacuetsiyenama.”

<sup>4</sup> Taitanga, ndoñe ŝmattsama tśëngaftangbe básenga chauetënana; más tśabana, chënga ŝmochtsabéchaye jtsabuátambayëse y jucacánëse, ntśamo Bëngbe Utabná endbetsabuatambaycá.

<sup>5</sup> Tśëngaftanga, chë nyets tempo nye ínñabiama oservénënga, tśëngaftangbe nduiñënga ŝmochtsayaunana; chca ŝmochtsama puerta respétoca, bëtścá cuedádoca y nyets ainaniñe tśabe juabnëngaca, mo cach Crístbioye cuaftseservencá. <sup>6</sup> Y chca chë nduiñëngbioye ŝmochtsaserverna, ndoñe nye chënga chacmojtsënña ora, mo nda nye entśangbe delante tśabá joquédama cuaftseboścá, ndayá Cristbe oservenëngcá, chënga nyets ainánaca jtsamana ntśamo Bëngbe

Bëtsá tojtsebošcá. <sup>7</sup> Njetsca trabajotémënga šmochtsama njets tšëngaftangbe añémoca, mo Bëngbe Utabnabiamu cuaftsetrabajacá, y ndoñe nye entsangbiamu. <sup>8</sup> Er tšëngaftanga ya šmondëtatšëmbo, cada ona, njets tempo nye ínÿabiamu trabajayá o nye cachabiamu trabajayá tomna, ntšamo tšabe soyënga tojamcá Bëngbe Utabnábiocana yochjójyëngacñe.

<sup>9</sup> Y tšëngaftanga, ndëmuanyëngbiamu ínÿenga njets tempo imoservena, cachcá tšabá chëngaftaca šmochjamna, tondayama ntsaútatjnayëse. Smochtsenójuabnaye, Bëngbe Utabná chë celoca endméná, tšëngaftanga y chëngbe mandayá yomnama, y chabiamu njetscanga cachcá monduámama.

*Ndayá Bëngbe Bëtsá entsanga tojatsatá Satanasbiamu jenëuyanama*

<sup>10</sup> Y morna, Bëngbe Utabnáftaca cánÿiñe mo canÿacá jtsemnëse, ainaniñe bëts añemo šmochtsebomna, chë Bëngbe Utabnabe bëts obenanentsana óbocana añemo. <sup>11</sup> Mo canÿe soldadcá, ba soyënga jtchëtjuana chë tmojtsentsjananga ora uayayëngbiamu jenëuyanama, tšëngaftángnaca cachcá, njetsca chë Bëngbe Bëtsá cmojatsatá soyëngaca šmochtseprontana jenëuyanama, tšëngaftanga jáingñama Satanás ntšámnaca tojtsama ora, ndoñe chacmondáyënjanama. <sup>12</sup> Er bënga ndoñe quemuatenojuerzana cach quem luarentša entsángaftaca jenëyënjanama, ndayá bacna espíritënga mando bomnéngaftaca; bacna espíritënga obenana bomnéngaftaca; y quem luarentša entsanga, chë bacna juabna bomna causa y Bëngbe Bëtsabe soyënga nduabuatma causa, mo ibetiñe cuaftsoyencá oyena entsángbioye amëndaye espíritëngaftaca; y chë tsbanánoca luarënguiñe imomna y bacna soyënga chaotsebínÿnama ama espíritëngaftácnaca. <sup>13</sup> Chíyeca, lempe ntšamo Bëngbe Bëtsá cmojatsatacá šmochjójyëngacñe y chë soyënga jtsamëse šmochtsiyena jtseprontánama, mo canÿe soldado jenëuyanama y jáyënjanama bëtscá soyënga tojtchëtjácá. Chca šmochjama, chë uayayá Satanás tšëngaftangbioye jáingñama chaojtsama ora ndoñe chacmondáyënjanama, y jenëuyanama lempe jtsamëse, chašmobená cha jayënjanama.

<sup>14</sup> Mo canÿe soldadcá, jabuache jtsanayana y cochaca canÿe morocho soye jenácochjatsana jtsevalentiamu y ndoñe chamondëyënjanama, tšëngaftángnaca cachcá, ntšamo ndegombre yomncá jtsamëse šmochtsiyena, mo chë jabuache cuaftasnacá, y chë Bëngbe Bëtsabe bominiñe tšabá yomna soyënga jtsamëse, mo chë morocho soye cochaca cuafjenacochjatscá, chca, Satanás tšëngaftangaftaca tondaye chaondobená jamama. <sup>15</sup> Mo canÿe soldadcá jtoshecochëtjuana betscó jobónjuama

jtseprontánama, tšëngaftángnaca cachcá, Bëngbe Bëtsabe obenánaca sempre šmochtseprontana jtsabuayiynayama ntšamo Bëngbe Bëtsá inétsama entšanga tempcá tšabá cháftaca chamotsatsmënama. <sup>16</sup> Canye soldado escudo jtsebomnana chë uayayabe uajuinÿinÿana flechëjuangá chabe cuerpiñe ndoñe chaonduámashënguama. Cachcá, tšëngaftanga cmontsamna Jesucristbeñe puerte jtsošbuáchiyana, mo escudo cuaftsebomncá, chca, chë bacna soyënga mandayá Satanás tšëngaftangaftaca tondaye chaondobená jamama, tšëngaftangbe ošbuáchiyana jabuajuánama cha tojtsama ora. <sup>17</sup> Mo chë soldadcá, canye morocho buchtsanëse tojtabuchëtsëse chabe bestšaše jenëuyanama, tšëngaftángnaca cachcá, sempre šmochjësejuabnaye Bëngbe Bëtsá cmojátsebacama, y chë juabna cmochanjújabuache, mo canye morocho buchtsanëse cuaftsabuchëtsancá. Mo canye soldadcá, chë uayayábioye jayëñjanana, chabe espadéjaca japéliase, cachcá tšëngaftanga, Bëngbe Bëtsabe palabra šmochtsóyebuambnaye Satanás jayëñjanama. Uámana Espíritu jtsamana, tšëngaftanga Bëngbe Bëtsabe palabra chašmotsebomnana. <sup>18</sup> Nÿets tempo chë Uámana Espíritbe uajabuáchenanaca Bëngbe Bëtsáftaca šmochtsencuëntaye, lempe ntšamo Bëngbe Bëtsáftaca jencuëntama yomncá y chábioye jtseimpadánëse. Yeuana šmochtsenójuabnaye ntšamo šmojtsichámuama, Bëngbe Bëtsáftaca chašmojtsencuënta ora, y chca šmochjama Bëngbe Bëtsábeñe sempre jtsobátmanëse, y Jesucristbeñe ošbuáchiyëngbiamana nÿetscangbiamana cha šmochtseimpadana.

<sup>19</sup> Atšbiámnaca Bëngbe Bëtsá šmochtseimpadana, atše jóyebuambayama chajontsé ora, cha chë buayenana soye chašúyanama; y atše chayobená tondayama ntjatauatičá jóyebuambayana, y chca, entšanga chayinÿanÿé Jesucristbiamana tšabe noticiënga, ndayá chënga tempo ndoñe monjántatšëmbo. <sup>20</sup> Bëngbe Bëtsá šojichmó mo canya chabe cuenta oyebuambnayacá, chë buayenánama entšángbeñe jóyebuambayama, y chca bétsamama, mora atše utamená séntsemna. Atšbiamana Bëngbe Bëtsá šmochtseimpadana, atše chayobenama Cristbe buayenánama tondayama ntjatauatičá jóyebuambayana, ntšamo atše jamama šojtsemncá.

### *Pablo chënga jtadióšoftanama*

<sup>21</sup> Tíquico, Jesucristbeyeca bëngbe bonshana catšata y canye entšá tšabe palabra bomná, Bëngbe Utabnabe trabajo jamama oservëniñe, ntšamo atše stsemnama y ndayá stsamama tšëngaftanga chašmotsetatšëmbuama, lempe cmochanjácuntaye. <sup>22</sup> Chama cha tšëngaftangbioye sënjichmó, ntšamo muentše fstsemnama chacméyanama, y tšëngaftanga ainaniñe añemo chašmotsebomnana chaomama.

<sup>23</sup> Atše sěntseimpadana Běngbe Bětsá chě Taitá y Běngbe Utabná Jesucristo, chaboma chě Jesucristbeyeca catšátangbe ainaniñe tšabe ebionana chašmotsebomnama, y Běngbe Bětsábioye y ínĵengbioye puerte chašmotsababuánĵeshanama, Jesucristbeñe tšěngaftangbe ošbuachiyánaca; <sup>24</sup> y chaboma, chě Běngbe Utabná Jesucristbioye běts bonshanánaca imobobonshaněngbeñe tšabe bendicioněnga chaotsemnama, canĵe ndocná yondobena jatrócama bonshanánaca.

## Filipenses

### *Jacheuayama*

<sup>1</sup> Pablo y Timoteo, Jesucristbiamá oservénata, quem ts-buanácha fsěntsabiamná Filipos běts pueblocá Běngbe Bětsabe entsanga imomněnga, y Jesucristoftaca cányiñe mo canyáca imomněngbiamá. Fsěntsabiamná nyetsca chě Jesucristbeñe ošbuáchiyěngbiamá, nyetsca chentša uanatsaněngaftaca y chě inye ošbuáchiyěnga ujabuáchaniñe trabajayěngaftaca. <sup>2</sup> Atše sěntseimpadana Běngbe Bětsá Běngbe Taitá y Běngbe Utabná Jesucristo, chaboma tsěngaftangbeñe tsabe bendicioněnga chaotsemnama, y chaboma tsěngaftanga ainaniñe tsabe ebionana chašmotsebomnama.

### *Pablo Běngbe Bětsábioye tbojtanchuá ošbuáchiyěngbiamá*

<sup>3</sup> Cada tsěngaftangbiamá stenojuabó ora, Běngbe Bětsá tsěngaftangbiamá sěndbětsatschuanaye; <sup>4</sup> y Běngbe Bětsá tsěngaftangbe tsabiamá stseimpadana ora, atše corente oyejuayá chca sěndbětsama, <sup>5</sup> ntšamo tsěngaftanga atše šmojuájabuachama, tsabe noticiěnga Jesucristbiamá entsanga abuayiynayiñe, tsěngaftanga Jesucristbeñe jtsošbuáchiyama šmonjanbojatsě orscana y měntscoñama. <sup>6</sup> Atše corente sěntsetatsěmbo, Běngbe Bětsá tojanbojatsě tsěngaftangbe ainaniñe tsabe soyěnga jtsamama, y más tsabe soyěnga yochtsamama. Y chca yochtsama, lempe ntšamo tsěngaftangbiamá cha yojtsejuabnacá chaochněnguěntscuana, y chca, Cristo Jesús yochjésaběntscuana. <sup>7</sup> Atše tsěngaftangbiamá sempre ainaniñe sěndbětsenojuabnaye, chíyeca atšbiamá puerte tsabá entsemna chca tsěngaftangbiamá jtsejuabnayana. Tsěngaftanga nyetscanga atše šmonjuájabuache jamama chě Běngbe Bětsá tša tsabia bětsemnayeca šonjaněntšabuaché trabajo. Atše chě Běngbe Bětsabe trabajo sěndbomna jamama, mora sěntsětámēna ora o natjěmbana shjoca stsana ora, nyetscángbioye tsabá inyinynayiñe chě tsabe noticiěnga ndegombre soyěnga bětsemnama, y bětská amiñe entsanga chě soyěnguiñe corente chamotsošbuáchema. <sup>8</sup> Běngbe Bětsá yotatsěmbo ntšamo sěntsichamcá ndegombre bětsemnama. Atše tša sěntseboše tsěngaftanga jányama y cbontsababuanyeshana cachcá ntšamo Cristo Jesús atše šondbobonshancá. <sup>9</sup> Atše, Běngbe Bětsá sěntseimpadana tsěngaftanga cada te más cha chašmotsebobonshánama y chě inyěngbioynaca, chca, osertánana chašmotsebomnama ndayá chě ndegombre soye bětsemnama jtsetatsěmbuama, y chašmotsetatsěmbo ndayá tsabá o ndayá ndoñe

tšabá tondmēnama; <sup>10</sup> y chca, chašmotsobena sempre jabocacayama chē puerte tšabá yojtsemna jamama soye. Chca, Cristo yochjésabo ora, tšēngaftanga puerte tšabe vida šmochántsebmna, bacna soyēngaca ndēmandánēnga; y tondaye quešmochátama, chora chē entšanga chca ndoñe tšabá quenátsmēna ca chamuátichamuama. <sup>11</sup> Y lempe ntšamo chašmojtsamcá ndegombre tšabá echántsemna, y nŷe Jesucristo endobena jamama entšanga chca chamotsamama. Nŷetsca chē tšabe soyēnga echántsemna, Bēngbe Bētsá puerte bētsá y uamaná bētsemnama jinŷanŷiyama.

*Atšbe vida endmēna Cristo jtseservénama*

<sup>12</sup> Jesucristbeyeca atšbe catšátanga, atše sēntseboše tšēngaftanga chašmotsetátšēmbo, ntšamo atše tijapasama, más bētscá entšanga Jesucristbiana tšabe noticiēnguifne chamotsošbuáchema tojoservema. <sup>13</sup> Chca, nŷetsca chē romanēngbe mandadbe bēts yebna bojanŷá soldadēnga y chē inŷe entšanga quem luarentše montsetátšēmbo atše utamená stsemna, atše Cristbiana tstrabája causa. <sup>14</sup> Atše utamená sēntsemnayeca, ošbuáchiyēnguentshana banga ainaniñe más añemo montsebmna, y chíyeca chēnga Bēngbe Bētsabe palabra más y más añémoca y tondayama ntjatauajcá entšángbioye montsabuayiyá.

<sup>15</sup> Ndegombre entsemna, báseftanga Cristbiana entšángbioye imojtsabuayiyá, pero chēngna nŷe ntšamo tijashjachcá šmojtsántšabošama chca, y chēnga imojtseboše, bētscá jtsamēse, atše chayotjáyana; chíyeca chca imojtsama. Pero ínŷengna, entšángbioye montsabuayiyá tšabe soyēnga ínŷengbiana jamama ndegombre imojtsebóseyeca. <sup>16</sup> Mēnga chca montsama, atše šmondbobonshánayeca y Bēngbe Bētsá chē trabajo šojanēntšabuáchema mondētatsēmboyeca, Jesucristbiana tšabe noticiēnga ndegombre bētsemnama entšanga jtsinŷanŷnayana; <sup>17</sup> pero chē ínŷengna chca imojtsama, ndoñe tšabe soyēnga ínŷengbiana imojtsebóseyeca, ndoñe chēnga chē ínŷengbiana tšabe soyēnga imojtsebóseyeca. Chēnga Jesucristbiana imojtsoyebuambná nŷe entšanga chēnga chamotsarrespetánama, y nŷe cachēngbiana tšabe soyēnga jtsebmnama imojtsebóseyeca. Chēnga jtsejuabnayana mochjobenaye jamama atše más chašotsengménama ca, muentše utamená chjēftsemnēntscuana, chēnga entšángbioye chca tmojtsabuatatambá ora. <sup>18</sup> Pero ¿ndayase chē soye atšbiana? Masque ntšámnaca, tšabe soyēnga ínŷengbiana tmojtseboše o ndoñe, Cristbiana montsoyebuambná, y Cristbiana chēnga montsoyebuambnama atše oyejuayá sēntsemna.



Y cabá más chanjóyejuaye, <sup>19</sup> er atše sěntsetatšēmbō quem utámenentšana atše chjésebocnama. Atše sěntsetatšēmbō muentšana chjésebocnama, tšēngaftanga Bēngbe Bětsá šmoimpadánayeca y Jesucristbe Uámana Espíritu šuajabuachánayeca. <sup>20</sup> Atše corente jtsošbuáchiyēse Bēngbe Bětsábeñe sēndobátmana, atše ndocna te tondaye chanjěftsema y chama chjaisēuatjama, pero aífne nŷetscangbe delante beca añémoca chayoyebuambá, y nŷets tempo pero más mora, lempe ntšamo stsamama y stsichámuama, atše chaima entšanga chaminŷanŷema Cristo puerte bětsá y uamaná bétsemnama, y chca chántsama masque ainá o obaná chaitsemnēse. <sup>21</sup> Chca entsemna, er atšbe vida Cristo jtseservénama endmēna, y nderado atše chajóbanēse, nŷetscanga puerte běts soye mochanjěftsashjache. <sup>22</sup> Pero atše ainá stsemnēse, chanjobenaye más uámana trabajo Cristbiamā jěftsemama. Chíyeca, atše ndoñe corente quetsátstatšēmbō ntšamo mora jobuáyanana, ainá jtsemnama o ndoñe. <sup>23</sup> Ndegombre mora puerte šontsētēmna nŷamo jobuáyanana: atše tša sēndboše ndoñe más quem luarentše ntjěftsemnana, Crístoftaca jtsatsmēnama, y ndegombre chca atšbiamā puerte tšabá nántsemna; <sup>24</sup> pero, ínŷoicana tšēngaftangbiamā šontsemna ainá jěftsemnana. <sup>25</sup> Atše corente sěntsetatšēmbō chca ndegombre yochtsemnama, y chíyeca sěntsetatšēmbō atše cabá ainá chjěftsemnama, tšēngaftanga jujabuáchama más Jesucristbeñe chašmotsošbuáchema, y chiñe bětscá oyejuayana chašmotsebomnama. <sup>26</sup> Chca, atše tšēngaftanga jutsětsayama choye chajá ora, chašmobená inŷe soyama más Cristo Jesús jětschuayama.

<sup>27</sup> Morna, chē más uámāna soye entsemna, tšēngaftanga chašmotsama ntšamo jtsiyenama ntšamo chē Cristbiamā tšabe noticiēnguiñe endayancá. Y mēntšá, cachcá, jutsětsayama chajá o ndoñe, atše chántsetatšēmbō tšēngaftanga Jesucristbeñe ošbuáchiyama ndoñe šmontsajbanama, y aífne beca ošbuáchiyana chábeñe šmotsobomñama; nŷetscanga cachcá šmojtsejuabnáyeca y nŷetscanga cach soye šmojtsebóseyeca, cánŷiñe nŷetscanga enutanánēnga jtsenojuezánēse, ndocná chē tšabe noticiēnguiñe tšēngaftanga šmobomna ošbuáchiyana chacmondábuajuanama. <sup>28</sup> Tšēngaftangbe uayayēngbiamā tondayama šmattsauatja, sempre bětscá añemo šmochtsebomna. Chca tšēngaftanga šmochanjínŷanŷiye chēnga pochocánēnga mochtsemnama, y tšēngaftangna atsebácanēnga šmochtsemnama. Y chē soye Bēngbe Bětsá tšēngaftangbiamā echántsama, Crístbeñe šmošbuachéyeca. <sup>29</sup> Chca echanjopása, er Bēngbe Bětsá tšēngaftangaftaca puerte tšabia endmēna, Cristbiamā

oservénënga Bëngbe Bëtsá tcmojábiamá, pero ndoñe nÿe chábeñe chašmotsošbuáchema, ndayá chabiamá chašmosufrímnaca. <sup>30</sup> Tšëngaftanga y atše cachca soyama montsenojuerzana. Tšëngaftanga ya šmonjinÿe ntšamo atše sënjánenojuerzana, entsanga jinÿanÿiyama chë tšabe noticiënga ndegombre soyënga bétsemnama. Y mora, tšëngaftanga noticiënga šmochanjóyëngacñe ntšamo atše cach soyama cachcá stsamama.

## 2

*Ndoñe uámanënga šmattsenobiamnaye, ntšamo Cristo ndoñe tonjanmcá*

<sup>1</sup> Tšëngaftanga, Crísoftaca cánÿiñe mo canÿacá jtsemnëse, ainaniñe bëtscá añemo šmontsebonna. Cristo cmondábabuanÿeshana, y chë soye tšëngaftanga cmontsējabuachana nÿetsca trabajënguentsana tšabá jabocanama. Y tšëngaftanga Cristbe Espíroftaca cánÿiñe mo canÿacá šmontsemna; tšëngaftanga nÿetscanga šmondénbobonshana y nÿetscangbiamá jóngmiamá šmonduamana. <sup>2</sup> Tšëngaftanga lempe chca šmobómnayeca, atše corente oyejuayá šmochjábema, er tšëngaftanga nÿetscanga cachcá cánÿiñe šmondëjuabná, cachcá nÿetscanga šmondénbobonshana, nÿetscanga mo canÿe ainancá šmondobomma, y nÿetscanga cachca soye šmondboše. <sup>3</sup> Tondaye šmattsama nÿe ínÿenga chë sóyeca chamotjáyana, o nÿe tšëngaftanga tša bëtš soyënga amënga šmomna ca entsanga chamotsejuabnama; pero ndoñe yapa uámanënga šmojtsemna ca šmochtsejuabnaye, y cada ona chaotsejuabná chë ínÿenga bëngbiamá más uámanënga imomnama. <sup>4</sup> Y ndocná tondaye chaondétsama, nÿe chabiamá tšabe soyënga jónÿenama, sinó ndayánaca chaotsama nÿetscangbiámna tšabe soyënga jónÿenama.

<sup>5</sup> Tšëngaftanga cmontsamna jtsemnana ntšamo cach Cristo Jesús yojanjuabná y yojanamcá:

<sup>6</sup> Cha nÿets tempo yomna cach Bëngbe Bëtsacá y uamaná cach Bëngbe Bëtsacá,

pero masque chca, ndocna te yonjanjuabná:

“Atše sëntseboše nÿetsca entsanga nÿets tempo atše chašmotserrespetana, ntšamo atšbe Taitá Bëngbe Bëtsá mondërrespetancá ca.”

<sup>7</sup> Pero cha mo nduamanacá tonjanóbema, nÿetsca chabe bomna soyënga jëftseboshjonëse,

y ndegombre, mo canÿe oservenacá tojanóbema.

Cha canÿe entsacá tojanonÿná,

y entsanga canÿe ndegombre entsacá tmojáninÿe.

<sup>8</sup> Cachá tojanlesenciá nduamaná jtsemnama,  
y sempre Bëngbe Bëtsábioye ibnayeunana, y jobanámnaca,  
cruciñe jóbanëse.

<sup>9</sup> Ndayá cha tonjanmama, Bëngbe Bëtsá, chë celoca más  
uámana luare tbojaninýinýé

y chë más uámana uabaina, chë más bëtsëtsangbe  
uabainënguentša uabaina tbojabuajo;

<sup>10</sup> y chca, celoca imomnënga, y quem luarentse y  
fshantse jashenoye imomnëgnaca nyëtscanga  
chamóshamentšema,

Jesúsbioye jëtschuayama, chabe uámana uabaina jayanëse;

<sup>11</sup> y chca, nyëtscanga chamuayana Jesucristo chëngbe Utabná  
yomna ca,

chca, Bëngbe Bëtsá chë Taitá nyëtscanga chamotsatschua-  
nama.

*Crístbeñe ošbuáchiyënga entsamna mo buashinýinýana es-  
trellëngcá jtsemnana*

<sup>12</sup> Chcasna, atšbe bonshana catšátanga, ntšamo  
atše tšëngaftangaftaca sënjamna ora, atše sempre  
šmonjanëyeunancá, mora más šmochtsatënëyeunana, mora  
atše tšëngaftangbiamna bënoca stsemna ora. Bëtsëtsanga  
ntjatenobiamnaycá y Bëngbe Bëtsá jtserrespetánëse  
šmochtsama soyënga, chca, tšëngaftangbe tšabe videntše,  
Jesucristbeñe ošbuáchiyënga quetsomñecá, tondaye  
chacmondëtsabuáshebenama; <sup>13</sup> er Bëngbe Bëtsá nyëts tempo  
tšëngaftangbe ainaniñe inétsama tšëngaftanga ndayánaca  
chašmotsebošama y chašmotsamama, ntšamo cha yojuabná  
y yobošcá chaotsemnana.

<sup>14</sup> Ndayánaca jamama chacmojtsëjaboto ora, chë soye  
šmochjama, chca jamama yapa totcá comna ca ntjatichamcá  
y ínýengaftaca jabuachana ntjatenatsëtsnaycá. <sup>15</sup> Chca  
cmontsamna, chca, tšëngaftanga šmojtsama soyënguiñe  
ndocná ndocna bacna soye chaondínýenama, y puerte tšabe  
vida chašmotsebomnana. Bëngbe Bëtsabe puerte tšabe  
basengcá šmochtsiyena, tšëngaftanga chë šmojtsemnënga  
canýe luarentse puerte bacna entšángbeñe y sempre  
bëtscá bacna soyënga jtsamana uamanëngbeñe. Chíyecna,  
tšëngaftanga šmochtsiyena puerte tšabe soyënga jtsamëse, y  
chca tšëngaftanga šmochántsemna mo canýe ibetiñe luarentse  
buashinýinýana estrellëngcá. <sup>16</sup> Chë tšabe soyëngaca  
entšángbioye chauinýanyé ntšamo muanjobenaye tšabe vida  
jtsebomnana. Chca chašmojamëse, Cristo cachiñe yochjésabo  
ora, atše chantsobena tšëngaftangbeyeca puerte oyejuayá  
jtsemnana, er ntšamo chašmojamcá echanjínýanyie  
atše ndoñe nýe bonamente jabuache tijatrabajá. Chca

atše chántsemna mo nda bëtscá tojoprontá, y chentšana ínŷengaftaca tojótjajo ora, chěngbioye tojtsayējanacá. 17 Mo chē altaroca canŷe bachna buiñe tojuabuashanacá, Běngbe Bětsá jětschuayama tmojóba ovesháftaca, cachcá nderado echántsemna atšbe buiñe, atše šmojóbase, chca, Běngbe Bětsábioye oyejuayá jabemama. Tšěngaftanga bětscá šmojalemošná, Crístbeñe tša šmošbuachéyeca, y tšěngaftangbe ošbuachiyánēnaca endmēna Běngbe Bětsábioye oyejuayá jabemama. Chē uta soye echántsemna mo chē buiñe y chē oveshacá, Běngbe Bětsábioye oyejuayá jabemama. Atše chca stjobanēse, puerte oyejuayá stsemna, y stjama tšěngaftángnaca cachcá chašmotsóyejuama. 18 Chca, tšěngaftanga cmontsamna oyejuayēnga jtsemnana, y šmochjama átšnaca oyejuayá tšěngaftangaftaca chaitsemnana.

### *Timoteo y Epafrodito*

19 Atše becá ošbuachiyánaca Běngbe Utabná Jesúsbeñe jtsobátmanēse, sěntsejuabná pronto chjobenaye Timoteo tšěngaftangbioye jíchmuama, tšěngaftangbiama chašuabocuéntama, y chca, atše más añemo chaitsatsbomnama. 20 Er nŷe cha endmēna canŷa cach atšcá ainaniñe juabnayá, y cha ndegombre puerte entseboše tšěngaftanga tšabá chašmuetsiyenama; 21 chē ínŷengna nŷetscanga nŷe cachěngbe tšabiamana ndayánaca jamama jtsejuabnayana, y tondaye ntsebošana Jesucristbiamana jamama. 22 Pero cach tšěngaftanga ya šmondětatsēmbo, ntšamo Timoteo chē padecena soyēnguentsšana tšabá tonjětsobocñama, y ntšamo Timoteo y atše, mo canŷe uaquiñá chabe taitábioye cuaftsajabuachancá, cánŷiñe fsěňjantrabája, más bětscá entšanga chē tšabe noticiēnga chamóyēngacñama. 23 Chcasna, atše sěntsobátmana cha jíchmuana, ntšamo átšeftaca jopásama chaitsetátšēmbo y cachora; 24 pero bětscá ošbuachiyánaca sěntsobatmánayeca, sěntsejuabná, Běngbe Utabná chašojtábocnēse, pronto átšnaca chjobenaye choye jama.

25 Atše sěntsejuabná yojtsemna, Jesucristbeyeca běngbe catšata Epafrodítanaca choye jíchmuana, nda átšeftaca cánŷiñe endētrabája y chē tšabe noticiēnga ndegombre soyēnga bětsemnana jinŷanŷiyama endenojuerzana, nda tšěngaftanga šmojanichmó atše chašuabēuájabuachama. 26 Cha chanjíchmu; cha puerte entseboše tšěngaftanga jányama, y yapa ngmēnaca entsemna, cha šocá enjamnama šmojátatsēmbonama. 27 Y ndegombre cha šocá enjamna, y enjětsinŷna mo jtsobanamcá; pero Běngbe Bětsá tbonjalastemá, y ndoñe nŷe chábioye sinó átšbioynaca, atše ndoñe más ngmenanēnga chayátsbomnama, ntšamo

mora sěntsebomnama. <sup>28</sup> Chíyeca atše más sěntseboše cha pronto jíchmuana, as tšěngaftanga cha chašmojtinje ora, puerte oyejuayęnga chašmotsemnama, y atše ndoňe yapa chašondětsengmenama. <sup>29</sup> Smochjofja njeťs oyejuayánaca, Bęngbe Utabnábeyeca catšátanga quetsomñecá; y njeťs tempo chacá amęngbioye mo bětsětsangcá šmochtsětabna, <sup>30</sup> er batšatema más y matěnjětsobana, Cristbiana trabajajiňe uajabuachaniňe. Cha chě trabajo tonjanma atše juajabuáchama, ntšamo cach tšěngaftanga ndoňe chešmatanobenacá, atše juajabuáchama.

### 3

#### *Ndayá Pablėbiana ndegombre corente yojanámana*

<sup>1</sup> Y morna, atšbe catšátanga, ndayá Bęngbe Utabná tojamama móyejuanga. Ndoňe bacá quešnatámana, ntšamo chě inje tsbuanáchaňe tcbonjaněbuabiamcá cachcá cachiňe jtětėyanama; y chě soye bětscá cmochanjújabuache ndoňe resjuiňe chašmondětsemnama. <sup>2</sup> Cuedado šmochtsebomna chě ndoňe tšabe entšangbiana, mo quešęngcá imomnęnga, chě puerte bacna soyęnga mondbětsamęnga, y entšangbe más delicadentše base bobachtema jatětsana uamanęnga; <sup>3</sup> er bęnga mondmėna y ndoňe ínjeňga, chě ndegombre uinynánana bomnęnga, bęnga Bęngbe Bětsabe entšanguentsęnga bětsemnama, bęnga chě Uámana Espíritbe uajabuáchenanaca Bęngbe Bětsá mondadoránama, bęnga chě Cristo Jesúseftaca canjyiňe mo canjácá bětsemnama mondbětsoyejuama, y bęnga chě ntšamo ínjeňga monduamancá bęngbe cuerpiňe jamama tondayama yondoservėnama mondbětsejuabnayama.

<sup>4</sup> Masque atše razón sěndětsóbomňe, ndayá atšbe cuerpiňe tmojamcá ndegombre iuámanama jtsejuabnayama; nderado nda tojtsejuabná razón yojtsebomna chě soyęnga yoservenaca jtsejuabnayama, ndegombre atše chabiana más razón chama stsóbomňe. <sup>5</sup> Sėnjanonjńá y posufta tianoye base bobachtema chě más delicadentše šmojtantětše; atšbe njeťs uta bětsětsata Israeloca entšanguentsata bonjamna, y atšna Benjaminbe běts pamillentšá sěndmėna; atšbe temp-sca běts taitanga njeťscanga hebreungna imnamna. Atšna fariseo sėnjamna. Atše sėnjánama, lempe ntšamo judięngbe leyęnguiňe endayancá, ndayá jamama šojanmėncá. <sup>6</sup> Atše tša sėnjánboše Bęngbe Bětsá jtseservėnama, chíyeca Jesúsbeňe ošbuáchiyęnga bětscá sėnjanėcamena; y ndayá canje entšá ibnětsemna jtsamama, Bęngbe Bětsabe bominjyiňe tšabia jtsemnama, judięngbe ley jtsocumplinėse, chama ndocná tondaye quenjátsbomna jayanama, atše ndoňe tšabá sěntsánama ca.

7 Pero lempe chca ntšamo atše sënjamnama y ndayá sënjánamama, puerte sënjanjuabná atšbiamama puerte yojanámana ca; pero mora, Cristo atšbe ainaniñe tonjámeshëngoyeca, chë soyënga atšbiamama ya ndoñe quenatámana. <sup>8</sup> Y cabá más, tondaye atšbiamama quenatámana, chë bëts soye jtsonyayëse, Cristo Jesús, Bëngbe Utabná jtsabuatmana. Chábeyeca, lempe chë nye quem luarentša soyënga sënjëseboshjona, y lempe chë soyënga atšbiamama tondayama quenátoservena; y chca entsemna, chë bëts soye jëftsashjáchama, Cristo jtsabuatmama, <sup>9</sup> y cháftaca cányiñe mo canyáca jtsemnama. Atše ya ndoñe quetsatsnguá Bëngbe Bëtsabe bominiñe tšabia jtsemnama, nye ntšamo atše tijamama chë judiëngbe ley jtsocumplínëse, pero Crístbeñe jtsošbuáchiyëse aíñe; Bëngbe Bëtsá entsama atše chabe bominiñe tšabia chaitsemnama, atšbe bacna soyëngama jtseperdónase, y lempe chca entsemna atše Crístbeñe sëndošbuachéyeca. <sup>10</sup> Atše séntseboše ndayá cha jtsabuatmana, chë obanënguentšana tojtanayenama cha tojaninyanjé obenana atše chaitsebomnama, atše cháftaca cányiñe mo canyáca chaitsemna ora; y ntšamo bënga játsebacama ora cach Cristo tojansufricá, átšnaca cachcá chaisufrima. Y cha tojanóbana orcá atše chaitsemnama; <sup>11</sup> y ntšámnaca, atše jëftsashjáchama Bëngbe Bëtsá chaoma atše chaitayenama.

*Yejuana jtsentsénëse, Bëngbe Bëtsábiocana uacanánana josháchiñama*

<sup>12</sup> Pero atše ndoñe quetsátichamo lempe chca ya tijashjache ca, o atše ndocna bacna soye ndamá y puerte tšabia Bëngbe Bëtsabe bominiñe stsemna ca, pero sempre natsanoye séntsa, mo nda canye luaroye jashjanguama cuaftsëchamancá; y puerte jtsošbuáchiyëse séntsobátmana atše chjobenaye jtsemnama, chë ndayama Cristo šojanchembo, er Cristo Jesús ya tonjama atše chabiamama chaitsemnama. <sup>13</sup> Atšbe catšátanga, atše ndoñe quetsátichamo chca ya tijashjache ca. Pero chama canye soye séntsama: chë tempo atše sënjánbomna y sënjánama soyënga, mora lempe stëtsoye sënjaquedá, y bëtscá séntsama jobenayama chë jashjanguama yojtsemnoye jashjanguama, <sup>14</sup> chë ndémoca yojtsemna jashjanguama luaroye jobenayama jashjanguama, mo nda canye luaroye jashjanguama ndayánaca juácánama bëtscá jenujuérase cuaftsëchamancá. Cachcá, átšnaca séntsa chë Bëngbe Bëtsá šojtsachembuana uacanánana josháchiñama, Cristo Jesúsbeyeca; y chë uacanánana entsemna chë nyetsca tescama yomna tšabe vida jtsebomnana.

<sup>15</sup> Chca bēnga šontsamna jtsejuabnayana, chē Jesucristbeñe puerte ošbuáchiyana y nyets tempo cha ústonēnga; y nderado tšēngaftanga ndayífnaca inyetšá šmojatsjuabná ora, Bēngbe Bētsá chē sóynaca tšabá cmochanjínyanñiye. <sup>16</sup> Pero morna šontsamna jtseyenana ntšamo méntscoñama Bēngbe Bētsabe soyēngama šojosertacá.

<sup>17</sup> Jesucristbeyeca catšátanga, ntšamo atše sēndmēncá tšēngaftanga šmochtsemna, y chē ntšamo jtseyenama tcbonjaninñanñecá imojtseyenēngbioye šmochtsēñyaye. <sup>18</sup> Ntšamo cbochanjauyancá, ya ba soye tcbonjáuyana y mora cachiñe chca chanjayana, pero chca jayanamna atše puerte ngménaca sēndbétsemna. Banga mondmēna, y chēnga ntšamo vida imojtsebomnama montsinñinñá, lempe ntšamo Cristo chē cruciñe jóbanēse bēngbiana iuayancá contra chēnga imojtsemnama, <sup>19</sup> y chēngbioye nyetsca tescama infiernoca mochántsapochocaye. Chēngbiana chē más uámana soye yojtsemna jtamana ntšamo cachēnga tmojtsebošcá, nye cachēngbe cuerpiñe tšabá jtsonñama. Chēnga nña mo bēts soye cuafjamcá jtsemnana chē soyēnga tmojtsama ora, pero ndegombre chēnga entsamna cach soyēngama jtsēuatjama; y chēnga sempre jésejuabnayana chē nye quem luarama enójuabnayēngbe soyēngama. <sup>20</sup> Chē cuenta bēngna, ndegombre celocama entšanga mondmēna, y mora montsobátmana, chē luarocana chauabo bēngbe atsebacayá, Bēngbe Utabná Jesucristo. <sup>21</sup> Cha bēngbe cuerpēnga, chē pronto jopochócama cuerpēnga echanjátrocaye, jtsemnama mo chabe cuerpcá, chē obanēnguentšana tojtayenabe cuerpcá; y cha chca echanjama, cha puerte obenana lempe jtsemándayama bómnyeyeca.

## 4

*Bēngbe Utabnáftaca cánñiñe mo canñacá jtsemnēse oyejuayana jtsebomnana*

<sup>1</sup> Chcasna, Jesucristbeyeca atšbe catšátanga, Bēngbe Utabnábeñe ošbuáchiyana ntjajbanacá, y puerte chábeñe jtsošbuáchiyēse, cháftaca cánñiñe mo canñacá šmochtsemna. Corente cbondábabuanñeshana y tša sēntseboše tšēngaftanga jáñyama. Tšēngaftangbeyeca atše puerte oyejuayá sēntsemna, y atše corente sēndbétsoyejuaye tšēngaftangbiana inñyēngbioye jáuyanama.

<sup>2</sup> Evodia sēntseimpadana y Síntiquenaca, chata chabuatenóyeunama, mo Bēngbe Utabnábeñe ošbuachiyata quetsomñecá. <sup>3</sup> Y ácnaca, nda puerte tšabá átšeftaca tconjatrabajá, cbontseimpadana chama chē shembásata chacújabuachama, er chata bētscá átšeftaca tbonjatrabajá tšabe noticiēnga

entsanga abuyayinayiñe. Clemente y inye entsanga átseftaca tmonjatrabajá cach soye amiñe. Nyetsca chëngbe uabaina entsábemana chë librëñañe, ndayentse yojsábemana chë tšabe vida mochjónyëngbe entsangbe uabaina.

<sup>4</sup> Sempre oyejuayënga šmochtsemna, Bëngbe Utabnáftaca cányiñe mo canyáca jtsemnëse, y cachiñe šcutëtayana: ¡Móyejuanga! <sup>5</sup> Nyetscanga chamotsetátšëmbo, tšëngaftanga tšabe juabna bomnënga šmomnana. Bëngbe Utabná jésabama tempo ya entsobeco.

<sup>6</sup> Tondayama šmattsenócochinýena, pero cada Bëngbe Bëtsáftaca chašmojsencuënta ora, ndayá cmojséjabortama cha šmochjaimpáda. Y chca chašmojsama ora, chánaca šochtsatschuanaye. <sup>7</sup> Chca, Bëngbe Bëtsá echanjama chë chabe ainaniñe tšabe ebionana tšëngaftanga chašmotsebomnana; chë tšabe ebionana puerta bëtscá endmëna, y bënga entsanga quetsomñecá ndoñe ntsobenana chama jósertana; y chca tšabe ebionánaca, tšëngaftangbe juabnënguiñe y ainaniñe tondayama quešmochátenocochinýena, er tšëngaftanga cányiñe mo canyáca Cristo Jesúsftaca šmondmëna.

*Lempe ntšamo tšabá yomncá soyëngama jtsejuabnayana*

<sup>8</sup> Cabana, atšbe catšátanga, lempe ntšamo ndegombre yomncá soyënguiñe šmochtsejuabnaye, lempe chë respeto yomerecéniñe, nyetsca soyënguiñe entsangbe bominyiñe tšabá yomniñe, nyets tempo corente tšabá yomniñe, nyetsca soyënga entsanga yogusetániñe, y lempe chë ndayama entsanga tmojtsejuabná tša iuámana ca soyënguiñe. Lempe chë tšabá yomna soyënguiñe y jtsatschuanayama yomna soyënguiñe šmochtsejuabnaye.

<sup>9</sup> Sempre šmochtsama chë átšbentšana šmojuábouinýe soyënga, chë atšbiajana šmojóyëngacñe soyënga, chë atše šmojoyeuná soyënga y ntšamo šmojinýcá atše jtsamana. Chca šmochtsama y Bëngbe Bëtsá, chë bënga ainaniñe tšabe ebionana chamotsebomnana amá, tšëngaftangftaca echántsemna.

*Pablo tojtanacheuá tmojanájabuachama*

<sup>10</sup> Atše corente sëndoyejuá Bëngbe Utabnáftaca cányiñe mo canyáca tsmënama, er tšëngaftanga ba ishinýe chentšana, cachiñe šmojatobená atše jatinýinýiyana ntsachetšá atšbe tšabiana tšëngaftangbiana iuámanana. Chca, atše ndoñe quetsátichamo tšëngaftanga atšbiana cmojsanebnëtjomba ca, ndayá ntšamo tšëngaftanga tšabá šmojuabnacá atše jinýinýiyama ndoñe yonjanopodena ca. <sup>11</sup> Atše chca, ndoñe quetsátichamo uajabotá stsemna ca, er atše sënjuatsjinýe sempre oyejuayá jëftsemnana, nýe ndaye soyiñe masque



batšatémnaca stsebomněse. <sup>12</sup> Atše sěndětatsěmbo ntšamo yomna jtsiyenana chě vida jtsebomnama uajaboto soyěnga tojtsashbeněse, y ntšamo yomna jtsiyenana chě tcuajabótama más bětscá jtsebomněse. Atše tijuatsjině oyejuayá jtsemnana masque něe ndaye soyěnguiñnaca stsemna ora, jasama bětscá stsebomna ora o masque něe shěntseca jtsemnana šojtsemna ora, atše jtsiyenama bětscá soyěnga stsebomněse o masque ndóñnaca. <sup>13</sup> Atše lempe chca sěndobena, atše obenana jtsebomnama Cristo endbétсамayeca. <sup>14</sup> Masque chcasna, tšěngaftanga tšabá šmonjama, atše padecena soyěnguiñe sěnjamna ora atše juajabuáchana.

<sup>15</sup> Tšěngaftanga, chě Filipos puebloca Jesucristbeñe ošbuáchiyěnga, corente šmondětatsěmbo, Macedonia luarentšana sěnjěftsanbocna ora, něe tšěngaftanga atše šmonjanájabuachama; iněe ošbuáchiyěnga ndoñe. Chora enjamna atšbe bojatsena tempo tšěngaftangbe luarentše chě tšabe noticiěnga entšanga abuayiynayiñe; y něe tšěngaftanga atše šmonjanájabuache. <sup>16</sup> Ba soye atše Tesalónica puebloca sěnjamna ora, y chašmuájabuachama šonjanájaboto ora, tšěngaftanga atšbe opresiděngama crocénana šmonjanafja. <sup>17</sup> Chca ndoñe quenátayana atše tsjuabná něe tšěngaftangbentšana ndayánaca jójěngacñama ca; chě sóyeca atše sěntseboše ndayá tšěngaftanga más tšabe soyěnga chašmotsamama, Běngbe Bětsá tšěngaftangbiama más chaotsóyejuama. <sup>18</sup> Er atše ya lempe sěnjójěngacñe, y chě šuajabótama cabá más sěntsebomna. Atše chě ntšamo šjuajabotcá lempe sěntsebomna, chě tšěngaftanga Epafrodítóftaca šmonjanichmó soyěngaca. Ndayá atše šmojanichmocá, Běngbe Bětsabe bominiñe puerte tšabá entsemna, mo juatšěmbonama ndayá tcojóba y altaroca tcojajuiněe y botamana tojtsonguětsecá, chora cha oyejuayá chca jójěngacñana. <sup>19</sup> Atšbe Bětsá, chabe bětscá uámana y běts bomnánaca, echanjama tšěngaftanga lempe ntšamo cmějabotcá Cristo Jesusbiajana chašmójěngacñama. <sup>20</sup> Entšanga něets tempo chamotsinñanýná Běngbe Bětsá y Běngbe Taitá puerte uamaná bětsemnama. Chca chaotsemna.

### *Chěnga jtadiósoftanama*

<sup>21</sup> Atšbe cuenta, něetscanga chě Jesucristbeyeca Běngbe Bětsábenga imomněnga šmochjácheuaye. Atšeftaca montsemna Jesucristbeyeca catšátangnaca cmontsacheuaná. <sup>22</sup> Něetscanga chě muentše Běngbe Bětsábenga imomněnga, y más chě romaněngbe mandadbe běts yebnocá oyeněnga, cmontsacheuaná.

<sup>23</sup> Atše sěntseimpadana Běngbe Utabná Jesucristo, chaoma tšěngaftangbeñe tšabe bendicioněnga chaotsemnama.

## Colosenses

### *Jacheuayama*

<sup>1</sup> Atše Pablo, Jesucristbe ichmoná Bëngbe Bëtsá chca yobóseyeca, y Jesucristbeyeca bëngbe catšata Timotéoftaca, <sup>2</sup> quem tsbuanácha sentsabiamná chë Colosas pueblaca Bëngbe Bëtsábenga imomnëngbiama. Tšëngaftanga bëngcá Jesucristbeñe ošbuáchiyënga šmondmëna, y chca, Jesucristbeyeca bëngbe catšátanga. Atše sëntseimpadana Bëngbe Bëtsá Bëngbe Taitá, chaoma tšabe bendicionënga tšëngaftangbeñe chaotsemnama, y chaoma tšëngaftangbe ainaniñe tšabe ebionana chašmotsebonnama.

*Pablo, Bëngbe Bëtsábioye tbojanimpadá Colosas pueblaca ošbuáchiyëngbiama*

<sup>3</sup> Bëngbe Bëtsá, Bëngbe Utabná Jesucristbe Taitá tšëngaftangbiama fstseimpadana ora, cha sempre fchandbétsatschuanaye, <sup>4</sup> er bënga fsënjátatsëmbona ntšamo tšëngaftanga Cristo Jesúsbeñe tša šmojtsošbuáchema, y ntšamo tšëngaftanga nyetscanga chë Bëngbe Bëtsábenga imomnënga šmababuánÿeshanama. <sup>5</sup> Natsanama, chë ndegombre buayenánama, chë tšabe noticiënga, tšëngaftanga tcmojanabuatambá ora, tšëngaftanga botamana šmojanuena ntšamo chë buayenániñe bejtsayancá, chë tšëngaftanga šmojtsobena tšabe soyama jobátmana, Bëngbe Bëtsábeñe jtsošbuáchiyëse. Chë šmontsobatmana soye entsama tšëngaftanga Jesucristbeñe puerte chašmotsošbuáchema y nyetscanga chašmotsababuánÿeshanama. Bëngbe Bëtsá celoca enduaquëcñá chë tšëngaftanga šmojtsobatmana tšabe soye. <sup>6</sup> Chë tšëngaftanga tcmojanabuayená tšabe noticiënga más bëtscá entšanga montsuenana; y chca, nyets quem luarentše entšanga montsiyena más tšabe soyënga jtsamëse. Chca entsemna ntšamo tšëngaftangbentše tojopasacá, chë natsana te chë tšëngaftanga Bëngbe Bëtsabe tšabiánama šmojanuena orscana, y ntšamo Bëngbe Bëtsá puerte bonshanánaca y tšabiánaca bëngbioye šuanÿenama ndegombre cmojanosérta orscana. <sup>7</sup> Y chca Epafras tšëngaftanga tcmojanabuatambá, Bëngbe Bëtsabe bonshánama y tšabiánama. Epafras endmëna canÿa bëngaftaca Cristbiama oservená, y cha bënga fsëndbobonshana; cha Cristbiama endëtrabája bëngbe cuenta tšëngaftangbentše. <sup>8</sup> Cha šonjáuyana ntšamo chë Uámana Espíritu yojtsama, nyetscanga Jesucristbeñe ošbuáchiyëngbioye chašmotsababuánÿeshanama.

<sup>9</sup> Lempe ntšamo tšëngaftangaftaca tojopasama, chë natsana te tšëngaftangbiana fsënjanuena orscana y mëntscoñama, Bëngbe Bëtsá sempre tšëngaftangbiana fchandbétseimpadana, cháftaca fstsencuénta ora. Bëngbe Bëtsá fsëndëimpadana, chabe Espíritu chaoma tšëngaftanga chašmotsobena jtsetatšëmbuana y jtsoertánana, chca, ntšamo Bëngbe Bëtsá yobošcá chašmotsamama, tšëngaftanga tšabá chašmotsetatšëmbuama. <sup>10</sup> Y chca, tšëngaftanga šmochantsobena jtsiyenana jtsamëse ntšamo Bëngbe Utabná yobošcá, y sempre šmochántsama ntšamo chabiana tšabá yomncá. Ntšamo tšëngaftanga chašmojtšiyencá tšabe soyënga jtsamëse, chentšana nyetsca tšabe soyënga echanjóbcna, y tšëngaftanga más tšabá Bëngbe Bëtsá šmochantsábuatma. <sup>11</sup> Atše, Bëngbe Bëtsá sëntseimpadana, chabe puerte bëtscá obenánaca cha chaoma tšëngaftangbe ainaniñe bëtš añemo chašmotsebomnama; y chca, tšëngaftanga chë padecena soyënguiñe chašmojtsemna ora, puerte uantadënga chašmotsemnama, y ainaniñe añémoca Bëngbe Bëtsábeñe becá chašmotsobátmanama. <sup>12</sup> Y puerte oyejuayënga Bëngbe Taitá šmochántsatschuanaye, nda iuama bënga chamotsobena ntšamo cha chabe entšanga jatšatayama tojašebuachenacá jtsebomnama. Tšëngaftanga šmochanjóyëngañe ntšamo cmojtšëtocancá celoca, chë corente buashinýinýana luarentše. <sup>13</sup> Bëngbe Bëtsá bënga šojatsebacá, Satanás, chë ibetiñe luarentša mandayabe cucuatšentšana, y tojama chë chabe bonshana Uaquiñabe amëndayana bëngbe ainaniñe chamotsebomnama; <sup>14</sup> chábeyeca Bëngbe Bëtsá Satanasbe cucuatšentšana šojatsebacá; o mëntšá, chábeyeca Bëngbe Bëtsá bëngbe bacna soyënga šojtsaperdoná.

*Cristo tojanóbanayeca, entšanga Bëngbe Bëtsáftaca tšabá jt-satsmëñana*

<sup>15</sup> Cristo tmonjáninýe ora, bënga tmojántatšëmbona ntšamo Bëngbe Bëtsá yomnana; entšanga imojobena cha jinýama, pero Bëngbe Bëtsábioye ndoñe. Cha, chë Bëngbe Bëtsabe Uaquiñá, ya natsana yojtsemna lempe chë Bëngbe Bëtsá tojanma soyëngama; y cha lempe chë soyëngama más uamaná endmëna. <sup>16</sup> Chábeyeca Bëngbe Bëtsá tojama lempe ntšamo celoca y quem luarentše yobinýncá, lempe ntšamo chë entšanga imobena o ndoñe mondobena jinýama soyënga, y chë espíritëgnaca chë imobena ínýengbioye jtsamëndayana y obenana imobomna. Bëngbe Bëtsá, chábeyeca y chabiana tojama, lempe ntšamo quem luarentše yobinýncá. <sup>17</sup> Bëngbe Bëtsá cabá nyetsca soyënga ndama ora, Cristo ya yojtsemna; y chábeyeca mora yomna, lempe ntšamo quem luarentše chaotsemnama yojamncá. <sup>18</sup> Cha endmëna nda nyetscanga

Bëngbe Utabnábeñe ošbuáchiyënga iuamënda, ntšamo chë bestšaše nyetsca chë cuerpentša soyënga jtsemandayancá. Cha endmëna nda iuama ošbuáchiyënga tsëm tsabe vida chamotsebomnama, y cha endmëna chë Bëngbe Bëtsabe más bëts Uaquiñá. Bëngbe Bëtsá tojanma, chë cachiñe ainënga mochatsmënënguentsana, cha chë natsaná chaotsemnama; nye cha canya chë más uámana luare chaotsebomnama, nyetscañe chaotsemándayama. <sup>19</sup> Er Bëngbe Bëtsá yojanjuabná cachabiana tsabá yojamna, lempe ntšamo cha yomncá, chabe Uaquiñábeñnaca chaotsemnama, <sup>20</sup> y Bëngbe Bëtsá tojánbošena, Crístbeyeca nyetsca soyënga quem luarentše y celoca, cháftaca tempcá tsabá chaotsatsmënama. Bëngbe Bëtsá chë soye tojanma, chabe Uaquiñá cruciñe tojanóbana ora y chabe buiñe tojanábuashana ora; y chca, Bëngbe Bëtsá tojanma nyetsca soyënga quem luarentše y celoca, cháftaca tempcá tsabá chaotsatsmënama.

<sup>21</sup> Tempo, tsëngaftanga Bëngbe Bëtsá stëtsoye šmojanquedá y chábioye uayayënga šmojamna, bacna soyënga šmojanjuabná y šmojánama causa; <sup>22</sup> pero mora chabe Uaquiñáftaca, cha mo canye entšacá jóbanëse, Bëngbe Bëtsá tojama tsëngaftanga tempcá tsabá cháftaca chašmotsatsmënama; y chca tojama, tsëngaftanga chabe delante nyets tempo chašmotsemnama; chora tsëngaftanga, chabe entšanga, ainaniñe ndocna bacna soye ndbomnënga chašmotsemnama, y ndocná chaodayana ntšamo šmojamcá ndoñe tsabá yontsemna ca. <sup>23</sup> Pero tsëngaftanga cmontsamna chë bëts cá ošbuáchiyana šmondbomnana nyets tempo jtsebomnana, Bëngbe Utabnábeñe jtsošbuáchiyama ndocna te ntjajbanacá. Nyets tempo chë tsabe noticiënguñe šmochtsošbuáchiye, y ndoñe šmatjaleséncia ndocná tsëngaftangbe ošbuáchiyana chaotrocama; y nye chca puerte jtsošbuáchiyëse Bëngbe Bëtsábeñe šmochtsobátmana, ntšamo tsëngaftanga šmojanmcá, Jesucristbiana buayenánama šmojanuena ora. Chë buayenánana endmëna ntšamo ba entšanga nyetsca quem luarentša entšángbioye tmojabuayenacá, y atšbe trabajo endmëna cach tsabe noticiëngama entšanga jtsabuayiynayana.

*Pablo, ošbuáchiyënga jasérviana trabajo tmojanbonjë*

<sup>24</sup> Atše corente sënjesoyejúa mora tsëngaftangbiana jasúfriama stsobenama. Ba entšanga entsamna jasúfriana Cristo jasérviana, y atše sëntsesufrina ntšamo Cristo tojansufricá, mora atše jtsesufrinëse chabe cuenta, ntšamo jasúfriama yomncá. Y ntšamo sëntsesufrincá entsemna Crístbeñe ošbuáchiyëngbe tsabiana, chë chabe cuerpcá imomnënga, chënga Crístbenga bëtsemnama. <sup>25</sup> Bëngbe Bëtsá atše šojábema

chë Jesucristbeñe ošbuáchiyëngbe canye ujabuachaná. Cachá chë trabajuama šojanábuayana, chca jamëse, tšëngaftangbe tšabiama chaotsemnama. Chë trabajo endmëna, lempe ntšamo cha tojayancá entšanga jábuayenana. <sup>26</sup> Bëngbe Bëtsá nyetsca entšanga ndoñe tonjanalesenciá, quem luare jobojátšama orscana y nyets tempo chë buayenánama chamotsetatšëmbuama; pero mora, chábenga imomnënga chë soye cha tojinýanyé. <sup>27</sup> Bëngbe Bëtsá yoboše, chabe entšanga imomnënga chamotsábuatmama ndayá tempo chënga ndoñe tonjaninýanyecá; y yoboše chë ndoñe judiënga jinýanyiyama tša bëts y tšabe soye yomna chë ndegombre buayenánana, ndayá tempo ínýenga ndoñe tonjaninýanyecá. Chë tempo ndoñe yonjanótatšëmbo buayenánana entsemna, Cristo tšëngaftangbe ainaniñe yojsiyena, y chábeñe puerte jtsošbuáchiyëse šmojtobena jtsobátmanana, Bëngbe Bëtsá puerte bëtsëtsanga y uámanënga chácmbiamama, batsá ntšamo cachá yomncá. <sup>28</sup> Bënga nyetscángbioye Jesucristbiamama fchandbëtsabuayiynaye; fchandbëtsëtsësnaye ndayá chënga ndoñe yontsamna jtsamana, y fsëndbëtsabuatambaye nyets osertánanaca ndayá chënga aíñe yojsamna jtsamana, y chca, nyetscángbioye Bëngbe Bëtsabe delante junatsama, puerte ošbuáchiyënga y osertánënga Bëngbe Bëtsabe soyënguiñe, chënga Crístoftaca cánýiñe mo canýacá jtsemnëse. <sup>29</sup> Chca chaotsemnama, atše bëtscá sëndëtrabája; y chca sentsama, chë Cristo yojsama atše chaitsebomnama bëts obenánaca.

## 2

<sup>1</sup> Atše sëntseboše tšëngaftanga chašmotsetátšëmbo, Bëngbe Bëtsá becá tsimpadánama, tšëngaftangbioye jujabuáchama, chë Laodicea puebloquënga Jesucristbeñe ošbuáchiyënga y nyetscanga chë ndocna te atše šmonjinýe ošbuachiyëngnaca. <sup>2</sup> Atše chca sëndama, tšëngaftanga y chënga ainaniñe bëts añemo chašmotsebomnama, y cánýiñe mo canýacá chašmotsemanama, nyetscanga jtsenbobonshánëse. Chca, nyets osertánana tšëngaftanga chašmotsebomnama, y chë tempo Bëngbe Bëtsá entšanga ndoñe tonjaninýanyé buayenánama chašmotsetatšëmbuama, y chë buayenánana Cristbe soye entsemna. <sup>3</sup> Mo canye bëtscá bomnana iytëmena soycá pero mora ya uínýenana, cachcá Crístbeñe entsemna nyets osertánana y obenana Bëngbe Bëtsá jtsabuatomama. Chë soye tempo Bëngbe Bëtsá entšanga ndoñe tonjaninýanyé, pero mora Cristo yojsama bënga chë uámana soyënga chamotsebomnama. <sup>4</sup> Atše chca sentsichamo, botamana palabrëngaca ndocná chacmondáingñema. <sup>5</sup> Er masque choca tšëngaftangtaftaca atše ndoñe quetsátsmëna, atšbe

ainana aíñe choca tšëngaftangafata entsemna; y atše puerte sëntsoyejuá tšëngaftanga šmatenëyeunanama y nyets tempo Bëngbe Bëtsábeñe šmojtsošbuáchema.

*Cristoftaca cányiñe mo canyáca jtsemnëse, entsanga ndegombre tšabe vida jtsebomnana*

<sup>6</sup> Tšëngaftanga Jesucristbeñe ošbuáchiyënga šmojanóbiamana ora, šmojanayana: “Cristo Jesús, Bëngbe Utabná entsemnana ca”. Chcasna, tšëngaftanga cmontsamna jtsiyenana soyënga jtsamëse mo chë cháftaca cányiñe mo canyáca tojtsemnacá.

<sup>7</sup> Chca šmontsobena jamana, cháftaca cányiñe mo canyáca nyets tempo jtsemnëse. Smochtsiyena jtsamëse ntšamo cha tojabuatëmbacá y cada te más chca. Cabá más smochtsošbuáchiye chë Cristbiamana buayenana soyëngama, ntšamo tcmojabuatambacá; y Bëngbe Bëtsá sempre smochtsatschuanaye.

<sup>8</sup> Cuedado smochtsebomna, ndoñe šmatjaleséncia ndocná chaondëtsamama tšëngaftanga jtsajbanama Cristbeñe ošbuáchiyana jtsebomnana. Chca entsanga montseboše juabnëngaca tšëngaftanga jáingñama, nye básefta entsangbe juabnënga y tondayama ndoservenana juabnënga. Chë juabnënga jtsóbocanana ntšamo bëts taitanga básengbiöye mondbetsabuátambayentšana y chë espíritëngbentšana, ndëmuanyëngbiamana entsanga jtsejuabnayana chënga nyetsca soyënguiñe imománda ca; pero Cristbentšana chë juabnënga ndoñe ntsóbocanana.

<sup>9</sup> Cristo endmëna cachcá ntšamo Bëngbe Bëtsá yomncá, masque mo canyë entsacá quem luarentše yojëftsiyena;

<sup>10</sup> y Bëngbe Bëtsá tojama tšëngaftanga ndegombre tšabe vida chašmotsebomnana, Cristoftaca cányiñe mo canyáca bëtsemnayeca; y Cristo, nyetsca chë mándayënga y obenana bomnëngbiamana más uamaná endmëna.

<sup>11</sup> Tšëngaftanga Cristoftaca cányiñe mo canyáca bëtsemnayeca, mo uinynananëngcá smontsemna, tšëngaftanga Bëngbe Bëtsabe entsanga šmomnana. Quem uinynananana ndoñe quenátsmëna mo chë más delicadentše base bobachtema tmojatëtscá, cach entsangbeyeca ntšamo judiënga monduamancá, pero aíñe entsemnana cach Cristo nda tcmojauinynaná;

y chë uinynananana entsemnana, tšëngaftangbe ainanentšana Cristo bacna juabnënga jabuajuánayana. <sup>12</sup> Tšëngaftanga šmojánenabayana ora, enjamna mo ntšamo cach Cristo tmojanatbontsacá tšëngaftanga utebuantsánënga cuaftsemncá, er tšëngaftanga šmojanajbaná jtsamana chë tempo šmojánama bacna soyënga; y ntšamo Cristo cháuatayenama Bëngbe Bëtsá tojamcá, cachcá, tšëngaftanga šmojánenabayana ora, enjamna

mo tšëngaftanga chašmatayenama Bëngbe Bëtsá cuafjamcá, er mora tšëngaftanga mo tsmëma entsangcá šmondoyena. Chca tojanopasá, Bëngbe Bëtsá obená bétsemnama tšëngaftanga šmojtsošbuáchema, y chë obenana tojama Cristo cháuatayenama.

<sup>13</sup> Inye tempo tšëngaftanga Bëngbe Bëtsabiamma mo obanëngcá šmojamna, yapa bacna soyënga jtsamama šmojanamana causa y uinýnanánënga mo Bëngbe Bëtsabe entsangcá ndoñe šmonjámnayeca, pero aiñe šmojanamana bacna soyënga jtsamana nýe ntšamo šmojanbošcá. Morna Bëngbe Bëtsá tojama tšëngaftanga tšabe vida chašmotsebmnama, Crístoffaca cánýiñe mo canýacá jtsemnëse, y Bëngbe Bëtsá bëngbe nýetsca bacna soyënga šojtsaperdoná. <sup>14</sup> Mo nda ba ndebénënga tojtsabamna y chama tsbuanachangá tojtsamna y chiñe tojtsayana chënga obligaciónaca imojtsemna chë ndebénana pronto jtobocana ca, pero chë entšá chëchangá tojtsandbiama chë entsanga cha ndoñe más chamondëtsendebénama, Bëngbe Bëtsá cachcá tojama, bacna soyëngama bënga šojtsaperdoná ora. Jesús bëngbe bacna soyëngama cruciñe tojanóbana ora, enjamna mo Bëngbe Bëtsá bëngbe ndebénana tojtsanpochocá cuenta. <sup>15</sup> Jesucristo cruciñe tojanóbanayeca, Bëngbe Bëtsá tojanayëñjaná Satanás y chabe bacna espíritënga obenana bomnënga y ínýengbioye amëndayënga; y nýetsca entsangbe delante tojaninýanyé cha chënga jtsamëndayama yobenama, mo canýe reycá chë ínýenga tojayëñjaná ora, chabe entšángaftaca natsana jtsayana y chë ayëñjanánëngna ústonoye.

*Ainaniñe becá jtsebošana chë ošbuáchiyëngbiama celoca yomna soyënga*

<sup>16</sup> Ndoñe caso šmattsabiamnaye, ndoñe tšabá šmontsamma ca ínýenga tšëngaftangbiama tmojtsichamo ora, ndayá tšëngaftanga šmétseye o šmétsofsëšnayama, o ndayá aiñe o ndoñe šmondbétsamama Bëngbe Bëtsá jadórama fiestënga ora o shbojueta fiesta ora, o jóchnama tese. <sup>17</sup> Bayté entsemna, Bëngbe Bëtsá entsangbe cucuatsiñe chë mandënga tojánboshjona, chë soyëngama bënga jabuátambama. Chë mandëngaca Bëngbe Bëtsá yojaninýanýnaye ndayá más chcoye jopásama; entšángbioye yojaninýanýnaye ndayá Cristo yochjanmama. <sup>18</sup> Báseftanga mondmëna y chënga mo nduamanëngcá entšángbeñe jtsebínýnana, pero tsoye cachënga corente uámanënga jtsenobiamnayana y angelënga jtsadórayana, mo Bëngbe Bëtsá cuaftsemncá. Ndoñe caso šmattsabiamnaye, tšëngaftanga ndoñe tšabá šmontsamma ca chënga tmojtsichamo ora, ntšamo chënga tmojtsichamcá tšëngaftanga ndoñe šmontsámayeca. Chënga jtsichámuana

bëts soyënga mo otjenayoquëcá tmojinÿe ca, y nÿe cachënga puerte jtsenábotamnayana, pero chca chamotsamama razón ndoñe quemátsbomna, er nÿe ntšamo inÿe entšanga imnetsejuabnaycá chëngnaca cachcá jtsejuabnayana. <sup>19</sup> Chënga Jesucrístoftaca cánÿiñe ndoñe tmonjoquedanga, y Cristo endmëna chë nÿetsca ošbuáchiyëngbe amëndayá, mo chë bestšaše nÿets cuerpo jtsemandayancá. Canÿe cuerpiñe chë bestšaše jtsamana nÿets cuerpo chaóbochema, ntšamo Bëngbe Bëtsá tojtsebošcá, chë cuerpo ndayá jasama chaotsebomnama jtsamëse, y nÿetsca chë cuerpentša soyënga chamenefjanama jtsamëse. Cachcá, Cristo jtsamana nÿetsca ošbuáchiyënga cánÿiñe mo canÿacá cháftaca chamotsemnana, y cada te más tšabá cha chašmotsábuatmama.

<sup>20</sup> Cristo tojanóbana ora enjamna mo tšëngaftángnaca cuafjobancá, y Bëngbe Bëtsá tšëngaftanga cmojatsebacá chë quem luarentše imománda espíritëngbe cucuatšentšana. As, ¿tšëngaftanga ndáyeca šmojtšiyena jtsamëse mo chë nÿe quem luarama enojuabnayëngcá? ¿Ndáyeca tšëngaftanga cabá šmobedecena chca mandënga, mo: <sup>21</sup> “Chë soye ndoñe matsbanana, chca soye ndoñe catjase, o chë soye acbe cucuatšeca ndoñe catjaca ca”? <sup>22</sup> Lempe chë mandënga, chë ndayá canÿa ndoñe bontsemna jamana, nÿe soyëngama jtsayanana, y tempo tojochnëngo ora, chë soyënga jtso pochócana y chora tondaye ntsámanana. Chë mandënga jtsemnana nÿe ntšamo entšanga mondbetsamcá y ínÿengbioye mondbetsabuatambaycá. <sup>23</sup> Ndegombre, ba entšanga jtsejuabnayana chë mandënga tmojamëngbiama, puerte osertánanaca chca tmojama ca, pero ndegombre chca ndoñe quenátsmëna; er chënga jtsichámuana, ntšamo Bëngbe Bëtsá jadórama yomncá imojtsabuatambá ca, jtsabuátambayana entšá cabnmëna uamaná ndoñe ntsenobiamnayana ca, y jabuache cachabe cuérpoca jtsamana ca. Pero chë mandënga tondaye ntsámanana, er chë mandënga entšangbe ainanentšana ndoñe ntjajuánana chë bacna soyënga jtsamama juabnënga.

### 3

<sup>1</sup> Cristo cháuatayenama Bëngbe Bëtsá tojanma ora, enjamna mo tšëngaftángnaca Crístbeñe ošbuáchiyënga, chašmatayenama cha cuafjamcá. Chíyeca, tšëngaftangbe ainaniñe puerte šmochtseboše ndayá Bëngbe Bëtsá celoca tšëngaftangbiama yobomncá; y choca, Cristo uámana puestentše endëtbemana, Bëngbe Bëtsabe catšbioica. Y šmochtsinÿinÿnaye chca šmojtsebošama, ntšamo jtsamëse mora šmojtšiyenama. <sup>2</sup> Tšëngaftanga nÿets tempo chë



celoca soyëngama šmochtsejuabnaye, ndoñe chë nÿe quem luarentše yomna soyëngama. <sup>3</sup> Tšëngaftanga Crístoftaca cánÿiñe mo canÿacá jtsemnëse, jtsemnana mo tšëngaftanga ya cuafjobancá, er mora ya ndoñe quešmátiyena tempcá jtsamëse. Cristo, Bëngbe Bëtsáftaca cánÿiñe mo canÿacá endmëna, y Cristo endmëna nda mora tšëngaftangbe vida yojtsinÿena. <sup>4</sup> Ndegombre, Cristo endmëna nda endama tšëngaftanga tšabe vida chašmotsebmnama; y quem luarentše cha cachiñe chaojtonÿná ora, tšëngaftangnaca chentše cháftaca šmochántsemna, y chora ntšamo Cristo corente uamaná y bëtsá yomnama Bëngbe Bëtsá yochjinÿanÿiyacá, tšëngaftangbiámncaca echanjínÿanÿiye más bëtsétsanga y uámanënga šmojtsemnana.

### *Tempsca vida y morsca vida*

<sup>5</sup> Tšëngaftanga, ntšamo chë nÿe quem luarama enójuabnayënga mondbetsebošcá bošana lempe šmochtsajbaná. Ndocná chaondëtseboše ndaye bacna soye boyabása o shembásaftaca jtsamana, ni chca soyënguiñe ndoñe chaondëtsejuabná; ndoñe chaondëtsiyena nÿe ínÿengbiama bacna juabnënga jtsebmñese, y ndoñe chaondëtseboše nÿe bëtscá soyënga ínÿengbiama más jtsebmñama, er chca jtsamana jtsayanana, chabiama más yojtsámama soyënga jtsebmñana, Bëngbe Bëtsá jatsbobonshánama. <sup>6</sup> Er entsanga mondmëna y chënga chca soyënga jtsamama jtsebošana, y Bëngbe Bëtsá ndoñe ntseyeunanana. Chca entsángaftaca Bëngbe Bëtsá puerte bochanjetna, y echanjamánda chë uabouana castigo chëngbeñe chaotsemnana. <sup>7</sup> Y tempo, tšëngaftanga šmojaniyena jtsamëse, sempre nÿe chca bacna juabnëngaca, <sup>8</sup> pero mora tšëngaftanga cmontsamna lempe quem soyënga stëtsoye jaquédana: ínÿengaftaca jetnana, ínÿengaftaca rábiaca jtsemnana, ínÿabiyoie ntšamo jáborlama jtsebošana, ínÿengbiyoie joyáanguanguana, y ndoñe tšabe palabrënga jtsóyebuambnayana. <sup>9</sup> Ndoñe šmattsenbuambnaye, er ntšamo tempo šmojamncá mora tšëngaftanga ya ndoñe cachcá quešmátsmëna, y mora ndoñe quešmátiyena jtsamëse ntšamo tempo šmojanamcá. <sup>10</sup> Y mora tšëngaftanga šmojashjache jtsemnana mo tsmëma entsangcá, y ntšamo tempo šmojanamcá ndoñe cachcá quešmátama. Bëngbe Bëtsá chca tsmëma entsangcá tcmojábiamá; y cha nÿets tempo yojtsama, tšëngaftanga cada te más ntšamo cha yomncá chašmotsemnana, chca, corente tšabá cha chašmuábuatmanama. <sup>11</sup> Chíyeca, ndayá Bëngbe Bëtsá tojamama, ndoñe judiënga y judiënga cachcanga mondmëna; chë más delicadentše base bobachtema tétšenënga ndoñe más uámanënga quemátsmëna chë ndoñe chca mondmënëngbiama;

chë inÿe luarëngocana áshjajnënga, bën tjoye oyenënga, chë nÿe ínÿabiana nÿets tempo oservénënga y chë cachëngbiana trabájayënga, nÿetscanga cachcanga mondmëna. Chë nÿe ndayá iuámana endmëna Crístbeñe jtsošbuáchiyana y nÿetsca ošbuáchiyëngbe ainaniñe cha yojtsemna jtsemándayama.

<sup>12</sup> Tšëngaftanga Bëngbe Bëtsábenga šmondmëna. Cha cmondábabuanÿeshana y tcmojabacacá chabe entšanga chašmotsemnama; chíyeca, tšëngaftanga cmontsamna ínÿenga jtsinÿanÿayana nÿetscangbiana jóngmiana šmuamanama, tšabe juabna ínÿengbiana sempre šmnétsebomnama, cada ona chë ínÿenga chabiana más uámanënga cuaftsemncá imnétsejuabnayama, nÿetscanga puerte bonshanánaca šmnétsënÿayama, y nÿetsca padecena soyënguiñe corente uantadënga šmomnama. <sup>13</sup> Nÿetscanga šmochtsenëuantana y šmochjenperdóna, nderado ntšamo nda ínÿabioye tbojaborlá y chama cha tbojtsatsëtsná ora. Ntšamo Bëngbe Bëtsá tšëngaftanga tcmojaperdonacá, tšëngaftángnaca cachcá ínÿenga šmochjáperdonaye. <sup>14</sup> Lempe chë soyëngama más enduámana nÿetscanga jtsenbobonshánana. Nÿetscanga šmojtsenbobonshánëse, tšëngaftanga šmochantsobena sempre lempe chë inÿe soyënga corente tšabá jtsamana, ntšamo ndegombre chë soyënga jamama yomncá. <sup>15</sup> Cristo endama tšëngaftangbe ainaniñe tšabe ebionana chašmotsebomnama. Chë tšëngaftangbe ainaniñe tšabe ebionánaca šmochtsiyena nÿetscanga natjëmbana, Jesucristbeñe ošbuáchiyënga quetsomñecá. Bëngbe Bëtsá tcmojáchembo tšëngaftanga nÿetscanga cánÿiñe mo canÿe cuerpcá chašmotsemnama, y chca, natjëmbana chašmotsiyenama. Bëngbe Bëtsá sempre šmochtsatschuanaye.

<sup>16</sup> Chë Cristbe puerte tšabe buayenana soyënga tšëngaftangbe ainaniñe nÿets tempo šmochtsambaye. Nÿets osertanánaca šmochtsenbuátëmbaye y šmochtsenbuayiynaye. Nÿets ainánaca šmochjacánta chë Salmos librëšañe uabemana cantënga, chë Jesucristbe soyëngama cantënga, y chë Bëngbe Bëtsabe Espíritu iuama tšëngaftanga chašmotsobena jacántama soyënga; chca šmochjama Bëngbe Bëtsá jëtschuayama. <sup>17</sup> Y lempe ntšamo chašmojtsama o chašmotsichamcá, Bëngbe Utabná Jesúsbeñe ošbuáchiyënga quetsomñecá chca šmochjama, sempre Bëngbe Bëtsá Bëngbe Taitábioye, chábeyeca jtsatschuanayëse.

### *Ntšamo ínÿengaftaca jtsiyenama*

<sup>18</sup> Shémanga, šmochtsatátšëmbo tšëngaftangbe boyanga chë yebnentša mándayënga imomnama, y nÿets tempo chca jtsejuabnayëse šmochtsiyena, er tšëngaftanga Bëngbe Utabnábeñe ošbuáchiyënga quetsomñecá, chca cmontsamna. <sup>19</sup> Boyanga,

tšëngaftangbe shémanga sempre šmochtsababuányëshana, y podesca palabrëngaca ndoñe šmattsëtsëtsnaye.

<sup>20</sup> Básenga, tšëngaftangbe bëtsëtsanga nyëtscañe šmochtsayaunana; chca šmojtsamëse, Bëngbe Bëtsá oyejuayá echántsemna. <sup>21</sup> Taitanga, ndoñe šmattsama tšëngaftangbe básenga chauetënama, ainaniñe tondaye añémoca chënga ndoñe chamondëtsatsmënama.

<sup>22</sup> Tšëngaftanga chë nyëts tempo nye ínÿabiana oservénënga, tšëngaftangbe nduiñënga nyëtscañe šmochtsayaunana, y ndoñe nye chënga tcmojtsënÿa ora, mo nda nye entsangbe delante tšabá joquédama tojtsebošacá, ndayá chënga šmochtsayaunana nyëts ainaniñe ndegombre tšabe juabnëngaca, er tšëngaftanga Bëngbe Utabnabiana corente respeto šmondpomna. <sup>23</sup> Lempe ntšamo chašmojtsamcá, nyëts tšëngaftangbe añémoca šmochtsama, mo Bëngbe Utabná ndegombre cuaftseservencá, y ndoñe nye entsangbioycá. <sup>24</sup> Tšëngaftanga ya šmondëtatšëmbo, ntšamo cha chabe entsanga tojašebuachenacá mo uacanancá, Bëngbe Utabná tšëngaftanga cmochjátšatayama. Er Cristo, chë Utabná, endmëna ndábenga tšëngaftanga šmomnana, y cha šmondëservena. <sup>25</sup> Pero chë ndoñe tšabe soyënga tontsamábioye, Bëngbe Bëtsá bochanjacastíga, ntšamo chë entsá bacna soyënga tojamcá, er Bëngbe Bëtsabiana nyëtscanga cachcá monduámama.

## 4

<sup>1</sup> Y tšëngaftanga, ndëmuanyëngbiana ínÿenga nyëts tempo imoservena, nyëtsca soyënguñe tšabá šmochtsama, y nyëtscangbiana cachcá šmochtsemna, chë nyëts tempo nye tšëngaftangbiana oservënëngaftaca, er tšëngaftanga šmondëtatšëmbo celoca canÿa endmëna, ndabiana tšëngaftángnaca oservénënga šmondmëna.

### *Ošbuáchiyënga jábuayenama*

<sup>2</sup> Nyëts tempo Bëngbe Bëtsáftaca šmochtsencuëntaye, ntšamo šmojtsichámuama botamana jtsejuabnayëse y Bëngbe Bëtsá jtsatschuanayëse. <sup>3</sup> Bëngbe Bëtsáftaca cha šmojtsencuënta ora, bëngbiámnaca chašmochtseimpadana, cha chaoma bënga fchayobenama Bëngbe Bëtsabe palabra Cristbiana entsanga jábuayenama, chë buayenana soye ndayama tempo entsanga ndoñe monjántatšëmbo. Atše chë buayenana soye entsanga abuátambaye causa, mora cárceloye sëntsëtámëna. <sup>4</sup> Chcasna, Bëngbe Bëtsá atšbiana šmochtseimpadana, atše chayobenama chë buayenana soyënga entsanga jábuátambama, y chë soye atše chaima chënga corente tšabá catafjosertaycá, er atše sontsemna chca jamana.

<sup>5</sup> Smochtsiyena nyetsca soyënga osertaná naca jtsamëse chë Jesucristbeñe ndošbuáchiyëngaftaca, y chca, nyets tempo ínÿenga šmochtsinÿanÿnaye tšëngaftanga Jesucristbeñe ošbuáchiyënga bétsemnama. <sup>6</sup> Inÿengaftaca chašmojtsencuënta ora, šmochtsama ntšamo šmojtsoyebuambnacá chëngbiana tšabá chaotsemnama, y soyënga šmochtsichamo nyetscanga oyejuayana chamotsebomnama; y šmochtsetátšëmbo ntšamo cmojtsamna cada cánÿabioye jojuana.

### *Jtadiósoftanama*

<sup>7</sup> Jesucristbeyeca bëngbe bonshana catšata Tíquico, canÿe trabajayá tšabe palabra bomná y Bëngbe Utabnabiana bëngaftaca oservená, tšëngaftangbioye noticiënga echanjuamba ndayá átšeftaca tojopasama. <sup>8</sup> Chíyeca cha tšëngaftangbioye sentsichamná, chca, tšëngaftanga chašmotsetatšëmbuama ndayá bëngaftaca yojtsopasana, y cha chacmañémuayama. <sup>9</sup> Cháftaca Onésimo echanjá, Jesucristbeyeca bëngbe bonshana catšata; cha canÿe tšabe palabra bomná endmëna, nda tšëngaftangbiocana tonjánabo. Chata tšëngaftanga cmochanjácuntaye lempe ntšamo muiñe yojtsopasancá.

<sup>10</sup> Aristarco, muentše átšeftaca cárceloye utamená, cmontsacheuaná. Y Marcos, Bernabebe primo, chánaca cmontsacheuaná. Tšëngaftanga ya buayenánënga šmontsemna ndayá jamama cmojtsamnana, Marcos tšabá jofjama, cha tšëngaftanga jautsëtsayama tojase. <sup>11</sup> Jesús, chë Justo cánaca uabainá, chánaca cmontsacheuaná. Quem pueblentša nyetsca judiënga ošbuáchiyënguentsana, nÿe chë unga átšeftaca mondëtrabája, Bëngbe Bëtsabe amëndayana entšángbioye chaóshjanguama, y chënga mondama atše ainaniñe bëts añemo chaitsebomnama. <sup>12</sup> Epáfrasnaca cmontsacheuaná, inÿe tšëngaftangbiocá y cha Cristo Jesusbiana jatrabájama endoservená. Cha nyets tempo tšëngaftangbiana Bëngbe Bëtsábioye tša bochandbëtseimpadana, tšëngaftanga Bëngbe Utabnábeñe ošbuáchiyana ndocna te chašmondájbanama, y nyets tempo chašmotsiyena lempe jtsamëse, ntšamo chë Jesucristbeñe corente ošbuáchiyënga jtsiyenana yojtsamncá; y chca, tšëngaftanga corente šmochántsetatšëmbo ntšamo šmojtsamcá ndegombre yomna ntšamo Bëngbe Bëtsá yobošcá. <sup>13</sup> Cach atše sënjinÿe y sentsobena jayanama ntšamo cha jabuache yotrabájama, tšëngaftanga jujabuáchama, chë Laodicea puebloquënga y Hierápolis puebloca oyenëngnaca. <sup>14</sup> Lucas, bëngbe bonshana ashnayá, cmontsacheuaná; y Démasnaca.

<sup>15</sup> Chë Laodiceoca Jesucristbeyeca catšátanga bëngbe cuenta šmochjácheuaye. Ninfábioynaca šmochjachuaye,

y nyetsca ošbuáchiyënga chë Bëngbe Bëtsá jëtschuayama chabe yebnentse jénefnama imuamanëngnaca. <sup>16</sup> Quem tsbuanácha chašmojualiá chentšana, Laodiceoca ošbuachiyëngbiye šmochjuíchmua, chócnaca mëcha chamualiamá; y tšëngaftángnaca šmochjualiá chë Laodiceoca ošbuachiyëngbiye tmonjanichmó tsbuanácha, chëcha tšëngaftangbiye chaojuáshjango ora.

<sup>17</sup> Arquivo šmochjauyana yejuana chaotsantješna chë Bëngbe Bëtsá tbojabonyé trabajo sempre tsabá chaotsocumplínama.

<sup>18</sup> Atše Pablo, nye quem palabrënga tšëngaftanga jacheuayama cach atšbe cucuátšeca sentsabiamná. Smochtsenójuabnaye atše utamená stsemnama. Atše, Bëngbe Bëtsá sëntseimpadana, cha chaoma tsabe bendicionënga tšëngaftangbeñe chaotsemnama.

# 1 Tesalonicenses

## *Jacheuayama*

<sup>1</sup> Atše Pablo, Silvano y Timotéoftaca, quem tsbuanácha sentsabiamná tsëngaftangbiamá, chë Tesalónica bëts puebloca Jesucristbeñe ošbuáchiyëngbiamá, tsëngaftanga chë Bëngbe Bëtsá chë Taitá y Bëngbe Utabná Jesucristoftaca cányiñe mo canyáca šmommënga. Atše sëntseimpadana Bëngbe Bëtsá, chaoma tsabe bendicionënga tsëngaftangbeñe chaotsemnana, y tsëngaftanga ainaniñe tsabe ebionana chašmotsebomnana.

*Pablo Bëngbe Bëtsábioye tbojtanchuá chë Tesalónica pueblentsa entsangbe ošbuáchiyama*

<sup>2</sup> Bënga sempre Bëngbe Bëtsá fsëndëtschuaná tsëngaftangbiamá, y bënga cháftaca ftsencuénta ora, tsëngaftangbiamá fchandbëtseimpadana. <sup>3</sup> Bënga, Bëngbe Bëtsá chë Taitáftaca ftsencuénta ora, fsëndbétsenojuabnaye ntšamo tsëngaftanga šmotrabájama, Jesucristbeñe ošbuáchiyana šmobómnayeca; ntšamo tsëngaftanga tša ínÿenga šmëjabuáchana, Jesucristo šmobobonshánayeca; y ntšamo tsëngaftanga, ndocna te ntjajbanacá, jtsošbuáchiyëse Bëngbe Utabná Jesucristbeñe šmobátmanama. <sup>4</sup> Jesucristbeyeca catšátanga, bënga fsëndëtatšëmbo Bëngbe Bëtsá cmababuánÿeshanama, y cha tcmojábacacama chábënga chašmotsemnana. <sup>5</sup> Bënga chë tsabe noticiënga Jesucristbiamá tcbonjanabuayená ora, ndoñe nÿe bënga jóyebuambayëse chca quenjatsmëna, ndayá chë Uámana Espíritbe obenanácna, y bënga corente jtsejuabnayëse chë buayénana ndegombre soye bëtsemnana. Tsëngaftanga corente šmondëtatšëmbo ntšamo bënga ftsjamna tsëngaftangaftaca fsënjamna ora, tsabe soyënga tsëngaftangbiamá nguayíñe.

<sup>6</sup> Chora, ntšamo bënga fsënjanamcá y ntšamo Bëngbe Utabná enjanियencá, tsëngaftanga šmonjanontsé amana; y chë buayénana šmonjanóyëngacñe chë Uámana Espíritu tcmojanatsatá oyejuayánaca, masque ínÿenga tmojamna tsëngaftanga puerte chašmosufrima. <sup>7</sup> Mëntšá, tsëngaftanga uánatsanënga šmonjanobiamá ntšamo ndegombre jtsiyënama, nÿetsca Macedonia y Acaya luarentša Jesucristbeñe ošbuáchiyëngbiamá. <sup>8</sup> Tsëngaftanga šmojoyebuambá Bëngbe Utabná Jesucristbe palabrama. Mora, ndoñe nÿe Macedonia y Acaya luarentše entsanga chama quemátstatšëmbo —nÿets luarenache entságnaca montsetátšëmbo ntšamo tsëngaftanga Bëngbe Bëtsábeñe šmojtsošbuáchema —y chca, bënga tondaye

más quešnátejaboto tšëngaftangbiamá jatichámuama. <sup>9</sup> Cach entšanga montsoyebuambná chë bënga tcbonjánabuache ora tša tšabá tšëngaftanga šcojanëbuajama. Chëngnaca montsichamo ntšamo tšëngaftanga šmojtsajbaná chë šmojanjuabná diosënga yojamna soyënga adórayana y šmojanontsé chë tšabe benache jtishachama, y chë Bëngbe Bëtsá ndegombrá y ainá jaserviama, <sup>10</sup> y chca, chabe Uaquiñá Jesús jobátmama; mua celocana echanjésabo; chabiamá Bëngbe Bëtsá tojanma obanënguentsana cháuatayenama, y cha šochanjátsebacaye chë uabouana castigüentsana, Bëngbe Bëtsá entšangbe bacna soyëngama chëngbiamá yobomnentsana.

## 2

### *Ntšamo Pablo yojantrabája Tesalónica puebloca*

<sup>1</sup> Cach tšëngaftanga, Jesucristbeyeca catšátanga, šmondëtatšëmbo bënga tcbonjánabuache ora ndoñe nÿe bonamente quenjatsmënama. <sup>2</sup> Tšëngaftanga šmondëtatšëmbo, bënga cabá tšëngaftangbioye nda ora, Filiposoca šonjanëyánguango y bacá šonjánaborlama; y masque tšëngaftangbioca bëngbe contra entšanga monjamna, Bëngbe Bëtsá tonjanma bënga fchayobená chë tšabe noticiënga bëtsca añémoca jabuátambama. <sup>3</sup> Er bënga entšangbioye bostero soyënga ndoñe queftsjatanabuayiyná, tšëngaftangbiamá bacna soyënga ndoñe queftsjatanboše, y entšanga jáingñama ndoñe queftsjatanoyebuambná. <sup>4</sup> Bëngna inÿetšá; Bëngbe Bëtsá yojanjuabná bënga chabe trabajo jamama obenënga ftsjamna ca, y chca, šonjanëbuáyana chabe tšabe noticiënga entšanga jabuátambama, y chca bënga fsëndoyebuambná; chíyeca bënga ndoñe nÿe entšangbe bominiñe tšabá chaotsinÿnama queftsátama, ndayá nÿe Bëngbe Bëtsabiamá, nda chë ndayá bëngbe ainaniñe yomnama yotátšëmbo. <sup>5</sup> Ntšamo tšëngaftanga corente šmondëtatšëmbcá, bënga ndocna te tšëngaftangbiamá tšabe soyënga tifjánayana, tšëngaftanga bëngaftaca oyejuayënga chašmotsemnama; y ntšamo tšëngaftanga cbonjanëtsëtsnacá ndoñe quenjatsmëna nÿe tšëngaftangbentsana ba soyënga bëngbiamá josháchiñama. Bëngbe Bëtsá chama yotátšëmbo. <sup>6</sup> Ndocna te bënga queftsatsnguá entšanga más uamanëngcá bënga chašotsabiamnama, ni tšëngaftangbentsana, ni inÿengbentsana.

<sup>7</sup> Masque bënga, Cristbe ichmónënga bétsemnama, matifjanobená tšëngaftanga nÿe sempre jtsamëndayana, bënga ndoñe chca chibiátanma; bënga corente jtsababuánÿeshanëse cbonjánanÿena, ntšamo canÿe mamá chabe básënga jtsabëchayana y corente bonshanánaca jtsanÿenana. <sup>8</sup> Tša cbonjánababuanÿeshanayeca, bënga ndoñe nÿe chë Bëngbe

Bëtsabe tšabe noticiënga checbënjatanabuayená, tšëngaftanga chiñe chašmotsošbuáchema ntšamo bënga fsëndošbuachecá, ndayá bëngbe vidënga jáshbiamnaca fsënjanprontana tšëngaftangbe tšabiamana. ¡Tša cbondábabuanýeshana!  
 9 Jesucristbeyeca bëngbe catšátanga, tšëngaftanga šmenabouínýna ntšamo bënga bëtscá y jabuache fsënjantrabajama, Bëngbe Bëtsabe tšabe noticiënga abuayiyanyiñe y bëngbe vida onguayiñe, chca, tšëngaftanga ndoñe chacmondëtsamnana bëngbe uajabótama bënga jatatšatnayama.

10 Cach tšëngaftanga šmondëtatšëmbo y Bëngbe Bëtsánaca, ntšamo bënga ftsjamna tšëngaftanga chë ošbuáchiyëngaftaca fsënjamna ora; fsënjaniyena ntšamo Bëngbe Bëtsá tšabá tbojtsinýancá, nyetscángaftaca fsënjánama ntšamo jamama šojanamncá, y ndocná quenátobena jatichámuana ntšamo fsënjanamcá ndoñe tšabá yonjamna ca. 11-12 Tšëngaftanga šmondëtatšëmbo, bënga bëtscá jóyebuambayëse cada ona tšëngaftanguentšá cbonjanëjabuachanama y cbonjánañemuama, ntšamo canýe taitá chabe básengaftaca endbetsamcá. Bënga bëtscá cbonjanëtsëtsná ntšamo Bëngbe Bëtsá tšabá tbojtsinýancá chašmotsiyenama; y Bëngbe Bëtsá cmontsëbuájajana chabe amëndayoye jamashënguama y chabe obenana y buashinýinýanana jinýama.

13 Bënga, Bëngbe Bëtsabe tšabe soyënga cbonjanabuayiyiná ora, ntšamo tcbonjanëyancá tšëngaftanga šmonjanuena y šmontsanošbuaché mo Bëngbe Bëtsábiocana buayenanancá, y ndoñe nýe entšangbe oyebuambnayancá. Y ndegombre Bëngbe Bëtsabe buayenánana endmëna, y chë palábraca, tšëngaftanga chë chábeñe ošbuachiyëngbeñe Bëngbe Bëtsá bëtscá soyënga yojtsama. Chama sempre Bëngbe Bëtsá fsëndëtschuaná. 14 Jesucristbeyeca catšátanga, cach tšëngaftangbe luarentša entšanga cmonjanëcamena ora y šmonjansufrina, šmonjanpasá ntšamo chë Judeoca Bëngbe Bëtsábeñe ošbuachiyëngcá enefjuanënga tmonjanpasacá, y chëngna Cristo Jesusbe entšanga mondmëna. Chënga tmonjansufrí cach luarentša entšanga, chë judiënga, chëngbioye monjanëcamena ora. 15 Chë judiëngbe bëts taitanga, Bëngbe Bëtsabe juabna oyebuambnayëngbioye tmojtsanëbaye, y ntšamo chëngbe bëts taitanga tmojanmca, chëngnaca Bëngbe Utabná Jesúsbioye tmojanóba, y chënga mondamana bënga chaftsesufrínama. Chënga ndoñe tšábënga Bëngbe Bëtsabe bominiñe quemátsmëna, y nyetsca entšangbe contra montsemna. 16 Chë ndoñe judiëngbioye, Bëngbe Bëtsá cháuatsebacama jábuayenama fstseboše ora, chë judiënga bëtscá jtsamana bënga ndoñe fchandobenama chca jamama.



Judiënga nÿets tempo bacna soyënga monjánama; pero chë entsanga jábuayenama bënga ndoñe fchandobenama jtsamana, entsemna chë último bacna soye ntšamo chë judiënga jamama imojtsobencá, más ya ndoñe; y mora, cabana, Bëngbe Bëtsá ya puerte chëngaftaca tbojetna y echanjácastigaye.

*Pablo tša yojánboše, Tesalónica puebloca entsanga jányama*

<sup>17</sup> Jesucristbeyeca catšátanga, bënga tšëngaftangbentsana baseftayté jëftsebocnama šonjanotocá ora, masque ndoñe choca tšëngaftangaftaca queftsjátanmëna, sempre tšëngaftangbiana fsënjanenuabná, y tša fsënjánboše tšëngaftangbioye jtésana jautsëtsayama. <sup>18</sup> Bënga fsënjánboše tšëngaftangbioye jésana; chíyeca cach atše Pablo, ba soye sënjanóshenguënja jobenayama choye jésama, pero Satanás yojantrabája bënga ndoñe fchandobenama chca jamama. <sup>19</sup> Atše sënstanboše tšëngaftanga jautsëtsayama, er tšëngaftangbeyeca Bëngbe Utabná Jesusbe delante, cha yochjésabo ora, ntšamo tšëngaftanga šmoyenama, bënga puerte jtsošbuáchiyëse fchantsobátmana, corente oyejuayënga fchtsemnama y más bëtsëtsanga fchtsemnama. <sup>20</sup> Aíñe, ndegombre, ntšamo tšëngaftanga šmoyenama, bënga bëtsá añémoca ntšamo tšëngaftangbeñe tifjamama fsëndbëtsoyebuambnaye, y tša oyejuayënga fsëntsemna.

### 3

<sup>1</sup> Chíyeca ya ndoñe chibiatanobená más jatobátmanana tšëngaftanga jautsëtsayama; as fsënjanjuabó nÿe bëndata Atenas bëts pueblentše joquédana, <sup>2</sup> y jíchmuana Jesucristbeyeca bëngbe catšata Timoteo, chë bëngaftaca trabajayá, Bëngbe Bëtsábioye oservëniñe, tšabe noticiënga Cristbiana entsanga abuayiynayiñe. Fsënjanichmó chacmañémuayama y chaotsamama tšëngaftanga Jesucristbeñe más chašmotsošbuáchema; <sup>3</sup> y chca, ndocná Jesucristbeñe ošbuáchiyana chaondájbanama, masque tšëngaftanga Jesúsbeñe ošbuáchiyënga bëtsemnama, ínÿenga imojtsama chašmotsesufrínama. Er cach tšëngaftanga šmondëtatšëmbo bënga šojtsamna chca quem luarentše jëftsepadecénana. <sup>4</sup> Y cabá tšëngaftangaftaca fsënjëftsemna ora, tcbonjanëyana bënga šojánamna jasúfriana; y ndegombre chca tonjopasá, ntšamo tšëngaftanga ya šmondëtatšëmbcá. <sup>5</sup> As y chë tšëngaftangbiana jtsetatšëmbuama más jatobátmanana ndoñe quetstétsobenayeca, sënjanjuabó šojëtsemna Timoteo jíchmuana. Sënjanichmó atše jtsetatšëmbuama aíñe bëtsá o ndoñe tšëngaftangbe ošbuáchiyana Jesucristbeñe tayojamnama, er atše yapa sënjanjuabná nderado Satanás tojanma tšëngaftanga

bacna soyënga chašmotsamama, y chca, bëngbe trabajo tondayama chaondëtoservënama.

<sup>6</sup> Pero mora, Timoteo tšëngaftangbiocana tontashjango y tonjúshjango noticiënga, y bënga chama oyejuayënga fsëntsemna, ntšamo tšëngaftanga bëtscá Jesucristbeñe šmojtsošbuáchema y nyetscanga šmenbobonshánama. Cha šonjacuntá ntšamo tšëngaftanga corente oyejuayënga bëngbiana šmuatenujuabnama, y ntšamo tšëngaftanga tša šmojtseboše bënga jányama, cachcá ntšamo bënga tšëngaftanga jányama tša fsëntsebošcá. <sup>7</sup> Quem sóyeca, Jesucristbeyeca catsátanga, y mora chë bënga nyetsca chë padecena soyënga fstsebmna ora y ínÿenga bënga jasúfriama imojtsama ora, bëts añemo fsëntsebmna, ntšamo tšëngaftanga tša Jesucristbeñe šmojtsošbuáchema jtsetatšëmbëse. <sup>8</sup> Jtsetatšëmbuana tšëngaftanga sempre puerte tšabá Bëngbe Utabnáftaca šmoyenama, entsama bënga más añémoca chaftsiyenama. <sup>9</sup> Mora fchantsobena Bëngbe Bëtsá jtsatschuanayana tšëngaftangbiana, y chë tšëngaftangbeyeca chabe delante bënga oyejuayana ftsbomnámna. <sup>10</sup> Cada te, bnëté y ibeta, tša Bëngbe Bëtsá fsëndëtseimpadana jobenayama tšëngaftanga jautsëtsayama chašualesenciama, Bëngbe Bëtsabe palabra tšabá chašmobedecema, chë buayenánana ntšamo yojtsashbencá jabuátambama.

<sup>11</sup> Bënga, Bëngbe Bëtsá fsëntseimpadana, cachá y Bëngbe Utabná Jesús, chašújabuache bënga fchayobenama tšëngaftangbioye jama jautsëtsayama. <sup>12</sup> Y Bëngbe Utabná chaoma más bëtscá chašmotsenbobonshánama, y cachcá corente nyetscángaftaca, ntšamo bënga cbondababuanÿeshancá. <sup>13</sup> Chca, tšëngaftangbe ainaniñe bëtscá añemo šmochántsebmna; y Bëngbe Utabná Jesús cachábengaftaca chaojésabo ora, Bëngbe Bëtsá Bëngbe Taitabe delante ndocná chaodayana, ntšamo tšëngaftanga šmojamcá ndoñe tšabá yontsemna ca, er tšëngaftanga šmondmëna Bëngbe Bëtsábenga, nÿe cha jtseservënama.

## 4

*Ntšamo jtsiyenama, Bëngbe Bëtsá oyejuayá chaotsemnana*

<sup>1</sup> Y mora inÿe palabra šmochjatspaséncia. Jesucristbeyeca bëngbe catsátanga, tšëngaftanga bëngbentsana šmonjanatsjinÿe ntšamo jtsiyenana cmojánamna, ntšamo Bëngbe Bëtsábioye oyejuayá jabemama yomncá, y ndegombre chca tšëngaftanga šmondoyena. Y mora Bëngbe Utabná Jesusbe cuenta, cbontsaimpadana y becá cbontsëtsësná más chca chašmotsamama.

<sup>2</sup> Tšëngaftanga šmondětatsëmbo ndayá tifjánayana ntšamo tšëngaftanga chašmotsiyenama, y chca fsënjanma Bëngbe Utabná Jesús chca jamama šonjanamëndáyeca. <sup>3</sup> Bëngbe Bëtsá endboše tšëngaftanga chašmotsiyenama mo Bëngbe Bëtsabengcá, ndocná bacna soyënga boyabása o shembásaftaca chaondëtsamama, <sup>4</sup> y nyëtscanga chamotsobena ntšamo canye shema jonguanguana, chë ntšamo canya Bëngbe Bëtsábia yomná jamama ibomncá, y ntšamo entšangbe bominiñe tšabá yomncá, <sup>5</sup> y ndoñe chabondónguango nye cháftaca bacna soyënga chëngbe cuérpoca jamama, ntšamo chë Bëngbe Bëtsábioye nduabuátmënga mondbetsamcá. <sup>6</sup> Chë palabriñe ndocná chabe catšátbioye chabondëingñé, chë catšatbe shémaftaca bacna soye jamëse, er chca amëngbioye Bëngbe Utabná corente echanjácastigaye. Chíyeca bënga ya bëtscá chama tcbonjabuayená. <sup>7</sup> Er Bëngbe Bëtsá ndoñe šonjánachembo bacna soyënga boyabása o shembásaftaca jtsamama, ndayá ntšamo tšabá yomncá jtsamama, ntšamo chabe entšanga mondbetsamcá. <sup>8</sup> Mëntšá, nda quem buatëmbana soyënga tojtsábotena, cha ndoñe nye entšanga jtsëbáténana, ndayá Bëngbe Bëtsábioye, nda tšëngaftangbe ainaniñe Uámana Espíritu cháúamashënguama tojama.

<sup>9</sup> Atše ndoñe quešnátsmëna juabuábiamana ntšamo cmojtsamna ínÿenga Jesucristbeñe ošbuáchiyënga jtsababuánÿeshanama, er cach Bëngbe Bëtsá tcbonjabuatambá nyëtscanga chašmotsenbobonshánama. <sup>10</sup> Y ndegombre, tšëngaftanga chca šmondama nyëtsca Macedonia luarentše Jesucristbeñe ošbuáchiyëngaftaca. Pero cbontsaimpadana, Jesucristbeñe catšátanga, más chca chašmotsamama.

<sup>11</sup> Nya sempre quem soyënguiñe šmochtsentšena: natjëmbana jtsiyenana, ínÿengbe soyënguiñe ndoñe ntsontrëmeténana, y ndoñe ntjatobátmanana nye ínÿenga tšëngaftangbiama chamotsetrabájama, ntšamo tcbonjanëyancá tšëngaftangaftaca fsënjamna ora; <sup>12</sup> chca šmochtsama, chë ínÿenga Jesucristbeñe ndošbuáchiyënga chacmotsarrespetánama, y ndocnábeñe ntjatobatmancá šmochantsobena jtsiyenana.

*Bëngbe Utabná quem luaroye yochjésabo ora*

<sup>13</sup> Bëngbe catšátanga, bënga fsëntseboše tšëngaftanga ndegombre chašmotsetátšëmbo ntšamo chë obanëngaftaca yochjopásama, y chca, tšëngaftanga ndoñe ngmenánaca chašmondëtsemnana, mo chë ínÿengcá, chë tcojóbanentšana ndoñe yontsemna jtayenama ca juabnayëngcá. <sup>14</sup> Bënga fsëndošbuaché Jesús tojanóbana y tojtanayenama, y cachcá bënga fsëndošbuaché chë tmojóbanënga y Jesúsbeñe

tmojtsošbuáchese, Bëngbe Bëtsá chëngbiana yochjama chë nyetsca tescama yomna tšabe vida Jesucrísoftaca chamotsebomnama, y quem luaroye cháftaca chamuatábama.

<sup>15</sup> Chë soyama bënga cbontsëtsëtsná ntšamo cach Bëngbe Utabná tojëftsanabuatambacá: Bëngbe Utabná chaojésabo ora, chë ošbuáchiyënga chë te cabá ainënga chamojtsemnënga, chábioye ndoñe quemochátinyëna tsbanánoca, más natsana chë ya obanënga chë te mochtayenëngbiana. <sup>16</sup> Er entsanga mochanjouena canye mando juayebuáchenana, chë angelëngbe amëndayabe oyebuambnayana y chë Bëngbe Bëtsabe trompetëfjua juajatëtámna, y chora cach Bëngbe Utabná celocana echanjástjango. Y chë tmojóbanënga, Crístbeñe imojanošbuachenga, natsana mochántayena; <sup>17</sup> chentšana, chë ainënga chamojtsemnënga chëngaftaca cányiñe Bëngbe Bëtsá šochanjúyamba, Bëngbe Utabná yochtsemnoca jashjanguama, chë celoca jantšetëshënga endmënoca; as chentšana nyetsca tescama cháftaca bënga mochántsemna. <sup>18</sup> Quem palabrëngaca nyetscanga ndoñe más mgénana ainaniñe chašmondëtsebomna.

## 5

<sup>1</sup> Jesucrísbeyeca catšátanga, ndoñe quenátsiyta atše jubuábiamana mocna ora chë soyënga yochjopásama. <sup>2</sup> Cach tšëngaftanga corente šmondëtatšëmbo, Bëngbe Utabná yochjésabo chama ndocná chaondëtsejuabná ora, mo canye atbëbanacá jashjanguana ibeta ndocná chama tonjatsjuabná ora. <sup>3</sup> Entšanga chamojayana: “Lempe tšabá endëtsomñe y tondayama quešnátamna játauatjana ca”, chora nye ndeolpe chë entsangbiana tša jasúfriama echanjóshjango, mo canye shembása šešona jtsebomnama ora nye ndeolpe jasúfriama jóntšancá; y ndegombre, entsanga chca jasúfriama quemochatotsbocá. <sup>4</sup> Pero tšëngaftanga catšátanga, ndoñe quešmátiyena mo ibetiñcá, bacna soyënga jtsejuabnayëse y jtsamëse; y chca, Bëngbe Utabná chaojésabo ora, tšëngaftanga ndoñe auatjanánënga quešmochátsmëna, mo ndábioye canye atbëbaná tbojotbá ora, chábioye cuaftsauatjanacá. <sup>5</sup> Nyetsca tšëngaftanga šmondmëna entsangbe juabna binynayabe básenga, y mo binyniñcá šmondoyena. Bënga ndoñe chë ibetiñe mandayabe básenga quemuátsmëna, y mo ibetiñcá ndoñe quemuátiyena; <sup>6</sup> chíyeca bënga ndoñe quešnátamna jtsemnana mo chë cachëngbe cuerpo jenomándama ndobenëngcá, chë mo cuaftsemangcá oyenënga. Pero aíñe šontsamna mo chë fšnëngcá jtsiyenana, bëngbe cuerpo jtsemándayëse y nyets tempo jtseprontánëse. <sup>7</sup> Ibeta ora entsanga jtsemangana,

y cach ibeta tojtsemna ora entšanga jotmenangana; <sup>8</sup> pero bēnga, chē binýñentsēngna, šontsamna sempre bēngbe cuerpo jtsemándayana. Sontsamna Bēngbe Bētsábeñe jtsošbuáchiyana y cha jtsebobonshánana, chē uayaná Satanasbiana jenēuyanama y cha jayēñjanama, mo canye soldadca, canye morocho soye cochaca jenácochjatsana jtsevalentiana y ndoñe chamondēyēñjanama. Y chē castigüentšana Bēngbe Bētsá šochjátsebacamnaca puerta jtsošbuáchiyēse jtsošbátmanana; y chca, bēnga mochántsemna mo canye soldadca, cha canye casquēse juabuchētsana jenēuyanama. <sup>9</sup> Er Bēngbe Bētsá ndoñe šonjáchembo bēnga chašotsamnama chē nyetsca tescama castigo jtsebomnama. Ndayá Bēngbe Bētsá šojabacacá, Bēngbe Utabná Jesucristbeyeca bēnga chamótsbocama. <sup>10</sup> Cha bēngbiana tojanóbana, bēnga cháftaca cánýiñe jtsiyenama chamotsobenama, masque ainēnga o obanēnga chamojtsemnēse, cha chaojésabo ora. <sup>11</sup> Chiyeca, nyetscanga šmochtsenañēmuaye y šmochtsenájabuachana más jtsošbuáchiyama, ntšamo tšēngaftanga mora ya šmontsamca.

*Pablo choca ošbuáchiyēnga jábuayenama*

<sup>12</sup> Jesucristbeyeca catšátanga, cbontsaimpadana chašmotsarrespectana chē Bēngbe Bētsabiana tšēngaftangbeñe trabajayēngbioye, y chē Bēngbe Utabná tšēngaftanguentse tojábacacanga uánatsanēnga chamotsemnana y ntšamo jtsiyenama cmojtsamnama chácmbuayenama. <sup>13</sup> Cmontsamna chēnga jtsarrespectánana y jtsababuánýeshanana, ndaye trabajo chēnga imojtsamama. Natjēmbana nyetscángaftaca šmochtsiyena.

<sup>14</sup> Quem soyēnga chašmotsamámnnaca cbontsaimpadana: jatrabájama ndoñe tmontsebošēngbioye šmochjucácana, añemo ndbomñēngbioye šmochjáñēmuaye, bētsca ošbuáchiyana ndbomñēngbioye šmochjújabuache, y uantadēnga nyetscángaftaca šmochtsemna.

<sup>15</sup> Cuedado šmochtsebomna, nderado nda bacna soye tbojaborlase, ndocná ndoñe cachcá chabondētachnēnguama. Maska, nye šmochtsentsena nyets tempo tšabe soyēnga jtsamama cach tšēngaftanguentšēngaftaca y nyetsca entšangaftácnaca.

<sup>16</sup> Nyets tempo oyejuayēnga chašmotsemna. <sup>17</sup> Sempre Bēngbe Bētsáftaca šmochtsencuéntaye. <sup>18</sup> Nyetsca soyēnguiñe Bēngbe Bētsá šmochtsatschuanaye; er chca entsemna ndayá cha yojtseboše, bēnga Cristo Jesúsbeñe ošbuachiyēngcá chamotsamama.

<sup>19</sup> Ndoñe šmattsama ntšamo chē Uámana Espiritu tšēngaftangbeñe yojtsamcá chaotsopochocama. <sup>20</sup> Ndoñe šmattsábotena chē Bēngbe Bētsabe juabna oyebuambnayēngbe

buayenana soye. <sup>21</sup> Yejuana šmochjájuaboye y šmochjayana, chë Bëngbe Bëtsabe juabna oyebuambnayá yomna ca tojtsichamuabe buayenánama ndegombre Bëngbe Bëtsábíocana tayóbocanama, y chentša tšabe soyënga šmochjobuajo y sempre chca šmochtsama. <sup>22</sup> Njëtscá bacna soyënguentšana šmochtsojuánañe.

<sup>23</sup> Cach Bëngbe Bëtsá, chë bëngbe ainaniñe tšabe ebionana chamotsebomnama endamá, njëtscá soyiñe tšábenga chacá chacmabíama, y njëts tšëngaftangbe espíritu, ainana y cuerpo chaotsinjëna, Bëngbe Utabná Jesucristo chaojésabo orscama; y chora, ntšamo tšëngaftanga šmojamama bacna soyënga yojsemna ca ndocná chaodayanama. <sup>24</sup> Nda tcmojúbuaja chábenga chašmotsemnama, cha sempre jtsamana ntšamo tojayancá, y lempe cha echanjama.

*Inye rueguënga chëngbíama y jtadiósoftanama*

<sup>25</sup> Jesucristbeyeca catšátanga, Diosmanda, bëngbíamnaca Bëngbe Bëtsá šmochtseimpadana.

<sup>26</sup> Njëtscángbiöye mo Jesucristbeyeca catšatangcá šmochjácheuaye, jtenámochëse, ntšamo cach tšëngaftangbe pamíllanga puerta bonshanánaca šmondbetsacheuanaycá.

<sup>27</sup> Cbontsamënda quem tsbuanácha njëtscá Jesucristbeñe ošbuáchiyënga chašmëbuáliama, y chca sëntsama, Bëngbe Utabná chca jamama šojanmandáyeca.

<sup>28</sup> Atše sëntseimpadana Bëngbe Utabná Jesucristo, chaoma tšabe bendicionënga tšëngaftangbeñe chaotsemnama.

## 2 Tesalonicenses

### *Jacheuayama*

<sup>1</sup> Atše Pablo, Silvano y Timotéoftaca, quem tsbuanácha sentsabiamná tšəngaftangbiana, chē Tesalónica bēts puebloca Jesucristbeñe ošbuáchiyēngbiana, tšəngaftanga Bēngbe Bētsá chē Taitá y Bēngbe Utabná Jesucristoftaca cánŷiñe mo canŷacá šmomnēnga. <sup>2</sup> Atše sēntseimpadana Bēngbe Bētsá, chaoma tšabe bendicionēnga tšəngaftangbeñe chaotsemnana, y tšəngaftangbe ainaniñe tšabe ebionana chašmotsebomnana.

*Cristo chaojésabo ora, ntšamo entšanga tmojamama Bēngbe Bētsá echanjayana*

<sup>3</sup> Jesucristbeyeca bēngbe catšátanga, šontsamna nŷets tempo Bēngbe Bētsá tšəngaftangbiana jtsatschuanayana, ntšamo tšəngaftangbiana jamama šojtsētocancá, er tšəngaftanga cada te más ošbuáchiyana šmontsebomna, y ntšamo tšəngaftanga nŷetscanga šmojtsenbobonshana, tempscama más yojtsemna.

<sup>4</sup> Tšəngaftangbe ošbuáchiyama y bonshánama, bēnga nŷets tempo oyejuayēnga fchandbétsemna, chē ínŷenache Bēngbe Bētsábeñe ošbuachiyēngcá enefjuanēngbeñe tšəngaftangbiana jóyebuambayama. Bēnga fchandbétsoyebuambnaye ntšamo tšəngaftanga ínŷetšá ntjatsjuabnaycá Jesucristo šmēstonama, y ntšamo tšəngaftanga chábeñe tša šmošbuachémnaca, masque ínŷenga tša cmēcamena y chašmosufrima bētscá imojtsama, tšəngaftanga Jesucristbeñe ošbuáchiyēnga bétsemnana. <sup>5</sup> Tšəngaftanga chca Cristo šmēstonayeca, corente entsinŷinŷena Bēngbe Bētsá nŷetsca soyēnguiñe tšabá amá yomnana, y entšanga ntšamo tmojamama tšabá o ndoñe tšabá bétsemnana jayanama ora, cha chca entsayana tšəngaftanga aíñe merecido šmotsobuájoñe chabe amēndayoye jamashēnguama ca; y mora, tšəngaftanga choye jobenayama jashjanguama šmojtsamama, ínŷenga imojtsama chašmotsesufrínama.

<sup>6</sup> Bēngbe Bētsá echanjama ntšamo jamama ibomncá; echanjama chē tšəngaftanga chašmosufrima imojtsamēnga bētscá chamosufrima; <sup>7</sup> y echanjama tšəngaftanga y bēnga chē mondēsufriñēngbiana, ndoñe más chamondētsesufrinana. Cha quem soyēnga echanjama, Bēngbe Utabná celoca chaojábobocna ora. Cha chabe puerta obenana bomna angelēngaftaca echanjabo, y chora bētscá iñetšēnga echántsemna. <sup>8</sup> Cha echanjabo chē Bēngbe Bētsábioye jtsabuatomama ndoñe montsebošēnga jabácastigayama,

y chë tšabe noticiënga Bëngbe Utabná Jesusbiamana doñe montsuenanëngbioynaca. <sup>9</sup> Chënga Bëngbe Bëtsá echanjácastigaye, nÿetsca tescama jtsapochócase; y Bëngbe Utabná bentsana bënoca mochantsemnënga, y ndocna te quemochatobenaye jinÿama Bëngbe Utabná tša bëtsá y obená bétsemnama. <sup>10</sup> Quem puerte uámana te, Bëngbe Utabná chaojésabo ora, nÿetsca chabe entšanga, nÿetsca chábeñe ošbuáchiyënga cha mochántsatschuanaye y mochántsichamo: “¡Tša obená cha yomna ca!” Y tšëngaftanga chëngaftaca šmochántsemna, er tšëngaftanga šmontsanošbuachë bënga ndegombre fsënjántatšëmbo soyënguiñe, chë bënga tcbonjanabuayená soyënguiñe.

<sup>11</sup> Chíyeca, chca chaotsemnama, nÿets tempo Bëngbe Bëtsábioye tšëngaftangbiamana fsëndëimpadana mercedo bomnënga chácmabiamama, chë vida chašmotsebomnama, ndayama cha tcmojúbuaja, y chabe obenánaca bëtscá chaoma tšëngaftanga chašmobená nÿetsca tšabe soyënga ntšamo šmojtsejuabnacá jamama, y chašmobená jamama ndaye soyënga ntšamo šmojtsamcá, Jesucristbeñe šmojtsošbuáchema. <sup>12</sup> Chca jtsamëse, tšëngaftanga šmochanjínÿanÿiye Bëngbe Utabná puerte bëtsá y uamaná bétsemnama, y cha echanjama tšëngaftanga más uamanënga chašmotsemnama. Chca echanjopása, er Bëngbe Bëtsá y Bëngbe Utabná Jesucristo tšëngaftangbiamana tšabe juabna ibobomna.

## 2

### *Chë Bëngbe Bëtsabe contra yomná*

<sup>1-2</sup> Mora atše sëntseboše Bëngbe Utabná Jesucristo jésabama orscama jáuyanama, chë bënga cháftaca tsbanánoca jteninÿenama ora. Básefta entšanga imojtsichamo chë bëts uámana te, chë Bëngbe Utabná jésabama te, ya tojóshjango ca; pero cbontsaimpadana, Jesucristbeyeca catšátanga, bëtscá šmochtsentšena chënga ndoñe chamondobená jamana tšëngaftanga inÿetšá juabna tšëngaftangbe ainaniñe chašmátsbomnama. Ndoñe šmatjóyeunaye nderado nda mëntšá chacmojtsëtsëtná ora: “Canÿe Bëngbe Bëtsabe juabna oyebuambnayá šonjáuyana chë Bëngbe Bëtsabe uámana te ya tojóshjango ca” o “canÿa chca šonjabuayená ca” o “Páblëbiocana tsbuanácha fsënjushache y chiñe entsayana chë te ya tojóshjango ca”. <sup>3</sup> Bëtscá šmochtsentšena ndocná tondáyeca chacmondáingñema. Er chë Bëngbe Utabnabe uámana te cabá ndóshjango ora, mallajta entšanga Bëngbe Bëtsabe amëndayama contra mochántsemna, y chë Bëngbe Bëtsabe contra yomná echanjábozna. Y cha entsemna nda



ibojtsemna infiernoca pochocaná jtsemnama. <sup>4</sup> Cha Bëngbe Bëtsabe contra echanjóyebuambaye, chë ndëmuanyëngbiana y ndaye soyëngama entsanga imojuabná diosënga imomnama contra echanjóyebuambaye. Chentsana cha echanjayana chëngbiana más obená yomna ca. Y Bëngbe Bëtsabe bëts yebnóynaca cha echanjámashëngo, choca echanjót'bema y entsanga echantsëtsëtsnaye ndegombre cha Bëngbe Bëtsá yojtsemna ca.

<sup>5</sup> ¿Chë soyama tsëngaftanga ndoñe šmondénabouínÿna? Atšë cabá tsëngaftangafaca sënjamna ora, chama sënjanoyebuambná. <sup>6</sup> Y tsëngaftanga šmondëtatšëmbo, nda mora yojtsama chë Bëngbe Bëtsabe contra yomná ndoñe chaondonÿnama, cabá chë tempo chca jopásama ndóshjango ora. <sup>7</sup> Mora ya mallajta entsanga puerta bacna soyënga tmojontšé amana, ndoñe ntšamo Bëngbe Bëtsá tojayancá chënga jamama yojtsamna ca, y bënga chë soyënga josértama ndoñe quemuátobena, ndayá nÿe Bëngbe Bëtsá chca šojinÿanÿese; pero ntšamo tchonjauyancá chë Bëngbe Bëtsabe contra yomnabiana ndoñe queochatëchnëngo, nÿa nda chë soyënga ndoñe chaondëtsemnama yojtsamábioye Bëngbe Bëtsá chabojtsejuaná ora aíñe. <sup>8</sup> Chora chë Bëngbe Bëtsabe contra yomná echanjábocna; pero Bëngbe Utabná yochjésabo ora, echanjángouo y echanjama cha chaóbanama; y tša buashinÿinÿanánaca y obenánaca echanjábocnama, chábioye bochantsepochóca. <sup>9</sup> Chë Bëngbe Bëtsabe contra yomná, Satanasbe obenánaca echanjabo, y entsanga bëts obenana echanjínÿanÿiye, y chë bëts soyëngaca entsanga ingñénënga mochántsemna. <sup>10</sup> Cha ba bacna soyënga echanjama ntšamo Bëngbe Bëtsá ndoñe yondbošcá, chca, ba entsángbioye nÿetsca soyënguiñe jáingñama. Y chënga ndegombre pochocánënga mochántsemna; Bëngbe Bëtsá chca echanjama, chënga chë ndegombre soyënga Jesucristbiana chëngbe ainaniñe ndoñe tmonjanóyëngaçñe causa, y chë soyëngama mo uámama soyëngcá ndoñe tmonjanjuabó causa, chca, atsebácanënga jtsemnama. <sup>11</sup> Chca causa, Bëngbe Bëtsá entseleséncia entsanga ingñénënga chamotsemnama, y chë ndoñe ndegombre soyënguiñe chamotsošbuáchema. <sup>12</sup> Bëngbe Bëtsá chca echanjama, nÿetscanga chë ndegombre soyënguiñe Jesucristbiana ndoñe tmontsošbuáchenga, chë bacna soyënga amama oyejuayënga tmojtsemnënga, chë nÿetsca tescama castigo chamotsebomnama jayanama.

*Bëngbe Bëtsá šojabacacá atsebácanënga jtsemnama*

<sup>13</sup> Pero bënga šontsamna nÿets tempo Bëngbe Bëtsá jtsatschuanayana tsëngaftangbiana, Jesucristbeyeca catšátanga, Bëngbe Utabnabe bonshánënga. Bënga, Bëngbe Bëtsá

fsëndëtschuaná cha quem luare cabá ndobojátša ora, atsebácanënga chašmotsemnama tcmojánabacacama. Bëngbe Bëtsá tcmojatsebacá er chë Uámana Espíritu Bëngbe Bëtsabe entšanga tcmojábiana, y tšëngaftanga chë ndegombre soyënguiñe šmojtsošbuaché. <sup>14</sup> Chë tšabe noticiënga bënga cbondábuayiyayeca, Bëngbe Bëtsá tcmojúbuaja chábenga chašmotsemnama. Cha tcmojúbuaja Bëngbe Utabná Jesucristbe obenana y buashinÿinÿanánënaca chašmotsebonnama.

<sup>15</sup> Chcasna, ndocna te šmattsajbaná ošbuáchiyana chë ndegombre soyënguiñe ntšamo tcbonjabuatambacá, cach tšëngaftangbeñe jóyebuambayëse y tsbuanácha jubuábiamëse, y ndocna te inÿetšá šmatjátsjuabnaye. <sup>16</sup> Bëngbe Bëtsá puerte tšabia endmëñayeca, cha šuababuánÿeshana y tojama bënga sempre añemo ainaniñe chamotsebonnama y chë mochjóyëngacñe tšabe soyëngama corente jtsošbuáchiyëse chamotsobátmanama. Chábioye y Bëngbe Utabná Jesucristbioye fsëntseimpadana, <sup>17</sup> chata chaboma tšëngaftanga bëtscá añemo ainaniñe chašmotsebonnama, y tšëngaftanga nÿets tempo chašmotsobena ntšamo tšabá yomncá jtsichámuama y jtsamama.

### 3

#### *Bëngbiana Bëngbe Bëtsá šmochtseimpadana*

<sup>1</sup> Y morna, Jesucristbeyeca bëngbe catšátanga, Diosmanda bëngbiana Bëngbe Bëtsá šmochtseimpadana, nÿetsca luarenache más ba entšanga chamotsobenama Bëngbe Bëtsabe buayenánana jouenama, y chënga chë soye chamóyëngacñama, y puerte chamotserrespetánama, ntšamo tšëngaftanga šmonjanmcá. <sup>2</sup> Bëngbe Bëtsánaca šmochtseimpadana cha chašotsëbuáyayama, y chë puerte bacna entšanga ndoñe chamondobenama jamama bënga fchaisufrima, er nÿetscanga ndoñe quemochatošbuáchiye chë fsëndbuayiyá palabriñe. <sup>3</sup> Pero Bëngbe Utabná sempre jtsamana ntšamo tojayancá, y cha echanjama tšëngaftanga más chábeñe chašmotsošbuáchema, y ndoñe nÿe cachcá quecmatënÿa chë bacna soyënga mandayá nÿe ntšámncana ndoñe chacmondáborlama. <sup>4</sup> Y Bëngbe Utabná entsama bënga ndegombre ainaniñe fchaitsejuabnama, ntšamo bënga tcbojanamëndacá mora šmojtsamama y cachcá sempre šmochtsamámncana. <sup>5</sup> Bënga, Bëngbe Bëtsá fsëntseimpadana, Bëngbe Utabná benache chacmanÿanÿé bonshánana jtsebonnama ntšamo Bëngbe Bëtsá endbomncá, y chašmojtsesufrina ora, corente añemo chašmotsebonnama, ntšamo Cristo tojansufrí ora yojanbomncá.

*Njyetscanga entsamna jtsetrabájayama*

<sup>6</sup> Jesucristbeyeca catšátanga, Bëngbe Utabná Jesucristbe mándoca cbontsamënda, ndëmua Jesucristbeñe ošbuachiyá jatrabájama ndoñe tontseboše y ndoñe tontsiyena ntšamo bënga tcbonjabuatambacá, cháftaca ndoñe šmattsóyebuambnaye.

<sup>7</sup> Cach tšëngaftanga tšabá šmondétatšëmbo ntšamo cmojtsamna jtsiyenana, ntšamo bënga fsënjoyencá: bënga tšëngaftangbeñe fsënjanियेना ora, nýe ntjatrabajacá oyënjayënga ndoñe queftsjatsmëna, <sup>8</sup> ni ndocnabe saná chibiáise, tondaye ntabuenaycá. Inýetšá enjamna; cada te bnété y ibeta jabuache fsënjantrabája, chca, tšëngaftanga ndoñe chacmondétsamnana bëngbe uajabótama bënga jatatsatnayama.

<sup>9</sup> Y ndegombre, bënga derecho fsënjánbomna tšëngaftanga jamëndama chašcújabuachama; pero masque chca, bënga jabuache fsënjantrabája tšëngaftanga chašmotsetatšëmbuama ntšamo yomna jtsiyenama, y chca chašmotsamama.

<sup>10</sup> Bënga tšëngaftangaftaca fsënjamna ora, mëntšá tcbonjanamëndá: Nda ndoñe tontseboše jatrabájama, cha cach ndoñe chaondétsesá.

<sup>11</sup> Chca fsëntsichamo, er bënga fsënjátatšëmbona, báseftanga tšëngaftanguentšënga imojtsiyena tondaye ntsamcá, pero tša chë inýengbe soyënguiñe jtsontremetënese.

<sup>12</sup> Chca oyena entšángbioye fsëntsabuayiyná y fsëntsamënda Bëngbe Utabná Jesucristbe mándoca, natjëmbana cachëngbe vida onguayiyne chamotsotrabájañama.

<sup>13</sup> Jesucristbeyeca catšátanga, ndoñe chacmondëumantšë tšabe soyënga amana.

<sup>14</sup> Nderado nda ntšamo quem tsbuanáchañe fsënjayancá ndoñe tontsuenana, šmochjarrepára nda cha yojtsemna y cháftaca ndoñe šmattsencuëntaye, chca, cha chaotsëuatjama.

<sup>15</sup> Mo canýe uayayacá ndoñe šmattsonýaye; šmochjabuayená mo canýe catšatcá, chca ndoñe chaondétsamama.

*Jtadiósoftanama*

<sup>16</sup> Bëngbe Utabná fsëntseimpadana, cha, chë entšanga tšabe ebionana ainaniñe chamotsebomna iuamá, chaoma tšëngaftanga nýets tempo y nýetsca tescama chca chašmotsebomnama. Bëngbe Utabná tšëngaftangaftaca chaotsemna.

<sup>17</sup> Nýe quem palabrenga tšëngaftanga jacheuayama cach atšbe cucuátšeca sëntsabianná. Atše chca sëndbauapochóca atšbe tsbuanachangá juabemama; ntšamo muentše entsabemancá entsinýinýná quem tsbuanácha atšbiácha iuamnama.

<sup>18</sup> Atše, Bëngbe Bëtsá sëntseimpadana, Bëngbe Utabná Jesucristo chaoma tšabe bendicionënga tšëngaftangbeñe chaotsemnama.

# 1 Timoteo

## *Jachuayama*

<sup>1</sup> Atše Pablo, Jesucristbe ichmoná sëndmëna. Bëngbe Bëtsá bëngbe atsebacayá endmëna y Bëngbe Utabná Jesucristo endmëna ndábeñe bënga, puerte jtsošbuáchiyëse mondobátmana ba soyënga bëngbiana cha yochjamama. Atše Jesucristbe ichmoná sëndmëna, er chata tbojanmandá atše chca jtsemnama. <sup>2</sup> Timoteo, atše quem tsbuanácha cbontsabobiamná. Atše Bëngbe Bëtsabe soyëngama entšanga sënjanabuayiyná ora, aca Jesucristbeñe tconjanošbuaché, y chca, aca mo atšbe ndegombre uaqiñacá tconjanóbema. Atše sëntseimpadana, Bëngbe Bëtsá Bëngbe Taitá, y Cristo Jesús Bëngbe Utabná, chaboma aca tšabe bendicionënga chacotsebomnama, chata chacmolastemama y ainaniñe tšabiana ebionana chacotsebomnama.

*Pablo chë ndoñe ndegombre soyënga abuátambayëngbiana chënga tojanabuayená*

<sup>3</sup> Ntšamo chë Macedonia luaroye chocana sënjëftsanbocna ora tcbonjanimpadacá, mora cachiñe chochtëtsimpáda. Efeso puebloca cochjoquéda, básefta entšanga chácua mëndama chë ndoñe ndegombre soyënga ndoñe chamondëtsabatambama, <sup>4</sup> ni nÿets tempo ndoñe nÿe chamondetsejuabná anteungbe cuentëngama, ni chë ba uabemana uabáinënga chë tempsca bëts taitangbiana. Er nÿe chca yapa jesejuabnayanentšana, jóbocnana nÿe ínÿengaftaca jabuachana enatsëtsnayıñe, y chca chëngbioye tondayama ntjujabuáchana ntšamo Bëngbe Bëtsá jamama yojuabnacá chaósertama. Chë soyna nÿe chábeñe jtsošbuáchiyëse jobenayana josértana.

<sup>5</sup> Chca mando entsemna nÿetscanga chamotsenbobonshánama, y chë bonshánana endóbocana nda chabe ainanentše ndocna bacna soyënga tondbomná bentšana, ntšamo tojtsamcá tšabá yojtsemna ca ainaniñe tojtsejuabná y tojtsetatšëmbuábentšana, y Jesucristbeñe ndegombre ošbuachiyábentšana.

<sup>6</sup> Báseftanga tmojtsajbaná chca jtsemnana y inÿe soyëngama tmojontšé juabnayana; chíyeca chënga mora imojtsentšena nÿe ndayámna ndoservena soyëngama enatsëtsnayana. <sup>7</sup> Chënga jtsebošana Bëngbe Bëtsabe ley abuátambayënga jtsemnama, pero chënga ndoñe yontsósertana ni ntšamo imojtsabatambacá, ni mo ndayánaca ntšamo chënga tmojtsichamcá, mo chë soyënga ndegombre cuaftsemncá.

<sup>8</sup> Pero bēnga mondētatsēmbō chē leyēnga tšabá yomnama; tšabá endmēna, chē ndayama chē leyēnga tmojuamcá entšá chē leyēngaca tojtsamēse. <sup>9</sup> Bēngnaca mondētatsēmbō, chē leyēnga ndoñe tmonjuama chē nyetsca soyēnguiñe tšabá amēngbiana. Chē leyēnga tmonjuama quemēntša entsānga jácastigama: ntšamo leyēnguiñe ndoñe tontselesenciancá amēnga y ntšamo Bēngbe Bētsá yobošcá ndámēnga, chē Bēngbe Bētsá ndoñe imondadoránēnga y bacna soye amēnga, Bēngbe Bētsá ndoñe mondērrespetánēnga y Jesucristbeñe jtsošbuáchiyana y Bēngbe Bētsá jtsadoránana tondaye yondoservena ca juabnayēnga, cachabe taitá o mamá obánayēnga y ndēmuanyēnga imomna entsānga obánayēnga, <sup>10</sup> boyabásaftaca o shembásaftaca bacna soye amēnga y boyabásenga cach boyabásengaftaca bacna soye amēnga, entsānga enēnga nye ínñabiama nyets tempo chamotseservénama, bosterēnga y chē nye bonamente Bēngbe Bētsabiama júrayēnga; chca entsayana, chē leyēnga yomna jácastigama nyetscanga ndēmuanyēnga ndoñe tmontsama ntšamo chē ndegombre buatēmbana soyēnguiñe iuayancá. <sup>11</sup> Ntšamo muentše chē leyēngama tijayancá, entsebuatēmbana chē Bēngbe Bētsábiocana puerte tšabe noticiēnguiñe, chē ndegombre buatēmbana soye; Bēngbe Bētsá, chē corente bendición bomná, šonjichmó chē buayenánana entsānga jabuátambama.

*Pablo Bēngbe Bētsábioye tbojtanchuá, tbojanlastemama*

<sup>12</sup> Atše, Bēngbe Utabná Jesucristo sēndētschuaná, er cha tojanjuabó, ntšamo cha šojanmandacá jobedésama atše tsjétsseprontanama, y chíyeca šojanábuayana atše chabiama chaitrabajama; y cha endmēna nda inétsama atše obenana chaitsebomnama chē trabajo jamama. <sup>13</sup> Cha chca átšeftaca tonjanma, masque tempo atše chabe contra ba soyēnga sēnjánichamo, chabe ústonēnga sēnjanēcama, y chabiama tondaye respeto ntsebomncá sēnjánenobuena. Pero Bēngbe Bētsá šonjanlastemá, er atše, Jesucristbeñe ošbuachiyá cabá ndoñe quetsjátanmēna, y chca, atše ndoñe quetsjátantatsēmbō ndayá tsjánamama. <sup>14</sup> Y chca, Bēngbe Utabná ba tšabe bendicionēnga atšbiama tonjanma, y chábeñe ošbuachiyá šonjánbema, y tonjanma atše cha chaitsebobonshánama y ínñengbioynaca. Cha chca bēngbiana tojama, bēnga cánñiñe mo canñacá Cristo Jesúseftaca bétsemnayeca.

<sup>15</sup> Ntšamo chanjayancá ndoñe nye bostero soye quenátsmēna, y nyetscanga entsamna chca ndegombre bétsemnama jtsejuabnayama: Cristo Jesús quem luaroye tonjánabo, bacna soye amēnga jabátsebacama, y chē bacna soye amēnguentše atše chē más bēts bacna soye amá sēndmēna.

16 Chíyeca, Bëngbe Bëtsá šonjanlastemá, jinÿanÿiyama cha puerte uantado entšangaftaca yomnama. Y chë soye ínÿengbioye tojaninÿanÿé, chë nÿetsca tescama yomna tšabe vida jtsebomnama, chë chábeñe mochtsanošbuachéngbioye; chca tonjaninÿinÿé cachá átšeftaca uantado jtsemnëse, atše nÿetscangbiama chë más bëts bacna soye amá jtsemnëse.

17 ¡Entšanga nÿets tempo chamotsinÿanÿná, chë Utabná nÿets tempo mandayá y puerte bëtsá y obená yomnama! Cha endmëna chë ndocna te echanjëftsobaná, chë entšanga ndoñe ntsobenana jinÿamá y chë nÿe canÿe Bëngbe Bëtsá yomná. Chca chaotsemna.

18-19 Timoteo, aca mo atšbe uaquiñacá condmëna. Atše tcbonjaimpadá, ntšamo tcbonjauyancá entšanga chacúyanama, ntšamo báseftanga Bëngbe Bëtsabe juabna oyebuambnayënga acbiama tmojanayancá, y chiñe jtsejuabnayëse chë Jesucristbe soyëngama chacopeliá y nÿets tempo chca chacotsama, Jesucristbeñe puerte jtsošbuáchiyëse, y lempe ntšamo tcojtsamama tšabá yojtsemnana ainaniñe jtsetatšëmbëse. Báseftanga, chënga ndoñe tšabá imonjëtsama ca chë ainanoca juabnënga tmojánayana ora, chë soye ndoñe tmonjanuena y chë causa, Jesucristbe soyënguiñe ošbuáchiyana tmojtsanajbananga y tmojanontsé inÿe buatëmbana soyënguiñe jtsošbuáchiyana. <sup>20</sup> Chca tonjopasá Himeneo y Alejandroftaca, y atše sënjalesenciá Satanás chaoma chata chabosufrima; y chca, chata chabuatsjinÿe Bëngbe Bëtsabiama ndoñe bacá ntsóyebuambnayana.

## 2

### *Pablo tojanabuayená ntšamo Bëngbe Bëtsá jtsadoránama*

<sup>1</sup> Nÿetsca soyama más cbontsaimpadana ndayá chë Jesucristbeñe ošbuáchiyënga Bëngbe Bëtsáftaca chamojtsencuénta ora, nÿetsca soyëngama ntšamo tojtsëjabotcá cha chamotseimpadana, nÿetsca entšangbiama, y cha sempre chamotsatschuaná. <sup>2</sup> Entsemna, nÿetscangbe tšabiama Bëngbe Bëtsá jtseimpadánama, pero masna quem luarentša reyëngbiama y inÿe mándayëngbiama, chca, nÿetscanga puerte natjëmbana jtsiyenama chamuetsobenama, y nÿetsca soyënguiñe tšabá jtsamëse, Bëngbe Bëtsá jtsatschuanayama, y entšangbe juabniñe tšabá chamotsemnana. <sup>3</sup> Chca jtsamana tšabá endmëna, y Bëngbe Bëtsá, bëngbe Atsebacayá, chama jtsóyejuayana; <sup>4</sup> y chca jtsóyejuayana, er cha endboše nÿetsca entšanga atsebácanënga chamotsemnana y chë ndegombre buayenánana chamotsábuatmama. <sup>5</sup> Chca nÿetsca entšangbiama endmëna, er nÿe canÿe Bëngbe Bëtsá nÿetscangbiama endmëna, y nÿe canÿa endmëna nda

yobena jamama entšanga tempcá tšabá Běngbe Bětsáftaca chamotsemnama; cha endmēna Jesucristo, cach entšá. <sup>6</sup> Er Jesucristo, mo canya ínŷenga játsebacama cuaftopagacá, chabe derecho vida jtsobomñama cachcá tojanonýa y tojanóbana, chca, nŷetsca entšanga chamotsobenama atsebácanēnga jtsemnama. Chē soye cha tonjaninýanýé, nŷa chama tempo yojtsemna ora, chē Běngbe Bětsá nŷetsca entšanga atsebácanēnga chamotsemnama yobošama. <sup>7</sup> Běngbe Bětsá chca nŷetsca entšangbiama yobóšeyeca, Jesucristo šojanábuayana chabe ichmoná jtsemnama, chabe soyēnga entšanga jtsabuayiynayama; ndegombre soye sēntsoyebuambná, ndoñe quetsátsbostero. Sonjanmandá chē ndegombre buayenánana chē ndoñe judiēngbioye jabuátambama, y chēnga entsamna chiñe jtsošbuáchiyana.

<sup>8</sup> Ntšamo sēnjayancá, atše sēntseboše nŷetsca chē Jesucristbeñe ošbuachiyēngcá enefjuana luarēnguenache, boyabásenga Běngbe Bětsáftaca chamotsencuēnta, y chora celoye, Běngbe Bětsábioye cucuatše chamatsbaná; pero chamna, ainaniñe bacna soyēnga ntsebomncá, ínŷengaftaca ntjatentjayanaycá, y ínŷengaftaca jabuachana ntjatenatsētsnaycá chēnga chamotsemna.

<sup>9</sup> Y atše sēntseboše shembásenga entšayangá chamu-atíchětjo, mo chē tšabe shembásenga mondbetsichětjoncá, ndoñe nŷe entšanga chamotsēbuáuatjama y ntšamo tmojtsichětjonama chēngna uámanēnga imomna ca entšanga chamotsejuabnama. Ndoñe quenátamna jtsenóbotamnayana, nŷa mo chca chquēcnēnga jtsemnēse, ni castellano soyēngaca o uámana fjantse ndětsbēngaca, o yapa uámana entšayangaca, chca, nŷe entšanga jinýama tšabá jtsemnama. <sup>10</sup> Pero aiñe mo chē Běngbe Bětsá adóraye shembásenga mondbetsamcá jtsamēse, chē tšabe soyēnga jtsamana.

<sup>11</sup> Nderado nda tojtsabuatambá ora, shembása bontsemna jtsatsjéndayana, chca ora tondaye ntjatichamcá, y chentša mándayēnga chaotsayaunana. <sup>12</sup> Atše ndoñe quichatsleséncia, canŷe shembása boyabásenga chaotsabuatambá, ni chaot-samēnda. Canŷe boyabása tojtsabuatambá o tojtsamēnda ora, shembása ndocá chaondětsichamo. <sup>13</sup> Chca chaotsemna, er Běngbe Bětsá natsana Adán tbojanpormá, y chentšana Eva; <sup>14</sup> y er Satanás Adánbioye ndoñe tbonjaningñé, ndayá chē shémbioye; y chca tbojaningñé ora, chē shema tojanma ntšamo Běngbe Bětsá ndoñe tbonjanlesenciácá. <sup>15</sup> Pero shembása atsbočaná echántsemna, básenga quem luaroye endbaúshejangoyeca, pero chamna, aiñe nŷets tempo Běngbe Bětsábeñe tojtsošbuáchese, nŷetscanga tojtsababuánŷeshanēse, cachá nŷetsca soyēnguiñe jenomándama tojtsobenēse, y nŷets

tempo tšabe soyënga tojtsamëse, ntšamo Bëngbe Bëtsabe entšanga mondbetsamcá.

### 3

*Ntšamo ibojtsemna chë ošbuachiyëngcá enefjuanëngbeñe mandayá*

<sup>1</sup> Mëntšá ndegombre endmëna: nderado nda tojtseboše canye trabajo jtsebomnama, cányentšë ošbuachiyëngcá enefjuanentšë chë inye ošbuáchiyënga jtsamëndayama, cha ndegombre yojtseboše canye puerte tšabe trabajo.

<sup>2</sup> Chýyeca, chë ošbuachiyëngcá enefjuanëngbe mandayá bontsemna jtsiyenana ba tšabe soyënga jtsamëse, chca, cha ndoñe tšabá yontsama ca ndocná chaondëtsichamuama. Y mëntšánaca cha bontsemna jtsemnama: nye canye shembásabe boyá; ntšamo jtsiyenama tšabá juabnayá chaotsemna, cachá nyetsca soyënguiñe jenomándama chaotsobena, y chaotsetátšëmbo ndayá ibomna tšabá jtsamana; chaotseprontana chabe yebnentšë posada entšanga júyentšamiama, y chaotsobena botamana abuatambayá jtsemnama.

<sup>3</sup> Ndoñe yapa tmoyá o penzentsero chaondëtsemna; pero chaotsemna tšabá mandbomná, entšanga natjëmbana chamotsiyenama bošá, y ndoñe chaondëtsejuabná nye crocénana jésebomnama.

<sup>4</sup> Chaotsetátšëmbo ntšamo nyetsca chabe yebnentša entšanga botamana jtsamëndayama, y chaoma chabe básenga chë ntšamo cha tojayancá chamotsamama, ndocna te stëtšoye chamondëquedama; <sup>5</sup> er, nda cachabe yebnentša entšanga ndoñe tontsobena jtsamëndayama, chca, ¿ntšamo nantsobena chë ošbuachiyëngcá enefjuanënga jtsanýenama?

<sup>6</sup> Cha ndoñe chaondëtsemna cabá mora cuenta Jesucristbeñe ošbuachiyá; aíñe chca chë ošbuachiyëngcá enefjuanëngbe mandayá tojtsemnëse, nderado nye cachá uámana entšá nantsenobiamnaye, y ntšamo Bëngbe Bëtsá Satanásbioye tbonjancastigacá, chca bëtsemnama, cach soyama Bëngbe Bëtsá chë entšábioye buanjacastíga.

<sup>7</sup> Chánaca bontsemna jtsiyenana jtsamëse, y chca chaojtsama ora, chë Jesucristbeñe ndošbuáchiyënga tšabá chabiamama chamotsichamo. Chë entšá ndoñe chca tontsamëse, chënga chabiamama mochanjayana ndoñe tšabá yontsama ca, y Satanás echanjama cha chabócochëngo bacna soyënga jamama.

*Ntšamo ibojtsemna chë ošbuachiyëngcá enefjuanënga ujabuachaná*

<sup>8</sup> Cachcá, chë mándayëngbe uajabuáchanënga mëntšá entsamna: uámana entšangcá nyetscanga chamotsétabna, uta palabra ndbomnënga; ndoñe yapa vínoye chamondëtsetmó,



y ndoñe chamondětseboše nje paselo beca crocénana jtsebomnama. <sup>9</sup> Chënga entsamna ndegombre jtsošbuáchiyana chë Bëngbe Bëtsá tojinñanyé soyënguiñe, chë ndayiñe bënga mondošbuaché, chëngbe ainaniñe inyetsá juabnënga ntjatsbomncá. <sup>10</sup> Natsana, chëngbiana botamana šmochjshuarrepára jtsetatšëmbuama chënga aíñe o ndoñe montsobena mo chë ošbuachiyëngbeñe mándayëngbe uajabuachanëngcá joserviama. Chënga nyetsca soyënguiñe tšabá tmojtsemnëse, šmochjálesenciaye chiñe chamoservema. <sup>11</sup> Cachcá, chë shémanga mëntšá entsamna: nyetscangbiana mo uámana entsangcá utabnënga, ndoñe uayátsenayënga, cachënga nyetsca soyënguiñe jenomándama obenënga, y nyétscañe tšabe palabra bomnënga. <sup>12</sup> Canye uajabuachaná chaotsemna nje canye shembásabe boyá, y chaotsetátšëmbo ntšamo chabe básenga y nyetsca chabe yebnentša oyenënga jtsamëndayana. <sup>13</sup> Chë uajabuáchanënga tšabá chiñe tmoservënëse, canye uámana puesto mochanjashjache, y chënga mochantsobena bëts añémoca jtsóyebuambnayama ntšamo Cristo Jesúsbeñe tmošbuáchema.

*Ndayá Bëngbe Bëtsá bënga šojinñanyecá, canye bëts  
buatëmbana soye endmëna*

<sup>14</sup> Atše sentsobátmana pronto chjjobenaye jama aca jauatsëtsayama; pero chca cbontsabobiamná, <sup>15</sup> nderado atše betscó jama ndoñe sënjobenase, chacotsetatšëmbuama ntšamo canya ibojtsemna nyetsca chë Bëngbe Bëtsábënga imomnëngaftaca. Chënga mondmëna chë Jesucristbeñe ošbuáchiyënga, chë Bëngbe Bëtsá Ainabe básenga. Chënga chë Bëngbe Bëtsabe ndegombre soyënga mondbomna chë más uámana puestoca quem luarentše, y tša mondëntšena chama inyëngbioye jáyëñanama. <sup>16</sup> Nya ndegombre endmëna, Bëngbe Bëtsá soyënga šojinñanyé, y chë soyëngaca bënga montsobena jtsiyenana, chë Bëngbe Bëtsabe entsanga imomnëngcá; chë soyënga bëngbiana ndegombre bëts buatëmbana soye endmëna, y chë buatëmbana soye mëntšá endmëna:

Cristo quem luarentše cach entsacá entsángbioye  
tojáneëbuacna.

Chë Uámana Espíritu tonjinñanyé cha nyetsca soyënguiñe tšabá  
amá yomnama.

Angelënga cha tmojáninye, y chabiana ba luarënguentša  
entsángbioye tmojanabuayená.

Ba entsanga quem luarentše chábeñe montsanošbuaché, y  
Bëngbe Bëtsá celoye tbontanatsbaná, cha puerta bëtsá  
y obená yomnama jinñanyëse.

## 4

*Báseftanga chë tšabe benachentsana mochtsojuánañe*

<sup>1</sup> Uámana Espíritu, nyetscanga catafjosertaycá tojayana, quem luare jopochócama tempo chaojtsobeco ora, básefta entsanga camochtsajbaná ošbuáchiyana chë ndayiñe bënga Jesucristbiana mondošbuaché soyënguiñe ca. Chëngna, espíritënga entsanga áingñayënga mochántsayayana, y chë ndoñe ndegombre soyënga chë bacna bayëjënga entsángbioye mochtsabuátambaye soyënguífñaca. <sup>2</sup> Chca buatëmbana soye jtsóbocanana chë bacna entsanga ntšamo ndegombre tmojuabnacá ndinýinýnayëngbentsana y chë bosterëngbentsana. Chënga chca bacna soye tmojtsama ora, ainanoca ndoñe ntsejuabnayana, ntšamo tmojamcá ndoñe tšabá yontsemna ca, er yapa bacna soyënga tmojama causa, chënga nýe chca chëngbe ainaniñe jésejuabnayana. <sup>3</sup> Quem entsanga ndoñe ntjaleséciana ínýenga chamotsobouamama, y jtsemándayana básefta sananga entsanga ndoñe chamondëtsesama. Ntšamo chënga chiñe tmojtsebuatëmbacá ndoñe ndegombre soye ntsemnana, er Bëngbe Bëtsá chë sananga tojanma, Jesucristbeñe ošbuáchiyënga y chë ndegombre soyënga uabuátmënga chamóyëngacñama, Bëngbe Bëtsábioye chama jtsatschuanayëse. <sup>4</sup> Er lempe ntšamo Bëngbe Bëtsá entsanga chamosama tojamcá tšabá entsemna. Ndoñe quešnátamna ndaye saná jtsaboténana, bënga chë saná tmojuáyëngacñe ora, Bëngbe Bëtsá chama tmojëtschuase; <sup>5</sup> er chca saná Bëngbe Bëtsábioye tšabá jtsinýnana, cachá chca tojayánayeca, y bënga chë sanama cha mondbatschuayama.

*Jesucristbiana trabájayiñe canýe tšabe oservená*

<sup>6</sup> Aca, chë soyënga ošbuachiyëngbioye chacojtsabuátambase, aca Jesucristbiana trabájayiñe canýe tšabe oservená cochántsemna. Y mo nda bëtscá añemo jtsebojnana botamana tojtsesacá, cachcá, ácnaca puerte ošbuáchiyana y ainaniñe bëts añemo cochántsebojnana; chca echántsemna, chë bënga mondošbuaché buayenana soye aca icuatsjendá y icoyeunánayeca, y ntšamo chë tšabe buatëmbana soyënguiñe endayancá sempre icuámayeca.

<sup>7</sup> Pero ndoñe nýe quem luarentša entsangbe cuentënga y ndoservenana cuentënga cattsuenana. Ba soyënga cochjama aca bëts añemo ainaniñe chacotsebojnana, mo nda bëts añemo jtsebojnana cachabe cuérpoca ba soyënga cuaftsamcá, ntšamo Bëngbe Bëtsá jadórama yomncá jtsiyenama jtsamëse; <sup>8</sup> cachabe cuérpoca ba soyënga jamana más añemo

jtsebomnama, aínne batšatema endoservena; pero jtsiyenanana Bëngbe Bëtsábioye jadórama yomncá jtsamëse, puerte enduámána y juajabuáchana nyetsca soyënga tšabá chaotsemnama; chca jtsamana puerte tšabá endmëna cachabe vidama quem luarentše, y chë inye vidócnaca. <sup>9</sup>Ntšamo tijayancá ndegombre entsemna, y nyetscanga entsamna jtsejuabnayana chca ndegombre bëtsemnama. <sup>10</sup>Y chë soyama bënga puerte mondëtrabája y mondësufrina, er chë Bëngbe Bëtsá Ainábeñe puerte mondošbuachéyeca, bënga mondobátmana cha yochjama soyënga bëngbe tšabiama. Cha endmëna chë nyetsca entšangbe atsebacayá, pero ndegombre masna, chábeñe ošbuáchiyëngbe atsebacayá cha endmëna.

<sup>11</sup>Ntšamo quem soyëngama tcbonjauyancá entšanga cochtsamëndaye y cochtsabuátambaye. <sup>12</sup>Ndoñe catjaleséncia, aca bobontse comnama, ndánaca chacmotsáboyënjama. Pero aínne bëtscá cochtsama, chënga puerte chacmotserrespetánama, chca jtsamëse icoyenama jtsonyáyëse, cachcá chamotsamama: botamana jtsóyebuambnayëse, nyets tempo tšabe soyënga jtsamëse, nyetscanga jtsababuányëshanëse, Bëngbe Bëtsábeñe corente jtsošbuáchiyëse, y puerte tšabia jtsemnëse, ainaniñe ndocna bacna soye ndbomná. <sup>13</sup>Atše choca chaijashjanguëntscuana, cochtsentšena chë Bëngbe Bëtsabe uabemana palabrénga entšángbeñe jtsaliáyama, y chënga jtsabuátambayama y jtsabuayiynayama. <sup>14</sup>Acbioye Bëngbe Bëtsá obenana tcmojanatšetá tšabe soyënga jamama chacotsobenama, ošbuáchiyënga jujabuáchama. Bëngbe Bëtsabe juabna oyebuambnayënga acbiama tmojanoyebuambá ora, y chë ošbuachiyënguentša bëtšëjëmënga chëngbe cucuatšënga ácebeñe tmonjancjá y Bëngbe Bëtsá acbiama tmonjanimpadá ora, chca tšetana obenana tcojanóyëngacñe. Chë soye sempre cochtsinyëna.

<sup>15</sup>As, aca cmontsemna sempre jtsamana chë soyënga ntšamo tcbonjauyancá. Cochtsentšena chë soyënga tšabá jtsamama, chca, entšanga chamobená jinýama, aca cada te más tšabá lempe cojtsamama. <sup>16</sup>Botamana cochtsantješna, aca chë tšabe soyënga jtsamëse cojtsiyenama, y chë tšabe buatëmbana soye ínýenga cojtsabuátambama. Cada te chca cochtsama, y chca, cach aca cochanjenájabuache atsbočaná jtsemnama y chë ácbioye ouenanëngnaca játsebacama.

## 5

*Ntšamo Timoteo ibojtsemna chë inye ošbuáchiyëngaftaca jtsemnana*

<sup>1</sup>Bëtšëjëmënga ndoñe catjucácana; chca játamamna, cochjábuaenaye, chënga mo cach acbe taitá cuaftsemncá;

y chë bobontsëngaftaca cochjama, mo chënga acbe catšátanga cuaftsemncá. <sup>2</sup> Chë bëtsanana shembásengaftaca tšabá cochtsemna, chënga mo cach acbe mamá cuaftsemncá; y chë tobiasëngaftaca cochjama, chënga mo acbe uabénanga cuaftsemncá; chëngaftaca cmontsemna puerte tšabia jtsemnana, chëngbiana ndocna bacna juabnënga ainaniñe ntsebomncá.

*Ošbuáchiyëngbenache viudanga tmojtsemna ora*

<sup>3</sup> Chë ndegombre viudanga, chë ndocná mondbomna chaújabuachama, chënga cochtsarrespetana y cochtsëjabuachana. <sup>4</sup> Pero canye viudá nderado básenga o nietënga tuabamna, chënga entsamna natsana jshauatsjínýana ndayá chënga chamotsamama Bëngbe Bëtsá yobošcá, cachëngbe pamíllanga chamotsarrespetánama, chëngbioye jtsanyëne, y chëngbe bëtsëtsangaftaca tšabá chamotsama, ntšamo chënga chëngaftaca tmojanmcá, er chca jtsamama, Bëngbe Bëtsá jtsóyejuayana. <sup>5</sup> Chë ndegombre viudá, chë juajabuáchama ndocná tbondbomná, Bëngbe Bëtsábeñe jtsošbuáchiyëse, cha bochjuájabuachama jtsobátmanana, y nyets tempo jtseimpadánana, bnëtë y ibeta, cha chabuájabuachama. <sup>6</sup> Pero canye viudá, nye quem luarentša entšángaftaca oyejuayá jtsemnama soyënga tojtsamëse, cha masque ainá tojtsemna, Bëngbe Bëtsabe bominýiñe mo canye obanacá jtsemnana, er chábioye ndoñe ntseeservénana. <sup>7</sup> Lempe chë soyënga chamotsamama ošbuáchiyënga cochtsamëndaye, chca, ndocná ndocna bacna soye chëngbiana jatichámuama chaondëtsebomnana. <sup>8</sup> Er, nda cachabe entšanga y más, cachabe pamíllanga ndoñe tontsacuedana, cha chca jtsinýinýayana chë buatëmbana soyënga, ndayiñe bënga mondošbuaché, ndegombre soyënga ndoñe yondmëna ca yojtsejuabnama, y cha chë ndoñe ošbuáchiyëngbiana más bacna entšá jtsemnana.

<sup>9</sup> Chë jujabuáchama viudanga imuábemana lístañe, chaotsábemana chë viudá chnënguana bnëtsana uatama más yobomná, y nye canye boyá ibnabomná. <sup>10</sup> Entšanga cha chamotsábuatma mo canye tšabe soyënga amacá: chabe básenga botamana tojabëché, áshjajnënga chabe yebnentše posada júyentšamiama prontaná, Bëngbe Bëtsabe entšanga imomnënga tojushecjabebé, chë imosufrínënga tojújabuache; jayanana, nda sempre nyetsca tšabe soyënga jamama yontšená.

<sup>11</sup> Pero chë lístañe, chë viudanga chnënguana bnëtsana uata cabá ndbomnënga ndoñe catjúbiana; er chë chëfta uata ndbomnënga, yapa nye cachënga tšabá jtsemnama juabnënga jtsebomnana y soyënga jtsamana. Chcase,

chënga Jesucristbioye ya ndoñe ntseservénana, y chora jtsebošana cachiñe jtëtóbouamayama; <sup>12</sup> y chca, ínÿenga chëngbiana mochanjayana ndoñe tšabá montsama ca, chënga chë ntšamo tempo Bëngbe Bëtsá tmojanšbuachenacá chënga ndoñe tmonjamama. <sup>13</sup> Y cabá más, tondaye ntsamcá tmojtsemna ora, chënga juabouinÿana oyënjayënga jtsemnama, y yebnënguenache jtsanama; y ndoñe nÿe oyënjayënga, sinó oinÿanëngnaca, ínÿengbe soyënguiñe jtseyentšbëtsjuanëse, y ndoñe yontsemna jayanama soyënga jtsichámëse. <sup>14</sup> Chíyeca, atše sëntseboše, chë viudanga cabá tobiašëngna chamuatobouamá, básenga chamotsabamna, y chamotsobena cachëngbe yebnënguenache jtsemándayana; y tondaye chamondëtsama, chca, bëngbioye uayayënga chamuayana, chënga chca ndoñe tšabá montsama ca. <sup>15</sup> Atše chca sëntsichamo, er básefta viudanga cabá tobiašënga tmojtsajbaná Jesucristo obedecénana, y tmojontšé Satanás joyeunayana.

<sup>16</sup> Canÿe shembása, Jesucristbeñe ošbuachiyá, nderado chabe pamíllangbeñe viudanga tojtsabamna, cha bontsemna chënga jujabuáchana, chca, chë ošbuachiyëngcá enefjuanënga ndoñe chaondëtsamna chëngbiana játantješnana; chca, chë ošbuáchiyënga mochanjobenaye chë ndegombre viudanga, chë chaújabuachama ndocná mondbomnëngbioye jujabuáchama.

*Ntšamo cuantsemna chë ošbuachiyëngbeñe amëndayëngaftaca*

<sup>17</sup> Chë bëtsëjemënga, tšabá chë ošbuachiyëngcá enefjuanënga tmamëndangna, jtsomerecénana entšanga más chamotsarrespetánama, chca trabajo bëtsamama, y más, chë sempre entšanga jtsabuayiynayama y jtsabuátambayama imontšenëngbioye. <sup>18</sup> Er Bëngbe Bëtsabe uabemana palabrenguiñe endayana, mëntšá: “Aca canÿe toróftaca shajuana tmojtsatbaná luariñe chacojsetrabája ora, ndoñe catjuanguëtsenaye ca”; ínÿoca: “Chë trabajayá merecido jtsebuájonana juácánama ca”. Chíyeca, chë bëtsëjemëngcá amëndayënga jtsomerecénana entšanga chamotsarrespetánama.

<sup>19</sup> Nderado nda tmojáuyana canÿe bëtsëjemá bacna soye tojama ca; pero útata o unga entšanga más ndoñe tmontsemna, chca tojamama tmojinÿe, y chë bëtsëjemá mal quedayá ndegombre soye yojtsichamo ca ndoñe tmonjayana, ndoñe catjóyeunaye.

*Inÿe soyëngama jábuayenama*

<sup>20</sup> Chë bëtsëjëmënga nÿe bacna soyënga tmojtsamënga, nÿetsca entšangbe delante cochjucácana, chca nÿetscanga uatjana chamuishache, bacna soye amama castigo mochtsebonnama.

<sup>21</sup> Atše cbontsemánda, Bëngbe Bëtsabe delante, Jesucristo y Bëngbe Bëtsabe bocacana angelëngbe delante, chë mandënga chacotsamama; pero ndoñe catjayana canÿe bëtsëjema tšabá o ndoñe tšabá tonjama ca, cabá ndoñe lempe botamana ndabonÿe ora, ni canÿe entšá ínÿengbiama más tšabá ntjatacacnaycá. <sup>22</sup> Ndocnabe bestšašiñe cucuatšënga catjájajua, Bëngbe Bëtsábioye chabiama jaimpádama, jinÿinÿiyama cha mo canÿe bëtsëjema amëndayacá joserviama yojtsobenama, nÿe betscó, juabuáyanama botamana ntjenojuaboycá. Pero nÿe ntjenojuaboycá chca tcojamëse, y cha canÿe bacna soye amá tomnësna, ácnaca cochántsemna mo chabe bacna soyënga cuafjamcá. Cochtsantješna ndocna bacna soyënga ainaniñe chacondëtsebonnama.

<sup>23</sup> Aca ba soye uafsbiaca condbëtsešoca causa, ndoñe más nÿe ena búyeshe cattseftmana, sinó base vínoynaca.

<sup>24</sup> Entšanga mondobena tšabá jinÿana, básefta entšangbe bacna soyënga, cabá chë soyëngama chëngbioye botamana ntjátjaye ora; pero ínÿengbe bacna soyëngama, nÿe tcojátjayentšana entšanga chama jtsetatšëmbuana. <sup>25</sup> Cachcá, báseftanga entšangbe delante tšabe soyënga jtsamana, y cachora chë soyëngama jtsotatšëmbuana; y ínÿengna iytëmcá tšabe soyënga jamana, pero masque chca, ndayténaca chë tmojanma tšabe soyëngama ínÿenga mochanjátatšëmbona.

## 6

<sup>1</sup> Chë nÿets tempo nÿe ínÿabiama oservénënga entsamna, chëngbe nduiñëngbiama jtsejuabnayana, chënga uámana entšanga imomnana y nÿets respeto jtsebonnama imomerecénama. Chca entsamna, Bëngbe Bëtsabe Uabainama y chabe soyëngama, ndayiñe bënga mondošbuaché y entšanga mondbëtsabatambaye, ínÿenga podesca ndoñe chamondëtsóyebuambnama. <sup>2</sup> Y chë imobomna Jesucristbeñe ošbuáchiyënga nduiñënga, chëngbioye nÿe batšá ndoñe chamondëtsarrespectana, er chënga Jesucristbeyeca chëngbe catšátanga mondmëna, y entsamna más tšabá jtsaservénana, er chëngbe trabajuentša tšabe soyënga imóyëngacañe, Jesucristbeñe ošbuáchiyënga mondmëna, y Bëngbe Bëtsabe bonshánënga.

*Jtsiyenana Bëngbe Bëtsá jadórama soyënga jtsamëse, endmëna chë ndegombre bomnana*

Quem soyënga cmontsamna entšanga jtsabuátambayana, y becá jtsëtsësnayana chca chacmóyaunama: <sup>3</sup> Nderado nda

inÿe soyënga tojtsabuatambá, y ntšamo bënga mondëjuabnacá, chë Bëngbe Utabná Jesucristbiana ndegombre buatëmbana soyama, ni chë buatëmbánana ntšamo jtsiyenama Bëngbe Bëtsábioye jadórama yomna soyënga jtsamëse, ndoñe cachcá bëngcá tontsejuabnase, <sup>4</sup> cha nÿe cachá puerte uámana entšá yojtsenobiamná, y tondaye ndosertaná yojtsemna. Cha tša jtsogustánana ba soyëngama y palabrëngama jabuachana jtsenatsëtsnayana, y cha nÿe chama vida jësebomnana. Cha chca yomna causa, nÿe jtsebošana chë inÿa tojashjache soyënga jtsebomnama, nÿetscanga ndoñe cachcá chamondëtsejuabnama jtsamana, ínÿengbioye joyáanguanguama jtsebošana, bacna soyënga ndoñe ndegombre soyënga ínÿengbiana jtsejuabnayana, <sup>5</sup> y ínÿengaftaca nÿe sempre jtsenpenzétsiyana, er chëngbe juabniñe nÿe bacna soyënga jtsebomnana, chë ndegombre soyënga quematábuatma, y jtsejuabnayana chë soyënga Bëngbe Bëtsá jadórama jtsamana, nÿe más soyënga jóyëngacñama yoservena ca. <sup>6</sup> Ndegombre canÿe entšá bëtscá tšabiana jëftsashjáchana, cha tojtsiyena Bëngbe Bëtsábioye jadórama soyënga jtsamëse, y sempre oyejuayá nÿe chë tojtsebomna soyëngaca tojtsemnëse. <sup>7</sup> Er bënga tmojanonÿná ora, quem luaroye bëngaftaca tondaye tmonjániyëbo, y quem luarentšana cach tondaye quemochatobenaye jëftsocñama. <sup>8</sup> As, bënga ndayá jasama y ndayá jtichëtjuama tmojtsebomnëse, chë soyëngaca oyejuayënga mochtsemna. <sup>9</sup> Pero chë bomnënga jtsemnama tmojtsebošënga, bacna soyënga jamama tojócochëngo ora, ndoñe ntsemorochana y pronto chiñe jotsatšana, mo bayá uachmaniñe cuafjotsatšcá, chë entšanga Satanasbe cucuatšiñe ndeolpe jotsatšana; chora chënga jtsamana soyënga mo chë juabna ndbomnëngcá, y chë cachëngbiana ndoñe tšabe soyënga tmojtsamëngbe juabnëngaca. Y mo chë uándbemana barco, bëts búyeshe asentoye tojtsenatjëmbcá, cachcá, chë bacna juabnënga bomnama, chëngbioye mochántsapochocaye y nÿetsca tescama mochántscastigaye. <sup>10</sup> Crocénana jtsebomnama yapa jtsebošana, jamana entšabe ainanentšana nÿetsca bacna juabnënga y soyënga chaóocnama; y básefta entšanga, crocénana jtsebomnama yapa jtsebošana causa, tmojtsajbaná ošbuáchiyana chë Bëngbe Bëtsabe soyënguiñe, chë bënga mondošbuaché soyënguiñe, y chca cachëngbiana tmojama puerte chamosufrima y bëts ngménana jtsebomnama.

*Chë tšabe soyama jtsenojuerzánama, ošbuáchiyana sempre chaotsemnama*

<sup>11</sup> Pero aca, Bëngbe Bëtsabiana oservená, chca benachentšana cochtsojuánañe. Nÿa cochtsentšena,

chë Bëngbe Bëtsabe bominiñe tšabá yomncá jtsamama, chë ndayá Bëngbe Bëtsá jadórama yomncá jtsamama, Jesucristbeñe puerte jtsošbuáchiyama, nyetscanga jtsababuányeshanama, Bëngbe Bëtsábeñe jtsobátmanëse puerte uantado padecena soyënguiñe jtsemnama, y corente jtsababuányeshanëse nyetscanga chacotsënyayama. <sup>12</sup> Chë tšabe soyama, ošbuáchiyana joboguiyanama cochtsenojuerzana. Chë nyetsca tescama yomna tšabe vida cochjashjache; chama Bëngbe Bëtsá tcmojanchembo y bëtská entsangbe delante tconjánayana tšabe soyënga Jesucristbiamama, ndayiñe aca icošbuaché. <sup>13</sup> Y mora, Bëngbe Bëtsabe delante, nda endbama lempe ntšamo quem luarentšë yobinýncá vida chaotsebomnama, y Jesucristbe delante, ntšamo cachabiamama ndegombre bemncá Poncio Pilatbe delante lempe tojanayaná, chatbe delante cbontsemánda, <sup>14</sup> lempe cochjama ntšamo tbonjauyancá, ndocna soye chacmondëntsashbe jamama, y cochtsiyena, ntšamo ndocná tondaye chaondëtsebomna jayanama aca bacna soye tcojama ca. Y chca cochtsama Bëngbe Utabná Jesucristo quem luaroye yochjésabëntscuana. <sup>15</sup> Y nya chë soyama chë tempo chaojóshjango ora, Bëngbe Bëtsá chca echanjínyanýiye, er cha endmëna chë corente bendición bomná y chë nye canýe Mandado. Cha nyetsca reyëngbiama, chë más uámana Rey, y nyetsca amëndayëngbiama, chë más uámana Utabná. <sup>16</sup> Nyë cha ndoñe bondmëna ndocna te ntjóbanana, y cha canýe bëts buashinýinýana luarentšë endoyena y choye ndocná yondobena jobéconana. Cha ndocná tbonjinýe y ndocná yondobena jinýana. ¡Entšanga nyets tempo chamotsinýanýná cha puerte bëtsá y obená bëtsemnama! Chca chaotsemna.

<sup>17</sup> Chë quem luarentša soyëngaca bomnënga imomnënga, cochjámëndaye enábotamnayënga ndoñe chamondëtsemnama, ni lempe tšabá yochjóbcnana, bëtská soyënga bëtsebomnama ndoñe chamondëtsobátmana, er chë tcobomna soyëngama ndoñe ntsótatšëmbuana ndayëntscoñama chca mochtsebomnama; pero aiñe, Bëngbe Bëtsábeñe jtsošbuáchiyëse, chënga chábeñe chamotsobátmana. Cha endmëna chë sempre bëtská soyënga šnetsatšatnayá; y chca, cha jamana bënga chamotsobena nyetsca chë soyëngaca oyejuayënga jtsemnama. <sup>18</sup> Ntšamo tšabá yomncá chënga chamotsama, ba tšabe soyënga chamotsama, y sempre tšabe ainánaca chamotseprontana entsanga ba soyënga jatšatayama, y ndaye tmobomna soye entsángaftaca jenájatayama. <sup>19</sup> Mo nda bëtská shajuana tojtsábuajo y jtsetatšëmbuana yochtsebomna más chcoye jasama, cachcá, quem bomnënga ba tšabe soyënga tmojtsamëse, mochántsetatšëmbo chënga bëtská tšabe



bendicionënga más chcoye mochtsebomnama. Y chënga chë soyënga tmojtsamëse, chënga chë ndegombre vida, chë nyetsca tescama yomna tšabe vida mochanjëftsashjache.

*Inje soye Timotéobioye tbojanbonjë*

<sup>20</sup> Timoteo, ndayá Bëngbe Bëtsá tcmojabonyecá, botamana cochtsinyëna. Entšanga nje quem luarentša soyëngama encuëntayana, ndoñe cattsuënana, ni chë ndoservena soyëngama jabuachana enatsëtsnayana, chë ndayama entšanga jtsichámuana becá osertánanentšana chca yóbocana ca, pero ndegombre chca ndoñe ntsemnana. <sup>21</sup> Atše chca sentsichamo, er báseftanga chca osertánana imobomna ca ichámënga, Jesucristbeñe ošbuáchiyana y chë bënga mondošbuaché soyënguiñe ošbuáchiyana tmojtsajbaná.

Atše, Bëngbe Bëtsá sëntseimpadana, ácebeñe tšabe bendicionënga chaotsemnana.

## 2 Timoteo

### *Jachuayama*

<sup>1</sup> Atše Pablo, Jesucristbe ichmoná sëndmëna, Bëngbe Bëtsá chca yobóseyeca. Jesucristo šonjichmó entšanga jábuayenama Bëngbe Bëtsabe šbuachenánama, ntšamo cha inétsamama entšanga chë nýetsca tescama yomna tšabe vida chamotsebozna; y chca vida montsebozna Cristo Jesúsfeftaca cánýiñe mo canýacá bétsemnayeca. <sup>2</sup> Atše quem tsbuanácha cbontsabobiamná, acbiamá Timoteo, aca mo atšbe bonshana uaquiñacá, Cristbeñe condošbuachema. Atše sëntseimpadana, Bëngbe Bëtsá, Bëngbe Taitá, y Jesucristo, Bëngbe Utabná, chaboma áceñe tšabe bendicionënga chaotsemnana, chata ácbioye chacmolastemama, y acbe ainaniñe tšabe ebionana chacotsebozna.

*Ndoñe ntsëuatjana entšángbeñe Jesucristbiamá jóyebuambayama*

<sup>3</sup> Sempre Bëngbe Bëtsáftaca stsencuénta ora, acbiamá sëndbëtsenojuabnaye, y acbiamá sëndbëtsatschuanaye bnëté y ibeta; y Bëngbe Bëtsá endmëna nda atše sëndëservena, ainánaca jtsejuabnaye y jtsetatšëmbëse, ntšamo atše stsamcá tšabá bétsemnana, cachcá ntšamo atšbe bëts taitanga tmojanmcá. <sup>4</sup> Atše sëndbëtétenojuaboje ntšamo aca, chocana atše sëntanabo ora shëchbuiye tconjanoperdema, y chíyeca atše tša sëntseboše aca jtétinýama, atše puerte oyejuayá chaitsemnana. <sup>5</sup> Bëngbe Bëtsá acbiamá sëndbatschuaye, er atše sëndbátenojuaboje aca Jesucristbeñe ndegombre ošbuáchiyana condbomnana. Natsana, acbe bëts mamá Loida, y chentšana acbe mamá Eunice chábeñe bontsanošbuáchiye, y ácnaca cachcá tcojamama atše puerte sëndétatšëmbo.

<sup>6</sup> Chíyeca sempre cochtsantješna quem uámana soyama: Mo nda canýe shinýañe tojtsajuinýinýnacá, chentše sempre chaotsoiñama, cachcá aca, chë Bëngbe Bëtsá tmojatšetá obenana tšabe soyënga jamama, sempre cochtsinýena. Chë obenana aca conjanóyëngacñe, atšbe cucuatšënga acbe bestšašñe sënjanjajó y Bëngbe Bëtsá acbiamá sënjanimpadá ora. <sup>7</sup> Er Bëngbe Bëtsá tonjama bëngbe ainaniñe Uámana Espiritu chaotsemándama, uatjana ndoñe ntsebozna, ndayá obenana bënga chamotsebozna, bonshánana Bëngbe Bëtsabiamá y nýetscangbiamá chamotsebozna, y cabënga jenomándama chamotsobenama. <sup>8</sup> Chíyeca, ndoñe cattseuatja entšanga jáuyanama, ntšamo tcojinýe y cojtsetatšëmbcá Bëngbe Utabnabiamá ndegombre bétsemnana; ni atšbiamá

ndoñe cattseuatja, atše cárceloye sëndutámenama, chabiamama oservena causa. Chamna, chë Bëngbe Bëtsá cmochanjátsetaye obenánaca, sempre cochtseprontana jasúfriama, átseftaca y ínÿengaftaca, entsanga tšabe noticiënga abuayiynaye causa. <sup>9</sup> Bëngbe Bëtsá endmëna nda bënga šojatsebacá, y šojáchembo jtsiyenama mo chábenga imomnëngcá jtsamëse. Y cha chca tojama, ndoñe nderado bënga ndaye tšabe soye tmojamama, ndayá cachá chca chaotsemnama inabóšeyeca y bëngbe tšabiamama juabna bómnyayeca. Cha chca inajuabnaye, cabá quem luare ndmëna orscana; y chca jamama Bëngbe Bëtsá inajuabnaye, chë ndayá Cristo Jesús bëngbiamama jamama sóyeca. <sup>10</sup> Y mora, Bëngbe Atsebacayá Jesucristo tojáboyeca, Bëngbe Bëtsá šojinÿanyé cha bëngbe tšabiamama juabna yobomnama. Jesucristo tonjama, entsanga nÿetsca tescama obanënga ndoñe chamondëtsemnama, y tonjama bënga chamotsetatsëmbuama, chë tšabe noticiënga chabiamama jounëse y joyeunayëse, bënga chë nÿetsca tescama yomna tšabe vida mochjábomnama, ndoñe nÿe jopochócama cuerpënguiñe.

<sup>11</sup> Bëngbe Bëtsá šojanábuayana tšabe noticiënga entsanga jábuayenama, Jesucristbe ichmoná jtsemnama y entsanga jabuátambama. <sup>12</sup> Chë causa, atše mora cárceloca quem soyënga sëntsesufrina; pero chama atše ndoñe quetsátëuatja, er atše sëndëtatšëmbo ndábeñe atše stošbuáchemama, y corente sëndëtatšëmbo cha yobena jtsinÿenana ndayá šojabonÿecá, chë ndayté cha yochjésabëntscuana.

<sup>13</sup> Nÿets tempo, chë ndegombre buayenánana, ndayá átšbentšana tconjanuencá, entsanga cochtsabuayiynaye, entsanga jtsinÿanÿayëse aca Jesucristbeñe icošbuáchemama, y Bëngbe Bëtsá y nÿetscanga icuababuánÿeshanama, y chca yomna aca Cristo Jesúsëftaca cánÿiñe mo canÿacá bëtsemnayeca. <sup>14</sup> Chë Uámana Espíritu, chë bëngbe ainaniñe endoyenabe uajabuáchenanaca, ntšamo Bëngbe Bëtsá tcmojabonÿecá sempre cochtsinÿena.

<sup>15</sup> Ntšamo ya condëtatšëmbcá, nÿetsca ošbuáchiyënga Asia luaroquënga cachcá šmonjesonÿá, y chentše bontsemna Figelo y Hermógenes. <sup>16</sup> Pero Bëngbe Utabná Onesíforbe pamíllanga chaotsalastemana, er cha ba soye šonjanañemó, y atše cárceloye utámenama cha ndoñe quenjatëuatja. <sup>17</sup> Masna, Romoye tojabánashjango ora, cha botamana šojánguango y šonjáninÿena. <sup>18</sup> Bëngbe Utabná lastemado cháftaca chaotsemna, ntšamo nÿetscanga tmojamcá tšabá o ndoñe tšabá yontsemnama cha yochjayana ora. Aca corente condëtatšëmbo ntsachetsá Onesíforo Efeso pueblaca šonjanëjabuachama.

## 2

*Jesucristbiana canye tšabe soldado*

<sup>1</sup> Y aca, atšbe uaquiñá, chë Cristo Jesús acbiana tšabe juabna yobomnentšana, bëtscá añemo ainaniñe cochtsebomna. <sup>2</sup> Ntšamo ba entšangbe delante šconjoyeunacá, cach buayenánana, boyabásenga nyétscañe tšabe palabra bomnënga cochjábanyie, y chamotsobena ínÿenga cachcá jabuátambama.

<sup>3</sup> Aca, chë bënga fsëndbomna padecena soyëngama jasúfriama chacmojtsemna ora, Jesucristbe soyëngama entšanga abuayiynaye causa, ainaniñe bëtš añemo cochtsebomna, mo canye tšabe soldadcá, cha chabe mándayabiama jasúfriana. <sup>4</sup> Ndocna soldado ntjátanana shjoca soyënguiñe vida jtsebomnama o crocénana juácanama. Soldado chca jtsamana, chabe mandayá, chca chaotsemnama tbojabocacá cha, oyejuayá chaotsemnama.

<sup>5</sup> Y canye travisiayá, ínÿenga jáyëñjanama, canye soye juácanama; pero ntšamo chë uacanánana jocñama tomncá ndoñe tonjatravisiase, cha chë soye ndoñe ntjosháchiñama. Cachcá, acbe trabajo cochjama ntšamo cmojtsemncá.

<sup>6</sup> Chë jajañe trabajayá derecho jtsebomnana chë natsaná jtsemnama, chë tmojatbaná sananguentšana ndayánaca jtsebomnama. Acaftaca cachcá echanjopása, chë trabajo tšabá chacojamëse. <sup>7</sup> Chë cbontsatsëtsnañe cochtsenójuabnaye, y Bëngbe Utabná echanjama lempe chacmósertama.

<sup>8</sup> Sempre cochtsenójuabnaye Jesucristbiana, ndabiama Bëngbe Bëtšá tojanma cháuatayenama y enjamna canya rey Davídbentšana entšá, ntšamo atše chabiama sëndabuayiyná tšabe noticiënguiñe endmëncá. <sup>9</sup> Chca abuayiynaye causa, atše sëntsesufrina, nya cadenëjuangácnaca utsbuaná, mo canye bëtš bacna soye ochjajnayacá. Pero masque atše chca sëntsemna, chë Bëngbe Bëtšabe soyëngama buayenánana ínÿenga entšángbioye montsabuatambá. <sup>10</sup> Chíyeca atše nyëtscá padecena soyëngaca sëndëtsóboyana, Bëngbe Bëtšabe bocacánëngbe tšabiama, chëngnaca atsebácanënga chamotsemnama, Crístbeñe jtsošbuáchiyëse; y Cristo Jesús bëtšëtsanga cháuabiamama, y cháftaca nyëtscá tescama chamotsiyenama.

<sup>11</sup> Mëntšá ndegombre endmëna:

Cristo Jesús tojanóbana ora, enjamna mo bëngnaca cuafjobancá, er bënga tmontsajbaná oyenana ntšamo tempo monjaniyencá y Jesucristbeñe montsošbuaché; y chca, bëngnaca cháftaca mochantsiyena;

<sup>12</sup> bënga chë padecena soyëngaca tmojtsesufrina ora, tmojtsemorochëse, bëngnaca Jesucrísoftaca mochántsemandaye.

Bënga tmojayana, cha ndoñe monduabuatma ca,  
 as cha bëngbiámnaca cachcá echanjayana;  
<sup>13</sup> bënga chábeñe ndoñe tmontsošbuáchese,  
 masque chca, cha cabá echanjama ntšamo tbo-  
 jašebuachenacá,  
 er cha lempe jamana, ntšamo sempre iuetsemncá  
 jtsinÿanÿnayëse.

*Canÿe trabajayá, ndáftaca Bëngbe Bëtsá jtsóyejuayana*

<sup>14</sup> Chë tbonjauyana soyëngama, cochjama chë  
 entsanga chamotsenójuabnama, y Bëngbe Bëtsabe delante  
 cochjábuayenaye chënga ndoñe yontsamna nÿe palabrëngama  
 jabuachana enatsëtsnayana; er chca, ndocna tšabe soye  
 ntjamana, y chca tmojtsenatsëtsná ora, jamana chë soye  
 ouenanënga más batšá chamotsošbuáchema, y jujabuáchana  
 chëngbe tšabe juabnënga jtsondbiamama. <sup>15</sup> Lempe  
 ntšamo icobencá cochtsama, aca chacotsemnana mo  
 canÿe entšá ndabiana Bëngbe Bëtsá cháuyana nÿetsca  
 soyënguiñe tšabá amá yomna ca; aca chacotsemnana mo  
 canÿe trabajayacá, nda tondaye tontsebomna ndayama  
 jatëuatjama; y chacotsemnana chë ndegombre buayenánana  
 corente tšabá buatëmbayá. <sup>16</sup> Entšanga nÿe quem luarentša  
 soyëngama, ndoservena palabrënga tmojtsencuénta ora,  
 chë soye ndoñe cattsuenana; er chë soye jamana entsanga  
 puerte inÿetsá chamobocanama, ntšamo Bëngbe Bëtsá ndoñe  
 yondmëncá, inÿetsá jtsejuabnayëse y jtsamëse. <sup>17</sup> Chëngbe  
 buatëmbana soyëngaca puerte bacá inÿyengbioye jáborlana,  
 nÿa mo canÿe uabouana šocana chamotsebomnana  
 cuafjamcá. Chca buatëmbayënguentšë Himeneo y Fileto  
 bontsemna. <sup>18</sup> Chata chë ndegombre benachentšana  
 tbojtsojuánañe, y ibojtsichamo chë obanënga chámuatayenama  
 Bëngbe Bëtsá ya catënjama ca, y Jesús chaojésabo ora,  
 nÿetscanga chámuatayenama Bëngbe Bëtsá ndoñe yochanjama  
 ca. Chë causa, chata bontsama básefta entsanga chë  
 ntšamo Jesucristbeñe imojanošbuachecá, mora ya ndoñe  
 chamondëtsošbuáchema. <sup>19</sup> Pero Bëngbe Bëtsabe ndegombre  
 buayenánana nÿets tempo cachcá endesomñe, y ndocná  
 quenátobena chë soye jatrócama. Chca endmëna mo chë  
 ndëtsbenga ndayiñe canÿe bëts yebna tojebncá, ndayiñe  
 mëntšá yojtsábemana: “Bëngbe Utabná endëubuatma chë  
 chábénga imomnënga”, y “Nÿetscanga chë Bëngbe Utabnábénga  
 imomnënga ca tmojtsichámënga, chamuajbaná nÿetsca bacna  
 soyënga amana ca”.

<sup>20</sup> Canÿe uámana entsabe yebnentšë, tsafjoca soyënga  
 ndoñe nÿe castellano o midio soyënga ntsemnana, ndayá  
 niñëse y fshantse soyëngnaca; chë natsana soyënga

uámana tescama jtsebuájonana, pero chë inÿe soyëngna, nÿe nÿets tempo chauetsoservénama. <sup>21</sup> Chca endmëna chë Jesucristbeñe imojtsošbuachéngbeñe, ndoñe nÿetscanga tmontsajbaná bacna soyënga juabnayana y amana, ni chë chca tmojtsama entšángbentsana ndoñe tmontsojuaná. Pero, chca jtsojuánañama tojtsebošá, echántsemna canÿa Bëngbe Utabnabiama tšabe trabajayá; y chca, mo chë tsafjoca castellano y midio soyëngcá, canÿe uámana trabajuiñe echanjosérvia, y cha sempre echántseprontana ndaye tšabe soye jamama.

<sup>22</sup> Chíyeca, ntšamo básefta bobontsënga bacna soyënga jamama mondbošcá, ndoñe cattsama; pero aíñe cochtsiyena ntšamo Bëngbe Bëtsabe bominyiñe tšabá yomncá jtsamëse, Jesucristbeñe puerta cochtsošbuáchiye, Bëngbe Bëtsá y inÿenga cochtsababuánÿeshana y nÿetscángaftaca natjëmbana cochtsomñe, chë chaujúabuachama Bëngbe Utabná mondbetsotšëmbuanëngaftaca cánÿiñe, ndocna bacna soye ainaniñe ntsebomncá. <sup>23</sup> Ndoservena soyëngama palabrënga y ndosertánentsana óbocana soyëngama ndoñe cattsuenana; aca corente condëtatšëmbo chë soyënguentsana entsanga nÿe jabuachana enatsëtsnayıñe jabocanana. <sup>24</sup> Pero chë Bëngbe Utabnabiama oservená ndoñe quebnátsmëna inÿengaftaca jabuachana ntsenatsëtsnayana; chamna, cha bontsemna jtsababuánÿeshanëse nÿetscanga jtsënÿayana, jtsemnana tšabe buatëmbayá y inÿengaftaca uantadá. <sup>25</sup> Cha bontsemna, chë chabe contra y chabe buayenánama contra imomnënga, chë ndegombre soyënga jabuátambama, pero ndoñe ntjatenabotamnaycá. Chca bontsemna, nderado Bëngbe Bëtsá nanjama chca juabnayana chamotrocama, y chca, chënga chë ndegombre soyëngama chamotsetatšëmbuama; <sup>26</sup> chënga botamana chamuatsjuaboma, y Bëngbe Bëtsá, Satanasbe cucuatšënguentsana cháuatsebacama. Satanás chënga tojanëtabá ntšamo cha tojtsebošcá jamama, mo bayënga canÿe uachmaniñcá.

### 3

*Ntšamo entsanga mochtsemna, Cristo jésabama chaojt-sobeco ora*

<sup>1</sup> Pero aca cmontsemna jtsetatšëmbuana, Cristo jésabama tempo chaojt-sobeco ora, entsanga echántsamna puerta padecena soyënguiñe jtsiyenana. <sup>2</sup> Chca echántsemna, er entsanga, cada ona nÿe cachabe tšabiama echanjésenuabnaye, crocénana jtsebonnama tša mochántseboše, mochántsemna enábotamnayënga y inÿengbioye mo nduamanëngcá mochantsënÿaye. Bëngbe Bëtsabiama

y ínÿengbiana bacá mochantsóyebuambnaye, chëngbe bëtsetsangbioye ndoñe quemochátayaunana, ni chëngbiana tšabe soyënga tmojtsamëngbioye quemochtëticheuanaye, y Bëngbe Bëtsabiana y chabe soyëngama ndoñe respeto quemochátsbomna, <sup>3</sup> ni cachëngbe pamíllangbioye quemochátababuanÿeshana, mochántseboše ndoñe natjëmbana jtsiyenama, uayátsenayënga mochántsemna, cachënga jenomándama ndoñe quemochátobena, mo ainana ndbomnëngcá mochántsemna, y nÿetsca tšabe soyënga uaboténënga. <sup>4</sup> Chënga, uayayëngbe cucuatšinë entšanga ayentšbáshejuanënga mochántsemna, mochántsama soyënga tondayama ntjatsrreparánëse, y cachënga uámana entšangcá mochántsenobiamnaye; chënga Bëngbe Bëtsá jatsbobonshana cuenta, cachëngbe cuerpiñe tšabá jtsomñama soyënga mochántseboše. <sup>5</sup> Inÿenga echantsinÿana mo ndegombre Bëngbe Bëtsá adórayënga chënga cuaftsemncá, pero chë mochántsama soyëngaca mochanjínÿanÿiye, Bëngbe Bëtsá obená bëtsemnana chënga ndoñe mondošbuáchema.

Nÿa tondayama chëngaftaca cattscencuéntaye. <sup>6</sup> Chënguëntšë báseftanga mondmëna, y chëngna botamana palabréngaca yebnënguenache jamashjnana, y chenache, chë paselo yomna jáingñama shembásenga jtsaíngñayana, chëngbe buatëmbana soyënguiñe chamotsošbuáchema. Chë shembásenga bëtscá bacna soyënga tmojama, y chë causa ndoñe corente natjëmbana montsiyena, y ba ndoñe tšabe soyënga imojtsama nÿe cachënga tšabá jtsemnana, ntšamo tmojtsebošcá. <sup>7</sup> Chënga nÿets tempo nÿe ndaye tsëm soye jatóntsana jatatsjínÿana, pero ndocna te ntjobenayana Bëngbe Bëtsabe ndegombre soyënga josértama. <sup>8</sup> Ntšamo Janes y Jambres Moisesbe contra ibojamncá, cachcá, chë ínÿenga jáingñama abuátambayënga nÿetsca ndegombre soyëngama contra jtsemnana. Chë entšanga chëngbe juabniñe nÿe bacna soyënga jtsebmnnana, y Bëngbe Bëtsá chënga tojtsëbaté, chënga chë ndegombre soyënguiñe ndoñe ntsošbuáchiyana causa. <sup>9</sup> Pero chënga ndoñe quemochatobenaye bëtscá entšanga jáyëñjanama, er nÿetsca entšanga mochanjátatšëmbona chënga nÿe bacna soyënga juabnayënga imomnana, mo chë Israeloca entšanga tmojantatšëmboncá Janes y Jambres nÿe chca juabnayata bëtsemnana.

*Inÿe soye Timotéobioye tbojanbonÿé*

<sup>10</sup> Pero acna, puerte tšabá condëtatšëmbo ntšamo atše tijabuatambacá, ntšamo jtsamëse atše tsiyena, ndayá jamama tsjuabná, ntšamo atše Jesucristbeñe puerte tsošbuaché, ntšamo ínÿengaftaca uantado tsmëna; ntšamo atše, Bëngbe Bëtsá y ínÿengbioye tsababuánÿeshana; ntšamo atše, Bëngbe

Bëtsábeñe jtsobátmanëse, <sup>11</sup> ínÿenga šmonjanacmena ora; y sënjansufrina ora, padecena soyënguiñe bëts añemo tsjánbomna. Acnaca condëtatšëmbo ntšamo atše chama Antioquía, Iconio y Listra bëts pueblëngoca tsjansufrínama. Pero masque entšanga tša šmonjanacmena, atše lempe sënjánauantana, Bëngbe Bëtsábeñe jtsobátmanëse, y cada ora, Bëngbe Utabná chëngbentsana šonjanatsbocá. <sup>12</sup> Ndegombre endmëna, nÿetscanga chë Bëngbe Bëtsá jadórama soyënga jtsamëse jtsiyenama bošënga, y Cristo Jesúseftaca cánÿiñe mo canÿacá imomnënga, puerte mochanjasúfria, chca bëtsemnama, chënga chamosufrima ínÿenga chamojtsama ora; <sup>13</sup> pero chë bacna entšanga y chë ínÿenga áingñayënga, cada te más bacna entšanga mochántsemna, más bacna soyënga jtsamëse; chënga ínÿengbioye mochántsaingñaye, pero cachëngnaca ingñënënga mochántsemna.

<sup>14</sup> Pero aca, nÿets tempo cochtsejuabnaye y cochtsama lempe ntšamo tcojuatsjinÿcá, chë ndegombre soyëngcá cojtsosbuácheñe, er aca tšabá condëubuatma chë tcmojuanbuátëmbanga; <sup>15</sup> y aca, cabá básetema conjamna orscana, chë Bëngbe Bëtsabe uabemana palabrengama condëtatšëmbo, chë ndaye sóyeca aca contsobena juatsjinÿana, Bëngbe Bëtsá chacmatsbocama, Cristo Jesúsbeñe jtsosbuáchiyëse. <sup>16</sup> Bëngbe Bëtsá, Uámana Espíritbeyeca tonjama, lempe ntšamo Bëngbe Bëtsabe uabemana palabrenguiñe yobinÿncá entšanga chamuábemama. Chë uabemana palabra endoservena, bëngbioye chë ndegombre soyënga jabuátambama; nderado ndaye soye ndoñe tšabá tmonjamama bënga chamotsetatšëmbuama, jinÿanÿiyama ntšamo más tšabá chë soyënga muanjobenaye jamama; y bëngbioye jabuátambama ntšamo jtsiyenama chë Bëngbe Bëtsabe bominÿiñe tšabá yomna soyënga jtsamëse; <sup>17</sup> chca, canÿe entšá Bëngbe Bëtsabiama oservená y obená chaotsemnama, tšabá chaotsetátšëmbo y sempre chaotseprontana nÿetsca tšabe soyënga jtsamama.

## 4

<sup>1</sup> Bëngbe Bëtsabe delante y Cristo Jesús, nda echanjabo mo reycá jabomándama y jabáyanama chë ainëngbiamá y chë ya mochjóbanëngbiamá, ntšamo chëngbe vidënguiñe tmojëftsemcá tšabá o ndoñe tšabá bëtsemnama, chatbe delante cbomandá, <sup>2</sup> Bëngbe Bëtsabe palabra entšanga chacotsabuayiynayama; sempre chca jamama cochtseprontana, masque entšanga aíñe o ndoñe jouenama tmojtsebošëse. Cochjama, ínÿenga bacna soyënga tmojtsamama chamotsetátšëmbo, chca tmojtsamama cochjucácana y cochjábuayenaye ndayá jamama yojtsamnana. Sempre chca cochtsabuátambaye, chca ora



puerte uantado jtsemnëse. <sup>3</sup> Chca cochtsama, er canÿe tempo echanjóshjango y chora entšanga chë ndegombre buatëmbana soye ndoñe quemochátuenana; chamna, nÿe chë último tsëm soyënga jtsetatšëmbuama boše causa, ba abuátambayënga mochanjuánguango, y chënga mochántsihamo soyënga nÿe ntšamo cach entšanga jouenama tmojtsebošcá. <sup>4</sup> Chënga chë ndegombre soyënga ndoñe quemochátuenana, y nÿe ndaye cuentënga mochántseyeunana. <sup>5</sup> Pero aca, sempre botamana cochtsejuabnaye; chë padecena soyëngama chacojtsesufrina ora, añemo cochtsebomna; chë Jesucristbiamá tsabe noti-ciënga entšanga abuayiynayabe trabajo cochtsama; y nÿa cochtsentšena ndayá Bëngbe Bëtsá tcmojabonyecá tsábá jt-samama.

<sup>6</sup> Er mo Bëngbe Bëtsábioye jëtschuayama, canÿe bayá obanáftaca tcojabuešcja vínoye jtsopochocancá, cachcá atšbe vídnaca ya jopochócama entsemna. Atše jóbanama bécoñe entsemna; chanjóbana ora echántsemna Bëngbe Bëtsá oyejuayá chaotsemnama. <sup>7</sup> Cristo Jesusbe soyëngama corente sënjenjuerzá. Mo canÿe travisiayacá, chë jashjanguama yomna luaroye ya tojashjangcá, átšnaca ya, ntšamo Bëngbe Bëtsá yobošcá atše jtsamëse, atšbe trabajo ya tijapochocá. Atše nÿets tempo Jesucristbeñe sëndošbuaché. <sup>8</sup> Chcasna, atšbiamá canÿe uacanana soye echántsemna, er Bëngbe Bëtsá tojama atše chabe bominiñe tsabia chaitsemnama. Bëngbe Utabná endmëna chë ndegombre tsábá ichamuá entšanga aiñe o ndoñe tsábá tmonjamama, y cha chë uacanana soye šochántatšetaye, entšanga ntšamo tmojamama cha chaojabáyana ora. Pero cha nÿe atše ndoñe chë uacanana soye quešochtëtätšetaye, ndayá nÿetscángbioye chca, ndëmuanÿenga puerte imoboše cha cachiñe cháuesabama, cha imobobonshánayeca.

### *Inÿe soyënga Timoteobiamá*

<sup>9</sup> Lempe ntšamo tcojobenacá cochjama betscó jabama atše jabínÿama; <sup>10</sup> er Demas, cha yapa nÿe quem luarentša entšangbe soyënga bošá enjamna, cha cachcá šonjesonÿá y Tesalónica pueblöye tojtsoñe. Crescente Galacia luaroye tonjá y Tito Dalmacia luaroye. <sup>11</sup> Nÿe Lucas, chë šmonjanájabuachanënguentshana, mora átšeftaca entsemna. Marcos cochjaftsenguango y ácaftaca cochjëftsbetše, er cha atšbe trabajuama puerte oservená endmëna. <sup>12</sup> Tíquico, Efesoye sënjichmó. <sup>13</sup> Chacojabo ora, uabonjanía šochjesacñe, atše Troas bëts puebloca, Carpbe yebnoca tijésaboshjona; chë librëšangánaca, pero chë uámana uabemana tsbuanachangá ndoñe chacmondëtsebnatjëmba.

<sup>14</sup> Alejandro, chë cobre soyënga pormayá, puerte bacá šonjaborlá. Bëngbe Utabná bochanjacistíga, ntšamo atše šojaborlama. <sup>15</sup> Chabiamá cuedado cochtsebomna; cha tojobenase ntšámnaca cmatjabórla, er cha chë bënga mondabuayiyná soyëngama contra entsemna.

<sup>16</sup> Chë natsana soyama, mándayëngbe delante šonjanotocá jenëuyanama ora, atše ndocná chešnáatanajabuache; nÿetscanga cachcá šmonjésonÿaye. Pero atše sentsobátmana, Bëngbe Bëtsá chama chënga chaotsaperdoná. <sup>17</sup> Pero Bëngbe Utabná aíñe šonjanájabuache y tonjanma atše bëts añemo jtsebomnama, y hc case, atše sënjanobená Jesucristbiamá nÿetsca chabe tšabe noticiënga entšanga jábuayenama, y chë luarentša ndoñe judiënga tmonjanobená chë soye jouenama. Mëntšá, Bëngbe Utabná canÿe uabouana resjuentsšana šonjanatsbocá, mo canÿe león jtsosañámentšana ndábioye cuafjatsbocacá, <sup>18</sup> y Bëngbe Utabná šochanjatsbocá, bacna soye ndocná chašondëborlama; y sempre jtsinÿenëse, cloye, chë ndayentše cha yománda luaroye šochanjesbetše. ¡Nÿetscanga nÿetsca tescama cha chamotsatschuaná! Chca chaotsemna.

*Pablo Timotéobioye jadiósoftanama*

<sup>19</sup> Atšbe cuenta cochjácheuaye Prisca y Aquila, y Onesíforbe pamíllnaca. <sup>20</sup> Erasto, Corinto puebloca tontsoquedañe, y Trófimo Mileto puebloca šocá sënjëftseboshjona. <sup>21</sup> Lempe cochjama, uaftena tempo chaondóshjango ora moye jabama. Acnaca cmontsechuaná Eubulo, Pudente, Lino, Claudia y nÿetscanga muentše Jesucristbeñe ošbuáchiyënga.

<sup>22</sup> Atše sëntseimpadana, Bëngbe Utabná Jesucristo ácaftaca chaotsemna, y Bëngbe Bëtsá tšëngaftangbeñe tšabe bendicionënga chaotsemnama chaoma.

## Tito

### *Jachuayama*

<sup>1</sup> Atše Pablo, Běngbe Bětsabe oservená sěndmēna y Jesucristbe ichmoná entšanga jábuayenama, chě Běngbe Bětsá chabe entšanga chamotsemnama tojábacacanga, Jesucristbeñe chamotsošbuáchema y chě ndegombre soyěngama chamotsetatšěmbuama; chě soyěnga endmēna ntšamo bēnga, Běngbe Bětsabe básenga bětsemnama, mondoyena jtsaměse. <sup>2</sup> Lempe chca sěndama, er Běngbe Bětsábeñe jtsošbuáchiyěse, atše sěntsobátmana chě nýetsca tescama yomna tšabe vida jtsebomnama. Běngbe Bětsá, chě ndocna te obosterayá, quem luare cabá ndmēna orscana tojanašebuachená entšanga chca vida jtsebomnama; <sup>3</sup> y nýa chama tempo tojóshjango ora, chě entšanga jábuayenama, soyěngaca Běngbe Bětsá chabe palabra šojinýanyé, ndayá Jesucristo entšangbiana yochjanmama; y chca jábuayenama atše palabra šmonjabonyé, Běngbe Bětsá, bēngbe Atsebacayabe mándoca. <sup>4</sup> Tito, quem tsbuanácha cbontsabobiamná. Atše Jesucristbe soyěngama entšanga sěnjanabuayiná ora, aca chábeñe contsanošbuaché y nýets útata cachca ošbuáchiyana Jesucristbeñe bondbomna, y chca, aca mo atšbe ndegombre uaquiñacá condmēna. Atše sěntseimpadana, Běngbe Bětsá Běngbe Taitá y Jesucristo Běngbe Atsebacayá, ábeñe tšabe bendicioněnga chaotsemnama chata chaboma, y chaboma aca ainaniñe tšabe ebionana chacotsebomnama.

### *Titbe trabajo Creta luaroca*

<sup>5</sup> Atše Creta luaroca tcbonjěftsanboshjona, ntšamo chentše jamama enjetsashbencá chacomama, y nýetsca pueblěnguenache chě ošbuachiyěngcá enefjuaněngbeñe bětsějeměngcá aměndayěnga jtsemnama chacubuáyanama, ntšamo tcbonjajtsemandacá. <sup>6</sup> Canýa bětsějémama uabuayaná měntšá bontsemna: chaotsiyena ntšamo chabiana ndocná chaondětsichamo ndoñe tšabá yontsama ca; nýe canýe shembásabe boyá; chabe básengna, Jesucristbeñe ošbuáchiyěnga chamotsemna, y chamotsiyena, ntšamo ndocná chaodayana chěnga nýe jenomándama ntšobencá y nýe ntšamo tmojtsebošcá imojtsiyena ca, o chěnga chěngbe bětsětsanga o mándayěnga ndoñe montsayaunana ca. <sup>7</sup> Er cánýentše ošbuachiyěngcá enefjuaněngbe mandayá, Běngbe Bětsabe trabajo jamama tmojabonyéyeca, cha bontsemna jtsiyenana, ntšamo ndocná chaodayana cha ndoñe tšabá yontsama ca; ntjajuaboycá, nýe ntšamo cha tojtsebošcá

ndoñe chaondétsama; ndoñe chaondétsiyena nye rábiaca jtsemnana; ndoñe chaondétsetmó; penzentsero ndoñe chaondétsemna; y ndoñe chaondétseboše nye paselo beca crocénana jtsebomnana. <sup>8</sup> Pero chabe yebnentse posada entšanga júyentsámiamana sempre chaotseprontana, tšabe soyënga chaotsebínñanama siempre chaotsentšena, botamana juabnaya chaotsemna, ntšamo Bëngbe Bëtsabe bominiñe tšabá yomncá chaotsiyena, nyets tempo Bëngbe Bëtsábioye chabotsadorana, y cachá nyetsca soyënguiñe jenomándama chaotsobena. <sup>9</sup> Cha bontsemna nyets tempo jtsošbuáchiyana y jtsobedecénana chë ndegombre buayenana soye, ntšamo tmojabuatëmbacá, chca, chë ndegombre buatëmbana soyëngaca ínñenga añemo chaotsatšatnana, y chë soyama contra tmojtsemnënga jáyëñjanama, ndoñe tšabá montsamama.

<sup>10</sup> Cha chca bontsemna, banga nye ndëmandánënga jtsiyenama bošënga mondmëna causa, y chënga mondmëna, nye ndaye ndoservena soyëngama yapa oyebuambnayënga y ínñenga áingñayënga, y chcanga más mondmëna chë nyetsca ošbuáchiyënga base bobachtema chë más delicadentse tëtšenënga jtsemnana yojtšamna ca mondbétsichamënguentse. <sup>11</sup> Y entseyta chëngbioye jtayáchetana, er chënga jamana ba pamíllanguentse nyetscanga Jesucristbeñe ošbuáchiyana chamotsajbanama. Chënga chca mondbétsama, chë ndoñe yontšamna jtsabuátambayama soyënga jtsabuátambayëse, nye paselo crocénana jongánama.

<sup>12</sup> Enjamna canya, ndabiama entšanga jtsichámuana cach Creta luarentša diosëngbiama oyebuambnaya canjamna ca, y cha cachabe luarentša oyenëngbiama mëntšá tonjánayana: “Creta luarentše oyenënga, nyets tempo bosterënga mondmëna, ainana ndbomnënga y oyëñjayënga nye beca jasama bošënga ca.” <sup>13</sup> Y chca ndegombre cha tonjánayana; chíyeca chënga jabuache cochjucácana, chca, chënga Jesucristbeñe chamotsošbuáchema y chamotsobedecena chë buatëmbana soyënga, chë ndayiñe bënga mondošbuaché; <sup>14</sup> y cach judiëngbe cuentënga ndoñe chamondétsuenana, ni chë ndegombre soyënga uabotenëngbe mandënga.

<sup>15</sup> Chë ainaniñe bacna juabnënga ndbomnënga y chca juabnëngaca ndëmandánënga, nyetsca soyëngama jtsejuabnayana mo ndegombre tšabe soyënga cuaftsemncá; pero chë bacna soyëngaca mandánënga y Jesucristbeñe ndošbuáchiyënga, nye ndayámnaca jtsejuabnayana mo bacna soye cuaftsemncá. Chca entsemna, er chëngbe juabnoca nye ena bacna soyënga jésebomnana, y ndaye bacna soye tmojama ora, chëngbe ainaniñe juabnënga ndoñe ntsebomnana, bacna

soye tmojamama chaúyanama. <sup>16</sup> Chënga jtsichámuana Bëngbe Bëtsá imuábuatma ca, pero ntšamo tmojtsama soyëngaca jtsinÿinÿnayana chca ndoñe ndegombre yondmënana. Chënga Bëngbe Bëtsabe bominÿiñe puerte bacna entsanga mondmëna, y ntšamo cha tomandacá ndoñe ntsamana; chë causa chënga ndoñe ntsobenana ndaye tšabe soye jamama.

## 2

### *Soyënga ntšamo chë ndegombre buatëmbánana endmëncá*

<sup>1</sup> Ntšamo chacojtsoyebuambnacá sempre chaotsemna ntšamo chë ndegombre buatëmbánana endmëncá. <sup>2</sup> Cochjayana chë bëtsëjëmëngna chamotsemna cachënga nÿetsca soyënguiñe jenomándama obenënga, nÿetscangbiana mo uámana entsangcá utabnënga, ntšamo jtsiyenama tšabá juabnayënga, nÿets tempo chë ndegombre soyënguiñe chamotsošbuaché, Bëngbe Bëtsá y nÿetscanga chamotsababuánÿeshana, y padecena soyënguiñe puerte uantadënga chamotsemna.

<sup>3</sup> Cachcá, chë bëtsanana shembásenga chamotsiyena mo Bëngbe Bëtsábioye adorayëngcá, uayátsenayënga ndoñe chamondëtsemna, ni tmoyënga. Entsamna chamotsiyena tšabe soyënga jtsamëse; <sup>4</sup> chë tobiasënga chamotsinÿanÿná y chamotsabuatambá ntšamo chëngbe boyanga y básenga jtsababuánÿeshanana, <sup>5</sup> ntšamo cachënga jenomándama jtsobenana, ainaniñe ndocna bacna soye ntsebomnana, yebnentša soyënga jtsamama jtsentšénana, nÿetscángaftaca tšábenga jtsemnana, cachëngbe boyángbioye jtsayaunanana, chca, ndocná chaondëtsobena Bëngbe Bëtsabe palabrama bacá jatóyebuambnayana, ntšamo chë tobiasënga tmojamama.

<sup>6</sup> Cachcá, chë bobontsënga añemo cochtsatšatnaye cachënga jenomándama chamotsobenama, <sup>7</sup> y chënga cochjínÿanÿiye ntšamo yomna jtsiyenana, cach aca nÿetsca soyënguiñe tšabá jtsamëse. Chca chacojtsabuatambá ora, nÿe chë ndegombre buayenánana cochtsabuátambaye y corente respétoca chca cochtsama, <sup>8</sup> chë ndegombre soyënga jtsóyebuambnayëse; chca, ndocná chaondobená jayanana aca ndoñe tšabá tconjayana ca, y chca, chë acbe contra ichámënga chamotsëuatja, er ndocna bacna soye quemochatobenaye bëngbiana jayanama.

<sup>9</sup> Chë nÿets tempo nÿe ínÿabiana oservénënga cochjábuayenaye, chëngbe nduiñëngbioye chamotsobedecénama, soyënga chamotsama chënga chamotsóyejuama, y yajuatsanënga ndoñe chamondëtsemnama. <sup>10</sup> Ndoñe chamondëtsatbëbana, pero aiñe nÿetscañe tšabe palabra bomnënga chamotsemna. Chënga chca entsamna, chca, ínÿenga chámuinÿe y chamojuabó tša botamana chë

buatëmbana soyënga, Bëngbe Bëtsá bëngbe Atsebacayabiamama yomna ca.

<sup>11</sup> Er Bëngbe Bëtsá bënga šonjinÿanÿé cha bëngbe tšabiamama juabnënga yobomnama, y chca, cha tojama nÿetsca entšanga chamotsobena atsebácanënga jtsemnama. <sup>12</sup> Chë Bëngbe Bëtsabe juabna bëngbe tšabiamama, šontsabuatambá jtsajbanama oyanana soyënga jtsamëse mo chë Bëngbe Bëtsá ndoñe mondadoranëngcá, quem luarentša bacna soyënga bošana jtsajbanama; y ntšamo mora quem luarentše jtsiyenámna ca šontsabuatambá, cabënga jenomándama jtsobenëse, ntšamo Bëngbe Bëtsabe bominiñe tšabá yomncá y cha jadórama soyënga jtsamëse. <sup>13</sup> Y chca jtsamëse, y Bëngbe Bëtsábeñe ošbuachiyánaca jtsiyenëse, jtsobátmanana chë puerte oyejuayana jtsebomnama te, Bëngbe Bëtsá obená y Atsebacayá Jesucristo, buashinÿinÿaniñe y canÿe corente uamanacá yochjésabo ora. <sup>14</sup> Cha chabe derecho vida jtsobomñama cachcá tojanonÿá y bëngbiama tojanóbana, chë ntšamo Bëngbe Bëtsá bemandacá ndoñe yondmëncá jtsamëse oyenentšana bënga játsebacama, ainaniñe ndocna bacna soye ndbomnënga jábiamama, bënga chábenga chamotsemnama, sempre prontánënga ntšamo tšabá yomncá jtsamama.

<sup>15</sup> Chca cmontsemna jtsabuátambayana, chënga becá añemo jtsatšatnayëse, y jtsinÿanÿinÿayëse chënga bacna soye tmojamama, chë nÿets condbomna mándoca jucácanëse. Ndoñe catjaleséncia ndocná chaodayana aca mando ndoñe condbomna ca.

### 3

#### *Ndayá Jesucristbeñe ošbuáchiyënga yojtsamna jamana*

<sup>1</sup> Cochtsama chënga chamuatenójuaboma chë mandadënga y inÿe mándayënga chamotsayaunanama, chamotsobedecénama, y tšabá yomncá jamama sempre chamotseprontánama. <sup>2</sup> Ndocnabiamama ndocna bacna soye chamondëtsoyebuambná, penzentserënga ndoñe chamondëtsemna, ndayá nÿetscángaftaca natjëmbana jtsiyenama bošënga, tšabá mándbomnënga, nÿetscanga tšabe ainánaca imojtsénÿama entšanga jtsinÿanÿinÿayëse.

<sup>3</sup> Er bëngnaca tempo monjamna Bëngbe Bëtsabe soyëngama ndosertánënga, ntšamo Bëngbe Bëtsá endëmandacá ndoñe quemjátanama, ingñénënga y mandánënga monjamna nÿetsca bacna soyënga jamama juabnëngaca y nÿe quem luarentše tšabá jtsemnama juabnëngaca. Bënga monjaniyena nÿe bacna soyënguiñe juabnaye, ínÿenga uantšaboše. Inÿenga bënga šonjanébuayënja y bënga nÿetscanga monjanenáboyënja. <sup>4</sup> Pero Bëngbe Bëtsá,

bëngbe Atsebacayá, bëngbe tšabiamá juabna yobómnyeca y tša šuababuányeshanama šonjaninýanyé ora, <sup>5</sup> cha šonjanatsebacá, pero ndoñe nderado bënga ndaye tšabe soye tmojanmama, ndayá cha bëngbiamá tbojanongméyeca. Cha šonjanatsebacá, bëngbe bacna soyënga jabuajuánase, y chë Uámana Espíritu jujabuáchëse, bënga mo tsmëma entšangcá chamotsemnana, ntšamo tempo yojamncá ntjatsjuabnacyá y ntjatamcá. <sup>6</sup> Bëngbe Atsebacayá Jesucristbeyeca, Bëngbe Bëtsá tojanma Uámana Espíritu bëngbe ainaniñe nyets tempo chaotsemándama y bënga chašotsëjabuachanama, <sup>7</sup> chca bënga, Bëngbe Bëtsá bacna soyëngama šojaperdónanga y bëngbe tšabiamá juabna bómnyeca tojayana chabe bominyíñe tšábenga imomnënga, chamotsobena cha yobomna soyënguentshana bënga mo ndayá cuaftsëtocancá jóyëngacñama, y chca, chábeñe jtsošbuáchiyëse, chë nyetsca tescama yomna tšabe vida chamotsobátmanama.

<sup>8</sup> Chca, lempe ntšamo tijayancá nýa ndegombre endmëna, y atše sëntseboše chë soyëngama bëtscá chacotsabuatambá, chca, chë Bëngbe Bëtsábeñe tmošbuachenga chamotsentsëna chë tšabe soyënga jtsamama. Chë buatëmbánana puerta tšabá endmëna y nyetscangbiamá bëtscá endoservena. <sup>9</sup> Inýenga nýe ndoservena soyëngama jabuachana tmojtšenatsëtsná ora, y anteungbe cuentëngama chamojtsoyebuambná ora, ndoñe cattsonremetena; ndoñe cattsama cach tšëngaftanga ndoñe tšabá jtsenëyeunanamcá, y judiëngbe leyëngama ndoñe ínýengaftaca cattsenpéliaye. Chca jtsamana tondayama ntososervëna, y nýe bonamente chca jtsamana.

<sup>10</sup> Nderado nda tojtsama entšanga ndoñe cachcá nyetscanga chamondëtsejuabnama y chamotsenpéliama, canýe o uta soye cochjabuayená ndoñe tšabá tonjamama; pero cha ndoñe tcmónjóyeunase, chentsana cháftaca ndoñe más cattsóyeuambnaye. <sup>11</sup> Chca cochjama, er aca cochanjátatšëmbona canýa chca tojtsemná, chabe juabna tojatrocá bacna soyënga jtsejuabnayama. Chë soye y chë inýe bacna soyënga ntšamo cha tojtsamcá, jtsinýanýnayana cha ibojtsemna castiganá chama jtsemnana.

### *Inýe soyënga Titbiamá*

<sup>12</sup> Atše, Artemas o Tíquico ácbioye chajjichmó y choca chaojáshjango ora, ndayánaca cochjama Nicópolis puebløye aca jama atše jinýama, er atše sënjjajuabó chentšë chë uaftenëntscuana jëftsemnana. <sup>13</sup> Lempe ntšamo chacojobenacá, cochjuájabuache chë ínýenga obuauyayá Zenas, y Apólosnaca; lempe ntšamo chata ibojtsëjabotcá cochjátšataye, ínýoye jama jatóntšama chamobenama y benachëjana tondaye chaondëtsabuáshebenama. <sup>14</sup> Atše

sěntseboše, bėngbe entšanga, chė bėngcá Jesucristbeñe ošbuáchiyėnga, chamotsentšena chė tšabe soyėnga jtsamama y chė puerte ujabótėnga jtsėjabuáchanama, chca, chėnga tondayama ndoservena vidėnga ndoñe chamondětsebomnama.

*Pablo Títbiye jadiósoftanama*

<sup>15</sup> Njetscanga chė átšeftaca montsemnėngnaca cmontsechuaná. Atšbe cuenta cochjácheuaye njetscanga chė bėnga imuababuanjėshanėngbioye, cach bėngcá Jesucristbeñe ošbuáchiyana bómnyeca. Atše, Bėngbe Bėtsá sėntseimpadana, cha chaoma ácbeñe tšabe bendicionėnga chaotsemnama.



## Filemón

### *Jachuayama*

<sup>1</sup> Atše Pablo, mora utamená Cristo Jesusbiamama oservena causa, quem tsbuanácha sentsabiamná, Jesucristbeyeca bēngbe catšata Timotéoftaca, acbiamama Filemón, bēngbe bonshaná y nda bēngaftaca condētrabája Jesucristo jaserviama. <sup>2</sup> Atše sēntsacheuaná, Jesucristbeyeca bēngbe uabena Apia y Arquínaca, nda bēngaftaca cánŷiñe Jesucristbe soyēngama endenojuerzana; y nŷetsca ošbuachiyēngnaca, ndēmuanŷenga imuamana acbe yebnentše jénefnama Bēngbe Bētsá jētschuayama. <sup>3</sup> Atše sēntseimpadana Bēngbe Bētsá Bēngbe Taitá y Bēngbe Utabná Jesucristo, chata chaboma tšabe bendicionēnga tšēngaftangbeñe chaotsemnama, y chaboma tšēngaftangbe ainaniñe tšabe ebionana chašmotsebomnama.

### *Filemonbe bonshánana y ošbuáchiyana*

<sup>4</sup> Bēngbe Bētsáftaca stsencuēnta ora, acbiamama sēndbētsenuabuabnaye, y sempre acbiamama Bēngbe Bētsá sēndbētsatschuanaye, <sup>5</sup> er atše sēnjátatšēmbona ntšamo aca nŷetsca chē Bēngbe Bētsábenga imomnēnga icuababuánŷeshanama, y ntšamo aca Bēngbe Utabná Jesúsbeñe tša icošbuáchema. <sup>6</sup> Bēnga, Jesucristbeñe ošbuáchiyēnga quetsomñecá, ácaftaca mo canŷacá fsēndmēna. Chca endmēnayeca atše Bēngbe Bētsá sēntseimpadana, tšēngaftanga chašmobená más botamana josértana nŷetsca chē Bēngbe Bētsábiocana tmojójyēngacñe tšabe bendicionēnga, bēnga Cristo Jesúseftaca cánŷiñe mo canŷacá bétsemnayeca. <sup>7</sup> Jesucristbeyeca atšbe bonshana catšata, aca chē Jesucristbeñe ošbuáchiyēnga tša condábabuanŷeshanama, atše corente oyejuayá sēntsemna y bēts añemo sēntsebomna. Y aca tcojama, nŷetscanga chē Bēngbe Bētsábenga imomnēnga chēngbe ainaniñe ngmēnaca ndoñe chamondētsemnama, chēnga jujabuáchēse.

### *Pablo, Filemónbioye Onésimbiamama tbojanimpadá*

<sup>8</sup> Y chca, atše Cristbe ichmoná quetsomñecá sēntsobena, aca nŷe jamándana ntšamo yomncá chacotsamama, pero atše chca ndoñe quichatsma. <sup>9</sup> Y cbondbobonshánayeca, chca játamamna, aca cbochanjaimpáda. Atše Pablo, Jesucristbe cuenta ichmoná jóyebuambayama y mora utamená, chabiamama oservena causa, <sup>10</sup> canŷe ruego cbochanjábema, Onésimo chacuájabuachama. Atše utamená tsmēnēntscuana, Jesucristbe soyēngama cha sēnjanbuayiyná. Cha Crístbeñe tonjanošbuachéyeca, cha mo atšbe uaquiñacá tonjanóbema.

11 Tempo, cha ácbioye tondayama quecmējátanservena, pero mora cha becá entsámama, acbiamama y atšbiamama. 12 Mora ácbioye sēntsatichamná, y atše sempre chabiamama sēndbētsenojuabnaye y sēndbobonshana. 13 Atšbiamama puerte tšabá manmēna cha átšeftaca matēnjoquedase, acbe cuenta atše chašoservema, cárceleye utamená sēntsemnēntscuana, chē tšabe noticiēnga entšanga abuayiyenaye causa. 14 Pero atše ndoñe chiyatsma cha chaoquedama atše chašuájabuachama, er atše ndoñe quetsátsboše aca obligaciónaca chacotsemnama, atše juajabuáchama ndayánaca chacomama; y sēntseboše aca ndayánaca chacoma, cach aca chca jamama puerte tcojtsebošese. Chcasna, tondaye quichatsma, chē soye chca chaotsemnama aca cabá ndocá ntjayancá. 15 Atše sēntsejuabná nderado Onésimo ácbentšana básefta tescama tojanoluaré, mora ácaftaca nyēts tempo jtsatsmēnama ca, 16 y ndoñe nyē acbiamama mo nyēts tempo canye oservenacá, ndayá chama más uamanacá, mo Jesucristbeyeca canye bonshana catšatcá. Atše puerte Onésimo sēndbobonshana, y acna cmontsemna más cha jtsebobonshánana, er cha mora ndoñe quenátsmēna canya nyē acbiamama nyēts tempo oservená, ndayá Bēngbe Utabnábeyeca canye catšata, ntšamo cach aca condmēncá.

17 Chca, aca atšbiamama condējuabná mo ácaftaca cánýiñe Bēngbe Utabnabiamama trabajayacá; chíyecna cmontsemna cha jtsofjana, mo atše šcojofjá. 18 Nderado ntšamo cha tcmojanborlá o ndayánaca tcmondebena, atše chama cbochjētsēntšabuachiye. 19 Atše Pablo, cach atšbe cucuátšeca quem soye sēntsabiamná. Atše chama cbochanjētsēntšabuachiye. Ndegombre, ndoñe quenátsiyta atše chachēyana becá šcondebena ca, ntšamo atsbocaná jtsemnama atše tchojánbuayenama. 20 Chcasna, Jesucristbeyeca atšbe catšata, Bēngbe Utabnáftaca cánýiñe mo canýacá quetsomñecá, Diosmanda chē pavor šcochtsebema. Diosmanda cochjama atšbe ainana ngménaca ndoñe chaondētsemnama.

21 Atše chca cbontsabobiamná, er atše tšabá sēndētatsēmbo, ntšamo cbontseimpadancá cochjamama, y cabá más chama cochjatsmama. 22 Y mora inye soye, Diosmanda posada šcochjabopróna, atše jányama chajjábocna orscama, er atše puerte jtsošbuáchiyēse Bēngbe Bētsábeñe sēndobátmana, cha tšēngaftangbiamama yochjama lempe ntšamo atšbiamama chašmojtjañcá, y chca, cha šochjaleséncia atše tšēngaftangbioye jésama.

<sup>23</sup> Epafras, muentše átšeftaca cárceloye utamená, Cristo Jesusbiamá entšanga abuyaynaye causa, chánaca cmontsechuaná. <sup>24</sup> Y Marcos, Aristarco, Demas y Lucas, chë bēngaftaca mondētrabájanga Cristo jaserviama, chēngnaca cmontsechuaná.

<sup>25</sup> Atše sēntseimpadana Bēngbe Utabná Jesucristo, chaoma tšabe bendicionēnga tšēngaftangbeñe chaotsemnama.

## Hebreos

*Bëngbe Bëtsá bëngaftaca tojoyebuambá, chabe Uaquiñáftaca*

<sup>1</sup> Tempo, Bëngbe Bëtsá ba soye y ba soyëngaca bëngbe bëts taitångbioye tojanëyana, chë chabe juabna oyebuamb-nayëngaftaca. <sup>2</sup> Pero quem tempo bëngaftaca tojoyebuambá, chabe Uaquiñá jíchmuase, bëngbioye cha chaśúyanama. Bëngbe Bëtsá tojama, lempe ntšamo chabe soye yomncá, chabe Uaquiñabiama chaotsemnana, y chábeyeca Bëngbe Bëtsá quem luare y nyetsca inye luarënga tojama. <sup>3</sup> Cha endinyanyná Bëngbe Bëtsabe corente buashinynyanana y uámanana, y cha endmëna cach Bëngbe Bëtsacá, y chábeñe bënga mondobena jinýama ntšamo Bëngbe Bëtsá yomncá. Chabe bëts obenánaca endútabna lempe ntšamo quem luarentše yobinyncá; cha tojayana y chca jtsemnana. Cha tojanóbana bëngbe bacna soyënga jabuajuánama, y chentšana Bëngbe Bëtsá tojaninyanýé cha puerte bëtsá y uamaná bëtsemnana, celoca játbemëse, Bëngbe Bëtsabe catsbioica, nyetscanga jtsamëndayama.

*Bëngbe Bëtsabe Uaquiñá chë angelëngbiama más bëtsá yomna*

<sup>4</sup> Y chca, Bëngbe Bëtsá tbojánbema chë angelëngbiama más uamaná y obená, er Bëngbe Bëtsá tbojanbuajó canýe más uamana uabaina y chë angelëngbiama canýe más uamana trabajo tbojanbonýé. <sup>5</sup> Ndegombre chca endmëna, er Bëngbe Bëtsá ndocna te ndocna ángelbioye mëntśá tbonjaniana, ntšamo chabe Uaquiñábioye tbojaniancá: Aca atšbe Uaquiñá condmëna.

Mënté entšanga sënjinyanýé aca atšbe Uaquiñá comnana ca. Ni ndocna angelbiama mëntśá tojánayana, ntšamo chabe Uaquiñabiama tojanayancá:

Atše canýe taitá chabiama chántsemna,  
y cha canýe Uaquiñá atšbiama ca.

<sup>6</sup> Quem Bëngbe Bëtsabe Uaquiñá endmëna nyetscangbiama más uamaná. Chca Bëngbe Bëtsá tojánayana, chabe natsana Uaquiñá quem luaroye cháuashjanguama cha tojanma ora: Bëngbe Bëtsabe nyetsca angelënga cha chamotsatschuaná ca.

<sup>7</sup> Y chabe angelëngbiama, mëntśá tojánayana:

Atše sëndama atšbe angelënga, chë atšbe buayiynayënga, mo binýiëngcá chamotsemnana,  
y chënga, atšbe oservëngënga, mo inñëngcá ca.

<sup>8</sup> Pero chabe Uaquiñabiama Bëngbe Bëtsá tojánayana:

Utabná, acbe amëndayana nyetsca tescama echántsemna,  
y aca nyetsca soyënguiñe condbëtsemmandaye, ntšamo tšabá yomncá jtsamëse.

<sup>9</sup> Aca icontšena ntšamo tšabá yomncá nyetsca soyënguiñe jtsamama, y sempre chca jtsamama tša icoboše, pero nña tondayama cmondogustana bacna soyënga jtsamana, chë ndayá Bëngbe Bëtsá ndoñe yondboše soye;

chíyeca Bëngbe Bëtsá tcmojabocacá, y tojama aca puerte oyejuayá chacotsemnama, chë ínÿengbiama más oyejuayá ca –Bëngbe Bëtsá tojánayana.

<sup>10</sup> Bëngbe Bëtsá mëntšánaca chabiamama tojánayana:

Utabná, quem luare jobojátšama ora, aca quem luare tconjanma,

y lempe chë celoca yomna soyëngnaca.

<sup>11</sup> Lempe chë soyënga nyets tempo ndoñe queochátsmëna; aca nyetsca tescama cochántsemna.

Lempe chë soyënga echanjopochóca, mo tojuatanguaná entšayacá.

<sup>12</sup> Aca chë luarënga cochanjátrocaye, mo tsmëcá cuafjabiamcá. Chca, chë luarëngaca cochanjama, mo entšayá tcojtenëjonëtse y tcojenotrocacá.

Pero aca nyets tempo cach aca cochandesomñe, y nyets tempo vida cochandesóbomñe ca –cha tojánayana.

<sup>13</sup> Bëngbe Bëtsá ndocna te ndocna ángelbioye mëntšá tbonjaniyana, ntšamo chabe Uaquiñábioye tbojaniyancá:

Atšbe catšbioica cochtsetbemana, acbe uayayënga acbe cucuatšifne chamoquedama atšbe obenánaca chjamëntscuana ca.

<sup>14</sup> Ndegombre, nyetsca angelënga espíritënga mondmëna Bëngbe Bëtsá jaserviama, ndëmuanÿënga cha tojanichamó bënga jabújabuachama, chë atsebácanënga mochtsemnëngbe tšabiamama.

## 2

### *Canÿe bëts soye endmëna atsebácanënga jtsemnana*

<sup>1</sup> Chíyeca, bënga šontsamna sempre Bëngbe Bëtsabe soyënga jtsuenanana, chë bënga tmonjouena soyënga, chë tšabe benachentšana ndoñe chamondojuánama. <sup>2</sup> Ndayá Bëngbe Bëtsá tempo angelëngaca entšanga tojanamëndacá, canÿe ndegombre soye endmëna, y entšanga entsamna chca jtsobedecénana; y chë bacna soye tmojanmënga y ntšamo Bëngbe Bëtsá tojanmandacá ndoñe tmonjanmënga castigo tojanatšatá, chca tmojanma causa; y chca, <sup>3</sup> bënga chca bacna soyënga tmojtsamëse, ¿ntšamo mochjobenaye jtsejuabnayana Bëngbe Bëtsá chama ndoñe šochanjacastígaye ca? Ndegombre cha chca echanjama, bënga chábeñe ndoñe tmontsošbuáchese, chë bëts soye jëftsashjáchama, atsebácanënga jtsemnana.

Bëngbe Utabná chë natsaná yojtsemna nda entšanga tojanabuayená Bëngbe Bëtsá entšanga yochjánatsebacama; y ínÿenga bënga šonjanabuayená cachcá ntšamo chábioye tmojanoyeunacá. <sup>4</sup> Y Bëngbe Bëtsánaca tonjaninÿanÿé, ndayá chënga tmojanabuayenacá ndegombre bétsemnama, chabe obenana jinÿanÿiyama soyëngaca, entšanga chamenjnaná soyëngaca, bëts soyëngaca, y entšanga chë Uámana Espiritu ainaniñe chamotsebomnama cha jtsamëse. Chca jamëse, cada ona chaotsobena jamama ntšamo Bëngbe Bëtsá yobošcá.

*Bëngbe Bëtsá tojanma Jesucristo entšangcá chaotsemnama*

<sup>5</sup> Bëngbe Bëtsá angelënga ndoñe tonjubuáyana chamotsemándama ndayá quem luarentše yochtsemniñe, lempe mo tsmëcá chaotsemnama Bëngbe Bëtsá chaojama ora, chë ndayama mora bënga montsoyebuambná. <sup>6</sup> Chamna, ínÿoca Bëngbe Bëtsabe uabemana palabrenguiñe mëntsá endayana, ntšamo chábioye canÿa tbojaniancá tojánayana:

Entšanga ndoñe yapa uámanënga quemátsmëna, as ¿ndáyeca tša chëngbeñe cuanjésejuabnaye?

Chënga entšanga mondmëna. ¿Ndáyeca tša chënga cuanjésanÿena?

<sup>7</sup> Aca tcojama entšá puerte uamaná chaotsemnama, y chë angelëngna nÿe batšatema chabiamá más uámanënga mondmëna.

Aca tcojama cha puerte uamaná y respeto merecido bomná chaotsemnama,

<sup>8</sup> y cha chaotsemándama nÿetsca chë inÿe soyënguiñe, chë quem luarentše aca tcojamiñe —chiñe canÿa tojánayana.

Entšá lempe chaotsemándama Bëngbe Bëtsá tojanma ora, tondaye tonjánboshjona entšáftaca ndëmandana soye ca. Pero mëntscoñama ndoñe nÿa chca quemëntinÿe, chë entšá lempe ntšamo quem luarentše yomncá jtsemándayana. <sup>9</sup> Pero bënga mondëtatšëmbo y corente mondonÿá Jesús aíñe chca tojanmama. Bëngbe Bëtsá tojanma cha nduamaná chaotsemnama, mo canÿe entšacá, baseftayté chë angelëngbiamá más batšá uamaná. Bëngbe Bëtsá, entšangbe tšabiamá jtsejuabnayëse, yojánboše Jesús chaóbanama, corente jasúfriase; Bëngbe Bëtsá yojánboše cha chca chaomama, nÿets luarentša entšangbe tšabiamá. Y Jesús ya chca tojánmayeca, Bëngbe Bëtsá ya tojinÿanÿé cha puerte bëtsá y uamaná bétsemnama.

<sup>10</sup> Nÿetsca soyënga yobinÿna Bëngbe Bëtsabiamá y chábeyeca. Tšabá enjamna, Bëngbe Bëtsá jamana Jesucristo chaotsemnama lempe ntšamo entšanga tmojtsajabotcá, nda chëngbe bacna soyënguentsana cháuatsebacama. Bëngbe Bëtsá chca tojanma, Jesús, chë entšanga atsebácanënga jtsemnama unachayá, chaosufrima jamëse, chca, ba entšanga celoca, mo

chabe basengcá, cháftaca bëtsétsanga chamotsemnana. <sup>11</sup> Er Bëngbe Bëtsá cach Taitá nyetscangbiana endmëna: Jesús, chë entsanga Bëngbe Bëtsábenga chamotsemnana iuamabiana, y chë entsanga chca chamojtsemnëngbiámna. Chíyeca Jesús, Bëngbe Bëtsabe Uaquiñá, ndoñe ntsëuatjana chëngbioye catšátanga ca jtsachembuanama. <sup>12</sup> Bëngbe Bëtsabe uabemana palabrënguiñe Bëngbe Bëtsábioye cha mëntsá tbojaniana:

Atšbe uabentsëngbeñe acbiana chanjóyebuambaye, y jacántase cbochanjëtschuaye, ácbioye adórayënguëntse ca.

<sup>13</sup> Y mëntsánaca cha Bëngbe Bëtsabiana tojánayana:

Atše atšbe Bëtsábeñe chantsošbuáchiye ca.

Y más chcoye mëntsá tojánayana:

Muentše Bëngbe Bëtsabe básengaftaca sëntsemna, chë atšbe cucuatšíñe tojábashëjuanënga, atše jtsanÿenama ca.

<sup>14</sup> Quem Bëngbe Bëtsabe básenga nyetsca entsangcá mondmënayeca, Jesúsnaca canÿe entsá chëngcá tojanóbema. Cha chca tojanma, jóbanëse, chë entsanga jóbanama chaotsamnana obenana bomná Satanás, jayënjanama.

<sup>15</sup> Y chca, cha tojama chë jóbanama y ndayá chentšana yochjopásama auatjënga ndoñe chamondétsauatjama; chënga nyets tempo corente ngmënaca imnoyena, jóbanama auatja causa. <sup>16</sup> Er ndegombre, cha ndoñe tonjánabo chë angelënga jabújabuachama, ndayá chë Abrahámbentšana entsángbioye.

<sup>17</sup> Y chama cha ibojamna jtsemnana nyetsca soyënguiñe cachcá mo chabe uabentsëngcá, chë entsanga, chca, jobenayama jtsemnana chëngbiana mo bachnangbe canÿe más uámana amëndayacá, Bëngbe Bëtsá jtseimpadánama chëngbioye chëngbe bacna soyëngama cháuaperdonama, puerte lastemado mëná y sempre ntšamo Bëngbe Bëtsá tbojauyancá amá. Chca, cha jóbanëse jamama entsanga chamobenama perdonánënga jtsemnana, y chca, jobenayama Bëngbe Bëtsáftaca tšabá tempcá jtsemnëngama.

<sup>18</sup> Y mora cha entsobena, ndëmuanÿenga bacna soye jamama tojócochenguënga jujabuáchana; cha chca entsobena, er cachánaca tojansufrí, cha bacna soye chaomama Satanás tša yojtsentšena ora.

### 3

#### *Cristo Moisesbiana más uamaná endmëna*

<sup>1</sup> Chíyeca, Jesucristbeyeca catšátanga, Bëngbe Bëtsábenga, ndëmuanÿenga Bëngbe Bëtsá tojáchembo chabe entsanga chamotsemnana, corente Jesucristbeñe šmochjésejuabnaye. Cha endmëna nda Bëngbe Bëtsá bëngbioye tbojanichmó, y nda bëngbiana yomna mo chë más uámana bachnangbe amëndayacá, Bëngbe Bëtsábioye jtseimpadánama bacna

soyëngama chašotsaperdonama. Cha chca endmëna chë bënga mondošbuaché soyënguiñe y chë mondbáyana ndegombre yomna ca soyënguiñe. <sup>2</sup> Er Jesús nyets tempo tojanma ndayá chaotsamama Bëngbe Bëtsá tbojanianyancá, Bëngbe Bëtsá, nda tbojanábuayana chca chaoservema, cachcá ntšamo Moisés tojanma ntšamo Bëngbe Bëtsá tbojanmandacá, chabe entšángbioye cháuaservema. <sup>3</sup> Canye yebna jebuaná chë yebnama más uamaná jtsemnana; cachcá Jesús, nda inétsama entšanga Bëngbe Bëtsábenga chamotsemnana, más jtsemerecénana Bëngbe Bëtsá cha puerte bëtsá y uamaná bétsemnana cháuinjanyëma, nye ntšamo Moisés, canya Bëngbe Bëtsabe entšanguentšá yojanomerecénama. <sup>4</sup> Ndëmuanye yébnënaca canye jebuaná jtsebomnana, pero Bëngbe Bëtsá endmëna nda tojanma lempe ntšamo yobinyncá. <sup>5</sup> Moisés yojtsama ndayá chaotsamama Bëngbe Bëtsá tbojanmandacá, tsabe oservenacá nyetsca Bëngbe Bëtsabe entšángbeñe, y yojamna canya corente tatšëmbuá ndayá más chcoye yochjanopásama, ndayá Bëngbe Bëtsá yochjánayanama. <sup>6</sup> Pero Cristo, ndayá Bëngbe Bëtsá tobošcá jamana, chë Bëngbe Bëtsabe entšángbeñe Uaquiñacá jtsemándayëse, ntšamo canye uaquiñá jtsemándayana ndayá nyetsca chabe pamillanga tmojtsamiñe; cha, chë Uaquiñacá y chënga chë Bëngbe Bëtsabe pamillentšengcá. Bënga chë pamillentša entšanga jtsemnana, bënga chë ndayá tmošbuáchema bëts añémoca sempre tmojtsóyebuambnase, y sempre Bëngbe Bëtsá tsabe soyënga bëngbiamama yochjamama tmojtsobátmanëse, y bënga chca jtsebomnana puerte oyejuayënga tmojtsemnëse.

*Chë jóchnama uámana luare Bëngbe Bëtsabe entšangbiamama*

<sup>7</sup> Chcasna, ntšamo chë Uámana Espíritu Bëngbe Bëtsabe uabemana palabrenguiñe tojanayancá:

Mënté tšëngaftanga ndayá Bëngbe Bëtsá tojtsichamcá šmojouenëse,

<sup>8</sup> ndoñe šmattsama, Bëngbe Bëtsabe buayenana soyënga tšëngaftangbe ainaniñe ndoñe chaondómashënguama, mo chë entšanga ndoyena luaroca Moiséssoftaca imojëftsemnëngcá, Bëngbe Bëtsabe contra nyetsca soyënguiñe imojtsemna.

Chënga bëtscá bacna soyënga tmojanma, mo ndayá cuaftsamcá jinjyama ntsachetšá más muanjobenaye jamana y Bëngbe Bëtsá cabá uantado chëngaftaca tayojtsemnana.

<sup>9</sup> Bëngbe Bëtsá tojánayana: “Chentše, tšëngaftangbe bëts taitanga bëtscá monjánama jinjyama ndayëntscoñe atše uantado chëngaftaca tsjamnama;



chca chënga tmonjanma, masque canta bnëtsana uatëntscuana chënga chentše tmonjáninÿe chë átše sënjánama bëts soyënga.

10 Chíyeca, atše chorsca entšángaftaca šonjánetna y sënjánayana: ‘Tšëngaftanga mora átšeftaca ndoñe quešmátajna, mo chë otšenënga tmojtsemnëngcá,

y ndoñe šmonjábošena jtsiyenana ntšamo atše tsbošcá jt-samëse.’

11 Chíyeca, atše chëngaftaca etonaná sënjánayana, mo nda cuafjajuracá,

chënga ndocna te mochjëftsashjache chë átšeftaca jóchnama uámana luaroye jashjanguama ca” —cha tojánayana.

12 Jesucrístbeyeca catšátanga, yejuana šmochtsantješna ndocná tšëngaftanguentšá chaondëtsebomna canÿe ainana bëtscá bacna juabnëngaca, y chë causa chaotsemna Bëngbe Bëtsábeñe ndošbuachiyá, y Bëngbe Bëtsábentšana, chë sempre iuetsemnábentšana chaotsojuánañe. 13 Chamna,

nÿetscanga añemo šmochtsatenatsetnaye cada te, chë bënga imobena Bëngbe Bëtsá joyeunayama tempo imoyenëntscuana, chë Bëngbe Bëtsabe uabemana palabrenguiñe “mënté ca” uabaina tempo. Chca cmontsamna, ndocná tšëngaftanguentšá chaondëtsamama, Bëngbe Bëtsabe buayenana soyënga ainaniñe ndoñe más chaondómashënguama, bacna soyënga jamama juabnëngaca ingñená. 14 Er, ndayá Jesús chabe amëndayoca yobomnentšana bënga chamóyëngacñamna, bënga šontsamna sempre ainaniñe corente jtsetatšëmbuana Jesusbe soyënga ndegombre soyënga bëtsemnama, ntšamo bënga chábeñe jtsošbuáchiyama tmonjanontšé ora monjanamcá.

15 Ntšamo Bëngbe Bëtsabe uabemana palabrenguiñe endayancá:

Mënté tšëngaftanga ntšamo Bëngbe Bëtsá tojtsichamcá šmojouenëse,

ndoñe šmattsama, Bëngbe Bëtsabe buayenana soyënga ainaniñe ndoñe chaondómashënguama,

mo chë entšanga ndoyena luaroca Moisésoftaca imojëftsemnëngcá, Bëngbe Bëtsabe contra nÿetsca soyënguiñe imojtsemna ca.

16 ¿Y ndëmuanyënga imojamna, chë Bëngbe Bëtsá tojanëyancá tmojanuenentšana, nÿetsca soyënguiñe chabe contra imojtsanmëna? Co chë Moisésbeyeca Egiptocana tmojánbocanënga. 17 ¿Y ndëmuanyëngaftaca Bëngbe Bëtsá etonaná canta bnëtsana uatëntscuana yojtsemna? Co chë bacna soyënga tmojanmëngaftaca, ndëmuanyënga entšanga ndoyena luaroca tmojanóbana y chëngbe cuerpo chentše

tojanoquedá. <sup>18</sup> ¿Y ndēmuanÿenga tojanëyana, mo nda cuafjajuracá, chënga ndocna te mochjëftsanashjache chë cháftaca jóchnama uámana luaroye jashjanguama ca? Co chë ndēmuanÿenga ntšamo cha tojanmandacá ndoñe tmonjanmënga. <sup>19</sup> Y ndegombre, bënga montsobena jinÿama chënga ndoñe tmonjëftsanashjache chë cháftaca jóchnama uámana luaroye jashjanguama, Bëngbe Bëtsábeñe ndoñe imontsošbuaché causa.

#### 4

<sup>1</sup> Chíyeca, bënga chë Bëngbe Bëtsáftaca jóchnama uámana luare jashjáchama cabá imobenëntscuana, ntšamo cha šojanašebuachenacá cachcá mëntscoñama iuétsemna, puerta cuedado mochtsebomna, nderado ndánaca tšëngaftanguentšá ndoñe nanjobenaye chca jashjáchama. <sup>2</sup> Er bëngnaca chë tšabe noticiënga tmonjouena, cachcá chë Bëngbe Bëtsabe buayenana soyënga chëngbe ainaniñe ndoñe chaondómashënguama tmojanmëngcá; pero chënga chë buayenana soyënga tmojanuena ora, ndocna tšabe soye chëngbeñe tonjanopasá, er chca tmojanuena ora, chë palabrenguiñe ndoñe montsanošbuaché. <sup>3</sup> Pero bënga, chë Jesucristbeñe tmojošbuachengna, mochanjobenaye chë jóchnama uámana luaroye jashjanguama, chë ndayama Bëngbe Bëtsá tojánayana, chë tempo chábioye chca tmojtsanábotengbiama cha mëntšá tojánayana ora:

Chíyeca, atše chëngaftaca etonaná, sënjánayana mo nda cuafjajuracá,

ndegombre chënga ndoñe mochjëftsashjache chë jóchnama uámana luaroye jashjanguama ca.

Pero cha chabe trabajo tojanpochocá, quem luare tojanma ora; <sup>4</sup> er Bëngbe Bëtsabe uabemana palabrenguiñe cánÿentše mëntšá endayana, chë canÿsëfta tianoye ndayá cha tojanmama:

Bëngbe Bëtsá nÿetsca trabajëngama tonjanochná chë canÿsëfta tianoye ca.

<sup>5</sup> Y cachentše Bëngbe Bëtsabe uabemana palabrenguiñe endayana, chë tempo chábioye chca tmojtsanábotengbiama:

Chënga ndocna te quemocháisashjache chë átšeftaca jóchnama uámana luaroye jashjanguama ca.

<sup>6</sup> Chë entšanga monjamna chë natsanënga chë tšabe noticiënga jouenama, pero chë Bëngbe Bëtsáftaca jóchnama uámana luare ndoñe tmonjëftsashjache, ntšamo cha inabošcá chënga ndoñe tmonjanma causa. Chcasna, cabá ndegombre endëtsomñe báseftanga, chë Bëngbe Bëtsá tojánayana soyënguiñe tmojtsošbuáchenga, mochjëftsashjache chë Bëngbe Bëtsáftaca jóchnama uámana luaroye jashjanguama. <sup>7</sup> Chë entšanga

ndoyena luaroca, Bëngbe Bëtsá entšanga tojánachembo chë cháftaca jóchnama uámana luaroye chámumashjnama, y chentsana ba uatëse cha cachiñe canye tempo tojuinyaná, chora entšanga chamobenama chë cháftaca jóchnama uámana luaroye jashjajnama, chë cha “mënté ca” tojanabaye tempo. Cha chca tojanma Davidbiajana jóyebuambayëse, David Bëngbe Bëtsabe uabemana palabrenguiñe mëntsá tojánayana ora:

Mënté tsëngaftanga, ndayá Bëngbe Bëtsá tojtsichamcá šmojouenëse,

ndoñe šmattsama, Bëngbe Bëtsabe buayenana soyënga ainaniñe ndoñe chaondómashënguama ca.

8 Josué, Israeloca entšanga Canaán fshantsëngoye yojtsënachaye ora, chë Bëngbe Bëtsáftaca jóchnama uámana luare jtsebomnama cha choca matëñjanmëse, Bëngbe Bëtsá bayté chentsana, David yojëftsiyena ora, inye tempuama ndoñe matëñjanoyebuambá, chë ndaye ora entšanga muanjobenaye chë cháftaca jóchnama uámana luare jashjáchama. <sup>9</sup> Y chca, cabá endmëna canye uámana luare ndayentse Bëngbe Bëtsabe entšanga mochjobenaye cháftaca jóchnama, ntšamo Bëngbe Bëtsá tojanochnacá, chë quem luare jamama nyetsca trabajënga tojanpochocá ora; <sup>10</sup> er nda tojashjache chë Bëngbe Bëtsáftaca jóchnama uámana luaroye jashjanguama, cha jóchnana chë Bëngbe Bëtsá tbojanmandá jamama trabajëngama, ntšamo Bëngbe Bëtsá tojanochnacá, chë quem luare jamama nyetsca trabajënga tojanpochocá ora. <sup>11</sup> Chíyeca, šontsamna lempe ntšamo tmojobenacá jamana chë jóchnama uámana luare jëftsashjáchama, ntšamo chë Bëngbe Bëtsábioye ndoñe tmonjanoyeunangcá ndocná chaondétsamama, y chë causa chënga chë soye ndoñe tmonjëftsashjache.

<sup>12</sup> Er Bëngbe Bëtsabe palabra endmëna mo canye aina soycá, nyets tempo entšangbiöye ndayánaca jtsabuátambayana, y bëtscá jamana corente obenánaca, y ndocna te nye bonamente chë palabra jóyebuambayana. Mo chë nyets utoicajana más efsana espadëjaquécá, jobenayana puerta jashenoye jatëtsana canye cuerpo tcojatëtse ora, cachcá y cabá puerta más Bëngbe Bëtsabe palábraca, cha bënga jinýanyiyana ntšamo bënga nye bëngbe ainaniñe tmojtsejuabná y tmojtsebošcá, y chë ndocnábioye tmonjinýinyé sóynaca; y chë palábraca cha endobena jáuyanana ntšamo bënga tmojajuabó y tmojabošencá aíñe o ndoñe tšabá bëtsemnana. <sup>13</sup> Ntšamo Bëngbe Bëtsá tojamentsana tondaye quenátopodena chabiamana iytëmenana jtsemnana. Bëngbe Bëtsá lempe bominye iuetsequëcñá, y nyetsca soyëngama y nyetscangbiamana lempe yotátšëmbo; Bëngbe

Bëtsá, ndábioye šojtsamna sempre jojuana ndáyeca canýe soye chca tmojamama.

*Jesús endmëna chë más uámana bachnangbe bëts amëndayá*

<sup>14</sup> Jesús, Bëngbe Bëtsabe Uaquiñá celoye tojámashëngo, y mora cha endmëna nda chabe delante sempre bëngbiama ibuétseimpadana, mo chë bachnangbe canýe más uámana amëndayacá. Chíyeca, bënga šontsamna sempre chábeñe jtsošbuáchiyana, ntšamo bëngbe ndegombre ošbuáchiyana yomncá, chë ndayama bënga nyetsca entšángbeñe tmojayana. <sup>15</sup> Er chë bëngbiama impadaná, mo bachnangbe canýe más uámana bëngbe amëndayacá, Jesús, yobena bëngbiama jóngmiana, bënga inýe ora ndoñe yapa obenana tmontsebmna ora, tšabe soye o ndaye sóynaca jamama. Chca endmëna, er Satanás tša yojtsentšena Jesúsbioye ba juabnënga chabotsontšáshjuanama, jayënjanama bacna soye chaomama, nyetsca juabnënga ntšamo bëngnaca mondbetsebmncá, pero Jesús ndocna te ndocna bacna soye tonjëftsema. <sup>16</sup> As, ndauatjca Bëngbe Bëtsá mochjótšëmbona, mo chábioye cuaftsobecocnangcá; cha canýe uámana tbemaniñe yojtsetbemana canýe bëts reycá; chca mochjama, bënga chášualastemama, y bëngbiama tšabe juabna jtsebmñese, chašújabuachama bënga chca chašojtséjaboto ora.

## 5

<sup>1</sup> Ndëmuanýe bachnangbe más uámana amëndayánaca jtsemnana entšanguentšana bocacaná, y uabuayaná chëngbe cuenta Bëngbe Bëtsá jaserviama, chábioye juatšëmbonama y bayënga jobáyama Bëngbe Bëtsá jëtschuayama, chca, Bëngbe Bëtsá chë bacna soyënga entšanga tmojamama cháuperdonama. <sup>2</sup> Chë bachna jtsoobenana jóngmiana, chë bacna soyënga amëngbiama chama ntsetatšëmbcá, y chë bacna soyënga jamama ingñënënga imomnënga, mo otšenëngcá imomnëngbiama, er cachánaca inýe ora ndoñe yapa obenana ntsebmñana, chë bacna soyënga jamama juabnëngama jtocochbuáchama. <sup>3</sup> Y chíyeca cha jtsemnana bayënga jobáyama Bëngbe Bëtsá juatšëmbonama, ndoñe nýe entšángbioye bacna soyëngama cháuperdonama, ndayá chábioye chaboperdonámnaca. <sup>4</sup> Ndocná quenátobena cachá quem uámana trabajo jentšetayana, bachnangbe más uámana amëndayá jtsemnana; cha jtsemnana, Bëngbe Bëtsábeyeca uabuayaná chca uámana trabajo jamama, ntšamo ndegombre Aarónoftaca tempo cha tojanmcá. <sup>5</sup> Cachcá, Cristo ndoñe cachá tonjanenábuayana jtsemnana chë Bëngbe Bëtsabe delante sempre bëngbiama impadaná, mo bachnangbe canýe

más uámana amëndayacá, ndayá Bëngbe Bëtsá tbojanábuayana chë uámana trabajo jtsebonnama. Cha endmëna nda Jesúsbioye mëntšá tbojaniyana:

Aca atšbe Uaquiñá condmëna.

Mënté entšanga sënjinÿanyé aca atšbe Uaquiñá comnama ca.

<sup>6</sup> Y ínÿocnaca, Bëngbe Bëtsabe uabemana palabrenguiñe mëntšá tbojaniyana:

Aca nÿetsca tescama canÿe bachna condmëna,

canÿe bëts bachna ntšamo Melquisedec yojamncá ca.

<sup>7</sup> Jesús quem luarentše yojëftsiyenëntscuana, cha juayebuáchëse y shëchbuíyeca Bëngbe Bëtsáftaca ibnëncuentaye y ibnaimpadana, cha chë jobanámentšana jatsbocama yojanobená; y Jesús ntšamo Bëngbe Bëtsá yojanbošcá tojánmayeca y tša respeto chabiamá bómnyeyeca, chábioye tbojanoyeuná. <sup>8</sup> Chca, Cristo masque Bëngbe Bëtsabe Uaquiñá inamna, jasúfriase tojanábouinÿe ntšamo jamana ndayá Bëngbe Bëtsá tojtsebošcá. <sup>9</sup> Chca, Bëngbe Bëtsá chábioye tbojánbema lempe ntšamo entšanga tmojtsajabotcá, nda chëngbe bacna soyëngama cháuatsebacama; chentšana cha, Cristo, tojanma lempe ntšamo yojaniytcá, nÿetscanga chë entšanga chábioye imojánëyeunanënga chamotsobenama nÿetsca tescama atsebácanënga jtsemnama; <sup>10</sup> y Bëngbe Bëtsá tbojanábuayana, chë chabe delante sempre bëngbiama impadaná, mo bachnangbe canÿe más uámana amëndayacá chaotsemnama, canÿe bëts bachna ntšamo Melquisedec yojamncá.

### *Resjo endmëna, ošbuáchiyana jtsajbanana*

<sup>11</sup> Bëtscá entsemna quem palabrama jóyebuambayama, pero chë soyënga jayanama ntšamo tšëngaftanga catafjosertaycá, ndoñe paselo quenátsmëna, er tšëngaftangna nÿa uenana Bëngbe Bëtsabe soyëngama jósertana. <sup>12</sup> Tšëngaftanga ya bayté Jesucristbe soyëngama šmotátšëmboyeca, tšëngaftanga cmontsamna ya jtsobenana ínÿengbiyoye chë soyënga jtsabuátambayana; pero tšëngaftanga cmontsëjaboto ndánaca Bëngbe Bëtsabe soyëngama cachiñe chacmëtëtabuayená, chë jtsošbuáchiyama šmojontsé ora natsana jshauatsjinÿana soyëngama. Y chca, tšëngaftanga šmojobiama mo šëšonatëmëngcá, jtsëjabótana létšiyey jofšiyana y ndoñe jobenayana jasana chë jabmuánama ndoñe paselo tontsemna soyënga. <sup>13</sup> Chë nÿetsca soyënguiñe ntšamo tšabá yomncá jtsamama buatëmbana soyënga ndoñe tontsabuatmá cha, jtsemnana mo canÿe šëšonatëmcá, nda vida jtsebonnana nÿe létšiyey jtseftmanëse. <sup>14</sup> Pero chë tmojtsobena jajuaboyana y jtsetatšëmbuana ndayá tšabá yomna o ndayá ndoñe tšabá jamama, chca jtsamëse tmoyenamna, chënga jtsemnana mo

bëtsëtsangcá, ndëmuanÿenga ndayánaca jasana, chë ndoñe paselo jabmuánama soyëngnaca.

## 6

<sup>1</sup> Chcasna, bënga šontsamna jtsajbanana nÿe jésebošana jtsatsjédayana Cristbe buatëmbana soyënga, chë bënga chábeñe jtsošbuáchiyama tmojanontsé ora tmojanatsjinÿe soyënga, y šontsamna jtsatsjédayana chabiamana nÿetsca soyënga, más totcá josértama yomna soyënga. Chca, bënga mochántsemna mo chë bëtsëtsangcá, ndayánaca jtsesayana. Ndoñe más nÿe chë natsana buatëmbana soyëngama mattsatsjédaye, mo chë ndayá yomna bacna soyënga jtsamana y chë bënga ndoñe vida ntsebomnama junatsana soyënga amana jtsajbanana, y chë tšabe benache jtishachana; o ntšamo Bëngbe Bëtsábeñe jtsošbuáchiyana; <sup>2</sup> chë juabáyana ndayá yomna; chë ínÿabe bestšašiñe cucuatšënga jacjayana Bëngbe Bëtsábioye chabiamana jaimpádama; chë obanënga jtayanama Bëngbe Bëtsá yochjamama; y mocna ora ntšamo entšanga tmojamama Bëngbe Bëtsá yochjayanama, chënga chë nÿetsca tescama yomna tšabe vida chamotsebomnama o nÿetsca tescama castigánënga chamotsemnama. <sup>3</sup> Y bënga chca fchanjama, chë más totcá yomna josértama soyënga jtsabuátambayana, Bëngbe Bëtsá chca chašojálesenciase.

<sup>4</sup> Ndëmuanÿenga, canÿe ya chë Bëngbe Bëtsabe ndegombre soyënga tmojanóÿëngacñe, y chë Bëngbe Bëtsabe ba tšabe soyëngnaca, chábënga bëtsemnama, y chë Uámana Espiritu chëngbe ainaniñe chaotsemándama imobomna, <sup>5</sup> y chë Bëngbe Bëtsá ntšamo tojašebuachenacá sempre inétsamama tmojinÿe, y ndëmuanÿenga tmojáninÿe Cristo jtsamana bëts soyënga chabe bëts obenánaca, chë ndaye obenánaca cha puerte bëts soyënga yochjama cha quem luaroye yochjésabo ora, <sup>6</sup> chënga Jesucristbeñe ošbuáchiyana lempe tmojtsajbanase, tondaye quenátsmëna ndayá jamama cachiñe Bëngbe Bëtsábioye jtobéconama; er Bëngbe Bëtsabe Uaquiñá chca stëtšoye jaquédana, y jtsemnana mo Bëngbe Bëtsabe Uaquiñábioye cachiñe chënga tmojtsecrucificacá, y entšanga cachiñe cha chamotsáboyejuanama chënga cuafjamcá. <sup>7</sup> Smochjinÿe: fshantse jamana chë ba uafténënga chiñe chaómashënguama, y chë chiñe trabájayëngbiamana bëtscá jaja sananga tojóboecnëse, Bëngbe Bëtsá jamana, chë fshantsentsana bëtscá tšabe soyënga entšangbiamana chaotsebínÿnama. <sup>8</sup> Pero nÿe uchmašëshangá y matënga uchmëfjangaca chiñe tojuábocnëse, chë fshantse tondaye ntsámanana; y nderado Bëngbe Bëtsá nanjama chiñe ndocna tšabe mata chaonduábocnama, y cabana,

entšanga chiñe mochantsashaniñá. Cachcá, chë ošbuáchiyana tmojtsajbananga castigánenga mochántsemna.

*Bëngbe Bëtsábeñe sempre chamotsobátmanama y ainaniñe bëtscá añemo chamotsebomnama*

<sup>9</sup> Pero masque chca montsoyebuambná, atšbe bonshánenga, bënga tšabá fsëndétatšëmbo tšëngaftangbeñe chë más tšabe soyënga echántsemna, chë atsbocaná jtsemnama tojtsá cha yobomna soyënga. <sup>10</sup> Er Bëngbe Bëtsá sempre ntšamo tšabá yomncá nyetsca soyënguiñe jtsamana, cha ndegombre echántsejuabnaye ndayá tšëngaftanga šmojamama, y chë chabiamama šmojinñyë bonshánama, chabe entšangbiyoe jtsëjabuáchanëse, ntšamo mórnaca šmojtsama. <sup>11</sup> Pero bënga fsëntseboše, cada ona tšëngaftanguentšá, nyets tempo y Jesús chaojésabëntscuana chaotsinñanñá corente yoboše chca jtsamama, Bëngbe Bëtsábeñe chca jtsošbuáchiyëse, chábeñe sempre chašmotsobátmanama, tšëngaftangbe tšabiamama cha chaomama. <sup>12</sup> Ndoñe queftsátsboše tšëngaftanga oyënjayënga chašmotsobiamama chë Bëngbe Bëtsá tcmojabanñyë trabajo jtsamama, ndayá Jesucristbeñe ošbuáchiyana bomnëngcá y padecena soyënguiñe uantado mënëngcá šmochtsama. Chca, chënga mochanjýëngacñe ndayá Bëngbe Bëtsá jatšatayama tojašebuachenacá, chabe entšanga bëtsemnama.

<sup>13</sup> Bëngbe Bëtsá Abrahámbyoye tbojanšbuachená ora, chca tbojanianama cachabe uabaina jayanëse, er inña chabiamama más uamaná ndoñe yontsemna ndabiamama jajúrama, ntšamo tbojanšbuachenacá ndegombre chaotsemnama; <sup>14</sup> cha mëntšá tbojanšbuachená: “Añe, atše chanjama aca bëtscá tšabe bendicionënga chacotsebomnama, y chanjama acbentša pamillentsana mallajta entšanga chamotsemnama ca.” <sup>15</sup> Y chca, Abraham Bëngbe Bëtsábeñe jtsošbuáchiyëse, puerte uantadiñe yojanobátmana ntšamo tbojanšbuachenacá Bëngbe Bëtsá yochjanmama, y pronto chca tojanóyëngacñe.

<sup>16</sup> Entšanga tmojajurá ora, chca jamana chëngbiama canñe puerte más uámanabe uabaina jayanëse, y chca chëngbiama más uamanabiama tmojajurá ora, jtsayanana ntšamo tmojašbuachenacá pronto mochjamama, y chcasna, chama ya ndoñe más ntjatenátsëtsnayana. <sup>17</sup> Y chca, Bëngbe Bëtsá tojánbošena botamana jinñanñiyana, ntšamo cha tojanašebuachenacá mochjanoyëngacñëngbiyoe, ntšamo tojanašebuachenacá cha ndegombre yochjanmama, y ndocna te chë ntšamo jamama yojanjuabnacá yochjantrócama. Chíyeca, botamana tojaninñanñyë cha chca yochjanmana, cachabiamama jajúrase, chë ntšamo tojanašebuachenacá yochjanmama ndegombre bëtsemnama. <sup>18</sup> Bëngbe Bëtsabe šbuachenana soye y chama jinñanñiyama

ntšamo tojanayancá, ntšamo tojanašebuachenacá ndegombre yochjamnama, chë uta soye ndocná ntsoobenana jatrócama; y chca tojayana ora, ndoñe ntso podénana Bëngbe Bëtsá chaobená jobostérama. Y chca, chë uta soyama, bënga bëtsá aňemo ainaniñe jóyëngacñana, bënga chë Bëngbe Bëtsábioye tmojobéconanga, cha chásuatsebacama y chašotsanñenama, mo canñe bëts resjuentšana tmojtsachetëngcá, ntšamo chentšana atsebácanënga jtsemnama cuaftsenguacá. Bëngbe Bëtsá šojáuyana bënga imojtsobena chábeñe jtsobátmanama ca, y bëts aňémoca chábeñe jtsošbuáchiyëse, cha yejuana šochtsanñenama mondobátmana. <sup>19</sup> Mo ntšamo chë bėjaye asentoca cuedádoca tcojajajo anclama, chë barcuñe enjaquenënga tšabá jtsetatšëmbuana chë barco ndoñe yochántasshatiyiyinama, cachcá bëgnaca, Bëngbe Bëtsábeñe imobátmanama, montsobena ainanoca jtsetatšëmbuana lempe tšabá yotsomñama. Bënga Jesucristbeñe mondobátmana, y Bëngbe Bëtsá yojtsemnoye celoca cha tojámashëngo y chabe delante entsemna mo chë bachnangbe más uámana amëndayacá. Chana jamashënguana chë Bëngbe Bëtsabe bëts yebnoca, “chë más uámana ca” uabaina luaroye, entšëjua ujonñana stëtšoica, Bëngbe Bëtsabe delante jtsemnama, <sup>20</sup> ndayentše Jesús celoca, Bëngbe Bëtsabe delante tojámashëngo bëngbe tšabiamama soyënga jamama, bëgnaca chamobenama chabe delante jamashënguama; chca, Jesús tojanóbema chë bachnangbe más uámana amëndayá nñetsca tescama, canñe bëts bachna ntšamo Melquisedec yojamncá.

## 7

### *Jesús, canñe bëts bachna ntšamo Melquisedec yojamncá*

<sup>1</sup> Quem Melquisedec yojamna Salem puebloca rey y bachna chë celoca Bëngbe Bëtsabiamama; Bëngbe Bëtsá, chë nñetscangbiamama más uamaná. Abraham chë reyënga y chëngbe soldadëngaftaca imojentsjaná y tojanayëñjaná chentšana yojtsatabó ora, Melquisedec tojánbocna cha jajëbenguama, y chora Bëngbe Bëtsábioye tbojanimpadá, Abraham bëtsá tšabe bendicionënga chaotsebomnama chaomama. <sup>2</sup> Chora Abraham chábioye tbojanatšetá, chë reyëngaftaca imojentsjaná ora, lempe tojanosháchiñentšana, bnëtsanentšana canñe soye. Chë palabra Melquisedec endayana “nñetsca soyënguñe tšabá ama rey ca”; y chánaca yojamna Salem puebloca rey, y chca endayana “nñetscanga natjëmbana chamotsiyenama ama rey ca”. <sup>3</sup> Chabe pamíllangbiamama tondaye quenatótatšëmbo; chca cha endmëna mo ni taitá ni mamá ndoñe endbomnacá, ni bëts taitanga. Tondaye quenatótatšëmbo



ntseco tojanonýnama, ni ntseco tojanóbanama; chca, inýe soyënguiñe cha yojamna mo Bëngbe Bëtsabe Uaquiñacá, y endmëna mo nýetsca tescama bachna cuaftsemncá.

4 Y mora, šmochjájuaboye tša uamaná Melquisedec inamnana, er bëngbe tempsca uámana bëts taitá Abraham chábioye tbojanatšetá, chë reyëngaftaca imojentsjaná ora lempe tojanosháchiñentsana bnëtsanentsana canýe soye. 5 Ntšamo Moisesbe leyiñe endëmandacá, chë bachnangbe más uámana amëndayá Leví, Aarónënaca ca uabainabe pamillentšana tmomna bachnanga, jtsamnana chë Israeloca entšángbioye nýetsca chë tmobomna soyënguentsana bnëtsanentsana canýe soye jtsayëngacayana; y chca jtsamnana masque chë entsanga cachëngbe pamillentšënga tmomna y Abrahábentsana pamillentšëngnaca. 6 Pero Melquisedec, masque Aaronbe pamillentšá ndoñe yonjamna, Abraham, chë ntšamo Bëngbe Bëtsá tbojanšbuachenacá tojanóyëngacñabentsana, cha tojanóyëngacñe nýetsca soyënguentsana bnëtsanentsana canýe soye, y Bëngbe Bëtsábioye tbojanimpadá, Abraham bëtscá tšabe bendicionënga chaotsebomnana chaomama. 7 Y ndocná quenátobena jayanama ndoñe ndegombre yondmëna ca, chë Bëngbe Bëtsábioye impadaná ínýabiama tšabe soyënga chaomama, más uamaná inëtsemna chë chca tojóyëngacñabiama, inýa chabiama Bëngbe Bëtsábioye tbojaimpadá ora. 8 Quem tempo, bachnanga mochjóbanënga, entšángbioye jtsayëngacayana nýetsca chë tmobomna soyënguentsana bnëtsanentsana canýe soye, pero chë Bëngbe Bëtsabe uabemana palabra, Melquisedeciama endoyebuambná cha mo canýa cabá ainá totsomñcá. 9 Y bënga montsobena jayanama, Abraham Melquisedécbioye chë nýetsca soyënguentsana bnëtsanentsana canýe soye tbojanoyé ora, yojamna mo Leví, chë nýetscángbioye nýetsca soyënguentsana bnëtsanentsana canýe soye ayëngacayá, Melquisedécbioye chca cuaftopagacá; 10 er cha Abrahambe pamillentšá inamna. Melquisedec yojtsabó ora y chábioye chë lempe tojanosháchiñentsana bnëtsanentsana canýe soye Abraham tbojanatšetá ora, yojamna mo nýetscanga, chë Abrahábentsana entsanga más chcoye mochtsaniyenënga, chëngnaca chë bnëtsanentsana canýe soye cuafjajocá, masque Abraham chca tojanma ora, Leví y chë Abrahábentsana inýe entsanga cabá ndoñe tmonjanonýná.

11 Israeloca entsanga Moisesbe ley tmojanáyëngaca, chë bëts taitá Levibe pamillentšënga bachnanga imojamnënga Bëngbe Bëtsá imojtseservena ora, y chënga monjamna Aarónbentsana

entšanga. Ntšamo chë leyiñe yomandancá imojánamënga perdonánënga jtsemnama y Bëngbe Bëtsabe bominyiñe tšábenga jtsemnama quem bachnanga jamama matmëñjanobenase, ndoñe manjanëyta Bëngbe Bëtsá inye bachna chabuatschembuama, nda ndoñe yonjamna mo chë bëts bachna Aaroncá, ndayá ntšamo chë bëts bachna Melquisedec yojamncá. <sup>12</sup> Er, canye bachnanga Bëngbe Bëtsábioye jtseservénama tmojabaná y inye bachnanga chábioye jaserviama tmojatontsé ora, jtseytana chë natsana bachnanga imojanoservena ora mándaye leyëgnaca jtsetrócama. <sup>13</sup> Bëngbe Utabná, ndabiama quem soyënga jtsóyebuambnayana, ndoñe Aaronbe pamillentšá quenjatsmëna, ndayá inye pamillentšá, y quem pamillentša entšanga ndocna te bachnangcá Bëngbe Bëtsá tmonjanservé, chë altar ndirichiñe Bëngbe Bëtsabe bëts yebnoca. <sup>14</sup> Er nyetscanga mondétatšëmbo Bëngbe Utabná Judabe pamillentšana bëtsemnama, y chë pamillama Moisés ndocá tonjánayana, Bëngbe Bëtsá mo bachnangcá chënga jtseservénama.

<sup>15</sup> Y ntšamo tmojayancá montsobena más tšabá josértana, er chë tsëm bachna Cristo yojamna canya mo Melquisedec yojamncá. <sup>16</sup> Cha bachna yojamna, ndoñe chë bachnanga chabe pamillentšana jabocanama yojánamnama canye ley tojánayanayeca, ndayá nyetsca tescama jëftsiyenama cha inobénayeca. <sup>17</sup> Er mëntšá endmëna, ndayá Bëngbe Bëtsá chabiama tojánayana:

Aca bachna nyetsca tescama condmëna,

canye bëts bachna ntšamo Melquisedec yojamncá ca.

<sup>18</sup> Cha tojánabo ora, Bëngbe Bëtsá tojanma chë nda bachna jtsemnama y ntšamo joserviama mandënga chaotsopochocama, er chë mandënga ndoñe ntjobenayana entšanga jujabuáchama atsebácanënga jtsemnama, y chca, chëngbiama ndoñe bëtská yonjanoservena. <sup>19</sup> Er Moisesbe léyeca, entšanga ndoñe tmonjanobená Bëngbe Bëtsabe bominyiñe tšábenga jtsemnama, pero mora chama canye corente más uámana soye montsebonna: Jesucrístbeñe jtsošbuáchiyëse, chábeñe montsobátmana Bëngbe Bëtsáftaca tšábenga chásuabiamama, y chca, Bëngbe Bëtsábioye bënga jtobéconama.

<sup>20</sup> Y Bëngbe Bëtsá lempe chca tojanma, cachabiama jajúrase, lempe ntšamo cha tojanayancá ndegombre chaotsemnama. Chë inye bachnanga, chë Aaronbe pamillentšëngbioye tmojanëbuáyana ora, Bëngbe Bëtsá ndoñe chca tonjánayana, <sup>21</sup> pero mo bachnëcá chaoservema Bëngbe Utabnábioye tbojanábuayana ora añe; cach Bëngbe Bëtsabiama jajúrase,

Bëngbe Utabná canÿe bachna yochtsemna ca tojánayana. Ntšamo Bëngbe Bëtsabe uabemana palabrenguiñe endayancá: Bëngbe Utabná Bëngbe Bëtsá, Jesucristbioye tbojaniyana, cachabiana jajúrase, ntšamo tojanayancá ndegombre chaotsemnama,

y juabna ndoñe ntjatrócamá:

“Aca bachna nÿetsca tescama condmëna ca.”

<sup>22</sup> Bëngbe Bëtsá chca tojánayanama, Jesúsbe yeca bënga corente mondétatsëmbo, ndayá Bëngbe Bëtsá bëngbiana jamama tojanašebuachenacá, chë Jesúsbioye bëngbe bachna chaotsemnama juabuáyanana, más tšabá yojtsemna chë ndayá tempo cha chabe entsangbiana tojanašebuachená soyama. <sup>23</sup> Chë inÿe bachnanga banga imojamna, er ndocná yonjanobena Bëngbe Bëtsábioye nÿetsca tescama chca jtse servénana; cada ona básefta uatëngama tojëftsanoservé, tojanóbana y inÿabioye chë trabajo jatontšabuáchana. <sup>24</sup> Pero Jesús ndocna te ntjobanámayecna, cha mo bachnëcá Bëngbe Bëtsábioye nÿetsca tescama bochjëftservesena, y ndocna te chabe trabajo inÿabioye bochanjëftsinyinÿiye, chë inÿa cachcá jtsamama chauatontšema. <sup>25</sup> Chíyeca, cha yobena nÿetsca tescama játebacana ndëmuanÿenga chábe yeca Bëngbe Bëtsábioye tmojobeconá, er nÿetsca tescama cha echanjëftsiyena Bëngbe Bëtsábioye chëngbiana jtseimpadánama.

<sup>26</sup> Chcasna, Jesús ndegombre endmëna lempe ntšamo bënga imuajabotcá nda Bëngbe Bëtsábioye bëngbiana chabotseimpadánama, mo chë bëngbe bachnangbe más uámana amëndayacá. Cha sempre uamaná endmëna, ndocna te ni mo canÿe juabna inÿabe contra yonjábomna, ainaniñe ndocna bacna juabna yonjábomna, chë bacna soyënga amënguentshana luaroca mëná, y Bëngbe Bëtsá tojanma celoca más bëtsá y obená nÿetscangbiana cha chaotsemnama. <sup>27</sup> Cha ndoñe bonjanájaboto canÿe te y inÿe te bayënga jtsebánayana, Bëngbe Bëtsá chabe bacna soyëngama chaboperdonama y chë bacna soyënga entsanga tmojanmámna, mo chë inÿe bachnangbe más uámana amëndayënga mondbetsamcá, cachëngbiana y chë judiëngbiámna. Cha tojanma lempe ntšamo yojaniytcá canÿe soye y nÿetsca tescama, entsanga bacna soyënga tmojanmama perdonánënga chamotsemnama. Cha chca tojanma, chabe derecho vida jtsobomñama cachcá tojanonÿná ora; y tojanóbana entsanga chamotsobenama perdonánënga jtsemnama. <sup>28</sup> Ntšamo Moisesbe leyinÿe yojanmandacá, chëngbiana mo chë bachnangbe más uámana amëndayëngcá tmojanëbuáyana entsanga inÿe ora bacna soye amënga; pero Bëngbe Bëtsá cabá chë ley entsangbe cucuatšifne tojanáboshjonentsana

baytese, cha chabe Uaquiñábioye chë bachnangbe más uámana amëndayacá tbojanábuayana, cachabiamá jajúrase, ntšamo tojanayancá ndegombre chaotsemnama. Bëngbe Bëtsá tojanma chë Uaquiñá chaotsemnama lempe ntšamo entšanga tmojtsajabotcá, nda cháuatsebacama, ndocna te bacna soye ndamá, ni ainaniñe bacna juabnënga ndbomná.

## 8

*Cristo, nda jóbanëse tojanma entšanga Bëngbe Bëtsáftaca mo canyáca chamotsemnama*

<sup>1</sup> Chë más uámana soye ndayama bënga montsichamo, chë Cristo mo bachnëcá yomnama montsoyebuambná ora, entsemna: Bënga chábeñe imojtsebomna canya nyetsca tescama Bëngbe Bëtsabe delante bëngbiamá impadaná, mo chë bëngbe bachnangbe más uámana amëndayacá, Bëngbe Bëtsabe catšbioica yojtsetbemana jtsemándayama, y Bëngbe Bëtsá chë más uámana tbemanentše. <sup>2</sup> Chë inye bachnanga Bëngbe Bëtsabe bëts yebnentše tmojánamashjna chë “más uámana ca” uabaina luaroye, Bëngbe Bëtsabe delante jtsemnama; pero chë luare celoca ndayentše nyets tempo Cristo mo chë bachnangbe más uámana amëndayacá yoserverna, entšanga ndoñe chca tmonjanpormá, ndayá Bëngbe Bëtsá.

<sup>3</sup> Nyetscanga chë bachnangbe más uámana amëndayënga tmojanëbuáyana, entšangbiamá soyënga y tmojóba bayënga Bëngbe Bëtsábioye juatšëmbonama, chëngbe bacna soyëngama perdonánënga chamotsemnama; chíyeca, jtseytana Jesucristo ndayánaca chaotsebomnama, Bëngbe Bëtsábioye juatšëmbonama. <sup>4</sup> Cha quem luarentše tojtsetrabájase, cha ni mo bachna ndoñe nántsemna, er muentše ba bachnanga mondmëna, y chënga ba soyënga jamana Bëngbe Bëtsábioye jëtschuayama, ntšamo jamama Moisesbe leyíñe yomandancá. Y chca, ndoñe nantseyta cha chca chauatoservénama. <sup>5</sup> Chë inye bachnanga imobomna luarënga Bëngbe Bëtsá jadórama, y ndaye soyëngaca chënga Bëngbe Bëtsá imoserverna, ndoñe cachcá yontsemna chë ndayentše Jesucristo celoca yoserverna luarcá, ni ntšamo cha yoservencá; nye batsatema bëngbioye šuinyanýná ntšamo chë celoca luare yomnama, ndayentše Cristo mo bachnëcá yoserverna. Y bënga mondétatšëmbo quem luarentše chë soyënga chca yomnama, er chë Bëngbe Bëtsábioye jadórama yebna, chë jatsjacama opodena yebna Moisés japórmama ora, Bëngbe Bëtsá mëntšá tbojaniyana: “Cuedado cochtsebomna chë atšbiamá yebniñe nyetsca soyënga jamama, ntšamo tcbonjaninýnyëcá chacomama, chë tjoca bonjamna ora.” <sup>6</sup> Pero bëngbe bachnangbe más uámana amëndayá Cristo,

tojashjache canye más bêts trabajo jtsebmnama, ntšamo chë inye bachnanga imobomna trabajuama; cachcá, ndayá Bëngbe Bêtsá tojayancá Crísoftaca bëngbiama jamama, bënga tempcá tšabá Bëngbe Bêtsáftaca jtsemnama jtsamëse, puerte más tšabá endmëna, chë ndayá tempo chabe entsangbiama jamama tojanašebuachená soyama. Ntšamo mora cha tojayancá puerte más tšabá entsemna, er tojašebuachená más tšabe soyënga bëngbiama jamama.

<sup>7</sup> Chë Bëngbe Bêtsá natsana tojanašebuachená soyëngaca matëñjanopodé entsanga chamotsamama ntšamo yojanamncá, ntšamo tojanašebuachenacá jýëngacñama, as ndoñe manjanëyta Bëngbe Bêtsá cachiñe canye trato chauátsbemama entsangbiama. <sup>8</sup> Pero Bëngbe Bêtsá tojáninye ntšamo yojanamncá entsanga ndoñe tmonjanmama, ntšamo cha tojanašebuachenacá jýëngacñama, y Bëngbe Utabná Bëngbe Bêtsá chëngbiama mëntšá tojánayana:

Canye tempo echanjóshjango, y chora Israel y Judabe pamillentsa entsangbiama básefta soyënga jamama chanjašebuachená,

chënga átseftaca tempcá tšabá jtsemnama chamotsobenama.

<sup>9</sup> Chë chanjašebuachená soye ndoñe queochátsmëna cachcá ntšamo chë chëngbe bêts taitanga sënjanašebuachená soye enjamncá,

atše chënga sënjanënatse ora, Egiptó luarocana sënjesanëbuacna ora;

pero chëngna, ntšamo jamama enjanamncá, chë sënjanašebuachená soye jýëngacñama ndoñe chemátanma causa,

atše cachcá chënga sënjesanënyaye ca, Bëngbe Utabná tojánayana.

<sup>10</sup> Chë Israeloca entsangbiama ndayá jamama canye tempo chentsana chanjašebuachená soye,

mëntšá entsemna ca, Bëngbe Utabná tojánayana:

Atše chanjama chë chëngbe juabniñe chaitsemánda soyama chënga chamotsejuabnama,

y chamotseboše jtsamana ndayá chëngbe ainaniñe chaitsemánda soye.

Atše chëngbe Bêtsá chántsemna, y chënga atšbe entsanga.

<sup>11</sup> Chë tempo ndoñe queochátsiyta cányenga inyenga chamotsabuátambama,

cachabe luariñe oyenábioye o cachabe pamillentsa entsábioye, atše chë chëngbe Utabná chašmotsábuatmama.

Ndoñe queochátsëyta, er nyetscanga uámanënga y nduámanënga,

corente tšabá atšbe šmochantsábuatma.

12 Chënga chanjálastemaye y chëngbe bacna soyëngama chanjáperdonaye, y ndocna te más chë bacna soyënga chënga tmojamama quichátsjuabnaye ca —cha tojánayana.

13 Bëngbe Bëtsá, chë entsangbiama mora jamama tojášebuachenama tojtsichamo ora, chca jtsemnana, er cha tojama chë tempo entsangbiama jamama tojanašebuachená soye, mora ya ndoñe chaondëtsoservénama; ndayá mo tanguá soycá tojtsemna y ya ndoñe tontsoservena, chë soyna nÿe batšatema más y ya jtsopochócana.

## 9

### *Bëngbe Bëtsá jadórama muentsa luare y chë celoca luare*

1 Y morna, ndayá Bëngbe Bëtsá tojanašebuachenama y tojanmandá soyama, mandënga yojamna ntšamo cha jtsadoránama, y nÿa chabiama pormana yebnentše quem luarentše. 2 Chíyeca, Bëngbe Bëtsá tojanmandá chaotsemna canÿe jatsjacama opodena yebna chábioye jadórama, mëntšá: Chë natsana tsañe quem Bëngbe Bëtsabiama yebnentše inauabaina “chë uámana luare ca”; chentše inamna chë canÿsëfta quinÿenëfjuangá castellano candelerësiñe, y canÿe meséshta ndayiñe yojacjana chë luarentše Bëngbe Bëtsá bétsemnana inÿinÿnaye tandëšënga.

3 Inÿe ujonÿana entsějua chentšana, inÿe luare inamna; inauabaina “chë más uámana luare ca”. 4 Chentše inamna chë castellano altar, incienso jajuinÿiyama, y chë cajontema nÿetsiñe castellanoca pormánëtema. Quem cajontema yojaninÿanÿná ntšamo Bëngbe Bëtsá tojanašebuachenacá, chë Israeloca entsanga chabe uámana entsanga yochjánabiamama, y inauabaina “Bëngbe Bëtsabe šbuachenana soye inÿinÿnaye cajontema ca”; y chë tsoye quem soyënga inabomna: canÿe castellano jarrëtema, maná ca uabaina tandëšëca, chë Bëngbe Bëtsá tojanma celocana chabe entsangbiama chaótsatšama saná; Aaronbe varëfja, chë tojanantšëfjonëfja; y chë ndëtsbé tablëbenga ndayiñe Bëngbe Bëtsá tojanábema chë bnëtsana uámana mandënga. 5 Chë cajontema juatsboca imnamna chë juatëngmiášha uabomnënga, mo angelëngcá, “querubinënga ca” uabáinënga, y chënga imojaninÿanÿná chë Bëngbe Bëtsabe buashinÿinÿanana chéntšnaca bétsemnana. Chënga, chë juatëngmiášhangaca chë cajontémentša nÿets ústonëtema imojanëtsbotsana; chë ústonëtema inauabaina “entsanga bacna soyënga tmojamama Bëngbe Bëtsá perdonaye luare ca”, er chentše, chë cajontema juatsboca chë bachnangbe más uámana amëndayá jtsamanana buiñe jabuëscjana, chë Bëngbe Bëtsábioye cha ibnaimpadana te, entsanga

cháuaperdonama. Pero mora ndoñe quenátsiyta chë soyëngama lempe jatóyebuambnayama.

<sup>6</sup> Lempe chca tmojanprontantšana, chë bachnanga sempre chë natsana luaroye imojánamashjuana, jamama ntšamo Bëngbe Bëtsá tojanamëndacá, chábioye jadórama. <sup>7</sup> Pero nÿe chë bachnangbe más uámana amëndayá yojobena chë inÿe luaroye jamashënguana, y nÿe canÿe cada uata. Choye jamashënguama orna, cha ibojamna bayëngbe buiñe juabuyambana, Bëngbe Bëtsábioye juatšëmbonama, chca, chë bachnangbe más uámana amëndayá tojanma bacna soyënga Bëngbe Bëtsá chaboperdonama, y chë ntsetatšëmbcá entšanga tmojanma bacna soyëgnaca. <sup>8</sup> Chca, chë Uámana Espiritu jamana bënga chaśósertama, chë natsana luare cabá tojtsemnëntscuana y chë bachnanga cabá chë soyënga chentše tmojtsamëntscuana, nÿetscanga cabá ndoñe tmonjanobená chë inÿe luaroye jamashjnama, chë “más uámana luaroye”. <sup>9</sup> Chë soyëngaca jtsopodénana bëngbioye jinÿanÿiyana, chë tempo, chë Bëngbe Bëtsábioye jadórama yebnentše entšanga uta luare imojábomna ora, ndoñe yonjopodena Bëngbe Bëtsabe delante nÿetscanga jatsmënana, mo chë bachnangbe más uámana amëndayacá. Y chë soyëgnaca jtsayanana, chë Bëngbe Bëtsabiana uátšëmbona soyëngaca y bachnanga tmojanóba bayëngaca, ndoñe tonjanopodé jamana canÿa Bëngbe Bëtsábioye adorayá, Bëngbe Bëtsáftaca tempcá tšabá chaotatsmënana y Bëngbe Bëtsá chabe bacna soyëngama tbojaperdonama ainaniñe corente chaotsetatšëmbuama. <sup>10</sup> Chënga, chë uátšëmbona soyëngaca y tmojanóba bayëngaca tmojanma nÿe ntšamo Moisesbe leyíñe yojanayancá, ndayá chiñe yojanlesenciancá, ndayá jasama o jofšiyama, y chë cuerpo jabebiana mo tšabe entšangcá Bëngbe Bëtsabe delante jtsatsmënana; nÿetsca mandënga nÿe cuerpama, pero ainanama tondaye ntjamana. Pero chë entšanga chca yojánamna jtsamana, nÿe Bëngbe Bëtsá inÿe soyënga, más tšabe soyënga jamama tojamandantscuana, chë tsëm trato tojábema ora.

<sup>11</sup> Pero Cristo ya tojánabo, y cha yomna chë Bëngbe Bëtsabe delante bëngbiana impadaná mo chë bëngbe bachnangbe más uámana amëndayacá, chca, bëngbiana chaotsemnana chë tšabe soyënga ntšamo mochjoyëngacñécá. Chë luare celoca ndayentše cha Bëngbe Bëtsabe delante mo bachnécá yotrabája, puerte tšabe luare yomna, y chentše cha, ndoñe chë quem luarentše bachnanga imomnëngcá, cha yobena jamana lempe ntšamo Bëngbe Bëtsá entšangbiana jamama inajuabnaycá. Chë luare ndoñe entšangbe cucuátšeca yondëpormana, y chca jtsayanana, quem luarentša soye ndoñe yondmëna ca. <sup>12</sup> Cha, canÿe y nÿetsca tescama chë luaroye Bëngbe Bëtsabe

delante tojánamashëngo ora, cha ndoñe chivo o ternerbe buiñe tonjanabuyamba, ntšamo chë inye bachnanga imojuamancá; ndayá jóbanëse, chabe buiñe juabuáshanëse, cha tojanma entšanga atsebácanënga jtsemnama chamotsobename; y chca tojanmëse, cha tojanobená chë luaroye Bëngbe Bëtsabe delante jamashënguama. Y Cristo chca choye tojanamashënguëse, tojanma bënga chë nyetsca tescama yomna tšabe vida jtsebomnama chamotsobenama.

<sup>13</sup> Ndëmuanyënga ndayámnaca chë leyama tmojanouedá mo chë Bëngbe Bëtsabe delante ndoñe tšabengcá, chë bachnanga imojuamana chëngbioye toronga y chivëngbe buiñe jabuéscacjana, y chë altaroca tcojajuinýe ternerabe jatinýa chëngbioye jatbótotana, chca, chënga jábiamama Bëngbe Bëtsabe delante mo tšabengcá. Chca tmojamentšana, chë bachnanga tmojánayana chënga imojtsobena chë inyëngaftaca jabama, Bëngbe Bëtsá jadórama, y cachiñe mo tšabengcá Bëngbe Bëtsabe delante imojtsatsmëna ca. <sup>14</sup> Ndayá bachnanga tmojanmcá yojanámana entšanga cachiñe mo tšabengcá Bëngbe Bëtsabe delante imojtsatsmëna ca jayanama; y chca, chë inyëngaftaca Bëngbe Bëtsábioye jadórama tmojanobenase, jntsetšá más yojtsámana Cristbe buiñe, ndëmuanýeye tojanábuashana bëngbiama cha tojanóbana ora! Chë nyets tempo vida bomná Espíritbe obenánaca, Cristo, chabe derecho vida jtsobomñama cachcá tojanonýa y bëngbiama tojanóbana. Cha, chë ndocna bacna soye ndbomná, tojanóbana ora yojamna mo canye bayá tondaye ndbemaná chë bachnanga cuafjobacá juatšëmbonama, entšangbe bacna soyëngama; cachcá Cristo, chë ndocna bacna soye ndbomná, bëngbe bacna soyëngama jáperdonama tojanóbana. Bëngbiama tojanóbanayeca, Cristo yobena jamama bënga ainaniñe corente tšabá chamotsetátšëmbo, bacna soyënga bënga tmojamama, chë ndoñe vida jtsebomnama bënga junatsana soyënga, chama bënga perdonánënga imojtsemnama, y chca, bënga montsobena jtsiyenana, Bëngbe Bëtsá, chë ndegombre ainá yomná, jtseservënëse.

<sup>15</sup> Chiyeca, Cristo jóbanëse tojama entšanga Bëngbe Bëtsáftaca cánýiñe mo canýacá chamotsemnama, ntšamo Bëngbe Bëtsabe tsëm trato yomncá; y chca cha tojama, Bëngbe Bëtsá chabe entšanga chamotsemnama tojáchëmbënga perdonánënga chamotsemnama, chë Bëngbe Bëtsabe tempsca tratentša ley jtsocumplínama inamna ora imojoyenëntscuana bacna soyënga tmojanmama; y chëngnaca chamotsobenama chë nyetsca tescama mochtsebomna soyënga jóyëngacñama, ntšamo Bëngbe Bëtsá chabe entšanga tojanašebuachenacá.

<sup>16</sup> Ntšamo canye testamentiñe tojtsayancá chaopasamna,



jtseytana chaotsótatsëmbo chë chca jamama tojašbuachená cha tojóbanama. <sup>17</sup> Canýe testamento tondaye ntsámanana, chë chca jamama tojašbuachená cha cabá ainá totsomñiëntscuana; nýa cha tojóbana orna aíñe. <sup>18</sup> Chíyeca chë Bëngbe Bëtsabe natsana trato, entsángbeñe tojanobojaťsé, chora tmojanóba bayëngbe buiñe jabuéscjése. <sup>19</sup> Moisés chë leyentša nýetsca mandënga nýetsca entsanga tojánabuayenantšana, tojanca buángana boboshëshe y hisopo betiyentša buacuafja, chë ternerënga y chivëngbe buiñe búyesheca enajuabnëyiñe tojanfchecuacuá, y chora chë leyënga librëšañe tojanbuéscacja, y nýetsca entsángbeñnaca. <sup>20</sup> Y mëntšá tojánayana: “Quem buiñe entsinýinýná, ntšamo Bëngbe Bëtsá tojamandacá ndegombre yochtsemnana, y tšëngaftangbiana puerta yochtsámanama ca.” <sup>21</sup> Moisésnaca buiñe tojanbuéscacja chë jatsjacama opodena yebniñe, y lempe chentša soyënguiñe, chë ndaye soyënga Bëngbe Bëtsábioye jadórama yojanoservena. <sup>22</sup> Er ntšamo leyiñe iuayancá, yojtsemna nýa mo nýetsca soyënguiñe buiñe jabuéscacjana, Bëngbe Bëtsábioye jadórama tšabá chaoservema; y buiñe ndoñe tonjuábuashanësna, ndoñe ntsopodénana entsanga bacna soyëngama perdonánënga chamotsemnana.

*Cristo jasúfriase y jóbanëse, tojanma entsanga bacna soyëngama perdonánënga chamotsemnana*

<sup>23</sup> Chíyeca jtseytana chë Bëngbe Bëtsábioye quem luarentše jadórama soyënga, chë bachnanga chamoma, Bëngbe Bëtsábioye jadórama tšabá chaoservema, chë Bëngbe Bëtsábioye jëtschuayama tmojóba bayëngbe buiñeca. Chë soyënga batšatema jtsinýanýayana ntšamo chë celoca luare yomnana Bëngbe Bëtsabe delante, ndayentše Jesús yoservena. Lempe ntšamo chë Bëngbe Bëtsábioye jadórama luarentše yomncá, chabe delante celoca, Jesucristo tojanma, chábioye jadórama tšabá chaoservema; pero chca tojanma más uámana soyënga jamëse, chë tmojóba bayëngaca bachnanga quem luarentše innétsama soyëngama. <sup>24</sup> Er Cristo ndoñe tonjánamashëngo canýe luarentše Bëngbe Bëtsá jadórama nýe entsangbe pormánentše, ndaye luare nýe batšatema jtsinýanýayana ntšamo chë celoca luare Bëngbe Bëtsabe delante chábioye jadórama yomnana; ndayá cach celoye tojánamashëngo, Bëngbe Bëtsabe delante luaroye, bëngbiana jtseimpadánama. <sup>25</sup> Chë bachnangbe más uámana amëndayana chë “más uámana luaroye” jamashënguana canýe cada uata, bayëngbe buiñeca, ndoñe cachabe buiñeca, chca, ndayánaca jamama entsanga bacna soyënga tmojamama perdonánënga chamotsemnana.

Pero Cristo chë luaroye celoca ndoñe tonjánamashëngo, chentšana jtésebcnana, y chabe buiñe juabuáshanëse cachiñe jatóbanama, y ba soye cachcá chauétsemnana. <sup>26</sup> Chca tojtsemnëse, Cristbiana manjanmëna jasúfriana y jóbanana ba soye, chë Bëngbe Bëtsá quem luare tojanma orscana. Pero ntšamo tojopasacá entsemna, mora chë quem luare jopochócama tempo yojtsobeco ora, Cristo canye y nyetsca tescama tojenonÿinÿé quem luarentša entšanga bacna soyënga jabuajuánama, chëngbiana jóbanëse, mo entšangbe bacna soyëngama canye tmojóba bayá, Bëngbe Bëtsábioye uatšëmbonacá. <sup>27</sup> Cachcá, ntšamo nyetsca entšanga jtsamnana nÿe canye jóbanama, y chentšana Bëngbe Bëtsá chëngbiana jayanana chë imojëftsiyenëntscuana ntšamo tmojanmcá tšabá o ndoñe tšabá bétsemnana, y chëngaftaca jamana ntšamo chora tojajuabocá, <sup>28</sup> cachcá, Crístnaca, nÿe canye chabe derecho vida jtsobomñama cachcá tojanonÿá, chabe buiñe juabuáshanëse jóbanama, ba entšanga bacna soyëngama jáperdonama; y chentšana cachiñe yochjésabo, ndoñe bacna soyëngama entšanga jabáperdonama, ndayá chë cha cháuesabama tša tmobátmanënga jabátsebacama.

## 10

<sup>1</sup> Chë Moisesbe leyentša mandënga, ntšamo chë bachnanga yojánamnana Bëngbe Bëtsá jadórama tmojóba bayëngaca y inÿe soyëngaca, ndoñe ntsinÿanÿnayana lempe chë Bëngbe Bëtsá chabe entšanga jatšatayana puerta tšabe soyënga, pero aiñe batšatema jtsinÿanÿnayana ntšamo chë soyënga yochtsemnana. Chíyeca chë mandënga, chë uatšëmbona soyëngaca y Bëngbe Bëtsábioye jadórama tmojóba bayëngaca, ndocna te ntjopódiana jamana chë Bëngbe Bëtsábioye jobéconama tmojtsebošënga, chca soyënga tmojtsamama cada uata nyets tempo, chënga ainaniñe corente chamotsetatšëmbuama chëngbe bacna soyëngama nyetsca tescama perdonánënga imojtsemnana. <sup>2</sup> Er ndayá tcojtsamama Bëngbe Bëtsabiana uatšëmbona soyëngaca y chábioye jëtschuayama tmojóba bayëngaca, entšanga Bëngbe Bëtsábioye adórayënga, chabe delante tšábënga jtsemnana matmënjanobenase, chënga chë bacna soyënga tmojanmama ainaniñe ngménaca ya ndoñe mamënjëtsemna, y matmëntsanajbaná soyënga amana chë tmojóba bayëngaca. <sup>3</sup> Pero juatšëmbonama entšanga bayënga tmojóba ora, josérviana entšanga bacna soyënga tmojamama cada uata chamuatenójuaboma; <sup>4</sup> er chë toronga y chivënga tmojóbanëngbe buiñeca ndoñe ntsopodénana entšangbioye bacna soyënga jabuajuánama.

<sup>5</sup> Chíyeca, Cristo quem luaroye tojánabo ora, Bëngbe Bëtsábioye mēntśá tbojaniana:

Ndoñe tconjábosena entśanga chacmátśēmbona soyēnga, ni tmojobaye bayēnga,

pero aiñe tcojama atśe canye entśacá chaitsemnama.

<sup>6</sup> Ndoñe tśabá quecmátinñana chē tmojóba y tmojajuinýe bayēnga,

entśanga bacna soyēngama chacotsaperdonama.

<sup>7</sup> As atśe Bëngbe Bëtsá sēnjaniyana: “Bëngbe Bëtsá, muentşe sēntsemna,

ntśamo aca icoboścá atśe chaimama,

ntśamo acbe uabemana palabrenguñe atśbiamana endayancá, chē ndayá atśe chjanmama ca.”

<sup>8</sup> Natsana, Cristo tojánayana, Bëngbe Bëtsá ndoñe tonjánbošena, ni tśabá tbonjanínynana entśanga chamuátśēmbona soyēnga, ni Bëngbe Bëtsábioye jētschuayama tmojóba bayēnga, ni tmojóba ni tmojajuinýe bayēnga, entśanga bacna soyēngama cha chaotsaperdonama ca, masque chēnga chē Bëngbe Bëtsábioye jadórana soyēngaca jamana, ntśamo leyiñe iuayancá ndayá chēnga jamama yojtsamna. <sup>9</sup> Y chentšana, Cristo Bëngbe Bëtsábioye tbojátaniyana: “Muentşe sēnjabo, chē ntśamo aca icoboścá atśe chaimama ca.” Chca, Cristo tojinñanyé chē

jtsamana soyēnga tmojóba bayēngaca, tondaye yonduámama entśanga bacna soyēnga jabuajuánama, y entśangbe bacna soyēngama jóbanēse tojaninñanyé chē ntśamo Bëngbe Bëtsá yoboścá jtsamana, más iuámama chē inye soyēnga játamama.

<sup>10</sup> Bëngbe Bëtsá tojama, bēnga chabe entśanga y chabe delante tśábenga chamotsemnama, ntśamo Bëngbe Bëtsá yoboścá Jesucristo tojánmayeca, chabe derecho vida jtsobomñama cachcá jonñayēse y entśangbe bacna soyēngama jóbanēse, canye y nyetsca tescama.

<sup>11</sup> Judiēngbe nyetsca bachnanga nyets tempo ba soye altar-entśa natsanoica Bëngbe Bëtsá jtseservénana, y ba soye cachcá jtsamana tmojóba bayēngaca, pero chē soyēngaca ndocna te ntjopódiana entśanga bacna soyēnga jabuajuánama. <sup>12</sup> Pero Jesucristo entśangbe bacna soyēngama tojanóbana ora, yojamna mo canye tmojóba bayacá, Bëngbe Bëtsá entśanga bacna soyēngama cháuperdonama; nye canye y nyetsca tescama chca tojanma, y chentšana Bëngbe Bëtsabe catśbioica tojtanoítbema, canye uámama puestentşe, jtsemándayama. <sup>13</sup> Chentşe cha yobátmana, Bëngbe Bëtsá chabe obenánaca Cristbe uayayēnga chabe cucuatśiñe chamoquedama yochjamēntscuana. <sup>14</sup> Er nye canye, entśangbe bacna soyēngama cruzoca jóbanēse,

Jesucristo lempe tojama, entśanga chē Bëngbe Bëtsábenga jtsemnama chēmbonēnga, chabe delante nyetsca tescama

tšabengcá chamotsemnama. <sup>15</sup> Y Uámana Espíritnaca, Bëngbe Bëtsabe uabenana palabrenguiñe šontsinjanyá chca ndegombre bëtsemnama, mëntšá tojánayana ora:

<sup>16</sup> Ndayá entsangbiana chjama, canye tempo chentšana chanjašebuachená soye mëntšá entsemna ca, Bëngbe Utabná tojánayana:

Atše chanjama chënga chamotseboše jtsamana ndayá chëngbe ainaniñe chaitsemánda soye,  
y chamotsejuabnama chë chëngbe juabniñe chaitsemánda soyama ca.

<sup>17</sup> Y chentšana mëntšá tojánayana:

Ndocna te más quichátsjuabnaye chënga bacna soyënga tmojamama,

y ntšamo atše stsebošcá contra soyënga chënga tmojamama ca.

<sup>18</sup> Chcasna, Bëngbe Bëtsá nyetsca tescama entsanga bacna soyëngama tojaperdoná ora, ya ndoñe ntjatsiytana inye soyënga más játamama, mo bayënga cuafjobaycá, entsanga bacna soyëngama perdonánënga chamotsemnama.

### *Sontsamna Bëngbe Bëtsábioye jtobéconana*

<sup>19</sup> Y chca, Jesucristbeyeca catšátanga, Jesusbe buiñe tojanábuashanama y bëngbiana tojanóbanama, chábeñe jtsošbuáchiyëse, bënga montsobena, tondayama ntjatauatjca Bëngbe Bëtsabe delante jamashënguama. <sup>20</sup> Bënga montsobena jamashënguama chë tsëm benachëjana, Cristo bëngbiana tojamëjana; cha nda inétsama chë nyetsca tescama yomna tšabe vida chamotsebonnama. Mo chë quem luarentše chë bachnangbe más uámana amëndayacá, chë ujonyana entsëjuajana jamashënguana chë “más uámana ca” uabaina luaroye, Bëngbe Bëtsabe delante jtsemnama, cachcá, Cristo bëngbe bacna soyëngama mo entsacá tojanóbanayeca, bëngnaca montsobena Bëngbe Bëtsabe delante luaroye jamashënguama. <sup>21</sup> Bënga mondbomna canye bëts bachnangbe más uámana amëndayá, Bëngbe Bëtsabe entsángbeñe jtsemándayama, y cha endmëna Jesús.

<sup>22</sup> Chiyeca, Bëngbe Bëtsá jaserviama ndegombre ainaniñe corente jtsebošëse, y chábeñe puerte jtsošbuáchiyëse, šontsamna Bëngbe Bëtsábioye jobéconana. Ntšamo chë bachnángbioye buiñeca tmojanabuešcaccjá, Bëngbe Bëtsabe delante tšabengcá chamotsemnama cha jaserviama, cachcá, Cristbe buiñe juabuáshanëse y bëngbiana jóbanëse, bënga ainaniñe corente montsetátšëmbo Bëngbe Bëtsá nyetsca tescama bëngbe bacna soyëngama šojtsaperdonama. Y bënga béjayeca uabainëngnaca mondmëna; chíyeca bënga jtsobenana Bëngbe Bëtsábioye chca jobéconana.

23 Bënga šontsamna nÿets tempo Bëngbe Bëtsábeñe puerte jtsošbuáchiyana, y ndocna te nÿe ndayámnaca játajbanana entsángbeñe ichámuana, chë Bëngbe Bëtsábeñe jtsošbuáchiyëse bënga imobatmana soyënga cha yochjamama, er chë soyënga šojašebuachená cha, sempre jamana ntšamo tojayancá. 24 Bënga šontsamna janguanguana ntšamo muatjobenaye añemo jenatšetayana, nÿetscanga jtsenbobonshánana, y ntšamo tšabá yomncá jtsamana; 25 pero ndoñe quešnátamna játajbanana, Bëngbe Bëtsábioye jadórama enefjuanana mo Crístbeñe ošbuáchiyënga quetsomñecá, ntšamo báseftanga imojtsamcá. Chamna, nÿetscanga añemo mochtsenatšetnaye Cristo nÿets tempo jtseservénama, y más mora, chë ndayá imojtsonÿama, Bëngbe Utabná yochjésabama ya yojtsobecuama montsetátšëmbo ora.

26 Er chë ndegombre soyëngama tšabá tmojátatšëmbonentšana y chë soyënga tmojoyeuná chentšana, bacna soyënga jtsamëse tmojtseyena, nÿe chca jamama tmojtseboše causa, muattsaboté ndayá Cristo bëngbiana tojanmccá, bëngbe bacna soyëngama cha tojanóbana ora, y ya tondaye nántsemna ntšamo Bëngbe Bëtsá bënga jtsaperdónama. 27 Y chca, ndayá bënga muattsobena jobátmana soye nántsemna nÿe chë Bëngbe Bëtsábiocana castigo, chë ndayama šojtsamna uatjana jtsebonnana; y nÿe jobátmana chë tempo, ndaye ora Bëngbe Bëtsá puerte etonaná chabe uayayënga bëtscá íñesheca yochtsapochóca. 28 Ndánaca chë Moisesbe leyama tojayana tondaye yondovalena ca, y útata o únganga chca tmojouena y aíñe cha chca tojayana ca chënga tmojayanëse, jtsemnana chë entsábioye jtsóbana, tondaye ntjalastemacá. 29 Canÿa, nÿets ainánaca Bëngbe Bëtsabe Uaquiñábioye tbojtsaboté; y tojayana Crístbe buiñe, chë ndëmuanÿeye tojanábuashana bëngbiana tojanóbana ora, tondaye yonduámama ca, ndayá nÿe ndaye entsabe buiñcá ca, chë buiñe chë ndëmuanÿeye šojtsinÿanÿná ndayá Bëngbe Bëtsá tbojašebuachenacá bëngbiana jamama, y ndáyeca Bëngbe Bëtsá chabe entsanga šojábiana, cha jaserviama; chë entsá Uámama Espíritbioye tbojóyenguango, nda inétsama bënga tšabe soyënga chamotsebonnana; y canÿa chca amá, ¿tšëngaftanga ndoñe šmontsejuabná cha ibojtsomerecena Bëngbe Bëtsábiocana canÿe puerte más uabouana castigo, chë Moisesbe leyama tondaye yondovalena ca tojayanabiama? 30 Bënga nÿetscanga mondétatšëmbo Bëngbe Bëtsá mëntšá tojánayanama: “Atše chanjama chënga chamosufrima, ínÿenga chamosufrima tmojama causa; y chënga chanjácastigaye, ínÿengbioye bacá tmojaborlá causa ca.” Y mëntšánaca tojánayana: “Bëngbe Utabná chabe entsangbiana echanjayana ntšamo

tmojëftsemcá tšabá o ndoñe tšabá bétsemnana, y chëngaftaca echanjama ntšamo chora chaojajuabocá ca.”<sup>31</sup> ¡Tša uabouana, Bëngbe Bëtsá chë nyets tempo ainabe cucuatšiñe joquédana, castigáná jtsemnana!

<sup>32</sup> Pero ntšamo tempo yojamnama šmochtsenójuabnaye, chë ndegombre soyënga Jesucristbiana cabá chora šmonjanábuatmana ora, y chora tša jenujuérsana cmonjanotocá padecena soyënguiñe, y chë causa tša šmojansufrí.

<sup>33</sup> Báseftanga tšëngaftanguentsšëngbioye entšangbe delante tmojanoyánguango, y ínÿenga tmojanma puerte chašmotsesufrínama; y ínÿenga tšëngaftanguentsšënga chca imojansufrinëngaftaca šmojanama, chënga jujabuáchama.

<sup>34</sup> Tšëngaftanga šmojánalastemana chë chënguentsšënga cárceloye imojanëtámenënga; y oyejuayënga šmojanlesenciá ntšamo šmojanbomncá ínÿenga chacmotsabacama, er tšëngaftanga šmojátatšëmbona Bëngbe Bëtsábiocana más tšabe soyënga šmojtsebomnana, chë nyetsca tescama šmochtsebomna soyënga.

<sup>35</sup> Chcasna, ndoñe šmatjajbaná ainaniñe bëtscá añemo jtsebomnana, ni Bëngbe Bëtsábeñe sempre jtsobatmanana; er chca šmobatmánayeca, Bëngbe Bëtsá echanjama tšëngaftanga bëtscá uacanana soyënga chábiocana chašmotsebomnana.

<sup>36</sup> Tšëngaftanga cmontsamna corente uantadënga jtsemnana, padecéniñe chašmojtsachñëjuana ora, chca, ntšamo Bëngbe Bëtsá yobošcá tšëngaftanga chašmotsamama, y ndayá Bëngbe Bëtsá tojanašebuachenacá chašmóyëngacñama.

<sup>37</sup> Er Bëngbe Bëtsabe uabemana palabrënguiñe cha mëntšá tojánayana:

Betsco, ndoñe bën, y chë jabama ibomná echanjabo.

Ndoñe bën quebochatóbema.

<sup>38</sup> Nÿe chë ndabiana atše chaijama atšbe bominÿiñe tšabia chaotsemnana,

átšbeñe cha betsošbuáchema, cha ndegombre chë nyetsca tescama yomna tšabe vida echántsebomna;

pero uatjana causa, átšbeñe ošbuáchiyana tojtsajbanase, atše cháftaca ndoñe quichátoyejuae ca —cha tojánayana.

<sup>39</sup> Pero bënga ndoñe quemásmëna chë uatjana causa Bëngbe Bëtsábeñe ošbuáchiyana tmojtsajbananga, y chca, nyetsca tescama pochocánënga jtsemnana imojtsajnënga; pero aíñe mondmëna chë Bëngbe Bëtsábeñe ndegombre ošbuáchiyënga, y chca, chë atsebácanënga jtsemnana mochjashjáchënga.

## 11

### *Bëngbe Bëtsábeñe ošbuáchiyana jtsebomnana*

<sup>1</sup> Ošbuáchiyana jtsebomnana endmëna corente jtsetatšëmbuana, ndayá tmojtsobatmancá ndegombre chca

yochjopásama; endmëna ainaniñe corente jtsetatšëmbuana, ndayá bënga mora ndoñe tmontsonyáca ndegombre chca yomnama. <sup>2</sup> Bëngbe Bëtsá tojánayana bëngbe bëts taitanga tšabá imojánama ca, chënga chábeñe imojtsošbuachéyeca.

<sup>3</sup> Bënga, Bëngbe Bëtsábeñe mondošbuachéyeca, mondëtatšëmbo cha quem luare y nyetsca luarënga tojanmama, chca chaotsemnama cha tojanmandá ora; chcasna, chë ndayá mora bënga jinýama imobencá, cha tojanma bënga ndoñe mondobena jinýama soyënguentšana.

<sup>4</sup> Abel Bëngbe Bëtsábeñe yojanošbuachéyeca, oveshatëmënga chábioye tbojanátšëmbona, y chë soye Bëngbe Bëtsabiana más tšabá yojtsemna, chë ndayá Caín, chabe catsata, Bëngbe Bëtsá jëtschuayama tbojanátšëmbonama. Chíyeca, Bëngbe Bëtsá tojánayana Abel chabe bominyiñe tšabia yojtsemna ca, ndayá Abel chábioye jëtschuayama tojanmcá oyejuayá tojanóyëngacñeyeca. Ntšamo Abel Bëngbe Bëtsábeñe yojanošbuachecá, masque cha ya obaná yojtsemna, chë soye cabá bënga šontsabuatambá.

<sup>5</sup> Enoc Bëngbe Bëtsábeñe puerte yojanošbuachéyeca, Bëngbe Bëtsá celoye tbojesanbëtseñe, ntjobancá. Chentšana ndocná tonjanobená cha jtsinýenana, Bëngbe Bëtsá tbojesanbëtseñe causa. Y Bëngbe Bëtsabe uabemana palabrenguiñe endayana, Bëngbe Bëtsá Enócaftaca oyejuayá canjamna ca, ntšamo jtsamëse yojoyenama, y chentšana celoye tbojtsanámbañe. <sup>6</sup> Pero Bëngbe Bëtsábeñe ntsošbuachiyá, ndoñe quenátopodena cha oyejuayá bëngaftaca jabemama, er chábioye jobéconamna, entšá jtsemnana jtsošbuáchiyana cha ndegombre bëtsemnama, y cha inétsamama chë cha jtsabuatmama tša tmobošëngbiana bëtsá tšabe soyënga chamotsebomnama, mo chábiocana uacanana soyëngá.

<sup>7</sup> Bëngbe Bëtsá Noébioye tbojanbuayená uabouana soyënga yochjanopásama, cachora ndopodena jinýama soyënga, y cha Bëngbe Bëtsábeñe yojanošbuachéyeca, tojanma ntšamo Bëngbe Bëtsá tbojanmandacá y barquësha tojanapormá chabe pamíllanga játsebacama. Cha chca tojanma ora, ošbuáchiyana bómnayeca, cha tojaninýanyé entšanga tša bacna soyënga tmojanmama y chë causa castigánënga jtsemnama yojtsamnama. Chabe ošbuachiyánamnaca Noé tojánashjache Bëngbe Bëtsabe bominyiñe tšabia jtsemnama, y chca entšá jashjáchana, nye Bëngbe Bëtsábeñe jtsošbuáchiyëse.

<sup>8</sup> Bëngbe Bëtsá Abrahambioye tbojanchembo, inye luaroye cháuama; Abraham Bëngbe Bëtsábeñe yojanošbuachéyeca, tojanma ntšamo Bëngbe Bëtsá tbojanmandacá, y tojánbocna chë luaroye jama, chë Bëngbe Bëtsá tbojanšbuachená jatšetayama luaroye, masque Abraham ndoñe yontsetátšëmbo ndëmoye

yochjánama. <sup>9</sup> Bëngbe Bëtsábeñe yojanošbuachéyeca, yojobena mo inye luarocana ashjanganacá jtsiyenana, cachabe luarentse ndoyená, chë Bëngbe Bëtsá tbojanšbuachená luarentse. Entšëjuaca pormana tambënguine yojoyena, cachcá ntšamo chë chábentšana básenga Isaac y Jacob ibojéftsiyecá; y chátnaca Abrahamcá ibojanobátmana jýëngacñama ntšamo Bëngbe Bëtsá Abrahámbyoye tbojanšbuachenacá. <sup>10</sup> Er Abraham corente uantadá yojanobátmana chë canye luaroye celoca jamashënguama tempo; chë luare inamna canye bëts pueblo, puerte tšabe ucuatjoniñe pormana pueblo, canye luare chë ndayentšana Bëngbe Bëtsá tojanjuabó ntšamo chaotsemnama, y cachabe pormana luare inamna.

<sup>11</sup> Sara, Bëngbe Bëtsábeñe yojanošbuachéyeca, Bëngbe Bëtsá tojanma cha canye šešona chabotsebomnama, masque chora ya bëtsanánëjema yojtsemna, šešona jtsebomnama. Bëngbe Bëtsá chca tojanma, er Sara corente yojanjuabná, cha chë canye šešona yochtsanbomnama tbojanšbuachená cha, nyets tempo ntšamo tojayancá amá yojamna ca. <sup>12</sup> Y chca, quem entšá Abraham, chë šešonga jtsabamnama ya ndobenábentšana, ba básenga tmojanonýná, tša mallajta mo chë celoca estrellëngcá, y tša chëftanga mo chë mar béjayoca chënyañentša cascajá, ndocná jacúntama ntjobenayana.

<sup>13</sup> Nyetsca quem entšanga imojéftsiyena jtsamëse ntšamo chëngbe ošbuáchiyana yojamncá, y chca tmojanóbana, masque cabá ndoñe tmonjanóyëngacñe chë Bëngbe Bëtsá tojanašebuachená soyënga. Pero chëngbe ošbuachiyánama corente imojtsetátšëmo, Bëngbe Bëtsá chentšana baytese ntšamo tojanašebuachenacá yochjánatšatayama y chë soyënga ndegombre yochtsemnama, y chama oyejuayënga chënga imojtsemna. Chënga tmojánayana quem luarentse chënga imojoyena mo cachëngbe luarentse ndoyëngcá, y quem luarëjana mo nye achnëjuanëngcá ca. <sup>14</sup> Y chca tmojtsichámëngna, puerte jtsinýanýnayana chënga tša imojtseboše inye luaroca joyénanama, canye luare cachëngbiama. <sup>15</sup> Chënga nye chë ndayentšana tmojëftsanbocna luarama manjánjuabnase, matmëñjanobená tšabá cachoye jeshëconama. <sup>16</sup> Pero chëngna canye más tšabe luare innaboše, canye luare celoca. Chíyeca Bëngbe Bëtsá ndoñe yonjanëuatja, chëngbe Bëtsá ca chënga chamotsechëmbuanama, er celoca canye bëts luare, mo canye bëts pueblécá chëngbiama tojanprontá.

<sup>17</sup> Bëngbe Bëtsá Abrahámbyoye jinýama, ndegombre aíñe o ndoñe Bëngbe Bëtsábeñe tayojtsanošbuachema, tbojanmandá chabe uaquiñá Isaac chabuánatse jóbama, chábioye jëtschuayama, ntšamo Abraham chë tojóba



bayëngaftaca jamama yojanamancá. Cha Bëngbe Bëtsábeñe yojanošbuachéyeca, yojtseprontana chë nýe canýe uaquiñá ibnabomná jóbama, Bëngbe Bëtsábioye jëtschuayama, masque Bëngbe Bëtsá mëntśá tbojanšbuachená: <sup>18</sup> “Chë ácbentšana entśanga nýe Isaacbiajana mochanjabo ca.” <sup>19</sup> Abraham corente yojanjuabná y yojátatśëmbo, Bëngbe Bëtsá ndegombre obenana bomná bëtsemnama, chë obanënga chámuatayenama jamama. Chíyeca, Bëngbe Bëtsá Abrahámioye tbojtsanauyaná Isaac jóbama ora, yojamna mo Abraham obanënguentsana chábioye cuaftoyëngacñécá. Y chca, ntśamo Isaácaftaca tojanopasacá, batśá yojtsinýanýnaye ntśamo Jesucrístoftaca yochjanopasacá.

<sup>20</sup> Isaac Bëngbe Bëtsábeñe yojanošbuachéyeca, Bëngbe Bëtsábioye tbojanimpadá chabe uaquiñátbiana, Jacob y Esaú, bëtscá tśabe bendicionënga chabotsebomnama, chë joshjanguama tempënga ora.

<sup>21</sup> Jacob Bëngbe Bëtsábeñe yojanošbuachéyeca, ya jóbanama ora, tbojanimpadá cada ona chë Josebe básengbiana, Bëngbe Bëtsá chaoma bëtscá tśabe bendicionënga chamotsebomnama. Cha chca tojanma, jotsejbénase Bëngbe Bëtsábioye jadórama, y chabe jatjonëfjiñe tsbanánoca jojuáchase.

<sup>22</sup> José Bëngbe Bëtsábeñe yojanošbuachéyeca, ya jóbanama ora, tojánayana más chcoye chë Israeloca entśanga Egiptó luarentšana mochjëftsanbocna ca, y tojëftsanmandá ndayá jamana chabe óbana cuérpoca.

<sup>23</sup> Moisesbe bëtśetsata Bëngbe Bëtsábeñe ibojanošbuachéyeca, cha tojanonýná ora, unga shinýëntscuana cha tmojtsaniytême, er chata tbojáninýe cha canýe botamana básetema bëtsemnama, y ndoñe tbonjanëuatjaná chë reybe mandama, chë nýetsca judiëngbe basetëmënga boyabásetemënga jtsëbáyana.

<sup>24</sup> Moisés Bëngbe Bëtsábeñe yojanošbuachéyeca, ya bëtśá yojtsemna ora, ndoñe tonjánbošena chë Egiptoca reybe bembëbe uaquiñacá chamotsábuatmama. <sup>25</sup> Chamna, tojánbošena cha jasúfriama ínýënga chamotsamama, cánýiñe chë Bëngbe Bëtsabe entśangaftaca, y ndoñe nýe baseftayté tśabá jatsmënana, bacna soyënga jtsamëse, ntśamo cachá tojtsejuabnacá, nýe cachá tśabá jtsomñama. <sup>26</sup> Chamna, cha yojanjuabná, chë padecena soyënguiñe jasúfriana ntśamo Cristo tojansufricá, más tśabá yojamna chë Egiptoca uámana soyëngama, er cha Bëngbe Bëtsábeñe jtsošbuáchiyëse chábeñe yojanobátmana, ba tśabe soyënga mo canýe uacanana soyca cha ibochjanatśetayama.

<sup>27</sup> Bëngbe Bëtsábeñe yojanošbuachéyeca, Moisés Egiptocana tojëftsanbocna, chë luarentśa rey cháftaca chábuëtnama

ntjatauatjá. Cha ainaniñe nyets tempo añemo yojtsebmna, y chca yojáninyña mo chë ndocná jinýama tondobenacá, Bëngbe Bëtsábioye cuaftsonýacá. <sup>28</sup> Bëngbe Bëtsábeñe yojanošbuachéyeca, ntšamo Bëngbe Bëtsá tbojanmandacá, Moisés chë judiënga tojanabuayená Bashco fiesta jamama, y chë Israeloca entšangaftaca yebnëngoye amashjuaniñe buiñeca tojanbuéscacja, chca, chë ángel obanayá, chë Israeloca pamíllangbeñe Egiptoca chë mayor uaquiñenga ndocá chaondámama.

<sup>29</sup> Moisés y Israeloca entšanga Bëngbe Bëtsábeñe imojanošbuachéyeca, chë “Buángana ca” uabaina mar bejayëjana tmojánenachnëngo, mo chiñe bojojo fshantse cuaftsomñcá; chentšana, chë Egiptoca entšanga cachcá jamama tmojánbošena ora, nyetscanga chiyiñe tojtsanatajo.

<sup>30</sup> Israeloca entšanga Bëngbe Bëtsábeñe imojanošbuachéyeca, chë Jericó bëts pueblentša tapiëšënga shëconana canýsëfta tentscuama chënga imojánajnentšana, chëšënga yojtsáshajaye.

<sup>31</sup> Rahab, chë pueblentša bacna vida bomna shembása, Bëngbe Bëtsábeñe yojanošbuachéyeca, ndoñe tonjanóbana chë inýengaftaca, chë bëts pueblentše oyenënga, chë ntšamo Bëngbe Bëtsá tojanmandacá ndoñe tmonjanmënga; y ndoñe tonjanóbana, er chë Israeloca entšanguentšana ichmónënga tšabá tojanëbuaja, chë jarrepárama tmojánanga ntšámose chë luar-entše oyenënga jáyënjanama jobenayama.

<sup>32</sup> Atše sentsobena bangbiana más jóyebuambayama, Bëngbe Bëtsábeñe ošbuáchiyëngbiana, pero luare šattsëshbe chchangbiana jóyebuambayama, mo Gedeoncá, Barac, Sansón, Jefté, David, Samuel y Bëngbe Bëtsabe juabna oyebuambayëngcá. <sup>33</sup> Chënga Bëngbe Bëtsábeñe imojanošbuachéyeca inýengbe mandadëngbe entšangbiyoye tmojanayëñaná, bëtscá imojánama nyetsca entšangaftaca ntšamo tšabá yomncá jtsamama y nyetscanga cachcá chamotsámanama, ndayá Bëngbe Bëtsá chënga tojanašebuachenacá tmojanóyëngacñe; y Bëngbe Bëtsá tojanma chënga leóngaca imojtsemna ora, chënga chamuatenáyebengoma, chentšana báseftangbiyoye ndocá chamondámama.

<sup>34</sup> Ošbuáchiyana bómnyayeca, Bëngbe Bëtsá tojanma lempe chaotsefsanama, chëngbiyoye inëshiñe tmojanacjá ora, chënga ndocá chamondëpasama; tmojanotsbocá espadëjaca jobanámentšana; ya tondaye añemo béntsebmna ora, Bëngbe Bëtsá tojanma bëts obenana y puerte añemo chamotsebmnama; tmojánashjache bëts obenana jtsebmnama inýenga jáyënjanama, chëngaftaca imojtsentsjaná ora; y tmojanobená inýe mandadënga y chëngbe soldadënga jáyënjanama, chamotsachetama jamëse.

<sup>35</sup> Ošbuáchiyana bómnyeca, básefta shembásenga chëngbe óbana pamíllangbioye cachiñe ainënga tmojtananÿe, chënga ainënga chamotsatsmënema Bëngbe Bëtsá tojanma ora.

Ošbuáchiyana bómnyeca, ínÿenga tmojanma básefta ošbuáchiyënga, puerte chamosufrima, y jobanámnaca; er chënga más tmojánbošena jashjáchana chë nÿetsca tescama yomna tšabe vida jtsebmomnana, y ndoñe nÿe chë jótsbocana batšatema más vida jtsebmomnana.

<sup>36</sup> Ošbuáchiyana bómnyeca, ínÿenga corente tmojansufrí, ínÿenga chëngbioye tmojanoyánguango ora y tmojanatsetšená ora; y ínÿenga tmojansufrí y cárceloje cadenëjuangaca utámenënga joquédamnaca.

<sup>37</sup> Inÿengbioye ndëtsbéngaca tmojtsanatëchënganja, serruchëshaca tmojtsanëjácacaye, espadëjaca tmojtsanëbaye. Inÿenga imojánajna cánÿentšana ínÿecnoye nÿe oveshá y chivëbe bobáchecha uichëtjonënga, ujabótënga, ainana tsetšanënga, y ínÿengbeyeca mocá borlánënga. <sup>38</sup> Chë nÿe quem luarama enójuabnayënga ndoñe monjanomerecena chënga mëngaftaca jtsiyenama, chënga chë vida imojábomna cánÿentšana ínÿecnoye aniñe, entšanga ndoyena luarënguenache, tjañenache, fshantsiñe atëbëfjniñe y cuevëshënguiñe.

<sup>39</sup> Nÿetsca quem entšanga, ndëmuanÿengbiamama muentše tmonjoyebuambá, Bëngbe Bëtsá tšabá chëngbiamama tojánayana, ošbuáchiyana imojánbomna ca; pero ni canÿa chënguentšá tonjanóyëngacñe, ndayá Bëngbe Bëtsá chëngbe entšanga jatšatayama tojanašebuachenacá, nÿetsca tescama jtsebmomnana. <sup>40</sup> Bëngbe Bëtsá, bëngbeñe jtsejuabnayëse, tojanjuabó canÿe más tšabe soye bëngbiamama jamama, chca, Bëngbe Bëtsá canÿe ora jamama, bënga nÿetscanga, chënga y bënga chamotsemnana lempe ntšamo Bëngbe Bëtsá yobošcá, ntšamo Bëngbe Bëtsá tojanašebuachenacá jóyëngacñëse.

## 12

### *Bënga mochtsejuabnaye ndayá Jesús tojanmama*

<sup>1</sup> Chiyeca, bënga mochtsejuabnaye ba entšangbiamama, chë bëngbiamama más natsana imojaniyenënga, ndëmuanÿënga puerte tšabá bënga jtsinÿanÿnayana ntšamo ndegombre yomnana Bëngbe Bëtsábeñe ošbuáchiyana jtsebmomnana, mo chënga ndayá bënga tmojtsamama cuaftsonÿangcá. Chcasna, mo chë tmochamanëngcá, ínÿëngaftaca jenëyëñjanama, chë jashjanguama tojtsemna luaroye natsana jashjanguama, chënga jotjajuamna, chë chorscama nduaserverna entšayá jtsenátsejcana, y lempe ndayá tojtsama más uenana chamotjajuama soyëgnaca jtsenójacana; bëngnaca cachcá, ndoñe matjaleséncia bënga Crístbioye ndoñe tšabá

ndëtso servénama, ni chë bacna soyënga jamama juabnënga, chë bëngbioye paselo jáyëñjanama juabnënga cachcá chamotsamama. Chamna, šontsamna sempre Bëngbe Bëtsá jtseservénana, puerte uantadënga jtsemnëse masque padecena soyënguiñe tmoyena, bënga chamobená chë trabajo jamama, chë ndayama Bëngbe Bëtsá šojáchembo.  
<sup>2</sup> Jesusbiana mochtsejuabnaye, nda šuebënatsana bënga ošbuáchiyana chamotsebomnana, y šuinñanýná ntšamo nyets tempo nyetsca soyënguiñe Bëngbe Bëtsábeñe jtsošbuáchiyama. Cha chë cruzoca jóbanama sufrínana lempe tojanoboyá, er cha yojanobátmana chë chentsana yochtsanbomna bëts oyejuayánama; y yojanjuabná, chë más bacá uamana entšangcá jóbanana, chabiana ndoñe canye uamana soye yonjamna ca; y chentsana chë uamana puestentše tojtanoítbema, Bëngbe Bëtsabe catšbioica, jtsemándayama.

<sup>3</sup> Chíyeca, šmochtsejuabnaye ntšamo Jesús Bëngbe Bëtsábeñe jtsobatmanëse, puerte uantado yojamnana, chë bacna soye amënga corente chabe contra imojtsemna ora. Chca chábeñe šmochtsejuabnaye, tšëngaftanga Cristbiana oservéniñe ndoñe chacmondëumantšema, ni ainaniñe añemo jtsebomnana ndoñe chašmondájbanama. <sup>4</sup> Tšëngaftanga padecena soyënguiñe šmojachnëngo, entšanga bacna soyënga imojtsama causa, pero mëntscoñama ndoñe cmontsamna jóbanama, Cristbe soyëngama enojuerzániñe; <sup>5</sup> y tcmojtsébnëtjomba ndayá Bëngbe Bëtsá tšëngaftangbioye, chabe básenga quetsomñecá tcmojábuayenama. Chë Bëngbe Bëtsabe uabemana palabrenguiñe mëntšá endayana:

Atšbe uaquiñá, Bëngbe Utabná aca jábuayenama tojtseboše ora,  
 aca jasúfriase y padecena soyënga jauántase,  
 chora ndoñe catjátšjuabnaye chiñe mo canye nduámana soye cuaftsemncá;  
 y cha chacmojuácacana ora, ndoñe cattsajbaná ainaniñe añemo jtsebomnana.

<sup>6</sup> Er Bëngbe Utabná jábuayenana nda cha tbobobonshanábioye, y jacastígana chë mo chabe uaquiñacá tbojofjábioye ca —chiñe endayana.

<sup>7</sup> Padecena soyënguiñe chašmojtseufrina ora, šmochtsejuabnaye chë soye yojtsemna tšëngaftangbioye jábuayenama, y chca, Bëngbe Bëtsá tšëngaftangaftaca jtsamana mo chabe básenga quetsomñecá. ¿Nderado nántsemna canye uaquiñá, y chábioye chabe taitá ndocna te buanjuácacana, más tšabá chaotsamama? <sup>8</sup> Nderado Bëngbe Bëtsá tšëngaftanga ndoñe tcmonjabuayená, ntšamo nyetsca chabe básengaftaca cha endbetsamcá, as tšëngaftanga ndoñe ntsemnana ndegombre chabe básenga. <sup>9</sup> Y bënga básenga monjamna ora,

bëngbe bëtsëtsanga quem luarentše monjanamana bënga jácastigana, y bënga chëngbioye ndoñe stëtsoye ntjaquédana. Y mora, bënga más šontsamna, jtsobedecénana y más bëts respeto jtsebomnana celoca Bëngbe Taitabiana, nda tojama entšanga espíritu chamotsebomnana, y chca, bënga tšabe vida chamotsebomnana. <sup>10</sup> Bëngbe bëtsëtsanga quem luarentše, nje básefta tescama, bënga jëftsabuayiynayana, y chca jamana chënga tšabá tojtsinÿana ora; pero Bëngbe Bëtsá bënga šojtsabuayiyná ora, sempre chca jtsamana bëngbe tšabiana, bënga chabe entšanga jábiamama, cachacá puerte tšábenga, ntšamo cha nÿets tempo yomncá. <sup>11</sup> Sempre bënga ndaye castigo tmojtsebomna ora, chora bënga chama ndoñe oyejuayënga ntsemnana, pero aíne cochtsetšenánënga. Pero bënga chë castigüentšana tmojuatsjinÿe ndayá Bëngbe Bëtsá chë sóyeca tbojtsabuayiynacá, as chentšana jóboznana natjëmbana oyenana, nÿetsca soyënguifne ntšamo tšabá yomncá jtsamëse.

*Bëngbe Bëtsábioye jtsabotena, entšangbiana ndoñe tšabá ntsemnana.*

<sup>12</sup> Mo nda puerte uamëntšnayacá, jatrabájama tondaye añemo ntjtsebomncá, tsátšena buacuatsšëngaca y puerte uamëntšena ntsamiasšëngaca, tšëngaftangbentše báseftanga ya uamëntšnayënga šmojtsemna Bëngbe Utabnabiana trabájayifne, y ainanifne ndoñe añemo šmontsebomna. Cachiñe bëts añemo šmochtishache, y Bëngbe Bëtsabe obenana cachiñe šmochtsatsbomna. <sup>13</sup> Mo chë canÿe benache tšabá y ndericho chaotsemnana tmojtsamëngcá, chca, chë coshetënga chiñe jama chamotsobenama y más tšabá jtsatanama chamuatatsjínÿama, y chë benachentšana ndoñe chamondëtsebocanama; cachcá tšëngaftanga, chë bëtscá ošbuáchiyana y Cristo jaserviama corente añemo šmobomnënga, chë nje batšatema ošbuáchiyana y chca jatrabájama nje tondaye añemo ndbomnënga šmochjújabuache; chë soye šmochjama, ntšamo Cristo tšabá jaserviama yomncá jinÿanÿiyëse, y ntjalesenciácá ndocna soye chaotsama chë tšabe benachentšana tšëngaftanga chašmotsojuánañama.

<sup>14</sup> Lempe ntšamo chašmojobenacá šmochjama nÿetscángaftaca natjëmbana jtsiyenama, y ntšamo Bëngbe Bëtsabe entšanga mondbetsamcá jtsamëse chašmotsiyenama, cha jtseservëne; er chca ntjamcá, canÿa ndoñe ntsoobenana Bëngbe Utabnábioye jinÿama. <sup>15</sup> Yejuana šmochtsantješna, ndocná Crístbeñe ošbuáchiyana chaondëtsajbanama, y chca, chë Bëngbe Bëtsá chabe entšangbioye yochjatšataye tšabe soyënga chënga ndoñe chamondashjache. Smochtsantješna,

tšëngaftanguentše ndocná chaondětsemna, mo canye untja tbětějca, chë chcaja sayëngbioye jásocayana, nda chaotsama, ínÿenga natjěmbana ainana ndoñe chamondětsebomnama y bacna soyënga jtsamëse chamotsiyenama. <sup>16</sup> Yeuana šmochtsantješna ndocná tšëngaftanguentše shembása o boyabásaftaca bacna soye amá chaondětsemnama, ni canya ndabiana Bëngbe Bětsabe soyënga tondaye chaondětsámana. Esaú chca tojanma, chë lempe yochjanashjachcá, mayor uaquiñá bětsemnama, chabe uabentsábioye canye šcena sanama tbojtaname ora. <sup>17</sup> Y tšëngaftanga šmondětatsěmbo, chca tojanopasá chentšana, Esaú tojánbošena chabe taitá Bëngbe Bětsábioye chaboimpadama, chabiana tšabe bendicionënga chaomama, chë mayor uaquiñá bětsemnama yojanobena jtsebomnama soyënga; pero chora chabe taitá ndoñe tbonjanoyeuná, er masque Esaú chora juabna tojantrócá, cha ndoñe tonjanobená ntšamo yojtsopasancá jětsjandmanana. Masque cha tša tojánbošena, shěchbuíyeca chabe taitábioye jaimpádase, ya ndoñe yontsopodena ntšamo tojanopasacá jětsjandmanana.

<sup>18</sup> Tšëngaftanga ndoñe chešmatobeconá, mo chë entsanga Israeloca Sinaí ca uabaina tjoye tmojanobeconacá, ndayá chënga imojobena jabojuama, y íñesheca yojtsángbototjuana, tondaye binÿniñe luare, tša ibetiñe y puerta jabuache binÿiëngaca; <sup>19</sup> ni chešmatuena chëngcá, canye trompetěfjua uajatětanana, ni Bëngbe Bětsabe oyebuambnayana. Chë oyebuambnayana tmojanuenënga, imojtseimpadana ndoñe más chëngbioye chaondětsóyebuambnama. <sup>20</sup> Chca tmojanma, jauántama ndoñe tmonjanobená causa, ntšamo Bëngbe Bětsá tojanamëndacá: “Nda quem tjoca chaojoyená, masque canye bayá chaotsomñe, entsemna chana ndětsbëngaca chamotsatěchënjanga jtsóbama ca.” <sup>21</sup> Ndegombre, ntšamo tmojaninÿcá tša uabouana yojtsemna, cach Moisésnaca měntšá tojánayana: “Tša šontsengměmná auatjananá sěntsemna causa ca.”

<sup>22</sup> Pero tšëngaftanga Bëngbe Bětsábioye šmojobeconá, y chca endmëna mo tšëngaftanga canye Sión ca uabaina tjoye celoca cuafjobeconacá, chë Bëngbe Bětsá nÿets tempo vida bomnabe běts puebioye, mo celoca Jerusalén cuenta; y ba uaranga angelëngbioye šmojobeconá, cánÿiñe oyejuayënga enefjuanënga imojtsemnëngbioye, Bëngbe Bětsá jtsatschuanayama. <sup>23</sup> Endmëna mo tšëngaftanga chë Bëngbe Bětsabe entšángbioye cuafjobeconangcá, chentše enefjuanënga mo Bëngbe Bětsabe basengcá, chënga ndayá chë Taitá tojašebuachenacá jójëngacñama, ndëmuanÿyënga Bëngbe Bětsá chabe librěšañe tojúbiana. Tšëngaftanga šmojobeconá

Bëngbe Bëtsábioye, ntšamo nyetsca entšanga tmojamcá tšabá o ndoñe tšabá bëtsemnama yochjayanábioye. Endmëna mo tšëngaftanga cuafjobeconacá, chë entšanga mora ya obanënga y ntšamo tšabá yomncá jtsamëse imojëftsienëngbe espiriténgbioye, chë entšanga ndëmuanyëngbiana Bëngbe Bëtsá tojanma chamotsemnama lempe ntšamo chabe entšangbiana yojanjuabnacá, chca, cháftaca sempre vida jëftsebmnama. <sup>24</sup> Tšëngaftanga Jesúsbioye šmojobeconá, chë jóbanëse, entšanga Bëngbe Bëtsáftaca mo canyáca chamotsemnama tojanmá, ntšamo Bëngbe Bëtsabe tsëm trato yojamncá; y endmëna mo chë bëngbiana cha tojanóbana ora tojanábuashana buiñoeye tšëngaftanga cuafjobeconacá; chca tojanábuashana, bëngbioye Bëngbe Bëtsabe delante mo tšabengcá jábiamama, mo ntšamo entšángbeñe buiñe jabuéscacjama chë bachnanga imojuamancá. Caín chabe catšata Abébioye tbojanóba ora, yojamna mo chë Abelbe uabuáshanana buiñe Bëngbe Bëtsábioye cuaftseimpadancá, chë bacna soyama castigo chaotsemnama; pero Jesucristbe buiñe ndoñe chca ntsamana, ndayá chíyeca bënga más tšabe soyënga jashjáchana; Jesusbe buiñeca, bënga montsobena atsebácanënga jtsemnama.

<sup>25</sup> Cuedado šmochtsebmna, bëngbioye tojtsoyebuambná ora cha joyeunayama. Chë Israeloca entšanga ndoñe tmonjánbošena Bëngbe Bëtsá joyeunayama, chë Sinái tjoca quem luarentše tojanabuayená ora; chëngbioye cha tojanacastigá. Y mora más, Bëngbe Bëtsá, chë celocana bënga abuayiynayá, ndoñe cachcá ndëcastigánënga quešochátabashejuana, ntšamo cha šojtsëtsëtsnacá ndoñe tmontseyeunanëse. <sup>26</sup> Bëngbe Bëtsá Sinái tjoca chë entšángbioye tojanoyebuambá ora, chabe oyebuambnayánaca tojanma quem luare chauangmëmanama, pero mora cha chabe uabemana palabrënguiñe tojašebuachená: “Atše cachiñe chanjatsma chauangmëmanama, ndoñe nye quem luare, sinó celócnaca ca.” <sup>27</sup> Bëngbe Bëtsá “cachiñe ca” tojánayana ora, chë sóyeca yojsichamo, chë ndayté lempe chaongmëmanama cha cachiñe yochjama ora, chë quem luarentše tmojama soyënga y chë jatrócama yopodena soyënga yochtsejuána ca, chca, nye chë nyetsca tescama yomna soyënga y ndoñe jatrócama soyënga chaoquedama. <sup>28</sup> Chcasna, Bëngbe Bëtsabe amëndayoca, chë cha yochjama bënga chamuamashënguama luare, yomna cachcá nyetsca tescama y ndocna te ntjotrócana. Bëngbe Bëtsá chama mochjëtschuaye, y ntšamo cha tšabá tbojtsinýancá mochtsadorana, chabiana bëts respeto jtsebmna, y nyetscangbiana más bëtsá cha yomnama jtsejuabnayëse. <sup>29</sup> Er Bëngbe Bëtsá puerte etonaná

chë chabiama nduauenanënga jabuache echanjácastigaye, y chca, cha jtsemnana mo canÿe íñeshe lempe jtsepochoamá.

## 13

*Ntšamo jtsiyenama, Bëngbe Bëtsá oyejuayá bëngaftaca chaotsemnana*

<sup>1</sup> Sempre nÿetscanga šmochtsenbobonshana, Jesucristbeyeca catšátanga quetsomñecá. <sup>2</sup> Sempre tšabá chë tšëngaftangbe yebnoye inÿe luarëngocana tmojáshjajnënga šmochjúbuaja, er chca jamëse, ntsetatšëmbcá báseftangna angelënga chëngbe yebnentše tmojanëbuaja.

<sup>3</sup> Chë utámenëngbiana sempre šmochtsenójuabnaye, mo tšëngaftángnaca chëngaftaca utámenënga cuaftsemncá. Chë ínÿenga tmojtsama chamotsesufrinëngbiana šmochtsenójuabnaye, er tšëngaftángnaca nderado cachcá šmatjatspása.

<sup>4</sup> Boyabása y shembása tbojanobouamá ora, ntšamo tbojanensbuachenacá nÿetscanga chamotserrespectana; y chë útata chabotsama nÿe ndayá y nÿe ntšamo Bëngbe Bëtsá bouamnátbioye tojanamëndacá, er Bëngbe Bëtsá echanjácastigaye chë shembása o boyabásaftaca bacna soye amënga, y chë shema o boyábioye ínÿaftaca ingñayëngnaca.

<sup>5</sup> Ndoñe šmattsiyena jtsejuabnayëse nÿe mallajta crocénana jëftsebomnama. Nÿe chë šmobomna soyëngaca oyejuayënga šmochtsomñe, er Bëngbe Bëtsá tojánayana: “Ndocna te cachcá quebochatonÿaye, ni canÿa quebocháiseboshjona ca.” <sup>6</sup> Y chca, bënga montsobena corente añémoca jayanama:

Bëngbe Utabná endmëna nda atše šonduájabuachana; ton-dayama quichátauatja.

¿Ndayá canÿe entšá nanjobenaye átšeftaca jamama ca?

<sup>7</sup> Tšëngaftangbe amëndayëngbiana, chë Bëngbe Bëtsabe buayenana soyënga tcmojábuatambangbiana, sempre šmochtsenójuabnaye. Sempre šmochtsenójuabnaye chë ntšamo chënga imojaniyenentsana tojanóbocna tšabe soyëngama, y šmochtsiyena jtsamëse ntšamo chënga imojanamcá, Jesucristbeñe ošbuáchiyënga bëtsemnana.

<sup>8</sup> Jesucristo cachá nÿets tempo iuëtsemna, tempo, mora y nÿetsca tescama. <sup>9</sup> Ndoñe šmatjaleséncia ínÿenga chamotsamama tšëngaftanga chë benachentsana chašmotsojuánañama, ndayá chënga tmojtsabuátambama, y chë Cristo tojánabuatambama contra soyëngaca. Más tšabá endmëna bënga ainaniñe añemo jtsebomnana, Bëngbe Bëtsá tšabe juabna bëngbiana yobómnyeyeca, y ndoñe chë sanama,

chë ndayá aíñe o ndoñe šontsamna jtseyayana soyëngama



mandënga tcojtsamëse. Chca mandënga ndocna te chë Israeloca entšangbiana tempo tonjanoservé.

10 Bënga chë Jesucristbeñe mondošbuáchenga, canÿe soye mondbomna mo chë Bëngbe Bëtsábioye jëtschuayama altaroca juinÿena soycá, bacna soyëngama perdonánënga jtsemnama. Bënga mondbomna chë Jesucristo bëngbiana tojanma soye, cruzoca tojanóbana ora, bëngbe bacna soyëngama; y chë nÿe tmojóba bayëngaca soyënga tmojtsama bachnanga ndoñe ntsebmomnana, chë Cristo tojanóbana ora, ndayá tojanmentšana tojanóbocna tšabe soyënga. <sup>11</sup> Er chë judiëngbe más uámana bachnangbe amëndayá, chë tmojóba bayëngbe buiñe chë “más uámana ca” uabaina luaroye juabuyambana, Bëngbe Bëtsá entšangbe bacna soyëngama cháuaperdonama, y chë bayëngbe cuerpënga jtsejuinÿiyana entšanga tmoyena luarentšana chaboca. <sup>12</sup> Cachcá, Jesúsna tojansufrí y tojanóbana bëts pueblentšana chaboca, chabe buiñe tojanábuashana ora jóbanëse, entšanga Bëngbe Bëtsábenga chamotsemnama, y chabe delante mo tšabengcá chamotsemnama. <sup>13</sup> Chíyeca bënga šontsamna Jesúsbioye jobéconana, nda entšanga tmojtsanaboté y bëts pueblentšana chaboca tojanóbana. Cha mochjuasto, y ntšamo cha tojansufricá bëngnaca mochjasúfria. <sup>14</sup> Er quem luarentše bënga ndoñe quemátsbomna canÿe bëts pueblo bëngbiana, nÿets tempo chauesomñe bëts pueblo, ndayá bëngna tša mondboše y puerte mondobátmana bënga joyéanama chë celoca yochtsemna Bëngbe Bëtsabe bëts pueblentše. <sup>15</sup> Chíyeca, šontsamna sempre Bëngbe Bëtsábioye jtsatschuanayana, Jesucristbiajana. Bëngbe Bëtsá chca tmojtsadorana ora, jtsemnana mo chábioye jëtschuayama canÿe soye cuafjuatšëmboncá. Chcasna, jtsóyebuambnayëse cha mochtsadorana. <sup>16</sup> Sempre ntšamo tšabá yomncá šmochtsama, y chë šmobomncá inÿengbiámnaca chaotsemna. Chca šmochtsama, er chca tcojama ora, Bëngbe Bëtsá oyejuayá jtsejuabnayana chca chabiana tcojama ca, y jtsinÿnana bënga Bëngbe Bëtsá imojtsatschuanama, ndayá cha tojamama.

<sup>17</sup> Sempre šmochtsama ntšamo chë tšëngaftanga ošbuachiyëngcá enefjuanëngbeñe amëndayënga tmojayancá, y sempre šmochtsiyena jtsamëse nÿe ntšamo chënga tmojtsebošcá. Chënga sempre tšëngaftangbioye jtsanÿenana, tšëngaftangbe tšabiana, ntšamo cmojánanÿenama Bëngbe Bëtsábioye jojuama yojtsamnama chënga jtsetatšëmbëse. Jtsayaunanëse, šmochjama chënga chëngbe trabajo oyejuayánaca y ndoñe ngmënaca chamotsamama, er ndoñe chca šmonjamëse, chë trabajo tšëngaftangbe tšabiana ndoñe

nántsemna.

<sup>18</sup> Běngbe Bětsá bėngbiana šmochtseimpadana, er bėnga ainaniņe corente fsendėtatsěmbo tšabá tifjamama, y tša fsěntseboše jtsiyenana ntšamo tšabá yomncá lempe jtsaměse.

<sup>19</sup> Tšěngaftanga bėtscá cbontsaimpadana, Běngbe Bětsá chašmoimpadama, atše chašolesenciama tšěngaftangaftaca cachiņe jtsatsmėnama.

*Běngbe Bětsábioye chěngbiana jaimpádama y chěnga jacheuayama*

<sup>20</sup> Atše, Běngbe Bětsá sěntseimpadana, cha chě nda endbėtsama bėnga natjėmbana chamotsiyenama, y nda tojanma Běngbe Utabná Jesús cháuatayenama, nda bėnga šondánjėna mo oveshěngbe tšabe abuajėnjácá; y Běngbe Bětsá chca tojanma, Jesús, chabe buiņe juabuášhaněse tojanóbanayeca, chca, entšanga jinjānjiyama ndegombre bėtsemnama ntšamo Běngbe Bětsá chabe entšangbiana tojanašebuachenacá njėtsca tescama jamama.

<sup>21</sup> Cha sěntseimpadana chaoma tšěngaftanga chašmotsebomnama njėtsca tšabe soyěnga ntšamo cmojtsějebotcá, chca, lempe ntšamo cha yobošcá tšěngaftanga chašmotsamama; y cha Jesucrísoftaca chaboma bėngaftaca ntšamo cha tšabá tbojtsinjancá. ¡Njėtscanga njėtsca tescama Cristo chamotsatschuaná! Chca chaotsemna.

<sup>22</sup> Jesucrísbeyeca catšátanga, tšěngaftanga cbontsaimpadana, jábuayenama ntšamo tcbonjauyancá, puerte uantádoca tšabá chašmóyěngacñama, er nje básefta palabrėngaca chama tcbonjubaábiana. <sup>23</sup> Atše sěntseboše tšěngaftanga chašmotsetátšěmbo, Timoteo Jesucrísbeyeca bėngbe catsata, ya ndoņe utamená yontsemnama, y cha betsko átšbioye chaojtaběse, átšeftaca chanjėftsbetše tšěngaftanga jánjama chajjá ora.

<sup>24</sup> Tšěngaftanga ošbuachiyěngbeņe njėtsca amėndayěnga šmochjácheuaye, y njėtsca Běngbe Bětsabe entšágnaca choca. Chě Italia luarquěnga ošbuáchiyěnga tšěngaftanga cmontsachuaná.

<sup>25</sup> Atše, Běngbe Bětsá sěntseimpadana, cha chaoma tšabe bendicioněnga tšěngaftangbeņe chaotsemnama.

# Santiago

## *Jacheuayama*

<sup>1</sup> Atše Santiago, Bëngbe Bëtsá y Bëngbe Utabná Jesucristbe canye oserverná, tšëngaftanga cbontsëbuabiamná, tšëngaftanga chë bnëtsana uta Israeloca bëts pamíllangbioye nyets luarëjana ujquëshenënga. Atše cbontsacheuaná.

## *Chë Bëngbe Bëtsábiocana osertánana*

<sup>2</sup> Jesucristbeyeca atšbe catšátanga, tšëngaftanga ndaye padecena soyënguiñe chašmojtšiyena ora, chiñe šmochjájuaboye mo chca tšëngaftangbe tšabiamna cuaftsemncá y šmochjóyejuaye; <sup>3</sup> er tšëngaftanga šmondétatsëmbo, chcañe chašmojtšajna ora, šmochtsetátšëmbo cach tšëngaftanga Jesucristbeñe puerte šmošbuaché o ndoñe. Chca ora bëts ošbuáchiyana chašmojtsebmñese, šmochanjobenaye, Bëngbe Bëtsábeñe jtšobátmanëse añémoca jtsemnana, masque padecena soyënguiñe chašmotsomñëse. <sup>4</sup> Pero chca chašmojtsemñese, šmochtsentšena jashjáchama ntšamo canye entšá Bëngbe Bëtsabe soyëngama corente osertaná yomncá chašmotsemnana, ntšamo Bëngbe Bëtsá yobošcá chašmotsiyenama, chiñe ni mo canye soye jamama chačmondëtsabuashebenëse.

<sup>5</sup> Nderado nda tšëngaftanguentšana ndoñe tontsobena corente osertánana jtsebmñana, cha bontsemna Bëngbe Bëtsá jaimpádana cha chaoma aiñe chana jtsebmñana, y Bëngbe Bëtsá chana bochanjátšetaye; er Bëngbe Bëtsá nyetscanga bëtscá endbétsatšatnaye y ndocnábioye jatáboyënjana. <sup>6</sup> Pero cha bontsemna, Bëngbe Bëtsábeñe puerte jtšošbuáchiyëse chama cha jaimpádana, y cha nderado ndoñe bochanjóyeunayama ntjatatëmnancá. Nda mëntšá tojtšamëse, inye ora aiñe Bëngbe Bëtsábeñe cuaftsošbuachecá y inye ora ndoñe, cha entsemna mo canye olëshcá, mar béjayoca binýia nye cátatoye jtšambayana. <sup>7</sup> Chca ama entšá ndoñe chaondëtsejuabná, Bëngbe Utabnábensana ndayánaca jatóyëngacñama. <sup>8</sup> Cha jtsemnana canye entšá, mora canye soye juabnayá, pero chentšana inyetsá jatójuabnañana. Chca, cha jtšiyenana nyetsca soyëngama uta soye jtsejuabnayëse, y chca cha ndoñe ntšobenaná tondaye puerte tšabá jamama.

<sup>9</sup> Chë Jesucristbeñe ošbuachiyá, ndbmñëjema y ndoñe yapa uámana entšá tomná, corente oyejuayá chaotsemna, er Bëngbe Bëtsabe bominiñe cha canye uámana entšá jtsemnana; <sup>10</sup> y chë bomnánaca puerte oyejuayá chaotsemna, Bëngbe Bëtsá chábioye nduámana entšá chabojábema ora, er mo chë

shacuaniñe uantšefjushacá, cha ndoñe nyets tempo quem luarentše ntjěfťsiyenana. <sup>11</sup> Shinýe tojábocna y becá tojojěnyana ora, chě shácuana jtsebuashana, chě uantšefjúsha jtsátsatsana y chabe uabótamanana ya ndoñe más ntsebínynana. Cachcá chě bomná, echanjóbana nye cachabiama más becá crocénana onguayíñe chaojtsemna ora.

*Bacna soye ocochěnguentšana tšabá jabocnana*

<sup>12</sup> Oyejuayá chaotsemna chě entšá chě padecena soyěnguentšana tšabá tojětsbocná, cabá Jesucrístbeñe ošbuachiyá; chama Běngbe Bětsá chabiama oyejuayá echántsemna y echanjama chě nyetsca tescama yomna tšabe vida cha chaotsebomnama, mo uacananancá chabe ošbuáchiyama. Chě soye Běngbe Bětsá tojašebuachená nyetscanga cha imobobonsháněngbioye. <sup>13</sup> Nderado nda bacna soye jamama tbojócochěngo, ndoñe chaondětsejuabná Běngbe Bětsá chca cháftaca yojtsama ca; er Běngbe Bětsá ndocna te bacna soye jamama jócochěnguana, y cha ndoñe ntsamana ínýenga bacna soye jamama chaócochěnguama. <sup>14</sup> Inýetšá endměna, canya bacna soye jamama jócochěnguana, bacna juabněnga tojtsebmna ora; cha chiñe nye jěsejuabnayana y chě soye jtsasjayana cha chca jamama. <sup>15</sup> Nda yapa bacna soyěnga tojtseboše, cabana cha pronto chě bacna soye jamana; y nda sempre bacna soyěnga tojtsama, chama Běngbe Bětsá nyetsca tescama bochanjacastíga.

<sup>16</sup> Atšbe bonshana catšátanga, ndoñe matenoíngñana, jtsejuabnayěse Běngbe Bětsá yojtsama tšěngaftanga bacna soyěnga chašmotsamama ca. <sup>17</sup> Nyetsca tšabe soyěnga y chě puerte tšabe soyěnga tšbanánocana endobá, Běngbe Bětsá chě Taitábicana. Y cha chě shinýe, juashcona, y nyetsca chě celoca yobuashinýinýana soyěnga tojamá, nyets tempo nye cachá iuesomñe y ndoñe inya ntjátsměnana. <sup>18</sup> Cachá jamama tojánbošenayeca, běnga chábenga šojánabiama, běnga chabe ndegombre palabrenga joueněse. Cha chca tojama, lempe ntšamo Běngbe Bětsá quem luarentše tojamentšana, běnga chě natsaněnga chábenga chamotsemnama.

*Ntšamo ndegombre yomna Běngbe Bětsábioye tšabá jadórama*

<sup>19</sup> Atšbe bonshana catšátanga, quem soyama šmochtsenójuabnaye: nyetsca tšěngaftanga cmontsamna sempre jtseprontánana jouenama; pero jóyebuambayamna jobátmana y ínýengaftaca jetnámna. <sup>20</sup> Inyaftaca tbojetna ora, canye entšá ndoñe ntsamana ntšamo Běngbe Bětsá yobošcá, chě nyetsca soyěnguiñe tšabá jtsamana. <sup>21</sup> Chcasna, šmochtsajbaná bacna soyěnga jtsaměse oyenana, y amana nyetsca soyěnga ndoñe ntšamo Běngbe Bětsá yomandacá; y chě

Bëngbe Bëtsá tojama tšëngaftangbe ainaniñe chaómashënguama buayenánana, ntjatosoberbnaycá šmochjójyëngacñe. Chë buayenánana chašmojóyeunase, echanjopódia tšëngaftanga atsebácanënga jtsemnama.

<sup>22</sup> Ndoñe quecmátamna nýe chë Bëngbe Bëtsabe buayenánana jouenana, ndayá ntšamo cha tojayancá aíñe jtsamana; ndoñe chca šmontsamëse, cach tšëngaftanga šmotsenoíngña. <sup>23</sup> Nda nýe chë buayenánana tojouena, pero betscó tbojtsebnatjëmbe y ndoñe tontsama ntšamo chiñe tojtsayancá, cha jtsemnana mo canýe entšá chabe jubíá espejuiñe tojtsenonýacá: <sup>24</sup> chana cachá jtšenónýayana, pero chë espejo tojabuertaná ora, jtsebnatjëmbana ntšamo cha bëtsemnama. <sup>25</sup> Pero nda ntšamo tojouencá ndoñe tbonjebnatjëmbe, y sempre tojtsejuabná chë entšanga játsebacama Bëngbe Bëtsabe puerte tšabe mando chabosertama, y tojtsiyena ntšamo chë mandënguëntse endayancá, lempe ntšamo chë entšá chaojtsamiñe oyejuayá Bëngbe Bëtsá bochanjábema.

<sup>26</sup> Nderado nda tojtsejuabná Bëngbe Bëtsábioye ibojtsadorana ca y chë Bëngbe Bëtsábioye adorayá ntšamo ibomncá cha yojtsama ca, pero ndoñe tontsobena bacna soye oyebuambnayana jtsajbanana, cachá yojtsenoíngña, y nýetsca soyënga ntšamo tojtsamcá Bëngbe Bëtsá jadórana, chabíama tondaye ntsámanana. <sup>27</sup> Bëngbe Bëtsá chë Taitabe bominiñe, chë puerte tšabe y ndegombre soyënga, ndayá entšá ibojtsemna jamana endmëna: chë uajchonga y viudanga corente ngménënga tmojtsemna ora jujabuáchana, y ndoñe bacna soyënga játamana, mo chë nýe quem luarama enójuabnayënga mondbetsamcá.

## 2

### *Nýetscanga tšabá jtsatenonýayëngana*

<sup>1</sup> Tšëngaftanga, Jesucristbeyeca atšbe catšátanga, šmondošbuaché Bëngbe Utabná Jesucristo, chë puerte bëtsá y uamanábeñe; chíyeca tšëngaftanga cmontsamna nýetsca entšanga cachcá jtsatenonýayëngana. <sup>2-3</sup> Nderado tšëngaftanga cánýentse šmojënefjna, y chora canýe bomna entšá tojášhango castellano ntšabuchëtjonëfjangaca y uámana entšayëjuangaca bopormaná, cha botamana šmojúmashëngo y mëntšá šmojauyana: “Moca quëfseroca mabesótbema ca”. Pero cachca ora, canýe ndbomnejema tojášhango uandocuenta entšayá uichëtjoná, y cha šmojauyana: “Acna choca tsanana cochtsemna o chafjoca mótbema ca”. <sup>4</sup> Chca tšëngaftanga ya šmotsama cach tšëngaftanguëntse báseftanga más uámanënga inýengbíama chamotsemnama, y chca šmojtsama, ana bacna juabnënga šmojtsebmna causa.

<sup>5</sup> Atšbe bonshana catšátanga, quem soye šmochjouena: Bëngbe Bëtsá quem luarentše ndbomnënga imomnënga tojabacacá, chënga canye puerte uámana soye chamot-sebomnama, Jesucristbeñe puerte chamotsošbuáchema; y mo otocana soycá Bëngbe Bëtsabe amëndayama chamosháchiñama. Cha imobobonshánëngbioye chë soye jatšatayama tojašebuachená; <sup>6</sup> pero tšëngaftanga chë cuenta, mo ndoñe cach tšëngaftangcá entsanga bendmëncá chëngbioye jtsënyayana. Ndegombre, chë bomnënga mondmëna chë nye sempre cmondbëtsamëndayënga y chë sjojónana chë pueblentsa mandadëngbioye cmondbáunatsënga. <sup>7</sup> Y cach bomnëngnaca mondmëna chë Cristbiana podessa oyebuambnayënga, ndábenga tšëngaftanga šmondmëna, y chabe uabaina tšëngaftangbiana puerte enduámana.

<sup>8</sup> Bëngbe Bëtsabe uabemana palabrenguiñe mëntšá endayana: “Ndëmua entsánaca cochtsebobonshana ntšamo cach aca cuenobobonshancá ca.” Tšëngaftanga ntšamo chë Bëngbe Utabnabe mandiñe endayancá ndegombre šmojtsamëse, tšabá šmochántsama. <sup>9</sup> Pero tšëngaftanga ndoñe cachcá šmontsenonýase, chcana bacna soye jtsamana y šmojama ntšamo Bëngbe Bëtsabe leyënguiñe ndoñe yondëlesenciancá. <sup>10</sup> Y mora, canye entsá nyetsca chë leyentsa mandënga tojtsobedecena, pero ndoñe tontsama ntšamo nye mo canye mando ntšamo iuayancá, cha Bëngbe Bëtsabiana jtsemnana canya ntšamo nyetsca chë leyentsa mandënguiñe ndoñe yondëlesenciancá amá. <sup>11</sup> Cach Bëngbe Bëtsá, chë “acbe shema o boyábioye ínÿaftaca ndoñe cattseingñaye ca” tojanayaná, cachá mëntšánaca tojánayana, “ínÿabioye ndoñe catjóba ca”. Chca, nda cachabe shëmbioye ínÿaftaca ndoñe tbonjaingñé, pero aiñe ínÿabioye tbojóba, chca, Bëngbe Bëtsabiana cha jtsemnana canya nyetsca chë leyentsa mandënga ndocumpliná.

<sup>12</sup> Tšëngaftanga cmonsamna jtsóyebuambnayana y jtsamana ndayá Cristo šojanamëndacá, atsebacana entsangcá, er Bëngbe Bëtsá echanjayana ntšamo tmojamcá aiñe o ndoñe tšabá bëtsemnama. <sup>13</sup> Er chë ínÿengbiana ndoñe ngmënana bomnëngbiana, Bëngbe Bëtsá ntjongmiacá echanjayana ntšamo tmojamcá aiñe o ndoñe tšabá bëtsemnama; pero chë ínÿengbiana aiñe ngmënana bomnëngbiana, ntšamo tmojamcá aiñe o ndoñe tšabá bëtsemnama Bëngbe Bëtsá chaojayana ora, chënga tšabá chentšana mochanjábocana.

*Chë ndegombre ošbuáchiyana, soyëngaca jinÿanyiyana*

<sup>14</sup> Atšbe catšátanga, ¿ndayama cánÿabioye buanjosérvia jayanana aiñe Jesucristbeñe sëntsošbuaché ca, pero cha

ínjengbiama tšabe soyënga ndoñe tontsama, y chca, ntšamo cha tojtsamcá ndoñe tontsinjanyá cha Jesucristbeñe yošbuáchema? Ndegombre, cha nye chca tojtsichámese, ndoñe ntsopodénana cha atsbocaná chaotsemnama. <sup>15</sup> Nderado canye boyabása o shembása ošbuachiyá entsayá tbojtsabuáshbena y saná chë te jasámnaca tbojtsebuáshbena, <sup>16</sup> y canya tšëngaftanguentsá tbojauyana: “Diošoftá, sēsnama ndoñe chacondětsepadecena y becá chacuatoshachá ca”, pero chca chaotsemnama chábioye tondaye tbonjatšetase, ¿ndayama nantsoservena chca jayanana? <sup>17</sup> Cachcá, nda tojayana Jesucristbeñe yošbuaché ca, pero ndocna tšabe soyënga tontsama, chë ošbuáchiyana bomnama jinjanyiyama, nye chca ošbuáchiyana jtsebomnana tondayama ntsoservénana.

<sup>18</sup> Pero nderado ndánaca mēntšá echanjayana: “Aca Jesucristbeñe icošbuaché, pero atšna ínjengbiama tšabe soyënga sēntsama ca.” Chora atše stjojuá: “Sminjinyē ntšamo canya nantsobena Jesucristbeñe jtsošbuáchiyana, chca chaotsinynama tondaye ntsamcá, y chora, ndayá tijamama atšbe ošbuáchiyana cbochjinjinyiye ca.” <sup>19</sup> Aca condošbuaché nye canye Bëngbe Bětsá yomnama y chca tšabá contsama; pero chë bacna bayëjēgnaca chiñe jtsošbuáchiyana, y chë causa chēnga uatjana jtsebomnana y jtsangmēmnyana. <sup>20</sup> Ndoñe obějema cattsemna; ndegombre cbochanjinjinyiye nderado nda Jesucristbeñe tojtsošbuaché, pero tondaye tontsama chca chaotsinynama, chabe ošbuáchiyana tondayama ntsoservénana. <sup>21</sup> Bëngbe Bětsá tojánayana chabe bominyiñe Abraham, bēngbe tempsca bēts taitá, tšabia yojamna ca; chca tojánayana, er Bëngbe Bětsá tbojanmandá ora, yojtseprontana chabe uaquiñá altariñe jóbama, cach Bëngbe Bětsábioye jětschuayama. <sup>22</sup> Aca contsobena Abrahámbeñe jinjyama, cha Bëngbe Bětsábeñe yojanošbuáchema, y soyënga yojánama chca chaotsinynama; y ndayá cha tojanmama entsinjinjyena, cha ndegombre puerta bētscá yojanošbuáchema. <sup>23</sup> Chca tojanopasá ntšamo Bëngbe Bětsabe uabemana palabrenguiñe endayancá, mēntšá: “Abraham Bëngbe Bětsábeñe yojtsošbuachiye, y chama Bëngbe Bětsá tojánayana chabe bominyiñe cha tšabia yojamna ca.” Y Abraham entsanabaina Bëngbe Bětsabe amigo ca.

<sup>24</sup> Y tšëngaftanga šmontsetátšēmbo, Bëngbe Bětsá ináyana canye entšá chabe bominyiñe tšabia yomna ca, chë entšá ndayá tojtsamama, chabe ošbuáchiyana chaotsinynama, y ndoñe nye ošbuáchiyana tojtsebomnana. <sup>25</sup> Cachcá tojanopasá Rahab, chë bacna vida bomna shembásaftaca; Bëngbe Bětsá tojánayana chabe bominyiñe cha tšabia yo-

jamna ca, er cha canye tšabe soye tojanma. Cha chë noticia uambaye judiënga posada tojanëyentsame, y chentšana tojanëjabuache inye benachëjana chamuáisebocanama, chë pueblentša soldadëngbiama chamotsachetama. <sup>26</sup> Lempe básefta palabrënguiñe jayanamna mëntšá entsemna: ntšamo canye cuerpo, espíritu ndbomna cuerpo, pronto jóbana, cachá chë ošbuáchiyana, ndocna soyëngaca tontsemna, chca chaotsinýnama, tondayama ntsoservénana.

### 3

#### *Bichtájaca tšabá jóyebuambayama endmëna*

<sup>1</sup> Jesucristbeyeca atšbe catšátanga, ndoñe yapa buátëmbayënga tšëngaftangbeñe chamondëtsemna; er tšëngaftanga ya šmondëtatšëmbo, bënga, chë entsanga abuátambayëngbiama, chë castigo más bëtsá yochtsemnama, Bëngbe Bëtsá ndoñe tmonjóyeunase, ntšamo entsanga tmojamama aiñe o ndoñe tšabá bëtsemnama cha chaojayana ora. <sup>2</sup> Bënga nyetscanga nyetsca bacna soyënga mondbétsama. Nderado nda oyebuambnanyiñe ni mo canye bacna soye tonjama, chë entšá puerte tšabia jtsemnana, ntšamo Bëngbe Bëtsá yobošcá jtsiyenëse, y cha yojsobena cachá sempre jtsenomándayama.

<sup>3</sup> Chë couayëngbioye freno tmojuayashbé ora, ntšamo bënga tmojtsebošcá chënga mochántsama, y bënga cachora jtsobenana ntšamo nyets chëngbe cuérpoca tmojtsamcá jtsemándayana, y ndoñe nye chëngbe bestšaše.

<sup>4</sup> Barquëshamnaca šmochjenójuaboje. Masque tša bëtsëtsacuemëngá y tša jabuache binýiënga chë barco jtsëjuatsëntšnayana, chë uamanéjayënga chë barco juyambana ndayëjana tmojtsebošcá, y chca, nye canye base soyetémaca, timón ca uabainëtémaca. <sup>5</sup> Cachá, chë bichtaja cuerpiñe canye base soyete endmëna, pero chë bichtájaca entsanga jtsenábotamnayana bëts soyënga tmojamama. Smochjouena, canye base iñeshe jtsobenana canye bëts tjañe juangbotjuama. <sup>6</sup> Y chë bichtaja endmëna mo canye iñeshcá, mo canye luare ndayentše puerte bacna soyënga tobinýncá. Chë bichtaja jtsobenana bëngbe cuerpentše puerte bacna soyënga bëngbiama jamama. Mo canye iñeshe becá tojtsendbiamnacá, chë bichtájaca tcojtsichamo ndoñe tšabe soye, jtsobenana bacna soyënga bëngbiama jamama nyets tempo quem luarentše tmuetsiyenëntscuana; y mo nda ndayá tojtsangbotjuacá, Satanás jtsobenana chë bichtaja jtsemándayana, bacna soyënga chaotsamama.

<sup>7</sup> Entšá endobena jtsamëndayana nyetsca tjoica bayënga, shloftšënga, osjojnayënga y buyeshiñe oyena bayënga; y



ndegombre mora entsamënda; <sup>8</sup> pero ndocná tonjobená chë bichtaja jtsemándayana, chca, bacna soyënga amana chaotsajbanama. Chë bichtaja jtsamana bëtsá bacna soyënga cada te chauëtsebinýnama, y mo canýe mëtscuaycá veneno jtsebomnana jóbama, chë bichtájna cachcá endmëna. <sup>9</sup> Bichtájaca bënga puerte tsábá Bëngbe Bëtsá y Taitabiana jtsichámuana, y cach bichtájaca bënga puerte bacá entsangbiana mondbëtsichamo, masque Bëngbe Bëtsá cachacá enoparecënga chënga tojábiana. <sup>10</sup> Cach uayásentsana jtsóbocanana Bëngbe Bëtsabiana tsabe palabrenga y entsangbiana bacna palabrenga. Jesucristbeyeca atsbe catsátanga, chca ndoñe chaondëtsemna. <sup>11</sup> Canýe béjaye obocanentsana ndoñe ntsopodénana tsabe búyeshe chaóboconama y cachentsana untja búyeshnaca. <sup>12</sup> Ntsamo canýe higo betiyentsana ndoñe ntsopodénana olivosësënga jashacama, y canýe uvas betiyentsana ndoñe ntsopodénana higuëbenga jashacama, cachcá, atsbe catsátanga, tamona búyeshentsana ndoñe ntsopodénana tsabe búyeshe chaóboconama.

*Bëngbe Bëtsábiocana óbocana osertánana*

<sup>13</sup> Nderado tsëngaftanguentse tojtsemna canýe puerte tatšëmbuá y osertaná, cha bontsemna, chca yomnama entsanga jinýanýiyana, tsabe soyënga amana jtsiyenëse y chë ntjatosoberbnaycá tojama soyëngaca; y cha chca jamana, puerte osertaná bëtsemnama. <sup>14</sup> Pero tsëngaftangbe ainaniñe yapa ínýabioye šmojtsántšaboše y nýe ínýenga chamotjáyana soyënga šmojtsama, as ndoñe šmattsenábotamnaye osertánënga y tsábënga šmomnana, er ndegombre Bëngbe Bëtsabe osertánana tsëngaftanga ndoñe šmontsebomna. <sup>15</sup> Er chca osertánana, Bëngbe Bëtsábiocana ndoñe ntsóbocanana, ndayá nýe quem luarama enójuabnayëngbentsana, nýe entsangbe juabnentsana, y canýe bacna bayëjbentsana. <sup>16</sup> Ndayentse entsanga yapa tmojtsenántšaboše, y nýe ínýenga chamotjáyana soyënga tmojtsama, chentse tondayama quemochátenëyeunana y nýetsca bacna soyënga mochántsama.

<sup>17</sup> Pero chë Bëngbe Bëtsábiocana óbocana osertánana bomnënga, nýetsca soyamna, natsana puerte tsabe vídaca jtsiyenana, bacna soyëngaca ndëmandánënga; y chënga jtsemnana chë ínýenga ndoñe chamondëtsentsjanama amënga, tsábënga y sempre jtseprontánana ínýenga joyaunayama. Y cach quemënga jtsemnana ínýengbiana ngmënana bomnënga, sempre tsabe soyënga jtsamana, cachcá nýetsca entsangbioye jtsénýayana, y ntsamo ndegombre tojtsemncá jtsichámuana y jtsamana. <sup>18</sup> Ntsamo canýe jená, botamana shajuana jtsebomnana tsabe jënye

jájena, cachcá, sempre natjěmbana jtsiyenama bošěngna, natjěmbana ínĵengaftaca jtsiyenana, chca, nĵetsca entšanga chamotsamama ntšamo Běngbe Bětsabe bominjĩne tšabá yomncá.

## 4

*Smochtsiyena Běngbe Bětsá tšěngaftangbeñe jtsemándayěse*

<sup>1</sup> ¿Ndayentšana chě tšěngaftanga jtsentsjanayama y jtsepenzěntsiayama yóbocana? Endóbocana chě tšěngaftangbe bacna juabnėnguentšana, nĵe cach tšěngaftanga tšabá jtsonñama; y chě soyěnga tšěngaftangbe ainaniñe sempre chě tšabe juabnėngama contra jěsemnana. <sup>2</sup> Tšěngaftanga ndayánaca jtsebomnama šmojtseboše, pero chca jtsebomnama ndoñe šmontsobena, as jtseprontánana ínĵengbioye jtsebáyama. Inĵa ntšamo tobomncá tšěngaftanga tša jtsántšabošana, y chě soye jashjáchama ndoñe šmontsobena ora, ínĵengaftaca jentjáyanganana y jtsepenzěntsiayana. Ntšamo šmojtseboščá ndoñe ntjobenayana jtsebomnama, Běngbe Bětsá chama ndoñe šmondbotjañe causa; <sup>3</sup> y chě soye šmojtjañe ora, tšěngaftanga ndoñe ntjójyěngacñana, ndoñe botamana chě soye šmondbotjañe causa, er tšěngaftanga chě soye jtsebošana nĵe chaoservema oyejuayěnga bacna soyěnguiñe jtsonñama.

<sup>4</sup> ¡Tšěngaftanga, Běngbe Bětsá bobonshánana šmojtsajbananga! ¿Ndoñe šmondětattšěmbo, chě jtsebošana nĵe quem luarama enójuabnayěngbe amigo jtsemnana y nĵe quem luarentša soyěnga jtsebomnama, chca, canĵe entšá Běngbe Bětsabe uayayá jtsemnana? Ndánaca tojajuabó nĵe quem luarama enójuabnayěngbe amigo jtsemnana, chca, canĵe Běngbe Bětsábioye uayayá jóbemana. <sup>5</sup> Ndoñe nĵe bonamente Běngbe Bětsabe uabemana palabrenguiñe měntšá endayana: “Chě Běngbe Bětsá tbojanichmó bėngbe ainaniñe chaotsiyenama Uámana Espíritu, puerte entseboše nĵe Běngbe Bětsá canĵa bėngbe aměndayá chaotsemnana ca.” <sup>6</sup> Pero Běngbe Bětsá, bėngbe tšabiamana jtsejuabnayěse bėnga jtsějabuáchanana, chíyeca Běngbe Bětsabe uabemana palabrenguiñe měntšá endayana:

Běngbe Bětsá chě nĵe cachěnga uámaněnga tmojtse nobi-  
amngangbe contra entsemna,  
y chě ndoñe uámaněnga montsenobiamngambiamna, Běngbe  
Bětsá más tšabe juabna entsebomna ca.

<sup>7</sup> Asna, tšěngaftanga šmochtseprontana nĵe Běngbe Bětsá chacmotsaměndama; ntšamo Satanás tcmojtsaměndacá ndoñe šmattsama, y cha cachora tšěngaftangbentšana echantsachá. <sup>8</sup> Běngbe Bětsábioye šmochtobconá, y cha echanjama tšěngaftanga ntšamo cha yomnama

chacmotsësertánama. Tšëngaftanga bacna soye amënga, cach tšëngaftangbe cucuatsšëngaca tšabe soyënga šmochtsama, bacna soyënga ndoñe. Tšëngaftanga chë inye ora jtsejuabnayana Bëngbe Bëtsá jtsebobonshánama, y inye orna, nye quem luarentša soyënga jtsebmomna, šmochtsajbaná bacna soyënga jamama bošana, chca, nye tšabe juabnënga tšëngaftangbe ainaniñe chašmotsebmomna. <sup>9</sup> Tšëngaftangbe bacna soyëngama ngménaca šmochtsemna, šmochjenóbošachna y cochtsetšenánënga šmochjóyebuambaye. Jatenbiajuayamna, šmochjenóbošachna; y joyejuayëngamna, ngménaca šmochtsemna. <sup>10</sup> Bëngbe Bëtsabe delante bëtsëtsanga ndoñe šmattsenobiamnaye, y cha más uámanënga cmochanjábiana.

*Inyëngbiama ndoñe ntsichámuana ndoñe tšabá tmonjama ca*

<sup>11</sup> Jesucristbeyeca catšátanga, ínëngbiama bacna soyënga ndoñe šmattsóyebuambnaye. Nda cachabe catšatbiama bacna soye tojtsichamo o tojayana ntšamo cha tojamcá ndoñe tšabá yontsemna ca, cha chora chë leyentša mandënga ndoñe ntsoemplínana y jtsichámuana chë leyentša mandënga tondayama yontsoservena ca. Y chë leyama chca tcojtsichámëse, cach ley jocúmplia cuenta, contsobiamná canye ichamuá chë ley aiñe o ndoñe yondoservénama, y chca ndoñe quecmátsmëna jtsamana. <sup>12</sup> Chë ley tojuapormá cha nye canya endmëna, Bëngbe Bëtsá, y cachá endmëna ntšamo entsanga tmojamcá aiñe o ndoñe tšabá bëtsemnama ichamuá, y cachánaca entsobena entsanga játsebacama o nyetsca tescama jácastigama. Y acna, ¿ndase cmëna ndëmua entsabiámna jobenayama jatichámuama ntšamo tojamcá aiñe o ndoñe tšabá bëtsemnama?

*Ndayá yëfse yochjatëchnënguama ndoñe ntsótatsëmbuana*

<sup>13</sup> Y mora quem soye šmochjouena, tšëngaftanga chë šmondbétsichamo: “Mënté o yëfse quemoye o chë inye bëts puebloye fchanjanga, y chentše canye uata fchanjëftsemna ba soyënguiñe trabájayañe, y ndegombre beca fchanjónyëna ca.” <sup>14</sup> ¡Pero ni mo ndayá yëfse tšëngaftangaftaca yochjochnënguama ndoñe quešmátstatšëmbo! Tšëngaftanga ndoñe quešmátstatšëmbo ndayëntscuana vida šmochjëftsebmomna, y chca, tšëngaftanga šmondmëna mo canye jantšetëshcá, chëshe mora jónyñana y nye ndeolpe jatenatjëmbana. Tšëngaftangaftaca cachcá echanjopása. <sup>15</sup> Tšëngaftanga mëntsá cmontsamna jayanama: “Bëngbe Bëtsá quešojalesenciase, ainënga fchántsemna y quem soye o chë soye fchanjama ca.” <sup>16</sup> Pero chë cuenta, tšëngaftanga bëts soyënga šmochjamama sempre jtšenábotamnayana, ndayá

tšëngaftanga chašmomama Bëngbe Bëtsá yochjalesenciáca ntsetatšëmbcá; y chca jtsamana ndoñe tšabá quenátsmëna. <sup>17</sup> Nda tojtsobena ntšamo tšabá yomncá jamama, pero ndoñe chca tonjama, cha canye bacna soye jtsamana.

## 5

### *Chë bomnënga jábuayenama*

<sup>1</sup> ¡Quem soye šmochjouena, tšëngaftanga chë bomnënga! ¡Chë tšëngaftanga šmochtseufrínama šmochjenóbošachna y uatjananënga šmochtseyoye! <sup>2</sup> Tšëngaftangbe bomnana buajónana janguánana entsemna, tondayama quenátoservena, y chë entšayëjuangá mejëjonga montsasá. <sup>3</sup> Tšëngaftangbe castellano y midio tojtsengúsheshe; y chë ngúsheshna echántsinÿinÿnaye tšëngaftanga chë crocenánaca ndoñe šmonjanmama ntšamo ínÿenga jujabuáchama yojamncá; chë causa, nÿetsca tescama cmochántsapochocaye, ntšamo chë íñeshe canye soye endbetseepochocacá. Tšëngaftanga quem tempo bomnana šmojtsejuabá, y mora quem luare jopochócama ya entsobeco. <sup>4</sup> Tšëngaftanga chë tšëngaftangbe fshantsënguiñe tmojëftsetrabajanga ndoñe šmontanëbuénaye, y mora šmochjouena, chënga chama cmontsachembuanama. Bëngbe Utabná nÿets obenana bomná, chë trabajayëngbe chembuanana ya tojouena. <sup>5</sup> Quem luarentše tšëngaftanga šmondoyena ba botamana soyëngaca y nÿe ntšamo cach tšëngaftanga šmobošcá jtsamëse. Ntšamo canye uacná jóbana, minÿicá tojtsemna ora, cachcá tšëngaftangbiana entsobeco chë te, ndaye ora Bëngbe Bëtsá echanjama castigánënga chašmotsemnana, er puerte bacna soyënga šmojama. ¡Chë castigo jtsebínÿinama tempo ya entsobeco! <sup>6</sup> Tšëngaftanga, chë puerte tšabá amëngbiana šmojayana jóbanama yojtsamna ca y šmojtsëbaye, chca ndoñe chaondëtsemnana chënga ndocá jamama ntšobencá.

### *Chë uantado jtsemnana y chë Bëngbe Bëtsáftaca jencuéntama ora*

<sup>7</sup> Pero tšëngaftanga, catšátanga, uantádoca šmochjobátma Bëngbe Utabná yochjésabo orscama. Chë jajañe trabajayá tojtsobátmana bëtscá tšabe shajuanënga jobuátbanama, jtsotocánana natsana uantádoca jobátmana chë jajañama uaftena tempo chaóshjanguama. <sup>8</sup> Tšëngaftángnaca uantadënga šmochtsemna, y tšëngaftangbe ainaniñe añemo chaotsemna, er Bëngbe Utabná mëntescana ndoñe bën y moye echanjésabo.

<sup>9</sup> Jesucrístbeyeca catšátanga, ntšamo ínÿenga tmojtsamama ndoñe nÿe šmattsoquejana, Bëngbe Bëtsá tšëngaftangbiana ndoñe chaodayanama, ntšamo šmojóyebuambama ndoñe tšabá šmonjama ca. Y nda yochjayana ntšamo entsanga

tmojamcá aíñe o ndoñe tšabá bétsemnama, ya entsebeconá. <sup>10</sup> Atšbe catšátanga, chë tempsquënga Bëngbe Bëtsabe juabna oyebuambnayënga, ndëmuanÿenga entsanga tmonjanabuayená Bëngbe Utabná jótšëmbonëse, chënga bëngbioye šonjëftsaninÿanÿiye ntšamo tmojansufrima, ntšamo šojtsamna uantadënga jtsemnana tmojtsesufrina ora; y chca tšëngaftanga cmontsamna jtsamana. <sup>11</sup> Bënga chëngbiana fsëndbétsejuabnaye oyejuayënga imojamna ca, chë tmojansufrí ora Bëngbe Bëtsábeñe imojanobátmana ainaniñe añemo jtsebomnëse. Tšëngaftanga šmojouena ntšamo Job ainaniñe añémoca Bëngbe Bëtsábeñe yojanobátmana, puerte padecena soyënguiñe yojasufrina ora; y šmondëtatsëmbo ntšamo Bëngbe Bëtsá cabana chábioye tbojancuedama, y chca yojamna Bëngbe Utabná entsangbiana puerte ngmená yómnyeca.

<sup>12</sup> Pero masna, atšbe catšátanga, ndayá jamama chašmojašbuachená ora, chca ndoñe šmatjama jajúrase ni celocama, ni quem luarama, ni ndocna inÿe soyama. Tšëngaftanga aíñe ca jayanama šmojtsebošëse, nÿe aíñe ca šmochjayana, y ndoñe casna nÿe ndoñe; chca, Bëngbe Bëtsá ndoñe chaondayana ndoñe tšabá šmonjama ca júraye causa.

<sup>13</sup> Nderado nda tšëngaftanguentšá puerte ngménaca tojtsemna, cha bontsemna Bëngbe Bëtsá chama jaimpádama. Y nderado nda oyejuayá tojtsemna, cha bontsemna jacántana Bëngbe Bëtsá jëtschuayama. <sup>14</sup> Nderado nda šocá tojtsemna, cha bontsemna chentša ošbuachiyëngcá enefjuanëngbeñe bëtšëjemëngcá amëndayënga jáchembuana, chënga Bëngbe Bëtsá chabiana chamoimpadama, y Bëngbe Utabná jótšëmbonëse aceitiye chamuanëtjuama. <sup>15</sup> Y tšëngaftanga, puerte jtsošbuáchiyëse Bëngbe Bëtsá chašmojaimpadá ora, chë šocá salud echántinÿena, y Bëngbe Utabná echanjama cha tšabá cachiñe chaotsatsmënama; y nderado cha bacna soyënga tojamëse, Bëngbe Bëtsá bochantseperdóna. <sup>16</sup> Chíyecna, chë bacna soyënga šmojtsamama šmochjobuambaye, y Bëngbe Bëtsá nÿetscangbiana šmochtseimpadana, chca, tšabá mo shnanëngcá chašmotsemnama. Canÿa ndabiana Bëngbe Bëtsá tojayana chabe bominÿiñe tšabia yomna ca, cháftaca tbojencuentá ora, chánaca ba tšabe soyënga jóyëngacñana, y jobenayana bëtš soyënga jamama. <sup>17</sup> Bëngbe Bëtsabe juabna oyebuambnayá Elías, mo cach bëngcá canÿe entšá inamna, y puerte jtsošbuáchiyëse ndoñe chaonduaftema Bëngbe Bëtsábioye tbojanimpadá ora, quem luariñe mo unga uata y tsëntsañe ndoñe tonjanafté. <sup>18</sup> Chentšana, Bëngbe Bëtsábioye cachiñe tbojtanimpadá ora, quem luariñe tojanafté y cachiñe chë jajañenache bëtscá saná yojtsatsbinÿna.

19 Atšbe catšátanga, nderado nda tšëngaftanguentšá tojtsajbaná chë ndegombre soyënga jtsamana, pero inÿa chábioye tbojuájabuache cachiñe chë tšabe benache cháuatishachama, <sup>20</sup> tšëngaftanga šmochtsetátšëmbo, ndánaca chë bacna soye amábioye tbojuájabuache chabe ndoñe tšabe videntšana cháuissebocnama, cha chë nÿetsca tescama castigüentšana chábioye jatsbocana, y jamana ba bacna soyëngama cha perdonaná chaotsemnama.

# 1 San Pedro

## *Jacheuayama*

<sup>1</sup> Atše Pedro, Jesucristbe ichmoná, quem tsbuanácha sentsabiamná chë cachëngbe luarentše ndoñe mon-doyenëngbiama, chë Ponto, Galacia, Capadocia, Asia y Bitinia luarënguenache ujquëshenënga imoyenëngbiama.

<sup>2</sup> Sëntsabiamná chë Bëngbe Bëtsá Bëngbe Taitá tojánabacangbiama, ntšamo cachá jamama yojanjuabnacá y ntšamo jopásama yojantatšëmbcá, cabá chca ndochnëngo ora; Uámana Espíritbeyeca, Bëngbe Bëtsá tojama tšëngaftanga chabe entšanga chašmotsemnama, Jesucristo chašmotseyeunanama y Bëngbe Bëtsabe delante tšabá chašmotsatsmënama, bacna soyënga abuajuánënga. Y Bëngbe Bëtsá chca tojanma, Jesucristbe buiñe juabuáshanëse, cha tojanóbanayeca. Atše bëtscá sëntseimpadana Bëngbe Bëtsá, chaoma tšabe bendicionënga tšëngaftangbeñe chaotsemnama, y chaoma tšëngaftangbe ainaniñe tšabe ebionana chašmotsebomnama.

*Bëngbe Bëtsábeñe jtsošbuáchiyëse vida jtsebomnana, atsebácanëngajtsemnama*

<sup>3</sup> Bëngbe Bëtsá y Bëngbe Utabná Jesucristbe Taitábioye matschuanga; cha puerta lastemado ínÿengaftaca yómnayeca, tojanma bënga tsëm juábnaca vida chamotsebomnama, bëngbioye bacna soyënga jabuajuánase, Jesucristo cháuatayenama tonjánmayeca. Chíyeca bënga montsobena chábeñe jtsobatmanana sempre y nÿetsca tescama, ndayá cha šochjátšatayama. <sup>4</sup> Ndayá bënga šochjátšataycá

ndoñe quenátsmëna jëftsopochócama opodena soyënga, ndayá nÿets tempo tšabe soyënga. Y bënga mondobátmana jóyëngacñama ndayá Bëngbe Bëtsá chabe entšanga jatšatayama tojašebuachenacá, ndayá celoca bëngbiama cha yojsinÿena. <sup>5</sup> Chë soyënga tšëngaftangbiama entsemna, Bëngbe Bëtsábeñe šmošbuáchema; cha chabe obenánaca cmondánÿena, tšëngaftanga játsebacama. Cha chca jamama ya tojaprontá y echanjínÿanÿiye, Cristo jésabama tempo chaojóshjango ora.

<sup>6</sup> Chíyeca tšëngaftanga tša oyejuayënga šmojtsemna, masque nderado jtseytana inÿe ora, nÿetsca padecena soyënguiñe jasúfriase chašmuachnënguama. <sup>7</sup> Mo chë castellanama jtsetatšëmbuama aíñe o ndoñe tšabe castellano tomnama iñiñe fjuchnëngcá, padecena soyënguiñe tšabá chašmojachnënguse, Bëngbe Bëtsá

echanjínjānyīye tšēngaftanga ndegombre taišmošbuáchema. Chē castellano pronto endbetsopochóca, masque chca, chana puerte endbetsámana. Y tšēngaftangbe ošbuáchiyana chē castellanama puerte más enduámana. Tšēngaftanga padecena soyēnguentšana bēts ošbuachiyánaca chašmojábočnēse, Jesucristo chaojésabo ora, entšanga mochanjinjē tšēngaftanga šmojtsomerecena chacmotsatacheuanama, más bētsētsanga y obenēga chácmbiamama y uámanēngnaca.

<sup>8</sup> Tšēngaftanga Jesucristo šmondobonshana, y chábioye ndoñe chešmátaninjē; masque mora cha ndoñe quešmatonjā, tšēngaftanga chábeñe šmontsošbuaché, y šmontsebmna canjē puerte tšabe oyejuayana, y ntsachetšá chana yomnana ndoñe quešmátobena jayanama, tša bēts cá causa. <sup>9</sup> Chca oyejuayana tšēngaftanga šmontsebmna, er ndayá tšēngaftanga jtsošbuáchiyēse šmobatmancá, ya šmojtsosháchichana, chē Bēngbe Bētsá tšēngaftanga jtsatsebacayana.

<sup>10</sup> Bēngbe Bētsabe juabna oyebuambnayēga ya imojanatsjendá y imojanguá jtsetatšēmbuama, ntšamo Bēngbe Bētsá entšanga játsebacama, y tmojanoyebuambá ndayá Bēngbe Bētsá tšēngaftanga jatsatayama, tšēngaftangbiamama tšabe juabna cha yobómnyeca. <sup>11</sup> Chēngbe ainaniñe yojtsemna Cristbe espíritu, y ntšamo tojanēyancá, cabá chca ndochnēngo ora, yojamna Cristo jasúfriama y ntšamo chentšana Bēngbe Bētsá chábioye puerte bētsá bochjábemama, Bēngbe Bētsabe juabna oyebuambnayēga imojanjuabná y imojanatsjendá jtsetatšēmbuama chē soyēga yochjanopása ora, ndaye tempo y ntšamo chē tempo yochtsemnana. <sup>12</sup> Pero tempo Bēngbe Bētsá chēngbioye tojaninjānyé, chca jtsamana ndoñe cachēngbe tšabiamama yonjamnana, ndayá chca jtsamana yojamna tšēngaftangbe tšabiamama. Chēnga tmojanoyebuambá, ntšamo chē tšabe noticiēga oyebuambnayēga tšēngaftanga tcmojauyancá. Y chca tcmojáuyana chē Uámana Espíritbe obenánaca, nda Bēngbe Bētsá celocana tbojichmó. Chē soyēga endmēna ndayá chē angelēga muantseboše tšabá jinjāma, chēnga chaósertama.

*Bēngbe Bētsá entšanga jtsachembuanana chabe entšangcá chamotsiyenama*

<sup>13</sup> Chíyeca, botamana jtsejuabnayēse tšabá jatrabájama, y cach tšēngaftanga jenomándama jtsoebenēse, yejuana šmochtsobátmana, Bēngbe Bētsá soyēga cmochjátatayama tšēngaftangbe tšabiamama jtsejuabnayēse, Jesucristo quem luaroye yochjésabo ora. <sup>14</sup> Tšēngaftanga Bēngbe Bētsabe básenga uauenanēga quetsomñecá, ndoñe šmattsiyena ntšamo cach tšēngaftangbe bacna juabnēga yomncá njē tšabá



jtsomñama, ntšamo Bëngbe Bëtsábioye cabá nduabuatma ora šmonjanbomncá. <sup>15</sup> Chamna, šmochtsiyena mo chë Bëngbe Bëtsabe entšangcá, puerte tšabe entšangcá jtsamëse, er Bëngbe Bëtsá, nda tcmojáchembo chca chašmotsemnama, sempre uamaná endmëna. <sup>16</sup> Er Bëngbe Bëtsabe uabemana palabrënguifne mëntšá endayana: “Tšëngaftanga Bëngbe Bëtsábeñe uámanënga šmochtsemna, er atše uamaná sëndmëna ca.”

<sup>17</sup> Tšëngaftanga Bëngbe Bëtsábioye šmondbuyana “Taita ca”, šmondbótšëmbona ora. Bëngbe Bëtsabiana nyetscanga cachcá mondmëna. Chíyeca, ntšamo nyetscanga tmojamama tšabá o ndoñe tšabá yontsemna ca cha yochjayana ora, cha chca echanjama nýe ntšamo chënga tmojamcá jtsonýayëse. “Taita ca” chábioye šmondbuyánayeca, quem luarentše šmochtsiyenëntscuana sempre šmochtsejuabnaye cha nyetscangbiana más bëtsá yomnama, chë šmojtsama sóyeca chca jtsinýanýayëse. <sup>18</sup> Tšëngaftanga šmondëtatšëmbo, Jesucristo, mo nda ínýengbioye játsebacama crocénana cuafjëtsajocá, tonjanóbana tšëngaftanga játsebacama, chë nyetsca soyënga nýe bonamente jtsamëse oyenentšana, ntšamo jtsiyenama tšëngaftangbe bëts taitángbentšana šmojanatsjinýcá. Cristo ndoñe checmatanatsebacá, yopodena jtsopochócama soyënga jëtsjájuase, mo crocénana o castellancá, <sup>19</sup> ndayá cachá jobanëse, chabe uámana buiñe juabuáshanëse. Cristo chë ndocna bacna soye ndbomná, tonjanóbana ora enjamna mo canýe oveshatemcá, tondaye ndbemaná, ni tsengana ndbomná, Bëngbe Bëtsábioye jëtschuayama altaroca obaná. <sup>20</sup> Chama Bëngbe Bëtsá Crístbeñe tojanjuabó y tbojanábuayana, cabá quem luare ndëtsemna ora; pero quem tempo, Cristo entšángbeñe tonjábocna tšëngaftangbe tšabiana. <sup>21</sup> Crístbeyeca, tšëngaftanga šmondošbuaché Bëngbe Bëtsábeñe, nda tonjanma Cristo cháuatayenama y puerte uamaná tbonjábema. Mëntšá, ndábeñe tšëngaftanga šmošbuaché y šmobátmana, Bëngbe Bëtsábeñe endmëna.

<sup>22</sup> Tšëngaftanga šmojama ndocna bacna soyënga ainaniñe ntsebomnama, Jesucristbeyeca catšátangbioye ndegombre jtsababuánýeshanama, er tšëngaftanga ntšamo ndegombre yomncá jtsamëse, Bëngbe Bëtsá šmoyeunana. Chcasna, sempre nyets ainánaca nyetscanga šmochtsenbobonshana. <sup>23</sup> Bëngbe Bëtsá tojama tšëngaftanga tsëm vida chašmotsebomnama; pero tšëngaftanga tsëm vida šmontsebomna, ndoñe nýe quem luarentša entšanga ndayá tmojamama, sinó ndayá Bëngbe Bëtsá chë ndocna te jobanamá tojamama. Cha chca tojama cachabe

palábraca, ndayá endoyebuambná ntšamo entšanga muant sobena tšabe vida jtsebomnama y chë palabra ndocna te queochaisopochóca. <sup>24</sup> Ntšamo Bëngbe Bëtsabe uabemana palabrënguñe endayancá:

Nyetsca entšanga mondmëna mo shacuaná,  
y chënga imobomna tšabe soyënga, endmëna mo chë shacua-  
nentša uantšefjushangacá.

Chë shácuana jtsanctana y chë uantšefjushangá  
jtsatquécjanana;

entšanga cachcá, nyets tempo quem luarentše ndoñe que-  
mochátiyena;

<sup>25</sup> pero Bëngbe Bëtsabe palabra nyets tempo echanjesomñe ca  
—chiñe endayana.

Y chë palabra endmëna chë Jesucristbe tšabe noticiënga, chë  
buayenánana ntšamo ínÿenga tcmojabuayenacá.

## 2

<sup>1</sup> Chcáyecna, nyetsca tescama šmochtsajbaná nyetsca bacna soyënga amana, ínÿengbioye áingñayana, bacna entšanga chë ntšamo ndegombre šmojuabnacá ndinÿinÿayënga ntsemnana, ínÿengbioye untšabošana, y ínÿengbiamu uayátsenayana. <sup>2</sup> Mo cabá mora onÿnana šešoncá, tša jtsebošana chabe mamabe létšiyé, cachcá tšëngaftanga cmontsamna puerte jtsebošana nyets tempo Bëngbe Bëtsabe soyënga jtsebomnama, chë soyëngaca Jesucristbeñe corente chašmotsošbuáchema, y chca, atsebácanënga chašmotsemnana; <sup>3</sup> ntšamo Bëngbe Bëtsabe uabemana palabrënguñe endayancá: “Tšëngaftanga šmojátatšëmbona Bëngbe Utabná puerte tšabia nyetscángaftaca yomnama ca.”

*Cristo, chë mo aina ndëtšbecá endmëná*

<sup>4</sup> Bëngbe Utabnábioye šmochtobeconá, nda endmëna mo canÿe aina ndëtšbecá, ndëmuanyëse tojtsama entšanga tšabe vida chamotsebomnama. Báseftanga cha tmojtsaboté, mo ntšamo chë ndëtšbéngaca canÿe yebna tmojtsejebuana ora, luaroca tmojtsejajó ndëtšbecá; pero Bëngbe Bëtsá chábioye tbojuábuayana, y chabe bominÿiñe cha puerte uamaná endmëna. <sup>5</sup> Chábioye šmochtobeconá, tšëngaftanga chë tšabe vida šmojóyëngacñënga, cánÿiñe mo aina ndëtšbéngcá, Bëngbe Bëtsabiamu jajebuama canÿe yebnentšama chašmotsemnana; mo Bëngbe Bëtsabiamu bachnangcá chašmotsemnana, nÿe Bëngbe Bëtsábioye jtseservénama jtsentšëñëse, chábioye jtsatschuanayama. Ntšamo Bëngbe Bëtsábioye jtseservénama šmojtsamcá, chábioye tšabá jtsinÿanana, ndayá Jesucristo tojanmama. <sup>6</sup> Chca ndegombre

endmëna, er Bëngbe Bëtsabe uabemana palabrënguiñe, Bëngbe Bëtsá Jesucristbiana mëntśá tojánayana:

Smochjinÿe, atşe sënjama Jerusalenentşe canÿa chaotsemna, y cha endmëna mo chë canÿe yebna jajebuámentşe chë más bëts uashacuanëşentşe jajona ndëtsbecá.

Cha atşbe Uabuayaná endmëna, y atşbiana puerte enduámana.

Nda chábeñe tojtsoşbuaché, ndocna te nÿe bonamente chábeñe queochátobatmana ca.

<sup>7</sup> Tsëngaftanga, chábeñe oşbuáchiyëngbiana, nda endmëna mo chë yebna jajebuámentşe más bëts uashacuanëşentşe jajona ndëtsbecá, cha puerte enduámana; pero chábeñe ndoşbuáchiyëngbiamna, entsopasana ntşamo Bëngbe Bëtsabe uabemana palabrënguiñe Cristbiana endayancá:

Chë yebna jebuanënga tmontsanaboté ndëtsbé, mora chë más bëts uashacuanëşentşe entşejájona ca.

<sup>8</sup> Inÿoca, Bëngbe Bëtsabe uabemana palabrënguiñe mëntśánaca chabiana endayana:

Cha endmëna mo ndëtsbé ndayentşe jtsojestjiyamcá; y mo peñëścá yomna chënga chamotsótsatşama ca.

Chënga Jesucristo jtsabotena, chabe buayenánana ndoñe ntjoyeunaycá; Bëngbe Bëtsá cabá chca ndopása ora tojanjuabó chca chaotsemnama.

<sup>9</sup> Pero tsëngaftanga şmondmëna Bëngbe Bëtsábeyeca bocacánënga, y mo canÿe rey tmojtserverna bachnangcá, y şmondmëna Bëngbe Bëtsabe entşanga nÿe chabiana jtsetrabájayama, y chë nÿe Bëngbe Bëtsábënga şmomnënga. Y chca endmëna, tsëngaftanga chë bëts soyënga ntşamo Bëngbe Bëtsá tojamcá chaşmotsabuayiynama. Cha endmëna nda tcmojáchembo chaşmotsajbanama oyenana mo ndoñe binÿniñcá jtsejuabnayeşe y jtsamëşe, cháftaca jtsemnama chaşmotsobenama, chë tsëngaftangbe juabnënga puerte binÿnayáftaca.

<sup>10</sup> Tempo tsëngaftanga ni mo cánÿentşa entşangcá ndoñe queşmënjatsmëna, nÿe ujquëşhenënga; pero mora, Bëngbe Bëtsabe entşanga şmontsemna; tempo şmonjamna entşanga ndocná tonjánalastemanga, pero mora, Bëngbe Bëtsá aiñe lastemado tsëngaftangftaca entsemna.

### *Bëngbe Bëtsá jtservernana jtsiyenana*

<sup>11</sup> Atşbe bonşánënga, ndayentşe tsëngaftangbe ndegombre luare yomna, celoca endmëna, y muentşe quem luarentşe, tsëngaftanga şmondmëna mo ínÿoicana ashjajnëngcá, y mo canÿe luarëjana nÿe achnëjuanëngcá, cach tsëngaftangbe luaroye átayiñe. Chíyeca cbontsaimpadana, ndoñe chaşmondëtsama soyënga ntşamo chë şmobomna bacna juabnënga tomncá, ainaniñe bacna soyënga bomna causa;

chca juabnënga ainaniñe jtsenpenzétsiayana, chentše jtsemándayama y Uámana Espíritu ndoñe chaondëtsemándama. <sup>12</sup> Chë Bëngbe Bëtsábioye nduabuatmëngbeñe sempre šmochtsiyena tšabá jtsamëse; chca chënga, masque mora tšëngaftangbe contra imojtsoyebuambná, tšëngaftanga mo bacá uamana entšanga cuaftsemnëngcá, chë tšabe soyënga ntšamo tšëngaftanga šmojtsamcá chamuinÿama, y chca, Bëngbe Bëtsá chëngbioye chaojenonÿinÿé te, chábioye chënga chamotsatschuanama.

<sup>13</sup> Bëngbe Bëtsá šmoyeunanama, nÿetsca entšanga mando bomnëngbioye šmochtsobedecena; chë Romoca bëtš mandádbioye, cha chë quem luarentša más uámana puesto jtsemándayama endbómnyeca; <sup>14</sup> y chë tšëngaftangbeñe mandadëngbióynaca, ndëmuanÿenga cha jíchamuana chë bacna soyënga amënga jácastigama, y chë tšabe soyënga amëngbiamá tšabá imojtsama ca chamuayanama. <sup>15</sup> Chë mando bomnëngbioye šmochtsobedecena, er Bëngbe Bëtsá endboše tšëngaftanga tšabe soyënga chašmotsamama, chca, chë ndosertánënga chë tšëngaftangbiamá podesca ichámënga, ntšamo ndegombre yomncá ntsetatšëmbcá, tondaye chamondëtsebomna tšëngaftangbe contra jayanama.

<sup>16</sup> Smochtsiyena tšabá jtsamëse, mo chë ya ndoñe más bacna soyëngaca y bacna juabnëngaca ndëmandanëngcá; pero chca šmojtsemnama ndoñe šmattsejuabnaye nÿe ndaye bacna soye jamama šmojtsobena ca, y nÿe chca šmochjátama. Más tšabá endmëna jtsiyenana, mo chë Bëngbe Bëtsá imoservenëngcá. <sup>17</sup> Nÿetscangbiamá respeto šmochtsebomna, chë Jesucristbeyeca catšátangbioye šmochtsababuánÿeshana, sempre šmochtsiyena Bëngbe Bëtsabiamá jtsejuabnayëse cha chë más bëtšá yomnama, y chë Romoca bëtš mandado šmochterrespetana.

*Cristo chabe entšanga tojinÿanÿé ntšamo yomna jasúfriana*

<sup>18</sup> Tšëngaftanga, chë nÿets tempo ínÿabiamá canÿe yebnentše oservënënga, tšëngaftangbe nduiñëngbioye šmochtsayaunana, puerte respeto chëngbiamá jtsebomnëse; y ndoñe nÿe chë tšábëngbioye y nÿe tšabá mandbomnëngbioye, ndayá chë bacá mandbomnëngbióynaca. <sup>19</sup> Nderado nda, ntšamo Bëngbe Bëtsá yobošcá jamama bošama, tojoboyá chabe nduiño cha chaosufrima tojtsama ora, masque chama jasúfriama ndoñe tbondmëna, chca jamëse, Bëngbe Bëtsá corente tšabá jtsinÿanana. <sup>20</sup> Er nderado tcmojtsacastigá ndaye bacna soye šmojama causa, y chora tša uantadënga chiñe šmojachnëngo, chë soye ndoñe yapa ntsámanana. Pero tšabe soyënga šmojtsama y chë causa šmojtsesufrina, y tša uantadënga chiñe šmojachnëngo, chë soye cocayé Bëngbe Bëtsá corente

tšabá jtsinŷanana. <sup>21</sup> Chca cmontsamna, er Bëngbe Bëtsá tcmojánachembo tšabe soyënga jamama y chca jasúfriama; chca ndegombre endmëna, er Cristo tšëngaftangbiama tonjansufri, y chca cha tcmonjaninŷanŷé, ntšamo jamama cmojtsamna, tšëngaftanga chca chašmotsamama. <sup>22</sup> Cristo ndocna te ndocna bacna soye chenáisema, ni ndocnábioye chebnaiseingñé. <sup>23</sup> Chábioye tmojtsoyenguá ora, chëngbioye ndoñe ntëyánguanguana. Cha chaosufrima tmonjanma ora, cha ndocá ntjatëtsëtsnayana jaútatjayama, ndayá Bëngbe Bëtsábeñe jtošbuáchiyëse, chábeñe yojanobátmana. Bëngbe Bëtsá ntšamo nŷetscanga tmojamama tšabá o ndoñe tšabá yonjamna ca yochjayana ora, chca echanjama nŷe ntšamo chënga tmojamcá jtsonŷayëse. <sup>24</sup> Cristo cruciñe tonjanóbana ora, cha tonjansufri chë castigo, chë bëngbe bacna soyëngama cach bënga šojánamna jasúfriama castigo, bënga chë bacna soyënga jamama juabnëngaca ndoñe más mandánënga chamondëtsemnama, y bënga ntšamo Bëngbe Bëtsabe bominiñe tšabá yomncá jtsamëse chamotsiyenama. Er Crístbioye chënga tmonjanlisiá chaóbanama y tonjansufri jobanëntscuana, y chca, bënga šonjanatsebacá. <sup>25</sup> Er tšëngaftanga, tempo Bëngbe Bëtsábentsana bënoca šmonjamna, mo ótsena oveshëngcá; pero mora Cristbe benache šmojtishache, y cha cmontsanŷena, mo oveshëngbe canŷe abuaŷenŷacá, y cha entsantješna tšëngaftanga tšabá chašmotsemnama.

### 3

#### *Ntšamo iuamna chë bouamnëngbioye jtsiyenana*

<sup>1</sup> Cachcá mo chë oservenëngcá, tšëngaftángnaca shémanga, tšëngaftangbe boyángbioye šmochtsayaunana, chca, chë Bëngbe Bëtsabe buayenana soyënguiñe ndošbuáchiye boyángbioye chašmobená jáyëñjanama, Jesucristbeñe chamotsošbuáchema, ntšamo tšëngaftanga šmojtсийenama. Ndoñe queochátsiyta chë buayenánama chënga jatëtsëtsnayana, <sup>2</sup> er chënga mochanjinŷe tšëngaftanga šmojtсийena, Bëngbe Bëtsá nŷetscangbiama más bëtsá yomnama sempre jtsejuabnayëse, y ntšamo šmojtsamcá chca yojsinŷinŷnáyeca. <sup>3</sup> Cach tšëngaftangbiama ndoñe mëntsá šmattsejuabnaye: “Entšanga atše botamaná tsmëna ca chamotsejuabnama atše nŷa mo chca chantenochquëca, chantenóbotamaye ba castellano soyëngaca o ba uámana entšayangá chantichëtjo ca”; <sup>4</sup> ndayá chca chaotsemna, ntšamo tšëngaftanga chë Uámana Espíritbeyeca mandánënga jtsemnëse ainaniñe šmojuabnama, cmëbionama y šmobošama; ndocna te ndopochócaŷe botamanana jtseboimnama, ainaniñe nŷe cach tšëngaftanga uámanënga

jenobiamama juabnënga ntsebomncá, pero aínne ainaniñe tšabe ebionana jtsebomnëse. Chë soyënga Bëngbe Bëtsabe bominyiñe puerte enduámana. <sup>5</sup> Tempo chca, chë puerte tšabe shembásenga, chë Bëngbe Bëtsabe bocacanënguentsënga, imojanamana jtenóbotamayana; chënga Bëngbe Bëtsabeñe imojtsanošbuaché y chábeñe imojanobátmana, y nyetscanga chëngbe boyángbioye imojánayaunana. <sup>6</sup> Chca yojamna Sara, Abrahámbioye ibnayeunana y chábioye “Taita ca” ibojanábobuatma. Tšëngaftanga Sarabe bembangcá jtsemnana, tšabe soyënga šmojtsamëse, y tondayama uatjana šmontsebomnëse.

<sup>7</sup> Cachcá, tšëngaftanga boyanga, cada ona cachabe shémaftaca chaotsiyena, tšabá jtseñeyeananëse, y cha respeto buajoná chaotsemnana jtsemëse; pero chca, ndoñe nje cha acbiamama más batšá obenana bomná bëtsemnana, ndayá Bëngbe Bëtsá chabiamama tšabe juabna yobómnyeyeca, ntšamo cach aca tšabe vida tcmojašbuachenacá chábioynaca tbojašbuáchenama. Chca šmochtsama, Bëngbe Bëtsáftaca jencuéntama totcá chaondëtsemnana.

*Chë tšabe soyënga amama jasúfriama yojtsamnënga*

<sup>8</sup> Y morna, nyetsca tšëngaftanga cachcá šmochtsejuabnaye, ínÿenga šmochtsalastemana, chë Jesucristbeyeca catšátangbioye šmochtsababuánÿeshana, ínÿengbiamama chacmóngmiaye, y cada ona chaotsejuabná chë ínÿenga chabiamama más uámanënga imomna ca. <sup>9</sup> Inÿenga tšëngaftangbiamama ntšamo tcmojaborlá ora, ndoñe šmattëchenanguaye; ni chacmojtsëyanguá ora, chëngbioye ndoñe šmattoyánguango. Chca játamama cuentna, Bëngbe Bëtsá šmochjaimpáda, chëngbeñe tšabe bendicionënga chaotsemnana cha chaomama, er Bëngbe Bëtsá tcmojáchembo chca chašmotsamama, y Bëngbe Bëtsábíocana tšabe bendicionënga chašmosháchiñama. <sup>10</sup> Ntšamo Bëngbe Bëtsabe uabemana palabrenguiñe endayancá:

Nda toboše tšabe vida jëtsebomnana y puerte oyejuayá tempënga jtsebomnana, yejuana chaochtsenojuabná bacna soyëngama ndoñe chaondëtsóyebuambnana, y ndoñe chaondëtsebosterama.

<sup>11</sup> Bacna soyënguentsšana chaotsojuánañe y tšabe soyënga chaotsama, natjëmbana nyetscángaftaca jtseyenama chaotseboše, y chca chaotsemnana sempre chaotsentšena.

<sup>12</sup> Chca bontsemna jamana, er Bëngbe Utabná, chabe bominyiñe tšabe soyënga amëngbioye jtsanÿenana, chëngbiamama sempre jtsantješnëse;

y sempre chéngbioye jtsayaunanana, chábioye ndayámna  
tmojtsotjanañe ora;

pero chë bacna soyënga jamana uamanëngbe contra cha jt-  
semnana ca —chiñe endayana.

<sup>13</sup> ¿Nda nanjobenaye tšëngaftangbiana bacna soyënga jamama, tšëngaftanga chë tšabe soyënga jamama sempre šmojtsentsénëse? <sup>14</sup> Pero masque tšëngaftanga cmojtsamna jasúfriama tšabe soyënga šmojtsamama, Bëngbe Bëtsá chama tšabe soyënga cmochántatšataye. Chë tšëngaftanga chašmosufrima amëngbiana ndoñe matauatjëngana, ni ainana tsetšenánënga ndoñe matsmënëngana, <sup>15</sup> ndayá ainaniñe sempre šmochtsejuabnaye Cristbiana mo Bëngbe Utabnacá y chabiana respeto šmochtsebonna; y sempre šmochtseprontana jojuama ndëmuanyënga tcmojtsatjaná ndáyeca tšëngaftanga Bëngbe Bëtsábeñe jtsošbuáchiyëse, chabiana ainaniñe šmobátmanama. <sup>16</sup> Pero chca šmochjama tšabe ainánaca jtsënyayëse y Bëngbe Bëtsabiana respeto jtsebonnëse. Smochtsiyena tšabá jtsamëse, y chama ainaniñe ndoñe chašmondëtsebonna juabnënga y chamuayana chca ndegombre ndoñe tšabá šmontsama ca, chca, ínÿenga tšëngaftangbiana podessa chamojtsoyebuambná ora, tšëngaftanga Crístbeñe ošbuáchiyënga quetsomñecá tšabe soyënga šmojtsamama, chënga chamotsëuatja chca tmojtsóyebuambnama.

<sup>17</sup> Más tšabá endmëna jasúfriana tšabe soyënga tcojamama, nderado Bëngbe Bëtsá chca chaotsemnana tojtsebošëse, y ndoñe chë jasúfriana ndaye bacna soye tcojamama. <sup>18</sup> Er Cristo nÿe canÿe tonjanóbana bënga bacna soyëngama jáperdonama; chë nÿetsca soyënguiñe tšabá amá, chë Bëngbe Bëtsabe bominyiñe ndoñe tšabá yondmëna soyënga amëngbiana, tšëngaftanga Bëngbe Bëtsáftaca chašmotsatsmënama. Entšacá, Cristo tonjanóbana, pero Bëngbe Bëtsá tonjanma, cha cachiñe vida chabe espiritñe chaotsatsbonnama. <sup>19</sup> Pero Cristo cháuatayenama Bëngbe Bëtsá cabá ndëma ora, chabe espiritñe cha tojána chë ndoñe tšabe entšanga imonjamnëngbe espiritënga utámenënga imojamnoye, chëngbiana castigo tojtsemnëntscuana; y cha tojanayënjanama chënga tojanabuayená. <sup>20</sup> Quem espiritënga bayté entsemna, Bëngbe Bëtsábioye ndoñe monjánëyeunana, Noebe yojëftsiyena ora, chë bacna soyënga amënga chca amama chamotsajbanama y tšabe benache chámuatishachama Bëngbe Bëtsá bën yojanobátmana ora, barquësha canduapormantscuana. Chentšana chë barquëshañe báseftanga tmojanotsbocá, posufta entšanga, búyeshe juatsbuacá chë barquësha yojtsámnyeca. <sup>21</sup> Chë

chënga chamótsbocama tojanëjabuache béjaye, enjamna mo chë mora jenábayama buyeshcá, chca, atsebácanënga bënga chamotsemnana. Pero tmojenábaye ora, bënga atsebácanënga jtsemnana, ndoñe chë cuerpentša tsengá tmojtsenóbolimpiama, ndayá bëngbe ainaniñe ndocna bacna juabnënga ntsebomnana Bëngbe Bëtsá tmojtseimpadánama; y bënga atsebácanënga mondmëna, Jesucristo cháuatayenama Bëngbe Bëtsá tojánmayeca. <sup>22</sup> Cristo celoye tojtantsjuá y Bëngbe Bëtsabe catsbioica yomna jamándama. Cha endmëna chë amëndayá angelëngbiana y espíritënga mando y obenana bomnëngbiana.

## 4

*Entsanga entsamna jtsiyenana ntšamo Bëngbe Bëtsá yo-bošcá*

<sup>1</sup> Chcasna, ntšamo Cristo tojansufricá, chabe cuerpiñe mo entšacá játssetšenëse, tšëngaftágnaca cmontsamna jtseprontánana chca jasúfriama. Er chë Crístbeñe ošbuachiyá nda chabe cuerpiñe tojasufrí, chë bacna soyënga amentšana tojtsojuánañe, <sup>2</sup> chca, chabe vidiñe, morscana y jobanëntscuana, jëftsiyenama ntšamo Bëngbe Bëtsá yobošcá, y ndoñe nÿe entšangbe bacna juabnëngaca, nÿe quem luarentše tšabá jëftsemnana. <sup>3</sup> Tempo, bayté enjamna, ndayëntscuana tšëngaftanga šmonjánama soyënga, mo chë Bëngbe Bëtsábioye nduabuátmënga mondbetsamcá; nÿa ndoñe más. Chë tempo, tšëngaftanga šmonjaniyena nÿetsca bacna soyënga jtsamëse, jenomándama ntšobencá; tšëngaftanga šmonjánama soyënga nÿe ntšamo šmojanbošcá, nÿe tšëngaftanga tšabá jtsomñama; šmonjanamana jotmenangana y ba fiestënga jtsebomnana, y chora chë ófjanënga tša jtsetmoyana y tša jtseyoyana, y ba uabouana soyënga šmonjanamana jtsamana chë diosënga yojamna ca šmojanjuabná soyënga jadórama. <sup>4</sup> Morna, chë Bëngbe Bëtsábioye nduabuátmënga montsenjananá, tšëngaftanga ya ndoñe más bacna soyënga jtsamëse šmojtsiyenama, ntšamo tempo šmonjaniyena, ntšamo chënga jtsamëse mondoyena, jenomándama ntšobencá; y chë causa, chënga bacna soyënga tšëngaftangbiana jtsóyebuambnayana. <sup>5</sup> Pero chënga echanjótocaye jayanama ndáyeca chca tmojamama, chë entšangbiana, chë ainënga y chë ya mochjóbanëngbiana, ntšamo tmojamama, aíñe o ndoñe tšabá bëtsemnana jayanama entseprontanabe delante. <sup>6</sup> Chíyeca, Crístbeñe ošbuáchiyënga, chë mora obanënga imojtsemnënga, ainënga monjamna ora, ínÿenga chë tšabe noticiëngama chëngbioye monjanabuayiyná, chënga chamobenama chë



nÿetsca tescama yomna tšabe vida chëngbe espíroftaca jtsebomnama, ntšamo Bëngbe Bëtsá yobomncá; masque mora quem luarentše, chëngbe cuerpo tojóbana, er Bëngbe Bëtsá tojayana nÿetsca entsanga yojtsamna jóbanama ca.

<sup>7</sup> Ndoñe bayté y nÿetsca soyënga echanjopochóca. Chíyeca, tšëngaftanga cmontsamna botamana jtsejuabnayana y jenomándama jtso benana, Bëngbe Bëtsáftaca jencuéntama chašmotsobenama. <sup>8</sup> Nÿetsca soyëngama, masna, sempre nÿetscanga puerte šmochtsenbobonshana, er nda ínÿenga puerte tojtsababuanÿeshaná, sempre jtseprontánana ínÿenga jáperdonama, chëngbiana bacna soyënga tmojamama. <sup>9</sup> Nÿetscanga šmochtsamana tšëngaftangbe yebniñe jenofjana, chca jamama totcá yojtsemna ntjatichamcá. <sup>10</sup> Nÿetsca tšëngaftanga Bëngbe Bëtsá tmojatšatá obenana tšabe soyënga jamama; chca, chë obenánaca cmontsamna jtsamana soyënga chë ínÿengbe tšabiana, chë Bëngbe Bëtsá cmojatšatá nÿets obenánaca ínÿengbioye jujabuáchama, nÿets tempo tšabe soyënga jtsamëse. <sup>11</sup> Nda tojtsabuayiyná, Bëngbe Bëtsabe palabra chaotsabuayiyná mo Bëngbe Bëtsá chabijana cuaftsoyebuambnacá; nda ínÿenga tojtsaserverna, chca chaotsama chë Bëngbe Bëtsá yojtsama cha chaotsebomnama obenánaca. Nÿetsca soyënga ntšamo šmojtsamcá chaotsinÿanÿná Bëngbe Bëtsá puerte uamaná y obená bëtsemnama, Jesucrístbeyeca. Chca šmochtsama, er Bëngbe Bëtsá puerte uamaná endmëna y obenana endbomna nÿets tempo y nÿetsca tescama. Chca chaotsemna.

*Puerte tšabá endmëna, Crístbeñe tcošbuáchema, jasúfriama tbojtsemnëse*

<sup>12</sup> Atšbe bonshana entsanga, ndoñe šmattsenjnanaye padecena soyënguiñe šmojtsesufrínama; chiñe jtsinÿnana ntsachetšá ošbuáchiyana šmobomnama. Chca ora ndoñe šmattsejuabnaye, tšëngaftanga ndoñe cmondamna chca soyiñe jtsachnëjuanana ca; <sup>13</sup> chamna, šmochjóyejuaye chë ntšamo Cristo tojansufricá šmojtsesufrina ora, chca, Cristo corente obenánaca y uamanacá entsángbeñe chaojtonÿná te, tšëngaftanga puerte chašmotsóyejuama. <sup>14</sup> Puerte šmochtsóyejuaye, nderado nda tcmojoyánguango Crístbiana bëtso servernayeca, er Bëngbe Bëtsabe Espíritu, chë corente bëtsá endmëná, sempre tšëngaftangbe ainaniñe iuétsemna. <sup>15</sup> Tšëngaftanguentše ndocná chabondëtsemna jasúfriama inÿa óbanaye causa, atbëbanama, bacna soyënga ínÿengbiana amama, o ínÿengbe soyënguiñe ontremeténama. <sup>16</sup> Pero Crístbe ustoná tomnama tojasufrí, chama ndoñe chaondëtsëuatja; chamna, Bëngbe Bëtsábioye chabotsatschuaná, cha Crístbe ustoná bëtsemnama.

<sup>17</sup> Er chë tempo ya tojobuache, Bëngbe Bëtsá jayanama, cach Crístbeñe ošbuáchiyëngbiamá, chabe entsangbiamá, tšabá o ndoñe tšabá tmonjamama. Cha chca bëngbiamá jayanama tojontsese, chë chabe palabra ndobedecenëngaftaca yochjanopasacá puerte uabouana echántsemna, cha chëngbiamá chca chaojayana ora. <sup>18</sup> Y chca, chë Bëngbe Bëtsabe bominyiñe tšabá amabiamá ndoñe paselo atsbočaná jtsemnama tontsemnëse, ¿ntšamo yochjopása chë Bëngbe Bëtsábioye ndoñe adórayënga y chë bacna soye amëngaftaca? <sup>19</sup> Chcasna, chë imosufrínëngaftaca Bëngbe Bëtsá chca yobóseyeca, entsamna chë tšabe soyënga jtsamana y Bëngbe Bëtsabe cucuatšiñe chëngbe espíritu chamoboshjona cha chaotsinýenama, er cha chënga tojánabiamá, y nyetsca soyënguiñe tšabe palabra bomná cha endmëna.

## 5

### *Crístbeñe ošbuáchiyënga jábuayenama*

<sup>1</sup> Y mora, chë tšëngaftangbentše ošbuachiyëngcá ene-  
fjuanëngbeñe bëtsëjemëngcá amëndayënga chanjabuayená,  
atše cach tšëngaftangcá bëtsëjema, canýa ntšamo Cristo  
tonjansufricá tonjaninyá y chama ínýenga tonjanëyana,  
y canýa ndábioye cach tšëngaftangcá Bëngbe Bëtsá  
bochjábema más uámana y bëtsá, Cristo entsángbeñe  
chaojtonýná ora; tšëngaftanga cbabuayená. <sup>2</sup> Ošbuáchiyënga  
šmochtsanýena; chënga chašotsanýenama Bëngbe Bëtsá chca  
tcmojábiamá. Chca, chentša ošbuachiyëngbeñe šmochtsama  
ntšamo canýe tšabe abujënyá chabe oveshëngaftaca  
endbetsamcá. Bëngbe Bëtsabe trabajo ndoñe šmattsama, nýe  
cmojtsëtocanama, ndayá chca jamama šmojtsebóseyeca.  
Chca ndoñe šmatjama nýe paselo crocénana juacánama,  
ndayá ínýengbíoje jujabuáchama tša šmobóseyeca. <sup>3</sup> Chë  
cmojtsamna jtsanýenama ošbuáchiyënga ndoñe nýe bëtscá  
šmattsamëndaye, mo chëngbe nduiñënga cuafjatsmëngcá,  
ndayá ntšamo tšëngaftanga šmojtsiyenama, chënga  
šmochjínýanýiye ntšamo yojtsamna jtsiyenana. <sup>4</sup> Chca,  
chë bënga nyetscanga, mo chë tšabe abujënyácá šuanýená,  
quem luaroye yochjésabo ora, mo canýe uabuashinýinýana  
coronësha ndocna te tontsandbemëshacá, tšëngaftanga canýe  
bëts uacanana soye šmochanjóyëngacñe, y chë soye endmëna  
nyetsca tescama; Bëngbe Bëtsá uámanënga y bëtsëtsanga  
cmochanjábiamá, cháftaca nyets tempo oyejuayënga jtsemnëse.

<sup>5</sup> Cachcá, tšëngaftanga chë bobontsëngnaca cbabuayená,  
sempre šmochtsejuabnaye chë bëtsëjemënga tšëngaftangbe  
amëndayënga imomnama, y chca šmochtsama. Cada ona  
tšëngaftanguentsá bontsemna jtsejuabnayana chë ínýenga

tšëngaftangbiamá más uámanënga cuaftsemncá, ínÿengbioye šmojtsaserverna ora; er ntšamo Bëngbe Bëtsabe uabemana palabrenguiñe endayanácá:

Bëngbe Bëtsá chë nÿe cachënga uámanënga tmojtsenobi-  
annangbe contra entsemna,  
y chë ndoñe uámanënga montsenobiamnangbiamna, Bëngbe  
Bëtsá más tšabe juabna entsebomna ca.

<sup>6</sup> Sempre šmochtsejuabnaye Bëngbe Bëtsá chë más bëtsá nÿetscangbiamá yomnama, y nÿets mando y obenana bomná yomnama, y chabe delante ndoñe uámanënga šmattsenobiamnaye, cha más uámanënga chácmbiamama, chama chë tempo chaojobuache ora. <sup>7</sup> Nÿetsca soyënga ndayama šmuenócochinÿenama Bëngbe Bëtsabe cucuatšinë šmochjáboshjona, er cha tšëngaftanga yejuana cmondánÿena.

<sup>8</sup> Cach tšëngaftanga jenomándama chašmotsobena y sempre šmochtseprontana, er tšëngaftangbe uayayá Satanás, mo canÿe león tojtsejató, nda jtsósañama tojtsana orcá, chë diablo, sempre jtsebošana jamama, tšëngaftanga Jesucristbeñe ošbuáchiyana chašmotsajbanama. <sup>9</sup> Puerte šmochtomorócha, Jesucristbeñe bëtscá jtsošbuáchiÿese, chë uayayá tondaye chaondobená tšëngaftangaftaca jamama, cach tšëngaftangcá Jesucristbeñe ošbuáchiÿënga nÿets luarënguenache cachcá jasúfriama yojtsamnama jtsetatšëmbëse. <sup>10</sup> Pero tšëngaftanga baseftayté chašmojasufrí chentšana, Bëngbe Bëtsá cmochanjábiamá nÿetsca soyënguiñe puerte tšábënga, puerte chašmotsemorochama, bëtscá ošbuáchiyana y bonshánana bomnënga jtsemnëse, y ainaniñe corente añemo bomnënga chašmotsemnama; Bëngbe Bëtsá, chë bëngbiamá tšabe juabna bomná, bënga nÿetsca tšabe soyënga šonjatšatá, y nda bënga šojáchembo nÿetsca tescama bëtsetsanga jtsemnama, chca echanjama. <sup>11</sup> Cha nÿets obenana nÿets tempo y nÿetsca tescama chaotsebomna. Chca chaotsemna.

### *Jtadiósoftanama*

<sup>12</sup> Silvano, ndabiamá sëndëjuabná atšbiamá canÿe tšabe palabra bomná Jesucristbeyeca catšata yomnama, cháftaca quem base tsbuanácha tcbonjubuábiamá. Atše sëntseboše tšëngaftanga añemo jatšatayana y jáuyanana, ndegombre ntšamo tcbonjubuabiamcá yojtsoyebuambná ntšamo Bëngbe Bëtsá tšabe bendicionënga cmatšatnama. Chíyeca, siempre šmochjëftsiyena jtsamëse ntšamo chabe tšabe juabna tšëngaftangbiamá yomncá.

<sup>13</sup> Ošbuáchiÿënga muentše átšeftaca montsemnënga cmontsacheuaná. Chënga quem bëtš pueblentše mondoyena bacá uamana entšangaftaca, mo chë tempo, Babilonia bëtš pueblota imojoyena entšangcá, pero Bëngbe Bëtsá muentša

ošbuáchiyënga tojabacacá cach tšëngaftangbioycá. Marcos, chë atšbiamá mo uaquiñacá endmëná, chánaca cmontsacheuaná.  
14 Nÿetscanga Jesucristbeyeca catšatangcá šmochjenchuaye, jtenámochëse tša šmojtsenbobonshánama.

Atše, Bëngbe Bëtsá sëntseimpadana cha chaoma tšëngaftanga chë Jesucristoftaca cánÿiñe mo canÿacá šmomnënga, nÿetscanga ainaniñe tšabe ebionana chašmotsebomnama.

## 2 San Pedro

### *Jacheuayama*

<sup>1</sup> Atše Simón Pedro, Jesucristbe oservená y chabe ichmoná, quem tsbuanácha sentsabiamná tšëngaftangbiamá, ndëmuanÿenga šmojashjache jtsebomnama canÿe ošbuáchiyana Jesucristbeñe, cach bëngbe ošbuachiyancá uámanana, er Bëngbe Bëtsá y Atsebacayá Jesucristo, jtsebošana ndánaca y nÿetscanga chábeñe chamotsošbuáchema.

<sup>2</sup> Atše sëntseimpadana, tšëngaftanga Bëngbe Bëtsabiamá y Bëngbe Utabná Jesusbiamá cada te más jtsetatšëmbëse, Bëngbe Bëtsá chaoma tšabe bendicionënga tšëngaftangbeñe chaotsemnama y chaoma tšëngaftanga ainaniñe tšabe ebionana chašmotsebomnama.

### *Chë Jesucristbeñe ošbuáchiÿëngbe tšabe soyënga*

<sup>3</sup> Bëngbe Bëtsá chabe obenánaca tojama bënga chamobená jtsebomnama, lempe ntšamo tmojtsëjabotcá tšabe vida jtsebomnama y jtšiyenama, Bëngbe Bëtsá jadórama soyënga jtšamëse. Cha chca tojama bënga chábioye chamotsábuatmama tojanma ora. Cha bënga šojáchembo, cachá obená y uamaná bëtsemnama y bëtš soyënga jamëse, chabe entšanga chamotsemnama. <sup>4</sup> Chca, Bëngbe Bëtsá šojatšatá ntšamo bënga jatšatayama tojanašebuachenacá, bëtš y uámana soyënga, chca, quem luarentša bacna soyënguentsána chašmotsojuánañama. Chë bacna soyënga quem luarentše jtsebínÿnana, entšanga nÿe cachëngbe bacna juabnëngaca jtšiyenama yapa boše causa. Chánaca chë tšabe soyënga šojatšatá, tšëngaftanga cháftaca cánÿiñe mo canÿacá chašmotsemnama, cachacá jtsemnama jashjáchëse. <sup>5</sup> Chca, ndoñe quenátsmëna nÿe Jesucristbeñe ošbuáchiyana jtsebomnana; chiñe šmochjenobuáshjache, bëtscá tšabe soyënga jtšamëse; chora bëtscá šmochtsama Bëngbe Bëtsabe soyëngama chacmotsësertánama; <sup>6</sup> chora bëtscá šmochtsama cach tšëngaftanga jenomándama chašmotsobenama; y chca, tšëngaftanga masque padecena soyënguiñe chašmojtsachnëjuana, ainaniñe puerte añemo jtsebomnëse, puerte uantadënga chašmotsemnama; y chentšana bëtscá šmochtsama, tšëngaftanga Bëngbe Bëtsá šmojtsadoránama jinÿanÿiyama; y <sup>7</sup> chca, nÿetsca tšëngaftanga ošbuáchiÿënga chašmotsenbobonshana; y chca, nÿetsca entšanga chašmotsababuánÿeshana.

<sup>8</sup> Tšëngaftanga lempe chë soyënga šmojtsebomna, y bëtscá chca šmojtsamëse, šmochantsiyena becá oservena soyënga

jtsamëse, y chentšana puerta tšabe soyënga echantsóbocana, corente tšabá Bëngbe Utabná Jesucristo chašmotsábuatmama. <sup>9</sup> Pero nda quem soyënga ndoñe tontsama, Bëngbe Bëtsabe soyëngama ndoñe ntsosertánana; y chca, cha mo canye jtaná o nduabinynacá jtsemnana; cha tbojtsebnatjëmbe Bëngbe Bëtsá chabe tempsca bacna soyënga tbojtsebojuánama, y Bëngbe Bëtsabe delante cachiñe tšabá chaotsatsmënama tojamama. <sup>10</sup> Chíyeca, Jesucristbeyeca atšbe catšátanga, nya šmochtsentsëna chca tšabe soyënga jtsamama, y chca, corente tšabá šmochanjátatsëmbona, Bëngbe Bëtsá chabe entšanga chašmotsemnana tcmojáchembuama y tcmojábacacama; y chca jtsamëse, Jesucristbeñe ošbuáchiyana ndocna te quešmochatajbaná. <sup>11</sup> Chca, Bëngbe Bëtsá oyejuayá tšëngaftangbiama echanjama, Bëngbe Utabná y Atsebacayá Jesucristbe amëndayoye jamashënguama ndegombre chašmobenama.

<sup>12</sup> Chcáyecna, atše sëntsejuabná tšëngaftangbioye sempre chë soyëngama jtsabuayiynayana, masque chë soyëngama ya šmotátšëmbo, y tša šmojtsošbuaché Bëngbe Bëtsabe ndegombre soyënguiñe y chca šmojtsiyena, chë mora šmojtsetátšëmbo soyënguiñe. <sup>13</sup> Sëntsejuabná, chajjéftsainëntscuana tšabá yojtsemna jamana, ainaniñe bëtscá añemo chašmotsebomnana chë soyënga jtsamama, ntšamo tijayancá jtsabuayiynayëse. <sup>14</sup> Atše sëntsetatšëmbo, ndoñe baytese y atšbe ainana Bëngbe Bëtsábioye yochtá, ntšamo Bëngbe Utabná Jesucristo šonjéftsanbuayenacá; <sup>15</sup> pero bëtscá chanjéftsema, atše chajjóbana chentšánënaca tšëngaftanga nyets tempo chë soyëngama chašmotsenójuabnama.

*Cristo corente uamaná y obená yojamnama tmojáninýe ora*

<sup>16</sup> Bëngbe Utabnabe obenanama y cha yochjésabama ntšamo tbonjanabuatambacá, ndoñe quenjatsmëna entšangbe osertánanaca pormana cuentëngaca, er cach bënga botamana fsënjáninýe chabe uámanana y obenana. <sup>17</sup> Bëngbe Bëtsá chë Taitá, Jesucristo puerta obenana bomná bëtsemnana y cha corente bëtscá y uamaná bëtsemnana tonjaninýinýe ora, bënga fsënjáninýe. Chca fsënjáninýe Bëngbe Bëtsá, chë puerta uámana y bëtscábocana oyebuambnayana Jesúsbioye mëntšá tbonjanianyana ora: “Mua atšbe bonshana Uaquiñá endmëna, atše chabiamana sëntsoyejuá ca.” <sup>18</sup> Cach bënga chë oyebuambnayana fsënjajuena, chë celocana tonjanóbocnana, er bënga Bëngbe Utabnáftaca fsënjannmëna, chë uámana tjoca.

<sup>19</sup> Chë sóyeca bënga fsëntsobena corente jtsetatšëmbuana, ntšamo chë Bëngbe Bëtsabe juabna oyebuambnayënga tmojanayancá ndegombre bëtsemnana, y tšëngaftanga

tšabá šmochántsama, ntšamo chënga tmojanayancá šmojtseyeunanëse. Chca, chëngbe palabrëngaca entsopodena Bëngbe Bëtsabe soyëngama tšëngaftanga jinÿanÿiyana, y echántsemna mo canÿe uajuinÿanësha canÿe ibetiñe luarentše tojtsebinÿnacá. Chë soyënga šmochtsuenana Jesucristo yochjésabëntscuana; chora, cha nÿetsca soyënga cmochanjinÿanÿiye, mo tšëngaftangbiana canÿe tsëm te cuafjabinÿncá, y chë jabinÿnama ora bínÿnaye estrella tojábozna tšëngaftanga jabuabinÿnamcá. <sup>20</sup> Pero natsana chacmësertá, ndocna palabra Bëngbe Bëtsabe uabemana palabrënguiñe tojayana canÿe soye yochjopása ca, cabá chca ndopása ora, nÿe cach Bëngbe Bëtsabe juabna oyebuambnayëngbe juabnentsana tojanóbocnama; <sup>21</sup> er Bëngbe Bëtsabe juabna oyebuambnayënga ndoñe monjanoyebuambná nÿe chënga chca jamama innabóseyeca, ndayá Bëngbe Bëtsabe cuenta tmojanoyebuambá, chë Uámana Espíritu chënga chca chamóyebuambama tojánmayeca.

## 2

*Chë ndoñe ndegombre soyënga buátëmbayënga  
(Jud 4-13)*

<sup>1</sup> Chë Bëngbe Bëtsabe juabna oyebuambnayëngbe tempo, Israeloca entsángbeñe baseftágnaca imojamna, ndëmuanÿenga imojichamo chënga ndegombre chca juabna oyebuambnayënga imojamna ca, pero ndegombre ndoñe chcanga imonjamna; cachcá, tšëngaftangbeñe abuátambayënga mochántsemna, y chënga ndoñe ndegombre soyënga mochántsabuatambaye, pero ndegombre soyëngaca cánÿiñe, chca, chënga chca imojtsabuátambama entsanga ndoñe chamondëtatšëmbonama. Chë buatëmbana soyënga echanjama, entsanga ndoñe ndegombre soyënga y bacna soyënga chamotsamama. Ntšamo chënga mochántsama y mochántsabuatambaye soyëngaca, mochántsama Jesucristo ndoñe chëngbe Utabná chaondëtsemnama, cha nda chënga tojatsebacá, mo nda ínÿenga játsebacama crocénana cuafjëtsajocá. Y chca, nÿe ndeolpe, chë Bëngbe Bëtsábicana uabouana castigo nÿetsca tescama mochántsebonna. <sup>2</sup> Banga chëngbiöye mochantsësetona, nÿetscna bacna soye, jenomándama ntsoencá jtsamëse; y chëngbe causa, ínÿenga ndoñe tšabá quemochátoyebuambnaye chë tšabe benachama, chë ndegombre soyëngaca benache jtishachama. <sup>3</sup> Chënga bëtscá crocénana jtsebonnama yapa mochántseboše causa, ba bostero soyëngaca cmochántsaingñaye; pero Bëngbe Bëtsá tempo chëngbiana tojánayana, ndoñe tšabá imojtsamama y chëngbiana castigo nÿetsca tescama chaotsemnámna.

<sup>4</sup> Běngbe Bětsá chě bacna soyěnga tmojanma angelěngbioye ndoñe tonjanaperdoná, ndayá infiernoye tojtsanatsatše y puerte ibetiñe tojtsanabáshejuana, chě uabouana tboca chamoquedama, Běngbe Bětsá chěngbiamá n̄yetsca tescama castigo chamotsebomnama yochjayana orscama. <sup>5</sup> Y cach ndoñe quem luarentša entšángbioye tonjanaperdoná Noé yojětsiyena ora, y chěnga jácastigama aĩne tojanma chě uabouana uaftena chěngbeñe chaotsemnama, chě nduauenana y bacna entšanga jtsapochócama. Chentšana, n̄ye Noébioye, tbojanatsbocá, nda entšanga yojanabuayiyná ntšamo jtsiyenana, Běngbe Bětsabe bominjĩne tšabá yomncá jtsaměse; cha y in̄ye can̄yšěftangnaca tojanatsebacá. <sup>6</sup> Bayté entsemna, Běngbe Bětsánaca tojánayana chě Sodoma y Gomorra běts pueblentša entšanga, yapa bacna entšanga imojamnama, běts castigo jtsebomnama yojánamnama; y iñesheca tojtsanapochocá, chě pueblěnga y chentša entšanga jatinyá jtsabiaměntscuana. Y chě sóyeca Běngbe Bětsá tojanin̄yan̄yě ntšamo bacna entšangaftaca yochjama, chě chentšana mochtsiyena bacna entšangbiamá. <sup>7</sup> Pero Běngbe Bětsá Lótbioye tbojanatsbocá, chě běts pueblěnga pochócayentšana. Cha yojamna Běngbe Bětsabe bominjĩne tšabá amá, y ntšamo chě luarentša entšanga imojaniyenama, n̄yetsca bacna soye jtsaměse, jenomándama ntšobencá, cha puerte ngmėnana inabomna. <sup>8</sup> Er quem tšabe entšá, chěngbeñe oyená, chě entšanga imojtsama bacna soyěnga cada te yojanon̄yaye y yojanuenana ora, puerte chabe tšabe ainaniñe inasufrina.

<sup>9</sup> Chca, Běngbe Utabná endobena chě Běngbe Bětsábioye adórayěnga játsebacana padecena soyěnguentšana y bacna soyěnga jamama juabněnguentšana, y chě bacna soyěnga jamama uamaněngna castigáněnga jtsabamnama, chě ntšamo chěnga imojaniyeněntscuana imojanamcá ndoñe tšabá yonjamna ca Běngbe Bětsá yochjayana tescama, y chěnga n̄yetsca tescama chě běts castigo chamotsebomnama jamándama. <sup>10</sup> Chca ndegombre endmėna, y más chě ndėmuan̄yěnga n̄ye cachěngbe cuerpěngama bacna juabněngaca jtsaměse imoyeněngbiamá, chěnga chě Běngbe Utabnabe mando jtsabotėnana. Chěnga bacá buátsenaněnga mondmėna y jtsebošana n̄ye ntšamo cachěnga tmojtsejuabnacá chaotsemnama, y ndoñe ntsauatjana chě espíritěnga obenana bomněngbiamá puerte bacna soyěnga jtsóyebuambnayama. <sup>11</sup> Chamna chě angelěnga, masque más añemo y obenana bomněnga mondmėna, ndoñe jen̄iėmuana chě espíritěnga obenana bomněngbiamá chca jayanama, chěngbiamá ndoñe tšabe soyěnga jtsóyebuambnayěse, Běngbe



Utabnabe delante.

<sup>12</sup> Pero chë buátëmbayënga, chë cachënga ndoñe tontsésertana soyëngama puerte bacá jtsóyebuambnayana, y chca, chënga mondmëna mo tja bayëngcá, soyënga tšabá josértama juabna ndbomnënga; chënga jtsiyenana nÿe ntšamo tojtsebiona y tmojtsebošcá, y chënga jónÿnana, chámuashebuayama y chamëbáyama. Chë buátëmbayënga mo chë bayëngcá mochántsapochocaye. <sup>13</sup> Chënga mochanjasúfria, ínÿenga chamosufrima tmojama causa. Chëngbe oyejuayana endmëna nÿe chora chënga tšabá jtsemnana soyënga. Tšëngaftangftaca cánÿiñe mo ošbuachiyëngcá tmojtšesá ora, tšëngaftangbiama ouatjcá jtsemnana y chëngbe causa, ínÿenga tšëngaftangbiama podesca mochántsihamo, er chënga chentše oyejuayënga jtsemnana, nÿe chënga tšabá jtsemnana jtsamëse; y chënga tšëngaftangbeñe jtsemnana, tšëngaftangbioye jtsaíngñase.

<sup>14</sup> Chënga ndoñe ntsoberenana canÿe shembása jinÿana, cháftaca bacna soye jamama ntsebošcá, y sempre jtsenguayana ntšamo bacna soye jamama. Chënga chë Jesucristbeñe nÿe batsá ošbuáchiyana bomnënga jtsaíngñayana, y siempre jtsentšénana nÿe más soyënga jésebošama y jésebomnama, ínÿenga tmobomnama más soyënga jashjáchama; chënga montsemna pochocánënga jtsemnana. <sup>15</sup> Chënga chë tšabe benachentšana tmojtsojuánañe, y mora mo otšenëngcá montsemna. Chca chënga imojtsiyena jtsamëse, mo chë Bëngbe Bëtsabe juabna oyebuambnayá Balaamcá, cha ndoñe tšabá tonjanma orcá; Balaam Beorbe uaquiñá. Cha yapa inaboše bëtscá crocénana juácánama ínÿengbiama bacna soyënga jtsamëse; <sup>16</sup> y Bëngbe Bëtsá, chábioye chabe bacna soyëngama tbojanácacana, cachabe asno chábioye chabuatsëtsama jamëse; y chca, ndoñe tbonjanlesenciá jama chë ndocna juábnaca soye jamama.

<sup>17</sup> Entšanga jtsobátmanana chënga bëtscá tšabe soyënga chamotsamama, pero chë tmojtsama soyënga tondayama ntsošervénana, y chca, chënga jtsemnana mo búyeshe obocantše tojtsebuashjcá; y chënga mora canÿe soye jtsejuabnayana y chentšana inÿetšá; chca chënga jtsemnana mo jantšetëshënga bëts bínÿiaca bonjnëshëngcá. Chëngbiama Bëngbe Bëtsá tojayana castigo chamotsebomnama, chë más ibetoca, tondaye binÿniñe luarentše. <sup>18</sup> Chënga ba botamana palabrëngaca jtsenábotamnayana, pero tondayama ntsošervénana; y chë cabá mora Jesucristbeñe tmojtsošbuachëngbiyoye jtsaíngñayana, chënga ntšamo chëngbe enutënga Bëngbe Bëtsábioye nduabuátmënga imoyencá jtsiyenama imojtsajbananga. Chë buátëmbayënga chë

soye jtsamana, chëngbioye jáyëñjanase, nÿe cachënga tšabá jtsomñama bacna juabnëngaca soyënga chamotsamama, cachënga jenomándama ntšobencá. <sup>19</sup> Chë abuatambayënga jašebuachenana tšabe vida jónÿenama, nÿe ntšamo chënga tmojtsebošcá jtsejuabnayëse y jtsamëse; pero cachënga mondoyena cachëngbe bacna juabnëngaca mandánënga, y chca, chënga montsajna pochocánënga jtsemnama, er ndaye entšánaca mandaná jtsemnana, chë nÿets tempo tobedecena sóyeca. <sup>20</sup> Er ndëmuanÿenga, Bëngbe Utabná y Atsebacayá Jesucristo tmojtsábuatmama, tmojtsajbaná oyenana mo chë nÿe quem luarama enójuabnaye entšangcá, nÿetsca bacna soye amana y tša bacna juabnënga ainaniñe bomnana, pero mora cachiñe chë soyënguiñe tmojtésajna, y cachiñe mandánënga tmojtsemna chë bacna juabnëngaca, chënga mora más bacá tempscama jabocanana. <sup>21</sup> Chëngbiana más tšabá manjamna ndoñe ntjobenayana jtsetatšëmbuana ntšamo Bëngbe Bëtsabe bominÿiñe tšabá yomncá inétsamama, chë soye jatabuátmanana y chentšana játajbanana chë buatëmbana soyënga y chë abuayiynayëngaftaca chëngbioye Bëngbe Bëtsá tojanoyé mandënga jtsobedecénana. <sup>22</sup> Pero chëngaftaca tojopasá ntšamo entšanga mondëntšayancá chca ndegombre bëtsemnama: “Chë queše chabe ashconánana tojtsemnoye jesshéconana ca” y “chë cotše cabá chora bebená, ngüichetšoye jana jetsójananduouoyama ca”.

### 3

#### *Jesucristo quem luaroye jésabama ora*

<sup>1</sup> Jesucristbeyeca atšbe bonshana catšátanga, móraca ya uta soyama cbontsëbuabiamná. Quem uta tsbuanáchaca atše sënjábosëna jamama tšëngaftangbe juabna nÿe ena tšabe soyëngaca chaotsemnama, y chca chaotsemnamna atše jtsabuayiynayëse chë tcmojanabuatambá soyëngama. <sup>2</sup> Atše sëntseboše tšëngaftanga chašmotsenajuabná, ntšamo chë inÿe tempënga ora, chë nÿe Bëngbe Bëtsábioye jtsoservënëse, chabe juabna oyebuambnayënga tmojánayanama, y chë Bëngbe Utabná y Atsebacayabe buatëmbana soyëngama y mandëngama, ndayá chabe ichmónëngaftaca tšëngaftanga šmojanóyëngacñe.

<sup>3</sup> Pero masna quem soye chacmotsësertana: Jesucristo quem luaroye jésabama tempo chaojtsobeco ora, mochántsemna entšanga y chënga mochantsiyena nÿe cachënga tšabá jtsomñama bacna juabnëngaca, y cmochantsëbuayajuana, chë Cristo yochjésabama šmošbuáchema. <sup>4</sup> Chënga mëntsá mochántsi chamo: “Cristo tcmojanašebuachená quem luaroye jésabama. ¿Ndegombre

chca? Chcase, ¿ndayentše cha yojtsemna? Bëngbe bëtsétsanga, ndëmuanyëngbiöye cha tojanašebuachená quem luaroye jésabama, ya tmonjóbana, y quem luarentše lempe cachcá endesomñe, ntšamo quem luare tojanobojatšé orscana enjamncá ca.”<sup>5</sup> Chë entsanga ndoñe ntsebošana jtsejuabnayana ya bayté yojtsemna, Bëngbe Bëtsá tojanmandá y chca tojanma celoca y quem luare chaotsemnana. Cha quem luare tojanma býeshentšana y býesheca;<sup>6</sup> y cach býeshecnaca, chë uabouana uaftenentša béjayeca, ya bayté yojtsemna, cha lempe quem luarentše yojanbinýncá tojtsanpochocá.<sup>7</sup> Pero chë mora entsemna celoca y quem luare, cach Bëngbe Bëtsabe mándoca, ndoñe quenátopodena chamotsepochocama, chë Bëngbe Bëtsá jayanama chábioye ndoñe mondadoránënga ntšamo tmojamcá ndoñe tšabá yonjamnana, y chë bacna soyënga tmojamama nyetsca tescama castigo chamotsebomnana jamándama tempo candóshjanguëntscuana. Chora Bëngbe Bëtsá, celoca y quem luare ñesheca echantsepochóca.

<sup>8</sup> Pero, atšbe bonshánënga, canye soye endmëna y chë soye ndoñe chacmondébnëtjomba: Bëngbe Utabnabe juabnama, canye te endmëna mo canye uaranga uatcá, y canye uaranga uata mo canye tecá.<sup>9</sup> Ndoñe quenátsmëna, ntšamo báseftanga jtsejuabnayana, ntšamo tojašebuachenacá cha ndoñe betscó yochanjama ca, chë cha quem luaroye jésabama, ndayá chana puerte uantado tšëngaftangaftaca comna; er cha jtsebošana ndocná nyetsca tescama castigo chaondëtsebomnana, ndayá nyetscanga bacna soyënga amana jtsajbanase, Bëngbe Bëtsabe tšabe benache chamuashjáchama.

<sup>10</sup> Pero Bëngbe Utabná echanjésabo ndocná chama chaondëtsejuabná ora, mo canye atbëbanacá jashjanguana, ndocná chama tontsejuabná ora. Chora celoca echanjopochóca, canye jabuache shauenanáncá, y quem luare ndaye soyënguentsana yomnana ñesheca echántsefjatëjo, y ndayá Bëngbe Bëtsá y entsanga quem luarentše tmojamcá, lempe echántsejuinýe.

<sup>11</sup> Lempe chca japochócama entsémnayeca, ndegombre tšëngaftanga cmontsamna jtsiyenana ntšamo chë Bëngbe Bëtsabe entsanga jtsiyenana entsamncá, y nyets tempo jtsamëse chë Bëngbe Bëtsábioye jtsatschuanayama yomna soyënga,<sup>12</sup> tšëngaftanga chë Jesucristo quem luaroye jésabama chaóshjanguama šmojtsobátmanëntscuana; y nýa šmochtsentšena cha más betscó cháuesabama. Chë te ñesheca celoca echántsejuinýe, y ndaye soyënguentsana quem luare yomnana cach ñesheca echántsefjatëjo.<sup>13</sup> Pero bënga mondobátmana ntšamo cha šojašebuachenacá: canye tsëm

luare, mo canje tsëm celoca y tsëm fshantscá, y chentše nyetscanga mochantsiyena ntšamo Bëngbe Bëtsabe bominiñe tšabá yomncá jtsamëse.

<sup>14</sup> Chiyeca, atšbe bonshánënga, chë soyënga chaotsemnama šmojtsobatmanëntscuana, nya chiñe šmochtsentsena, chca, cha yochjésabo ora, chacmanýena oyeniñe tšabá Bëngbe Bëtsáftaca jtsatsmënëse, ínýengaftaca natjëmbana jtsiyenëse; chacmanýena ainaniñe ndocna bacna soye ndbomnënga, y puerte tšabá jtsamëse oyeniñe; chca, ndocná chaondobená jayanama tšëngaftanga ndaye bacna soye šmojama ca. <sup>15</sup> Quem soye šmochtsejuabnaye: Bëngbe Atsebacayá ndoñe yapa betscó tonjésabësna, chca jtsemnana cha puerte uantado nyetscángaftaca yómnyeca; chca cha yomna, ba entšanga chë bacna soyënga amana chámajbanama y chabe benache chámuatishachama y chca, atsebácanënga chamotsemnama. Cach quem soyëngámnaca, Jesucristbeyeca bëngbe bonshana catšata Pablo tcmónjanëbuábiamá, chë Bëngbe Bëtsá tojanma cha chaotsebomnana osertanáca. <sup>16</sup> Chë soyëngama, Pablo nyetsca chabe tsbuanáchangañe tonjanoyebuambá. Chëchangañe endmëna soyënga totcá josértama; y chë soyëngama, chë Bëngbe Bëtsabe soyëngama ndoñe tmonjuatsjínýënga, y chë mora canje soye jtsejuabnayana y chentšana ínýtšá juabnayënga, jtsejuabnayana y ínýengbioye jtsabuayinyayana ndoñe ndegombre yondmëna ca. Y cachcá jtsamana inye soyëngaca, Bëngbe Bëtsabe uabemana palabrénguiñe. Chca chënga montsajna pochocánënga jtsemnama.

<sup>17</sup> Chiyeca, atšbe bonshánënga, tšëngaftanga chë ya šmojtsetátšëmbo chë ndoñe ndegombre soyënga abuátambayënga mochtsemnama, yejuana šmochtsantješna; chca, chë Bëngbe Bëtsá ntšamo yomandacá ndobedecenëngbe soyëngaca ínýënga jáingñama, tšëngaftanga ndoñe chašmondëtsemna mo uambanëngcá, ndoñe chašmondëtsajbanama jtsebomnana chë Bëngbe Bëtsabe soyënga ntšamo šmojashjachcá. <sup>18</sup> Pero atšna, Bëngbe Utabná y Atsebacayá Jesucristo séntseimpadana, tšëngaftanga chašmotsiyena jtsamëse, chë chábentšana šmojóyëngacñe ba soyënga ntšamo tomnama jtsejuabnayëse, y chaoma tšëngaftanga cada te más tšabá cha chašmotsábuatmama. ¡Nyetscanga cha chamotsatschuaná, mora y nyetsca tescama! Chca chaotsemna.

# 1 San Juan

*Cristo, chë nyetsca tescama yomna tšabe vida entsanga chamotsebomnama amá*

<sup>1</sup> Bënga cbontsëbuabiamná chë Bëngbe Bëtsá ndabiajana inëtsoyebuambnabiamna, chë nyetsca tescama yomna tšabe vida entsanga chamotsebomnama iuamabiamna, chë Bëngbe Bëtsá cabá quem luare ndëma orscana ya yojamnabiamna. Bëngbe matscuašëngaca chabe oyeambuayana fsënjouena y bëngbe bomínýeca cha tonjama soyënga fsënjinyë. Aíñe bënga cha fsënjinyë y bëngbe cucuátšeca fsënjábojajo. <sup>2</sup> Cha bëngbentše tonjanonýná y fsënjáninyë; chíyeca bënga chabiamna cbontsëtsësná y cbontsabuayiná, nda sempre vida yobomna y nda chë nyetsca tescama yomna tšabe vida entsanga chamotsebomnama iuama. Chana, chë Taitá Bëngbe Bëtsáftaca inamna, pero mora bëngbioye šojinýanyë. <sup>3</sup> Bënga tšëngaftanga cbontsabuayiná ntšamo tifjinýe y tifjouencá, tšëngaftanga cánýiñe mo canýacá bëngaftaca chašmotsemnama. Bënga cánýiñe mo canýacá fsëndmëna chë Taitá Bëngbe Bëtsáftaca y chabe uaquiñá Jesucristoftaca. <sup>4</sup> Bënga quem soyënga tšëngaftanga cbontsëbuabiamná, bëngbe oyejuayana corente bëtscá chaotsemnama.

*Bëngbe Bëtsá endmëna chë entsangbiamna binýnayá*

<sup>5</sup> Mëntšá entsemna ntšamo Jesucristbentšana tifjouencá y chca tšëngaftanga cbontsabuayiná: Bëngbe Bëtsábeñe lempe binýniñe, lempe tšabá endmëna, y chábeñe tondaye ndoñe chca quenátsmëna. <sup>6</sup> Bënga tmojtsichamo cháftaca cánýiñe mo canýacá fsëntsemna ca, pero cabá ndoñe Bëngbe Bëtsabe cucuatšinyë, chë binýniñe tmontsemna, y chca, bacna soye juabnayënga y amënga tmojtsiyena, asna, bënga mojtsebostero y ndoñe montsama ntšamo ndegombre yomncá. <sup>7</sup> Pero bënga chë binýniñe tmojtsiyena, tšabe soye juabnayënga y amënga ntšamo Bëngbe Bëtsá iuamcá, as nyetscanga cánýiñe mo canýacá mochántsemna, y chabe uaquiñá Jesucristbe uabuáshanana buíñeca, Bëngbe Bëtsá bëngbe bacna soyënga sempre šochántsabuanayena, y echanjama bënga chabe delante tšabá chamotsatsmënama.

<sup>8</sup> Bënga bacna soyënga ndoñe queftsátbomna ca tmojtsichámëse, chca cabënga jtsenoíngñayana y ainaniñe chë ndegombre soyënga ndoñe tmonjójyëngacñe; <sup>9</sup> pero bënga ndegombre bacna soye amënga fsëndmëna ca, Bëngbe Bëtsá tmojauyanëse, cha bënga šochanjínýanyie cachá chë ntšamo šojiytsašëbuachecá amá y nyetsca

soyënguiñe tšabá amá yomnama; y chca, nyetsca bëngbe bacna soyënga šochanjáperdonaye y nyetsca bacna soyënga šochanjábuajuanaye. <sup>10</sup> Bënga tmojtsichamo, bacna soyënga ndoñe chibiatsma ca, chca bënga muattsichamo mo Bëngbe Bëtsá canye bostero cuaftsemncá, y ntšamo Bëngbe Bëtsá bënga šojauyancá ainaniñe ndoñe tmonjýöngacñe.

## 2

### *Cristo, bëngbe obuauyayá*

<sup>1</sup> Tšëngaftanga mo atšbe basengcá, er atše tcbonjanéjabuache Jesucristbe tšabe noticiënguiñe chašmotsošbuáchema, quem soyënga cbontsëbuabiamná bacna soyënga ndoñe chašmondëtsamama. Pero ndánaca Crístbeñe ošbuachiyënguentšá bacna soye tojamëse, bënga canye obuauyayá Bëngbe Bëtsabe delante montsebomna, y cha endmëna Jesucristo, chë nyetsca soyënguiñe tšabá amá. <sup>2</sup> Jesucristo tonjanóbana ndoñe nye Bëngbe Bëtsá bënga chásuaperdonama bëngbe bacna soyëngama, ndayá quem luarentša nyetsca entšágnaca chëngbe bacna soyëngama cháuaperdonama.

<sup>3</sup> Bënga ntšamo Bëngbe Bëtsá šojtsamëndacá tmojtsamëse, ndegombre mochántsetatsëmbo bënga cha imuábuatmama. <sup>4</sup> Pero nda tojayana: “Atše Bëngbe Bëtsá sënduábuatma ca”, pero ndoñe tontsama ntšamo Bëngbe Bëtsá ibuamëndacá, cha canye bostero jtsemnana y ainaniñe chë Bëngbe Bëtsabe ndegombre soyënga ndoñe tonjýöngacñe. <sup>5</sup> Pero nda ntšamo Bëngbe Bëtsá ibuamëndacá tojtsama, jtsinýanýnayana chabe ainaniñe Bëngbe Bëtsabiana corente bonshánana yomnama, y chca, mochántsetatsëmbo bënga sempre cánýiñe mo canýacá cháftaca imomnama. <sup>6</sup> Nda tojtsichamo Bëngbe Bëtsáftaca cánýiñe mo canýacá yojtsemna ca, bontsemna jtsiyenana soyënga jtsamëse ntšamo Jesucristo yojëftsiyencá.

### *Canye tsëm mando*

<sup>7</sup> Atšbe bonshana entšanga, ntšamo mora cbontsëbuabiamnacá, ndoñe canye tsëm mando quenátsmëna, pero aiñe canye tempsca mando; entsemna cach tšëngaftanga Cristbe ústonënga šmonjanobiama ora šmonjanóyëngacñe mando. Quem tempsca mando entsemna ntšamo tšëngaftanga bëngbentšana šmonjouencá. <sup>8</sup> Pero masque chca endmënëse, quem cbontsëbuabiamná soye tšëngaftangbiana echántsemna mo canye tsëm mandcá. Cristo enjëftsiyena ntšamo quem Bëngbe Bëtsabe mando ndegombre yomncá y tšëngaftágnaca cachcá šmondoyena, er chë bacna juabnënga jtsebomnëse mo ibetiñcá jtsiyenana tempo

ya echanjochnëngo, y chë entšangbe juabna ndegombre binÿnayá ya entsebuashinÿinÿana.

<sup>9</sup> Nda tojayana chë binÿnayáftaca yojtsemna ca, pero cha chabe catsátbioye tbojtsáboyënja, cha cabá tempcá, bacna juabnënga jtsebomnëse yojtsiyena, mo ibetiñcá. <sup>10</sup> Nda chabe catsátbioye tbojtsebobonshana, cha chë binÿnayáftaca jtsiyenana, y tondaye queochátsmëna cha bacna soye chaotsamama. <sup>11</sup> Pero nda chabe catsátbioye tbojtsáboyënja, cha bacna juabnënga jtsebomnëse jtsiyenana, mo canÿa ibetiñe oyenacá. Cha ndoñe ntsetatšëmbuana chë ndayá tojamama ntšamo chentšana yochjopása, er chë bacna juabnënga jtsebomnëse jtsiyenana chábioye ndoñe ntjaleséciana ntšamo tšabá yomncá chaotsamama.

<sup>12</sup> Bäsenga, atše cbontsëbuabianná Bëngbe Bëtsá tšëngaftangbe bacna soyënga tcmojáperdonama, ndayá Jesús tojanma sóyeca. <sup>13</sup> Taitanga, tšëngaftanga cbontsëbuabianná, er tšëngaftanga ya šmonjuábuatmana chë quem luare jobojátšama orscana ya inamná. Tšëngaftanga bobontsëngnaca cbontsëbuabianná, er tšëngaftanga ya chë nÿetsca bacna soyënga mandayá Satanás šmonjayënjaná.

<sup>14</sup> Bäsenga, tšëngaftanga tcbonjubuábiana, er tšëngaftanga chë Taitá ya šmonjuábuatmana. Taitanga, tšëngaftanga tcbonjubuábiana, er tšëngaftanga ya šmonjuábuatmana chë quem luare jobojátšama orscana ya inamná. Bobontsënga, tšëngaftángnaca tcbonjubuábiana, er tšëngaftanga bëtscá añemo ainaniñe šmambá, y Bëngbe Bëtsabe palabrama sempre tšëngaftangbe ainaniñe šmondëjuabná, y chë nÿetsca bacna soyënga mandayá šmonjayënjaná.

<sup>15</sup> Ndoñe matsbošana oyejuayënga jtsemnana nÿe quem luarentša soyëngaca, ni nÿe chë soyënga jtsebomnama. Nda yapa tojtseboše quem luarentša bacna soyënga jtsebomnama, cha ndoñe chë Taitábioye bondbobonshana. <sup>16</sup> Er chë nÿe quem luarama enójuabnayënga mëntšá juabnënga mondbomna: yapa jtsebošana jtsebomnama ntšamo chë ainaniñe bacna juabnënga bomnënga mondbetsebošcá; yapa jtsebošana nÿe ndayá tmojatinÿe soye; y yapa jtsenábotamnayana chë tmobomna soyëngama. Chë juabnënga Bëngbe Bëtsábicana ndoñe ntsóbocanana, ndayá nÿe chë quem luarama enójuabnayëngbentšana. <sup>17</sup> Pero quem luare echanjopochóca y nÿetsca chentša soyënga, chë entšanga bacna juabnëngaca yapa imoboše jtsebomnama soyëngnaca. Pero nda ntšamo Bëngbe Bëtsá yobošcá tojtsama, cha chë nÿetsca tescama yomna tšabe vida echántsebomna.

*Chë Cristbe contra yomná*

18 Básenga, quem luare jopochócama tempo ya entsobeco. Ntšamo tšëngaftanga šmonjouencá, quem tempo echanjabo chë Cristbe contra yomná. Pero morna banga Cristbe contra imomnënga tmonjábocana. Chca bënga montsetátšëmbo chë quem luare jopochócama tempo ya yojtsobecuama. 19 Chënga cach bëngbentsana tmonjábocana. Pero chënga Jesucristbeñe ndoñe tmonjanošbuachená ntšamo bënga mondošbuachecá, er chënga ntšamo bënga montsošbuachecá mamojtsošbuachese, cach bëngaftaca matmënjoquedanga. Pero chca tonjopasá, ndegombre jtsotatšëmbuama ntšamo bënga Jesucristbeñe mondošbuachecá, chënga nyetscanga ndoñe mondošbuáchema.

20 Pero Cristo, chë Uamaná, tšëngaftanga tmonjabacacá, y cha tonjama chë Uamana Espiritu tšëngaftangbe ainaniñe cháumashënguama; y nyetsca tšëngaftanga chë ndegombre soyënga šmondétatšëmbo. 21 Atše cbontsëbuabiamná, ndoñe chë ndegombre soyëngama ndoñe šmondétatšëmbuama, ndayá aíñe šmotatšëmbuama; er tšëngaftanga šmondétatšëmbo chë ndegombre soyënga y ndoñe ndegombre soyënga cánjiñe jtsemnama ndoñe yondopodénama. 22 Nda tojayana Jesús chë Bëngbe Bëtsabe Uamana Uabuayaná, chë Cristo ndoñe yondmëna ca, chana jtsebosterana. Cha jtsemnana chë Cristbe contra yomná, nda iuichamo Cristo Bëngbe Bëtsabe Uaquiñá ndoñe yondmëna ca, y chca, cha Bëngbe Bëtsabiana ndoñe ntsejuabnayana cha chë Taitá bëtsemnama. 23 Nda tojtsichamo Cristo Bëngbe Bëtsabe Uaquiñá ndoñe yondmëna ca, cha chë Taitáftaca cánjiñe mo canyáca ndoñe ntsemnana. Pero nda entšángbeñe tojayana, Cristo aíñe Bëngbe Bëtsabe Uaquiñá endmëna ca, chana aíñe chë Taitáftaca cánjiñe mo canyáca jtsemnana.

24 Tšëngaftanga, chë Cristbe ústonënga šmojanóbiana orscana šmojanuena soye, tšëngaftangbe ainaniñe šmochtsambaye. Chca chašmojtsamëse, tšëngaftanga chë Uaquiñá y chë Taitáftaca cánjiñe mo canyáca šmochántsemna. 25 Y quem soye entsemna ntšamo Cristo šojëftsasëbuachená: chë nyetsca tescama yomna tšabe vida jtsebomnana.

26 Atše chca cbontsëbuabiamná, chë tšëngaftanga jáingñayama imojtsebošëngbiama chašmotsetatšëmbuama. 27 Pero Cristo tcmojanabacacá ora, Uamana Espiritu šmojanóyëngacñe, y mora tšëngaftangbe ainaniñe Uamana Espiritu šmontsebmna, y ndoñe quenátsiyta ndocná más chacmotsabuátambama, er chë Uamana Espiritu lempe cmontsabuatambá; y cha endabuatatambá ndegombre soyënga, y bostero soyënga ndoñe. Mëntšá, ntšamo chë Uamana Espiritu tcmojabuatambacá jt-siyenëse, Crísoftaca cánjiñe mo canyáca šmochtsemna.



28 Y mora básenga, Crísoftaca cányiñe mo canyáca šmochtsemna, chca, cha chaojabáisebocna ora, chábeñe jtsošbuáchiyëse, bēnga añémoca chamotsemnama y ndoñe chamondëtsëuatjama, bēnga chabe delante chamojtsemna ora. 29 Tsēngaftanga šmontsetátšēmo Jesucristo nyetsca soyēnguiñe tšabá amá yomnama. Chcasna, cmontsamna jtsetatšēmbuana, nyetscanga ntšamo Bēngbe Bëtsá yobošcá tmojtsamēngna, Bēngbe Bëtsabe básenga imomnama.

### 3

#### *Crístbeñe ošbuáchiyēnga, Bēngbe Bëtsabe básenga*

1 Menójuabonga, ntsachetšá Bēngbe Bëtsá chē Taitá šondábabuanjēshanama. Chabe bonshánana tša bëtscá endmēnayeca, bēnga šondëubuabuatma chabe básenga ca, y ndegombre bēnga chca mondmēna. Chē causa chē nye quem luarama enójuabnayēnga ndoñe quenátēsertana ntšamo bēnga imomnama, er chēnga cha ndoñe tmonjanábuatmana.

2 Atšbe bonshana entšanga, mora bēnga ya Bēngbe Bëtsabe básenga montsemna. Y masque cabá ndoñe quemuátstatsēmo ntšamo más chcoye bēnga mochjamnama, aiñe mondëtatšēmo, Jesucristo chaojabáisebocna ora bēnga cachacá mochtsemnama, er bēnga mochanjobenaye jinjama ntšamo cha ndegombre yomncá. 3 Y nda chca chábeñe puerte jtsošbuáchiyëse tojtsobátmana, bacna soyēnga amana jtsajbanana, más tšabia jtsemnama, ntšamo cach Cristo yomncá, lempe tšabia y bacna soye ndbomná.

4 Pero nda bacna soye tojama, chana ntšamo Bēngbe Bëtsá tojëftsemandacá jtsaboténana; er bacna soye jamana endmēna, jtsabotena ntšamo Bēngbe Bëtsá tojëftsemandacá.

5 Tsēngaftanga ya šmondëtatšēmo Jesucristo quem luaroye tojánabo bēngbe bacna soyēnga jabétsabuajuanama, y cha ni mo canye bacna soye ndoñe yondbomnama. 6 Chcasna, nda cányiñe mo canyáca cháftaca nyets tempo tojtsemna, ndoñe ntsiyenana bacna soyēnga jtsamëse. Pero nda tojtsiyena bacna soyēnga jtsamëse, Jesucristbiana ndoñe tbonjosertá y ndoñe yondëtatšēmo ntšamo cha bëtsemnama. 7 Atšbe básenga, ndocná chacmondaingñe: nda nyetsca soyēnguiñe tšabá tojtsama, cha canye tšabá mándbomna entšá jtsemnana, ntšamo Jesucristo yomncá; 8 pero nda tojtsiyena bacna soyēnga jtsamëse, chabe ainaniñe Satanás jtsemándayana, er Satanás quem luare jobojátšama orscana bacna soyēnga iuétsama. Bēngbe Bëtsabe Uaquiñá nya quem soyama tojabo: chē Satanásbe soyēnga jabëtseepochocama.

9 Ndocná Bēngbe Bëtsabe uaquiñá tojtsemná jtsiyenana bacna soyēnga jtsamëse, er cha jtsebomnana chē Bēngbe

Bëtsá tbojuántšame tšabe vida, y Bëngbe Bëtsá chabe Taitá endmëna. Chíyeca cha ndoñe ntsiyenana bacna soyënga jtsamëse. <sup>10</sup> Corente jtsotatsëmbuana ndëmuanÿenga Bëngbe Bëtsabe básenga imomnama y ndëmuanÿenga Satanasbe básenga; ndëmuanÿéngnaca ntšamo tšabá yomncá ndoñe tmontsama o chabe catšata ndoñe tmontsebobonshana, ndoñe ntsemnana Bëngbe Bëtsabe básenga.

*Nÿetscanga jtsenbobonshánana*

<sup>11</sup> Quem buayenana entsemna ntšamo tšëngaftanga šmojanuena, tšëngaftanga Cristbe ústonënga šmonjanobiamora scana: nÿetscanga šontsamna jtsenbobonshánana. <sup>12</sup> Ndoñe Caincá muatjama. Chabe ainaniñe Satanás yojamánda, y chíyeca, chabe uabentsábioye tbojtsanóba. ¿Y ndáyeca tbojtsanóba? Cha ndoñe tšabá yonjánama; chabe uabentsana aíñe; chíyeca tbojtsanóba.

<sup>13</sup> Jesucristbeyeca atšbe catšátanga, ndoñe šmattsenjnanaye chë nÿe quem luarama enójuabnayënga cmojtsëbuayënjama. <sup>14</sup> Bënga mondétatsëmbo, bënga tempo monjaniiyena chë nÿe quem luarama enójuabnayënga mondoyencá, y chca, Bëngbe Bëtsabiamama mo obanëngcá monjamna, er bënga monjaniiyena ntšamo Bëngbe Bëtsá ndoñe yondëmandacá. Pero Bëngbe Bëtsá tonjama mora bënga tsëm vida chamotsebobonnama, y chca, mo ndegombre ainëngcá montsemna. Chca mondétatsëmbo, er bënga bëngbe catšátangbioye mondábabuanÿeshana. Nda chabe catšátbioye ndoñe tbontsebobonshana, cha cabá mo obanacá jtsiyenana. <sup>15</sup> Nda cachabe catšátbioye tbojtsáboyënja, cha jtsemnana mo entsanga obanayacá. Y tšëngaftanga šmondétatsëmbo entsanga obanayá ndoñe ntsoobenana jtsiyenana, chë nÿetsca tescama yomna tšabe vida chabe ainaniñe jtsebobonmëse.

<sup>16</sup> Ndayá chë jtsenbobonshánana bëtsemnana mëntšá montsetátšëmbo: Jesucristo chabe derecho vida jtsobomñama cachcá tojanonÿá y bëngbiamama tojanóbana; cachcá bënga šontsamna jtsemnana, sempre jtseprontánana chë Jesucristbeyeca bëngbe catšátangbiamama jóbanama. <sup>17</sup> Canÿa bomnana tojtsebobomna y catšátbioye uajabotá tbojtsanóba, pero chabiamama ndoñe tbonjongmé y ndoñe tbonjuájabuache, cha ndoñe ntsoobenana Bëngbe Bëtsabiamama ainaniñe bonshánana jtsebobonnama. <sup>18</sup> Atšbe básenga, ndoñe quešnátamna nÿe bëngbe catšátanga imuababuánÿeshana ca jatichámuana, y nÿe chë bonshánama jatóyebuambnayana; pero ndegombre šontsamna ndayánaca jamana, chca, jinÿanÿiyama, bënga ndegombre ínÿengbiamama imuababuánÿeshanama.

*Bëngbe Bëtsabe delante natjëmbana ainánaca entšanga*

<sup>19</sup> Chcase bënga mochántsetatsëmbo, ntšamo chë Bëngbe Bëtsabe ndegombre soyënga yomncá bënga imojtsamama. Y bënga ndoñe quemochátenocochinÿena, Bëngbe Bëtsábioca jtsemnama merecido ndoñe mondbuájona ca tmojtsejuabná ora; y bëngbe ainana natjëmbana Bëngbe Bëtsabe delante echántsemna. <sup>20</sup> Bënga chca bëngbe ainaniñe tmojtsejuabná ora, bënga montsobena natjëmbana ainana jtsebomnana, er Bëngbe Bëtsá corente jtsotatsëmbñana ntšamo bëngbe ainana yomnana, y cha lempe yotátšëmbo. <sup>21</sup> Atšbe bonshana entšanga, bënga ndoñe bacna soye tmonjama ca bëngbe ainaniñe tmojtsejuabnase, jtsobenana añémoca jtsemnana y tondayama ntsauatjá Bëngbe Bëtsabe delante jtsemnana. <sup>22</sup> Y cha lempe ntšamo chamojotjañcá šochanjátšataye, er bënga montsama ntšamo Bëngbe Bëtsá ibuamandacá y ndayá chabe bominÿiñe tšabá yomncá. <sup>23</sup> Y chabe mando endmëna: bënga chabe Uaquiñá Jesucristbeñe jtsošbuáchiyana, y bënga nÿetscanga jtsenbobonshánana ntšamo Jesús šojëftsamëndacá. <sup>24</sup> Ntšamo Bëngbe Bëtsá tojëftsemandacá amënga, Bëngbe Bëtsáftaca cánÿiñe mo canÿacá jtsemnana, y cha sempre chëngaftaca cánÿiñe mo canÿacá echanjëftsemna. Y quem sóyeca bënga montsobena jtsetatsëmbuana cha bëngaftaca iuétsemnama: Uámana Espíritu bëngbe ainaniñe cháumashënguama cha tojama.

## 4

*Chë Bëngbe Bëtsabe Espíritu y chë Cristbe uayayabe espíritu*

<sup>1</sup> Atšbe bonshana entšanga, nÿetscanga chë Bëngbe Bëtsabe juábnaca imoyebuambná ca ichámëngbioye ndoñe šmattsayaunana; botamana šmochjuarrepára corente jtsetatsëmbuama chënga aiñe o ndoñe chë Bëngbe Bëtsabe juábnaca imóyebuambnama. Quem tempo banga Bëngbe Bëtsabe ndoñe ndegombre juabna oyebuambnayënga quem luarëjana mondajna. Chë causa tšëngaftanga cmontsamna botamana chëngbiama juarrepárana. <sup>2</sup> Chë Bëngbe Bëtsabe Espíritu ndegombre imobomnëngbiama tšëngaftanga mëntšá šmontsobena jtsetatsëmbuana: nda tojayana Jesucristo quem luaroye aiñe entšacá tojánabo ca, cha ndegombre chë Bëngbe Bëtsabe Espíritu yojtsebomna. <sup>3</sup> Pero nda ndoñe chca Jesucristbiama tonjayana, cha Bëngbe Bëtsabe Espíritu ndoñe yontsebomna; inÿetšá, chana chë Cristbe contra yomnabe espíritu yojtsebomna. Tšëngaftanga šmojouena chë espíritu yochjabama; pero ndegombre cha ya quem luarentšë entsemna.

<sup>4</sup> Atsbe básenga, tsëngaftanga Bëngbe Bëtsábenga šmondmëna y ndoñe šmonjalesencia chë Bëngbe Bëtsabe ndoñe ndegombre juabna oyebuambnayënga tsëngaftangbioye chacmaingñema, er chë nyets tempo tsëngaftangbe ainaniñe vida endbomná, chë nye quem luarama enójuabnayëngbe ainaniñe mándayabiama más obená endmëna. <sup>5</sup> Chë Bëngbe Bëtsabe ndoñe ndegombre juabna oyebuambnayëngna chë nye quem luarama enójuabnayënguentsana mondmëna, chíyeca chënga nye quem luarentša soyëngama jtsóyebuambnayana, y chë nye quem luarama enójuabnayënga chënga jtsayaunanana. <sup>6</sup> Pero bënga Bëngbe Bëtsábenga mondmëna. Nda Bëngbe Bëtsábioye tbojtsabaatma, bëngbioye jtsayaunanana; pero nda Bëngbe Bëtsábioye ndoñe tbontsabaatma, cha bënga ndoñe ntsayaunanana. Chiñe bënga montsobena jtsetatšëmbuana nda chë ndegombre soyënga jóyebuambayama ama espíritu yobomnabiama, y nda chë ínÿengbioye jáingñama ama espíritu yobomnabiámna.

*Chë bonshánana Bëngbe Bëtsábiocana yóbocana*

<sup>7</sup> Atsbe bonshana entsanga, chë bonshánana Bëngbe Bëtsábiocana endóbocana; chcase, bënga šontsamna nyetscanga jtsenbobonshánana. Nda Bëngbe Bëtsábioye y chë inÿe entsángbioye tojtsababuánÿeshana, cha Bëngbe Bëtsabe uaquiñá jtsemnana y Bëngbe Bëtsábioye jtsabaatmana. <sup>8</sup> Nda ndoñe chca tontsebobonshana, cha Bëngbe Bëtsábioye ndoñe ntsábuatmana, er Bëngbe Bëtsá bonshanánaca nyetsca soyënga jamana. <sup>9</sup> Bëngbe Bëtsá šonjinÿanÿé bënga šuababuánÿeshanana, cha chë nye canÿe Uaquiñá ibobomná quem luaroye jíchmuase; cha tbojanichmó, bënga chábeyeca chë nyetsca tescama yomna tsabe vida chamotsebomnama. <sup>10</sup> Bëngbe Bëtsabe bonshánana mëntsá endmëna: ndoñe quenátsmëna bënga Bëngbe Bëtsá imobobonshánayeca, ndayá cha bënga šojánababuánÿeshanayeca, y chabe Uaquiñá tbojanichmó, cha jóbanëse, bënga bëngbe bacna soyëngama perdonánënga chamotsemnana.

<sup>11</sup> Atsbe bonshana entsanga, Bëngbe Bëtsá chca šuababuánÿeshana; chcasna, bëngnaca šontsamna nyetscanga jtsenbobonshánana. <sup>12</sup> Ndocná ndocna te Bëngbe Bëtsábioye tbonjinÿe. Bënga nyetscanga tmojtsenbobonshánëse, Bëngbe Bëtsá nyets tempo bëngaftaca echántsemna, y chabe bonshánana puerta bëtsá bëngbeñe echántsemna. <sup>13</sup> Bënga mëntsá montsobena ndegombre jtsetatšëmbuana bënga Bëngbe Bëtsáftaca imomnama y cha bëngaftaca: cha tonjanma chabe Espíritu bëngbe ainaniñe cháúamashënguama. <sup>14</sup> Y cach bënga fsënjinÿe y entsanga fsëntsëtsëtsná, chë Taitá

chabe Uaquiñá tbojichmoma, quem luarentša entsanga jabátsebacama. <sup>15</sup> Ndánaca tojayana Jesús Bëngbe Bëtsabe Uaquiñá yomna ca, cha Bëngbe Bëtsáftaca cányiñe echántsemna y Bëngbe Bëtsánaca sempre cháftaca cányiñe mo canyáca.

<sup>16</sup> Chcase bënga montsetátšëmbo y montsošbuaché ndegombre Bëngbe Bëtsá bënga šuababuányeshanama. Bëngbe Bëtsá nyetsca soyënga bonshanánaca jamana y nda Bëngbe Bëtsá y chë inye entsanga sempre tojtsababuányeshana, cha Bëngbe Bëtsáftaca cányiñe mo canyáca jtsemnana y Bëngbe Bëtsánaca siempre cháftaca cányiñe mo canyáca. <sup>17</sup> Chca, Bëngbe Bëtsabe bonshánana puerte bëtscá bëngbeñe echántsemna, bënga bëts añémoca y tondayama ntsautjca chamotsemnana, chë tšabá o ndoñe tšabá tmonjamama entsangbiama jayanama Cristo yochjésabo orscama; er bënga Jesucrísoftaca cányiñe mo canyáca jtsemnëse, quem luarentše mondmëna ntšamo Jesucristo endmëncá. <sup>18</sup> Nda Bëngbe Bëtsá y chë inye entsanga tojtsababuányeshana, tondayama ntsautjana; bënga corente tmojtsebobonshana ora, ndoñe ntsopodénana uatjana jtsebmomnana. Canye entsá tojtsautja ora, jtsemnana mo chabe castigo ya cuafjobojatšecá. Chca, nda uatjana tojtsebmomna, Bëngbe Bëtsábioye y chë inye entsanga cha ndoñe corente yondábabuanyeshana, ntšamo Bëngbe Bëtsá bënga šuababuanyeshancá.

<sup>19</sup> Natsana Bëngbe Bëtsá šojánababuanyeshana, y chíyeca bënga, cha y chë inye entsanga imuababuányeshana. <sup>20</sup> Nda tojayana: “Atše Bëngbe Bëtsábioye sëndbobonshana ca”, pero cachca ora cachabe catšátbioye tbojtsáboyënja, cha canye bostero jtsemnana. Canya aiñe jtsobenana chabe catšata jinýama; y cha chë catšátbioye ndoñe tbontsebobonshana, ndegombre cha Bëngbe Bëtsábioye ndoñe bondbobonshana, ndábioye jinýama ndoñe ntsobenana. <sup>21</sup> Y bënga quem mando chábentšana tmonjanóyëngacñe: nda Bëngbe Bëtsábioye tbojtsebobonshana, cachabe catšátbioynaca chabotsebobonshana ca.

## 5

*Chë Jesucristbeñe ošbuachiyá endobena Satanasbe soyënga jayënjanana*

<sup>1</sup> Nda tojtsošbuaché Jesús chë Uámana Uabuayaná, chë Cristo yomnama, cha Bëngbe Bëtsabe uaquiñá jtsemnana; y nda canye taitábioye tbojtsebobonshana, chë taitabe uaquiñábioynaca cha jtsebobonshánana. <sup>2</sup> Bënga Bëngbe Bëtsá tmojtsebobonshana y ntšamo cha tojtsemadacá tmojtsamëse, bënga ndegombre mochántsetatšëmbo, chë Bëngbe Bëtsabe basengbioynaca bënga imuababuányeshanama.

<sup>3</sup> Bënga Bëngbe Bëtsábioye imobobonshánama quem soyiñe jtsinýnana: bënga ntšamo Bëngbe Bëtsá tomandacá tmojtsamëse. Y ndayá Bëngbe Bëtsá yomandacá ndoñe yapa totcá quenátsmëna bënga chamotsamama. <sup>4</sup> Nda Bëngbe Bëtsabe uaquiñá tomna, chana jáyënjanana quem luarentša entsanga y soyënga ntšamo Satanás yomandacá. Quem luarentša entsanga y soyënga ntšamo Satanás yomandacá, Crístbeñe bënga imošbuachéyeca montsobena bënga jayënjanana. <sup>5</sup> Nye nda, Jesús Bëngbe Bëtsabe Uaquiñá yomnama tojtsošbuaché, cha jtsobenana chë entsanga y soyënga ntšamo Satanás yomandacá jayënjanana; ndocná más.

*Bëngbe Bëtsá tojinýanyé ntšamo chabe Uaquiñabiama ndegombre yomncá*

<sup>6</sup> Cach Jesucristo endmëna nda quem luaroye tojánabo y mëntšá tojanenonýinýe: búyeshca cha tmojanabayé ora, y buiñe juabuáshanëse cha tonjanóbana ora. Cha ndoñe tonjanenonýinýe nye búyeshca, ndayá búyeshca y buiñeca. Cach Uámana Espíritu entsobena jayanana chca ndegombre bétsemnama Jesusbiamá, er chë Espíritu endmëna chë sempre ndegombre oyebuambnayá. <sup>7</sup> Endmëna unga soyënga, ndayá iuinýanýná ntšamo ndegombre yomncá Jesusbiamá: <sup>8</sup> Espíritu, búyeshca y buiñe; y chë unga soyënga lempe cachcá Jesusbiamá jtsinýanýnáyana. <sup>9</sup> Bënga mondbétsejuabnaye, ndayá entsanga tmojinýe ca tmojtsichámuama mo ndegombre cuaftsemncá, pero ndayá Bëngbe Bëtsá tojtsichamcá chë ndegombre soye jtsemnana y puerte jtsámanana, er chë ndegombre soye ntšamo cha tojtsichamcá, endmëna ndayá chabe Uaquiñabiama iuichamcá. <sup>10</sup> Nda Bëngbe Bëtsabe Uaquiñábeñe tojtsošbuaché, cha chca nyets tempo chabe ainaniñe jtsejuabnáyana; nda Bëngbe Bëtsábeñe ndoñe tontsošbuaché, cha chca jtsamana mo Bëngbe Bëtsá canýe bostero cuaftsemncá, er chë Bëngbe Bëtsá chabe Uaquiñabiama tojayana soyama cha jtsejuabnáyana ndoñe ndegombre yontsemna ca. <sup>11</sup> Ntšamo Bëngbe Bëtsá chabe Uaquiñabiama tojayancá mëntšá entsemna: Bëngbe Bëtsá bëngbiamá tojama chë nyetsca tescama yomna tšabe vida chamotsebomnama; y quem vida chabe Uaquiñábeñe entsemna. <sup>12</sup> Nda Bëngbe Bëtsabe Uaquiñáftaca cánýiñe mo canýacá tojtsemna, cha chë tšabe vídnaca jtsebomnana; pero nda chë Bëngbe Bëtsabe Uaquiñáftaca cánýiñe mo canýacá ndoñe tontsemna, cha chë nyetsca tescama yomna tšabe vida ndoñe ntsebomnana ca.

*Inýe soyëngama jábuayenama y jtadiósoftanama*

13 Tšëngaftanga, chë Bëngbe Bëtsabe Uaquiñábeñe šmošbuachéngbioye quem soyënga cbontsëbuabiamná, ndegombre chašmotsetatšëmbuama chë nyetsca tescama yomna tšabe vida šmojtsebomnama.

14 Bënga bëts añémoca y ndauatjca Bëngbe Bëtsabe delante mondmëna, er bënga mondëtatšëmbo, nderado ntšamo chaotsemnana cha tojtsebošcá bënga tmojtjañe ora, cha bënga šnétsayaunanama. 15 Nderado ndayá chca Bëngbe Bëtsábioye tmojtsotjanañe ora, cha bënga joyaunayana; bënga mondëtatšëmbo chca ndegombre yomnama, y chca, bëngnaca montsetatšëmbo, ndayánaca chábioye bënga chamojotjañcá cha šochjátšatayama.

16 Nda cachabe catšátbioye tbojinýe canýe bacna soye tojtšamama, pero chë bacna soye tojamentšana cha perdonaná jtsemnana cabá tojtsopodénëse, chábioye bontsemna Bëngbe Bëtsá jaimpádana, y chca, Bëngbe Bëtsá echanjama chë catšata chë nyetsca tescama yomna tšabe vida chaotsebomnama, cha chca tojamentšana perdonaná jtsemnana cabá tojtsopodénëse. Pero canýe bacna soye endmëna, y chca tojamama canýa ndoñe ntšobenana perdonaná jtsemnana, y chca, cha jabocnana canýa nyetsca tescama castigáná chaotsemnana, y atše ndoñe quetsátichamo chë bacna soyama yojtsemna Bëngbe Bëtsá jtseimpadánana chaboperdonama ca. 17 Nda tojtsama ntšamo Bëngbe Bëtsá ndoñe yondëmandacá, cha bacna soye jtsamana; pero nyetsca bacna soyënga ntšamo canýa tojtsamcá, ndoñe ntjamana cha ndëperdonaná chaotsemnana.

18 Bënga mondëtatšëmbo, nda Bëngbe Bëtsábioye mo taitacá tbojtsebomna, cha ndoñe ntsiyenana bacna soyënga jtsamëse, er chë Bëngbe Bëtsábentšana Onýnaná chábioye jtsinýenana, y Satanás, chë nyetsca bacna soyënga amëndayá, tondaye ntšobenana chábioye jabórlana. 19 Bënga mondëtatšëmbo, bënga chë Crístbeñe ošbuáchiyënga Bëngbe Bëtsábënga imomnama, y chë quem luarentša inýe entšanga Satanasbe cucuatšinë imomnama. 20 Bëngnaca mondëtatšëmbo Bëngbe Bëtsabe Uaquiñá tojabama, y cha iuama bënga osertánana chamotsebomnama, chë ndegombre Bëngbe Bëtsá yomná jtsabuatmama. Bënga chë ndegombráftaca cánýiñe mo canýacá mondmëna, bënga chabe Uaquiñáftaca cánýiñe bétsemnayeca. Cha chë ndegombre Bëngbe Bëtsá endmëna, y nda chë nyetsca tescama yomna tšabe vida entšanga chamotsebomnama iuamá. 21 Atšbe básënga, ndoñe šmattsadorana cach entšangbe pormana soyënga, chë ndayama ínýënga mondbétsejuabnaye díosënga yomna ca.

## 2 San Juan

*Jtsiyenana ndegombre soyëngaca y nyëtscanga jtsenbobonshánëse*

<sup>1</sup> Atše chë bëtsëjema, quem tsbuanácha sentsabiamná, chë uámana mamá, chë Bëngbe Bëtsabe bocacaná y chabe basengbiámna, ndëmuanÿenga atše ndegombre sëndábabuanÿeshana. Y ndoñe nyë atše chënga quetsátababuanÿeshana, ndayá nyëtscanga chë Bëngbe Bëtsabe ndegombre soyënga uabuátmëngnaca. <sup>2</sup> Atše cbontsababuanÿeshana, chë ndegombre soyënga bëngbe ainaniñe mondbómnyeca, y chë soyënga bëngbe ainaniñe sempre echántsemna.

<sup>3</sup> Atše sëntseimpadana Bëngbe Bëtsá chë Taitá, y Jesucristo chë Taitabe Uaquiñá, chaboma tsëngaftangbeñe tsabe bendicionënga chaotsemnama, chata tsëngaftangbioye chácmalastemama, y chaboma tsëngaftangbe ainaniñe tsabe ebionana chašmotsebonnama. Quem soyënga, bënga chë ndegombre soyënga uabuátmënga y nyëtscanga mondenbobonshánëngaftaca echántsemna.

<sup>4</sup> Puerte sënjoyejuá, er atše acbe básenguentše báseftanga sënjánÿena chë ndegombre soyënga ntšamo Bëngbe Bëtsá chë Taitá šojamëndacá jtsamëse. <sup>5</sup> Y mora, uámana mamá, cbontseimpadana Diosmanda nyëtscanga chamotsenbobonshana. Chë cbontsëbuabiamná soye ndoñe canÿe tsëm mando quenátsmëna, ndayá cach Cristbe ústonënga tmonjanobiama ora tmonjanóyëngacñe mando. <sup>6</sup> Bënga, Bëngbe Bëtsá y chë inÿe entšanga imababuanÿeshanama jtsinÿnana, bënga ntšamo Bëngbe Bëtsá tojamandacá jtsamëse tmojtsiyenama. Y chabe mando, ntšamo Cristbe ústonënga šmonjanobiama ora šmojanuencá, mëntsá endmëna: jtsiyenana Bëngbe Bëtsá y chë inÿe entšanga jtsababuánÿeshanëse.

*Chë entsángbioye áingñayënga*

<sup>7</sup> Quem luarëjana banga entsángbioye áingñayënga mondana, y chënga jtsejuabnayana Jesucristo quem luaroye ndoñe mo canÿe ndegombre entsacá tonjánabo ca. Nda chca tojtsejuabná, cha jtsemnana chë aingñayá y Cristbe contra yomná. <sup>8</sup> Chëngbiamna cuedado šmochtsebonna. Ndoñe chcace, tsëngaftanga ndoñe quešmochátsebonna chë Cristbiamna cach tsëngaftangbe trabajuentšana tojóbocna soyënga, y ndoñe quešmochatosháchiñe lempe ntšamo Bëngbe Bëtsá tsëngaftangbioye jatšatayama yojtsebošcá.

<sup>9</sup> Ndánaca chë Cristo tojanabuatambá soyëngama inÿe soyënga tojabatuatambá, cha ndoñe Bëngbe Bëtsáftaca cánÿiñe



mo canyáca ntsemnana; pero nda sempre ntšamo Cristo tojanbuatëmbacá tojtsabuatambá, cha aínne chë Taitáftaca y chabe Uaquiñáftaca cányiñe mo canyáca jtsemnana. <sup>10</sup> Ndánaca tšëngaftangbioye tojá jabuátambama, pero ndoñe ndayá Cristo tojanabuatambacá tojtsebuátëmbase, cha ndoñe šmatjofja, ni mo šmatjachuaye. <sup>11</sup> Er nda chábioye tbojachuase, chábioye jtsajabuáchanana chë bacna soye chaomama.

### *Jtadiósoftanama*

<sup>12</sup> Atše ba soyënga sëntsebmoma tšëngaftanga jáuyanama, pero ndoñe quetsátsboše tsbuanáchañe jubuábiamama. Atše sëntsejuabná aínne chjobenaye tšëngaftangbioye jama, jobenayama nyetscángaftaca jencuéntama, chca, bëngbe oyejuayana puerte bëtscá chaotsemnana.

<sup>13</sup> Crístbeyeca acbe quenata, chë Bëngbe Bëtsabe bocacaná, chabe básenga cmontsacheuaná.

## 3 San Juan

### *Juan Gaybiama puerte tšabá tojanoyebuambá*

<sup>1</sup> Atše chë bëtsëjema, quem tsbuanácha atšbe bonshana amigo Gaybiama sentsabiamná. Chábioye atše ndegombre sëndbobonshana.

<sup>2</sup> Atšbe bonshaná y Crístbeyeca atšbe catsata, Bëngbe Bëtsá sëntseimpadana aca tšabia nÿetsca soyënguine chacotsemnama y salud bomnánaca. Atše sëntsetatšëmbo aca ainaniñe tšabá cotsomñama, Bëngbe Bëtsabiana bëtská tšabe juabnënga chentše jtsebomñese. <sup>3</sup> Er báseftanga Jesucristbeñe ošbuáchiyënga átšbioye tmonjabo y šmonjacentá ntšamo aca chë ndegombre soyënga yomncá icuamama, aca chë ndegombre soyënga jtsamëse icoyenama. Chíyeca atše bëtská sëntsoyejuá. <sup>4</sup> Tondaye jamana atše nÿetšá oyejuayá chaitsemnama, ndayá nÿe jouenana chë atšbe basengcá imoquedánënga ntšamo chë ndegombre soyënga yomncá jtsamëse imoyenama.

<sup>5</sup> Atšbe bonshaná, aca contsama ntšamo Jesucristo tonjanbuatëmbacá, aca chë ínÿenga Jesucristbeñe ošbuáchiyënga jujabuáchama ndayánaca tcojama ora, y masna, chë inÿe luaroquëngocana ashjajnëngbiama ndayánaca tcojtsama ora. <sup>6</sup> Chë átšbioye tmonjabënga tmonjoyebuambá, chë Jesucristbeñe ošbuáchiyënga quem luarentše mondbenenefjnëngbe delante, aca tša chënga icuababuánÿeshanama. Diosmanda, ntšamo tojtsëjabotcá chënga cochjújabuache, chca, chënga chamobená tšabá inÿe luarëngoye játama. Chënga mondmëna Bëngbe Bëtsabiana trabájayënga; chcasna, chëngaftaca cochjama ntšamo chënga chama mercedo imobuajoncá. <sup>7</sup> Chca cochjama, er chënga chëngbe pueblënguentšana tmojëftsebocana Jesucristbe soyëngama entšángbioye jábuayenama, y chënga chama tondaye crocénana quematóyëngacañe chë Jesucristbeñe ndošbuáchiyëngbe cucuatšentšana. <sup>8</sup> Chíyeca bënga šontsamna chëngbiama jtsantješnana y jtsëjabuáchanana, chca, bënga chamobená cánÿiñe chëngaftaca jatrabájana, entšángbioye chë ndegombre soyëngama jábuayenama, ndayá chënga mondama.

### *Diótfrefes ndoñe tšabá tonjanma; Demetrio aíñe*

<sup>9</sup> Atše canÿe tsbuanácha chë Jesucristbeñe ošbuáchiyënga chentše mondbenenefjnëngbioye sënjubuábiana, pero Diótfrefes ndoñe yontsuenana ntšamo atše sentsichamcá, er cha yojtseboše chë inÿëngbioye nÿe jtsamëndayana. <sup>10</sup> Chíyeca atše

choye chajá ora, ndayá cha yojtsamama chanjauácacana. Cha sempre bacá yojtsoínÿana y uayátsenaye soyënga bëngbe contra yojtsichamo. Y chë soye chábioye ndoñe bontsobastana; chana chë Jesucristbeñe ošbuáchiyënga chabe puebloye tmojáshjajnënga ndoñe ntjúbuajana, y chënga júbuajama tmojtsebošëngbioye ndoñe yontsalesenciana chca chamomama, y chë Jesucristbeñe ošbuáchiyënga bëtsemnama innétsenefjuana luarentšana yojtsatëbuacana.

<sup>11</sup> Atšbe bonshaná, ndoñe cattsama chë ndoñe tšabá yontsamacá, ndayá chë tšabe soyënga tmojtsamëngcá cocht-sama. Nda ntšamo tšabá yomncá tojtsama, cha Bëngbe Bëtsábia jtsemnana; pero nda ndoñe chca tontsama, cha cabá ndoñe yondétatšëmbo ntšamo Bëngbe Bëtsá yomnama.

<sup>12</sup> Jesucristbeñe ošbuáchiyënga nÿetscanga tšabe soyënga Demetriëbiamama montsichamo, y Jesucristbe ndegombre soyënga entsinÿna ntšamo cha soyënga yojtsiyenama. Bëngnaca chabiamama tšabá fsëntsichamo, y aca condétatšëmbo ntšamo bënga fsëntsichamcá, ndegombre yomnama.

### *Jadiósoftanama*

<sup>13</sup> Atše ba soyënga sëntsebomna aca jauyanama, pero ndoñe quetsátsboše tsbuanáchañe juábobemana. <sup>14</sup> Atše sëntsejuabná betscó chjobenaye ácbioye jama jauatsëtsayama y jobenayana ácaftaca jencuéntama.

<sup>15</sup> Puerte tšabe ebionana ainaniñe chacotsebomna. Quem luarentša amiguënga cmontsechuaná. Diosmanda, bëngbe amiguëngbioye choca cada ona cochjácheuaye.

## San Judas

### *Jacheuayama*

<sup>1</sup> Atše Judas, Jesucristbe oservená y Santiagbe catšata, quem tsbuanácha sentsabiamná, ndēmuanÿengbioye Bēngbe Bētsá, chē Taitá chabe entšanga chamotsemnama tojáchembo, chabe bonshánēnga, y ndēmuanÿenga Jesucristo endánÿena. <sup>2</sup> Atše, Bēngbe Bētsá sēntseimpadana, cha puerte lastemado tšēngaftangaftaca chaotsemnama, cha chaoma tšēngaftanga ainaniñe tšabe ebionana chašmotsebomnama, y chaoma tšēngaftanga cada te más Bēngbe Bētsábioye y ínÿengbioye chašmotsababuánÿeshanama.

### *Chē ndoñe ndegombre soyēnga buátēmbayēnga*

<sup>3</sup> Atšbe bonshánēnga, atše tša sēndboše tšēngaftanga jubuábiamama, ntšamo Jesucristo bēngbe bacna soyēnguentšana šojátsebacama, tšēngaftangbioye y bēngbioynaca; pero atše sēntsejuabná atše šojtsemna tšēngaftanga jubuábiamana, jáimpadama bētsá chašmotsama Jesucristbe soyēngama, chē mondošbuaché soyēngama jenujuérsama, ndoñe chaondopochocama. Chē soyēnga Bēngbe Bētsá chabe entšanga canÿe tojatšatá, y nÿetsca tescama. <sup>4</sup> Er tšēngaftanga ntšamo ínÿenga imomnama ntjatatšēmboncá, básefta entšanga tšēngaftangaftaca tmojenutaná. Chēnga mondmēna Bēngbe Bētsá ndoñe adórayēnga, y chē buátēmbana soyēnga tmojtsetrocá. Bēngbe Bētsá bēngbe tšabiamana juabna yobómnayeca, chēnga jtsichámuana tšēngaftanga šmojtsoyena nÿetsca bacna soyēnga jtsamēse jtsiyenana, jenomándama ntsoyencá ca; y chca, chēnga montseboše jinÿanÿiyama, Jesucristo ndoñe bēngbe canÿe Nduiño y Bēngbe Utabná chēngbiamana yondmēna ca. Y bayté, Bēngbe Bētsabe uabemana palabrenguiñe tmojanábema, chē chca amēngna jtsamnana nÿetsca tescama castigánēnga jtsemnama ca.

<sup>5</sup> Masque tšēngaftanga lempe quem soyama ya šmondētatšēmbo, atše sēntseboše jamama tšēngaftanga chašmotsenojuabná, Bēngbe Utabná, Israeloca entšanga Egiptoquēngbe cucuatšentšana tojanatsebacá chentšana, cachá chē Israeloquēnguentse chábeñe ndošbuáchiyēnga tojánapochocama; <sup>6</sup> y cachcá chē angelēngbiámna, ndēmuanÿenga ndoñe tmonjanoquedá chē tmojanóyēngacñe mándoca, pero aiñe chēngbe luarēnga cachcá imojéftsonÿaye. Chē causa, Bēngbe Bētsá tojanmandá cadenējuangaca

nÿetsca tescama chamoquedama, chë más ibetiñe, tondaye binÿiñe luarentse, chënga bacna soyënga tmojanmama nÿetsca tescama castigánënga jtsemnama yoÿtsamna ca, cha jayanama tescama. <sup>7</sup> Y chë Sodoma y Gomorra, y chë béconana pueblënguentse entsangbiámnaca; chëngnaca cach angelëngcá ndoñe tšabá monjánama, y nÿetsca bacna soyënga imojánama boyabása o shembásaftaca, y ínÿengaftaca y bayëngaftácnaca. Chíyeca chënga tmonjansufrí chë ññesheca castigo nÿetsca tescama, y chca, nÿetsca entsángbioye tmojaninÿanÿé, ndayá yochjopása chë chca Bëngbe Bëtsábioye ndoñe tbontsobedecenáftaca.

<sup>8</sup> Cachcá, chë ndoñe ndegombre soyënga buátëmbayëngnaca chë mo otjenayoquécá tmojáninÿe soyëngama jtsichámuana, y chë causa cachëngbe cuerpëngama bacna soyënga jtsamana, chë mando bomnëngbioye jtsëbátenana, y chë espíritënga obenana bomnëngbiama ndoñe tšabá ntsichámuana, mo chëngbioye cuafjoyanguangcá. <sup>9</sup> Pero ni mo chë angelëngbe mandayá Miguel quem buátëmbayëngcá tojanma. Cha chë diábloftaca ibojentsjaná ora, Moisesbe cuerpama cháftaca jabuachana ibojanenatsëtsnaye ora, ndoñe tonjanenñemó jayanama chë diablëbiama podescasoyënga, jóyenguanguse, ndayá nÿe mëntsá ibojauyana: “Bëngbe Utabná chacmácacana ca.” <sup>10</sup> Pero quem buátëmbayëngna, chë ndoñe tontsësertana soyëngama podescasoyëngama jtsichámuana, y ntšamo tojtsebionama y tmojtsebošama, nÿe mo bayëngcá, chë soyëngama tšabá josértama juabna ndbomnënga, ndayá chentšana tmojtsësertancá jtsamëse, jamana chënga nÿetsca tescama castigánënga jtsemnama chamotsajnama.

<sup>11</sup> ¡Tša lastema quem buátëmbayëngbiama! Er chënga ndoñe tšabá tmojanma, mo Caincá; cha tojanaboté ntšamo Bëngbe Bëtsá inétsama bacna soyënga japerdónama, y cabana chabe catšátbioye tbojanóba. Chënga crocénana juacánama, mo Balaam yojanamcá, Bëngbe Bëtsabe tšabe benachentšana tmojtsojuánañe, bacna soyënga jamama. Chënga chë amëndayëngcá Bëngbe Bëtsá tojanabacacángbioye ndoñe ntsayaunanana, ntšamo Coré, Moisés y Aarónbioye joyaunayama ndoñe tonjanbošencá; y chë causa chënga pochocánënga mochántsemna, ntšamo Coré pochocaná chaotsemnama Bëngbe Bëtsá tojanmcá.

<sup>12</sup> Chëngna tšëngaftangbiama jtsemnana mo canÿe ndëtsenga luarentse canÿe bëts tsengacá, tšëngaftangaftaca tmojenutaná ora, cánÿiñe jasama mo Jesucristbeñe ošbuachiyëngcá. Chënga chca jtsemnana, er chca fiestënguñe chënga oyejuayënga jtsemnana, nÿe chënga tšabá jtsomñama soyënga jtsamëse, y chënga chama ndoñe ntsëuatjana. Chënga nÿe

cachëngbiama jtsantješnana, ínÿengbiama ndoñe. Chënga tša jtsašebuachiyana, pero chëngbe buatëmbana soyënga ínÿengbiama tondayama ntoservénana; y chca, chënga jtsemnana mo chë tša jënÿá ora jantšetëshëngcá, tondaye ntjuaftena, bínÿiaca ochñëjuanëshënga; y mo betiyeshënga jashtsnëshënga y buashanëshëngcá, chë jashacama tojtsemna ora tondaye shajuana causa. <sup>13</sup> Chënga nÿets tempo bacna soyënga jtsamana cachëngbe bacna juabnëngaca, y chë bacna soyënga ntšamo tmojtsamcá jtsinÿanÿnayana chënga chë bacna juabnënga imobomnama. Chca, chënga jtsemnana mo mar béjayoca oleshëngcá, chentsana espumushënga bëtscá tsenguëshëca jtsóbocanana. Y cabana, chënga jtsemnana mo estrellëngcá chëtemëngbe benachentsana tmojtsebocna, y chentsana jtsefsanana. Bëngbe Bëtsá tojamandá, chë buátëmbayënga ntšamo tmojamamna, chë más ibetoca, tondaye binÿniñe luarentše nÿetsca tescama chënga chamoquedama.

<sup>14</sup> Adánbentsana chnënguana pamillo entšanga tmojánachñëjna chentsana Enoc tojánashjango. Chánaca Bëngbe Bëtsabe juabna tojanoyebuambá chë bacna buátëmbayëngbiama, mëntšá tojánayana ora: “Smochjinÿe, Bëngbe Utabná echanjabo bëtscá uaranga angelëngaftaca, <sup>15</sup> nÿetsca entšangbiama jabáyanama ntšamo tmojamcá tšabá o ndoñe tšabá bëtsemnama; y cha echanjamánda chë Bëngbe Bëtsábioye ndoñe adórayënga nÿetsca tescama castigánënga chamotsemnama, tša bacna soyënga chabe contra tmojamama, y bacna soyënga chabe contra tmojamanama, chënga, chë puerta bacna soyënga amënga ca” —tojánayana. <sup>16</sup> Chënga mondmëna chë tšabe soyëngama nÿets tempo podësca ichámënga, y ndocna te tondáyeca oyejuayënga ntsemnana. Chënga jtsiyenana bacna soyënga jtsamëse nÿe cachënga tšabá jtsomñama, y puerta botamana palabrënga jtsichámuana uámanënga jtsenobiamnayëse, y tšabe soyënga ínÿengbioye jtsëtsénayana, chënga tšabá joquédama y chëngbentsana ndayánaca josháchiñama.

### *Ošbuáchiyënga jábuayenama*

<sup>17</sup> Pero tšëngaftanga, atšbe bonshánëngna, šmochtsenójuabnaye ndayá chë Bëngbe Utabná Jesucristbe ichmónënga tcmojanëyanama, mëntšá: <sup>18</sup> “Jesucristo quem luare jésabama tempo chaojtsobeco ora, mochántsemna entšanga, y chënga mochantsiyena jtsamëse nÿe cachënga tšabá jtsomñama bacna juabnëngaca, y tšëngaftanga cmochantsëbuayajuana ca.” <sup>19</sup> Chënga mondmëna chë ošbuáchiyënguëntše nÿetscanga ndoñe cachcá chamondëtsejuabnama amënga; chënga mondoyena jtsamëse

cachëngbe bacna juabnëngaca y ndoñe quemátsbomna Uámana Espíritu, chëngbe ainaniñe chaotsemándama.

<sup>20</sup> Pero tšëngaftanga, atšbe bonshánënga, nÿets tempo, cada te más Jesucristbeñe ošbuáchiyana šmochtsebomna, chë Bëngbe Bëtsábiocana endóbocana ošbuáchiyana, y Bëngbe Bëtsáftaca šmochjencuénta, ntšamo Uámana Espíritu tcmojtsamëndacá. <sup>21</sup> Yeuana šmochtsantješna tšëngaftanga nÿets tempo chašmotsiyenama, Bëngbe Bëtsá cmababuánÿeshanama jtsejuabnayëse, y šmochtsobátmana chë tempo ndaye ora Bëngbe Utabná Jesucristo, tšëngaftanga jtsalastemánëse, yochjama tšëngaftanga chë nÿetsca tescama yomna tšabe vida chašmotsebomnana.

<sup>22</sup> Chë inÿe ora aíñe y inÿe ora ndoñe Jesucristbeñe ošbuáchiyana bomnënga šmochtsalastemana. <sup>23</sup> Bëtscá šmochtsama, báseftanga chë uabouana castigüentšana atsebácanënga chamotsemnana, mo chënga íñeshentšana cuaftëbuacancá. Inÿengbiamá chacmotsangmena, pero cuedado šmochtsebomna, chënga chašmojtsëjabuachana ora, ntšamo chënga bacna soyënga tmojtsamcá ndoñe chašmondëtsamama; y chë bacna soyënga ntšamo chënga tmojtsiyena jtsamëse, chëngbe bacna juabnëngaca, nÿa tondaye chacmondëtsogusetana.

*Judas, Bëngbe Bëtsá jëtschuayama*

<sup>24-25</sup> Chë nÿe canÿe Bëngbe Bëtsá, bëngbe Atsebacayá obenana endbomna tšëngaftanga jtsanÿenama, chca, tondaye chaondëma tšëngaftanga Jesucristbeñe ošbuáchiyana chašmotsajbanama; y obenana endbomna tšëngaftanga ainaniñe ndocna bacna soye ndbomnënga chašmotsemnana y puerte oyejuayënga cachabe delante chašmotsemnana, cha canÿe puerte uamaná y obená bëtsemnana chaojinÿanÿé ora. Bëngbe Utabná Jesucristbeyeca, nÿetscanga Bëngbe Bëtsá chamotsatschuaná; y cha puerte bëtsá chauesomñe, nÿets obenana bomná y nÿets mando bomná, nÿets tempscana, tempo, mora y nÿetsca tescama. Chca chaotsemna.

## Apocalipsis

### *Ndayá quem librěsañe yomna*

<sup>1</sup> Quemuentše entsábemana ndayá Běngbe Bětsá Jesucrístbioye tbojaninýinýé, chě Běngbe Bětsabe oservéněnga cha cháuinýanýema, ndayá jopásama yojsobecuama chěnga chamotsetatšěmbuama. Jesucristo chama chabe ángel tbojichmó, chě soyěngama atše, Juan, chě Jesucristbe oservenábioye chašuinýinýema. <sup>2</sup> Y atše sěnjayana lempe ntšamo ndegombre yomncá lempe chě tijinýe soyěngama, chě Běngbe Bětsabe buayenana soyěngama y chě Jesucristo šonjaniana ndegombre bětsemna soyěngama.

<sup>3</sup> Oyejuayá nda tojtsalía, y oyejuayěnga nděmuanýenga botamana tmojtsuenana quem yochjopása soyěngama, chě muentše entsabemancá ndegombre tmojóyeunanga, er chca jopasa tempo entsobeco.

### *Asia luaroca ošbuachiyěngcá enefjuaněnga jacheuayama*

<sup>4</sup> Atše Juan, sěntsabiamná chě Asia luaroca canýsěftañe ošbuachiyěngcá enefjuaněngbiama. Atše, Běngbe Bětsá sěntseimpadana, tšabe bendicioněnga chábiocana chašmosháchiñe y ainaniñe puerte tšabe ebionana chašmotsebomna, Běngbe Bětsábentšana, chě canýsěfta espíritěngbentšana y Jesucrístbentšana. Běngbe Bětsá, chě mora endmėná, enjamná y sempre echantsemná; chě canýsěfta espíritěnga, chabe uámana puesto natsanoica mondmėněnga; <sup>5-6</sup> y Jesucristo, chě ntšamo Běngbe Bětsabiama yotatsěmbcá ndegombre oyebuambnayá, chě natsaná ndabiama Běngbe Bětsá tojama obaněnguentšana cháuatayenama, y nýetsca quem luarentša mandaděngbe aměndayá. Cristo šondábabuanýeshana y běngbe bacna soyěnguentšana šojatsebacá, cha tonjanóbanayeca, chabe buiñe juabuáshaněse. Cha tojama běnga chamotsobena cháftaca jtsemándayana y uámaněnga chamotsemnama, y Běngbe Bětsá chabe Taitá mo bachnangcá chamotseservénama. ¡Nýetscanga nýets tempo chamotsinýanýná Cristo puerte bětśá y uamaná bětsemnama y obenana nýetsca tescama yobomnama! Chca chaotsemna.

<sup>7</sup> Moueněnga. Cristo jantšetěshěnguiñe echanjėsabo.

Chábioye nýetscanga mochanjinýe,  
chě tmonjancrucificágnaca;

y quem luarentša nýetsca entšanga puerte ngmėnaca  
mochántsemna  
y mochantsošachna chábeyeca.  
Ndegombre, chca chaotsemna.



<sup>8</sup> “Atše sēndmēna chē n̄yetsca soyēnga bojatšayá y pochocayá ca,” Bēngbe Utabná Bēngbe Bētsá tojayana. Cha chē sempre endmēná, enjamná, n̄yets tempo echantsemná, chē n̄yets obenana bomná.

*Juan mo otjenayoquēcá Cristbiamá tojánin̄yē*

<sup>9</sup> Atše Juan, Jesucristbeyeca tšēngaftangbe catšata, cháftaca cán̄yīñe mo can̄yácá bētsemnama, cach tšēngaftangcá sēndēpadecena, tšēngaftangcá chanjēftsashjache Bēngbe Bētsabe amēndayoye jamashēnguama, y tšēngaftangcá Bēngbe Bētsabeñe jtsobátmanēse, uantado sēndmēna chē padecena soyēnguiñe. Bēngbe Bētsabe palabra sēnjánabuayiynama y Jesusbiamá ntšamo ndegombre endmēncá sēnjanóyebuambnama, atše šmonjetsanētšena mar bėjayoca can̄yē fshantsentše, Patmos ca uabáinoca. <sup>10</sup> Y tonjanopasá, can̄yē tmengo, chē ošbuáchiyēnga Bēngbe Utabnábioyē cán̄yīñe jētšchuayama te, atše sēnjanóquedá chē Uámana Espíritbeyeca corente mandaná, mo otjenayoquēcá soyēnga sēnjētson̄yaye, y atšbe stētšoica can̄yē jabuache oyebuambnayana sēnjanuena, mo can̄yē trompetēfjua cuafjuajatētcá; <sup>11</sup> mēntšá šontsanatsētsná: “Can̄yē librēšañe mábema lempe ntšamo contson̄yácá y cochjuíchmua chē Asia luaroca can̄ysēftañe ošbuachiyēngcá enefjuanēngbioyē: Efeso, Esmirna, Pérgamo, Tiatira, Sardis, Filadelfia y Laodiceoquēngbioyē ca.”

<sup>12</sup> Sēnjanobuértana jin̄yama nda chca šojtsanatsētsná, y chca sēnjanma ora, sēnjánin̄yē can̄ysēfta castellano candelerēsēnga; <sup>13</sup> y chē can̄ysēfta castellano candelerēsēnguiñe tsēntsaca can̄ya sēnjánin̄yē, mo entšacá in̄yná, can̄yē bēn entšayá uichētjoná, y cochóntscoca can̄yē tēntša castellano uasnanējaca. <sup>14</sup> Chabe stjēnashana uafjantsēsha, puerte uafjantsēsha mo can̄yē oveshabe boboshēshacá, y chabe fšnēbenga mo iñeshcá enjētsin̄yana. <sup>15</sup> Chabe shecuatšēnga enjētsēbuashin̄yīn̄yana mo bronscá, ndaybé natsana iñējana tcojuchnēngo enabé chaotsemnama y chentšana entšējuaca becá tcojajojó corente chaotsebuashin̄yīn̄yanama; y chabe oyebuambnayana jabuache enjētsenana mo bētscá bėjaye cuaftsebuachquēcancá. <sup>16</sup> Chabe catšbioica cucuatšīñe enjētsatbēna can̄ysēfta estrellēnga, y chabe uayoicana enjētsobocana can̄yē espadēja, n̄yets utoicajana puerte efsánēja, y chabe jubiá tša enjētsēbuashin̄yīn̄yana, mo chē shin̄yē corente, lempe ntšamo tojobenacá tojtsebuashin̄yīn̄yana orcá.

<sup>17</sup> Cha sēnjánin̄yē ora, chabe shecuatšentše mo obanacá sēnjánshajaye. Pero cha, chabe catšbioica cucuatše átšbeñe jajājuase, šonjanian̄yana: “Ndoñe matauatjana; atše

sëndmëna chë nyetsca soyënga bojatšayá y pochocayá, 18 chë sempre vida bomná. Atše obaná sënjamna, pero mora nyetsca tescama vida sëntsebmna. Atše obenana sëndbmna, y chë obenánaca entšangbioye ndoñe quenátamna infiernoca nyetsca tescama castigánënga jtsemnana, mo nyets tempo cuaftsobaná. 19 Ntšamo tconjinýcá mábema, chë quem tempo endmëna soyëngama y chë más chcoye echántsemna soyëngama. 20 Mëntšá endmëna chë atšbe catšbioica cucuatšinë tconjinýe canýsëfta estrellëngaca y chë canýsëfta castellano candelerëšëngaca: chë canýsëfta estrellënga montsinýinýná chë canýsëfta ñe ošbuachiyëngcá enefjuanëngbeñe chamotsemándama uámana ichmónënga, y chë canýsëfta candelerëšëngna chë canýsëfta ñe ošbuachiyëngcá enefjuanënga.”

## 2

### *Efesoca ošbuachiyëngcá enefjuanënga jábuayenama*

1 Mëntšánaca cha šonjaniyana:

“Mëntšá mabobema chë Efesoca ošbuachiyëngcá enefjuanëngbeñe chaotsemándama uámana ichmonábioye:

Mëntšá entsichamo chë chabe catšbioica cucuatšinë canýsëfta estrellënga entsatbëná y chë canýsëfta castellano candelerëšënga luarëjana entsaná: 2 Atše lempe sëndëtatšëmbo ntšamo tšëngaftanga šmoyenana; atše corente sëndëtatšëmbo tšëngaftanga jábuache šmotrabájama, y ntšamo tšëngaftanga Bëngbe Bëtsábeñe jtšobátmanëse šmnétsauantana padecena soyënguiñe šmojtsemna ora. Y átšnaca sëndëtatšëmbo tšëngaftanga ndoñe šmontsobena jtšëuantánana ntšamo bacna entšanga tmojtsamcá. Atšnaca sëndëtatšëmbo tšëngaftanga yejuana šmojarrepará y becá šmojenojuabó jinýama chë Jesucristbe ichmónënga imomna ca tmojtsichamëngbiamá; pero ndegombre chënga ndoñe chca quemátmëna; y chca šmojámayeca, tšëngaftanga mora šmontsetátšëmbo chënga bosterënga imomnama. 3 Padecena soyënguiñe becá šmojoboyá y chca ora, Bëngbe Bëtsábeñe šmobátmana. Chë soyënguiñe šmojasufrí, tšëngaftanga atše šmoservénama; y tšëngaftanga chca šmondëserveda, ainaniñe añemo jtšebomnama ntšajbanacá.

4 Pero canýe soye sëntsebmna tšëngaftangbe contra jayanama: Tšëngaftanga mora ya ndoñe cachca bonshánana quešmátsbmna ni atšbiamá ni nyetsca entšangbiamá, ntšamo átšbeñe jtšošbuáchiyama šmonjanbojatšé orcá.

5 Menójuabonga ntšamo chë tempo šmonjánbobonshanama, juabnayana motrocanga y cachiñe šmochtsama ntšamo chë átšbeñe jtšošbuáchiyama šmonjanbojatšé orcá.

Ndoñe chcase, atše tšëngaftangbioye chanjá jabuache jetsacastígama, jtsapochócantscuana, mo chë tšëngaftangbe cuenta entsemna candelerëse chabe puestentšana cuaftsejuanacá. Chca chanjama, tšëngaftanga juabnayana ndoñe chašmonjatrocace. <sup>6</sup> Pero tšëngaftangbe pavor quem tšabe soye šmontsebmna: Tšëngaftanga šmonduábotena lempe ntšamo chë nicolaíta ca uabaina entšanga tmojtsamcá, ndayá átsnaca sënduábotena.

<sup>7</sup> Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojsëtsëtsnacá. Chë padecena soyënguentsšana tšabá chamojábocana mo ayënjanyëngcá, chëngbiana chanjama chë nyetsca tescama yomna tšabe vida chamotsebmnama, y chca chënga mochántsemna mo chë nyetsca tescama yomna tšabe vida jtsebmnama betiyeshentšana cuaftsesacá, chë entšanga sempre oyejuayënga mondbetsemnoca ca” —cha šonjaniyana.

*Esmirnoca ošbuachiyëngcá enefjuanënga jábuayenama*

<sup>8</sup> Mëntsánaca cha šonjaniyana: “Esmirna bëts pueblentše ošbuachiyëngcá enefjuanëngbeñe chaotsemándama uámana ichmonábioynaca mëntsá mabobema:

Mëntsá entsichamo chë nyetsca soyënga bojatšayá y pochocayá, chë tonjanobaná y ndabiana Bëngbe Bëtsá tonjama cháuatayenama: <sup>9</sup> Atše sëndëtatšëmbo tšëngaftanga tša jabuache šmojasufrima y ndbomnjëmënga šmomnama, pero ndegombre Bëngbe Bëtsábíocana bëtscá tšabe soyënga šmondëtsóbomñe. Y sëndëtatšëmbo tša bacá tšëngaftangbiana mondoyebuambná chë judiënga imomna ca ichámënga, pero ndoñe ntsamana mo chë Bëngbe Bëtsabe bocacana entšangcá; chca, chënga mondmëna mo Satanasbe entšangcá, nje chábioye jtseservënese y jtsatschuanayëse.

<sup>10</sup> Ndoñe matauatjëngana chë ndoñe yapa bën y tšëngaftanga šmochjasufrima, er Satanás echanjama tšëngaftanguentsënga báseftanga cárceloye ínÿenga chacmëtámíama, jinÿama ntsachetšá Crístbeñe ošbuáchiyana šmobomnama, padecena soyënguiñe šmojtsemna ora; y entsamna baseftayté jasúfriana. Sempre bëtscá ošbuáchiyana, y ainaniñe bëts añemo šmochtsebmna, masque jobanámnaca chacmotsamna, Crístbiana trabájaye causa. Chca chašmojtsamëse, atše chanjama tšëngaftanga chamotsebmnama mo canÿe uacanana soycá, chë nyetsca tescama yomna tšabe vida.

<sup>11</sup> Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga

yojtsëtsëtsnacá. Chë padecena soyënguentsana tšabá chamojábocana mo ayënjanayëngcá, ndegombre chënga ndoñe queochátamna játauatjana nyetsca tescama castigánënga jatsmënama ca” —cha šonjaniana.

*Pérgamoca ošbuachiyëngcá enefjuanënga jábuayenama*

<sup>12</sup> Mëntsánaca cha šonjaniana: “Pérgamo bëts pueblentše ošbuachiyëngcá enefjuanëngbeñe chaotsemándama uámana ichmonábioynaca mëntsá mabobema:

Mëntsá entsichamo chë nyets utoicajana puerte efšana espadëja entsatbëná: <sup>13</sup> Atše sëndétatšëmbo ntšamo yomna tšëngaftangbe oyenentše, canye luare ndayentše Satanás entsángbioye puerte iuaménda. Masque chca, tšëngaftanga sempre nje atše šmondétseserverna, y ndocna te chešmáisayana átsbeñe ndoñe šmondošbuaché ca, ni mo Antipas, chë canye nyets tempo atšbe ustoná y atšbiana ndegombre oyebuambnayá, ínÿënga tmonjanóba ora. Y lempe chca tojopasá tšëngaftangbe pueblentše, ndayentše Satanás bëtscá entsana.

<sup>14</sup> Pero básefta soyënga sëntsebmoma tšëngaftangbe contra jayanama: Chentše tšëngaftangbeñe báseftanga montsemna, soyënga montsabatambá ntšamo bayté entsemna Balaam enjanabatambacá. Cha rey Balácbioye tbojanbuayená ntšamo jamana Israeloca entsángbioye jáingñama, chënga chë ntšamo ndoñe tšabá yomncá chamotsamama; y chca, Balac tojanma chë ínÿënga diosënga yojamna ca imojanajuabná soyënga jadórama uátsëmbona saná chë Israeloca entsanga chamosama, y shembása o boyabásaftaca bacna soyënga chamotsamama.

<sup>15</sup> Chéntšnaca ínÿënga montsemna, y chëngna chë nicolaitëngbe buatëmbana soyënguiñe mondošbuaché, y chca buatëmbana soyënga ndoñe tšabá quenátsmëna.

<sup>16</sup> Smochtsejuabnaye ntšamo šmojtsamama, chëngbioye tšëngaftangbeñe šmojtsëuantana ora, y chca jtsamana šmochjajbaná; er ndóñese, atše betscó tšëngaftangbioye chanjá, y chë chca buatëmbana soyënguiñe ošbuáchiyana ndoñe tmonjajbanángaftaca chanjétsja chë atšbe uayoicana endóbocana espadëjaca.

<sup>17</sup> Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsëtsnacá. Chë padecena soyënguentsana tšabá chamojábocana mo ayënjanayëngcá, chëngbioye maná chanjátšataye chamosama, chë celoca tandëše, ndayá Bëngbe Bëtsá tempo entsángbioye ndoñe tonjinÿanyé; y canye fjantse ndëtsëtëma chanjáyentsbuachiye, chënga oyejuayënga šmojábemama. Chiñe canye tsëm uabaina

echantsábemana; ndocná chë uabaina quenátabatma, ndayá nÿe chë chamojóyëngacñënga ca” —cha šonjaniana.

*Tiatiroca ošbuachiyëngcá enefjuanënga jábuayenama*

<sup>18</sup> Mëntsánaca cha šonjaniana: “Tiatira bëts puebloca ošbuachiyëngcá enefjuanëngbeñe chaotsemándama uámana ichmonábioynaca mëntsá mabobema:

Mëntsá entsichamo Bëngbe Bëtsabe Uaquiñá, chë mo iñeshcá uafšná y mo entšëjuaca jojona puerte chaotsebuashinÿinÿanama bronce shecuatsënga bomná: <sup>19</sup> Atše sëndëtatšëmbo ntšamo tšëngaftanga šmoyenama; sëndëtatšëmbo ntsachetsá tšëngaftanga Bëngbe Bëtsábioye y nÿetscángbioye šmababuánÿeshanama, ntšamo tšëngaftanga Bëngbe Bëtsábeñe puerte šmošbuáchema, ntšamo chábioye šmoservénama, ntšamo tšëngaftanga ínÿenga šmojujabuache y ntšamo Bëngbe Bëtsábeñe jtsobátmanëse becá šmojoboyá padecena soyënguiñe; y sëntsetatšëmbo mora más bëtscá tšabe soyënga šmojtsama, ntšamo tšëngaftanga átšbeñe jtsošbuáchiyama šmonjanbojatsé orscama.

<sup>20</sup> Pero canÿe soye sëntsebmna tšëngaftangbe contra jayanama: Tšëngaftangbeñe šmondëuantana chë shembása, mo chë bacna reiná Jezabelcá endmënábioye. Chë shembása entsichamo Bëngbe Bëtsabe juabna oyebuambnayá canmëna ca; pero chabe बातëmbana soyëngaca atšbe oservénënga entsaíngña, shembása o boyabásaftaca bacna soyënga chënga chamotsamama, y chë ínÿenga diosënga yojamna ca imojanajuabná soyënga jadórama uátsëmbona saná chamosama. <sup>21</sup> Cha sënjuená atše chjacastíga ca, chca juabnayana ndoñe tonjatrocace, y canÿe boyabásaftaca bacna soyënga amana ndoñe tontsajbanase. Cha jacastígama batšá sënjobatma, nderado chca amana nanjatróca, pero ndoñe chenátsbošena. <sup>22</sup> Mora atše chanjama bëts šocana cha chaboshachama, y chë cháftaca bacna soye tmojamënga, juabnayana ndoñe tmonjatrocá y chca jtsamana ndoñe tmontsajbanase, chëngbiana chanjama puerte chamosufrima; <sup>23</sup> y chë shembásabe básenga chantsëbaye. Chca, nÿetsquénache ošbuachiyëngcá enefjuanënga mochántsetatšëmbo, ndayá entšanga juabniñe y ainaniñe tmojuabnacá atše tsuábuatmama; y cada ona tšëngaftanguentsá, chca bacna soye cháftaca tojamá, ntšamo ibojtsomerecencá chanjacastíga.

<sup>24</sup> Pero tšëngaftangbentše, ínÿenga Tiatira pueblentše šmojtsemnënga, chë shembásabe बातëmbana soyënguiñe ndoñe šmontsošbuachenga, y chë ínÿenga imuábuatma Satanasbe soyënga, chë ndoñe paselo josértama soyënga ndoñe šmonjuabuátmanënga, tšëngaftanga ndoñe

quebochatamēnda inye más toto soye chašmotsamama.  
<sup>25</sup> Pero nye sempre šmochtsama ntšamo mora šmojtsamcá,  
 y šmochtsiyena ntšamo chē Bēngbe Bětsábíocana  
 šmojóyēngacñe soyēnga yomncá, atše quem luaroye  
 jesabámēntscuana.

<sup>26</sup> Chē padecena soyēnguentsana tšabá chamojábocana  
 mo ayēnjanayēngcá y ntšamo atše sēndēmandacá  
 chamojtsamēnga, chē quem luarentše ya ndoñe más  
 vida jesebomnámēntscuana, atšbe obenana chanjátšataye  
 nyetsca mándayēngbentša entšángbeñe jtsemándayama,  
<sup>27</sup> ntšamo atšbe Taitá chabe obenana šojatšetacá; y  
 chēnga entšángbioye puerte obenánaca mochántsamēndaye,  
 mo canye hierro varēfjaquécá, y chēngbe contra  
 chamojtsemnēngbioye mochántsapochocaye, mo nye  
 matbajēnga tmojtsētsjanjnacá. <sup>28</sup> Y chē jabínynama ora  
 bínynaye estrélnaca chanjátšataye.

<sup>29</sup> Chē jouenama tmojtsobenēnga, chamouena ndayá  
 Espíritu chē ndayenache ošbuachiyēngcá enefjuanēnga yo-  
 tsētsētsnacá ca” —cha šonjaniana.

### 3

#### *Sardisoca ošbuachiyēngcá enefjuanēnga jábuayenama*

<sup>1</sup> Mēntšánaca cha šonjaniana: “Sardis bēts pueblentše  
 ošbuachiyēngcá enefjuanēngbeñe chaotsemándama uámana  
 ichmonábíoyenaca mēntšá mabobema:

Mēntšá entsichamo chē Bēngbe Bětsabe canysēfta  
 espíritēnga y chē canysēfta estrellēnga bomná: Atše lempe  
 sēndētatsēmo ntšamo tšēngaftanga šmoyenama; atše  
 sēndētatsēmo tšēngaftangbiana ínēnga tša jtsichámuana  
 Bēngbe Bětsá jaserviama bētscá šmojtsama ca, pero  
 ndegombre tšēngaftanga nye batšatema šmotsama, y  
 chca, chabiana mo obanēngcá šmondmēna. <sup>2</sup> Botamana  
 šmochjenóbobonye y más šmochtsama chē Bēngbe Bětsá  
 jaserviama cabá šmondama básefta soyēnga. Ndoñe yapa  
 quenatájamna chē tšabe soyēngnaca chašmotsajbanama,  
 er atše sēnjinye chē Bēngbe Bětsábíoye jaserviama ntšamo  
 jtsamēse šmoyencá, atšbe Bětsabiana ndoñe yapa  
 tšabá quenátsmēna. <sup>3</sup> Asna, šmochtsenójuabnaye ndayá  
 Bēngbe Bětsábíocana šmojóyēngacñama, y chabiana  
 šmojouena soyēnguínacá. Ntšamo chē soyēnga yomncá  
 šmochtsiyena, juabnayana šmochjatróca y šmochjótša  
 bētscá jtsamana Bēngbe Bětsá jaserviama. Ndoñe tšabá  
 cach tšēngaftanga chašmonjenójuabose y juabnayana ndoñe  
 chašmonjatrocace, nye ndeolpe chanjá tšēngaftangbioye,  
 mo canye atbēbanacá, chabiana ndocná tontsejuabná ora,

y ndegombre tšëngaftanga ndoñe quešmochátstatšëmbo mocna ora atše tšëngaftangbioye chjama.

<sup>4</sup> Masque chca, Sardisentše tšëngaftangbeñe básefta entsanga mondmëna, chënga ndoñe chematajbaná oyenana tšabe soyënga jtsamëse, bacna soyënga játamama. Chëngna átšeftaca mochántsjaina uafjantsëjuangá uichétjonënga, chënga chca merecido montsebuajónayeca.

<sup>5</sup> Chë padecena soyënguentsana tšabá chamojábocana mo ayënjanyëngcá, chca uafjantsëjuangá uichétjonënga mochántsemna, y chëngbe uabaina ndoñe quichatsjuána chë tšabe vida mochjónyëngbe uabaina enduábemana librësentšana, ndayá atše, Bëngbe Bëtsabe delante y chabe angelëngbe delante, chënga atšbe entsanga imomna ca chanjayana.

<sup>6</sup> Chë jounama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yo- jtsëtsëtsnacá ca” —cha šonjaniyana.

*Filadelfioca ošbuachiyëngcá enefjuanënga jábuayenama*

<sup>7</sup> Mëntšánaca cha šonjaniyana: “Filadelfia bëts puebloca ošbuachiyëngcá enefjuanëngbeñe chaotsemándama uámana ichmonábioynaca mëntšá mabobema:

Mëntšá entsichamo chë uamaná y ndegombre oyebuambnayá, chë jtsemándayama puerta obenana bomná, ntšamo Rey David enjanbomncá, chë nda ndayá chaotsemnama tojamandá ora, ndocná ntobenana jamama chca ndoñe chaondëtsemnama, y ndayá ndoñe chaondëtsemnama tojamandá ora, ndocná ntobenana jamama aíñe chaotsemnama: <sup>8</sup> Atše lempe sëndétatšëmbo ntšamo tšëngaftanga šmoyenama.

Minyënga, atše sënjama tšëngaftanga bëtská tšabe soyënga chašmotsebomnama, y ndocná quenátobena jamama chca ndoñe chaondëtsemnama; y chca entsemna mo atše tšëngaftangbiamu canye bësháša cuafjatëfjácá, y chëša jtatámiamu ndocná quenátobena. Atše sëndétatšëmbo tšëngaftanga batšatema obenana šmobomnama, pero šmojouena ntšamo jtsamama tcbonjauyancá, y ndocna te chešmátayana atšbe entsanga ndoñe šmondmëna ca.

<sup>9</sup> Atše chanjama, chë mo Satanasbe entsangcá imomnënga, nye chábioye jtseservénëse y jtsatschuanayëse, chë judiënga imomna ca íchámënga, pero chë Bëngbe Bëtsabe bocacana entsangcá ndámënga y bosterënga, chënga tšëngaftangbioye chamua y tšëngaftangbe delante chamoshamentšé, tšëngaftangbiamu respeto jinyanÿiyama, y chca, chënga chamotsetátšëmbo atše sempre cbababuánÿeshanama.

<sup>10</sup> Atše tcbonjanamëndá, Bëngbe Bëtsábeñe jtsobátmanëse,

lempe chašmotsoboyá padecena soyënguiñe, y tšëngaftanga chca šmonjama. Chíyeca, atše puerte tšabá cbochántsanýena, chë quem luarentše oyenënga nyëtscanga jasúfriama y padecena soyënguiñe jtsemnama chaojtsemna ora, Bëngbe Bëtsábeñe aíñe o ndoñe mondošbuáchema jinýanýiyama.

11 Cachiñe quem luaroye betesco chanjésabo. Sempre šmochtsama ntšamo mora šmondamcá, y Bëngbe Bëtsábiocana šmojóyëngacñe soyënga šmochtsinýena; chca ndocná chaondobená ndayá jamana, y chë sóyeca chaoma tšëngaftanga ndoñe chašmondóyëngacñe ndayá Bëngbe Bëtsá chë chábioye jtseservénama ndoñe tmontsajbanángbioye yochjatšataycá, chëngbe uacanana soye. 12 Chë padecena soyënguentsána tšabá chamojábocana mo ayëñjanayëngcá, chëngbiana atše chanjama sempre Bëngbe Bëtsabe delante chamuesomñama, y chca, chënga mochántsemna mo chë Bëngbe Bëtsabe bëts yebnentša ucuatjoniñcá; ndocna te Bëngbe Bëtsábentšana quemocháisebocana; y chëngbeñe atšbe Bëtsabe uabaina chanjuábema y atšbe Bëtsabe bëts pueblentša uabaina, chë tsëm pueblo Jerusalén, chë celocana yobá pueblo, Bëngbe Bëtsábiocana. Y chëngbeñnaca chanjuábema atšbe tsëm uabaina. Lempe chca chanjama jinýanýiyama chënga Bëngbe Bëtsábenga mochtsemnama.

13 Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtšetsëtsnacá ca” —cha šonjaniyana.

### *Laodiceoca ošbuachiyëngcá enefjuanënga jábuayenama*

14 Mëntšánaca cha šonjaniyana: “Laodicea bëts puebloca ošbuachiyëngcá enefjuanëngbeñe chaotsemándama uámana ichmonábioynaca mëntšá mabobema:

Mëntšá entsichamo chë sempre Ndegombrá endmëná, chë Bëngbe Bëtsabe soyëngama ndegombre oyebuambnayá, y chë ndábeyeca Bëngbe Bëtsá quem luare tojanmá: 15 Atše lempe sëndëtatšëmbo ntšamo šmoyenama. Atše sëntsetatšëmbo tšëngaftanga ndoñe yapa šmontseboše Bëngbe Bëtsá jasérviaama, pero Bëngbe Bëtsabe buayenana soyënga ndoñe lempe šmontsabeté. Y chca, nýe batšatema šmojtseboše Bëngbe Bëtsá jasérviaama; chca, tšëngaftanga šmontsemna mo tibiye buyeshcá, ni ntšniñiye, ni shécbaniye. ¡Atše sëntseboše tšëngaftanga chašmotsemna mo ntšniñiye o shécbaniye buyeshcá, tšabá jtsamëse o tondaye! 16 Chca, tšëngaftanga tibiye buyeshcá šmondmëna, y ndoñe quešmátsboše bëtscá jamama, pero Bëngbe Bëtsabe soyënga ndoñe lempe šmontsabeté. Chíyeca atše sëntsejuabná



jtsěbatena, mo nda tibiye búyeshe tojětsbuashětj cá, chcaye ndoñe bondogustana causa.

17 Er tsěngaftanga jtsichámuana bomněnga šmomna ca, puerte tsábá šmojábocana y tondaye cmontsabuáshebena ca, pero ndoñe quešmátstatsěmbo Běngbe Bětsabe soyěnga bětscá cmojtsabuáshebenama. Chca, tsěngaftanga šmontsemna nŷa ndoñe tsábá, ínŷenga ngmėnana chacmotsabamna, mo ndbomnėjeměngcá, mo jtaněngcá, Běngbe Bětsabe soyěngama ntosertancá, y mo enašěngcá, bětscá Běngbe Bětsabe soyěnga ntsebonncá. 18 Chíyeca cbaruayená, átšbentšana chašmuatsjinŷe chě Běngbe Bětsabe soyěnga y uámana soyěnga, mo chě ena castellano jabemama, inějana fjěchněnguěse castellano átšbioye šmojtsontšabuamnañcá. Tsěngaftanga Běngbe Bětsabe delante mo enašěngcá šmondmėna, er cha endonŷá chě ba bacna soyěnga ntšamo tsěngaftanga šmojtsamcá. Smochjaleséncia atše chacbějabuache tsěngaftanga Běngbe Bětsabe bominŷiñe tsábenga chašmotsemnana, mo juichětjuama uafjantse entšayá átšbioye šmojtsantšabuamnañcá. Chca šmochjama, tsěngaftanga Běngbe Bětsabe delante ndoñe chašmondětsėuatjama. Smochjaleséncia atše chacbějabuache tsěngaftanga Běngbe Bětsabe soyěngama chacmósertama, mo tsěngaftanga bominŷe šocanama shnana átšbioye šmojtsontšabuamnañcá. Chca šmochjama, Běngbe Bětsabe soyěngama puerte tsábá chacmósertama.

19 Atše chě sěndábabuanŷeshaněnga sěndbaucácana y sěndbábuayenaye. Chíyeca, lempe ntšamo šmojobenacá šmochtsama Běngbe Bětsá jasėviana, y juabnayana šmochjatróca, y nŷets tempo puerte šmochtseboše Běngbe Bětsá jtseservėnana. 20 Nderado canŷe tsabe amigo yebnoye tojabo y tojachembo, tsěngaftanga šmojoueněse y bėšáša šmojebiatěfjěse, cha jamashěnguana, y cánŷiñe cháftaca joyejuayana y jasana. Cachcá, atše entšanga sěntsachembuana chašmolesenciá chěngbe ainaniñe jtsiyenama. Nderado nda šojóyeunase, atše chanjámashěngo chabe ainaniñe jtsiyenama, y nŷets tempo cháftaca cánŷiñe mo canŷacá chanjěftsemna.

21 Chě padecena soyěnguentsana tsábá chamojábocana mo ayėnjanayěngcá, atše chanjama chěnga puerte bětsětsanga chamotsemnana ntšamo atše sěndmėncá, y átšeftaca chamótbemama, atšbe uámana tbemanentše jtsemándayama, ntšamo atše atšbe uayayěngbioye sěnjayėnjanacá, y atšbe Taitáftaca chabe uámana tbemanentše tijotbemcá.

22 Chě jouenama tmojtsobeněnga, chamouena ndayá Espíritu chě ndayenache ošbuachiyěngcá enefjuaněnga yo-

jtsëtsëtsnacá” —cha šonjaniyana.

## 4

*Chë Ainënga Bëngbe Utabnabe uámana tbemanentša natsana imojtsechuanaye*

<sup>1</sup> Chentšana mo otjenayoquécá sënjáninýe. Sënjanrrepará y sënjáninýe celoca canýe bësása enjétsatëfjna, y chë natsana sënjanuena oyebuambnayana, chë enjamna mo canýe trompetëfjua cuafjuajatëtcá, mëntsá šonjétsatsaye: “Moye másëngo, atše cbochanjinýinýiye ntšamo más chcoye yochjopasacá ca.”

<sup>2</sup> Cachora, chë Uámana Espíritbeyeca, mo atšbe ainana celoca cuaftsemncá atše sënjanoquedá, y sënjáninýe celoca enjëtsemna canýe reybe uámana puesto, y chentše canýa enjëtsetbemana. <sup>3</sup> Chentše enjëtsetbemaná enjamna, puerte tëshinýná mo jaspe ndëtsbecá, puerte buanganá mo cornalina ndëtsbecá, y chë uámana puesto shëconana canýe tsëfcuácuatjo enjamna, y enjëtsebuashinýinýana mo canýe esmeralda ndëtsbecá. <sup>4</sup> Chë reybe uámana puesto juachajana, inýe uta bnëtsana y canta puesto sënjáninýe, y chiñe uta bnëtsana y canta bëtsejémënga amëndayënga monjëtsetbiamana, uafjantsëjuangá uichëtjonënga, y castellano coronëshangá monjëtstabestšajona. <sup>5</sup> Chë uámana puestentšana enjëtsovocana tcuinýëjënga, becá shauenanana y juesasanana; y chë uámana tbemaniñentša natsanoicna, canýsëfta uajuinýanëshha enjëtšangbototjuana; chë uajuinýanëshangá entsayana chë Bëngbe Bëtsabe canýsëfta espíritënga. <sup>6</sup> Y chë uámana puestentša natsanoica enjëtsemna mo canýe mar bejaycá, tëshinýniye mo canýe cristal ca uabaina ndëtsbecá.

Chë luariñe tsëntsaca, chë uámana puesto enjëtsemnentše y chë shëconánëjana monjëtsemna canta Ainënga, nýëtsañe fšnëbéngaca, natsanoica y stëtsoica. <sup>7</sup> Chë natsana Ainá enjamna mo canýe leoncá, chë inýe Ainá mo canýe toroščá, chë inýe Ainá enjánbomna mo canýe entšabe jubiácá, y chë inýe Ainá mo canýe águila tojtsongüëfjnacá. <sup>8</sup> Chë canta Ainënga, cada ona chnënguana juatëngmiášha enjanábomna, y tsoicajana y shjoicajana nýëtsañe fšnëbénga monjánbomna. Y chënga nýets tempo, ntjochnacá mëntsá monjánichamo:

¡Uamaná, Uamaná, Uamaná, Bëngbe Utabná,

Bëngbe Bëtsá nýets obenana bomná,

nda enjamná, endmëná y sempre echanjëftsemná ca!

<sup>9-10</sup> Chca chë Ainënga Bëngbe Bëtsá bëtscá tmontanchuá, Bëngbe Bëtsá chë uámana puestentše tbemaná, chë nýets tempo y nýetsca tescama oyená. Chënga puerte respeto chabiamana monjëtsebomna y bëtscá tmontanchuá. Cada ora

chënga chca tmonjanma ora, chë uta bnëtsana y canta bëtsëjémënga amëndayënga, chë uámana puestentše tbemanabe shecuatšentše joshamentšiyana y chábioye jtsatschuanayana, chë coronëshangá chë natsanoica jutšanana, y mëntšá jtsichámuana:

<sup>11</sup> Aca nÿets mercedo condëtsobuájoñe, Bëngbe Utabná y Bëngbe Bëtsá,  
entšanga chamotsinÿanÿnama, aca puerte bëtsá comnama, y chamotsichamo aca nÿets respeto buajoná comna, y nÿets obenana bomná comna ca,  
er aca nÿetsca soyënga tcojama;  
aca icnabóšeyeca chë soyënga yojtsemna y aca chca tcojanma ca.

## 5

### *Chë uabemana uándmanana tsbuanácha y chë Oveshatema*

<sup>1</sup> Chë uámana puestentše enjsetbemanabe catsbioica cucuatšifne canÿe uándmanana tsbuanáchanaca sënjáninÿe, y nÿétsañe enjétsabemana tsoicajana y shjoicajana, y canÿsëfta tsengájaše sellëngaca enjétsajandmanana. <sup>2</sup> Y canÿe ángel puerte obenana bomná sënjáninÿe, y cha mëntšá enjétsayebuache: “¿Nda mercedo yobuájona, quem uándmanana tsbuanácha jutëfjonama y chë sellënga jutsécama ca?”

<sup>3</sup> Pero, ni celoca, ni quem luarentše, ni quem luarentša jashenoye, ndocná quenjatsmëna obenánaca chë uándmanana tsbuanácha jutëfjonama, ni juinÿama. <sup>4</sup> Y atše puerte sënjánenobošachna, er ndocná ntjónÿnana mercedo buajoná chë uándmanana tsbuanácha chautëfjonama, ni chauinÿama. <sup>5</sup> Pero canÿa chë bëtsëjemënguentsá šonjaniyana: “Ndoñe más matenóbošachena; mouena, chë Judabe pamillentšá, León ca uabobainá, mando y obenana bëtsebomnama, chë rey Davídbentšana Entšá, tonjayëñaná; cha entsobena chë uándmanana tsbuanácha jutëfjonama, y chë canÿsëfta sellënga jutsécama ca.”

<sup>6</sup> Chora sënjáninÿe, chë uámana puesto y chë canta Ainënga y chë bëtsëjémëngbe tsëntsaca, canÿe Oveshatema tsanana, pero enjétsinÿna mo cuaftsobacá. Chë Oveshatema enjánbomna canÿsëfta tsëtjonëše y canÿsëfta fšněbé. Chë canÿsëfta fšněbé monjaninÿinÿná chë Bëngbe Bëtsabe canÿsëfta espíritënga, chë Bëngbe Bëtsá nÿets quem luarëjana tojánichamonga. <sup>7</sup> Chë Oveshatema tonjanobeconá y chë uándmanana tsbuanácha tonjanaca, chë uámana puestentše tbemanabe catsbioica cucuatšentsana; <sup>8</sup> y chabe cucuatšifne tonjanaca ora, chë canta Ainënga y chë uta bnëtsana y canta bëtsëjémënga amëndayënga chë Oveshatembe shecuatšentše

tmonjanoshamentšé. Njëtscanga monjétsëtbëna arpangá y castellano copbenga jútjena inciensiýeca; chë copbenga inciensiýeca enjamna chë Bëngbe Bëtsabe entsanga tmojayana palabrënga, cháftaca jencuéntama ora. <sup>9</sup> Y quem tsëm canto montsancántaye:

Aca merecido condëtsobuájoñe, chë uándmanana tsbuanácha chacuacama y chë sellënga chacutsécama;

er acbe buiñe juabuáshanëse tconjanóbana, y chca enjamna mo crocénana cuafjëtšajocá, Bëngbe Bëtsabiana chamotsemnama,

entsanga njëtscá cachca buiñe bomnënguentsána, njëtscá biyana bomnënguentsána, njëtscá canýe entšanguentsána, y njëtscá mándayëngbentša entšanguentsána.

<sup>10</sup> Aca tcojama chënga chamotsobena ácaftaca jtsemándayama y uámanënga chamotsemnama, Bëngbe Bëtsábioye mo bachnangcá chamotseservénama,

y quem luarentše chënga montsemánda ca —chënga monjëtseversiaye.

<sup>11</sup> Y chca sënjetsonýaye ora, mallajta angelëngbe oyebuambnayana sënjanuena, y chënga monjëtsemna chë uámana puestentše, chë Ainënga y chë bëtsëjëmënga amëndayëngbe shëconana. Njëtšá bëtscá angelënga monjëtsemna, corente mallajta; <sup>12</sup> y chënga mëntšá monjëtšayebuache:

¡Chë Oveshatema cuafjobacá endmëná,

merecido endëtsobuájoñe, njëtš obenana, njëtš bomnana,

njëtš osertánana y njëtš añemo chaotsebomnama,

y entsanga chabiana chamotsichamo cha njëtš respeto buajoná yomna ca,

y chamotsinýanýnama cha puerte bëtsá y uamaná yomnama,

y njëtscanga chamotsatschuanama ca! —chënga monjëtšayebuache.

<sup>13</sup> Y sënjanuena, lempe ntšamo Bëngbe Bëtsá tojanmcá aina soyënga, celoca, quem luarentše, quem luarentša jashenoye y chë mar béjayoca, chëngnaca mëntšá monjëtšichamo:

¡Chë uámana puestentše tbemanábioye y chë Oveshatema njëtscanga njëtš tempo y njëtscá tescama chamótsatacheuanaye

y chamotsichamo chata puerte uámanata y njëtš respeto buajonata ibomna ca,

y chamotsinýanýná chata puerte bëtsëtsata y obenata bëtsemnama ca!

<sup>14</sup> Y chë canta Ainënga monjëtšichamo: “Chca chaotsemna ca.” Y chë bëtsëjëmënga amëndayëngna tmonjanoshamentšé y chátbioye monjëtšatacheuanaye.

## 6

*Chë Oveshatema chë canÿsëfta sellënga tonjanëtsëcá*

<sup>1</sup> Chentsana más sënjáninÿe; chë Oveshatema chë canÿsëftentsana natsana sello tonjanëtsëcá ora, sënjanuena canÿa chë canta Ainënguentsana puerte jabuache, mo cuafjajuesascá, mëntsá enjëtsichamo: “¡Mabo ca!”

<sup>2</sup> Sënjanrrepará y sënjáninÿe canÿe fiantse couaye, y chábeñe enjetsenjaquená canÿe arquëja enjëtsatbëna. Chábioye canÿe coronësha tmonjaniyé, y mo canÿe ayënjanayacá tonjëftsanbocna, y cabá más jatsÿenjanámnaca.

<sup>3</sup> Chë Oveshatema chë inÿe sello tonjanëtsëcá ora, sënjanuena chë inÿa chë canta Ainënguentsana mëntsá enjëtsichamo: “¡Mabo ca!”

<sup>4</sup> Y inÿe couaye tonjánbocna, canÿe buanganá; y chë enjetsenjaquená obenana tonjanóyëngacñe jamama chë fshantsentsa natjëmbana vida chaotsopochocama, entsanga chamotsenóbama; y canÿe bëts espadëja tmonjanoyé.

<sup>5</sup> Chë Oveshatema chë inÿe sello tonjanëtsëcá ora, sënjanuena chë inÿa chë canta Ainënguentsana mëntsá enjëtsichamo: “¡Mabo ca!” Sënjanontjësé y canÿe ftsenga couaye sënjáninÿe, y chë enjetsenjaquená canÿe romanësha enjëtsëtbëna.

<sup>6</sup> Y chë canta Ainëngbeñe canÿe oyebuambnayana mëntsá sënjanuena: “Nÿe canÿe kilo trigo canÿe tesca trabajuama, y unga kilo cebadá canÿe tesca trabajuama; pero chë aceitiye y chë vínoyna ndoñe cattsepochócaye ca.”

<sup>7</sup> Chë Oveshatema chë inÿe sello tonjanëtsëcá ora, chë ústonoca Ainá enjëtsichamo: “¡Mabo ca!”

<sup>8</sup> Sënjanontjësé y canÿe shatsësiye couaye sënjáninÿe; chë enjetsenjaquená Obanana ca enjanabaina, y stëtsoica bonjëtsëstona canÿa, Obanënga imomna luare ca uabainá; y chátbioye obenana tmonjanatsatá cántañentsana cánÿentse quem luarentse jtsepochócama, chentsa entsanga jtsapochócaye, entsanga tmojt-sentsjanama, bëts shëntsangëgaca, šocanëngaca y quem luarentsa tsátjaye bayëngaca.

<sup>9</sup> Chë inÿe sello tonjanëtsëcá ora, sënjáninÿe chë altarentsa tajsoye chë tmojanóbanëngbe espíritënga, chë Bëngbe Bëtsabe palabra entsanga abuayiynayama tmojanóbanënga.

<sup>10</sup> Chora chënga tmonjanontsé tša uayebuáchana: “Uamaná y ntšamo tojšëbuachenacá lempe amá bëngbe Nduiño, žntseco quem luarentsa entsangbiama cochjayana ndoñe tsabá tmonjamama, y chë bëngbioye obanayama cochjácastigaye ca?”

<sup>11</sup> Chentsana nÿetscángbioye uafjantse entsáyá tmonjaniyé y tmonjanéyana batsatema más chamobatmá ca, chë cachëngcá Crísbeyeca catšátanga y

oservénënga, chë cachëngcá mochjanóbanënga, nyetscanga choca chamojtsemnëntscuana.

<sup>12</sup> Y más sënjaninë; chë inye sello cha tonjanëtsëcá ora, jabuache fshantse tontsanangmëmana; shinye tontsanftsénganga, mo chë obaná tojtsemnama juichëtjuama entsayacá, y nyets juashcona mo buiñcá enjëtsinyna, <sup>13</sup> y estrellatëmënga celocana fshantsoye tontsantquëcjana, mo canye higo betiye jabuache binyiaca tojtseshatiyeyna ora, chë nguëfshna higuëbenga cuafjatquëcjancá. <sup>14</sup> Y celoca luare tontsanenatjëmba mo canye tsbuanácha cuafjuandmanacá, y nyetsca tjañe y béjayoca fshantsënga, chë ndayentse enjamntšana tontsanojuaná; <sup>15</sup> y nyetscanga, fshantsoca reyënga, uámanënga, soldadëngbe amëndayënga, bomnënga, obenana bomnënga, y nyetscanga chë nyets tempo nye inyabiama oservénënga y chë cachëngbiama trabájayëngnaca, chë cuevëshënguiñe y bëts ndëtsbenguenache tjañe tmontsanóitana; <sup>16</sup> y chë tjañëngoye y chë ndëtsbengoye montsanichamo: “¡Bëngbioye šmotsëtebuantsá y šmotsaitame, chë uámana puententse tbemanabe bominyëntšana, y chë Oveshatembe uabouana castigo, cha bëngaftaca tbojetnama, bëngbeñe ndoñe chaondëtsemnama! <sup>17</sup> Er chë uachuana te chabe castigo jtsebínynama te tojóshjango; y mora ¿nda nanjobenaye chë sóyeca ndoñe chamondëtsepochochocama ca?” —chënga montsanichamo.

## 7

*Chë Bëngbe Bëtsábioye oservénënga chë uabouana castigüëntšana mochántsatsëbacana*

<sup>1</sup> Chca tonjanopasá chentšana, canta angelënga sënjaninë, monjëtsatsana chë quem luarentša canta opochócayenache; chënga ndoñe quemënjatanleséncia chë canta binyiënga jtsebínynama, ndoñe chaondëtsebinyiayama, ni fshantsentse, ni mar béjayoca, ni ndocna betiyeshënguiñe. <sup>2</sup> Inye ángelnaca sënjaninë, shinye bocana luaroicana enjetsabó, y chë Bëngbe Bëtsá Ainabe sello enjëtsiyëboye. Chë ángelna chë inye canta angelëngbioye, ndëmuanyëngbioye obenana tmojanatšatá chë fshantsentse y mar béjayoca lempe jtsepochochocama, chëngbioye jabuache tonjánabachembo: <sup>3</sup> “¡Todaye šmatjapochóca, ni fshantsoca, ni mar béjayoca, ni betiyeshënguiñe, chë Bëngbe Bëtsabiama oservénëngbioye chë sëlloca juentsaca fchayauinynanantscuana, ndoñe chamondëtsepochochocama ca!”

<sup>4</sup> Y sējanuena buétanga chē sélloca tmojánauinýnanayama: canýe patse, canta bnétsana y canta uaranga entsanga uinýnanánēnga nýetsca Israeloquentša bēts pamillanguentšana.

<sup>5</sup> Judabe pamillentšana, bnétsana uta uaranga uinýnanánēnga;

Rubenbe pamillentšana, bnétsana uta uaranga;

Gadbe pamillentšana, bnétsana uta uaranga;

<sup>6</sup> Aserbe pamillentšana, bnétsana uta uaranga;

Neftalibe pamillentšana, bnétsana uta uaranga;

Manasesbe pamillentšana, bnétsana uta uaranga;

<sup>7</sup> Simeonbe pamillentšana, bnétsana uta uaranga;

Levibe pamillentšana, bnétsana uta uaranga;

Isacarbe pamillentšana, bnétsana uta uaranga;

<sup>8</sup> Zabulonbe pamillentšana, bnétsana uta uaranga;

Josebe pamillentšana, bnétsana uta uaranga;

y Benjaminbe pamillentšana, bnétsana uta uaranga entsanga.

*Chē mallajta entsanga uafjantsējuangá uichétjonēnga*

<sup>9</sup> Chentšana, sējanrepará y mallajta entsanga sēnjánanýe, ndocná quentaisobenaye jacúntana, nýetsca mándayēnguentshana, nýetsca cachca buiñe bomnēnguentshana, nýetsca canýe entsanguentshana, y nýetsca biyana bomnēnguentshana; chēnga monjétsatsana chē uámana puesto chē Oveshatembe natsanentše, uafjantsējuangá uichétjonēnga y ramēshangá monjétsētbēna. <sup>10</sup> Nýetscanga tša monjétsayebuache:

¡Bēnga atsebacayana endobá, Bēngbe Bētsá,

chē uámana puestentše entsetbemanábentšana,

y chē Oveshatémbentšana ca!

<sup>11</sup> Y nýetsca angelēnga, chē uámana puesto y chē bētsējémēnga amēndayēnga y chē canta ainēngbe shēconana monjétsatsanēnga, chē uámana puestentša natsanoica tmonjanoshamentšé, fshantsóntscoñe jotsejbénase, y Bēngbe Bētsá tmonjanadorá, <sup>12</sup> mēntšá jayanēse:

¡Chca chaotsemna!

Bēngbe Bētsábioye nýets tempo y nýetsca tescama chamotsadorana

y nýets ainánaca cha chamotsatschuaná.

Entsanga chamotsinýanýná cha puerta bētsá y uamaná bétsemnama;

cha endmēna nýets osertánana bomná, y nýets respeto buajoná, y nýets obenana y añemo bomná.

¡Chca chaotsemna ca! —chēnga monjétsichamo.

13 Chentsana, canya chë bëtsëjemënguentsá tonjanoyebuambá y šonjantjá: “¿Ndëmuanyënga imomna chë uafjantsëjuangá uichëtjonënga, y ndëmocana tmojabo ca?”

14 “Taita, aca chëngbiama cotátsëmbo ca” —atše sënjanjuá.

Y cha šonjaniana: “Chënga montsemna chë jabuache ngmenënguentsana tšabá tmojabocanënga; chë Oveshatema chëngbiama tojóbana y chëngbe bacna soyëngama perdonánënga montsemna; chëngbe uichëtjonëjuangá tmojtsaboshabé y chë Oveshatembe buñëca tmojtabofjantsé.

15 Chíyeca chënga chë Bëngbe Bëtsabe uámana puestentša natsanoica montsemna,  
y chábioye nyets tempo chabe delante mondëserveda,  
y chë uámana puestentše entsetbemaná,  
chëngbenache jtsemnëse, chënga echántsanyëna, mo cuafjutsebotscá.

16 Ya ndoñe más shëntsana, ni uajuendayana quemochátsbomna;

shinyama, ni yapa jënyama ya ndoñe más quemochátssufrina;

17 er chë Oveshatema, chë uámana puestentša natsana tsëntsaca entsemná,

chëngbioye mo oveshëngcá echantsabuajënä,

y echanjunatse béjaye vida bomniye yóbocana luaroye,

y Bëngbe Bëtsá echanjama ya ndoñe más ngmënana chamondëtsebomnama ca” —cha šonjanjuá.

## 8

### *Chë ústonoca sello*

1 Chë Oveshatema chë uándmanana tsbuanáchañe chë ústonoca sello tonjanëtsécá ora, celoca ndocá quentëtsënëna mo tsëntsa hora nyëtsá.

2 Chora sënjananyë chë canyësëfta angelënga, chë Bëngbe Bëtsabe delante monjëtsatsanënga; chëngbioye canyësëfta trompetëfjuangá tmonjaniyé.

3 Chentsana inye ángel tonjánashjango, canyë castellano matbëtémaca incienso jajuinÿiyama, y altar natsanoica tonjantsá; chábioye bëtscá incienso tmonjanoyé chaojuinÿema chë castellano altaroca, chë uámana tbemana natsanoica enjëtsëmnoca. Chë ángel incienso tonjanjuinÿé Bëngbe Utabná jëtschuayama, cánÿiñe nyetsca chë Bëngbe Bëtsabe entšanga tmojoyebuambá palabréngaca, cháftaca jencuéntama ora. 4 Y chë incienso juinÿnentša ngona, chë ángelbe cucuatšentsana Bëngbe Bëtsabe delante tonjanótsjua, cánÿiñe chë Bëngbe Bëtsabe entšanga cháftaca jencuéntama palabréngaca.

5 Chentsana chë ángel chë incienso jajuinÿiyama matbëtëma tonjanca, chë altarentša chebábengaca tonjanajutjé, y quem luaroye tonjanëtsana. Chora enjëtsëmná tša juesasanana,



corente shauenanana, bëtscá tcuinjënga, y quem luare tontsanangmëmana.

### *Chë trompetëfjuangá*

<sup>6</sup> Chora chë canÿsëfta angelënga, chë canÿsëfta trompetëfjua uabomnënga, tmonjanoprontá chëfjuangá juajatëtama.

<sup>7</sup> Chë natsana ángel chabe trompetëfjua tonjanájetëto, y quem luaroye tmonjanëtšana bëntstá y íñeshe, cánÿiñe buiñeca. Ungañentšana cánÿentse quem luarentse tontsanjuinÿe, úngañentšana cánÿentse betiyeshënguiñe y nÿetsca nguëfshna shacuanënguíñnaca.

<sup>8</sup> Chë inÿe ángel chabe trompetëfjua tonjanájetëto, y chora chë mar béjayoye tmonjanëtšana canÿe soye mo canÿe bëtstjañe tojtsangbototjuancá, y chë mar béjayiñe úngañentšana cánÿentse buiñe tontsanóbema. <sup>9</sup> Chë mar béjayiñe vida imobomnëngbeñe úngañentšana cánÿentse tontsanopochocá, y chë barquënguëntšnaca úngañentšana cánÿentse.

<sup>10</sup> Chentšana chë inÿe ángel chabe trompetëfjua tonjanájetëto, y canÿe bëtstrella, mo canÿe uajuinÿanëshacá enjétsangbototjuana, celocana tonjanótsatse chë úngañentšana cánÿentse béjayënguiñe, y béjaye óbocanénache. <sup>11</sup> Chë estrella enjanabaina Untjana ca; y chë úngañentšana cánÿentse buyeshënguiñe untjiye tontsanóbema, y chë untja búyeshe causa ba entšanga tmonjanóbana.

<sup>12</sup> Chë inÿe ángel chabe trompetëfjua tonjanájetëto, y chora tontsanóndbema chë úngañentšana cánÿentse shinÿiñe, y chë úngañentšana cánÿentse juashconiñe y chë estrellënguíñnaca. Chca, nÿetsca chentša úngañentšana cánÿentse ibetiñe tonjanoquedá, y chë causa ndoñe quemëntétsebinÿnaye posufta horëntscuana, bnëté canta hora y ibeta canta hora.

<sup>13</sup> Chentšana, sënjanrrepará y sënjanuena canÿe águila, tsbanánoca celoca enjetsongüefjná, jabuache mëntšá enjétsichamo: “¡Tša lastema, tša lastema, tša lastema quem luarentša entsangbiama, chë inÿe trompetëfjuangá chë inÿe unga angelënga chamojuájetëto ora ca!”

## 9

<sup>1</sup> Chentšana chë inÿe ángel chabe trompetëfjua tonjanájetëto, y sënjáninÿe canÿe ángel quem luaroye jastjanguana y enjétsinÿna mo canÿe estrella celocana quem luaroye cuaftsotsatsancá; y moye tonjánashjango ora, tmonjanoyé chë uabouana tboca atëfjñentša llavëfja.

<sup>2</sup> Chë uabouana tboca atëfjñentse tonjánatëfjo, y chentšana becá ngona tonjanótsjua, mo bëtst hornentša ngoncá; y chë uabouana tboye atëfjñentse ngona causa shinÿe tontsanibétata y nÿets celoca ena ngona enjëtsemna. <sup>3</sup> Chë

ngonentšana ba tsátjaye chapulinga tmonjánbocana, y nyets quem fshantsějana tmonjanáshana; y chěngbioye obenana tmonjanatšatá, chánaca jándbemama, mo chě juetjuama alacraněngbe obenancá. <sup>4</sup> Chěngbioye tmonjanaměndá tondaye ntjándbemana chě shacuaněnguiñe, ni ndocna nguěfshna matěnguiñe, ni ndocna betiyeshiñe; nje chě juentsaca chě Běngbe Bětsabe sélloca nduinýnanana entšangna aĩne. <sup>5</sup> Pero ndoñe chematanalesenciá entšangbioye jobáyana, ndayá nje jamama chěnga shachna shinýentscuana tsetšanana chamotsebomnama; y chě chěnga monjánama chamotsebomnama tsetšanana enjamna mo canye alacranbe uetjoniñcá.

<sup>6</sup> Chca tempo chaojtsemna ora, entšanga mochántseenguaye ntšamo jtsóbanama, chě tsetšaněnga jauántama ndoñe quemochátobena causa, pero ndoñe quemochátinýena ntšamo jaměse jtsóbanama; y masque tša mochántseboše jóbanama, chora chěngaftaca ndoñe chca queochatopása, mo jóbanama ndoñe tmontsobencá.

<sup>7</sup> Chě tsátjaye chapulinga monjétsinýna mo couayěngcá prontáněnga jama entšangaftaca jéntsjava; chěngbe bestšašĩne monjanábomna mo castellano coroněshangacá, y chěngbe jubiá enjamna mo entšabe jubiácá. <sup>8</sup> Stjėnashe monjánbomna mo shembásabe stjėnashacá, y chěngbe juatsašěnga mo leonbe juatsašěngcá. <sup>9</sup> Chěngbe cuerpěnga jeněuyanama cochaca monjánbomna morocho soyěnga, mo hierro soyěngcá, y chěngbe juatěngmiashangá tmojtsabonjná ora, chě shauenanana bětscá enjamna, mo ba cochěshangá couayěnga cuaftsasjojnacá, chě inýengaftaca jéntsjava tmojětsátjajo ora tojtseshauenancá. <sup>10</sup> Chěnga monjanábomna mo alacranbe uascuatšějuacá, ba uetotjěfjangaca, y chě uascuatšějuaca obenana monjánbomna shachna shinýentscuana entšanga mal chamotsepasama. <sup>11</sup> Chě tsátjaye chapulinga canye aměndayá monjánbomna, chě uabouana tboca mándaye ángel; hebreo biyañna cha uabainá Abadón ca y grieguiñna Apolión o pochocayá ca.

<sup>12</sup> Chě natsana pochócyana ya tocjochněngo, pero más chcoye cabá inye uta soye más pochócyana cachcá echántsemna.

<sup>13</sup> Chentšana chě inye ángel chabe trompetěfjua tonjanájeteto, y canye oyebuambnayana sėnjanuena, chě Běngbe Bětsabe delante enjětsemna castellano altarentša juatsboica lado sibienache obocanentšana enjětsobocana. <sup>14</sup> Y chě oyebuambnayana, chě trompetěfjua tonjanájeteto y enjětsėtběna ángelbioye tbonjaniyana: “Chě canta angelěnga chě Eufrates bėts fshájaye tsachoca utsbuaněnga mējafjoná ca.” <sup>15</sup> Y chě

canta angelënga tmonjanëjafjoná; y nÿa chë ora, chë te, chë shinÿe y chë uatama chëngbiöye tmojanaprontá, chë quem luarentša entsángbeñe úngañentšana cánÿentšënga jtsëbáyama. <sup>16</sup> Atše sënjanuena buétanga imojamna chë angelëngaftaca tmojána soldadënga, couayënguiñe: uta patse millonënga ca.

<sup>17</sup> Mëntsá sënjánanÿe mo otjenayoquëcá chë couayënga y chë chëngbeñe enjaquenënga: Chë enjaquenënga monjánbomna morocho soyënga cochaca, jenëuyanama, y chë soye buanganana enjáninÿna, mo iñcá, y fchendana mo chë uámana ndëtsbé jacintcá y tsësiyana inÿnana mo azufrcá; y chë couayënga monjánbomna mo leonbe bestšašcá, y chëngbe uayoicana enjétsobocana iñe, ngona y azufrana. <sup>18</sup> Y chë úngañentšana cánÿentše entsanga tmonjanóbana quem unga uabouana pochócaye soyëngaca, chë couayëngbe uayoicana enjétsobocanana: iñe, ngona y azufrana. <sup>19</sup> Er chëngbe obenana entsanga japochócama monjánbomna uayáshañe y uascuatšëjuañe; er chëngbe uascuatšëjua enjuamna mo mëtšcuayëngcá, bestšašëngaca, y chëjuanga causa entsanga mal montsanpásaye.

<sup>20</sup> Pero chë inÿe entsanga, chë uabouana pochócaye soyëngaca ndoñe tmonjanopochocanga, juabna ndoñe chematantrocá, y ndoñe chematanajbaná amana chë bacna soyënga ntšamo monjanamcá; ndoñe chematanajbaná adórayana chë bacna bayëjënga, ni chë mo diosënga cuaftsemncá jtsejuabnayëse imojánadorana castellano soyënga, midio soyënga, bronce soyënga, ndëtsbé y niñëbé soyënga; y chca soyënga ndoñe quemënjatobena ni jinÿama, ni jouenama, ni jtsanama. <sup>21</sup> Juabna ndoñe chematantrocá y ndoñe chematanajbaná entsanga obanayana, encjuanayana, bacna soyënga boyabása o shembásaftaca jtsamëse oyenana, ni atbëbanana.

## 10

### *Chë ángel base uándmanana tsbuanáchaca*

<sup>1</sup> Chentsana sënjáninÿe inÿe ángel, puerte obenana bomná; celocana enjétsastjajuana, y chabe shëconana canÿe jantšetëshe enjétsemma; chabe bestšaše tatsëtsacá canÿe tsëfcuácuatjo. Chabe jubiá shinÿcá enjétsëbuashinÿinÿana, y chabe shecuatšënga mo úcuatjona niñëbenga cuaftsoiñcá.

<sup>2</sup> Chabe cucuatšinë enjétsëtbëna canÿe base uándmanana y utëfjna tsbuanácha. Chabe catsbioica shecuátšëca chë mar béjayoca tonjantsá, y chë uañicuayóicatšëcna, quem fshantsentše. <sup>3</sup> Y jabuache tonjanoyó, mo canÿe león cuaftseyocá; y tonjanoyó ora, canÿsëfta juesasanentša jabuache shauenanana sënjanuena. <sup>4</sup> Chë canÿsëfta

juesasana chca tmonjanoyebuambá ora, atše sēnjanoprontá ntšamo chēnga tmonjanayancá juabemama; pero canye oyebuambnayana celocana sēnjanuena, mēntšá šonjétsatsaye: “Nye aca cochtsójuabnañe ntšamo chē canyēsēfta juesasana tmonjayancá, ndocnábioye catjauyana, y chē soye ndoñe catjuábema ca.”

<sup>5</sup> Chora chē ángel, chē mar bėjayoca y quem fshantsentše atsaná sēnjaninjá, chabe catšbioica cucuatše celoye tonjanatsbaná, <sup>6</sup> y tonjanjurá Bēngbe Bētsabiama, chē nyets tempo y nyetsca tescama oyenabiama, chē celoca, quem luare, chē mar bėjaye, y lempe chē luarēnguiñe yobinýncá tojanmabiama. Tonjánayana: “Ya ndoñe más quemochatobatma; mora Bēngbe Bētsá echanjama ntšamo tojašebuachenacá, <sup>7</sup> er chē tempo chaojóshjango, chē ústonoye ángel chabe trompetēfjua juajatētama chaojontsé ora, chora ya echanjochnēngo ntšamo Bēngbe Bētsá jamama yojuabnacá; chē soye nyetsca entšángbioye cha ndoñe chenatinýanjé, ntšamo tempo cha chabe oservēngbioye, chē chabe juabna oyebuambnayēngbioye tojanabuayenacá ca” —cha tonjánayana.

<sup>8</sup> Chē atše sēnjanuena oyebuambnayana celocana enjétsobocanana, cachiñe šonjanatsētsá y šonjaniyana: “Motsa y mauaca chē mar bėjayoca y quem luarentše ángel entsemnabe catšbioica cucuatšīñe base uándmanana y utēfjna tsbuanácha ca.”

<sup>9</sup> As atše chē ángelbioye sēnjána; chē base uándmanana tsbuanácha chašuíyema sēnjaniyana, y cha šonjanjuá: “Quemēcha, motsásañe. Acbe uayoye uamešquénēcha mo tjouangbe meloycá echántsamna, pero acbe uafsbioyna puerte uauntjēcha echantsábema ca.”

<sup>10</sup> As chē base uándmanana tsbuanácha chē ángelbe cucuatšentšana sēnjanaca, y sēntsanásañe; y atšbe uayoye meloycá enjétsamna, pero sēnjanabmuaná y atšbe uafsbioyna puerte uauntjēcha tontsanábema. <sup>11</sup> Chora šmonjaniyana: “Aca cmontsemna cachiñe jtétabuayenana, ntšamo Bēngbe Bētsá tojayancá chē ntšamo yochjopásama, ba canye luarentša entšángaftaca, ba mándayēngbentša entšángaftaca, ba biyana bomna entšanguentsēngaftaca y quem luarentša reyēngaftaca ca.”

## 11

### *Chē útata Bēngbe Bētsabe juabna oyebuambnayata*

<sup>1</sup> Chentšana canye medídaye niñēfja šmonjanoyé, mo jatšēmbonēfjca, y šmonjaniyana: “Motsa y Bēngbe Bētsabe bēts yebna y chentša altar cochjamedída, y cochjácutayebueta entšanga chentše Bēngbe Bētsábioye imojtsadorana.

<sup>2</sup> Pero chë Bëngbe Bëtsabe yebnentše más shjoica luarna cachcá cochjonýaye, ndoñe catjamedída, er chiñe chë ndoñe judiëngbiana endmëna; y chënga, chë uámana ca uabaina bëts pueblama, canta bnëtsana y uta shinýentscuana soyënga mochántsama chiñe jtsepochoćama, mo cuaftsebotajnaycá.

<sup>3</sup> Pero atše, útata atšbiana tatsëmbuata y oyebuambnayata chanjichamuá atšbe cuenta entšángbioye jábuayenama, canýe uaranga y uta patse y chnënguana bnëtsana tentscuana. Chatna uajojësha entšayangá uichëtjonata bochántsemna, chca, ngmena bomnama jinýanýiyama ca” —chata tbonjánayana.

<sup>4</sup> Quem útata atšbiana tatsëmbuata y oyebuambnayata bontsinýinýena chë uta olivos betiyeca y chë uta candelerëseca, ntšamo Bëngbe Bëtsá, chë quem luarentše mandayabe delante endmëncá. <sup>5</sup> Nderado nda tojtseboše chatbiana bacna soye jamama, ndoñe quentatobenaye ntšámnaca jáborlana, er uayoicana íñeshe nanjóbcna y chë uayayëngbioye nantsapochóca; nderado nda tojábosena chatbiana bacna soye jamama, cachcá cha buántsemna jóbanama. <sup>6</sup> Chë útata obenana bondbomna celoca jtsachtama, ndoñe chaonduaftema, entšángbioye Bëngbe Bëtsabiana chabojsabuayiyá tese; obenana bëjayënga buiñe jtsebiama, y jamama quem luarentše chaotsóndbemama, nýetscna pochóca soyëngaca, bueta sóynaca ntšamo chata tbojtseboščá.

<sup>7</sup> Pero ntšamo Bëngbe Bëtsabiana ibotatsëmbcá entšángbioye jábuayenama chata chabojapochocá ora, chë uabouana bayá, chë corente bëts tboicana chaojabocná, chátbioye echántsatsjaye, echantsayëñaná y echantsëbaye. <sup>8</sup> Y chatbe óbana cuerpo, chë corente bëts pueblentša tsáshenañe echanjoquéda, chë chatbe Utabná tmojancrucificá luarentše, y chë bëts pueblo inýetšá juabáyamna nántsemna mo chë Sodoma y Egiptó luaroycá. Chentše endmëna mo chë bëts pueblënga Sodoma y Egiptcá, er chentše chë entšanga yapa bacna soyënga jtsamana. <sup>9</sup> Y unga y tsëntsa tentscuana, chë obanatbe cuerpo mochantsonýaye, nýetsca canýe luarentša entšanga, nýetsca cachca buiñe bomna entšanga, ba biyana bomna entšanguentšana y ba mándayëngbentšá entšanga; ndoñe quenátslesenciana chata jutabuantsama. <sup>10</sup> Chata bochjóbanama, quem luarentše oyenënga mochanjóyejuaye; tša oyejuayënga mochántsemnama, ndayánaca mochanjénatšëtaye, er ntšamo chë Bëngbe Bëtsabe juabna oyebuambnayata tbojanayancá, tojanma quem luarentše oyenënga puerte chamosufrima.

<sup>11</sup> Pero chë unga y tsëntsa te tonjanochnëngo ora, Bëngbe

Bëtsá tonjanma chë obanata chábuatayenama; chentšana tbon-tantsata, y chë monjétsantješnënga tša uatjana tonjanëbuache. <sup>12</sup> Chora canÿe jabuache oyebuambnayana tbonjanuena, celocana mëntsá enjétsëtsësnaye: “Moye mašënguata ca.” Y chatna canÿe jantšetëshiñe tbonjántsjua, y chatbe uayayënga chca monjétsönÿaye. <sup>13</sup> Cachora quem fshantse jabuache tontsanangmémana, y chë bëts pueblentse bnëtsanentsana cánÿentse tontsanáshajaye, y canÿsëfta uaranga entšanga tmonjanóbana. Chë ainënga tmonjanoquedanga, tša auatjanánënga, chë celoca Bëngbe Bëtsábioye montsanadorana.

<sup>14</sup> ¡Chë inÿe uabouana soye quem luare japochócama, mora tocjochnëngo, pero betsko chë ústonoye uabouana pochócaye soye echanjóshjango!

### *Chë ústonoye ángelbe trompetëfjua*

<sup>15</sup> Chë ústonoye ángel chabe trompetëfjua tonjanájatëto ora, celoca tša monjétsayebuache, mëntsá monjétsichamo:

Ora tocjobuache, Bëngbe Utabná y chabe Uámana Uabuayaná Jesucristbe amëndayana quem luarentse chaotsemnama, y chë amëndayana echántsemna nÿets tempo y nÿetsca tescama ca.

<sup>16</sup> Y chë uta bnëtsana y canta bëtsëjémënga amëndayënga, chë chëngbe uámana puestiñe Bëngbe Bëtsabe delante monjétsëbiamanënga, tmonjanoshamentsé, fshantsóntscöñe jotsejbénase, y Bëngbe Bëtsá tmonjanadorá, <sup>17</sup> mëntsá jayanëse: Bëngbe Utabná, Bëngbe Bëtsá nÿets obenana bomná, aca chë mora cha condmëná y chë tempo cha conjamná cbontsatschuaná, er nÿa mora acbe bëts obenánaca soyënga cochjama, acbe amëndayana jóntšama.

<sup>18</sup> Ba luarentša entšanga ácaftaca tmonjanotšatjayená; pero chëngaftaca cmojetnama chë uabouana castigo jtsebinÿnama te tocjóshjango, chë tempo tmojanóbanëngbiana jayanama tšabá o ndoñe tšabá tmonjëftsemama.

Tonjóshjango chë hora, uacanánana jtatšatayama chë achiana oservëngbioye, chë acbe juabna oyebuambnayëngbioye, chë acbe entšángbioye, y chë acbe uabaina nÿetscangbiana más bëts uabainana yomnama juabnayëngbioye, uámanënga y nduámanënga; y chë tempo tonjóshjango, quem luare pochocayënga jt-sapochócayama ca —chënga tmonjánayana.

<sup>19</sup> Chora, Bëngbe Bëtsabe bëts yebna celoca tonjantëfjo, y choye enjëtsebinÿna chë cajontema, ndayëtema yojaninÿanÿná ntšamo Bëngbe Bëtsá chabe entšángbioye tojanašebuachenacá; y chora enjëtsemna tcuinÿënga, tša shauenanana, juesasanana, quem fshantse tontsanangmëmana y bëtscá bëntstá tonjantquëcjana.

## 12

### *Chë shembása y chë uabouana bayá*

<sup>1</sup> Chentšana, canÿe bëts soye celoca tonjanonÿná entšanga canÿe soye jinÿanÿiyama: canÿe shembása, shinÿe mo chabe uichëtjoniaca, juashcona chabe shecuatšentša tajsoye, y chabe bestšašinë canÿe coronësha bnëtsana uta estrellëngaca. <sup>2</sup> Chë shembása ngomamaná enjëtsemna, y chë šešona jónÿnama yojëtsobecuama jabuache enjëtseyoye, chë šešona jónÿnama cha puerte jasúfriama ibojamna causa. <sup>3</sup> Y chora inÿe bëts soye celoca tonjanonÿná, entšanga inÿe soye jinÿanÿiyama: canÿe uabouana dragón buanganá, canÿsëfta bestšašëngaca y bnëtsana tsëtjonëšëngaca y chë bestšašënguiñe enjanábomna canÿsëfta coronëshangá. <sup>4</sup> Chabe uascuatšëjuaca úngañentšana cánÿentse chë estrellatëmënga celocana tontsansjojó, y quem fshantsoye chëtëmënga tontsanëtšana. Y chë dragón chë šešona jtsebomnama shembásabe delante tonjantsá, chë šešonatémbioye jtsósañama, cha tojonÿná ora. <sup>5</sup> Chora chë shembása canÿe šešona boyabásetema bontsanbomna, nda nÿets luarenache entšángbioye yochtsamëndaye mo canÿe hierro varëfjaquécá. Pero chë šešona chábentšana tmontsanjuaná y Bëngbe Bëtsábioye, chabe uámana puestoye tmontsanámbañe. <sup>6</sup> Chë shembásana entšanga ndoyena luaroye tontsanachá, Bëngbe Bëtsá canÿe luare ibojaboprónta choye, chentše saná chamocaredadoma, canÿe uaranga y uta patse y chnënguana bnëtsana tentscuana.

<sup>7</sup> Chentšana celoca canÿe entsjanayana enjëtsemna: Miguel, chë angelëngbe amëndayá, y chabe angelënga chë dragónaftaca monjëtseentsjanaye. Chë dragón y chabe angelënga monjëtseatsjanaye, <sup>8</sup> pero ndoñe chematanobená jáyënjanama, y chëngbiama ya ndoñe más luare celoca quentëtsemna. <sup>9</sup> Chcase, chë uabouana dragón chocana tmontanábocna, chë tempsca mëtšcuaye, chë Diablo y Satanás ca uabainá, y chë bëtscá entšángbioye aingñayá; quem fshantsoye cha tmontsantsatše, y chë cha yojanamënda angelëngnaca.

<sup>10</sup> Chora canÿe jabuache oyebuambnayana celoca sënjanuena, mëntšá enjëtseichamo: Chë Bëngbe Bëtsá entšanga jätsebacama tempo ya tonjóshjango.

Mora Bëngbe Bëtsá echanjínjanyie chabe obenana y mándayana,  
 y chabe Uámana Uabuayaná Jesucristbe obenana  
 jtsemándayama;  
 er chë Cristbe delante bëngbe catsátanga mal aquedayá ya  
 tmontábocna,  
 nda nyets tempo Bëngbe Bëtsabe delante mal enjanaquedayá.

<sup>11</sup> Bëngbe catsátanga cha tmonjayënjáná,  
 er Cristo, chë mo tmojóba Oveshatemcá, Bëngbe Bëtsá bacna  
 soyëngama entšanga cháuaperdonama,  
 tonjanóbana, chabe buiñe juabuáshanëse,  
 y chë ndegombre soyëngama chënga monjanóyebuambnáyeca;  
 er chëngbe vida chëngbiama ndoñe quenjatámana;  
 Jesucristo jasérviana jóbanama chënga monjanprontana.

<sup>12</sup> ¡Chcasna, celoca corente oyejuayana chaotsemna,  
 y tšëngaftanga chë choca oyenëngbeñnaca!  
 ¡Pero tša lastema chë fshantsoca y mar béjayoca oyenëngbiama,  
 er chë diablo tšëngaftangbiye tonjástjango, corente tšatjayá,  
 er cha entsetátšëmbo ya nye batšá yojtsábojamna chë chábiye  
 mochjacastígama ca! —enjétsichamo.

<sup>13</sup> Chë dragón quem fshantsoye tmojtsantsatsáma  
 tonjáninje ora, chë šešona boyabásetema tbonjanëshjango  
 shembásabioye tbontsanacmé. <sup>14</sup> Pero uta juatëngmiásha, chë  
 bëts aguilbeshá, chë shembásabioye tmonjaniyé, chabiana  
 tmojanprontá luaroye chaongüefjoma, entšanga ndoyena  
 luaroca, chë dragónbentsana bënoca; y chentše enjamna  
 chë shembásabioye saná chamuájuatšema, unga y tsëntsa  
 uatëntscuana. <sup>15</sup> Chora chë dragón, chabe uayoicana bëts  
 béjaye tonjanbuashëtjo chë shembásabe stëtšoica, chaobuama  
 y chabotsambama; <sup>16</sup> pero quem fshantse chë shembásabioye  
 tbonjanájabuache, er chë fshantse mo uayašacá tonjantëfjo, y  
 chë dragonbe uayoicana béjaye obocniye tontsanobmuánañe.  
<sup>17</sup> Y chë dragón chë shembásabioye tondaye jamana  
 chenatanobená causa, corente cacháftaca tbonjánetna, y  
 tonjána chë ínýenga, chë shembásabe basengcá mondmënënga  
 játsjayama, ntšamo Bëngbe Bëtsá yomandacá imobedecénënga,  
 y ntšamo Jesucristo tonjanabuayená ndegombre soyëngaca  
 sempre imoyenënga. <sup>18</sup> Y chë dragón chë mar béjaye tsachañe  
 tonjantsá.

## 13

*Chë dragón tonjanma, chë mar béjayoca uabouana bayá  
 chabe obenana chaotsebomnama*

<sup>1</sup> Chentšana atše sënjáninje, canje uabouana bayá  
 chë mar bejajoicana tonjánbocna; enjánbomna canysëfta



bestšašënga y bnëtsana tsëtjonëšënga, y chëšënguiñe bnëtsana coronëshangá, y chë bestšašënguiñe bañe enjëtsabemana Bëngbe Bëtsabiama contra oyebuambnaye uabaina. <sup>2</sup> Chë uabouana bayá sënjaninýa enjamna mo canýe leopardcá, mo osbe shecuášangaca, y chë uayáshana mo leonbeshacá. Chora chë dragón tonjanma chë uabouana bayá chaotsebomnama chabe obenana, y chabe uámana puesto jtsemándayama, y chabe bëts mando. <sup>3</sup> Canýe chabe bestšašënguentse enjëtsinýna mo jóbanama tëtšeniñcá; pero chentse tbontanóbema; y chora quem luarentša nýetsca entšanga ojanánënga monjëtsemna, y chë uabouana bayábioye montsanëyeunana. <sup>4</sup> Y chë dragón montsanadorana, chë uabouana bayábioye obenana tbojánatšetama; y chë uabouana bayábioynaca montsanadorana, mëntšá jayanëse: “Ndocná obenana quenátsbomna quem uabouana bayacá, y ndocná quenátobena chábioye jayënjanama ca.”

<sup>5</sup> Chë uabouana bayábioye tbonjanlesenciá corente podesca Bëngbe Bëtsabiama chaotsóyebuambnama, y obenana tbonjanatšetá, canta bnëtsana y uta shinýentscuana chaotsemándama. <sup>6</sup> Y podesca Bëngbe Bëtsabiama tonjánayana, soyënga chabe contra, chabe bëts yebnama y chë celoca oyenëngbe contra. <sup>7</sup> Chábioynaca tbonjanlesenciá chë Bëngbe Bëtsábenga imomnënga játsjayama, jáyënjanantscuana; y obenana tbonjanatšetá chaotsemándama nýetsca cachca buiñe bomna entšángbeñe, nýetsca canýe entšángbeñe, nýetsca biyañe bomnëngbeñe, y nýetsca mándayëngbentša entšángbeñe. <sup>8</sup> Chë uabouana bayá nýetsca quem luarentša entšanga mochántadorana. Chë entšanga mondmëna ndëmuanýengbe uabaina ndoñe yontsábemana, chë Bëngbe Bëtsábioye jëtschuayama mo canýe oveshatemcá, tojanóbanabe librëšañe. Bëngbe Bëtsá quem luare cabá ndëma ora, quem librëšañe tojanábema nýetscanga chë tšabe vida mochjónýenëngbe uabaina.

<sup>9</sup> Chë jouenama obenënga, chamouena.

<sup>10</sup> Chë cárceloye jama ibomná, cárceloye bochanjotóca jama; chë espadéjaca jobanamá, espadéjaca echanjóbana.

Chíyeca quem luarentse entseyta, chë Bëngbe Bëtsábenga imomnënga padecena soyënguiñe tmojtsemna ora, puerte uantadënga jtsemnana y Bëngbe Bëtsábeñe jtsošbuáchiyana, mo chë Bëngbe Bëtsabe entšangcá.

<sup>11</sup> Chentšana inýe uabouana bayá sënjáninýe, quem fshantsentsana enjëtsébocana; uta tsëtjonëse mo oveshabešcá enjánbomna, pero mo canýe dragoncá, mo canýa Satanásbeyeca mandanacá enjëtsoyebuambnaye. <sup>12</sup> Y enjánama soyënga chë natsana uabouana bayabe nýets obenánaca, chabe delante.

Chë fshantsentša bayá tonjanma nÿetsca luarentše oyenënga chamotsadoránama chë natsana uabouana bayábioye, chë jóbanama tëtšeniñe tbontanobemá. <sup>13</sup> Cha ba bëtš soyëngnaca enjánama chabe obenana entšanga jinÿanÿiyama, entšangbe delante jamana iñe celocana fshantsoye chaótsatsšamnaca. <sup>14</sup> Y cha tbonjanlesenciá chaoma chabe obenana jinÿanÿiyama chë natsana uabouana bayabe delante. Chë soyëngaca entšanga tonjanaíngñé, y quem luarentša entšanga tonjanëyana canÿe soye chamopormá, y chë soye cháótsinÿna mo chë natsana uabouana bayacá, chë espadëjaca tëtšená enjamná, y chora tšabá enjetsatsmëná. <sup>15</sup> Y chë inÿe uabouana bayábioye tmonjanlesenciá obenana chaotsebomnana jamama, chë natsana uabouana bayábioye jadórana entšanga tmonjanma soye vida chaotsebomnana, y chë soye jóyebuambayama chaotseobenámnaca, y jamama chë chábioye ndoñe tmonsadoránënga chamóbanama. <sup>16</sup> Y tonjanma, nÿetscángbioye, básenga y bëtšétsanga, bomnënga y ndbomnënga, cachëngbiamana trabájayënga y nÿe ínÿabiamana nÿets tempo oservénënga, catšbioica cucuatšniñe o juentsaca chamuínÿnanama. <sup>17</sup> Y ndocná quenjátanobena ni jiyama, ni jobuámiñama, chë uinÿnanánana ndoñe tontsebomnëse; chë uabouana bayabe uabaina o chë chabe uabainama yomna número.

<sup>18</sup> Chë número jinÿenamna bëtscá osertánana jtseytana. Chë becá osertánana bomná cháuinÿyena ntšamo chë uabouana bayabe número iuayancá, er canÿe entšabe número endmëna. Chë número endmëna chë chnënguana patse y chnënguana bnëtsana y chnënguana.

## 14

*Chë canÿe patse y canta bnëtsana y canta uaranga entšangbe canto*

<sup>1</sup> Y más sëntsanonÿá. Sënjáninÿe, chë Oveshatema, enjétsatsjabna Sión ca uabaina tjoca, y cháftaca monjëtsemna canÿe patse y canta bnëtsana y canta uaranga entšanga, y chëngbe juentsaca enjétsabemana chë Oveshatembe y chabe Taitabe uabaina. <sup>2</sup> Chora sënjanuena celocana canÿe shauenanana, mo bëtscá béjayënga y bëtš juesasana shauenanancá; y chë shauenanana enjamna mo chë arpësha uenanayënga chëngbe arpëshangá tmojtsabuastocá. <sup>3</sup> Chënga canÿe tsëm canto montsancánta Bëngbe Bëtšabe delante, chë chabe uámana puesto y chë cháftaca canta Ainënga y chë bëtšëjëmënga amëndayëngbe natsanentše. Y ndocná quenjátanobena chë canto juatsjinÿyana, nÿe chë canÿe patse y canta bnëtsana y canta uaranga quem

luarentšéngbentšana atsebácanéngna aíñe. <sup>4</sup> Chénga monjanmëna chë shembásoftaca ndocna bacna soye tmonjanmënga, er chénga imojanenómánda chca bacna soyénga ndoñe ntsamama; chë Oveshatema ndëmoye tojtsá y chéngnaca choye jtséstonana. Chénga imojamna chë natsanénga chë quem luarentša entsánguentše atsebácanénga jtsemnama, y chénga atsebácanénga imojtsemna Bëngbe Bëtsá y chë Oveshatema jtsaservénama. <sup>5</sup> Chénga ndocna te tmonjanobosteró; ndocná quenátobena jayanama chénga bacna soye tmojanma ca.

*Ntsamo chë unga angelénga tmojánayana*

<sup>6</sup> Chentšana inye ángel sënjáninye, tsbanánoca celëjana enjétsongüefnjaye. Cha enjánbomna canye nyets tempscama oservena buayenana soye, entsángbioye jáuyanama, nyets quem luarentše oyenénga, nyetsca mándayéngbentša entsanga, nyetsca cachca buiñe bomna entsanga, nyetsca biyañe bomnéngbeñe y nyetsca canye entsángbiamá. <sup>7</sup> Y jabuache mëntsá enjétsichamo: “¡Bëngbe Bëtsabiamá šmochjájuaboje cha nyetscángbiamá chë más uamaná endmënama, y cha šmochtsatschuanaye, er ya tonjóshjango chë tempo ntsamo entsanga tmojamama tsábá o ndoñe tsábá bëtsemnama cha cháuyanama! ¡Chë celoca y quem luare, chë mar bójaye y nyetsca chë fshantsentsana óbocana bójayénga tojamá šmochtsadorana ca!”

<sup>8</sup> Chábentšana inye ángel mëntsá enjétsichamo: “¡Ya bëts castigo, ya bëts castigo chë Babilonia bëts puebloca entsángbeñe echántsemna!, ndëmuanyénga tmojinýanyé ntsamo puerta bacna soyénga shembása o boyabásoftaca jtsamama y inye corente bacna soyéngnaca, y chentšana nyets quem luarentša entsanga mo cach Babilonioquéngcá tmojama. Chë causa, Bëngbe Bëtsá echanjama chéngbiámnaca chabe uabouana castigo chaotsemnama ca.”

<sup>9</sup> Chë útatbentšana inye ángel jabuache mëntsá enjétsichamo: “Nderado nda chë uabouana bayábioye y chë chábioye jadórama pormana soye tojtsadorana, y tojalesenciá chabe uinýananana soye juentsaca o cucuatšiñe chamojajoma, <sup>10</sup> chánaca bontsemna, chë Bëngbe Bëtsabe uabouana castigo jasúfriana. Entsanga puerta bacna soye tmojamama, Bëngbe Bëtsá puerta tbojetna, y chë causa echanjama chë castigo chéngbeñe chaotsemnama. Y chë uámana angelénga y chë Oveshatembe delante, chë bayá adorayábioye puerta mochanjatsetšená, íñeshe y azúfreca. <sup>11</sup> Chca chamojtsesufrina ora, becá ngona echantsóbocana, y chë ngona nyets tempo chca echantsótsjuaye; y chénga, chë uabouana bayá y chábioye jadórama pormana soye

adórayënga, y chabe uinÿnanana soye bomnëngbiama, ndocna te chë tsetshanana queochatëjbana ca” —cha enjëtsichamo.

<sup>12</sup> Chíyeca quem luarentşe entseyta, chë Bëngbe Bëtsabe mandënga obedecënënga y Jesúsbeñe puerte oşbuáchiyana bomnënga, chë Bëngbe Bëtsabe entsanga, padecena soyënguiñe tmojtsemna ora, puerte uantana jtsemnana.

<sup>13</sup> Chentsana canÿe oyebuambnayana celocana sënjanuena, mëntśá šonjëtsatsaye: “Mëntśá mábema: ‘Tśa oyejuayënga mochántsemna chë mëntescana mochjóbanënga, Bëngbe Utabnáftaca cánÿiñe mo canÿacá jtsomñëse ca.’ ”

“Aíñe ca” —chë Uamana Espíritu tonjayana—, “chënga ya ndoñe más queochátamna jatrabájana, ni jasúfriana, er chënga tmojama tśabe soyënga Jesús jasérviana, y chë soyëngama chënga tśabe bendicionënga mo uacanancá celoca mochanjóyëngacñe ca.”

### *Ndayá chë angelënga quem luarentşe tmojanatbaná*

<sup>14</sup> Chora más sënjáninÿe; sënjáninÿe canÿe fjantse jantşetëshe, y chëshiñe canÿa enjëtsëtbemana. Cha enjamna mo canÿe entsacá; chabe bestśaşiñe enjanábomna canÿe castellano coronësha, y cucuatşiñe canÿe puerte efšana mëtştá enjëtsatbëna. <sup>15</sup> Chentsana, chë celoca Bëngbe Bëtsabe bëts yebnentšana inÿe ángel tonjánbocna, y jabuache bonjëtsatsaye chë jantşetëshiñe tbemanábioye: “¡Acbe mëtştaca machbonja y shajuanënga matbaná, er chë játbanama tempo ya tonjóshjango; chë quem luarentśa shajuana ya tonjaboche ca!” <sup>16</sup> Y chë jantşetëshiñe enjantbemaná chabe mëtştaca quem luariñe tonjánachbonja, y nÿets quem luarentşe atbanániñe tonjanoquedá.

<sup>17</sup> Chentsana inÿe ángel chë celoca Bëngbe Bëtsabe bëts yebnentšana tonjánbocna; chánaca canÿe puerte efšana mëtştaca. <sup>18</sup> Y chë altarentšana inÿe ángel tonjánbocna, chë mando bomná iñesheca castigo entsangbiama jamama; y chë puerte efšana mëtştá bomna ángelbioye jabuache tbonjanianya: “¡Acbe mëtştaca machbonja y chë fshantsoca nÿetsca uvas betiyeshënguentśa uvasëşangá mátabe, er ya uabochenëşangá entsamna ca!” <sup>19</sup> Y chë ángelna chabe mëtştaca quem luariñe tonjánachbonja, y nÿetsca quem luarentśa uvasëşangá tonjanátabe, y lempe chë juantsëtetjiana luaroye tonjanëtšana. Chë soye entsinÿinÿná ntşamo yochtsemnana Bëngbe Bëtsabe uabouana castigo. <sup>20</sup> Chë uvasëşangana, chë bëts pueblentšana chaboye tmonjanantsëtetje, y chë luarentšana tśa buiñe tonjanóbocna; tonjanojutjé couayëngbe uayashbenëşantscoñe y mo unga patse kilómetrënga tonjanábuashana.

## 15

*Chë angelënga chë canÿsëfta pochócaye soyëngaca*

1 Chentsana, inÿe bëts soye entsanga inÿe soyama jinÿanÿiyama, celoca sënjaninÿe, canÿe puerte bëts soye: canÿsëfta angelënga canÿsëfta pochócaye soyëngaca, chë ústonoye pochócaye soyënga. Chë soyënga chaajtsemnentsana ya ndoñe inÿe pochócaye soye yochántsemna, er chëntscoñe Bëngbe Bëtsá yochjacistíga, lempe ntšamo cha jamama tojanjuabocá.

2 Canÿe mar béjaynaca sënjaninÿe, mo cristalca enjétsinÿna iñeca enájuaabniye; y chë béjaye juachaca monjétsatsana chë tšabá tmojanbocnënga, y ni chë uabouana bayá, ni chë chábioye jadórama pormana soye ndoñe tmonjánadoranga, y chë uabouana bayabe uabainama yomna número chëngbeñe chaotsemnama ndoñe tmonjanlesencianga. Nÿetscanga chënga monjétsabomna Bëngbe Bëtsá tojanëtsatá arpangá.

3 Chënga, canÿe canto monjétsacantaye ntšamo Moisés, chë Bëngbe Bëtsabe oservená tojancantacá, y ntšamo chë Oveshatema tojancantacá. Mëntsá monjétsacantaye:

Puerta bëts soyënga y tšabe soyënga entsemna lempe ntšamo  
aca tcojamcá,

Bëngbe Utabná Bëngbe Bëtsá nÿets obenana bomná;  
lempe ntšamo jtsamëse aca icoyena, acbe bominiñe puerte  
tšabe y ndegombre soyënga yomna,  
nÿets luarënguenache entsangbe Rey.

4 Bëngbe Utabná, ¿nda nanjájuaboye aca nÿetscangbiama ndoñe  
más bëtsá condmëna ca,  
o ndoñe cmantsatschuanaye?

Nÿe aca uamaná condmëna;  
nÿetsca mándayëngbentsá entsanga ácbioye mochanjabo,  
ácbentše mochanjoshamentšiyé aca jadórama,  
er ntšamo tcojamcá lempe entsángbioye mora tcojinÿanÿé,  
y lempe ntšamo aca tcojamcá tšabá jtsemnana ca —  
monjétsacantaye.

5 Chca chentsana sënjanontješé y sënjaninÿe chë celoca Bëngbe Bëtsabe bëts yebna tonjantëfjo, chë Bëngbe Bëtsá Moisésbioye tbojaníyé leyënga uajajóntšë. 6 Y Bëngbe Bëtsabe bëts yebnentsana tmonjánbocna chë canÿsëfta angelënga, chë canÿsëfta pochócaye soyënga uambayënga, uafjantse lino entsëjuangá uabuashinÿinÿanëjuangá uichëtjonënga, y tëntša castellano uasnanëjëngaca cochóntscoñe. 7 Chentsana, canÿa chë canta Ainënguentsá chë canÿsëfta angelëngbioye tonjanoyé canÿsëfta castellano copbenga jútjena chë Bëngbe Bëtsabe uabouana castígoca; Bëngbe Bëtsá chë nÿets tempo y nÿetsca tescama vida bomná. 8 Chorna, chë Bëngbe Bëtsabe

bëts yebna celoca becá ngónaca tonjanojutjé, y chë ngona enjétsobocana Bëngbe Bëtsábentsana, chabe buashinÿinÿanana y obenana jtsinÿanÿnayëse; y Bëngbe Bëtsabe bëts yebnoye ndocná quenjátanobena jamashënguana, chë canÿsëfta angelëngbe canÿsëfta pochócaye soyënga candochnënguëntscuana.

## 16

### *Chë castígoca copbenga*

<sup>1</sup> Chentsana, canÿe jabuache oyebuambnayana sënjanuena, chë celoca Bëngbe Bëtsabe bëts yebnentsana enjétsobocana, y chë canÿsëfta angelëngbioye mëntsá enjétsëtsëtsnaye: “Mot-sajna y quem canÿsëfta copbenga, chë Bëngbe Bëtsábiocana endóbocana uabouana castígoca, fshantsoca šmochjabuashcja ca.”

<sup>2</sup> Chora chë natsana ángel tonjána y chabe copbé quem luariñe tonjanbuashcja, y nÿetsca entsanga chë uabouana bayabe uinÿnanana soye bomnënga y chë chábioye jadórama pormana soye adórayëngbe cuerpiñe bañe bacna nguayanana tonjanóbocna, puerte tsetšénana.

<sup>3</sup> Chentsana, chë inÿe ángel chabe copbé mar béjayoca tonjanbuashcja, y choca búyeshe buiñcá tontsanóbema, mo canÿe entsá obanabe buiñcá, y nÿetscanga chë mar béjayoca vida bomnënga tmontsanóbana.

<sup>4</sup> Chora chë inÿe ángel chabe copbé béjayënguiñe y béjaye obocanënguiñe tonjanbuashcja, y buiñe tontsanobiamana.

<sup>5</sup> Chentsana sënjanuena, chë béjayënguiñe mando bomna ángel mëntsá enjétsichamo:

Aca nÿetsca soyënguiñe tšabá amá condmëna,  
er aca tcojayana chë quem luarentša entsanga chca castigánënga chamotsemnama.

Bëngbe Bëtsá, Uamaná, mora chca condmëna y chca conjamna;

<sup>6</sup> er chënga tmonjama, chë acbe entsanga  
y acbe juabna oyebuambnayëngbe buiñe chauábuashanama,  
jtsëbáyëse;

y mora tconjama chënga buiñe chamofšema.

Nÿets mercedo imobuájona chca japásama ca —cha enjétsichamo.

<sup>7</sup> Altarocánënaca canÿe oyebuambnayana sënjanuena, mëntsá enjétsichamo: “Aíñe, Bëngbe Utabná, Bëngbe Bëtsá, nÿets obenana bomná condmëna, y ntšamo entsanga contsacastigacá, ndegombre y tšabá entsemna ca.”

<sup>8</sup> Chentsana, chë inÿe ángel chabe copbé shinÿiñe tonjanbuashcja; chë shinÿe corente tontsanobonÿaná y chíyeca entsángbioye íñesheca tontsanajuinÿé. <sup>9</sup> Y

nÿetscanga uabouancá juinÿnënga tmonjanoquedá; pero chënga ndoñe chemátanbošena bacna soyënga amana jtsajbanana, ni Bëngbe Bëtsabe benache jtishachana, ni chábioye quemëntétsatschuanaye, más chabe contra ba soyënga montsanichamo; cha nda obenana yobomna chëngbioye chë pochócaye soyënga jíchmuama, chënga chamosufrima.

<sup>10</sup> Chentsana chë inÿe ángel chabe copbé chë uabouana bayabe uámana puestiñe tonjanbuashcja, y nÿets chabe amëndayiñe ibetiñe tonjanoquedá. Chë entsanga bich-taja montsanenójantsnaye, yapa tsetše causa; <sup>11</sup> pero ni chca, chë entsanga chematanajbaná bacna soyënga jtsamana, ndayá chë yapa tsetšama y chë chëngbe cuerpiñe bacna nguayanana causa, chë celoca Bëngbe Bëtsabe contra ba soyënga montsanichamo.

<sup>12</sup> Chentsana chë inÿe ángel chabe copbé chë bëts fshájaye Eufrates ca uabáiniyiñe tonjanbuashcja y chë béjaye tontsanbuashjo, japróntama chë shinÿe bocanoica luarënguentsa reyënga y chëngbe soldadënga chëjana chámuachnëjnama.

<sup>13</sup> Atše sënjáninÿe, chë dragonbe uayáshoicana, chë uabouana bayabe uayáshoicana y chë ndoñe ndegombre Bëngbe Bëtsabe juabna oyebuambnayabe uayoicana tmonjánbocna unga bacna espíritënga; mo sapošëngcá monjétsinÿna. <sup>14</sup> Chënga monjamna bayëjëngbe espíritënga; bëts soyënga monjánama obenana jinÿanÿiyama, y montsanbocana nÿets luarentša reyënga jáchembuama, chë uámana te, ndayté Bëngbe Bëtsá, chë nÿets obenana bomná yochjabo entsangbiana jabáyanama ntšamo chënga tmojamama, chë te chënga chabe contra chamotsetsjama.

<sup>15</sup> Bëngbe Utabná Jesucristo mëntsá tojayana: “Smochjinÿe, atše nÿe ndeolpe chanjabo, mo canÿe atbëbanacá, chabiana ndocná tontsejuabná ora; chíyeca oyejuayënga mochántsemna atše jabama tmojtseprontanënga, mo nda tojtsefšna y chabe entsayá totsaboprontañacá, nÿe enasá ndoñe chaondëtsemnama, y entsanga chca tmojinÿe ora ndoñe chaondëtsëuatjama ca.” <sup>16</sup> Y chë bacna espíritëngna chë reyëngbioye tmonjanënatse canÿe luare, hebreuiñe Armagedón ca uabáinoye.

<sup>17</sup> Chentsana, chë ústonoye ángel chabe copbé quem luarentša tsbanánoca tonjanbuashcja, y chë celoca Bëngbe Bëtsabe bëts yebnentša uámana puestentšana canÿe jabuache oyebuambnayana tonjanóbocna, mëntsá enjétsichamo: “¡Chë jopásama enjamna soye ya tocjochnëngo ca!”

<sup>18</sup> Chora enjëtsemna tcuinÿënga, shauenanana y juesasanana, y quem luariñe tontsanangmëmmana, yapa jabuache quem luare tontsanëbanjó causa; quem luarentše

entsanga imobinÿna orscana, ndocna te nÿa chca quem luare tontsanëbanjó. <sup>19</sup> Chë puerte bëts pueblo úngañe tontsanojatá, y nÿets luarentša bëts públënga tontsanáshajaye, y Bëngbe Bëtsá tojanenojuabó chë puerte bëts Pueblama, Babilonia ca uabaina pueblama, chentša entsanga chë uabouana castigo chamotsebomnama, Bëngbe Bëtsá tša tbojánetna causa, tša bacna soyënga chentše tmojanmama. Y chca, chë chëngbe bëts pueblo úngañe tontsanojatá ora, cha chënga tonjanacastigá. <sup>20</sup> Mar béjayoca nÿetsca fshantsënga y quem luarentša nÿetsca tjañe tontsanenatjëmbe. <sup>21</sup> Celocana bëtsëtsa bëntstbenga entsángbeñe tonjantquécjana, chëbenga canta bnëtsana kilama más utbenga; y entsanga Bëngbe Bëtsabe contra ba soyënga tmonjánayana, er chënga tša montsansufrina chë bëts pochócaye bëntstá causa, y chë pochócaye bëntstá chëngbiana puerte jabuache castigo enjannama.

## 17

### *Chë puerte bacna vida bomna shembásabe castigo*

<sup>1</sup> Canÿa chë canÿsëfta angelënguentsá, chë canÿsëfta copbenga monjanatbënënguentsá, tonjánabo y šonjaniyana: “Mabo; cbochanjinÿinÿiye ntšamo yochtsemna chë puerte bacna vida bomna shembása, chë béjayënguiñe entsetbemanabe castigo. <sup>2</sup> Quem luarentša mandadënga cháftaca puerte bacna soyënga tmojama, y quem luarentša oyenënga puerte tmojóyejuanga chë cháftaca bacna soyënga amama, mo chë bacna vida bomna shembásabe vínoyeca puerte cuafjotmenangá ca.”

<sup>3</sup> Chentšana chë ángel, atše chë Uámana Espíritbeyeca corente mandaná jtsemnëse, šonjanánatse entsanga ndoyena luaroye. Choca sënjáninÿe canÿe shembása, canÿe uabouana buángana bayábeñe enjaquená; chë bayabe cuerpiñe nÿétsañe Bëngbe Bëtsabiama puerte bacá oyebuambnaye uabaina enjétsabemana, y enjánbomna canÿsëfta bestšaše y bnëtsana tsëtjonëse. <sup>4</sup> Chë shembása enjanichëtjona uámana shbuenda uafjatsenga y buángana entsayá, y entsanbotamana castellánoca, uámana botamana ndëtsëtëmëngaca y pérlica. Chabe cucuatšiñe canÿe castellano copbé enjétsatbëna, jútjena puerte uaboyënja soyëngaca, y chë boyabásengaftaca cha tojanma puerte bacna soyëngaca. <sup>5</sup> Y chabe juentsaca canÿe uabaina enjétsabemana, ndoñe josërta soye, mëntšá: “Chë puerte bëts pueblo Babilonia, tša bacna entsanga chentše, mo chë puerte bacna vida bomna shembásengbe bebmá cuaftsemncá; chentšana tojanóbocna quem luarentša nÿetsca puerte uaboyënja soyënga ca.” <sup>6</sup> Atše sënjáninÿe chë shembása tëmiá, er cha tojanofšé chë Bëngbe Bëtsábenga



imojamnëngbe buiñe, ndëmuanjengbioye tmojanëbaye Jesusbiana oyebuambnaye causa.

Chca sënjaninÿe ora, tša sënjanenjaná. <sup>7</sup> Chora chë ángel šonjaniyana: “¿Ndáyeca tcojenjaná ca? Atše cbochanjauyana ntšamo yojsayana chë shembása y chë chábioye bontsambá uabouana bayá, chë canÿsëfta bestšaše bomná y bnëtsana tsëtjonëše; chë soye ndocná quenátstatšëmbo. <sup>8</sup> Chë tconjinÿe uabouana bayá, tempo chca enjamna, pero mora ya ndoñe. Chë corente bëts tboicana cha echanjetsjuá, pero lempe pochocaná jtsemnama chca echántsaye. Quem luarentše oyenënga, ndëmuanjengbe uabaina quem luare jobojátšama orscana ndoñe yonduábemana, chë tšabe vida mochjónÿenëngbe uabaina iuábemana librëšañe, chënga mochanjenjaná, chë bayá chë tempo enjaniyená y mora ya ndoñe, pero cachiñe yochjésabama chamojinÿe ora.

<sup>9</sup> “Muentše canÿe soye entsemna chë chca josértama chamojobenangbiana: chë bayabe canÿsëfta bestšaše endmëna canÿsëfta tjañe ndayiñe chë shembása entsetbemana; chë bestšašëngnaca mondmëna canÿsëfta mandadënga. <sup>10</sup> Chentsana, shachnëngbe amëndayana ya tonjochnëngo, canÿa mora entsetbemana jtsamëndayama y chë inÿa cabá ndoñe tonjášhango. Y cha chaojášhango ora, ndoñe bënama cha queochaisemánda. <sup>11</sup> Chë tempo enjaniyena uabouana bayá pero mora ya ndoñe, endmëna chë canÿsëfta mandadënguentsana inÿe mandado, pero chánaca chë inÿe canÿsëftangcá endmëna y lempe pochocaná jtsemnama entsá.

<sup>12</sup> “Chë tconjinÿe bnëtsana tsëtjonëše mondmëna bnëtsana mandadënga, jamëndama cabá ndoñe tmonjójayenga; pero básefta tescama cánÿiñe chë uabouana bayáftaca, mando mo reyëngcá mochanjóyëngacñe. <sup>13</sup> Quem bnëtsanënga nÿetscanga cachcá mochántsejuabnaye, y chë uabouana bayábioye chëngbe obenana y mando mochanjátšetaye. <sup>14</sup> Chë Oveshatembe contra mochántsentsjanaye; pero chë Oveshatema echantsayëñaná, er chë Oveshatema endmëna nÿetsca amëndayëngbiana chë más uámana Utabná y nÿetsca reyëngbiana chë más uámana Rey. Chë bnëtsana mandadënga cháftaca mochántsentsjanaye ora, cha chentše chabe entsángaftaca cánÿiñe echántsemna. Chënga mondmëna chë cha tojáchembo y tojubuáyanënga y chábeñe sempre ošbuáchiyënga ca” —cha šonjaniyana.

<sup>15</sup> Chë ángel mëntšánaca šonjaniyana: “Chë tconjinÿe béjayënga, ndayiñe chë bacna vida bomna shembása entsetbemana, mondmëna nÿetsca canÿe luarentša entsanga, enutanana entsanga, nÿetsca biyañe oyebuambnayeñga

y nyetsca mándayëngbentša entsanga. <sup>16</sup> Y chë uabouana bayábeñe tcojinÿe bnëtsana tsëtjonëse y chë uabouana bayá, chë bacna vida bomna shembásabioye mochantsáboyënja; enašá cachcá mochanjesonÿaye; chabe cuerpentša mëntsena mochantsósañe y íñesheca mochántsejuinÿiye, chaopochocantscuana. <sup>17</sup> Bëngbe Bëtsá tojama chë bnëtsanënga ainaniñe tša chamotseboše, ntšamo cha yobošcá chamotsamama. Chca, chënga mochanjenóyeunaye chëngbe mando chë uabouana bayábioye jantšabuáchiyana, ntšamo Bëngbe Bëtsá tojayancá chaojopasantscuana. <sup>18</sup> Chë tconjinÿe shembása chë puerte bëts pueblo endmëna, chë ndayentša mandadënga nyets quem luarentša mandadëngbeñe mando mondbomna ca” —cha šonjaniyana.

## 18

### *Babilonia japochócoma*

<sup>1</sup> Chentšana inÿe ángel sënjáninÿe, celocana enjétsastjajuana, puerte obenana bomná, y chabe buashinÿinÿananaca nyets quem luariñe entsanbinÿna. <sup>2</sup> Chë ángel jabuache mëntšá enjétsichamo:

¡Ya mochantsepochoá, ya mochantsepochoá chë uámana pueblo Babilonia!

¡Chentše tojtsóbema diablëngbe oyeniñe,  
nyetsca bacna espíritëngbe oyeniñe,  
y ndoñe tšabe y uaboyënja shloftšëngbe oyeniñe!

<sup>3</sup> Er nyetsca quem luariñe mándayëngbentša entsanga puerte bacna soyënga tmojama chentša entsangbe causa, mo chë bacna vida bomna shembásaftaca bacna soyënga cuafjamcá,  
mo puerte cuafjotmenangcá chë bacna vida bomna shembásabe vínoyeca.

Nyetsca luarënguentša mandadënga puerte bacna soyënga tmojama,  
mo chë shembásaftaca bacna soye cuafjamcá,  
y quem luarentša obuámnañënga y enënga, bomnënga tmojobiama chentša entsanga yapa crocénana nÿe ndayíñnaca ntsejuabnaycá gástaye causa ca —cha enjétsichamo.

<sup>4</sup> Chentšana, celocana inÿe oyebuambnayana sënjanuena, mëntšá enjétsichamo:

¡Chë bëts pueblentšana maisebocana!, tšëngaftanga chë atšbe entšanga šmomnënga,  
chë chentša entšanga mondbëtsama bacna soyënga ndoñe chašmondëtsamama,

ni chë chëngbioye japochócama soyënga tšëngaftangbiama cach  
ndoñe chaondëtsemnama.

5 Chënga tša bacna soyënga tmojama, tša bëts cá nÿa mo  
celóntscoñe cuafjoutjecá,

y Bëngbe Bëtsá mora entsejuabná chënga tša puerte bacna  
soyënga tmojama causa, chë soyëngama jácastigama.

6 Ntšamo chentša entšanga ínÿengbiama ndoñe tšabá tmon-  
jamcá,

chë entšangbiámnaca cachcá chaotsemna;

ntšamo tmojamama, cabá uta soye más cachca soye  
chëngbiama chaotsemna;

ntšamo chentša entšanga ínÿenga chamosufrima tmojamcá,  
chëngnaca cachcá uta soye más chamosufrí.

7 Chënga corente jtšenábotamnayana y yapa crocénana nÿe  
ndayíñnaca ntsejuabnaycá jtsegástayana;

chë causa, chënga entsamna puerte jasúfriama y becá  
tsetšanana jtsebo mnama.

Er chëngbe ainaniñe mëntšá jtsejuabnayana:

“Muentše mo reyëngcá mondëtbiámana.

Viudacá ngménaca ndoñe quemuátsmëna; tondayama que-  
mochátssufrina ca.”

8 Chíyeca, canÿe ora pochócaye soyënga chëngbiama  
echanjóshjango:

jóbanama šocanënga, puerte ngménana y jabuache shëntsana,  
íñeshca lempe chëngbeñe echántsejuinÿe;

er Bëngbe Bëtsá corente obenana bomná endmëna,

Bëngbe Utabná chë chënga chca castigo chamotsebo mnama  
tojayaná ca —cha enjétsichamo.

9 Quem luarentša mandadënga, chentša entšángaftaca  
puerte bacna soyënga tmojamënga, y chëngaftaca nÿe  
ndayíñnaca yapa crocénana, ntsejuabnaycá tmojagastanga,  
mochanjošachna y puerte ngmenánaca mochántsemna, chë  
bëts pueblo chaojtsangbototjuanentša ngona chamojinÿe  
ora. 10 Chentšana bënoca mochanjoquéda antješna, chë  
uabouana castiguama auatja causa, y chentša entšangbiama  
mochanjayana:

¡Tša lastema, tša lastema tšëngaftanga chë uámana bëts  
pueblo, Babilonientše oyenëngbiama, chë tša obenana  
binÿnentše!

Canÿe ora tšëngaftangbe castigo tojóshjango ca —  
mochántsichamo.

11 Chë quem luarentša obuámnañënga y enëngnaca  
mochanjošachna y ngmenánaca mochántsemna chë  
pueblentša entšangbiama, er chora ya ndocná  
queochátsmëna chë chënga tmojúshjango soyënga  
chamobuámiñama: 12 tmojúshjango castellano soyënga,

midio soyënga, uámana y botamana ndëtšbenga, perlënga, uámana lino y shbuenda uafjatsenga entšayá y sedëjua y uámana uabuángana entšayá; nyetsca botamana uanguëtše betiyënga, marfiloca pormana soyënga, uámana niñšëngaca pormana soyënga, bronce soyënga, hierro y marmol soyënga; <sup>13</sup> bëtscá canela y inye botamana uanguëtše y tamna soyënga, botamana uanguëtše béjayënga, incienso y mirra; vínoye, aceitiye, uámana arninjá, trigo; bayënga ndayánaca uasmëmnyënga, oveshënga, couayënga, cochëshangá y entšanga nyets tempo nye inyabiama oservenëngnaca. <sup>14</sup> Y chë pueblentša entšangbiamama mochanjayana:

¡Chë tša cmonjanogúsetana jtsebomnana soyënga, mora ya ndoñe quešmátsbomna;

chë uámana y buashinýinýana soyënga y tša bomnana lempe šmojobuetše,

y ndocna te más cachca soye quešmochátsbomna ca!

<sup>15</sup> Chë soyënga enënga, chë bëtš pueblentša entšángbeyeca bomnënga tmojanobiamënga, bënoca mochanjoquéda antješna, chë bëtš pueblentša entšangbiamama tša bëtš castiguama auatja causa; mochanjošachna, puerte ngmenánaca mochántsemna. <sup>16</sup> Y mëntšá chentša entšangbiamama mochanjayana:

¡Tša lastema, tša lastema tšëngaftanga chë uámana bëtš pueblentše oyenëngbiamama!

Chë enjáninýna mo canye shembasacá, uámana lino entšëjua uichëtjoná,

uámana shbuenda uafjatsenga y uabuángana entšayá uichëtjoná,

botamananá castellánoca, perlënga y uámana botamana ndëtšbéngaca.

<sup>17</sup> ¡Y canye ora chabe tša bomnana lempe tojtsopochocá ca! —mochanjayana.

Nyetsca chë barquënguentša mándayënga, chentša entšanga inye luaroye ajnënga y chentša trabájayënga, y nyetscanga chë vida onguayíñe mar béjayoca trabájayëngnaca, chentšana bënoca mochanjoquéda antješna, <sup>18</sup> y chë bëtš pueblo chaojtsangbototjuanentša ngona chamojinye ora, jabuache mochanjayana: “¡Quem uámana bëtš pueblécá ndocna inye pueblo cachcá quenátsmëna ca!” <sup>19</sup> Chca chamojinye ora, ngménama bestšašíñe polvëshe mochántsenotboto, y mëntšá mochántseyona ošachiyënga y puerte cochtsetšenánënga:

¡Tša lastema, tša lastema tšëngaftanga chë uámana bëtš pueblentše oyenëngbiamama!

Chentša bomnánaca bomnënga tmojanobiamama nyetscanga chë mar béjayoca barco bomnënga.

¡Canÿe ora lempe tojtsopochocá ca! —chënga mochántseyona.

Chora chë ángel tonjánayana:

<sup>20</sup> ¡Celoca oyenënga móyejuanga

chë pueblo chca tojapasama;

y tsëngaftángnaca móyejuanga, Bëngbe Bëtsabe entšanga, Jesu-  
cristbe ichmónënga y Bëngbe Bëtsabe juabna oyebuamb-  
nayënga,

er chca jacastígase, Bëngbe Bëtsá tojama chënga chamo-  
sufrima,

ntšamo tsëngaftanga chašmosufrima chënga tmojanmcá ca! —  
cha tonjánayana.

<sup>21</sup> Chentšana, canÿe ángel puerta obenana bomná, canÿe  
ndëtsbé tonjanatsbaná, mo canÿe bëts nantsnëbé ndëtsbecá,  
mar béjayoye tonjanashbuetše y mëntsá tonjánayana:

Mëntsá, nÿe ndeolpe y jabuache, Babilonia chë uámana bëts  
pueblo mochántsetsatše,

y ndocna te más quem pueblo queochátsmëna.

<sup>22</sup> Chentše, ndocna te más quemochátuenana

arpangá uabuástoyana, ni cantayana, flautëfjënga y  
trompetëfjuangá cach ndoñe;

ndocna te más quemochátsmëna obrerënga,

ni chë nantsnëbeñe trabájayana quemochátuenana.

<sup>23</sup> Chentše, ndocna te más ndocna uajuinÿanësha  
queochátbinÿnaye,

ni casamento fiestentša enbouenanana quemochátuenana.

Er chë bëts pueblo chca mochantsepochóca,

masque chentša obuámnañënga y enënga nÿets quem luar-  
entše chë más bomnënga monjamna,

y chentša bocjuánaca nÿetsca luarënguentsa entšanga in-  
gñënga monjamna ca —cha tonjánayana.

<sup>24</sup> Bëngbe Bëtsá chca chë bëts pueblentše echanjama,  
er chentše tmojinÿena chë Bëngbe Bëtsabiamana trabájaye  
causa tmojanóbanëngbe buiñe; chë chabe juabna  
oyebuambnayënga, chabe entšanga, y chë chábioye  
oservënana nÿets quem luarentše tmojtsëbayëngbe buiñe.

## 19

<sup>1</sup> Chentšana celoca sënjanuena mo mallajta entšanga cuaft-  
sayebuachcá, mëntsá monjétsichamo:

¡Bëngbe Utabná matschuanga!

Bëngbe Bëtsá endmëna nda chabe entšanga tojatsebacá;  
cha puerta uámanana, buashinÿinÿana y mando endbomna,

<sup>2</sup> er ndayama cha tojayancá ndegombre jtsemnana,

y ntšamo tsábá chama tojtsemncá.

Cha chë uachuana bacna vida bomna shembásabioye tbojastigá.

Chë shembásabe puerte bacna soyënga causa, nyëts luarentša entsángnaca bacna soyënga tmojama.

Chábioye chca jacastigase,

Bëngbe Bëtsá tojama ntšamo jamama ibomerecencá,

chábioye oservénënga chë shembásabeyeca tmojóbana causa ca  
—chënga monjétsichamo.

<sup>3</sup> Y cachiñe mëntšá tmonjánayana:

¡Bëngbe Utabná matschuanga!

¡Chë bëts pueblo japochócama uangbototjuanentša ngona nyëtsca tescama chca echanjótjuaye ca!

<sup>4</sup> Y chora, chë uta bnëtsana y canta bëtsëjémënga amëndayënga y chë canta Ainënga tmonjanoshamentšé, y Bëngbe Bëtsá, chë uámana tbemanentše enjëtsetbemanabioye tmonjanadorá, mëntšá jayanëse: “¡Chca chaotsemna! ¡Bëngbe Utabná matschuanga ca!” <sup>5</sup> Y chë uámana puententšana canyë oyebuambnayana tonjanóbocna, mëntšá:

Bëngbe Bëtsá matschuanga, nyëtsca chabe oservénënga

y chë nyëtschangbiamna cha chë más uamaná yomnama juabnáyënga,

básënga y bëtsëtsanga ca.

### *Chë Oveshatembe casamento fiesta*

<sup>6</sup> Y sënjanuena mo mallajta entsangbe oyebuambnayancá, mo bëtscá béjaye cuaftsobonjnacá y mo bëts juesasanana shauenanancá; mëntšá monjétsichamo:

¡Bëngbe Utabná matschuanga!

Er Bëngbe Utabná, Bëngbe Bëtsá nyëts obenana bomná tojontšé jamándana.

<sup>7</sup> Puerte móyejuanga y mochjínyanýiye

Bëngbe Bëtsá puerte bëtsá y uamaná bëtsemnama,

er mora entsemna mo chë Oveshatembe casamento te cuafjoshjangcá;

chabe shema yochjabocná puerte tojtenobotamá;

<sup>8</sup> tmojalesenciá cha chauatíhëtjo uámana, nduatsënga uafjantse y uabuashinýinýana lino entsáyá.

Chë shema entsinýinýná chë Bëngbe Bëtsabe entsanga;

y chë lino entsáyá jtsichëtjonana entsinýinýná

chënga lempe ntšamo tšabá yomncá jtsamëse imoyëna ca —  
chënga monjétsichamo.

<sup>9</sup> Chentšana chë ángel šonjaniyana: “Mëntšá mábema: ‘Oyejuayënga chë Oveshatembe casamento fiestama ófjanënga ca.’”

Y mëntšanaca šonjaniyana: “Chca, ndegombre Bëngbe Bëtsabe palabrénga endmëna ca.”

<sup>10</sup> As chabe shecuatšentše sēnjanoshamentšé cha jadórama, pero cha šonjanianyana: “Ndoñe, átšeftaca ndoñe chca mátamana, er atše Bēngbe Bētsabe canye oservená sēndmēna, ntšamo aca condmēncá, y chē Crístbeyeca acbe catšátanga, ntšamo chabiana motatšēmbcá y chabe ndegombre palabrēnga n̄yets tempo imabuayiynganga mondmēncá. Aca cmontsemna Bēngbe Bētsá jadórama ca.”

Ndayá Jesús tojanma y tojanayancá, endama chē Bēngbe Bētsabe juabna oyebuambnayēnga chēngbe ainaniñe osertánana y añemo chamotsebomnama, chē soyēngama entšángbioye jábuayenama.

### *Chē fjantse couayiñe enjaquená*

<sup>11</sup> Chora sēnjánin̄ye celoca atēfjniñe; canye fjantse couaye enjētsemna y chē chábeñe enjaquená enjanabaina “Ntšamo tojašebuachenacá amá” y “Ndegombre oyebuambnayá ca”, er ntšamo tšabá yomncá cha tojanjuabó y tojanma entšángaftaca; y chca chabe uayayēngaftaca monjánentsjanaye.

<sup>12</sup> Chabe fšnēbenga mo iñeshcá enjánin̄yana, bestšašiñe ba uabuashin̄yinyana coronēshangá enjanábomna, y canye uabaina chábeñe enjanábemana; n̄ye cha chē uabaina yojanábuatma.

<sup>13</sup> Cha enjanichētjona buiñeca unētjona entšayá y chabe uabaina enjamna “Bēngbe Bētsabe palabra ca”.

<sup>14</sup> Y chabe ústonoye monjétsajna mallajta soldadēnga celoquēnga, nduatsenga uafjantse y uámana lino entšayá uichētjonēnga, fjantse couayēnguiñe enjaquenēnga.

<sup>15</sup> Chē enjētsebnatsanabe uayoicana enjanóbocana canye puerta efšana espadēja, chē Bēngbe Bētsabeñe ndošbuáchiyēnga játatsetšama. Cha puerta obenánaca echántsamēndaye, mo canye hierro varēfjaquécá. Cha echanjama entšángaftaca mo nda uvasēšangá juantšētetjiana tojtsabotajná ora cuafjamcá; y echanjama chēnga chamotsebomnama chē puerta uabouana castigo, Bēngbe Bētsá chē n̄yets obenana bomná tbojetna causa.

<sup>16</sup> Chabe uabonjaníyañe y chabe mēntjoca canye uabaina enjanábemana: “N̄yetsca reyēngbiama chē más uámana Rey, y n̄yetsca amēndayēngbiama chē más uámana Utabná ca”.

<sup>17</sup> Chentšana canye ángel sēnjánin̄ye, shin̄yiñe enjétsatsana, chē celoca tsbanánoca n̄yetsca monjanongüefjná shloftšēnga jabuache mēntšá enjétsētsētsnaye: “¡Mabēnga, menefjna chē Bēngbe Bētsá tojaprontá bēts saná jasama; <sup>18</sup> chašmosama reyēngbe mēntšena, soldadēnga amēndayēngbe mēntšena y valente entšangbe mēntšena, couayēnga y chēngbeñe enjaquenēngbe mēntšena, y n̄yetsca entšangbe mēntšena, cachēngbiama trabájayēnga y n̄ye ín̄yabiana n̄yets tempo trabájayēnga, básesenga y bētsétsanga ca!”

19 Chora atše sēnjáninýe chē uabouana bayá y quem luarentša reyēnga chēngbe soldadēngaftaca tmojánenefjna, chē fjantse couayiñe enjaquená y chabe soldadēngaftaca jéntsjava. 20 Chē uabouana bayá tmonjanotbá, y cháftaca chē Bēngbe Bētsabe ndoñe ndegombre juabna oyebuamb-nayá, chē bayabe delante ba bēts soyēnga tonjanmá obenana jinýanýiyama; y cha chē soyēngaca tojanaingñé chē uabouana bayabe uinýnanana soye chamuayentšjajoma tmojanlesencianga, y chē chábioye jadórama pormana soye adórayēnga. Y chē útatbioyna ainata tmontsanatmetše chē íñesheca uaf-jajónayoye, chē azufre endējuinýinýanentše. 21 Chē ínýengbioyna tmontsanapochocá chē fjantse couayiñe enjaquenabe uayoicana enjanóbocana espadējaca, y nyetsca shloftšēnga chēngbe mēntšénaca yapa tmontanoshachá.

## 20

### *Chē uaranga uata*

1 Chentšana canýe ángel sēnjáninýe celocana entsanast-jajuana chē corente asentoye tboca llavēfjaca, y canýe bēts cadenējua entsanētbena. 2 Chē ángel tbontsantbá chē dragónbioye, chē tempsca mētšcuaye, chē Diablo y Satanás endmēná, y canýe uaranga uatama tbontsanbátsēca. 3 Chē corente asentoye tboye tbontsantsatše, chentše tbontsanētame, y chentše bēšáša tsengájašēca tonjaninýnaná, ndotatšēmbcá jatēfjuama ndocná chaondobenama; y chca, chē dragón ndoñe chaondobená jabocnama entšanga jáingñama, chē uaranga uata candochñēnguēntscuana; y chora, básefta tescama chē dragón mochanjētsboshjona.

4 Uámana puestēnga sēnjáninýe, y chiñe tmonjanotbiama chē entšanga tšabá o ndoñe tšabá tmonjamama jayanama obenana tmojanóyēngacñēnga. Chē bestšaše jtsēstjanguēse tmojanóbanēngbe espíritēngnaca sēnjánanýe. Chēnga chca tmojanóbana, Jesús tojánayana soyēnguiñe y chē Bēngbe Bētsabe buayenana soyēnguiñe sempre ošbuáchiye causa. Chēnga ndoñe tmonjanadorá ni chē uabouana bayá, ni chē chábioye jadórama pormana soye, y ndoñe tmonjanlesenciá chē bayabe uinýnanana soye juentsaca o cucuatšínē chamuayentšjajoma. Y sēnjáninýe chēngna tmontanayena y Crístoftaca canýe uaranga uatama montsanmánda. 5 Chē entšanga mondmēna chē natsanēnga jtayenama, pero chē tempo chē inýe obanēnga ndoñe chemēntētayanayena, ndayá nýe chē canýe uaranga uata chentšana. 6 ¡Oyejuayēnga y Bēngbe Bētsabe entšanga, chē tmojtayanenēnga chē obanēnga chámuatayenama Bēngbe Bētsá tojanma ora! Chēnga ndoñe quenátamna chē nyetsca tescama castigo jtsebomnana, ndayá Bēngbe Bētsá y Crístbioye



mo bachnangcá chënga mochántseservena, y Crísoftaca chë uaranga uatama mochántsemundaye.

*Satanás japochócamá*

<sup>7</sup> Chë uaranga uata chaojochnëngo ora, Satanás chabe utámenocana mochanjétsboshjona; <sup>8</sup> y cha echanjábocna nyets luarentša entsángbioye, chë Bëngbe Bëtsabe soyëngama contra imomnëngbioye jáingñama, chë ntšamo Bëngbe Bëtsabe contra Gog y Magog tempo ibojamncá imomnënga. Satanás, chë entsanga echanjáchembo Bëngbe Bëtsabe contra jéntsjava, y tša chëftanga cha echanjáchembo, nya mo chë mar béjaye chënyoca cascajá mochántsemna.

<sup>9</sup> Chënga nyetscanga nyets luarëjana mochanjátsjua, y chë Bëngbe Bëtsabe entsanga oyenentše y chabe bonshana entsangbe bëts pueblo shëconana mochanjotsaye. Pero celocana iñe echanjatquécjana y chë Bëngbe Bëtsabe contra imomnënga lempe echántsjuinye. <sup>10</sup> Y Satanás, chë aingñayá, mochántsatmetše chë iñeshe y azúfrecá uafjajónayoye, ndayentše chë uabouana bayá y chë Bëngbe Bëtsabe ndoñe ndegombre juabna oyebuambnayá tmontsanatmetše. Chentše bëts castigo nyets tempo, bnëtë y ibeta mochanjasufrina.

*Chë obanëngbiamá tmonjánayana ntšamo chëngaftaca jamama yojtsemnana*

<sup>11</sup> Chentšana sënjáninye canye bëts uámana fjantse puesto jamándama y nda chiñe enjetsetbemaná. Celoca y quem luare chabe delante lempe tonjanenatjëmbe, y ndócnentše más chenatanobinyná. <sup>12</sup> Y chë obanënga sënjánanye, bëtsëtsanga y básesenga, chë uámana puestentša natsanoica monjétsatsana; y chë librëšangá tmonjanëtëfjo, y inye librëšanaca, ndëmuanyënga nyetsca tescama tšabe vida mochjónyëngbe uabaina uabemana librëša. Chë obanëngbiamá tmonjánayana ntšamo chëngaftaca jamama yojtsemnana, cachënga vida imojábomna ora ntšamo tmojëftsema soyëngaca, ntšamo chë librëšangañe yojanabemancá. <sup>13</sup> Chë mar béjayoye tmojanóbanënga choicana tmontanbocna, y chë obanënga tmojanoquedanga luarënguentshana tmontanbocna, y cada cánjábiamá tmonjánayana ntšamo cháftaca jamama yojtsemnana, cachënga vida imojábomna ora ntšamo tmojëftsema soyëngaca. <sup>14</sup> Chentšana ya ndoñe más obenana quentëtsemna entsanga chamóbanama chaomama, mo chë obenana chë iñesheca uafjajónayoye cuaftsëtsencá; quem iñesheca uafjajónayoye endmëna chë nyetsca tescama castigo jtsebmnama luare; chë choca castigánënga jtsamnana yojtsamnëngbiamá entsemna mo chënga

cachiñe cuafjatobancá; <sup>15</sup> y ndëmuanjengbe uabaina chë tšabe vida mochjónjengbe uabaina iuábemana librëšañe ndoñe yonjanabemana, chë iñsheca uafjónayoye tmontsanatmetše.

## 21

### *Celoca tsmiñe y fshantse tsmiñe*

<sup>1</sup> Chentšana atše sënjaninje canje celoca tsmiñe y canje fshantse tsmiñe, ndoñe ntšamo tempo enjamncá, er chë tempo enjamna celoca y fshantse chora ya ndoñe quentétsemna, y chë mar béjaye chora cach tondaye. <sup>2</sup> Sënjaninje chë “uámana ca” uabaina bëts pueblo, chë tsëm bëts pueblo Jerusalén, Bëngbe Bëtsábiocana celocana enjétsostjajuana, puerte botamaniñe, mo canje shembása puerte botamananacá, chabe boyá jábocnabiana. <sup>3</sup> Y chora canje jabuache oyebuambnayana Bëngbe Bëtsabe uámana puestentšana sënjanuena, mëntšá: “Mouena. Bëngbe Bëtsá entšangaftaca echántsemna y cha chëngbeñe echantsiyena. Chënga chabe entšanga mochántsemna, cach Bëngbe Bëtsá chëngaftaca echántsemna, y cha chëngbe Bëtsá echántsemna. <sup>4</sup> Cha echanjama chënga ndocna te más ngménënga chamondëtsemnama, y ndoñe más chamondóbanama, ndoñe más chamondošachema, ni ngménaca ndoñe chamondëtsóyebuambnama y ndoñe más tsetšanana chamondëtsebomnama; er ntšamo chënga entšangcá fshantsoca tempo imojëftsiyena ora enjamncá, chora ya ndoñe chca queochátsmëna ca.”

<sup>5</sup> Chë uámana puestentše enjantbemaná šonjaniyana: “Atše lempe mo tsëm soyëngcá sëndbama ca.” Y mëntšánaca tonjánayana: “Chë soyënga mábema, er chë palabrënga endmëna ntšamo ndegombre yomncá, y nyetscanga mondobena chiñe corente jtsošbuáchiyana ca.”

<sup>6</sup> Chentšana šonjaniyana: “Lempe tonjochnëngo. Atše sëndmëna chë nyetsca soyënga bojatsayá y pochocayá, chë natšaná y chë ustonoyá. Mo nda tša uajuendayana tojtsebomná canje béjaye fshantsiñe obocanentšana cuafjofšecá, cachcá nda tša tojtseboše atšbe soyënga jtsebomnama, atše chanjama cha chë soyënga chaotsebomnama, y chë nyetsca tescama yomna tšabe vídnaca, chca jtsebomnama chábioye tondaye ntstjañcá. <sup>7</sup> Nda nyetsca soyënguentšana tšabá chaojabocná mo ayëñjanayacá, lempe echanjóyëngacñe ntšamo atšbe entšangbioye jatšatayama tijašebuachenacá, y atše chabe Bëtsá chántsemna y cha atšbe uaquiñá. <sup>8</sup> Pero chë auatja causa Crístbioye ndoñe mondëservénënga, chábeñe ndošbuáchiyënga, chë bacna soyënga causa Bëngbe Bëtsabiana puerte

uaboyénjanënga imomnënga, chë ínÿengbioye obánayënga, chë shembása o boyabásaftaca bacna soye amënga, chë bocjuana soyënga amënga, chë soyënga adórayënga diosënga yomna ca jtsejuabnayëse, y nÿetscanga bosterënga imomnëngbiamna, chënga entsamna chë íñesheca uafjajónayoca jasúfriana, chë azufre yojuínÿinÿanentše. Chentše puerte castigánënga sempre mochanjëftsemna, mo uta soyama cuafjobancá ca.”

### *Chë tsëm bëts pueblo Jerusalén*

<sup>9</sup> Chentšana canÿa chë angelënguentsá, chë canÿsëfta copbenga bomnënga jútjena chë canÿsëfta ústonoye pochócaye soyëngaca, átšbioye tonjánabo y šonjaniyana: “Mabo, cbochanjinÿinÿiye chë tojobouamá shembása, chë Oveshatembe shema ca.” <sup>10</sup> Y atše chë Uámana Espíritoftaca corente mandaná jtsemnëse, chë ángel šonjanánatse canÿe bëts y tsbanana tjoye, y šonjaninÿinÿé chë tsëm bëts pueblo Jerusalén, chë “uámana ca” uabaina pueblo, celocana Bëngbe Bëtsábicana enjëtsostjajuana. <sup>11</sup> Chë bëts pueblo enjëtsebuashinÿinÿana Bëngbe Bëtsabe buashinÿinÿanánaca; enjëtsebuashinÿinÿana mo canÿe uámana botamana ndëtsbecá, mo jaspe ndëtsbecá, pero mo cristalca tëshínÿniñe. <sup>12</sup> Chë bëts pueblo shëconana canÿe bëts y tsbanana tapiëse enjamna, chë tapiësiñe bnëtsana uta bëshashangá y cada bëshashentše canÿe ángel, y chë bëshashangañe enjanábemana chë Israeloca bnëtsana uta bëts pamíllangbe uabaina. <sup>13</sup> Shinÿe bocanoica unga bëshashangá, shinÿe uenatjëmbambanoica ungashá, tsjuanoica unga bëshashangá, y tsmanoica ungashá. <sup>14</sup> Chë tapiëse enjanécuatjona bnëtsana uta ndëtsbenguiñe, y chëbenguiñe enjanábemana Jesucristo chë Oveshatembe bnëtsana uta ichmónëngbe uabaina.

<sup>15</sup> Chë ángel átšeftaca oyebuambnayá canÿe castellano juinÿnanëšëfja enjánatbëna jamedídama chë bëts pueblo, chentša bëshashangá y chentša tapiëse. <sup>16</sup> Chë bëts pueblo cach medida enjánbomna nÿets cantoica, cach medida tëntsoye y nÿanëjoye. Chë ángel chabe juinÿnanëšëfjaca chë bëts pueblo tonjanmedidá: enjánbomna uta uaranga y uta patse kilómetrënga; tëntsoye, tsbanánoye y nÿanëjoye cach medida enjánbomna. <sup>17</sup> Chentšana chë tapiëse tonjanmedidá, enjánbomna chnënguana bnëtsana y shachna metrënga; ntšamo entsanga chca soyënga jamedídama mondëtatšëmbcá chë ángel tonjanmedidá.

<sup>18</sup> Chë tapiëse enjanpormana jaspe ndëtsbeca, y chë bëts pueblo ena castellanoca, tša chca nÿa mo cristalca tëshínÿniñe enjáninÿna. <sup>19</sup> Chë ndëtsbenga ndayiñe chë tapiëse enjanécuatjona enjánbotamanana nÿetsca uámana botamana

ndëtsbéngaca: canyebé jaspe ndëtsbeca, chë inyebé zafíroca, chë inyebé ágata ndëtsbeca, chë inyebé esmeráldaca, <sup>20</sup> chë inyebé ónice ndëtsbeca, chë inyebé cornalina ndëtsbeca, chë inyebé crisólito ndëtsbeca, chë inyebé berilo ndëtsbeca, chë inyebé topácioca, chë inyebé crisoprasa ndëtsbeca, chë inyebé jacíntoca y chë inyebena amatista ndëtsbeca. <sup>21</sup> Chë bnëtsana uta bëshashangá enjuamna bnëtsana uta perlënga; cada bëshásha nýe canýe pérlica uapormanëshá. Y chë más bëts tsáshenëjana enjamna ena castellánoca; mo cristalcá tëshínýniñe enjáninýna.

<sup>22</sup> Chë bëts pueblentse ndocna Bëngbe Bëtsabe bëts yebna chiyátaninýe, er Bëngbe Utabná, chë Bëngbe Bëtsá nýets obenana bomná y chë Oveshatema chentse bonjamna, y chata nýetscangbiana chë bëts pueblentse ndayéntsñaca adoránata bonjétsemma. <sup>23</sup> Chë bëts pueblentse ndoñe quenjatsiyta shinýe o juashcona chaotsebínýnaye, er Bëngbe Bëtsabe buashinýinýanana chentse enjétsebinýnaye, y chë Oveshatembe buashinýinýanana mo uajuinýanëshacá enjamna chë bëts pueblama. <sup>24</sup> Chentša binýnayánaca, entsanga nýetsca mándayëngbentse mochantsiyena, y quem luarentša mandadënga chëngbe uámana y bëts soyënga chë bëts puebloye mochanjiyëbo. <sup>25</sup> Chë bëts pueblentša bëshashangá ndocna te quemochtétatame, y chentse ndocna ora ibeta queochátsmëna. <sup>26</sup> Chë bëts puebloye mochanjiyëbo chë nýetsca luarënguentsha entsangbe uámana y bëts soyënga, y chë nýetsca luarënguentsha entsángbeñe bëtsétsanga y uámanënga iuabiamná soyëngnaca. <sup>27</sup> Pero ndocna te queochatómashëngo ndayánaca, y chë soye chaotsama entsanga ndoñe tsábenga chamotsemnana Bëngbe Bëtsá jadórama; ni ndocná queochátamashëngo, Bëngbe Bëtsabiama nýa tondayama ogustana soyënga amá o ínýengbloye jáingñama soyënga amá. Choye mochanjámashjna nýe chë ndëmuanýengbe uabaina yojtsábemana chë Oveshatembe librësháñe, chë nýetsca tescama tsabe vida mochjónýenëngbe uabaina uábemanentse.

## 22

<sup>1</sup> Chë ángel šonjaninýinýé chë enjanobëjna bójaye vida bomniye. Chë búyeshe enjamna ndëtsenguiye y tëshínýniye mo cristalcá. Enjanóbocana chë Bëngbe Bëtsá y chë Oveshatembe uámana puestocana, <sup>2</sup> y chë más bëts tsashená tsëntsajana enjanobëjna. Chë fshajayentsha catoica lado enjanójuajna betiyeshënga chë nýetsca tescama yomna tsabe vida jtsebomnana, canýe uatiñe bnëtsana uta soye jashájonana, canýe cada shinýe; chë betiyeshentsha

tsbuanáchënga josérviana nyetsca mándayëngbentša entšanga jáshnama. <sup>3</sup> Choca ndocna soye queochátsmëna chë ndayama Bëngbe Bëtsá tojayana ndoñe tšabá yondmëna ca, y ndaye bacna soye japásama chaotsemna soye. Chë Bëngbe Bëtsá y chë Oveshatembe uámana puesto chë bëts pueblentše echántsemna, y chatbe oservénënga mochántadorana. <sup>4</sup> Chënga mochanjinÿe Bëngbe Bëtsabe jubiá, y chabe uabaina chëngbe juentsaca mochantsambaye. <sup>5</sup> Chentše ndocna ora ibeta queochátsmëna, y chentša oyenënga ndoñe queochátëjaboto canÿe uajuinÿanësha o shinÿe chaotsebínÿnaye, er Bëngbe Bëtsá Bëngbe Utabnabe buashinÿinÿanana chëngbiamá echantsebínÿnaye, y chënga mochántsemna mo reyëngcá uámanënga, y Bëngbe Bëtsáftaca nyetsca tescama mochántsemandaye.

### *Jesucristo jésabama entsobeco*

<sup>6</sup> Chentsana chë ángel šonjaniyana: “Quem palabrënga endmëna ntšamo ndegombre yomncá, y nyetscanga mondobena chiñe corente jtsošbuáchiyana. Bëngbe Utabná, cach Bëngbe Bëtsá, nda endbama chabe juabna oyebuambnayënga, chëngbe ainaniñe osertánana y añemo chamotsebomnama jóyebuambayama, chabe ángel tbojichmó chabe oservénëngbioye jinÿanÿiyama ndayá betscó yojtsemna jopásama ca.”

<sup>7</sup> Chora Jesús tonjánayana: “Mouena. ¡Atše cachiñe betscó chanjésabo! Oyejuayá nda quem buayenana soyënga, ntšamo ndegombre jopásama, chë Bëngbe Bëtsabe juábnaca oyebuambana soye tojoyeuná, chë ndayama quem librëšañe entsábemana ca.”

<sup>8</sup> Atše Juan, chë soyënga sënjanuena y sënjáninÿe. Y chca sënjanuena y sënjaninÿentšana, chë chca šonjaninÿinÿé ángelbe delante atše sënjanoshamentšé, cha jadórama. <sup>9</sup> Pero cha šonjaniyana: “Ndoñe, átšeftaca ndoñe chca mátamana, er atše canÿe Bëngbe Bëtsabe oservená sëndmëna, ntšamo aca condmëncá, y ntšamo chë Crístbeyeca acbe catšátanga, chë Bëngbe Bëtsabe juabna oyebuambnayënga y nyetscanga chë ndayá quem librëšañe endayanama tmojóyeunanga mondmëncá. Aca cmontsemna Bëngbe Bëtsá jadórama ca.”

<sup>10</sup> Chora mëntsánaca šonjaniyana: “Ndoñe mo iytëmencá catjáboshjona ndayá quem librëšañe entsabemancá, chë ndegombre jochnënguama soyënga, er chca jopásama chë tempo ya entsobeco. <sup>11</sup> Cachcá monÿá chë bacna entšá bacna soyënga chaotsama; chë puerte bacna soyënguiñe jtsiyenama bošá, cachca soyënga chaotsama; pero chë tšábiana ntšamo tšabá yomncá chaotsama, y chë Bëngbe Bëtsabe entšá, nyets

tempo nyets ainánaca chábioye chabotseservena ca” —cha šonjaniyana.

<sup>12</sup> Chora Jesús cachiñe tonjánayana: “Mouena. Atše quem luaroye betesco chanjésabo, y átšeftaca chanjiyëbo chë uacanana soye, y cada ona tšëngaftanguentšábioye chanjoyiye ndayá tojamama ntšamo tbojtsomerecencá. <sup>13</sup> Atše sëndmëna chë nyetsca soyënga bojatsáyá y pochocayá, chë natsaná y ustonoyá, chë ndábeyeca y ndabiama lempe yomna ca” — šonjaniyana.

<sup>14</sup> Oyejuayënga chë bacna soyëngama perdonánënga imojtsemnënga, mo chënga chëngbe entsáyá botamana cuaftsaboshabecá. Chca chënga mochantsobena chë nyetsca tescama yomna tšabe vida jtsebomnama uacanánana jashjáchama, mo chë nyetsca tescama yomna tšabe vida jtsebomnama betiyeshentsana cuaftsesacá, y mochanjobenaye chë tsëm bëts puebloye bëshásajana tšabá jamashjnama. <sup>15</sup> Pero ndoñe quemochatobenaye jamashjnana chë ba ndoñe tšabe juabnënga ainaniñe bomnënga, chë bocjuanënga, chë shembása o boyabásaftaca bacna soye amënga, chë inyënga obánayënga, chë soyënga adórayënga diosënga yomna ca jtsejuabnayëse, y nyetscanga chë bostero soyënga ogusetánënga y chca jtsamëse oyenënga.

<sup>16</sup> Chora Jesús cachiñe tonjánayana: “Atše Jesús, atšbe ángel tijichmó chë ntšamo atše sëntsejuabnacá ndayenache ošbuachiyëngcá enefjuanëngbioye lempe chámabuayenama. Atše sëndmëna chë Rey Davidbentsana Entšá. Atše sëndmëna mo chë bínyanoye puerta bínñayeye estrellcá ca.”

<sup>17</sup> Chë Uámana Espíritu y chë Oveshatembe shema bondbëtsichamo: “¡Mabo ca!” Y nda chca chaojouená cháuyana: “¡Mabo ca!” Y mo nda tša uajuendayana tojtsebomna, tojabo y bëtscá bėjaye cuafofšecá, cachcá nda tša tojtseboše Jesusbe soyënga jtsebomnama, chábioye chaobeconá y cha echanjama chë soyënga cha chaotsebomnama y chë nyetsca tescama yomna tšabe vídnaca, chca jtsebomnama tondaye ntsotjañcá.

<sup>18</sup> Nyetscanga ntšamo quem librëšañe entsabemancá, chë ndegombre echanjopásama chamojouenëngbioye šcuabuayená. Nderado nda chë soyëngama más chaojaboté, Bëngbe Bëtsá echanjama cha chaosufrí chë quem librëšañe entsábemana pochócaye soyënga. <sup>19</sup> Y nderado nda ntšamo quem librëšañe entsabemancá, chë ndegombre echanjopásama soyënguiñe ndayánaca tojajuaná, Bëngbe Bëtsá chábioye bochantsebojuána ntšamo chabiama yomncá chë nyetsca tescama yomna tšabe vida jtsebomnama

betiyeshentšana y chë tsëm bëts pueblentšana, chë ndayama quem librëšana entsábemana.

<sup>20</sup> Quem soyënga oyebuambnayá, chë lempe ndegombre echantsemnama tonjayaná, atše, Jesús sentsichamo: “Aíñe, betesco chanjésabo ca.”

Chca chaotsemna. ¡Cochjabo, Bëngbe Utabná Jesús!

<sup>21</sup> Bëngbe Utabná Jesús chaoma tsabe bendicionënga tsëngaftangbeñe chaotsemnama.